






1623/c

BORMANNUS, Petrus. the other.







773/3

SYLLOGES
EPISTOLARUM

A
VIRIS ILLUSTRIBUS
SCRIPTARUM

TOMUS. V.

QUO
NICOLAI HEINSII

ET
VIRORUM ERUDITORUM, IN SUECIA, GERMANIA,
BELGIO, ITALIA, ET GALLIA

EPISTOLAE.

MUTUAE

ET
NIC. HEINSII

AD
CHRISTINAM AUGUSTAM REGINAM SUECIAE

CONTINENTUR.

DENIQUE INDICES QUATUOR IN OMNES
TOMOS SUBJICIUNTUR.

YALOGES
FISTOLARUM

VIRIS ILLUSTRIUS

SCIENTIAM

TOMOS. IV.

1609

NICOLAUS HEINSIUS

ET

PROFESSOR HISTORIAE NATURALIS, IN ACADEMIA GYMNASIO

BRUNSVIGIENSIS, ET GYMNASII

FISTOLARUM

MUTUM

ET

NICOLAUS HEINSIUS

ET

PROFESSOR HISTORIAE NATURALIS, IN ACADEMIA GYMNASIO

BRUNSVIGIENSIS, ET GYMNASII

BRUNSVIGIENSIS, ET GYMNASII

BRUNSVIGIENSIS, ET GYMNASII



JOHANNIS SCHEFFERI

ET

NICOLAI HEINSII

EPISTOLAE.

MUTUAE.

EPISTOLA I.

JOH. SCHEFFERUS

*Nic. Heinsio.**Leidam.*

ON possum non gratissima memoria subinde mecum recolere id tempus, quo me praesentem vel hîc, vel Holmiae humanissimis tuis colloquiis beare non es dedignatus. Etsi enim in me nihil sit, quo conciliare mihi magnorum virorum amicitiam possim, abunde tamen tua illa erga quosvis artium bonarum cupidos propensa voluntas supplevit, quod desiderari poterat. Qua etiam nunc fretus tibi scribo, simul atque quae de subsidiis istis ad rem Navalem Roma petendis benigne es pollicitus, in memoriam tibi revoco, oroque, ut, si absque molestia tua fieri possit, mihi ea compares. Indicatum mihi nuper est, te nescio quae *Pyrrhi Ligorii* (nisi fallor) pro me curasse exscribi. Scire igitur velim, an res ita sese habeat, & a quo, quaque ratione petere id possim. Nam horum nihil apud nostros explorare potui. Ignosce, quaeso, vir optime, confidentiae meae, & si ita videtur, rescribe. Nobilissimum Parentem tuum, virum vere Maximum, ex me diligenter velim salutari, sicut & *Boxhornium*, e cujus animo nomen nostrum, etsi post tot annos, quibus ei primum coepi innotescere, tamen nondum penitus deletum existimo. Vale. Dabam Ubsaliae 17. Julii MDCLII.

*Joh. Scheffero.**Upsaliam.*

Singularibus tuis meritis, vir Clarissime in rem litterariam fit, ut consuetudinis ac familiaritatis vinculo arctiori tibi adstringi exoptem, cujus nodo jampridem me illigatum tenes, ex quo ante septennium Upsaliae nonnunquam te compellare mihi obtigit. Ex eo constantissimus virtutum tuarum cultus pertinaciter huic animo inhaesit, atque inhaerebit porro ad extremum vitae diem. Quare, cum publico Procerum nostrorum mandato sedem denuo figere sum jussus in aula Suecica, majori beneficio me cumulare non potes, quam si hospitem te mihi praebeas, ac apud me divertas, quotiescunque aut privata negotia aut Academiae publica te evocabunt. Quod sine fuco ac fallaciis dictum, quaeso, interpretare & boni consule. Lautiora enim alibi hospitia facile invenias; non tamen ulla, quae te libentius sint exceptura. Mitto interim nonnihil hinc nugarum mearum, nuperrime ex patria allatum, & me absente in lucem protractum. Quod secundis curis aliquanto ornatius politiusque mox praestabo, si otium continget. Meae sunt in Pub. Ovidium castigationes, quarum alterum exemplar tibi a me destinatum est, alterum eximio viro¹ Socero tuo. Ab eodem cum ante septennium utendos acceperam libros duos, non mihi, sed illustrissimo regni hujus Cancellario *Erico Oxenstierniae*, qui eos inspectos sibi unice cupiebat; non sine summo rubore meo inter manus ejus uterque codex periit. Certe cum identidem repeterentur, non sunt redditi. Alter librorum *Cambdeni* Britanniam complectebatur, alter *Elisabetham*, si recte memini. Utrumque ex patria advexi, quos cum Nasone accipies, clarissimo Socero tuo tradendos. Mallem profecto ipsa, quae utenda mihi dedit, reddidisse exemplaria, hoc quia non possum, simillima iis nunc reddo. Amicissimus *Gronovius* plurimam salutem tibi dicit, cujus Senecam Tragicum in dies expecto. Vale, vir Clarissime. dabam festina manu Holmiae Suecorum Anno *ciciciclx*. ad di. *xxii*. Augusti Juliani.

¹ *Johanni Loetenio*, J. U. D. Historiarum & Eloquentiae, mox Juris Professore, & Historiographo Regio & Bibliothecario Academiae Upsaliensis, & deinde Regii collegii Antiquitatum Praefidi. Vide *Schefferum* de Scriptoribus Suecis pag. 175. Edit. *Moller*, & Epist. *Heinsii* ad *Gronovium* Tom. I. 199.

EPISTOLA III.

JOH. SCHEFFERUS

*Nic. Heinsio.**Holmiam.*

FRustra diu verba quaero, Domine, ut humanissimis tuis litteris respondeam. Videlicet inexpectata omnia, meritumque meum longe supergressa comprehendunt. Animum favoris ac benevolentiae erga me plenissimum; familiaritatis & hospitii jucundissimam pollicitationem. Accedit industriae judiciiique summi opus tuum, quo, qui olim pannis & quisquiliis ineptorum hominum erat inductus, nec praeter nomen praeferebat sui quicquam, restitutus nunc Ovidius integritati nitorique pristino legentium cunctorum oculis animisque se commendat. Pro quibus omnibus singulisque, quas tibi debeam gratias, intelligo, quas agam, invenire nequeo. Quanquam autem omnem loquendi facultatem mihi eripuerit meritorum tuorum magnitudo, quantam tamen possum operam impendam, ut ne penitus benevolentiae tuae indignus deprehendar; totque beneficia perpetua memoria servare ac recolere haud desinam. Interim tibi, Domine, gratulor ex animo splendidissimum munus, tuae nuper fidei prudentiaeque commissum, oroque Deum, ut, quod augurantur alii, ego firmiter persuasum habeo, humanitate ac dexteritate tua vetus illud inter Regnum hoc Rempublicamque vestram amicitiae vinculum firmetur, ac in commoda utriusque populi fervetur integrum quamdiutissime. Socero meo tradidi, quod mandasti; agit is tibi gratias maximas, sicut amplius ex litteris ipsius liquebit. Clarissimi & mihi amicissimi viri, Domini *Gronovii* Senecam, cujus mihi spem in nuperis fecit litteris, impatienter exspecto. Ipsum perofficiose, cum se offerat occasio, resalutari cupio, hocque officium, nisi grave est, ab humanitate tua oro. Vale, vir Illust. Nobilissimeque, coeptumque favorem tuum porro erga me servare perge. Upsaliae 3. Septemb. Anno MDCLXI.

EPISTOLA IV.

JOH. SCHEFFERUS

*Nic. Heinsio.**Holmiam.*

TU vero, quod optavi semper, nuper verò abs te petii, me amare pergis. Conatus meos, quamvis exiguos, placere tibi testaris, nec verbis modo, sed ut re ipsa juvare ac promovere quaeris. Pertinet huc cura tua singularis in comparandis mihi eis, quae ad Phaedrum aut Mauritium videntur esse necessaria. Ceteros quoque libros tuos, optimos rarissimosque offers. Quibus sane rebus nihil mihi esse potest vel utilius, vel gratius. Scilicet in mundi quodam velut angulo hinc degimus. Libros ad nos adferre solent paucos, &

ex iis ipsis nobis utiles paucissimos, ut nosti. Cum viris eruditis alibi viventibus commercia litterarum exercere, conciliare nobis amicitias & colere propter longinquitatem viarum, & causas alias vix licet. Ita fit, ut conemur multa, expedire pauca valeamus. Accedit inopia eorum, qui, si tandem aliquid elaboramus, describere typis, ac publicare velint. Manet ergo intra Musaei nostri parietis clausum, quod edere jam olim & promissimus & paravimus. Nec ideo cessamus agere aliquid, & si non aliis, nobis saltem cura ista esse utiles. Quod ad Phaedrum observavimus, est ejusmodi, ut ad neminem, quam adolescentibus nostris studiosos pertineat. Locutiones ejus Latinas esse collatione cum aliis, cum primis Virgilio, quem observo prae aliis voluisse imitari, instituta ostendi, *Schoppiique* adversus eum censuras, nimis aliquando rigidas, mitigavi. Sensum & connexionem, ubi videbantur obscurae, explicatione brevi aperui. Unum quoque alterumque locum suspectum mihi curare ac emendare conatus sum. Nam caetera omnia jam occuparunt alii ante me, cum primis vir eruditissimus, *Tanaquillus Faber*, cujus nuper admodum, una cum *Praschii*, in auctorem dictum notas, Argentorato ad me missas accepi, & cum voluptate summa legi. Ante *Meursii* editione usus sum a *Raphelengio* Anno 1610. procurata. Vitiiosa passim, uti scis, sed frustra a me emendata, quando pleraque sic edidisse *Fabrum* video, ut ego conjectaveram. Non omittam tamen retractare mea, & si aliquem invenero, qui describere typis volet, saltem in juventutis studiosae commoda adornare. Cum praesertim Phaedrum hunc in opusculo de stylo vehementer olim commendaverim, iisque suaserim legendum, qui litteras Latinas incipiunt, & earum rectitudinem ac ingenuitatem, ut sic dicam, comparare sibi conantur. In Mauritio, quem beneficio operaque Serenissimae Reginae *CHRISTINAE*, munere vero ac dono *Lucae Holstenii*, una cum caeteris Taeticis ad MS. codices collatis, beneque auctis possidemus, haecenus nihil tentavimus, cum quia morbo diuturno fui vexatus, tum quia quae antea sub manibus habebam, prius putavi absolvenda. Quod si vitam valetudinemque Deus largietur, quamprimum illi operi suscipiendo me accingam. De Panegyricis nunquam magnopere cogitavi. Et puto non ita pridem editos esse Parisiis, cum *Acidalii*, *Livinei*, & nonnullorum aliorum commentariis. Quamquam mihi non contigerit videre illud opus, licet saepius quaesiverim. Pacatum ante annos quosdam publicavi, tantum ut haberent textum studiosi, quibus eum explicabam ratione mei muneris. Etiam si & in ipso observarim haecenus cum aliunde, tum ex MS. meo, cujus adjutorio in editione illa usus sum, quod tum non vidi. Quod si plura subministrare tuus codex poterit, erit, de quo & privatim mihi gratuler, & apud alios liberalitatem tuam laudem. *Schelii* de re veterum militari adeo non vidi, ut ne audiverim quidem nominari. Quare mihi quidem nihil fuerit jucundius, quam eorum copiam nancisci. Maxime cum sperem, habiturum me ex illis, quo quae olim de maritima istius parte sum commentatus, locupletiora & instructiora faciam. Id quod haecenus omni studio sum conatus, effecique ut prodire possint altera parte non auctiora solum, sed & meliora. Quod si comparari possent illi, nescio qui, scriptores

Grae-

Graeci, quorum alter de Pyratice, alter de Partibus navium scripsit, sicut memini me audire ex Cl. *Isaaco Vossio*, res foret optatissima. *Salmasium* aiebat habuisse, quod facit, ut ignorem, an non una cum ipsius filio transferint ad *Fabrum*. Sed de his haecenus. Interea ego totus sum in absolvendis illis, quae de Natura Constitutioneque Philosophiae Pythagoricae olim meditatus sum. Velut quaedam sunt praeludia majoris operis de Philosophia ipsa, quod sequetur, nisi deo visum fuerit me ante ex humanis evocare. Sed ego mei immemor prolixius, quam debebam, scribo, teque, tot aliis majoribus occupatum, nugis meis detineo. Quod si vires dare deus volet, excurram ad vos circa tempus imminens nundinarum, & coram me tibi sistam, Domine. Denique illos librorum thesauros apud te perscrutari, cura diligentiaque, quam possum, maxima conabor. Interim te Deus servet, & ex voto vivere sinat. Vale, &, ut coepisti, me amare perge. Scripsi Upsaliae a. d. 9. Septemb. CIOICLXI.

EPISTOLA V.

JOH. SCHEFFERUS

*Nic. Heinso.**Holmiam.*

NON possum ita gratias humanitati tuae agere, ut oportet: tot namque beneficiis officiisque devinctus, quantum tibi debeam, intelligo, quomodo quod debeo, solvam, non invenio. Gaudeo interea benignum facilemque me habere creditorem, & quem scio ponere in solutionis parte, quod tam multa me debere ipsi grato animo agnosco. Neque tamen, si sic feret occasio, unquam officio meo deero, quod de me persuasum habeas, vir Nobilissime, oro. De cetero en tibi aliqua nugarum mearum, sicut nuper promisi, tu, si videbitur, leges, & judicium tuum feres de iis, quo vel itabunt olim, vel aeternis tenebris damnabuntur. Apud Cornel. Nep. vita Miltiad. cap. 5. *Deinde postero die sub montis radicibus acie e regione instructa, nova arte, vi summa praelium commiserunt: namque arbores multis locis erant raras, hoc consilio, ut montium & tegerentur altitudine &c.* Cruciant eruditos verba, namque arbores multis locis erant raras, hoc consilio. vide *Boeclerum*; ego parenthesi haec includo, & ista, hoc consilio, non ad arbores, quod vulgo faciunt, sed praecedens praelium commiserunt, refero. In eodem Cornelio prima cujusque libri verba titulum esse puto, ut *Miltiades Simonis filius, Atheniensis. Themistocles Neoclis filius, Atheniensis, Pausanias Lacedaemonius, Cimon Miltiadis filius, Atheniensis.* Apud Tacitum vita Agric. cap. 12. *patiens frugum, secundum. & secundum* puto glossema esse, suadetque sequens *mitescunt.* Ibid. cap. 23. *Juventus in ipsa Britannia terminus: mallet, in ipsa Britanniae terminus, ut esset ratio emphaseos in voce ipsa, & qualem terminum innueret, intelligeretur.* Ibid. cap. 31. *neque enim arva nobis aut metalla, aut portus sunt, quibus exercendis reservemur, lege, aut pastus sunt:* nam de portibus & eorum exercitio nihil legimus. De pecore vero ex Britan-

nia copiose docet Caesar de B. G. lib. iv. cap. 12. *Mox & libertatem non in praesentia laturo, vetustissimi libri Rhenano laudati, & in libertatem, non in praesentiam laturo.* scribo, *& in libertatem, non in praesentia mala duri: duri in mala, pro ad mala i. e. tales, qui magno animo possint subire.* Ibid cap. 33. *& vix monitis exercitum militem adhuc ratus.* Ursini liber vetus, *& vix munimentis coërcitum militem accendendum adhuc ratus: scribo, & vix munimentis exercitum militem adhortatus, nam illud accendendum natum ex adhuc ratus existimo, ut expleretur sensus.* Ibid cap. 36. *in aperto pugnam: lege, in aperta, & expono de Britannis inermibus, nec satis munitis propter breves cetras.* Ibid cap. 42. *paratus simulatione; malle, parata simulatione.* Apud Apuleum libro de Dogm. Plat. edit. Lugdunensi Beroaldi, & Florentina, (quas habeo solas) *pueri ejus in aere partiendo ingenium: Scribo, p. e. acre in percipiendo.* Mox, *verum etiam labore & elegantia illustravit sapientiam, ab eo sibi traditam; conjunctim lege, cum dicti libri a voce sapientiam novam periodum constituent: paulo post, labore quoque asserere, & quae sequuntur corruptissima sunt verba, quorum abs te medicinam exspecto.* Rursum post *pro neque pugnari inter se tantummodo: scribo, neque pugnare non inter se &c.* Apud Sarisberiensem edit. Lugd. Batav. Mairii lib. ii. Polic. cap. 4. *quae si per singula, prout aut auctoribus digesta sunt, coepero enarrare, vel sola haec proprium tempus desiderabant.* non dubito, quin tò aut ex prava repetitione syllabae sequentis natum, debeat deleri; Mox. cap. 15. *cum enim majestatem urbis principes visibili specie censuerunt honorandam; scribo, majestatem urbis principis.* & cap. 17. *pro nocticulam, pono noctilucam, & pro consilia, concilia.* Idem lib. iii. cap. 2. *haec enim contemplatio quadripartitum parit fructum, utilitatem sui, charitatem proximi, contemptum mundi, amorem dei.* Puto Sarisberiensem scripsisse, *vilitatem sui.* Apud Auctorem Virorum illustr. ex edit. Schotti, vita Numae, *cum diu interregno seditiones orirentur, Scribo, cum de interregno.* Sed ego nimium jam te detineo his nugis meis. Unum peto, ut cum jam in manus sumserim denuo Phaedrum, si quae habes ad eum, ut te habere scio, mittere haud graveris, simul atque procurare mihi lectiones varias ex codice Remensi, quarum compotem te posse fieri nuper putabas. Oro insuper, ut mihi explices illius locum, qui est statim ab initio opusculi, ubi excusare velle videtur, *quod arbores loquantur.* Nam quia toto in opusculo arbores loquentes non invenio, quo pertineat illa excusatio, aut metus calumniae, haud profecto video. Vale, vir Nobilissime, meaeque confidentiae, quam tua peperit singularis & inusitata humanitas, ignosce. Scribebam Upsaliae a. d. 29. Octob. CIOCIOLXI.

Cl. Gronovium, si feret occasio, velim à me salutes. Scriberem ipse, si haberem fidum aliquem, cui litteras committerem.

EPISTOLA VI.

NIC. HEINSIUS

*Joh. Scheffero.**Upsaliam.*

CUM nuper a me discedebas vir celeberrime, totus eram, ut potes meminisse, in expectatione literarum nostri *Gronovii*, quas tamen nullas hactenus ab eo tempore accepi. Quapropter est, ut suspicor, aut meas, quas non ita pridem binas, & quidem satis verbosas, ad illum dederam, non fuisse curatas, aut si quas ille rescripsit, eas in via intercidiisse. Dum alius ex alio tabellarius spes meas hinc frustrantur, ad longe jucundissimas tuas, quae postea supervenere, responsum quoque distuli diutius, quam fieri oportuisset. Grates operose quod agendas mihi duxisti pro tenui prandio, exosculor summam benignitatem tuam, quod preces amico animo rogantis non es aspernatus: domui meae felicitatem gratulor eximiam, quam talis & tantus hospes intravit. Ex Belgio nostro, aut Gallia, aut Italia quod nunciare possum, nihil nunc occurrit, cum omne litterarium commercium, quod cum Viris eruditione praestantibus illic terrarum pridem exercebam, penitus interruptum sit mea ad Suecos protectione. Revocavi tamen ad officium cessantes nuper, & alloquiis meis ad mutuas confabulationes instaurandas excitavi. Ut spes sit in posterum fore, ne ignarus vivam eorum, quae foris inter Musarum cultores geruntur. Codicem Phaedri Rhemensem qui consultum a se ac excussum fuisse mihi vere praeterito per literas significabat, est *Marquardus Gudius*, domo ac gente Holstatus, vir sane & ingeniosus & eruditus. Is tum in procinctu erat, Italos aditurus, perlustrata jam Gallia, quod iter breve admodum, & vix annum fore perscribebat. Ubi is locorum nunc haereat, prorsus ignoro. Auguror tamen aut Italos aut Gallos de illo nonnihil edocturos esse, cum ad me scribent. In Belgium rediisse hominem ubi intellexero, non desinam illi obstrepere, donec copiam tibi faciat eorum, quae ex codice Rhemensi ad Phaedrum annotavit. Parisienses mox publico committent typis illis splendidis descriptos, Agathiam, Procopium, & Themistii orationes, omnia, quam hactenus circumferuntur, auctiora & castigatiora. Vossianum de LXX. interpretibus commentarium nuper apud nos editum indies exspecto. *Isaaci* ille foetus est, ne tu de patre forsan intelligas. *Gronovii* Senecam quando visuri simus, haud scio, quem tamen prodiisse jam pridem sum certus. Magistratus ille Academicus, quo nunc fungitur, ab amicis illum studiisque invitum frequenter avocat. Destinari hunc *Freinskemio* successorem ab Electore Palatino, jamque ad spartam illam adornandam esse invitatum, *Langermannus* ejus agnatus ad me Hamburgo proxime perscripsit. Literis tuis si illum compellandum censes, eas mihi committe. Ita enim fiet, ut recte curentur. Caeterum quod neglexeram propemodum flagitare, cum praecipue flagitandum mihi proposuissem, hoc est: ut hospitio meo utaris, cum feriae proximae excursus ad nos tibi

tibi permittent. Dies hybernos perbreves foris inter amicos tum licet exigas, vespertas longas & intempestas domi in mea bibliotheca. Hoc quemadmodum enixe peto, ita te gratificaturum hîc mihi confido. Ad Nepotem, Tacitum, Apulejum, & Sarisberienfem quae observas, docta, ingeniosa & te digna sunt, praesertim quae ad vitam Agricolae notasti. Eorum copiam jam feci. Per illustri Schelio, cujus exactos de Castrametatione Romanorum commentarios apud me vidisti. Is enim & tui perquam studiosus est, & Urbicium a te votis ardentissimis expectat. Suas etiam in Tacitum conjecturas typis describendas nunc curat. In Nepote locum male affectum necessaria distinctione feliciter sanasti. Lemmata etiam singulis virorum illustrium vitis reddenda esse opportune mones. In Tacito quoque, quae corrigis, perplacent omnia. Illud unum, quod in *Fulvi Ursinii* codice legitur, *Et vix munimentis coercitum militem accendendum adhuc ratus*, ferri posse censeo. nisi mavis *militem voce accendendum*. Ut *τὸ voce τοῖς munimentis* opponatur. *Accendere* hac significatione etiam Silio Italioc semel iterumque me recordor reddidisse. Nosti Virgilianum illud.

Aere ciere viros, Martemque accendere cantu.

Apud Apulejum *τὸ acre in percipiendo ingenium* jam occupavit postremas editiones. Alter apud illum locus foede interpolatus est. Quod *τὸ labore Et elegantia* bis repetitum satis innuit. Quod si legas. *Verum cum se Socrati dedisset, non solum ingenio atque doctrina caeteros Socraticos vicit, verum etiam sapientiam ab eo sibi traditam labore illustravit, asserere nisus est, Et eleganti* (hujus periodi omnia ex antiquis membranis castigantur) *perque venusta majestate verborum plurimum ei adhibuit dignitatis*. Paulo ante, *Tantosque progressus exercitatio contulit ei, ut Pythia Et Isthmia de lucta certaverit*. Viri eruditi in postremis editionibus ex fide veterum membranarum reposuerunt, *deluctata*, perperam. Scribendum enim nulla mutatione, *Isthmiade lucta*. Sic *ἰσθμίας νίκη* apud Graecos. Apud Phaedrum libelli initio, *quod arbores loquantur*, merito tibi negotium faceffit. Quare aut, statuendum Phaedri multa intercidisse, aut locum esse mendosum: fuit cum opinarer, librariorum supinitate naevum obrepisse ex veteri scriptura, quod *abiquole loquantur*, pro *aviculae*. hinc *arbores* a male feriatis Criticis formatas esse. Apud eundem aliud nunc mihi agenti haec duo loca sese offerunt. Fab. LX, editionis Ritters.

Sic valeas, inquit, ut farina es, quae jaces.

Nihil urbanitatis aut acuminis in hoc dicto agnoscas, quare suspicor a manu Phaedri esse litteris transpositis, *ut farina es, quae necas, vel neces*. Sic valeas, inquit, ut per te valent illi, quos occidisti, sarcasmus est cum imprecatione conjunctus. Ibidem scribe, *comprehensus occubuit neci*, non *compressus*. Alter locus est fab. LXIV. de Medea

Quae saevum ingenium variis involvens modis.

Rectius opinor fore, *variis involvens dolis*. Naso Met. VII. 297. in hac ipsa de Peliae filiabus narratione,

*Neve doli cessent, odium cum conjuge falsum
Phasias adsimulat.*

hinc

hinc πολυκερδής Apollonio dicitur

Μηΐσατο Μηδείης πολυκέρδε & ἐννεσιάων.

percurram elegantissimum scriptorem brevi denuo, cum tantillum otii eram
nactus; si quid conjecturarum super locis depravatis inter legendum mihi sub-
nascetur id omne tui, juris tuique arbitrii sum factururus. Habes hîc epistolium
ad V. C. Socerum tuum. Vale, vir eximie, meque benevolentia tua com-
plecti perge. Dabam Holmiae Suecorum MDCLXXI. ad diem xv. Novemb,

EPISTOLA VII.

J O H. S C H E F F E R U S

Nic. Heinsio.

Holmians.

INgens tuae litterae mihi nuper attulerunt gaudium, cum propter alia, tum praesertim ideo, quod videbam non displicere tibi, quae tanta libertate nuper scripsi. Erant pleraque hujusmodi, ut dubitarem ipse, nec monstrare tibi ausus fuisset unquam, nisi ad temeritatem hanc singularis tua bonitas humanitasque meum animum natura sua timidum alioqui, & sibi ipsi diffidentem, provocasset. At tu ea putasti esse tanti, ut & communicare aliis dignatus sis; perillustri cum primis *Schelio*, a quo si, quae ipse de nugis hisce meis judicaverit accipies, perscribere ad me non omittes, quando paratos habeo in Agricolam commentarios, quibus expono libellum illum, prout quondam feci hîc in Academia publice. Qui cum lucem forsân aliquando sint visuri, mea interest novisse, quid alii viri magni de conjecturis meis statuunt. Caeterum, cum semel inter nos coeperimus de hoc genere confabulari, ecce tibi alia nonnulla, quae in Cornelio observavi. Vita Miltiadis cap. 4. ita legitur. *Hostes eadem re fore tardiores, si animadverterent auderi adversus se tam exiguis copiis dimicare*: non scio an Latinum sit, *audetur dimicare, audetur facere*: exemplum sane fateor me observare nullum. Ergo puto pro *auderi*, *audere* scribi oportere, confirmatque conjecturam meam codex vetus optimae notae, quem a me dono accepit *Boeclerus*, & in adornanda postrema scriptoris illius editione non sine fructu adhibuit, licet, unde codicem acceperit, dissimulet: nam in eo clare legitur *audere*, quod tamen monere *Boeclerus* omisit. Mox. cap. 7. *copias e navibus eduxit*, habent; verum illud e *navibus* non agnoscebat codex ille meus, ex quo fit, ut glossema esse putem. Ibid. c. ult. pro, *tum mira comitas*, lego, *communitas*, ut & *Schottus* fecit, nec placet expositio *Boecleri*: agitur hîc enim de facilitate admissionum, quae potest esse absque comitate; quod ostendit *Cicero* in epistola quadam ad Q. Fratr. *nihil interest habere ostium apertum, vultum clusum*; Vita Themistoclis cap. 6. *triplex Piraei portus constitutus est, isque moenibus circumdatus, ut ipsam urbem dignitate aequaret*. Ita habent omnes editi, quo fit, ut *isque* referretur ad praecedens *portus*: ego autem observavi, meum illum codicem i duplex jungere, sicut saepe fit in MS. Sic ubi supra cap. 4. legitur *ingratiis*, in meo fuit *ingratis*; ubi in Miltiad 3. legitur *interiissent*,

Tom. V.

B

meus

meus habuit *interissent*; simili ergo modo hîc pro *isque* scribendum *isque*, & ad *moenibus* referendum videtur; ita simul respondebit optime quod sequitur, ut *ipsam urbem* &c. Cap. 7. vulgo sic distinguunt, *dedit operam*, ut *quam longissime tempus duceret*, *causam interponens*, se *collegas expectare*. Cum *Lacedaemonii* *quererentur opus nihilominus fieri*, eumque ea re *conari fallere*, interim *reliqui legati sunt consecuti*. Ignoro, an non melius post *expectare* comma, & post *fallere* punctum poneretur, sensus esset, cum *quererentur Spartani ducere tempus*, & nihilominus *procedere opus*, Themistocles interposuit hanc causam; quae facta verisimilis, quia interim legati venerunt. Sed de his plura alia vice. Venio ad Phaedrum, proque locis dubiis in eo indicatis sanatisque summas ago gratias. Quod respondisti *ad arbores* in praefat. libri primi, ingeniosissimum est; sed vellem libri veteris auctoritas accederet, omnino enim locum censeo corruptum, non deesse fabulas multas. Fab. 12. l. 1. pro *retentis impeditis*, mallet *retentus impeditis*. Id f. 16. pro *mala videre*, mallet, *mala ridere*. Lib. 11. f. 1. *qualem te dicam bonam*, varie hoc immutant, quid si dicemus ordinem esse, *qualem te dicam fuisse antehac bonam*. Bonam id est cum adhuc esses bona; Quid? si pro *bonam*, legamus *vivam*, ut alludatur ad vocabulum *reliquae*, quasi obierit nunc epota. Ibid. f. 11. vellem scire, quid de iis verbis *amisso corpore* censeas. *Praschius* tentabat, *abscissi corporis*, vel, *amissi roboris*; nescio an non *corpus* hîc virilem partem posset denotare sensu peculiari. Simile tamen exemplum apud alios requiro, nec invenio. Ibid. f. xv. scribo, *cur hac sit potior?* *quod jacentis miserita est*. Duo sunt, qui loquuntur; canis quaerit causam tam pravi, ut rebatur ipse, iudicii, respondet agnus. Lib. 1v. f. 14. hanc fabulam jungendam cum superiori puto. f. 17. pro *adeunt* scribunt, *abeunt*: nam sequitur mox de aditu. Mox pro *confusus* puto reponendum, *confusi*, ut referatur ad canes, nam illud *confusus fragor* displicet. Fab. 23. pro *mori contractum cum te cogunt frigora*, mallet *contracta*. Sic *contracto frigore* Virg. & *contrahere morbum*. Mox fab. 24. pro *laudes duae*, mallet, *laudis duae*, scio *Fabrum* scribere, *laudes*, *duo*: sed pondera mecum & judica. Statim post emendant varie illud *irate*; ego retineo, & pro *sentiam* scribo *sentias*, ut referatur ad Simonidem: cur enim de se ipso metueret? Mox pro *corpora*, scribo, *corpore*; & iungo cum sequentibus, *humanam supra formam*: nam *diffuentes corpora* non bene cohaeret. Fab. 23. pro *existima*, scribo, *existimo*, ut sit formula confitentis importunitatem; Item pro, *qui sinceræ conscius*, puto, *sincere*; nam *sincera integritas* tautologiam sapit. Lib. v. f. 1. pro *repetunt*, mallet *adrepant*; Habes, nobilissime domine, meas de his locis cogitationes, quas ideo hîc congeffi, ut de iis semel iudicium tuum audiam. Non placebunt omnes, ne mihi quidem placent. Quia tamen venerunt in mentem volo per has provocare ac velut elicere tuas longe meliores, vel si quae placebunt, eas tua stabilire auctoritate contra aemulos, ac invidos. Interea te oro amiceissime ignoscas nugis hisce meis, & per eas tempus tibi eripi ne aegre feras. Habeo neminem alium, cui communicare ista commode queam, & in mea unius sententia acquiescere non sustineo. Quod si tamen praeter opinionem meam haec molesta tibi videbuntur, scribe, operam-

ramque dabo, ne te amplius in posterum offendam. De *Gronovio* quae scribis, mira sunt. Etsi autem commode vivatur Heidelbergae, non patior tamen mihi persuaderi, ut vel suspicer *Gronovium* cum illa *Leidam* velle permutare; Sed qui tu sentias, cupio intelligere. Video & optimum ac candidissimum *Langermannum* adhuc vivere ex tuis, atque vehementer lactor; nihil de eo audivi; ex quo ante tot annos *Upsaliae* vale dixit. Quod si occasio fuerit ejus salutandi meo nomine, res mihi erit gratissima, si eam non omiseris. Vale, nobiliss. domine, ac festinationi meae turpiterque formatis litteris ignosce, aliter non licuit propter negotia diversa, & brevitatem temporis, iterum vale. Scribebam *Upsaliae* 26. Novemb. MDCLXI.

EPISTOLA VIII.

NIC. HEINSIUS

Job. Scheffero.

Upsaliam.

Alloquia tua, vir ornatissime, cum per se admodum grata sunt, tum hoc nomine longe gratissima, quod reconditae semper eruditionis multum depromant & secum trahant ex uberrima illa scientiarum penu, quam longis vigiliis instruxisti. Hoc quoque benignitatis tuae est, quod obloquentem liberrime non adversaris, in qua re si nonnunquam nimis mihi indulgeo, arbitrari te velim, non studio dissentienti id a me dari, aut vitilitigandi prurigine me laborare, sed invitari te hac tessera ad eandem libertatem, quam mihi vindico. Ab illustri *Schelio* ubi responsum accepero, quid ille de locis in *Tacito* per te restitutis sentiat, ut intelligas, operam dabo. Audere pro *Auderi* quod reponis apud *Nepotem* vita *Miltiadis*, ut & caeteras ad eundem scriptorem conjecturas tuas laudo & amplector. etiam illud apud *Phaedrum*, *retentus impeditis cornibus*. Alter ille locus apud eundem valde perplexus ex libro 1. fab. xvi.

*Fraudator homines cum advocat sponse improbo,
Non rem expedire; sed mala videre expetit.*

Claudicant enim numeri priore versu. Veteres membranae apud *Rigaltium* agnoscant, *fraudator nomen cum locat sponsu improbo*. De utraque lectione hanc constituebam jampridem,

*Fraudator nomen cum advocat sponsu improbum,
Non rem expedire; sed malum dare expetit.*

Modus loquendi ex jure depromptus: *nomen improbum*, pro valde improbo, ut bonum, malum nomen, & similia. Possit & refingi, *Fraudator nomen cum obligat sponsu improbum*: & *locat* & *obligat*; cum c & g in antiquis membranis, frequenter confunduntur. Sed alteram conjecturam longe veriore ducō, cum, inquit, fraudulentus homo alium pro se hominem improbum sistit vadem, non hoc agit, ut rem expeditiorem reddat, sed ut malum det. *Malum dare* passim apud *Comicos* occurrit. Itā jam olim conjeceram, tu videris, an feliciter. *et mala ridere* tuum illud ad vulgatam scripturam propius accedit: Fab. xvi.

Onus naturae melius quo deponeret. Non damno hanc scripturam, meliorem tamen fore existimo, si reponas, *onus maturum*, ut apud Nasonem, *iii. Fast.* 541.

Parce, precor, gravidis, facilis Lucina, puellis,

Maturumque utero molliter aufer onus:

Humi jacebat ibidem malo, quam humo. Libro *iii. fab. 5.* videtur scribendum

— — — *Qualem te dicam, ô bona,*

Ante hac fuisse?

ô bona, quomodo *ô bone*, passim apud Comicos. Eadem fabula malim,

Adhuc Falernae faecis testa e nobili

Odorem quae jucundum late spargeret:

Hunc postquam totis avide attraxit naribus

Quae Falernae faecis odorem adhuc spargeret e testa nobili. *fab. xi. amissi roboris* Praschianum placet. Aliud certe non succurrit, quod propius accedat ad vulgatam scripturam. Nam *corpus* pro virili parte sumi posse vix existimem. Lib. *iv. fab. xvii. vers. 2.* *tempus oratum suae.* aut *suos* legendum est, videlicet *legatos*, aut *sibi*, qui pro se orarent melioris vitae tempus. Quod posterius praefero, cum & *sese* mox subsequatur. Pro eo, *vix tandem invenit eos Mercurius*, vide an *reos* sit a manu Phaedri. *Reos*, quia citati non respondebant. Pro eo, *nunquam carebunt hominis contumelia.* malim *omni contumelia*, vel *hominum.* *Confusus subito quod fuerat fragor*, merito te offendit, & placet *to confusi.* Sed *to fuerat fragor* non concoquo, puto, *canes confusi*, subito, vel *subitus*, quod ruerat fragor: ut apud Horatium lib. *i. od. xvi.*

— — — *non tremendo*

Jupiter ipse ruens tumultu:

hoc est tonans, & apud Lucretium *i. 1098.*

Neve ruunt coeli tonitralia templa superne.

Fab. xxiii. optime *contracta frigora* castigas. *fab. xxiv.* placet *laudis duae*, Quod sequitur,

Verum ut ne irate dimissum te sentiam

In aliis est,

Verum ne irate dimissum te sentiam.

Scribebam jampridem,

Verum ut ne ingratis te dimissum censeas.

Vel etiam,

Verum ut ne iratum dimisisse censeas.

Et mox,

Ne male dimissus gratiam corrumpere,

non dimissam gratiam quod vulgo circumfertur: deinde nil mutandum videtur illo versu,

Sudore multo diffuentes corpora.

Ut sit Graecismus. Potest etiam distinguere post *diffuentes*, ut subsequatur, *corpora humanam supra formam.* neque tamen displicet tuum *illud corpore.* Denique pro

pro omnes scierunt, lego sciverunt, a scisco, hoc est pronunciarunt. Festus sciscere sententiam dicere interpretatur. Sil. Ital. vii. 544.

Aequant imperio & solem concedere nocti

Sciscant.

Fabula proxima ut probam conjecturam *τὸ existimo* amplector. Initio fabulae legendum *distringit*, hoc est distrahit: *destringere* idem valet, quod stringere, ut *destringere gladium*: pro quo saepe apud optimos scriptores perperam *distringere gladium* legas: hominem variis negotiis distractum designat. *Integritas sinceræ* ferri potest. *Sincerus* enim pro illibato aut intemerato saepe sumitur. ut *Sincera voluptas*, *sincera gaudia*. Lib. v. fab. i. *adrepant* impense placet, aut *arrepunt*, ut propius insistamus ductui litterarum. Si quas praeterea ex conjecturis tuis silentio praeterivi, iis a me subscribi tacita relligione velim tibi persuadeas. Et hactenus quidem tuis vestigiis insisto, alias fortasse meae conjecturae tuam censuram elicient. Nunc illud addo in transcurso libri i. i. initio.

Momentum ut horae pereat officii mei.

Malo, officiis meis. paulo post,

Quamvis in ipsa natus sim poene Schola.

Miror eruditos interpretes praeteriisse, scribi oportere, *poenae Schola*. proxime praecedentes versus eleganter & facete invidiam barbarae patriae a poeta amoluntur. Thrax enim Phaedrus, & Pieria mons Thraciae Apollonii Scholiaetae, licet alii Macedoniae eum assignent, unde *Pierides Musae* dicuntur, ut oblique innuat eandem sibi & Musis patriam esse. Quamvis, inquit, in servitute natus, laude invita in hanc vitam incubui. *paenae Scholam* ergastulum aut pistrinum vocat. *τὸ pene* versus respuit, qua voce si uti Phaedrus voluisset, poterat transpositis vocabulis jambum omnibus numeris perfectum dedisse, *Quamvis in ipsa pene sim natus schola*. Sed *τὸ quamvis* satis ostendit illum deflectere a priori oratione. Quare & subdit. *invita laude*, ut se servum natum ostendat. Illud *curamque habendi*, quo opum conquirendarum studium denotatur, hoc loco intempestivum & parum facere ad rem videtur, cum de laude & fama conquirenda agatur; Illud quoque paulo ante, *artium peperit chorum*, nonnihil suspectum est. Nam quid est *chorus artium*. *artificem chorum*, aut *praesidem artium chorum* rectius dixisset. Sed hoc minimi momenti, & fortassis dictum, ut Horatio, *centum puer artium*. A Gronovio nostro tandem litteras accepi, quibus significat *Tanaquillum Fabrum* revixisse, de cujus morte falsus nuncius in Belgium erat allatus. Addit praeterea Senecam suam in lucem jam prodiisse, ejusque exemplar tibi a se destinatum esse, quod *Elzevirii* Amstelodamenses se curaturos promiserint. Sed mari jam clauso, ne ante tempestatem vernam liber huc perferatur valde metuo. Habere praeterea paratum se praelo novum de re pecuniaria opusculum, quod ab Antagonista *Schoockio* provocatus conscripserit. *Vossii* de Lxx. interpretibus jam proflare venalem commentarium, in quem Theologi nostri magna mole se involaturos esse minentur. Haec sunt, de quibus ille. Ex Gallia Italiaque litteras rerum novarum.

indices expecto quotidie. Tardiores ad tuas responsiones boni ut consulas etiam atque etiam te rogo. Interventu enim amicorum jam bis factum est, ut inchoatam epistolam coactus sim abrumpere. Tum illud praecipue peto, nequid harum ineptiarum tuis in Phaedrum observationibus inferas, nisi quod probaris ipse. Sine cura enim aut meditatione ulla chartis illevis, quicquid se mihi obtulit, dum Phaedrum cum tua epistola committo. Vale, vir celeberrime, & nisi molestum est, quando nobis expectandus sis, verbis vel tribus indica. Dabam Holmiae Succorum Anno MDCCXII. a. d. XIIII. Decemb. Juliani.

EPISTOLA IX.

JOH. SCHEFFERUS

Nic. Heinsio.

Holmiam.

Quod de meis nuper ajebas litteris, id ego potiori jure dixerim de tuis. Nihil enim est in iis, nisi singulare ac eximium, & quod non modo satisfacit meis desideriis, sed & jucundissimis accessionibus ea supergreditur. Scilicet de uno alteroque Phaedri loco tibi sententiam meam aperui; tu non modo quid judicares de iis, sed & quid de aliis censes similibus, benignissime juxta & doctissime significasti. Quo magis miror, nolle te communicari ea publice cum aliis, cum a nemine meliora doctioraque queant. Sane si haec talia sunt occultanda, quid facere meis debeam, vel te judice, intelligo. Sed audebo boni publici gratia peccare in imperia tua, & si non omnia, pleraque tamen meis admiscere, ut ex his auctoritatem illis conciliem, & pro singulari hoc amicitiae officio gratias tibi agam debitas. Quod autem nuper non speraveram modo, sed & firmiter propositum habebam excurrere ad vos, pluribusque diebus uti selectissima Bibliotheca tua, prout liberalissime benignissimeque concesseras, id totum nunc mutare cogor, partim valetudine minus prospera impeditus, partim ob difficultatem viarum in tam remissa hyeme: interea pro humanissima invitatione tua summas tibi ago gratias, usus bonitate tua, cum primum per meliorem corporis constitutionem, & caetera, quae me nunc impediunt, licuerit. De litteris nunc nihil addo, ne te nimis frequenter interpellando nugis hujusmodi iratum mihi faciam. Caeterum quod de optimi Gronovii sententia in loco Taciti adnotasti, ante ignoravi, quoniam illae quidem ejus curae in Statium mihi nunquam visae sunt. Quanquam autem de acerrimo viri doctissimi judicio nil dubitem, nescio tamen, quomodo mihi mea conjectura magis placeat, cum qua, sicut vulgo dicitur, suum cuique pulchrum, tum praesertim, quia & a veteris scripturae vestigiis minime recedit, & sententiam habet obviam clarissimamque. De ceteris impatienter judicium illustr. Schelii expecto, quem interim, si putabis non ingratum fore, meo nomine salutabis officiosissime. Cupio enim per te innotescere & ipsi, & aliis viris magnis amicis tuis, si modo me putabis eum, cujus non dedignaturi sint obsequia officiaque; Interea tu vale, domine, & me porro
amare

amare perge; Deus te seruet, novumque annum cum sequentibus plurimis
prosperum laetumque tibi esse jubeat; Iterum Vale, Upsaliae 17. Decemb.
CICIDCLXI.

EPISTOLA X.

NIC. HEINSIUS

Job. Scheffero

Upsaliam.

PArum intelligis elegantiam tuarum literarum, vir eximie, & voluptatem
summam, quam ex iis percipio, si opinaris fieri posse, ut sis nimius, ut-
cunque me compelles assiduus. Ad Phaedrum quae tibi suggesti haecenus, te-
nuia & jejuna prorsus sunt, quorum sterilitatem meliora forsitan aliquando com-
pensabunt. locus ille, qui me nuper exercebat,

*Quamvis in ipsa natus sim pene Schola,**Curamque habendi penitus mente eraserim,*

Recte se habere mihi postea visus est in vulgatis editionibus, nisi quod priore
versu *poenae* reponendum est, ut tum monui, sive vocem illam cum *Schola*
construas, & *poenae Scholam* ergastulum interpreteris, sive *natus poenae* dixerit
Phaedrus, pro *natus ad poenam*, quod verius opinor. Sic *natus bello*, *natus foro*,
natus rebus gerendis, cujusmodi frequentissima exempla apud optimos scripto-
res passim occurrunt. Sic Naso

Non tu natus equo, nec fortibus utilis armis.

Versu posteriore, *curam habendi* pro studio opum conquirendarum posuit, ut
apud eundem Nasonem arte Amatoria,

Nec nos ambitio, nec amor nos tangit habendi,

Et alibi quoque non uno loco. Hoc igitur vult Phaedrus, vix potuisse se emer-
gere & eluctari ad famam prae augustiis rei familiaris, cum arduum sit prorsus
& perquam difficile homini omnium indigenti ad gloriam eniti. Huc spectant,
quae de divitiis amici sui mox subjungit. Superiora mire elegantia & festiva
sunt, ubi barbaros natales excusat, matrem Thressam, quod gens mulieres
per Graeciam contemptissime olim habebantur, quod faex meretricularum ex
Thressis potissimum constaret, quo & illa Herus apud Nasonem spectare mo-
nui in notis ad Epistolam XIX. vers. 100.

*Interdum metuo, patria ne laedar, & impar**Dicar Abydeno Thressa puella toro.*

Ita enim ex optimis membranis restitui, & pluribus ea illic loci illustravi.
Quae tamen cum chartis illinebam, haud succurebat, Antistheni quoque Phi-
losopho, teste Laertio Diogene, matrem Thressam exprobatam fuisse. Extat
praeterea locus insignis hujus argumeti apud Theophrastum in Characteribus,
capite *ἡ κακολογία*, ubi pro insigni contumelia istud ingeritur, *ἡ μὲν τοιμήτης*
εὐγενὴς Θεστιά ἐστι; τὰς δὲ τοιαύτας ἐντὶ πατρίδι εὐγενεὶς εἶναι φασίν: erant enim
ancillae plerumque, & quidem impudicae, ut jam dixi: sed haec praeter in-
sti-

stitutum, de quibus plura, cum ad Phaedrum revertemur. Nunc monendum te duxi, habuisse me ab *Elzeviriis* literas, quibus nunciant, exemplaria duo Senecae Gronoviani homini amico in Sueciam contendenti esse tradita, quae is se perlaturum ad me sit pollicitus; horum alterum cum tibi destinatum sit, scire pervelim, qua illud via ad te curari velis, ne diutina ejus expectatione torquearis incassum. Praeterea exploratos habere velint mores *Curionis* nostri iidem *Elzevirii*, meque percunctantur, hominemne & probum & diligentem esse censeam, cuique libros per Sueciam distrahendos tuto possint credere. Operam enim hinc suam a me offerri *Elzeviriis* ambitiose jam pridem contendit ipse *Curio*. Si opinaris e re illorum non fore, ut commercium hoc cum illo exerceant, mone me, quaeso, vel tribus verbis. Index ut celeris, ipsos etiam *Elzeviriis*, religiose operam dabo. *Vossii* Etymologicum jam credo lucem aut videt, aut mox videbit. Apud Gallos Italosque quid rerum geratur ut cognoscas, mitto hinc *Bigotii* epistolam, quanquam difficili charactere conscriptam, cum in ea sint nonnulla, quae te spectent; eam, ubi oportunum ac commodum erit, remittes. Quanquam ejus te latorem complecti malim. Eris certe hospes longè mihi acceptissimus. A *Schelio* necdum accepi responsum. De loco Taciti ut Gronovianam sententiam plenius intelligas, describenda curavi, quae ille ad ejus illustrationem congeffit. Vale, & cura corpus infirmum diligenter. Exarabam Holmiae Suecorum Anno *MDCCCLXII*. quem tibi tuisque prosperum ac fortunatum voveo. a.d. *III*. Januar.

EPISTOLA XI.

JOH. SCHEFFERUS

*Nic. Heinsio.**Holmiam.*

Duplici beneficio me affecisti nuper, Domine, nam & locum Phaedri difficiliorem explicando, reddidisti eruditorem me, & transmittendo litteras Cl. *Bigotii* dedisti operam, ut intelligerem, quicquid fere per orbem eruditum hodie geratur. Ac ut de *Bigotii* literis primum agam, video ex eis viri optimi egregiam erga me voluntatem, hocque nomine non parum mihi gratulor, tibi autem ago gratias, cujus opera, etiam tacente te, intelligo satis effectum, ut *Bigotio* notum esset *Schefferi* nomen. Quod vero attinet Mauritium vel Urbicium mihi missum ab *Holstenio*, sunt illius libri *XII*: ex quatuor MS. duobus Barberinis, Mediceo & Farnesiano. Integri omnes cum suis lemmatibus, exceptis pauculis locis; totum opus constat centum & triginta circiter paginis in folio, ut vocant. Si, quae ipse ex Mediolanensi codice descripsit, mittere huc volet, faciat mihi rem gratissimam, quando finitis eis, quae de natura & constitutione Philosophiae Pythagoricae nunc habeo sub manibus, Mauritium toto animo aggrediar exponere. Quod de Aeliani & Leonis tacticis addit *Bigotius*, pariter est gratissimum; misit quidem & ea ad me *Holstenius*, collata cum codicibus MS. ex quibus expletas habeo lacunas omnes, quae hodie in
edi-

editis comparent; sed codicis Mediolanensis nullam facit mentionem unde suspicor, *Holstenium* eum non consuluisse, atque sic ex eo aliqua haberi posse, quae in caeteris non inveniabantur. Interea cum ad Cl. *Bigotium* scribes, velim explores, num quid habeat aut sciat de peculiari *Aeliani* opere *ἐπὶ τῶν ναυμαχίαις συντάξεων*, ut appellat ipse cap. 2. & *Arcerius* superesse putat, ac delitescere in Bibliotheca Regis Serenissimi. Nam si hoc foret, necesse esset, ut hoc opus illi alteri adjungeretur. Atque ista quidem ad illam partem litterarum Cl. *Bigotii*, quae ad me spectabat. Venio nunc ad tuas, ac de *Curione* quidem ante omnia respondeo; videri recte facturos *Elzevirios*, si quid suarum rerum ipsius fide committant; notus mihi *Curio* est tredecim retro annis, & ita notus, ut de ipso nihil dubitem, diligens est in rebus & negotiis suis, ut qui maxime. Praeterea sobrius, ut nec aleae nec veneri deditus, quibus alias virtutibus vulgo nostri se suaque pessime perdere consueverunt: itaque & Academia typos suos totamque officinam ei committit, effecitque apud Regem Serenissimum, ut pulcherrimis privilegiis & immunitatibus fruatur. Senecam Cl. *Gronovii* per neminem huc ad me curaveris, quam affinem meum, rectius, cujus nomen *Petrus Salanus* Regii dicasterii Notarius, ut vocant, apud quem nuper, cum Holmiae essem, divertebam; & scribam hodie ad ipsum eo nomine. In Phaedri loco habes me consentientem tibi, atque simul devinctum, sicut dixi; non tamen aegre feres, spero, si quae mea prius fuerit sententia de eo, hîc adscripsero. Videbatur mihi Phaedrus toto eo loco hortari Eutychum, ut, si velit operam dare literis, & eruditioni, serio id agat, non obiter, nec per otium, ut fere faciunt, qui in aulis vivunt, cujusmodi aliquis Eutychus ille fuisse videtur: causam autem addere, quod eruditio, nisi multo serioque labore, non possit comparari, atque ut hoc efficacius diceret, addere proprium exemplum, & dicere, licet ego sim editus in monte Pierio, ubi Musae habitant, omnemque eruditionem produnt, licet adeo in ipsa paene Schola & officina litterarum (sic montem Piërium propter Musas vocare videbatur) sim natus, ac neque opibus corradendis operam dederim, nec adeo gloriae aut famae, quae longe aliam viam jubet incedere sectatores suos, hoc praesertim tempore, quo litterae contemnantur scilicet, tamen aegre obtineo a Musis, ut me recipiant in coetum suum, & me solidae participem faciant eruditionis. Quomodo tu putas ad eruditionem eos posse pervenire, qui obiter hoc agunt, de caetero toti sunt in cumulandis opibus & similibus rebus? Hoc putabam velle Phaedrum, quia enixam se esse jugo Piërio matrem scribit, non tam a serva existimabam natum (cum Thrax a Thrace editus in Thracia non videbatur fuisse servus) quam postea casu quodam servum esse factum, & idcirco neque *libertinum*, sed *libertum* dici sine libri tertii. Postremo captum forsan esse puerum eo bello, quod adversus Thracas gestum est ductu patris Octavii Augusti, cujusque meminit Suetonius in Aug. cap. 3. Haec ego quondam, sicut dixi, de hoc loco suspicabar, quae tu amplius examinabis, si ita videbitur, nec tam dissentientem me, quod jam sum testatus, quam haerentem confirmabis. Remitto statim ad te epistolam *Bigotii*, proque ea gratias maximas

ago, denique per te amplius innotescere illi desidero; quare salubris eum perofficiose meo nomine & ad praestationem promissorum adhortabere. Faciam ipse, si per te non ingratis illi fore meas litteras intellexero. Nam nunc quidem non audeo, nisi tu prius conciliator interveneris. Et quia paulo ante Aeliani mentio est facta, scire velim, utrum non & variae historiae ipsius existent plura in Bibliothecis, quam hodie circumferuntur, & an ejus variae lectiones aliunde possint haberi, quia enim cum semel iterumque edidi, & fortassis denuo edam, non poterunt non talia mihi magno esse usui. Sed ego longis nimis nugis te detineo, nec nisi molestiam facefso tibi meis litteris, itaque claudo, teque, nobilissime domine, plurimum valere jubeo, huncque annum cum frequentibus multis cum hilaritate prosperaque valetudine transigere. Quod votum coram ipse apud te pronunciaturum me sperabam; nunc me prohibet virium imbecillitas & labores publici, quos jure suo exigit a nobis Academia, & juvenus studiosa, itaque hac quidem vice gratias humanitati tuae ago summas, usus oblato beneficio occasione proxima. Iterum vale, Upsaliae a.d. 7. Januar. CIOIOCLXII.

P. S. Quis est is in litteris *Bigotii*, qui de optimo genere interpretandi Graecos auctores scripsit? nam nomen ejus ob maculam in charta deletum legi non potuit.

EPISTOLA XII.

NIC. HEINSIUS

Joh. Scheffero.

Upsalam.

HAud invitus ex tuis intellexi, vir Clarissime, nequaquam ingratum tibi fuisse tenue officium, quod epistolam *Emerici Bigotii* tecum communicarim: faciam id ipsum porro, quoties ad me perferentur nuntii peregre, quos tua cognitione non indignos esse judicabo; significavi interim *Bigotio*, quae perscribi ad illum volebas: nec dubito virum egregium, cum in aliis omnibus mecum sentiat, pari quoque tui demerendi studio flagrare. Sed & *Curionis* causam egi apud *Elzevirios*. A *Schelio* litteras accepi, quae testantur epistolam meam cum tuis in Tacitum conjecturis illi redditam fuisse. De ipsis tamen conjecturis sententiam suam non tam prodit, quam proxima occasione se proditurum pollicetur. Habui & Florentia literas a *Carolo Dato*, cui *Gudium* ad Italos contendentem verbis seriis commendaram. Ejus ille cum non meminerit, vereor, ne quid adversi juvenis eruditus in via sit expertus, quem salvum unice velim, vel *Phaedri* tui causa, quod certo persuasum habeam, tersissimum scriptorem ex Rhemenfibus membranarum longe castigatiorem prodire posse. Si quid opportunae occasionis se tibi offeret, commodis ejus invigilandi ac prospiciendi apud Procerum Suecorum nonneminem, qui liberis erudiendis praeceptorem quaerat, *Gudii* nostri ne graveris meminisse, quaeso. Nam aut sub vernam tempestatem ille in Belgium revertetur, aut revertetur nunquam. Seneca.

neca doctissimi *Gronovii* necdum ad me perlatus est. cum perferetur de tuo exemplari statuum, quemadmodum voluisti. Meas in *Phaedrum* conjecturas, quas alibi occupatus chartis illeveram, nimis indulgenter habuisti. Sunt enim in iis nonnullae, quas damno ac rejicio ipse. Locum illum initio libri III. non satis diligenter perpenderam. Quare accedo tibi in alia omnia eunti. Versus tamen ille non satis videtur respondere menti scriptoris,

Et laude invita in hanc vitam incubuerim.

Nam si neglectus opum conquirendarum, si literata educatio ad famam comparandam faciunt, cur *laude invita* se natum subjungit? Posterior syllaba & *pene* producta videri posset ob sequentes duas consonantes. Nunc sententiam tuam explorandam duco de initio libri IV. Versus pauciores sunt, sed valde mendosi, numeris etiam turbatis, praesertim illa, *fabulae exaudiant adeo fugatae*. Quae temerario prorsus consilio ab editione sua *Faber* relegavit, ejecta etiam voce *detrito*, unoque pro duobus versu exhibito. Ad *Bigotium* nihil impedit, quominus scribas ipse. Est enim vir officiosissimus, & qui nobilitatem gentis cultu literarum egregie exornat. Literae, si quas parabis, diligenter a me curabuntur. Aeliani variae historiae veterrimum exstare exemplar in Medicea bibliotheca *Vossius* subindicavit. Quam vere hoc ab illo affirmetur, ex *Dato* mox resciscam. De optimo interpretandi genere qui scripsit, est *Huetius*, quem *Holmiae* novisse potuisti, domo *Cadomensis*, ni fallor. Fuit enim in *Suecia*, sed illo tempore, quo *Itallam* ego perlustrabam. Vale, vir Celeberrime. Exarabam *Holmiae* Suecorum MDCLXII. a. d. XVI. I. Januar.

EPISTOLA XIII.

JOH. SCHEFFERUS

Nic. Heinsio.

Holmiam.

Binas tuas, Domine accepi. Adjunctum posterioribus *Isaaci Vossii* opus avidissime evolvi: Quaeris, quid de eo sentiam, non sum is, qui de talibus iudicium ferre sive possim sive debeam. Hoc saltem ajo, plus in eo eruditionis ac ingenii me reperisse quam putarem, & a me quidem *Vossius* facile fidem impetrat eorum, quae differit de aetate mundi. Sunt quidem aliqua, quae majorem expositionem postulant, ut ea de diluvio non orbis universi, verum partis, item sera primorum hominum fecunditate, & id genus. Verum haec & explicari possunt, ut opinor, & si vel maxime non possent, caeterae sententiae nil derogant. Dabo uni alterique nostrorum Theologorum id scriptum legendum, quidquid ipsi sentiant, de eo proxime significabo. *Meursium* remitto cum summa gratiarum actione, liber est utilissimus, sicut omnia ejus viri, quae in Graecis antiquitatibus scripsit. Nobiliss. *Schelii* eruditissimas in *Taciti* conjectationes summa cum voluptate legi, sunt omnino tales, quales recipi ab omnibus merentur. Fabula de *Moro* prorsus est ridicula. Novi cum ab annis bene multis, producente me in notitiam ipsius Cl. Dom. *Jacobo Göt-*

tofredo, cum adhuc Genevae esset. Quid? si revivisceret *Salmasius*, quam latum dicendi campum haberet? Ex *Dati* litteris paucissima intellexi, cum quia linguae Italicae parum dedi operam, tum quia valde contorti sunt literarum ductus, ut in multis divinare fuerim coactus. Videotamen nescio quid de pictura videri promittere, quod utinam prodiret cito, & ad manus meas perveniret; scripsi ego jam olim ea de re nonnihil, quod cum his conferre opto. Ad Phaedri verba, *laude invita*, ista noto: *invita*, quippe quae me alio trahebat, cum in isto vitae genere intelligeret, se mihi non posse prodesse; vult, se nullam spectavisse laudem gloriamque in eligendo hoc vitae genere, Scholiastico scilicet ac litterato, non magis, quam divitias; si enim istoc voluisset, debuisse aliud vitae genus sequi, quod vulgo magis laudatur, cui laus est favorabilior; Tu videbis, Domine, num sensum attigerim. Versus libri v. *detrito Myronem argento* &c. exposueram in primis meis ad Phaedrum curis, pro ut intelligendus videbatur; sed quia postea cognovi, non solum *Fabrum*, sed & ante ipsum *Rigaltium* aliter eos legere, huncque posteriorem codicis Remensis allegare auctoritatem, malui hoc sequi. scis, quid de ipsis sentiat *Salmasius* in Exerc. Plin. Sed nec ex expositione ejus, nec ex emendatione sensum commodum percipio. Si meam voles mentem scire, scribam proxime, nunc enim vix has paucas literas aeger & in lecto jacens conscribere valeo. Peto, ut, nisi grave est, exponas mihi mentem tuam de loco libri iii. f. 2. ubi utitur *pro vita rogare*. Emendat hunc locum *Schoppius* in infamia Famiani velut minus Latinum: & sane *rogare pro aliquo* non memini legere, si quid nosti communica, & inibis magnam gratiam, non solum apud me, sed & omnes alios, in quorum manus venient. Sed cogor hanc epistolam claudere propter causas, quas jam dixi, Vale, pluraque expecta, si rursus, id, quod brevi fore spero, convalevero. Iterum. Vale, a. d. 5. Febr. MDCLXII.

P. S. mittere has cum *Curione* ante biduum constitueram, sed nescio quae causae ipsi injecerint moram, igitur *Meursii* opusculum tradere alii sc. Dn. *Iberingio* coactus sum, qui se redditurum tibi post diem unum alterumque recepit. homo est probus & in aula illust. Cancellarii notissimus, ut de fide ejus non dubitem, de valitudine mea non habeo, quod hac vice scribam amplius.

EPISTOLA XIV.

NIC. HEINSIUS

*Joh. Scheffero.**Upsaliam.*

Valetudinem tibi parum pro votis cessisse jam pridem, equidem invitatus audio. Eam igitur ut cures diligenter te adhortor. Quod feceris si & omnem animi contentionem ex studiis subnatam procul habeas, & aëris mutationi nonnihil indulgeas, quo feriae Paschales proxime vel ultro te invitant. In antiquis scriptoribus nihil temere mutandum esse assentior omnino tibi. Sed dele-

delectus adhibendus est, ne sordibus librariorum pertinacius adhaereamus: qui plurimum in optimis quibusque scriptoribus sibi permisere: ad naevos detergendos: via tritissima est, si membranarum veterum vestigiis insistatur. Sed ubi mendum liquido apparet, nec quidquam opis adfertur a caecis codicibus, ad conjecturas confugiatur satius est, quam ut vescamur glandibus, cum fruges sunt in promptu. Quid Nonio Marcello est depravatius, nec defunt exemplaria ejus scriptoris oppido vetusta, quae miro consensu tamen in naevos etiam perquam manifestos conspirant. Lucretii tria exemplaria ante annum DCCC. exarata mihi contigit pervolvere. Parum nihilominus auxilii doctissimo poëtae huic a me latum est. Nasonianarum Metamorphoseon codices membraneos centum & plures non vidi tantum, sed majori ex parte perlegi. Restant tamen illic plurima, quae solo conjecturae ductu sunt sananda, aut sanabuntur unquam. Nonium Marcellum, quem modo dixi, & Priscianum suo tempore usos exemplaribus parum emendatis veterum auctorum, quorum testimoniis frequenter, ut scis, utuntur, in confesso est apud homines literatos. Idem Plinio patruo usui venisse ad Melam Vossius noster docuit. Quid de Phaetro dicemus, quem pessime a librariis excerptum esse, ex iis, quae Rhemensis libri ope in illo restituit Rigaltius post Pithoeanam editionem; liquido apparet, cujusque membranae veteres vix ullae occurrunt? In Bibliotheca Reginae nostrae pagellae duae aut tres Phaetri extabant in veterissimis membranarum exaratae. Opinor Petri Danielis olim fuisse. Nam quae ex schedis illius profert Rigaltius, cum Regio fragmento ut plurimum consentiunt; quod postea videbimus. Diversas ex iis schedis lectiones communicavit mecum Vossius. Quae laudibus meis defers nimia & immodica sunt. Quare te rogo, ut amotis phaleris familiariter post hac agamus. Apud Phaet. fab. III. quod *sustulit* pro *tulit* interpretatur Rittersbusius, vellem exemplis id confirmasset, quae quamdiu in promptu non sunt, vulgatae scripturae non possum acquiescere. legebam jampridem

Tunc illa talem lis tulit sententiam.

Sententiam non tantum *ferre* iudex dicitur; sed actor quoque & reus. quomodo praemium & munus *ferre* tam qui accipiunt, dicuntur, quam qui dant. Ad librum II. Tristium Nasonis simile mendum *sustuli*. ubi pertinacia mira *utque* pro *lisque* in antiquis membranarum legebatur. Nunc minimum abest, quin scribendum in Phaetro opinor,

Tunc illa litem sustulit sententia.

Mira est simplicitas orationis & nativus quidam lepos in hoc scriptore. Itaque cum erectum aliquid aut longe quaesitum occurrit, non possit non esse mendis suspectum. Fab. II. *Qui dissolutos mores vi compesceret*, neque credibile est ranas rogasse a Jove, ut vi compescerentur dissoluti mores. in prima voce opinor mendum esse. *Sive* pro *sibi* nempe exaratum fuit solenni errore: unde *qui factum*,

Sibi dissolutos mores ut compesceret.

vel qui compesceret, si tò vi placet, insistamus ei, quod ex Rhemenſi codice *Rigaltius* haud dubie protulit. Sic fab. XLV. videtur corrigendum, *Non quis citius progredi? a quo*, nunc *vis* legitur. *Sibi*, hoc est *ranis*. Eleganter & Latine apud Nasonem Epistola Laodamiae,

*Pugnet & adversos tendat Menelaus in hostes,
Ut rapiat Paridi, quam Paris ante sibi.*

Sibi, Menelao. Plura exempla alibi congeſſi: nec monerem, niſi *Johannes Crojus*, vir caetera eruditus, hoc tanquam barbarum in Parente meo ſugillaſſet. Eadem fabula ſub finem, leve eſt, ſed monendum tamen, videri ſcribendum, *majus ne eveniat malum*. Quanquam *venire* pro *evenire* nonnunquam ſumitur. Fab. I I. bene *parvum*, *Schoppius*, ut numeris conſulatur. Nollem pro vulgata lectione ſtetiſſet *Barthius* Adv. XLVI. cap. v. Idem perperam Adv. eodem capite & libro, Fabula proxima, *ab alio ferri putant*, contra legem carminis. Fab. VI I I. *Socii fuere cum leone in ſaltibus*; plebejum hoc videtur & minus elegans, quare legebam, *ſociati iere*, & proximo verſu, *hic cum cepiſſet*. Leo videlicet. Nam aut vaccam, aut capellam aut ovem cepiſſe cervum vaſti corporis quis credat? Fab. VII I I. idem odioſe mutat, *quia jam non poteſt*, in *jam nunc poteſt*, vel *tunc*. Fab. IX. putabam,

Lepus ſemianimus, mortis en ſolatia!

ut verba leporis ſint. Male paulo poſt idem *Barthius* ad Claud. pag. 220. *deplores tua*. Sera enim eſt imprecatio poſt poenam. Fab. IO. *te credo ſurripuiſſe*. puto *ſurpuiſſe* a Phaedri manu eſſe, nam alterum duriores reddit numeros. Sic Catullus, Horatius, Martialis, alii: quamquam parum refert. Fab. XI. *Barthius* Adv. XXIX. cap. VIII. *Ignotus fallit: notis eſt deriſui*. non male. Ibidem. verſ. 5. *fugientes ipſe ut exciperet*. Tolle tò ut, neque aliter ſchedae reginae, mox eadem, *auriculus* (pro *auritulus*) *clamorem ſubitum totis tollit viribus*; bene, & paulo poſt, *leonis adſtiguntur*. denique, *ſimili fugiſſem metu*, eadem. fab. XII. in iſdem

*Saepe eſſe utiliora quae contempſeris,
Ejuſce rei teſtis haec narratio eſt*

in priore verſu tò *utiliora* contra metrum eſt, forte *utilia* vere. poſteriori *reji* legendum, producta ſyllaba, quomodo & apud Lucretium non ſemel. Vulgatum ſi tuemur, pro *exerit* narratio, reponi ſatius erit, *aſſerit*, vel *diſſerit*. ut pag. 69. ed. Ritters. ego *plures diſſero*. ibid. *ut illa mihi profuerunt*, ſchedae reginae, *utilia mihi quam fuerint*. fab. XIII. optime eadem, *Quae* (leg. *qui*) *ſe laudari gaudent verbis ſubdolis* *Serae* dant poenas turpes poenitentiae. Paulo aliter ea *Danielis* codice *Rigaltius*. Verſus ultimus iſtiſ fabulae, metuo ut ſit ſpurius. Antepenultimus inſigni glosſemate eſt conſpurcatus in Schedis Regiis. *tum demum ingemuit corvus, cur dolosus fuiſſet deceptus fraudibus ignavius*. Holmiae Feb. CIOCIOLXII.

EPISTOLA XV.

JOH. SCHEFFERUS

Nic. Heinsio.

Holmiam.

PRO nuperis tuis, Domine, summas tibi debeo agoque gratias. In exponendo confirmandoque Phaedri loco abunde satisfacisti mihi, credo aliis omnibus, qui has litteras intelligunt. *Schoppium* pro eo semper habui, ut tu depingis, atque adeo esse talem semel iterumque ex ipsius in praedictum Phaedrum annotationibus intellexi. Quod a me doceri cupis sensum aliquot in Phaedro locorum, frustra es: ego enim sum, qui discere debeo, non docere. ne tamen apud te, ut eum virum, quem tantopere colo venerorque, non omnia mea cogitata deponere velle videar, en tibi, quae ad Fab. 4. lib. IV. *quacunque summa tradet luxuriae domum*, annotavi. *domus luxuriae*, pro ea, quae instructa est ad luxum, ante *domum politam* appellavit, addiditque *delicatos hortulos*. Sic *exilii domum* usurpavit Hor. I. carm. ode 4. sicut docti viri legunt eo loco. Simillimaque ratione in Eccles. cap. 7, leguntur *ἐν τῇ ἐνδοσύνῃ, ἐν τῇ πένθει, ἐν τῇ πείρῃ*. ergo *tradere luxuriae domum*, est vendere instructas & paratas ad voluptatem aedes alii, *quacunque summa*, etiam levi & exigua, tanquam rem inutilem, & quam habere nolis. De loco altero dixi jam, me nolle repugnare sententiae *Rigaltii*, delentis aliqua in his versibus; si tamen major accederet auctoritas, quae retinenda omnia suaderet, putarem ego ipsa verba, *fabulae exaudiant adeo fugatae*, velut in Parenthesi poni, esseque verba hortantis cum voto ac desiderio, quasi cupiat fabulas contemptu fugatas, & sic longissime in situ ac squalore recumbentes, audire hoc inventum suum, ac spe bona progredi in lucem; fore namque, ut in precio majori sint futurae; inventum, de quo agit, est in eo, ut recentioribus, & a se excogitatis fabulis affingatur auctor Aescopus. Quod inventum ait accepisse se a statuariis similibusque artificibus, qui ut pretiosiora faciant recentiora opera, delere nova & vetera inscribere nomina iis consueverunt; Hoc, opinor, indicat his verbis, *pretium operibus majus inveniunt, novo si marmori adscripserunt Praxitelem, suo detricto, Myronem argento*; si, inquit, marmori seu operi marmoreo inscribunt vetus nomen Praxitelis, tanto tempore ante laudati ob hanc artem, detricto & crafo suo, id est proprio ejus nomine, quod revera competit marmori novo; si argento, id est, operi ex argento, quod recentis est artificis, extricto & abolito ejus nomine inscribunt vetus nomen Myronis, pretium faciunt impetrantque majus, quam alias habere solent nova ista opera, propter singulare hoc inventum, ex quo novis operibus nomina veterum magistrorum imponere consueverunt. Vult, recentia illa nomina artificum, qui fecissent illa opera, extrivisse ac delevisse alios artifices, & ut divenderent pro vetustis, in-

inscripſiſſe nomina artificum vetuſtiſſimorum atque celeberrimorum. Illud *ſuo* non accipiendum eſt de artificibus, ut puto, quaſi ipſi ſuum detriverint nomen; nam ſi hoc voluiſſent, quid ita inſcripſiſſent prius; ſed de marmore. Marmoris nomen ſuum eſt, quod ei competit, quod ejus eſt proprium. Ut Cic. 1. off. *Id maxime decet, quod eſt cujuſque ſuum maxime.* Negat quidem *Meurſius* in *ſuo* poſſe ac debere intelligi nomine, quia hoc vocabulum non praecedat, verum nemo eſt, qui non *Praxitelem* & *Myronem* pro vocabulo & nomine utriuſque poni intelligat. Haec ſunt, nobiliſſime domine; quae de loco jam hoc olim conjectaveram, ſi exiſtimas eſſe digna, quae in manus aliorum veniant, ſignifica: nam ego quidem de his nil exiſtimavi agendum mihi, quia permotus auctoritate *Rigaltii* verba haec ex textu pleraque, quae dubia & obſcura ſunt, ejeci. Opus Cl. *Voffii* exhibui cuidam ex noſtris Theologis, amico meo. Laudat is impenſe diligentiam & ingenium viri, eaque, quae proponit, non deſtituta eſſe ait omni ratione: unum inquit, eſſe rem amplioris diſquiſitionis, de auctoritate textus Hebraici: metuendum namque eſſe, ne ſi ea vileſceret, tandem haberemus nihil, cui in controverſiis cum adverſariis tuto ac velut ultimo, ac infallibili fundamento inniteremur. Quae pro auctoritate LXX. adferuntur, non carere omni dubitatione, deque iis, quae habentur hodie, Graecis bibliis eadem, imo plura & majora dici poſſe, quam quae ipſe objicit textui Hebraeo. Hoc privatim, & ad te: nollem enim publicari hoc judicium, vel mei, vel cujuſquam alterius in tali argumento fieri mentionem, Opus ipſum *Voffii* remittam proxima occaſione. Interim quia offers commodam occaſionem, non potui, quin his ſalutarem *Bigotium*, teque orarem enixe ut & curare litteras ad eum, & conciliare me ipſius gratiae ac favori, haud graveris. De *Gudio*, de quo ſcripſiſti in ſuperioribus litteris, cogitabo, operamque omnem impendam, ut prodeſſe ipſi poſſim. Quamquam non diſſimulem eſſe rem difficilem in his locis, cum propter alia, tum propter linguae diverſitatem, ſicut ipſe facile potes aeſtimare. Reſtituo tibi litteras quoque reliquas, quas adſociaſti tuis, proque iis ago gratias. *Fabrum* laudo, tanquam eum, qui ſe patiat ab aequitate atque veritate ſuperari, de caetero, ne in *Phaedro* quidem ubique aſſentiri ei valeo. Litteras meas ad Cl. *Gronovium* perveniſſe gaudeo, eoque nomine plurimum tibi debeo. Non quod contingerent, quae vel mea vel ipſius intereſſent, ſed quod ſemel inter nos initam amicitiam promovere nuda ſcribendi conſuetudine deberent; ſed jam charta nugis meis deeſt, itaque finio, teque plurimum valere jubeo. Upſaliae a. d. 18. Februar. CIOIOCLXII.

EPISTOLA XVI.

JOH. SCHEFFERUS

*Nic. Heinsio.**Holmiam.*

REmisi ante hoc biduum *Isaaci Vossii* opus per amicum: spero id bona fide tibi redditum esse, interea denuo tibi ago gratias pro humanissima talium communicatione. Raro & plerumque tarde ad nos deferuntur ista, ut propterea non possint non gratissima nobis esse, quae cum propter alia, tum novitatem suam se commendant. De *domo luxuriae*, quae scribis apud Phaedrum sunt omnino talia, qualia nemo temere repudiaverit, sed ego nescio quomodo sim tardior & timidior in immutandis, quae quocunque modo ferri posse videntur, maxime si correctionis causam ex vetustis libris, & eorum discrepantia habeamus nullam: scilicet ex plebe sum eorum, qui has tractant litteras, neque aliquid majus conari audeo. Alia tua est conditio, cujus meditationes nomen olim ingeniosissimis operibus partum, & existimationem inter eruditissimos hujus aevi facile tuentur. Sicut autem in hoc loco tuam mihi humanissime sententiam exposuisti, id oro facias & in caeteris, quemadmodum promittis; spero enim, habiturum me occasionem primo quoque tempore edendi ejus auctoris. De *sustulit sententiam* mihi quidem visum est sufficere, quod judicaverit *Rittersbusius* cum nonnullis, esse compositum pro simplici; adjeci tamen posse cui videri legendum, *talem in hos tulit sententiam*, ut in *hos* sit adversus hos, fucos videlicet, sed & hoc sic posui, ut nollem temere quid immutari; Quid tu judices de loco hoc, scire avidissime desidero, atque utinam sic vires tuae permetterent, quas ut nondum rediisse intelligo, sic ex animo deum precor, ut quamprimum integras reddere tibi velit. Quod me attinet, ita jam per annum ampliusque vivo, ut nec aegrotem vere, nec valeam; interdum decumbo, mox surgo iterum, & libros fumo in manus. Paulo post ad eos ita nauseo, ut ne intueri quidem valeam mira quadam, & ante hoc tempus ignota mihi mutabilitate; Sed parco fatigare te querelis hisce de mea valitudine, hoc ideo scripsi, ut ne ignores causam tarditatis meae in scribendis litteris: ea enim aliquando est mea conditio, ut stivam citius, quam calamum in manus sumserim; De glossariis, quae excuduntur Parisiis, aliquid accuratius novisse desidero, qualia sint, quae in corpus illud conjunguntur. Utrum & majora ista opera, ut Hesychius, Etymologicum Sylburgii, Pollux, & id genus. Imprimis scire cupio de Thoma magistro, num & ille caeteris adsocietur; si quid nosti, scribe quaeso. Interea bene vale, ac si merebor, me amare perge. Upsal. 4. Martii *MDCLXII*.

EPISTOLA XVII.

JOH. SCHEFFERUS

*Nic. Heinſio.**Holmiam.*

NON possum non & gratulari mihi, & tibi summas agere gratias, quod sepositis, aut certe dilatis ad tempus negotiis gravioribus tam diligenter prolixèque, quodque majus est, tam benevole humaniterque ad nugas meas respondere sustines: scribo, sicut nuper dixi, saepe cum taedio, hinc adeo in chartam conjecto, quicquid in mentem venit, nunquam deprompturus apud quenquam, adeo non apud te, nisi ad nescio quam fiduciam, temeritatem rectius fortasse dixerim, me invitaret singularis tua, totiesque explorata mihi bonitas. Et tu tamen non cessas benigne excipere, qualiacunque denique sint, quae ad te perferuntur, non cessas labantem erigere, dubitantem firmare, errantem in viam reducere. Igitur mihi quidem nihil suavius, nihil utilius est tuis litteris, quas utinam tam frequentes, tam optimarum observationum plenās etiam in posterum queam impetrare, sicut hactenus obtinui. Nec omittam agere hoc apud te summis precibus, vel Phaedri causa, qui quādoque tandem lucem est visurus, plus debebit tibi, quam cuiquam alii. Versum fab. LII. felicissime abs te emendatum judico. In fab. I. illud *ut exponere Vlitius* conatur, sicut nosti; sed & hīc, si retinendum *ut videtur*, in sententiam tuam concedo. Quae de isto *sibi* mones, optima sunt, & notaveram nonnulla ejus generis ad lib. III. fab. 48. iis verbis, *aedes sibi fundasset*. In fab. v. tuum *sociati ierunt* mirifice placet; at quod vis, *hic cum cepisset*, de eo dubium mihi facit, quod in Graeco similiter est, *ἐπεὶ δὲ ζῶα τινα ἐδήγευσαν*; sed & Anonymus referens hanc fabulam.

Cervus adest, cervum rapiunt.

Nempe, quod vacca & capella non potuerunt viribus, agebant voce, cursu, vel simili ratione. Fab. IX. illud, *mortis enſolatia*, tam est ingeniosum, ut non possim satis commendare. Aliter quidem sentit Cl. Gronovius in litteris quibusdam suis ad me, sed hoc praevalet. Saltem meo judicio. Fab. X. non intelligo illud *auriculus*, puto enim ab *auritus* necessario venire non *auricalus*, sed *auritulus*. Igitur peto enixe, ut in hoc vocabulo intelligendo amplius me instruas, caetera quoque ad Phaedrum pertinentia, sic ut coepisti, liberaliter ac benigne communicare velis oro: praeferent utique nomen tuum, quae abs te communicata in notis nostris reponentur. Addam hīc, quod diebus hisce inquirenti nonnihil apud Ovidium tuum occurrebat lib. I. Epist. ex Ponto 5. eo versu *scribimus invita, vixque movente manu*. Ais Vossianum habere *notata*, inde videtur *motata* scribi posse, ut sit a *motare*, habeatque locus eum sensum, scribimus manu invita & reluctante, quaeque se vix patitur moveri ad formandas

das litteras. Ineptum est, dices, sed vel hinc constare tibi volo, quantum confidam tuae erga me benevolentiae, qui ne talia quidem depromere apud te ambigam. Non habeo amplius hac vice, quod scribam, & urget tabellarius, itaque hîc finio, teque diu multumque valere jubeo. Vale: Upsaliae XI. Martii MDCLXII.

EPISTOLA XVIII.

JOH. SCHEFFERUS

Nic. Heinsio.

Holmiam.

Reditae mihi sunt binae tuae, quarum prior multas optimasque in Phaedrum continebat observationes, posterior adsociatas habebat Cl. Bigotii amantissimas litteras. Non possum non prolixè gratulari mihi de favore tanto ejus viri. Nam, ut vides, pollicetur offertque ultro, quae ego petere ab ipso nunquam sustinuissem. Imprimis vero gratum est, quod de Arriano scribit. Utinam daretur occasio, qua huc possent omnia illius deferri. Petoque enixe, ut cum ipso agas istoc nomine. Hieroclis lectiones varias ex MS. ejus enotari opto, & conferri cum editione Parisiensi Curterii Anno 1583. vulgata, quia ea sola mihi est ad manus. Anglicanam nuperam habere non potuimus. Quod existimat Cl. Bigotius, posse eum opusculo de natura & constitutione Philosophiae Pythagoricae praefigi, in eo adhuc haereo, cum propter causas alias, tum quia ei locus aptior in Philosophia ipsa dari poterit, ubi constitui hoc genus scriptorum integrum adhibere. Ut sunt carmina Pythagorae, Demophili & Democratis & Sexti sententiae, & hujusmodi. Atque ut melius intelligat institutum meum in praedicto opusculo, en tibi argumenta capitum, hîc in scedula adjecta. Quae scribit de τὸ ἑπάρμα θέντες τῇ βαλλομένῃ, sunt ejusmodi, ut optarem invenire me quid posse, quo ipsi satisfaceret. Sed agnosco meam ignorantiam libenterque hîc profiteor. ἑπάρμα vocabulum esse nauticum non puto, certe apud neminem ad hunc diem legere me recordor. Dabo tamen operam ut in posterum studiosius observem, si quid de eo occurrat. βαλλομένην quoque navis esse partem minime existimo. Quin potius, si, quod primo intuitu occurrit, depromendum est, ista τῇ βαλλομένῃ sejungo a prioribus, & cum ὑποτρέχου compono. Puto aut ἑπάρμα esse antennam, cum velo, ita dictam, quod attollatur, cum religanda est ad malum & velificatio instituenda. Ut sit τὸ ἑπάρμα τιθέναι, quod apud Senecam Epist. 77. *antennam submittere*, pro lege ac consuetudine navigationis, cum ventus, praesertim adversarius, est validior. In βαλλομένῃ autem puto intelligendam esse vocem ναύς, sicque appellari, quae a vento huc & illuc agitur. Ut sit sensus loci totius, *cum notus inciperet vehementius flare, Nautaeque metuerent, ne ab eo agerentur in Proconesum, submisisse antennas & vela, postque multam navis jactationem venisse tandem ad promontorium, ibique anchoras*

jecisse. ¹ Sic in praesens statuo de loco, cujus utinam adscribere auctorem voluisset. Inveniretur forsitan ex aliis ipsius locis, quibus lumen huic adferri posset. Quod de Phaetro scribit idem Cl. *Bigotius*, plurimum me turbat, neque scio, quid cum meis facere debeam. Atque adeo consilium sententiamque tuam scire desidero, si, quod putat *Bigotius*, transmittere huc observationes suas velit *Gudius*, vel inferentur meis, vel etiam seorsum subjungentur, pro ut ipsi visum fuerit. Sin minus, & hoc obtineri ab eo non poterit, expectandum mihi video, donec sua ediderit. Quamquam alterum mallet, & ut agas cum eo meo nomine, enixe rogem. Interea non ea minus cupio novisse, quae de caeteris in Phaetro locis sentias. Sive enim edentur mea aliquando, sive non edentur, poterunt conjecturae tuae multum adjuvare me interea, ad ipsius auctorem meliorem intellectum. Itaque ne graveris pergere, mihique aperire sensum tui animi etiam de reliquis, summopere oro ac contendo. Fab. XIII. de qua quaeris, est inter Aesopicas 208. inter Aphthonii 29. inter Anonymi Latini 15. Sed in iis nihil, quod ad verba, *cum de fenestra*, faciat. Velim, mihi dubium indices, nam ego quidem ista haecenus habueram pro fanis. In MS. meo Panegyrico perinde, ut in tuo legitur. Sed *u* & *u* eadem forma semper scribitur, ut ambigam, an non *saevos labores* scribi debeant, est alias MS. meus minime vetus codex, verum ab optimo descriptus. En specimen in Paneg. Pacati cap. 34. quod in editione mea olim minime observavi. Vulgo ita legitur. *Testis est Siscia, testis pulcherrimus amne conflictus.* In meo ita haec se habent *pulcherrimus acie conflictus.* Non dubito quin scripserit: *Testis est Siscia, Testes pulcherrimi Savi conflictus.* Cap. 35. *Quanto exercitorem operam*, vulgo, in meo *exerciorem*. Puto compendium scripturae esse, pro *exercitatiorem*. cap. 36. *mutilis excisisque membris*: in meo expresse, *inutilis*. Est autem *inutilis* pro *inutiles*, ut saepe; sed haec obiter, & hac occasione. Interea ut coepi, ita porro te officiose oro, ut ne defatigeris pergere in hoc genere, mihique communicare, quae ad rem meam spectare intelliges. Cl. *Bigotio* si scribes, velim perofficiose salutem meam nuncies. Idem peto apud *Gronovium* facias. Cujus quo evaserit Seneca, scire vehementissime desidero. Vale, vir Nobilissime, litterisque deterrime pictis ignosce. Dextrae enim exulceratione laboro, quae causa quoque fuit, quod cum priori tabellario nullas litteras ad te dederim. Iterum Vale, Upsaliae 25. Martii MDCLXII.

¹ Integrum ex *Bigotii* ad *Heinsium* Epistola adscripsi, ut plenius *Schefferi* mens percipiatur: ἡμῶν εἰς πλοῖον ἀπαίρει τὴν πόλιν; ἐπιχειρομένη δὲ σφοδρῶς ἀνέμῳ βορρῆα, φοβηθέντες οἱ ναυτικοὶ ἵνα μὴ εἰς τὴν Προκόνησον ἐχειφῶσι, τὸ ἑμπύμα ἦντες τῇ βαλλομένῃ ὑποτρέχουσι τὸ ὄρεον τὴν Τείτωνον, καὶ κείνην ῥίψαντες τὴν κατὰ τὴν ἡμεῖς ἐκδεχόμενοι νότον, ἵνα ὁ πλοῖον βάλῃσι τὴν Ἀπαμείαν.

EPISTOLA XIX.

NIC. HEINSIUS

Job. Scheffero.

Upsaliam.

Quaquam jure optimo videor subvereri, ne futilis putidusque sim, vir Clarissime, qui in Phaetro tuo & in aliena messe non spicas tantummodo legam, sed paleas quoque, & quidem cum pulvisculo, quod ajunt, corradam omnes inutili diligentia; ut intelligas tamen nihil desideris tuis ac mandatis esse mihi antiquius, pergam tibi gratificari. Ac primo quidem, quod fab. xiiii. libri primi occurrit *de fenestra*, e qua caseum surripuisse corvus narratur, cum parum oportune mentionem injici hoc loco censerem, dubitabam an non relictum esset a Phaetro *de canistro*. Quod in canistris panem caseoque & id genus alia ad victum pertinentia recondi solere meminissem. Sed haec, ut dixi, dubitantis sunt. Libro ii. ipso statim initio occurrit,

Exemplis continetur Aesopi genus

Ubi *Aesopi genus* pro fabulis Aesopicis insolentior loquendi modus nonnihil me offendit. Quare minimum abest, quin excidisse voculam opiner dissyllabam, & reponi debere *Aesopi id genus*, fabellarum intellige. Quod addi necesse non erat, cum versu proximo subsequatur. Initio libri iii. noster,

Nunc fabularum cur sit inventum genus,

Et libro iv. sub finem cum ait de se, *Usus vetusto genere, sed rebus novis*, intellige scribendi genere, vel fabularum genere, Fab. lxxxvii. *Ut spectatorum mos est, & lepidum genus*. *Lepidum genus*, tubicinum subaudi. Nam si ad spectatores referas, potius *cupidum genus* sint dicendi. inserta sane, quam dixi, vocula sensus erat apertus & facilis. Quae *Barthius* Advers. pag. 965. ad loci hujus illustrationem profert, ea parum ad rem facere mihi visa sunt. Mox distinguo, *si libuerit aliquid interponere, dictorum sensus ut delectet varietas*. *Aliquid interponere*, subintellige, quod ad rem & argumentum non faciat. Quales fabellae de atriensi & tibicine, & tribus sororibus, & patre filii interfectore, aliaeque id genus. *Dictorum varietas*, pro fabularum & jocorum varietate; *multarum rerum varietas* lib. iv. 25. *Dicta* pro facetiis ponunt optimi auctores Latinitatis. Noster fab. l. *obscaena dicta & petulans jurgium*, pro dicteriis. Naso Fast. iii. 695.

Inde joci veteres obscaenaque dicta canuntur.

ita libri veteres. ubi plura notavi. Ut & Fast. vi. 408. hinc *jacere dicta*, & *dicteria*, & *dicere probra alicui*, quare & forsitan paulo ante in Phaetro scribendum, *quicumque fuerit ergo narranti jocus*: non *narrandi locus*. Quaquam & vulgata scriptura potest ferri, ut hoc velit, quicumque ergo locus meae fuerit narrationi, *Re commendetur* (ita enim malo, quam *commendatur*) non auctoris nomine. Non ideo, inquit, fordeant tibi ac spernantur ex hisce fabellis nonnullae, quod a me excogitatae sint. Fab. xxxii. *Et quae debetur pars*. scribo, En

quae debetur pars tuae modestiae, *Audaacter tolle*. Fab. xxxiii. *quum se putaret pingi*: legebam, *fingi*, ad Amores Nasonis libro El. xiv. vers. 2. nec poenitet. Video id ipsum Schoppio quoque in mentem venisse: nisi quod vulgatam scripturam ex Poenuli Plautinae istis immerito tuetur, *Poliri, expoliri, pingi, fingi*. nam *pingi* illic pro *fucari* ponitur. Cui verbo in hac fabella non est locus, ubi de ornandis capillis agitur. Caeterum, ut & illud in transcursu moneam, pro *poliri* in Plautino loco fortassis reponendum *moliri*, cum *expoliri* sequatur, ne bis idem dicat. Nosti Terentianum illud,

Dum moliuntur, dum comuntur, annus est.

Fab. xxxiv. *morsu vehementis canis, vehementi legebam*, & versu proximo, *panem misit malefico*. Quod recorderer fab. xxiii. *panem mittere*, & Fab. xli. *panem mittere pantherae*, occurrere. Sed vidi postea occupasse conjecturam utramque Gronovium ad Senecam pag. 56. ubi plura ad rem, postrema editione: male igitur Rittershusius, qui *immittere* alicubi his notis pro *mittere* reponit, locus nunc non est in promptu. Fab. xxxv. *sus nemoris cultrix: nemoricultrix* castigaram in ora editionis Rittershusianae, qua solebam uti, addideramque confirmandae castigationi Catullianum illud, *cerva silvicultrix; aper nemorivagus*, & Petronianum, *ciconia pietaticultrix*. Tum illud ex fabula proxima *alticinētis atriensibus*, addito glossarii loco, *Alticinētus*, ἀνεσαλμένῳ. Sed praevisa ea omnia ab accuratissimo Rittershusio hacc scribens agnovi. Quapropter unice rogatum te cupio, ut si quid chartis illevero, quod ab aliis ante me sit monitum observatumque, id illis integrum cedas, quibus debetur, tanquam primis auctoribus. Ibidem,

Terrore effuso & perturbatis sensibus.

Scribe,

Terrore offuso perturbatis sensibus.

Aliquid vidisse video Rittershusium, non omnia. *perturbatis sensibus ad Aquilam* refer, quam hoc monito perculerat ac consternarat scelesti Felis: *offundi* facissime in *effundi* degeneravit apud optimos scriptores librariorum culpa. Quae de re nonnihil in observationibus noster Gronovius, ego plura ad Val. Flacum lib. iv. 482. annotavi, quae si tanti putabis, libens excerpam. Pro *derepit* male *direpit* editio Rigaltii. Mox, *Dolosa toto condidit sese cavo*. Rigaltius, *tuto cavo*. Sed cum nihil periculi esset ab aquila & apro feli, minus epitheton *cavi* illud hinc arridet. Legendum opinor, *noto cavo*. Fab. ix. *nota pernicitas*. xi. *exitus noti*. xxxvi. *noti flexus*. lxxxvii. *notum canticum*. Sic & alibi. Fab. xxxvi. *Prospētat Siculum, & prospicit Tuscum mare*. Tuscum mare, quod Etruriam versus vergit, Siculum quod versus Siciliam; nam mare Siculum hinc prospici non potest, quare ut medeamur tautologiae, legendum fortassis, & *respicit Tuscum mare*. ut villa Luculliana a fronte Siciliam habuerit oppositam, a tergo Etruriam. Vulgata scriptura sic defendi quodammodo poterit, ut dicatur villa haec ab uno latere Siciliam, ab altero Etruriam prospexisse. Sed concursus ille & *prospētat* & & *prospicit* parum concinnus videtur. Mox, *perambulante laeta domino viridaria*. Numeri huic versui non constant, cui

cui malo conatus succurrere *Faber tollit τὸ laeta*. Sed sic quoque claudicabit versus.

Peran-bulan-te domi-no viri-daria.

Tres Syllabae sunt in ultimo pede praeter exemplum, & quinque pedes versui. non enim video, quā aliter scandi possit: lego,

Peram-bulan-te lae-ta domi-no viri-dia.

Viridia pro *viridariis* dixit quoque, & quidem bis, scriptor elegantissimus Plinius Secundus lib. v. Epist. 6. in pulcherrima villae Etruscae descriptione, *Acanthus in plano mollis, & (poene dixerim) liquidus; ambit hunc ambulatio pressis varieque tonsis viridibus inclusa*. Postea, sunt locis pluribus disposita sedilia e marmore, quae ambulatione fessos, ut cubiculum ipsum juvant. Fonticuli sedilibus adjacent, per totum hippodromum inductis fistulis strepunt rivi, & qua manus duxit, sequuntur, his nunc illa *viridia*, nunc haec, interdum simul omnia juvantur. Mox, id ut putavit esse nescio quid boni. nisi nescio contrahas in duas syllabas, pedes vix constabunt, quam licentiam vix concoquo. Deinde illud τὸ boni quid ad rem hīc faciat non video. Forte, *Id ut putavit nescio esse quid doli*. Subodorabatur quippe Caesar, hoc ab Atrienſi fieri callido consilio, ut videlicet libertatem hocce officio consequeretur. Sub finem istis verbis, *Multo majoris alapae mecum veniunt*, velim doceri, an *venire mecum*, pro apud me Latinum esse arbitreris. Non quod id negem ego, sed quod haesitem, ac profitear non satis liquere mihi, quod ex te quaero. Fab. xxxvii. *inducta verbis Aquila monitis paruit. veris monitis* probe Gronovius Diatr. Stat. xiii. Fab. xxxviii. *Comes quieto sequitur*. Quia de duobus est mentio, & praecessit τὸ ille, sensus videtur requirere, ut legatur, *Comes hīc quieto &c. mox*,

Interque caedem ferro mulum trusitant.

Quia de mulionibus nil praecessit, τὸ *interque caedem* abruptum videtur, putabam aliquando, *interque se dum ferro mulum trusitant*, dum, inquit, ictibus gladiatorum alternis mulum fiscos ferentem trudent ac fauciant. *inter se* ut apud Maronem,

Illi inter sese magna vi brachia versant.

Sed haec conjectura tantum, & cui ipse nimium non fidam. Fab. xxxix. *Ut venatorum fugeret instantem necem, malebam instantum*. Quanquam concinniora omnia videntur fore, si legas, *ut venatores fugeret instantes neci*, vel, *venatore effugeret instanti necem*. Mox, *nec ideo videt*. Scribendum videtur, *nec adeo videt*. Eleganter enim redundat ea vox optimis scriptoribus. Fab. iv. *Nec quem petebat, adeo potuit attingere*. Deinde *quantum est laboris?* malo, *quanti est laboris?* Sed minimum refert. Deinde, *Et arte fictas*, τὸ *arte* non satis appositum videtur huic loco, quod vero sequitur, *Sin autem ab illis doctus occurrit labor*, quomodo intelligas cupio doceri. Nam nescio quid mendae vereor, ne isti loco subsit. Vale. Exarabam Holmiae MDCLXII. xxvii. Mart. Ad Bigotium cras scripturus operam dabo, ut intelligat, quid ad postulata sua responderis. De Phaetro Gudii etiam meminero. Gudius ipse sub aestatem proximam Florentiae futurus est. Hortabor igitur *Datum*, ut aurem illi vellat de Phaetro, quod

quod a me quoque fiet, & quidem serio. Interim ut de scriptore disertissimo edendo cogitare pergas vehementer te adhortor. Hieroclem cum MSS. collatum vidisse me opinor in bibliotheca *Menagii*, qui vir doctissimus *Bigotio* contubernalis est. Sed *Holstenii* exemplar luculentum Reginae nostrae opera facile impetrabis, ad quam hereditatis jure pervenit. Editionem Britannicam usibus tuis paratam semper apud me fore scito. Senecam *Gronovii* qui adferre huc debuisset, negat se attulisse, aut de hoc libro quicquam sibi constare, cujus inexpectatae rei *Elzevirium* jam certiore feci. iterum vale. In Panegyrico Plinii cum *bis senos labores* restituebam, oportune admonebar illorum, quae notavi ad Librum xv. mei Nas. vers. 39. τὸ *pulcherrimi Savi* a Livineo jam occupatum est. idem tuetur *exfertiore* operam, ut & *Gruterus*: & sane *exsertus* saepe pro prompto & parato apud aevi hujus scriptores haud raro sumitur, quae de re ad Claudianum notasse nonnulla recordor.

EPISTOLA XX.

JOH. SCHEFFERUS

*Nic. Heinio.**Holmiam.*

N^Ulla praeterire solet hebdomas, in qua non novo singularique beneficio me afficias. Sic nuper transmisisti, quae & Phaedrum, & ob ipsum me mirifice juvant ac delectant. Referam singula ad suum locum, quantumque uterque tibi debeat publice indicabo; si in publicum unquam mea venient; de quo tamen paene desino deliberare, postquam tu mihi auctor exstitisti prodendi hujus laboris. Verum quid de *Gudio* sperare debeo? video, tarda fore omnia; nobis vero properandum est, praesente typographo, iisque instructo rebus, quae huc faciunt; itaque opto maturari ea, quae a *Gudio* habere possum; sin minus, poterit & ipse suam contribuere operam ad scriptoris hujus illustrationem, cum praesertim mihi sit propositum non quærere ex hac editione gloriam, sed auctorem eum ita edere, ut juvenus Suecica ex eo possit aliquam habere utilitatem; maxime tenera illa & rudis, cum qua non pigebit ubique descendere ad minuta, & verborum singularem vim ac efficaciam exponere. De Hierocle suo tempore videbo; pro editione ejus novissima gratias tibi ago. De *mecum veneunt* apud Phaedrum, censeo τὸ *mecum* pro *apud me* Latinum esse, sed in phrasi alia, ut cum dico *hoc est mecum*: at *hoc venit mecum* non puto; Itaque legebam olim *alapae meae veneunt*; si quid habes melius, communices mihi oro. Versus, *sin autem ab illis doctus occurrit labor*, pravus est. *Rigaltius* & *Faber*, omiserunt illud *ab*, ego arbitrabar pro eo & legendum, atque ita vidi nuper edidisse & *Urfinum*. *Occurrit* est quod supra, *pervenit ad aures*, mea opinione; si erro, tu me meliora doce, denique caetera, quae ad auctorem hunc notasti, liberaliter ac benigne caeteris adde, Non enim potero quiescere, quam ista omnia abs te consecutus fuero, Vale, & festinationi meae, quam imperant amici, moleste hisce feriis officiosi, ignosce. Upsaliae ad 1. April. MDCLXII.

EPI-

EPISTOLA XXI.
NIC. HEINSIUS*Joh. Scheffero.**Upsaliam.*

Phaedri illustrandi telam, quia semel exorsi sumus eam, porro detexamus, praesertim cum id te cupere ac flagitare cognoscam, vir Clarissime. Ad fabulam libri primi undecimam scriptura Regii codicis, *simili fugissem metu*, proba ac sincera est, lectione vulgata in leges metricas peccante, ac proinde e contextu Phaedri nostri eradenda. Initio libri secundi si admittis & probas distinctionem nostram, *Dictorum sensus*, τὸ *sensus* quartum casum pluralem accipe, & *animos* interpretare. Scis Virgilianum illud

— — — *tantum, vicine Palaemon,*
Sensibus haec imis (res est non parva) reponas.

Sic & *sensus advertere* obvium optimis scriptoribus. Fab. xxxvi. quando *mecum venire* parum Latine dictum judicas, quod & mihi videbatur, duarum litterarum mutatione facili locum censeo sanari posse, si pro *mecum* refingatur, *michi cum*; pro *veniunt*, *vaeneant*. Multo majoris *alapae mi cum vaeneant*. *mi* pro *michi* etiam admitti potest, sed praestat alterum. Hercules apud Nasonem lib. ix. Met.

Nec mihi centauri potuere resistere, nec mi
Arcadiae vastator aper.

Vaenire cum tertio casu eleganter conjungitur, ut in Catonis de R. R. capitis cxliv. initio. *Oleam legendam hoc modo locare oportet. Oleam cogito recte omnem arbitrato domini, aut quem custodem fecerit, aut cui olea vaenierit.* Caeterum, ut & illud addam, quod homines literati per *alapas* intelligi *libertatem* volunt, fieri potest hanc mentem fuisse Phaedri, sed mihi simplex locutio hinc loci, quam figurata magis arridet. Advolabat atriensis ad herum vocantem, in spem certam praemii erectus, ob operam concinne & oportune, uti opinabatur, domino navatam. At ille quaevis alia expectanti atriensi, quanquam inquit, ob operam futilem ac nugatoriam vapulare meruisti, scito tamen, *alapas* tam vili apud me non constare. Ejusmodi dicteria quo magis inopinata promuntur, eo plus urbanitatis habere nosti. Sub *donationis* voce, quae praecessit, videtur quodvis praemium potius, & quamcumque largitionem intelligere, quam ipsam libertatem, quae ob tantillam operam donari non solebat. Agnoscebat Tiberius subdole haec fieri ab Atriensi, quem propterea ludendum false joci inexpectati argutia sibi proponebat. Unde fit, ut malim paulo ante reponi, *id ut putavit nescio esse quid doli*, pro *boni*. intelligebat nimirum hoc officium gratis sibi non praestari, sed spe fiduciaque remunerationis. *Putare* scriptor Latinissimus posuit pro judicare, arbitrari, ut in illo Terentiano, *nolunt, ubi velis, ubi nolis, cupiunt ultro*. THR. *bene putas. Parvi putare* apud Catullum, *noli spernere, nec putare parvi*. Naso Met. x.

Tom. V.

E

Quid?

*Quid? quod amat, tantique putat connubia nostra,
Ut pereat.*

Exempla passim apud optimos scriptores sunt in promptu. En nunc de hoc loco, quae si tibi satis facient, gaudebo. Sin minus, ne sic quidem operam omnem cum Atrienſi nostro luſero, qui tibi gratificari ſim conatus. Sequitur nunc alter ille locus ſub finem libri ſecundi, *Sin autem ab illis doctus occurrit labor*. Hunc ego mendosum videri in ora codicis mei notaveram, nunc tanto-confidentius id ipſum affirmo, quod te quoque ſic ſentire intelligebam. Conſiciebam igitur pro *occurrit* literis tranſpoſitis & parum immutatis *arceatur*, quod ab *occurrit* minimum abit, ex quo tranſpoſitis a feſtinante librario ut jam dixi litteris *occurrit* natum, ſi, inquit, doctus hic labor arcebitur tuis auribus, tuaque lectione, per invidos & malignos homines, quos ſub livoris nomine jam ante tetigerat, forti animo feram & concoquam fatale exitium: *ut ab tolli minime poteſt*, ne verſus claudicare jubeatur. Hoc certe velle Phaedrum opinor, ut ſi verba ejus non ſum aſſecutus, a mente ejus non multum aberraviſſe me credam. *ut occurrit* commode interpretaris, ſed ne bis idem dicat Phaedrus, alio confugiendum eſſe arbitror. Pro eo, ſi *livor obtrectare* &c. malo, ut *livor obtrectare*. Nam repetitio illa & ſi parum concinna mihi apparet: utcunque livor, inquit, hanc curam reprehendat & carpat, non tamen effecerit, ut mihi laudis non ſim conſcius. Quod ſi ſtadium noſtrum perveniet ad aures tuas, hac felicitate ſubmovebitur facile omnis de livore querela. Sin autem ille apud te quoque mihi moleſtus erit, & ſcripta mea auribus tuis excludet & arcebit, malum fatale forti animo tolerabimus. Pro *arte fictas*, quod nescio quomodo diſplicebat, vide ne Phaedrus ſcripſerit, *Et forte fictas animus ſentit fabulas*. quomodo apud Martialem lib. i. Epigr. v.

Contigeris noſtros, Caefar, ſi forte libellos

Quamquam vulgata lectio defendi omnino poteſt, ſi verbum ſubſtantivum eſſe ſubintelligis, ſi animus ſentit fabulas haſce ex arte fictas eſſe, non deeſſe iis artem; qua propter temere nil mutandum. Libro iiii. ſub initium jam monuiſſe videor *officiis tuis* rectius videri, quam *officii tui*. Paulo poſt videtur ſcribendum, *otium des corpori*, *Ut adſietam fortius perſtet vicem*, etiam bene, ſi ex vetuſtis membranis deprompta eſt lectio, Naſo artis tertio tamen,

Nec nimium vobis formoſa ancilla miniſtret,

Saepe vicem dominae praestitit illa mihi.

Paulo poſt,

Et laude invita in hanc vitam incubuerim.

Nescio an fatale mihi ſit in hunc locum impingere, audebo tamen denuo tibi obſtrepere, etſi bis terve jam id inconſulte ſatis eſt factum. Primo ut conſtent numeri, repono trajectis vocibus, *vitam in hanc incubuerim*. Ita locus non erit iis, quae Faber hic monet, cum nullo exemplo aut auctoritate adſtruantur. Deinde ſupra ſe laudis conſcium dixerat, agens de livore.

Nec tamen eripiet laudis conſcientiam.

Et lib. iv. ſub finem, *mihi parta laus eſt*. Huc adde, quae poſt fabulam LXXXVI. mag-

magnifice de se praedicat apud Particulonem. Succurrunt tibi & Horatiana de Graecis poetis?

Grajis ingentum, Grajis dedit ore rotundo

Musa loqui, praeter laudem, nullius avaris,

Laus igitur peculium poetarum: Naso, *quid petitur sacris nisi tantum fama poetis?* qua propter valde metuo, ne affirmativa particula in negativam sit mutanda hoc modo; *Nec laude invita vitam in hanc incubuerim*, ita omnia erunt perspicua, & sequentia his respondebunt. Sed, nisi calculus tuus accesserit, falsum me conjecturae opinabor. Illud *natus sim poene Schola* quomodo excusari possit jam ostendi alias. Puto nihilominus trajectis vocibus reliquisse Phaedrum, *poene sim natus Schola*. Certe in schedis regiis frequentissime voces alieno loco positae versus claudicantes efficiebant, quas minutias piguit annotare. Denique eodem hoc carmine,

Rem me professum dicet forsân aliquis gravem.

Scribe, ne versus claudicet, *dicet forsân quis graveni*: quis pro *aliquis* eleganter ponitur. idque saepe in Ciceronis aliorumque ex optimis scriptorum vetustis membranis offendi, cum *aliquis* in libris vulgariis legeretur. Fabri illud, *fors aliquis* durius videtur. τὸ candore noto sub finem carminis refer ad *noto cavo*, de quo agebam proxime. Fab. XL. malo *ad huc Falernae faecis testa nobili*, vel, *e nobili*, quam quod vulgo circumfertur *Adhuc falerna faece*. odorem quae spargeret Falernae faecis; mox probe Faber, *qualem, te dicam, bona*, quod & mihi in mentem venerat. Videtur autem fabula referenda ad servitium. Fab. XLI. *Saevit irato impetu*; non damno hanc scripturam. Vide tamen, ne Phaedrus reliquerit, *iterato impetu*. Nam & saevisse jam ante pantheram ex iis, quae subsequuntur, apparet, *illis reverter hostis* &c; mox pro, *Et illa*, malo *at illa*. Fab. XLII. *Usu peritus hariolo velocior Vulgo esse fertur*, de velocitate hariolorum si quid observasti, cupio doceri. Fab. XLIII. *Pendere ad lanium quidam vidit simium*, puto excidisse voculam, ut, ob cognationem sequentium litterarum: *ut vidit simium*. *Quidnam saperet pro quomodo*. Fab. LIX. *quidnam fecissent*, pro quare, quod nescio an recte in *quianam* mutarit *Rittershusius*. Fab. XLIV. *tanto, inquit, melior*, Elegans loquendi modus, quem bene observat Faber. Similem locum castigavi *Metamorph. Nasonis* XIV. 657. Fab. XLV. *Namque ubi tricandum; bene strigandum Rigaltius*. Quod editionem anni MDCXVII. jam occupavit, cum *Salmasius* Solinianis exercitationibus pag. 56. perperam id sibi vindicaret. Fab. XLVI. *Et vigilem, cum nox venerit, malebam evigilem*. Mox, *age si quo est abire animus, est licentia*. Versus mendosus: nam repetitio *Est* hic ingratum quid sonat. Forte, *Age si quo fert ire animus, est licentia*, vel, *an licentia est?* Fab. XLVII. *Saepe te considera*; τὸ saepe corruptum videtur & alienum hoc loco. Mox puto,

Hi speculum, ut cathedrae matris appositum fuit;

Pueriliter ludentes forte inspexerant, vel, oppositum.

Nam faeminae in cathedra sedentes speculum habebant oppositum, ut id intueri sic commode possent, dum ornabantur. Faber legit, *in cathedra matris ut positum*

fait, propius vestigia veteris scripturae, fateor, sed docere debuerat speculum in cathedra poni solere. Fab. XLVIII. *Et cedo invidiae*, non satis locutionem assequor, tu certiora me doce. Fab. XLIX. *dum concursant familia*, perperam hoc in *concurſat* mutavit *Rigaltius*. videantur, si tanti est, quae notis ad Naſonem hujus generis observavi Remed. Amor. vers. 164. Fast. III. 189. Met. II. 188. & IX. & 26. quibus non pauca curae secundae allinunt. Mox *lucerna allata*, puto *illata* scripsisse Phaedrum. ita loquebantur veteres; Apulejus III. Met. *illatis luminibus epularis sermo percrebuit*. Met. XI. Naſo. *illato lumine vidit*, *Et scelus Et natam*. Fast. II. 35.

Fit sonus, inſclamat comites, Et lumina poſcit.

Maeonis, illatis ignibus acta patent.

Contra apud Propertium lib. IV. El. IX.

Lumina ſopitos turbant elata Quirites.

Q. Curtius lib. VIII. *Itaque apertis foribus Et lumine illato ſopitum mero ac ſomno regem excitant*. Fab. L. *En, ait hoc unum eſt*, & quae ſequuntur ſatis frigide dicta videntur. & mendosa eſſe opinor, ſententiam tuam de his quoque ſcire deſiderans. Nunc abrumpo: jamdudum enim ſum nimius. Quod petii frequenter, id denuo nunc repeto, vir celeberrime, ut delectum adhibeas iis, quae ad Phaedrum nonnunquam ſoleo annotare. Ago enim tecum familiariter, & ut quidque ſe mihi offert, ita in chartam conjicitur. Unde fit, ut ex iis multa, poſt maturam meditationem, ipſe improbare ſoleam eorum, quae primo arridebant. Interim, ut pergas de edendo quamprimum Phaedro cogitare te adhortor. Cum proxime literas in Italiam hinc dabo, enitar *Gudio* perſuadere, ut quae ad Phaedrum observavit, ad me mittat, ſi omnia non poteſt (nam ſchedas ſuas fortassis in Gallia reliquerit) ſaltem ea, quae majoris & praecipui momenti in his videbuntur. Quanquam id ipſum *Bigorio* quoque curae jam fuiſſe confido, qui frequenter Florentiam, literas ſolet exarare. Vale. Exarabam Holmiae CIOIOCLXII. a. d. II. April.

EPISTOLA XXII.

JOH. SCHEFFERUS

Nic. Heinfio.

Holmiam.

HAbebant multa nuperae tuae, quae me mirum in modum delectabant, ut; cum fab. xxxvi. pro *mecum ſcribis mi cum*, cum initio l. III. pro *praestes vicem* ponis *perſtet vicem*, ac ſimilia: audebo tamen in nonnullis meam quoque aperire mentem, pro libertate ea, quam mihi totiens conceſſiſti. Primum Fab. xxxvi. ſi verba, *id ut putavit Et c.* referimus ad Tiberium, non video primum, quomodo cum praecedentibus *to id* cohaereret, deinde, dixerat ante rem Tiberium intellexiſſe, & ſtatim ſubdit, judicaſſe dolum aliquem ſubeſſe. Videtur illa eſſe repetitio ſupervacua. Itaque aut haec verba expono de ſervo, tanquam ipſe, viſo quod intelligeret Caſar hoc officium ſuum, exultaret, ac neſ-

nescio quid boni allaturum sibi crediderit: aut pro *id ut*, & *ut* scribendum cenſeo; cupio autem amplius doceri, cum hos verſus *Rigaltius* & *Faber* in editionibus ſuis omiſerint, unde ita putes factum, an quod iſtis viderentur ſpurii, num potius, quod in libris melioribus non comparerent. *Rigaltii* editionem olim habui, & contuli cum meis, nunc in poteſtate mea non eſt, ideo nec conſulere poſſum & videre, num de hac re quid monuerit. In fine libri, verſu eo, *ſi livor* &c, ubi vis, *ut livor*, putabam propius ad veſtigia ſcripturae veteris reponi, *ſin livor*, & ſic olim notaveram: eodemque modo ſequitur, *ſin autem ab illis*, ubi olim ſcripſeram, *ſin autem* & *illis*. Libri tertii initio fateor me nondum ſatis vel tuam vel auctoris mentem percipere. De hoc ita opinabar, agi omnino de eo, qui *intrare Muſarum limen cogitat*, de quo ait noſter, *mutandum ipſi eſſe vitae genus*, quale ſequitur *Eutyclus*, non curis publicis onerandum animum, nec rei domeſticae invigilandum, vel ſimilibus aliis incumbendum, quae tamen vulgo laudari ſolent. Scilicet eos vulgo pro prudentibus peritiſque habent, qui noverunt rem augere ſuam, amplificare potentiam, dignitatem, & id genus; caeteros incumbentes litteris, ut ignavos, imperitos, & infructuoſa re ſe delectantes rident, ac contemnunt. Quo reſpectu, qui laudari cupit, eum oportet litteras omittere, curare ſe domumque ſuam, publicas ambire dignitates &c. At noſter ait ſe feciſſe contra, & poſtpoſita neglectaque illa laude incubuiſſe litteris, etſi ultro ſe offerret, offenderetque vias, quibus poſſet obtineri, adeoque invita negligi ſe a noſtro intelligeret. Quamquam autem iſta omnia fecerim, inquit, quamquam laudem, ſicut vulgo ſolent, & ego potuiſſem conſequi, neglexerim, tamen limen illud Muſarum intrare ſumma difficultate datur, *faſtidioſeque in coetum recipior*. Quo pacto intraturum, vel admiſſum iri putes eum, quem a litterarum ſtudio abſtrahunt tot curae aliae. Sic, inquam, de hoc loco ſuſpicabar, ſi erravi, meliora cupio abs te edoceri. Ad fab. XLII. non habeo, quod de *velocitate* hariolorum dicam, putavi artis aliquam, vel praefagitionis felicitatem, aut celeritatem intelligendam eſſe, quaſi diceret, celerius eos, qui edocti ſunt uſu, videre, quomodo futuro malo debeat occurrere, quam hariolos. Nempe quaeſcebat ruſticus, quomodo avertere periculum prodigio ſignificatum deberet: ad quod reſpondebant harioli, victimis opus eſſe; contra Aefopus, & certius, uſu ſcilicet edoctus, illam paſtorum nequitiam ſubjicit, quae apud Auctorem noſtrum legitur. Fab. XLVIII. pro & *cedo invidiae*, ſcribendum olim opinabar *accedo invidiae*: nam *cedere invidiae alicujus* dicitur, ut *cedere honori alicujus*, hoc eſt minus eſſe, quam pro honore, ſicut apud Virg. lib. III. Aen. At hoc utique non vult noſter, itaque *accedere invidiae* putavi dictum, ſicut apud Ciceronem, *accedere virtuti alicujus*, pro vicinum, propinquum eſſe, non reſugere velle, ſed ultro ſubire; iſta fuit mea ſententia, tu de ea videris; Fab. L. hunc putabam eſſe ſenſum, hoc unum, h. e. maximum ſummumque eſt, cur tanto ardore ſtudeam laboremque famam meam bonam ac integritatem adverſus te tueri ac defendere, quia non habeo teſtes, per quos facere hoc poſſum; ſi enim eos haberem, facile te plures redarguerent, nunc cum ſim ſolus, omnia

nia pro innocentia mea & fama conservanda mihi facienda sunt. Caeterum apparet facile, in vocabulis *laborare*, *integritas*, *testes* propter ambiguitatem jocos subesse. Mallem tamen, ne & hoc omittam, pro *en ait* scribere, & *ait*, si sic tibi videatur. Habes properanter breviterque ad ea, quae scripsisti nuper, quae velim ita legas, ut simul memineris, me istaec aliaque omnia iudicio submittere tuo. Interea te oro, ut ne defatigeris addere caetera, quae spectare ad auctorem hunc videbuntur; praesertim cum jam partem maximam tanta benignitate communicaveris. *Meursii* denarium Pythagoricum una cum Glossario Graeco Barbaro habere te existimo, si carere libro utroque potēs ad tempus exiguum; mittam aliquem ex affinis mei domesticis, qui petat abs te, & huc ad me curet deferri, reddam fide optima, neque longius, quam permiseris, detinebo; A. *Gronovio* habere litteras solebam olim, nunc longo tempore vidi nullas, itaque vereor, ne aegrotet, aut alia quapiam de causa minus grata detineatur, si quid nosti, scribe, vir nobilissime. Nullasne litteras habuisti ab Ill. Dn. *Schele*? quid agit is in Tacito, quo usque progressus est? Sed claudō, quia charta me jam destituit, & te porro, sicut hactenus scripsi, me amare velle etiam atque etiam oro. Vale; Upsaliae Anno MDCLXII. XVI. April.

EPISTOLA XXIII.

NIC. HEINSIUS

Joh. Scheffero.

Upsaliam.

Curionis negotium diu est, quod *Elzevirii*s commendavi, uti eram pollicitus: videtur quidem commendatio ipsa pondus habuisse suum apud illos, cum & gratias mihi egerint hoc nomine, & ad nonneminem ex propinquis suis in hac civitate negotiantem literas dederint, quibus is jubebatur *Curionem* super hac re convenire, sed noster ille nullibi jampridem comparet. Ad officinam certe ejus cum pueros frequenter miserim sciscitatum, ubi lateret bonus *Curio*; aut quando rediturus esset, incerta omnia ad me relata sunt. Itaque qui & alios bibliopolas ex nostratibus conciliare illi coeperam, supersedendum hac opera judicavi, dum ex latebris suis tenebrio noster emergat. Literas peregre cum complures nuper acceperim, in iis tamen vix deprehendi quicquam, quod tua curiositate esset dignum. *Schelium* de castris Romanorum parare Commentarios, *Gronovium* de novo Observationum volumine edendo cogitare nunciatur. *Holstenii* & *μακρῆς* bibliothecae quid factum sit, ex *Furstenburgiana* epistola cognosces. Frivola mea & tuum *Phaedrum* & te jam enecuerunt, credo. Pergam nihilominus te obtundere hisce ineptiis. In illo versu, *Et arte fictas animus sentit fabulas*, nihil omnino mutari placet. etiam in illo, *Pendere ad lanium quidam vidit finium*, non est necesse inseri τὸ ut: cum *Phaedrus* brevitati impense studens minus curare videatur periodum cohaerentem & nexum ejusmodi. Fab. III. immiscuit se parvorum formoso gregi. Probabam ante *Schoppia-*
num

nun illud *Pavim*, quod syllaba in hoc versu redundaret. Nunc satius fore opinor vocibus transpositis, *se immiscuit pavonum formoso gregi*. nam quod Tanaquillus Faber τὸ *immiscuit τεσσύλλαβον* statuit, nolim me hercules factum, cum nulla auctoritate id nitatur. Nam Virgilianum *Miscuerunt*, & Phaedri nostri ex fab. IV. libri II. *prae-buerunt*, nihil ad rem faciunt: cum in altero versu *Miscueruntque*, *herbas dactylus* sit, in altero sit anapaestus, *Felis-que catu-lis lar-gam prae-buerunt-dapem*. nam veteres *miscuerunt*, *prae-buerunt*, atque huiusmodi infinita alia tam correpta, quam producta tertia syllaba enunciant, quomodo & in *tuleritis*, *dederitis*, similibusque. Scis illud Nasonianum

— — — *Vitamque fatebor*

Accepisse simul. Vitam dederitis in undis.

Ubi productam habet tertiam syllabam. apud Maronem secunda in *tulerunt* & in *steterunt* corripitur. *obstupui steteruntque comae* & *vox faucibus haesit*. tum, *matri longa decem tulerunt fastidia menses*. egi de his nonnihil ad Nasonem variis locis. Praesertim ad Epistolam Didus vers. 53. & 165. nam in vulgatis codicibus ut plurimum ejusmodi loca depravata circumferuntur. Miror doctissimum *Fabrum* hoc aut ignorasse aut dissimulasse, si scivit. Fab. XLIX. *inconcinna videtur repetitio & damnanda: damnandam existimo, damnanda crimina*. Posterius forte corruptum. Fab. LI. *olim redisses ad splendorem maximum*. Vide, ne reliquerit nobis Phaedrus, *colli redisses ad splendorem maximum*. monilia enim collo, ut scis, appendebantur, atque illa ex baccis sive margaritis, ut plurimum, constabant. Versu proximo, *Ego qui te inveni*, non video, quid cohaereat oratio: nam *possum* pro *potes* erat dicendum puto,

Ego quod te inveni, potior cui multo est cibus,

Nec tibi prodesse, nec mihi quicquam potest.

nisi mavis,

Nec tibi prodesse, nec mihi quicquam queo.

Caeteris, uti vulgo sese habent, in priori versu intactis, sed malo alterum. Fab. LII. *in dubium plane res ut merito venerit*. malebam, *plana res*, ne duo ad-verbia concurrant. *planam rem* pro *facili liquidaque* posuit, & quae in facto consisteret, ut juris periti loquuntur, ita *planum facere* & *probare* conjunxit Lucretius lib. II.

Huic satis illud erit planum facere atque probare,

Non fieri partum. & libro I.

Hoc tibi de plano possum promittere, Memmi.

Liquido & facile possum promittere. *rem* igitur *planam*, *dubiae* & *difficili* opponit. hinc & illa ducta videntur apud jurisconsultos *de plano cognoscere*, *de plano judicare*, & similia, quod res perplexae & dubiae e tribunali judicarentur, faciles ac dilucidae in plano. Eadem fabula non opus est, ut repetam, cum memineris scribendum videri, *Tunc illa litem sustulit sententia*. Fab. LIIR. *Expedi, quod fecerim*, Rectius editio Rigaltii, *expedi quid fecerim*. Quare fecerim. Fab. LIX. *quidnam fecissent*, quod male mutant. Sic *quid veniant*, pro *quare*

quare veniant apud poëtas frequenter. de quo loquendi loquendi modo egi pluribus apud Nasonem Pont. lib. 1. El. 1. vers. 9. Fab. LIV.

Age porro, scisset cum crearer masculus.

Non videtur satis Latinum esse, nam aut *scierit* dicendum erat, aut *scisse*. de quo sententiam tuam scire desidero. tum an *age* satis commodum hoc loco arbitreris. Nam id si mendo non vacat, videtur subintelligendum, demus, concedamus scivisse. Fab. LV. *cavoque ramo*, malebam *rami*, quod vox *cavi* substantive passim apud nostrum occurrat, uti etiam infra hac ipsa fabula, *noctua egressa e cavo*. ita & Horatius frequenter. Ibid. *Sonare cithara quos putes Apollinis*. rectius fore videtur aut, *sonari cithara*, aut *sonare citharam*, aut *sonare cithara Apollinem*, non *Apollini*. nam *cantus sonant cithara Apollinis*, videtur modus loquendi paulo insolentior. Fab. LVI. & *Myrtus Veneri*, at praestiterit, ni fallor. Ibid. *At mehercule narrabit, rō narrabit* non opinor sanum esse. *mehercules* etiam legendum, ut syllabis consulatur forte

At mehercules pararit, quod quis vobuerit

pararit, sibi legerit, compararit. Sic *aere parare*, pro emere. Atque haec suffecerint hoc loco. *Justus Pluymerus* Typographus Amstelodamensis significavit proxime literas Roma se habuisse nuper admodum a *Gudio*. Die crastini rogabo illum, ut observationum nonnihil ab illo conetur impetrare meis verbis ad Phaedrum. Vale, vir Clarissime, & me solito affectu perge complecti. Holmiae exarabam Anno *MDCLXXII*. a. d. xx. Aprilis. Ex Dania allatam nuper huc Sefeldianam bibliothecam narro, cui locus in arce regia est datus. Multa illic Meursiana vidi *ἀνέκδοτα* aut editis auctiora.

EPISTOLA XXIV.

JOH. SCHEFFERUS

Nic. Heinsio.

Holmiam.

Remitto ecce tibi, quas ad me misisti nuper literas, proque illarum communicatione gratias humanitati tuae ago singulares, quando mihi nil jucundius, quam scire, quid viri eruditi per regiones externas in re litteraria moliantur. Fab. XLIX. pro *damnanda crimina* quod merito improbas, legebam olim, *clam ante*, quod quale sit tu videris. Fab. LI. pro *nec mihi quicquam queo*, ut putabas, mallem retentis omnibus scribere *potis*, ut sit eclipsis, pro *potis sum*, quomodo Virgilius, quem semper respicit, Aen. III.

Nec potis Jonios fluctus aequare sequendo.

Fab. LIII. pro *quid fecerim*, legebam, *qui id fecerim*, etsi tecum alterum non improbem. Fab. LIV. non satis scio quid cum illo *fuiisset* facere debeam, nam video & Ciceronem illud *age porro* ponere sic absolute: ut de Invent. II. *age porro, quid si velint iudices adscribere, passurusne sit populus*. Itaque suspicor hunc esse sensum verborum: concedamus interim, etsi scisset, niger an albus essem, tamen cum crearer masculus. Puto autem hic deficere orationem agni, &

& sequi aliam canis interruptentis: quia enim videbatur agnus allaturus quidpiam contra matrem, arripit occasionem canis praeveniendi ejus ex eo, quod sexus mentionem fecisset, aitque, ingenti beneficio affectum esse a matre, quod marem, non faeminam ediderit, cui mox respondet agnus, monstrato periculo praesentissimo ex hoc beneficio, ut canis putabat. In istud *sonari cithara*, vel *sonare citharam* facile tecum consentio; peto tamen, ut me erudias, num non, sicut apud Horatium i. *sonare plectro aureo* dicitur, sic *sonare cithara* dici queat, & sicut apud Fabium lib. i. cap. 10. legitur; *cantus hortatur remigio*, sic rectum sit *cantus sonat cithara*, cantusque canentem significet. Fab. XLVIII. pro *accedo invidiae* suspicabar nunc, & *me do invidiae*, vel sit dictum sicut apud Ciceronem in somnio Scipionis, *dare se sermonibus vulgi*. Sane Idem *dare materiam invidiae* dixit alicubi. Sed de hoc sententiam tuam exspecto, peto autem, iterum iterumque, ut ne, quae in libris sequentibus admonitione indigent, velis omittere taedio laboris, cum ex eo fructus non ad me solum, sed & totam juventutem studiosam perveniat amplissimus. *Meursii* Glossarium cum ejus Pythagorico denario huc mecum referre ausus sum, singularis benevolentiae tuae erga me fiducia, dabo autem operam, ut & hinc a me habeantur munde, & post tempus breve salvi ad te perveniant. De caetero summas tibi ago gratias pro nuperis diebus exhibita humanitate, nec in votis habeo amplius, quam ut excurrere ad nos quoque velles, domumque nostram praesentia tua beare. Darem profecto operam cum meis, ut constaret tibi, quantum & debeam, & debere velim omni tempore, Vale. Upsaliae 2. d. 29. April. CIOICLXII.

EPISTOLA XXV.

JOH. SCHEFFERUS

Nic. Heinsio.

Holmiam.

Optima pulcherrimaque sunt, quae nuper tuis litteris indicasti, imprimis placuit illud, *age poro scisse, num crearer masculus*, ut prope jurem, sic scripsisse Phaedrum, nec minus ingeniosum est illud, *circum in quaestus ducere*. Fab. LX. pro *& sane bene* legitur in prioribus editionibus, *& sane leve*; quare putabam, *joculari id tibi* (vel *hoc tibi*) *videtur, sit sane leve*, ut pressius inhaeretur scripturae veteri; alias amplector tuam emendationem lubentissime. Illud *Pelii in nemoris* Fab. LXIV. haud dubie est tale, ut ambigere de eo stultum sit: verba ista, *justoque vindicavit exemplo impetum*, sic intelligebam, Minos vindicavit incursiones piratarum justa poena: *impetum* putabam positum pro iis, qui impetum faciunt, quomodo passim noster in talibus solet, ut Fab. v. *improbitas abstulit*. Fab. 13. *ingemuit corvi stupor* &c. *Exemplum* credebam significare *supplicium*, ut apud Caesarem, Terentium, & alios. tu videris, quam bene ista a me dicantur. Fab. LXXVII. *sordidum perjurium* putabam dictum, quod committitur ex causa sordida, propter avaritiam scilicet, quam dici *sordidam*

Tom. V.

F

est

est notum, & pauculos quosdam nummos. Ut sit sensus, tu, qui non cessas etiam Deos provocare ad iram, & patientiam eorum irritare continuis perjuriis, etiam ex levissima & sordida plane causa, tantumque, ut vel quadrantes pauculos aggredes patrimonio tuo; itaque ergo intelligebam, si erravi, tu aberrantem reduces in viam. Nunc oro enixe, ut significes, quid censeas de isto versu, qui est Fab. LX: *aliquot venit saeculis rete tortitus. Rigaltius* postremo edidit, *aliquot secutis venit & retorridus*, quod non displicet. Sed quia semper haeres incertus, num sic scripserit ex codicibus antiquis, an ingenio, scire cupio, quae tua sit sententia. Vexatissimum locum, qui est ab initio libri quinti, nescio, an possim ita emendare, si scripsero.

Qui pretium operibus majus inveniunt, novo

Si marmori adscripserunt Praxilem, suo

Detrito, Myronem argento, fabulae & audeant

Adeo fugatae.

Suo id est proprio, vero, justo, ipsi debito; intelligitur autem nomen, quod non quidem expresse, virtute tamen inest *Praxitelem*: illud *Myronem argento* intelligendum est ex repetitione praecedentium: si *novo argento adscripserunt Myronem*, sequitur deinde, *audeant hoc ipsum facere fabulae*, praesertim cum nunc adeo sint fugatae ac ejectae ex usu hominum per nescio quem novorum contemptum. Porro *fabulas* hic puto poni pro scriptoribus fabularum; more solito apud Nostrum, de quo ante dixi. Quaeso te etiam etiamque, ut ignoscas meis his ineptiis. Non possum non significare tibi, quae in mentem quoquo modo mihi veniunt, si forte sternere viam possint ad inveniendum verum, aut id saltem, quod est vero proximum. Verum haec de Phaedro. Non possum autem non occasione hac apud te conqueri de fortuna mea Aelianique mei, quem Argentorati denuo in lucem edere paraveram. Nam cum in prioribus notis meis multa viderem esse immutanda, multa explicanda uberius, explendaque, feci illud, quanta cura potui, perque partes misi Argentoratum, & in magna expectatione fui, fore, ut editio secunda liberaret me ab iis, quae per incuriam & festinationem perperam in prima admisi. Nunc ecce, quid acciderit; primum partem maximam eorum foliorum, in quibus scripta erant, quae secundis curis annotaveram, Typographus per incuriam amisit. Deinde ipse paucis diebus post prolapsus ex equo, vitam cum morte permutavit, ita editus est deinde Aelianus, maxima parte retentis notis veteribus & omissis illis omnibus, quae postea notavi; quae res quantum mihi afferat dolorem, credere non potes. Scripsi, ut ne publicarent quidquam editionis hujus, priusquam videam, quid desit, ut supplere possim, adjecto appendice. Sed quia metuo, ne plus lucrum suum, quam famam meam attendant, agi per te, domine, velim cum Typographo quocunque ex vestris, explorarique voluntatem alicujus de edendo eo auctore tertia vice. Qualis si posset reperiri, vel in ipso titulo ostenderem, hanc secundam esse veramque editionem, illamque Argentoratensem pro mea me non agnoscere; sed hoc tuo judicio permitto, qui scribes, quid hoc casu faciendum mihi censeas, & si putas facere id, quod pro-

proposui, debere, significabis, an me reperturum aliquem Typographum inter vestros existimes. Nam *Curio* quidem noster omnibus his non sufficit, & periculum est in mora, uti vides. Atque utinam hîc Phaëdrum saltem posset edere, dum omne tempus in describenda Soceri mei història infumit, vereor, ne ea finita discedat, Phaëdrumque relinquat mihi; quo magis oro rogoque, ut occasione data editionem ejus urgeas apud *Curionem*, hominemque eo impellas, ut primo quoque tempore praelo committat, plus enim apud eum tua unius valet auctoritas, quam decem aliorum. Vale, ac istis nugis meis ignosce. Upsaliae a. d. 6. Mai. A. C. MDCLXII.

EPISTOLA XXVI.

JOH. SCHEFFERUS

Nic. Heinsio.

Holmiam.

ET tuas & Cl. *Bigotii* literas, quibus hîc respondeo, accepi, redditus & antequam biduum est Seneca *Gronovii*. Attulerunt mihi omnia non mediocre gaudium, non & *Gronovium* non prorsus oblitum esse nostri, facile ex argumento tam egregio illustrique collegi, & te in continuatione favoris erga me minime defatigari, cum ex tuis, tum ex Cl. *Bigotii* litteris abunde intellexi, cujus amicitiam, & promptum rerum mearum promovendarum studium totum bonitati tuae me debere profiteor; Atque utinam in me quid esset, quo vicissim declarare tibi animum meum possem, nunc in me nihil superest, quam ut simpliciter agnoscam, tantum debere tibi, quantum solvere nunquam poterò. De Aeliano meo scribis optime, atque utinam hanc mihi operam praestare velles, scribereque ad eos, per quos juvari posse me existimas. Memini me legere semel iterumque Aeliam variam historiam in indice Regiae Bibliothecae, itaque scripsi Cl. *Bigotio*; addes & tu meis precibus vota tua desideriaque, ita spero nihil nobis negaturum. Etiam in Anglia MS. esse audio, sed cujus generis, ignoro. De Phaëdro nunc non habeo magnopere, quod scribam, cum impediunt me operae Typographicæ, absente Socero meo. Gudiana conjectura, de qua scribis, placet optime, interea nescio, quomodo illud in te mihi videatur obscurum, nempe sermo est de *anima*, quæ hîc odorem significat, itaque non in odore bonum, sed odor ipse bonus longeque melior fuisse olim videtur, scilicet cum non ex vacua amphora, sed vino ipso proveniret. Si de lagenæ sermo esset, viderentur omnia melius quadrare, nunc *magnum bonum est in anima*, *majus bonum est in anima*, pro anima est bona, anima est melior, seu odor est gratior, est praestantior, duriusculum videtur, verum hoc non scribo, tanquam non amplectar ingeniosam viri praestantissimi, ac litteris ipsis veteris scripturae inhaerentem emendationem, sed ut pro libertate mea, quam concessit mihi tua bonitas, sententiam tibi aperiam mei animi, & erudiri abs te cupiam. Cl. *Gronovio* si quando scribes, quaeso, significa, ut & accepisse me egregium illius munus indicem, & gratias pro eo agam. De caetero te oro,

ut & festinationi meae, & litteris pessime scriptis ignoscas, cum enim morbi subinde me vexent, factum est, ut in lecto istas exarare coactus sim, per summam animi molestiam, & corporis non mediocres labores. Vale, vir Nobilissime. Upsaliae a. d. 13. Mai. CIOIOCLXII.

EPISTOLA XXVII.

JOH. SCHEFFERUS

*Nic. Heinsio.**Holmiam.*

SEro tuis amantissimis respondeo, nam citius non poteram, propter corpus Saegritudine afflictum, quae cum subinde revertatur, dabis, opinor, veniam tarditati, quam imposuit non ignavia, sed extrema necessitas. De caetero, unde incipiam, quove desinam, gratiarum actionem, quam pro tot tantisque beneficiis tibi debeo maximam, Domine, non invenio. Totiens interpellavi negotia tua, totiens ad scribendum te compuli, nugisque meis ac quisquiliis negotium feci tibi. Quicquid denique eruditissime in Phaedrum annotaveris, mira promptitudine ac facilitate abs te impetravi; scio saeculi consuetudinem, & invidiam aliorum, haud secus atque nescio quae secreta recondentium ista, sibi que solum servantium; quo magis praedicanda tua est humanitas, & amor ac benevolentia erga me singularis, pro qua utinam in me esset, quod vicissim rependerem. Nunc nec ignota tibi mea est infirmitas, & ego eam non dissimulo, non ut hac ratione debitum exsolvam, sed ut me in aere tuo esse & profitear nunc, & in posterum omni tempore agnoscam. De Phaetro, nondum sic convalui, ut scribere multa queam. De Aeliano potius rogo, ut, quantum potes, institutum meum promoveas, tam enim male me habet casus nuperus, ut quaeram omni ratione, qua potest fieri, corrigere, quod in dedecus meum vergit, absque mea culpa. Esse in Bibliotheca Parisiensi MS. certum est ex catalogo. Quid igitur? quando, si non per Cl. *Bigotium*, per alium aliquem varias lectiones codicis ejus occupare possemus. Quid? si & ex Anglia opera Cl. *Bigotii* subsidia accederent; sed de Anglia scio nihil, totum tuae fidei curaeque committo, quem scio nihil omisurum eorum, quae in rem meam pertinere poterunt. Phaetrum *Rigaltii*, cum ejusdem Glossario reddidit mihi Socer ante dies aliquot: restituam utrumque librum una cum caeteris occasione proxima. Interea Vale, & brevitati meae ignosce, plura scripturus, cum plene convaluerō. Upsal. a. d. 27. Mai. CIOIOCLXII.

EPISTOLA XXVIII.

JOH. SCHEFFERUS

Nic. Heinsio.

Helmiam.

Remitto ad te literas *Bigotii* cum multa gratiarum actione. Quae de Phaedro scribit placent, verum metuo ne sint frustra curae meae futurae, post tot aliorum in eo collatam operam, nam & *Gujeti* ais prodiisse notas in eum, quas videre cupidissime desidero. Vir fuit, sicut mihi quidem videtur, perspicax, & in genere hoc studiorum optime versatus; verum nimis fidens suis conjecturis, & ad corrigendum audax, ne dicam, temerarius; tanto magis aveo cernere, quid ipse de nonnullis Phaedri locis censuerit; Quod autem ad *Bigotium* attinet, oro te, per quicquid possum, ut cum eo agas serio meo nomine, petoque enixe, ut, si quae ad Aeliani Variam comparare mihi possit, comparet, quando prodiisse illam, de qua scripsi nuper, editionem intelligo, publicatamque esse, licet prohibuerim, petierimque; ut expectarent, donec per modum addendorum ea, quae amissa sunt, restitui, & caeteris conjungi possent. Quia itaque famae meae interest prodire tertiam editionem, quanta maxima celeritate potest, iterum iterumque te oro ac obtestor, ut me hac in parte juves, ac si per alios quoque comparare mihi possis quidpiam ad hoc negotium idoneum, id facias. Mauricii liber septimus jam in Latinum sermonem est translatus: restant libri quinque, quos bono cum deo absolvere conabor quatuor, vel quinque hebdomadam spacio. Interea velim, si sic ferat occasio, ut explores *Elzeviriorum* animum ac voluntatem, videasque, num edere eum ipsi velint. Nulla erit in me mora, curabo brevi omnia describi, ut typis edi commode queant. Etsi autem de interpretatione mea polliceri nihil ausim, id tamen citra arrogantiam dixero, me plus centum locis ostensurum, Leonis interpretem *Jobannem Chesium* adeo non percepisse scriptoris ejus mentem, ut mirum sit, interpretationem illam etiam *Meursium* servare voluisse. Sed hoc plenius ex ipso opere intelliges. Si parare mihi Cl. *Bigotius* Arrianum volet, rem faciet gratissimam, quamquam non existimem expectare me debere, donec & hic accedat, cum Mauritio: quum conjungi nequeant, nisi magno volumine, ad quod tardiores esse typographi consueverunt. Cl. *Gronovii* silentium vehementer miror: scripsi ei quinquies & amplius, sed responsum vidi nullum. Mutasse ipsum animum priorem erga me, summa viri tantoque tempore probata mihi humanitas & sinceritas suspicari prohibent; malo credere, id fieri per otii penuriam, aut quamvis aliam causam, quam aversionem. Haec scripseram, in vicina praedia mea iturus, cum ad me venit nobilis ille Germanus cum Italo quodam, litterasque tuas reddit. Feci, quantum potui, pro ratione loci hujus, & nostrarum facultatum. Neque puto negaturos, voluisse me testari, quantum tibi debeam, ac debere semper velim. Nomen utriusque iterum excidit memoria, quod per te rescire desidero;

dero. Vale, vir Nobilissime, ac si molestum non est praesentiae tuae honore nos aliquando dignare, non est toto anno tempus opportunius, ut puto. Upsaliae a. d. 15. Juli, CIOCIOLXII.

EPISTOLA XXIX.

JOH. SCHEFFERUS

Nic. Heinsius
Holmiam.
Sicut multis nominibus gratae mihi fuerunt tuae literae, sic illud ingratissimum, quod post Sororis tuae, Illust. Domini Schelii quoque obitum, & ex duplici hoc casu, duplicem moestitiam tuam nunciarunt. Nec profecto leviter animum meum tetigit mors immatura tanti viri, quem tu rectissime ais potuisse multum studiis meis prodesse, si diutius vixisset. Testatur id satis, quod in Polybium nuper est commentus. Testantur pauca, quae in postremis ad te suis de nonnullis Taciti locis differuit, cujus cum amplissimas fecisset nobis spes, ignoro, an nunc quidquam sperare audeamus. Atque ista quidem est conditio mortalium. Quo magis ego festinare soleo, ut mea quoque modo absolvam, & scripto saltem comprehendam, maxime ea, quae in libros ante a me compositos emendandi atque illustrandi gratia meditari soleo, inter quae non postrema sunt illa in Aeliani Variam Historiam, pro qua tantopere te laborare gaudeo, gratiasque tibi ago. Recte autem monet Cl. *Bigotius*, non debuisse me sic festinare cum editione illa, verum amplius est quam biennium, postquam mea misi Argentoratum, quo quidem tempore de singulari tua ista erga me benevolentia, multoque minus de notitia *Bigotii* polliceri mihi nihil quidquam poteram. Agebam ergo tum, quantum erat in viribus meis, atque utinam sic omnia fuissent publicata, sicut ego destinaveram. Nunc dupliciter male mecum actum est, nam & subsidiis necessariis fui destitutus, & quae deleri, immutari, suppleri volui, partem maximam manserunt, ut fuerunt in editione prima. Quare, ne diutius haec macula operi illi inhaereat, ad editionem tertiam festino, ad quam juvabunt me plurimum ea, quae tam amice liberaliterque pollicetur *Bigotius*, & te aliunde conquisturum significas. Et non possum non denuo te orare, ne graveris pergere in hoc amicitiae officio, & studia mea etiam hac in parte promovere. Notae *Gajeti* in Phaedrum traditae mihi sunt. Breves esse video, quasdam quoque minoris momenti, sed quia nihil tam exile est, ad quod non interdum offendat juvenus, propterea recte me facturum spero, si omnes, quotquot sunt, seorsum edam, notisque meis subjungam. Interea pro iis, ut caeteris multis tuis, summas tibi debeo gratias. Cl. *Gronovii* literae, & pro quibus transmissis pariter tibi ago gratias, nil continebant praeter quorundam Phaedri locorum emendationem ex Cl. *Gronovii* mente, de quibus olim ad eum scripserim, ac ne verbo quidem meminit eorum, quae nunc habeat sub manibus. Tantum de multitudine negotiorum tuorum queritur. Itaque nil tale est in iis, quod tu sperabas, ut videres ipse, si

si non describere cogrer ea, quae in illis continentur, & adicere meis notis. Mauricius ad finem est perductus, nunc describitur; a me vero notae in eum adornantur. Quae Cl. *Bigotius* monet de versione *Gazae*, non sunt contemnenda. Vellem itaque, ut exploret, si potest, amplius. Verèor tamen, ne sit res multiplicis, si non irriti laboris, cum de eo nemini hactenus innotuerit, cum tamen caetera *Gazae* satis sint cognita. Ego sane propter ipsum mea non differo. Si haberi potest, bene est, ac ne sic quidem poenitebit me impensis laboris; si non potest, cum mea erunt confecta, publicabo. Nisi forte tibi fecus videatur. Pro nobili isto Germano nullae mihi debentur Gratiae abs te, verum ex adverso a me tibi, quando & hac ratione facis, ut mea innotescant viris bonis, per quos promoveri possunt. Sic enim & ipse mihi est pollicitus. Neque dubito de fide ejus, si modo salvus eo veniat, quo iter suum destinavit. Mitto alias hic litteras ad Cl. *Gronovium*, quas, nisi grave est, ad sociabis tuis, quandocunque scripseris. Nam ut statim mittantur, nihil opus est, quia nihil continent, ad quod responderi mihi cito cupiam. De caetero constanti tuae gratiae ac benevolentiae commendo me meaque, teque plurimum valere jubeo. Upsaliae a. d. 12. August. MDCLXXII.

P. S. Cl. Dominum *Bigotium* quaeso enixe, ex me salutes plurimum, si forte ei scribes, moneasque, ut pergat promissa exsolvere. Nihilne rescripsit ad locum illum auctoris Graeci nescio cujus? Nihilne de Arriani Tacticis? An per eum haberi possent Basilii Patricii Naumachica? Memini *Vossium* mihi nominare aliquem Graecum ineditum, qui scripserit de partibus navium, & alium, qui de Piratica. Si quid ex eo super his potes amplius informare, quaeso, ne omitte scribere mea causa, cum occasio dabitur.

EPISTOLA XXX.

JOH. SCHEEFERUS

Nic. Heinsio.

Holmiam.

PRO nuperis tuis summas tibi ago gratias, vir nobilissime, praeterquam enim quod humanitatis tuae, favorisque erga me soliti sunt plenae, nova quoque continent promissa de implendis eis, quae proxime rogavi. Neque defuturos arbitrò viros bonos petitioni meae, si tua insuper auctoritas accesserit. Memini me audire quondam ex Cl. *Vossio*, vidisse ipsum nescio quem scriptorem Graccum de partibus navium inter MSS. *Salmasii*. Velim, ut de eo scribas ad Cl. *Bigotium*, atque utrum, sive ex illo codice, aut simili fortassis Bibliothecae Regiae, si ibi possit reperiri, descriptus haberi queat, explores. Est Parisiis Ephorus ille Dom. Baronis *Bielkii*, discipulus quondam meus, per quem caetera possent expediri. Nomen ejus est *Andreas Nicolai*, qui mea causa quidvis faciet. Pro his, quae de Avieno scribis, gratias ago summas. Non possum eum bene jungere Phaetro, quia metuo, ne libelli magnitudo crescat plus, quam ego velim propter nostros homines, qui nullam in rem aegrius pecunias erogant,

gant, quam in libros. Itaque ipsum quidem industriae alienae relinquo. Nec me intellexerit satis *Curio*, cum de Avieno tecum ageret. De *Gujeti* notis solis scripseram, significaveramque velle me eas seorsum peculiari appendice addere meis annotationibus in *Phaedrum*: speraveram fore, ut excurrere ad vos liceret hisce nundinis, ac videre apud te libros, quorum haecenus in tuis fecisti mentionem. Nunc id fieri haud posse intelligo propter causas varias. Quamprimum autem absolvetur *Phaedrus*, quem nunc sub manibus habet *Typographus*, veniam. Quae de rebus *Mori* innuis subobscura sunt, vellem explicares amplius. Doleo vicem eruditi viri, & quondam *Genevae* mihi cogniti. Socer meus paucos dies fuit *Holmiae*, ut offerret *Historiam* eis, quibus inscripserat, & statim discessit cum uxore, propter nundinas, quae tum in hac urbe celebrabantur. Queritur non datam sibi fuisse occasionem, qua te salutaret, dum nunc hujus, nunc illius ex *Proceribus* regni frequentare domum, & quaerere admissionem ac colloquium cogitur, & cum petitione excusationis, salutem simul plurimam perofficiose tibi impertit. Caetera expediet *Curio* coram, cui simul commisi *MS. Horatium*; si quid est in eo dignum observatione, gaudeo, sin minus, de voluntate tamen mea vel hinc constare tibi volo. Vale, vir nobilissime, ac favere mihi perge. Upsaliae a. d. 30. Septemb. Anno C. CIOICLXII.

EPISTOLA XXXI.

JOH. SCHEFFERUS

*Nic. Heinso.**Holmiam.*

Quod raritatem litterarum tuarum excusas, in eo facis pro solita humanitate ac civilitate tua, Domine: nam tu tot publice privatimque occupatus laboribus, quid opus habes excusatione apud eum; qui cum vivat in otio, ne sic quidem satis diligens est, aut frequens in scribendo; nec necesse arbitror hoc excusare tibi, quando ultro te novisse arbitror, quam saepe interveniant etiam nihil agentibus, quare scribere non queant; itaque tu quidem scribis, quando voles, voles autem semper, scio, quando argumentum otiumque erit. Promtitudinem voluntatemque tuam in juvando *Aeliano* meo summa reverentia amplector ac ostentor. *Bigotio* ipsi meis litteris importunus esse non sustineo, ad quem si scribes, salutabis eum ex me perofficiose, simulque exquires ex eo cuncta, quae nuper de *Auctore* partes navium explicante scripsi. *Phaedrus* magna parte sua jam est descriptus, quae tu felicissime, ingeniosissimeque suggestisti mihi, adeo non censeo premenda, ut injurius essem & adversus *Phaedrum*, & adversus omnes ejus lectores, si publico non communicarem. Faciam tamen, quod totiens mones, & de quibus amplius deliberandum putabo, omittam. Non quod judicium mihi aliquod sumam in tua, sed ut voluntati tuae paream: erit forte, cum & illa promere, ampliorique cura stabilire dabitur. *Mori* negotia plane mira & perplexa sunt. Ego non video; qua fa-

cun-

cundia sua eluere hanc maculam valeat, quamquam credam eum esse, qui casus quosvis animo, nescio an bene dixerō, magno ferre soleat. Non habeo, quod magnopere hac vice scribam, hoc solum oro, ut me gratia tu, sicut hactenus, sic in posterum complecti ne cessare velis; Cl. *Gronovium*, si forte ad eum scribes, salutari ex me perofficiose cupio. Vale. Upsaliae a. d. 28. Octob. CIOIOCLXII.

EPISTOLA XXXII.

NIC. HEINSIUS

*Joh. Scheffero.**Upsaliam.*

C*Hristianus Hugenus Zulichemius* Constantini filius, Juvenis nobilissimus, & Matheseos inprimis peritus, tum arcta mihi junctus jampridem consuetudine, cum commentarios de Phaenomenis Mathematicos moliatur, mox in lucem proferendos, rogavit me verbis seriis, ut, si quid hujus argumenti per hosce terrarum tractus a me corradi posset, ornamento studiis suis futurum, id ne gravarer ad se mittere. Phaenomena tria aut quatuor in hisce regionibus spectata, in quibus & classem navalem, vivis coloribus descripta jam ad illum, ut postulabat, misi. Nunc cum ex fama partim publica, partim ex historia viri Clarissimi Soccri tui sim edoctus, ante expeditionem Regis Caroli Gustavi, nuper defuncti, spectatum in agro Upsaliensi phaenomenon a viris compluribus fide dignissimis fuisse, rogatum te volo, ut ejus ectypum, si haberi possit, mihi obtineas, sin minus, accuratam saltem narrationem, quam amicus meus lucubrationibus suis inferat, ac bono publico divulget. Si quid praeterea similis argumenti aut hi, aut alii ex amicis tuis viri literati huc conferre potestis, multum vos demerituros esse & me & *Hugenium* certi estote. *Bigotius* Kal. Octobribus epistolium breve admodum ex Neustria ad me dedit, quo significabat de repetenda Lutetia se cogitare. Quintili & Septembri mense ad illum scripseram verbose, etiam ad alios amicos Celtas: neutrius epistolae cum is meminere, facile persuadeor ut credam eas in via perisse, una cum his quas addideram. Sperare me jubet uberrimas rerum novarum literas, quas ex urbe regia ad me sit daturus. Ex Italia nihil dum accepi, quapropter impatiens diuturnae sollicitudinis occupavi per literas nuper amicos taciturnos, in his *Datam* quoque, cui de Aeliano negotium operose commendavi. Metuo tamen, ne aut ad plures abierit, aut valetudine parum prospera utatur. Plane enim insolens est, & miraculo simillimum, hoc ejus silentium. A *Gronovio* etiam nil ad me perfertur, etsi *Observationes* ejus prodiisse, cum ex Catalogo Nundinarum Francofurtensium autumnali, tum ex Graevianis literis intelligam. Idem Livium & Tacitum suis aliorumque animadversionibus illustratos praelo typographico jam commisit. Phaedrum tuum avidissime exspecto, Virgilium MS. recte accepi. Vale, vir Amicissime, Holmiae a. d. VII. November. CIOIOCLXII.

DEbuiſſem ante octiduum reſponſiſſe tuiſ, verum interveniebant neſcio quae negotia, quae me alio trahebant. Caeterum quod tum diſtuli, nunc quantum poſſum, expediam verbis. Nam imaginem rei nemo expreſſit pictura. Faciam hoc autem ea fide, qua mihi relatum eſt ab illis, qui coram aſpexerunt ſignificaveruntque litteris ipſi requirenti, quas de verbo ad verbum in Latinum converſas attulit Socer meus in notis ad Hiftoriam ſuam. Accidit Anno MDCLV. d. 18. Febr. cum ſolemniſ haberetur verbi divini concio in Pago Raſbökil, non multum Upſalia diſtante, ut ſerius veniens miles quiſpiam, dum contendit ad portam templi, haud procul ab ea parte animadvertit ingentem equitum peditumque numerum, quare non parum commotus templum ingreditur, unumque & alterum ruſticorum in proximis ſubſelliis excitat, oratque, ut egreſſi videant ipſi quoque, quid negotii foris ſit. Dum exeunt illi, ſtatim rumor per templum circumfertur de copiis militaribus in proximo. Ergo egrediuntur omnes, ſequitur Paſtor ipſe, ſolliciti de ſe, rebusque ſuis. Cum veniſſent extra portam, vident arcem pulchre conditam aedificatamque, & ad eam exercitus pedeftres equeſtresque praelio concurrentes in illis ipſis campis, qui proxime templo adjacent. Erant omnia vero tam ſimilia, ut ambigerent omnes, juſtumne praelium, an ſpecies tantum ejus aliqua oculis oblata foret. Adeo conſpiciebantur omnia, galeae, criſtae, haſtae, ſclopetae, frena & id genus. Ipſi vultus omnium dignoſci poterant, tantoque pugnant ardore, ut perſequerentur ſe per virgulta, fruticeſque paſſim extantes, ipſique bombardis in defectu rerum aliarum caedere ſe cernerentur. Paulo longius ab iis conſpiciebantur naves bellicae velut per ſumum aut nebulam ultro citroque vectae, ut ſolet in praeliis, impetentes ſe omni genere armorum. Emicabant undique ignes ex tormentis bombardisque pugnantium. Haud procul ab arce velut a latere ambulabat vir corpore procero, pallio demiſſo, pileo bene lato, velut ſpectator totius negotii. Qui tandem verſus arcem contendens evanuit, & una cum ipſo quicquid erat militum naviumque. Durabant haec tempore bene longo, quamobrem aliqui ſive propius ſpectandi ſtudio, ſive quia de rebus ſuis in vicinia erant ſolliciti, eo contendebant, ubi videbant iſtae gerī. Verum quo appropinquare ſe propius putabant, hoc ſimul intelligebant ſe abeſſe longius, denique cum partem bonam confeceſſent itineris, quae ante a fronte, eadem poſt a lateribus, & mox a tergo animadvertēbant. Sequenti die circa idem tempus eodem in loco non exercitus aliqui conſpiciebantur, verum turba quaedam atratorum, palliis ad pedes lugentium more demiſſis, & pileis latis, ſtans immota in illis ipſis campis, quae paulo poſt diſparuit. Iſtae ſunt, quae in dictis Raſboenſibus campis ſunt viſa, ne-
mini

mini non tum statim habita pro omine, quando in illis ipsis campis, eo tempore, quo gloriosissimae memoriae Rex *Gustavus Adolphus* cecidit in acie Lutzenfi, tumultus incredibilis pugnantium inter se auditus est iis, qui tum forte iter per eos faciebant. Quorum unus hodieque superstes in hac urbe vivit, verum praeter tumultum illum & clamores caedentium, fugientium, insequentiumque nihil observare potuit, cum de nocte illa fierent. De similibus aliis Phaenomenis non memini alias me hic audire quidquam. Dabo tamen operam, ut per occasiones explorem, & excutiam memoriam seniorum. *Bigotii* litteras aliquas saltem ad te avidissime expecto. Aelianum meum ipsi, aliisque viris eruditis per te commendari gaudeo. De historia ejus animalium vellit mihi aurem Cl. *Thom. Bartholinus*, offertque MS. excerpta, in quibus ait contineri plura, quam quae hodie vulgentur. Verum nihil efficit, nunc quidem, cum tot aliis sim occupatus, nec institutum meum fuerit, Aelianum edere totum. Illustr. D. *Biørnklov*, a me exigit, ut finito Phaedro Ciceronis edam Epistolas ad familiares, eo ordine modoque, sicut a *Sibero* sunt dispositae. Nec negare possum meam operam. Interea me penitus eadem recudantur, notas paucas difficiliorum locorum adjiciam. Si quae habes ad eam rem spectantia, pro humanitate tua liberaliter communicaturum te confido. Id quod simul enixissime abs te oro ac contendo. Phaedrus aegrotante Typographo decumbit ipse quoque, neque scio, quando proditurus sit in lucem. Vehementer metuo, ne libros tuos nimis diu apud me detineam, si repētis, dabo operam, ut per fidum hominem ad vos transmittam. Cl. *Gronovium* cum amicis ceteris, si quando ad eos scribes, ex me perofficiose salutari cupio. Tu quoque, Nobilissime Domine, salve atque vale. Upsaliae 20. Novemb. CIOICELXII.

EPISTOLA XXXIV.

NIC. HEINSIUS

Joh. Schæffero.

Upsaliae.

Narrationem de Phaenomeno agri Upsaliensis celeberrimo, quam ad me misisti proximis diebus, vir Clarissime, pergratam equidem & longe acceptissimam habui, eamque ut *Plugenius* quampridem consequatur, operam enixe dabo. Aliud, quo classis navalis exprimeretur, in Helmstädiensi tractu nuperime spectatum, rumor constantissimus ubique differt. Sed ejus accuratam descriptionem necdum sum nactus. De Phaedro tuo doleo & indignor tam lentum negotium esse. Promittit *Curio* Upsaliam se jam excursurum esse, ut operas cessantes urgeat & impellat, quo speratus finis volumini propemodum detexto imponatur. De Ciceronis epistolis quod cogitas edendis, laudo institutum. Harum principem possideo editionem, & variorum observata ad eandem epistolas, quae apud me videbis, cum huc excures. Sin adventum tuum propediem nobis expectandum esse abnuis, quod abominor, mittam liben-

tissime quicquid hujus generis in scriniis meis delitescit. Recordor in Italia me vidisse elegantem harum epistolarum editionem, quam *Petrus Victorius* jam senex typis Florentinis curarat describi ad exemplar Medicæe Bibliothecæ antiquissimum, sed ejus editionis copia mihi hætenus quidem facta non est. A *Bigotio* literas accepi tandem, sed breves, quas hîc vides. Uberiores me habiturum, simulatque Lutetiam revertetur, spem faciat. Quas *Quinctili* mense ad illum dederam una cum tuis, eas, malo fato, in via periisse invitum animadverto. *Gudium* necdum Florentiam Rôma rediisse ex hiscè cognosces, ut mirari jam desinam, quid ille de *Phædri Rhemensis* excerptis suspensos nos tam diu teneat. Lutetiae prodierunt familiae Romanæ *Fulvii Ursini* altera fere parte auctiores. Ingentem quippe vim nummorum veterum ad hæc familias pertinentium, qui diligentiam *Ursinianam* fugerant, *Carolus Patinus* hinc inde collegit, operique inseruit, cujus exemplar indies expecto. Vale, vir Celeberrime. Holmiae Succorum CIOCCCLXII. a. d. ix. Kal. Decembr.

EPISTOLA XXXV.

JOH. SCHEFFERUS

Nic. Heinſio.

Holmiam.

Remitto tibi cum summa gratiarum actione litteras *Bigotii*. Meas ad eum periisse invitum intelligo, cum quia metuo, ne inofficiosus ei videar, tum quia scripseram de *Arriano*, aliisque, ad quæ responsum ejus expectabam. Quæ de prodigio nuper, aut phaenomeno *Halmstadiensi* ex diversis fide dignis accepi, breviter commemorabo. Die 13. Octob. circa tertiam pomeridianam prope *Halmstadium*, *Hollandiæ* oppidum, ex ipso mari emergebat instar onerariæ minoris navis aliqua, cursum ex meridie in septentrionem tendens, quæ tamen paulatim in magnitudinem bellicæ maximæ crescebat. Apparebant quoque cuncta ejus vela & caetera instrumenta eo modo, sicut solent in bellicis navigiis. In summa quippe habebat vexillum atro-purpureum. Mox emergebant alia aliaque navigia simili modo, quaedam majora, quaedam minora, qualium usus solet esse in bellis. E quarum justo ordine dispositarum medio deinde prominebat arx, haud dissimilis ei, quæ est *Halmstadii*, supra quam spectabatur quidam cultu regio ornatus, vultum versus oppidum *Halmstadium* dirigens. Paulo post dividebantur naves velut in duo agmina, mutabanturque circa occasum Solis in duas urbes, cum turribus suis templisque ac aliis aedificiis. Plerique nullos milites, nulla signa hostilia memorant conspecta inter eas classes. Unus se velut ex majore tormento, verum e longinquo explosum botbûm audivisse scribit, cum tremore terræ fumoque. Idem e septentrione venientem ingentem classem sese ait observasse; quam viderit, donec visum noctis tenebræ adimerent. Verum utrum una ista fuerit duarum ante dictarum, an tertia quaedam, non commemorat. Habes, Domine, quod mihi com-

compertum est de Phaenomeno illo ex litteris plurium, partim Halmstadii, partim in vicinia degentium, qui se observasse ac vidisse ipsos ista testantur. Phaedrus meus alias aliasque nequit moras. Neque ipse festino, postquam ex *Curione* nostro intellexi, esse inter familiares tuos quemdam *Tollium*, qui se *Notas* quasdam *Scaligeri* comparaturum primo quoque tempore promisit. Quem idcirco velim, ut meo nomine humanissime compelles, & ad solvendam promissi hujus fidem incites. Quae liberaliter ad Epistolas Ciceronis promittis, ea sunt gratissima. Quamquam adhuc sum incertus, num hac hyeme in eis elaborare aliquid possim, cum propter corrigendi molestiam ad lucernam, & oculorum meorum imbecillitatem, tum quia *Curio* nondum satis ea de re egit cum Generoso Dno. *Biørnkloou*, qui editionem illam urget. Nam nisi certus fuerit de eo opere, in Scholis & Gymnasiis hujus regni recipiendo, sumptus in id frustra & cum damno suo facturum videtur; in tanta ejus per orbem universum frequentia, & copia. Spem visendi vos, coramque vobiscum agendi interceptit partim Phaedrus nondum absolutus, partim uxor mea ex puerperio decumbens. Puto tamen post mensem unum aut alterum mihi spatium futurum. Vale, vir nobilissime, ac me amare perge. Upsaliae a. d. 9. Decemb. CIOICLXII.

EPISTOLA XXXVI.

JOH. SCHEFFERUS

*Nic. Heinsio.**Holmiam.*

PArum prospera te uti valetudine, cum non levi dolore animi ex proximis tuis intellexi. Sentio videlicet, quanto id non tibi solum, & mihi, studiisque in universum omnibus sit detrimento, quibus tanta cura diligentiaque prodes. Quamquam vereor ne haec ipsa res valetudini tuac sit adversa, illique tui animi ardori vires corporis parum sufficiant. Ut fortasse te non sine gravi causa jubeam inspicere temet ipsum, & ex veteri formula curare valetudinem, ne dum nimis vis prodesse omnibus prodesse parum valeas. Deus servet te; vir optime, ac cito vires tibi restituat. De *Tutarchis* Hygini dixi olim in Milit. Nav. pag. 309. ex quo loco petes sententiam meam, si tanti videbitur. Quid de *Pitulo* habet idem auctor, bene est, nec mutari, vel alterisco, ut fit vulgo, insigniri debet. *Pitulus* est ex Graeco *πίτυλον*, quod percussionem denotat, sonumque inde natum. Qualis erat, quem ciebat hortator in navi, portisculo suo, sive pertica, qua remigantibus dabat modum in impellendis remis observandum. Eumque intelligit Hesychius, quando *πίτυλον* exponit, τὸ πρὸς κέλευσμα ἐλάσαι. *Πίτυλον* est primum κέλευσμα, quod fit portisculo. Deinde junctum ei ἐλάσαι, sive pulsus ille remorum, ad pulsus ejus modulum seu numerum, quem edebat baculo Hortator. Hinc *sedere ad pitulum*, est sedere in propinquo, sive vicinia pituli, hoc est eo loco, ubi pitulus editur. Est hoc autem perinde, ac sedere versus puppim. Nam in pup-

pi. stabat vel sedebat Hortator, ibique pitulum dabat. Stat. Lib. VI. Theb. vers. 791.

Et signo de puppe dato, posuere parumper

Brachia; vix requies, jam vox ciet altera remos.

Neque aliud quid innuit Hyginus. Nam postquam de Gubernatore, Proreta, Tutarchis Argo navis retulisset, de remigibus quoque addere quid vult, & ex iis commemorare, qui ad proram, quive ad puppim sederint. Id ergo profert illis verbis: *ad proram & remos sederunt Peleus & Telamon, ad pitulum sederunt Hercules, & (in mea editione quae est Lugdunensis Anno 1600. edita perperam ad est excusum) Idas, ceteri ordinem servaverunt.* Hoc vult, versus proram remigum officio fungentes sedisse Peleum & Telamona, a dextro alterum, alterum a sinistro latere, versus puppim vero, ubi hortamentum datur, Herculem & Idam. Caeteros observasse suum quemque ordinem. Facit autem horum specialem mentionem, quia erant velut duces quidam ceterae remigum turbae in suis versibus, seu potius ordinibus, haud secus atque in militia terrestri λοχαγοι vel δεσποται, unde & peculiari nomine δεσποται & επικεφαλαι appellabantur, sicut dixi cap. 3. Lib. II. de Mil. Navali. Neque aliud opinione mea, quam Hyginus, voluit Flaccus, quando cecinit lib. I. Arg.

Hinc laevum Telamon pelagus tenet, altior inde

Occupat Alcides aliud mare.

De quo loco tamen amplius videbo in curis secundis meorum de militia navali librorum. In quibus haec, & centum alia explicabuntur, & a me omissa, & a nemine adhuc exposita, si vitam Deus dederit. Phaedrum nulla causa est, cur tam avide desideres. Si quid boni habebit, id a te profectum erit. Caetera erunt levia, & in usus juventutis nostrae solum scripta, sicut aliquoties testatus sum. Ego tamen nullo sum impedimento, quo minus prodeat, sed typographus, qui nos omnes per sex septem hebdomadas habuit ludibrio, nec manum operi admovit. Pro indicio, quod fecisti de Naumachicis Leonis agotibi gratias. Quamquam ego de Basilii Naumachicis nuper scripserim, & auctore Anonymo (certe nomen ejus mihi excidit memoria, si quod habet) de partibus navium. Nec scio, an Naumachica Leonis alia sint, quam quae extant in ipsius Tacticis cap. 19. si sunt alia, significes mihi velim. Auctoris ejus de partibus navium aliquoties mentionem fecit apud me Cl. Isaacus Vossius, ex quo proinde certiora omnia de eo poterunt haberi. Nec omittes inquirere meo nomine, si quando ad eum scribas. Vale, vir Nobiliss. ac me, ut soles, amare perge. Deus te servet, annumque novum, cum plurimis sequentibus saluum tutumque transigere faciat. Iterum vale. Upsaliae 30. Dec. MDCLXII.

EPISTOLA XXXVII.

NIC. HEINSIUS

Joh. Scheffero.

DE *Tutariis* & *Pitulo* quae solent me non es gravatus, vir Clarissime, perquam accepta habuis. Negligentius, fateor, consulueram indices commentarii de re nautica tui. Leonis *Naumachica* Gortorpii olim a me inspecta cujus sint molis, non satis memini: anni quippe duodecim & plures sunt, quod codex ille in manus meas primum incidit, nec postea est perlustratus. Bis jam aut ter itineri accinctus fui, ut coram te salutarem: sed inopinati semper aliquid negotii intervenit, & a proposito me revocavit, ne viae committerer. Nunc cum brevi proceres sint conventuri, vix opinor a rebus meis impetrari posse, ut de itinere hoc cogitem. Te tamen hic complecti unice desidero. A *Bigotio* literas accepi tandem, quales sperare me jussierat, hoc est uberes & copiosas. Phaedrum tuum non a me solo impatienter expectari inde colliges. Vale, vir eximie, & me affectu tuo constanter prosequi, ut haecenus, perge. Holmiae Suec. MDCLXXII. a. d. XIX. Januar.

EPISTOLA XXXVIII.

JOH. SCHEFFERUS

Nic. Heinsio.

Holmiae.

Misi ad te nuper Phaedrum per novercam uxoris meae D. *Loccenii* conjugem. Spero tibi redditum esse, judiciumque tuum, avide exspecto. Quamquam, cur expectem, causa nulla sit, cum ipse sciam pleraque esse minuta pueriliaque. Verum ego non tam quid placere huic aut illi possit, verum quid huic nostrae juventuri esset utile, debui attendere. Quod proinde tu pro humanitate tua excusabis. Quemadmodum & vitia typographica haud pauca, quando ad hoc corrigendi munus plane sum ineptus, libereque id profiteor. Pro litteris *Gudii* summas ago gratias. Video virum eruditum suis usibus propriis servare, quae in Phaedrum annotavit. Minime aegre fero, atque adeo nunc etiam in multis ab ipso erudiri cupio. Quamquam si misisset, nihil dissimulaturus eram, quod apparet vel ex loco unico lib. I. c. 2. *Bigotium* de me adhuc cogitare gaudeo, speroque adjumentum aliquod ab eo cum in aliis, tum in Aeliano. Pro cujus variantibus lectionibus tua ope procuratis transmissisque gratias summas ago, idemque per te fieri apud *Gudium* per te data occasione meo nomine oro rogoque. Vellem viro longe humanissimo Dn. *Bigotio* mittere exemplum Phaedri mei, sed qua ratione possim, non invenio. Si tu rationem nosti, scire eam cupio. Mauricius hebdomade sequenti praelo committetur, uti spero. Utinam & caeteri Tactici ad manus meas pervenirent, qui nec

dum

dum editi sunt in publicum. Scripsi aliquoties de duobus scriptoribus, altero, qui agit de Piratica, altero, qui agit de partibus navium, quorum semel iterumque mentionem fieri praesente me a Cl. *Isaaco Vossio* recordor, ut tua opera scire licet, ubi locorum degant lateantve; & num ipse eos habeat *Vossius*, & communicare velit. Nam finito Mauricio nihil agam prius, quam ut mea de Militia Navali emendem, longēque alia faciam, quam ut nunc sunt. Et habeo innumera jam nunc in eam rem collecta. Fac itaque, si potes, ut de his similibusque per te intelligam. Sed nimium abutor tua facilitate, Domine, meisque litteris nil, praeter molestiam tibi creō. Itaque finio, & te gratiae Divinae commendo. Vale, Upsaliae. a. d. 3. Martii MDCLXIII.

EPISTOLA XXXIX.

JOH. SCHEFFERUS

*Nic. Heinsio**Holmiam.*

Nudius tertius est, ex quo *Gronovii* Observationes ad me pervenerunt. Debebat secum attulisse soror uxoris meae, sed ea cistae incluserat, quae nunc demum navigio huc est advecta. Dedi statim bibliopegae, ut conferre possim cum priori editione, ac videre quid accesserit. Miror, quod non librum quartum eadem forma excusum addiderit. Livium ejus impatienter expecto, ac subinde moneo nostros, ut differant emere sibi eum auctorem, donec editio ista fuerit publicata. Pro cura, quam adhibuisti in transmittendo Phaetro, gratias tibi ago debeoque maximas. Te potissimum auctore ac suasore verto nunc Arrianum, eique quantum mihi superest temporis ab aliis laboribus tribuo. Quo successu, tu aliique olim videritis. Quae de Petronio significabas litteris superioribus, fateor me fecisse parvi. Scilicet similia de Livio aliisque superioribus temporibus jactabant. Etiam vereor nunc, ne quis Italus sub nomine Petronii ludum sibi faciat de credulitate aliorum. Valerii Flacci editionem Bononiensem scribis te non vidisse, utrum vero videre desideres non scribis. Fac itaque ut intelligam voluntatem tuam, est enim in Bibliothecae Academiae Catalogo editus Bonon. 1519. Si putas esse tanti, transmittetur liber molis non exiguae, ut qui alia quoque contineat, idonea occasione. Nuper quid notabam de siglis veterum. Observabam *Hermannum Hugonem* in de prima scribendi origine distinguere a literis singularibus, eoque fine citare Ciceronem pro Murena & Gellium Lib. xvii. cap. 9. Mihi neque Cicero neque Gellius agere de ea re videtur, longēque aliud quid velle, quam id genus, de quo *Hugo* loquitur, & descripsit Valerius Probus. Si otium fuerit, inspicere quaeso locum utrumque ac sententiam tuam aperi. Nam & *Vossium* pro parte *Hugonis* stare haecenus video, quod verba attinet, Lib. i. Art. Gramm. cap. 40. Sed jam nimium est nugarum. Tu, vir Nobiliss. Vale, ac me amare perge. Upsaliae a. d. 19. Maii MDCLXIII.

EPI-

EPISTOLA XL.

NIC. HEINSIUS

Joh. Scheffero.

Upsaliam.

EXspectavi hactenus nequicquam, si aut *Bigotius* noster, aut exterorum alii, e numero sodalitii nostri significarent rei literariae nonnihil, quod a te haud ignorari meretur, aut mihi scriptionis argumentum qualecumque suppeditaret, vir clarissime: sed nil epistolarum jampridem peregre ad me defertur, quod tua cognitione sit dignum. *Gronovius* tamen noster, quod nomen in deliciis tibi esse minime nescio, postremis pollicebatur mox fore, uti per literas te conveniret, sed promissi hujus memoriam illi haud dubie refricabit tuus *Phaedrus*, cujus exemplar jampridem in manus ejus pervenisse debuit. Nam is, qui fasciculi curandi provinciam susceperat, in Belgium nostrum jam advenit sospes, uti asseverare non dubitant, qui hominem propius novere. Exspecto, ut & *Elzevirius* me rei hujusce faciat certior, cui fasciculus erat inscriptus. Libellos recens editos nonnullos diebus proximis accepi e patria, quos inter *Vossianum* de fluxu ac refluxu marino commentarium, *Lucretium Tanaquilli Fabri* observationibus novis illustratum. Poëma panegyricum de rebus a *Berengario* gestis, quod cum *Patavii* olim in monasterio quodam invenissem, tinea blattisque expositum, curavi describendum, & *Hadriano Valesio*, *Henrici* fratri edendum tradidi, cujus animadversiones luculentae accedunt. Denique praeter alia historiam nostrorum temporum spectantia catalogum Bibliothecae *Dufrenianae*. *Studia* Cl. *Brunneri* mihi sunt commendatissima. De *Valerii Flacci* editione *Bononiensi* quid vellem, ex *Curione* jam intellexisti, credo. *Sigla* veterum non videntur fuisse occultae litterarum notae, de quibus agunt *Gellius*, & *Cicero*, aut notae, quales illustravit *Valerius Probus*, hoc est singulare litterarum, sed *σημεία*, quod & ipsum nomen evincit. Talem codicem *Aratorum Germanici* se vidisse *Petrus Bembus*, si recordor, alicubi narrat. Vidi & ego *Glossaria* complura ejusdem notae. Teneoque nunc in manibus veterrimum *Maronis* codicem, in cujus margine scholia occurrunt hujusmodi siglis ut plurimum exarata. Extat id genus Scholiastes quoque *Juvenalis* in *Leiden* Bibliotheca. Merito autem cavere Imperatores *Graeci* ac *Romani*, ne libri *Juris* hujusmodi characteribus describerentur, quia librarii, nisi memoria uterentur praesentissima, in hac re labi facillime atque aberrare poterant. Simile scribendi genus apud *Seras* seu *Sinenses* etiam nunc in usu est. Vale, *Holmiae Suecorum* MDCLXIII. XII. Junii *Juliani*.

EPISTOLA XLII.

J. O. H. S C H E F F E R U S

Nic. Heinſio.

Holmiam.

QUI has tibi offeret, filius est ¹ *Laurentii Fornelii*, Poeseos apud nos Professoris, amici mei singularis. Qui cum certis de causis iter ad vos inſtituiſſet, atque tibi potiſſimum propius vellet innotescere, per me, cuius preces poſſe neſcio quid apud te perſuaſum ſibi habet, commendari gratiae ac favori tuo voluit. Et eſt juvenis ingeni doctrinaeque haud vulgaris. Qui cum fructu Gallias & Angliam perlustravit, binisque vicibus in patria tua vixit, Leidaequae publicos honores impetravit. Studiis imprimis Mathematicis eſt deditus, Mechanicisque, in quibus paucos creditur habere pares. Quod ipſe facile intelliges, ſi admittere eum voles. Et quia multa de humanitate ſingulari inaudivit, praeterea neſcio quo peculiari gentis vestræ amore tenetur, neſas eſſe putavit, ſi non reditū nuper factus, te quoque ſalutaret, officiaque ſua, qua poſſet comitate, offerret. Peto autem, quantum poſſum, vir Nobiliſſime, ut ipſum reſque ejus tibi habeas quaſi commendatiſſima, cum ipſius cauſa, quippe qui meretur, tum & mea cauſa, qui diligo Juvenem propter rarum ejus ſingulareque ingenium, propterque parentem ejus, virum vere bonum cordatiſſimū. Neque dubitare debes, collocaturum te beneficium in hominem gratiſſimum. Pluribus orare pro eo apud te non debeo, quem ſcio ſuomet ingenio pronum ad hoc genus beneficii, illisque omnibus bene cupere, qui rerum honeſtarum ſtudio tenentur. Flaccum miſi heri cum ſtudioſo quodam, apud Praefectum rei monetariae Dn. *Koch* degerem. Eum librum obtuliſſe minime dubito. Vale, vir Nobiliſſ. ac me, ſicut ſoles, ames. Upsaliae a. d. 26. Junii 1673.

¹ de hoc viro & ejus ſcriptis vide *Schefferum* de Scriptoribus Suecorum pag. 141. Edit. Molter, qui eum obiſſe 8. Jul. 1673. notat. de Filio, cui praenomen *Jonae*, ibid. pag. 230. qui obiit 17. Febr. 1679.

EPISTOLA XLII.

N I C H E I N S I U S

Joh. Scheffero.

Upsaliam.

ULTIMAS meas, quae de libris in Batavia noſtra Galliaque nuper admodum editis, atque inter hos de Lucretio *Tanaquilli Fabri* agebant, recte curatas eſſe confido, vir Celeberrime. Valerium Flaccum *Johannis Baptiſtae Pii* commentario libro illuſtratum & accepi, nec inutilem fore mihi, in eundem poetam nonnihil obſervationum paranti, auguror. Videram quidem caſtigations *Pii* in Valerium non nullas laudari a Criticis ſcriptoribus, ſed eas ex in-

integro hujus commentario esse delibatas ignorabam. *Fornelium* quod mihi conciliaſti, plurimum tē amo: dignus eſt enim ob eximias animi dotes, non mea tantum benevolentia; ſed ſtudio atque adfectu horum omnium, qui literis favent. A *Bigotio* geminam nuper habui epiſtolam; qui Lutetia jam digreſſus in Neuftria paterna ſedem hoc anno eſt fixurus. *Brunneri* noſtri ſtudia, ut curae mihi fuiſſe apud illum intelligas, offert & pollicetur vir humaniſſimus *Moerini* Atticiſtam haecenus ineditum, cujus apud *Photium* in bibliotheca ſit mentio. Nam de verſione *Palaeophati* quod addit, jam ſerutum eſt. Iplas literas ecce. Ex iis cum alia ſeruta non indigna cognofceſ, tum illuſtriſſimum *Montoſerii* Marchionem, cui poemata mea inſcripſi olim, praefectura provinciae Nor- mannicae nuper auctum eſſe. Ipſe etiam Marchio ejuſdem rei per literas me certiore facit. Addit idem, quod & alii nunciant, regi Chriſtianiſſimum inter plurimas animi heroici dotes, amore literarum conſpicuum, viris per Europam compluribus, eruditionis fama praecipuis, annuum ſtipendium nuper eſſe largitum. Inter hos *Hevelii* & *Boeckleri* Germanorum, tum noſtratium *Voſſii* atque *Hugenii* junioris, habitam fuiſſe rationem audio. Nam meum quoque nomen quod principibus Achivis permixtum agnoſco, id ruborem mihi exprimit, & quidem maximum. Sed cum rei publicae, ut ſcis, foederatorum Belgarum operam & obſequia addixerim, de admittenda hac munificentia nihil haecenus decrevi, dum intelligam poſſe id fieri dominis meis minime invitis ac nolentibus. Phaedrum tuum noſtro *Gronovio* ſe tradidiſſe ſignificabat ultimis ſuis *Daniel Elzevirius*, ac curae ſibi rem fore pollicebatur de altero exemplari ad *Bigotium* mox mittendo. Vale, mi Scheffere. ſcribebam Holmiae Anno dñi m^o c^o lxiij. a^o d. iv. Julij.

EPISTOLA XLIII.

JOH. SCHEFFERUS

Nic. Heinsio.

Primum gratias tibi ago, quod ad petitionem meam tanta facilitate admit-tere, tanta humanitate excipere *Fornelium* noſtrum es dignatus. Non po-teſt ſatis apud me praedicare benevolentiam promptitudinemque tuam, quam ſummopere ſuis rebus, etiam in poſterum utilem futuram ſperat, planeque ſibi pollicetur. Facit autem nobis ſpem fore, ut ad nos excurras hiſce diebus. Quod ut vehementer opto, ita etiam enixe oro, ut noſtro qualicunque hoſ-pitio uti ne graveris. Excipieris a nobis, ſicut non pro dignitate tua, quod per facultatum noſtrarum tenuitatem non valemus, ita ſaltem pro copia no-ſtra animo ſimplici, candido & erecto. Remitto quoque litteras *Bigotii*, quodque *Brunnerum* noſtrum attinet, fore ei acceptiſſima, quae pollicetur, ſcio certiſſime. Nam ipſe quidem abeſt ab urbe, neque ſpatio unius vel alte-rius hebdomadis revertetur. Honorem tibi habitum a Rege Chriſtianiſſimo

gaudeo, gratulorque tibi, Domine, hoc magis, quia judicio factum intelligo, quod in tanto Rege admiror venerorque. Utinam sic pergat magnus princeps. Non deerunt ingenia praeclara, omnemque impendent operam in illustrandis bonis artibus ac litteris, postquam patronum sibi alicubi terrarum, praemiumque paratum esse sentiant. Mauricius noster lente procedit, dum est unus tantum, qui scit Graece scribere, ex typographis nostris. Ex is saepe aliis negotiis impeditur. Utinam, quod petiisse abs te scribit *Curio*, id impetrare possit, ut huc ex Hollandis unus alterque typographus ad rogatum tuum veniret, sic omnia rectius celeriusque possent expediri. Interea ego Arrianum verto, cujus exemplum ad me missum mire pravum est, licet, qui descriptit, summam se adhibuisse curam testetur. Passim sunt lacunae, verba ipsa misere corrupta, laborque tanto major, quanto minus subsidiorum aliunde suppetit. Nam tametsi prima ejus pars in multis cum Arriano conveniat, tamen ea, quae de priscis Romanorum exercitationibus equestribus agit, non habet, unde ei possit medicina aliqua afferri. Praeterea fragmentum ex Alanica Historia Arriani, ut opinor, ad quod emendandum pariter, praeter ingenium, nil afferri potest. Ego tamen faciam, quantum in me erit, atque prout ad me missa sunt exhibebo omnia, deinde meam in notis declarabo sententiam. Vale, vir Nobiliss. ac me amare perge. Upsaliae a. d. 14. Julii MDCLXIII.

EPISTOLA XLIV.

JOH. SCHEFFERUS

*Nic. Heinio.**Holmiam.*

ECce tibi duo folia Mauricii nostri, quae Cl. *Bigotio* mittes, si videbitur. Plura mittere cum tabellario commode non possum, nec sunt multo plura edita, dum ad alia aliaque typographi trahuntur. Quae Cl. *Bigotius* in primo folio annotavit, nobis pridem sint provisae, indicataeque in animadversionibus. Nec eo minus grata, quia nostram sententiam confirmant. Caeterum ne ea ipsa, quae in mentem venerunt mihi, iterum recipiam, adscripsi conjecturas in margine, prout haecenus occurrebant. Eas vel firmare, vel rejicere, novisque accessionibus locupletare poterit Cl. *Bigotius*. Quanquam cum subsidii non parum habeam ex Leone ad emaculandum Mauricium, rem mihi faceret longe gratiorem Cl. *Bigotius*, si quae ad Arrianum habet notata vel ipse, vel alius ex amicis ejus, mihi mitteret, ejusque illam partem maxime, quae agit de exercitatione equitum apud Romanos. Nam illius quidem rei aliunde nulla, vel omnino pauca suppetunt subsidia, & sunt nonnulla ibi, sive primi codicis, sive exscriptoris vitio corrupta manifeste, ac hiulca. Ut ex. gr. ab initio: ἀποτεμνόμενοι δὲ πάντες πεδὶς τὸ πρὸς δὲ βήματι ἐς παλατίαν ἰσοπλεύρως χεῖμα. Paullo post: ὁ πόθεν μάλιστα ἐκ δὲ ἀφάνους ἐπελαύνειν δόξαν ἢ μὴ ἀπλήν. ἀλλ' ὡς ἐν ποικίλῃν

πίλην ἢ ἐκδρομὴν ποιῆσθαι. σημείοις δὲ διακεκημένοις ἀπελάυνσαι &c. Hujus generis alia sunt plusscula, quae non potest non observasse *Bigotius*. Et quia nemini, nec Graecorum, nec Romanorum, quantum scio, prodita est ista exercitatio, haereo subinde, doctorumque opus habeo subsidia. Quod si praestare mihi ipse dignaretur, non modo mihi rem gratissimam, sed & omnibus, in quorum manus aliquando venient, utilissimam faceret. Tu, si grave non est, ei potes indicare hanc petitionem meam, virumque sponte sua pronum ad talia, auctoritate insuper tua adhortari, agereque cum eo, ut, quae mittere velit, celerrime mittat, quando finito *Mauricii* textu, *Arriani* textus describetur a typographo, atque tum ad notas demum venietur. Vellem ipse ei scribere, sed quia intelligo, districtum curis multis, praeterea ad priores meas responsum expecto, hoc quicquid est officii, differam in tempus aliud. Tu velim interea cum meo nomine salvere jubeas, & favere porro rebus meis, sicut coepit. Id quod abs te quoque fieri opto, enixeque rogo, quem propediem coram visurum spero, cum ad nundinas autumnales venero. Vale, Nobiliss. Domine. Plurimum te *Brunnerus* noster salutat. Upsaliae. a. d. 15. Nov. CIOIOCLXIII.

EPISTOLA XLV.

JOH. SCHEFFERUS

*Nic. Heinsio.**Holmiam.*

PRO amica gratulatione, litterisque *Bigotii* & *Falconerii* summas ago tibi gratias. Remissem has cum tabellario nupero, nisi me affixum lecto tenuisset morbus per dies aliquot. Video *Falconerium* habere aliqua parata in *Arrianum*. Utinam ea velit edere in lucem, & a sua quoque parte juvare rem litterariam. Neque enim mea poterunt impedimento esse ei, qui subsidiis ad talia, quam ego, est instructior. Quod si tamen malit forte sua huc transmittere, dabimus operam, ut una edantur cum nostris quam diligentissime. Quae narras de *Plauto Livioque Gronovii*, mihi jucundissima fuerunt. Spero habituros nos cum primis navibus. Quid autem *Virgilius* tuus? quando ipsum habebimus? Nostra lente procedunt, neque ante festum *Paschatis* eorum quidquam video me polliceri posse. Sed est finiendum abituriente tabellario. Quare te, cum amicis jubeo salvere, ac valere optime. Upsaliae festinante calamo a. d. 19. Febr. CIOIOCLXIV.

EPISTOLA XLVI.

JOH. SCHEFFERUS

Nic. Heinsio.

Holmiam.

PRO Epistola *Bigotii* gratias tibi ago maximas. Video subintrare mihi *Fabrum*, quod recesserim nonnunquam a sententia ipsius. Ferendum erit, quod non poterit mutari. Judicabunt inter nos eruditi. Nam quod nit affinxisse me nonnulla ipsi, quae nunquam cogitaverit, id equidem, quale sit, non intelligo. Si quid factum est, errore factum est, & quia rudis ego stylum ejus parum intelligo. Tu si observasti quidpiam, indica quaeso. Scripsi hoc nomine ipsi *Bigotio*, cui, nisi grave est, mittas epistolam. Negotium cum *Falconerio* tuae fidei diligentiaeque committo totum, eumque perofficiose ex me saluari cupio, si quando litteris invisas. Quae *Bigotius* de *Valesio* promittit, fac, ut expediat, meis que precibus tuas adde. Nostra negotia lente hinc procedunt, cum ob alia, tum quia multis laboribus, ob molestissimum, quo fungor, officium, obruor. Vale, vir Nobilissime, & me amare perge. Upsaliae a. d. 8. Mart. CXCICLXIV.

EPISTOLA XLVII.

NIC. HEINSIUS

Job. Scheffero.

Upsaliam.

CUM proxime nonnihil litterarum dabam ad *Bigotium* & tuas misi eadem Opera, & de Arriani Tacticis, ut quantum in se esset, tibi gratificarerur, verbis enixissimis denuo rogavi hominem, atque obtestatus sum. Eram & de Plutarcho additurus, nisi quod nimia *Brummeri* nostri festinatione nuper factum est, ut parum recordatus sim, quatenus is ex magni scriptoris opusculis potissimum recensenda ac in lucem proferenda sibi proposuerit. Hoc ubi certius ex te cognoscam, opera a me dabitur, ut, si quid operum Plutarchi latet in vetustis apud Celtas bibliothecis, unde editiones vulgatae castigari atque emendatiores fieri possint, id ut in gratiam amici nostri a *Bigotio* excutatur quamprimum, & ad nos mittatur. Hesterno die litteras Dantisco accepi, per quas amicus non nemo me rogat, uti copiam faciam navalium ac maritimarum legum Suecicae gentis, si quae in publico circumferuntur, praesertim Latino aut Germanico sermone conscriptae. Esse enim in illa civitate hominem juris peritum, qui luculentos ejus argumenti commentarios paret. Si quid harum rerum a Suecis in lucem sit prolatum, ex Socero tuo omnium optime poteris doceri, ni fallor. A *Bigotio* recentes admodum ante triduum accepi, quas hinc vides.

vides. Is cum valetudine adversa diu conflictatus tandem nunc convaluit. Ex Belgio aut aliunde, quod nuntiare possem, nihil omnino rerum novarum ad me perlatum est. Vale, vir eximie, & salve cum clarissimo *Brunnero*. Exarabam propere *Holmiae Suecorum* a. d. 24. Martii *Juliani* MDCLXIV.

EPISTOLA XLVIII.

JOH. SCHNEFFERUS.

Nic. Heinsio.

Holmiam.

Recte meas ad Cl. *Bigotium* curatas esse gaudeo, eoque nomine tibi me debere plurimum agnosco. Pro cura tua de *Arriani* *Tacticis* ago gratias. Ea, prout reperi in meo codice, converti pridem in Latinum, notas quoque uberes adjeci, quibus, quae suspecta sunt, indicantur. Si quid aliunde interea accideret subsidii, in lucro veluti ponitur. Quod *Bigotius* de aetate ejus scribit, pluribus jam ante exsecutus sum ex ipso scriptore. Neque in me quidquam deerit, quod ad divulgandum cum pertinere intellexero. Sed en tibi nova obstacula. Typographi dico, quos nuper ex Belgio conduxit noster *Curio*, a conterraneo suo *Joh. Pauli* pessime corrupti, parant abiturum, & contra fidem datam, scriptoque comprehensa pacta plus exigunt a *Carione*, quam ipse dare sine damno potest, cum praesertim plus jam ante promiserit, quam vulgo dare solent in *Hollandia*. Nempe postquam eos vestimentis omnique alia re necessaria instruxit, nimis diu esse sibi videntur in opere, prius quam possint & pecunias accipere. Et quia *Curio* paratus est ad aequa omnia, impositum ipsis in Consistorio Academico, ut ne prius excedant urbe, quam rationes crediti solutique reddiderint. Sed homines licentiosi abituros se minantur omnibus invitis. Quod propterea scribo, ut si eis accidit quidpiam, quod nollent, ipsorum, nulla nostra factum culpa intelligas. Simul videas, quam misera nostra sit conditio, qui cuneis velut atque machinis extundere singula, quae in lucem dare volumus, adigimur. Quin imo huc scriptum nuper est *Argentorato*, etiam *Freinsheimii* in eum notas ibi publicari. De *Fabri* indignatione scripsi nuper, petiique ut quid judicares de ipsa, mihi significare velles, dicereque, si quae observaveris, quibus eam sim promeritus. Quod quia nondum factum est; idem proxime abs te expecto. Quae *Socer* meus respondet, addidi in scedula ipsius manu scripta. *Brunnerum* haecenus non vidi, nec adire ipsum licuit per occupationes alias. Dabo operam, ut ipse tibi scribat proxime. Vale, vir Nobilissime, ac festinationi meae ignosce. *Upsaliae* a. d. 29. Martii MDCLXIV.

EPI-

EPISTOLA XLIX.

NIC. HEINSLUS

*Job. Scheffero.**Upsaliam.*

OPeras illas Typographicas socordes & nequam, recte omnino feceris, si pro ea, qua polles, auctoritate in ordinem redegeris, & pro meritis haberi jusseris, vir Clarissime. Ne mireris tamen occasionem querelae justae tibi esse subnatam: testor & adfirmo, mihi quoque, ex quo hinc sedem fixi, non dispar negotium a tribus quatuorve nebulonibus ex numero meorum popularium fuisse exhibitum, quos aut ipse ex Belgio in comitatu meo adduxeram, aut meis impensis postea huc devehendos curaram. De ancillis nostratibus eadem omnia asseverant, qui opera non paucarum hinc sunt usi: eas nempe ipsas, quae frugaliter naviterque in patria sese gessissent, simulatque huc delatae essent, ita mores atque instituta harum imbibisse regionum, ut supinas pigerimasque & immundas in omnibus se praestarent. Quod nisi in hac civitate frigerent leges, de meis sycophantis poenas sumsisse poteram, quod ut apud vos fiat de vestris a te pendet. Die crastini expostulabo cum *Plumero* super hac re, hominemque hortabor, ut officii sui fungos nostros admoneat: nam ejus consilio haec ab illis fieri minime opinor. Proxime scribebat idem *Plumerus*, praelo se subjecisse *Minervam Scioppii Sanctianam*. Habere se & praelo paratos integros *Trajani Boccalini* in omne Taciti corpus commentarios, vernaculo sermone conscriptos. *Paschalii Grosippi* Grammaticalia opuscula, vulgatis exemplaribus longe auctiora, aliaque cum *Schioppii*, tum *Sanctii*, quae aut lucem haecenus non viderint, aut pretio haberi non possint: haec ille, quid *Bigotius* ad me perscribat ex hac ejus epistola uberius cognosces. in tuis ad *Phaedrum* animadversionibus nil recordor occurrere, quod *Fabrum* offendisse potuit, sed vir ille eo est ingenio, ut, quo benignius habeas, eo plus sibi indulgeat. Vale
Holmiae v. April. MDCLXIV.

EPISTOLA L.

JOH. SCHEFFERUS

*Nic. Heinio.**Holmiam.*

NON incuria ignaviaque factum, ut tam diu retinuerim litteras *Bigotii*, sed quia interveniebant publica, eaque negotia, quae per octiduum & amplius occupatum non sinebant quidquam aliud agere. Quare dabis tarditati meae veniam, nec eo secius in posterum mittes, si quae pertinentia ad litterarum studia ab amicis accipies. Mihi certe in hac parte terrarum degenti nihil potest gratius accidere. *Bigotii* vero binae eo mihi jucundiores fuere, quod me facerent certum de ipsius *Arriano MS.* Neque possum satis commendare ac
amare

amare hunc ipsius erga me animum, id quod publice etiam profitebor suo tempore. Tu si scribes ei, fac, ut intelligat, agnoscere me beneficii hujus magnitudinem, & praedicare paratum esse. Quae de Petronio scribit, sunt notatione digna, veroque proxima. Quo enim alias pertinuerit tam arcta MS. ipsius custodia? de qua memini jam olim aliquid legere me in litteris Italicorum ad te scriptis. Et apparebit suo tempore. Frustra enim est, qui se impositurum sperat facile tam docto & in talibus exercitato. Habui his diebus litteras ab *Andrea Bosio*, eruditissimo viro, in quibus referebat se nunc esse totum in adornando *Josepho*, habere ejus quaedam MSS. & expectare plura a *Boineburgio*, petitque a me, ut si quid nossem, quod juvare eum posset, indicarem. Ego, qui a talibus sum destitutus penitus, hoc viri humanissimi desiderium tibi aperio, & occasionem monstro beneficii praestandi homini, ut scio, minime ingrato. Sed tu videris, quid factu sit commodum. Promittit alias *Cornelium Nepotem* emendatiorem, quam prodierit unquam hactenus. Item editionem iteratam *Dissertationum*, quas scripsit de Pontifice Maximo. *Gronovio* nostro litem esse ortam cum *Tabore* nunciant studiosi nostri *Giesa* ad me perscribentes. Utinam talia non distineant virum eruditissimum ab aliis utilioribus. Sed finire cogor epistolam, festinatione summa scriptam, cui tu quaeso ignosce, ac me, ut soles, prosequi favore tuo perge. Vale. Upsaliae. a. d. 26. April. Anno MDCLXIV.

EPISTOLA LI.

NIC. HEINSIUS

Job. Scheffero.

Upsaliam.

Hesternus dies attulit a *Bigotio* nostro mihi epistolam, cui adjuncta erant nonnulla te spectantia, quae hîc vides, vir Clarissime, utinam studiis tuis profutura. Nam id quidem praecipuo est nobis in voto. Quid rerum apud Italos Gallosque nunc geratur ut plenius cognoscas, mitto, quae super hoc argumento ad me perscribit idem ille *Bigotius*. Nam aliud, quod nunciare possim, nil omnino occurrit. Ad tertium *Livii Gronoviani* volumen edendum lentius quam velim, sese accingunt operae Typographicae. Fore nihilominus ut hujusce curae omnia in lucem hoc anno proferantur, sperare nos jubet *Elzevirius* bibliopola. *Plautus* amici nostri nondum ad me pervenit. Quas mones *Arriani Tacitici* adscriptas esse castigationes, eae quin a *Bigotio* sint profectae, vix est dubitandum. Vale, & amicos communes saluta. Holmiae MDCLXIV. a. d. xxiv. Maii.

EPISTOLA LII.

JOH. SCHEFFERUS

Nic. Heinsio.

Holmiam.

Tuas una cum Cl. Bigotii litteris, & Basilii Naumachicis recte accepi. Non potes credere, quanto gaudio me affecerit Basilus, ut quem videam continere non pauca rebus meis valde conducencia. Quare & tibi gratias ago maximas, & ut Bigotio interea agas meo nomine, si forte scribes, etiam etiamque oro. Nam ipse illi scribere nunc per varias occupationes nequeo, & expecto meum de Philosophia Pythagorica opusculum, intra dies paucos finendum, ut una possim mittere. Notae marginales in Tacticis Arriani, non sunt Bigotii, sed alterius (ut scribit ipse,) qui librum illum habuit a Bigotio utendum. Est mihi MS. quidam codex, in quo vita S. Odiliae, sic incipiens: *Temporibus Hinderici Imperatoris quidam dux illustris. finiens: per omnia secula seculorum Amen.* Item alia ejus descriptio, incipiens: *Dum ortum sponsi, sanctam videlicet ecclesiam. finiens: praestante Domino nostro Jesu Christo.* Item de vita ducis Athici sive Adalrici, incipiens: *Erat temporibus Dagoberti. finiens, per omnia secula seculorum, Amen.* Item de vita S. Hydolphi incipiens: *Nutrix S. virginis Odiliae. finiens, cujus se mancipat militiae.* Item alia hujus generis, quae nescio, an a quoquam ante sint publicata. Continent non pauca, ad Dagobertum pertinentia. Si scirem ante non esse edita, & mereri lucem, ederem. Tu videbis, & ab amicis cognosces, quid de his statuant. Non possum plura hac vice, quia me interturbant amici moleste officiosi. Vale, & ut soles, res meas tibi habe commendatas. Upsaliae. a. d. 31. Maii. CIOICLXIV.

EPISTOLA LIII.

NIC. HEINSIUS

Job. Scheffero.

Upsaliam.

Perlatus est ad me nudijs tertius Gronovii nostri Plautus, una cum ejusdem libello apologetico, variisque praeterea aliorum lucubrationibus recens in lucem emissis, quibus & Longinus *Tanaquilli Fabri* castigationibus atque annotationis illustratus erat adjunctus, vir clarissime. Plauti & libelli apologetici geminum exemplar quia illic offendebar, persuasus sum ut crederem, tecum mihi munus istud esse dividendum. Nam amicus noster haecenus non monet, quid libris hisce cupiat factum. Tradidi itaque Curioni volumen utrumque ad te mittendum, & quidem ea lege, ut, si male conjectura a me facta sit, atque alii sit munus destinatum, tu perlectos codices sis redditurus, sin divinus fui & verax augur, amici nostri munificentia solide fruaris. Mitto & Petronii fragmentum typis Patavinis descriptum, de quo judicium tuum ne

apud

apud me premas obsecro. Nam mihi libellum animo attentius pervolvendi otium haud fuit. ad Trimalchionis caenam spectant pleraque, ut tute arbitrari potes. *Bigotium* proxime percunctabor, quid de codice tuo, varias variorum vitas complectente, sit statuendum. Ex Italia litteras ab amicis tandem accepi. Narrat *Falconerius* Romae sub praelo esse *Ezechielis Spanhemii* dissertationem de utilitate atque usu veterum numismatum, tum imagines viro- rum illustrium ex gemmis ac nummis antiquis depromptas & hactenus publice non visas. At *Datus* de Florentinis suis *Franciscum Redium* dedisse publico observationes de natura viperarum novas. *Valerium Chimentellum* moliri com- mentarios in inscriptionem Pisanam, in quibus & de veterum sellis sit acturus. Edi praeterea observationes naturales Academicorum Etruscorum. Cardinalem *Palavicinum* praelo subjecisse Historiam Concilii Tridentini, curis secundis nunc adauctam, quam opponit Historiae ejusdem argumenti a *Paulo Veneto* conscriptae. Parari praeterea publico observationes Mathematicas *Caroli Rinaldi*, *Alphonsi Borelli* de motu animalium opus. Denique versari sub praelo varia diversorum scripta, sed Etrusco idiomate contexta. Haec volebam nescius ne esses. Vale, vir Eximie, properabam. Holmiae MDCLXIV. a. d. IX. Junii Juliani.

EPISTOLA LIV.

JOH. SCHEFFERUS

Nic. Heinsio.

Holmiam.

R Emitto tibi Petronii fragmentum, quod cum voluptate summa perlegi. Video plusscula jam ante esse edita. Quae nunc primum accesserunt, valde sunt corrupta; credoque, non aliam esse causam, cur omitterentur hic illicve aliqua a librariis, quam quod essent perditissima. Verba continent, & locutiones alias non observatas, ut *saplutus*, *lupatrix*, *praxim*, *coelus*, *balneus*, *abstinax*, *nervia*, *mesapius*, *scelio*, *offa*, *molestare*, *gaudimonium*, & id genus: nec tamen ideo rejicere audeo, cum & alias Petronio familiare sit recedere nonnihil a communi consuetudine, & caetera mirifice conveniant cum iis, quae vulgo exstant. Contuli, & locum Sarisberiensis, qui probare fragmentum hoc videtur. Quare facile existimo, verum esse, ac propterea mereri, quod consideretur amplius, libereturque a vitiis, quibus scatet, quantum potest fieri. Et habeo jam aliqua notata, quae proman, si non ingrata fore intellexero. Interea ecce tibi meum de Italica Philosophia libellum, de quo velim judicium mihi perscribas tuum: mitto quoque *Bigotii* Arrianum, sicut ipse voluit, cum summa gratiarum actione. Plautum *Gronovii* cum alio libello reddam, quandocunque jusseris. Haec festino scripsi calamo, & fasciculum adjeci ad Cl. *Gronovium*, quem ad eum curabis, quandocunque occasio fuerit, Vale. Upsalae 3. Julii MDCLXIV.

EPISTOLA LV.

NIC. HEINSIUS

*Job. Scheffero.**Upsaliam.*

Occuparunt me praeter solitum diebus proximis curae publicae, vir Clarissime, & immane quantum distraxerunt. Tum & ex urbe rus proficisci sum coactus, ut amici & popularis mei nuptiis interesset. Quae causa est, quod litterarum nihil a me in manus tuas perfertur jampridem. Sed nec iterare lectionem fragmenti Petroniani haecenus est datum. Quod genuinumne sit an adulteratum, tibi harum rerum sagacissimo censori arbitrandum relinquo. Ut tamen sententiam meam intelligas, quod videris velle, in toto orationis contextu pauca occurrunt, quibus elegantiae Petronianae nitor & vestigium indubitatum prodatur. Narrationem de Vitriario frigidissimam agnosco. Et tamen sunt hîc illic, quae eruditionem saeculi vetusti prae se ferant. Ut de Venere strabosa (*Strabosus* enim, non *Strabonus* opinor scribi oportere) Venerem quippe Strabam nonnullis habitam ad Artem Amatoriam Nasonis palam pluribus feci. *Octavius Falconerius* emunctae vir naris, Roma perscribit, non posse se persuasum habere, ut Petronianae indolis credat hunc libellum. Quibus fere paria censet noster *Gronovius*, nisi quod is arbitratur, fragmenti hujus auctorem, quicumque is sit tandem, Petronii plura vidisse, quam nunc in publico circumferantur. Unde fit, ut in nonnullis, quae depravata ducit, conjecturis indulgeat. Sed tu haec, & si quae plura sunt, omnium optime videbis. Eruditissimum tuum de Philosophia Italica commentarium percurri tantummodo oculo festinante haecenus, totum intentiore cura mox perlecturus, pro quo gratias interim ingentes, & quantas pro tam exquisito munere haberi par est, habeo. *Gronovio* exemplar suum propediem mittetur. Qui recte ordineque factum nuper nunciabat, quod Plauti sui atque alterius libelli copiam tibi fecissem. Quatuor exemplaria Philosophiae Italicae in Gallias mittenda tradidit mihi *Curio* noster. Primum horum ad *Bigotium*, ad *Valesium* secundum, tertium, ac quartum ad *Menagium* atque ad *Capellanium* spectare addebat, nec defuturus sum mandato. Rerum novarum nihil nunc in promptu est, nisi de bello Brittannico apud nos metum esse, ac contagionem illic nonnihil jam coepisse grassari. Vale, Holmiae Suecorum MDCLXIV. a. d. v. August.

I. Vide *Gronovii* Epist. ad Heins. cccxcv.

EPISTOLA LVI.

JOH. SCHEFFERUS

*Nic. Heinsio.**Holmiam.*

M Eum de Philosophia Italica opusculum fuisse tibi non ingratum, gaudeo, deque eo judicium tuum; cum per otium amplius inspexeris, requiro. Tot ejus exemplaribus in Galliam Hollandiamque mittendis molestum tibi fuisse *Curionem* nostrum, aegre fero. Promiserat ipse, se daturum operam, ut citra tuam molestiam per nautas hoc negotium conficiatur. Nunc video abuti cum bonitate tua, quae quia simul meos usus spectat, pro ea summas tibi ago gratias, & occasionem quaero cupide, qua vicissim meam promptitudinem testari tibi valeam. Petronii fragmentum & tibi & aliis suspectum esse video. Ego quoque deprehendo pluscula in eo, ad quae haereo. Infinita tamen depravata, mutila, & glossis interpolata censeo. De omnibus cum cura, alia occasione. Nunc enim propter occupationes alias non licet. Quid de Livio *Gronovii*, grassante sic contagione per Amstelodamum atque Leidam, sperandum nobis sit, scire vehementer cupio; nam a *Gronovio* quidem ipso nihil habui litterarum longo tempore. Vale, vir Nobilissime, ac me amare perge. Upsaliae. a. d. 16. August. CIOIOCEXIV.

EPISTOLA LVII.

NIC. HEINSIUS

*Joh. Scheffero.**Upsaliam.*

G Ratiarum actione tardius, fateor, apud te defungor, vir Clarissime, quam aut officii mei ratio, aut munus longe praestantissimum postulabant. Sed inde publicis negotiis, hinc valetudine minus confirmata interpellantibus, jam pridem meus vix fui. Et tamen Arrianum ac Mauricium tuos majori jam ex parte perlegi, nec sine fructu praesentissimo, dum nulla ex observatis tuis pagella non doctiorem me reddit. In Gallias ac Bataviam nostram destinata abs te exemplaria ut tuto illuc quamprimum perferantur, quantum in me, diligentissime curabitur. De Petroniano fragmento publici juris faciendo si cogitare pergis, communicabo tecum, quicquid binis jam litteris in illo castigavit atque illustratum reddit noster *Gronovius*. Is ante Februarias Kalendas Livium suum in lucem proditum spondet. Sed ob hibernas itinerum difficultates vix ante Majas Kalendas libri tam desiderati exoptatique exemplaria sperare possumus. A *Bigotio* de die in diem litteras expecto, quem Lutetiam ex Neultria jam rediisse opinari licet. Claudianus meus lucem jam pridem videt, cujus ta-

men:

men nec ipse haftenus compos sum factus; cum lues per Bataviam universam hac aestate atrociter grassata commercium cum Suecis omne quodammodo abruperit, certe in annum proximum rejecerit. Eadem illa lues *Cornelium Schrevelium* e vivis sustulit; majori liberorum suorum, quos denos aut duodenos reliquit, quam rei litterariae damno, cum multa conaretur quidem ad ornandum eruditionis nomen, sed pauca bene, in describendis aliorum animadversis unice occupatus, idque nullo ferè adhibito delectu. Haec nunc: Amicos omnes jubeo salvere. Vale, vir Celeberrime, & me, ut solebas, amare. *Holmiae Suecorum MDCLXIV. a. d. vi. Decemb.*

EPISTOLA LVIII.

JOH. SCHEFFERUS

*Nic. Heinso.**Holmiam.*

NON meretur gratiarum actionem munus tam exiguum, praesertim apud eum, quem tot pridem officiis beneficiisque habes tibi devinctissimum. Neque opera mea tanta est, quam illustrando utrique adhibui scriptori. Scio vires ingenii mei, & conatus saltem non displicere tibi tuisque similibus cupio. Quorum proinde judicium de illo ac sententiam perscribes, cum intellexeris. Praecipue *Gronovii*, quem miror tam diuturnum pertinaxque silentium servare, etiam *Bigotii*, quem spero tuo studio accepturum, quod illi cum caeteris viris doctis a me destinatum est. Ignosce, quaeso, meae fiduciae, qua tibi toties negotium facefso. De *Petroniano Fragmento* cogitavi aliquoties, & adhuc cogito. Itaque si me juvare tua aliorumve voles opera, rem facies gratissimam. Vidi pluscula in eo, ut opinor, non inconcinna. In aliquibus adhuc haereo: ut in illo *tangomenas*, bis occurrente iisdem litteris. Sed & quid ista velint, nec dum assequor, quibus prae mala sua & cornua nascuntur. Item, *Staminatas duxi*, & plane matus sum. & frigori *laecasin* dico. & *pentiacum* & *pollicem porricino* & *scelio*. & *odaria saltare*. & *cromataneas* & *marcutia*, & *mufrius* & *baci bal-lum*. & *matautata*, & *saucunculum*. & *barcalæda*, idem *excatarrisasti*. Sunt & alia, quorum auctoritatem quaero adhuc apud bonos auctores. Ut, quod *malus fatus*, masculinae esset pro neutro, non uno in loco, *nervia* pro *nervis*, & hujusmodi. De quibus & ego amplius alio tempore, cum nunc per occupationes publicas, & solennem actum Magistrorum promovendorum, qui celebratur hodie, non possim. Vale, atque sicut haftenus, ita porro me tuum esse patere. *Upsaliae a. d. 13. Decemb. MDCLXIV.*

EPISTOLA LIX.

JOH. SCHEFFERUS

*Nic. Heinsio.**Holmiam.*

Respondere tuis jam ante octiduum debueram, sed expectabam nostros Mathematicos, qui aberant ab urbe, sicut solent, per hos dies festos. Interea redduntur litterae mihi *Curionis*, cum Fragmento *Petroniano*, & binis *Cl. Gronovii* epistolis. Pro quibus omnibus summas tibi ago gratias. *Gronovium* video ambigere, fraudisque suspectos habere *Dalmatas*. Ego quoque haesi semper haereoque: non tamen infelicitè expressisse *Petronium* ubique fere existimo, quicumque tandem fuerit, fragmenti ejus auctorem. Sunt enim in eo doctae locutiones plusculae, quaeque aliud sapiunt saeculum, quam qua scriptus ille liber in praefatione dicitur, qui continet id fragmentum. Quia tamen dubitare scio multos, facturumne operae pretium sim, si quae in mentem mihi venerunt de tot corruptis in eo scripto locis declarem, ignoro. Denique quid tu existimes, scire vehementer cupio. Sed ad Mathematicos revertor nostros. Observarunt illi sydus utrumque, more Mathematicorum, per tubos & instrumenta caetera. Daboque operam, ut proxime delineata habeas omnia: sic enim pollicitus mihi est *Rudbekius* noster. Quid portendant, indicare omitunt, cum plerisque nostris sit persuasum, aut nihil certi portendere, aut si portendant, sciri id haud posse. Quare veluti consensu quodam eos rident, qui spes metusve huic illive populo per divinationes suas injiciunt. Si quid vero deinceps intellexero, dabo operam, ut in tempore significem. Litteras *Gronovii* remittam proxime. Nunc enim otium non fuit describendi omnia, quae ex illis faciunt ad institutum meum. Vale, vir Nobilissime, annumque hunc novum, cum plurimis subsequenter tuo publicoque bono laetus valensque vive. Upsaliae a. d. 10. Januar. Anno MDCLXV.

EPISTOLA LX.

NIC. HEINSIUS

*Joh. Scheffero.**Upsaliam.*

Compertum ex rumoribus publicis haud dubie habes, vir Clarissime, Britannos foederatis Belgis denuo minitari bellum, nec minitari tantum, sed ad Martem apertum rem jam devenisse. Per quas turbas tam atroces fit, ut totum me ad occupationes ut ingratas, sic publicas tamen, cogar convertere, humaniori litteratura ad tempus valere jussa, cum alia ex aliis mandata per singulos tabellarios a patria ad me perferantur, quae otio omni mihi interdican ac Musarum sacris. Quapropter ignoscas mihi par est, si paria tecum non facio, & scriptionis officium mutuae paullo negligentius usurpo. Interim recte

te

te facturum cenſeo, ſi fragmentum iſtud, quod ſub Petroniano circumfertur nomine, nuperque admodum luce donatum eſt, ruruſ publico permittas. Eſſe enim in illo nonnulla, quae guſtum antiquitatis haud dubium nobis dant, proruſ ut credam perſuadeor: nam de omnibus id adfirmare non auſim. Nonnulla ex iis, quae negotium tibi faceſſebant, jam caſtigavit noſter *Gronovius*, ut ex literis ejus cognoſſe potuiſti. Quid Mathematici veſtri obſervarint in cometa nupero, deſidero, ut ſatiſſiat curioſitati quorundam amicorum per Italiam Galliamque ac Germaniam, qui ſuper ea re per literas me conſuluerunt: divinationes & vaticinia aſtrologica nil moror. Inter viros horum ſtudioꝝ peritos haud convenit, cum alii unum ſolum modo cometam apparuiſſe contendant, alii duos, ſed tempore diverſos & loco. Ex Belgio tabellarius nec dum advenit, ut nunciare vix poſſim, quid illic nunc rerum geratur, niſi hoc unum, ad bellum omnia neceſſaria parari, brevique in promptu fore centenas naves omni armatura inſtructas. Claudiani exemplaria duo aut tria ex Belgio proxime accepi, quorum unum tibi ſervetur. Arriani & Mauricii, quae in Gallias, ut ſcis, deſtinabantur ante hos tres meſes, ne nobis perierint, metuo. Ajunt enim navem ferro onuſtam, quae hinc in Hollandiam contenderet, in mari Balthico vi tempeſtatis eſſe depreſſam; ſed nomen navis a me ignoratur. Vale, vir Celeberrime, & amicos meis verbis, ni moleſtum eſt, ſalvere jube. Exarabam Holmiae Suecorum MDCLXV. a. d. VII. Februarii.

EPISTOLA LXI.

JOH. SCHEFFERUS

*Nic. Heinfio.**Holmiam.*

ETſi nihil mihi ſit jucundius, quam creberrimas abs te accipere litteras, tamen raritatem earum excuſari mihi, non erat neceſſe, qui jam pridem intelligo, quantis nunc negotiis obruare. Neque alia eſt cauſſa, quae me parcioꝝ eſſe in ſcribendo juſſit proximis hiſce meſibus. Tametſi enim erat, ſuper quibus ſententiam exquirere tuam non una vice volebam, tamen nugis meis ſerias res tuas interturbare nefas videbatur. Qua in re ſi quid a me peccatum eſt, inſcitia potius quam ignavia cenſebis factum. De cometa promiſit nuper *Fornelius* noſter, ipſum ſe ad te ſcripturum. Quae res effecit, ut deinde hanc curam ejicerem ex animo. Nunc denuo cum ipſo egi, promiſitque is nonnihil poſt horam unam atque alteram, ſi accepero, una cum hiſ transmittam. *Rudbeckius* ſtudioſe colligit judicia exterorum de eo (& cum ſingulis tabellariis huc mittit alia aliaque Illuſtr. Cancellarius) poſtquam bonam illorum naſtus erit copiam, & jam, quid alii ſentiant, intellexerit, ſe ſuam quoque proditurum ſcripto promittit ſententiam. Eſſe enim ſibi quaedam obſervata, quae adhuc nemini, quantum videre potuerit ex hiſ, quae haſtenus accepit. Quare petit, ut ne nimium feſtines, namque daturum operam, ut paulo poſt habeas accuratius quid, quam nunc ſtatim poſſit dari. In eo

con-

conveniunt plane *Rudbekius*, *Fornelius*, alique, quod existiment non fuisse unum cometam, verum duos diversos, cujusque sententiae rationes satis firmas proditurum se *Rudbekius* recepit. Tu censebis suo tempore. De Claudiano feliciter emisso tibi gratulor, proque liberalitate tua tibi ago gratias maximas. Casum fasciculorum nostrorum aegre fero, &, si certi de eo erimus, resarcire illum proxima occasione quaero. Petroniana mea properant ad finem. De editione tamen eorum adhuc haereo incertus, donec forte per occasionem demonstrare tibi potero, judiciumque tuum coram explorare. Sed diutius molestus tibi esse non sustineo. Ergo Vale, ac, ut soles, me amare perge. Omnes Amici perofficiose te salutant. Upsaliae a. d. 14. Febr. Anno *MDCCCLXV*.

EPISTOLA LXII.

JOH. SCHEFFERUS

*Nic. Heinsio.**Holmiam.*

Quod in remittendis *Gronovii* litteris fui tardior, non alia est causa, quam quod *Curio* noster se quotidie dictitaret abiturum, cui rectissime credi posse confidebam. Nunc quia video adhuc per dies aliquot hinc mansurum, en tibi cas, una cum dissertatione mea de auctore fragmenti *Traguriani*. Quam nisi grave est, velim perlegas, judiciumque de illa tuum mihi perscribas. Cl. *Gronovii* observationes admodum me delectarunt. Unam tamen non intelligo, quando ex *Martialis* VIII. 59. citat, *Autolyçi tam piperata manus*, nam in editis, quos ego vidi, non est *piperata*, verum *piceata*. suspior, *Scriverium* illo modo habere. Verum eum videre non licuit, quia hinc est nemo, qui exemplar ab eo editum habeat. Tuum & *Gronovii* judicium de Auctore dicti fragmenti libenter simul publicarem, si scirem, non ingratum id vobis futurum. Tu sententiam perscribes tuam, & quid fieri velis aut non velis, indicabis. Gratam Cl. Dn. *Capellano* fuisse voluntatem meam laetor. Utinam ad ipsum, amicosque caeteros pervenire nostra possent. Nunc dubito, propter ea, quae scripsisti nuper. Nautae nomen, cui commissa fuerunt, ignoro, nec nunc adest *Curio*, ut ea queam scire. Scribam mox, si veniet; quod spero. Interea Vale, vir Nobilissime, ac me amare perge. Upsaliae 3. Mart. *MDCCCLXV*.

EPISTOLA LXIII.

NIC. HEINSIUS

*Joh. Scheffero.**Upsaliam.*

Commentarium tuum de *Stylo*, *Curionis* nostri opera, accepi, munus longe gratissimum: qui etsi *Upsaliam* tunc denuo se cogitare significaret, neglexi tamen *Claudianum* illi ad te perferendum tradere, quod in valetudine adversa, cum qua mihi res erat, cogitationes occupabantur. Cl. *Rubekium* jam

Tom. V.

K

absol-

absolvissē opinor, quae super cometa nupero meditari dicebatur, quod cometa ipse jam desierit apparere. Sunt & alibi terrarum, qui in eodem argumento exercentur, a quibus illum praeveniri nolim: ejus rei indicem mitto epistolam, quam ab amico proxime accepi. Mitto & Bigotianas litteras, quod completantur nonnulla, quae tibi fore haud ingrata sum opinatus. Et has & illas, si sine incommodo tuo fieri id potest, ad me reverti quamprimum cupio. Livius *Gronovii* etsi publico jam donatus, tarde admodum ad nos perferetur, quod piraticis incursibus mare infestetur. Vale, vir celeberrime, *Holmiae* MDCLXX. die XXVI II. Martii.

EPISTOLA LXIV.

JOH. SCHEFFERUS

*Nic. Heinsio.**Holmiam.*

Reddo tibi litteras cum summa gratiarum actione. Phaedrum denuo a *Fabro* esse editum video, idcirco videre ipsum impensissime desidero. Quod si per calamitatem bellorum huc transmitti non potest, optarem describi ea, quae ad me pertinent, atque huc curari per tabellarium, neque enim tam multa esse possunt. *Mentelius* num edito *Petronii* fragmento aliquod de auctore judicium, vel notas emendationesve adjecerit, scire aveo. Quae de cometa perscripsisti, *Rudbekio* legenda dedi. Respondit, sibi pridem jam compertum esse, unum fuisse, non duos. Pleraque quae parata habebat, tradidisse igni ob causas, quas coram referam suo tempore. Velle tamen tuam in gratiam nonnulla, quae repetere memoria possit, consignare denuo, ac ad te mittere. Id simul hac ipsa indicavit hora, se cum quibusdam aliis hodie mane observasse aliam cometam bene magnum versus Orientem, quem oravit, ut & tu consideres, quidque de eo observarint alii, in posterum significes. Livium Cl. *Gronovii* prodiisse gaudeo, illiusque compotes nos futuros suo tempore confido. Claudianus tuus quandocunque venerit, erit mihi longe gratissimus. Vale, vir Nobilissime, meque, sicut soles, ama. *Upsaliae* a. d. 31. Martii MDCLXX.

EPISTOLA LXV.

NIC. HEINSIUS

*Job. Scheffero.**Upsaliam.*

DE Phaetro *Tanaquilli Fabri* nuper iterum in lucem prolato negotium *Emérico Bigotio* litteris proximis commendabo. Quamquam ille in agro *Rotomagensi* etiamnum subsistit, per adversam fratris valetudinem impeditus, quominus *Lutetiam* possit recurrere. De *Mentelii Petronio* rem omnem quoque diligentius explorabo. Sed *Philologicae* eruditionis nihil ab illo velim tibi pol-

pollicere, quamquam vir est caetera non indoctus, & egregie officiosus. Cometa etiam apud nos diebus proximis coepit apparere. Qui ne non diversus sit ab illo, quem superiori anno atque hujus initio conspeximus, etiam atque etiam nobis est videndum. Quae Cl. *Rudbekius* super hoc argumento sperare me jubet, avidissimus expecto, nollemque vir accuratissimus in lucubrationes suas tam ferociter ac iracunde saevisset. Tu hortare illum, ut in proposito pergat. Mitto hinc epistolam eodem spectantem, quam Hamburgo hodie accepi. Eam *Rudbekio* & *Fornelio* nostris legendam permittas, licet postea huc redituram tua opera. Claudianus meus occasionem operitur, qua perferri tuto ad te possit. *Gronovius* postremis suis significabat, Quintilianum suum prodiisse. De Livio nihil addebat, quem tamen & ipsum jam prostare venalem ex Elzevirianis litteris prope colligere mihi videor. Vale, vir Celeberrime, amicorum decus. Socerum tuum cum ornatissimis viris, *Rudbekio*, *Verelio*, *Brünnero*, *Fornelio* salvare plurimum jubeo. Exarabam Holmiae Suecorum Anno MDCLXV. a. d. VII. Aprilis Jul.

EPISTOLA LXVI.

JOH. SCHEFFERUS

Nic. Heinsio.

Holmiam.

Ecce tibi litteras, quas huc nuper voluisti mittere. Scripsit, ut opinor, jam ante octiduum *Fornelius*, quae spectare ad propositum negotium videbantur. At *Rudbekius* noster tardior est, propter & labores alios aliosque, quibus obruitur, & quia collatis omnium aliorum sententiis annotaturum sese sperat, quae adhuc a nemine sunt observata in hoc toto de cometis argumento. Dabit & picturam, quae omnia reddet evidentiora. Et sperabam fore, ut nunc omnia haberet confecta, idcirco scriptionem huc usque differebam. Sed quia heri in coena mihi dixit, adhuc aliqua desiderari, tacendum diutius non putabam, ne me oblitum mandatorum tuorum censes. Veniet ipse *Rudbekius* ad vos circa finem hebdomadis hujus per dies aliquot, ubi ipse forsitan sua tibi coram tradet. Quod mea causa scribere amicis in Gallia dignatus fueris, est gratissimum mihi, nec nunc expecto quid impatientius, quam responsum. Libelli nostri, qui destinabantur passim viris bene nobis, ut putamus, cupientibus, perferuntur Lubecam, ibique haerebunt, donec occasio aperietur, qua transmitti queant in Hollandiam, quod praevideo fore non, nisi post tempus bene longum; atque vehementer doleo. Tu si ad eorum aliquem scribes, significabis hoc infortunium, & nos liberabis a suspitione oblivionis aut ignaviae, nisi grave erit. Petronii fragmentum, quantum quidem ex eo nunc est editum, ad te deferet *Curio* noster, quem *Rudbekius* habebit socium itineris. Vale, vir Nobilissime, nosque si non immerentes sumus, amore tuo prosequi porro perge. Upsaliae a. d. 25. April. MDCLXV. Misit ante tempus bene longum aliqua suorum ad me *Titius*, Professor Dantiscanus, idque tua, uti

opinor, opera. Eidem mearum nugarum aliqua remisi cum Bibliopola Lubecensi praeteritis nundinis autumnalibus. Id quod velim per te intelliget, si forte illi scribes, quia vereor, ne non magis in hoc, quam aliis commissis ei negotiis fidem suam servarit. Iterum vale, ac confidentiae meae ignosce. Nomen Bibliopolae, nisi fallor, est *Beeckenstein*.

EPISTOLA LXVII.

NIC. HEINSIUS

*Joh. Scheffero.**Upsaliam.*

JOnae Fornelii comitatem in promendis sine procrastinatione observatis ad cometam nuperum spectantibus, uti debebam, habui acceptissimam. Id vir industrius ac solers, quando opportunum videbitur, ex te resciscat cupio. Mihi vicissim curae erit, ne qua negligatur occasio aut pereat, studiis ejus commodisque consulendi. *Rudbekium* huc propediem venturum recte postremae tuae monebant. Venit enim, sed sic, ut nobis non compellatis denuo ad vos decesserit, una cum *Curione* bibliopola, ut ajunt. Cum tamen paratum tibi apud me esse Claudiani exemplar tempestive satis indicaram, quod per illum ad te deferri debuit. Quae spes, quando me frustrata est, *Loccenii* nostri genero id ad te curandum permisi, qui cis dies paucillos Upsaliam se cogitare asseverabat nuper admodum. *Rudbekium* hortare, quaeso, ut coepisti, ne promisso desit. Ejusdem argumenti prodromum luculentum ab *Hevelio* propediem habebimus. Sunt & alii complures in Gallia Germaniaeque ac Italia, qui in hac ipsa palaestra assidui nunc desudant. pervenit jam in manus meas *Johannis Georgii Graevii* oratio adversus superstitionem ac meticulosam vulgi de cometis opinionem, quasi per illos sinistra quaevis & inauspicata nobis portenderentur; addito ejusdem materiae libello, qui *Andream Dudithium* auctorem prae se fert. Ex Gallia jampridem nihil a *Bigotio* litterarum ad me perfertur. Hunc, puto, frater-nae valetudinis malum pertinax alio vocat. Arrianus tuus cum Mauricio ne in via haerere pergant, a *Curionis* diligentia pendet. Utrumque certe libellum homines Lutetiae eruditi videre percipiunt, exemplar Reginae destinatum an Romam jam pervenerit, scire desidero. Sunt, qui opinentur etiamnum illam de Suecia repetenda cogitare, negant alii. Petronii fragmentum una cum tuis animadversionibus avide expecto. Quae vidi haecenus hujus tuae lucubrationis, mirum in modum placuere. Rogavi amicum Dantiscanum, quicum frequens litterarum commercium mihi intercedit, ne gravetur *Titium* percunctari, ecquid epistola tua cum fasciculo, quem nundinis autumnalibus librario Lubecensi *Beeckenstenio* perferendum credideras, recte sit curata. Ex Batavia nostra nihil nunciatur, praeter ea, quae ad bellum Britannicum referenda sunt. Vale, optime & doctissime vir. Holmiae Suecorum CIOIOCLXV. a. d. XIX. Maii.

EPISTOLA LXVIII.
NIC. HEINSIUS.*Joh. Scheffero.**Upsaliam.*

Nulla applausus spe aut expectatione erectus, sed fretus sola amicitia nostra, & indolis tuae benignitate illa luculenta, per quam fit, ne conatus mei in litteratura qualescumque tibi omnino improbentur, Claudianum nostrum nuperae editionis ad te misi, Scheffere clarissime. Commendabit etiam opellam utcumque nostram, uti auguror, Typorum haud quaquam aspernandus nitor. Meis ipsis lucubrationibus non nimium laboriosis sat superque gloriae parietur, si post plurimas scriptoris eximii editiones nostra haec omnium minime mendosa ac impolita esse censebitur. Praestantissimo *Rudbekio* promissa praestare per occupationes continuas liceret vellem. Nam & fidem ejus a me liberatam cupit per assiduas litteras. Eques ille Polonus, qui in eo totus est, ut variorum de Cometis nuperis observata in unum colligat, ac collecta publico permittat, & mihi grave est toties super re eadem interpellari. Interest praeterea *Rudbekii* ipsius non latere diutius, quae observavit. ne si alii prolatis in lucem observatis iisdem illum praevertant, homines maligni postea criminentur, alienis plumis exornatum prodire, non suis. In unam omnia epistolam conferri haud incongrue aut incommode, ni fallor, possunt. Praeter *Graevium* jam duo tresve alii scriptores super hoc argumento ex foederatis Belgis publice circumferuntur. Accepi etiam Dantisco Hevelianum de Cometis prodromum, libellum mire accuratum. Quae Polonus eques in hanc rem proxime ad me dabat, hinc mitto reditura in manus nostras tua opera, ut spero, ubi oculis *Rudbekianis* atque *Fornelianis* erunt delibata. Erravisse nos in nomine bibliopolae Lubecensis ut cognoscat *Titius*, operam nudius tertius dedi. Ex Belgio nostro rerum novarum nihil, ubi omnium studia in bellum Britannicum intenta sunt. Prostat jampridem publice *Livius Gronovianae* recognitionis: prodibunt & propediem *Euangelia Gottica*, nisi jam prodire. Tua ad *Petronianum* fragmentum observata multum mihi arrident. quod in eo habetur, *Sic notus Ulysses*, *Maronianum* est hemistichium ex *Aeneidos* 11 vers. 64. unde manifestum fit, quid sibi hinc velit *Petronius*. Erant alia, de quibus monitum te cupiebam: ea fortassis in medium proferentur a minus occupato. *Falconerius* & *Bigotius* avent scire, quid sperandum sit a *Brunnero* nostro. Salveant amici omnes, tu vale, & veni. Exaratum *Holmiae* CIOIOCLXV. a. d. xv. Junii Juliani.

Stanislaus de Lubienietz Lubieniecus Rolisius, qui Theatrum Cometicum edidit Anno 1667. in quo videbis omnes *Heinsii*, *Rudbekii*, *Fornelii* & aliorum de Cometis communicatas epistolas;

EPISTOLA LXIX.

JOH. SCHEFFERUS

*Nic. Heinsio.**Holmiam.*

SEro tuis litteris respondeo. Nempe eo tempore, quo tradebantur mihi, *Rudbekius* & *Fornelius* aberant: & quia ambo versabantur Holmiae, sperabam fore, ut te convenirent ipsi, deque istis omnibus coram tecum agerent. Nunc ait *Rudbekius*, se quidem quaesivisse te domi tuae, sed non reperisse, mox cum navigio coactum abire, in quo nescio quas arbores peregrinas habebat collocatas. *Fornelio* litteras tradidi, ut praecepisti. Ait nil ad eas posse reponere, nisi viso prius Cl. *Hevelii* libello, quare ut mittatur sibi, ipsum esse tecum acturum. Litteras illas interea servare, nisi plane remitti velis statim, quod nunciare poteris cum proximo tabellario. *Rudbekium* & ante saepius, & nunc denuo admonui officii sui, monstratis tuis litteris, sed praeter pollicitationes nec dum quidquam potui extundere. Spero tamen operam daturum, ne de eo conquerendi justam tandem habeamus causam. Livium Cl. *Gronovii*, cum *Quintiliano*, & *Ulphila* Cl. *Junii* impatientissime expecto, quanquam quid sperandum expectandumve mihi sit, in hac tanta rerum omnium turba, penitus ignorem, nisi tu forsitan viam aliquam inveneris. De *Brunnero* nostro scribere nil possum, quia is jam ante dies quatuordecim in patriam abivit, nec ante tres quatuorve hebdomadas est reversurus. Pro iis, quae significasti in *Petronio*, summas tibi ago gratias, optoque vehementer, ut sit otium tibi, quo possis caetera addere. Invenient locum suum in addendis, quae subjicientur, eritque satis temporis, si intra hoc octiduum mittentur, cum in *Notis* reliqua sint folia duo, nec nimis festinet typographus. De *Phaedro Tanaquilli Fabri* num rescripserit *Bigotius*, scire cupio, simul & num ad eum sint perlati mei libelli, & si, quod metuo, perlati non sunt, ut per te intelligat, nullam apud me tam diuturnae morae esse causam. Vale, vir Nobilissime, ac me, ut soles, ama. Upsaliae a. d. 27. Junii Anno MDCCCLXV.

EPISTOLA LXX.

JOH. SCHEFFERUS

*Nic. Heinsio.**Holmiam.*

TAndem ad me venit *Claudianus* tuus. Injecerat ei moras aliquas primum affinis meus, serius abiens *Holmia*, mox nauta ingenio suo tardus. Sed expectationem tam diutinam compensavit abunde tanta ejus elegantia, ut post se relinquat plerorumque ejus generis aliorum. Quare pro tam singulari ac eximio munere gratias tibi ago maximas, tuumque fore me perpetuum polliceor. Cum *Rudbekio* non semel egi tuo nomine. Pollicetur

is quotidie industriam suam, & jam conscripisse quaedam scio. Sed tam multis aliis occupatus, nescio quomodo ad hoc negotium sit tardior. Non omit- tam tamen urgere, & vel invito extundere aliqua, minime, ut ex colloquiis ipsius conjectare possum, contemnenda. Indicabam ipsi, quae significaveras de oratione *Graevii*; statim videndae ejus desiderio exardebat. Sed quia ignora- bam rationem, qua huc posset adferri, effeci, ut hoc, quicquid est, differret in adventum suum, cum post dies summum quatuordecim iter ad vos cogitat. Arrianum meum ad Reginam Seren. CHRISTINAM pervenisse scio ex litte- ris ¹ *Laurentii Skyte* sacerdotis, Roma ad me scriptis mense superiori. Quid actum sit cum caeteris exemplaribus, ignoro. Scripsit *Curio Bibliopolae* Lu- becenti, ut per suos homines mittat Hamburgum, inde in Bataviam, ad com- munes amicos. Quid facturum sit, suo tempore intelligemus. Quae Dantiscum mea causa perscripsisti, grata sunt, sed errabam in significando nomine Biblio- polae, nec enim *Beckenstenius*, sed *Wetstenius* vocatur. Poterit nihilominus vel ex his colligere *Titius*, non defuisse me officio meo, gratamque mihi esse ejus amicitiam. Petronius procedit satis lente, dum typographi sunt occupati ex- cudendis tot disputationibus, quot fere singulis annis circa studiosorum no- strorum abitum, feriasque Caniculares solent haberi. Spero tamen, post tres quatuorve hebdomadas finitum iri, hocque ago eo majori studio, quo libentius intelligo, non displicere tibi ea, quae ad eum adnotamus. Cupio mirifice vos videre coram, & potest fieri, ut brevi ipse etiam ad vos excurram. Nunc enim impediior curis domesticis, & uxoris nec dum satis curata valetudine, quam contraxit adversam ex puerperio superioribus diebus difficillimo, ut de vita ejus desperarem. Unde vel praecipue factum, ut ad tuas tardius, quam debebam, responderem. Vale, Nobilissime Domine, ac me, sicut soles, perge amare. Upsaliae a. d. 6. Julii CIOIOCLXV.

¹ Hunc antea regium in Portugallia Residentem, ut vocant, transisse ad pontificios, & Monachum factum scribit *Schefferus* de Script. Suec. pag. 176. Edit Moller.

EPISTOLA LXXI. NIC. HEINSIUS

Joh. Scheffero.

Upsaliam.

Quae proxime ad te perscribebam de praelio navali inter Britannicam no- stramque classes commisso nuper admodum, extenuando, qua adfecti fu- mus, cladem, magnis equidem auctoribus peccabam, vir Clarissime, sed peccabam tamen. Ita enim ut crederemus, inducebant nos litterae *Nicolai Rusii*, qui foederatorum Belgarum Patribus ab actis est & epistolis, ad *D. Isbrandum* perscriptae in hanc rem. Inducebant & privatae amicorum scriptiones. Misere postea patres indicem universae classis accuratum, ex quo licuit deprehendere, naves XVI. bellicas cum celoci una desiderari, partem maximam aut exustas aut depressas ab hoste, cum classis tota ex navibus centum circiter & vicenis

con-

confisterit, quarum nonnullae tamen ad pugnam serius sunt egressae, nec praelio interfuere. Nocuit plurimum rebus nostris ventus hosti secundus, nobis adversus: nocuit etiam non minus primo statim conflictu ductores classis nostrae praecipuos cecidisse: cum ex praestantibus nonnulli quoque abessent, *Ruterum* in Africam Americamque secuti, quos Deus nobis sistat incolumes; sunt enim propediem cum magna praeda adfuturi, ut ipsius *Ruteri* monent litterae. Qui Brittannos in Africa adortus primum, non modo recuperavit arces haec, quas illi perfide & contra datam fidem praeripuerunt; verum etiam quae ab illis loca illic terrarum jure possidebantur, ditioni foederatorum Belgarum adjecit, Cormantinam imprimis arcem, caput gentis, naves complures aut cepit aut depreffit. Inde ad Insulas Americanas a Britannis infestas conversus, non minori illic quoque damno hostem adfecit, vastatis coloniarum potissimis. Hunc ut salvum quampridem apud nos videamus praecipua patribus est cura: tum & classem ex Oriente, quae opulenta admodum de die in diem nobis venit expectanda. Ultimo conflictu non incruentam Britannis cessisse victoriam in conperto habemus, una navi a nostris capta, exustis aliis nonnullis. Sociorum navalium vim haud exiguam, ducum adhaec quosdam occubuisse, viros principes ac splendido prognatos loco non paucos, qui praelio voluntarii interfuere. ex quorum numero unus tormento majori bellico disiectus avulsa cranii parte manum perstrinxisse dicitur duci Eboracensi, cujus lateri forte proximus adstabat; quanquam Britanni damna sua prudenter tegunt ac dissimulant. Rex tamen quod subtristior appareat hoc rerum statu tam laeto, sunt qui de morte aut Eboraci Ducis, aut Ruperti Palatini, aut Montacutii nonnihil suspicentur. Quicquid tamen id est, diu latere nos non potest. Ministros Suecum ac Danum, qui Londini sedem fixere, laetitiam palam testatos esse, ac Regi victoriam gratulatos pudendum est. De Danis praecipue, qui se salvos nobis, quanti sunt, debent. Orator Gallicus, quia in contraria ivit, male a plebe est multatus. Rex interim Christianissimus accepta clade nostra oratori Britanno significavit, sese mox staturum a partibus nostris, ni Rex Britanniarum ad aequas pacis condiciones descenderet, remota procrastinationis ambage. Hoc exemplum si foederatorum reliqui aemularentur, pacem sancitam brevi videremus. Sed a publicis hisce ad privata ut veniam, a *Bigotio* epistolam accepi hesterno die, qua fratrem suum fato functum nuntiat, seque in re familiari curanda totum occupari: propediem Lutetiam sibi fore excurrendum, quando in Phaedrum *Fabri* inquisiturus sit, libellumque, si fieri possit, ad te missurum. Mauricium & Arrianum tuos frustra haecenus expectat, quos, nisi *Curio* paullo diligentius, quam fit haecenus, curabit, fore praevideo, ut Lutetiam nunquam perferantur. Negat & *Titius* fasciculum tuum haecenus in manus suas devenisse, qui mari Gedanum recta ex hac civitate mitti debuit, non Lubecam per itineris ambages. A *Gronovio* nil omnino. A Cl. *Rudbekio* perlata est heri ad me epistola, cui quod reponam, nihil nunc est in promptu. Nam Hevelianum prodromum, quem nudius sextus mittebam, jam ad te pervenisse confido, quod exemplar Hevelianae munificentiae mihi est pignus. Alterum exemplar, quod

quod Magnus regni hujus Cancellarius utendum dederat, possessori suo restitutum est. *Rudbekium* aedes meas me absente nequicquam accessisse doleo, quem plurima salute impertitum volo. *Fornelium*, cum in hac civitate esset, nullum vidi. Tu quaeso & hunc & illum adhortare, ut si quid observationum suarum super cometa nupero juris publici factum volunt, maturent operas, quas urgere amicus Hamburgensis continua flagitatione non cessat. De Petronio gratificari desideriis tuis summo opere velim, sed per publicas occupationes non licet. Vale, vir celeberrime, & mihi, ut soles, fave. *Lubienicii* litteras remitti quidem velim, ubi commodum erit, nihil tamen est caesarum, cur festines. Exarabam Holmiae Suecorum CICIOCLXV . ad d. iv. Quinctil.

EPISTOLA LXXII.

JOH. SCHEFFERUS

*Nic. Heinsio.**Holmiam.*

PRO litteris *Bigotii* summas ago gratias. Video minuta esse, quae adversus me a *Fabro* adferuntur, atque miror. Ego ipse deprehendi alia, quae monstrabo suo tempore. Quo simul ad ista respondebo evidenter, ut appareat, contradicendi studio pleraque ab ipso proferri. Tua quoque locum tunc invenient. Interea opus ipsum cupio videre, si modo possit fieri. Quod me senem nominet, rideo: puto enim eum annis non paucis meam aetatem antecedere, ut qui anno hujus saeculi vigesimo primo sim natus, atque ita nunc annum agam quadragesimum & quartum. Potes hoc rescribere Cl. *Bigotio*, & simul de aetate *Fabri* explorare. Mitto hinc rursus folia quaedam a *Rudbekio* nostro elaborata. Spondet finem proxime & una figuras omnes. Petronius meus heri absolutus est. Exemplum mittam proxima occasione. Sum nunc ob praesentiam nostrorum Aulicorum paullo impeditior, ut veniam tumultuariarum huic scriptioni petere necesse habeam. Vale. Upsaliae a. d. 25. Julii CICIOCLXV .

EPISTOLA LXXIII.

NIC. HEINSIUS

*Joh. Scheffero.**Upsaliam.*

PRO exordio *Rudbekianae* epistolae ad me misso, est sane cur ingentes gratias me tibi debere lubens agnoscam. Utinam reliqua, quae supersunt pertexenda, tempestive compareant? Ex hoc enim gustu jam ubertim cognosse est datum, quid vir ille in hoc argumento possit praestare. Ipsum per litteras compellabo, ubi ea ex lucubratione nonnihil emerferit. Nam nunc interpellatorium atque importunum potius id officium, quam compellatorium aut comitati datum videri possit. Valetudinem nutare tibi invitius intelligo. Clade

Tom. V.

L

qui-

quidem qualicumque adfecti sumus, sed quam victores immane quantum extulere in majus. *Raterus* noster post expugnatas partem maximam in Africano litore arces Britannicas, Americani litoris oram nunc strenue populatur. Unde fit, ut speremus ingenti praeda onustum nobis illum mox adfuturum. Galliarum Rex minari Britannis pergit, ni desinant injuriarum, a nostris partibus sese staturum. Sed minis hisce nihil proficitur. De litteris Lubienicianis ad me remittendis, non est quod nimium hinc festinaes, quas legi a *Rudbekio Fœrnelioque* auctor ipse, ut videre potuisti, cupit. Habes hinc a *Bigotio* excerptorum nonnihil, quod corrasit ille ex Fabrianis ad Phaedri fabulas observatis. *Schedae* ipsae, ubi iis abunde eris usus, ad me reverti cum cominodo tuo poterunt. In te non minus quam in me injurius est illic *Faber* non uno loco, quantum apparet. Primo conjecturam meam super τὸ *videns* Petaviano codici adscripsit maligne satis. Deinde quod τὸ *prospexit* pro *conspexit* ejusdem codicis minus Latinum putat, in eo fallitur. Est enim eleganter id dictum & apposite hinc loci. *Prospicit* enim, qui loco edito in depressum oculos vergit, ac declinat, uti hinc fit. Sic *Aeneidos* primo vers. 185. *Aeneas prospectum pelagi ex scopulo petere dictus*, & paullo post, ex eodem scopulo *tres litore cervos prospicere errantes*. Libro iv. 419. *Dido arce ex summa littora late fervere, Trojanis altum petentibus, prospicit*. Libro ix. 33. *Teucri subitam pulveris nubem glomerari per campos e vallo castrorum prospiciunt*. *Aeneid.* xi. 839. *Opis Dianae comes e summis montibus Camillam morte multatam prospicit*. Atque ita porro. Quid enim necesse in re trita exemplis indulgere? *Fab.* vii. libri i-i. *Viridaria* non posse ferri & ego jamdudum, si recordaris, monueram, nec constare versui huic legem metricam. Quare *viridia* reponi oportere, nec conjecturae etiamnum poenitet. Significabam tum id vocabuli apud *Plinium* bis terve occurrere, Libro v. *Epistol.* 6. & apud *Jurisconsultos* veteres non uno loco. Certe in *Pandectis Florentinis* vix aliter exaratum occurrit. Nec non eo usi *Seneca* *Epist.* lxxxvi. & *Macrobius* lib. i. cap. 10. *Saturnal.* pag. 171. ed. *Pontani*, tum scriptor vetustus apud *Nonium Marcellum*. Sed locus non est in promptu. Legisse me tamen illic sum certus. Sed & *Cicero* libro i-i. *epistolarum* ad *Atticum* Ep. 3. Si membranis antiquis credimus. *Cyrus ajebat viridiorum διαφάσεις latis luminibus non tam esse suaves*. ubi *radiorum* circumfertur. Nec *Faber* probat, *Canes confusi, subito quod ruerat fragor*. Sic enim distinguo malo. *Fragor*, inquit; non ruit. At discurrit certe, qua significatione τὸ ruere nonnumquam sumi, est in comperto. Ut in illo *Nelsonis*, *Exspatiata ruunt per apertos flumina campos*. Sed demus ruere sumi pro cadere, certe fragor ille, quo magis discurrit, eo magis terris appropinquat. Hinc devoluta tonitrua apud eundem *Phaedrum* de Principe tibicine. At fragor parum proprie ruere dicitur. Quasi mille talia poëtis non sint in usu. Apud *Martialem* epigrammate ultimo libri i-ii. *Subitis coelum ruit imbribus*, quomodo *Juppiter* (pro coelo) apud *Horatium* horrendo ruit tumultu. & apud *Senecam* *Hippolyto*: *Si nunc serenum est, omnis impulsus ruat Aether, & atris nubibus condat diem*, cum imbres, fulmen, tonitru. ex coelo ruant. *Cadit fragor* apud *Maronem*. Sic cunctus *Pelagi* cecidit fragor:

gor. Cum non tam fragor ipse fluctuum cadat, quam fluctus cum fragore mixti cadant ac confidant. Sive igitur fragorem coeli ruere, sive coelum cum fragore ruere dixerit Phaedrus, tantundem sit. Sunt plura in Phaedro examinanda, de quibus alibi. Ut cum libro i. Fab. rii. *Fugantque rostris* circumfertur, pro quo concinnius fore opinor, *Figuntque rostris*, proprio hac in re verbo. Sic apud Nasonem Met. xiv. picus Martius *duro fera robora rostris figit*. Sed desino. Tu vale; vir Celeberrime. Exarabam praepropere. Holmiae Suecorum Anno MDCLXV. a. d. xxxi. Jul.

EPISTOLA LXXIV.

JOH. SCHEFFERUS

Nic. Heinsio.

Holmiam.

Reddo tibi summa cum gratiarum actione utramque Epistolam, quam communicasti nuper. Cum *Grypenhielmio* nondum sum locutus. Quamprimum occasio erit, mandata tua expediam. Quae de Cl. *Gronovio* scribis, non intelligo, adeo non metuendum est, ut per me aliis innotescant. Video quidem eum agere gratias. Sed quae causa ejus rei sit ignoro. Tu hoc explicabis, nisi grave fuerit. ¹ Cl. *Gronovium* me nimis esse facilem putare video in arripiendis aliorum figmentis, ideoque nolle, ut quae de Phaedri fragmento, vel supplemento garriuntur, significantur mihi. Rideo, viroque optimo ago gratias, qui vel hoc pacto credulitatem meam vult castigari, atque conservari dignitatem ac existimationem. Interea cupio scire quis sit ille, qui tam magna promittit, tectoque nomine aut ficto a Cl. *Gronovio* significatur. Spondeo, me fidem illi adhibiturum esse nullam. Livium *Gronovii* avidissime expecto, utinam tuto ad nos perferatur. Fragmentum *Petronii* redditum tibi puto. Sed post adjici curavi, quae Cl. *Gronovio* sunt annotata. Ea accipies post dies aliquot, cum *Carid* noster ad vos revertetur. Nunc excudere coeperunt veterem Upsaliam nostram. *Rudbekius* cum tabellario proximo pollicetur reliqua sui scripti, atque tum & litteras se ait redditurum. Vale, vir Nobilissime, ac ut soles, me amare perge. Upsaliae a. d. i. Augusti Anno MDCLXV.

Hanc cum superiore tabellario misisse debueram. Sed accidit casu, ut aliam arriperem, sicut suspicor, aut mitterem nullam. Si aliam misi, quaeso, ut ignoscas errori, per festinationem commisso, eamque remittas. Sequuntur iterum hac vice *Rudbekiana* nonnulla, ut vides. Proxime habebis finem. Vale.

¹ Vide *Gronovii* ad *Heinsium* Epist. ccciv. in fine.

EPISTOLA LXXV.

NIC. HEINSIUS.

*Joh. Scheffero.**Upsaliam.*

TEstudineo gradu *Curionem* ad nos properare video, vir Clarissime, cujus opera usurus eram in codice Panegyricorum veterum ad te curando. Sed & nudius sextus Dantisco fasciculum accepi a *Joachimo Pastorio*, qui libellos nonnullos complectebatur, quorum copiam auctor ipse voluit tibi a me fieri. Si abesse pergit *Curio*, aliam oportunitatem sum circumspecturus, qua & Panegyrici veteres & haec Pastoriana ad te perferantur, ne quid in me sit morae. *Gronovii* Livium Hamburgensi via Lubekam misit *Elzevirius*, unde huc perveniat. Sed quando manus nostras subitum sit exoptatissimum hominis amici munus, id divinare vix ausim. *Bigotius*, qui Lutetiam se rediturum propediem penultimis suis asseverabat, in Neustria haerere pergit, nec pedem inde moturus est. Ita fit, ut me lateat omnino, quicquid ea in civitate rei inter homines geritur. Nec ex Belgio nostro nuntiorum quicquam ad studia haec nostra spectantium accepi. *Menagius* ipse cum in epistolis exarandis sit lentissimus, quid in ejus aedibus super fragmento Petroniano disputatum sit haud scio. Habes hinc nonnihil litterarum ad *Rudbekium*. Velim ultimae duae figurae tandem aliquando compareant; cum *Lubienius* moram hinc haud levem objici operis typographicis diu sit quod conqueratur. Pro ejus epistolis mihi restitutis gratias ago, acturus majores, si quid responsi ad illas ab Upsaliensibus amicis una adfulisset. Vale, vir eximie. Exarabam Holmiae Suecorum MDCLXV. a. d. xv. Septemb.

EPISTOLA LXXVI.

JOH. SCHEFFERUS.

*Nic. Heinsio.**Holmiam.*

POST MS. codicem tuum, qui non parum mihi utilis, accepi nuper Vernetam editionem quoque ac Parisiensem heri veterum Panegyricorum. Pro quo subsidio gratias tibi ago maximas, daturus operam ut occasione prima libri illi tibi, nisi ipse interea ad vos venero, reddantur. Valde equidem districtus sum curis aliis, quas imponit mihi munus nuper a S. R. M. commissum. Dabo tamen operam, ut absolvam, quae in Pacato habeo affecta: Utinam permittat valetudo, quae subinde aliis aliisque molestiis impeditur. Sed hoc Deo cura erit, cui & tuam commendamus, maxime quia metuimus, ne diuturnioris silentii tui causa sit illa ipsa non satis commode se habens valetudo. Petiit Cl. *Rudbekius*, ut & salutem tibi nuntiarem ejus nomine, & quaererem, quo modo ea sese habeant, quae Hamburgum nuper ad *Lubienkium* sunt missa. Num
per-

perlata sint ad ipsum, eaque is acceperit, an pervenerint in manus alienas. Si occasio erit, atque si videbitur, vel ipsi, vel mihi respondere poteris. Plura nequeo hac vice, quod tu velim vitio ne veritas mihi, & bene valeas. Upsaliae 21. Novembris MDCLXV.

EPISTOLA LXXVII.
NIC. HEINSIUS

Job. Scheffero.

Upsaliam.

¹ **B**inis tuarum responsum debeo. De Josepho edendo valde mihi probatur institutum viri Clariss. *Bosii*. idem agitavere consilium jam olim *Scaliger* & *Casaubonus*. Postea *Petrus Cunaeus* nostras, & *Samuel Petitus*. *Scaliger* codicem Josephi plurimis castigatum locis *Francisco Gomero* moriturus legaverat. Distracta quidem ante hoc decennium publica auctione apud Groninganos, si recordor, *Gomari* fuit bibliotheca, sed inter illos libros, etsi copiosos, Josephus non comparuit. Quem *Gomari* gener, aut alius nescio quis ex *Ἰμαννὴλ* propinquis sibi vindicavit, ut postea mihi est intellectum. *Casauboni* exemplar penes *Emericum* filium haud dubie haerebit. Idem de *Cunaei* codice statuendum reor, cujus filius natus maximus, ex Oriente jam redux sedem Lugduni Batavorum fixit. *Petiti* Bibliotheca emtorem nescio quem invenit, invenit tamen, de qua re *Emericum Bigotium* nostrum occasione prima percunctabor; qui & ipse Josephi nonnulla cum optimis membranis commisit, quas ego schedas apud *Isaacum Vossium* ante hoc quinquennium inspexisse me memini. Nec denegabit, puto, harum usum *Bosio*, qua est humanitate, *Bigotius*; si id necdum praestitit; fortassis & alia hanc in rem bono publico collaturus. De *Scaligeri* & *Cunaei* exemplaribus *Gronovius* noster indagandis operam Cl. *Bosio* navare posset. Quem inter & *Casaubonum* *Emericum* necessitudinis nonnihil intercedit. In meis scriptis nil omnino asservatur, quo editio haec ornari possit. Rufini versionem haud dubie addendam operi curabit *Bosius*, & quidem ex vetustis membranis recognitam, quales in bibliothecis paullo instructioribus passim occurrunt, nam editiones typis haecenus descriptae admodum mendosae circumferuntur. His tu virum celeberrimum cum salute mea imperti, quaeso. ² A *Gronovio* heri epistolam habui. Ait is *Salustium* prodiisse, cui observationum nonnihil suarum per filium curarit addi. Videtur is cogitare de *Diatribis* ad *Sylvas Statianas* recu- dendis. Habui & a *Bigotio*. Narrat is secundum tomum epistolarum *Tanaquilli Fabri* in lucem nuper prolatum esse. Plura perscripturum se pollicetur, simul atque *Lutetiam* pervenerit, quo cogitabat ante Kal. Januarias. Addit alia tuae cognitionis haud indigna, quae apud me videbis, aut quae ad te mittam, si ex-

¹ Has omisi, quia nihil continebant, nisi *Bosium* gratias agere, pro studio juvandi ejus co- natus in Josepho. & alias saepe rejeci epistolas.

² Vide Epist. ccccv. *Gronovii* ad *Heinsium*.

excursus ad nos tuus differri perget Cl. *Rudbekio* salutem adscribo. qui optime sibi consulat, si cometam novum in usus publicos diligenter observabit: opinantur enim per Gallias Germaniamque mathematici stellam esse haud insolitam, quae in cingulo Andromedae apparet, de cometa non assentiuntur nostro *Rudbekio*. Vale, vir eximie, & me amare perge. Holmiae Suecorum MDCLXV. a. d. XXIX. Decemb. Auspicia instantis anni fortunata tibi adprecor. Nec *Bigotius*, nec *Gronovius* quicquam tuorum operum haecenus acceperunt, quod miror. Noribergium nescio quem commentarios parasse in Petronii fragmentum *Bigotius* monet, cui & *Valesius* observata sua in idem fragmentum typis describenda tradet. Argentorato ad me scribunt *Boecklerum* nostrum conclamatae esse valetudinis. Ignosce festinanti.

EPISTOLA LXXVIII.

JOH. SCHEFFERUS

Nic. Heinso.

Holmiam.

Tardiores solito me esse in respondendo fateor. Sed tarditatis hujus causa fuit primum valetudo parum prospera per aliquot hebdomadas, deinde *Curio* noster, qui quotidie abitu minabatur. Quem eo magis deferre meas ad te volebam, quod simul committere ipsi decreveram editionem novam Phaedri a *Fabro* publicatam, atque huc ad me transmissam. Quamquam nihil aliud contineat, quam quod pridem a Cl. *Bigotio* accepimus. Ipsa ejus verba sunt, quae transcripsit. Quod videbis ipse proxime, quando *Curio* ad vos discedet. Caeterum quia propositum nunc mihi est, primo quoque tempore denuo Phaedrum edere, indicandum tibi hoc existimavi, ut si voles aliqua monere, faceres in tempore. Quamquam nolo esse molestus tibi, quem scio, tot curis nunc esse districtum, ut ad haec studia nostra difficulter possis accedere. Hoc rogare audeo, ut transmittas mihi occasione oportuna editionem Rigaltianam Phaedri primam, ut eam conferre possim diligentius cum postrema ejusdem, Parisiis Anno 1630. in 12mo publicata. Puto enim plurimum inter se differre, cum tamen ad utramque usum sese scribat codicis Rhemensis lectionibus. Pro litteris Cl. *Titii* huc transmissis ago tibi gratias, & ut videas confidentiam meam, te ex adverso aliis ad Ampliss. *Gronovium* onero. Habui ab eo ante dies pauculos aliquas, quibus nunc respondendum fuit, licet nihil continerent praeter aliquas ad Phaedrum observationes. Quaeso autem etiam atque etiam, ne hoc vitio mihi vertas. Cl. *Rudbekium* non convenisse te vehementer miror, qui ultra hebdomadam Holmiae jam commoratur. Et promiserat mihi abiens se statim accessurum te, atque tarditatem mearum litterarum excusaturum tibi. Cometam mihi fassus est non esse aliam, quam stellam illam, de qua scribis. Sibi autem nominari cometam ex suis & peculiaribus rationibus. Sed hoc ipse explicabit melius, aut fortassis jam coram, priusquam has accipies, explicavit.

EPI-

EPISTOLA LXXIX.

NIC. HEINSIUS

Job. Scheffero.

Upsaliam.

JAm pridem ad te scripturio, vir Celeberrime, sed dum in eo jam ter quaterve-
sum, aliud ex alio rei inopinatae intervenit, quod cogitationes meas hinc
avocarit, inviti quamquam & nolentis. In ea scis nos incidisse tempora,
quorum ratio omnis cum sit turbata prorsus ac instabilis, vix est, ut quicquam
inde certi vindicare nobis possimus. Interim est cur gaudeam summo opere,
cum valetudine adfecta in gratiam utcumque te rediisse, quam ut cures dili-
gentius in posterum etiam atque etiam te adhortor. Ne dum studio nimis
intento in commune consulis, bono publico ante aetatem nobisque amicis tuis
praeripiaris. Tandem reversus est Lutetiam *Bigotius*. Quid illic rerum inter
homines geratur eruditos, ex ejus epistolâ uberrime, ni fallor, cognosces,
quam perlectam ad me reverti rogo, ut finas. Ex Belgio nuntiandum nihil
omnino occurrit; ubi omnia ad bellum sese terra marique conficiendum nunc
componunt, amplexis partes nostras tandem aperte Galliarum Daniaeque Re-
gibus, & Electore Brandenburgico. Si eadem consilia agitentur in hac aula,
posset a coeptis iniquissimis ad pacis studia nullo negotio converti Britannus.
De Phaedri fabellis rursus edendis te cogitare laetor. Editionem Rigaltianam
jam habuisses; sed occurrens mihi in publico noster *Curio*, dum ad vos festinat,
negabat expectare sibi integrum esse, suadebatque, ut opera filiae tuae libel-
lum ad te perferendum curarem. Quod consilium secutus addidi libellis Phae-
dri Petronianum fragmentum editionis Parisinae, quamquam nil in eo occur-
rat, quod sciri tua intersit. Aliam ejusdem fragmenti editionem in eadem
parari civitate cum animadversis doctissimorum hominum, praeter *Bigotium*
Capellanus quoque monet. Annotata tua in fragmentum illud cum exempla-
ribus libelli de stylo tandem ad se perlata esse nuper admodum significabat
Elzevirius, ac simul spem faciebat curae sibi fore, ut ad *Gronovium* & *Bi-*
gotium uterque quamprimum libellus mitteretur. De Tacticis scriptoribus ac
Commentario de secta Pythagorica cum nihil addat, facile hinc colligo, nec
dum horum voluminum copiam illi factam esse, quod miror & indignor. Phae-
dram percurram denuo, & si quid observationum novarum subnascatur mihi,
ejus te facturum sum participem. Jam olim de variis locis me tecum per litte-
ras scio egisse, quae legibus metri non fatis apud elegantissimum scriptorem
respondent, & levi vocabulorum in suum locum translatione, unde perperam
movere pedem, sanari possunt; quae antiquis animadversis majori ex parte an
sint inserta certo exploratum vix habeo. Egeram & de illo loco lib. 11. fab.
36. *perambulante laeta domino viridaria*, quem cum pedibus labantem animad-
vertisset *Faber*, *laeta* confidenter ejecit, quod vocabulum tamen hîc aptissi-
mum est. Ego, ni fallor, significavi minima mutatione *viridia* reponi oportere.

tere. Admitti enim dactylum a Phaedro penultima sede in jambis suis vel inde fit manifestum, quod subsequente proxima fabula habes, *si ve-ro acces-sit con-silia-tor male-ficus*; *Viridia* pro *viridariis* Latine dici jam pluribus apud te exemplis adstruxi, quantum recordor, quae nunc non repetentur. Adde Vitruvii locum lib. vi. cap. 6. *Hi collocantur spectantes ad septentrionem, & maxime viridia prospicientes*. Apud Senecam Ep. lxxxviii. scribendum est, *Cisternam aedificiis ac viridiis subditam*: non, *viridibus*; si lege stamus, quam Macrobius dicit Saturn. Lib. i. cap. 4. *viridiorum* quoque jam designavi ex antiquis epistolarum Ciceronis libri ii. ad Atticum exemplaribus. Eadem fabella isto versu, *prospectat Siculum & prospicit Tuscum mare*, nescio an monuerim videri scribendum, *& respicit*. non enim veri fit simile, duo illa *maria* a fronte villam Tiberianam habuisse. Nisi interpretaris ab antica parte Siculum, a postica Tuscum mare prospexisse. Tu videris. Vale, vir celeberrime, & me ama. Holmiae Suecorum cicioclxvi. prid. Kal. Mart.

EPISTOLA LXXX.

JOH. SCHEFFERUS

*Nic. Heinsio.**Holmiam.*

R Eddo tibi litteras *Bigotii*, cum proluxa gratiarum actione, quas communicare nuper mihi voluisti. Didici ex eis plurima, inter alia id quoque, quod in edendo de variis ingeniorum bonorum monumentis catalogo nunc pergant. Id quod mihi vehementer placuit. Credo enim hac in parte Parisienses rem praestare longe gratissimam iis omnibus, qui amant litteras. Utinam quis esset, per quem compotes illius opusculi fieri possemus. Verum metuo, ne sint vana nostra desideria hoc tempore. Libellos meos ultimos nunc pervenisse spero ad Cl. *Gronovium*. Quid cum Mauricio & caeteris sit actum non excogito. Putat *Curio* noster (quem credo apud te fuisse, ut qui heri hinc discesserit) fasciculos meos errore datos *Pluymero* Hagae Comitum, qui dari *Elzevirio* debuerint. Ita neminem scire, quid cum iis debeat fieri. Si quo pacto vel hunc vel alium errorem circa eos potes submovere, ac ut suum quisque consequatur, ratione aliqua efficere, rem facies mihi quidem longe gratissimam. Pro Phaedri editione Rigaltiana, & Petronii fragmento plurimum curae tuae debeo. Filia mea nec dum est reversa, sed abducet eam secum uxor mea, quae cras deo volente, iter eo instituet. Tum reddentur mihi ambo libelli, quorum videndorum magno teneor desiderio. Properat ad finem Upsalia mea, tum Phaedrus recudetur, observabunturque diligenter, quae binis monuisti litteris. Si quid interea occurreret aliud, cum erit otium, significabis. Quae de Petroniano fragmento magnorum apud Gallos sit sententia virorum, valde cupio videre. Atque mittet forte quid eorum libellorum ad te Cl. *Bigotius*. Cui si scribes, velim indices per me non stare, quo minus mea habeant. Feci enim, quod mearum fuit partium, ut nosti. *Brunnerus* noster te salutat perofficiose, primoque tempore

pore Moeridem redditurum pollicetur. Haeret nunc nescio quibus aliis in rebus, Plutarchi, ut opinor, parte quadam edenda. Ego maluisssem omnia postposuisset Moeridi. Sed relinquendus est suo arbitrio. Upsaliam, cum absoluta fuerit, quo pacto mittere ad amicos queam, non intelligo, nisi tu prospexeris viam aliquam. Sed nolo te his nugis longius morari. Vale, atque me, ut soles, porro amare perge. Upsaliae a. d. 6. Martii Anno CIOIOCLXVI.

EPISTOLA LXXXI.

NIC. HEINSIUS

Job. Scheffero.

Upsaliam.

Ecce tibi binas a *Bigotio*, vir Clarissime, per quas significat animadversiones in fragmentum Petronianum tuas & libellum de stylo Lutetiam pervenisse. Spero idem fatum experturos aliquando Tacticos tuos, & commentarium de dogmate Pythagorico post annuos errores: quamquam de iis quicquam sibi compertum esse negat *Elzevirius*. Ex *Curione* libens cognoscebam nuper Upsaliam tuam jam ad finem propemodum, esse perductam: unde spes mihi addebatur, fore propediem ut Phaedrum curis secundis recognitum praelo typographico permittas. Non satis memini, an in illo scriptore deprehenderis insignem errorem, ubi agit de Demetrio Phalerio & Menandro Comico. *Phalerius* enim Demetrius (sic enim malo, quod Graecis est *φαληρεύς*, quam *Phalereus*) non occupavit improbo imperio Athenas: ut Demetrium Regem cum Phalerio videatur confudisse, quamquam nec ipse tyrannus fuit dicendus. *Phalereus* penultimam producit, *Phalerius* corripit. Sic *Alexandria* & *Alexandrea*. quod postremum apud Horatium & Propertium penultima producta occurrit. *Darius* & *Dareus*, *Cyclopius* & *Cyclopeus*, Nam Graecum modo per *i* litteram correptam, modo per *e* productam efferebant. Sed hoc leve. proferre in theatrum, quod Statio restitui, addendum illud Ausonii epistola ad Ursulum Grammaticum de Terentio, *Protulit in scenam quot dramata fabellarum, Arcadiae medio qui jacet in gremio*. Sed de his alibi. Videbo, an per oratorem Gallicum *Pomponium* obtineri possit index ille, aut catalogus Auctorum, quem Lutetiae procudi singulis hebdomadis de novo scimus. *Plumerus* bibliopola Amstelodami vivit, & quidem vicinus *Elzevirii*. De caeteris meminero. Vale, vir Celeberrime & festinanti ignosce. Holmiae Suecorum CIOIOCLXVI. a. d. xxvii. Martii

EPISTOLA LXXXII.

JOH. SCHEFFERUS

PRO amica litterarum Bigotianarum communicatione summas ago gratias tibi. Video Cl. *Bigotium* videre mea in Petronii fragmentum cupere. At desiderio ipsius satisfactum parum credo, quia anceps dubiusque haereo, nec temere pronuntiare quid sustineo. Interim & alios non satis esse certos haud illibenter intelligo. *Wagenseelii* & *Valesii* Epistolas videre vehementer cupio. Scripsit de iis pridem *Arnoldus* ad me Norimberga, meaque addi eis voluit. Verum ego dissertationem meam nolui a caeteris divelli. Quae de Demetrio in Phaedro mones, amplius considerata puto. Sunt enim in Laetio nonnulla, quae tueri posse Phaedrum videntur. Et adscriptis Phaedri locum iis Cl. *Menagius*, tanquam eadem tradentem. Poteris, cum otium erit, videre, sententiamque tuam aperire mihi. Catalogum Parisiensem ut procuraret nobis Dn. *Bejerus*, cursus publici Praefectus, operam dedi, & spero promissis statuturum. Upsalia mea hodie finita est, exemplum ejus habebis a *Curione* nostro, cum ad vos redierit. Phaedrum recudere typographus incipiet hac, opinor, hebdomade. Cl. *Gronovio* si scribes, significes oro, accepisse me *Quinctilianum*. Ipse enim nolo scribere, donec occasionem habuerō mittendi una aliquid mearum rerum. Quanquam his turbatis rebus nesciam, qua ratione mittere queam, nisi tu dispexeris occasionem aliquam in tempore. Sed non possum plura, recens e lecto venio, cui affixum me per duas hebdomadas & amplius tenuit morbus, qui nunc passim hic & alibi affligere homines solet. Vale. Upsaliae a. d. 3. April. Anno MDCLXVI.

P. S. Laetium *Menagii*, & Phaedrum *Rigaltii* reddam primis diebus. An non in editione priori plures notas ediderit *Rigaltius*, scire cupio.

EPISTOLA LXXXIII.

JOH. SCHEFFERUS

UTique res meae aliter eveniunt, quam optaram. Praeterquam enim, quod quae ad Cl. *Bigotium*, amicosque alios misi, intercepta sunt, ne quidem in *Puffendorffio* spes nobis aliqua reponenda, quando eum captum teneri Hamburgi, propter nescio quae commissa, mihi nuntiatur. Solus est Dn. *Frisius* Concionator aulicus Ill. Dn. Comitis *Koningsmarki*, qui supplere poterit hos in caeteris defectus, quia illi aliqua dedisse exemplaria, cum Petroniani Fragmenti, tum Arriani caeterorumque libellorum meorum *Bigotio* tradenda, *Curio* ait. Si ne is quidem suum facere officium volet, rationem scio amplius nullam, cum

Petro-

Petroniani fragmenti, neque *Curioni*, ullum amplius supersit exemplar. Quod velim in tempore Cl. *Bigotio* significes. Mitto nunc Upsaliam & ad te, & ad *Gronovium Bigotiumque*, quia postquam *Curioni* hoc negotium jam improspere successit, per quem possim mittere, habeo neminem. Quare oro, ut ignoscas mihi, qui tibi aliis occupato hoc negotium faceſſo. Phaedrum necdum licuit ordiri, quia qui ex Typographis describere eum debuit, miser diem suum obiit. Jubet *Curio* nos expectare adhuc unam alteramve hebdomadam. Plura non occurrunt, & festinat, qui fasciculum secum deferet. Ergo Vale, meque, sicut soles, ama. Upsaliae a. d. 29. April. *ciciciclxvi*.

EPISTOLA LXXXIV.

JOH. SCHEFFERUS

Nic. Heinsio.

Holmiam.

Remitto tibi litteras communicatas nuper, summa cum gratiarum actione, inque signum animi mei erga te, Upsaliam meam trado. Deferet fasciculum ad te studiosus quidam, cui hoc negotium commisi, nisi vento cessante nimis diu detentus fuerit. Quae de viris magnis ab Augustiss. Galliarum rege salario auctis nuntias, grata sunt, praesertim propter Cl. *Reinesium*, quem existimo talium esse indigentem, si quem alium. Et poterit fortassis promovere opus Inscriptionum, cujus praeter titulum & praefationem nihil hactenus est excusum. Quod vero me quoque in hunc censum venire aliquando posse auguraris, in eo sentio te quidem admodum amice de me rebusque meis judicare, quomodo autem persuadere mihi debeam, non video, cum nec sim ex illa virorum doctorum classe, quibus praemia haec destinantur, nec si essem, ita innotuerim Gallis, ut ulla mei vel per somnium mentio fieri posse videatur. Quare spem tam temerariam ego quidem haud concipio, tibi vero pro amoris ac benevolentiae pleno istoc in me animo, cultum studiumque meum publice persequi. *Bigotium* libellos fisco addictos nihilominus, ut inspiciat saltem, aspecturum confido, licet forsitan ipsos recipere non possit. Quum praesertim nihil sit in eis, quod quem possit offendere. Nisi hoc fiat, quid sperandum nobis faciendumve sit haud video. De Philosophia Pythagorica & Mauricio centies jam egi cum *Curione* nostro. Respondet, libros Hamburgum esse missos, epistolam quoque monstrat Bibliopolae Lubecensis, qua & misisse se eo, & inde Amstelodamum destinatos fuisse testatur. Nil se ait posse amplius. Credo resciri ab *Elzeviriiis* posse, num acceperint ejusmodi libros, nam ad ipsos mittere Bibliopola Hamburgensis, *Köönig* nomine, qui & alias res ipsorum curare solet, debuit. Vel significabitur saltem, an a dicto mercatore Hamburgensi per superiorem aestatem missi ad eos libri ex Suecia per piratas fuerint ablati, aut casu alio perierint. Audeo his adsociare litteras ad Cl. *Bigotium*, quas mittes una cum tuis, quandocunque scribes, nisi grave erit. Vale, vir Nobiliss. ac me, sicut soles, ama. Upsaliae a. d. 1. Mai. *ciciciclxvi*.

EPISTOLA LXXXV.

NIC. HEINSIUS

Joh. Scheffero.

Upsaliam.

TArdius gratiarum actione defungor apud te pro Ubsalia vetere, quam mihi met ipsi proposueram primo faciendum, post acceptum munus, vir Clarissime, quamque lex humanitatis postulabat. Sed dum spero subventurum nonnihil aut ex patria aut aliunde rerum novarum de iis, quae per orbem litteratum nunc fiunt, fraudatum me spe atque expectatione omni ferus nunc agnosco. Adeo post Bigotianas illas, quas vidisti, nil ad me pervenit, quod curiositati tuae oblectamento esse possit, aut cognosci abs te mereatur. Nisi hoc unum fortassis, excessisse e vivis *Gasperum Gevartium*, & *Janum Vlitium*, utrumque a multis jam retro annis mihi conjunctissimum, alterum senio confectum, alterum in flore aetatis immaturae nobis praereptum, & eo quidem lugendum magis inter vos, quod studium linguarum septentrionalium insigne prae se ferebat. Verum ut ad Ubsaliam tuam revertar, partem ejus scripti potissimam non sine praesenti voluptate jam perlegi, reliqua absolvam feriatis diebus, quos imminere jam nunc haud nescis. In tam sterili argumento tantam eruditionis haud protritae copiam a te conquiri potuisse, tanta cum lectoris conjunctam voluptate, equidem miratus sum. Ejus commentarii exemplaria *Gronovio Bigotioque* per te destinata, jam navigant, ni fallor in Bataviam. In Britannia Collegium quoddam Philosophicum est institutum non ita nuper, quod Sophorum indigitatur, ex hominibus rerum multarum cognitione instructis compositum totum, ut ferunt, Philosophiae praesertim ornandae illustrandaeque insudantibus. Proposuerunt illi Cl. *Hevelio* quaestiones non nullas haud inutiles aut inscitas, de quibus vir ille insignis vos Ubsalienses etiam nonnihil cogitare velit: cum sint inter alias nonnullae ad coeli hujus ingenium praecipue pertinentes. Date, quaeso, operam, ut viro vestrae gloriae perquam studioso hic gratificemini: quod ut fiat, mitto exemplar ipsarum quaestionum, quod eam in rem curavi describendum. Libros, quos scis fisco Gallicano addictos primo, mox *Patino* restitutos quidem nuntiat *Capellanus*, sed post restitutionem in iis fragmentum Petronianum, furto haud dubie ablatum, non comparuisse. Promiserat se scripturum *Koningio* Hamburgensi *Elzevirius* de libris aberrantibus; & fecit, credo. Sed cum nihil ex illo rei istius superaddat proximis, de tota re omnia incerta & funesta praesagio. Urgebo tamen iterum per proximas litteras hominem, ut saltem dicat, quid sperari de sarcinis istis oporteat. Vale, vir Clarissime, & amicos communes saluta. Holmiae Suecorum MDCLXVI. a. d. xxv. Mai. Juliani.

EPISTOLA LXXXVI.

JOH. SCHEFFERUS

Nic. Heinsio.

Holmiam.

PRO tam benigno amicoque animo, quo perlatam ad te nuper Upsaliam nostram excipere es dignatus, plurimum tibi debeo, vir Nobilissime. Neque minus eo nomine quod curare fasciculos ad amicos non es gravatus. Sentio me tibi his negotiis molestum existere: sed postquam semel iterumque intellexi, *Curionem* nostrum in curandis talibus haud satis esse felicem, ipsa necessitate jubente impudens esse cogor. Quod tu pro humanitate tua in deterius quaeso ne interpretere. Tot *Petroniani* fragmenti periisse vel intercepta esse exemplaria vehementer doleo. An vero ne per Dn. *Frisium* quidem aut *Pufendorfium* acceperint amici Parisienses, scire cupio. *Gewartium* & *Vlitium* vivere desiisse dolco. *Vlitium* parem negotiis intelligo fuisse, vel ex notis ejus in scriptores rei venatoriæ, facileque persuadeor, potuisse plurimum præstare; etiam in argumento illo, de quo scribis. Collegium Philosophicum Anglicanum multa bona nobis proditurum confido. Habent enim & ingenium Angli & facultates alias, librorumque rariorum copiam, nec diligentia ipsis deest necessaria. Quaestiones Cl. *Hevelio* propositas inspexi, atque de aliquibus, quae mihi notae sunt, nunc statim respondere volui, ut promptitudinem nostram vobis facerem testatam. Succinum picis fossilis esse genus censeo, cujus venae lateant in fundo maris. Idem a natura sua constipari credo, motuque maris ejici in littus. Sed & hîc in Suecia reperiri verissimum est, ad insulae Biörkoa nominatae littora, in Meïero lacu, cujus aqua dulcis est. Ut pereat eorum sententia, qui a falsugine maris censuerunt condensari. Sed & illorum stare nequit, qui ex arboribus crediderunt exsudare, quia nullo alio in loco hujus lacus reperitur; cum alibi sint arbores similes, etiam in majori copia. Succini illius in Biörkoa reperti massa elegans duorum digitorum lata & crassa penes me est, munere illius, qui suis manibus, cum particulis pluribus aliis in littore ejus insulae collegit, affirmavitque ex Pastoris Ecclesiae ejus loci ore, vento fluctus ad littora pellente ejici, ibique passim reperiri. Hirundines magno impetu circa tempus autumnale, haud secus atque ranae faciunt, mergere se profundo lacuum & fluviorum, tam est certum, quam quod certissimum. Affirmaveruntque mihi plurimi, qui viderunt extractas cum piscibus reti, quali hybernis temporibus sub glacie piscari in his regionibus consueverunt, caloreque ignis refotas reviviscentesque. Quaedam animalia hîc albescere hyberno tempore, ac aestivo recipere priorem colorem, verissimum. Vidi ipse habuique lepores circa hyemis verisque initium, dimidia parte albos, dimidia sui coloris. Media hyeme non vidi, nisi albos. Sed & vulpeculae hyberno tempore sunt albae. Sciuri quoque suum mutant colorem, hybernoque tempore evadunt grisei, hoc est nigro alboque sparsi mixtique. Estque hoc

genus pellium frequentissime per Europam in usu, a plerisque tamen ex sciuris sumi ignoratur: Germani mei *Grauerk*, item *Fall*, appellant. Pisces ob glaciem non fractam enecari saepius compertum, sed primum in piscinis solum, vel angustioribus lacubus, deinde in lacubus tantum illis, ubi fundus spissior, nam ubi rarior, non solent aeque facile. Denique qui pisces bene vivunt in limosa vel argillosa terra, illi quoque non perinde enecantur, ut caeteri. Sed & in lacubus majoribus, ubi intensissimum est frigus, glacies rumpi solet sive fluctuum impetu, sive ob conclusos spiritus per agitationem aquae sursum elatos, magnaue deinde vi erumpentes. Sane cum sic glacies per totam latitudinem finditur una ruptura, id fieri cum fragore ingenti consuevit, velut aliquot tormenta exploderentur, quod non semel audivi. Quare pisces frigore enectos in lacubus ejusmodi majoribus haud temere invenies. Neque oleum neque acris muria salis communis vere congelatur in glaciem, saltem his in locis. Gelu terram penetrat ad duos cubitos, seu ulnas Suecicas, estque, quicquid in ea continetur humidi aut succulenti, album glaciei instar. Aquae vero stantes amplius, & saepe ad tres ulnas, pluresque, fluentes minus. Ubi flumen citato cursu labitur, ibi ne quidem congelari solet. Quemadmodum nec fontes perpetuo manantes circa scaturiginem congelantur, imo hyberno tempore calidiores videntur esse, quam aestivo. Habes breviter, vir Nobilissime, responsionem ad nonnulla. Ad caetera respondebo, cum ista ipse amplius exploravero futura hyeme, si vitam Deus dederit. Quod si haec tanti videntur, ut communicanda censeas cum Cl. *Hevelio*, per me liberum erit. Neque colere litteraria colloquia de his similibusve vel cum ipso, vel cum Anglicis detrectabo, si per me juvari conatus suos posse arbitrabuntur. Phaedrum pridem praelo committere cogito, suntque parata editioni novae omnia. Sed solito tardius procedere *Curionis* nostri consilia deprehendo. Quod ferendum mihi juxta cum aliis, quae in typographia nostra plurimum molesta sunt. Interque ea vel praecipue, quod cuncta mea prodeunt tam male correctata. Nam & ego currente oculo saepe ista inspicio, & quae bis terque corrigenda monui, oscitantia operarum relinquuntur inemendata, aut, dum emendari debent, mutantur in deterius. Quod secus evenit, ubi certus aliquis est in typographio, huic negotio addictus. De qua re propterea scribo, ut cum non pauca talia irrepperint, & in Upsaliam, & tu humaniter excuses illa, & apud amicos veniam illorum exores. Vale, vir Nobilissime, & me amare perge. Upsaliae a. d. 29. Mai. Anno MDCLXVI.

EPISTOLA LXXXVII.

NIC. HEINSIUS.

*Job. Scheffero.**Upsaliam.*

Plurimum quidem me demeruisti, vir clarissime, tam obvia benignitate, qua sine procrastinatione ulla ad Quaestiones philosophicas, ex Britannia ad

ad celeberrimum *Hevelium* missas, tam accurate responderis. Quapropter te ac collegas tuos vehementer exhortor, ut ad reliqua exornanda vos accingatis in hyemem proximam. Haecenus quae suppeditasti, ad *Hevelium* recta nunc eunt. Cl. *Rudbekio* salute dicta meis verbis significes velim, per me non stare, quo minus sibi habeat in posterum *Prodromum Hevelianum*, quem utendum a me jampridem accepit, cum ejus libri aliud exemplar in Germania sum nactus. Quaestionum *Britannicarum* cum nullum in serinis meis exemplar superfit, illud, quod per *Curionem* illi traditum est meo nomine, ad me reverteratur velim. Exspecto librorum recens editorum nonnihil ex patria. *Gronovius* typis describi curat *Palmerii Gronovii* exercitationes in optimos quosque veterum Graecorum doctissimas, sic vocat ipse, quas a *Bigotio* edendas accepit. Prodiit & postumus *Morici Rudbekii* super re *Vestiaria* commentarius, praeter *Vossianum* de *Nati incremento*. Caeterum res nostras tandem melior respexit Deus. Kalendis Junis Julianis sub horam secundam tertiamve pomeridianam Britannii, secundo vento se permittentes, magno impetu classem nostram in anchoris stantem, Britannicum inter Flandriumque littus, sunt adorti; sed repulsi a nostris acriter, sub noctem sua relegere vestigia inceperunt; postero die eumque subsecuto altero instauratum magnis utrimque animis praefitum; sed & tum nostri praevaluerunt acies in fugam Britannis, ac navibus nonnullis captis ac depressis, tertii praefertim agminis, quod vexilla candida praeferebat. Dux ipse *Georgius Askanius* Hagam captivus est perductus, postquam navem suam, x. tormentis bellicis instructam, *Trompio* deditisset, quam nostri, ne impedimento esset bellantibus, exusserunt. Capta & secunda navis in illo ordine, interfecto *Barclaiæ* duce, tertia depressa. Pridie Nonas Junias auxilio fugientibus advenisse dicitur cum navibus xxii. Princeps Palatinus *Rupertus*, quando iterum acies est instaurata. Hanc quoque caesam a nostris litterae nonnullae ex Dania ferunt. Belgicae nostrae id promittunt tantum, non adfirmant, quae Nonis Junis sunt exaratae, adduntque illa etiamnum nocte mugitus tormentorum auditos fuisse, signum haud dubium continuati in id tempus navalis praelii. Ex duobus nostris occubuerunt *Cornelius Everhardus* Zelandorum Thalassiarquia, vir inter paucos strenuus, & *Trompii* legatus *Hulstius*. *Trompius* ipse rem fortissime gessit, *Ruterus* ultimis rebus se servare iussus, ne quid discriminis in ejus capite Resp. subiret, praelio abstinuisse creditur. Britannicae naves quinque in Hollandiam captivae jam erant a nostris abductae, plures in Zelandiam missae dicebantur. Ut de rebus optime speremus, praefertim cum dux *Bellifortius* in procinctu sit cum classe lx. navium, praeter xxxii. Danicas. Quarum ope hostem superbum & pacis impatientem ad aequum compelli posse, si parum in nobismet ipsis est praesidii, confidimus. Faxit Deus O. M. ut tam prosperae pugnae navalis initia eventu pari comprobentur. Vale. Exaratum Holmiae Suecorum Anno crio cclxvi. xix. Junii Juliani.

EPISTOLA LXXXVIII.

JOH. SCHEFFERUS

Nic. Heinsio.

Holmiam.

PRO libello de eventu praelii nupero gratias ago maximas. Inducor facile, ut rem ita gestam esse credam, sicut in eo memoratur. Quocunque autem modo evenerit, deum oro, ut servire is eventus revocandae paci possit. Quae *Rudbekio* nunciari voluisti, nondum nunciavi quidem, quia abfuit ab urbe; nunciabo autem, quamprimum invenero. Phaedri hac hebdomade fecimus initium, veniet post diem unum alterumve ad vos *Curio*, & specimen ejus secum feret. In Militia navali nunc sum totus, atque libros duos priores jam absolvi. Puto plane me daturum suo tempore novum opus, & cujus ne umbra quidem sit, quod ante publicavimus, adeo quotidie inter scribendum subnascuntur mihi paene innumera non, ut spero, contemnenda. *Gronovii* edita cernere desidero, imprimis *Rubenii* rem vestiariam. *Reinesii* Petroniana mittam una cum *Curione*; habeo enim munere ipsius hinc transmissa. Sunt in iis multa egregia, ut est vir infinitae lectionis & memoriae singularis. Expecto tamen, quid tu de nonnullis sentias, quod perscribas mihi oro. Semper mea infelicitè in Gallias navigare doleo. Ne tamen temporum calamitatem mihi vertant vitio amici illic elegantes, per te opto ab ipsis obtinere. Vale, ac me ama, sicut soles. Upsaliae a. d. 24. Julii Anno MDCCCLXVI.

EPISTOLA LXXXIX.

JOH. SCHEFFERUS

Nic. Heinsio.

Holmiam.

Reddo tibi schedas, quas nuper communicare mecum es dignatus. Video virum doctissimum corrigendi studio abreptum abire longius quandoque non a scriptura modo veteri, sed totius loci sententia. Quod palam faciam coram, volente Deo, si proximis nundinis autumnalibus dabitur ad vos excurrere. Mea tandem ad *Elzevirios* perlata esse gaudeo. A Cl. *Bigotio*, quid de meis in fragmentum Petronianum curis censuerit, novisse peramanter cupio. Si quid scribet, te communicaturum mihi confido. Phaedri nostri specimen vidisse te opinor, ac in eis observasse quaedam, quae ad te pertinent. Doleo, *Curionem* nostrum uti papyro tam sordida, textum quoque non aliis majoribus litteris excudi voluisse. Sed is quidem sua spectat commoda, de honore meo nil sollicitus, quod ferendum est hoc rerum statui. Interea valde opto vel ipsi aliam mentem, vel mihi alium Typographum, si quando, quae conscribo de militia navali, prodire in lucem debebunt. Nam aut mea stulte diligo, aut monstrabo singulis fere paginis non observata aliis, certe nusquam prodita. De

cac-

caetero quandoquidem scripturum te ad Cl. *Reinesium* opinor, litteras hîc ad eundem mitto, quas spero non gravaturum te adjungere tuis, atque adeo id peramanter abs te oro ac contendo. Nulla festinatione opus est, fiet, quandoque commodum videbitur. Vale, Nob. Domine, meisque studiis favere perge, Upsaliae a. d. 14. August. CIOIOCLXVI.

EPISTOLA XC.

JOH. SCHEFFERUS

Nic. Heinsio.

Holmiam.

ACcepi nuper *Curionis* nostri opera Evangelica Gothica *Fr. Junii*, itemque *Alb. Rubenii* opuscula. Delectarunt me omnia mirifice, cum primis vero illa *Rubenii*, quae optarem venalia extare, ut & ipsi copiam eorum habere possemus. Sunt enim rarae eruditionis prorsus plena, ut non sine detrimento iis possimus carere: Sed & *Juniana* sunt egregia, summaque diligentia conscripta. Dabo autem operam, ut, cum volente Deo proximis nundinis Autumnalibus ad te venero ipse, & haec, & alia tua tibi reddantur. *Bigotii* litteras de *Petronianis* meis periisse doleo. Scire namque cupio libentissime, quid de iis statuatur. *Valesii* & *Wägenselii* judicia edita habeo, quibus video reponi posse plurima. Inter caetera miror incusare *Valesium*, tam valde, quod est *Ciceronis*, & *incumbere ova*, quod est *Varronis*, & hujus generis multa alia. *Gronovius* quid sentiat, non scio, probaturum tamen ista omnia vix puto. Sed de his & aliis coram pluribus, ut spero. Quae de *Phaedro* praecipis, curae mihi erunt. Quamquam ne sic quidem credo irrepsisse aliud, quam quod, quia dicebatur valde verisimiliter, omittendum non videbatur. Vellem plura, sed jam abit *Tabellarius*. Quare oro, ut ignoscas, de caetero me tibi habeas commendatissimum. Vale: Upsaliae 31. August. CIOIOCLXVI. Pro litteris ad Cl. *Reinesium* curatis summas tibi debeo quoque gratias.

EPISTOLA XCI.

NIC. HEINSIUS

Joh. Scheffero.

Upsaliam.

Petronii sui copiam & mihi fecit *Reinesius*, addiditque nonnulla serius observata, quam ut typis describi potuerint, quae hîc mitto, si fortassis ad te non pervenerint. Nihil igitur necesse *Petronium* a *Curione* ad me ferri, schedas istas, ubi commodum erit, huc redire patieris. *Bigotii* nostri epistolam unam alteramque video nuper mihi periisse & indigne fero. Idque eo magis, quod suspiceris inclusa fuisse, quae super fragmento isto *Dalmatico* ab hominibus eruditis *Lutetiae* publice sunt disputata. Monet enim *Elzevirius* fasciculum nescio quem *Bigotianum* a *Jolyo* bibliopola *Parifino* nuper admodum ad se mis-

Toms. V.

N

sum

sum esse, quem non acceperit, & volebat *Elzevirii* opera *Bigonii* tibi in fars ad me curandis. Historiam proelii navalis Britannos inter & nostros nuper commissi tam impolito barbaroque sermone narratam ad te pervenisse pudet. Habebam alia exemplaria Gallico ac Vernaculo sermone, sed ea amici diripuerunt. Nostri Tamesin insidere pergunt *xx.* navibus bellicis. Centum navium classis parari a Britannis dicitur, quare & apud nostros *xx.* aliae instruuntur, cum totidem incendiariis; Galli interim, ac Dani, nescio quas ob causas, adesse nobis cunctantur. Hevelianus liber *Rudbekio* destinatus hacere apud me pergit, quod qua via ad amicum nostrum sit mittendus, ignorem. De militia navali cogitare te denuo plurimae est mihi voluptatis. Vellem & typographum scitum invenires, qui concinnis typis & charta nitidiore ornamentum operi conferret. Libellos nonnullos, qui te auctorem praeferrent, Lutetiae inter homines litteratos a Theologo Konigsmarkiano divisos fuisse monet *Capellanus*, sed nihil horum ad se pervenisse. Tacticos scriptores abs te editos & dogmatum Pythagoricum cum acceperit tandem *Elzevirius*, spondet exemplaria *Gronovio* *Bigotioque* ac reliquis amicis mittenda curam sibi fore ne aberrent. Vale, vir Celeberrime, & mihi favere, ut facis, perge. Holmiae Suecorum Anno *MDCLXVI.* a. d. *III.* Septemb. Julian.

EPISTOLA XCII.
NIC. HEINSIUS

Joh. Scheffero.

Upsaliam.

Rubeniani de re vestiaria commentarii & Evangeliorum Gothicorum non ingratum tibi fuisse conspectum gaudeo. Evangelia munus a me pusillum accipias rogo, quorum duplex exemplar amicorum munificentia mihi suppeditavit: poteras & acceptam mihi retulisse Rubenii vestiariam, sed monet *Elzevirius* alterum exemplar *Graevio* me debere editori hujusce libri, alterum non consilio, sed errore ad me pervenisse. De quo cum *Curione* tibi erit transigendum, si id tui juris esse cupis. *Graevius* ipse Hesiodi novam editionem adornat; cujus specimen hinc mitto. Monet idem per litteras, e vivis excessisse apud Neomagos *Schultingium*, juvenem eruditum & mihi amicum, cujus ad Quintiliani declamationes observata potuisti jam vidisse. A *Gronovio* diu est quod nullas accipio. jubeor tamen ab *Elzevirio* litteras ejus propediem expectare. A *Titio* libellum poematum accepi tibi offerendum. Sed cum me ignaro elapsus sit, & iter ad vos promorit *Curio*, non occurrit nunc quidem, cui credatur fasciculus. Ex Italia scribunt amici, *Valerii Chimentellii* de sellis veterum commentarios sub praelo fervere. Nam de *Nardini* Roma vetere in lucem prolata jam significasse me tibi nonnihil existimo. Addant *Cosmum Medicum*, magni Etruriae Ducis filium natu maximum, amore eruditionis vehementer capi, jamque in eo esse, ut bibliothecam praeavitam, quae ad D. Laurentii asservatur, magno accessu codicum tam scriptorum, quam editorum, hinc inde studiose col-

collecto adaugeat. Habui a *Christina Alexandra* epistolam proxime, sed unde vix liqueat, sitne huc ventura, an, quod proceres Sueci videntur malle, iter dilatura. De te quid nobis sit expectandum fac sciam. Allatae sunt ad nos hesterno die a *Rutero* litterae, quibus nuntiat se cum Britannis denuo congressum, nil ob ventos plus satis vehementes toto biduo potuisse promovere; unam navem Britannicam LVI. tormentis bellicis instructam a suis captam, & mox exustam esse. Eventum proxime expectamus. Interim septem millia aedium Londini conflagrasse dicuntur. Adeo domi non esse tutos apparet, qui foris aliena flammis invadunt. *Hevelius* doceri cupit, an electrum istud, quod in lacu Suecico provenit, ejusdem duritiei atque adeo naturae sit, qua Borussicum. Vale, vir celeberrime; & mihi, ut facis, perge bene velle. Exarabam Holmiae Suecorum CIOIOCLXVI. a. d. xx. Septemb.

EPISTOLA XCIII.

JOH. SCHEFFERUS

Nic. Heinsio.

Holmiam.

PRO tam eximio ac singulari munere, quo instruere ornareque Bibliothecam meam voluisti, non possum satis meritis tibi agere gratias. Equidem non hoc volebam, cum nuper animo simplici declararem desideria mea, sed ut pecunia parare mihi possem. Verum est haec singularis tua erga me benevolentia, cui praeter multa alia etiam hoc debeo. De Rudbekianis opusculis jam transigi cum *Curione* nostro, ut & ipsa mea sint. Specimen editionis *Hesiodi* novae prorsus placet, videoque in *Lectio*nibus istis contineri multa non profecto vulgaria. Unum miror, quod occurrit pag. 11. *Naves veterum paulo majores duo habuere gubernacula, duos clavos, unum in prora, alterum in puppi.* Scio naves ἀμφιπρύμνους. Sed tales fuisse vulgo naves veterum nec testimonia scriptorum, nec nummi, nec monumenta alia declarant. A Cl. *Gronovio* ante paucos dies litteras accepi, quibus conqueritur de adversa valetudine ac colicis doloribus, quibuscum conflictatus sit per aliquot hebdomadas. Sed quia illae litterae sunt scriptae in Augusto mense, puto eum nunc se melius habere. *Chimentelli* de fellis librum optarem videre, quia continebit meis usibus idonea in opere de Re Vehicularia, quod olim habeo affectum. Serenissimae *Christinae* per occasionem tam idoneam ut me commendes, oro. Constituit salarium mihi, cum hinc discederet, sed ejus pro bienno solummodo sum factus compos. Sed de hac re atque aliis coram. Constitui enim proxima hebdomade, nisi quid intervenerit, ad vos ipse iter facere. Interea vale, vir optime, meque semper tuum perge amare. Upsaliae a. d. 25. Septemb. CIOIOCLXVI.

EPISTOLA XCIV.

JOH. SCHEFFERUS

*Nic. Heinsio.**Holmiam.*

Distuli ad te scribere, non quod nescirem, pro quantis meritis officiisque tuis deberem gratias, sed quod per quem tuto traderem tibi meas, haberem neminem. Scilicet quem abs te acceperam nummum, mittere simul constitueram non per obvium quemvis, ac ne tabellarium quidem, apud quem furripi clanculum litteras, in quibus recondi pecunias suspicio est, didiceram, sed certum fidumque hominem. Qui cum nunc demum se obtulerit, non feres aegre vel nummum tam sero remitti tibi, vel me in scribendo & agendo gratias fuisse tam tardum. Optaram equidem nuper, vel ea rerum mearum fuisset conditio, ut & tuo frui diutius colloquio licuisset, & simul in notitiam Excellentissimi viri, Domini Foederati Belgii legati pervenire potuissem. Verum quia mei me expectabant cum vehiculo, & viarum incommoditas coelique inclementia jubebat festinare, ne cum uxore & filia serius, quam oportebat, venirem in hospitium, idcirco credo & te pro solita humanitate tua excusaturum, quod occasionem rei tam optatae, abs te amore singulari erga me oblatam, non avide arripuerim, sed & daturum operam, ne vir Illustrissimus Dominus Legatus, cujus alias humanitatem praedicari saepius audivi, finisterius quid sentiat de mea ista nescio rusticitatene dixerim rectius, an libertate. De caetero tibi me meaque studia iterum meliorem in modum commendo. Et si quid habes, quod ad adornandam rem meam navalem potest facere, id benigne communicare ne graveris, oro. Cum primis scire cupio, an qui non ita pridem Parisiis ad familias Romanas pertinentes editi sunt nummi, non sunt in potestate tua, & num sit in iis, quod consilia mea possit juvare. Neque facies rem ingratam, si eo nomine cum amicis Italis Gallisque ages. Promisit aliquid *Chifletius* Seren. *Christinae* Reginae concionator aulicus, ut aliunde intellexi. Utrum fidem liberaturus sit, ignoro. Credo & Cl. *Bigotium* hac parte posse aliquid praestare. Sed profecto testor, fore me in hac editione longe alium, quam fui in priore. Sed abrumpendum est, quia is, qui haec secum sumet, stat in procinctu, & exigit epistolam. Quare Vale, vir optime, atque me, ut soles, amare perge. Upsaliae Novemb. cicioclxvi.

EPISTOLA XCV.

NIC. HEINSIUS

*Joh. Scheffero.**Upsaliam.*

DE nummo Neronis antiquo restituendo cur tam anxius esses, vir clarissime, nil omnino causae erat, cum tibi mea omnia pateant aequae ac mihi.

Juve-

Juvenem illum, qui tuas cum nummo tulit, etsi ignotum mihi, doleo benignius apud me haberi non potuisse. Sub ipsum meridiem ab illo compellabar, quando superveniebat *Laurentius Linde*, regni Suecici Senator & Marescallus, cum aliis convivis apud me pransurus ex condicto. Itaque vix inchoatus sermo parum tempestive fuit abruptendus, quod tu pro caetera tua bonitate in bonam partem interpretaberis, & apud illum, nisi grave est, excusabis. Hodierno die tabellarium ex patria expectabamus, quem ex Gallia Italiaque litteras mihi allaturam augurabar ab amicis artium bonarum studiosis. Is cum in via retentus alicubi, nullus advenerit, de studiis communibus quod nuntiem, vix quicquam est in promptu. Voluit *Lubienius* ut *Rudbekio* nostro copia fiat hujus paginae, quam vides: unde ille colligat epistolae suae editionem promoveri, quam rem ut tibi curae esse finas, vehementer te rogo. Scriberem ad ipsum, sed litterarii commercii fugitans quodammodo vir optimus videtur. Adde huic tabulae duas alias ab *Hevelio* profectas, uti ex ipsa *Hevelii* epistola tibi manifestum fiet, quam mitto. Velit ille te cogitare super promissis rerum naturalium novis observationibus, ut vides: quam ego rem haud parum gloriae tibi conciliaturum confido. His accedit & *Reinesii* epistola. Video senem nostrum nonnihil mihi succensere, quod conjecturae suae in Nasone minus acquiescam. Locus est *Metam.* vii. vers. 297. ubi vide in notis meis scripturae discrepantias, *petit hoc a Colchide munus*. Ipse volebat ex vestigiis veterum membranarum, *petit hoc ab Aetide munus*. *Aetae* nomen cum frequentissime apud Poetas vetustos cum Graecos tum Latinos occurrat, & *Medae Aetidos*, *Aetam* & *Aetida* priore syllaba correpta negavi me usquam legisse. Ille in his fabulis poetas plurimum sibi permisisse contendit, nec inficior id ego, sed exemplorum auctoritate deferre plurimum solo. Proposueram eidem difficultatem in loco *Valerii Flacci* libro iii. vers. 523. *Et manicae virides, & stricta myrtus avena*. Quis locus hic sit *myrto* prorsus in obscuro est. De *coryto* mihi quoque venerat in mentem ante hoc septennium, eamque conjecturam tunc *Gronovio* non improbanti communicavi. Apud *Silium* libro xv. vers. 775.

Omnes Naiadum plenis comitata pharetris

Turba ruit, striduntque sagittiferi coryti.

Tum per saxa ferae.

Ita enim locus vulgo foedissime interpolatus & in plures versus diffusus ex membranis est constituendus. Apud *Maronem* quoque *corytique leves humeris*. pro *avena* scribendum *habena* vidit quoque *Rutgersius* in *Venusinis* lectionibus necdum editis. ut de scutica venatoria intelligatur, de qua *Pollux* lib. vi. cap. iii. Sed *Myrtum* non temere damnaverim, videntur enim ea usi ad ornatum venatores. Sic *pastoria myrtus* apud *Virgil.* sub finem lib. vii. Si quid lucis ad locum perplexum potes conferre, fac quaeso. *Curioni* auctor fui, persuaderet tibi de mittendo *Tacticorum* tuorum exemplari *Romam* ad *Ostadium Falconerium*, qui & in ejusdem argumenti scriptoribus edendis desudat, nisi quod scribebat proxime se a proposito nonnihil deterreri, quod intellexerit ex *Bigotio*, esse qui *Africanum*, *Apollodorum*, *Philonem Byzantium*, *Athenaeum*.

naeum edendos aut Latino sermone donandos susceperit. Ad Phaedrum l. iv. fab. LXXXI. de Simonide, olim legebam sub finem, *omnes sciverunt, a scisco, non scierunt*; nec displicet conjectura, hoc est statuerunt, pro re rata habuerunt: hinc *plebiscita* statuta plebi. *Grypenbielmio* poematum meorum exemplar debetur, quod mihi nullum est ad manum, plura quidem submittere iussus erat *Elzevirius*, sed is postremis litteris monet, nullam fore occasionem ante hybernā tempestatem navium ex Hollandia huc iter facturarum. Quapropter si *Curio* etiamnum vobis adest, moneatur per te rogo, de exemplari libelli huc perferendo, quod rationibus Elzevirianis adscribatur, & *Grypenbielmio* interim ex promissi fide cedat, dum vernum tempus adfulgeat. Vale, vir eruditissime, & me, ut facis, ama. Holmiae MDCLXVI. a. d. xi. Kal. Decemb.

P. S. Scribam ad *Falconerium* aliosque, ut, si possint, institutum tuum pulcherrimum de re veterum navali illustranda foveant ac juvent. Potuissē & ego fortassis plura subministrasse, nisi tu festinasses abitum nuper, & mihi in patriam Februario mense, & fortassis citius, foret excurrendum; quamquam hactenus iter istud rebus meis necessarium obtinere non possum ab iis, a quorum nutu pendeo. Familias Romanas editionis Gallicanae possideo, non memini tamen quicquam in iis occurrere profuturum.

EPISTOLA XCVI.

JOH. SCHEFFERUS

Nic. Heinsio.

Holmiam.

Q Uas misisti nuper paginas, *Rudbekio* statim tradidi. Est plane, ut scribis, ad respondendum tardissimus. Causas tibi alias aperiam. De *Valerii Flacci* loco non habeo, quod nunc quidem moneam, nisi suspectum saltem videri illud *Myrtus*. At vero id in *corytum* mutari oportere, juxta tecum non arbitror. Neque scio, an explicari possit commode de scutica. Quo enim respiceret illud *strieta*? nec huc facit aliquid, opinor, sine *avena*, sine *habena* legatur. Sed de hoc deliberabo alio tempore. Quod *Reinesius* (cui salutem ex me officiosam nunciabis) suspicatur, dissensum ejus me non ferre aegro animo, in eo bene facit. Eccur enim ferrem? sua opinor cuique relicta est sentiendi libertas, mihi mea. Nec in eo, ut consentiamus tandem, salus vertitur humani generis. Sentiamus nos interim, judicium de cujusque sensu relinquamus aliis. Quae de *lingua canina*, apud *Petronium* cap. XLIII. memorat, id meo animo explicandum ex sequentibus. Carpit nempe *Chryfantum*, qui hinc loquitur, vitiaque ejus palam reprehendit. Solent autem canes palam allatrare ignotos, & adversarios suos invadere. Ergo & in reprehendendo illo *Chrysanto* *linguam caninam* se adhibuisse ait. Quo simul respexisse potuit ad *Cynicos*, quorum consuetudo in talibus est notissima. Illud *comedis* tractum est ex opinione vulgi, qui putat, usum talium ad istiusmodi negotia conducere.

Cir-

Circumferuntur apud Germanos meos proverbia huic spectantia, & in Plinio existimo occurrere, quae idem docent. In Phaedro illud *scierunt*, semper accepit *prosciverunt*, a *scisco*, ut sit contracte dictum, sicut alia hujus generis consueverunt. De Poëmatibus tuis locutus sum cum *Curione*. Is aiebat, se, cum reversus fuerit Holmiam, tibi redditurum. Quae nomine Cl. *Hevelii* mones, curae mihi erunt. Haecenus fieri nil potuit, propter hyemem plane mollem, & remissam. Quod occasione data velim cum salute mea ei significes. Reditum te in patriam parare animo aegro audio. Licet enim nihil non sit jucundum, quod tibi gratum accidit, tamen jam jam sentio, quam hinc mihi postea vivendum sit ab omni litteratorum commercio, & notitia eorum, quae in studiis geruntur, longissime remoto, quod quanto me afficiat dolore, nemo melius, quam tu ipse intellexeris; sed finiendum est, quod pluribus ob occupationes alias nunc non possum. Vale, vir nobilissime, atque me, ut soles, perge amare, numerareque inter tuos. Upsaliae a. d. 27. Novemb. MDCCCLXVI.

EPISTOLA XCVII.

JOH. SCHEFFERUS

Nic. Heinsio.

Holmiam.

Reddo tibi, ut volebas, ¹ Cl. *Gronovii* epistolam, de qua recte suspicatus es, perlecturum me cum voluptate. Adeo egregia & scitu digna continebat plurima. Nam quae de me in ea leguntur, catenus saltem non fuerint ingrata, quatenus ostendunt viri doctissimi amicum erga me animum, quem quantivis facere utique non dissimulo. Unde simul peto, ut si respondeas ei, hanc voluntatem meam exponas, cumque officiosa salute nuncies, nil fore acceptius, quam si propius venire in notitiam ipsius liceat. Dedi nuper in mandatis *Curioni*, ut Upsaliam meam ei curet offerri per *Elzevirios*. Spero factum, judiciumque de ea ipsius, vel per te cognoscere desidero. Quae autem illa sunt *Scaligeri* excerpta, quorum meminit? Qui illi, quibus nihil in vita suavius, quam omnium capitibus insultare. An de *Vossio* hic suspicari debemus? Gellium velim Cl. *Gronovius* cum cura expolire dignetur. Nemo poterit rectius. Ad Cl. *Bigotium* quaero aliquid litterarum dare. Verum, quia quomodo ad ipsum pervenire queat, nescio, tuam opem imploro, si quando scribere constitues. De *scierunt pro sciverunt* necdum habeo quid certi, quod respondeam; suspicor tamen, me inventurum, si libellos meos excussero. Nunc enim non licet propter alia negotia. Te cum adversa conflictari valitudine sicut non sine sensu insigni doloris audio, ita laetor impensissime, reddi tibi vires priores paulisper, atque valetudinem restitui. Simulque Deum oro, ut cito totus convalescas, diutissimeque vivas maximo litterarum amicorumque bono. Phaedrus meus lento pede procedit. Notae tamen meae nunc finitae sunt. Sequuntur *Guyeti*, & alterius, nescio cujus in versionem Gallicam, quibus in-

dex

¹ Est illa, quae n. xxx. legitur inter Graevianas Tom. iv. hujus Sylloges.

dex subjicietur. Ante discessum tuum coram me acturum tecum adhuc semel confido. Vale, vir nobilissime, atque me, ut soles, amare perge. Upsaliae a. d. 7. Decemb. Anno MDCLXVI.

EPISTOLA XCVIII.

NIC. HEINSIUS

*Joh. Scheffero.**Upsaliam.*

Nescio quomodo oblitus sum, cum Graevianam proxime mitterem epistolam, illi & Bigotianam addere, uti nunc facio, cum in ea sint nonnulla, quae te tangant. Ex *Elzevirii* litteris disco Hagae Comitum nonnullas *Scaligeri* observationes ad A. Gellium a *Vossio* juris publici esse factas, quas per tabellarios se missurum offert, si velim: hinc puto, quae *Graevius* de eodena narrat negotio subobscurae, perspicuae & liquidae tibi mihiq[ue] fiant. Ad *Bigotium* si quas voles, mitte quam primum. Singulis enim Mercurii diebus *Lucretiam* mihi scribendum est ad illustrissimum *Beuningium*. valetudo mea jam paullo melius procedit. in *Phaedro* tuo, ubi conjecturae illius meae meministi, multo minoris alapae m[ei] cum veneant, & vaeneant, perperam omissum est. An a *scisco*, *scii*, pro *scivi*, deduci posset, tu videris; ego vix opinor. Vale. exarabam Holmiae MDCLXVI. XIV. Decemb.

x Vide Epist. xxx. *Graevii* ad *Heinsium*.

EPISTOLA XCIX.

JOH. SCHEFFERUS

*Nic. Heinsio.**Holmiam.*

Utor solita humanitate tua, litterasque istas mitto ad Cl. *Bigotium*, tuasque tibi reddo. *Fabrum* de *Aeliano* cogitare vides. Faciat licet, non inveniet, ut spero, multa in meis, nisi quae incuria Typographi mala mutilatave edita sunt, quod pridem monui ad *Phaedrum*. Habeo & ego non pauca denuo in scriptorem confecta, quae nescio, an ille omnia nobis prodet aut praeripiet. Sed tempore videbimus. Unum opto, ut modeste agat. *Holstenii* emendationem probo, etiamsi locum *Arriani* necdum licuerit inquirere. Multa sunt, quae ipsam firmant, suo indicanda loco. Sed hoc obiter. De me nil habeo hac vice, quod scribam, & veniet *Curio* noster ad vos diebus hisce, qui quae restant *Phaedri*, secum adferet. Ex Cl. *Bigotio* explores velim, quid de meis judicent libellis. Scribet tibi sine dubio aperte candideque. Lexicon, cujus facit mentionem, est in Praediis Ill. Dn. *Rablambii*, ubi vidi ante annum obiter, & ita, ut ignorem, quale sit, nam frigus erat intensissimum, ut tractare manibus nequiverim, & adjuncti nobis plures alii fuere, qui ad alia nos abstrahabant. Nomen tantum *Pausaniae* praefixum observavi, suspicionem facit ejus

Le-

Lexici, cujus apud Suidam & Eustatium non semel nomen legitur. Ignoro an non fuerit Moschopuli, vel alterius, quia, sicut dixi, non tractavi manibus, sed in fronte tantum inspexi. Vale, vir nobilissime, ac, ut soles, me amare perge. Upsaliae a. d. 18. Decemb. *ciōiōclxvi.*

EPISTOLA C.

JOH. SCHEFFERUS

*Nic. Heinsio.**Hagam.*

POST non Majum jam, in quo tu reditum pollicebare, sed Augustum etiam impatienter te expecto: solebant nempe prius multa mihi tuo beneficio afferri nova de & litteris & litteratis per universum poene orbem viris, quibus per absentiam hanc tuam diuturnam toto tempore nunc careo. Quae res, quam mihi sit molesta, qui post lucem clarissimam, in qua te praesente videbar versari, nunc in odiosissimis erro tenebris, ipse potes aestimare. Atque, quia ne nunc quidem spes apparet certa coram te compellandi, per litteras saltem adeundum te putavi, ne absentem minus quam praesentem credar coluisse. Ita quippe postulant ingentia tua in me beneficia, quorum si ullo tempore deponerem memoriam, ingratus mortalium jure meritoque haberer. Nam ut alia ratione solvam tam proluxa nomina, in me quidem nulla est facultas. Et bonitati tuae sufficit, confido, habere contentum debitorem; cum quo plura impendis, hoc libentius impendere consueveris. Adeo nil respicis in liberalitate tua praeter facti honestissimi conscientiam jucundam. Reddita tibi esse Phaedri mei reliqua confido. Post tempus exiguum Pacatum accipies, qui nunc sub praelo est. Ego rem vehiculariam habeo sub manibus. Et procedit opus strenue. Folia plus quam triginta sunt jam absoluta, bis tantum mox accedet. Partes erunt duae. Prior generaliora tradet de vehiculorum origine, materia, partibus, temone, axe, rotis, capso, jugo, frenis, habenis, flagellis, junctura, ornamentis, & similibus. Posterior singulas vehiculorum explicabit species, bigas, trigas, plaustra, rhedas, petorrita, &c. In quibus omnibus nunc demum sentio, quam pauca haecenus vel bene, vel omnino tradita reperiantur. Militia navalis absoluta pridem est. Ei offert sese quidam typographus Norimbergensis. Verum cum sint meliores in Hollandia Typi; praeterea facilius illuc mea mitti queant; quam Norimbergam, scire cupio, num haberi apud vos Typographus & diligens, & fidus possit. A Cl. *Andrea Bosio* allatae his diebus mihi litterae, in quibus perofficiose amanterque orat, ut, quae ante liberaliter es pollicitus ad meliorem Josephi editionem, ea communicari ipsi ne graveris. Cl. *Bigotium* varias Parisiensis codicis & Italicorum aliquot lectiones audiuit possidere. Illas per te sperat plane sese accepturum. Inter caetera sic habet. A. Cl. *Bigotio nemo est, qui facilius sua obtineat, quam illustris Heinsius. Utinam exorari possit. Nondum ad eum heroa scripsi, quod tempore destituar, sed & dextra non satis valida utar, eoque jam defatigata. Scribam tamen certo post paucos dies.*

Tom. V.

O

terea

terea tu rem hanc ei commenda. Vides, quanto studio *Basilius* petat, ut cogitare debeas; annon hoc, quicquid est laboris, tribuere tam felici optimi viri precibus honestum sit. *Cl. Bigotio* si scribes, cum perofficiose ex me salutabis, memoremque mei rogabis manere. Summo viro Domino *Gronovio*, ut & *Cl. Graevio* misi *Phaedri* mei exemplaria. Num acceperint, ignoro. quia neuter mihi scripsit. Tu utrique meam nunciabis observantiam, & quae habeam sub manibus, significabis, nisi grave fuerit. Vale, decus meum, & me semper tuum amare perge. Upsaliae a. d. 10. Septemb. 1690. CLXVII.

EPISTOLA CL.

JOH. SCHEFFERUS

Nic. Heinsio.

Hagam.

PRO binis tuis, & cum illis *Ill. Capelani* ac *Pastorii* literis gratias ago maximas, *Ill. Capelano* respondi statim, literasque dedi noto alicui in aula Gallici legati, qui procuraturum eas sese diligenter recepit. Quod significabis viro summo, & nisi grave fuerit, me meaque studia eidem commendabis. Promisit aliqua subsidia ad rem navalem & vehiculariam, quae ut mittat, tu quoque precibus tuis facies. *Palmerii* observata de ordinibus remorum apud veteres pridem habeo per amicum, qui ea folia comparavit mihi. Video recedere ab iis nihil, quae jam olim a me tradita fuerunt. Neque sane, si amamus verum, recedere quisquam potest. Id quod longe pluribus evidentiusque monstro in nova ejus operis editione. Ad quam Typographum si comparabis; quod studiose facere te scribes, rem feceris mihi optatissimam. *Phaedrum Gudianum* avidissime expecto, nec de opera ipsius dubito, quam praeter ingenium eximium ipsius, juvare plurimum libri veteres potuerunt. In versu, *tum lata litem sustulit sententia*, nil habeo, quod non vehementer laudem. Placet tamen magis conjectura tua, *tunc illa litem sustulit sententia*. Nam *lata* longius recedere a scriptura veteri videtur. Atque solet alias quoque isto fere modo, ut lib. iv. cap. 3. *tum moestus ille*, ubi malletm similiter *tunc* scribere, & lib. v. cap. 4. *tunc illa irridens*. Ego non audebam tale, quia omnibus in libris videbam consensu edi *sententiam*. Prudentio impense gratulor de tam insigni cura, quam in eum tribuisse te jam jam scio, videreque illum avidissime cupio. *Cl. Graevii* ad hunc diem vidi nihil. Misi eidem una cum *Ampl. Gronovio* *Phaedrum*. Verum metuo, ne acciderit in illo mihi, quod in *Mauricio*, quem ignoro, utrum ad hunc diem acceperit *Ampl. Gronovius*. Scripsit *Curio*, sicut affirmat, *Elzevirio*, ut exemplum ejus curet ad charissimum mihi virum. Post illas litteras responsi nihil tulimus. Etiam *Gronovius* ipse, qui de *Gellio MSS.* meo egerat olim, respondet nihil, post specimen illius a me ipsi missum. A *Cl. Bigotio* post discessum tuum pariter nil vidi. Eum ut officiose salutes ex me, cum scribes, impensissime rogo. *Ill. Capelano* destinavi *Phaedrum*, si quae tibi prior erit occasio exempli unici ad eum mittendo, facias quaeso meo nomi-

mine. Sumpti ab *Elzevirio* pretium ego *Curioni* solvam. Pacatus meus properat ad finem, quem, si possum, mittam adhuc ad te caeterosque amicos ante hyemem. Quae super quaesitis Philosophorum Anglorum scripsi, publicata esse accipio non illibenter, modo sint, quae aliis prodesse queant. Dabit saltem honor litteris meis habitus occasionem mihi, ut de pluribus in posterum sim sollicitus. Haecenus enim illam operam frustraneam putavi, cum haberem neminem, cui observatione talium grati quid praestare posse crederem. Atque utinam liceret intelligere, quae maxime per nos vellent discere: desiderio eorum, quantum quidem in me est, nunquam non studerem satis facere. Mortes eruditorum virorum lugeo, sed nullius magis, quam Cl. *Bocharti*. Fuit ille vir non eruditione magis, quam humanitate singularis. Qui cum haberet abunde, de quo jactare sese posset, nihil tamen minus, quam jactare se solebat. Candidissimus in scriptis suis, neminisque famae molestus. Quod corrigendum vidit, corripiebat non modeste solum, sed interdum etiam cum adversarii sui praedicatione, sed nec suae tantum gentis viros aestimabat, quod plerique faciunt: putabat alibi terrarum etiam existere, quos nefas esset contemnere. Sperabam jam illius opus novum de arboribus plantisque S. scripturae, quod sub manibus habere ipse indicaverat in suis scriptis. Sed id quidem imperfectum relictum esse metuo. Quo exemplo maturanda nostra intelligimus. Pastorianis rectius respondero ex his locis: propius enim absunt. Reditum tuum summo desiderio expecto. Faxit deus, ut itinere jucundissimo utaris, salvusque ac incolumis ad nos pervenias. Summum virum Dn. *Gronovium* cum Cl. *Graevio* salutem perofficiose, atque observanter. Te quoque resalutant socii mei, *Brannerus*, & amici caeteri. Vale, Upsaliae a. d. 5. Novemb. CIOIOCLXVII.

EPISTOLA CII.

JOH. SCHEFFERUS

Nic. Heinsio.

Hagam.

POSTremis tuis nunc respondeo. Verum paulo serius, quoniam sperabam fore, cum significaret mihi *Curio*, navigium in via esse, quocum accepturus sit nonnulla sibi ab *Elzevirio* missa, ut intelligerem propius, quid ea tua vellent, *Graevii Hesiodum* accepisse jam debes. Suspicebam enim, missum forte aliquod illius ad me exemplum, pro quo gratiae agendae forent. Verum video nunc illam meam vanam fuisse suspicionem, cum nil istiusmodi commissum sibi *Curio* testetur. Et fortassis aliter tu noluisti ea intellecta, quam de alias ad nos perlato eo opere. Quamquam ante non allatum fuerit; sed nunc demum primo visum nobis. Observo autem viri doctissimi elegantissimas eruditissimasque in Poetam illum curas, omnique ratione amo. Pro honore quoque, quem in compellando meo nomine meis habuit laboribus, officiosissimas ipsi ago gratias, atque ut per te hunc meum deditissimum ipsi ani-

mum intelligat, etiam atque etiam oro. Quamquam optarem librorum meorum de militia navali secundas extare curas, quippe quibus ea omnia, ad quae remittit lectorem, plenius & diligentius sunt tractata. Verum eas prodituras nescio an sperare debeam, quia *Curio* non sufficit ad faciendos tantos sumptus. Quale *Elzevirius* de ipsis recudendis dederit responsum nescio, neque novi, a quo compellatus sit hoc nomine. Scripsi quidem optimo *Gronovio*, habere me paratam editionem novam, sed de *Elzevirio* nil scripsi. Quare peto, ut haec mihi explicatius significes. Phaedrum meum ad vos spero perlatum. Jussi eum dari & *Gronovio* & *Graevio*. Mauricium num acceperint, quod jam fieri ante annos aliquot debuerat, nec dum certo scribit. Ego nuper Pacatum denuo emisi, quem mittam proxima occasione. Nunc quantum otii conceditur, omne rei vehiculariae tribuo, ad quem si per te, si per amicos aliquod comparabis, rem facies exoptatissimam. Imprimis Illustr. Dn. *Capelanum* ut compelles, oro. Habeo apud me MS. Anonymi vitarum B. Odiliae & Ducis Adalrici, in quibus pro conditione temporum illorum pluscula sunt fabulosa. Quaedam tamen Historiae servientia. Eum, quia necdum vidit lucem, quod confirmavit mihi Cl. *Bigotius*, ejusdem *Bigotii*, aliorumque hortatu vellem edere, si haberem, qui describere typis susciperet. Nam *Curio* noster nunc in synopsi juris Soceri mei occupatum habet praelum. Tu significabis, quid de hoc conatu meo judices. Aeliani varia per *Fabrum* publicata impensissime videre cupio, nam & ego in edendis ipsis denuo sum occupatus, cum praefertim in editionem secundam Argentorati procuratam erepserit vis tanta foedissimorum mendorum, dum transmissa mea pleraque Typographus per incuriam perdit, & ex jam ante editis versus integros omittit, ut pro mea illam nequeam agnoscere. De Prudentio tuo agam pluribus, cum contigerit inspicere. Has ut ad optimum *Gronovium* transmittas, impetraturum me ab humanitate tua confido. Postremo te reversum ad nos videre iterum, ac coram complecti, si quid unquam, studiose opto ac desidero. Vale, Nobilissime Domine, Amicosque omnes perofficiose ex me saluta. Upsaliae a. d. 11. Febr. CIOIOCLXVIII.

EPISTOLA CIII.

JOH. SCHEFFERUS

Nic. Heinsio.

Hagam.

Litteras meas exerrantes Dn. *Elzevirium* in viam reduxisse gaudeo, hocque nomine me debere illi plurimum profiteor. Tui extra culpam sunt. Mea factum inscitia, ut putarem te habere Amstelodami, qui litteras ad te missas exciperent, & ad te curarent, ubicunque esses. Reditum tuum avide expecto, atque tum coram visurum te confido. Mauricium meum curabo ad Cl. *Gronovium*, quacunque ratione potero. Miror autem, ne ab *Elzevirio* quidem ei-
 da-

datum, postquam hoc ab eo petiit per litteras *Curio* noster. Caeteras quoque litteras meas ad ipsum perisse dolèo, cum ob alia, tum quia sic videbor in scribendo ignavus esse. Plinio ante caeteros gratulor, quod Gronovianam nactus sit opem, manumque medicam impetravit. Nam confido plane fore, ut per ipsum integrior evadat plurimum. Quinam sunt inediti illi Graeci abs te empti, nisi grave est scire desideranti significabis. Pausaniae Lexicon, de quo agit Cl. *Gronovius*, est nullum, sed Moschopuli. Significavi, nisi fallor, pridem, simulque adjeci schedulam aliorum operum, quae in volumine illo continentur, superque ipsis sententiam Cl. *Bigotii* rogavi. Verum periisse istas meas necesse est, quia nil respondit hactenus. Quod significabis viro optimo, cum dabitur occasio, salutemque nunciabis meam & officia, una cum amicis caeteris, quorum commercio litterarum carere cogor, postquam te carere coepi. De conditionibus, quas proposuit *Elzevirius* edendae a se Militiae navalis meae, etiam etiamque oro, ut me certiore facias. Nam nobilem illum, quocum sibi ait fuisse negotium, Dn. *Gyldenankerum* suspicor, qui pridem abiit in Gallias. Neque ullae ipsius ad me ex illo tempore pervenerunt litterae. Si condiciones *Elzevirii* sunt tantum non aperte iniquae, mihi que impossibiles, habebit me facillimum in omnibus. Rei vehiculariae meae subsidia nulla hactenus sum consecutus abunde. Interea meo ingenio absolvi volumen prius. Sequetur posterius hac aestate, si vitam Deus dederit. Appendicem notarum ad Petronii Dalmatici fragmentum dabo brevi. Scripsit mihi nuper illustr. comes *Gustavus Adolphus de la Gardie*, nunciatum sibi esse de Petronio integro, delitescente Roterodami apud sacerdotem quendam, occultantem librum, ceu spurciciei plenum. Quod quia novum, nec auditum antea, scire per te cupio, quid veritatis insit huic narrationi. Nec enim occultum tibi potest esse, credo. Plura nequeo hac vice, tantum quid de Aeliano *Fabri* habeas compertum, & num proftet apud vos, perscribas oro. Denique te cum Cl. *Gronovio* *Gracvique*, quos saluto perofficiose, plurimum salvere ac valere jubeo. Upsaliae 14. April. CIOIOCLXVIII.

De *Elzevirii* voluntate, ut me certiore facias quamprimum, vehementer oro. Lexici, cujus supra feci mentionem, haec est inscriptio. ¹ Ονομάτων Ἀττικῶν συλλογὴ ἐκλεγεῖσα ἀπὸ τῶν τεχνολογόντων εἰκόνων ἔκ Φιλοστράτου, ἣν ἐξέδοτο ὁ σοφώτατος κύριος Μανυὴλ ὁ Μοχροπέλης, ἡ δὲ ἀπὸ τῶν βιβλίων τῶν ποιητῶν: συνετέθησε ὡς ταῦτα καὶ σοιχείον. Super scriptum eidem latinis verbis: *de dictionibus Atticis per ordinem litterarum ex Philostratis*. Quod a me inspectum obiter effecit, ut scriberem de lexico non Pausaniae, nisi fallor, sed Philostrati.

¹ Vide Cl. *Fabricii* *Biblioth. Graec.* lib. IV. cap. 34. tom. IV. pag. 535.

EPISTOLA CIV.

JOH. SCHEFFERUS

Nic. Heinſio.

Holmiam.

Salum te ad nos reſerſum ſupra modum gaudeo; eoque nomine tibi gratulor ex animo. Utinam tempore aliquo detur frui præſentia tua; curabo enim, ſi modo ulla ratione potero, ut ad vos excurram, præſentemque te amplectar. Prudentium tuum ante horam *Curionis* puer attulit, pro quo, ſicut tibi debeo plurimum, ſic exſolvere hoc debitum nunc quidem minime poſſum. Dabo tamen operam, ut intelligas perpetuo meum animum tibi officiſſime addiſtum. Litteras *Elzevirianas* recte accēpi, eiſque reſpondi ſtatim, litteraſque meas ante octiduum miſi ad *Curionem*. Summa reſponſi ea eſt, me nemini libentius comittere Militiam Navalem, quam *Elzevirio*. Figuras (ut vocant) circiter decem novas accedere, totum opus, ſi ſic ei videatur, primo quoque tempore me miſſurum eſſe. Pro labore meo nihil nominatim me exigere, ſi opere finito libelli unius vel alterius elegantioris munuſculo ornare bibliothecam meam volet, in ipſius arbitratu fore. Exemplar meum, quia peregre mitti non poteſt, deſcribendum eſſe. Et jam initium ejus rei factum. Sunt autem deſcribenda omnia & edita & recens a me ſcripta, ne propter multas magnasque acceſſione emendationeſque typographo moleſtia creetur. Puto tamen ſpacio unius menſis, vel ſummum alterius me deſcripta habiturum omnia. Haec feſtinatione ſumma; quia tuas litteras non ante hanc ipſam horam accepi, & jam diſceſſurus. Quare ignoſces feſtinationi huic, & verbis. Upſaliae 26. Junii MDCLXVIII.

EPISTOLA CV.

JOH. SCHEFFERUS

Nic. Heinſio.

Holmiam.

An te dies circiter duodecim ſcripſi tibi vere feſtinante calamo, quod convenire parum cenſerem meo erga te amoris & obſequio, differre longius gratulationem de adventu tuo felici, licet vix perlegere tuas poſſem, eo ipſo momento mihi redditas. Factum quoque eſt, ut omitterem multa, quae ſcribenda erant. inter caetera id etiam, quod ſpectabat laborem abſ te mea cauſa ſuſceptum, partim apud *Elzevirium*, partim apud alios. Cumprimis vero in adferendis exoptatiſſimis fasciculis ab optimis clariſſimiſque viris Domino *Gronovio* & Dn. *Graevio* mihi miſſis, ſicut ſcribis. Pro quibus omnibus mea cauſa factis gratias tibi debeo agoque immortales. Libri mei de militia navali ſpacio unius & alterius hebdomadis deſcripti erunt. Quo magis abſ te oro ac contendendo, ut, quid cenſeas de *Elzevirii* voluntate, ſignifices. Puto nil a mea
parte

parte posse desiderari. Impensas saltem facio non exiguas in descriptionem integri ejus operis, quod tu aestimabis facile suo tempore. Sperabam plane posse me ad vos excurrere. Nunc ex inopinato interveniunt impedimenta, quae me adhuc ad tempus aliquod tenent domi. Quod si liceret, orarem impense, ut ipse his aestivis diebus, quibus commodissima sunt itinera, venires ad nos, hospitioque nostro uti ne dedignareris. Equidem in nobis nihil est, quo excipere te possumus pro dignitate meritisque tuis. Omnia tamen boni consulturum te ab humanitate bonitateque tua sperare audemus, eo magis, quod non omnino incognita tibi nostra sit Upsalia. Meos in Pacatum conatus non displicere tibi gaudeo: pro loco indicato mihi ex notitia Imperii, gratias ago maximas, de quo cogitabo alias. Nunc enim totus sum in illustrando trecentorum annorum auctore, qui descripsit Archiepiscopos, Praepositos, Decanos, & id genus Ecclesiae Upsaliensis, haecenus inedito, qui labor mihi est injunctus ab illustrissimo R. Cancellario, & jam poene omnia confecta habeo, festino enim, quo ad rem vehiculariam redire liceat. *Meursii* Glossarium quod tanto tempore meis usibus concedere gravatus non sis, valde laetor, hocque nomine plurimum tibi debeo. Reddidisse vero tibi *Curionem* nostrum cum gratiarum actione spero. Sed claudenda est epistola, ne te nugis meis supra modum videar detinere. Vale, ac, ut soles, me amare perge. Upsaliae a. d. 7. Julii MDCLXVIII.

EPISTOLA CVI.

NIC. HEINSIUS

*Joh. Scheffero.**Upsaliam.*

DUM in salutandis occupor proceribus, aliaque, in quibus haerere solent peregre advenientes, procuro, vix potui ea festinatione ad tuas longe jucundissimas responsum parare, qua cupiebam, vir optime. Sed nec sarcinae nostrae ex Batavia haecenus comparent, quas inter nonnulla sunt *Gronovii* ac *Graevii* nomine tradenda. ¹ *Graevius* interim per literas me monet *Gasbekios* fratres Officia Ciceronis variorum animadversis illustrata praelo destinare describenda; quibus & observationes tuas posse subjungi, nisi quid dissentires ipse. Tu, quae tibi super hoc negotio sit sententia, certiore me quamprimum fac, quaeso. Addit idem amicus noster observata in eisdem *Tullii* libros, a *Petro Suffrido* & *Francisco Fabricio* contexta, nequicquam abs se quaeri. *Suffridi* observationes non habeo, habeo *Fabricii* oppido eruditas, sed eas ubi sim inventurus, libris meis in cistas sparsim coniectis, prorsus ignoro. Tu si quid hîc in medium possis conferre, noli nobis publicoque deesse. Hisce tandem subjungit, non deesse in foederatis Belgis typographos, qui *Meursiana* *divendota* Regiae bibliothecae sua opera divulgari velint, libros praesertim de antiquitatibus Cypri, Rhodi, atque Cretae, deque regibus Lacedemoniis commentarium.

¹ Vide *Graevii* Epistola LV. tom. IV. hujus Sylloges.

rium. Quod ut impetretur, tuam operam nobis non inutilem fore confido. Ipse *Graevius* in Suetonio adhuc occupatur, Homero etiam manum admoturus. *Gronovius* cum valetudine parum confirmata luctatur. *Fredericus Brummerus*, haeres *Reinesii*, de lege Cincia commentarium publico dedit, quem laudari ajunt. Ad *Elzevirium* litterarum nonnihil parabo die crastino, vel tua caussa, ut negotium lucubrationum tuarum, quod nosti, confectum aliquando habeamus. Solent scriptores apud nos cum typographis pacisci de nonnullis exemplaribus sui juris faciendis horum operum, quae luci adornant. Atque hîc puto non iniquum *Elzevirium* experiemur. An de aliis quibuscunque libris conditionem sit amplexurus dubito; quod id aut nuncquam, aut raro apud nos fieri soleat. Invigilabo tamen, quantum in me, tuis desideriis atque commodis. Tuas super hac re literas ad *Elzevirium* confestim se misisse mihi *Curio* est testatus. Origenis opera ex editione *Huetii* jam vidisti credo. Narrat *Bigotius* esse in Galliis, qui opera S. Maximi duobus aut tribus voluminibus suscepit edenda, sed Clerum Gallicanum preces ejus de impensis faciendis repulisse. *P. Henschenium* S. Odiliae vitam esse editurum, si ea abs te impetrari potest. Sed cum minus liquido designet, seorsimne, ac cum reliquis, quas parat, Sanctorum vitis eam sit daturus, quod te nolle opinor, exploranda erit aliquanto certius ejus super hoc proposito sententia. Nec *Phaedrum* tuum editionis secundae, nec *Tactica* *Mauricii* accepisse se asseverat. Tale quid si in posterum aut Belgium, aut in Gallias vis mitti, aut alio quocunque, mea operam erit consultum tibi. *Aelianum* ab illo jubeor expectare cum MS. collatum. *Brummerum* de *Plinii* epistolis edendis cogitare, idem significat *Bigotius*. *Tacticos* omnes veteres a *Claudio Hardy* typis Regiis Lutetiae describendos fore jam nuntiavi, puto. vale, vir clarissime, & me, ut facis, ama. Holmiae CIOIOCLXVIII. a. d. x. Juli.

EPISTOLA CVII.

JOH. SCHEFFERUS

Nic. Heinsio.

Holmiam.

HUMANISSIMAE tuae cum propter alia fuerunt mihi longe jucundissimae, tum quod faciebant spem fasciculorum a viris optimis amicissimisque ad me destinatorum. Nihil mihi erit gratius, maxime post intervallum tantum, quo ab ipsis vidi nihil, quam constantis eorum erga me humanitatis tam egregia cernere complectique argumenta. Quae ad officia *Ciceronis* annotavi, sunt prolixa, justumque faciunt commentarium, ut non possint jungi hujusmodi editioni; praeterea nec descripta cuncta habeo. Exscribam tamen potiora quaedam, & occasione mittam proxima, ut si digna tibi videantur, cures ad Cl. Dn. *Graevium*. *Suffridi* aut *Fabricii* nihil est in bibliotheca mea, videbo tamen, an quid explorare possim apud alios. *Meursiana* quatenus sint in Bibliotheca Regia, ignoro. Scribam Bibliothecario, amico meo. Quod, si
ca,

ea, de quibus agis, reperiantur, operam impendam, ut impetremus beneficio Illustris Cancellarii, si non aliter, descripta saltem per quemdam studiosum. Negotium meum de militia navali totum tuo arbitratui committo. Transiges cum Typographo, prout optimum videbitur. Nec enim pro me exigam, quod aliis non consuevit dare. Origenis vidi nihil, quod non poteris mirari, si credes, ne illorum quidem libellorum quidquam nos vidisse, qui sunt editi apud vos, Arrianum dico, *Palmerii* Observationes, *Pignorii* initia Matris Magnae, & hujusmodi, quorum nihil adhuc *Curio* vel accersivit, vel impetravit. Odiliana mittere num debeam, ignoro, quia dubito an tanti sint. Habebo mecum, cum ad vos pervenero, & monstrabo, ut videre ac judicare possis ipse. *Tactica*, & caetera mea misi nunc per quemdam in comitatu Illustriss. Legati Gallici, qui per annos aliquot vixit in aula Illustriss. Cancellarii, ad amicos Parisiis degentes. Utinam curentur rectius, quam quemadmodum huc usque curata sunt a *Curione*. Aelianum collatum cum MSS. videre impensissime desidero, quemadmodum & editionem Fabrianam, quam pariter ad hunc diem frustra expectavimus. *Brummeri* scripta *Reinesii* esse videntur, sed hoc apparebit rectius, cum ipsa ad nos fuerint aliquando perlata. Humanitati tuae summas ago gratias, per quam mihi optima oblata est occasio destinandi mea ad amicos. Utar ea suo tempore. Interea ut diutissime valeas, etiam etiamque oro, me vero ut amare pergas, enixissime peto. Upsaliae a. d. 14. Julii MDCLXVIII.

EPISTOLA CVIII.

JOH. SCHEFFERUS

*Nic. Heinsio.**Holmiam.*

Fasciculi, quos per Curionem ad me destinasti, recte mihi sunt redditi ante dies aliquot. Gaudeo plurimum munere tam egregio, quo uterque *Gronovius* & *Graevius* me ornarunt. Id vehementer miror, quod neuter suas aliquas addere litteras voluerit. A *Gronovio* jam sesquiannus est, quod habui postremas. Et quaerebam bis sententiam ipsius de *Molorcho* Statii, inferendam meis de militia Navali. Sed quia constans ejus est silentium, te oro, ut si quid habes de eo, mihi aperias. Salmasiana enim emendatio non satisfacit: praeterea significes, quando scribes ad utrumque. Constitui enim ipse quoque scribere, gratiasque illis agere, ut debeo. Sed & tibi pro labore in curandis ad me istis obstrictum & esse & manere me perpetuum animo gratissimo profiteor. Haec breviter, quoniam occupatissimum te intelligo. Vale, ac ut soles, me amare perge. Upsaliae a. d. 18. Augusti MDCLXVIII. Postremas meas cum appendice Petronianarum Notarum tibi redditas confido.

EPISTOLA CX.

NIC. HEINSIUS

Upsaliam.

Audeo, ut qui maxime, fasciculos a Gronovio Graevioque destinatos tibi in manus tuas illaefos pervenisse, viri clarissime. Ad horum alterum vel ad utrumque si quid paras literarum, mihi id omne negotium permittas rogo. A Graevio unam habui epistolam, ex quo paternum larem deserui: a Gronovio nullam. Nescio enim quomodo vir amicissimus, qui miram in hujusmodi officiis solēbat praestare diligentiam, nunc non tam sua, quam senectutis culpa rarius procedit ad spartam istam adornandam. In munere praeterea Academico collegiisque privatis instituendis adeo est assiduus, ut de Tacito, Plinio, Gellio edendis, quos sperare jam pridem nos jubebat, vix possit cogitare. De Molorchio Statii nihil observatum a me memini. In opere de re vehiculari nescio an tetigeris illa Lucani in libro secundo, si probe memini, (Lib. I. vers. 426.) *Et docilis rector monstrati Belgae covini*. ita enim scripti editique constanter, nisi quod in margine editionum quarundam *rostrati*. neutrum satisfecit. Quare opinabar a Lucani manu esse *constrati*. *constratus covinus* ut *nazis constrata*. Ex certe *covinos constratos* fuisse, seu opertos, vel ex isto Martialis loco lib. XII. Ep. 24. manifestum fit, *o jucunda, covine, solitudo! currus constrati, & currus strati* in eo differunt, quod alteri sint tecti sive operti, alteri, quibus stragulae vestes injiciebantur. qua de re plura in curis secundis ad Nasonis locum Fast. VI. vers. 680. *in plaustro sirpea lata fuit*. ubi cum membranae veteres parum sibi content, uti jam in animadversis designavi, monebo esse corrigendum, *sirpea strata*. Nam straguli vicem *sirpea* in eo plaustro occupabat. Appendicem notarum Petronianarum recte accepi. Vale, vir clarissime, & mihi velle perge. Holmiae Suecorum Anno MDCCXXVIII. a. d. VI. Kal. Sept.

EPISTOLA CX.

JOH. SCHEFFERUS

Nic. Heinsio.

Holmiam.

Sicut scripsi nuper, ita tibi mitto nunc ad Clarissimos viros Gronovium Graeviumque litteras, quas ut ad ipsos, quodocunque scribes, curare ne graveris, etiam atque etiam oro. Gronovium tam esse tardum miror profecto, imo doleo, quoniam ab eo speraveram opem in Molorchio Statiano exponendo. Locus est Sylv. III. in propemptico, ubi vulgo habent, *sint*, quibus exploret rupes gravis arte Molorchus. Salmasius putat: *s. q. e. plumbo gravis alta molybdis*, quod videtur nimium recedere. Sed nec per Molorchum nauticam bolidem hic existimo intelligendam, quod magistri veteres volunt. Puto autem Gronovium quid dixisse

xiste de hoc loco in suis ad Statium curis. Quasi quia non habeo, ipsius iudicium me speraveram impetraturum, quo vel firmare mea, vel emendare possem. Verum pergit is ad hunc diem servare silentium suum. Lucani emendationem anticipavit jam *Isaacus Vossius* apud Boschartum P. II. Geogr. fac. lib. I. cap. 12. ex quo annotavi pridem in meis. Pro emendatione loci Ovidiani gratias, & in meis opportune memorabo. Nam & in illis de *constratis verbis* odicam opluscula. Inter eos, qui Hesychio emendando curam aliquam adhibuerunt video laudari saepius *Sopiniolum*. Quis sit, & an sua quaedam ediderit (laudat enim aliqua) scire valde desidero. Mihi vir Graecarum litterarum peritissimus videtur. Post octiduum, vel summum dies quatuordecim iter ad vos institutam, volente deo, adferamque meam Militiam Navalem cum nonnullis aliis, ubi spero datum iri occasionem coram te compellendi agendique tecum de quamplurimis. Interea ut te fervet gratia divina saluum oro, meque amoris tuo gratiaeque commendo. Vale. Upsaliae a. d. 15. Septemb. Anno CIOIOCLXVIII.

EPISTOLA CXI.

NIC. HEINSIUS

Job. Scheffero.

Accidit hoc plane praeter spem meam, vir clarissime, quod tam parce frui te nobis contigit, cum proxime in hanc civitatem Upsalia te contulisses. Per hibernam fortasse tempestatem offeretur rursus occasio tuae praesentiae, quod cupio vehementer me hercules, si tantum temporis septentrioni huic vestro a me dabitur: nam id totum eum a nutu pendeat alieno, nihil affirmandum temere mihi occurrit. Viam interim carpit ad Batavos nostros militia tua navalis, imo jam illuc pervenisse potest, nisi quid adversi, quod abominor, intorvenit. *Sopinius*, si probe recordor, Theologus apud nos fuit ex Frisiorum provincia, qui Hesychii editionem ante annos hosce quinquaginta & plures moliebatur, vir Graecarum litterarum in primis peritus, & parenti meo amicus. Nam ipse hominem haud vidisse memini, qui me nondum nato jam ad plures, ni fallor, abiisset. Amstelodamenses de Graevio ad se vocando agere dicuntur, destinato hanc in rem mille ducentorum Joachimicorum annuo stipendio. *Elzevirius* ingentem *Ezechielis Spanhemii* de usu & praestantia veterum nummo-

¹ *Godofredus Sopinius* Bolsverdae in Frisia Ecclesiasticam provinciam obiit, familiaris fuit *J. Isaac. Pontano*, ad quem epistolam de Herba Britannica edidit *Cl. Matthaeus* in Sylloge sua n. CLXXIX, in qua & de Hesychio suo mentionem facit; obiisse eum Anno 1618. apparet, ex *Sibrandi Siccamae* ad *Pontanum* Epistola Ibid. CLXXIII. ubi de scriptis ejus agit. & in alia CLXXII. schedas ejus tumultuario & plane sine ordine & methodo scriptas, & quas vix ab aliquo explicari posse spes est, se per filium recepit scribit. Edidisse responsionem Apologeticam ad Libellum Anonymi, qui vocatur, *Bona fides Sibr. Lubberti* Anno 1616. *Konigius* testatur in Bibliotheca.

rum commentarium typis suis describit, post curas priores longe auctiorem. Hoc *Spanhemius* ipse Heidelbergae ad me nuper. Cujus perlectis literis vehementer sum gavissus falsos esse rumores, qui illum favore Palatini Electoris, quo floret hactenus, excidisse, ac Genevam ad paternum larem confugisse, criminabantur. Commentarium ad legem Cinciam, de quo coram agebamus, indies expecto. Libri complures admodum lucis publicae facti, quos *Elzevirius* ex patria ad me mittebat, atque in his *Lubien* commentarius de cometis operosissimus, naufragio mihi perierunt. Vale, vir eximie. Exarabam Holmiae. ipsis Kal. CIOIOCLXVIII. quas hîc vides Cl. *Brunnero* tradendas recte cures.

EPISTOLA CXII.

JOH. SCHEFFERUS

Nic. Heinsio.

Holmiam.

VAlde tuis litteris laetatus sum, non modo, quod spem facerent militiae Navalis meae in Hollandiam perlatae, sed & quod commodiori valetudine tenui, quam superiori tempore, palam innuerent. Deus servet te, viresque largiatur integras, perficiendis pulcherrimis operibus, quae paras, & ornandis amicis, quos nullo non officiorum genere devincis tibi. De Militia mea cupio plane certus esse: quare si quid intellexeris, id extemplo significare ne graveris, oro. Quanquam videam negotium fore tardum, vel propter ea, quae de *Spanhemii* commentariis hîc nuncias. Cl. *Graevio* gratulor conditionem plane pinguem ab Amstelodamensibus oblatam, neque dubito, quin eam jam acceperit. Liquet autem abunde bonis litteris esse pretium apud eos, quae per alias orbis partes fere compelluntur mendicare. Nam & hîc ut victum habeant, multis tamen aliis sunt destitutae, quae ubertim apud vos inveniunt. Quid autem optimus *Groenovius*? An meliori loco valetudo ejus, quam fuit hactenus? Utrum ille, utrum *Graevius* accepisse litteras meas significarunt? Ab *Andr. Bosio* habui ante unam alteramve hebdomadem, in quibus ista ad te pertinentia: *Josephus noster adhuc expectat varias Bigotianas. Quaeso salvere a me jube Nobilissimum Heinsium, meoque nomine roga, ut optimum virum denuo promissorum admoneat.* Quae tua sit sententia, per me significari poterit eidem, si sic visum fuerit. Scribit alias vir egregius, *Reinesianum* corpus inscriptionum sibi oblatum ab Electore Saxoniae hac lege, ut cedat debito quadringentorum Imperialium, quibus Elector ipsi est obstrictus, & det operam, ut edatur. Se vero quomodo posteriorem implere conditionem queat, non invenire, ac idcirco rem relinquere inconfectam. Periiisse tibi naufragio tot libros egregios, vehementer doleo. Ante discessum tuum, quem opto serum esse, coram acturum me tecum certo confido. Spero autem me usurum fortuna, futurumque frequentiore apud te, quam nuper licuit. Plura nunc quidem non habeo, & me obruunt negotia, de quibus plura *Curio* tibi memorabit. Vale. Upsaliae a. d. 4. Decemb. CIOIOCLXVIII. *Brunnero* suas statim misi. Iterum vale.

EPI-

EPISTOLA CXIII.

NIC. HEINSIUS

*Joh. Scheffero.**Upsaliam.*

Quantum ex litteris Illustris *Beuningii* hesternis sum edoctus, pervenit sospes in Bataviam nostram *Johannes Philippus Silvercronius*, qui militiae tuae navalis volumen, *Elzevirio* tradendum, hinc secum tulit: ut probe curatum esse hunc fascem vix dubitari par sit. Nam ab ipso *Elzevirio* nuntios necdum accepi, qui rei totius securos esse nos jubeant. *Graevius*, quantum audio, oblatam ab Amstelodamiis conditionem rejecit, praetulitque mille & ducentis Joachimicis, Octingentos annuos ab Ultrajectinis proceribus promissos. ea tamen lege, ut post excessum suum uxori viduae CLX. Joachimici quotannis ex aere publico annumerentur. Quod & ipsum Amstelodamii praestandum abs sese fore erant polliciti. Rogavi amicum hunc nostrum, ut super maturanda voluminis tui editione calcar *Elzevirio* nonnumquam addat, quem fore paullo tardiolem in partibus suis implendis facile praevideo, cum quod Spanhemiano commentario manum admovere jam coeperit, tum quod iter in Gallias meditari se scribat. Cl. *Bosium* recte se habere meique meminisse est quod laeter maximum in modum. Provocatus ejus litteris suavissimis ante annum, quando in patria haerebam, rescripsi: nec tamen haecenus rescire mihi est datum, sitne curata probe epistola, an interciderit in via. Langermannianae certe fidei commendatam fuisse succurrit. Pestilentiae contagies cum hac aestate Rhotomagum populata sit utcumque, ab ea civitate *Bigotium* nostrum, ruri latitantem, avertit. Qui casus moram quoque ac procrastinationem promissis ejus de Josepho objecit, ut opinor. Nuntiabat is proxime, scriptoris ejus exemplar cum vetusto codice collatum ad *Isaacum Vossium* me abente in Bataviam fuisse missum, qui fidem obligasset, ejus paratam mihi fore copiam, simul atque ex hoc septentrione redissem domum, quod aut hiberna hac tempestate, aut saltem vere proximo, ut confido, fiet. Addit idem *Bigotius* Archiepiscopum Cantuariensem in Britannia Typographiam instruxisse magnis impensis, quam aut a Josepho aut Chronicis Joannis Antiocheni edendis, qui liber lucem necdum adspexit, auspicari operas velit. de transferendis in sermonem Latinum Graecis Tacticis *Coselerium* provinciam suscepisse, communicata cum *Henrico Valesio* opera. haec ille. Vale, vir Celeberrime. Holmiae XIX. Decemb. MDCLXVIII.

EPISTOLA CXIV.

NIC. HEINSIUS

*Joh. Scheffero.**Upsaliam.*

Nolim pretium, quod alloquiis tuis pono meritissimum, ex infrequentia mea metiari. Haftenus enim ratio valetudinis meae plus satis conturbata omni poene scriptione, atque adeo corporis exercitamentis, vel levissimis mihi interdixit, vir Clarissime. Tuas ad *Graevium* probe curavi, qui iniebat nuper, Polybii novam a Britannis editionem adornari. Desudant, puto, in eadem palaestra *Boclerus* & *Gronovii* filius natu major. A *Falconerio* litteras proxime accepi, quas tibi legendas mitto. Complectuntur enim nonnulla, quae scire tua interfit, etsi video futurum, ut ductus Chirographi difficillimos assequaris. *Slusium* quod ait *Allatio* in cura Vaticanae Bibliothecae successorem datum, equidem sum miratus. Est enim Leodicensis ille, in qua civitate canonicatum possidet. Sed Romae vixit olim annis compluribus una cum *Dormalio*, si memini. Vir Graecae litteraturae & rerum Mathematicarum peritissimus, atque adeo ad omnem factus humanitatem. Unde cognoscas, & hunc Pontificem, & ejus ex fratre filium *Rospilosium* Cardinalem litteris promovendis egregium in modum studere. *Bigotius* ob pestilentiam tractus Neustriae jam pridem infestam rursi multo tempore delituit valetudinem dubiam expertus. Unde factum, ut nonnulla ex his, quae ad illum curavi, perierint in via. *Capellanus* proxime scribebat, agnatos ejus velle, ut de matrimonio ineundo cogitet, a quo videtur ipse esse alienus. Sed cum alterum ex fratribus amiserit, manum fortasse vel invitus huic consilio dabit. Lutetiam certe se conferret vellem, tum ut vitam Chrysostomi sub praelo jam dudum haerentem perficeret, tum ut nunquam me doceret, quid rerum illic inter eruditos geratur. Nam *Capellanus* senio confectus vix par est huic officio. de *Elzevirio* nil audiivi prorsus, ex quo in Gallias ante hasce sex hebdomadas est profectus. Promiserat sese specimen operis tui typis descriptum ante profectionem mihi missurum esse, sed fidem non liberavit. *Curionem* tamdiu abesse doleo & miror. Poterat enim praesentia ejus hic nobis esse non inutilis in negotio quodam *Elzevirium* tangente. *Meibomium*, Amstelodamiis operam suam addixisse, postquam *Graevius* illuc pertrahi non potuit, reor me jam significasse; stipendium illi obtigit minus lautum, ut audio. Operi tuo de militia navali quidquid additum aut insertum velis, inferendum vel addendum per me curabitur. De te ante discessum meum videndo jam incipio desperare. Bibliotheca mea cum intra ciuitatis angustias sit redacta, libris utor non nisi paucissimis: in his Sallustium evolvebam nuper editionis Franequeranae ab *Ausonio Popma* procuratae. ubi ex Historiarum Sisenae lib. iv. hoc fragmentum inter alia exhibetur. *Et partim fera vite, partem lauro & arbusculo ac multa pinu ac Myrtetis abundat.* Rogo alias editiones consulas, meque doceas ex quo scriptore id fragmentum sit depromptum.

tam. Deinde ecquid super illo aut per Anton. Augustinum, aut per alios sit annotatum. Nam primo scribendum videtur, *partim lauro & arbuto*. Ineptum enim est, cum species arborum seu fruticum potius varias recenscat Sisenna, in his arbuti meminisse: per *feram autem vitem* labruscam, puto, designat. Deinde dubito, an non dederit Sisenna, *ac culta pinu*; certe cum fructices diversas enumeret, non arbores, de pinu domestica hoc intelligendum, quae fructibus potius, quam arbutis accensetur. De ea multis egi ad Nasonem lib. III. Art. Amat. contra Salmasium; pluribus etiam ad Maronem. Locus Nasonis sic se habet.

Silva nemus non alta facit, tegit arbutus herbam,

Ros maris & lauri, cultaque pinus adest.

Corrigebat adversarius noster, *cultaque tinus*. Atqui tinum esse laurum silvestrem novisti; ut per *cultam tinum* nihil praeter laurum possit intelligi. Atque ita bis lauri meminerit Naso. Nescio quomodo pinum hanc domesticam, sive hortensem, variis apud Maronem locis homines eruditi impugnarint. Nam illo loco in Bucolicis

Populus in silvis gratissima, pinus in hortis,

Peliserius castigabat, *in oris*, scilicet maritimis. In Culice pro his, *& semper florida pinus*, a Bembo, *picris*, fuit inculcata temere. Sed jam nimii sumus. Vale; vir Eximie; Holmiae xv. Mart. MDCLXIX.

EPISTOLA CXV.

JOH. SCHEFFERUS

Nic. Heinsio.

Holmiam.

PLurimum me delectasse tuas, conjicere jam ex illis potuisti, quas uno die citius ad te scripsi, quam tuae mihi redderentur. Nempe valetudo tua adversa habebat me sollicitum, quam in melius nunc versam gaudeo, tibi que gratulor ex animo. Sed & litterae Cl. Falconerii multiplicem mihi attulerunt voluptatem, quoniam ex iis didici prolixè, argumento que longe gratissimo, quam bene mihi cupiat, deque rebus meis sentiat amice abunde cognovi, quamquam facile intelligam hoc totum tuis honorificis, & amicissimis de me judiciis deberi, quibus pridem scio conciliatos mihi viros doctos plurimos, proque hoc officio ac beneficio prorsus singulari atque nunquam ex memoria deponendo me devinctum tibi manere perpetuum gratissimo lubentique animo profiteor. Et quia video virum egregium me insuper ornare munere splendidissimo, officii mei esse censeo, ut ipsi agam gratias, idque adeo nunc facio his litteris, quas oro amicissime, ne grave ducas cum tuis ad ipsum curare. Quae de codice Fragmenti Petroniani narrat, grata mihi fuere, daboque operam, ut significem Cl. Arnoldo Norimbergam, qui sollicitè conquirat judicia doctorum de fragmento illo. Sed cur non contra istac scribat Falconerius scire cupio, nec enim vidisse puto, quae a me ad Fragmentum illud sunt notata. Fragmentum.

Si-

Sisennae habetur apud Nonium, in voce *Fera Vite*, pro quo in libris veteribus est *Ferabite*, sed emendavit *Turnebus* lib. xxix. Advers. 23. Caetera servantur in omnibus, quos ego vidi. Ne *Mercerus* quidem in suis ad Nonium notis immutavit quidpiam. Nam *Antonii Augustini* nec ego habeo, nec apud alios invenio. *Arbuto* tuum pro *Arbusto* vehementer placet, nam omnino necesse est, ut de peculiari genere loquatur. Nisi putemus *Arbusti* vocem specialius quandoque usurpatam & pro *Arbuto*. Quum etiam in *Philoxeno* habeatur *Arbustos*, κέρμαρ: quanquam ego in *Sisenna* malim *Arbuto*. In *culta pinu* haereo, quoniam ex caeteris de hac specie intelligi posse videtur, licet absit *culta*, quod istoc quidem sensu carmini, quam prosae aptius quis putet. Nolo tamen repugnare, maxime si adjumenta quaequam aliunde accedant. *Elzevirium* promissis non stetisse, moleste fero. *Curionem* hîc detentum citra voluntatem ab aegritudine scio. *Basilii* *naumachica* proxime commendabo tibi, nunc enim nimis impediôr. *Capelano* debeo responsum. Si per te licebit mittere, proxime hoc debito me liberabo. Habui diebus hisce a Cl. *Morhofio* Epistolam, in qua nunciari tibi jubet cum officiorum promptitudine amicissimam salutem. Iter cogitare se in *Angliam*, *Gallias*, & *Italiam* aestate imminente, desiderio coram agendi cum viris per regiones illas celebrioribus significat. Quod cum non ingratum forte tibi sit cognoscere, significandum statim arbitratus sum, ut si litterarum aliquid ad eum vel mandatum per me voles dare, proxime huc mittas. Ego enim scribere hebdomade proxima constitui. Interea cura, ut valeas, meque, sicut facis, ames. Upsaliae a. d. 19. Martii cicioclxix.

EPISTOLA CXVI.

NIC. HEINSIUS

Joh. Scheffero.

Upsaliam.

Perlata est hodierno die ad me epistola *Graevii* nostri; qua is testatur, expectari quotie die reducem ex Galliis *Elzevirium*. A reverso confestim manum operi tuo admovendam fore, & quidem eo festinatius, quod *Spanhemiana*, quae scis, jam ferme ad finem sunt perducta. *Gronovianas* in *Plinii* historiam naturalem castigationes lucem jam spectare. Ejusdem *Tacitum*, ac *Suetonium* suum, sub praelo parum promovere. *Reinesii* postuma per *Brummerum* juris publici esse facienda, simul atque is ex peregrinatione Italica retulerit ad suos pedem. *Lutetiae* prodiiisse tomum alterum scriptorum *Historiae Ecclesiasticae* animadversis *Valesianis* illustratum. Haec & plura ille. Sed de rebus Gallicis poterimus certiora doceri ex *Elzevirii* literis, ubi is suis erit redditus & nobis. Hisce interim, qualiacunque ea sunt, te minime fraudandum esse duxi. De rebus meis sunt quae tecum agam, sed malletm ea coram in sinum tuum effundere. Valitudo pertinacior facit, ut reditum ad meos urgere apud procures nostros flagrantissime pergam, utque deprecatus sim provinciam, etsi honorifica sit satis, legationis, quae foederatorum *Belgarum* nomine paci Suc-

cos inter & Moschos componendae destinatur, mihi demandatam. De discessu tamen ex hisce regionibus ante Kal. Quintiles proximas obtinendo nihil temere ausim adfirmare, praesertim cum illustrissimus Grotius Gallica legatione ordinaria, ut vocant, nuper sit auctus, ac proinde isti spartae adornandae se accingat. Pro Nonii loco gratias ago ingentes. ¹ De *culta pinu* conjecturam veram nolo praestare: etsi *colere ferro arbores, colere vineta* & similia passim apud Columellam, scriptorem elegantissimum, occurrant. Nam Horatianum illud dicere esse poëticum: *Neque harum, quas colis, arborum, te, praeter invisam cupressum, ulla brevem dominum sequetur.* Historicos tamen modis loquendi poëticis uti in comperto est. De *Arbuto* ne dubitem locus Ovidii facit. Quid quod in pervetustis Columellae membranis scriptum identidem *Arbusto* pro *Arbuto* offendi, ne de Glossario Philoxeni miremur. Potuit Ovidius Sifennae locum, de *culta pinu* non minus, quam de *Arbuto* imitatus esse, ut Silium Italicum nonnulla ex Sallustio desumxisse animadverto. Quale illud libro XII. vers. 354. Qui locus ex optimis membranis sic constituendus est.

*Isque ubi Torquatum raptim properata ferentem
Signa videt, pugnaeque avidas accendere dextras,
Fraude loci nota, latebroso per avia saltus
Evolat, & provisa fugae compendia carpens,
Virgulta tegitur valle ac frondentibus umbris.*

Vulgo illuc legitur *accedere dextras, profusa fugae compendia, & occulta tegitur valle.* Vallem virgultis oblitam designat. est autem Sallustianum, ex cujus historiis profert Servius, *consedit in valle virgulta nemorosaque.* Occultam vallem quis de mendo suspectam habuisset, nisi alio nos vocaret Agrippinus ille liber praestantissimus? Sed jam nimius sum. Alias agam de locis Silii rem nauticam tangentibus, quos videor ope membranarum integritati suae restituisse. Ad *Capellanum*, curabo, quas mittes. Est enim mihi is propediem compellendus. Ad *Falconerium* tuas necdum misi, sed mittam proxima hebdomade, quod *Elzevirium* jam itinere defunctum augurer, cuius opera hîc mihi est imploranda. *Curioni* cum valetudine negotium esse inique fero. Si is cogitur etiamnum ab hac abesse civitate, fac, quaeso id ex te intelligam. *Falconerius* viderit haud dubie tuas in Petronium animadversiones. Sunt enim in Urbe viri principes talium sic satis curiosi. *Falconerium* esse ex primaria Etruriae nobilitate, patrum habuisse Cardinalem, alias puto monui. Vale, vir clarissime, & me, quod facis, ama constanter. Holmiae CXCIX. a. d. x. April. manu propria.

P. S. Addit Graevius Gronovii filium in Macrobio non minus, quam Polybio luci adornandis desudare.

¹ Haec pertinent ad Ovid. III. Art. Amat. 692.

EPISTOLA CXVII.

JOH. SCHEFFERUS

*Nic. Heinsio.**Holmiam.*

CUR tam tarde respondeam tuis, ecce tibi causam, Basilium, quem semel sumptum in manus volui absolvere, ac una ad te mittere. Non feres aegre pro humanitate tua, si petiero, ut oblata occasione ipsum cures ad *Elzevirium*, ac in calce meorum de Militia Navali librorum jubeas collocari. Vellem autem una facie, divisis, uti vocant, columnis exhiberi Graeca Latinaque, non duabus, sicut ego hîc scripsi. Caetera pro arbitratu suo constituet *Elzevirius*. Pro iis, quae ex Graevianis nunciasti, gratias ago maximas. Gronoviana in Plinium videre aveo, ut &, quae tu promittis, ad rem nauticam spectantia. Utinam habuissem copiam eorum, priusquam mea ad *Elzevirium* fuissent missa! *Falconerii* genus nunc primum ex te intelligo. Quare oro, ut si scribes, excuses ei meam hanc ignorantiam. *Capelano* hîc mitto alias, quia video ex postremis ejus traditas, quas superiori autumnio misi. An vero & *Menagio*, *Bigotioque*, dubito, quia nihil scribunt, & is, cui dederam negotium, diem suum obiisse dicitur. Tu si ad eos aliosve scribes, dabis operam, ut ignoscas, mea causa. Misi enim Nob. *Bigotio* Mauricium, quem in Galliis vidisse nec dum puto. *Gronovii* filium egregiae indolis oportet esse ac doctrinae, qui Polybium polliceri nobis audet. Gratulor ego viro optimo hoc nomine, gaudiumque ei ex virtutibus ejus filii opto durabile ac perpetuum. Ego nunc in re vehicularia pergo, nec deponam, si permittat valetudo, antequam absolvero. Meum quoque de pingendi arte Commentarium, qui Norimbergae publicatur, pene ad finem audio perductum. Valetudo tanto tempore, ac tam pertinaciter adversa tibi me quoque affligit, qui intelligo, quanto cum detrimento litterarum sit conjuncta. Quare opto ex animo, ut deus te respicere, viresque pristinas restituere tandem velit, quod plane hoc vere, cum clementior fiet aëris constitutio, futurum confido. Ante abitum te certe sum visurus, si modo vixero. *Curio* noster nondum valet, sed modo decumbit, modo obambulat, modo iterum lecto sese dare compellitur, neque polliceri quidquam audet de profectione sua, quam tamen optat modis omnibus. Plura non habeo, tantum oro, ut me, quod facis, amare pergas. Vale, Upsaliae a. d. 20. April. CIOIOCLXIX.

EPISTOLA CXVIII.
NIC. HEINSIUS*Joh. Scheffero.**Upsaliam.*

HAbui hodierno die literarum nonnihil a *Bigotio*, qui & salutem tibi plurimam voluit dici suo nomine, & significari, recte ad se perlatos, quos minus misisses, libros, vir clarissime. Ut jam securus esse possis horum quoque, quos eadem, ni fallor, via ad *Capellanium Menagiumque* misisti. Illud vero indigne tuli, quod addit vir optimus, de pertinaci sua valetudine, per quam in Neustria detineri pergat, & de morte *Valerii Chimentellii*, quem in ipso juventutis flore fata intempestiva e vivis abstulere. Nam *Allatium*, de quo nuntios nuper accipiebamus, nobis ereptum eo moderatius ferendum, quod is justum vitae curriculum jam quodammodo peregisset. Libellos nonnullos recens editos secum mihi ex Galliis laturus est *Elzevirius*, atque in his rariora numismata *Segurii*: tum luculentam *Salmasii* praefationem de homonymis plantarum, Specimen magni operis de plantis, cui Typographus aut in Belgio nostro, aut in Britannia quaeritur: quod sine copia characterum tam Arabicorum, quam Hebraicorum opus ipsum in lucem proferri vix possit. *Thevenotum* in Hollandiam profectum, ut edendam illic curet Geographiam Arabicam *Abulfedae* cum versione Latina, uti ex *Graevio* quoque jam cognoveram. *Fabrium* cogitare de Scaligerianis recensendis, libello haud magni pretii, idque inter turbas domesticas super filia illi exortas, quae bibliopolae Salmurienfi nupta res suas habere sibi a marito sit iussa. Accepisse se inscriptiones *Falconerii* athleticas, quas & ad nos deferri quamprimum velim; Praeterea *Redii*, Medici Florentini, de insectis librum. Agit ad haec de dialectica Ciceroniana, libro longe rarissimo, jam olim apud Polonos edita, Auctore viro quodam illustri ex Sarmatica nobilitate: quod scriptum a *Luca Holstenio* plurimum laudari meminerit, quodque optet in lucem denuo proferri. Si librum vidisti, aut exploratum habes, certiora de illo a te mihi promitto. Haec ille. Venio nunc ad tuas: Naumachica *Basilii* mittam ad *Elzevirium*, ubi tuto id licebit. Revocatur domum illustrissimus *Grotius*, ut legationem obeat Gallicanam. Is puto mense Junii profectionem adornabit, cui committetur fasciculus, si non alia erit interea temporis occasio in promptu. Ad rem navalem spectantia, de quibus egi tecum, in Silio potissimum occupantur ex membranis optimis a me recognito. Si tanti ea sunt, mittam oportuniore tempore, nunc ab ista cogitatione avocor. Nec eo loco valetudinem experior, ut intentioni ea labori respondeat. *Gronovii* nostri filius natu maximus, quid in re literaria praestiturus sit, videbimus propediem. Tuum de pingendi arte commentarium in Germania edi nesciebam, quo inexpectatus magis obveniet nobis is thesaurus. *Curioni*, viro officioso & probo, valetudinem confirmatam precor. Ego etsi missionem jam flagitavi saepenumero a proceribus nostris, tamen promoveo parum. Metuo

etiam ne revocato, quod dicebam modo, Oratore nostro, difficiliore hoc ipso experiar. *Graevius* Typographum offert *Meursianis* trium insularum antiquitatibus, quae hactenus ineditae in Regis bibliotheca Holmiae, ut scis, asservantur. Excurret ad vos proximis diebus illustrissimus regni Cancellarius, quantum audio. Poteris fortasse illi persuadere hac oblata occasione libri editionem. Nam sine procerum consensu frustra id speremus. Typographus est *Petrus Elzevirius*, qui *Ultrajecti* sedem fixit. Librum dedicabit Regi *Graevius*; Sin minus, eam ego provinciam in me recipio. Has ad Cl. *Brunnerum* tuae diligentiae commendatas volui. Vale, vir celeberrime. Exarabam Holmiae Suecorum MDCLXIX. a. d. XXI II. April. Jul.

EPISTOLA CXIX.

JOH. SCHEFFERUS

Nic. Heinso.

Holmiam.

Quae me scire voluisti ex *Bigotianis* litteris, gratissima fuere, nisi quod *Chimentellii* morte intempestiva interceptum nobis doleam plurimum, quod ad illustrandas litteras humaniores pertinebat. *Scaligeriana*, quae a *Fabro* scribis recenseri, haud intelligo. An libellus iste est, quem ante tempus exiguum ediderunt *Hagae Comitum*? Si is est, iudicium in *Fabro* requiro. Nec enim videtur is libellus sine multiplici invidia retractari posse. Dialecticam *Ciceronianam* vidi nunquam. Fuit tempore aliquammulto *Holmiae* in schola *Germanorum* Rector quidam, *Herbinius* nomine, gente *Polonus*, quocum egi pridem eo de libro. Aiebat is, satis sibi esse notum, & in *Polonia* contemni. Denique misurum mihi, ut primum ad suos revertatur. Sed ad hunc diem nihil ejus vidi. Scribam *Titio* *Dantiscum* proxime, ac explorabo rectius. Meus de *Pingendi* arte *Commentarius* vix respondebit expectationi tuae. Neque edidissim; nisi dandum aliquid omnino fuisset *Entero* Typographo, cui *Militiam Navalem* ante promiseram. *Historicum* opus, quod a me conscribi ait, necdum quidem scribi coeptum est, incipietur tamen brevi. *Chronicon* appellant *S. Olai*, quia continet praecipue res gestas *Olai*, Regis *Norvagorum*. Id opus simul prodit antiquissimas, certissimas, fideque dignissimas res populorum per *Septentrionem*, neque illo & *Sturlesonii* *Chronico* quidquam inter vetera monumenta, quod majorem mereatur laudem. Aliud nunc sub praelo est, ex *Suecico* veteri a me translatus, quod appellant vulgo *Konungastyrelse*, hoc est *Institutionem Regiam*. De quo me scripsisse pridem puto. Editur *Holmiae*, neque scio, quando poterit perducere ad finem. De *Illustriss. Cancellarii* adventu hactenus nil audio, si venerit, curabo commissum mihi negotium diligentissime. Sin minus, ipse *Holmiam* excurram, saltem ut te videam & appellem, ubi dabitur fortassis commoda occasio. Tibi valetudinem opto firmiorem, & ut votis tuis omnia respondeant. Quamquam si me respicio, malim te propius, quam longius a nobis abesse. Pro curis tuis circa meas epistolas innumeris, humanitateque

cac-

caetera plane singulari quas reddam gratias non habeo, agere tamen nullo tempore intermittam. Interca oro, ut me amare pergās, atque etiam etiamque te valere jubeo. Iterum vale. Upsaliae a. d. 3. Mai MDCLXIX. Rev. Brunnero nostro reddidi Epistolam tuam, gravissime is haecenus decubuit. Sed nunc incipit reconvallescere.

EPISTOLA CXX.

NIC. HEINSIUS

Joh. Scheffero.

Upsaliam.

Proximis diebus vergebat de novo in pejus valetudo mihi; ita factum est, ut Oratorem foederatorum Belgarum ad vos contendentem non sim comitatus, quod mihi jam pridem erat propositum, vir clarissime. Sed nec de demandata mihi a Proceribus nostris ablegationis ad Russos provincia, certi quid consilii mihi hanc ipsam ob causam capi potuit. Deprecatus quidem sum honorem onerosum adfectae valetudini, sed exploratum nondum habeo, an preces sint auditae. De dialectica Ciceroniana ad *Titium* jam scripsi. Auctorem libri nominare non potuit *Bigotius*, sed post eundem ad dignitatem Cancellarii eventum asseverat, ut de *Samoskio* suspicari possimus, cujus & de Senatu Romano commentarius circumfertur, etsi *Sigonio* a nonnullis vindicatus. Noribergam cum forte ad Cl. *Arnoldum* scribes, viro optimo in memoriam velim revoces negotium codicis membranacei Metamorphoseon Ovidianarum, quem possidet *Nicolaus Rittersbusius*, librum notae haudquaquam contemnendae, uti jam olim a *Gronovio* nostro sum edoctus. Eum *Arnoldus* ipse, qua est humanitate, utendum mihi a possessore jam olim petiit, sed senem aliquanto difficiliorem haud potuit expugnare. Si contingat *Rittersbusium* ad plures abire, quo illum aetas provecta jam vocat, codicis illius rationem ab *Arnoldo* haberi cupio, ne in manus alienas deveniat, sed meo aere, si possit fieri, mihi addicatur. De expensis securus esse per te jubeatur, cui hoc beneficium haud invitus dabit, sat scio. Et haec quidem haecenus. *Curionem* si morbus Upsaliae tenere pergit, dubito enim de re parum mihi comperta, negotium Elzevirianum, quod is a se curari in hac civitate posse spem fecerat, alteri demandabo. Opus historicum, quod dixi, parum proprie nuper sum locutus: Institutionem Regiam innuebam nuper, cui observationes tuas esse accessuras fert rumor, & a magno regni hujus Cancellario praefationem. Gothicae nescio quid antiquitatis haud dissimilis sub proelo typographico sibi esse Vissenburgi Illustrissimus *Drotzetus* nuper significabat. A *Bigotio* heri habui epistolium; sed quod rerum novarum nihil complecteretur. Socratem & Sozomenum *Valesii* quotidie exspecto. Vale, vir celeberrime. Holmiae Suecor. IV. Junii mensis Anno MDCLXIX.

EPISTOLA CXXI.

JOH. SCHEFFERUS

*Nic. Heinsio.**Holmiam.*

Magno me affecit dolore, quod de valetudinis tuae inconstantia scribis. Utinam reddatur tibi, qualem & tu desideras, & ego cum amicis omnibus ex animo precantur tibi. Nihil porro jucundius fuisset, quam si te una cum Oratore Foederati Belgii videre apud nos, proque tot tuis meritis gratum tibi animum testari potuissemus. Honoravit ipse cum conjuge filioque nos praesentia alloquioque suo, licet ignotos, &, ut suspicor, illa demum die primum auditos. Acciditque id plane inopinis nobis, qui ante habuimus praesentem in aedibus nostris, quam venturum intellexeramus. Contemplatus est nonnulla minuta, quae in Musaeo nostro servantur. Utrum inter ea fuerit, quo expectationi ejus satisfactum sit quodamtenus, ignoro. Explorabis tu occasione data, & significabis mihi. Doleo, me nil monstrassee ipsi pertinentium ad rem litterariam, eorumque, quae vel jam sub manu habeo, vel elaborata primum seruo. Sed & tempus erat vespertinum, & ipse festinabat ad alia. Quod si me resque meas notiores ei facies, plurimum tibi me devincies. Norimbergam scripsi octiduo ante, quam tuae mihi redderentur. Scribam tamen brevi denuo, uti mandata tua expediam diligentissime. Curio noster incipit ex mortuis resurgere, ac sperare meliora, imo credere, se post unam alteramve hebdomadem Holmiam iter posse facere. Itaque in id tempus differri negotium Elzevirianum fortasse nil nocuerit. Quid autem *Elzevirius*? me quidem totum tradidit oblivioni. Neque scio, quid cum Militia mea meditetur. Forte aliud consilium cepit, de quo utinam per te possem certior fieri. Quem Illustriss. *Drotzet* is curat excudi librum, *Sturlesonius* est, nuper mihi nominatus, linguaque Danica primum editus in Dania a *Wormio*. De *Meursii* opusculis ineditis egi diebus hisce cum Nob. Dn. *Grypenhielmio*. Pollicetur is suam operam, neque putat rem difficultatem habituram. Ajunt, huc venturum Illustriss. Cancellarium, quocum pariter agam eo nomine, si occasio idonea se offeret. Plura non succurrunt hac vice. Quare claudio, teque plurimum valere jubeo. Upsaliae a. d. 11. Junii. *MDCLXIX*. Nob. *Bigotium* ex me salutabis, cum scribes, orabisque, ut significet, an libellos meos acceperit.

EPISTOLA CXXII.

NIC. HEINSIUS

*Joh. Scheffero.**Upsaliam.*

Habui proximis diebus epistolium a *Gronovio* nostro, ubi inter caetera, *Hamplissimo & optimo Scheffero plurimam salutem, cui etiam, quod debeo exsol-*
vam

eam quamprimum. Taciti sui sub praelo typographico defudantis mentionem, quod mireris, nullam omnino fecit. Observationes suas ad Naturalem Plinii historiam jam typis esse descriptas docet, nec proflare tamen venales, dum contextus ipsius Plinii a typographo absolvatur. In Plinii junioris epistolas etiam nescio quid bibliopolae promulgandum tradidisse, praeter secundas in Plautum curas. Se quoque ab Amstelaedamensibus invitatum, ad profitendas publice humaniores literas, sed vergente jam aetate in senectam deterritum, commendatione sua *Marco Meibomio* adfuisse, qui eam spartam jam adornandam suscepit. Haec fere ille. *Bigotius* ultimis suis significabat proditurum esse Lute-tiae propediem operum B. Maximi Collectionem Graecolatinam, nescio quo adornante, tribus voluminibus distinctam. *Elzevirium* ex Galliis reversum adhortari non desino, ut manum militiae navali admoveat quamprimum, promissi atque fidei obligatae reus. Monui & *Gronovium* hodie, ut cessantem interpelllet nonnunquam, & a nimia procrastinatione ad officium revocare nitatur. Quantum video id agit *Elzevirius*, ut Spanhemianum commentarium publico permittat, priusquam tuis lucubrationibus edendis sese accingat, etsi alia quaevis sperare nos jusserit. Mittebat proxime Socratis & Sozomeni historiam Ecclesiasticam Valesianae editionis, cum codice membranaceo Maronis ex Menteliana bibliotheca deprompto, & aliis libellis, quos omnes accepi: etiam *Brummeri* commentarium ad Legem Cinciam. Venio nunc ad tuas, vir Clarissime, proximis diebus mihi traditas. Diu est, quod profectionem ad vos minatus Illustrissimus *Grotius* me comitem sibi voluit adsciscere, nuper autem me ignaro in viam se conjecit, quod sub eam tempestatem recidiva tentatus decumbebam. Is apud me multis commendavit officia tibi abs te praestita. Nunc in eo est, ut sarcinas colligat, mandato publico, in patriam prius, mox in Gallias abiturus. Sed & mihi, valetudinem quamvis adflictam caussanti, deprecantique jampridem anxie onerosam tanti honoris sarcinam, mandata publica mense proxime decurso sunt exhibita, per quae Ruthenam aulam a patriae Patribus jubeor adire, atque illic omnia tentare, ne simultates gentem illam inter & Suecos exortae in apertum Martem erumpant. Expecto quotidie nonnulla ex foederato Belgio necessaria, quibus huc perlatis in pedes me conjiciam, ut si fieri ulla diligentia possit, ante tempestatem proximam hybernā ex illo terrarum tractu emigrem. Quo magis velim *Curionem* tempestivum huc decurrere, ut cum illo coram de negotiis Elzevirianis agam. De *Meursii* postumis Illustrissimus Cancellarius optime me sperare non ita pridem jubebat. Si recordor probe, libellos tuos ad se perlatos esse jam significavit *Bigotius*. Vale, vir celeberrime, & mihi velle, ut haecenus, perge. Holmiae A. MDCCLXIX. a. d. XVI. Junii.

EPISTOLA CXXIII.

JOH. SCHEFFERUS

*Nic. Heinſio.**Holniam.*

PER aliquot hebdomadas decubui ex pedum aegritudine, & dolore capitis. Quominus vitio mihi vertes, quod tam fero tuis respondeam. Primum autem gaudeo, gratiasque tibi ago, quod Mauricium & Gellium ad Cl. *Gronovium* curare volueris. Deinde ut pro Militia navali mea sollicitus esse pergas, officiosissime te oro. Accepi hodie ab *Elzevirio* decima quarta praeteriti Novembris scriptas, in quibus conqueritur deesse sibi Typographum idoneum perficiendo operi, quem si nactus fuerit, significaturum mihi. Verum metuo, ne sint verba vacua & promissa vana. Idcirco cupio tandem certus esse de rebus meis. *Frisius*, de quo scripsi, est *Andreas Frisius*, Bibliopola Amstelodamensis, qui Magium de tintinnabulis, & Eculeo, Gallonium de cruciatis Martyrum, Pignorii Mensam Isiacam, Ciacconii triclinium, & id genus alia edidit, cuncta ad antiquitates pertinentia. Quo magis sperabam fore, ut reciperet meum quoque opus. Sed tu amplius deliberabis. Quod si certus essem, nolle *Elzevirium* promissis stare, neminemque ex vestratibus se offerre alium, Norimbergam scriberem; ut significavi nuper, atque ideo impense rogo, ut efficias quo sciam aliquando, quid cogitare debeam. Omnem spem in te unico habeo repositam, quem idcirco tanta fiducia compello, quod tu pro solita humanitate tua vitio non vertes mihi, confido. Scholiasten Athonii a quo sperare possim, non dispicio. Danis interdictum secreto est commercium litterarium cum nostris. Ideo nemo eorum meis litteris respondet, postquam apud ipsos *Christianus* Rex est factus. Ita cogor scribere quod possum, non quod volo. Reinesianas ad *Daumium* epistolas habeo ad me diebus hisce perlatas munere Cl. *And. Bosii*, qui nuper eas edidit. Scribit se habere plures alias, editurumque esse, ut primum reperiet, qui sumptus facere in editionem volet. Bibliothecam *Reinesio-Brummerianam* distrahi Lipsiae, reperto nemine, qui vel totam, vel maximam ejus partem sibi vellet emere, deploratque interitum tot bonarum observationum, marginibus librorum a *Reinesio* adscriptarum. Libros quoque Variarum Lectionum reliquos in Bibliotheca Reinesiana negat inveniri, & idcirco suspicari se, sublato furto. Sibi memorat impositum esse a superioribus, ut Historiam Ecclesiasticam componat hujus & superioris seculi, atque ita interverti propositum de edendo Josepho, quod hactenus habuerit. Plura non occurrunt, quare claudio, teque plurimum salvere ac valere jubeo. Upsaliae. a. d. 3. Januarii Anno MDCCCLXXI. quem tibi cum sequentibus quamplurimis laetum faustumque precor ex toto animo. Has ad Cl. *Gronovium* mittes, quandocunque commodum erit.

EPISTOLA CXXIV.

JOH. SCHEFFERUS

*Nic. Heinsio.**Holmiam.*

Quod jam ex *Columbo* nostro intellexeram, id ipsae tuae nunciant mihi litterae, diuturno molestissimoque pedum morbo te affligi. Quae res eo majorem mihi attulit dolorem, quod quanto morbus iste damno sit non modo corpori, quod excruciat, sed ipsi quoque animo, quem ad omnia facit tristiores, fatis superque didicerim. Quo magis Deum immortalem oro, ut restituat tibi vires, ne tot bonis carere diutius Respub. litteraria cogatur, quae ex te summo desiderio indies expectat. Pro Graevianis ad me curatis summas ago gratias, ut & iis, quae de perlatis ad Cl. *Gronovium* libris significas. De *Brummeri* fato pridem putabam constitisse tibi: nam is quidem superiori aestate aquis suffocatus est in Italia. Habui ante hoc triduum litteras a Cl. Dn. *Morhofio*, reduce in patriam ex itinere. Is te perofficiose jubet salutari. Nunciat praeterea non pauca de viris eruditis per Angliam & alia loca, inter caetera & ista, Dn. *Isaacum Vossium* ex Oda Catulliana, *Phaesus ille, quem videtis hospites*, concinnare opus de Architectura navali. *Tanaquillum Fabrum* edidisse librum, titulo nescio quo *Du Christianisme*, ob quod scriptum ab officio Professorio sit submotus. *Annam Mariam Schurmans* cujusdam *Labadiae*, hominis seditiosi & Chiliastae, partes secutam Belgio cum ipso discessisse, adque ipsam Elegiam dehortatoriam scripsisse *Constantinum Hugenum*. Quae eadem omnia mihi admodum sunt inexpectata, nec fortassis tibi alia videbuntur. De caetero narrat, *Frisium* Typographum, de quo scripsi nuper, edere Hieronymum Mercurialem de arte Gymnastica, & nescio quem alium de Pileo. Unde adhuc spes est, ipsum in se recepturum meum de militia navali commentarium, si cum ipso agatur. Quamquam cum sit mihi ignotus, ego quidem ipse facere hoc nequeam, id tantum optem, ut res meas ab *Elzevirio* possem recipere. *Curionem* nostrum, reducem a vobis ante biduum, compellavi. Petit enixe veniam omitti tecum colloqui, quod prohibuerit & negotiorum multitudo, intra biduum vel triduum absolvendorum, & valetudo minus prospera. Brevi excursum sese denuo ad vos confirmat, & acturum pluribus tecum de negotio *Elzeviriano*; chartas quoque redditurum, si sic videatur, quas habeat non hîc, sed *Holmiae*. Ego nunc *Chronicon* Episcoporum *Upsaliensium* hîc sum editurus. Res mea Vehicularia decurrit ad finem, & promittit Typographus ejus publicationem circa festum Paschatis, adeo praevertit *Elzevirium*, quod do-

1 Immo in Gallia Anno 1668. III. Decembris undis fluvii *L'Arberine* dicti abreptus & submersus. vide *Georg. Beyer* praefationem ad *Opuscula Brummeriana*, quae bono rei literariae Lipsiae Anno 1712. edidit.

doleo. *Graevio* respondebo alio tempore, nunc enim non possum. Te quoque, antequam a nobis discedas, visurus sum, si vixerò, nec me ulla impediēt difficultas, modo tempus itineris intellexero: qui & hoc & longe plura majoraque debeo tot tuis in me meaque meritis, ante omnia tam humano benignoque animo, quem ut perpetuum mihi serves talem, qualem simul profitentur litterae, etiam etiamque oro. Vale. Upsaliae 14. Februar. *CICIDCLXXI.*

EPISTOLA CXXV

JOH. SCHEFFERUS

*Nic. Heinsio.**Holmiam.*

ANte paucos dies ad me venerunt litterae Cl. *Gronovii*, nuntiāntes inter alia, quod significavi nuper, redditum ipsi esse opus meum de Militia Navali, sed quod & miror, & indignissime fero, dimidia sui parte mutilum, nec enim accepit, ut testatur ipse, nisi librum primum, & partem aliquam secundae. Caetera desiderantur omnia, ut & Basilii Naumachica, & imagines a me delineatae. Non excogitare satis possum, quid impellat *Elzevirium*, ut tam inique mecum agat. Nunquam ei meo opere molestus fui, nunquam ut id ederet, compellavi. Ipse ultro ad me scripsit, sibi que petiit. Poterat ergo bona pace mea ab initio non suscepisse hoc negotium. Sed postquam ultro suscepit, ferre utique non debeo, tam indigne me haberi, ac non tantum per biennium & amplius differri; sed & nunc ab ipso id, quod meum est, contra fidem & officium boni viri mihi negari, cum stolidā simulatione, quasi redita sint omnia. Video eum copiam exemplarium obtendere, quae adhuc ad manus habeat. sed etiam habuit jam illo tempore, cum a me exigeret secundae editionis volumen, & promitteret, se id extemplo praelo commissurum, deinde frustra est, si expectet, donec primae editionis exemplaria distrahantur, quia nemo emet, postquam publice privatimque significavi me paratam habere secundam: sed nec damnum fecit *Janssonius*, si ex 1500. exemplaribus, tot enim habuit primae, ista paucula manserint reliqua. Quare te per quicquid possum oro, ut homini improbo hanc iniquitatem monstres, & extorqueas vel ab invito, quae & missa ipsi esse redditaque nosti optime. Non in *Elzevirio* unica mea spes est reposita. Sunt in mundo Typographi, qui suam operam praestabunt mihi & in hoc & in aliis meis edendis, ringente licet *Elzevirio*. Et in hanc sententiam respondi etiam Cl. *Gronovio*, cui, oro enixe, per occasionem ne graveris mittere hanc epistolam, quam adjunxi. Aphthonium spero hac hebdomade absolutum iri. Quo facto videbo, ut ad te perferri queat. Vale, vir optime, meque, sicut soles, ama. Upsaliae a. d. 25. Martii Anno *CICIDCLXXI.*

EPISTOLA CXXVI.

NIC. HEINSIUS

Joh. Scheffero.

Upsaliam.

Isaacus Gruterus, Erasmiiano, quod apud Roterodamiōs nostros est, Gymnasio praefectus, occupatur jam pridem in colligendis *Hugonis Grotii* epistolis, ad amicos huc illuc missis, quas ille juris publici factas immense cupit. Eaque propter, quod edoctus sit, hac in civitate complurēs inter *Oxenstiernae* domus scrinia asservari, me summo opere rogavit, uti earum, quas vir summus ad illustrissimum heroem *Axelium Oxenstiernam* jam olim scripsisset, copiam sibi ac facultatem impetrarem, sin minus, harum saltem, quae arcani nihil, aut quod publice ignorari oporteat, complectantur. Tu cum contubernilibus tuis, eximio illo, inquam, adolescentum nobilissimorum pari, ni molestum est, agas, quaeso, hac de re, & *Grutero* aut gratificare in totum, si potes, aut saltem certiores nos fac, nihil esse sperandum. Alterutro enim modo fides nostra apud hominem ut amicum, sic hoc in negotio ardentiorē aliquanto, liberabitur. Porro integrum cum relinquunt mihi Proceres nostri ad se excursus, non patiar elabi temporis aestivali opportunitatem jam nunc oblatam, meque ante Nonas Junias proximas viae, uti augurari licet, committam, certe ante proximos dies festos. Tui salutandi arriperem profecto ulnis ambabus occasionem, nisi laborarem pedibus, per quos fit, ut cogitationem omnem de Upsalia vestra, deque viris illo in oppido tot praestantibus supremum forte nunc a me adeundis, cogar deponere. Cl. *Brunnerus* si Thomae Magistri schedas jam excussit Romanae editionis, eas ad me reverti ante abitum velim; tum quae apud *Curionem* deposui, Elzevirianam cum *Wenxteri* haeredibus litem concernentia nonnulla. De libri tui editione praesens cum praesentibus bibliopolis nostris agere & possum commode, & tui causa debeo; si ante discessum forte nostrum nihil responsi a *Gronovio Graevioque* aderit, quod nolim. Historiae Augustae scriptores cum *Salmasii* ac *Casauboni* commentariis eadem in Belgio nostro forma prodire, qua *Plinium*, *Polybium*, alios Graecos pariter ac Latinos auctores in lucem prolatos nuper vidimus. Pro *Aphthonio* tuo gratias ago ingentes, eumque jam libellum inter paucos seposui, ubi otium quaecunque dabitur, cum cura mihi evolvendum. Lutetiae oracula Sibyllina typis denuo describi audio, *Palmerii Grentesmenelii* heredes opus Graeciae veteris illustratae postumum & *μικραέρτα* in Hollandiam misisse, juris publici faciendum, ex *Bigotio* nuperrime sum edoctus. Et haec quidem haecenus. Tu, vir praestantissime, nos, si meremur, amare perge, & salutem cura quam diligentissime, Holmiae Suecorum CICIOCLXXI. a. d. XII. Maii.

EPISTOLA CXXVII.

JOH. SCHEFFERUS

*Nic. Heinsio.**Hagam.*

CUM, qui hanc tibi offeret, affinitatē mihi junctus (nam frater ejus gener meus est) iter ad vos susciperet, non potui, quin simul te salutarem, propter cujus absentiam hīc in solitudine versari mihi videar. Scripsi ante mensem per Dom. Baronis *Paykill* ephorum, a quo non dubito, quin meas jam acceperis. Ad eas nunc impatienter expecto responsum, & quid sperandum mihi sit de Militia Navali mea, scire vehementissime cupio. Si est nemo apud vos, cui edere eam commodum videatur, etiam atque etiam oro, ut occasione prima, qua tuto poterit, ad me remittatur. Hygini quae extant, habeo locis plusquam ducentis emendata, & parata editioni. Si vel *Gasbekii* (qui nuper edidere fabulas) vel alii volent edere, poterunt ostendere, qua occasione debeam transmittere. Quod & Cl. *Graevio* nunciabis, qui se habere scripsit ante haec, qui velit edere. Atque spero fore, ut eum impensarum haud poeniteat. De Re Vehiculari mea nihil audio, an reddita sit tibi, amicisque reliquis. Quanquam bibliopola se misisse ad vos nuntiarit. Quaeso uno verbo, an acceperitis, significare ne gravemini. Video hīc & illic esse typographi errata, dum meam scripturam parum assequitur. Vos excusabitis, qui novistis, quam sit difficile in tam longinquis oris emendate quidpiam publicare. Scripsi nuper tibi, litteras Grotianas Comitem *Axelium* in bibliotheca sua, vel alibi inter res suas necesse esse aliquas, sed Holmiam abiturus promisit se perscrutaturum omnia, & si quid invenerit, communicaturum. Viris Celeberrimis, *Gronovio* & *Graevio* salutem adscribo, si Cl. *Gronovio* Gellius meus porro est inutilis, poterit una cum Militia Navali mea ad me redire. Vale, vir summe, meque tui observatissimum amica memoria commendatum esse tibi ne gravere. Upsaliae a. d. 8. Octobr. CIOIOCLXXI.

EPISTOLA CXXVIII.

NIC. HEINSIUS

*Joh. Scheffero.**Upsaliam.*

Miraberis, sat scio, vir Clarissime, & quidem jure optimo, nil litterarum, Mex quo discessi a vobis, in manus tuas a me perlatum tibi. Ignosces tamen, nisi frustra mihi blandior, cunctationi huic meae, ubi disces, in ipso itinere graviter a valetudine me tentatum, haecenus aut lecto fere aut cubiculo haefisse adfixum, certe hac ex civitate pedem toto trimestris temporis spatio post reditum non movisse. Quibus molestiis objecto rationem reddendam fuisse proceribus nostris horum omnium, quae Moscuæ Holmiaeque proximo bien-

nio

nio a me gesta sunt in rem communem, si addam, minus succensebis credo pertinaciori silentio nostro. Quid si quod nihil litterarum ad te dandum duxi, nisi explorata penitus Bibliopolarum nostratium mente super edendis tuis eruditissimis de Militia veterum Navali commentariis. Et quia integrum mihi haudquaquam fuit per valetudinem, ut dicebam modo, pedem movere haecenus ex hac aula foederatorum, *Gronovium*, *Graevium*, *Ryckiumque*, aliosque amicos, a quibus conventus sum post reditum in patriam, non destiti impellere pro virili atque exhortari, ut operi tuo, omni diligentia, typographum mature circumspicerent. Quod se facturos promiserunt, dum me teque una ac eadem opera demereri student, ita proxime testati sunt, nihil omnibus admotis machinis profici abs se potuisse. Non jam iterabo, quod alias testatus sum abunde, quantum recordor, improbari a me vehementer factum *Elzevirii*, qui nos indignis modis sit ludificatus: cum aut promissis stare debuerit, uti virum integrae existimationis decebat, aut certe per compendia nos frustrari, omissa omni offuciarum ac procrastinationum ambage. Remisit itaque diebus proximis opus tuum ad me *Gronovius*, quod ego amico nonnemini ad te perferendum tradam ex horum numero, qui mense proximo in comitatu oratoris nostri Holmiam Suecorum iter auspicabuntur ex hac aula: qua ego occasionem magis opportunam non novi. Interim cum *Pyrrhi Ligorii* Antiquitates ineditae, xxx. voluminum opus, in bibliotheca Reginae dicantur exstare, facile puto impetrabis, uti triremium figurae ex antiquis marmoribus expressae, quae operi isti complures inferuntur, & quas eques *Puteanus* olim tuos in usus describi curarat, quaeque postea inter manus Reginae, ut nosti, periere, denuo excerpantur inde commodis tuis inserviturae. Addam & hoc, quod fortassis ignoras, clandestinae quantum audio machinae opus a *Marco Meibomio* Amsteladami adornari, & jam sub praelo esse, adversus Militiam tuam Navalem editionis primae. Nam scriptum exemplar tuum ejus oculis patuisse non opinor. Hoc mihi a *Theodoro Ryckio* jam semel iterumque est significatum. *Meibomium* ipsum Holmiae ante annos hosce vixenos novisse potuisti. Cum illo nec mihi nec amicorum meorum cuiquam usus amicitiae propior aliquanto intercedit. Sibi enim ut vixit haecenus, ita antiquum obtinere pergit. Cathedram professoriam humaniorum litterarum obtinuerat ante annum alterumque apud Amsteladamos, sed ex qua brevi post tempus sit ejectus denuo, ut nunc privatus vivat. de isto ejus instituto si certiora cognovero, horum omnium certiore te faciam quamprimum. Prodiit in eadem civitate opus alterum de re navali sermone vernaculo, molis immensae, quod *Nicolaum Witzium* Consulis Amsteladami filium auctorem praefert, vix in transcurso inspectum mihi, ut de eo sententiam ferre neutiquam possim. Commentarium tuum multa eruditione refertum, & te plane dignum, de Re Vehicularia proximis diebus munus abs te accepi, nec legi tamen, alibi occupatissimus: sed seposui, hiberna tempestate, cum bono deo, totum perlecturus attentiore cura; vehementer enim salivam mihi movere omnia, quae illic oculo festinante a me sunt delibata. Gratias interim longe maximas ago pro munificentia tua singulari, con-

stantissimoque in te mei demerendi studio. Senecas Rhetorem Philosophumque *Gronovii* nostri, ac aliorum animadversionibus illustratos, uti & Tacitum, propediem puto, certe ante Januarias Kalendas cum Suetonio *Graevii* in lucem protractos videbimus. Coepta & manus admoveri a *Plumero* editioni secundae Tragoediarum Senecae. Ex Italia habui hodie a *Carolo Dato* litteras, sed vix quicquam complectuntur rerum novarum nisi hoc, propediem prodituram esse editionem Venetiis auctiorem Historiae naturalis *Ferrantis Imperati*: quam superiori seculo Neapoli vulgatam puto me in scriniis bibliothecae possidere. Narrat *Bigotius*, Lutetiae absolutam esse a patre *Cossartio* novam Conciliorum Generalium editionem, eundemque jam cogitare de animadversis suis in Themistii orationes pertexendis, quae auctiores quam haecenus circumferuntur ab illo in lucem protractae, nescio qua de causa, inter typographi manus annis compluribus haerere pergunt. Patres Benedictinos magno studio pervetustos codices conquirere operum B. Augustini, quibus diligenter ad vulgatos libros excussis scriptorem illum emendatissimum luce publica donent. Pari studio certari in operibus B. Gregorii Magni castigandis, quorum tomus primus typis jam sit descriptus. Edi etiam Marii Mercatoris adversus Julianum opus ut pereruditum, sic haecenus ineditum. *Elzevirius* propediem dabit Celsissimi Principis *Ferdinandi Furstenbergii* Monumenta Paderbornensia, post ejusdem principis poemata juris publici nuper facta. Aphthonius tuus *Gronovio Graevioque* per me jampridem traditus est. Vale, vir Celeberrime, & amicos communes, ni molestum est, verbis meis officiose saluta: tum quid Upsalienses vestri moliantur doce. Hagae Comitum MDCLXXI. xxx. Octob. Prodiit Thesaurus Numismatum veterum *Caroli Patini* nuper admodum, praeter alterum ejusdem opus majoris rei de eodem argumento.

EPISTOLA CXXIX.

N. I. C. HEINSIUS

*Joh. Scheffero.**Upsaliam.*

PRidie Kalendas Novembres, datis ad te litteris significavi, vir Clarissime, rerum mearum statum, nec mihi integrum haecenus fuisse per valetudinem antiquum obtinentem, aut Amstelaedamum aut ad alias in vicinia civitates excurrere: ut nec editio Militiae Navalis, cui consultum unice volebam, promoveri per me potuerit, nec alia curari, quae agenda mihi incumbabant. Praeter *Gronovium Graeviumque Theodorus* tamen *Ryckius* operam suam mihi quoque approbavit, tentatis variis typographis, si manum operi admovere vellent. Quapropter cum haberem compertum actum a nobis agi, cepi concilium de volumine isto tibi restituendo, quod amicus meus *Johannes Wilhelmus van Kellere*n cum Oratore nostro *Harenio* iter ad Suecos sese moliturum esse subindicasset, quam opportunitatem curandi ad te voluminis non negligendam rebar. Detinetur tamen etiamnum hic terrarum ille, profecto jam in Sep-

Septentrionem *Harenio*, ut liber quodque nondum viae commissus sit: de quo plura proxime. De Antagonista tuo nihil postea intellexi; est enim totus clancularius, & qui in suis occulendis mira polleat industria. Epistolam tuam valedictoriam Comiti *Oxenstiernae* scriptam multa cum voluptate multoque cum fructu, ut tua soleo, jam legi; tum sua *Gronovio Graevioque* exemplaria mit-tenda curavi. Ajunt alium te auctore libellum prodiisse nuper apud nos, de me-morabilibus Regum Suecorum; sed quem videre haecenus non est datum. *Gro-novii* nostri valetudo non est eo loco, quo vellem; reliquias morbi diuturni haudquaquam potest profligare. Adhaeret tumor pedum immodicus, & sto-machus infirmus, unde ab aqua intercuti periculum incumbit. Accessit & quartana nuper, ingrata hospes, nec facile emigratura ex ea sede, hac praefertim tempestate. De re litteraria, quod significare possim, nihil nunc est in promptu. Doleo non potuisse me abiturum a vobis valedicere praestantissi-mis collegis tuis, atque in his clarissimo *Brannero*: hujus etiam suavissimis va-ledictoriis litteris quod nil rescripserim; talibi immanc quantum occupatus, graviter sane irascor mihimet ipsi, alia occasione culpam apud illum deprecaturus: nunc salveat cum aliis amicis. Vale. Hagae Comitum a. d. xv. Nov. CXCICLXXI.

EPISTOLA CXXX.

JOH. SCHEFFERUS

*Nic. Heinsio.**Hagam.*

Q Uas exiguo intervallo nuper abs te accepi binas, plurimum mihi attulisse gaudii, credas velim, vir Nobilissime. Praeterquam enim quod te sal-vum ad tuos nunciarent pervenisse, certum quoque me fecerunt de amore tuo erga me argumentis pluribus. Inter quae non postremum, quod tanta cura & sollicitudine non per te solummodo, sed & alios amicos tuos studueris Militiae Navali meae quaerere typographum. Quo nomine plurimum me tibi devin-ctum esse libentissime agnosco. Et quia intelligo vestris hominibus laborem meum displicere (quod *Elzevirius* quidem jam ante biennium indicare potuif-fet, si in eo fidei ac humanitatis quidquam fuisset) quanto ocyus MS. ad me remitti volo. *Meibomii* consilia miror prorsus, quem neque verbo neque facto laesi unquam, ac ne aliter quidem quam de nomine habui cognitum. Quam autem humaniter civiliterque agit, qui sibi sumit disputandum adversus librum, in quo ipse jam ostendi plurima mihi displicere? Sed videbo tamen, quae sit allaturus, & num mera editurus sit oracula. Ac fortasse factus est Apollo, post-quam telonia exercere in Dania desiit. Tu quaeso fac me certiozem, utrum illud scriptum ejus contra me unicum sit directum, num vero ex occasione aliorum mea suggillare instituerit. Optarem plane, si fieri posset, specimen aliquod videre. Ac fortassis per ignotum impetrari poterit a Typographo tan-tum charta aliqua rejicula, in qua operarum errores solent notari. Cupio pro-

profecto valde videre, quia utatur modestia, ut intelligam in tempore, quali cum adversario res mihi sit futura. Quare te oro, quantum possum, ut sis mihi adjumento in his omnibus. Interea in Lapponicis meis occupatus sum, quae hac hyeme absolvere studebo, si vitam Deus dederit. Hyginum credo me emissurum Hamburgi, ut & Phaedri tertiam editionem, quam a me exigat typographus. Libellus meus exemplorum gentis Suecicae tibi traditus jam esse debet, in eo etiam etiamque oro, ut excuses nimis multos crassosque errores. Ut statim ab initio pro *publicare* fecerunt *publicari*, pro *commemorare* *commemorationem*. pag. 33. etiam post *caeteris universis* verba omiserunt quaedam, quod & alibi est factum. pag. 121. pro *calceisque* ediderunt *calcibusque* & id genus alia, ut errores in nominibus propriis omittam. Promisit equidem typographus, se in calce adjecturum errores, nam libellus ipse ante paucas hebdomadas demum mihi visus est. Et spero ego brevi me altera vice editurum auctiorem & correctiorem. Morbis tot affligi optimum *Gronovium*, cum moerore magno & dolore audio. Deus eum litteris servet incolumem adhuc longo tempore. Literas ab ipso nullas habui nuper. Si Gellius meus MS. ei amplius usui non est, optarem, ut cum idoneo homine remitteretur. Plura non habeo hac vice. Cl. *Brunnerus* officiosissime te resalutat. Si ex me *Gronovium Graeviumque*, viros optimos, peramanter & officiose salutabis, rem facies gratissimam. Vale. Upsaliae a. d. 15. Decemb. *MDCLXXI*.

EPISTOLA CXXXI.

NIC. HEINSIUS

*Joh. Scheffero.**Upsaliam.*

Tertium nunc scribo reversus in patriam, vir celeberrime atque eruditissime: etsi vix habeo, quod prioribus duabus superaddam, per quas significavi, opus de Militia veterum Navali tuum a *Gronovio* nostro penes me depositum esse, cum typographus illi frustra quaesitus esset, post *Elzevirii* haudquam approbatas nobis tergiversationes. Decretum erat mihi primo per Oratorem nostrum *Harenium* illud ad te curare perferendum, vel per amicum saltem, in *Harenii* comitatu ad vos excursurum, ne quid in tumultuario negotiorum aulicorum turbine liber fortassis aberraret, aut tardius ad te curaretur. Sed amicus ille, de quo spes erat facta, & *Harenium* elabi passus est, & subsequutus illum postea, ambiguum reliquit nobis, terrane an maritimo itinere in Sueciam esset excursurus. Sarcinas saltem suas committendas mari fore cum asseveraret, quo expeditiorem se viae praeberet, non ausus sum, fateor, hac anni tempestate thesaurum tantum elemento longe infidissimo permittere, nisi tu juberet. Exspecto igitur mandata tua, ne temeritatis meae atque inconsultae festinationis des poenas, & tecum res universa literaria, si quid ego ausim praeter voluntatem atque imperium, sine certissimo successu. Interea servabitur apud me Militia tua Navalis in duos distincta tomos, una cum *Basilii* *Nau-*
machi-

machicis ac figuris, quas secundae editioni accessuras adornasti: nihil enim harum, quantum licetprehendere, inter *Elzevirii* manus subductum est nobis. *Meibomii* de triremibus scriptum etsi in lucem emissum, quantum audio, oculis tamen haecenus non usurpavi. Vivit is vir sibimet ipsi tantum, alieni consilii negligens; quare metuo, ne, quia in te praesertim hanc fabam cussisse dicitur, immodestius aliquanto se gesserit in vellicando tuo opere. Etsi ne hoc quidem ex rumore publico mihi est compertum. Propriis impensis hanc lucubrationem misit in publicum: typographum & is frustra quaesivisset: si ante abitum Oratoris nostri haec commentatio fuisset facta juris publici, misissem utique jam eam ad te, cum dubitandum non sit, quin ejus perlegendi desiderio tenearis. *Gronovius* noster post morbum diuturnum, quem nosti, languere pergit, & quartana interdum tentatur. Accedit & tumor pedum immodicus, qui ne hydropem praesagiat, subverendum videtur. Revocavit igitur ab omni studiorum contentione tempestivam manum, etiam a Tacito, jam ad finem perducto propemodum. Tu, si quid ad me voles, ad *Danielem Elzevirium* Amstelaedamum tuas perferri cura; nisi meliorem viam ipse novisti. Ad illum enim dirigunt suas amici Galli Italique, quas mihi traditas volunt. Nam ego in hac civitate sedem haudquaquam stabilem haecenus sum nactus. Possunt tamen & Holmiam ad aedes meas deferri, aut tradi *Henrico Cletschero*, qui res foederatorum Belgarum me absente nunc illic agit. Vale, vir summe, & ni molestum est, collegis tuis Soceroque, viris Clarissimis, salutem a me dicito. Hagae Comitum a. d. xxv. Decemb. cioroclxxi.

EPISTOLA CXXXII.

JOH. SCHEFFERUS

*Nic. Heinsio.**Hagam.*

Duas a me accepisse debes epistolas, unam pridem, alteram ante paucos dies scriptam, qua utrique tuae acceptissimae jucundissimaeque respondi. Supervenit nunc tua tertia, quae me docet de Militia Navali mea adhuc apud te haerente. Quae quum mitti non potuerit per amicum occasione Legati vestri huc in itinere constituti, recte feceris, si servaveris, donec alia dabitur occasio, quam putabo tutam, quaecunque tandem tibi probabitur, cujus curam in his & sollicitudinem jam pridem habeo perspectissimam. *Meibomii* de triremibus, praesertim ea parte, qua in me invehitur, videre cupio impatienter. Quare nihil mihi unquam gratius praestiteris, quam si miseris citissime. Quod si mitti liber ipse tam cito non poterit, fac quaeso etiam atque etiam, ut habitum ipsius cognoscam, & ea praecipue intelligam, quae in meis vellicat. Cupio & illud scire, densus ne sit, item utrum novam foveat sententiam de ordinibus remorum, & num triremium occasione scripserit de omni genere navium. Haec & his similia ut significes mihi, primo quoque tempore, rogo impensissime, ut deliberare possim, utrum respondere ipsi debeam, an

Tom. V.

S

cani-

caninos latratus negligere. *Gronovii* viii summi afflictissima valetudo magnum mihi metum incutit amittendi ejus, a quo ingentia adhuc in rem litterariam beneficia debent expectari. Deus omen avertat, reddatque nobis eum, saluumque servet longo tempore. Quod si tamen ei quid humanitus eveniet, quod nolo, ne omittas quaeso dare operam, quo *Gellius MS.* meus recte mihi remittatur. De meis rebus scripsi nuper, neque habeo nunc alia, nisi quod invenerim diebus hisce scriptorem *Succum MS. Israelis Erlandi* nomine, qui vitam *S. Erii Regis* & miracula composuit ante annos circiter trecentos, nemini adhuc notum. *Chronicon Archiepiscoporum* sub praelo, per ignaviam incuriosissimi *Curionis*, contabescit, atque perit, antequam in lucem veniat. Is *Curio* postquam satis noti in aula *Ambrosii*, Linguae Italicae Magistri, viduam duxit uxorem, adeo a se ipso degeneravit, ut in *Curione* nil sit reliquum, praeter vestes obsoletas & vocabulum. Vale, annumque hunc cum subsequen-
tibus plurimis laetus salvusque in multiplicia rei litterariae commoda amicorum-
que gaudia tranfige. Resalutant te officiose omnes, quos per me saluari voluisti.
Upsaliae a. d. 2. Januarii Anno MDCLXXII.

EPISTOLA CXXXIII.

NIC. HEINSIUS

Job. Scheffero.

Upsaliam.

Quartum nunc, quantum licet meminisse, vir celeberrime, ad te scribo, ex quo pedem retuli ad meos, super commentario tuo de Militia veterum Navali mirum anxius in modum. Amicus ille, cui eum consignare ad vos profectionem meditati destinaram primo, nondum, quod sciam, Holmiam pervenit, expilatis partem maximam in via sarcinis, aliisque molestiis non paucis objectus; ut nondum poeniteat, ejus opera in perferendis ad te scriniis tuis me non fuisse usum. Iis interim quid factum cupias aveo vehementer doceri. Cum & ego sub aestatem proximam domo sim excursurus, ac crediturus valetudinem thermis Aquensibus, si per apparatus bellicos vicinorum, qui nos atrociter premunt, id licebit; ac praeterea vix sit sperandum, ut librarii nostrates opus illud publici juris faciendum in se recipiant. Si per continuam pedum debilitatem ac dejectas vires non prohiberer haecenus omni excursu in vicinas civitates, jam ego typographos tentassem ipse super hoc negotio, quod nunc alienae curae parum feliciter committendum fuit. Meibomianum de triremium apud antiquos fabrica opusculum vidi: te ex professo, quod tamen significatum erat, non invadit. Sed judicium fert de curis tuis istius argumenti prioribus, posteriores enim non vidit, egregie iniquum. Cui tamen si ve petulantiae, si ve malignitati minus, sat scio, succensebis, quando deprehendes, *Casaubonum*, aliosque praecipui nominis in literas viros, nihil benignius illic haberi. Vix dederam ad te postremas meas, cum mihi significatum est *Gronovium* nostrum diu valetudine tentatum pessime adfecta hydropicaque in

ex-

extremis esse. Desiderabat ille alloquium meum non leviter. Nec potui tamen morienti adesse ob causas fonticas, quas paullo ante exponebam. Rogavi tamen *Theodorum Rykium*, Juvenem egregium, ut meis vicibus apud praeceptorem suum fungeretur, in cujus complexibus ὁ πᾶνν expiravit, incredibili meo cum dolore, qui amicum intimum & in paucissimis carum amisi. Illustrissimus comes *Oxensternius* nobis nunc adest; a quo conventus sum semel. Si daretur mihi in publicum frequentius prodire, quotidianus lateri ejus adhaererem. Vale, vir eximie, properabam. Hagae Comitum Anno MDCLXXII. VI. Febr. Gregor. Petronii fragmentum Tragurianum attentius legebam, nuper ac relegebam. Observabam & nonnulla post accuratissimas tuas in id annotationes. Jam certo sum persuasus esse Arbitri hunc genuinum foetum: ut qui contra senserint hactenus, nihil sentire mihi videantur. Iterum Vale.

P.S. His jam obsignatis epistolium Amstelodamo ad me perfertur a *Frederico Scantzio* exaratum, qui significabat binas se abs te literas habere mihi tradendas. Ejus rei volebam nescius ne esses. Vale.

EPISTOLA CXXXIV.

NIC. HEINSIUS

Joh. Scheffero.

Upsaliam.

ANte octiduum, vir Clarissime, agebam tecum per literas, adhuc incertus, an ex trinis meis ullas acceperis. Postea tres simul a te accepi opera *Scantzii* affinis tui, quibus nunc respondebo. *Marci Meibomii* de te invadendo consilium improbo vehementer; sed quod perexiguus mihi cum illo sit necessitudinis usus, ad saniora revocare qui possim hominem non video. Excussus fortunis apud Amstelaedamios quodammodo, quos inter literas profitebatur humaniores, nec causam sat scio, nunc sibi privatim vivit, familia numerosa, ut ajunt, oppressus. Operi suo de fabrica triremium antiquarum cum typographum non inveniret, suis impensis librum describi curavit, cujus ipse ego exemplar nullum hactenus sum nactus, nisi quod *Graevius Ryckiusque* mihi aliud agenti exhibuerunt. Sunt enim nunc alia, quae me occupent ac morentur. Est autem, ut prae se fert auctor, haec lucubratio pro specimine habenda commentarii majoris. Certe plura ejusdem argumenti promittit. Te in eo non quidem sibi vellicandum proponit magis, quam *Scaligerum, Casaubonum, Palmerium*, aliosque summates in re literaria viros, qui de re navicularia, aut in transcurso, aut ex professo egerunt: sed fert de curis tuis prioribus iudicium malignum satis, ut ex schedio cognosces. Rogavi hodie per literas *Scantzium*, ut si quem nosset ad vos propediem Amstelaedamo discessurum, ei consignaret voluminis istius exemplar, quod ab *Elzevirio* rationibus meis adscribendum auferre possit. Jussusque est opera eadem *Elzevirius* id tradere postulanti *Scantzio*. Casaubonianam Polybii versionem verbis aliquanto procacioribus idem hoc in opere *Meibomius* proscindit passim, cum & ipse tamen erroribus suis

obnoxium sese praebeat non uno in loco. Quale illud, quod in Virgilio lib. v. 663. castigandum censet, *factas abiecte puppes*, pro *pictis puppibus*: non recorder ad pictos in puppibus deos tutelares esse referendum hunc locum. Sunt tamen erudita nonnulla in hoc commentario. Quapropter vellem alienos, si qui sunt, errores aliquanto modestius refellendos sibi proponeret. Et haec quidem haecenus. Libellum tuum exemplorum Suecicorum non vidi. Mentionem ejus apud me ante hos tres quatuorve menses, tanquam prostantis apud bibliopolas, fecit is idem, qui primas abs te mihi tulit literas. Distracto bibliopolio Janssoniano ante biennium, inventa sunt illic exemplaria nonnulla ac publice inter bibliopolas divendita Militiae tuae Navalis. Ea res sufflamina- vit, credo, impetum *Elzevirii* ac aliorum, ne commendantibus nobis editionem secundam, merito quantumvis, manum darent. Hygini fabulas dictus est *Gaesbecius* fratribus obtulisse nescio quis ex Italia literarum humaniorum professor, qui ex vetusto codice eas castigarit, suppleveritque locis non paucis. An rumori isti credendum haut scio. Sed percontabor amicos Leideneses. Sua- deo interim, ne quid moreris propositum tuum de iisdem fabulis edendis. Phae- drum quoque tuum editionis tertiae videre gestio. Nescio quis in Holsatia eum edidisse cum variis hominum eruditorum observationibus nuper scribatur. In fabula de rustico & porcello nondum me poenitet conjecturae. Ubi *verrem* & *verri*, pro *verum* & *vero* bis reponendum esse censebam jam olim. Ex Italia libri navigant complures ad me missi, qui proximis annis illic prodierunt in lucem. Quos inter opera *Latini Latini* 2. vol. in 4^{to}. Marmora erudita equitis *Ursati*, Pars secunda gemmarum *Antonii Augustini*, Pars itidem secunda Pachy- meriae historiae Constantinopolitanae in folio. Nili epistolae in fol. Parieti- nae sive inscriptiones antiquae S. Paulli in fol. Roma antiqua *Nardini*, Inscrip- tiones Athleticae *Falconerii*, Martyrologium antiquum *Florentini*. *Donius* de restituendo agro Romano: aliique complures. Auctor is de rebus gestis S. Eri- ci Regis non pauca haud dubie complectitur curiosis oculis haudquaquam indigna. *Gronovium* cum dies xxviii. Decembris mensis abstulerit nobis, in- credibili meo cum dolore, monebo liberos, ut Gellius tuus restituatur tibi. Perduxerat amicus noster castigationes ad scriptorem illum suas in librum duo- decimum, ni fallor. Reliqua abruptit intempestivum fatum. Prodibunt tamen illa, credo, in lucem cum aliis non paucis adhuc edendis. Bibliothecam suam vetuit divendi, quae inter filios duos proinde dividetur. Commentarii tui de Archiepiscopis Upsaliensibus vicem doleo. Nuper dum evolvo forte Petri Ab- batis Cellensis epistolas, Lutetiae ante annos plus minus sexagenos editas, vidi illic mentionem fieri *Archiepiscopi Upsaliensis*. Ad quem ibi exhibentur pa- pae Alexandri iiii. litterae, etsi Archiepiscopus illic non nominatur. Fit & mentio Falconis Esthonum Episcopi: fit & *Suetiae* & *Sueonum Regis*. Scribit idem Alexander illic ad *Lingacopenses*, ad Episcopum *Stranensem*, *Stravengarenssem*, *Trundensem*. Si librum non vidisti, excerpam inde quae res Suecicas tangunt, aut librum ipsum a me accipies utendum. Vixit autem *Petrus Cellensis* sub A- lexandro papa jam dicto. In eo jam eram, ut hasce opera tumultuaria exaratas ob-

obsignarem, cum me compellat *Berkelius*, is ipse nimirum, qui Stephanum Byzantinum apud *Gaesbekios* edendum curat, qui de Italo Hygini fabulas promittente rem mihi confirmavit, oblitus tamen nominis. Viros clarissimos, Socerum & reliquos collegas jubeo plurimum salvere. Vale, vir eximie, & summae festinationi ignosce. Hagae Comitum Anno MDCCCLXXII. XII. Fab. Gregor.

P. S. Rogo, vir Clarissime, significes terra an mari Militiam Navalem ad te reverti desideres. Mari post mensem alterumque deesse nobis occasio haudquaquam poterit, sed cum vicini nobis bellum parare dicuntur primo vere, quod omen deus avertat, nihil te inconsulto tentare certum est; ne, si quid praeclaris istis vigiliis sequius obtingat, ego me culpa oneratum agnoscam. Vale.

EPISTOLA CXXXV.

JOH. SCHEFFERUS

Nic. Heinsio.

Hagam.

Quas per *Schantzium* ad me dedisti, recte mihi redditae sunt. Plerisque, quae in iis desiderabas scire, jam respondi ante octiduum, quod responsum meum dedi Dn. *David Strang*, mercatori Amstelodamensi ad te curandum. Spero te jam accepisse illud. Pro studio, quod adhibuisti in comparando mihi libro *Meibomii*, gratias ago maximas. Pecuniam pro eo numerandam reddam libentissime, si cui reddi velis *Holmiae* significaveris. Judicium, quod de Militia Navali mea fert *Meibomius*, magnopere non curo, nec enim vel judex ipse atque censor publicus est constitutus, nec ab unius judicio, omnium vero minime *Meibomii*, nostra stare cadereve spero. Si de triremium structura nihil habet solidius, quam quod in notis ad *Vitruvium* protulit, monstrabo, vanas ejus esse conjecturas, quae cum ipsa rei pugnent veritate. Sed mihi expectandum est, donec librum ipsum videro, quem impatienter expecto. *Elzevirium* a publicatione secunda mei operis deterritum per auctionem *Jansonianae* Bibliothecae non existimo. Emit ultro, meque ignaro figuras omnes, & exemplaria editionis prioris, & post decimum editionem secundam a me petiit, tanquam ad quam factus sit paratior per ea, quae sibi ex praedicta auctione comparavit. Magis igitur credo a *Meibomio* hoc ortum, qui nimirum *Elzevirio* persuasit, sese editurum opus, quo mea tantum non omnia revellentur. Utinam autem his negotiis nunquam se immiscuisset *Elzevirius*, nec emisset sibi supra dictas figuras; jam pridem editam Militiam Navalem meam haberem, ex secundis curis. Mea in *Hyginum* vel ideo arbitror nec dum publicanda, quo videre prius possem, quae Italia submittit nobis. Oro autem, ut me certum facias, an jam praelo sint subjecta. Librum Exemplorum gentis *Suecicae* redditum tibi confirmavit mihi pridem *Gothofredus Schultzius*, bibliopola *Hamburgensis*, suspicorque ipsum haerere apud haeredes *Jansonii*, *Waesbergium* & caeteros, quibus-

buscum crebra ei negotia intercedunt. Scribam illi proxima occasione, atque ubi culpa haec resideat explorabo. Phaedrum pridem transmissi Hamburgum. Quod in fabula Rustici & Porcelli, doctissime mones, potuisssem indicare, si de ea prius scivisssem sententiam tuam, nunc alii servandum est occasione. Ago interim pro ea gratias, quas debeo, maximas. Auctor vitae S. Eriici non habet quidem multa singularia, sed quia tamen monumentum quoddam est antiquitatis, nostrique talium penuria laborant, ideo non puto negligendum. In Chronico Episcoporum nihil hactenus est actum. Si Petri illius Abbatis loca videre possem, forsitan me juvarent. Nunc ille mihi non est conspectus, ac ne in Bibliothecis quidem nostris habetur. Gellium cum caeteris meis recuperare cupio, vel per mare transmissa, si itinera terrestria minus futura sunt secura. Facies tamen, quod tibi optimum videbitur. Casus fortuitos praestare nemo tenetur, omnium minime tu, qui tot beneficiis me totum habes pridem in aere tuo. De Re Vehicularia mea quae sint aliorum judicia, nondum perscripsisti. Multa ibi, praesertim libro secundo, edita esse vitiose doleo. Sed quid faciam in hoc terrae angulo constitutus? Finio, teque ab amicis omnibus officiosissime resaluto. Vale. Deus te servet, viresque corporis restituat tibi. Vale. Upsaliae a. d. 2. Martii CIOIOCLXXII.

EPISTOLA CXXXVI.

NIC. HEINSIUS

Job. Scheffero.

Upsaliam.

HOC ipso temporis momento perferuntur ad me tuae longe acceptissimae Hillae profecto, quas *Fredericus Scantzius* ad curam suam pertinere voluit. Nam quae per *Davidem Strangium* nescio quem ante curatas oportuisse scribis, eas nullas accepi hactenus, nec commentarium exempla gentis *Succicae* complexum. Scribo hodie de hac & illa re ad ipsum *Scantzium*. Interim narro, accepisse me hesterno die epistolium a *Graevio* nostro, quo nuntietur, egisse sese cum *Waesbergio* bibliopola Amstelaedamensi de edenda Militiae tuae Navalibus lucubratione, nec illum abnuisse, si persuaderi possit *Elzevirius*, ut salubri pretio tabulas qua ligneas, qua aeneas, ad opus illud jam olim pertinentes, sibi divendat. Id autem cum se promiserit facturum *Elzevirius* jampridem mihi, si alius bibliopola sese operi in lucem proferendi accingeret; non potest salva amicitia nostra deesse hic nobis. Si procedet id negotium stante pollicitis *Waesbergio*, nec perducere *Elzevirius* poterit tamen ad tabulas, quas dixi, alteri isti communicandas, ipse Amstelaedamum me conferam, etsi debilis, ac infirmus, ut ad aequa is perpellatur. Quod nunc monendum duxi, ne tu commentarium istum alteri fortassis typographo addicas, dum certiora omnia de *Waesbergio* nobis sint explorata. Egeram & ego cum bibliopola nuper in hoc oppido (extra quod pedem hactenus non protuli) de editione ejusdem operis. & jam ille persuasus videbatur, haec ut ageret: sed re communicata cum patre suo

fuio apud Roterdamos aetatem agente (is est *Leerfius*) resiliit a proposito, & spes nostras abruptit. Vel eo magis hanc rem ad curas revocandam mihi censeo, quod collisis nunc cum Britannica iterum gente foederatis Belgis, nihil literariae adhuc supellectilis mari concredendum posthac tuto videatur. Minimum certe absuit diebus proximo decursis, quin magnam copiam codicum bonorum, quos amici Itali Roma Florentiaque ad me mittebant, fuerim perditurus. Evasis tamen navis, quae thesaurum hunc ferebat nobis, salva, & effugit felicissimum in modum hostiles assultus. Aderat mihi die hesterno ex Gronovianis liberis filius natu minor, cui aurem de Gellio tuo vellebam. Testatus est is, sese jam fratremque ab alio nescio quo eadem super re tuo compellatos nomine, ac sibi curae fore, ut liber is ad te revertatur. Ceterum cum parens morte praeventus Observationes suas in Gellium non absolverit, *Jacobum* fratrem id agere, ut pertexat hanc telam marte proprio: qui & post Gallicam peregrinationem Macrobius illustravit. Hygini fabulas ex Italia qui pollicetur est *Mutius Barettus* Placentinus, homo mihi ignotissimus. Jam consului amicos Florentinos de hoc novo scriptore, si quid polliceri de illo nobis debeamus, quod vix opinor. Nec opinor *Gaesbekios* fratres de edendo codice oblato fidem haecenus suam obligasse. Quapropter te nolim frivolas has ob causas a proposito deterri. Abbatis Cellensis Petri, si quod exemplar aliunde erui poterit, id tibi vindicabo: sin minus, curabo ex meo codice excerpanda in tuos usus, quae ad Suecas antiquitates illic videbuntur pertinere. Commentarium tuum de Re Vehiculari meritos tulisse applausus non est quod dubites. Cum ejus evolvendi desiderio se teneri testaretur *Bigotius*, redemptum a Bibliopolis exemplar ad illum perferendum curavi. Ego illi perlegendo me totum accingere nondum potui, curis domesticis immane quantum districtus: quibus tamen ut expediar, fiet propediem. In re literaria apud nos frigent omnia, & frigeunt porro, quantum licet conjectura assequi, incumbente nobis bello gravissimo. Amicos Upsalienses jubeo salvere. Vale, vir celeberrime. Exarabam Hagae Comitum, Anno MDCLXXII. IX. Kalend. April.

EPISTOLA CXXXVIII.

NIC. HEINSIUS

Joh. Scheffero.

Upsaliam.

Nillas tuarum in via perisse opinor, praeter illas, quas *Elzevirio* te misisse scribis: nam neque illae comparent haecenus, & negat ipse *Elzevirius* quicquam abs te aut ab aliis ex Succia nuper ad se perlatum, vir Clarissime. Quas *Strangio* commiseras, eae etsi tardius aliquanto, recte nihilominus sunt curatae. Proximis meis significabam spem nobis esse factam a *Graevio* de Typographo nescio quo, qui Militiam tuam Navalem publico tradendam in se recepisset. Sed dum & cunctetur *Graevius* rem extra dubium ponere, & tu post edi-

editum Meibomianum argumenti ejusdem commentarium malis, ut credo, lucubrationes istas de novo percensere, oblatae a *Strangio* libri ad te perferendi occasione deesse nolui. Misi itaque ad *Fridericum Scantzium* ante hosce XIV. dies schedas omnes ad rem navalem pertinentes cum Basilii Naumachicis, ut eas aut ipse, aut *Strangii* opera usus, Holmiam mittendas curaret; cui nautae eas tradiderit, propediem ex me cognosces. Si interim constare sibi pergit de opere edendo Typographus ille, de quo mecum egit per litteras noster *Graevius*, ejus rei mature te admonebo, ut, si conditionem non averaris, liber ad nos redire possit, te volente: ut dubitem tamen de oblatis bibliopolae faciunt bella atrocissima, quae nobis terra marique ingruunt ab hostibus potentissimis, & quae promovendis artium bonarum studiis haudquaquam favebunt. Eorum virus noxium jam nunc experimur, dum nec Tacitus *Gronovii*, nec *Schultingii* Seneca, aut Suetonius *Graevii*, quos prodiisse jam dudum in lucem oportuit, publico haecenus donentur. Lucubrationibus tuis de Re Navali addita sunt a me tria exemplaria Monumentorum Paderbornensium, totidemque Poëmatum Illustrium VII. virorum, quae divisa inter te velim, magnumque Regni Sueciae Cancellarium, ac virum Amplissimum *Edmundum Grypenhielmium*. Scripti & hujus & illius auctor est in potissimis Celsissimus *Princeps Paderbornensis*, qui voluminis utriusque ex typographia Elzeviriana nuper in lucem prolati exemplaria complura ad me pervenire voluit, cum viris eruditis ac dignitate praecipuis communicanda. Voluit idem Princeps, ut in monumentis Paderbornensibus nomine Typographi praefarer nonnulla, ad operis commendationem ratus ea factura, ubi cum non pauca dicantur de eximiis virtutibus nostri Principis, eaque satis magnifica, persuasum tamen habeas volo, vero majora haudquaquam a me dicta. Vides, vir Clarissime, de alieno liberalem me esse factum, quando de meo vix possim. Virgilium ex recensione nostra jam minimum abest, quin absolverit *Elzevirius*; qui tamen vix tanti est, ut ad te perferatur, quod annotationes nullae accedant. Coeptus & edi Valerius Flaccus, sed operis adeo cessantibus, ut vix semestri tempore ad librum tertium ejus auctoris a Typographo sit perventum. Et haec quidem haecenus. *Jacobus Gronovius* ante perfectionem Hispanicam monitus a me, ut codicem Gellianum restituendum tibi curaret, id jam factum abs se respondet, librumque traditum Professori Juris nescio cui Upsalienti, qui de eo repetendo rem abs te in mandatis habuisset. Meibomiana ad te perlata jam pridem oportuit, quando ejusce curam rei in se suscepit *Schantzius*, qui & ipse ad me perscripsit consultum abs se *Waesbergium* bibliopolam, ecquid exemplorum gentis Suecicae libellum mihi tradendum penes se haberet; negavit se habere. Quid Upsalienses vestri moliantur, quid tu mediteris, cupio vehementer doceri. Vale, vir eximie, & mihi velle, ut haecenus, perge. Hagae Comitum XX. Maii. MDCCCLXXII. Haec jam exararam, cum me compellat *Fridericus Schantzius*, ac docet, de litteris ad *Elzevirium* abs te missis errorem esse: eas enim litteras sibi fuisse concreditas abs te, quae *Elzevirio* ad me mittendae traderentur, & abs se recte ad me missas fuisse. Commentarium de Militia Navali tuum cum libris adjunctis jam navigare.

fuisse

fuisse enim conjectum in navem, cui Calmariae nomen, ac destinatum Holmiam ad affinem tuum *Brobergium*. Hoc volebam nescius ne esses. Iterum vale, vir celeberrime.

EPISTOLA CXL.

JOH. SCHEFFERUS

*Nic. Heinsio.**Hagam.*

JAM pridem binis tuis ultimis respondisse debueram. Sed impediverunt me morbi, qui me toto hoc vexarunt anno, & adhuc vexare non desinunt. Deinde status rerum vestrorum turbulentissimus, ob quem nesciebam, an possem scribere, & per quem litteras ad te curarem. Nam & *Schantzius* noster a vobis discesserat, de quo ad hunc diem ignoramus, quo venerit, & incidisse in latrones, ac ab eis vita spoliatum esse metuimus. Nunc quia Dn. *Strang* spem fecit fore, ut si litteras ad ipsum darem, ad te sint perventurae, scribo ac significo, recte mihi esse reddita non modo Meibomianum opusculum de fabrica triremium, sed & caetera, quae huc misisti, cum Militia Navali mea. Pro quibus omnibus summas tibi ago gratias, & ut Celsiss. Auctori meo nomine submisisse, observanterque agas, diligentissime rogo. Acceperunt statim & Illustriss. Cancellarius, & Gen. Dn. *Grypenhielm* sua exemplaria, quod fortassis jam significarunt tibi. Meibomianum inventum, totum quantum, nullum est, nec ei firmando ullus facit locus veterum ab ipso adductus, quod tibi suo tempore faciam planissimum. Frustra itaque se jactat tam arroganter homo vanissimus, & doctis omnibus tam inciviler insultat. Ego haec aestate nihil propemodum egi. Et dissuaserunt medici, ut incumberem libris, si vellem denuo reconvalescere, quibus vel propter uxorem liberosque meos est parendum. Prodiit tamen Hamburgi, ut significavit nuper typographus, epistola Cl. *Bocharti* a me versa in Latinum ex Gallico, de Aenea nunquam in Italiam profecto. Ibi denique sub praelo est Phaedri nostri tertia editio. Hyginus etiam eo mittetur proxime. Quem si tuo nomini inscripsero, ex officio facturum me meo scio, utrum vero gratum tibi sit futurum, ignoro, utque in tempore me doceas, oro. Lapponia pervenit ad finem. Desiderantur picturae ac imagines, quas cum commodum est, delineo. Militia Navalis mea forte typographum inveniet Francofurti, nec dum tamen satis certus sum de ea re. Gellium meum MS. Holmiam allatum esse his diebus audio. De aliis meis non habeo, quod nuntiem: Socer meus absolvit versionem Latinam Codicis legum Suecicarum. *Magnus Celsius*, Matheseos Professor, Chronologiam infallibilem *Christ. Ravii* refutavit, disputatione publica non ita pridem habita apud nos. Quae res *Ravium* tanto dolore dicitur affecisse, ut Academiae huic vale dixerit, & nunc factus sit Professor Francofurti ad Oderam. Plura non succurrunt. At res vestrae plurimum mihi afferunt moeroris, cum praesertim scire nequeam, quomodo

Tom. V.

T

se

se habeant amici communes, deque te ipso, forteque tua plane sine incertus. Scribe igitur, si potes, & me libera hoc metu, simul fac, ut intelligam, quo pacto vivat optimus *Graevius*, multum enim vereor, ne in summo discrimine versetur. Deus vos omnesque nos respiciat, & totius universi turbatores aliquando castiget. Quo in voto desino, atque ut me porro amare pergas, etiam etiamque te oro. Vale. Upsalae a. d. 20. August. CIOIOCLXXII.

EPISTOLA CXLI.

NIC. HEINSIUS

*Joh. Scheffero.**Upsaliam.*

Quanta calamitati Foederatorum Belgarum populus hoc anno sit objectus, vir celeberrime, nil necesse est, ut operosum in modum enarrem tibi: cum ex fama publica non possis non habere mala nostra perspectissima. Ego, etsi valetudini obnoxius, ex quo in patriam reversus sum, obsecutus tamen auctoritati ac mandato Principis in Germaniam me contuli, ubi tertium jam mensem haereo, ad meos, uti spes est, propediem rediturus, quando copiosius de studiis communibus tecum agam. Tu vicissim si alloquiis tuis longe acceptissimis subinde me beaveris, non parum equidem sum debiturus tibi. Omnium tutissimum fore opinor, si tuas *Elzevirio* bibliopolae tradendas cures Amstelaedami. Ante meam ex patria profectionem egi cum typographo Amstelaedamensi de Militiae tuae Navalis editione altera in publicum proferenda: quod monitus essem a *Graevio* nostro, inventum sibi, qui conditionem libri in lucem emittendi non detrectaret. Et sane paratum is sese mihi professus est ad suscipiendam hanc provinciam, modo pacatiora tempora adfulgeant. Existimo autem multo fore consultius ejus opera ut utaris, quam typographi apud Germanos cujuscumque; qui figuras operi inferendas ab *Elzevirio* tam facile haud quaquam impetrabit. Tu tamen, vir Clarissime, facies, quod e re tua videbitur. Ostendebat idem Typographus mihi Meursianas, quas nosti, trium insularum antiquitates, jam magna ex parte typis suis descriptas. Haerere tamen opus asseverabat ob inopiam chartae. Augurari licet pacem speratam huic quoque malo remedium mox esse allaturam. Phaedrum tuum editionis tertiae videre vehementer desidero. Uti & Hyginum, cui quod me patronum circumspicis, honorem maximum ulnis ambabus amplector. Pluribus agam tecum redditus mihi ac meis: nam hîc militares inter strepitus nunc vivo, qui me totum obtundunt. Officinas librarias hac in civitate vix obiter inspexi, ubi se mihi obtulerunt Valerius Maximus & Sulpicius Severus *Joannis Vorstii* notis non ineruditis illustrati. Et has mei juris ante discessum faciam, & si quid praeterea melioris notae librorum occurrit. Vale, vir celeberrime, & valetudinem, si me amas, cura quam diligentissime. Francofurti ad Moenum. XVII. Octob. Gregor. CIOIOCLXXII.

EPI-

EPISTOLAE CXLII.

JOH. SCHEFFERUS

Nic. Heinsio.

Hagam.

ANTE biduum ad me sunt allatae tuae, Hagae Comitibus hoc ipso mense scriptae, quae me multo affecerunt gaudio. Primum, quod te saluum ac incolumem in hoc periculorum pleno tempore ad tuos nuntiarent reversum. Deinde, quod ostenderent, manere eundem tuum tamen erga me animum, qui fuit longo tempore, memoriamque mei non intervalla locorum, non silentii diuturnitatem posse obliterare. Fateor equidem, me debuisse pridem respondisse tuis, saltem iis, quas ad me scripsisti Francofurti. Nam quas ex aula Paderana dedisse ais, ad me haecenus non sunt perlatae. Verum quia sentiebam, nusquam certo loco te subsistere, praeterea itinera militibus infesta nuntiabantur, malui expectare, donec tutior mittendi litteras occasio se praeberet. Equidem ne nunc quidem ita omnia composita, ut optant, quotquot belli mala mecum vel experti sunt, vel sciunt aestimare: spero tamen litteraria commercia paullo tutius & certius a nobis posse coli in posterum, quam huc usque factum. Itaque ad utraque illas tuas nunc respondeo: primum quod Militiam Navalem meam attingit, nihil quidem ea nunc festinat; nec tamen expectare vestros Typographos posse videtur in hac temporum difficultate. Phaedrum esse publicatum scio ex bibliopola Hamburgensi, nam huc usque ipsum nondum contigit videre. Scripsi ei pridem, ut ad *Elzevirium* curaret exemplum tibi mittendum. Et fortasse jam ad te perlatum est, non enim credo neglecturum, quod tam sancte promissit. De Hygino nihil plane mihi nunciatum est, nisi quod excudendi ejus initium fit faciendum circa medium aestatis hujus. Si jam factum est, ipfas meas spes typographus anticipavit. Anonymum, qui argumenta fabularum Ovidianarum concinnavit, adjicere non proposui. Quod si ejus lectiones varias communicare mihi haud gravaberis, forsitan invitabunt me ad eum una cum fabulis Fulgentii emittendum, quarum varias lectiones spero me a *Gudio* impetraturum. Epistolam, sub nomine *Constantini Opelii*, a me contra fabricam Meibomianam esse scriptam tibi soli confiteor. Nolo enim mihi esse quid negotii cum homine maledicentissimo & audacissimo. Quod jactabat, refelli haud magno negotio se posse, quae in ea scripta sunt, credo facile, si respicio illius animum. Quid enim putet se non posse, qui ex quovis quidvis audet fabricare? Caeterum an doctis suam sit approbaturus sententiam, dubito admodum, cum non conjecturis mea, ut ipsius, & violentis explicationibus, sed argumentis evidentibus, aperto verborum sensu, & conspiratione veterum monumentorum sint subnixa. Tu firmabis me in hac sententia, vel ostendes contrarium, si epistolam ipsam haud gravabere, vitiosissime quidem, ut Hamburgi, editam, sed cui subungi errata curavi, postquam pars exemplarium jam esset me invito inscioque distracta. Cujus exemplum ad te curabo perferri ope-

ra bibliopolae Hamburgensis, ut primum litteras ad eum dandi occasio praebetur. Ego haecenus & per biennium fere aegrotavi, neque spem recipiendae pristinae valetudinis habeo magnam, adeo a scorbuto corpus totum occupatum est. Non ita igitur potui expedire destinata, ut volebam. Chronicon Archiepiscoporum Upsaliensium brevi perducetur ad finem, post ingentes moras, quas iniecit nescio quibus causis typographus. Lapponia mea Francofurtum est missa initio hujus anni, quanquam ad hunc diem ignorem, utrum eo perlata sit, cum a bibliopola nullas adhuc viderim litteras. Orationem, quam publico nomine habui coram Rege, cum primum ad imperium propriis curis tractandum accessisset, quia sic volebant, typographo describendam dedi. Mitterem exemplum ejus, si scirem, qua ratione tuto possem. Nunc recolo, quae annis plusculis occasione lectionum publicarum in diversos notavi scriptores, non unius generis omnia, quoniam nec auditores semper iidem fuere. Videbunt fortasse lucem sub titulo Lectionum Academicarum: Dices, quando tandem finis erit nugarum? Itaque claudio, ut tamen prius te rogem plurimum, ne graveris significare, quid *Graevius* noster vivat, & has litteras mittere ad *Jacobum Gronovium*, ubicunque fuerit. Nam respondeo epistolae ipsius scriptae ante annum, sed nunc demum mihi redditae, ut nesciam, quo loco nunc versetur. Vale. Upsaliae a. d. 13. Maii MDCLXXIII.

EPISTOLA CXLIII.

JOH. SCHEFFERUS

*Nic. Heinsio.**Hagam.*

ACcepi tuas, superiori mense scriptas, e quibus video, ne inter has quidem bellorum turbas Cl. *Graevium* intermittere curas promovendae rei litterariae. Quod quidem admodum mihi est jucundum cognitu, optoque ad nos perferri, quae ab ipso eduntur. *Cuperum* Daventriae humaniores profiteri litteras, nunc demum disco ex tuis. Placet mihi vehementer ejus in edendo Luciano propositum. Desiderat enim is scriptor, ut cum cura edatur, quam adhibiturum debitam virum egregie doctum confido. Quae in Italia nuntias esse publicata, sunt haud dubie utilissima, sed eorum videndorum copiam nos habituros unquam, ne speramus quidem, in hoc turbulentissimo rerum omnium statu. Neque enim pacis ulla cogitatio apud quenquam, dum alii pro libertate, alii pro dominatione tentant ultima. Deus miseriam tot millium respiciat. Mitto tibi hic Chronicon Archiepiscoporum, una cum oratione mea, & epistola de triremibus, de quibus omnibus proxime judicium tuum & eruditorum aliorum apud vos expecto. Phaedrum scripsit typographus Hamburgensis pridem ad te missum, neque dubito quin *Waasbergius* interea tibi reddiderit. Stierrhielmianae in Ulphilam curae sunt tumultuariae, nec a nostris magni fiunt, praesertim Theologis, qui multa desiderant in ipsius praefatione. Atque poterant profecto multa aliter scribi. Sed nimirum, sicut ipse nosti,
fuit

fuit ingenium ejus laboris impatiens & calidum. Dico, fuit, quia rebus humanis pridem vale dixit. In Gothicis & Suecicis antiquitatibus nihil nuper publicatum. Chronicon magnum Rhythmicum sub praelo est. Socer meus meditatur novam suae historiae editionem, postquam Codicem legum Suecicarum vertit in Latinum, atque publicavit. Ego fortasse in lucem dabo quendam *Israelem Erlandi*, nec dum editum, qui scripsit vitam S. Erici Regis Sueciae, cum miraculis ejusdem. Nunc Lectiones meas Academicas retracto, quae continebunt notas in Auctores aliquot Graecos Latinosque. Hyginus nec dum est sub praelo. Lapponia spectat finem, videbitque lucem proximis Nundinis Francofurtensibus. Si quae habes in Julium Obsequentem, ea ut communices mihi, etiam etiamque rogo. Plura non occurrunt hac vice, nisi quod te salutare velim Cl. *Graevium*, & si quos potes alios ex communibus amicis in hac bellorum incertitudine. Deus vos fervet, pacemque vobis ac otium restituat. Vale. Upsaliae 14. Julii MDCLXXIII.

EPISTOLA CXLIV.

JOH. SCHEFFERUS

*Nic. Heinsio.**Hagam.*

Puribus tuis una vice tandem respondendum. Fecissem olim, nisi me adversa valetudo jam inde a festo Michaelis anni proxime praeterlapsi, ad haec tempora prostratum tenuisset in lecto. Itaque pro bonitate tua & humanitate tarditati meae ignosces. Primum autem ago tibi gratias pro inscriptione Dalmatica, in qua video nonnulla notabilia, de quibus alia occasione. Phaedrum & Chronicon Archiepiscoporum Upsaliensium recte tibi tradita, laetor. Orationem quoque meam, etsi festinanter, neque compte satis scriptam, haud displicuisse, gaudeo plurimum. Interea & Lapponiam meam accepisse debes, si modo fidem & promissa servavit Bibliopola Francofurtensis. Sed ea quidem tam est edita vitiose, ut illius pudeat poeniteatque. Mitto hinc errata nonnulla, si forte tuo exemplari non adjuncta sunt. Nonnulla dico, nam omnia enotare non potui. Et scio, festinanter relegenti ne observata quidem aliqua, quale illud pag. 200. vers. 14. ubi *pendens semper supra*. & pag. 223. vers. 3. ubi, *de Abeno*, quod scribendum. Est qui eam transfert in sermonem Germanicum, ut audio, brevique parat edere. Ego quoque eam dabo non emendatiorem modo, sed & auctiorem, ut primum haec editio fuerit distracta. Hyginus nunc sub praelo est, & promittit typographus publicationem ejus circa festum Paschatis. Nunc in peculiari opere de insignibus priscis regni Sueciae sum occupatus, demandata mihi a S. Regia Maj. ea cura. Quo efficitur, ut alia, quae parabam absolvere, tantisper differre necesse habeam. Apud nos nil editur, quod sit pretii alicujus, cum idoneos non habeamus typographos, & si quid editur, id manet intra fines hujus Regni. Lectiones meae Academicae, & Libri de Militia Navali adhuc circumspectant opem alienam. Pro emendatio-

dationibus in Obsequentem summas ago gratias. Si quas cum libris vetustis editis aut ineditis collationes procurare mihi posses, faceres rem admodum acceptam. Sumam enim eum in manus, ut primum data fuerit occasio. Dum publice Justinum explico, video me posse post omnes alios ad eum conferre nonnulla, forsitan non prorsus contemnenda. Specimen accipies alio tempore. Nunc enim mittere non licet. Quid de *Graevii* Cicerone expectare debeamus, quaeso significa. Saltem nunc, quam anno praecedenti, spero meliora, postquam ad priorem sortem Ultrajectini pervenerè. Si occasio dabitur, saluta eum perofficiosissime meo nomine, ac amicitiae veteris memoriam non penitus ex animo delere jube. Vale, vir Nobilissime, ac ut soles, me amare perge. Upsaliae 6. Januarii Anno *MDCLXXIV*. quem annum tibi cum multis sequentibus in commodum rei litterariae prosperum & laetum adprecor. Resalutant te quoque amici omnes, quos per me salutari voluisti. Iterum, iterumque vale.

P. S. Mitto hinc simul litteras generi mei, Poëseos in hac Academia Professoris, quem favori tuo, quantum possum, commendo, & intelliges ipse pluribus in posterum, nisi eum repudias, quantopere te colat atque veneretur.

EPISTOLA CXLV.

JOH. SCHEFFERUS

*Nic. Heinso.**Hagam.*

Scripsi tibi 6. Januarii, raritatemque mearum excusavi per morbum, qui me fatigavit inde ab autumno anni praeteriti, ac ne nunc quidem plane cessat. Significavi quoque alia, quae tum occurrebant. Nunc ex tuis in Februario scriptis intelligo, non esse traditas tibi eas litteras, quod miror, cum commiserim Holmiae cuidam, qui se fide optima spondebat ad te curaturum. Spero tamen ad te perlatas, postquam ultimas ad me misisti. Quod cupio, vel propter errata, quae ad te misi, commissa in Lapponia mea, foeda & multiplicia, singulis etiam occurrentia paginis. Confido enim illam tibi redditam interea a Bibliopola. Sic certe mandavi, & ipse promisit pluribus. Quam nescio quae apud id genus hominum sit negligentia, quod video ex *Schultzii* exemplo, qui nunc demum mittit libellum Memorabilium gentis Suecicae, quem jam ante annum debebas accepisse. Sed tamen & ipsos forte impedit interdum calamitas temporum, cui remedium speramus indies plenum a pace, quam cum Anglis cives tui sancivere. Atque utinam nos omnino bonitas caelestis respiciat, commodisque pacis mala tot tantaque bellorum permutet. Litem, quae te haecenus a litteratis curis abstraxit, esse finitam tandem in tuum commodum, laetor gratulorque tibi ex animo, eo magis, quia spero, posthac abs te iri compensatum, quod ipsius causa ab initio intermissum est. *Jacobum Gronovium* patria deserta consedisse in Italia, miror. Velim scire, num paternas amicitias oblivioni tradere incipiat, num tecum quoque eas colere pergat. Scripsi ei olim, uti scis, sed responsi tuli nihil. De me, quae

quae nuntiem, non habeo; morbi enim non ineptum magis me faciunt ad studia, quam pigrum. Vix a me obtineo, ut scribam epistolam amicis, adeo non possum operis litterati quid absolvere. Hyginum tamen proxime accipies, inscriptum tuo nomini, ut promisi ego, & tu indulxisti mihi. Ad Justinum quoque pergo annotare quaedam atque Obsequentem. De quo proinde rogabo, quod petii antea, ut si quid lectionis variae vel habes ipse, vel aliunde potes habere, id communicare mihi ne graveris. Cogitavi quoque aliqua ad Marcianum. Verum defunt mihi subsidia, quae quomodo impetrare valeam non video, cum praesertim ne vulgati quidem libri ad nos perferantur. Et fortassis frustra festino, cum iis etiam, quae jam ante confecta habeo pluscula, praesertim lectionibus Academicis, id est observationibus in scriptores plusculos, & Militiae Navali nostrae, Typographi defint. Resalutant te officiosissime, quotquot per me voluisti salutari. Ego quoque te salvere jubeo, & valere diutissime. Upsaliae. xvi. Martii. MDCLXXIV.

EPISTOLA CXLVI.

NIC. HEINSIUS

*Joh. Scheffero.**Upsaliam.*

PAUCOS ante dies perlata est ad me Epistola tua, vir Celeberrime, diu multumque in ipso itinere cunctata; cui unde procrastinationis tantum sit objectum, equidem divinare non possum. Maluisssem quippe tempestivius aliquanto traditam mihi, ut de restituta tibi in melius valetudine, quae unice me habebat anxium ac suppensum animi, certiora edocerer. Pro libris compluribus per te missis mihi gratias jam egi, agoque, quantas possum. Lapponiam exhibuit mihi *Graevius* noster, a nobili Sueco nescio quo ex Ubiis ad se perlatam nuper. Aliud ejus commentarii exemplar mihi haecenus videre non contigit. Infesso enim per hostem non unum Rheno vix datur merci librariae tutus ad nos transitus. Miserat quidem mense praeterito ex suis nonneminem *Elzevirius* Francofurtum, qui nundinis Paschalibus proximis interesset. Verum is, luctatus aliquamdiu in Frisia provincia cum maximis itinerum difficultatibus, paucos ante dies ad herum, irritus propositi, est reversus. Ipse *Graevius* & salvere plurimum per litteras te jubet, & testatur praeterea perferendum ad te Suetonii sui exemplar Baronem *Flamingium* in se recepisse. Spem ad haec facit, mox fore, ut literis suis te conveniat. Ego & ante menses hosce duos litterarum ad te nonnihil dedi, & nuper alias tradidi *Laurentio Magalotto*, viro elegantissimo, & nobilitatis Etruscae insigni ornamento, ad vos excursus paranti. *Waesbergio* bibliopolae, cum Amstelodami proxime adesset, visus sum intellexisse Fabulis Hygini abs te recognitis Astronomica ejusdem quoque esse accessura. Unde vix spes est, fore ut opus omne proferatur in lucem ante Kalendas Sextilis vel Septembris. Doleo propter haec bella vix rem mihi esse integram de bibliotheca ex Suecis huc transferenda, quod tamen propediem a me

me curabitur, cum feram impatientius usum librorum omnem mihi interceptum tot jam annis. Poteram alioquin suppeditasse haec Astronomica Hygini cum scriptis exemplaribus duobus aut tribus collata, quae in scriniis meis servari scio. Julii Obsequentis codices vetustos qui vidisset, neminem inveni haecenus, nec aliud exemplar opinor usquam exstitisse, praeter illud, ex quo *Aldus Manutius* suam editionem Plinianis epistolis conjunctam adornavit. De Justino edendo te cogitare lubens audio. Ediderunt illum inter caeteros, *Elias Venetus* & *Tanaquillus Faber*, sed neutra editio oculis mihi haecenus est usurpata. *Graevius* in Cicerone illustrando pergit, verum passibus omnino lentis. Ejecti quidem sunt Galli ex provincia Ultrajectina, sed ne sic quidem calamitatis bellicae sunt expertes miseri cives, degente etiamnum in vicinia hoste. Caeterum post instauratam cum Brittannis pacem meliora sperare par est. Nos quidem animis ad bellum propagandum nunc accingimur, ex quo Caesar & Hispanus partes nostras sunt amplexi. Sed jacent interim miserrimum in modum bonae artes, jacet proventus omnis bonorum codicum, cessantibus typographicis praelis, & veterno quodam oppressis. Genèrum tuum, praestantissimum virum quod mihi conciliare non es gravatus, equidem id habeo longe acceptissimum. In Italia Galliaque ex amicis meis complures amisi nuper, atque in his *Johannem Capellandum*, miri candoris magnaeque elegantiae virum. Plura debebam ejus meritissimis laudibus, sed quae per dolorem immensum premo. Vale, vir eximie, & me tuis virtutibus unice addictum perge benevolentia, ut haecenus, omni favere. Hagae Comitum. MDCLXXIV. XI. Aprilis Georg. Jam intellexeris credo *Jacobo Gronovio* in Tuscis peregrinanti delatam a Magno Duce professionem artium bonarum Pisanam.

EPISTOLA CXLVII.

NIC. HEINSIUS

*Job. Scheffero.**Upsaliam.*

VIX meas decurso proximo mense ad te dederam, Cl. *Scheffere*, cum¹ tuae Martii die XVI. exaratae comparuerunt: quas habui, ut tuas omnes, longe equidem acceptissimas. Lapponiam tuam nullus vidi haecenus, praeter id exemplar, quod *Graevius* noster exhibebat mihi non ita nuper ex Ubiis ad se, uti ferebat, perlatum. Nam quae in Bibliopoliis hîc prostitere venalia numero perpauca, quod ipsa novitate, ut sit, nec minus sui pretii & auctoris nomine litterarum studiosis plurimum se commendarent, jam distracta esse audio. Misit quidem, ut solet, *Elzevirius* ex suis nonneminem ad nundinas aestivas Francofurtum, sed is, itinerum difficultatibus objectus in Frisia, regione ut scis paludosa, pedem referre post multas molestias ad herum coactus est. Ut haecenus compertum non habeamus, si quid exquisitae frugis in re litteraria

¹ Hae quidem ad manum erant, sed quia nihil praeter ceteras novi continebant, omisi, ut saepe alias.

ria peperint nundinae. Ex superiōribus meis rescire jam potuisti bellicae tempestatis inclementia apud nos adflata omnia bonis artibus ornandis promovendisque vix locum reliquisse. nunc benignior paulatim adspirat nobis aura, annuente mirificum ac stupendum plane in modum gratia divina: quippe cum res nostrae ex improvīso ante hoc biennium sic dejectae & tantum non conclamatae haberentur, ut nullis remediis erigi atque refocillari viderentur posse, Deus tanquam e machina repentinus supervenit, omniaque in integrum restituit, paucissimis exceptis oppidis, imo vix uno alteroque, quae hostili praesidio etiamnum insidentur; reliqua, sponte, ut amissa erant, & nulla vi admota, ad veteres dominos jam rediere. Ego interim consilium cepi de privata vita amplectenda, quo & temporum iniquitas, & valetudo pertinax, & desiderium, quo flagrabam jam pridem singulare detexendi telam omnem scriniorum meorum, assidua flagitatione me compulerunt. Reliquum est, ut e privata & molestissima lite me expediam, in qua, plus quam velim, curas occupare cogor. Sed & illa jam ad finem properat, ac tranquilliores vitae decursum posthac promittit. *Abrahamus Berckelius*, qui post Antonini Liberalis Metamorphoses, observationibus suis illustratas, jam quadriennium in Stephano Byzantino edendo occupatur, significabat mihi proxime penes se extare fragmentum MSS. fabularum Hygini ejusdemque astronomicōn, sed nulla prece per moveri potuit, uti copiam ejus aut tibi faciat aut mihi, quod prae se ferat, Hyginum suis quoque curis fore exornandum. Non opinor tamen exemplum scriptum, quod ostentare dicitur, a vetustate commendationem posse multum mutuari. *Samuel Tennulius*, *Gronovii* & ἐν μνημείοις affinis, Frontini Strategemata sub praelo habet, post, uti vult credi, Valerium Maximum daturus. In Britannia Josephi, Archimedis, & Jamblichi editionem moliuntur. qua de re complura propediem ex me cognosces & certiora. Jam enim Oratores nostri, in quibus *Beuningius*, arctissima, ut scis, mihi junctus necessitudine, eo sunt perfecti, nec unum ex amicis meis in suo comitatu trahunt. *Isaacum Vossium* benigna admodum fortuna illic terrarum respexit, uti jam significasse me tibi opinor. Cum *Jacobo Gronovio* rarius litterarum commercium intercedit mihi, etsi ex Etruria ab aliis amicis, atque adeo ab ipso magno Duce, frequentes accipiam. Narrant illi, detectum nuperius antiqui operis sepulchrum in via Flaminia, tertio aut quarto ab urbe lapide, cujus inscriptionem luculentam addi & variis picturarum ornamentis conspicuam. de Marciano edendo quod cogitare te scribis, vir celeberrime, velim me doceas, ecquid Capellam Martianum designes, cujus codices pervetustos tres quatuorve scio asservari in publica Leidensium bibliotheca. Julii Obsequentis unicum fuit exemplar, ex quo *Aldus Manutius* editionem suam concinnavit. Ut frustra codices pervetustos circumspicias illius auctoris. Lectiones tuas Academicas publico commissas gestio videre. Neque enim dubitari potest, quin plurima in iis nos sis docturus, quae haecenus ignorabantur. Militiae Navali typographum inveniri apud nos posse haudquaquam diffido, simulatque Galliarum Regi cum Belgis foederatis melius convenerit. Nam reliquos hostes, in quibus regem Britannum

& duos Antistites, jam a capite nostro sumus amoliti. Sarcinas meas ac bibliothecam e Suecis devehendas, ad nos jam nunc curo. Utinam salvae ad me perferantur. Vale, vir summe, praecipuum amicorum decus. Salutat te noster *Graevius*, ego socerum tuum, generumque cum clarissimis collegis salvere plurimum jubeo. Hagae Comitum Anno MDCLXXIV. XVII. Mai. Gregor.

EPISTOLA CXLVIII.

NIC. HEINSIUS

*Job. Scheffero.**Upsaliam*

INter illas publicae rei angustias, vir celeberrime, quis foederati Belgae ob-
jecti sumus, interque praesentissimam hanc artium bonarum solitudinem,
quam bellis atrocioribus referimus acceptam, solatia certiora vix aliunde pro-
veniunt mihi, quam a tuis, omni eruditionis melle conditis alloquiis. Quo
molestius atque iniquius tuli multo jam pridem tempore nil literarum omnino
abs te in manus meas perferri: cum ego frequentes exarasse me recorder. In-
geminat curas haec sollicitudo, quam lubricus atque anceps valetudinis tuae
status nunquam non altam huic animo infigit. Sed ecce commodum, Hyginus
tuus, proximis diebus per *Waesbergium* traditus, lenivit utcumque hosce angores.
Qui quod meum fronte in ipsa nomen ostendit, ut non possum non exosculari
pulcherrimam hanc in te benignitatem, meique studium omni praedicatione
majus; ita me interpellat pudor justissimus, ac mei admonet subinde, ne pos-
sim hic quicquam meritis meis arrogare. Faxo nihilominus, si usus venerit
aliquando, ne conqueraris rem tibi fuisse cum homine tanti honoris parum in-
telligente. Ipsum praeterea Hyginum cum cura perlegendum mihi sub hyberna
tempestate proposui. Quando fortasse de locis nonnullis dubiae apud illum
sanitatis pluribus tecum sum acturus. Perlata enim jam ad nos e septentrione
vestro bibliotheca mea, ac sarcinis litterariis locum mihi solitarium circumspexi
in agro Trajectino, qui me studiis antiquis reddat, ubi primum e litibus domesti-
cis ac forensibus tricis, quae me totum haecenus, ex quo ad meos sum reversus,
obtundunt, dabitur emergere: quam felicitatem haud longe quaerendam pro-
pediem fore mihi promitto. Continget illa quoque occasione, ut spero, tuis
lucubrationibus, vir Clarissime, nonnihil iri consultum. Astronomica certe
Hygini si fabulis additurum te scivissem, poterant tibi in nonnullis prodesse
mea serinia. Nam praeter editionem ejus Regiam, Aldinam & Basiliensem
aliasque, quarum copiam tibi jam factam reor, poteram suppeditasse Venetam
Anni MDCCCLXXXII. tibi haudquaquam cognitam, tum aliud exemplar cum
scriptis codicibus duobus aut tribus a *Jano Vlitio* collatum. Quid, quod *Abra-
hamus Berckelius*, qui Antonini Liberalis metamorphoses animadversis suis illu-
stratas cum Stephani Byzantini fragmento in publicum nuper dedit, significa-
bat non ita pridem, eorundem Astronomicon exemplar scriptum se possidere,
cui

cui fabularum pars accederet. Sed cum is quôque de Hygini editione dicatur cogitare, vix video, quo successu codex hic ab illo possit sperari tuis usibus indulgendus. Quanquam proximo biennio non defore illi, quod agat, ne Hyginum typis adornare possit, sit credibile; cum defudet totus in Stephano; quem modo dicebam, Byzantino commentariis suis illustrando, cujus partem vix dimidiam toto quadriennio typographus *Gaesbekius* jam profligavit. Si cogitationes tibi sedent editionis Hyginianae secundae typis mundioribus aliquando proferendae, nam Hamburgensis illa nec emendata est satis, nec nitore lucubrationum tuarum respondet, fac quaeso id quamprimum cognoscam: sunt enim, quae sub vernam tempestatem ad te cupiam perlata; quando incumbens hybernium tempus vix permittit, ut id citius fiat. Poterimus alternis opera uti in posterum Rumphiana, in curandis hinc inde sive literis, sive fasciculis majoris rei. Hunc, inquam, *Rumphium*, qui successor mihi apud vos est datus, non gravaturum reor, quicquid id est incommodi; cum & literis humanioribus imbutus sit utcunque, ac tibi, uti ante discessum mihi significabat, velit innotescere. Cum aliis libellis, quos tibi servo, seposui etiam Rhetores antiquos Graecos editionis Aldinae, librum ut inventu perdifficilem, ita oblatum bona fortuna nuper mihi venalem, praeter id exemplar, quod a magno *Scaligero* legatum Parenti meo, penes me extat haecenus. Vale, vir summe, & mihi favere, ut facis, perge. Hagae Com. MDCCCLXXIV. xxv. Octobr.

Ad nundinas Francofurtenses proximas misit quidam e suis nonneminem *Elzevirius*, cui tamen in mandatis dare sum oblitus, ut Lapponiam tuam mihi inde adferret. Apud vos, qui alta fruimini pace, quid apparetur rei literariae, cupio doceri. Nam nos alia omnia cogitamus. *Jacobus Gronovius*, qui professionem bonarum artium Pisanam, a magno Etruriae Duce oblatam sibi, erat amplexus anno proxime decurso, nunc inde ad nos reditum parat. Socero tuo & Cl. *Brunnero* salutem dico plurimam.

EPISTOLA CXLIX.

JOH. SCHEFFERUS

*Nic. Heinsio.**Hagam.*

Quas ante menses aliquot exaravi, & per Typographum Hamburgensem Hygino praefixi litteras, una cum Hygino ipso pridem tibi redditas credo. Sic profecto credere me voluit *Gothofridus Schultz*, Bibliopola Hamburgensis, qui a se missum Hyginum semel iterumque mihi confirmavit. Quare cum ex eo tempore nullae tuae ad me sint perlatae, propemodum eam adducor in sententiam, quasi parum tibi gratum fuerit meum hoc officium. Et profecto fateor ultro, id esse tenue ac minutum: Quia tamen ex amico animo cultuque, quo te ob virtutes, eruditionemque raram prosequor plane singulari, profectum

etum esse facile agnoscis, spero non tam operis exilitatem, quam amicae voluntatis magnitudinem respiciendo, excusaturum quod culpari posse alias videbitur. Post Hyginum publicavi nuper etiam *Israelem Erlandi* de vita & Miraculis S. Erici Regis Sueciae, quem mitterem, si occasio daretur, non quod magni sit momenti, sed ne quid meorum quacunque de causa possis desiderare. Hamburgum per bibliopolas Holmiae in nundinis versatos misi Lectiones meas Academicas, ut ibi excudantur. Utrum recte fuerint curatae, necdum scire potui: habeo & Justinum cum Julio Obsequente praelo paratum. Ciceronis vero officia absolvere nunc studeo. Explicabuntur commentario sat amplo, qualem videtur argumenti ipsius ubertas atque dignitas postulare. At haec quidem majori contentione quaero perficere, quod vires meae morbis quotidianis sic franguntur, ut non possim vitam longiorem sperare. Quae conditio tuarum sit, scire vehementer cupio. Sperabam aliqua intellectuum per generosissimum *Magalottum*, qui superiori aetate fuit apud me, litteratque ex itinere promisit. Verum haecenus vidi nihil, & Mercator, qui negotia ipsius Holmiae curare solebat, statim post discessum ejus morte defunctus est. Quod scribo, ut silentium meum excuses viro longe humanissimo, si forte litteras ad ipsum mittes. Plura non occurrunt, nisi quod praesentem annum tibi laetum candidumque optem cum innumeris sequentibus. Vale, Upsaliae 8. Januarii MDCLXXV.

EPISTOLA CL.

NIC. HEINSIUS

*Joh. Scheffero.**Upsaliam.*

PAUCIS ante Novembres Kalendas proxime decursas diebus, epistolam ad te dedi, vir celeberrime, si recordor id probe, qua cum alia nonnulla, ut fit, complectebam, tum agebam gratias ingentes, nec tamen beneficio pares, pro Hygino tuo recens tum ad me perlato. Has litteras Holmiam pervenisse ex V. A. *Christiano Constantino Rumpfo*, foederatorum Belgarum res in aula vestra curante, sum edoctus, ad quem curatae erant, ut mirer earum tibi copiam haudquaquam fuisse factam. Amisit exinde uxorem *Rumpsius*, aliaque majoris rei sub primum adventum habuit peragenda apud vos, per quae fieri potuit, ut in literis istis ad te curandis diligentiam suam, non semel mihi exploratam, non satis probavit nobis. Quapropter proximis diebus repetendam ad te scriptiorem duxi, cum interea supervenerint tuae longe jucundissimae, hoc uno parum acceptae tamen, quod valetudinem, quam & ipse pridem experior minime secundam, nutare tibi & adfligi magis ac magis nuntiarint. Habere me, quae vere proximo ad te perlata velim, per nautas nostros, nescio quid libellorum, diu est quod significavi. Postea & Stephani Byzantini fragmentum abs sese editum *Abrahamus Berkelius* mihi tradidit, quod ad te missum cuperet. Idque regio

regio ministro *Guldenstolpio* ad vos perferendum jam tradidissē, nisi ille mihi in villa decumbenti nec opinus esset elapsus. Si quid libellorum praeterea vis conquestum tuos in usus, id quaeso quamprimum significa. Nam & ego rus propediem excurram denuo, ut ordinem bibliothecam variis in locis illic congestam, & in auctonibus librorum, quae frequenter admodum habentur apud nos, circumspiciam, si quid e re tua futurum illic occurrat. Lectiones Academicas, quarum spem facis, utinam in publicum prolatas mox videamus, cum caeteris praeclaris ingenii monumentis, quae nuperius elucubraſti. Lapponiam tuam apud bibliopolas nostros haecenus indagare non potui. Luteſtia ſcribunt, *Henricum Va'eſium* poſt tria Scriptorum eccleſiaſticorum volumina in lucem emiſſa nunc Libanii inedita complura apparare, quae Rhetoris illius tomum tertium conſtituant. Non dubito complura apud Gallos exquiſitae notae prodiſſe ſcripta proximo triennio, quo armis utrimque decertamus, ſed horum notitia ad nos vix pervenit. Nunc etiam vos videmini in partibus fore, quod avertat deus. ubi compertum habebo meos ad te perferri, plenius uberiusque de hiſce ac aliis rebus ad te perſcribam. Vale, virorum Clariffime, meque ſolito favore complecti perge. Hagae Comit. *cicidclxxv.* prid. Kal. Mart. Gregor. *Jacobus Gronovius* ex Italia nuper redux multa collegit illic e Mediceis codicibus haud contemnenda, praefertim ad Polybium, Arrianum, Dionem Coccejanum & alios. *Laurentium Magallotum* Florentiam reverſum audio: ab ipſo diu eſt quod literarum nihil accepi.

EPISTOLA CLI.

JOH. SCHEFFERUS

*Nic. Heinsio.**Hagam.*

HIS diebus tandem tres accepi tuas junctim ad me miſſas opera Nob. Domini *Rumpfii*, quamobrem mittere diſtulerit tamdiu, eo ſcribit factum, quoniam ſperavit ipſum ſe venturum huc Upſaliam, & coram eas redditurum mihi. Quod ſignifico, ut intelligas, cur ad tot tuas nullum a me haecenus acceperis reſponſum. Nolo enim negligens officii videri, praefertim tibi, cui tot tantisque nominibus ſum obſtrictus. Hyginum meum (quem inſcriptione tui nominis ornatum non diſplicuiſſe tibi gaudeo) non emendate ſatis prodiſſe fateor, aegerrimeque fero. Sed quid faciam? aut nihil publicandum mihi, aut hoc ſubeundum eſt ſatum. Ac ne errata quidem licuit apponere in fine, quum librum acceperim diu poſt ejus divulgationem, & Epistoſas meas duas, quibus quaedam conſignaveram, bibliopola conqueratur amiſſas etiam ſequenti tempore. Longe pejus prodiit Lapponia, ut ejus plane pudeat poeniteatque. Nulla pagina eſt ſine vitio multiplici, eoque ſaepe foediſſimo. Itaque & illa recudetur non modo emendatior, ut ſpero, ſed & auctior locis plurimis: quod Typographus ipſe petit, diſtractis jam exemplaribus omnibus,

licet sint Regiomonti in Borussia & Wittembergi, qui editionem primam denuo dicantur refingere. Quod si ad Hyginum mittere voles, de quibus scribis, facies rem longe mihi acceptissimam, animabisque me & ad ipsius parandam novam aliquam editionem. Cl. *Abrahamo Berckelio* velim agas gratias ingentes pro munere, quod ad me mitti per te voluit. Utinam id ad me possit pervenire cum caeteris, quae amice polliceris mihi. Omnium enim videndorum summo teneor desiderio. Sed an sperare liceat incertus sum in hac difficultate temporum, ubi terra marique cuncta bellis sunt infesta. Deus nos respiciat, & reddat pacem. Ita optamus etiam his in terris magisque serio, mihi crede, quam vos finitis persuaderi vobis. Sed ad mea revertor, quae cur festinem edere, significavi nuper. Neque causas habeo, ob quas mutem sententiam. Pergit namque valetudo adversa me urgere. Interpellant tamen subinde aliqua. Quale, quod nuper calamo festino conjicere in chartam sum coactus, de tribus aureis orbibus ante menses circiter quatuor in Scania e terra erutis, quod nunc sub praelo est, & cum *Israele Erlandi* mittetur cum prima occasio erit. Lapponiae enim expectare te editionem novam malo, quam ex lectione libri tam foede editi nauscam contrahere. Aelianum habeo tertiae editioni poene paratum. Num ad eum quoque vel ad alios scriptores Graecos Cl. *Jacobus Gronovius* ex MS. observavit quaedam, scire aveo. Gratulor ipsi reditum in Patriam felicem ex animo, & ut amare me pergat, vehementer opto. Quod occasione data significare ei haud graveris, rogo. Socer meus & Cl. *Brunnerus* officiose te resalutant. Apud nos nihil est, quod in lucem mittitur, praeter Suecica quaedam. Et est ea rerum nostrarum facies, culpa quorundam Academiae huic male cupientium, ut plerique nescio quid, certe omnia alia circumspicere nunc cogamur. Sed de hac re scribam plenius, cum finem aliquem negotii illius prospexero. Erunt pleraque inexpectata tibi penitus. Haec habeo hac vice, proxime scribam plura, cum has ad te pervenisse intellexero. Vale. Upsaliae 30. Martii CIOIOCLXXIV.

EPISTOLA CLII.

NIC. HEINSIUS

Job. Scheffero.

Upsaliam.

Significabam proxime per literas, vir clarissime, traditum esse a me *Waesbergio* bibliopolae fasciculum, qui libros complecteretur nonnullos, ad te curandos ejus opera. Illos non Hamburgum, quod polliceri videbatur, sed Holmiam recta ad institorem *Beunsum*, *Waesbergius* abs se missos nunc asseverat, nactus opportunitatem navis Anglicanae, nescio cujus, quae Amstelodamo ad vos contendebat. Ejus rei certiore te faciendum nunc duxi, adjectis, quas pollicebar nuperius, ad generum tuum literis, cui, si molestum non est, aequae ac tuo Socero aliisque viris in Academia vestra praestantibus
uti

uti me commendes unice rogatum te volo. Nos in bellica hac Charybdi aestuare modis miserrimis pergitur, nec spes adfulget fortunae melioris. Unde fit ut artium liberalium promovendarum studium omne fugiat apud nos & procul habeatur. *Thomas Munckerus* Antonini Liberalis Metamorphoses, annotatis suis illustratas, post Berkelianam curam praelo typographico submisit. *Gisbertus Cuperus* varia ingenii monumenta publico tradenda in scriniis habet parata, sed quae temporum meliorum statum praestolentur. Dissertatio tamen ejus de sigillo Harpocratis Smetiano, lucem, ut opinor, propediem videbit. *Graevius* noster valet, & in Cicerone suo pergit assiduus occupari. Valet & *Bigotius*, uti *Elzevirianae* me docent literae. Nam mihi nullum omnino per haec bella cum amicis Gallicanis est epistolae commercium. Julium tuum Obsequentem in lucem esse prolatum ferunt. Si tempestivius rescivissem hoc abs te agi, conjecturas in hunc auctorem nonnullas, magni *Scaligeri* communicasse tecum poteram, quas non ita nuper e Myliana bibliotheca sum nactus. Eam quippe auctione publica apud nos distractam suppeditasse mihi libros complures notae rarioris, nec paucos maximi illius viri manu illustratos correctosque, aut ab illo cum scriptis exemplaribus commissos, gaudeo immane quantum. Simul ac nonnihil memet expediero etricis forensibus, quod sub autumnum fiet proximum, paraturus sum excursum in Germaniam, si quid a thermis illis forte valetudini meae consulatur: nam dejectis viribus ad contubernium Musarum tot jam annos intermissum reverti vix datur. *Appelbomius*, e Suecia nuper redux, pertulit ad me eruditum sane *Johannis Stiernhookii* de Jure Sueonum vetusto commentarium. *Jacobus Grönovius* libellum emisit observationum in Historicos nonnullos Graecos. vale, vir summe & mihi studere perge. Hagae Comitum VII. Jun. Gregor. MDCLXXV.

EPISTOLA CLIII.

NIC. HEINSIUS

Joh. Scheffero.

Upsaliam.

Quia rem privatam nondum ex sententia componi datur, in hanc aulam frequentius mihi quam velim, est excurrendum e secessu agri Trajectini, vir Clarissime, ubi nuper cum forte incidissem in Julii Obsequentis exemplar, quod e magni *Scaligeri* bibliotheca ad me pervenit, manu ejusdem nonnullis locis castigatum annotatiunculis, ipsas tuos in usus inde excerptas duxi, additis & meis opera tumultuaria conjecturis, si quid eae tibi prodesse forsitan possint. Scaligeranas esse scito, quibus *Scaligeri* nomen est subjunctum, reliquas meas, quibus carere potuisses, sed expectationem tuam frustrari nolui. Percurrebam nuper, quae ad Pacatum annotasti, exquisita sane, ut tua omnia. Si novam quandoque libelli ejus editionem es moliturus, subministrari per me nonnulla poterunt, tibi haudquaquam ingrata futura, quod veteres

Panc-

Panegyricos cum vetusto codice collatos ab eodem *Scaligero* possideam. Dissertationem tuam de orbibus tribus aureis nondum accepi. Gaudeo interim libellos, quos miseram ante belli exortum, ad te perlatos esse, quibus alios sub vernam tempestatem subjungam, si per bella licebit, quae navigationem minime pacatam sperare non sinunt in posterum. *Meursianus* de trium Insularum antiquitatibus commentarius jam jam emissus est in lucem, Regi vestro dedicatus. *Antonini Liberalis* *Metamorphoses* novis animadversis illustratas propediem dabit *Thomus Munckerus*; & *Caperus Gisbertus* dissertationem suam de sigillo *Harpocratis*. In iis, quas ad Generum tuum proximo dabam, metuo, ut aberraverit manus mea, prae multa festinatione non semel, praesertim in *Valerii Flacci* loco. libri III. vers. 493. ubi scribendum reor.

Germanique manu repetiti crimine Perses

Vale, virorum praestantissime. Hagae Comitum MDCLXXV. xx. Septemb. Gregor.

EPISTOLA CLIV.

NIC. HEINSIUS

Joh. Scheffero.

Upsaliam.

NON alio magis nomine haec bella odiosa mihi sunt ac invisa, cum longe plurimis nominibus permolesta ea experior, quam quod necessitudinis alternae toto jam biennio nullus ad me fructus redundat, voluptas nulla, praeter solam recordationem, *Scheffere* clarissime. Dedi quidem litteras ad te non infrequentes, mihi & observationes in *Jul. Obsequentem Scaligeranas* & meas, datis etiam ad praestantissimum *Columbum*, generum tuum, responsoriis super non uno *Valerii Flacci* loco. Caeterum an quicquam horum ad vos perlatum sit rescire haecenus non est datum. Tuus de tribus circulis commentarius, & si quae alia misisti, ea perierunt in via, certe in manus meas haecenus non sunt perlata. Nunc *Ampl. Cuperi* litteras ad te mitto, aliasque *Joh. Boschii* cum *Petronio* ejusdem, nuper in publicum prolato. Annotatis is suis conjecturas e meis haud paucas, ut videbis, inseruit, sed mentem meam non affecutus in omnibus. Pluribus tecum agam, ubi id licebit tuto: nunc enim vix licet sperare meas ad te perventuras. Vale, & feliciter aetatem age. Hagae Comitum v. Maji MDCLXXVII. Gregor.

JOH. SCHEFFERS

1895

EPISTOLA CLVI.

NIC. HEINSIUS

*Joh. Scheffero.**Upsaliam.*

Ingentis equidem solatii loco mihi fuit, inter maximas horum temporum difficultates angustiasque, *Scheffere* clarissime, e tuis Julio mense exaratis cognoscere, non omnem mei curam tibi excidisse. Mihi quidem perpulchra cándoris eruditi imago, quam in te semper suspexi, continuo oculis obversatur. Nam quod literae nostrae hinc inde in optatas manus rarae pervenerunt, injuriae temporum adscribam, quam amoliri nostrae non sit facultatis, ac speremus in posterum meliora. Quos misisti libellos, habui equidem acceptissimos, quia abs te profectos. Sed & literas tuas *Cupero* inscriptas recte curatas esse confido, nam *Boschio* destinatas ipse ei in manum dedi. de Petronio nuperae editionis ita est, ut scribis: complura sunt in ea, quae culpari possunt. Ultimam editionem Romanam Traguriensis fragmenti fuisse exprimendam & ego monui, sed cum serum jam esset. Adolescentes nostri plerumque praepropero zelo famae cupiunt insinuari. De iis, quae ad Obsequentem miseram, videbo si reparari damnum possit, cum pacatiora adfulgebunt tempora. Interim valetudinem tuam, quae miris modis anxium me habet, abs te curari diligenter prae caeteris velim. In Saxoniam scribam proxime, si fortassis illic tuo de Militia Navali commentario typographus possit inveniri: nam apud nos haec studia jam jacent. Opinor tamen brevi fore, ut Graeciam *Palmerii* veterem, ac Holstenianas in Stephanum Byzantinum animadversiones typis descriptas videamus. Soceri tui e vivis excessum perinvitus intellexi. Vale, vir summe. Hagae xiiii. Novembr. cicioclxvii.

EPISTOLA CLVII.

JOH. SCHEFFERUS

*Nic. Heinsio.**Hagam.*

Si vales, bene est, ego continue aegroto. Nec est levis morbi vis, sed sgravissima, quae sic totum occupavit corpus, ut plerumque digitis etiam ne calamum quidem possim regere. Hinc ista tarditas in officiis praestandis, & respondendi eorum Epistolis longa & pudenda mora. Quamquam & occasiones nobis dentur rarae per has temporum calamitates, quibus maria quoque infestant latrocinia creberrima, ut aliquid ad vos queamus mittere. Vobis tamen audio nunc affulgere laetiora, constituta pace, quam vobis gratulor optoque diuturnam. Nunc significo redditum mihi Vellejum tuum, munus gratissimum, quoniam & abs te, & cura tanta est elaboratum. Placent omnia tua mirifice, adduntque novos stimulos de nonnullis cogitandi. Utinam bea-

beares nos & tuis in Petronii fragmentum: laudas eam operam non semel, nec jam negare longius erudito orbi potes. Quas hîc mitto nugas, non re-puto dignas, quae subeant oculos tuos. Mitto tamen, ne prorsus vacua nadaque sit Epistolâ. Nam Justinum meum puto tibi pridem redditum. Ita enim mihi testatus est Bibliopola Hamburgensis, qui cum suo more, id est vitiosissime, excudit. Monui hominem, antequam aggrediebatur opus, verum video me fuisse frustra. Debet nunc auctarium addere, nisi a piratis interceptum est, nam de eo nil audivi, ex quo hinc dimisi. Librum meum de priscis Regni Sueciae insignibus excidunt Holmiae, cum finitus erit, & dabitur occasio, mittetur. Expecto enim avidissime tuum aliorumque doctorum de eo iudicium. Sequetur alius de scriptis & scriptoribus Suecorum. Destinavi utrumque etiam Cl. *Cupero*, cui idcirco nunc non scribo. Faciam prolixius, cum simul mittere & illos potero. Quod velim ei significes. De *Holstenii* in Stephanumnotis dubitare incipio, postquam eas editioni novae a *Pinedo* Amstelodami publicatae video non adjectas. Quid autem de Josepho habes? perguntne eumedere, quos scripsisti. Sed cogor finem facere, unum addo, ut amicos omnes, & in his *Graevium* ex me una cum *Berckelio* perofficiose salutes. Vale, atque me amare, si merebor, perge. Upsaliae 26. Novembri. Anno CIOIOCLXVIII.

Haec ultima ad *Heinsium* fuit *Schefferi* epistola; nam anni sequentis mense Martio d. XXVI. obiit. vide *Witte* Diar. *Mollerus* vero in Hypomnematibus ad *Schefferi* Sueciam Literatam pag. 457. XXVI. Aprilis obiisse notat, sed ex Epistola *Columbi* CLXIV. mortuum VII. Kal. Aprilis esse constare poterit: Indici scriptorum, ab ipso *Scheffero* contexto, omissa quaedam opuscula addidit *Mollerus*. Subjiciemus nunc Generi ejus *Johannis Columbi*, viri itidem doctissimi, epistolas ad *Heinsium*, ejusque ad eum remissas, cujus etiam parum longaevis spes egregias, quas de ejus eruditione conceperat *Heinsius* & alii, mors immatura interceptit. utinam Valerio Flacco licuisset ipsi operam navare, de quo in his epistolis plurima profert, egregia & erudita.

EPISTOLA CLVIII.

JOH. COLUMBUS

Nic. Heinsio.

Hagam.

MAgnis & illustribus te rebus intentum, parum cultis litteris interpellare *Mausus*, haud verecunde forsitan videar egisse, *Heinsi* vere nobilissime. Sed cum dotes, quas in te admiramur omnes, quotquot eruditionis nomen veneramur magis quam assequimur, etiam a minimis se coli ferunt non moleste;

¹ Hic *Columbus*, gener *Schefferi*, fuit eruditissimus vir, & qui, nisi immatura morte A. ætatis 43. CIOIOCLXXXIV. 14. Aug. raptus fuisset, egregiis monumentis famam posteritati commendasset. vide *Schefferi* Sueciam literatam, quam post mortem Soceri curavit edendam pag. 237. & *Molleri* notas pag. 428. ubi ab eo editi & quorum spem fecerat, edendi libri recensentur.

ste, pateat, quaeso, nec mihi nullus apud incomparabilem humanitatem verinae locus; finalque in me redundare quotamcunque particulam summi favoris, quo merito dignaris Socerum meum optimum & benignissimum. Amor Musarum ingens, quo jam aliquot annos teneor, effecit, ut satis jam functo *Laur. Fornelio* Poëtices professio jussu Regis clementissimi mihi mandaretur. Vir autem ille, quem dixi, ingeniosus & eruditus, peculiari instituto pene nihil publice legit, praeter *Metamorphoses* *Ovidii*, & *Horatii* *Odas* *Satyrasque*, ut ipse vocabat, selectiores. idque alternis sic praestitit, ut annum spatium non amplius alterutri eorum scriptorum tribuerit; moxque reverteretur ad priores. Mihi eadem saepius interpretari non libet: itaque de auctore non uno cogitandum est. Praeter alios multum placere coepit *Val. Flaccus*, nisi quod exemplorum magna sit apud nos penuria. Jam cum tuo beneficio maximo, non *Ovidium* tantum, & *Claudianum*, quos mimitabili felicitate integros nobis nitidoque restituisi, sed & alios locis quamplurimis sanatos habeamus; non improbe nos orare speramus etiam *Argonauticorum* poëtas curam plenioris. Praesertim cum aliud agens velut in gustu quodam longo plura & majora nobis sis impertitus, quam alii totum se emendatum posituros professi. Atque utinam tibi & corporis vires & curae diversas permittant elegantem illam poësin refingere: aut, si hoc sperare non datur, erudito cuipiam vestrae quamprimum hoc muneris injungere. Neutrum si per hos tumultus bellicos, quibus nostro quoque cum dolore nunc strepunt recidivae illae Musarum sedes, contingere avide exoptantibus potest, ipse fortassis illi operi manum admovebo, si tuo praesertim favore studioque me fueris dignatus. Ita benignitate tua utcumque levare possem desiderium ingens editionis tuae. Atque si tam praeclare de studiis meis mereri non gravaberis, dum vivam faxo ut tanti beneficii tibi ratio constet, meamque modestiam, addo etiam pietatem, ipse laudes. Ignosce, oro quaesoque, scriptioni festinatissimae. Upsaliae a. d. vi. Januar. Anno MDCLXXIV. & vale.

EPISTOLA CLIX.

NIC. HEINSIUS

*Joh. Columbo.**Upsaliam.*

Unctae equidem humanitatis expers sum habendus jure optimo, nisi compellationem tuam tam improvisam, tamque benevolam ambabus ulnis tenerissime complectar. Plurimi jam ante faciebam *Johannem Schefferum*, Socerum tuum, virum in paucis hac tempestate de re litteraria praeclare meritum. Ita enim eruditio ejus spectatissima, ita affectus merebatur, quo me fovit ac complexus est jam pridem haud perfunctorium in modum. Nunc haereditariam quodammodo factam mihi hanc viri eximii singularem prorsus benignitatem video, & exultabundus agnosco; nec committam, ut necessitudinis hujus partibus, ad quas me peramanter invitas, vir Clarissime, videri possim unquam de-

defuisse. Ceterum de Valerio Flacco, quod mones: hunc ego poetam & legi satis diligenter olim, & animadversionibus non paucis illustratum praelo typographico describendum ante hoc biennium permisi. Sed quod & bella supervenerint funesta, & mihi non multo post in Germaniam publico nomine fuerit excurrendum; ipso interea, i.e. vivis erepto typographo, opus neglectum intermissumque supremam exspectat manum. Inter varios, quibus sum usus, poetae praestantissimi codices; incidi quoque in exemplar Holmienae bibliothecae Regiae jam olim, quantum conjectura affequebar, manu Pomponii Laeti descriptum. Accedebant illi libro & Festi Pompeji fragmenta, quae excuti diligentius fortasse mereantur, quod dicatur Laeti exemplar vulgatis codicibus Festi fuisse aliquanto integrius. Obtulerunt autem sese mihi in Vaticana libri complures ab eodem Pomponio exarati, qui huic scripturae ad amissim respondebant. Praecipuum tamen usui fuit vetustissimum exemplar Valerii, quod ex haereditate Fulvii Ursini in Vaticana asservatur bibliotheca; Baptistae Pii in commentariis laudatum non semel, sed minus diligenter adhibitum in plerisque, quam fieri debuisset. Contextus ipse a me recognitus locis plurimis jam descriptus est typis; reliquum est, ut concedatur otium pertexendis notis necessarium, quod adfuturum propediem promitto mihi. Neque tamen est, quod lucubratiunculae nostrae ab instituto te revocent deterreantve; quin polliceri ausim, utiliter omnino operam abs te collocandam fore, si isti curae te accingas quamprimum. Tam multa enim quae obscura, qua mendosa in Flacco passim occurrunt, ut unius non sit hanc hydram profligare. Obtigit Ludovico Carrioni codex praestantissimus, cujus beneficio non pauca castigavit feliciter sane; sed & conjectura nonnunquam ad partes est vocanda, quando a membranarum praesidii parum offertur: quae ratio Carrionem in plerisque est frustrata rei poeticae, quantum apparet, minus peritum. Tu igitur, vir Clarissime, pessime habito a supinis librariis scriptori succenturiare ac fer opem, quaeso, praesentissimam, certusque esto vix alibi laudabilius cogitationes tuas posse occupari. Habes Oraculum domesticum Socris tui, ad quod confugas in locis perplexis, ut haerere nusquam jam possis. Nec defuturus sum ego pro virili suppeditandis iis, quae medellam Flaeco qualemcunque possint videri allatura. Vale, & me in tuis habere perge. Hagae Comit. Anno MDCLXXIV. XLIII. April. Gregor. d. h. r. m. n. o. n. o. s. u.

EPISTOLA CLX.

JOH. COLUMBUS

Nic. Heinſio.

Hagam.

Acceptis superiore anno litteris tuis, non gaudebam tantum, sed plane exultabam; te pro caetera humanitate tua non moleste tulisse, ab ignoto tam audacter te compellatum: quin immo non gravatum esse epistola luculenta & honorifica me beare, multisque modis comem. & benignum te mihi ex-

hibuisse, pene magis etiam quam sperare ausus fueram. Equidem jam diu oportuit me gr̃atias egisse: confiteorque defuisse officio: sed & Socer meus distulit scribere, & me, praeter solitos assidue institutionis labores, hominum haud sane benevolorum incursum, lites, & alia acerba sic fatigarunt, ut emendatiunculas Val. Flacci, quas mittere destinavi, vix percensere commodum esset; animo praesertim occupato, & propemodum fracto tot molestiis. Earum aliquas nunc mitto; timide, fateor, & cunctanter: neque enim negare possum, poetam hunc nostrorum plerisque ignotum, a me quoque nimium sero visum esse. Praeterea eruditione pene nulla suffultus, ad Criticam aspirare non sum ausus. Neque tam improbae sunt spes meae, ut haec tibi placitura esse confidam: ut qui meminerim, quam rara in hoc genere sit etiam eruditissimorum felicitas: si tamen typographus notas tuas nondum ad finem usque descripsit, vel semel si merebar nominari, plurimum ubi debebo. Lib. 1. vers. 2. pro *medios cursus* legit Barthius *medio cursu*. Dubito; cum & Seneca Agamemn. vers. 430. dicat,

Aperitque cursus, mille quos puppes fecent.

Et videar apud alios similia legisse. vers. 103. *arvorum studiumque*) Mallem quidem ego, *studium atque insontis aratri*. vers. 332. *Credam nostris ingrata*.) Sensus videtur exigere *mibi grata* ob praecedens *Nec*. Scriptum forsitan fuit, *mi grata*. id alius facili lapsu mutavit in *ingrata*. vers. 523. *Videt e Graja nunc stirpe nepotes*. sic legendum esse, vincit, puto, sequens versus. vers. 631. *linquite, terrae, spem pelagi*.) Sic distinguendum, nec assecutum esse *Carrionem* verum sensum arbitrator. vers. 646. *plenasque malis clam*.) forte *vagis*. 672. *Pontus habet*) an *avet*? 721. *prole nepotes*) *Penates* rectum esse videtur. 753. *fragor per moenia differt*) Sic legendum puto cum *Laeti* libro, quem quod mihi indicaveris, gratias ago. praesertim ob Festi schedas, quas cum vulgatis diligenter conferam. vers. 758. *ri-ctumque genas*) *Suspikor, rictumque gemens* & *lumina pressit*. hoc est, aegre cedens instanti hosti, cum murmure seu gemitu rictum oculosque depresso. *Gemitum* leonibus tribuit etiam Virgilius. Aen. vii. vers. 767. *Talia per lacrimas*.) MSS. Carr. *per lacrimans*. lego, *Talia fert lacrimans*. 784. *Et cunctae primis*) Ut pro & rectius legi videtur. 815. & *heu cunctae*.) Forte, *haec cunctae*, nempe piacula. Lib. 11. vers. 58. Putabam pro, & *in uno decidit Euro*, legendum esse, & *mundo decidit auro*. & vers. 61. *non illa sequi mihi sidera constat*, pro, *monstrat*. nunc malo expectare editionem tuam. vers. 64. pro *conditur* videtur rectius legi *conditus*; nempe *nitet*. vers. 110. *plenasque* &c.) MSS. *Laeti, it barbara vestis*. Puto, *plenaque movebant Armentis*. n. r. *it barbara v*. Movebant pro movebantur. vers. 118. *placidi* mallem. & vers. 121. cum Bononiensi, *Qua datur*. vers. 168. *Eadem traditque auditque, nec ulli Vana fides*, legerem ductu codicis, quo usus Carrio. Etiam vers. 221. *Quae se aperit facies*; ut Virg. *Tantaque se facies aperit*. nisi praecessisset in Flacco vox eadem. sed pro ea forsitan *species*, legendum. vers. 253. *miser en retine*. vers. 290. *Quantas modo linquis* &c.) Omnino legendum, *Quanta modo linquis inanes Pube domos*? Vulgata inepta videntur. & *puppi* proximo vers. sequitur. 322. *Pharii se patris* &c.) Facile vidi deesse verbum: conjiciebam *Phariis narrabat*; aut *cantabat*. nunc video *Laeti* librum habere; *videbat*. 372. longe

longis coeptis & fluctibus. leg. *longis*, vel *longe*, *coeptis a fluctibus arcet.* coepti fluctus, ut, *coeptum iter, coepta terra*, de quibus me docuisti ad Ovid. Art. Aman. i. vers. 234. vers. 382. *accessimus actis*) magis convenire videtur *ausis*. vers. 400. *sceptra gerant, regant cum Carrionis libro.* Etiam sic loqui priscos, te docente alicubi, non ignoro. 435. *tenuis Lemnos*) Suspendebam, *transit Lemnos, transitque.* Nunc malo tuum iudicium expectare. vers. 525. *Occupat Alcides arcum*) forte arcu, ut Ovid. *Ratto Celer occupat ausum.* & Auctor. lib. spectac. *Occupat hanc ferro rusticus.* 527. *deferre velint*) *differre*, id est disjicere per valles. Sic Lucretius Virgilius alique, ut nosti. Lib. i i l. 343. *ille suum vultus*) praefero vultu. vers. 493. *Repetit quo crimine*) an, *repetit discrimine.* vers. 511. In hac oratiuncula liquet aliquam multa esse corrupta: sed fateor non aequè liquere, quid remedii sit adhibendum. Pro, *quae bellum res ipsa postulat*, aut *quae bellave*, i. e. quaeve bella, Aut, *quae praelia*, e cuius glossa *bella* alius forsitan fecit *bellum*. vers. 513. *pulcro ponto*) *victo ponto*, aut forsitan *pulso* melius huc facere videretur. *iussaeque dolorum* (aut *dolori*) *Primitiae, tenero superati protinus angues.* 533. *piceaeque acclivis*) *acclinis*. ut Claudianus, *Florum acclinis tumulo.* Lib. iv. 92. *jungentibus*) sic Carrio ex libro suo, quem miror non vidisse legendum *jungentibus*. vers. 268. *Projectusque*, forte, *proiectusque.* 270. *pro certantibus* dubito an reponendum sit *jaçantibus*, aut *versantibus.* 273. *Ut deinde urgentes*) Haec mendosa esse vel illud *nubibus* videtur probare. puto: *Ut dein turgentibus effugit motibus iras.* Verum *effudit* non est fortasse sollicitandum. Sic enim Virgilium locutum memini. 527. *Haesit uterque polo*) immo *solo* potius. imus aër vix dicitur *polus*. 510. *exiit aures*) Non damno illud *accidit aures*. Mihi tamen placet, *exiit auris*, ut terrificum magis & divini horroris. 715. *nec tantus quamvis*) Fateor me non videre, quae junctura sit horum cum iis, quae praecedunt, quaeque sequuntur. Quam enim vim habet hoc? vix alibi latiora sunt maria, quamvis nec tantas aquas Tyrhenum & Aegaeum habeant, & Syrtibus undae desint. Mihi videtur legendum: *nec parvas quamvis Tyrrenus & Aegon* (aut *Aegeus*) *Volvat aquas, geminis nec desint Syrtibus undae.* Sic omnia erunt plana. 728. *Scythicum specie sinuatur in arcum*) Pontus nempe. Duo sane versus, *Atque huc Europam,* cum proximo loco videntur moti. quem aptiorem viderentur habere post illum versum, *Pontus & exorta facilis concrefcere bruma.* 758. *En, ait, inviso*) *eliso*, aut *illiso* legemus potius. Sed haec quamvis pauca & exilia, metuo ne tersissimis auribus tuis nimia sunt. Etsi nondum quippiam affero ex libris reliquis; veritus ne, ut dixi, tibi sum gravis. Vix enim dubito, quin, si quid rectè contigerit mihi videre, jam occupatum a te sit. Verum, quod prius testabar, sufficit, si me dignatus fueris utcumque nominare. id quod fors ambitiose affecto: Sed oro des veniam; nec, si haec, ut subito, ita infelicitè nata sunt, omnem in posterum placendi tibi spem mihi praecidas. Plurimum reverendus Dn. Brunnerus officiosam tibi salutem dicit. Veretur, ne jam dudum malum nomen sit in rationibus tuis: sed propediem ipse significabit, quando speret se fidem tuam liberaturum. Vale, vir summe, & coeptum favorem mihi indulge. Upsaliae d. xxx. Martii. st. vet. Anno cicioclxv.

EPI-

EPISTOLA CLXI.

NIC. HEINSIUS

Joh. Columbo.

Upsaliam.

AD Valerium Flaccum abs te observata feliciter, quae mittebas nuperius complura, vir Clarissime; ea quae habuerim longe acceptissima, non est quod dubites. Quamquam enim me circumstant hinc inde per molestias tricarum forensium occupationes, ab amoenitate rei Musicae, ut scis, alienae prorsus, non ita tamen ejuravi elegantiam ac cultum literarum omnem, ut non gaudeam intime ac exultem, si quem meliora respiciunt fata tam benignum in modum, ut praecipuis vetustioris aevi scriptoribus, qua Latinis, qua Graecis, erudita utilique in publicum lucubratione incedatur. Est certe is Valerius Flaccus noster, qui post unum Maronem nemini Romanorum Epici praestantia carminis ac maiestate facile concedat. Plurima castigavit in illo laudabiliter omnino Ludovicus Carrion; fatendum enim, pervetusti codicis secutus auctoritatem: sed cujus vestigiis nimis religiose insistens quandoque a scopo aberret. Adde, quod jam inveterati plerique naevi per membranas vel antiquissimas nequicquam se sperent profligari persanarique posse. Cujus rei pro argumento indubitato vel primus Valeriani operis sit versus, qui in libris omnibus jam antea saecula complura exaratis mendosus circumfertur, *Delum nautas pro natis Delum* ostendendo. vers. 22. ubi omnes, non amnes, perperam codices antiqui ad unum omnes. Sed haec jam alii viderunt; illud intactum haecenus vers. 12. scribi oportere, *Versa proles tua pandet Idume* (Namque potest) *Solymo nigrantem pulvere fratrem*. Librarii inciti, qui non videbant *to pandet* ad fratrem referri debere, nec elegantissimum loquendi percipiebant modum, ad *versam Idumen*, loco perperam interpolato retulerunt. *Versa* igitur *Idume* sit sexti casus, aut *Idumae* jam subverbia, aut certe mox subvertenda, quamquam prius praestiterit. Credibile est enim confecto jam feliciter per Titum Judaico bello, haec tanquam futura tuto vaticinatum esse Valerium. Non tango nunc aliorum conjecturas, quae ut non paucae sunt suo loco vexatissimae, sic parum felices. Sequentia etiam minus intellecta sunt haecenus. *Ille tibi cultusque delum delubraque genti Instituet*. Ille ab interpretibus refertur ad Domitianum, qui patri post mortem honores divinos sit instituturus, ac templum Flaviae genti, quod utique praestitum est a Domitiano, nec diffiteri possum. Sed licet mihi sciscitari, quomodo praesagire Flaccus noster potuerit, haec a Domitiano fore praestanda; neque enim sine manifesta offensa Titi, qui natus major erat, Domitianum Patri, quo vivo ac superstita haec scribebantur, futurum esse, vaticinari Poetae licebat; ut jam demus illi de re hac tota constitisse, quod vero haudquaquam est simile: cum nec Titus, nec Domitianus de templo Flaviae gentis excitando sub hanc tempestatem cogitarent, nisi in patrios annos ante diem inquisivisse vellent videri. Hunc scrupulum si potes expedire & amoliri a nobis,

bis, Columbe politissime, plurimum sane rem literariam tam comi officio es demeriturus. Filum interim orationis exigit, ut ille ad fratrem, hoc est Titum, non ad *prolem* referatur. Unius literae mutatione nebulas hasce diffiparis, puto, si gentis rescripseris. Delubra gentis non Flaviae intelligenda, sed vero Judaeae, cum aliter velint tamen interpretes: de Idumaea enim victoria hîc agitur. Respexit nimirum ad templum illud Hierosolymitanum, toto orbe decantatissimum, quod sibi dedicatum ambitiose nimis Imperatores Romani jam ante hunc Vespasianum voluerunt. Cajus certe quod statuam suam in eo cuperet dedicari, ingens excessum ejus praecepit gentis seditio Idumaeae, seu Judaeae, cujus scriptor ex antiquis non unus meminerunt. Hadrianus quoque templum id ipsum Jovi postea dedicavit, sui que nominis Coloniam ex urbe fecit Hierosolyma. Legatur igitur, *Ille tibi cultusque deum delubraque gentis Instituet.* Titus, qui ipso naturae ordine successor tibi destinatus a fati, divinos honores & delubra Idumaeae gentis jam devictae, aut mox debellandae, instituet tibi post obitum. Versu tertio operis, perperam Barthius prioris ad Claudianum curae pag. 339. nescio an & alibi, *rumpere cursus* sollicitabat, cum pari quoque modo inter alios loquitur Silius lib. vi.

Primus claustra manu portae dictator, & altos

Disjecit postes, rupitque in praelia cursum.

Sic & Argonautae per cautes Cyaneas *rupere cursum*. Sed haec in infinitum abirent. Tua omnia, quae ab aliis non erant occupata, jam codicis mei marginem insident, ut memoriae obversentur. Versu 332. *τὸ ingrata* referebam ad ipsam Alcimeden. Ego, inquit, ingrata, quae ne serenis quidem nostris, hoc est coeli nostri serenitati de te absente sim creditura, tuta omnia timens pro materno adfectu. vers. 631. *Linqute, terrae, spem pelagi*, pluribus annotata mea adstruxerunt. vers. 646. malebam olim, *plenasque aliis clamoribus undas* nam & Argonautarum exortos clamores in tam foeda tempestate hoc ipso innuit. vers. 692. *portus habet*: videndus Gronovius ad Thebaidos Statianae lib. viii. 515. vers. 721. *penates* jam Laurentius Balbus occupavit. vers. 758. *rixtumque gemens*, recte conjicis, gemitum leoni dat noster quoque sub finem libri tertii. vers. 767. *Talia fert lacrymans*. Sic & ego in annotatis, sed occupavit monere Gisb. Cuperus Observ. lib. iii. cap. 6. vers. 784. *& cunctae*. videntur haec esse spuria, qualia ego non pauca alibi in Flacco visus sum deprehendisse. Sic & in Virgilianis codicibus pervetustis lacunae Maronis ipsius complures a sciolis perperam sunt suppletæ: Lib. ii. vers. 58. Volebam ego in annotatis, scriptae lectioni propius inhaerens, *vicino decedit auro. Auricomus Titan* Poëtis. Sirio alibi noster *saevum aurum* pro radiis adscribit. vers. iii. *it barbara vestis*, non est, in scriptis omnibus occurrit, & jam alii monuerunt. Placet interea tuum illud *plenaque movebant*. vers. 166. *traditque auditque* bene iidem scripti & editiones ante Carrionem. vers. 252. videtur legendum per appositionem, *Jamque fugam dubiae donum rape mentis, & ense Hunc potius miser, oro, tene*. Sic apud Nasonem Metam. iii. fabula Narcissi inconcinne legebatur ante nos, *quo refugis, remane*, cum scribendum sit, *quo fugis? oro, mane*. in scriptis codicibus

apud Valerium est, *miserere tene. rapere fugam habes* & libro v. *rapit inde fugam* &c. vers. 290. alii jam occuparunt, *quanta modo linguis inanēs pube domos?* vers. 218. *Pharii se patris.* de hoc loco copiose nos in annotatis. vers. 431. legendum (cum sit in scriptis *transita*) *Tunc, tenui Lemno, transire Electria terra, tenui* quae propemodum oculis jam se subduxerat. vers. 321. *Occupat Alcides arcu,* & nos non uno exemplo in annotatis adstruximus. Lib. III. 493. *repetito crimine* nos, pluribus suo loco illustramus. vers. 511. *quae praelia* libri veterēs & Gronovius. vers. 513. nos in annotatis nostris, *pulso ponto!* a diis enim marinis, Neptuno praesertim, submissa haec bella. post lege, *justaeque dolorum primitiae.* Lib. IV. vers. 271. legebam ego

*Pollux sic providus ictus
Servat, & Oebalio dubium caput eripit astra;
Ut videt ingentes effundi nubibus iras
Ardoremque viri, paulatim insurgere fesso
Integer.*

vers. 527. *Haesit uterque polo.* videntur quaedam excidisse. vers. 715. *nec tantos quamvis.* locus perplexus, cui medeberis puto, si ut pro & reponis ultimo versu. Non alibi undis effusis cesserunt litora longius, ne quidem in Tyrrheno & Aegeo, quamvis uterque tantas aquas volvat, ut hinc desint undae geminis Syrtibus. Brevis nec inelegans loquendi modus, qui pendet a superioribus. Syrtes undis destitutae ac brevibus passim implicitae, atque hac de causa frequentissimis naufragiis infames. Caussam siccitatis hujus dat Tyrrheno & Aegeo ad se trahentibus aquas Syrtium. Praeterea Salmasius in Solinianis & hoc loco, & aliis pro *Aegon* castigabat *Aegan.* Plura si communicare non gravaberis, obstringes me haud modice. Vale, vir Clarissime, & meus esse sic porro perge. Hagae Comitum MDCLXXV. Nonis Juniis

EPISTOLA CLXII.

JOH. COLUMBUS

Nic. Heinsio.

Hagam.

Sicut paene nullum hominis cujusquam beneficium tanta me umquam affecit laetitia, Heinsi incomparabilis, quanta litterae tuae, quibus me ornare dignatus es: ita ex quo eas adeptus sum, quotidie cogitandum laborandumque mihi censui, ne haec talis viri comitas benignitasque summa, male tandem inveniaturo collocata. Cum vero sub finem anni superioris litterae fratris mei, praeter caeteram bonitatem, quam praedicabant in te copiosissimam, salutem quoque mihi honorificam nuntiarent, illud inter tot laeta magno dolori fuit, periisse epistolam meam utramque, quibus pro tuis meritis tibi gratias egeram. Priorem adplicuit suis Cl. Socer meus, cum in aliis, supra quam dici potest, in me beneficiis, tum ob hoc eximie mihi carus, quod tuum mihi fa-

favorem conciliaverit. alteram ¹ *Petrus Lagerloff Vermelandus* inter tacitos, sed venerabundos admiratores tuos nequaquam postremus, per popularem suum *Suenonem Hasselboom* curandam accepit superiore autumno fere medio. Neque postea saltem alteram esse perlatam, collegi ex litteris nuper Socero meo, quem dixi, redditis, sed scriptis Hagae mense decembris: in quibus quod denovo tantus per te mihi honos, verba, quibus condignas tibi gratias agam, non invenio. Equidem levis admodum jactura fuit in amissis meis: testes tamen observantiae ac pietatis in te meae nollem intercuisse. Hoc autem, quidquid est, ut refarciam, ad ea protinus accedo, de quibus me affari non es dedignatus. Quemadmodum admiratus sum semper majorem, quam cujusquam alterius, in revocandis & pristino decori restituendis antiquorum Musis solertiam atque felicitatem tuam: ita Valerio Flacco nunquam dubitavi veram & propriam elegantiam rediisse, ut in aliis infinitis, ita in duobus illis versibus lib. 1. 12. & 13. ex quo eos in notis tuis ad Ovidianas Metamorphoses persanatos videre contigit: quas notas in poetam ingeniosissimum, dum licet, nocturnis diurnisque verso manibus. Neque vero sine emendatione hac constabit integritas sua orationi; neque si copulam & inferamus versui posteriori, (quod vir quidam eruditissimus, quocum obiter de hoc loco egi, ne a manuscriptis discedatur, fieri malebat) non peribit maxima illa rotunditas, ut sic loquar, & elegantia leposque, quem hoc tuo minio huic pulcherrimae poësis parti redditum ivisti. Alteri correctioni, qua reponis *gentis ævri & genti*, credo non ideo assuevisse satis aures meas, quia ne ad ea quidem bene multa satis limatas habere me sentio, quae integerrimae tersissimaeque Latinitatis saepe sunt, quo magis ignoscere te aequum est imperitiae meae, si me nondum satis ista percepisse fuero fassus. *Instituere sacra vel templa* dicitur (quamquam non ausim jurare, nihil diversum homines venustos & perspicaces in monumentis veterum invenisse) qui nova in honorem cujusquam condit aut excitat. *instituere gentis templa cuiquam*, insuetum nonnihil accidit ad aures meas. ac fortasse *de delubra* de uno Judaico non vult intelligi. Interim tibi omnino est assentiendum voculam *Ille* referendum esse ad Titum, non ad Domitianum. Quod cum tenemus, non errabimus forsitan, si ausum sub bono Principe talia augurari poëtam dicemus, qualia olim futura optabat Princeps ipse, cumque eo P. R. universus, qui hunc non utique aeternum erat habiturus. Nec fane multo molliora sunt ista, quamvis consecrationis lucem prae se ferentia, obitum tamen non dissimulantia

— — — cum jam genitor lucebis ab omni

Parte poli.

& reliqua. Quod si haec non placent, an suspicari licebit poetam vivo Imp. Vespasiano opus suum inscripisse, sed extincto eo, paucula quaedam de filiis, praec-

¹ Professor Eloquentiae Upsaliensis. vide *Schefferi Sueciam Litteratam* pag. 261. & *Molleri* notas pag. 438. *Suenonis Hasselboomii* meminit pag. 215. ut juvenis, & *Martini Brunneri* discipuli, & quem peregrinandi occasione singulari usum dicit, qua forte hanc epistolam secum tulit.

praesertimque majore, jam potito rerum inseruisse? Verum ab his aut ipse nos expedies, aut nemo: Etsi autem in hoc non responderim satis interrogationi tuae doctissimae, permitte tamen, ut in aliis minoribus aliquid argutari coner, facilitate tua inductus, qua utinam ne abutar! Molestiae ac labores curaeque Rectoratus Academici, quo functus sum semestri, multum temporis abstulere & Flacco & veteribus aliis. utque nihil dissimulem, expectatio desideriumque summum editionis tuae segniores me in hoc legendo facit. Quod in superioribus tentamentis meis fuerint, quae non improbaveris, magnum habeo calcar studiorum meorum: nec nihil in paucissimis illis habebō quod gaudeam, etsi omnia haec, quae nunc accedunt, damnaveris. Oro autem obsecroque, nec ubi eorum memineris, quae se tibi non approbant: satis est, ea praeteriisse. Nec tam improbus sum, ut te, partim & alios, non existimem vidisse pleraque, si quia tamen in his recta. Sed quia nondum visa mihi sunt, quae vos signavistis, experiar, si quid & nunc inveniam quod meum sit. Lib. I. vers. 60. *tanto dracone*) draconi forsan rectius. vers. 68. *aut curru*) forte *currum*. vellet, scilicet. 105. *jussi laude*) lego, *v. si*. per lustra viaeque visi. 265. *placido sic currere*.) Ita etiam Alardi editio: cum liqueat legendum esse *si*. 375. *Tegeeo limine*) puto *limite*. Pomp. Laetus interpretatus *agro* sic videtur legisse. vers. 489. *Haud aliter Venator cum lustra fugit*. suspicor rectius esse *quam*. quod in *quum* facile depravari potuit. 681. *oritur clamor dextraeque sequentum*) an, *dextraeque sequuntur*, vel *dextrique*, i. faventes, secundi. *lassatus*, quoque, & *eques* versu 708. ut sit: *Minoia frustra Infremuit manus, & visu lassatus inani Omnis eques plenis rediit* (vel *redeunt*) *Gortyna pharetris*. Auctor Elegiae in obitum Drusi: *Funeris exsequiis adsumus omnis eques*. *eques* certe habet Pomp. Lacti manu scriptus liber, tuo beneficio mihi indicatus non exiguo. nam in eo me oblecto donec prodierit editio tua. 815. *& heu cunctae*) forte, *& haec cunctae*; non displicet repetitio. Lib. II. vers. 72. *Atlantidis*) mallem, *Pallantidis* aut *Thaumantidis*. 118. *placidis regionibus*) *placidi reg. Aetheris*. 143. *nuntius essem*) ardeo doceri sitne hoc *nuntius* in veteribus, *san nuntia adessem* aliudve quippiam. 237. *His cruor in thalamis*) *it thalamis*. mallem etiam *anbelo*. 240. *adduntque domos pars ignibus atris*) sic distinguo. injiciunt intactas ardentibus 284. *Occulerat*) an, *occultat*? 382. *actis*) *ausis*. 551. *tum colla tumens, tum*) praeferrem, *jam colla tumens, jam c. a.* Lib. III. *Tollitur hinc*) Huic loco certiores opem tu dabis, Heinss, ut aliis plerisque omnibus. Interim *Tollit in hunc* credo legendum. 246. *tanta Jovis*) quid illud *Jovis*? infra vers. 373. *lucem* appellat. forsitan & hic *lues* legendum. 342. *Hypsidae*) *Hypsipyle* & v. prox. *vultu*, non *vultus*. 605. *Strata vel oblati*) melius *ablati* scribemus forsitan. sequitur nono versu *oblato cursu*. 671. *Tibi quidquid in ipso Sanguine*) praetulerium in isto *Sanguine*. Lib. IV. vers. 17. *inque vagi libavit*) an non rectius *libravit*? 82. *& jam mihi*) aliud quid videtur latere. *jam* & nunc praecessere. num, *& amici limina caeli*, vel *lumina*, ut prius. 92. *Sol auricomis*) *Sol auricomus jungentibus Horis*. 295. *Territus ipse etiam*) haec ad superiora refero. 300. *nec spes effoeta*) an potius *defecta*, & loco *& advolat, involet* 351. *Intentisque canit vidisse*) sic Ciofanius adducit ad Ovid. Met. I. p. m. 9. & mox pag. 371. *moventem* pro *morantem*. Idem vers.

396. nec quo se vertice, pro, quo sese vertice 580. exiit aures) exiit auris magis terrificum & divinum videtur. ut Virg. tum vox audita per auras. Lib. v. vers. 86. jamque ferentes) an sedentes? Ovid. Met. xv. Jam sedet Ortygie. Sed nec alterum displicet. ferentes scil. addita fretis freta. 100. Odrysius dum rite) putabam tum. sed nunc ambigo. videntur enim haec cum sequentibus jungenda. pro isto *Altius in ventos recipit ratis*, lego *recidit*. nam *Sabellicus cecidit*. 183. *acthere plena*) *prona* credo rectius. ut *proni Dii* Lucano. 293. *liceat Grajis ut*) *praefero dum*, quod Pius notat in quibusdam, 308. *aut altos*) *Retineo alios*. 369. *Et saevo*) *aut saevo*. 431. *vix Tethys*) *Titan* conjectabam. Sed nihil affirmo. 455. *deflexerat error*.) aut hoc loco *converterat* vel *diverterat*, aut superiori versu *retorquent* legerim. alterum forte e glossa est. 520. *Jamdudum fremit*) *premit* haud dubie rectum. 594. *Vide lata comentem*) Quis ferat comentem? nec correxit tamen in exemplari suo Alardus. 597. *nulla minanti*) puto *multa minanti*, ut Ovid. *Multa mihi coelum, multa minantur aquae*, 633. *nec foedere vestro*) liber Laeti habet *ut*. forte aut. 670. *Fassaque quae nequeam? sic femina*) etiam hinc advocamus opem tuam. an *Fassaque quae nequeam ceu femina*. ut stringit illa Martis, *neque femineis jus objicit ausis*. v. ult. *lumina*) lego *limina*. Lib. vi. vers. 24. *Non illos ideo tantos*) lego *tanti*, cum Cod. Carr. *Laetique*. forte & *ignotis* seq. v. ut sit *Non illos ideo tanti venisse labores Per maris. ignotis quid opus concurrere, nec quos Oderis*. Noster in fin: *Aesoniden aequore tanto Debita cognati repetit qui vellera Phryxi*. 122. *Et raptor amorum*) durum illud Vossii 11. De Arte Grammat. pag. 223. ed. post. *raptorque Amadocum*. Tuum longe venustissimum, *Et raptor agrorum*. 124. *notusque refutat*) & hic locus difficilis. *Suspicebam, nervosque refutat*. an potius *nodosque*, ut intelligat Graecis dictos *κονδύλας*. Medici nostri *nodos* dicunt extrema brachii, unde digiti incipiunt. 169. *gemit intus*) *ictus*. 171. *Typhoea verberat*) existimo primum in *Typhoeus* vix produci, uti nec corripi *Typhon* apud priscos. malim itaque *Typhona reverberat*: noster lib. iv. *Implorant clamore patrem Typhona nefando*. 184. *galeis*) imo *gladiis. galearum* mox meminerit. 209. *Pectus in adversum graviter jacet*) MSS. Laeti, Gelae. *Scribo, simul obvius hastam Pectus in adversum Gelae jacet, alipedemque Consilii extusso victor duce*. 263. *Ante manu tacita*) num, *Arte manus tacita?* Martialis *Callidam manum vocat*. 280. *animos acies*) *acres auget Mavors*. 302. *belli diversa*) lib. Laeti, *Campi dimensa*, an, *campi diversa?* 400. *dirumque reterquet*) *retorquent*. equi puta. 722. *hos ipsae Gentes*) *hos Asiae, vel Scythiae gentes*. Lib. vii. vers. 17. *Aesonias*) *Aemonias*. facilius Medae fuit patriae nomen; quam patris cognoscere. vers. 75. *An magis everso*) lego, *inverso*. ut Virg. saepe. & noster alibi. vers. 76. *dum seminis*) *dum dentibus* exigit series orationis. 94. *quamquam mihi dextera*) imo *nunquam mi. d.* 165. *quin illa sacris*) Carr. lib. *queis sacis*, lib. Laeti, *adstantem*. Corrigo: *queis illa sacris, quo freta veneno Illum etiam totis adstantem noctibus anguem, Qui nemus, &c. Sternat, (aut Fundat, aliudve hujusmodi) Et in somnos ingenti solvat ab orno, Haec tibi nunc: Furiis atque ipsi caetera mando*. Nulla te melius dixerit, quibus artibus ad molliendum sopiendumque draconem opus sit: quemadmodum vero rite ea fiant, Furiae atque ipsa viderint. 244. *Ar-*

dua amanti) difficilis locus. cogitabam, *aequus*, aut *haeret amanti*. Sed nondum videtur fassa amorem, unde infra vers. 298. *rupta condi tellure premique Jam dudum cupit, & duras evadere voces*. Aliud itaque quaerendum. num, aut fuga *nocti*. Sed tu, oro subvenias, Heinſi ſospitator unice Valerii noſtri. 343. *quem primum*) *prima*. 359. *durat editque*) quo modo *durat*, ſi *edit*. an potius *alitque*, vel *obitque*. 369. *totos nunc contrahit*) *toto monte* ſcil. 444. *miraris & ipſa*) & *ipſe*. 506. *ſaevius ipſis*) malo, *iſtis*. 520. *quem tanta utinam fiducia noſtri ſit mihi*) lego *fiducia contra*, vel, *fiducia in hoſtem ſit mihi*. 536. *Contingat vix deinde*) *Contingat mox d. m.* 550. *In vellera in ipſa*) Lib. Laeti, *ni vellera & : ſcribo*, ne *vellera & ipſa*. Lib. VIII. vers. 23. *ferit irritus Iſthmum*) lego *petit*. ut Ovid. *venit irritus illuc Romulus*. vers. 136. *inflexit frater*) lego, *infeſtus frater*. 157. *Sed quid ego*) *Sed quid ago?* *quem ve*. 168. *Aut certe nunc*) *Aut certe mecum*. 217. *hortatur*) *hortatus*. vers. 224. *Ipſa autem invitae*) *invictae* verius puto. 320. *Haud finit*) lego *Ut ſinat*. & ſeq. v. *quondam pro quoniam*. Sed jam nimium vereor fatigaſſe te minutiis meis, vir maxime, inſtantque latuſi literas Holmiam. Da veniam ſcriptioni nimium feſtinatae. Volebam plura. Sed erit forſitan poſthac tabellarius certior. Vale, & audaciae meae veniam indulge. Upſaliae, d. xxvii. Jul. ſt. vet. A. CIOIOCLXXVII.

EPISTOLA CLXIII.

NIC. HEINSIUS

Joh. Columbo.

Upſaliam.

Nunc demum e tuis longe jucundiffimis datur cognoſſe eas, quas ante hoc biennium ad te exararam, & in quibus de Valerii Flacci locis nonnullis agebatur, in manus tuas perveniſſe: nam binas alteras, quas ex illo exaratas ſcribis, cave credas mihi redditas fuiſſe. ſedem quidem certam nullibi fixi, dum nunc in hanc aulam excurro, nunc in ſeceſſu Vianenſi Muſis ac ſolitudini vaco, non moleſtum tamen erat ſiſ, qui litteras peregre ad me adferunt, eas *Danieli Elzevirio*, Bibliopolae apud Amſtelaedamios non ignoto, tradere, continuo ad me curandas, quod is me compellare per litteras ſoleat frequentiffimus. Detector equidem ac abominor funeſta haec tempora, vel eo potiffimum nomine, quod amicorum abſentium conſuetudinem intervertant maligne nobis: ſpero tamen ad ſummum infaniae perventum eſſe, ac mox pacatiora omnia fore ſperanda. Quod ſi fit, nihil habebo prius aut jucundius, quam de ſtudiis communibus, quae potiora duco, tecum conſabulari. Nunc hoc ipſo dolores geminantur, quod litteras plurimum voluptatis laturas mihi tam frequentes in via intercipi intelligam. Sententiam meam de verſu apud Valerium Flaccum III. 493. poſtea Socero tuo aperueram, nimirum videri ſcribenda,

Germanique manu repetiti crimine Perſes.

Sed & illae litterae interciderunt. Lib. I. 12. *delubra gentis* pluribus exemplis ex ipſo Valerio depromptis aſſerere ſum conatus, ut videbis aliquando. Reliqua

qua, quorum mones, habui gratissima, & horum nonnulla editione mea jam occupavi. Vale, 14. Novemb. MDCLXXVI.

EPISTOLA CLXIV.

JOH. COLUMBUS

Nic. Heinsio.

Vianam.

GAudeo factum esse tandem, vir maxime, ut una cum Socero meo nonnihil litterarum ad te dare liceat; quas nequaquam distulissem tam diu, humanissimis litteris tuis tertium ornatus sub exitum anni superioris, nisi optimus, quem dixi, senex, longis ac pertinacibus vexatus morbis, interdum & graviter concussus, scribere, quod aiebat, nequisset. Hunc autem ut expectarem, idoneae fuere causae. In Valerio Flacco legendum esse, *delubraque gentis Instituet*, facile nunc assentior tibi, postquam coepi tandem repetere memoria, praesertim tuo admonitu, illud verbi divina in re usitatum esse, ipsi etiam Valerio; ut libro III.

Circum humiles aras ignotaque numina divum

Instituit. — — —

Haec vero & alia istiusmodi non advertisse tum stuporem meum! Prorsus igitur credo scripsisse, ita ut doces. Vereor ne occupatum illud a *Barthio*, lib. VIII. vers. 217. *hortatus*, pro, *hortatur*, caeteris meis inseruerim. nolim nunc certe factum. Plura forsitan alibi: nisi fors tibi typographoque commodum nunc fuerit Valerium nobis dare, quod quidem vehementer exopto. ¹ Libellum, quem his adjungo litterulis, tibine mittere auderem, fateor me ambegisse, cogitantem, vix esse in eo, quod cum voluptate legas. Sed utinam ne magis etiam offenderim, illustre nomen tuum meis istis apinis interponendo! At hanc mihi da, quaeso, veniam. Sive hoc opusculum refingi poterit, sive aliud quippiam a me excudi, non committam, spero, in posterum, ne non satis caute magnis nominibus usus dicar. Si quid tamen peccatum hoc modo est, simplicitati meae hoc omne, non arrogantiae oro tribuas. Quum nimium festinata sit haec editio, paro alteram, cui major impendatur cura. Vehementer equidem cupio doceri abs te, aliisque vestratibus viris eruditis, de hoc scripto Graeco, ejusque auctore, quid censeatis: sed quum opera haec prima tam male cesserit, metuo, ne omnia damnetis. Mittam tamen exempla plura cum habuero, qui Holmiam eat. Haec tabellario publico dedi, ut saltem aliqua fasciculo Soceri mei adjungerem. Vale, vir summe, & inter tuos vel ultimum, modo aliquem, locum mihi concede. Upsaliae xxvi. Nov. Julian. Anno MDCLXXVIII. raptim.

¹ Ex seq. Epist. video fuisse *Incerti Scriptoris Graeci fabulas Homericas de Ulyssis erroribus ethice explicatas*, quas hoc anno edidit Holmiae. In notis suis pag. 110. laudans *Nic. Heinsium*, de litterarum commercio cum viro illustri sibi gratulatur vehementer.

EPISTOLA CLXV.

JOH. COLUMBUS

Nic. Heinsio.

Hagam.

V Ade vereor¹, Heinsi vir¹ summe, ne ab humanitate officioque penitus descivisse videar, quia non ante indicaverim tibi excessum e vita Soceri mei, magno a te amore, plurimisque officiis per omne propemodum aevum suum culti: praesertim cum illius causa etiam me immerentem perhumane benigneque sis complexus. Verum quam miserabili errore sit factum, ut crediderim te illic locorum degere, quô non modo meae, sed vix ullae quidem litterae pervenirent, ne graveris quaeso accipere. *Petrus est Lagerlöff* Vermelandus, elegans, & eruditus juvenis. Ab hoc mihi venerunt Haga litterae, pro re comperta minimeque dubitabili nuntiantes, in Americana te maria, insulamque Surinam jussu potentissimae Batavorum Reipub. cum imperio profectum esse. Quid facerem? nolebam credere: sed multa coegerunt. Auctor minime vanus alias aut obesae naris; tuorum Parentisque tui maximi scriptorum lectioni & admirationi mecum deditissimus, mihiq; multos annos familiaris & poene domesticus. Sed neque fieri putabam, ut Hagae de te falsa narrarentur, ubi nemini non sciebam te notissimum. Apud animum denique multorum, quos amaveram prae aliis & suspexeram, mortibus concussum & afflictum, tristibusque jam diu assuefactum ingratus nuntius faciliorem invenit fidem. His igitur victus, morbo quoque & morte unici fratris vehementer perturbatus distuli scribere. Tandem alterae ab eodem *Petro* litterae adsunt, quibus deceptum se fatetur, simili nomine falsa ista nuntiasse: a celeberrimo *Graevio*, cujus humanitatem & elegantiam mire praedicat, veriora edoctum Ultrajecti, scire se Vianae te vivere. His accessit heri Mantuanus ille vates, per te nitori suo redditus, carmine ad Regem Christianissimum, quale a solo te scribi potuit, auctus, magnisque testis coeptae benevolentiae tuae, qua nullum praesentius remedium tot malis meis afferri potuit. Per te igitur, spectatamque toties benignitatem tuam, per memoriam *Schefferi* nostri oro quaesoque, ut errori meo des veniam, & caetera, quae funeris cura lassatus utcumque referre valeo, haud gravate cognoscas. Aliquot jam annos increverat morbus ille, (scorbutum vocant) quo confectus est Socer meus, cumque superiori autumnio vires reliquisset ei perexiguas, non potuit tamen eo deduci Senex optimus, ut a lectionibus publicis desisteret. Quinetiam diem Non. Decemb. natalem Professionis Skyttianae publica oratione celebravit, qua *de fati rei literariae per Sueciam* perrexit agere, deque malis, quibus nunc laborat Academia nostra, verissime liberrimeque multa locutus est. Dixit & aliam, paucis post diebus, *in Christi Servatoris natalitia*, incredibili cum applausu audientium: qua Deo se gratias egisse, Academiaeque vale dixisse non sine lacrimis suorum testatus est domum reversus. Sub exitum anni superioris Vellejus tuus illi est allatus; ipse autem munere gratissimo recrea-

creatus, non temperavit sibi; quin assiduus, querentibus licet medicis, eum tereret. Possum affirmare, in hoc genere literarum, ac paene omni, post felices illas emendationes tuas nihil ei lectum esse. Amplas admodum ingenii & eruditionis tuae divitias laudabat impense: paucula quaedam tamen fassus est se cupere servata, ut erat in pristinis lectionibus tuendis nimis interdum religiosus. Morbum lento ipsum cruciatu macerantem mira tulit patientia, exceptisque salutaribus quibusdam monitis, & gemitibus perquam raris, obstinato silentio: decessit VII. Kal. April. ab Academicis primum, mox omni patria nostra, quam ille ut cultiorem ac politiore redderet, nulli pepercerat labori, acerbè multumque defletus. Duo ejus libri Holmiae nunc typis describuntur. Unum *Sueciam literatam* vocat, catalogum continentem omnium, quae in patria mea digna memoratu visa sunt, scriptorum. Altero, jussu Regis, *antiqua insignia trium coronarum* genti nostrae it vindicatum. Utrique attexuntur ab aliis nonnulla, quae typographos non parum morantur: mittam tibi, quamprimum fuerint absoluti. Paratae sunt praelo in officia Ciceronis Animadversiones item, item notae in eadem, quibus pars duntaxat primi libri explicatur; arbor tamen opus satis prolixum edi posse. *Basilicae*, id est, de Regibus, & ad Reges orationes aliquot. In Taciti Agricolam liber commentarius. *Opilio*, seu de Ovium Pastoribus *Adversaria*. De *Latinitate perperam existimata* liber. Sed jam ad alia festinandum est. Praeter Socerum meum obiere hoc anno Academiae nostrae Professores quatuor, ¹ *Petrus Liung*, *Jonas Fornelius*, *Magnus Celsius*, & novissime *Martinus Brunnerus*. Duo postremi multum item deplorantur, maxime propter operum suorum summam manum desiderantium inhibitam sic editionem. Inter alia fuit *Moeris Atticista*, de quo *Brunnerus* quotidie querebatur, tarde sibi rem procedere, propter ecclesiastica negotia, quibus distringebatur. Illum scriptorem, si tu permiseris, (nam tuo beneficio deberi scio) curabo edi quamprimum: habeo enim & ipse descriptum, nec invidebunt haeredes publicis usibus *Brunneri* & *μαναεῖτς* annotata: sed recenti luctu jam oppressos alloqui hac de re vereor. de studiis meis multis nunc agere non licet, ne *Illust. Dominum Rumpfium* nimis grandi onerem epistola. Is, de quo supra, *Petrus Lagerloff*, affirmavit inter alia praeclara hoc quoque dixisse celeberr. *Dominum Graevium*, se triumviros amorum propediem esse editurum. Qua re cognita vehementer laetabar. In Bibliotheca vero & *μαναεῖτς* nostri *Schefferi*, scis (puto) existare *Tibullum manu-*

¹ Horum quidam aeternum latuissent exteris, nisi peplo suo Literatae Sueciae intexuisset eorum nomina *Schefferus*. *Petrus Ericus Liung* Philosophiae practicae Professor, nec, nisi exercitationibus fere Academicis emissis, inter suos fuit multum notus. Vid. pag. 242. de *Jona Fornelio* Matheseos professore pag. 230. de cujus patre *Laurentio* saepe in epistolis prioribus mentio injecta fuit. *Magnus Nicolaus Celsius* Mathem. Professor memoratur *Scheffero* pag. 187. Celebrior his fuit *Martinus Brunnerus* Graecae primum Linguae, mox Theologiae Professor, de quo creberrima in his epistolis mentio, & cum quo *Heinsius* etiam epistolas plurimas commutavit, in quibus cum nihil fere, nisi de *Moeri Atticista*, quem edere voluit, agatur, eas proferre vix operae pretium visum. Palaephatum edidit Upsal. 1663. Vide *Schefferi* Suec. literat. pag. 214.

nu non quidem valde antiqua, sed tamen ex veteri bonoque exemplari descriptum. Hunc vobis libens mitterem, ut tantis viris officio qualicumque gratificarer. Sed opinor, ut caetera soceri mei, ita hoc quoque exemplar a te, cum Holmiae viveres, diligenter perlustratum. Hoc enim a Socero meo videor audivisse: de Horatianis certe membranis hoc affirmavit. Idem nescio quo casu de Tibullo hocce nihil dixerat mihi, antequam notas meas (heu nimium properatas!) in scriptorem illum Graecum, quem misi vobis anno superiore exeunte, jam formis vulgatas legisset. Incertus tamen, an & Tibullus iste visus tibi, non tempero mihi, quin aliqua excerptam. Lib. i. Eleg. i. *Non ego laudari cupio*) MS. Scheff. *Non ego laudari curo. Et rixas inferuisse juvat*) MS. *conscruiſſe*, quod fatis, nisi fallor, plenam efficit orationem. El. ii. *Cum libet*) MS. Sch. *Quom libet*, & sic etiam proximo versu. *provocat orbe*. MS. *convocat*. *Non ut totus*. MS. *Non ego totus. Sectaque de sanctis diripuisse*) MS. *eripuisse*. forte, *deripuisse*. de qua voce ad Ovidium nos doces. *non vanus saeviet ipse*) MS. *usque*. & sic Aldina, forte & aliae, quas praeter solam Mureti, annotatis tamen in margine Scaligerianis, fateor non esse ad manus. Eleg. iv. *post offeret ipse volenti*) MS. Scheff. *post auferet ipse. auferet* mihi se satis probat. *roganti* habet Scaligeri liber, saepe cum Schefferiano consentiens. *ne turbis fabula*) MS. Sch. *turpis*. Eleg. v. *tenerisque lacertis*. MS. Sch. *mutisque lacertis. escasque sepulchris*) MS. Sch. *herbasque*. Eleg. vi. *Fingere tum &c.*) MS. *Fingere nunc, ut sola cubaret, Cardine nunc tacito. Effluit effuso*) M. S. *Et fluit effuso cui toga laxa sinu*. Eleg. vii. *quamam possum te dic.*) M. S. *possim. postulat imbres*. MS. *imbris* & sic plerumque. El. viii. *seroque juventam*) M. S. *juventas*. & paulo ante *ingere dente notas*, non *figere*. mox *coma tum mutatur*, non *cum*. *poterat custodia falli*) M. S. *vinci. miseros laedebat amores*) M. S. *ludebat*. Eleg. ix. *quam plures emeruisse viros*) M. S. *quem ptes*. opinor veram lectionem esse, quam proles. Eleg. x. *At nobis aerata*) MS. S. *exerta. Flet teneras*) M. S. *tenebras subfusa genas*. quod posterius etiam Scal. maluit. an praeterea legendum *tenebris*, i. e. pallore? sed ambigo; vehementer tamen illuc propendeo. Lib. ii. Eleg. i. *Vos celebrare cantate deum*) Nihil juvat hic liber iste. Malim tamen *celerem*. Eleg. ii. *strepitantibus* MS. Sch. *trepidantibus*. Eleg. iii. *At tu quisquis is est*) MS. Sch. *hic est*. scribe *hic es*, ut Virgil. *Hic vir hic est. imperitat* MS. Sch. *Imperat* & num, *imperat*, en? *multa columna*. MS. *mille columpna*. *Femina Choa* Sch. MS. *mendose*. an *Chia*? non puto. Eleg. iv. *Et nunquam misero*. MS. *ut nunquam misero vincla remittat amor. Seu quid peccavimus uror*. MS. *urit*, quod volebat Scaliger. Ita mox cum ejusdem libro. *nondum formaverat urbis*, non *fundaverat*. & rursum *exiguus pulsa*, si satis assequor. *Troica qui*. MS. *quae*. *Hic magnae nunc* MS. *jam*. *Nubilus annus* MS. Sch. *annis*. hoc est, *amnis*, quod fortasse non spernendum, potest de Tiberi sermo esse. Eleg. vi. *tua qui ferus otia liquit*. MS. Sch. *hostia liquit*. *Et mihi grata tuba*. MS. *Et mihi facta tuba est*. Scilicet MS. *ilicet*, si satis assequor. *sis mihi dura veto*. MS. *sis mihi lenta veto*. de qua voce ad Ovidium pulcherrima nos erudis. Lib. iii. Eleg. i. *Pumex* & Aldi *editio pumicat* &. MS. *pumice* &. legendum puto, *pumice sed*. idque sequens ver-

versus firmare videtur. Eleg. i. i. *Qui primum* MS. *primus longas incomta* MS. *incu tq, animamque precatae.* MS. *rogatae.* & sic Aldina etiam. ¹ Idem voluisse te puto ad Fastos Ovidii, sed locum nunc non invenio. Eleg. iv. *omina noctis.* MS. *agmina noctis,* quod suspicor verum esse. *lumina sera quies,* MS. *fessa.* *Mutabilis illi.* MS. *illis* ut Scaliger. *Felix hoc alium,* MS. *ac alium:* Eleg. vii. *Cave puer,* MS. *Carpe,* ut apud Petronium. *Cadmaeae matris praeda.* MS. *turba cruenta.* Lib. iv. ad Messalam. *omne movemus hoc tibi.* *Movemus* cum Scaligero, & mox cum ejusdem libro *carmine.* *Cimmeriorum ad aras* MS. *ad arces.* *Vidit, ut inferno.* MS. *vidit & inferno Plutonis subdita regno magna deum proles levibus discurrerat undis.* Visis nugis meis ad Anonymum illum Graecum, *ὁ μὲν αἰεὶς* noster librum hunc suum praebeuit inspiciendum. Ejus itaque ductu legendum fortasse, *Vidit ut inferno (aut inferni) Plutonis subdita regno Magna deum proles levibus discurreret umbris.* *Cum canibus rapidas.* MS. *rabidas.* rabiem noti Horatius dixit. *brevius contendere.* MS. *levius,* quod magis Latinum videtur: *Testis Arpinas.* MS. *testis & Arpinas.* in illo *pauper* latere videtur quidpiam. *abnuvit additus.* MS. *abnuvit abditus.* forte *annuit* (vel *adnuvit*) *abditus aris.* Cyri Clementia Gindes. MS. *Cydnus.* *nec quia.* MS. *quid.* *totus desponitur orbis.* MS. *toto disponitur orbe.* *Vires necat aër,* MS. *negat.* *Hic & colla jugo.* MS. *hinc.* *Fortuna ut mos est.* MS. *Fortuna ut mos illi semper adversa.* Forte, *Fortuna, ut semper mos illi adversa.* vel *bene si totus* MS. *vel bene si notus.* alterum praecessit. Elegia ad Cherinthum *nec sis nunc injusta.* MS. *nec tu sis injusta.* Mox pro quam solvisse, idem liber *nos se visse.* Eleg. ad Junonem, *illa aliud tacita jam sibi;* MS. *jam sua,* quod longe elegantius. Ad Messalam, *apta puellis.* MS. *apta puellae.* Elegia, quae inscribitur, *Sulpicia loquitur.* *Exsolvit promissa* MS. *se solvit.* Elegia quae incipit, *Estne tibi Cherinthe: Ut videar paucos.* MS. *Ac videas.* hoc forte rectius, aut *ac videor.* *Tu mihi sola places.* MS. *tu modo sola.* *Haec per sancta tuae Junonis.* *Nec tibi sancta.* puto scriptum fuisse. *Haec tibi sancta,* aut, *per tibi sancta tuae.* Sed jam delasso vos minutiis istis, suntque fortasse haec jam ante notata tibi & visa, Nobilissime Heinsi. Oro autem, ne in magna temporis & editionum inopia mihi fraudi sit prius observata ab aliis repetiisse. Saltem aestimavi vel sic ostendendum libri hujus non spernendum pretium, quem statim vobis mittam, cum cognorim prius non esse inspectum. Valete, viri magni, & simplices haec naenias nostras boni contulite. Upsaliae i. i. Septemb. cicioclxix.

¹ Immo vero *Heinsius precatae* legit ad vi. Fast. 303. monente *Brouckhusio.*

EPISTOLA CLXVI.

NIC. HEINSIUS

Job. Columbo.

Upsaliam.

INcredibili maerore me tantum non confecit mors inopportuna Soceri tui, vir Clarissime, quamvis in scriptis plane eximiis perennabit senex, inter paucos aetatis nostrae literatus atque eruditus. Recruduit altissimi doloris vulnus,

Z 2

accep-

acceptis nuper admodum ejus literis Novembri mense exaratis, quibus & tuas addidisti, una cum libello exquisitae notae, de fabulis Homericis, quem avidissime profecto, nec sine multa voluptate jam perlegi haecenus ignotum mihi, idque uno oculorum conjectu, quo major exarsit sitis in hoc pectore complura hujus notae tuis illustrata lucubrationibus contemplandi. Maronem meum, etsi nullis exornatum annotationibus, jam accepisse debuistis. Holmiam certe perlatum esse narrant ultimae Ampl. viri *Constantini Rumpfi* litterae: eum Valerius mox Flaccus excipiet, sed nec ille ullo novarum animadversionum ornatu spectandus. Culpa hujus rei convertenda est omnis in unum typographum, qui editionem curavit parum nitide atque emendate, ut ejus jure optimo me pigeat pudeatque. Haec in antecessum: pace enim tandem stabilita fore in posterum confido, ut iter litterario commercio, per tantum temporis interrupto, tutum ac securum contingat. Vale, vir praestantissime, & mihi velle, post Socerum, cujus adfectu plurimum triumphabam, perge. Vianae xviii. Octob. cldcclxxix.

EPISTOLA CLXVII.

JOH. COLUMBUS

Nic. Heinso.

Vianam.

Sanctam piamque vivere in te *Schefferi* nostri memoriam, minimeque una cum ipso gratiam, quae inter vos fuit, dirum funestumque illum diem abstulisse, epistola, qua nuper me beasti, luculento docet testimonio. Hac ego illustris *Rumpfi* beneficio potitus, (cujus item humanitati pro eo ac meretur laudandae non sufficit infantia mea) Socrum meam tantum gaudii celare nolui: laetabatur & ipsa hoc nuntio plurimum, magnaeque bonitati tuae ut gratias agerem, diligenter orabat. Utinam se hac dignam praestare valeat tenuitas nostra: prompto quidem pioque animo cedemus nemini. Quid, quod litteras etiam meas praevertisti, quas iv. Non. Sept. Ill. *Rumpfo* ad te mittendas dedi: quam misero autem errore factum sit, ut eo usque distulerim scribere, ex ipsis haud dubie jam cognovisti. Nam perlatas nunc esse, vir ille optimus jubet sperare: nec fuisset mihi ullus inter bonos locus, nisi pro munere praestantissimo statim egissem gratias, cognitoque, te inter Belgas vivere, de obitu Soceri mei te fecissem certiore. Valerii praeterea Flacci tui quod spem facis, gaudeo, fateor, quam possum inter tot funera maeroresque alios, vehementissime: per typographum stetisse, quo minus notis tuis poteremur, non ipse modo molestissime fero, sed quicquid ubique est bonas litteras amantium. Est etiam cujus ego accusam typographos Holmenses, quorum unus ab ipso *Scheffero* traditum sibi de *Suecorum in litteris conatibus* opusculum jacere finit vix dimidia parte descriptum typis: alter, quae de *insignibus* ab eodem sunt composita, jam absolvit quidem: sed sculptorem adhibuit imperitum, & plus quam dici potest, segnem. Liberatus Academicis laboribus Holmiam propediem (ut spero)

spero) excurram, &, si nihil aliud, saltem litteras benignitatis tuae memores mittam. Tu vero vale, vir incomparabilis, & in optatissimo mihi favore tuo persiste. Upsaliae IV. Kal. Decemb. Anno MDCLXXIX.

EPISTOLA CLXVIII.

JOH. COLUMBUS

*Nic. Heinsio.**Vianam.*

Superiori hebdomade litteras tuas laetissimus accepi, vir maxime, Vianae xx. Januarii scriptas: habeoque hoc felicitatis non minimae, tempore tam exiguo tantum eas maris ac terrarum superasse, ut eo citius exhilaratum me venirent. Decembri quidem mense, si quas ad me dedisti, quod hae novissimae dicunt, in tabellarios non satis fidos inciderint necesse est. Sed Octobri medio exaratae, cum hisce nuperrimis, si quid est damni, multum illud levant: nisi quod nequeam ullis aequo animo carere litteris, quibus in magna virium temporisque penuria vir tantus me non dedignaris. Excusatione vero non fuit opus, cum in nulla parte aut occasione testandae benevolentiae abs te sit cessatum. nam & probasse te mythologum istum, nec ita, ut merebatur, audaciam tulisse dolenter, inter apinas istas nomen tuum usurpantis, utraque luculenter docet epistola. Magnas quoque gratias ago, quod Moerim Atticistam edere sinas: imo hoc ut faciam horteris: ego etiam atque etiam videbo, ne benignitatem istam longa cunctatione frustrer, neve reticeam ingratus, quo accurante in Gallia descriptus, & in has plagas mundi missus sit. Emendationes quasdam jam tunc appositae atque eleganter factae, marginique adscriptae habebat exemplar illud, cum huc afferretur. Eas arbitror celeberrimi *Bigotii* esse. In omnibus istis ego sic versabor, ut contextus prorsus, qualem Parisiense hoc dat apographum, adhibeatur: in notis brevis servetur, nec minor ubique fides quam diligentia compareat. Julium Obsequentem Soceri mei nondum tibi redditum esse valde doleo. Sperabam iussu editoris Amstelodamo, ubi typis est descriptus, allatum: quod nisi hoc factum putassem, vel ex his locis in Belgium ad te, amicosque *Schefferi* alios misissem. Sero nunc quidem, sed tamen ago cum Bibliopola vestrate *Beunsio*, qui nundinarum causa hac in urbe nunc vivit, datis confestim ad *Bomios* litteris, ut exempla vobis praestet multis nominibus debita. Errori meo quaeso ut ignoscas: quam vellem novi quid esse, quod statim impertirem! sed partim typographorum desidia, partim aliorum culpa factum est, ut neutrum eorum operum, quae Holmiae excuduntur, nunc praesto esse queat. Etiam imaginem Soceri mei in nummo statui vobis mittere: estque ipsa in chalybe elaborata: sed nondum aversa nummi facies. Cujus cunctationis causa partim in aliis occupationibus artificis residet, partim in foeminarum morositate, quae in ornatu ἡ μακαρίτης exteriore vellent aliquid mutatum. Ope autem omnienitar, ut caeteris perfectis, nummus ad vos quamprimum apportetur. Librum

de *Lapponibus* apud *Regiomontanos*, si memini, auctiorem excudi senex noster, dum nobiscum fuit, dicebat: post id temporis nihil de eo auditum est. Mittam & hunc, cum fuero nactus: & interea navis, quae prima solvet ex portu *Holmiensi* ad vos itura *Lapponiam*, qualis jam ante est edita, tibi adferet; una cum notarum in *Justinum* auctario: hoc enim nondum te vidisse arbitror. Libros in *Germania* nuper editos inspicere nondum potui propter corporis imbecillitatem, quae summam per aëris intemperiem non finit in *tabernas bibliopolarum* exire. Ab aliis tamen memoratorum en tibi aliquot nomina. *Georgii Matthiae Konigii* Bibliotheca vetus & nova. *Henrici Kippingii* Antiquitates Romanae. *Joh. Adami Webers* annulus memoriae *Salisburgi* A. 1679. scriptum esse fertur *ὁ δὲ τῆς ἐκείνου* ad Principes. Laudatur & *Hofmanni* lexicon copiosum prorsus, resque omnis aevi complexum plurimas. Sed hujusmodi libros referri forsitan nolles. Veterum scriptorum illic editorum non habeo quemquam memorare post *Eutropium* cum *Metaphrasi Graeca* *Paeanii*, *Sextumque Rufum*, & *Zosimum* a *Christophoro Cellario* publicatos. Quos tibi jam dudum visos esse suspicor, cum A. 1678. prodierint in lucem. Adeo nihil apud nos est, quod indicatum per te *Lactantii* opus possit compensare. Hoc peregrinae naves primo vere, ut spero, nostris bibliopolis afferent. Paene fugerant me *Georgii Ursini* Phililologicae observationes, in quibus reprehentum audio *Schefferum* nostrum; quo jure, dispiciam diligenter. Etiam hunc mittam tibi, si (quod puto,) comparebit in hisce nundinis, eritque navis, quae velit in *Belgium*. Oro praeterea, ut si quis liber extiterit, quem velis cognitum, ne graveris eum indicare mihi: nihil poterit umquam optatius evenire, quam si qua in re tibi valero gratificari. Plura nunc scribere non finit corpusculi debilitas ex diuturna destillatione, indeque nato pulmonum vitio. Hodie tamen medici coeperunt meliora omnia spondere. Utinam & tu valere possis, vir summe, in mea multorumque aliorum, tui, & quas a vetustatis & barbariae morsibus felicissime vindicas, bonarum litterarum cupidissimorum gaudia perpetua! Upsaliae die x. Februarii Juliani, Anno *MDCLXXX*. A celeberrimo *Graevio* adscriptam mihi salutem laetor impensissime. Non cunctabor per litteras illi gratias agere, favoremque illius ambire. Iterum vale.

EPISTOLA CLXIX.

JOH. COLUMBUS

Nic. Heinso.

Vianam.

Vehementer admodum, sed varie tamen affecerunt me litterae tuae, ab aegroto scriptae indulgentissime. *Constantini* vero *Rumpfi* cura, viri humanitate plurima pariter ac amplissima dignitate illustris, recte in hanc urbem, inque manus meas perlatae. Valetudinis tuae asperioris nuntio me gravissime perculerunt; quam ut meliorem in locum rediisse quamprimum comperiam,

riam, summa est votorum meorum. Benignitate vero, quā me, viribus etiam infirmioribus utens, summa prosequeris, nihil non videor mihi consecutus; nec cessabo, dum spirare licebit, eam meritissimis praedicare laudibus, nisi quando, ne non tam ipsam celebrare, quam me insolentius efferre censear, cui tantum ea tribuit, verendum esse arbitrabor. Mea quidem valetudo, quam tibi curae esse perquam comiter significas, satis nunc est commoda. Soceri mei libros, quos promissi saepius, nondum a typographis exhibitos doleo: sicuti nec nummum imaginem ejus referentem, occupato propter Regias nuptias artifice. Nunc tamen certior paulo spes facta est, fore paucis diebus, ut lucubrationem de antiquis patriae meae insignibus videamus absolutam, quam ubi fuero nactus, Ill. *Rumpffio* tibi mittendam statim commendabo quam potero diligentissime. Opusculo de *Suecia literata* restat pars adoptivorum, cum indice & praefatione longiuscula. Segnes adeo non desinam operas urgere, donec perfecerint. De *Lapponia*, quam reculam oportuit, nihil audiivi. Bibliopola Naumburgensis *Carolus Wolffius* eam recepit denuo publicandam. Opinor eum causari exemplaria nondum omnia distraeta editionis prioris. Hujus itaque mihi exemplar die XVI II. hujus mensis, una cum Jul. Obsequente, & Auctario notarum in Justinum, quae propediem a nautis vestratibus *Elzevirio* allatum, tibi quoque ab eo redditum iri, *Rumpffii* bonitas jubet sperare. Si quid prius promissis inveniam adjiciendum, perquam libens faciam. Academici labores nunc se incipiunt remittere: itaque ad perpoliendum id, quod in Atticistam meditor, accingor totus. Valerium tuum videndi cupiditate summa flagro, quem grandi beneficio tuo nactus ubi fuero, quo par est loco munus rarissimum ac honorificentissimum haberi, a tanto praesertim viro profectum, si quid in me est bonae mentis, habebo. Vale, (ita deus propitius velit jubeatque!) & in favore tuo, quo nihil mihi optatius, persiste. Raptim Upsaliae d. xxx. Apr. Anno MDCCCLXXX.

EPISTOLA CLXX.

JOH. COLUMBUS

Nic. Heinsio.

Vianam.

Vehementer moveor in valetudine tua, Heinsi optime, animique tibi jam ante addictissimi ardorem intendit, quod ne aeger quidem cesses me alloqui epistolis, quae mihi (deum testor) auro gemmisque cariores existunt. Utinam haec mea firmiori nunc reddatur! alioqui valde metuo, ne loquacitate sua tibi creet molestiam. *Schefferi* nostri lucubrationes libenter a te lectitari gaudeo: sed pudori est nonnumquam praestitas esse caeteras totiens promissas. ego tamen ejus culpa immunis sum, saepius ab iis deceptus ipse, qui, cum nihil extricent, promissis me ducunt perquam uberibus. Librum tamen de *Patriae nostrae insignibus* huc deductum esse, ut communicari cum pluribus possit, quamquam necdum omnibus a caelatore perfectis, adest jam, qui nuntiet. Quare huic

huic tabellario ad certum hominem do literas, ut aliquot ejus exempla Ill. *Rumpfio* reddi curet. Alterum de *Scriptis & Scriptoribus gentis* nostrae opusculum haberi nequit, ante quam redierit e terris vestris typographus, ubi typorum causa emendorum haerere persistit. Nummum vultus *Schefferi* jam fracti morbo, digressumque meditantis, exacte referentem eidem Domino *Rumpfio* exhibitum esse spero, pluribus item in exemplis. oportuit in auro amici illius tui fulgere tibi imaginem: sed donec rescua mea, deo adjuvante, creverit, ut talem queam mittere, argenteum nummulum quaeso boni consulas. Praestabunt coheredes mei, nisi fallor, plura tibi exempla. *Mauffaci* Harpocracionem una cum procuratis tuo beneficio *Valefii* Notis tardius excudi dolendum est. Vellem sane typographi facultatibus consultum vel de meo: nam libri illius potiundi fateor me cupiditate magna incensum. Parva res est, quam dicam: sed oro ut pro magna facilitate tua ne graveris accipere, cumque illo communicare: ipse quo minus illi scribam, nominis ignoratio prohibet. Ad finem jam spectant ea, quae in Atticistam hac tempestate commentari licuit; videoque (utinam non fallar!) ad emendandum opusculum illud a librariis perquam negligenter habitum aliquid contulisse. In paucis tamen haesisse me fateor; nec dubium, quin lapsus sim subinde: sed si vel tibi vel celeberrimo *Graevio* visum fuerit adjectis observationibus novis reliqua perficere, tanto minus huic opusculo rubiginis, aut etiam prorsus nihil, adhaerere gaudebo vehementer. Ita ergo perpolitum libellum si typographus iste voluerit publicare, paratum me habebit conferre illi xxx. aut xl. thaleros imperiales, quos ille olim missis libellis aliquot compenset. Levis est pecunia, (fateor) sed nec Moeris cum notulis meis quatuor aut quinque folia majora, quae plagulas vocant, superabit, ni typis fuerit praegrandibus. Hanc conditionem si acceperit, tanto studiosius enitar in posterum, ut commodis ejus inserviam. Sin ille renuet, ut in his, modo faveatis vos, locis Moeris excudatur typis, videbo. *Balufii* Miscellanea tarde adeo a bibliopolis huc deportari miror. *Elzevirio* si quid forte scripseris, exemplar eorum unum oro jubeas ut mittat: pecuniam accipiet, quicumque ab eo delegabitur. Sed jamdudum vereor, ne te offendant tot minutiae meae. Clarissimo *Graevio* multam & officiosam oro salutem a me feras. Auctarium notarum in Justinum mittam illi propediem. Si quid praeterea fuerit inter libellos *Soceri* mei, quod inspicere vobis libuerit, etiam ex iis, quae numquam edita sunt, studium vobis meum approbabo. Quae sunt edita, horum vix nisi bina aut singula nunc reliqua sunt exempla. Sed tamen & haec habebitis, nec invita socru mea, istiusque coheredibus. Catalogum exhibebit opusculum de scriptis Suecicis, de quo paulo ante. In *Florum* notae *Schefferi* nondum inveniri potuere: si quid fuerit, mittetur quamprimum. Vale, vir summe, nimioque literarum incultui, quas ab aliis instantibus turbatus exaro, ignosce. Upsaliae Prid. Kal. Sextil.

EPISTOLA CLXXI.

JOH. COLUMBUS

*Nic. Heinsio.**Vianam.*

Justissimas pro misso a te Valerio Flacco gratias agere parantem novis me litteris tuis cumulavit Illustris *Rumpsius*. Suavissimis illis quidem, & quibus, (ut omnibus tuis) nihil mihi venit unquam acceptius: respectu tamen cessationis meae rubore nonnullo me suffundentibus, cunctantem pro munere praestantissimo gratum testari animum, totiesque promissum Atticistam differentem, donec iterum a te, secus ac merueram, comiter ac honorifice compellarer. Et Flaccum quidem impertiens nobis meruisti de studiis nostris insigniter: nec tempero mihi, quamvis urgeant multa magnis necessitatibus, quin ei lectitando vacem subinde: nequeo dicere, quantum laeter hunc poetam te vindicem esse adeptum, quamque vehementi me incenderit haec editio notarum cupiditate potiendarum: ut quem plurimis in locis veterum ope codicum peritissime curasti; eum depromptis etiam ab ingenii thesauro remediis praesentissimis perlanes, sibi ac nobis restituas. Oro autem ut pro solita facilitate, bonaque cum pace tua, finas me specimen quaecunque aut documentum dare libri supra quam dici potest cari, ex quo ad me pervenit, (ex-eunte, si memini, mense Octobri) cupide pervoluti. Libro VII. vers. CCLXIV. haec parenthesi percommode clauduntur,

— — — *Ibi ante alios qui tum mihi pulchrior omnes
Visus erat, longeque ducem mirabar & ipse.*

Juvat, inquam, haec distinctio plurimum. Sed quia loquitur Venus simulans Circen, patere arbitror esse scribendum, *mirabar & ipsa*. Verum hoc non dubito tibi jam deprehensum esse, quem recorder de typographi negligentia graviter esse questum. Quaeso igitur ne succenseas, de re minuta & prius animadversa monendo si sum importunus. Moeris ut nondum ad te redierit, partim expectatio responsi de Leidensi typographo, partim libri nonnulli fecerunt, Holmiae submissi, quos habere prius non poteram, quique videbantur subsidii nonnihil allaturi ad Moerim tot mendis liberandum. Nunc vestro permisso, nec negata spe hujus apud vos describendi typis, quod mittere eum liceat, gaudeo vehementer, gratiasque ago maximas. Plura de hoc, cum vel Dominus *de Geer*, vel quem proxime Ill. *Rumpsius* inveniet, vobis afferendum librum accipiet. Ipse optimus *Rumpsius* promisit se Upsaliam nostram prope diem esse visurum. Nummi memorialis exempla tarde ad vos perferri, imo Holmiae adhuc haerere doleo: praesertim cum rem leviculam vobis tamen non penitus ingratam fore intelligam. Metuo valde, ne nihil ejus sit placitum, nisi facies fortasse senis nostri vere ac diligenter expressa; sed confecti morbo, fatoque jam imminentis. Reliquus habitus miseriam refert nescio quam: pravo ac molesto metu artificis, ne procures offenderet, si mundiore aut paulo splendidiore dedisset. Emblema vero multum abit ab instituto b. *Schefferi*. qui vel corylum jactibus viatorum laesam, vel aratrum detritum & fractis rotis

inutile voluit referri. at artifex aratrum Suecicum sine rotis, & quale in usu cum maxime solet esse, exhibuit. admonitus negavit corrigi posse. Quae de literariis nostrorum conatibus animo benevolo, sed corporis destituto viribus optimus idem senex festinavit, sic foedavit typographus, ut verear illi rei omen inesse. Integra verba nonnunquam, interdum & plura, omissa sunt. ut in praefatiuncula nostra ad Illustriss. Comitem de la Gardie (a. 3. vers. 14.) *luculentiora dedit in eandem Sueciam nostram*, desunt voces *amoris & fidei*. Paulo ante vero hanc septentrionem edidit. Prooemium prolixius, quod Cl. Schefferi est, & in hoc opusculo partem facere debebat potissimum, minutis prorsus oculosque fugientibus literis, omisso nomine auctoris, expressum esse molestissime ferimus. Neque communicata mihi sunt haec, antequam se per omnia fudissent exemplaria. Verebantur enim sordium suarum conscii sibi homines, ne novos sumtus facere cogerem. Meliorem chartam saltem in quibusdam exemplis adhibuisset, si quam vivo adhuc optimo socero fas duxissem de opusculis ejus curam gerere. diu enim est, cum typographus haec inchoavit. Sed jam nimis loquens rursus epistola te fatigo, cui nihil aut parum inest tamen, cujus in compensandis utcumque iis, quae de libris optimis prolixè narrat, ratio haberi possit. Vale, vir maxime, faveque porro. Upsaliae a. d. 17. Dec. Anno MDCLXXX.

EPISTOLA CLXXII.

JOH. COLUMBUS

Nic. Heinso.

Vianam.

Post morbum non levem paulo nunc firmiori mihi litteras tuas nudius tertius afferebat Holmiensis tabellarius, quarum lectione cum mire videar refectus, illud tamen vix fero, tuae quoque valetudini hanc hyemem infestam fuisse: deumque precor, ne nimium tibi nocuisse velit eam, quae dein secuta est magna caeli intemperies. Me quidem sic vexavit crebra vertigine ac insomniâ, ut nondum capiti meo vigor suus constet; visio nescio quibus tenebris interfusus turbata, nec non & alia hebetudo, perdifficilem reddat vel brevis epistolae scriptionem. Accedunt medicorum interdicta, quae plane distinent a calamis librisque animi sane aegrum ac moerentem. Itaque nec Valerium Flaccum nunc quidem legere licuit: quem cum brumae superioris tempore pervolverem, fructum cepi maximum ex locis plurimis peritissime (si tamen ulla de his mihi superest judicandi facultas) a te restitutis. Animadverti nonnulla Holmensis etiam codicem (quod & ipse doces) contulisse. quem tuo mihi notum judicio post te diligenter perlustravi. In eo loci sunt, unus & alter, saltem non ineptas lectiones praeferentes. Sed utrum fugerint haec tuos tot volumina percurrentis oculos; an consulto sint praeteritae, quia non probatae, minus liquet. Tamen spectata bonitate tua fretus, audebo nunc eas indicare: obsecrans, ne sedulitatem hanc fors intempestivam gravius accipias. lib. 1. vers. 353. *Aut unde Haemoniae molem ratis? liber, quem dixi, moles habet.*

Me-

Memini quae notaveris ad Ovid. Epist. xii. vers. 84. Sed Valerii locus similior videtur huic Maronis, *Unde tremor terris*, aut istius, *omnes unde amor iste, rogant*, aliisque. Eod. lib. ii. vers. 518. *Ille simul molem horrificam*: rectius, opinor, liber, quem dixi, *Ille* bellua nempe aut *pestis*, de qua vers. 498. & vers. 503. *Illam incumbentem* &c. lib. iv. vers. 500. *sed miseras etiam prohibere sorores*. Idem liber, *miseros*. Phinea nempe, & hos qui cum eo erant. vers. 587.

Verum inter medias dabitur sic currere cautes.

Idem lib. pro sic commodius, ut videtur, si. & lib. v. vers. 609. *ἀντὶ τῆς habenae, habenae*. sermo enim est de fundis, ut vides. Non satis memini, priusne monuerim lib. vi. vers. 229. arbitrari me legendum, *Vadit eques*, non *Vidit*. Pag. 21. vers. 649. leve est mendum typographi *Tysbi* pro *Tiphy*. Plura non occurrunt: nec superesse puto. Si quid tamen posthac a me poterit deprehendi, non cunctabor, quoniam permittis, indicare. Moerim describam quamprimum, mittamque, nam haecenus valetudo nimis incommoda fuit. Vale; vir summe, festinantique propter cephalalgiam, quae me premit, ignosce Nummos *Schefferi* nostri vultum referentes apportabit vobis *D. Bedowaldt*, hisce diebus in Belgium abiens, ut scribit Ill. *D. Kumpfius*. Carmen quod una affert, misi petenti *D. Rumpfo*, sed non ut vobis porro mitteret. nunquam enim quicquam in hoc genere valui perficere, quod vestris oculis subjici dignum sit. Plane me antehac nescio & invito illuc defertur: sed quia sic contigit, oro des veniam Iterum deum supplex veneror, ut te quam diutissime vivere ac valere velit jubeatque. Mart. ciciocLXXXI.

EPISTOLA CLXXIII.

NIC. HEINSIUS

Thom. Reinesio.

Lipsiam.

Recens a lectione epistolarum tuarum, vir summe, quas forte proximis diebus in hac civitate venales offenderam, & tui admiratione plenus, non potui temperare mihi, quin quaecunque id est, quod hic vides, literarum ad te darem. Excusabit, ut spero, nonnihil hanc parum tempestivae scriptio- nis confidentiam, quod immortalibus chartis nomen meum a te intertum non uno loco deprehendi. Id enim ut perquam benigniter factum esse facile agnosco, ita nexu aeterno benevolentia tam profusa, & inexpectata me sibi adstringit. Utinam vero (est quippe liberius paulo tecum expostulandum nunc mihi) utinam manu largiore nonnunquam lautitias tuas nobis apponeres, quas in penu Bibliothecae interioris luculentas asservare diceris! Quas enim haecenus, tam parce prompsisti, eae orexim nobis acuunt, non tollunt. Liberandum tibi est invidia omni ineptiarum ac perditae existimationis hoc saeculum: quo nullum unquam fuit pessimorum librorum feracius. Da quaeso operam, quod unice potes, ut inter tantam soli ac avenae sterilis copiam, ubique plus

aëquo enascentem atque luxuriantem, bonae etiam frugi nonnullus sit locus. Variarum lectionum quod tibi edendum restat, si praelo quamprimum commiseris, insigni sane beneficio rem litterariam demerearis. His quoque, quae *Rupertus* tuus olim Romanae antiquitatis illustrationem spectantia magno labore molitus est, nec absolvit, supremam manum aliquando impone: ita fiet, ut singularem pietatem manibus amicis ac nobis gloriae tuae studentibus probes, qui summam eruditionem orbi universo jam approbasti. In sola doctrinae conscientia omnem vigiliarum fructum ac praesidium laboris exantlati collocare noli. Cum vivus tuis laudibus interesse possis, quid opus debitam mercedem in exequias differri? Mirati sumus hactenus, in tam paucis chartis tam multa nos doceri potuisse. Reliquum nunc est, ut ubertatem diligentiae tuae & lucubrationum divitias incipiamus venerari. Audeo tibi hisce precibus odiosus esse, quod privata vota mea cum emolumento publico conjuncta sint. Caeterum inscriptiones antiquas plures olim ad te ex Belgio & Italia misi, quas videris accepisse. Mitterem nunc denuo non paucas, nisi novam post *Gruterum* farraginem marmorum antiquorum *Franciscus Barberinus* Princeps, ut scis, litterarum amantissimus, typis describi curaret, quas totum quadriennium sub praelo typographico jam desudare sum edoctus. Nasonem animadversionibus meis illustratum publico nuper dedi, nec tamen qualem speraveram aut volebam ipse. Tumultuaria quippe & incondita haec opera fuit, quod respublica juvanda domo me avocaret, dum praelo libellus committebatur. si quisquillas illas te dignas judicassém, eorum jam exemplar ad te perlatum foret. Curis jam nunc secundis me coepi accingere, praesertim cum amici Galli Italique nova veterum membranarum praesidia mox praesto fore jusserint sperare. Utinam ex bibliothecis Germanicis, maxime vero Saxonis, erui nonnihil tuo beneficio possit, quo editio nova auctior atque ornatior prodeat in lucem! dum auxiliares peregre hujusmodi copias expecto, Claudianum denuo recensere coepi, quem assiduis precibus flagitant typographi. Ad Virgilium postea me convertam, cujus longe vetustissimum exemplar inter alios codices Medicea suppeditavit Bibliotheca, cui epigramma hoc adscriptum offendi. Vale, vir Celeberrime, magnum Germaniae ornamentum. Dabam Holmiae Suecorum Anno MDCLXI. a. d. XVI. Novemb. Juliani.

EPISTOLA CLXXIV.

NIC. HEINSIUS

Thom. Reinesio.

Lipsum.

Triennium jam est, si recordor probe, & quod excurrit temporis, vir celeberrime, quando *Lucae Langermanno* per Saxoniam vestram iter facturo, dum ob negotia quaedam Viennam Austriae domo avocatur, litteras ad te ferendas dedi, quae & cultum singularem, quo te meritissimum complector, jampridem testabantur, & ne salutator prorsus ἀσύνβητος adessém, sententiam
tuam

tuam explorabant super loco perdifficili veteris epigrammatii, quod *Turcius Rufus Apronianus VC. & Inl.* Virgiliano codici, qui in Medicea Florentiae Bibliotheca asservatur, in gratiam *Macarii VC* fratris sui abs se recognito ac castigato, praefixerat. Ubi quid per *penaces* designaretur, te sciscitabar. Agit enim Asterius de circensibus a se sub consulatum suum ordinarium exhibitis. Initium epigrammatis haecenus, ut opinor, inediti tale est.

Distinxi emendans gratum mihi munus amici

Suscipiens, operi sedulus incubui:

Tempore quo penacas circo subjunximus, atque

Scenam Euripo extulimus subitam &c.

Hanc epistolam, quia *Langermannus* noster postea significavit, hospiti nescio cui, ad quem Lipsiae divertebat, ad te curandam fuisse traditam, cum a sese ob summam festinationem fieri non potuisset, facile suspicatus sum aberravisse illam in via, & ad te perlatam non esse. Sub eandem forte tempestatem rogatus per amicum in aula Gallica gratiosum & potentem, ut in chartam ne graverer conjicere nomina illorum, quos per orbem Christianum in omni litteraturae homines aetatis nostrae praecipuos censerem, haud distuli obsequentem jussis me praebere: teque, ut debebam, inter Germanorum paucos laude ac commemoratione promeritis sum prosecutus. Nec multo post intellexi, Regem Christianissimum, pro incredibili suo in universum eruditionis nomen studio, stipendium annuum viris saeculi nostri praestantioribus, tam exteris, quam Gallis compluribus, decrevisse. Comperi etiam indicii mei habitam fuisse rationem, nisi quod te, *Gronovium*, ac *Ferrarium*, illum dico, cujus de *Re vestiaria* volumen eruditum publice circumfertur, in eo numero omissos esse cum dolore ac indignatione adverti. Sed errorem illum hic tandem annus in meliora mutavit, monente eodem amico meo. Is est *Johannes Capellanus*, Regi Christianissimo a consiliis, vir sanctissimis moribus, tum in poësi vernacula magni omnino nominis, mihiq; jam per lustra quatuor artificissima necessitudine conjunctus: Regi adhaec, ac apud Regem praecipuae auctoritatis Ministris, atque in his Illustrissimo *Colberto* admodum acceptus: qui subindicabat proximis litteris, pervicisse tandem desideria mea, missumque non ita nuper nomine regio ad te munus quadringentorum Joachimicorum. Quae munificentia magni Principis ut propria ac perpetua tibi obtingat, auctor tibi sum, de operum tuorum parte aliqua Majestati ejus quamprimum dedicanda. Interim per epistolas non Regi tantum, sed Dn. etiam *Colberto*, & si me audis *Capelano*, gratum praestare te potes; quod ab aliis, quibus idem honor est habitus, confieri solet: Tu, quaeso, hanc admonitionis nostrae confidentiam in partem haud malam interpretere, cum ab illo profisciscatur homine, qui te veneratur ac observat in paucissimis. Vale, exarabam festina manu. Holmiae Suecorum
CICIDCLXVI. a. d. III. Non. Majas.

EPISTOLA CLXXV.

T H O M. R E I N E S I U S

*Nic. Heinsio.**Holmiam.*

A Bundanter insignem animi tui bonitatem, & amicum adversus hominem hunc adfectum jam olim publicasti, cum studium ejus in conquirendis Inscriptionibus adjuturus e penu vestro submittebas, de quibus Posteritas tibi solvendi *μηνύτρ* rea est. Comparent ea omnia & singula cum grato nominis tui cultu in Symphoremate meo; inde beneficium istud tibi apud me non periisse intellexeris. Non stetit intra hoc amor tuus, sed subinde crevit in majus, ut non dubitaveris Regis Christianissimi Ministris me ostendere (significabat hoc ipse *Capellanus*) & quos alius sibi rapuisset favores, mihi conciliare praevalueris. Beneficii adeo, quod a Rege Maximo nec opinanti nec merenti venit, primum te auctorem agnosco & praedicabo semper. Amicam vero de modo utendi talibus admonitionem absit ut male interpreter: gratissima ea mihi vel ideo, quod ad mentem istam perscripseris; Feci enim ante, quod fieri consulebas, per epistolas, quarum unam hucce addidi; alteram ad Ill. Dn. *Colbertum* accipies paulo post e manibus *Langermanni*, apud quem per amicum mea ad Petronium e Dalmatia deponam; adjiciamque iis pauca alia, quae interea dum emissus fuit, adnotari digna visa sunt. A Cl. *Scheffero* interdum dissentire licuerit mihi, spero, itemque rogo. Gallorum de Fragmento illo judicia, quae Parisiis vulgata esse dicuntur, nondum cognoscere potui, aveo autem avide inprimis istud *H. Valesii*. In epigrammate *T. R. Aproniani Asterii* (facis COS. cum Protogene a. D. 449.) *Penates* sunt *πίνακες, σάβιδες*, tabulae, axes, asseres, quorum coaxatione lcenam subitariam super Euripo Circensibus se extulisse dicit, cui interpretationi sequentia fidem fortassis adstruent. *Pinax* Graccum exaratum a scriptore Latino solenni more, quo omnia fere Graecorum in suam Linguam vertebant Romani, praesertim illi sub deliquiis Latinitatis seculo quarto quintove; Quinimo veteres ita consueverant; Petronius, a quo recens sum, in brevissimo scripto dixit, *Bisaccium, Tangomenas, Eupatria, Cataphagae, Bacolestiae, Balaniscus, Anathymiasis, Macaristus, Gennaei, Clepo, Aginare, Eccritus, Chorda, Sycamina, Matteae, Epidipnis, Battarissare, Agaga, Canera, Pyriare, Priapiscoti, Maetrilla, Matrillem, Casauras, Casalbidium, Embolum*, pag. 21. pro ed. *Ampulla, Melitari, Carycae*. Permutatione vero vocalis secundae & tertiae Latinorum nihil frequentius: hinc in faxis *Spindon, Mancips, Bedua, Emet, Fecet, Fescu, Vertutem*, in libris *Delexus, Menerva, Doleum, Tesana*, pro *Ptisana, Pubeda*. Neque de neglecta *m & a* curandum est; nam & sic antiqui, Lucretius, Virgilius & tuus Ovidius. In Eponymologico, quod partem feci Commentarii ad Inscr. *Apronianos* xxiv. digessi, & inter eos quendam *Apronium* commentatorem Virgilii: quem & *Jul Pomp. Sabinus*, Commentario ad Virg. & *Dan. Gaetanus* ep. ad *Pet. Mannam* scripta

Anno

Anno 1486. & *Scipio Tettius* catalogo, ac *Simlerus* laudat: Is *Apronianus* an est tuus iste cum pleniori nomine? Poëtarum imprimis studiosum fuisse video; nam & *Sedulii* opus Ecclesiasticum e schedis collectum, ad omnem elegantiam vulgavit, ut est in conservato a *Sirmondo* ad Ennod. l. i. ep. 24. epigrammate, cui *Turci Asterii* nomen praescriptum. Optime Vale, & amorem illum tuum mihi persevera; ego tibi meum, si quisquam, fidelissime. Scr. Lipsiae 9. Jun. Anno v. a. c. c. i. c. l. x. v. i.

EPISTOLA CLXXVI.

NIC. HEINSIUS

*Thom. Reinesio.**Lipsiam.*

Quando merentibus per me bene est, nihil mihi inde vindico, praeter unam eamque maximam voluptatem, vir celeberrime. Tibi igitur soli acceptum refer, quicquid aut honoris aut emolumenti a munificentia Regis Christianissimi rebus tuis accessit. Floret magni Principis aula Ministris litterarum cognitione pulcherrime instructis, inter quos ignotus esse aut latere nequaquam potuisti. Memores, fateor, & partium suarum gnaros sum adhortatus, ut tui ratio haberetur, quam haberi jam ante hoc triennium oportuisset, cum inter praecipua seculi ornamenta a nemine non numeraris eruditionis studioso. Si quid tamen hinc praestiti, id omne Regis Augusti a me datum est existimationi, cujus cum pudore ac opprobrio praesentissimo junctum fore videbatur, si tibi uni parcus esset, qui manum tam profusam praeberet aliis compluribus, modica omnino scientiarum laude conspectis. Cum *Johanne Capelano*, optimo integerrimoque mortalium, plurimum necessitudinis totis jam quatuor lustris mihi intercedit, quam amicitiam tamen, etsi persancte semper habitam a me uniceque observatam, numquam sic mihi sum gratulatus, uti nunc facio, quando illum desideriis non minus meis in re longe aequissima, quam Regis sui gloriae consultum ivisse insigni argumento perspexi. Ad *Petronii* fragmentum quae nuper annotasti, videbo, ut tua omnia lubentissimus. Ego libellum hunc, quae nunc incumbit mihi occupationum publicarum moles, semel, ut quod res est dicam, haecenus idque festinanter admodum, perlegi: perlecturus cura cum majore, ubi comparebunt hinc terrarum, quae tu ornando scriptori politissimo contulisti. Nec *Schefferum* nostrum offendent, puto, sicubi studio veritatis impulsus ab illo modeste dissenties. Ex scriniis meis nil erui nunc datur, quod hostimenti vicem occupet, praeter novam poematum meorum editionem, quem *Langermannus* propediem ad te curabit. Aliud omnino agens in gratiam typographi, flagitatoris tantum non assidui, eam tempore maxime alieno adornavi. Bellum enim, quod ab hoste parricida, & rerum domesticarum nuper conturbatore, invitis nobis & nolentibus nulla de causa intentatur, totum pro-

proximo biennio a privatis me avocavit, dum id unice cavendum mihi incumbit, ne Suecos, rerum novarum plus satis studiosos, in partes nobis adversas haec procella abripiat. Has machinationes vix nunc tandem toto conatu sumus amoliti. Operam meam quod laudas in conferendis antiquis Inscriptionibus, benigniter quidem tu facis, sed parum ex merito nostro. Non enim recordor, me quicquam eo contulisse, etsi complura id genus penes me exstabant jam olim, praeter Zelandicas fortasse nonnullas, West-Cappelanas, si memini. Nam quas ex Italia per *Gronovium* ad te curavi ante hosce annos *xiii*. eas ille postea negavit mihi ad sese perlatas fuisse. Epitaphia erant octo aut novem numero, quae aere meo in urbe redemeram. Reliqua, quae magno numero descripsi, praesertim ex libro *xxxiv*. antiquitatum Romanarum *Pyrrhi Ligorii*, a *Langermanno* fortassis acceperis, cui itineris hujus tum socio mea patebant omnia. Opus istud *Ligorii*, quod in triginta fere distinctum volumina, marmoribusque ac nummis gemmisque creberrimis ornatum, nec haecenus editum, *Christina Borbonia* Henrici Magni Galliarum Regis filia, Sabaudorum ducis mater, cum in ducali Taurinensium servaretur bibliotheca, me conciliante, munus ad Reginam *Christinam* misit, ex quo opere aliquot millia marmorum ineditorum depromi possent: quae collegit ipse ex parte operis trigessimae quarti, & quae ad rem divinam ac religionem potissimum sunt referenda, numero haud pauca, ex Barberina, si recordor satis, bibliotheca, in qua apographum ejus libri servabatur, depromsi beneficio *Lucae Holstenii*. Sed de his alias. Virgilius Mediceus ab Asterio correctus, praeclarum antiquitatis monumentum est. Codices pervetustos plurimos cum viderim in caecis bibliothecis, nullum tamen vetustiore a me inspectum fuisse memini. Carpenſe Virgili exemplar est *Aldo Manutio* in orthographia. Epigramma Asterii, uti post Bucolica legebatur, integrum subjiciam. Alia fortassis libri ipso exordio fuerant adscripta, quod non liquet, cum sex aut octo paginae prioris codicis perierint. *Henricus Valesius*, vir doctissimus, per *Penaces* intelligit congressum variarum ferarum in arena. Cum consules Romani sub auspicia anni novi Ludos scenicos, & penaces, seu ferarum pugnas ederent. Hoc sequenti proxime disticho ubertim adstrui idem *Valesius* contendit. *Penaces* igitur quod in *Historia Augusta Pancarpum*. Quamquam potius videtur scribendum *Paneces*, *πανεχες*, ὅτι πάντες ἔχουσιν, & recte subdidit τὸ *junctim*, ut tria haec spectacula uno eodemque die exhibita fuisse fiat manifestum, quod & ex sequentibus liquet, *Festorumque trium permanet una dies*. Haec ille fusius persequetur in commentario suo de arte critica. Tu elige vir summe, tuamne malis interpretationem, an Valesianam veriore existimes. Vidi & ego codices Sedulii vetustos, qui Asterii nostri epigramma, quod *Sirmondus* ad libri primi epistolam *xxiv*. Ennodii prodidit, & cujus tu meministi, prae se ferrent. Quamquam, cum in schedis membranaceis Sedulii Barthiani *Advers.* *xii*. cap. *xix*. *Turcius Rufius Asterius Quintus* indigitetur editor Sedulii, de nepote potius aut filio Asterii nostri, quam de nostro Asterio id capiendum videtur. Alium Apronium emendatorem illum Virgilii vetustum esse opinor,

de

de quo quod monuisti gaudeo & gratias ago. *Epistolam* ¹ *Danielis Gaitani* nullo vidi hactenus. Haec inservire nostris lucubrationibus poterant, quas Maroni satis operosas dedimus, collatis inter se veterrimis divini poetæ exemplaribus. Utinam alii sint in promptu codices, ut liceat hanc telam aliquando detexere. Sed jam nimii sumus, & de verbosa allocutione plus satis fatigavimus. Vale, vir summe, & mihi, ut hactenus, studere in posterum perge. Exarabam Holmiae Suecorum, pridie Idus Quintil. c1515CLXVI.

¹ *Daniel Cajetanus* vocandus: Cremonensis fuit, natus Anno 1498. Professus literas humaniores Mediolani; de cuius infelicitate vide *Pierium Valerianum* lib. 11. pag. 145. Vitam ejus exhibet *Francis. Arisius* tom. 1. Cremonae literatae pag. 388. qui non egestate confectum & mendicabundo similem, sed peste correptum obiisse Anno 1528. scribit. Epistolas ejus & poemata, & alia adhuc inedita, & servata in bibliotheca convent. S. Francisci Cremonae, idem *Arisius* passim in isto opere laudat. Haec vero epistola ad *Petrum Mannam*, est praefatio ad *Julii Pomponii Sabini* commentarios in Virgilium, editos apud Oporinum Anno 1544. ut etiam mox *Reinesius* docet.

Quia vero *Heinsii* in Virgilium commentarii nondum in lucem emerferunt, hinc inter schedas Heinsianas, de Codice Mediceo, & Asterio, illorum particulam repertam hac occasione vulgandam duximus; quia in his epistolis saepe *Heinsius*, de illis viros eruditos consuluit. Vide cccxciv. tom. 11. ad *Papenbroch.* & ad *Gronovium* cccclxxix. tom. 111. pag. 475. & alibi. post *Heinsium* de Asterio, & de Sedulio egerunt eruditissimi viri, *Noris* ad Cenotaphia Pisana Dissert. 1v §. 1. & *Jul. Fontaninus* de Antiquitatibus Hortae lib. 11. cap. 111. §. 5. & de *Turcio Aproniano* & gente *Apronia* nuper doctissimus *Muratorius* dissert. 1. & 11. ad Paulini Poëmata. tom. 1. Analect. pag. 141. Deinde ad *Turcium Apronianum* refert *Rufini* epistolam ante interpretationem sententiarum Sixti 11. nuperus earum sententiarum editor, vir eruditissimus, *Urb. Godofr. Siberus.* in prologo pag. 25. ille vero *Turcius*, est *L. Turcius Secundus Apronianus*, quem *Heinsius* avum *L. Turcii Aproniani* fuisse docet.

Omnium, quotquot videre mihi contigit, Maronianorum codicum tenuissima exaratus in membrana veterrimus praestantissimusque est habendus suo jure, qui Florentiae ad Divi Laurentii adservatur in Medicea bibliotheca. Nam quamquam in Vaticano armario hisce usurpavi jam olim oculis tria nostri poetæ exemplaria perquam vetusta, & litteris aeque ac Mediceus ille formae quadratae majoribus, sive, ut vulgo nuncupantur, capitalibus Romanis exarata, quorum unum e Palatinatu superioris Germaniae huc translatum fertur, ad senium tamen laudatissimi codicis, quo sum usus, haudquaquam accedebant: quod tamen minime referendum arbitror ad Trajani Imperatoris tempora, uti censebat *Paulus Gabianus*, qui anno saeculi superioris Lxv. ex hoc ipso codice collectas variantis scripturae lectiones Brixianis typis in lucem curavit emittendas: non facto tamen juris publici perinsigni testimonio, quod post Bucolica, quae primo illic loco exhibebantur, insertum, lucis haud parum foeneratur cum tempori, quo codex exaratus esse possit videri, tum factis quoque Romanis. Quam *Gabiani* supinitatem ut quodammodo refarciamus, proferemus inscriptionem pulcherrimam, ipsa, ut opinor, *Asterii* viri perillustri manu conscriptam, qui codicem non quidem exararat omnem, sed recognoverat locis plurimis ad fidem vetustiorum exemplarum, aque naevis non paucis per librarium, ut fit, commissis vindicarat. Verum de ipso

codice nonnihil praemitemus, qui *Rudolphi Pii Cardinalis Carpenfis* cum fuisset; ab illo tabulis supremis Vaticanae bibliothecae legatus esset; furtoque interceptum suspicatur, ubi tamen sua negat aetate comparuisse *Aldus Munutius* nepos, qui cum in opere Orthographico hunc librum passim collaudet, testemque multae advocet auctoritatis, sub vocabulo tamen *Aetherius* praecipue commendat. In potestatem *Achillis Statii* Lusitani postea devenit, uti epigramma frontispicio libri ab ipso *Statio* adscriptum testatur, qui ejusdem fide pererudit in Catullum ac Tibullum animadversionibus frequens etiam subnuitur, cum de Orthographica ratione est agendum. Incipiebat autem ab Eclogae Sextae, versu XLVIII. senis septenisve paginis prioribus mutilatus, forma codicis, quam quartam vocant. Margini glossematia nonnumquam ac interpretamenta, sed rara, adlinebantur, minuto quidem ac diverso scriptionis characterē, qualem nos *cursorium* sive *cursum* appellamus, ipsa tamen Maroniani contextus scriptura vix recentiora, ac supparem fere aetatem prodentia, ut haec quoque ab Asteriana manu proficisci vix dubitemus. Georgicōn porro aut Aeneidos libris nulla, ut in aliis codicibus, argumenta praefixa. Post Bucolica autem cum totius paene paginae spatium vacaret, haec litteris itidem uncalibus legebantur exarata.

TURCIUS RUFIVS APRONIANVS ASTERIVS VC. ET INL.
EX COMITE DOMEST. PROTECT. EX COM. PRIV. LARGIT
EX PRAEF. VRBI PATRICIVS ET CONSUL ORDIN. LEGI ET
DISTINXI CODICEM FRATRIS MACHARII. VC. NON MEI
FIDUCIA, SED EJVS, CUI SI ET AD OMNIA SUM DEVOTVS
ARBITRIO XI. KAL. MART. ROMAE.

DISTINXI EMENDANS, GRATVM MIHI MVNVS AMICI
SUSCIPIVS, OPERI SEDVLVS INCVBVI.
TEMPORE QVO PENACES CIRCO SVBJVNXYMVS, ATQVE
SCENAM EYRIPPO EXTVLIMVS SVBITAM.
VT LVDOS CRRVSQVE SIMVL, VARIVMQVE FERARVM
CERTAMEN JVNCTIM ROMA TENERET OVANS.
TERNVM QVIPPE SOFOS MERVI, TERNA AGMINA VVLGI
PER CAVEAS PLAVSVS CONCINVERE MEOS.
IN QVAESTVM FAMAЕ CENSVS JACTURA CVCVRIT.
NAM LAVDIS FRVCTVM TALIA DAMNA SERVNT.
SIC TOT CONSVMPITAS SERVANT SPECTACVLA GAZAS,
FESTORVMQVE TRIVM PERMANET VNA DIES.
ASTERIVMQUE SVVM VIVAX TRANSMITTIT IN AEVVM,
QVI PARCAS TRABEIS JAM BENE DONAT OPES.

Vides hunc codicem ab *Aproniano Asterio* emendatum ipso consulatus sui ordinarii tempore. Versu epigrammatis nono, pro in *quaestum* margini adscriptum erat *pretium*, quae diversa scriptura & *quaestus* Asterium auctorem videtur habuisse, ambiguum quid praeferrī oporteret. Ego tamen *quaestum* pretio hīc praetulerim. *Asterios Apronianos* fuisse nobilissimos Romae non uno saeculo,

atque adeo Caesarum cognationi innexos post videbimus. Illud primo dispi-
ciamus, cum *Asterii* duo consules Ordinarii numerentur in Fastis Romanis,
quorum alter cum Protogene anno aerae Christianae ccccxlix. alter Praesidii
collega anno cccxciv. consulatum gesserint, ad utrum horum sit referenda,
quam publicamus, inscriptio, ut de codicis vetustate liquidius aliquanto res
tota sit nobis in comperto. Annorum xlv. intercapedo consulum utrumque
distinguit, ut videmus. Quare non est ut post annum cccxciv. emendatus
ac distinctus ab *Asterio* sit censendus, etiamsi ad posteriorem referatur consula-
tum. Quid quod ipsum codicem munus accepisse semet a *Macario* V. C. testa-
tur *Asterius*? ut liber nonnullo tempore ante hanc illius recognitionem exara-
tus possit censerī, ac proinde annorum mcc. ut minimum aetatem referre.
Praenomen autem suum neque hoc expressit loco *Asterius*, neque id in fastis
comparet. *Lucium* tamen fuisse dictum cur suspicari liceat, quod praenomen
usitatum *Asteriis*, ecce pulcherrimam apud Gruterum in magno opere pagina
ccccclxxvi. num. 7. inscriptionem.

ASTERII.

L. TURCIO APRONIANO V. C.
FILIO L. TURCI APRONIANI V. C.
PRAEFECTI. URBIS. NEPOTI
L. TURCI. SECUNDI. C. V. CONSULIS.
QUAESTORI. PRAETORI. QUINDECIM
VIRO. SACRIS. FACIUNDIS. CORREC-
TORI. TUSCIAE. ET. UMBRIAE. OMNI
VIRTUTE. PRAESTANTI. STATUAM
EX. AERE. ORDO. SPOLETINORUM
AD. MEMORIAM. PERPETUI. NOMINIS
CONLOCAVIT.

CURANTIBUS. FL. SPE. V P. ET
CONDONIO. TAURO JUN.

POST. AMANTI. ET. ALBINI. CONS.

Est autem dedicata haec inscriptio anno aerae Christianae cccxlv. quo
consules fuerant *Amantius* & *Geionius Rufus Albinus*. Eundem *Rufum Al-*
binum fuisse opinor, quem sub Constantino Aug. praefectum urbi, perperam
Rufinum vocant *Albinum*. [Reddendum autem *Amantio Postumii* nomen in Fastis
ex hoc lapide, qui *Onuphrium Panvinium* erroris praeterea convincit, referen-
tem *Turcii Secundi Asterii* consulatum ad annum ccccxlv, quo consulum
fuisse *Turcium Rufum Apronianum Asterium*, Maroniani codicis emendatorem,
reor. Nam alter Asteriorum consul ordinarius in Diptycho, quod vir erudi-
tissimus *Alexander Wiltbemi* in appendice hujus argumenti publico dedit,
Flavius Asterius dicitur: de quo plura nos in sequentibus. Certe cum in mar-
more antiquo *L. Turcius Secundus* Consul constituatur *L. Turcii Aproniani* illius
avus, cui dicata est inscriptio sub annum cccxlv. consulatus iste totos annos
cl. praecesserit annum, quem illi consuli una cum Protogene assignavit *Onu-*

phrius, a vetusto lapide deceptus, uti videre est apud ipsum in Fastis ad annum cccxcvii. Quid quod *L Turcius Secundus* Consul dicitur tantum, non addito ordinarii titulo, ut consulem suffectum fuisse oporteat. Sic apud Gruterum pag. MLXXIX. *Paetino & Aproniano* Cos. qui itidem suffecti. *Apronianum* nomen videntur *Asterii* adscivisse, quod adoptione in *Asteriam* gentem ex *Apronia* transiverint, cujus nominis laudatur consul sub M. Aurelio Antonino Aug. unde. S. C. *Apronianum*. Apud Ammianum Marcellinum mentio variis fit locis *Aproniani*, praefecti urbis sub Juliano Caesare Aug. qui ea in dignitate usque ad Valentiniani tempora perstitit. Is apud Gruterum pag. DCXLVII. n° 6, 7. bis *Turcius Apronianus* appellatur, nullo addito praenomine, quod tamen *Flavium* fuisse colligas licet e codicis Theodosiani libro XIV. Tit. de Suariis, quo & inscriptiones Gruterianae jam a me designatae spectant, & quod Ammianus refert magnam huic *Aproniano* rei annonariae curam fuisse. Codicis autem Theodosiani lex cum incipiat, *Imp. Julianus Aug. FL. Aproniano suo S. Jacobus Gothofredus*, vir sane praeclarus, corrigendum censet, sed frustra, *Imp. FL. Julianus Aug. Aproniano suo S.* cum *Lucium* potius praenomen *Apronianis*, quam *Flavium*, in usu fuisse contendat. Atqui *Flavios* etiam dictos *Asterios* ex alterius consulis praenomine, quod Diptychon Wilthemianum servavit, liquet, id vero in gratiam Imperatorum, quorum plerique *Flaviam* nomen sub haec tempora adisciebant, videntur fecisse: quemadmodum sub tempora florentis reip. liberti & clientes patronorum sibi vindicabant nomen. Neque enim persuadeor, ut credam Consulum ordinariorum alterum non *Asterium*, sed *Astyrium* dictum; quamvis *Astyrii* nomen ad posteriorem consulem *Jacobus Sirmondus*, vir longe doctissimus, referri oportere censeat, ad priorem *Wilthemius*, quod in vetustis Chronici Idatiani, Marcellini comitis, Prosperi, aliorum codicibus modo hic modo ille *Astyrius* dicantur. Adde Eusebium Historiae Ecclesiasticae lib. VII. cap. 64. cui martyr ille, cujus festum a. d. 111. Non Mart. celebratur, quemque Senatorii ordinis ac regiae affinitatis virum primarium facit, dicitur *Ἀστυρίου*. Sed aliter de eodem Nicephorus ac Martyrologia, quotquot usurpare his oculis vetusta nobis contigit. Quae etsi in nominibus propriis frequenter peccant, in *Asterio* nomine tamen sibi constant uno consensu, cum martyres illie praeter hunc alii etiam complures ita dicti occurrant. Nec infrequens mentio Episcopi *Asterii* in Collatione antiqua Catholicorum & Donatistarum sub Honorio Aug. habita apud Carthaginem. Exstant & Graeca *Asterii* opuscula. Natam autem hanc nominis differentiam e prava temporum illorum pronuntiatione arbitror, *E* & *I* litteras confundente: *I* autem in *Y* mox degenerasse, quod ab *Astyria* Hispaniae regione nomen derivari opinarentur: *Astyr* enim pro *Astur* in marmoribus antiquis non raro occurrit. Sic apud Lucanum lib. IV. cum in vetustissimis membranis exaratum esset, *Astyrii scrutator pallidus auri*, *Astyrii* nunc perperam circumfertur. *Asturia* enim auri fodinis olim insignita, non *Astyria*. In Martyrologiis antiquis passim *Crisconius* pro *Cresconius*, *Mauritania*, quae in nummis & lapidibus est *Mauretania*, *Epictitus* & *Epititus* pro *Epicteto*,
Cor-

*Cornilianus, Arminia minor, Sotyr pro Soter, Apimia pro Apamea, Oecomini pro Oecumenii, Cicilius pro Caecilio: contra Elarus, Epolitus, Callenicus, Eme-
lianus, Candedianus, Emereta, pro Hilarus, Hippolytus, Callinicus, Aemilia-
nus, Candidianus, Emerita. In Asterio nomine tamen, quod dicebam, toties
in iisdem martyrologiis occurrente, nil omnino, quod mireris, codices variant,
cum tamen, ut vidimus, pronunciandi ratio plebeja locum illic ubique obti-
neat. Ceterum ad hunc ipsum Asterium, qui Maronianum recognovit codi-
cem, referri oportere editionem Paschalis carminis Seduliani vel inde persua-
deor ut credam, quod & hîc & illic praefixum Asterii epigramma legitur,
unde liqueat poëtices studia ab illo exculta fuisse. Sane in antiquissimis Sedulii
membranis Rhemensibus haec legi testatur Sirmondus ad libri primi Ennodiani
epistolam xxiv. Hoc opus Sedulius inter chartulas dispersum reliquit, quod recolle-
ctum adornatumque est a Turcio Rufio Asterio V. C. Consule Ordinario & patricio.
Sive, ut Wiltbemi in codice S. Albini invenit, ex Consule ordinario & pa-
tricio. quod ille mavult, quamquam e marmoribus antiquis probari possit viros
consulares non tantum ipso consulatus sui anno, sed in omnem vitam dictos
fuisse consules pro consularibus, aevo praesertim posteriore. Deinde seque-
batur Asterii hoc epigramma ad Macedonium Abbatem, cui Sedulius & ipse
dedicarat hoc opus:*

*Sume, sacer meritis, veracis dicta poetæ,
Quae sine figmenti condita sunt vitio.
Quo caret alma fides, quo sancti gratia Christi,
Per quam justus ait talia Sedulius:
Asterii tui semper meminisse iubeto,
Cujus ope & cura edita sunt populis.
Quem quamvis summi celebrent per saecula fasti,
Plus tamen ad meritum est, si viget ore tuo.*

Caspar Barthius V. Cl. Adversariorum libro xii. cap. xix. eosdem profert
versus ex vetustissima, uti asseverat, scheda, inscriptionem autem sic exhibet,
*** *Quod recollectum, adunatum, atque ad omnem elegantiam divulgatum est a Tur-
cio Rufio (pro Rufio) Asterio Quinto ex consule ordinario atque patricio. Praeterea
versu penultimo fastus pro fasti legebatur in iis membranis, uti & in codice S.
Albini. Libro Barthiano si quid fidei habendum, Quinti praenominis fuerit
noster Asterius, quamvis id loco alieno inculcatum illic apparet, quod codicis
illius fidem nonnihil apud me elevavit. Nec desunt vetusti codices, qui ve-
teris & novi Testamenti collationem, Sedulianis insertam poëmatibus eidem Asterio
vindictum eunt, frustra, ut opinor. Porro occasionem nacti hîc non inop-
portunam componamus in transcurso litere, inter eruditos nostrae tempesta-
tis, atque etiam veteres inter, qui de scriptoribus Ecclesiasticis sunt commen-
tati, exortam, quorum nonnulli Sedulium floruisse sub Valentiniano secundo
& Theodosio contendunt, Sigebertus ad aetatem refert Constantis & Constan-
tini, alii complures, quos inter Gennadius in vetustis apud Sirmondum mem-
branis, & Sirmondus cum Theodosio ii. & Valentiniano iii. faciunt coaeta-*

neum. Sed de Theodosio majore verum est, quem versibus suis compellavit, ut Valentiniani consortem atque Orienti imperantem. Ab *Asterio* igitur, qui anno aerae Christianae ccccxlx. cum Protogene consulatum gessit, Sedulii carmina in lucem sunt emissa, non ab Praesidii collega, ut perperam inter alios vir summus *Jacobus* rebatur *Usserius* Armachanus: cum Gelasius Papa, qui biennio post supremum obiit diem, anno videlicet ccccxcvi. Decreto lxx. Sedulium, ut celebrem poetam commendet, dist. xv. apud Gratianum, *Venerabilis viri Sedulii Paschale opus, quod heroicis scripsit versibus, insigni laude proferimus.* Laudat etiam Cassiodorus sub finem divinarum Lctionum. Quid quod *Asterius*, quando Sedulianum vulgavit poema, jam consulatu erat defunctus? Quid quod posterior *Asterius*, qui cum Praesidio consulatum gessit, Orientalis imperii consul videtur fuisse, Sedulius autem Latine scripsit in occidente, ubi consulatum gessit vetustior *Asterius*. Nec mirum videri debet ad Theodosium relatum operis sui dedicationem a Sedulio, quamvis in Oriente solo adhuc imperantem, cum idem Princeps litterarum longe amantissimus fuerit, ut Ausonius nos docet, qui lucubrationes suas poeticas eidem dedicavit. Ad vetustiorum quoque *Asterium* referri debet locus Sidonii Apollinaris libro viii. Ep. vi. qui solemnibus hujus consulis interfuisse sese adolescentem, aut potius puerum, testatur. Idatius in Chronico ad annum aerae Christianae ccccxxvi. sub Honorio Aug. *Wandali Suevorum obsidione dimissa instante Asterio Hispaniarum comite relicta Gallaecia ad Baeticam transiverint.* Denuo ad annum ccccxlii. *Asterius dux utriusque militiae ad Hispanias missus.* etsi *Asturius* illic legitur. ut forte Hispania prave enuntiando nomini *Asteriorum* originem dederit, dum *Asturios* suos & *Asterios*, *Asturiae* provinciae nimium memor, confundit. Certe Ildefonsus *Asturium* quendam, sive *Austurium*, Episcopum Toletanae sedis memorat, nisi & illic librarii peccaverunt. Videtur autem *Asterius* comes Hispaniarum & utriusque dux militiae nostri hujus aut pater, aut, quod malim, germanus fuisse, cujus inter titulos nec comitatus Hispaniarum nec utriusque militiae ducatus comparent, ut supra vidimus. *Asterius* autem Idatio laudatus generum habuit *Merobaudem*, sibi in Magisterio militiae utriusque successorem, studiis itidem poeticis, eodem teste Idatio, excultum.

E P I S T O L A CLXXVII.

T H O M . R E I N E S I U S

Nic. Hermsio.

Holmiam.

EXhibeo nunc, quarum nuper me debitorem tibi fatebar, meas ad Petro-
Enium e Dalmatia *εκοτολογίες* subitaneas, nec satio, scio, maturas; quibus
addidi quaedam post subnata schedia; de utrisque censibus ut merentur; neque
enim metuo obelos tuos, quin requiro. Peracerbum mihi accidit tam malae
memoriae fuisse, ut cum primas ad te darem pro Ovidio, quem beneficio tuo e
manu Graevii nostri dudum minus acceperam, gratias non egerim; id vero

ἢ περιμέεⓄ si nunc facio, ignosce quæso, & nihilominus ratum habe. Gratulor autem Ovidio, quod deposito sita lautus & hilaris, tam nitidus, tam ornatus, per te incedat nunc; augustius beneficiū tuum est, quam si vel e Ponto a Barbaris solemnibus codicillis in urbem eum revocasset imperator: gratulor etiam seculo; quin etiam tibi mentem hanc intentam studiis illis, quorum majestas cum pari utilitate amoenitateque contentum sequius sentientium extinguit, & quae nisi via, quam institisti trivisti que commentando, digne satis tractari nequeant. Sane pauci vident eum unum rectumque modum esse subveniendi bonis autoribus, eosque interpretandi rationem peroptimam. Saltem in vers. 296. VII. Metam. copia lectionum in manuscr. te obruit, sic ut in vera eligenda defecisse videaris; eam vero Medicei & Vaticani libri exhibent: sed si in alteris diphthongum *AE* resolveris in vocales duas: in alteris *O* pro *A*, quod solenne librariis ut marmorariis scriptum cogites: exit enim quod solum verum & ab Ovidio est, *Aetide*. Αἰητις Αἰητιάς, & neglecta, ut fieri solet, diphthongo, Αἷητις, Αἷητιάς, Κολχίς, *Colchis*, *Cytaeis*, Κυταίς de Medea synonyma sunt. Et de Medea intellexit Ovidium Hyginus; nec dicendus errore tribuisse Medae, quod Tethyi debuerit: certe Tethyos nullae hinc partes sunt, ut putas. Apud Thetin quidem latuit prae Lycurgo. Bacchus, teste Hom. Il. 7. Apollod. l. 3. Nonno Dionys. l. 20. & Phornuto: sed ab ea rogasse nutricibus suis vetulis juventam nullus eorum dicit. τερατόνργημα vero hoc Medae fuit, ut in Aesone, ut in Pelia: cui cur interponeret Ovidius rem a Tethye gestam causa tibi dicenda fuerit; mihi nulla adparet. Confirmat haec, quae credere non potuisti, de Medea circa nutrices Bacchi Schol. Eurip. Medae Argum. qui sic: ΑἰχύλⓄ ἐν τῇ δὲ Διονύσου τροφῆς ἰσορῇ, ὅτι καὶ τὰς Διονύσου τροφῆς μετὰ τῶν ἀνδρῶν αὐτῶν ἀνεψήσασα (ἡ Μήδεια) ἐνεοποίησεν. Aeschylum igitur autorem habuit Ovidius, & recte de Medea intelligitur, sive *Aetida*, quod in pluribus manuscr. vidisti, sive *Colchida*, quod e glossemate irrepsisse puto, dixerit. Sed de his arbitrium tuum, tua existimatio valebit. Te, mi amicissime Heinsi, bene rem gerere & ex animi sententia vivere, erit mihi ὑπερήδισον ἄκυσμα; eo quic te ἤμαρ τε καὶ κατ' ἐνφρόνην ὁμῶς deo commendo. Scr. Lipsiae 7. Jul. stil. vet. Anno CIOIOCLXVI.

EPISTOLA CLXXVIII.

THOM. REINESIUS

Nic. Heinsio.

Holmiam.

NON refutabis, spero, candorem meum, quo te meritissimo tuo refero inter eos, a quibus me adjutum in colligendis Epigraphis fateri ad Posteritatem; pietatis & pudoris mei interest; nihil in eo mentiar, nec sum alioquin ad quamcunque fictionem, βλακείαν & magniloquentiam per naturam apertus. Serio doleo eas, quas Gronovio nostro pro me submissas scribis, interverfas esse: quas a Langermanno acceptas habeo, eas antequam abiret ad externos com-

communicabat Helmftadio; unam tantum Divionensem, cum Holmiae degeret. Fortaffis jacturam, quam in tuis facere me in fatis fuit, penſavit *Spanhemius*; is Heidelbergae hiſce diebus; quas e *Ligorii* voluminibus excerptas ſcribit, ad quadraginta miſit, inter quas quaedam ſunt ἐπιτάφιοι. Cujus generis tuas illas fuiſſe mones. Quoties Ill. *Capelanum* ad me praedicas, toties in novam ſpem erigor, ejus fideli cura, opera & efficacia a Rege Chriſtianiſſimo impetrando- rum ſumtum pro edendis illic meis; hîc enim uti frigent haec ſtudia, ita manus, quibus ſublevari vellent, ψελλίζουσιν, imo torpent. Valde equidem velim, dum a DEO datur mihi, lucem iſta videre: terret enim, cum cogito, quid ſcriptis poſtumis fieri ſolerat. *Turc. Ruff. Apron. Aſterium*, illum Poëtarum ſtudioſum, & Virgilii emendatorem, Conſulem collega Protogene A. D. 449. eſſe non deſinam credere ob id, quod *Barthius* in ſuis ſchedis reperit adpellari *Quintum*. Eſt enim ea ſcriptura a Librario inepto, qui e ſiglis V. C. fecit im- pertinens iſthoc; & hoc vidit *Barthius* quoque. Neque igitur filium quen- dam ejus aut nepotem fingere opus habemus auctorem epigrammatis; Ipſe Conſul eſt, qui Sedulium novit, & qui Virgilium emendavit. *Apronianum* vero Virgilii Commentatorem vetuſtiorẽ noſtro ab eoque diverſum quendam eſſe exiſtimare non licet: expreſſe enim *Pompon. Sabinus*, qui lectiones ejus ſub- inde allegat, *Ruffum Apronianum* nominat Comm. ad 1. Aen. extr. *Dan. Gai- tani* ad *Petrum Mannam* epiſtola eſt in Edit. Virgil. Oporiniana A. 1544. in 8. Quomodo per *penaces* in epigr. COS. Aſterii terarum certamen intelligere poſſim, nondum me docuit *Valeſius*. Quin ſi iſte verus ſenſus eſſet, idem bis diceretur; nam verſ. 5. 6. exprimit feras: ut in conſeſſo ſit non intellexiſſe eas antecedente diſticho. Triplex ſpectaculum ſimul uno die adornavit Conſul; idque ſatis clare patet e verſ. 5. 7. 12. Sed quod ſcenam ſubitariam ex tabulis ſuper Euripo extruxit, in qua ludi muſici, tanquam in Odeo, exhiberentur, haec ad ipſa edita munera nihil attinet, nec numerum eorum auget; ſed ad magnificentiam conſulis, inuſitata ſubſtructione populum delectantis & cap- tantis famam referendum eſt: nimirum in circi nova ſcena ludi, in arena au- rigae & terae ſpectabantur. Ego etſi non ſim tam prave amans mea, ut alio- rum inventis locum praebere nolim, hîc tamen neſcio, qua fiducia mei & ple- nitudine tenebo, quod habeo. In prologo epigrammatis verſ. 5. legam, *cujus & ad omnia. Patinus*, Medici Paris. F. & ipſe Medicus, ecquid tibi notus eſt? Deſtinavit ad me nuper, interprete D. *Sponio* Med. Lugd. ſuum ad Urſini de Familiis Commentarium ſpecioſum. Videtur καίπερ τέκτωνεῖναι δοκῶν & πράξει εὐλαργικὰ, eoque ſuſpicor frigidum fore *Sophos*, ſi quod ab Antiquariis Gal- lis, popularibus ſuis, expectat. *Marquardum Gudium* Holſatum, cum quo aliquis uſus mihi ante hoc decennium, dum Jenae degeret, magnam Inſcrip- tionum copiam ex Italia adtuliffe, & morari Hagae veſtrae narrari memini; eoque *Graevio* noſtro hoc dedi negotii, perſuaderet homini, ut vel publicaret ipſe, vel meis ad editionem accinctis eas ſociaret; ſed nihil adhuc profeci; non dubito tua auctoritate eum huc impelli poſſe; neque certè tuae amantiſſi- mae mei voluntati diſſido. Habes epiſtolam verbosiorẽ fortaffe, quam velles; quod

quod tibi ita videri putabo, nisi mihi longiorem remiseras. Tua etiam longiuscula non me fatigavit, sed recreavit. B. V. Scr. Lipsiae XI. Aug. st. v. Anno CIOIOCLXVI.

EPISTOLA CLXXIX.

NIC. HEINSIUS

*Thom. Reinesio.**Lipsiam.*

PLuribus te compellavi nuper admodum, idque pridie Eidus Quintiles, si recordor probe, Reinesi celeberrime, quas literas *Langermanni* nostri opera in manum tibi perlatas oportuit. Complectebantur illae cum alia, tum epigramma *Asterii* integrum, quod ille Codici Maroniano abs se castigato praefigi curarat, una cum *Henrici Valesii* viri doctissimi interpretamento. Nec multo post per tabellarios Germanicos tradebatur mihi fragmentum Petronii Dalmaticum, quod munus ad me pervenire voluisti, observationibus abs te illustratum eruditionis reconditae plenissimis, quas ego non tantum plurima perlegi cum voluptate, sed etiam quae addideras ex scriniis tuis *avēndora Scheffero* perlegenda commisi, quem nova fabularum Phaedri editio juris publici propediem facienda occupatum nunc habet, uti ex epistola ejus, si quid auguror, uberius cognosces, quam ille proximis diebus curandam mihi concredebat. Equidem, quid pro tam praestanti munere a me reponatur tibi, vir summe, nihil nunc omnino est in promptu, praeter libellum poematum meorum nuper luce publica donatum a bibliopolis nostratibus, me & absente & in publicis negotiis cogitatione tota defixo: ut cum venia evolvendus sit tibi, si tantum temporis ab aliis occupationibus vacui habebis tamen, quod meis frivolis sine tuo ac publico incommodo elargiri possis. Libelli exemplar *Langermannus* ad te curabit, simul ejus copiam ab *Elzevirii* Amstelaedamensibus, quod propediem fore aut jam factum esse confido, obtinebit. Observata ad Petronium tua salivam mihi denuo moverunt ac desiderium illorum, quae complura in pluteis librariis adfecta possides & elucubrata, luci haudquaquam invidenda. Ea ni proferre quamprimum festinas ipse, metus est maximus, ne te nobis erepto, blattis tineisque pabulum relinquantur. Habes Variarum Lctionum libros reliquos, habes alia haud pauca, quae publico permitti possunt ac debent, dum majori veterum inscriptionum operi typographum circumspicis. Da, quaeso, hoc meis precibus, da tuae gloriae, quam felicissimis auspiciis longe lateque splendidam jam consecutus es. De *Aetide* quod ad Nasonem meum observasti, habui profecto acceptissimum, & enixe contendo atque adhortor, ut si plura forsan ad elegantissimum scriptorem, at turpiter etiamnum mendis inquinatum, annotasti, ut fecisse te non dubito, eorum copiam ac facultatem mihi facias, quae curis a me secundis mox adornandis inserantur. In observatione tua, permittes enim, ut spero, hanc mihi libertatem, unicum est quod me moretur ac suspensum teneat, ne sententiae tuae totus accedam.

Tom. V.

Cc

dam.

dam. *Aetæ* nomen cum apud poëtas veteres tam Graecos quam Latinos frequentissimum occurrat, hos praesertim, qui argumenti Argonautici scripta publicarunt, non recordor alibi in illorum operibus Ἀἴτην pro Ἀἴτην, correpta vocali littera prima, quae ex dipthongo sit progenerata, exstare exempla, si in promptu sunt, haud dubie vicisti. Faveo interim eruditissimae observationi, ac veram unice cupio. Ad Valerium Flaccum quae jam pridem parata habeo, dum inspicio forte nuper, occurrebat locus ille libro III. vers. 523 ubi Nymphas Hylæ raptrices describit; *Et manicæ virides, & stricta myrtus avena.* quem versum fateor a me non intelligi, aut capi: quis enim locus hic *myrto*? quid *stricta* illa sibi vult *avena*? Tu id me docebis, aut nemo. Vale, vir eximie, & ut hactenus me tui nominis longe studiosissimum amor tuo dignari perge. Exarabam Holmiae Suecorum CIOIOCLXVI. a. d. XVIII. Kal. Septembr.

EPISTOLA CLXXX.

T H O M. R E I N E S I U S

Nic. Heinso.

Holmiam.

Candidum vero diem istum & prorsus laetabilem, qui me tibi copulavit! Ita multa e tuis ad me solatia mihi nascuntur, & solida delectatio simul, cum amoris tui radiis foveri & literatis fabulis pasci me sentio. Sane utrimque abs te mihi satisfactum; & utriusque beneficii, cum ad tuas quotidie respicio, continua fruitio mihi; memoria autem erit sempiterna. Pro Petronianis non expectem ἀντίδωρον aliud, sufficit mihi iudicium tuum, quo ornare ea voluisti, unius contra omnium; saltem dubito, si mereantur; fortassis enim adfectus, δεινὴν δυνάσασαι τὰς ψυχὰς, praevaluit rationi. Restat in iisdem unum alterumque, cuius ignorantia me torquet; usque adeo nihil est in Antiquitate, quod non admirer, & scrutatu ac cognitione indignum existimem. Quis istud *de lingua canina* pag. 14. mihi interpretabitur? Tractum, puto, est de trivio, e vulgari ἀνίσταται & populari superstitione; fortassis etiam dictum joco, cuius origo ignara nobis. *Aetida* dixisse Poëtam Latinum, quam Graecus Ἀντίδα, apud me non est dubium, cum & consuetudo Latinorum, qua dipthongos in simplices, longas in breves mutant; exempla adnumerare tædiosum sit; & licentia, qua Poëta maxime uti potuit, hoc persuadeant. Haec vero tanta fuit, ut etiam, in nominibus propriis praesertim, consonantes elidere sibi sumserint: hinc *Baternae* pro *Basternis*. Quod autem in eo ipso vocabula *Aetes* exemplum me poscis, aliquanto iniquius videtur. Si enim in aliis fecere, cur in hoc non fecerint, causa nulla est: etsi qui fecerint & ubi, ego hodie nesciam. Fortassis loca, ubi fecere, per descriptores corrupta sunt, qui usitatus notiusque sibi substituerint; & utrumque Ἀἴτης, Ἀἴτης rectum esse ignorarint. Quin, si tantum abhorres istud *Aetide*, legas licet, *petit hos Aetidamunus*. Ignorantia constructionis rarioris verbi cum duobus Accusativis,

pe-

peperit librariis τὰ α, ab: unde etiam factum est, ut terminationem casus sexti omnes Codd. conseruent; nullus quarti. Quicquid tamen horum sit, satis, puto, feci liquidum, τὸ Τετῃ, quod tibi placuit, non posse tolerari. De versu Val. Flacci nihil curasse tot editores, miror sane: quid in eo intellexerint, divinare nequeo; usque adeo sensum nullum exhibet. Corrector sciolus temere intrusit τὸ myrtus, cum, quod scripserat Poëta, corytus, non caperet; addidit, ut consentirent suo facinori reliqua, & dissyllabum suppositum pro trisyllabo non offenderet vel luxaret versum, ingeniosam nequitiam, ordinem verborum, quem divinus Poëtae calamus struxerat, pervertendo. Nos Valerio, omisiss hisce spuris, sua restituamus, & legamus post haec,

Et virides manicae, & stricta corytus habena: —

Quo nihil verius. Inter arma Nympharum arcus & pharetra loro adstricta sive lumbo sive humero: ea corytus; quem accipere potuit e Statii x. Theb. nisi potius huic ipse tradidit. Γαρυτός θνητὸς τῶν Suidae, Γαρ. τὸ ὄπλον, ἐν ᾧ ἐμβάλλεται τὸ τόξον Varino. Cl. Schefferum meis verbis peramanter salutare velim; aliud nunc non erat. Videtur, quod boni cordatique viri est, dissensum meum circa Petroniana aequo animo ferre; mallet autem monuisset libere, si qua offendi. Esse enim hoc neque a me alienum puto. Bene Vale, vir Amplissime, & me nominis tui longe studiosissimum amore porro dignare. Scr. Lipsiae Kal. Oct. st. vet. CIOIOCLXVI.

EPISTOLA CLXXXI.

NIC. HEINSIUS

*Thom. Reinesio.**Lipsiam.*

MArmora illa vetusta, quae Gronovio suggessi ex Italia jam olim communicanda tecum, numero septena, meo aere compararam in urbe, mox naufragio, dum in patriam mittuntur, cum aliis antiquitatibus haud contemnendae rei, absumpta: quorum exemplaria tamen a Luca Langermanno accepisse potuisti, clarissime & summe vir. Monet enim ille per nuperas suas, quicquid inscriptionum antiquarum in scriniis suis reppererit, id omne tuae potestatis jam esse factum. Unum ex illis marmor en tibi, possunt & reliqua mitti, si nec dum alia via ad te pervenerunt. **HIC EST SEPULTA PACILIA. SOSPITA. PIA. PROBA. BONIS. PROBATA. SUMMA. QUAE VIXIT. FEDE QUI BENE. COGNORINT. COGNITAM. BENE EXISTUMANT. HAVE. ET. VALE. QUAE, OPTAS EVENIANT. TIBI. ET. TUIS. L. AQUILLIUS. FAUSTUS. DE. SUO FECIT.** Addo & aliud, quod acceptum refero V. C. Camillo Peregrino Capuano, Capuae repertum, ut asseverabat ipse. **UNA. DIES ADIMIT CRUDELI. CLADE PEREMPTAS, QUIS ARA HAEC. (puto posita est) POSITAS.**

Vide Reines. clas. xvi. Insc. 33 & Epistol. Heinsii ad Gronovium ccxl.

C c. 2.

TAS. POENA. HOMINIS. MISERI. FILIA. NAMQUE. PERIT. PERIIT. ET MATER. EUNDEM DESERIT. ILLA. PATREM. DESERIT. ISTA VIRUM. En tertium quoque apud Carthusiam sive thermas Diocletianas Anno ciccicclii. circiter repertum, quod *Christophorus Puteanus*, Petri & Jacobi frater natu maximus, rei Carthusianorum vicarius Generalis, mihi tradebat.

1 D. M.

QUICUMQUE ES PUERO LACRYMAS EFFUNDE, VIATOR. BIS TULIT HIC SENOS PRIMEVI GERMINIS ANNOS, DELICIUMQUE FUIT DOMINI, SPES GRATA PARENTUM, QUOS MALE DESERUIT LONGO POST FATA DOLORI, NOVERAT HIC DOCTA FABRICARE MONILIA DEXTRA, ET MOLLE IN VARIAS AURUM DISPONERE GEMMAS. NOMEN ERAT PUERO PAGUS, AT NUNC FUNUS ACERBUM ET CINIS IN TUMULIS JACET, ET SINE NOMINE CORPUS. QUI VIXIT ANNIS XII. MENSIBUS VIII. DIEBUS XIII. HO. VIII.

Complures inscriptiones collegi ex libro xxxiv. Antiquitatum *Pyrhi Ligorii* inedito, quem Cardinalis *Franciscus Barberinus* possidebat, sed illae haud dubie jam sint insertae illi operi, quod Cardinalis ipse publico jam pridem parat. Nescio an videris *Julii Caesaris Capacii* Antiquitates Neapolitanas. Idem similis argumenti commentarium vernaculo sermone dedit in publicum, cui titulus *il Forestiero*, inde excerpti duo marmora, quae vides.

2 INJICE. SI PIETAS. USQUAM. EST. SUSPIRIA. ET IMPLE. MECUM. HOSPES LACRIMIS. MARMORIS. HOC. VACUUM. NAM. FORMAE. EXEMPLUM. PERIIT. CUM OBIIT. MEA. LYDA. QUAM. PERIERE. HOMINES. VEL. PERIERE. DEI.

3 VERNA. MEAS O. MI VERNA QUIS AH QUIS AB AURA. TE. IN TENEBRAS. RAPUIT PERDITUS. EN. MORERER. NI TECUM ASSIDUE LOQUERER. NI SAEPE JOcando FALLERER. HINC. DUM TE CONTINUO. ASPICIO SEMPER. ERO TECUM ETSI ME SOPOR OCCUPAT UMBRAM. TE UMBRA PETAM ERGO. UMQUAM. NE. METUE. ABS. TE. ABEAM.

Sed de his alibi erit agendum. Inveniuntur & nonnumquam tesserae quadratae eburnae, spectaculis, ut creditur, inservientes. Cujus generis nonnullas est videre in *Tomasini* de Tesseris hospitalitatis commentario, & si probe recordor, in *Casalii* antiquitatibus Romanis, quales & apud me exstant cum hac inscriptione, 4 PILODAMUS JULI SP. A. D. III. KAL. FEB. M. VAL. CN. DO. Aliam vidi in dialogo Antonii Augustini de nummis antiquis Ita-

1 Vid. *Reines.* xvii. Claf. Insc. 175. 2 Vide *Reines.* Claf. xiv. Insc. 105.

3 Vid. *Reines.* Cl. xviii. Insc. li. legitur & in *Catalectis Pithoei* pag. 140. & inter *Catalecta Petroniana*. *Gruterus* vero retulit inter spuria pag. xvii.

4 Vid. *Reines.* Cl. v. Insc. lxi. & sequentem Insc. lxi.

Italicæ editionis, quæ tabulis numismatum aereis est insignita. PETILLI. SP. ID. NOV. C. JUL. M. AEM. RUFIO. Aliam Florentiæ vidi & descripsi, sed schedæ illæ nunc non sunt in promptu. & hoc fortassis præter institutum. Si onere molestissimo publici muneris detur aliquando defungi, de Roma denuo adeunda spem non est quod omnem prorsus deponam. De Barberinis inscriptionibus quid sperandum sit, tunc certius te potero docere. De *Aproniano* & *penaces* vocabulo, quæ suggessisti, habui longe gratissima. *L. Turcii Aproniani Asterii* mentionem fieri video in veteri columna temporis Diocletiani, in antiquitatibus ineditis: *Pyrrhi Ligorii* IMPP. CAESS. VALERIO. DIOCLETIANO. ET AURELIO. VALERIO MAXIMIANO PIIS. FELICIB. SEMPER AUGG. ET. FLAVIO VALERIO CONSTANTIO GALERIO VAL. MAXIMIANO ROM. CXCL. CURANTE TURCIO APRONIANO V. C. PRAEF. URB. FIL. ASTERIO. CORR. FLAM. ET. PICENI. *Cujus & ad omnia* ego quoque in ora codicis mei annotaram. cum *Patino* haud dubie mihi intercessit necessitudo: vir est amoeni & dicacis ingenii, quique similitates cum societatis Jesu Theologis haud perfunctorias exercebat: Filium non nisi ex fama & scriptis notum habeo. Misit & ad me exemplaria Romanarum *Fulvii Ursini* Familiarum, in quibus publico restituendis minus festinasset vellem. Suppeditari enim ex Musæo meo atque aliunde complura poterant, quæ ornamentum haud parum isti Commentario attulissent. Nunc in edendis *Briennii* Comitum nummis dicitur occupari. Numisma, quod Nasonis nomen solum præ se fert, in ordinem Axiae gentis redegit, quasi sola gens ista eo cognimine sit usæ. *Gudius* ipse magnam marmorum vetustorum copiam abs se in Italicâ peregrinatione collectam ad me jam pridem perscripsit. Sed post reditum ad Belgas nostros nil litterarum ab illo accepi. Hortarer alioquin illum, ut tecum thesaurum istum communicaret, quod nunc omnium optime per *Graevium* fiet. Poëmatum meorum exemplar jam accepisti, credo, curante *Langermanno*. Proxime agebam tecum de loco uno alteroque Valerii Flacci, ac simul grates referebam pro Petronii Fragmento eruditissimis abs te animadversis illustrato. De Valerio sæpe mihi visum est mirum, in vetustis codicibus tot illi nomina assignari. *Flaccum* Martialis & *Quintilianus* vocant, ut credibile sit *C. Valerium Flaccum* fuisse nuncupatum. Unde igitur ista *Setinus Balbus*? si & illa ad Valerium nostrum spectant, *Balbus* potius, quam *Flaccus* esset, dicendus. Exime, quaeso, qui potes, hunc tu mihi scrupulum, vir eximie; & festinatae scriptiioni benigniter ignosce. Exarabam Holmiæ Suecor. CIOICLXVI. a. d. v. Eid. Octobr.

EPISTOLA CLXXXII.

T H O M. R E I N E S I U S

*Nic. Heinſio.**Holmiam.*

ANnuit tandem desiderio meo virorum optimus *Langermannus*, uti suspicor, a te quoque summonitus, & apographa Inscriptionum in peregrinatione Italica Gallicaque collectarum mihi credidit: a quibus quam adjutus sim ad integrandas eas, quas *Lambecius* ab *Holſtenio* acceptas mutilas miserat, dici non potest. Quo consilio illi lacinias eas & paucas tantum ^{prioris} ex epigraphis decerptas exhibere potius, quam integras voluerint, divinare nequeo. Male meriti sunt de hoc pulcerrimo genere Antiquitatis, qui vel dederunt mancas, omiſſis quae vel legere ipsi non poterant, vel legere posteros nolebant, homines praeposteri: Nec melius illi, qui vel compactis duabus tribusve in unum, temporum, rerum & personarum historiam foedant turbantque, vel diremtis, quae cohaerebant, seorsimque traditis utraque reddunt ignota, obscura, & inutilia cognitioni, quaeque cum multo labore tandem restituere & coartuare necesse est. Alterum ex his peccavit descriptor lapidis Fani Fortunae, quem mecum communicas. Sunt enim revera duo diverſi, eodem tamen loco reperti, diverſorumque temporum: & ille quidem de Dioclet. Aug. & Collegis: hic de Asterio, quem Correctorem Flaminiae & Piceni fuiſſe Imp. Val. & Val. e legibus Cod. Theod. ostendo in Eponym. Et recte igitur *Gruterus* velut distinctos producit; illum quidem pag. cclxxix. hunc pag. clxv. *Gudius* paucas quasdam submiſit, faciente amico; reliquas viſus premere. spes in *Graevio* mihi aliquas eſſe exprocaturum. Tesserarum literatas novem, annos intra 690. & 759. signantes jam dum habeo; tuarum altera de *Julio Philodamo* ad Annum U. 702. altera de *Petillio Ruſſione*, ad Annum 708. pertinet. *Capacium*, de quo mones, ut & civem ejus *Joh. Ant. Summonte*, qui Neapolitana stilo populari condidit, evolvi dudum. Exemplar Poëmatum tuorum rite ad me curavit *Langermannus*: Italica, quae *Corr. Hondemannus*, hodie inter Conſiliarios in aula Elector. Dresdenſi, qui te Patavii noſſe ajebat, ante decennium inde aſportaverat, placuerunt; ſed haec quia pluſcula, & velut in theatro *Μουσούργους* hujus aetatis non ita notos in vulgus noſtrum exhibent, perplacent. Circa *Συτηματίον* de L. Valeri, Argonauticôn *ἐν ἐξαμέτρῳ* ſcriptoris, duplici cognomento imprimis videndum eſt, quale id ſit & quorum. Noti ſunt Grammaticorum, clauſtraliū etiam magiſtrorum, & librariorum ſciolorum artes, quā in talibus indigita-
mentis circa ſcriptores veteres nugari conſueverint. Eoſdem ludos ſuper Valerio feciſſe exiſtimabo, dum indubius de *Balbi* cognomento e veteribus testiſiſtatur. Rem enim maxime ſuſpectam reddit cognomen *ἐξ ιδέας* ei impoſitum geminum fuiſſe, ac ſi eundem *Capitonem Labeonem* adpelles: quod moribus Romanis abſonat. E Cicerone *A. Terentius Varro Muraena*: itemque *C. Marcius Figulus Thermus* noti ſunt, in quibus cognomen illud adoptionem in Famili-
liam

liam Terentiam, & Marciam, hoc natales utriusque Liciniam & Minuciam nobis indicat. *Flaccum & Balbum*, si simul fuerunt in L. Valerio (hoc enim *κρίνονμενον* est & *ζητέμενον*), an eodem modo interpretari poterimus, ut natus e Balborum Valeriorum familia in Flaccorum Valeriorum domum adoptione transiisse putetur; sed manet tamen quaestio, an e Valeriis quidam aliquando Balbus fuerit: mihi quidem nondum repertus est: solum Balbinum in Valeriis COS. Anno U. 1007. ex 8. MCL. *L. Valerium L. F. Cl. Poplicium Balbinum Maximum* notavi. Unde *ἐπέχειν* satius esse puto, quam liquido sive adfirmare e praescriptione Codicum *ἀδεσπότης* incertique aevi, sive negare, dum uti dicebam, certior nobis indicina ab incorrupta antiquitate venerit. Idem Valerius, etsi Patavinus fuisse constanter adferatur, Setinus quoque esse potuit; nimirum in altera civis *ἑσεί*, vel etiam *διατελεῖν*, in altera *νόμῳ* vel *φύσει*, quod de Viris illustribus aliis pariter scimus. Haec nunc potui. Dominus JESUS te servet, vir Amplissime, & inter novi anni processum renovet tibi gaudia mille. Lips. Terminalib. Christianis Anno MDCLXVI.

EPISTOLA CLXXXIII.

J. F. R. GRONOVIIUS

*Thom. Reinesio.**Daventriam.*

Literas tuas, *Reinesi* maxime, recte ad me curavit frater. Librum ad primam occasionem expecto, & acceptum statim devorabo. *Graevium* nostrum, quod hic posuit temporis, non ineleganter traduxisse, & perpetuos hujus peregrinationis fructus habiturum opinor. Eorum duntaxat, quae mei juris sunt, nihil, quod sciam, in hunc diem desiderat, nec est ullus congressus noster, cui legitima velut accessio non sit grata recordatio tui. Adco & ille in te colendo paternam sibi constituit sanctitatem, & ego hanc pietatem ejus provocare gaudeo, nec jucundius ullum aut habeo aut praesto acroama, quam meritissimas tuas laudes. Nam quum te semper, ex quo novisse potui, fecerim plurimi, te unum adspecto, in te solo acquiesco, tibi, qui velut deluvio aut pestilentia absumentarum literarum unus exemplum manes, Nestoris vivacem situm precor. Qui paulo ante florebam & superbiebam, si quando in Batavos me contulissem, diripiebar amicitiiis & hospitiiis summorum virorum, nunc relictus & desertus, & non modo principibus eruditionis, sed ipsi eruditioni superstes, velut totidem circa me fulminibus jaectis, attonitus, quibus in locis renatae Athenae, & resonare ipse Helicon videbatur, subito mutis, vastis, inanibus, horridis aegrum spiritum traho. Nam, ne nescias, quos tu Philemonas & Roscios propediem in scenam venturos putabas, rebus & ipsi humanis vale dixerunt & plaudere. *Salmasium* dico in aquis Spadanis febri expugnatum, & ad Trajectum Mosae humatum, ac *Zuerium* domi tabe confectum, quanta funera, si alter paulo moderatior ac civilior, alter constantior in bonis propositis, in quae interdum incidebat, fuissent! Nunc fuerunt, ille impotentia fecit,

fecit, hic vanitate, ut perpauci, qui familiarius noverunt homines, his mortibus ut decebat, afficiantur. Alterum praemortuum jam literis, & ab aliquot annis nihil praeter maledicta ac bilem vomuisse, alterum literas nunquam serio tetigisse, apud imperitos adolescentes, & homines barbariem Politicorum nomine dissimulantes sese venditare gnarum, & id unum agentem, ut his placeret, interpretantur, ut leviozem etiam faciant publicae calamitatis dolorem. Quidquid sentiunt tamen, Lugdunum habet, cur in longum tempus lugubria non deponat. Verum alterius meritis nomen, alterius merito majus erat: etiam quum cessarent, qui adibant vel tralatitii sermonis gratia, ab altero doctiores discedebant, ab altero discedere tantum sibi videbantur; denique imago & species ingens, etiam postquam res non numerosa ac propemodum evanida. Interim illa literarum gloria, quam *Janus Douza*, cujus nunc primum beneficium intelligitur, ibi pepigerat plantaveratque, cum his mortibus ab stirpe interiit: nam alter ille Phoenix ingenii, mente prae senio labascente, *Scriverius* oculis pedibusque captus, superstites sibi sunt. *Nicolaus* noster urbem patriam non amat, nec ab ea intelligitur. *Criocerot*i successerunt viri, per quos *Suoceros* crevit, & comparatione jam magnus est. Nihil igitur tu hic generosum in litteris nostris, imo ne ingenuum quidem aut liberale expectes. Ego vero, jam dudum hunc casum praevidi. *Casaubonum* cum post *Scaligeri* mortem percussione, ut sic dicam, digitorum possent habere, excluderunt illi maxime aemuli, quos ille fidissimos sibi putabat; ut nuper *Bochartum*, *Vossium*, *Meursium* expulerunt, ipsi discipulum nullum aut sectatorem aut clientem bonum fecerunt, nec cuiquam de vera studiorum via fidele consilium dederunt, ut soli scaperent: ea studia, quibus ad famam pervenerunt, palam contemnentes, & ingenia, quae fovendo ad frugem perducere potuissent, aut deterrentes, aut supprimentes, & ubique postponentes: inter se vero non muliebribus tantum animis invicem obtrectantes, sed identidem gladiatoria desperatione concurrentes, & vulgo hanc opinionem ingenerantes, sanctum illud literarum nomen ad animi emendationem & vitae iter dirigendum nihil omnino prodesse. Sic quasi terrigenae Jasonii aut Cadmei, inter intestinae discordiae bella sparsi consumptique, sine semine, sine posteritate interciderunt. Quae quis non moereat? quis fando studiorum amans temperet a lacrimis? Praesertim quum intra breve tempus & Gallia *Petarvium*, *Rigaltium*, *Sirmondum*, *Petitum*, *Gothofredum*, Magnosque & liberalissimosque Maecenates, *Montesballum* Tholosatem Episcopum, *Memmium* Avaltiae comitem, *Fabricium Peirescium* & *Sarravium* Senatores, *Puteanorum* fratrum alterum amiserit. Seculum plane novum ordiri videmur, idque bene barbarum, nec spem habeo, nisi si quos absque magistro deus & suus genius ad meliora verterit, aut quam ipse facio in meis auditoribus, quibus quum nihil praeter vetera & optimi aevi proponam, subinde video excitari aliquem, qui persequi ac producere velit, quae a nobis elementa accepit. Suetonium quibusdam cum maxime privatis scholis recito, in ejus Tiberio (ne habeas a me totus *μεμψιμοίρης*) cap. 24. videbar nuper in ipsa contentione interpretandi.

emer-

emendare loccum. *Principatum quamvis neque occupare confestim, neque agere dubitasset, & statione militum, hoc est, vi & specie dominationis, adsumta, diu tamen recusavit impudentissimo animo.* scio os probum Pompeji, *animum inverecundum.* Sed scribendum censeo, *impudentissimo mimo,* quia nempe manifestum erat, & ab omnibus intelligebatur. Et scis hoc verbo delectari Suetonium, Octav. 99. Calig. 45. Oth. 3. Eodem Tiber. cap. 45. *nec quemquam amplius pati constantissime recusantem.* intelligis rem non valde honestam, *nec volentem* dicendum erat, aut *nec patientem*; ergo & *recusantem.* Quidam amicus ex aliis Germaniae partibus nuper falso nos delectavit gaudio editi posterioris Adversariorum tomi, cum justo stupidae arrogantiae titulo, & jam gratulabar Graevio nostro ostentatam occasionem tantam scribendi, si vellet olim, & quae iste curva fecit, corrigendi: nam ut ipse correxerat priora, quamquam homini favi semper & peperci, nisi in deterius, non exspecto. Nunc vidi ex tuis non tam laetas istic res esse. Cupio enim prodire, nec dubito, quin & per saepe aliquid boni repererit. *Heinsius & Vossius* apparent maximae Reginae, cui ut invisos illos faceret & superos & Acheronta movet ille, quem lugemus. Mela nunc vereor ne in spongiam incumbat, sola aemulatione susceptus. de Militia & Gallorum Scythicis originibus paucae paginae sunt impressae, sed vix puto ex schedis perfici posse, quando uterque, ut nascebantur, operis dabant. Jam me quoque taedet loquacissimae epistolae, quam utinam sic punires, ut me obruere velles etiam copiosiori. Vale, unicum decus, & praesidium litterarum, & me ama. Daventriae a. d. ix. Kal. Decem. ciciocliiii.

EPISTOLA CLXXXIV.

JOH. ANDR. BOSIUS

Nic. Heinsio.

Amstelodamum.

Jamdudum tibi, vir Summe, & debeo plurimum, & debere me agnosco. Jac professus sum, cum ob erudita scripta tua, quibus plurimum adjutum me, praesertim in altera mea Nepotis editione, quae jam sub praelo sudat, sentio; tum quod tam prompte ac sollicitè nostra in Josephum studia conatusque optimo atque eruditissimo *Bigotio* commendare voluisti. Nam id pridem communis amicus noster Cl. *Schefferus* mihi, nec semel, significavit. Quare meum erat statim ea causa gratias tibi, quantas illa singularis benevolentia tua merebatur, persolvere. Sed partim occasio defuit, qua commodè litterae meae ad te perferri possent: partim exspectandum duxi, quid responsi a *Bigotio* ferres. Nunc postquam primo e litteris Amplissimi *Langermanni* ad Ill. *Conringtonium* nostrum, dein & e tuismet ad *Reinesium* ἡ μακαρίτην paullo ante obitum illius exaratis (quarum exemplum nuper demum Suecus quidam Lipsia ad me misit) quam promte ac humaniter excerpta sua mihi offerat *Bigotius*, intellexi; merito sum veritus, ne, si diutius silerem, ingrati hominis notam apud te incurrerem: praesertim cum ad te scribendi facultatem ipsemet praebuisses. Itaque

Tom. V.

Dd

hoc

hoc primum quanto maximo possum opere te rogo atque obsecro, ne moram hanc aegre feras. Proximum erat, ut gratias tibi ob tantum beneficium agerem. Sed verba non invenio, quibus aequare magnitudinem illius possim. Sive enim te considerem, sponte nec rogatus a me id exhibuisti: sive me, in ignotum & nulla re de te meritum id contulisti: sive denique ipsum, tam ingens est, ut majori me afficere vix queas. Quid enim non exspectem ego, vel potius Josephus noster, a *Bigotio*, viro ea eruditione, ut in hoc genere doctrinae paucos inveniat pares, superiorem fortasse neminem? Suffecerit igitur id unum in praesenti dixisse, me ob singulare hoc beneficium aeternum tibi obstrictum esse. Si quid praeterea tuis meritis dignum nostra baltuties potest, id olim publice exequetur, quando Josephus noster prodierit. Interea si quo officii genere te vicissim demereri possum, nihil eorum omittam, quae in manu mea sunt posita. Significa modo, vir Maxime, siquid est, in quo opera mea uti possis. Caeterum quando coepisti de Josepho bene mereri, da, quaeso, operam, ut reapse nobis obtineas, quae doctissimus *Bigotius* communicaturum se nobiscum recepit. Desidero autem non modo varias ex optimis Codicibus Italicis excerptas, sed illius etiam conjecturas annotationesque. Addentur nostris vel seorsim, vel aliis permixtae, prout ipse voluerit, laudato ubique candide earum auctore. Quod etiam aliorum notis facturum sum, si qui sunt, qui suas ad me destinare voluerint. Non dubito, & te, vir eruditissime, servare doctas in hunc scriptorem conjecturas, quibus si potiri queam, magno pariter beneficio censerem. *Bigotiana* commodè, ut opinor, mitti possent ad Cl. *Boeclerum*: inde ad me. Quippe, ni fallor, frequentes inter eos litterae comitant. Scriberem ipse ad *Bigotium*; sed nescio, ubi locorum nunc agat. Faxo tamen, cum primum id cognovero. Si Parisiis viveret, sua tradere posset civi meo *Friderico Brummero*, ad quem maxima pars bibliothecae *Reinesiana* pervenit. Is nunc ibi apud D. *Mentelium* degit. Sed desino gravissimas occupationes tuas morari. Vale, vir Summe bono patriae & rei litterariae quam diutissime, & mihi meisque studiis favere perge. Scribebam Jenae Thuringorum, a. d. v. Eid. Mai. Anno Christi. *MDCLXXVII*. Si responso me dignari occupationes tuae permiserint, commodè id destinabitur *Hamburgum* ad Amplissimum virum *Lucam Langermannum*. Inde ego per amicum petam.

EPISTOLA CLXXXV.

CHRIST. DAUMIUS

*Nic. Heinso.**Hagam.*

Audaciae meae, ignotissimi forte tibi, ad te, Nobiliss. & Ampliss. vir, scribendi, comiter ignoscas iterum iterumque rogo. Illubens sane occupationibus tuis gravissimis, vel publico vel privatis etiam Musis debitis, qui eas tum Reip. tum eruditis quibulvis immane quantum commodas, incondi-

tis

tis & subitis hisce meis interstrepo. Cogor tamen quasi id facere, dum amico cuidam meo, quae valde rogavit, denegare non sustineo. Est is Clariss. vir, *Johannes Gebhardus*, Professor & Bibliothecarius Uratislaviensis, qui cum Prudentium tuum cum MSto Rhedigeriano contulisset, verecundatus fuit ipsas has varias ad te mittere, commodissimum ratus, si me interprete ad Excell. *Graevium* nostrum curarentur; unde porro rectius ad te irent. Obsecutus ergo voluntati Amici, malui pudore posito injurius in tuas, quas dixi, sanctiores curas fieri, quam homini amico, nec parum de me merito, negare vel tantillum. Mitto ergo, cum iis; quae adjecit, qualescunque eae tandem sint, & ut forte parum conferant tum leviculae, tum maximam partem aliorum codicum ope jam praeoccupatae, certe poterant visae desiderium eximere membranas inspiciendi ipsas, spe potioris alicujus lectionis exinde eruendae. Ad didi pari aleae jactu & Varias Psychomachiae Aug. Vindel. olim editae, quam ipse contuli. Atque utinam pluribus, si tanti, aut potioribus gratificari licuisset. Sunt quidem apud me Editiones diversae Prudentii, manu Barthiana passim conscriptae, quarum Notis carere te aequo posse animo arbitror. Quod si tamen volenti tibi foret, eas a capite ad calcem quales quales hinc inde descriptas tecum; vir Nobiliss. communes factururus essem, modo vel unico nutu id significetur. Quales vero tandem sint, speciminis gratia, e plurimis pauculas saltem, sine dilectu, excerpam. Ad v. Cath. vers. 125. *Sunt & Spiritibus.*] haec dicit ut Poëta, non statuit ut Doctor. Et sic alia alibi. Ad x. Cathem. vers. 87. *L. Quam nocte ex vulnere tristi.* Ad Hymn. Laurentii vers. 119. *L. arcam* Wowerius ad Sidon. 152. male. Ibid. vers. 118. *aenigmatum*] τροπικῶς, nummorum Caesaris figura signatorum. Meurs. Animadv. Miscell. lib. 1. cap. 10. Ib. vers. 456. *L. Julia Caecitas.* Hoc est, stirps Aeneae. Val. Flacc. Phrygios prius indignatus Julos. Juli posteritatem in Caesaribus. In Laud. xviii. Mart. Caesar. Aug. 195. *L. ut absolvant retinac.* Hym. Fructuos. vers. 66. *L. affremit voluptas.* Alias incompositus est sermo. Pass. Cypr. 90. *F. Uncticultor.* vers. 94. *L. hostis ut deorum.* Romano vers. 52. *Romanus heros acris exc.* Ib. 440. *L. Mox uniformis Aug. Trin.* Vel Mox aequiformis. Hamart. vers. 405. *L. Idololatriis,* ἰδωλολάτρεις, scribit & Meursius Crit. Arnob. 1. 6. cap. 3. Ex paucis his de reliquis judicium faciendum, quae tamen magis explicant Autorem, quam corrigunt. Versus Aviti inter testimonia de Prudentio spurii sunt partim, & a *Joh. Gagneio* interpolati, uti patet ex Operum Aviti Sirmondiana editione, & primis Argentinensi ac Colonienfi. Hos rogo in subsequenti editione tollas, genuinis ex Sirmondiana substitutis, quae utinam in vestro Belgio, ut exemplis potiremur, recudatur. Adjiciam & nisi grave est, quae legenti Ovidium praestantissimae omnium tuae editionis inciderunt; explodenda omnino, si malo talo steterint. Nec enim mea Suffenus amo, sed saltem subjicio acrius perpensuro ad tertiam editionem, non semel id jussus a nostro *Graevio*. Sed tenuitatis meae mihi conscius, vix tandem id mihi persuasi. In Epist. Heroid. 14. vers. 18. Nescio an non malis nunc cum Naugerio legere praepedit orsa. orsa dextrae, i. e. scriptionem. Volunt id sequentia. Epist. 17. 228. *Unde petam fratres.* Forte melius *Fratris.*

Quia Castor obierat, Polluce immortalis, qui immortalitatem cum fratre diviserat Jovis indultu. Et sic simul non vivebant. Praeterea *petere fratres vix dixit, sed petere opem*, Ovidius. Epist. 21. 38. *Me precor, ut serves, perdere velle velis.* Sic *negat negare* Catullus. I. Pont. 2. 89. *Ira viri mitis non me misisset in istam,* (Sc. humum.) *Si satis haec illi nota fuisset humus.* Possit esse Antiprosis, qualis in illa Cic. pro Sylla: *quae prima innocentis mihi defensio est oblata, suscepi.* Virg. 1. *Urbem quam statuo, vestra est.* Ibid. v. 105. *Malim: Non petito ut bene sit, sed uti magis tutius.* Quam Lectionem & Bersm. ad oram servat. Petit non poenam mitigari, ut ut non tollatur. Versus in Apoth. Prudentii 596. valde obscurus est, nisi mendosus adhuc. Nemo tamen subvenit. Amsterodamensis minuta interpretationem quidem tollit. Sed ne sic quidem clara res. τὸ *Norat*, enim casu destituitur. An *Vagire* eo referatur? Erant pluscula. Sed sufficiant haec. Vix enim hisce non abunde molestus ero. Qui non nisi fiducia humanitatis maximae tuae cum pari eruditione & judicio conjunctae haec deproperare ausus fui. Culpam vero omnem, si quid peccavi, luat *Graevius* meus, qui non semel ad hoc facinus audendum me animavit. Sed desino, meque incomparabili favori tuo, Nobilissime Domine, unice commendo. Vale diuque, & publico, quae promissisti tandem sistere, quantum potes, accelera. Dabam Cygn. d. 14. August. st. v. CXCICLXIX.

Cum his Daumianis epistolis qui conferre velit scriptas a *Daumio* ad *Joh. Gebhardum*, quas anno 1709. edidit *Joh. Andr. Gleich*, multa videbit, quae lucem his adferent: communicavit enim *Daunius* cum *Gebhardo* omnia fere, quae ab *Heinsio* edocebatur.

EPISTOLA CLXXXVI. NIC. HEINSIUS

Chr. Daumio.

Cygnam.

Nisi exploratum haberem argumentis haud paucis animi tui praecipuum candorem, & egregiam plane atque exquisitam, qua me prosecutus es jampridem, indolis benignae bonitatem, *Christiane Daumi*, vir politissime, circumspicienda anxie & longe quaerenda excusatio foret nunc mihi, qua diluerem procrastinatae tanto tempore scriptionis moram hanc plus quam bimam. Sed cum noster *Graevius* jam olim adeo vividis coloribus pulcherrimas dotes tuas mihi designarit, ut eas sensibus meis altissime infixas non possim non assiduus tecum circumferre, spondeo paratam mihi apud te veniam fore, si omni verborum amota circuitione, pro re agam paucissimis, totum me tuo arbitrio permissurus, sive citra veniae desperationem deliquisse, sive causam habere omni patrocinio vix erigendam ac prostratam, penitus convincar. Sub ipsam illam quippe tempestatem, qua haec exarabantur, auspicabar auctoritate publica iter demandatum mihi in ultimum septemtrionem, hoc est in Ruthenos, ubi annum paene tempus exigendum nobis invitis fuit, & valetudini adfectae obnoxius cum maxime. Reverius inde in Sueciam, cum eandem causatus valetudinem, vix obtinuissem a Proceribus nostris reditum ad meos, facta mihi

mihi absentiae diuturnioris gratia, vix recollegi memet ab itinerum ac morbi pertinacis incommodo. Instauratis igitur jam nunc nonnihil viribus gratiarum actioni me accingo, pro litteris jucundissimis per se, atque eo acceptioribus, quod conatus nostros Prudentii Poëmatis castigandis jam pridem insudantes praesidio luculento sane foveant ac tueantur, missis ad me scripturae discrepantis lectionibus, quas V. Cl. *Johannes Gebhardus*, te impulsore meae in spem gratiae, ex vetustis Rhedigerianae bibliothecae membranis industrie ac diligenter collegit. Provisum autem in primis caute a nostro *Graevio*, ne discrimini in via exponerentur Schedae illae, quas proinde maluit adventum meum praestolari apud sese, quam mihi in itinere per eventus parum exploratos occurrere, aberraturas fortasse. *Gebhardo* ipsi testatus sum, ut vides, epistolio maximam voluptatem, qua me vir officiosissimus perfudit immerentem, dum auxiliator adest studiis haudquaquam exspectatus. Te vero in oculis ferre non desino, quo proxeneta beneficium id mihi obtigisse gratus agnosco, debitor jam antiquus ob egregium munus Barthiani in Papinium commentarii. Quo munere haud quaquam quotidiano factum est, ut Poëtam praestantissimum jam olim familiarem mihi & legam, quam solebam, diligentius, & locis compluribus restituam subinde in integrum. Silvas praecipue, quarum quod codicis pervetusti inveniantur nulli, eo plus mendi libros editos occupavit. ad Prudentium quae ex Barthianis exemplaribus suggestisti, ea margini notarum mearum jam allevi. de Aviti loco, videbar eum ex Sirmondi editione depromissey. Consulam denuo eam, ubi offeret se mihi, nam nunc quidem haud est ad manum. Ad Nasonem si liceret refingere per otium, quae olim observabam, longe auctiora, addo & limatiora, darem omnia. Epistol. xiv. 118. *dextrae ossa*, obnitentibus scriptis non ausus sum immutare, etsi potuit Librariorum manus aberrasse in tantilla re. Epist. xvi. 228. *Fratri opem* non admisi, etsi id Latinius fateor, quia non recordor parem licentiam alibi a Nasone commissam hac sede pentametri, ut syllabam brevem vocali subsequente producat. Epist. xxi. 58. *perdere velle velis* non concoquo. Obvium est, fateor Catullianum illud, *negat negare*. Sed ut *Vossius* contendit reponi oportere, & hoc nec ait, pro *negat*. Sed amplius deliberemus praestat. Ponto. i. Eleg. ii. 89. *τὸ istam & haec* minus concinne jungi videbantur. Ibid. *non petito ut bene fit, sed uti male tutius*, vix opinor debere mutari *male* in *mage*. Queritur passim Naso non tantum de incommodis exilii sui, ob deformitatem & frigus loci, in quem relegatus erat, sed etiam ob assidue imminentem isti regioni hostem. Atque adeo exoptat passim locum exilii non tam amoeniorem statione Pontica, quam pacatiorem. In loco igitur pacato, deformi horridoque male quidem erat aetatem acturus, sed tamen tuto. Dubium mihi non est, quin complura observaris, & quidem momenti majoris ad Poëtam utrumque, quae communicare te mihi per otium velim. Illud vero est, quod in primis te moneam, vir Clarissime, ut Observationum libros, quarum spem *Graevius* noster nobis diu est quod fecit, in publicum mox emittas. Non enim dubium fit nobis, quin multa nos illic sis docturus, quae ignorabamus hactenus.

Vale, & feliciter rem gere. Exarabam Nonis Octobri. Jul. A. cicicclxxi.
Hagae Comitum manu properante.

EPISTOLA CLXXXVII.
NIC. HEINSIUS

Chr. Daumio.

Cygnam.

ANnui temporis spatium jam ferme exactum est, si probe recordor; vir Clarissime, cum per literas silentii diuturni, ac protractae ad jucundissimas tuas rescriptionis moram anxie apud te excusabam, simulque Cl. *Gebhardo* gratias agebam pro subministratis perquam officiosum in modum ex vetusto Prudentii codice scripturae discrepantiis. Meus quippe in ultimos Europaeorum gentium Ruthenos excursus rescribendi officium tardaverat multo tempore. Iis literis quid sit factum, adhuc ignoro. Interventu enim bellicae calamitatis ita publicae privataeque res hoc anno apud nos fuere turbatae, ut primarum etiam necessitudinum quisque pro se obliti simus. Ego dolori justissimo juxta ac valetudini dubiae dum solatium remediumque circumspicio, in Germaniam vicinam deflexi: atque adeo decreveram ad vos etiam visere, sed Francofurtum usque progressus, inveni omnia armata, dum arma fugio. Inter quas promoti tardius itineris cunctationes referre pedes ad meos jubeor. Quod unum igitur potui, te vel absentem per literas summi amoris indices complectendum sum ratus: de studiis communibus ut subtexam nonnihil, etsi minime, sat scio, exspectas, de ornandis in praesentissima rerum nostrarum calamitate a me cogitari; Virgilium ac Valerium Flaccum vere proxime decurso typis describendos curaram, additurus animadversiones utrique Poëtarum, nisi propositum id bella interPELLASSent prorsus intempestiva. Haerere igitur sub praelo typographico libelli hi pergent. Si quid interea peregre subsidii adfulserit, quo alterutrum scriptorem castigationem proferre in lucem detur, id equidem habebō longe acceptissimum. Maronem cum optimis compluribus pervetustae notae membranis commisi, sed in iis ferme omnibus Catalecta desiderabantur, quae cum pudendum in modum sint depravata, medicinam iis certiorē adhuc circumspicio, quam quae conjectando admoveatur. Quid de Cl. *Reinesii* postumis in publicum emittendis sperare debeamus, quid bibliothecae ejus factum, aut faciendum, & quem nacti sint assertorem Codices veterum auctorum scripti, quos possidere complures dicebatur; denique quid tute moliaris, cupio doceri. Si in Belgium nostrum literis tuis ad nos mittendis parum explorata, aut dubia est via, Hamburgi si tradantur *Lucae Langermanno*, viro mei amantissimo, spes est fore, ut ad me perferantur, nisi occasionem nosti, qua perveniant ad *Danielem Elzevirium*, qui apud Amstelædamios res meas agit. Ego cis dies trinos abitum hinc paro. Vale, vir Clarissime, & mihi velle perge. Francofurti ad Moenum cicicclxxii.
XIII. Octob. De Poëtis Christianis si edendis etiamnum cogitas, habeo nonnul-

nulla, quibus ornari id institutum possit; Tanta cum bonorum librorum hîc conflictamur inopia, ut ne ex postumis quidem Reinesianis publici jam juris factis, possint haberi mihi perquam pauca.

Haec epistola edita inter *Daumianas* ad *Gebhardum*. XLV. pag. 134.

EPISTOLA CLXXXVIII.

CHRIST. DAUMIUS

Nic. Heinsio.

Hagam.

Literas tuas, Nobilissime & Amplissime vir, XIII. Octob. superioris anni datas (nam priores, quas memorasti, vidi nullas) ¹ 17. Februarii demum perquam laetus tam diu speratas accepi. Sed invaletudo mea primum, deinde uxoris, & ejus sexto Martii infecutus placidus ac beatus, mihi vero valde luctuosus, obitus curas respondendi alio, praeter quidem votum, at non fatum meum, maxime averterunt. Nunc ad officium redeam imperant suavissimae tuae, quibus utinam satis faciendo essem. Valetudinem tuam inconstantem non solum Poëmata abs te secundo edita, sed & epistolae tuae adjuncta Elegia elegantissima, quam hîc, cum multi eam expeterent, & tuum ad me missum exemplum in via valde fuisset attritum, recudendam dedi, non sine dolore meo ingenti docent. Eam voveo & spero locatam interea in solido, summo egregii publici & politiae literariae bono. Quid *Graevio* nostro, quid *Gudio* (nam *Gronovium* Patrem ex humanis excessisse, quanquam & nos eadem fata manent, nunquam non moerebo.) acciderit hactenus, ubi haereant, juxta cum ignarissimis novi, & miror hos, si salvi adhuc, quod unicum meum votum, ne brevissima quidem salutatione me vel amicos dignari. Sed tempora procul dubio in culpa sunt, & Martius furor, qui Bataviam vestram, olim adeo florentem potentemque, non parum concussit. Virgilium & Val. Flaccum ex tua emendatione sub praelo sudare coepisse, maximo est mihi gaudio. Ad utrumque quid tenuitas mea conferat, non reperio: praesertim ad prioris *Catalecta*, cum nullae horum membranae mihi fuerint unquam visae. Paucis diebus ante quam tuas accepi, venit in manus Virgilius membranaceus, cum Latino Josepho, Bibliis Latinis & Breviario, ex monasterio nescio quo forte dolo malo subtractus: nec explorare potui, a quo & quonam fuerit missus. Amici tamen, familiaris illius viri, apud quem depositi fuerant, opera inspectio ad bihorium illius indulgebatur mihi. Contuli paucis in locis: nihil a vulgatis discrepabat. Moretum vero, quod e Virgilianis illis appendicibus, cum Ovidio male tributis Aeneidos Argumentis, solum inibi exstabat. contendi, ut vides, integrum, & quidem superstitiosa, ut ut supervacanea plerumque diligentia. Culicis & Ciris, quae Poëmatis prae cunctis maluissem, nec vola ibi nec vestigium apparebat. Valerii Flacci nullas membranas vidi. Editiones habeo Aladinam Anni 1523. Bononiensem Anni 1498. Parisinam Ascensii 1511. Philippi En-

¹ Atqui 16. Febr. jam *Gebhardo* scribit se accepisse Heinsianas & cum eo communicat. vid. Epist. ad *Gebhardum* XXI.

Engentini Argentinensem 1525. Carrionis Plantinianam in 8. 1565. & 1566. in 12. Colon. Allobrog. 1617. 8. Lugdunensem post Carrionem ab A. S. I. C. emendatam 1604. in 16. Gryphii Lugdunensem 1548. 16. Alardi ἀναφθορίων, ut Barthius vocare amabat, Lipsiae in 8. forma proditam. Quas cum putem te ipsum jam inspexisse, rem forte actam agere nolui. Quod si tamen opera alicubi mea uti voles, faxo promptitudo mea appareat. *Reinesii* postumis nescio quae spes sit futura edendis. Adeo frigus haec studia hîc locorum invasit, nostratiumque palatum ad omne sapidum ferè obbrutuit. Bibliotheca ejus apud Brummerianos haeredes haerere adhuc dicitur Lipsiae. Sunt, qui narrant Cancellarium Cizensem *Seckendorffium* eam redimere voluisse, aut jam redemisse. Sed nondum certi quid explorare potui. MSStos tot codices apud eum existisse, quot in Apologia contra *Rivinum* jactat, vix mihi persuadeo. Monstravit enim mihi, cum coram aliquando adessem, MStos Chymicos Zosimi, Pappi Philosophi, Pselli Epistolam de lapide Philosophico, de Iside Prophetissa, Olympiodori codices. Item Macri & Physiologi membranas, illas contuli cum excusis, has descripsi. Vidi & tum nonnullos MStos ex Erfurtenfi Bibliotheca commodatos codices, ut Bernh. Geystensem, Petrum Heliam, cui nonnulla Ovidiana adjuncta erant, cum Catonis distichis. Nec apparent alia MSta in Bibliothecae ejus Catalogo, quem amicus superiore anno mecum communem faciebat. Ejus post obitum excusos libros in Belgium tam raro ferri sane miror. Praeter quidem Epistolas ad Vorstium, Nesteros, & ad me, quas *Bosius* Jenae edidit, qui & plures habet & colligit etiamnum, nihil prodire haecenus memini. Et rarescunt itidem in nostratium Bibliopoliis. *Joh. Fritschius* Lipsiensis Librarius possidet ejus opus Inscriptionum, quemadmodum fatetur praefatione in Gutherium de jure manium a se denuo editum, & expectat, ut publicet, Maecenates. Ego contuli haecenus Manilium cum membranis, Claudianum Mamertum, & hunc quidem cum iis, ex quibus Petrus Mosellanus primam editionem dederat, qui tamen multa praetervidit. *Barthii* ad Orthodoxographorum textum, nullius fere pretii est editio. Rectius *Schottum* secutus fuisset. Nactus & nonnulla Membranarum Schedia valde antiqua ex Caelio Aureliano sum. Ovidium chartaceum de Arte amandi ab amico supeditatum itidem cum Bersinanniana commisi. Metamorphosin itidem charteam nuperrime meam aere feci; sed nonnullis in locis inspecta parum juvit. De cacteris nunc nihil. Christianos Poëtas in manum sumerem denuo, si sumtuarii adessent; quorum curam tamen nondum prorsus abjeci. Forte enim quo minime credam gurgite, erit piscis. Expectavi diu Theodulfum Aurelianensem, & Aleimum Avitum utrumque *Sirmondi*, Commodianum, Hantvillensis Archithrenium, & nonnullos, quos *Labbeus* promisit. Sed frustra. Damasium Parisinae nuperae Editionis nactus sum. Ceponii in Genesin versus ex Adversariis *Barthii* (cujus & Animadversiones in Paulinos Petricorium & Pel-laecum mecum sunt) descripsi, quantum inibi exstat. Bernardo Geistenfis Palponistam longe auctiorem & emendatiorem reproducerem, si textus alicubi integrior reperiretur. Lipsiae fuit olim in Collegio Min. Principum, ut Ca-

talo-

talagus indicat, cum Henrico Samariense, & aliis nonnullis raris, sed a mala manu furtive jampridem subtractus. De Victore Massiliensi seorsim excudendo itidem cogito, modo Typographus officium suum non deserat, & typos novos paret. De aliis nunc parco scribere. Utinam aliquis Solimarium Gunteri, Johanneida Corippi, quae in Bibliotheca Budensi fuit, Antiocheida Jos. Devonii, quam Cambdenus laudat, tenebris erueret! Tu, vir Nobiliss. si quid juvare potes, beneficentiam tuam exsere, quam grati depraedicabimus; atque utinam superiore anno ad nos visisses! Deum veneror, ut te diu salvum tuis, nobis ac literis fervet. B. V. Scrib. ὡς τάχιστα. Cygn. d. xvii. April. CIOIOCLXXIII. Quid Ampliss. *Langermannus* agit? ecquando Anthologia Graeca auctiore nos beabit, & caeteris promissis? Quae hîc addidi boni ut consulas oro. Alia occasione forte alia & potiora.

EPISTOLA CLXXXIX.

NIC. HEINSIUS

Chr. Daumio.

Cygnem.

Indigne medius fidius, sic ut nil magis, fero, vir clarissime, litterario huic commercio, quod mihi frequentissimum cupiam tecum exerceri, tot objici incommoda ac molestias, per quas fiat, ut alternae epistolae aut tarde perferantur huc illuc, aut plane non perferantur. Quas sane ultimas ad me dedisti, eae cum longo tempore Hamburgi inter manus *Lucae Langermanni* essent quodammodo attritae, vix tandem ad me pervenere ante tertium ab hinc mensem. Libellos vero, qui epistolam comitabantur, ne nunc quidem accepi, sed tamen exhibendos propediem mihi fore confido. Nimirum adeo turbatae primo biennio res nostrae fuere, ut cum amicis exteris consuetudo omnis abrumpenda nobis fuerit, dum defixi in contemplatu calamitatis nostrae haeremus unice, nec alio curas aut cogitationes convertimus. Nunc procella, quae nos totos involverat, dissipatur paulatim ac evanescit. Itaque operam daturus sum diligentem, ut frequentiores in posterum ad vos perferantur: praesertim cum noster *Graevius* mihi asseverarit, fixam esse Lipsiae sedem a suo fratre, cujus opera in litteris curandis tuto posthac possimus uti. Interim, quod exemplum harum litterarum, quas ante hoc biennium ad te & Cl. *Gebhardum* datas periisse in via e tuis sum edoctus, non ita nuper fortuito sese obtulisset mihi, ejus copiam tibi faciendam duxi, unde liqueret, officio me haudquaquam defuisse, simulatque post peragratum ultimum septentrionem, & attritam multo tempore valetudinem, in tranquilliorum soli natalis portum me subduxeram. Neque enim quicquam in iis praeterea commendandum occurrit. Ubi tranquilliora tempora nos respexerint, quod propediem fore auguror, tantum fortassis confidentiae mihi arrogabo, ut ausurus sim molestiam tibi exhibere, super conquirendis libellis nonnullis apud vos in publicum prolatis, sed quos videre nobis hîc terrarum minime contingat. Cujus sunt

Tom. V.

Ec

no

notae philologicae sat multa Weitziana ac Riviniana, quae apud nos haberi non possunt. Eoque in numero illius in Ibin Ovidianam animadversa, hujus non pauca, qua Graecis scriptoribus, qua poëtis Christianis illustrandis, ut audio, data memini, & vidisse me *Andreae Senftlebi* nuces saturnalitias, libellum non inelegantem. Nec dubium est mihi, complura id genus alia inter vos proflare, quae mereantur nostris quoque usibus patere. Nam de scriptis Reinefsianis, omni eruditione cumulatis, fama est non pauca, cum ab *Andrea Bosio*, tum a te quoque exspectanda nobis, per quae singularem in modum erudiamur. Ego etsi consilium cepi jam pridem de privata vita amplectendâ, quae me defultorem hactenus in solida apud Musas, tanto neglectas tempore, reponat gratia, tamen nec valetudo, nec temporum calamitas satis ferunt, ut animo defaecato convertar ad ea perlucanda, quae per majus otium chartis olim illevi. Et sane si tempestas bellica interquiescat nonnihil ac sedetur, Germaniam vestram denuo adeundam mihi propono, ut salubrium thermarum ope debilitati pedum, quam satis incommodam experior, quoquo modo consulatur. *Graevius* noster, quantum licet per temporum iniquitatem, assiduus occupatur in Cicerone illustrando. *Gudium* aula Holsatica sibi adfixit, de quo rari ad nos feruntur nuntii. *Gronovium* patrem post diuturnam valetudinem hydrops ante hoc biennium nobis eripuit. Filius natus major, dum peregrinatur apud Tuscos, a magno Duce, literarum amantissimo, quam laudem Mediceis omnibus esse domesticam minime ignoras, ad professionem bonarum artium Pisanam evectus est, susceptusque in locum praeceptoris sui *Valerii Chimentelii*, in flore aetatis ipso extincti, cujus limatissimum de Biselliis veterum vidisse commentarium potuisti. Catalectorum Maronianorum & scripta exemplaria & vetustae editionis codices adhuc quaero nequicquam. Quantivis pretii fuisse mihi est visum exemplar illud, sub initia artis typographicae ipsa prolutum in lucem, cujus testimonio V. C. *Caspar Barthius* in Adversariis frequenter est usus. Sed ad quem liber is pervenerit, indagare non possum, Valerii Flacci codices editos excussi plerosque, nec defuere manu exarata volumina ejusdem mihi scriptoris. In quibus praesidii nonnihil fuisse ut haudquaquam negarim, sic tamen ad conjecturas recurrere frequenter sum coactus. Bibliothecam meam hac aestate e Suecia, ubi haeret majorem partem, exspecto, quam nactus & Alcimium Avitum & Theodulphum *Sirmondi* praestare tuis usibus potero. Utriusque enim exemplar geminum me reor possidere. Cl. *Langermannus* totus est foro & causidicinae addictus. Quanquam non semel jam est pollicitus nobis, mox fore, ut ad studia Graeca potiliminio revertatur. Vale, vir praestantissime, & mihi favere, ut solebas, perge. Dabam Hagae Comit. *MDCCCLXXIV. xxx. April. Gregor.*

EPISTOLA CXC.

CHRIST. DAUMIUS

Nic. Heinsio.

Hegam.

Voto forte diutius, Nobiliss. Heinsi, tuo, imo & meo, protollo responsum ad binas tuas, mihi longe acceptissimas, meum. Sane hanc moram causati fuerunt Amici, a quibus mihi pollicebar, quae desiderabas. Sed, praeter ea, quae adjunxi, caetera frustra. Accessit expectatio literarum Graevii nostri; ne quid dicam de invaletudine, quae per aliquot hebdomadas, cum aliis deinde remoris, studiis meis justitium indixerat. At ego avidissimus ille sititor tum Val. Flacci, tum Alc. Aviti & Theodulphi a *Sirmondo* editorum, desiderio horum fere contabui. Quibus tandem aliquando a te impetratis (deus faxit quamprimum!) quam laetabor tum, quam triumphabo! Libelli mei superiore anno ad *Langermannum* missi, sed ut ex tuis cognovi a litteris avulsi, an interea appulerint, valde scire aveo. *Gebhardo* tuas misi; at responsum adhuc dum ab eo praestolor. Qui, nisi fallor, *Senfiebii* tum Nuces Saturnalitias, tum *Aleam*, ut pote editor, ipse donabit. *Rivini* nonnulla opuscula, ut *Tertullianum*, *Victorinos*, (quibus tamen non addidit, quae *Sirmondus* publicaverat inter quinque patrum opuscula, quae postea a *Bosio*, nunc *μακκαεῖτη*, nactus erat, & quorum *Joh. Anton. Campanus* in epistolis suis olim meminerat) *Cassii Problemata*, *Phaemonem*, *Dioclem Carystium*, *Summa artis Poëticae fastigia*, epistolam de *Nazianzeno*, quae ab ejus Filio, paulo ante suum *Lipsia* discessum impetravi, a me capeffe. Caetera haftenus non reperi, dabo autem ulterius operam, si quid aliunde se prodat, id ut tibi asseram. *Weitzius* in *Ibin* an quid scripserit, dubito. Certe nunquam comperi. Venerunt his diebus in manus meas *Notae* ejus in *Cypriani* (vel *Tertulliani*) *Sodomam*. Inscripterat, ut ex *αὐτογεγράφω* patet, ultimo vitae suae anno, is post Christum natum erat 1642. *Caspari Hofmanno* celeberrimo Medico. Sed typographine culpa, an ipsius *Hofmanni* incertum, liber inter chartas Amici nuperrime defuncti, qui multa *Hofmanni* ab ejus obitu acceperat, delituit, a Filio ad me missus. Eas *Notas* noster *Typographus* pollicitus est se editurum post *Lipsiensem* proximam *Panegyrim*. Potero tum, si fiet, addere *Gronovianas* *Notas*, ex ejus *Observ. in Script. Ecclesiasticos*. *Barthii* veterem *Virgilium* cum *Catalectis* quis nunc possideat, compertum nondum habeo. *Chimentellium* nondum vidi. Etsi meus *Konigius*, Professor Poëseos *Altdorfinus*, qui te mecum admiratur, tuam poësin magnifice effert, & salutem tibi a se adscribi enixe rogat, eum possidet: ab eo ut ejus conspectum habeam, spero me facile impetraturum. Ille in *Theodulphi* versu quodam. ^{agens,} *Exul, inops, pauper, tristissimus, anxius,*

1 In *Sirmondi* editione lib. iv. Carm. pag. 213. legitur *agens*. Sed, si mihi liceret sententiam dicere, *algens* praeferrē omnibus conjecturis. Notum illud *Juvenalis*, *probitas laudatur & alges*. *Theodulfus* vero haec adjectiva, quae miseriam ejus exprimunt, ex sollemni quasi formula, cumulat. vid. ad *Ovid. Epist. vi. 162.* & *i. Amor. vii. 113.* vide etiam *Inf. Epist. Cix.*

agens, uti in Canisii Editione jacet, ubi τὸ *agens* Barthius in *egnus*, pro *egenus*, inepte mutarat, Reinesius autem in *aegrens* mutarat, τὸ *agens* retinet, exponitque, qui sine gente est, ut *amens*, qui sine mente est. Valde vellem hîc inspicere *Sirmondum* posse observationes meas: ut post domestica quaedam inpedimenta tandem e diversis schedis congeram, non abnuo. Servet modo Numen benignissimum nos vivos salvosque. Quae ad Statium emendationes interea tibi natae sunt, utinam communes nobiscum essent! Volebam plura; sed avocor. B. V. Vir Nobiliss. & favorem persevera mihi, qui haec deproperabam Cygnae XIV. Kal. Septemb. Anno CIOIOCLXXIV.

EPISTOLA CXCI,

CHRIST. DAUMIUS

Nic. Heinso.

Hagam.

Quas Nonis Octobribus ante triennium hoc primas ad me *Gebhardumque* dedisti, vir Nobilissime, hoc vero ipso Anno mense Aprili descriptas denuo misisti, accepi 14. Decembri demum. Tuas inde *Gebhardo*, a quo insertas accipis, cum *Senftlebi* de Alca libello (Nucum Saturnalitiarum, ob distracta exemplaria, copia neque ipsi, neque mihi haecenus fieri potuit, inquiram tamen amplius) his nundinis Lipsiensibus transmittam. A *Graevio*, nescio an meas cum fasciculo acceperis; certe miror ab ipso ad geminas meas nihil reponi. Fraterne ejus in aula sit, an quis alius, equidem haereo. Placuit itaque has ad *Langermannum* per ipsius Fratrem curare, experimentum capto, an haec via ad te verior breviorque futura sit. *Weitzii* in Cypriani Sodomam Notae ob domestica remoramenta, & publicam superioribus mensibus Eccles. & Scholarum Visitationem Electoralem, nondum praelum subierunt: neque mea nonnulla, quae editurus alioquin eram. Uxor is praeterea, ex qua prid. Kal. Nov. Filiolus mihi seni natus, adversa valetudo hebdomade ista curas manibus meis item excusserunt. Avitum & Theodulphum Sirmondianos utinam secunda aura huc adveheret. Nam a *Bosio*, qui humanis pridem excessit, nihil amplius mihi opis. Ejus Bibliothecam Illustriss. & Celsiss. Principem Vindobensem emisse narrant. Juniores *Gronovium* Norimbergam nuper transiisse fama est. Qua de causa me fugit? Exspecto autem brevi, ut amici inde mei eam mihi aperiant. Valerium Flaccum anxie etiamnum desideramus. Sed de valetudine tua afflicta nescio quis rumor, utinam falsissimus! increbuit. Ea ut in solido locetur, diuque vigeat, caeleste veneramur Numen. Interea caetera a te expetita hinc inde conquirō; ubi fuero adeptus, nulla mora intercedet, quin ad te statim curentur. B. V. Vir Excellentissime, & favorem tuum mihi persevera. Dabam Cygn. d. 28. Decemb. Anni CIOIOCLXXIV. ad finem tendentis: cujus exodium novique exordium longe felicissimum apprecor.

EPISTOLA CXCH.

NIC. HEINSIUS

Chr. Daumio.

Cygneam.

EST fane, cur optimi *Langermanni* officiis plurimum me debere haud ingratus agnoscam, Daumi Clarissime, qui in litteris nostris ultro citroque curandis, sedulitatem suam ac fidem argumento non uno nobis approbatam nuper voluit. Ultimas certe meas diligentem in modum ejus opera perlatas ad te fuisse ex iis datur colligi, quas noster *Graevius*, vir omni candore, omnique morum ac liberalioris disciplinae elegantia uberrime instructus, non ita nuper, dum rus contendens utor ejus solenni hospitio, mihi abs te traditas voluit, una cum *Rivini* libellis nonnullis, apud nos haudquaquam visis hactenus, eamque ob causam longe acceptissimis. De altero fasciculo *Hamburgum* meos in usus ad *Lambecii* fratrem abs te misso quod ad eundem perscribebas *Graevium*, errorem esse nunc demum doceor per *Langermanni* litteras, qui monet nec *Lambecio* fratrem esse, aut *Hamburgi* aut alibi locorum, & sibi esse concreditum fasciculum, quem a *Lambecii* fratre nequicquam exspectassem. Ceterum defuisse hactenus occasionem, qua tuto ad me perferri possit. Nam priorem fasciculum, qui nonnulla e scriptis tuis, praesertim poetice completebatur, diu est, quod sum consecutus. Toto jam triennio ut a curis ac occupationibus abstineam, per contumaciam fit valetudinis, ejus potissimum impulsu cum studiis tot annos intermissis rediturus in gratiam, nisi consilii hujus ac propositi expertem me vellent cum tricae forenses super paterna haereditate, quibus diuturnis pridem teneor implicitus, tum publica temporum & patriae bellis atrocissimis obiectae calamitas. E Germania redux ante hoc biennium ad paternum larem, libros complures mecum advexi, quos in Ubiis potissimum collegeram, dum bibliopolarum tabernas sagacius indago excutioque. Hos cum ruri nuperius essem, quo deferendos cum reliqua curavi bibliotheca jampridem, non licuit pervestigare, ut *Alcimum Avitum Sirmondi* promissum tibi seponerem, oppressus a morbo tum, qui ne nunc quidem fatis remittit. Opinabar & *Theodulfum* ejusdem *Sirmondi* in Ubiorum colonia quoque a me repertum, verum inspecto catalogo, non *Theodulfum*, sed *Eugenium* ibi a me comparatum fuisse invitus agnosco. Quem si tuis usibus non inutilem arbitraris, seponam libentissimus, ante decursum Martii mensis omnem in villam, ut opinor, rediturus, nec quicquam diligentiae desiderari in me patiar, ut & *Theodulphum* consequaris: praesertim si pax fera nos hoc anno respexerit, facillimum erit *Emerici Bigotii* summo studio abs te desiderati exemplar consequi. Nam quod a me possidetur, cum *Sirmondi* ipsius munus sit, manu ejus, fronti voluminis adscripta, id testante, aegre fateor a me demittam: nisi quod tuae in spem gratiae, vir humanissime, nihil non velim debeamque effectum dare. Cogita interim etiam atque etiam ac perpende tecum, si quid

praeterea libellorum conquistum velis, quod una cum Avito ad te veniat, qui vix meretur, ut solus atque incommutatus itineri semet accingat: & ego tuam munificentiam si non assequi & aequare, aemulari certe percipiam, si meae res sit facultatis. E scriptis Senftlebianis Aleam veterem, Argo, & nuces Saturnalitias memini possidere in bibliotheca mea nuper inventas. De Rivinianis quae desunt mihi, agam proxime, ut & de Weitzianis; Neque enim satis respondet memoria, ut de iis quicquam adfirmem, nisi consulta prius inspectaque bibliotheca. Opera eadem Theodulphum *Sirmondi* adibo super versu illo, *Exul, inops, pauper, tristissimus, anxius, agens.* Contextu Valerii Flacci & Maronis jam ante hoc triennium typis descripto, annotatis meis typographus manum admoveere cessat hactenus, dum praestolatur tempora magis pacata: quae adsint utinam, & nos afflictos solentur propediem! Ego Poëtarum Christianorum corpus post curas *Georgii Fabricii* tuis beneficiis acceptum referri ab orbe litterato vehementer velim. Vale, Vir eximie, meque inter tuos numerare, qui te colendo concedo nemini, perge, quaeso, in posterum. Hagae Comitum CIOIOCLXXV. XIV. Martii.

EPISTOLA XCIII.

CHRIST. DAUMIUS

Nic. Heinso.

Hagae.

Quas cum fasciculo, in quibus & *Gebhardi* literae, ad *Lucam Langermannum* superiore Decembri misi, an acceperis, vir Nobilissime. dubius adhuc feror. Nunc nactus ex insperato hominem, qui in Belgium ad vos se iturum professus est, illi breves has, & ob serius indicatum ejus discessum satis festinatas commisi, ut hac oportunitate explorarem, quid meis interea esset factum. Afferebatur superiore anno de adversa valetudine tua tristis nuncius. Ea si (quod voveo!) mutavit, & si vales, bene est; Deumque oro ac veneror, ut vitam tibi proroget & diuturnam & vegetam. Per exhibitorem harum speramus citius responsum nos nacturos; se recte enim curaturum commensali suo hactenus Lipsiae, amicissimo meo, certa fide spondit. De Val. Flacci, Virgilii ac Silii editionibus quae spes tandem, item de Avito ac Theodulpho *Sirmondi*, certior fieri admodum desidero. Lipsienses promittunt post nundinas Editionem Paullini Petrocorii de vita Martini, cum Paullini Pellaei, Aufonii Nepotis, Eucharistico, a *Jureto* & *Barthio* Animadversionibus illustratorum. Qui si pactis steterint, exempla vobis servabuntur. B.V. Magni nobis aestimate vir, & diutissime vive. Dabam Cygnea die XVII. Martio Anno CIOIOCLXXV.

EPISTOLA XCIV.

NIC. HEINSIUS

*Chr. Daumio.**Cygnem.*

MArtio Mense nuperius decurso, vir clarissime, rescripsi ad tuas perquam jucundas, quas beneficio nostri *Graevii* eram consecutus, fasciculumque *Lucae Langermanno* ad te curandum commisi, tum hominem simul obsecravi amicissimum, ut quas a te mihi tradendas erat nactus, quamprimum mitteret, id quod factum haecenus ab illo non esse miror & doleo. Interim proximis diebus, dum *Leidam* forte excurro, alterae abs te una cum *Geronticis Barthianis* sunt traditae praeter expectationem omnem. Praeterea is, qui tradebat, cum offerret operam suam in curandis, si quae ad te perlata vellem, arripiendam duxi occasionem opportunam, ac confestim *Avitum Alcium Sirmondi*, quem munus a me acciperes, paravi. Nam de *Theodulfo* jam pridem significabam, non illum, ut putaram primo, sed ejusdem *Sirmondi Dracontium* a me redemptum in *Ubiis* pridem fuisse. Nec despero tamen fore, ut *Theodulfo* aut *Lutetia*, aut aliunde nanciscar brevi, praesertim si pax alma nos tempestive respexerit, quod faxit deus. Id enim nisi sit, & quidem quamprimum, studia bonarum artium jacere apud nos pergent. Amici tui hinc terrarum ad unum omnes recte omnino valent. *Jacobus Gronovius* observata nonnulla ad *Dionem Coccejanum*, *Arrianum* de Expeditione *Alexandri Magni*, & *Tactica Aeneae* proxime in publicum dedit. *Gysbertus Cuperus*, consul *Daventriensis*, quem ex *Observationum* libellis tribus luce pridem donatis potes novisse, totidem alios praelo paratos habet; cum aliis scriptis rem antiquariam egregie illustrantibus. *Abrahamus Berckelius*, praeter *Stephani Byzantini* fragmenta recens inventa, *Antonini* quoque *Liberalis Metamorphoses* cum annotationis suis emisit pridem. Eundem *Antoninum*, curis aliquanto uberioribus illustratum, *Thomas Munckerus* sub praelo nunc habet. *Graevius* noster *Meursianis* trium insularum antiquitatibus edendis nondum est defunctus. Me occupationes privatae, eoque permolestae, quod circa tricas versentur forenses, a Musis divellunt haecenus nolentem. Prodierunt & annotata *Samuelis Tennulii* in strategemata *Frontini*. *Theodorus Ryckius* *Servio* se manus admoturum pollicetur. Vale, vir praestantissime, & si quid studiis tuis videbor conferre posse aut ornamenti, aut utilitatis, manda confidenter, quod voles. *Hagae Comitum*.
 61010CLXXV. XXI. Maii. Gregor.

EPISTOLA CXCVI.

CHRIST. DAUMIUS

Nic. Heinſio.

Hagam.

Q Uas XXI. Maii Gregor. hujus anni ad me dederas, vir Nobilissime, xvi. Junii Greg. recte Lipsia ad me fuerunt perlatae; sed absque *Sirmondi* Avito, quem nescio retinuerisne tutemet tecum adhuc, an Amicus ille, qui literas ad me curavit. Exspecto igitur, anxio cum desiderio, munus tam rarum, tam praeclarum, tam optatum: pro quo quas agam habeamque gratias vix satis reperio. Non autem perlatae fuerunt haec illae tuae, quas mense Martio cum fasciculo ad *Lucam Langermannum* dedisse vis, quas quemque non minus avide desidero, ac Avitum. Theodulphi Aurelianensis Opuscula a *Sirmondo* 1646. edita (non enim *Rivini* Editio omnia complectitur) si conciliare vel meo aere poteris: gratissimum erit. Unde enim alioqui consequar, non novi. Dracontium *Sirmondi* a *Barthio* olim nactus sum, ex cujus exempli notis ad oram adjectis *Rivinus* male excerpserat, quae suae editioni inepte inseruit, ut ad *Reinesium* scribere & loca indicare me memini. Caeterum quia a *Graevio* literas acceperis, dabo itidem operam, ut per eum, si quid fasciculorum, deo dante, deinde mittam, curari queat. Epistolas *Plinii Thomae* edidit, mihiq; inscripsit, quod *Barthianorum* Codicum trium usuram ei concessissem. Nunc in Epistolis *Politiani* edendis allaborat, quas una auxi. *Reinesii* Epistolarum ad me daturum, a *Bosio* editarum, exemplum, si desideras, mittam quod mihi superest, si per novitium id Amicum, quo nunc utimur, commode fieri potest: Sin; *Graevii* fratri commendabo, ut ne desit mihi gratificaturo vobis, rogato. Meum cum *Columbano* Catonem nuperrimum nescio an acceperis. Sunt & ejusdem *Reinesii* tum ad *Nesters*, tum ad *Vorstium* editae epistolae. Si quid harum aut aliorum librorum posces, indica saltem, faxo, nisi inimpetrabile sit, a me habeas. Ego ubique quaero *Architrenium* *Hantavillensis* ab *Ascensio* editum, & *Hericum* de vita S. Germani. Sed frustra. Et si enim hunc a *Barthio*, qui ex *Meursiano* Codice descripserat, adeptus fuerim, mallet tamen excusum tractare, quod ille in transcribendo sua aliquando, studione an properationis incuria nescio, in miserit. *Weitzii* *Cyprianus* nondum praelo subjectus est ob domesticas nonnullas difficultates, & *Typographi* lentam operam, qui & *Victorem* *Massiliensem* ultra votum meum diutius premit. Nec *Lipsienses* *Paulinum* *Petricorium* ereptum in manus hucusque resumpserunt, culpa puto sumptuarii, qui chartae satis ex voto *Typographi* suppeditare negat: unde editio differtur. *Gronovii* illa observata nondum vidi. Ubi is agit jam? Non pauca de eo mihi per litteras retulit jucunda *Königius* *Proff.* *Altorffinus*, cum quo in Bibliotheca ibi publica sermonem miscuerat. *Gisbertus* *Cuperus* auditus, non visus est mihi. Neque *Tenulii* *Frontinus* ad nos pervenit. Fragmentum *Stephani Byzantii* & *Liberalis* *Metamorphosin* sum

sum nactus. Antoninum *Gatakeri* saltem possideo: *Casauboni Bosius* usui olim meo concesserat. His diebus in Ciceronis Philippica ix. sub finem fere, pro eo, quod in omnibus, quot vidi, editis legitur: *Ut igitur, si ipsum consulem, quid velit, sic pedestrem ex aere statuam, tanquam ex ejus auctoritate & voluntate decerno* &c. ausus fui emendare: *Huic igitur, si ipsum consulam, decerno. te, vir ingenio, doctrina & acumine singularissime, cum Graevio arbitrum, an bene successerit, capio cupioque: qui, dum Meursianis insudat, Ciceronem forte ad tempus seposuit. Vale, & vive diutissime. Cygneae* cicioclxv. xviii. Junii Gregor. Literis meis superioribus Kal. Sept. Jul. datis & ad Graevium missis addideram nonnulla *Rivini* opuscula. Die vero 28. Decemb. Jul. per *Lucam Langermannum* *Senftlebi* Aleam (nondum enim Nuces reperimus) cum *Gebhardi* ad te literis.

EPISTOLA CXCVII.

CHRIST. DAUMIUS.

Nic. Heinsio.

Hagam.

Litteras tuas, Nobiliss. vir xxi. Maii datas, veluti interea rescripti, accepi, sed nondum illas, quas mense Martio cum fasciculo ad me datas misisti. In nuperioribus meis ex festinatione nimia erravi, vice Antonini Liberalis de Marci Antonini Editionibus verba faciens. Etiam Stephani Byzantini fragmentum a *Berckelio* proditum me habere frustra dixi. Est enim meum a *Tennulio* publicatum. Unum igitur idemque an diversa, haereo. Mitto nunc ex insperato aliunde eruta *Rivini* Christianorum Poëtarum Opuscula haftenus magnam partem inter segestria a Bibliopolis relata rejectaque. Proximis Lipsiensium nundinis a *Böhemo* nostro Avitum acceptissimum tuum munus exspecto. Utinam & Theodulphi Sirmondiani fieri me liceret compotem. Desidero etiam Commodianum, Hippolytum Martyrem a *Marq. Gudio* vetere amico primum publicatum, & ex veteribus libris Hantvillensis Architrenium, meo aere parandos, si parabiles sint. Res domesticae meae hoc anno, si unquam, satis afflictæ me a Musis plurimum abstinerunt. Spero impofterum, deo dante, meliora. A *Graevio* me nullas prorsus accipere maxime mirum est. Junio rem *Gronovium*, vel Patris & *μπαλαίτης* causa salute a me mactari (nisi grave est) velim. *Weitzii*, *Senftlebi* & alia talia adhuc inquiri, at nondum tamen reperi. Ubi adeptus fuero, & horum faxo ut fias compos. *Philippus Labbeus* Soc. J. Parisiis an adhuc vivat, & num Glossaria Graecol. vetera ab eo auctiora, ut Catalogi quidem nundinales promiserunt, prodierint, si forte per te rescire potero, id oppido gratum mihi fuerit. Pollicitus is plura est in Bibliotheca nova MSSorum, praesertim Historica & Poëtica, utinam stetisset promissis! Quid Valerius Flaccus agit? quando nostro conspectui tamdiu desideratus hospes se sistet? Pluribus te in mage seriis occupatissimum, vir Nobiliss. non onero. B. V. & salve diu diuque. datae Cygneae a. d. xxv. August. st. Jul. cicioclxv.

Tom. V.

Ff

EPI.

EPISTOLA CXCVIII.

CHRIST. DAUMIUS

Nic. Heinsio.

Hagam.

A Vitum Sirmondi cum adjuncta Elegia, mihi lecta, uti & priores, jucundissima recte per *Böhemum* nostrum accepi tandem. Pro quibus denuo gratias ago habeoque. Aviti Homilium de Festo Rogationum, & Epistolas Lugduni excudisse *Vincentium Portonarium* Anno 1536. chartis 12. cum *Simlerus* in Bibliotheca Gesneriana a se aucta memorat, miror, cur *Sirmondus* id tacuerit. *Langermannum* proxime per literas denuo conveniam de ad ipsum abs te missis literis, & meis itidem cum fasciculo quid factum fuerit, exploraturus. Caetera, quae in literis cum fasce libellorum Rivinianorum superiore hebdomade ad *Böhemum* nostrum missis memoravi, nunc repetere parco. Hoc addo solum. *Rivinum* sibi in corrigendis iis Poëtis multum indulgisse, ut vel ex Corippo initio libri 2. liquet, de Eugenio ne quid dicam. Unde *Reinesii* strigilim non immerito expertus est. Nisi grave est, rogo, ut vel tribus significes, an recte meae hactenus traditae, & si quid porro desideres, mea opera simul utaris. Pluribus molestus aut importunus esse desino. B. V. Vir aeternum colende. Dab. Cygn. Kal. Sept. Stylo Jul. CIOIOCLXXV.

EPISTOLA CXCI.

NIC. HEINSIUS

Chr. Daumio.

Cygneam.

B Inis tuarum responsum a me deberi, jampridem invitatus agnosco, *Daumi* praestantissime, quarum alterae Decembri mense anni proxime decursi, sunt exaratae, Junio subsequenti alterae, nec distulissimam partem debitae scriptio- nis, nisi quod rogato jampridem a me per epistolam in Galliis amico, ut Theodulphum *Sirmondi*, quem videre flagitas, conquirat, nil rescripti ferrem hactenus. Certus tamen sum, non defuturum illum meis precibus in re tantilla, si liber inveniri utcumque possit. Interim Alcimi copiam sibi jam factam esse augurari licet, nisi frustratur nos illorum diligentia, qui ejus ad te curandi provinciam jam dudum susceperunt, quique litteris libello additis ad te curandis spem nostram non fefellerunt. Illud vero permolestum fero de litteris meis, quas *Langermannus* debuerat curasse, eas ad te perlatas non fuisse. Architrenium & vitam S. Germani conquiram diligenter, si auctiones, quae per vicinas urbes, & in hac aula frequentes admodum, & tantum non quotidianae sub autumnum habentur, tale quid se nobis offerant. Epistolas a *Reinesio* ad te exaratas, cum ante hoc triennium essem Francofurti, sum nactus. Epistolas

stolas Plinii a *Thomasio* editas hîc terrarum hætenus non vidimus. Committebam olim in Etruria vulgatas scriptoris hujus editiones, cum vetustissimo codice Medicaeae bibliothecae, cujus ope menda complura deterfi. Possideo & ipse membranas ejusdem scripti, sed non valde antiquas; miror interim bibliopolas nostros, qui volumen illud cum notis omnium, quotquot hætenus prodierunt, interpretum se dare falso jactitant, *Claudii Minois* animadversiones, & copiosas & scriptorum codicum praesidio haud contemnendo subnixas, omisisse. *Politiani* nonnulla inedita adhuc delitescunt inter Italos. Certe oden longe pulcherrimam, quae in Poëmatis ejus non existat, *Horatio Cbristofori Landini* videas praefixam. *Jacobus Gronovius* Italicis jam pridem valere jussis, Daventriae in patria sedes suas fixit. de valetudine mea, ut diu adfecta, sic in pejus quotannis vergere, non falsi apud vos rumores sparguntur. Quo magis sum assiduus in re privata componenda reliquum vitae studiis daturus, quod propositum ut constantius teneri a me possit, secessum in agro Trajectino circumspexi jam mihi, in quo hibernam, ut spero, tempestatem sum exacturus. Pro *Senstlebio* de alca libello, gratias hîc egi optimo *Gebhardo*. Nuces Saturnalitias, Argo, & Alani parabolas ab eodem editas *Senstlebio* jam aliunde sum nactus. Meursianae trium insularum antiquitates, & Plinii Panegyricus cum notis *Dominici Bauui*, Graeviano beneficio lucem jam vident. Nunc Cicero ejusdem praelum Typographicum est subiturus. Conjecturam in Philippicis Ciceronis tuam uterque approbamus. Antonini Metamorphoses cum novis *Thomae Munckeri* animalversionibus, & *Gisberti Cuperi* commentarius in sigillum Harpocratis propediem juris publici fient. Idem de Stephano Byzantio *Berckelii* sub Kalendas Januarias erit sperandum. Pro *Rivini* opusculis ad *Graevium* missis, quae dudum nactus sum, gratiis agendis non defui. xx. Septemb. Gregor. cldcclxxv. Hagae Comit.

EPISTOLA CC.

NIC. HEINSIUS

*Cbr. Daumio.**Cygneam.*

SEptembri mense, quas ad te simul ac praestantissimum *Gebhardum* dabam, *Svir Clarissime*, eas recte tibi curatas fuisse licet augurari. quando exploratam jam argumento non uno habemus fidem ac diligentiam illius, qui eas in se receperat. De *Alcimo Avito* praesertim ad te perlato gratulor immane quantum mihi. cum ita te de me meritum esse agnoscam, ut tuis commodis nihil antiquius esse mihi debeat. Hoc igitur munusculum, quod numerosa profusaque liberalitate remuneratum voluisti, missis ad me *Rivini* compluribus opusculis, ut jam nihil e scriptis hominis sane eruditi videar desiderare, multo equidem rubore me suffusum sentio; quando nihil invenio meis hætenus in scriniis, quod tua hac munificentia pensetur. Lutetiam ad *Emericum Bigotium*,

tium, virum perquam officiosum, & mihi in paucis conjunctum, litteras jam pridem dedi, per quas est rogatus serium in modum, ut Theodulphum *Sirmondi* nobis conquirat, nec detrectavit ille demandatam spartam: sed distulit non-nihil, dum ex agro Rhotomagenfi, quo rusticatum pridem concessit, sub Kalendas Decembres redux in urbem, officio hoc defungi commodum possit. Proxime daturus ad illum litteras de Architrenio & vita S. Germani monebo, ut si fortassis incidat in utrumque, aut alterutrum horum, eos assertum nobis eat. Stephani Byzantini fragmentum Berckelianis illustratum notis nunc ad te mitterem, nisi ipsum *Berckelii* Stephanum cis paucos menses proditurum scirem, cui annotata illa in fragmentum auctiora accedent. Hebraeus apud nos, cui *Pinedo* nomen, eundem Stephanum suis illustratum commentariis praelo typographico commisit. Antoninus Liberalis *Munckeri* & *Gisberti Cuperi* dissertatio de sigillo veteri Harpocratis publice hîc prostant: nec non Meursianus de trium insularum antiquitatibus commentarius. Commodianum *Rigaltii*, & Hippolytum Martyrem *Gudii* frustra quaesivi in officinis librariorum. in auctioribus si occurrant quandoque venales, eorum ut fias compos, opera a me dabitur. Alterum horum bibliopolae Parisini Cypriani operibus proxime editis addiderunt. Hippolytum castigatorem, ut prae se fert, *Combesius* in auctuario, sive supplemento bibliothecae patrum. *Philippus Labbeus* in vivis esse desiit jam pridem. Glossaria antiqua, quae multos jam annos sub praelo Lutetiae nescio quas ob causas haerere pergunt, non ille collegit, sed *Carolus Labbeus*, ad quem *Scaligeri* complures exstant epistolae. Hunc quoque librum, etsi nondum juris publici factum, a *Bigotio* sperare sum jussus. Ajunt apud vos Phaedrum jam pridem prodierisse notis *Augusti Buchneri* illustratum, quem videre mihi numquam contigit, cum unice Phaedrum ipsum habeam in deliciis. Nec dubito quin id genus libelli sat multi, per Saxoniam vestram typis descripti sint, qui conspectu nostro fraudantur haecenus. Plinii epistolas a *Thomasio* luci datas jam sum nactus, ut & Nepotem Cornelium *Bosianae* editionis nuperae. Quid factum sit illis litteris, quas ad te curandas *Langermanno* commiseram anno proxime decurso, haud scire possum, cum propter haec bella rarius ad illum scribam. Certe litteras ipsas & accepit ille, uti testatus est mihi, & curae eas sibi fore est pollicitus. De *Graevii* quereris silentio, & ille jam officii sui per me admonitus: ut dubitare vix possis fore, ut in posterum is sese tibi praestet diligentior. Redemit *Elzevirius* ab haeredibus *Vossii* & *μακαρίτῃ* complura viri summi opera haecenus inedita, aut certe auctiora, in quibus libros ejus de vitiis sermonis. Vale, vir clarissime, & mihi, ut facis, perge studere. Hagae Comitum Prid. Kalend. Novembrib. CIOICLXXV.

EPISTOLA CCI.
CHRIST. DAUMIUS

Nic. Heinsio.

Hagam.

BInas tuas, Nobiliss. Heinsi, priores xx. Sept. posteriores xxviii. Octob. Stili Gregor. datas xxx. Novemb. ft. Jul. junctim accepi. Quibus quo minus statim responderem, tum occupationes incredibiles, tum narrationes de inundatione Belgica horrendae causatae fuerunt. Gavissus sum sane iis lectis Riviniana feliciter ad te pervenisse, atque utinam & alia sic possint curari. Reperi enim in meis Bernardi Geystensis mei exemplum, ut & Homilias veterum in Nativ. Christi, & Catonis ante quadriennium revisi unum, Barthii item Claudian. Mamertum, cum *P. Aretini* Colloquio muliebri ab eodem interpretato, *Rivini* Hildeberti Cenom. Homilias. Quos libellos, si nondum possides, vel etsi possides, modo tanti sint ut possas, prima quaque occasione ut tuis accedant, donec alia indagavero, dabo operam. Theodulfo, qui non ita pridem in Amsteladamsium pergulis librariis adhuc exstitit, si eximio *Emerico Bigotio*, Parisiis, ubi editus, venanti propitia Delia faverit; beabor ut qui maxime, & tibi, viroque illi eruditissimo, quas non agam gratias? Epistola tua mense Martio ad *Langermannum* missa, ad quem tamen interim meas dedi, nescio an perlatas, nondum appulit. Inter libros, quos anxie quaero, est & Gulielmus Apulienis, Rhotomagi, nisi fallor, ante hoc seculum fere editus, deinde a *Duchefnio* inter Historicos Franciae relatus. Quo ipso opere, grandioris procul dubio pretii, potiri mihi nondum licuit. Nec *Claudii Minois* in Plinium annotata cognita nobis fuere. Ut *Landini* Horatii, Odae illius a Politiano praefixae causa, compos fiam, allaborabo, qui nuperrime ab amico Virgilium *Pierii* Parisiis editum demum obtinui. Illius Etrusca Poëmata hic terrarum vix speranda erunt. Editus est Venetiis 1546. liber hoc Titulo: *Rime diverse de molti eccellentiss. autori, nonovamente raccolte. Eiusque altera pars* sequenti anno. Insunt *Bembi*, *Sannazarii*, *Naugerii*, *Molsae*, *Ariosti* Carmina. Sperabam in illis & *Politianum* reperturum. Sed falsus animi fui. Caeterum tuas ad *Gebhardum* Uratislaviam ea ipsa hebdomade, qua accepi, curandas Lipsiam misi. Quod & factum esse rescripserunt amici. Exspecto ergo proximis Nundinis responsum. *Philippum Labbeum* pro *Carolo* quod posui, fefellerunt me Catalogorum nundinalium inepti consarcinatores, ratum *Caroli* operam illam *Philippum* resumpsisse. Doleo sane, cum e vivis tam cito sublatum, a quo tam multa praeclara ac rara opera e MSSis promittebantur. Phaedrum a *Buchnero* unquam editum non memini, nec quid monuerunt ipso vivo mei discipuli, quos a me sibi commendatos in fidem receperat: nec post obitum gener ejus *Otho Praetorius*, qui epistolas ejus, Poëmata aliaque editurus erat, si superfuisset diutius. Nunc horum omnium nescio an ulla spes. Orationes Panegyricae nonnullae prodierunt junctim. Corn. Nepotem ejus Hamburgenses nobis dederunt. Libri, quos

memorasti, utinam & ad nos transvolent, & qui praela morantur adhuc, quamprimum in lucem prodeant, voveo unice. *Cuperi* Observationes etiam *Königius* Professor & Bibliothecarius Altdorfius valde mihi commendabat, quas necdum conspexi. Apud nos Corippus *Rittershusii* Altdorffii editus habetur. Epistolae *Reinesii* ad *Joh. Vorstium* Coloniae March. excusae, quibus offendit nonnihil nostrates Theologos, nunc rarius visuntur. An ad te pervenerint, uti & quas ad *Nesteros* scripsit, scire velim. Edidit idem *Vorstius* Sulpicium Severum, Corn. Nepotem, Justinum, Val. Maximum & alia, quae ad me mittere voluit, ut discipulis meis commendata divenderem. Sed cum Bibliopolam non agam, & salubrius in ipsis librariorum tabernis nonnunquam emanatur, renui officium, quod frustra sumsissem. Quod si horum quid arridebit, vel tribus indica. *Vlitii* curas in Venaticos Poëtas secundas, & illustris tui parentis, ἡ μακαρίτης, Theonem nunquam adipisci potui. Essent multa alia, sed te tantum virum hisce ut onerem, religioni duco. Ex Poëtis, quos *Julius Scaliger* censet, frustra aliunde eruere studui *Pauli Cerrati* de Virginitate Carmen. Item quos *Ravisius Textor* laudat *Cantalycium*, *Pacificum*, *Quintiliani Stoeae* *Cleopolim*, *Remaclum*, *Mich. Anglium*, *Valerandum Varanium* &c. Sunt sane rarissimi. *Matthaei Vindocinensis* Tobiam edidit Oporinus 1563. quod poema in Rutgersiana Bibliotheca existit, teste catalogo pag. 92. sed neque hanc editionem indipisci potui. Non ita pridem quasi primus divulgavit *Heringius*, qui de Molendinis scripsit. Olim Lugdunenses Anno 1505. edidere longe auctius, quam *Heringius*. *Barthii* membranae, quae *C. Gevartii* fuere, nunc mecum sunt, sed vix dimidia. Val. Flaccum ecquando tandem videbimus? quando Maronem? Quando assertionem Fragmenti Petroniani, de quo nonnihil ὁ δὲ θεῶ proximis. Nunc enim publicis privatisque negotiis defessus sum, & intorturbor dum haec exaro non semel. B. Vale & vive diutissime, Nobiliss. vir, ac mihi cupere perge. Dab. Cygn. d. xv. Decemb. st. Jul. A. cıııııclxxv. Deprehendi tandem Auctorem Etioſtichi illius de Natali *Bapt. Mantuani*, quod πολυμαθεῖς ατ Reinesius pag. 51. Epist. ad me in Epitaphio lapide Mantuae incisum pertendebat. Ego vero tum contra recentioris, genio Distichi & aliis rationibus ductus, esse suspicabar. pag. 16. 51. 59. Is est *Bernhardus Sturmius* al. *Valterius Patschovinus*, apud quem Centuria 5. num. 73. Etioſtichorum Gorticii Anno 1568. in 8. editorum, legitur. Opuscula illa Mantuani, quae Mantuae 1516. excusa, & in D. *Calixti* Bibliotheca olim exstiterunt, supra modum videre ayeo. Verum unde nanciscar?

EPISTOLA CCII.

CHRIST. DAUMIUS

Nic. Heinſio.

Hagam.

POST nuperas ad te, vir Nobiliss. datas, & jam, ut spero, exhibitas, donatus sum a Professore Lipsienſi *Lic. Oleario*, praesenti Oratorum Herodotea-

tea-

tearum libello, quem, cum nihil novi aliud nunc suppeditaret, mittere placuit alia, quae mihi offerri videbatur, via. Et si enim in juventutis tantum gratiam is concinnatus est: tamen vel aspexisse saltem juvabit, & constabit nonnihil inde, quid a nostratibus publicetur. Est auctor alioqui vir humanus, eruditus & diligens, speramus (si vita nobis a deo ter Opt. nobis concedetur prolixior) plura ac potiora. Destitutus ego uno & altero jam mense Collega, qui superintendentis munus homo ambitiosissimus ambiit & exambiit, laboribus ejus in me unum devolutis, ad plura scribenda raros dies habeo vacuos. Nec nunc satis otii est. Non possum tamen non adjicere, quod incidit, me quum ex Graevio nostro perceperim te Fragmentum Traguriense pro genuino Petronii asserere, valde optare, ut assertiones eae publicae legantur. Apud Joh. Salisber. lectorem Petronii studiosissimum, Epist. 196. haec legimus: *Utinam submergatur in thermis, quibus dignus est, quas meruit, ut conjiciatur in rutae folium, cujus peritonius in poenam delinquentium meminit.* Annon Petronius hic reponendum, cum hoc proverbium *in rutae folium conjicere*, in eo ipso fragmento occurrat? Idem Salisb. l. 3. Policrat. cap. 13. *Pica siquidem pulvinaris efficacissima est, & ut dici solet, cornix nocturna.* At p̄oris illa pica pulvinaris in eodem Fragmento jacet. *Thesaurum* genere Neutro dicit. At sic apud Plautum olim legebatur in Aulularia observante Barthio, Adv. pag. 1431. Et sic clare visitur in meis Membranis, quas ab eo possideo. Quin & 3. Trin. 3. vers. 35. si distinctio omittatur, eadem vox apparebit. *hoc ubi Thesaurum effuderis.* Consideretur modo is locus. Sane & auctor Queroli, prout scripti codices referunt, teste *Rittershusio* pag. 95. ad eum, & *Grutero* pag. 113. non temere usurpavit. Sic postea Beda in vita Cudberti cap. x. vers. 19. Angelomus Lexov. praefat. Comment. in libros Regum, & Alcuinus. Laudat & hos *Barthius* pag. 2151. & 2723. Haec nescio an novitii suppositoris esse queant, praesertim cum multa alia id dissuadeant. *Statilium* ajunt contra *Wagenseilium* scripsisse pro Fragmento Traguriano. Cujus scriptum utinam in meam potestatem veniat. Sed avocor. Tu vir Nobiliss. haec incompertius deproperanti ignosce; & anprobenetur tibi, vel tribus aperire dignare. B. V. Dab. Cygnae d. xx. Dio. A. CIOICLXXV. ft. Jul.

EPISTOLA CCIII.

NIC. HEINSIUS

Chr. Daumio.

Cygnae.

VOluptate mehercules ingenti perfundebar ante paucos dies, facta mihi copia epistolae tuae Decembri mense pridem decurso exaratae, per quam sum edoctus, binas meas recte tibi redditas fuisse, *Daumi* clarissime. Nam quamquam amissae in via utriusque facilis omnino jactura fuerit habenda, malo tamen officii mei diligentem atque illibatam constantiam tibi liquido apparere. Ad *Langermannum* diu est, quod litterarum nihil dedi, revocantibus nos a com-

mer-

mercio utrimque litterario bellis funestissimis, per quae necessitudinum, etiam antiquissimarum vincula labefactari videas ac convelli. Ita fit, ut ignorem prorsus, quid nam iis factum sit litteris, quas ejus fidei ad te curandas proxime commisi. Cum revertar ad officium litterarum, rem totam curatius apud illum explorabo, si valet tamen, ac superstes est. Totus enim adhuc in luctu, amissis nuper compluribus amicis, eo deveni calamitatis, ut nihil ominer nisi funestum. In Italia certe nuper amisi *Octavium Falconerium*, & *Carolus Datum*, viros mihi conjunctissimos, ne quid de Cardinali Etrusco *Leopoldo Mediceo*, dicam, Principe artium bonarum longe amantissimo. Sed a funebribus hisce ad laetiora transeamus. Ab *Emerico Bigotio* fasciculum librorum sum iustus exspectare jam pridem, qui, si mihi *Theodulphum Sirmondi* feret, ut auguror, libellum sine procrastinatione eadem, qua *Avitus* ad te pervenit via, nisi si quam tutiorem ultro indicabis, perferendum curabo. Jubet vir praestantissimus te plurimum salvere, ac rogat, si quandoque offeretur tibi venalis editio *Lipsiensis* Anni 1552. *Orationum Gregorii Latinarum*, ex interpretatione *Rufini*, eam sibi vindicare ne graveris. Ut enim in lectione patrum praecipue Graecorum est assiduus, ita magno studio conquirat, si quae versiones horum antiquae, aut etiam recentes typis descriptae sunt. Tum doceri cupit, quis *Langevoethus* ille, ex cujus versione *Lipsiae* jam olim publicata, orationem *Nazianzeni* curavisti denuo edendam. Hunc quoque libellum, si commodo tuo fieri possit, conqueri a te velit. Proxime scripturus ad illum rogabo, ut *Gulielmum* tuos in usus vicissim conquirat. Nec deerit suis partibus, ut est mire officiosus. Rerum Gallicarum scriptores a *Duchenio* publicati apud nos si quando venales occurrunt, quod raro quidem contingit, pretio ditrahuntur infano. Unde fit, ut in mea bibliotheca haecenus desiderentur. Sed jam *Regii Lutetiae Typographi* in eo sunt, ut novam horum editionem meditentur, & quidem luculentior. E libris, quos designas, *Bernardum Geystensem*, tum & *Cenomanensem Hildebertum Rivini* nondum videre contigit. Nec *Rittershusii* Corippum aut *Reinesii* ad *Vorstium* epistolas. Sed *Francosurto* fortassis haberi possent. Etruscorum *Politiani* geminam possideo editionem, *Aldinam* alteram, alteram *Mediolanensem*; cui *Julius Caesar Scalliger* pulcherrimum manu sua elegidion adscripsit, arbitratus nihil in Etrusca poësi hoc libello exstare praestantius. Odae illius Latinae, quam *Landino* dedit *Politianus*, initium tale erat, quantum recordor; *Vates Threicio blandior Orpheo*. Latet ea alibi in scriniis meis. Quae cum excutientur, tui recordabor. Nam ipsum *Landini* *Horatium* non possideo. *Augusti Buchneri* opera omnia in lucem proferri rei litterariae intererat omnino: fuit enim vir ille mire elegantis ingenii. *Plinii* epistolas animadversionibus *Claudii Minois* illustratas, & *Gratum Vlitii* ad te mittam, simul dabitur per otium libellos e latebris armarii mei indagare. *Theonem* parentis mei etiam invenero haud difficulter, non enim rarus apud nos in auctionibus occurrit venalis. Utinam plures designares ex hisce, qui a te desiderantur potissimum. Hoc ut facias quam primum vehementer te rogo. *Matthaei Vindocinensis* editionem *Lugdunensem*

opinor me possidere, Oporinianam non vidi: sed in membranis descriptus non raro oblatus mihi est. Baptistae Mantuani opera in tomos quatuor distincta ex editione Antverpiana possideo. Typographi Parisini opera Gregorii Mag-
ni & Leonis primi dederunt nuper e scriptis libris auctiora ac castigatiora, praelo commissuri propediem Ambrosium quoque & Augustinum, pari dili-
gentia recognitos, ut & Cassiodori opera. *Baluzius* capitularia Regum Gallo-
rum sub praelo habet duobus voll. in folio. Apud nos praela Typographica feriantur quodammodo propter bella. Francofurti ad Viadrum Anno 1602.
edita est *Christophori Pelargi* methodica explicatio actorum Apostolicorum. Ac-
cedit vita & peregrinatio D. Pauli ab Euthalio Diacono & Sophronio descripta.
Hunc librum & *Bigotius* & ego vehementer desideramus. Vale. Hagae Comi-
tum IX. Mart. CIOIOCLXXVI.

EPISTOLA CCIV.

CHRIST. DAUMIUS

Nic. Heinsio.

Hagam.

NON minore ego perfusus fui laetitia, acceptis & lectis tuis literis, quae
postridie Kal. April. st. Jul. cura Bohemi nostri recte ad me pervenerunt.
Ex iis autem intelligo te meas, 12. Dec. superioris anni Styl. Jul. scriptas,
cum *Olearii* Opusculo Herodoteo tum nondum fuisse nactum; aut si post datas
ad me tuas demum nactus es, libellum tamen non una. Quod minime placet.
Id ex Dn. *Carpzovio* didici, qui in literis tuis ad ipsum exaratis, fasciculum
meum non accepisse te significasse affirmabat. Curatus est autem per *Graevii*
fratrem, nec rescivi fatis haecenus, quid de illo factum sit. Amicos tam prae-
stantes te amisisse, ipse pariter doleo. Amisi & ego, licet vilioris fortis, ami-
cum tamen utilissimum mihi, & libris raris conquirendis, etiam vili aere plane
incomparabilis diligentiae *Joh. Sextum*, cui Catonem meum, quem cum *Gei-*
stenis, an *Geissensis*, *Palponista*, duplo jam notis auctiore & emendatiore,
sed nondum excuso, & *Reinesii* ad *Vorstium* Epistolis nunc mitto, inscripsi.
Is si viveret adhuc, Clarissimo *Bigotio* tuo forte gratificarer celerius. Inquiram
tamen per alios, quantum potero. Eum praestantissimum virum, ut a me vi-
cissim quam officiosissime salvere jubeas, enixe rogo. Cato, tumultuario studio
congestus, non accurate habitus, si placet, & tanti est, posset illi mitti. Red-
hiberem contra aliud exemplum. *Gystenis* nullum superest. *Hildeberti* haec
compingens reperire non potui. Sequetur occasione proxima. Gr. *Nazianzeni*
ex *Rufini* translatione habetur in publica sive Senatoria hinc Bibliotheca, cui
ego custos sum. *Apologeticus*, de *Epiphaniis* sive *Nat. Domini*, de lumini-
bus, quod est de secundis *Epiphaniis*, de fide liber, de *Nicena* fide, de *Pen-*
tecoste & *Spiritu S.* de semet ipso ex agro reverso, de dictis *Hieremiae* prae-
sente Imperatore, de reconciliatione & unitate Monachorum, de grandinis
vastatione, de *Arrianis* quod non liceat semper & publice de deo contendere;

Tom. V.

G g

quae

quae uno volumine Argentinae per Joan. Knobloich. 1508. in 4to edidit *Joh. Adolph. Mulingius*, qui praecedente anno Alcum Avitum primus evulgarat. Editionem Lips. Anni 1522. nondum conspexi. *D. Georgius Langevoith* fuit tum temporis Pastor Ecclesiae Chemnicensis in Misnia, quo publicavit Lipsiae, nim. MDCLXXV. orationes duas Graecè in Christi Natalem, unam Basilii, alteram Gr. Nazianzeni, a se in Latinam Linguam versas cum pauculis additis notis. Promisit plures, sed vix praestitisse reor. Eum libellum semel tantum vidi. Euthalii Narrationes in Epistolas Pauli omnes (nescio utrum Enarrationes, an Argumenta Epistolarum intelligenda,) memorat, loco & anno tamen non addito, Catalogus auctionalis Rotheraeus Amsterodami 1669. excusus, quam noster Bohemus ad me misit, Num. 783. pag. 57. Qui nisi fallit, necesse est plura Euthalii exstare, quam vitam illam D. Pauli, quae habetur in Oecumenii editione Graeca splendidissime Veronae in folio procurata Anno 1532. pag. 237. Nescio an etiam in *Morellii* Oecumenii editione 1630. nec enim vidi. Argumenta sane Epistolarum in Veronensi edita exstant, & forte sunt ipsius Euthalii. Alioqui ille Euthalius de vita Pauli, adjectus est graecolatine Georgii Majoris paris argumenti libello, Wittenb. 1559. in 8to. Et Francofurti ad Viadrum prodiit 1601. cum Sophronii additamento impensis *Joh. Hartmanni*, forte auspiciis *Chr. Pelargi*, qui & sequenti anno suo in Acta Apostolica Commentario (quem conquiram quantum potest) adjecit. De Gul. Apulien. forte fors favebit. *Politiani* illa Oda acceptissima mihi erit, si illa potiar, uti & *Plinius Minois*, & *Vlitii* curae in Venaticos secundae, & Theo. Nobiliss. Parentis tui. O beatum illum diem, qui me illis exhilarabit! Abdiam Babylonium nondum sum adeptus. Persuaseram mihi exstare in Bibliotheca P. Colonien. sed jam frustra me fuisse sensi. Itaque & illo Christiani nescio, cujus Poetae carmine nobis carendum est. Cujus ubi vel initium cognovero, acquiescet animus interea, donec totum editione illa explorata adipiscar. Antverpiensis, quo ad Titulos, nam prius Francofurtensis fuit, Mantuani illa Editio valde vitiose excusa est ex Ascensiana, non emendatis iis, quae ipse Mantuanus mutaverat in Bononien. quae tamen non omnia complectitur. Reliqua Tomo I. III. & IV. aliis typis adjecta ex Mantuana illa Anni 1516. in 8to. (vel ut Belgicus Catalogus, cujus Fragmentum a Bohemo jam teneo, ante aliquot annos excusus, praefert, Lugdunensi) desumpta sunt, quae neque in Francofurtensi, nec ejus anteriore, bis enim sunt mutatae primae & ultimae paginae, extabant. De caeteris Scriptoribus noviter editis, aut edendis jucunda oppido narratio fuit, & aveo plura talia cognoscere, vicem relaturus, quibuscunque modis potero. Mirum fatum est nonnullorum sequiorum temporum scriptorum, qui dimidii exstant, dimidii perierunt, nisi in Bibliotaphiis superstites sint. Sic Corippi Justinus superest: Johanneis ejusdem nondum lucem aspexit, quam *Caspinianus* olim habuit. Gunteri Ligurinus saepe excusus circumfertur: Solimarius ejusdem nondum publice prodiit. Josephi Devonii de bello Trajano libri 6. a *Dresenio* cum Notis dati sunt: Ejus Antiocheis a *Cambdeno* versibus inde productis laudata, nondum nobis visa.

visa. Petri Rigae Aurora adest: Ejus de vita Crispini & Crispiniani carmina ignorat nostra aetas. Matthaei Vindocinensis Tobias exstat: Poëtica ejus, vel, ut inscripsit, Poëtria nondum prodiit. de Curia Romana *Flacius* publicavit, sed Poëtria ejus, utut ab eodem edi promissa, adhuc tamen supprimitur. Gul. Britonis Philippeis adest: non ita Karlotis. Vitalis Gallici Querulus *Gruteri* ope lucem vidit: Ejus Amphitruo vel Geta, cujus initium: *Graecorum studia nimium nimiumque secutus* adhuc delitescit. Sed hi versificatores ultimi fere aevi sunt, de quibus *Bigotio* tuo (quem non nisi ex Ovidio & Prudentio tuo novi, & plura tamen de eo scire vellem) cura forte, prae sacris illis Patribus, vix ulla est. Henricum Samariensem, pauperem dictum, erui alicunde posse valde opto. Ejus Sermonem de S. Nemine habeo. Hi scriptores non boni licet aevi, aliquando tamen conducunt ad melius cognoscenda, ubi conferuntur, tempora. Horum multi a *Labbeo* in Bibliotheca nova memorantur. Sed obitus ejus immaturus eos omnes intercepit. Nazianzeni *Ἀπορήτα* Lipsiae cum sua versione edidit *Joh. Hornschuckius* Prof. olim Graecae Linguae Anno 1645. non parum a *Rivino* adjutus, quae nescio an vobis cognita sint & expetantur. Alia a *Langio*, *Pirckheimero* aliisque versa prolixitatem vitaturus, & aliis occupatus nunc silentio praetereo. B. Vale, vir *τιμωλύεσθε*, & si taedium multiloquentia haec mea forte parit, comiter ignosce, Dabam Cygn. XIX. April. st. Jul. Anno MDCLXXVI. *ὡς τάχιστα*. Obfiguraturus has commodum accipio Vratislavia literas *Gebhardi*, & Ampliss. *Conradi*, cujus parens olim Prosopographiae Melicae tres Millenarios edidit: Filius autem continuat. Eas dum resignare festino pro Conradianis maximo festinationis impetu ad te pertinentes resigno. Ignosces huic meo infortunio. Video variantes Virgilii inesse Lectiones. Quas tamen, uti nec literas inspexi: festinat enim Tabellarius. Noli curiositati alicui meae id tribuere. Nisi moram ille satis alioqui traxisset, remissem ipsi, ut describeret denuo. Sed spero veniam hanc mihi apud te paratam.

EPISTOLA CCV.

NIC. HEINSIUS

Chr. Daumio.

Cygnam.

Litteras tuas Decembri mense exaratas, quibus orationes Herodoti erudita Latina illustratae, munus accedebant, accepi quidem tempestive satis, sed rescribendi officium distuli, spe ab amico facta fore, ut Sirmondi Theodulfum hic terrarum daretur indagare tuos in usus, ne Cl. *Bigotii* opem frustra imploraremus, quod is Rhotomago pedem haecenus non moveat, librum Lutetiae quaesiturus, uti erat pollicitus. Sed quando nihil nobis est praesidii in nostris bibliopoliis, Lutetia per amicum quemcumque curabimus librum devehendum, si *Bigotius* cunctari perget. Interim & aliae tuae Aprili mense exaratae supervenerunt, cum Reinesianis epistolis, ac Catone & Geystensi

tuis. Reinesianas epistolas, quod nondum videram, habui profecto longe acceptissimas, uti & Geystensem. Nam Catonem *Bigotio* servamus, ut voluisti cum aliis libellis, ejus in usus a me sepositis & Rhotomagum ituris propediem. Petronii nomen quod ivisti restitutum in Epistolis Sarisberiensis, subscribo conjecturae tuae omnino. Vidit enim ille ea Petronii, quae & haecenus sunt circumlata, & in Fragmento Traguriensi exhibentur, quod multis argumentis fit manifestum, plura non vidit. Multa veteres, & in eodem Petronius fragmento extulerunt masculina, quae in usu esse desierunt postea, & nonnisi neutro nunc utuntur genere. *Fatus, coelus, lorus, lutus, candelaber* & complura talia, in quibus multus est Trimalchio, ineptus atque intempestivus antiquitatis captator, qualis a Petronio ridendus proponitur; haec suo loco pluribus adstruemus. *Wagenzeilium* dure atque inclementer habuit *Statilius*, nec *Valesio Hadriano* pepercit: hujus Apologetica typis Blavianis ante hoc sexennium una cum Petronio Traguriano sunt descripta, cujus exemplar conquiram tibi, cum aliis libellis ad te perventurum, quos jam habuisses, nisi mora etiamnum injiceretur ab occupationibus permolestis, quae haecenus non sinunt me divelli ab hac aula, & in sinum bibliothecae confugere. Spero tamen hanc aestatem omnibus molestiis colophonem imposituram, quod faxit deus, cum & valetudo in pejora vergat quotidie, & ego ante supremae diei adventum scriniis meis miserum in modum disiectis consultum nonnihil velim. Praeter amicos nuper morte intempestiva ereptos mihi nunc etiam *Hemicus Valesius*, vir plurimae eruditionis, obiit supremum diem. Historiae Ecclesiasticae tomum quartum, scriptores Latinos complectentem erat pollicitus, tum Aristidae ac Libanii varia inedita, Harpocratonem, notas in Ammianum auctiores, commentarios de critica veterum, Antiquitates Atticas, aliaque scripta, quibus nunc lucem fortassis nequicquam speremus. Academia Leidensis e Galliis Theologum nuper accepit pereruditum, & humaniori litteratura ac linguis orientalibus probe excultum, *Stephanum Monachium*, *Samuelis Bocharti* intimum quondam amicum. Ego Roma exspecto libros non paucos recens editos, atque in his varia antiquitatis monumenta, ut Columnas Trajani atque Antonini, nuperae editionis cum notis *Bellorii*. Catenam SS. Patrum in Marcum, vitas Angeli Colotii, Octavi Pantagathi, Fulvii Ursini. Ibidem eduntur Geographi veteres qua Graeci, qua Latini, magnam partem haecenus in publico non visi, & collecti a *Luca Holstenio*. De versionibus antiquis Graecorum patrum quae scribis, cum *Emerico Bigotio* communicabuntur, ad quem nonnihil litterarum propediem est dandum. *Bigotius* ipse vitam Chrysostomi Graecam haecenus ineditam diu est quod molitur. Nazianzeni complura Rufino interprete me scio possidere, sed cujus ea sint editionis, pro certe non adfirmaverim. Litteras Cl. *Gebhardi* resignatas non est quod excuses, aut depreceris. Apud me enim, vir praestantissime, in hisce talibus impune ab amicis peccatur, aut potius peccari non potest. Vale, Hagae Comit. 22. Jun. MDCCCLXXVI.

EPISTOLA CCVI.

CHRIST. DAUMIUS

*Nic. Heinsio.**Hagam.*

DEdi ad te, Nobiliss. vir, superiori mense Aprili literas satis prolixas cum fasciculo Catonem & Palponistam meum, & *Reinesii* ad *Vorstium* Epistolas complexo, quas quemque *Bohemus* noster, ad quem illa mittebam, tibi tradere iussus erat. Nunc anxius an recte appulerint, denuo scribo, etsi aliis occupatus, addens exiguum illud *Hildeberti*, quod mihi supererat, & fragmentum Euthalii, prout a G. Majore editum est; nam *Pelargus* integrius dedit, & nonnihil forte a Majoris edito varians. Inquisivi hactenus in desiderata varie, sed nondum quid eorum repertum ac impetratum est. Ne ipsa quidem *Pelargi* in Acta Apostolica Commentaria. Non desinam autem porro inquirere. Facilior res esset, si vel Lipsiae vel Norimbergae ipse degerem; nam quibus illa injungo mei securi libros non semper attendunt. Hoc mihi mirum, haec in acta Commentaria non exstare Francofurti ad Oderam in Bibliotheca *Pelargii*, quae nunc Academiae est, cujus Catalogum nuperrime publicavit Bibliothecarius, *Becmanni*, illius Originum Lat. Linguae Auctoris, Filius. In quo Catalogo his diebus offendi Bernardum Palponistam Coloniae 1501. excusum esse, inibique exstare. Videbo igitur, ut nanciscar induitrium aliquem ibi hominem, qui cum mea editione contendat. De Theodulfo & caeteris mihi promissis, quaeso, quae spes? Euthalii Francofurtensem editionem Anno 1601. (*Pelargi* arbitror esse) mea manu proxime describam, tantilla temporis ac chartae jactura, si forte interea aliunde nacti estis: sin minus, ut conferre possit cum membranis suis Cl. *Bigotius*, cui tecum denuo salutem? Interim an priores meae, etiam illae, cui *Olearii* libellus appactus erat, per *Graevium* ad te missus, salvae tibi redditae fuerint, valde doceri vel tribus aveo. B. Valete uterque, & favere porro mihi ne dedignamini. Dabam Cygn. d. XXI. Aug. st. Jul. Anno C. CIOIOCLXXVI.

EPISTOLA CCVII.

CHRIST. DAUMIUS

*Nic. Heinsio.**Hagam.*

ECcum, vir Nobilissime, quem in meis ante hoc octiduum datis, pollicebam Euthalium ex Francofurtensi exemplari, etsi satis properanter, fideliter tamen descriptum, & quidem prout editus circumfertur, cum omnibus suis virtutibus & vitiis. Nam & accentus etiam vitiosos, & reliqua repraesentavi, ut jacebant. Contuli etiam cum Veronensi editione, quae alicubi nonnulla omittit, ut videatur *Pelargus* auctiore usus fuisse exemplo. Illius

Gg 3

enim

enim hanc esse credo *ἐκδοσιν*. Nam in Bibliothecis reperiuntur quidem ejus in Acta Apost. Commentaria, absque tamen Euthalio. Inquisivi in illa, verum nondum venalia alicubi reperi; & forte si Euthalius abest, a Vobis non ita desiderantur. De quo tamen, nisi grave est, per occasionem, moneri volo. Catalogum MSSorum Bibliothecae Paulinae Lipsiae propediem edet meus *Fellerus*, ejus Bibliothecarius nunc. Cujus exemplaria, ubi praelo exhibit, vobis servabimus. Pluribus te, vir *τιμολόγησας* jam non onero, unum saltem rogans adhuc, ut an mea, praesertim quibus *Gebhardi* literae inerant, acciperis, vel tribus doceas; mihiq; favorem tuum perseveres. B. V. Dab. Cygn. d. III. Kal. Sept. *MDCLXXVI*.

EPISTOLA CCVIII.

NIC. HEINSIUS.

Chr. Daumio.

Cygneam.

Nescio an ad te perlatae sint, quas cum tibi, tum Cl. *Gebhardo* inscriptas. Una mense Junio curabam per amicum Leidensem. Facit tamen explorata jam ante non uno nomine ejus diligentia, ut recte perlatas opiner ac prorsus confidam. Postea contigit Vianam excurrere, ubi e rudibus disiectae bibliothecae obtulerunt se mihi *Plinius Claudii Minois*, & *Vlitii Gratius*, quos ad V. C. *Fred. Benedictum Carpzovium*, ut tibi tradantur, misi. De Theoné Sophista patris mei indagando bene te jubeo sperare: nam & liber is apud nos in officinis bibliopolarum satis est obvius, & ipse ejus exemplar non unum possideo. Jamque accepisses, cum duobus hisce libellis, nisi exemplari, quod se mihi forte offerebat, *Aphthonius* fuisset annexus, & quidem collatus cum membranis, quem viae longinquae discrimini committendum haud duxi. Reliquum est, ut Catalogum promissum suppedites quamprimum eorum codicum, quos desideras cum maxime. e Gallia Italiaque diu est, quod litterarum nihil accipio. Florentiae *Laurentium Pantiaticum*, virum litteratum in primis, & mei peramantem, e vivis audio excessisse. *Bigotius* ruri delitescit, ita fit, ut nihil litterarum pridem ab illo acceperim. Post vindemiam tamen exactam Rothomagum, credo, revertetur, ut solet, atque illic hyemem est exacturus. Epistolas Ciceronis, quas familiares vocant, *Graevii* nostri ac variorum notis illustratis ac in tomos duos digestas publice propediem videbimus; puto. De caeteris altum in re litteraria apud nos est silentium. Vale, Hagae Comit. v. Septemb. *MDCLXXVI*.

EPISTOLA CCIX.

NIC. HEINSIUS

*Chr. Daumio.**Cygnem.*

Proxime te monebam, vir Clarissime, de Plinii epistolis, & Gratio Lipsiam missis, quos a *Fr. Bened. Carpzovio* accipies, nisi jam accepisti. Theonem parentis mei postea & Bohemo vestro ad te curandum, meo nomine, ni fallor, tradidit *Th. Ryckius*. De aliis libris, qui a te desiderantur, indagandis parem mihi successum spondeo, cum quales hi sint, ex te plenius cognovero. Theodulfum certe ut procuret tibi quamprimum *Bigotius* noster, denuo a me rogabitur, ubi rure, quo aestatem totam delituit, atque etiam nunc delitescit, in urbem reversum cognovero. Id autem vix fiet ante Kal. Januarias proximas, si quid credendum *Stephano Monachio*, viro praestantissimo, & *Bigotii* interioris notae amico, quem Academiae Leidenfis curatores, ad SS. Theologiae Cathedralis, nuper Rothomago evocarunt. *Samuelis Bocharti* meritissimum discipulum, a quo Josephum uberius recognitum jubemur expectare, quando molitus idem *Bosius* intempestivo nobis funere est subductus. Romae Joannem Priceum natione Britannum excessisse e vivis audio. Ultrajectini nostri *Gisbertum Voetium* lugent, clari nominis Theologum, anno aetatis LXXXVIII. extinctum. Euthalium de vita D. Pauli tam editum a *Georgio Majore*, quem descriptum tua manu una cum Hildeberto Cenomanensi recte accepi. Atque illum quidem perferendum in Gallias, ubi tuto licebit, curabo ad *Bigotium*: habeo enim variorum codicum farraginem, quos illi jampridem debeo. Sed a piratis nihil tuti est. De *Pelargo* non opinor sollicitum esse *Bigotium*. Catalogum Paulinae bibliothecae jam a Cl. *Carpzovio* sum nactus. pro *Olearii* libello diu est quod gratias tibi egi. Vale. 24. Novemb. MDCLXXVI.

EPISTOLA CCX.

CHRIST. DAUMIUS

*Nic. Heinsio.**Hagam.*

UTraque Epistolia tua, vir Nobilissime, tum Nonis Septembr. tum 24. Novembr. hujus Anni exarata, recte reddita mihi sunt, una cum Plinio & Gratio per *Carpzovium* nostrum transmissis. Pro quibus quas gratias agam & quid redhostimenti reponam dum dispicio, & alia aliunde ex transverso interveniunt, elabatur mihi respondendi occasio. Sed injurius in tantam ~~de duplici~~ tuam essem, si porro filerem, teque de Amicorum tuorum fide suspensum tenerem diutius. *Bohemus* noster nondum ad me scripsit. Spero autem ejus literas cum Theone B. Parentis tui me proxima Lipsiensium Nundinarum occasione accepturum. Literas ad *Gebhardum* statim misi. Paulo post ab Uratislavienfis
Lip-

Lipsiae degentibus relatum est, ipsum Paralyfi correptum, dum Aetum oratorium exhibere meditaretur. Etiam *Fellgibelius* Bibliopola Vratisl. amicis narravit, se nihil a *Gebhardo*, quod ad me pertineret, accepisse. Fuerunt tamen post nundinas, qui *Gebhardum* literas dedisse affirmabant. Unde meas denuo ad ipsum misi: sed nihil regessit ille haecenus. ¹ Theodulfum Aurelianensem *Sirmondi* (qui a Theodulo alius est scriptor) adhuc anxie prae omnibus desidero, quem ex vestratum Catalogis didici Amstelodamensium & aliorum tabernas librarias jam pridem occupasse. In illa editione gestio nosse, an Paraenesis ad Judices ea, quam *Petrus Daniel* primus vulgavit, *Elmenhorstius* deinde repetiit, & ex ea, me suppeditante, *Rivinus*, initio, quod in illis deest, auctior pleniorque fuerit edita. In Epistola ejus ad Modoinum de suo exilio, versus est, prout *Canisius* edidit: ² *Exul, inops, pauper, tristissimus, anxius, agens*. ubi vocem ultimam *Barthius* in *Advers.* mutaverat in *egnus*. *Rivinus* in *aeger*. *Reinesius* in 2. ad me epistola *aegrens* malebat. *Königius* Professor Altdorfinus retinebat τὸ *agens*, ut esset compositum, quale *amens* est, & significaret eum, qui sine gente est. Sunt talia ibi alia, cur eam editionem, quae & alioqui plenior & absolutior est caeteris, praetereaue nonnulla aliorum Opuscula continet, vellem consulere. Eam vel meo aere, quod statim refusus essem, optarim nancisci posse. *Menagium* gaudeo adhuc vivere. Ejus habeo Poëmata, & *Diogenem Laërtium*. *Politiani* pulcherrimam illam ad *Landinum* Odam reperi in editione *Horatii Basileensi* *Georgii Fabricius* 1555. Poëmata vetera de corrupta Ecclesiae statu a *Flacio* edita pleraque exstant in tomo primo *Memorabilium Joh. Wolfii*, excepto *Bernardo Morlanensi*, sive *Cluniacensi*, cujus haec editio, ut prima, ita integrior & *Bremensi Chytrei*, ac *Rostochiensi Eilb. Lubini*, & *Rinteleni* longe melior est. Nam *Luneburgensem* ultimam non vidi. Praeterea praefatione, qua caeterae carent, auctior. Ea si fuero indeptus, (quaeram ubicunque potero) faxo statim atque accepero ad te, *Heinsi nobilissime*, curetur. Est quidem admodum rarus inventu liber: fit tamen aliquando, ut insperato tales offerantur venales. Interim ut videas, qualia illa Poëmata sint, & quotnam, schedas, quae superant a puerulis olim, me alibi occupato, antequam possessor libri fierem, inde descriptas mitto, rogans tamen ut post inspectionem, ne aliorum visum offendant, conscindas, mihiq; ignoscas, quod tam subitas chartas elegantissimis tuis oculis objicere non fuerim verecundatus. *Morlanensis* illius *Bernardi*, sive *Morvalensis*, membranas olim apud vos habuit *Damasus Blyenburgius*, uti e centone ipsius *Ethico* liquet. Edo nunc *Hieronymum Graecum Theologum*, a *Barthio* in *Adversariis* laudatum, cum *Gennadii Scholari* non dissimilis argumenti opusculis.

¹ Vide de hoc Theodulfo *Trithem.* de Script. Eccles. n. 260. & *Miraei* Auctar n. 236. & *du Pin* Biblioth. Eccles. tom. vi. pag. 124. *Sirmondus* editionem primam a *Petro Daniele* curatam esse ait in notis suis pag. 278. alia carmina edidit *Mabillon.* Analect. pag. 410. quem & vide pag. 377. 378. & *Baluzii* Miscellan. tom. i. pag. 491. & tom. vii. pag. 21. & *Pagii* Critica ad Annum 835. & *Boecler.* Bibliograph. Critic. pag. 753. edita etiam poëmata quaedam Theodulfi in *Canisii* lectionibus tom. ii. part. ii. pag. 65. Editionis novae.

² Vid. supra. Epist. clxxxv.

culis. Ecce speciminis interim loco quae excusa sunt. Restant quatuor adhuc octerniones. *Joh. Christoph. Becmannus*, *Christiani* originum Scriptoris Filius, Francof. Marck. Histor. Prof. & Bibliothecarius misit ad me Palponistae Bernhardi Gestensis (sic excusum est: Glossae addunt vetustam esse villam prope Monasterium sitam; opus hîc esset Westphalo, qui locum, ut cluit, nominaret ac describeret.) Canonici Ecclesiae S. Mauritii extra muros Civitatis Monasteriensis, ubi & sepultus est; qui etiam fuerat quondam Cancellarius Episcopi Monasteriensis, Apographum ex editione Colonienfi Anni 1504. apud *Heinr. Quentel.* excusam, unde infinita restituere & supplere in mea editione, quae sic non prima, nec fere ullius pretii est, potero. Is *Becmannus* totus jam est in vertendo Johanne Melele, vel Malele, mediorum temporum scriptore Graeco, de quo & *Vossius*, a *Valesio* in excerptis Peirescianis prorsus omisso: quem editione dignum *Becmannus* judicat, quod Chronico Alexandrino multis in locis genuinus inde intellectus contra *Raderum* inferri, multaque restitui in illo queant hiantia, δυσόητα, incongrua. *Graevii* epistolas Ciceronis nondum vidi, uti nec ejus Plinianum Panegyricum *Baudii* Commentario illustratum. In illarum Libro 7. Epist. 6. Versuum illorum veteris Poëtae Trochaicorum alterum ultimavoce corruptum arbitror. Quem sic lego: *Multi, qui domi aetatem agerent, propterea sunt improbi.* Non improbat, ut vulgo haecenus lectum est. Quid censetis? Poëmatís illius de Berengario a te ad Claudianum laudati, utinam fieri possem particeps! Abdiam Babylonium neque ex *Lazii*, neque Parisiensium editione Lipsiae alibique reperire possum. Si apud vos occurreret, meo aere redime quaeso. Per *Carpzovium* indicatum statim refundam. Vel saltem Carminis illius veteris, quod *Lazius* edidit, initium haud gravatim communica. Inter mea desideria sunt Hieronymus de haeresibus Judaeorum a *Claudio Menardio* publicatus: Item Vigilius Tapsensis de trinitate: Architrenius, Commodianus, Alcimi Aviti Colonienfis & Basileensis Editiones; Fausti Andrelini Elegiae, Q. Marcus Corradus de Lat. Lingua Bononiae excusus, Phil. Berterii Pithanôn libri, Henrici de Male Fortunatis Elegia de diversitate Fortunae & Philosophiae consolatione Lugd. 1509. Suspicor Henricum Pauperem sive Samariensem esse. *Tanaquilli Fabri* praeter Anacreontem & Phaedrum nihil habeo. Inter ἀνέκδοτα Gaufredi Poëtriam novam, Bernardi Silvestris Megacosmum & Microcosmum. Henricum Samariensem vel meo sumptu describi facerem, si quis id oneris in se susciperet. In Italiae & Galliae Bibliothecis frequentes sunt. Sed talium infinitus esset numerus, & te tantum virum onerare talibus maximae religioni duco. *Buchneri* in Prudentii Hymnum Natalitium reperi in meis superfluum. Est. Dresdae doctus vir, ejus auditor olim, qui multas ejus Commentationes nondum editas possidere nuper dicebatur. De eo inquiram per amicos. Si quid & tu vir Nobilissime desideras, & copiose annotaveris, forte & uni & alteri tibi conciliando bona fors favebit. B. V. & secuturum annum felicissime auspicare, salvusque cum multis aliis hilarisque tranfige. Dab. Cygneae d. XXI II. Dec. st. Jul. A. CIOIOCLXXVI. Quando tandem Valerius Flaccus publicum viset? Quando Virgilius?

Tom. V.

Hh

EPI-

EPISTOLA CCX.

NIC. HEINSIUS

Chr. Daumio.

Cygneam.

TUto me crediturum esse *Bohemo* vestro, quicquid aut literarum aut libellorum committerem, ad te perferendum, sum ratus, *Daumi* praestantissime, quando verbosas meas mense Junio ad te simul & doctissimum *Gebhardum* exaratas ejus fidei commendabam, tradito & postea eidem parentis mei *Theone*. Sed cum hactenus ex te non intelligam epistolas illas recte curatas esse, minimum abest, quin interceptas in via, certe perditas, habeo persuasum ut credam. Si ita est, aliam ad *Gebhardum* parabo. Nolo enim vir officiosissimus suspicetur labores suos a me negligi. De *Plinio Claudii Minois* & *Jani Vltii* Gratio melius liceat ominari, quos *Lipsiam* perlatos Novembri mense non ita nuper decurso atque inde ad te missos e literis *Carpzovianis* pridem cognovi. Reliquum est, ut & tuae literae rei ejus me securum reddant. *Euthalius* tuus *Bigotio* destinatus, etiamnum penes me haeret, quod tutam, qua in *Gallias* mitteretur libellus, occasionem hactenus non sum nactus. Recevit tamen iam hunc penes me esse *Bigotius*, teque tantum laboris sui causa suscepisse, vir modestus erubescit. De *Theoduldo Sirmondi* ad te mittendo promissa denuo iteravit. Hoc volebam nescius ne esses. De *Hildeberto Cenomanensi* in publicum proferendo cogitare *Baluzium* audio. Opinor mihi visas, praeter homilias, nescio quas sanctorum vitas ejusdem scriptoris apud *Graevium* nostrum, editore eodem *Rivino*: Sed enim operi supremam manum haud videbatur imposuisse. Quaero hactenus poemata antiqua, quae *Flaccus Illyricus* olim edidit de corrupto Ecclesiae statu. Sed ita quaero, ut iis carere possim, si non commodum offerantur. *Graevius* Ciceronis Epistolas, & *Florum* nondum emisit in publicum. Vale, *Daumi* Clarissime, Hagae Com. MDCLXXVII. x. Februar.

EPISTOLA CCXI.

CHRIST. DAUMIUS

Nic. Heinsio.

Hagam.

A*Bohemo* nostro, Nobiliss. Vir, *Theonem* nondum accepi, spero tamen occasione commoda adepturum, nuperrimeque ei aurem denuo vellicavi. Fasciculum autem cum literis meum *Carpzovianis* adjunctum sperabimus interea fuisse perlatum. In iis gratias egi pro *Plinio* & *Gratio*, quas nunc repero. *Gebhardo* etiam destinatas misi. Is ad me quae rescripserit, insertum *Weycov* docebit. Ejus meusque Amicus vir Ampliss. *Johannes Henricus Cunradus*, *Casparis* olim tot viris doctis, ut *Theatrum* ejus *Symbolicum* & prosopogra-

pographiae Millenarii tres testantur, vita donatis Clari Filius, illustriss. Duci Lichtensteinensi a Consiliis, mecum cognoscere avet Beatiss. Parentis tui annum diemque emortualem, tuumque ipsius natalem. Ei haud invitus, spero, gratificaberis. A Cl. V. *Emerico Bigotio* Theodulfum Sirmondi perlaetus expectabo. Deus prosperet nostrarum utriusque iter. Hildebertum a *Baluzio* promitti incredibile dictu est quam me exhilaret. Impense enim eum Auctorem amo. Restant sane longe plura, quae *Rivinus* non edidit; publicanda. Utinam promisso staret *Baluzius*! Vita Agnetis, ejus nomine ex conjectura a *Barthio* edita, postea a *Rivino* repetita omnino est, Alexandri Essebientis Angli, de quo *Lelandus*, & exscriptor ejus *Baleus*, hujus vero *Pitfeus*, videndi. Riviniana editionis exempla ipso editore vivo disparuerunt nescio quo abacta, ut aliquando per jocum ad ipsum dicerem, ipsum eo libro mures pascere velle, quod abderetur, nec in conspectum ullius veniret. Post ejus obitum *Barthius* suum exemplum mihi donabat: sed mancum. Quae postea a successore in matrimonio ipsius, nunc etiam defuncto, receperam, ea *Graevius* a me nactus est. Videbo an per *Carpzovium* ea indagari queant, ubi delitescant. *Marquardus Gudius* per *Petrum Axenium* ad me misit praeteritis diebus Membranas elegantes Ganfredi, sive Gaufridi de vino salvo Angli, cujus initium ex Bromtone commune fecerat mecum olim Epistola ad me 103. *Reinesius*, quas integras intra septiduum, dum ille Dresdae in negotio Sereniss. Ducis sui haereret, descripsi, librumque superiori hebdomade gratus remisi. Promittit alia ἀνέκδοτα, in quibus & Henricus Samariensis, quem Septimelensem vocat, & Patavii eodem nomine exstare *Tomasius* refert. Gaufridi duo capita inter Poëmata illa veterum a *Flacio* editorum, quae hinc inde etiamnum, utinam favente Delia, venor, habentur. Mitto alias pagellas mei Opusculi. Restant duo oëterniones, ubi absolvetur habebitis & *Graevius* & *Bigotius*, & si quis favet alius, qui interea honorifice a me salveant, a me exempla: quae spero *Carpzovium*, uti pollicitus est, & subito has a me exigit, curaturum. Sed avocor, hoc unum addo. Heri aderat nobis *Tobias Ludolfus* Sax. Altemb. Camerae Director, Aethiopici Lexici Londini excusi auctor, apud quem cum honorificentissima tui mentio, jussit salutem plurimam ascribere, brevique & literas ad te se daturum insuper pollicitus est. B. V. vir Nobilissime & aestimatissime, diuque sospes vive. Dabam Cygn. prid. Kal. Martii st. Vet. CIOICLXXVII.

EPISTOLA CCXII.

NIC. HEINSIUS

Chr. Daumio.

Cygnaam.

Plinium *Minois*, & *Vlitii* Gratium ad te perlatos esse gaudeo sane plurimum, qui tum demum me bene mereri arbitror de re communi litteraria, si tuis studiis consultum eo, vir praestantissime. de Theone parentis mei, parem factorum indulgentiam promitto mihi, de Theodulfo *Sirmondi* denūo promisso-

H h 2

rum

rum admonui *Bigotium*, ac interim Euthalium consignavi in Gallias mittendum in manus *Stephani Monachii*. In ipso Theodulfi versu a te producto videtur scribendum, *tristissimus*, *anxius*, *amens*. Poëmatis de corrupto ecclesiae Romanae statu a te transmissis utar, dum exemplar typis descriptum offeretur. Hieronymi, cujus specimen misisti, reliqua libens videbo. de Johanne Malela per *Becmannum* edendo salivam movisti. Opinabar enim ejus editionem nobis non aliunde, quam ¹ e Britannii esse expectandam, ubi pervetustum ejus scriptoris codicem adservari meminerim. Tuam in Tullianis Epistolis conjecturam cum *Graevio* communicari. Nam is liber ab eo recognitus lucem nondum aspexit. Poëma de Berengario, quod e tenebris eruebam olim Patavii, typis describendum curavit pridem ac commentariis illustravit *Hadr. Valesius*. Si quod exemplar ejus venale invenero, tuis invigilabo commodis, ut & de caeteris, quae videris desiderare, in primis de Abdia Babylonio bene te sperare jubeo, qui si e Basileana non possim editione, saltem e Parisina a me accipies. Vale, vir Humanissime. In Plinii epistolas commentarios suos nos jusserat sperare *Pricaeus*, sed is fato nuper est functus Romae. Parens meus obiit supremum diem xxv. Februar. Gregor. Anno cicciclv. Ego natus sum die Julii xxix. Anni ciccicxx. Hagae Comit. vi. April. cicciclxvii.

¹ Et inde etiam accepimus: nam Oxonii 1691. cum interpretatione & notis *Edm. Chilmeadi*, cum dissertatione de auctore per *Humfred. Hodium*. & Epistola doctissima *Richardi Bentlei* ad *J. Millium* prodiit. Auctor vero ipse non satisfecit expectationi, cum multa fabulosa & dubiae fidei narret, & plagiarius manifestissimus sit. Quae ex Eusebio descripsit ad examen vocat *H. L. Schurfleischius* in Notitia Bibliothecae Vinar. pag. 51. & seqq. vide & *Cl. Crenium* de Furibus librariis diss. i. pag. 27.

EPISTOLA CCXIII.

CHRIST. DAUMIUS

Nic. Heinsio.

Hagae.

THeonem Illustris Parentis tui quotidie exspecto a nostro *Bohemo*, qui se accepisse, & commodam mittendi praestolari occasionem amico nuper retulit. Pro quo interim denuo gratias ago. Abdia Babylonio prorsus careo, (ut vides ex Praefatione Opusculi mei, cujus aliquot exempla, si nostro *Carpzovio*, ut spero, curanti fortuna faverit, mitto; plura missurus, si ea grata vobis futura cognovero, & quidem charta aequae candida) itaque & ejus possessionem anhele. Putabam exstare in Bibliotheca Coloniensi, cum *Barthii* quae fuerat, eam e Riviniana Bibliotheca redimerem: sed falsus animi fui; non enim ibi reperitur. Carmen autem illud, aut saltem illius initium, unice desidero. Ut & nescio quo fato Theodulfum *Sirmondi*, in quo τὸ ἀγὲς, i. e. sine gente, in syllabam non peccabit: non enim peccat in *amens*, praepositione etiam ibi producta. Euthalius excusus ut ad me revertatur, non est opus. Tanti enim non est, ut sumptus causetur; & ego aliud praeterea

exemplum possideo. Suspicabar fore ingratum, quod non integer in eo *Majoris* opusculo apparet, & cujus tamen editio a Pelargiana alicubi variat. Lubuit autem talium curioso *Bigotio*, si forte careret, & hoc exemplum meo MSto adjicere, ut quale illud editum foret, ipse oculis suis arbitraretur. Quicquid autem feceris; vir Nobiliss. omne illud ex praestantissimo tuo judicio factum perplacebit. *Bosius ὁ μακαρίτης* ex Caesareana, Lipsiensi & aliis Bibliothecis ad Josephum suum emendandum instructus erat: sed morte praeventus spem nobis non rem reliquit, quam alii expleant. Interim Disputationes ejus, in quibus ad Josephum facientia ex illis MSSstis nonnulla inspersit, non plane insuper habenda. *Monachio* optarem eas opes, atque illa media! Sed quis praestabit? Favit *Bosio Lambecius*, uti peculiaris ad illum scripta Epistola testatur, quae typis excusa est. *Becmannus* ad meas nondum rescripsit. Nec prius, quam his nundinis potuit exemplum Hieronymi mei ad ipsum commode curari. Incertum de rebus Berengarii praenimis aveo. Initium ejus e Bibliotheca Patavina *Tomasini* didici. Exculum autem jam esse, nondum resciveram. Corippum *Rittershusii* quatuor argenteis venalem Norimberga ut afferri curem propediem, meum erit. Promiserat Amicus exemplum, quem vanidicum tandem sensi. Vidit eum apud me his diebus *Petrus Axenius*, Sereniss. Duci Slesvici ac Holsatiae a Secretis, qui ad me Dresda, ubi unum & alterum mensem in negotio Principis sui haeserat, ad sesquidiem visit, Phaetro, quo me donabat, cum suis in 1. Librum Notis pridem Hamburgi editis, cum repetita utraque *Rigaltii* editione, aliisque scriptis clarus. Notas in Librum. II. & III. MStas ad me Dresda legendas miserat. Is cum Hamburgo Lipsiam venisset, per *Franckensteinium* curavit ad me Membranaceum Codicem Gaudfredi de vino salvo Angli; nim. Poëtriam ejus novam, cujus duo capita *Retnesius* in ad me Epistolis ex Chronicis Anglicanis mecum communicaverat; *Flacius* autem alia duo in a te desiderato libello, non tamen addito Autoris nomine, dedit. Alium tamen ejus ibi librum de Curia Romana, quem & *Wolffius* in Memorabilibus suis repetiit, & laudavit *Hieremias Paduanus*. Promisit autem *Axenius* a *Marq. Gudio* intimo suo, a quo Membranas illas ad me portandas impetraverat, Henricum etiam Samarientem, sive ut ille, & alia Italiae MSSta, appellabat, Septimelensem; quem suspicor Henricum de Male Fortunatis esse Lugd. 1509 editum; quae ubi domum reversus fuerit, quod proxime fiet, oportunitatem commodam nactus, ad me non invitus ex promisso curabit. Illum Gaudfredum descripsi, sed Membranae versu 526. *Cordis ad exemplar Regis formata* vitiatae erant crasso nomine proprio, inque ejus vicem reposito Carolo. Ejus exempla in Galliis & Italia plura habentur, ut *Labbei* & *Tomasini* Catalogi testantur. Sed quis hîc nos juvet? Utinam in Lugdunensi vestra haberetur Bibliotheca? *Bosii* Bibliotheca Academiae Jenensis, ut ajunt, beneficentia Principis addicetur. Catalogus publice excusus non est. Vidi, quae Amicus meus quidam inde excerptis; sed ille quae captui suo inserviebant, excerptis, melioribus & sibi ignotioribus relictis. Doleo autem *Bosium* a me commodato accepisse indices in Josephum & plerosque Graecos

cos Patres a *Barthio* confectos, propriaque ejus scriptos manu, quos ab haeredibus recipere non potui, forte a studioso aliquo furto subtractos. Catalogos, quos memoras, non vidi. Vidi autem B. Parentis tui, *Rutgersii*, *Vossii*, *Pawii*, *Riolani* &c. & habeo fragmentum ex nescio quo Catalogo, sane bonis libris ac raris instructissimo. Libros, quos desidero, nonnullos properanter consignavi. Forte ex his unus & alter aliquando obveniet venalis. B. V. & diu vive, τιμαλφῆσατε Domine. Dabam Cygneae inter mille avocamenta, die XVI. Maii MDCLXXVII.

EPISTOLA CCXIV.

CHRIST. DAUMIUS

Nic. Heinsio.

Hagam.

Quas vero pro Virgilio, Victore Massil. & Icone *Rutgersii* denuo tibi, Illustris Patrone, sufficientes solvam gratias, quibus tua beneficentia, curaque *Carpzovii* nostri mea iterum augefcit Bibliotheca? Sane non reperit tenuitas mea, cujus vel umbram reponat, nedum ut saltem par quod esset ulla vel minima ex parte reponat. Sufficiant ergo interim tibi, Nobiliss. vir, gratiae ex animo dictae: qui si sic perges, coelo me dignum ut arbitrer facies. Superiores meas recte puto redditas. Nunc ne prorsus steriles hae veniant, etsi steriles veniunt, adjeci variantes Lectiones Prudentii MSSi Paulinae Lipsiae bibliothecae non magnae, ut ipse vides, rei, & magnam partem circa scripturam occupatae: tamen ne desimus, tantilla chartae & temporis jactura, officio nostro, & ut videas, cum quibus aliis membranis illae convenient, nec quid melius speres, militatum hoc omne est & datum tuae in spem gratiae, cum potiora nunc desint. De caetero cum haec occasio ad te mittendi subita sit, & occupationes meae eaeque diversae nunc cumulentur, pono calamum, & bene diuque valere te jubeo, ô & praesidium & dulce decus meum! Dab. Cygneae a. d. IX. Julii Anno D. MDCLXXVII.

EPISTOLA CCXV.

CHRIST. DAUMIUS

Nic. Heinsio.

Hagam.

A *Carpzovio* nostro, vir Nobiliss. Fautorum & Amicorum Maxime, lubens intellexi, Theodulphum favente Numine, te tandem impetratum Amstelaedamum misisse; unde is eum ad me curet. Id ut vir impetrabilissimus, quantum potest, efficiat, meis eum rogavi literis, dedique peculiarem five hac five alia proxima occasione curandum fasciculum, *Capo'erreii* in *Metamorphosin* Ovidii Notas, *Buchneri* Panegyricum, & in Prudentii Hymnum Natalitium Animadversiones complexum; si una cum epistola hac vice non possit,

possit, expediendum commodiorē, modò ne iis libellis mittendis frustra sim. Sed quid hi ad tuum mūnus? Haerebo profecto in tabulis tuis nomen lentum, si unquam expungendum. Corippum *Rittershusii* adhuc ab amico exspecto: quem ubi consecutus fuero, sequenti dabo oportunitate. Mei Hieronymi integri exempla nonnulla per *Carpzovium* ad te ableganda, puto tandem perlata esse. Vir Clariss. *Ant. Magliabechius* vitam Bernardi Geystensis in MSto Bibliothecae Mediceae reperisse dicitur. Eam ut per ejus meumque amicum adipiscar, operam navabo. *Vossii* de vitiis Sermonis & *Graevii* Ciceronis Epistolae ubi prela exierint, non sine significatione pretii haud gravatim certiores nos facito. Magni Parentis tui Theonem a *Bobemo* nondum vidi, qui occasionem mittendi raram literas ad amicum causatus est. Eum indies avidissime exspecto. Mirer enim si non tandem aliquando daretur per tantum temporis intervallum *Facii* illa desiderata & *Nazianzenus Langevithi* nondum e latibulis eruti sunt. Inquiram autem ulterius. Si quid porro gratum tibi desideras, indica quaeso. Offeruntur aliquando praeter spem diu alias quaesiti libri. *Quo minime credis gurgite, piscis erit*, ait tuus Ovidius. Ita Vale, vir Nobiliss. & amare me constanter perge toto affectu tuum. Dabam Cygnaeae d. xxv. Julii ft. V. Anno MDCLXXVII.

EPISTOLA CCXVI.

NIC. HEINSIUS

Chr. Daumio.

Cygnaem.

Tardius aliquanto, atque adeo praeter spem duabus tuis rescribo, Daumi Clarissime, obnoxius valetudini aliquandiu, deinde & ob rem familiarem curandam avocatus ab aula frequenter. In praecipuis tamen responsi procrastinati causa fuit, quod spe per amicos facta Abdiae Babylonii, abs te desiderati, e latebris Bibliopoliorum apud Roterodamios eruendi, cum exemplar ipsum, quod offerebat se venale, inspexissem, deprehendi invitum carmen Poëtae Christiani incerti, in fronte libri a *Woligango* & *Lazio* e membranis pervetustis juris factum publici, cujus a me mentio facta jam non semel esset, illic haud quaquam comparere. Unde fit, ut omnino suspicer errorem eundem per plura dispersum exempla, Parisinis aliisque Lazianam editionem secutis typographis ansam dedisse omittendi hujus carminis. Sed bene habet, quod non multo post aliud sese exemplar apud Leidenenses in auctione publica, quod tibi vindicare,

¹ Abdiae hujus editio a *Lazio* curata prodiit Basileae 1551. nuper inseruit eum codici Apocrypho N. Testamenti Cl. *Fabricius* tom. 11. in initio, & testimonia varia de hoc suppositio scriptore praemisit. pag. vero 401. editiones recenset. inter quas omittit Parisiensem 1566. quam possideo in illa ut & priore 1560. est praefatio Lazii, sed carmen illud, de quo hic Heinsius, omissum. Ad seculum decimum eum detrudit *Oudin* de scriptoribus Ecclesiasticis tom. 1. pag. 420. ceterum haec, & epistola CCXVIII. editae inter Daumianas a *Joh. Andr. Gleichio*. Chemnici Anno 1709. pag. 270. & seqq.

carem, offerbat. Nam quamquam liber ipse Abdiae adglutinator eo in volumine parte sui mutilatus exhibetur, nihil ego illud ad Abdiam ejusque socios a *Lazio* editos ratus pertinere, redimendum vel sic duxi, quod spero me fecisse te non nolente. Rogatus interim a me nonnemo est ex amicis Leidenfibus, ne quam negligeret occasionem libri quam primum Amstelædamum mittendi ad *Danielem Elzevirium*, unde mox Lipsiam ad humanissimum *Carpzovium* curaretur, quando is utrique nostrum in his talibus gratificari pro caetera sua benignitate non alienum abs se ducit. Carmen ipsum e versibus plus minus quadringentis constat, sed fortassis aut a *Georgio Fabricio* in corpore Poëtarum Christianorum jam denuo exhibitum, aut ab aliis post luce publica donatum, quod tuum erit curiosius indagare: quando nec Fabricii opus, nec alii codices, unde id liquere certius nobis possit, nunc sunt ad manum. Ejus initium sub finem hujus Epistolæ designatum invenies. Theodulphum jam pridem ad vos delatum oportet: Nam de Theone miror, tantillum libellum tam diu in via haerere. Rarius Leidam excurro, quo tamen sub dies cogito proximos, ad curam meam revocaturus, ut aut opera *Danielis Elzevirii*, quae feliciter jam nobis cessit non semel, liber ad te perferatur, aut si is periit, aliud consequamur exemplar, quod factu arduum non erit. Et haec quidem haecenus. Nunc veniendum est ad tuas longe jucundissimas, quarum alterae Majo mense, Julii alterae erant exaratae. D. Hieronymi de Trinitate opusculum cum aliis eidem additis habui, ut tua omnia, perquam acceptum. Cujus & *Graevio* nostro *Ryckioque* ac *Monachio* exemplaria jam divisi, divisurus & propediem sua *Bigotio Spanhemioque*. Ipse *Graevius*, ut est tui amantissimus, Ciceronis sui exemplar per *Elzevirium* tuos in usus Lipsiam mittendum jam curavit; quod ut significarem tibi, me obsecrabat nuper. De Josepho *Stephani Monachii* lentum, ut apparet, erit negotium. Britannii tamen de editione scriptoris hujus nova cogitare pergunt magis ac magis, eamque in rem aere suo redempta cupiunt, quae *Bosius* ad scriptorem illum meliorem reddendum e variis Bibliothecis complura collegerat, quod negotium curandum *Graevius* suscepit. *Bosii* ipsius scripta possideo perpauca, atque in his Cornelium Nepotem editionis primae, ac dissertationem de Pontificibus urbis Romae, deque Clinicis Ecclesiae veteris, quantum memini: Unde eruditionem hominis ad praeclara nati colligere arduum non fuit, quo magis fato ejus tam praecipiti ingemisco. E libris, quos tibi fore usui es testatus, jam *Basilii Zanchii* poemata sum nactus, quae una cum Abdia Babylonio ad te curabo perferenda. E reliquis plerosque, nam de omnibus polliceri nisi temere nihil possum, ut consequaris aliquando, pro meis facultatibus curabo. Editio Lugdunensis anni MDIX. varios posteriorum temporum versificatores complexa, exstat, ni fallor, in armariis meis. Sed illam alia posterior in eadem urbe procurata excepit, quam & ipsam me reor possidere. *Vossius* de vitiis sermonis praelo Elzeviriano nondum, quod sciam, est commissus. Interim Gallicanos typographos exercet Lexicon ejusdem fere argumenti, a viro quodam gentis illius doctissimo operose contextum, cujus specimen *Bigotius* pridem ad me misit. Prodiit hinc nuper in lucem libel-

libellus postumus ¹ *Everhardi Feithii* antiquitates Homericas complexus: ejusdem Atticas antiquitates Bibliopola nos jubet sperare. *Jacobus Gronovius* Livium Parentis sui typis describendum curat, cui de suo multa est additurus. De Graecia *Palmerii* alias puto egi, cujus editio parte sui majore est profligata. Sed partem Graeciae tantum comprehendit: reliqua autor morte praeventus non perfecit. *Thomas Munckerus* post editos in Britannia mythologos Graecos, vere proximo Latinis notis eruditis illustratos typographo Hagano vulgandos permittet. *Graevius* praeter Ciceronem in Floro edendo pridem occupatur, &c. Vale, vir Clarissime, & feliciter aetatem age. Hagae Comitum MDCCCLXXVII. Nonis Octobris. De Corippo *Rittershusii* non est, quod multum labores. *Weitziana* in Museum & Theocritum nunquam vidi. Mirum *Lazium* ignorasse auctorem, qui Hieronymus Paduanus est, toties hoc nomine ante Lazianam editionem Lipsiae, Viennae & alibi excusum, etiam a Pulmanno Antverpiae. De passione Domini nostri Jesu Christi carmen heroicum, luculentum ad Donatum Episcopum incerto auctore,

*Maxime Coelicolum, supera qui celsus ab aula
Aeterno imperio superes, fortique tridente
Res hominum, divumque regis, quo turbine diro
Judaei irruerint, rabies quae traxerit illos
Tanta, tuo nato poenas inferre nefandas,
Horrendumque genus mortis, crudelius ipsa
Terque quaterque nece, est animus describere versu.
Tu modo fluctiferum, pater, haec rege vela per aequor,
Primitia/que meae, si qua est, en accipe Musae.*

¹ Vide Epistolam hujus Sylloges Tom. II. 515. pag. 812.

EPISTOLA CCXVII.

CHRIST. DAUMIUS

Nic. Heinsio.

Hagam.

Theonem tandem a *Bobemo* nostro, & Theodulphum a *Carpzovio* salvos innotui. Pro quibus quas agam gratias vix reperio: ita beneficiorum numero & magnitudine me vincis, Nobilissime vir. Uterque magno me gaudio affecit: Theo quidem imprimis ob *Camerarii* emendatam a beato tuo Parente versionem, cujus judicium semper miratus sum; Theodulfus autem ob integra, quae mutilata prius legebamus, & addita longe plura prius non visa. Miror tamen in *Canisio*, & illo in Bibl. PP. Colonienfi, plura ejus haberi, etiam a *Rivino* recusa, quae *Sirmondus* omisit, invitulque vidi hujus rei causam in notis praeteritam. Multa jam observavi exinde, absque ea editione alioqui non cognoscenda. Unde denuo pro hoc beneficio gratias tibi *Bigotioque* curanti libellum persolvo longe maximas. Quas & debebo majores, ubi Ab-

Tom. V.

Ii

diam

diam *Lazii* accepero, utut appactus liber parte sui mutilatus sit. Illud Poëma (*Jesuidae* aliis nomine inscriptum) quod adjecit *Lazius*, tanquam incerti Auctoris, est *Hieronimi Vallensis*, vel, ut alii, *de Vallibus*, *Paduani*, quem *Gesnerus* male anno 1494. claruisse ait. Vixit enim ille *P. Donatus*, cui consecravit hoc, anno 1442. ut videre est pag. 141. Biblioth. Pad. *Tomastini*, quam indultu Amici aliquando perlegi: apud quem legimus etiam *Paduae* MStum *Jesuidae* & Carminum *Hieronimi de Vallibus* haberi. Narratque idem *Gesnerus* in Biblioth. alibi *W. Lazium* habere MStum hujus, alibi *Viennae* 1510. in 4to. editum esse: Ego autem non solum MStum chartacium, sed & *Lipsienses* quatuor editiones in Libraria mea asservo, anno 1509. 1512. 1516. 1517. in 4to. excusas apud diversos Typographos. Edidit & 1559. Antverpiae apud *Bellerum* in 12. *Th. Pulmannus* cum *Dominici Mancini* Poëmatibus, ut ait, multis tamen omissis, quae apud me sunt: nimirum de Passione Domini, & quatuor virtutibus: *Macarii Mutii* equitis *Camertis* (de quo in epistolis *Politiani*) triumpho Christi, omissa iterum eleganti proso sermone Praefatione *Argentinae* prius excusa, & aliis aliorum carminibus. Exstat anno 1494. *Lipsiae* procusa expositio *Mysteriorum Missae*, Christi Passionem figurantium Anonymi. Is auctor hujus *Hieronimi* longe plures versus in testimonium advocat. Quibus inibi lectis *Barthius* olim adeo captus est, ut crediderit esse vetusti alicujus auctoris *Hieronimi* dicti, & in Librum LXVII. *Adversariorum* cap. 2. non sine laude ejus exscripserit. Ex quo aliquando haec verba excerpere memini: Sane vero talia, ut ipsum opus, eximie desideramus; jungunt enim sacris rebus Romanam dictionem, ita ut vix ullum superstitem Poëtarum Christianorum isto meliorem censere possis. Haec ille. Variant autem plurimum exemplaria, praesertim *Pulmanni*, quem interpolasse multa suspicor. Variat & lectio in *Lazii* edito, ut ex paucis versibus illis descriptis animadverto. Qui eo gratior hac propter appellet. *Hieronimi* mei *Graeci* quatuor adhuc hisce adjeci exempla, sed a literis his abjuncta, ut eas *Carpzovius* noster, si non cum fasciculo, saltem absque illo prius ad vos propellat. Nisi grave, & ubi occasio erit, velim mittatur aliquando ad *Juniorem Gronovium* a me perhonorifice salutandum, hujus exemplum. Qui primam Parentis sui ad me epistolam, cum periisset, denuo descripsit: Parentis vero *Livium* eum denique recudere volupe est. Habeo primam ejus editionem: ultimam paulo ante suum ex hac vita discessum mihi promisit; sed morte praeventus praestare non potuit. A *Graevio* nihil vidi, neque literas, neque *Ciceronem*: inquiram autem vel apud *Carpzovium*, qui se exemplar ab *Elzevirio* accepisse scripserat, & *Menenkenium* Prof. Publ. e Belgio etiam exemplum nactum esse ante nundinas memoraverat. *Bosii* Bibliothecam *Jenensi* publicae adjunctam affirmant. Utrum MSSta ejus addita excusis Codd. fuerint, me praeterit. Usui ejus, cum viveret, concedebam indices in *Graecos* nonnullos, quibus & *Josephus* additus erat; incredibili diligentia a *Barthio* confectos & αὐτοχρεια scriptos. Verum post obitum ejus disparuerunt, nec ab haeredibus recuperare potui, a tagaci procul dubio manu subtracti, ut & nonnulla alia. Publicavit iis, quae

te possidere memoras, plura, quae si in manus meas incident, faxo iis ut potiaris. De Josepho ejus nonnulla ex ejus ad me^r literis excerpti. *Weitzii* in Musacum exiguus Notarum absque textu libellus est, Ambergae in 12. anno 1613. excusus. Maximam partem cum indice, si non totus, correpsit in notas Pareanas. In Theocriti saltem Charites notas edidit Coburgi Anno 1624. in 8. paucissimis pagellis, quas ad *Barthium* miserat. Sunt mera sententiarum collectanea. Inquiram in utrumque libellum; utinam felici sorte! Corippum *Rittershusii* per Zwollanos ad Elzevirios misit *Carpzovius*. Versificatores illi Lugduni anno 1509. & postea additi qui sint, rescire aveo. Octo auctores mei, inter quos Cato, Theodulus, Facetus &c. anno 1505. sunt excusi. Henricum de male Fortunatis 1509. cum Comment. Lugd. proditum desidero: sed vix spero. Si is Henricus pauper vulgo dictus est, aliis Septimelensis, spero ex promisso *Petri Axenii* a *Marq. Gudio*, qui nuperrime alteras *Gaufredi* membranas emendatiores & Scholiis locupletiores ad me curavit, his diebus per *Carpzovium* Hamburgum. Commodianum, Architrenium, autorem de gestis Berengarii, Mantuani veteres editiones ante Antverpiensem luci datas anxie desidero, aere meo lubens redempturus per *Carpzovium* curando. Ad Amorum triumviros sunt apud me Notae *Barthii*, ex V. MSto. ad vetustissimam edit. nullius anni & loci in Folio, quam in Italia puto excusam. Pro judicio variorum bonorum librorum gratias ago habeoque. Utinam & ad nostras oras appellant. Haec admodum festinans. Inelegantiae ergo me excusabis *τιμὰλφέςατε* vir B. Vale, sospesque diu diuque age! Dab. Cygn. d. 16. Octob. ft. V. Anno CIOIOCLXXVII.

I. In Josephum nunc totus incumbo. Ad eum excudendum operam suam honestis conditionibus obtulit *Johannes Koenig*, bibliopola Basiliensis. Etiam Lipsia spes aliqua adlucescit fore, ut Lipsiensis cujusdam sumtu haec excudat. Sed lentum negotium est: & labor plane taediosus. Nam vix ulla periodus est, quae non adnotatiunculam requirit: & chronologica multum operae temporisque sibi poscunt. Versio autem *Gele- niana* infinitis locis a Graeco recedit: quam tamen & ipsam emendare animus est. Est vir magnus, qui suadet, ut varias lectiones solas separatim edam, ut in *Polybio* fecit *Boclerus*: sed id a me impetrare nondum possum. Ut tamen acceleretur editio quae in tanta expectatione est, constitui versionem intactam relinquere; & solummodo graviora illius ἀμαρτήματα in notis perstringere: controversias quoque plerasque, praesertim Chronologicas in aliud opus exercitationum ad Josephum & historiam sacram, si deus vitam dederit, separatim, & per partes, ritu disputationum Academicarum edendum, rejicere. In notis autem id potissimum operam dabo, ut textus *Josephi* emendetur, & variae MSS. lectiones, doctorumque virorum conjecturae recensentur.

EPISTOLA CCXVIII.

NIC. HEINSIUS

*Chr. Daumio.**Cygneam.*

LAetor me hercules, ut qui maxime, cum Theonem parentis mei, cum *Sirmondi* Theodulphum ad te salvos pervenisse, idque cura ac beneficio praestantissimi *Carpzovii*, cui hoc nomine uterque plurimum sane debemus. Ab hoc successu augurium capio non vanum mox fore, ut & *Basilii Zanchii* Poëmata & *Abdias Babylonius*, jam dudum viae commissi, fato utantur pari. Caeterorum, quos desideras, codicum ratio a me habebitur, cum venales offerentur. Quas vero grates, *Daumi* clarissime, tibi nunc agam pro *Corippo Rittershusii*, quem librum in Bibliopoliis hîc terrarum nequicquam quaeras? quas pro S. Hieronymi de Trinitate opusculo? cujus copiam & *Jacobo Gronovio*, quod jubes, & *Emerico Bigotio* sum factururus. A *Bigotio*, quod miror, jam totis sex mensibus literarum nihil ad me perlatum. Diu est, quod *Aegidius Menagius* significabat per litteras lugere inconsolabiliter fraternam mortem: sed & id vulnus jam cicatricem duxisse debuit. *Jacobus Gronovius* praeter *Livium* parentis sui, & suum, observata peculiaria typis describenda curat, ut audio, super *Livianis* locis compluribus rem Geographicam tangentibus. Habet & sub praelo *Gisbertus Cuperus* quartum *Observationum Philologicarum* librum. Tres priores longe auctiores castigatioresque posset publico simul dare, sed, ut sunt tempora, typographum huic rei frustra circumspici opinor. *Amstelaedamenses Bomii* fratres tamen *Callimachum* dicuntur luci parare, *Animadversis Annae Fabrae Tanaquilli* filiae illustratum. *Ciceronianas Graevii* Epistolas jam debes accepisse. Eiusdem *Florus* lucem propediem quoque videbit, quem & alia proxime excipient. Ferunt & *Luciani* libellum de *Calumnia* publico datum, cum notis *Jacobi Tollii*, sed quem nondum videre mihi contigit. *Thomas Munckerus* amicus meus assiduus est in *Mythologis Latinis* recognoscendis, quos in unum volumen coniectos aestate proxima in publicum, ut opinor, emittet. Nunc post *Hyginum* absolutum *Fulgentio* manum admovere coepit, cujus codicem vetustum, & multis locis sibi utilem e *Leiden*si bibliotheca nactus, subsidia conquirat majora, sed irritum haecenus conatu. Conqueritur in suis ad me litteris nec *Baptistae Pii* in hunc scriptorem commentaria, nec *Jacobi Locheri*, quae Anno 1521. in *Germania superiore* dicuntur prodiisse, reperire se posse: *Locherum* praestare si nobis potes, & me non minus, quam *Munckerum* ipsum, & rem litterariam omnem perpulchre demereberis. Volebam plura, sed recens a morbo, qui me aliquam diu lecto habuit adfixum, vires scriptioni non satis respondere invitum intellexi. Vale, mi *Daumi*. Hagae Comitum MDCLXXVII. Kal. Decembris.

EPISTOLA CCXIX.

CHRIST. DAUMIUS

*Nic. Heinsio.**Hagam.*

Appulerunt tandem d. 24. Decemb. ft. V. post tuas, vir Nobilissime, literas x. Decembri a nostro *Carpzovio* ad me recte missas, Clarissimi *Graevii* Ciceronis epistolae, & *Zanchius* tuus cum *Abdia* Babylonio. Quibus libris quid mihi gratius obvenire potuisset, nunc non memoro: verba enim deficiunt, & pudore afficior, cum cogito me tot beneficiis obrutum victumque, tam ingratae mentis hominem vivere cogi, nec paria facere posse. Doleo sane fortem mihi adeo adversari, ut quod valde velim efficere nullus queam. Visebantur ante unum & alterum mensem in quodam auctoris Lipsiensi Catalogo abs te desiderata vetusta illa a *Flacio* congeita Poëmatia. Sed cum ille serius ad me pervenisset, jam ab alio praerepta illa fuerant, nec rescire potui, in cujus pervenerint potestatem. Sic caetera a te cupita necdum reperi; nec tamen despero tempus, deo volente, futurum, ut & illa alicunde erui liceat. Cl. *Graevio* non tantum his, sed & peculiaribus litteris agam gratias. *Gisberti Cuperi* Observationibus Philologicis nondum potiri datum est, uti nec *Munckeri* Mythologis Latinis. *Jac. Locheri* Fulgentium nunquam vidi, ex appendice *Simleriana* Gesneri mihi saltem notum. Ejus Poëmata nonnulla spreta olim adeo *Jano Grutero*, ut ex praefatione partis 5. Poëtarum Germanorum liquet, possideo aliis appacta. Horatius cum Scholiis, sed non magnae puto rei, exstat in Bibliotheca hîc publica. Forte ab anno 1498. quo Argentorati Horatium edidit, doctius aliquid accuratiusque postea publicavit. Quod si Fulgentium indagare deinceps dabitur, a me non negligetur. Interim significo *Barthium* ad *Commelinianam* Mythologorum Latinorum Editionem nonnulla notasse, quae si Clmo *Munckero* arrideant, a me fideliter excerpta habebit. Dabo exiguum harum gustum. pag. 192. libri 1. pro melos carminis expectabat, legit ille expectorabat. pag. 171. cap. 17. Mercurium dici voluere quasi mercium curum. L. Mercicurium. pag. 173. cap. 15. Anacreon antiquissimus autor, l. amabilissimus: pag. 184. cap. 7. lib. 2. pro impossibilis latro L. improvisibilis. Videndum tamen, an non praecedenti voci potentior opponatur. pag. 193. cap. 16. de Dionysio, in femore suo misit, l. insuit. pag. 215. fine capitis de Marfya & Orpheo: Pastores sunt, qui aliena sulcando subtilius pascunt. L. sua vilius. Alia addere non vacat. Plura ad Continentiam Virgilianam adscripsit. Baptistam Pium in Fulgentium, uti & ejus Elegias a Ravasio Textore ejusque exscriptoribus laudatas, itidem nunquam vidi. Novi Bibliopegos & alios homines, qui veterum talium librorum ingentem numerum consciderunt, e quorum manibus aliquando quosdam eripui. Hinc non mirum rarefcere ubique eos, nec faciles inventu esse. De caetero si qui libri grandiores, qualis *Abdias* iste, pro quo adhuc debitor sum, fuit, ad me destinabuntur,

velim significari mihi pretium illorum, ut per Dn. *Carpzovium* possim refundere: Et si quos amplius libros desideras, eorum indicium dari, ut si non omnes, saltem unus & alter attendi possit, & pro te acquiri. Ea propter scripsi & Noribergam ad Cl. V. *Christophorum Arnoldum*, Amicum meum veterem, qui Cl. viri *Ant. Magliabechii* amicitiam mihi conciliavit, addito exemplo tuarum litterarum. Ad quas respondit his verbis: *Pro literis Heinsii, in gemmarum & emblematum censu habendis, maximas, quas possum, gratias ago: Amavit nos quoque Daphnis, & Epistolio me aliquando beavit; cum quo veterem revocare amicitiam, Leydae a nobis initam (si liceret) omnino vellem. Saluta virum Celeberrimum verbis meis, quem silentio hactenus colui; & adhuc colo &c.* Haec ille. Plura vetat acris gravedo, primum ad scribendum caput averfans, nec parum oculis molesta, quam abstinencia studiorum omnium optime curo, singulis fere annis acciduam. B. Vale, Amice incomparabilis. Dabam Cygneae Kal. Januarii Anni a nato Christo *MDCLXXVIII.* cujus ut & longe plurimum secutorum auspiciis felicissimum fortunatissimumque esse jubeo. *Frid. Nau-see* edidit Anno 1531. Coloniae Anonymi Philalethi Eusebiani in vitas, miraculaque passionesque Apostolorum, Rhapsodias. In illis reperio integra capita ex Abdia descripta, nisi is potius ex hoc descripsit, aut *Lazius* primus Editor initia hujus immutarit. Possit ex hoc Abdias aliquoties, si tanti, emulari.

EPISTOLA CCXX.

CHRIST. DAUMIUS

Nic. Heinsio.

Vianam.

Hiberni frigoris saevities & me inclementius, praesertim mense Januario habuit, *Heinsi* Nobilissime, Maecenas honoratissime. Quo magis doleo te binos ferme menses lecto fuisse affixum; Deumque veneror, ut salvum quamprimum ac ex voto sospitem seculo & Musis te diutissime praestet servetque. Victorem Massilientem, quem cum Virgilio (at quanto, quam memorabili, & quantis gratiis digno munere!) a *Carpzovio* nostro expectare me jubes, laetissimis excipiam amplexibus. Viales interim illis faveant benigni! Forte erit, ut & Panegyricus Berengario dictus e latibulis prodeat, & meum singulari jucunditate exhilaret animum. Quanquam laetitiam hanc turbare non parum videantur cogitationes ac sollicitudines, quomodo tantis beneficiis tuis redhostiam ego, ab omni ejusmodi ope inops, cum materia occasione fere nulla sit, & sic tamquam in ingratum benignitas effundatur tanta. Sed & hic, spero, Numen caeleste providebit. Manum illam in Victore alteram, quam *Pulmanni* arbitraris, mihi ejus esse neutiquam est visa. Habeo enim illam frequentem in Codicibus, quos *Barthius* a Raphelengianis aere suo redemerat, Juvenalibus puta tribus, Sedulio, Aratore, Schedis Horatii &c. quibus usus erat *Pulmannus* in suis Editionibus. Castigationes Vellejanas denuo emendatas quam vellemus

tenus *Arnoldus* & ego prodire. Judicium enim singulariter acuunt collatae tales editiones judiciosorum hominum. Hieronymi ille libellus, si ad me mitteretur, sedulo darem operam, ut brevi temporis spatio, nisi liber Victore Massiliensi, quem intra decendum describebam, forte crassior ac prolixior sit, exscriptus a me ipso, prima statim tuta occasione per Dn. *Carpzovium* remitteretur. An *Bigotio* libelli mei accepti fuerint, scire jucundum fuit. De Lactantii noviter reperto scripto & a *Baluzio* edendo *Graevius* salivam jam moverat. Utinam quamprimum rei spes illa transcribatur? A *Baluzio* alioqui dudum edita, ad nos, quod scio, vix aut nondum pervenerunt. Sane *Hildebertum* Cenomanensem, si & illum publicaret, avidissime expeterem e Bibliopoliis. Imperfecta enim satis est Riviniana, nec ullo insuper modo potest haberi, ne ab ejus quidem Filiis, qui parentis sui hunc librum ignorare fere videntur. Post obitum ejus disparuisse miror omnia illius exemplaria. Habeo nunc mecum ex Paulina Lipsiensium Bibliotheca Membranaceum grandem Codicem, in quo Mamutii nescio cujus de virtutibus Elegia plus mille constans versibus, Orosius, Arator, Rigae & Prudentii nonnulla, ut Psychomachia, Hamartigenia, Hymni. Quae cum tua, vir Nobiliss. comparare coepi, varias proxima occasione, modo tanti sint, missurus. Sed nolo inficetis meis nugis tibi, vir Nobilissime, tuisque studiis esse molestiae, quem valere ac salvere ex animo jubeo. B. Vale iterum iterumque & salve. Deproperabam Cygnae inter illa ἐμπόδιον
Nonis Maii MDCLXXIX.

EPISTOLA CCXXI.

NIC. HEINSIUS

Chr. Daumio.

Cygnae.

SUB hibernam tempestatem proximam me receperam ex aula in locum solitarium, quem studiis meis secessum destinavi, ut & vires a morbo dejectas instaurarem, simul ut bibliothecam, mire conturbatam tot jam annis, ordinarem, ac meis aptarem usibus. Cujus tamen in propositi successu ne omnino mihi satisfecerim, per intervenientem morbum factum est, qui cum ab aliis curis, tum ab officio litterarum, quod amicorum pluribus debebam, tibi in primis, me avocavit haecenus. Illustrium septem virorum poemata, quae debebam tibi, misi jam ad *Elzevirium*, quibus ille Vellejum Paterculum est additurus. Panegyricum carmen Berengario dictum iis additum oportuit, sed exemplar, quod jam seposueram ad te mittendum, nescio quomodo in armariis meis aberravit, & manus meas frustratur. Ubi comparebit denuo, quin ad te iturum sit dubitare non debes. *Thomae Munckero*, quae Barthiana ad Fulgentium Mythologum proxime annotata communicabas, fuerunt acceptissima, ac horum pleraque approbationem ejus sunt consecuta. Abdiam Babylonium *Salmasius* cum pervetusto *Fr. Jureti* codice contulerat, uti is ipse saepe in scriptis testatur. Dum excutio Bibliothecam meam, complura illic volu-

volumina invenio apud Italos praesertim excusa olim, quae hîc terrarum rare videntur. Ut *Pauli Manutii* de comitiis & urbe Romana commentarios. ejusdemque ac *Fratri Petri de Damasceno* dissertationem. *Victorem*; & a *Morrellio* editum alterum *Hieronymi* libellum Graecum cum versione Latina. Vale. Vianae ad Leccam 24. Junii Gregor. CIOIOCLXXVIII.

EPISTOLA CCXXII.

CHRIST. DAUMIUS

Nic. Heinsio.

Vianam.

Litteris tuis, vir Nobiliss. reposuissem responsum maturius, si *Carpzovius* noster ad Acidulas Egranas profectus voto meo non defuisset. Nunc commodum salutante nostras oras Clariss. *Graevio*, non potui non ei committere *Arnoldi* ad te literas. Quibus si quid reddes responsi, curabo illud ad eum statim atque accepero. Mar. Vict. Massiliensem, etsi mihi haecenus amatissimum, & inter κεμύλια repositum, male fecit *Graevius*, cum dono abs te mihi datum olim affirmavit, quod tum ex ejus ἀυτογέγραφο, tum ex Epistola cxxiv. ad *Reinesium* a me scripta, videre est. Idque credidi firmiter, cum tot Epistolis acceptis, ne semel quidem vel a te, vel a *Graevio* eo nomine fuerim com-
monitus. Securius igitur eo libro, quasi meo usus, ad typos quidem textum descriptum habeo: sed nondum cum descripto commissum: qui liber etiam Catalogo nundinali Lipsiensi non ita pridem inferi jussus est, quasi mox publicandus, fueratque publicatus, nisi exspectassem aliunde ad commodius edendam editionem Gagneianam, quam & te rogare memini. Hac vice igitur, ne beneficium tuum mihi prorsus pereat, remittere per *Graevium* non potui. Bidui enim intervallo collatio & notarum descriptio, tot intercedentibus remoris, expedienda non erat. Si statim, ac Lipsiam appulerat, id me monuisset, obtinuisset facilius. Exiguam igitur hanc morulam aegre noli ferre, cujus benevolentiam toties expertus sum. Remittetur cura *Carpzovii* quamprimum, non sine gratiis. Scribit autem *Graevius*, quem frustra hospitem exspectavi, te, vir Nobiliss. promittere, si remisero, aliud mihi ejusd. Editionis exemplum; quod summis precibus rogo, maximisque desideriis mihi polliceor. Atque utinam & Gagneianam una nancisci possem. Editionem enim nondum abjeci; sed si vitam Deus largietur, vel meis sumptibus, ubi ad eam rem tantum aeris collegero, uti Hieronymum dederam, dabo typographo, exemplaue ad vos mittam. Μακαρίῃς Ἱερωνύμῳ (procul dubio is meus est Hieronymus) φιλοπονία παντὶ χειρῶν ὠφελοῦσα quot chartarum opusculum est? Utinam olim habere licuisset, adjunxissem meo. Octo illa opuscula Catonis, Theoduli &c. ipse possideo: At non Lugdunensem illam Anni 1538. quam valde cum veteriore illa componerem, si tam felix impetrator essem. Henricum de male Fortunatis Lugd. editum quaero, qui Septimelensis, aliis Samaritensis est, cujus communicationem aut a Clariss. *Magliabecchio*, qui ejus
vitam

vitam e MSS. sua manu mihi descripsit, & *Barthol. Scalae* opuscula cum aliis dono misit: aut a *Marq. Gudio* exspecto, in gratiam *Magliakeechii* cum editurus. Berengarii Panegyristen ubi nactus fuero, quas non gratias acturus sum? atque utinam referre daretur. Indicium sane rogo adhuc librorum copiosius, ut si reliqui statim non compareant, unus & alter saltem, qui se primum offerat, tibi, Maecenas honoratissime, conciliari queat. B. V. incomparabilis *Heinsi*, & maxime festinatis incomptisque benigne ignosce. Dabam Cygneae a. d. 21. Aug. st. Jul. A. V. R. cıııııCLXXVIII. *Buchneri* epistolae jam *Dresdae* excuduntur. Vidi specimen.

EPISTOLA CCXXIII.

CHRIST. DAUMIUS

Nic. Heinsio.

Vianam.

Letteras ad te, vir Nobiliss. meas Clmo. *Graevio*, cum Lipsiae haereret, cum Arnoldianis concreditas, jam in manus tuas illustres pervenisse arbitror. Hac vice per Ampliss. Dn. *Carpzovium* remitto tandem Victorem Massiliensem, pro cujus tamen diuturna permissione gratias (si sufficit) peringentes ago, & maxime memor hujus ero beneficii. Ibi quae ad Hilarium notata sunt, Maximi Parentis tui manu exarata agnosco: quam novi ex litteris *αυτογέγραφοις* ad *Barthium*, & vidi in diversis virorum doctorum Philothecis. Sed cujusnam manus sit, qui pag. 115. *velantes* ad oram scripsit, *Rutgersiine*, cujus manum nondum vidi, an alterius, nosse perquam haveo. An *Rutgersii* sunt paucae ad Victorem pag. 14. 15. notae? Noli autem, Domine maxime venerande, indignari, quod tamdiu apud me detinuerim hunc libellum, qui, nisi ex errore meum putassem, & si citius fuisset vel a *Graevio* monitus, jam olim, & quidem brevis, postquam primum accepi, temporis spatio, ad suum reversurus erat Dominum. Septem illustres Poëtas una cum Vellejo & *Rutgersii* effigie, cujus unum cum *Arnoldo* nostro commune feci, post *Graevii* discessum demum recte adeptus sum: unde mihi nova debitio nata est. Quî vero ex tabulis tuis nomen expungatur meum, nondum queo perspicere. Valde placet in eo collatio cum primigenia editione, ex qua sic vera lectio feliciter fuit eruta. Utinam & alii Auctores ad primas sic revocarentur editiones! Septimellensis dimidiam fere partem ex Lipsiensi Bibliotheca nactus sum: nam caetera librarius omiserat; utinam aut a *Magliabeechio* aut a *Gudio* (uterque enim promisit) supplenda! Berengarii Poëtam anxie exspecto. *Manutii* illa scripta, quae possidere te ais, hucusque fuerunt mihi incognita. De Hieronymo superius scripsi. *Raenerius* Medicus, qui octo illos versificatorculos recudit, utinam aliquando hac facie conspiciendos, etiam Ovidii *Metamorphosin* evulgavit, & nescio quid in *Lutatii Argumentis* ex Manuscriptis sibi praestitisse visus est. Si *Munckeri* Fulgentius in lucem prodiit, eum nondum sum conspiciatus. *Gaufredum* cum tertiis Membranis a *Gudio* ad me missis commisi,

Tom. V.

Kk

pro-

proxima oportunitate publicandum. Suspicio eum suam Poëtriam (sic vocat) bis edidisse: tantae discrepantiae alicubi in eo apparent. Victoris Massiliensis Morellianum exemplar, & quae ei accessere Poëmatia, debebant adhibere suis editionibus, qui postea Bibliothecis Patrum inseruere. Nam *Georgius Fabricius* uno & altero loco in suis Poëtis Christianis sibi permisit, quod non debebat. Etiam in Drepanio omisit distichon, quod & reliqui fecerunt. B. Vale; vir nobilissime, evergeta aeternum commemorandi, & me alio Victoris exemplo tibi amplius obstringe. Dabam Cygnae a. d. xvi. Octob. Anno ciciöclxxviii.

EPISTOLA CCXXIV.

NIC. HEINSIUS

Chr. Daumio.

Cygneam.

INyitus quidem ex ultimis tuis cognovi *Graevium* nostrum, tam vicinus vobis cum esset, curis avocatum domesticis, te non convento pedem ad nos retulisse e Saxonia vestra, de qua redux ceteroquin complura narravit nobis haud injucunda auditu. Nunc in Floro luce donando totus est, in quem quicquid conjecturarum e scriniis meis corradi potuit, id omne communicavi cum amico nostro. Vellejum meum tertia parte auctiorem & emendatiorem luci paratum jam habeo, quo aequiore animo a te inspiciendae sunt castigationes meae properanter nimis in publicum nuper emissae. Hunc enim libellum cum poëmatibus Septem Illustrium Virorum, quod sibi redditum ultimis significavit noster *Carpzovius*, ejus tibi copiam jam esse factam vix est ut dubitem. Panegyricus *Berengario* dictus, qui aberravit in pluteis meis, nondum e fuga retractus est. Victor Morellianae editionis, tamdiu apud te servetur licet, dum alterum ejus exemplar ad te perveniat, quod tibi seposui. Frequenter quidem amicus noster, etiam cum libellus ei traderetur ad te mittendus, a me monitus est, ejus repetendi curam ne negligeret, ut fatetur ipse, cum eorum, quae ad oram codicis *Rutgersius* annotaverat, nullum mihi exemplar sit reliquum. Sed oblitus, quantum apparet, moniti saepe iterati a me, effluere sibi passus est has preces. Tibi autem, vir Clar. satisfactum rebar, si editione illa ad satietatem uteris. *Gagneianam* Victoris editionem nequicquam quaero hactenus: ad *Arnoldi* litteras rescriptum *Carpzovio* nostro mittam hodie. de Poëmatibus *Angeli Politiani* Etruscis olim inter nos actum memini, quorum editionem Aldinam possideo & alteram Mediolanensem Anni 1519. cui vir maximus *Julius Caesar Scaliger* manu sua adscripsit; dignum poëma non solum, quod quibusvis praestantissimis vulgaribus scriptis adnumeretur, sed etiam quod praestantissimum omnium habeatur. Vale, Idib. Novemb. ciciöclxxviii. Vianae ad Leccam.

EPISTOLA CCXXV.
NIC. HEINSIUS*Chr. Daumio.**Cygnem.*

DE Victore Maffiliensi, cur tam anxie festinares nihil omnino caussae erat; Daumi Clarissime, poterat enim in scriniis tuis acquiescere, dum aliud exemplar, quod sum pollicitus tibi, traderetur. Id tibi apud me quemadmodum praesto est, ita Panegyricum Berengario dictum nondum erui est datum e latbris Bibliothecae meae. Hyberna haec tempestas aliquanto inclementior facit, ut cubiculo rarius excesserim in museum: sub adventu hirundinum tamen id tutius licebit, sine valetudinis incommodo, quae me foco adfixit. ad Hilarium quae annotata sunt ex *Puteanorum*, ut suspicor, codice, non parentis mei, sed *Rutgersii* manum praeferunt, ex cujus legato quia ad me pervenit, librum cariorem habeo. Altera illa manus, quae pag. 115. comparet, mihi plane est incognita. Castigationes Vellejanas ad te perlatas esse gaudeo, non quod sint tanti, quae te lectorem possint sperare, sunt enim tumultuarium in modum a festinante conscriptae. Sed ut videas pro jure amicitiae nostrae, ita me arbitrari, etiam minima mea ad te pertinere: adauxi eas altera fere parte, multis rejectis aut immutatis, in quibus videbar mihi post intentiores curas a scopo aberrasse. ad Cl. *Arnoldum* litteras mense Novembri dabam, quas te accepisse confido. De Hieronymi libello agam cum *Graevio* nostro, si sit, cui describendum concedi possit. Sin minus, ad te referendum aliquando curabo, ubi tuta sese offeret occasio. *Raenerius* ille argumentis in Metamorphoses Nasonianas vetustis recognoscendis utilem se operam navasse gloriatur, quod tamen doctissimus *Munckerus* negat, qui a me argumenta ea accepit cum vetustissimo codice Florentiae collata. *Munckerus* Fulgentio suo adhuc typographum quaerit, Vianae 10. Februar. MDCLXXIX.

EPISTOLA CCXXVI.
CHRIST. DAUMIUS*Nic. Heinsio.**Vianam.*

PRO Maronis tui, vir Nobiliss. munusculo non tenui, quod ais, quippe accurato studio ad antiquitatis Auctorisque genium elaborato, grates de-
nuo ago sed tenues, solis nimirum verbis constantes, non re aliqua suffultas. Utinam felicitate illa bearer, qua vicissim aliquid contra praestare possem iis, quae in me haecenus praestita sensi. Deus orandus est, ut desiderio nostro quamprimum consulat. Interim & annotationes in divinum hunc vatem paratas avide expectabimus, atque ut huic operae multisque aliis porro superfis, Caeleste Numen quotidianis votis implorabimus. Cl. *Bigotius* si tibi Berenga-

rii Panegyricum procuret, quantas ipsi, tibiue simul debebimus gratias! Quod & de Hieronymi Graeci φιλοπονίας dixerim. De Malēla quia *Becmannus* ad ultimas diu responsum non reposuit, nunc iterum litteras ad eum dedi monitorias, me doceat, quid nobis de promisso suo sperandum sit. Quod statim atque edoctus fuero, vobis, viri honoratissimi, significabo. Audio multis eum obrutum esse negotiis; unde forte illum laborem ad tempus seposuit. Sed certiora, ubi respondebit, quod proxime facturum spero, ex ipso cognoscemus. Claudii Marii Viēt. Editionem Gagneianam, imo si potest, etiam a Sirmondiana & Zehneriana aliam adhuc, si ad conferendum mitteretur, quando aliter non datur, gratus remitterem. Primam Argentinensem Anno 1507. habeo, veterem praeterea nullam. Ideoque tam anxie desidero, quod *Zehnerus*, quae in Colonienſi sunt lectiones variae, editionis Argentinensis esse dicat, & vice versa, quae Argentinensis ajat esse, Colonienſis: ex Basileenſi vero *Moltheri* pauciſſima quaedam afferat, quasi paucis locis inspexisset saltem, non contulisset integrum. Lactantii noviter repertum Libellum a *Baluzio* grandibus, ideoque sumptuosius, voluminibus esse inclusum, insigniter dolemus. Sic enim ejus potiundi spes eo minus apparet, quo rarius cariusque in nostram Germaniam ea opera ventura sint. Conjicio id ex Homiliarum Caesarii exiguo a *Baluzio* editarum Opusculo, quo me munificentissimus *Carpzevius* donavit. Qui si parvo aere non acquirendus est, quid fiet de ingentibus Parisinorum operibus? *Reinesiana* illa an possim acquirere allaborabo. Olim cum edebantur, plura habui exempla, quae cesserunt amicis, ut praeter unum e singulis compactum jam nullum mihi supersit. Observabo autem ne elabantur, modo bona Fors eas pagellas obtulerit. Sed fac, τιμαλφέσατε. *Heinsi*, mittas indiculum desideratorum; forte felicius si non hic, tamen ille pluresve occurrant, quibus tibi rem gratam praestare queam. Orationem *Buchneri* de 4. Virgilii Ecloga, utut forte ante tibi possessam, hisce inclusi. *Munckeri* Hyginus & Fulgentius an prodierint nosse non parum desidero. Utinam *Baluzius* Hildebertum Cenomanensem evulgaret? Reperi nuper fragmentum illius ex Libro de Miseria Conditionis humanae apud Auctorem incertum, cujus annis abhinc ducentis Loci Communes ex Patribus collecti titulo *Phaetrae* prodierunt: cujus tres quasi Editiones deprehendi; prima Norimbergae sub incunabulis Typographiae foras data est, altera in pulchris membranis scripta aliquot, quod miror, capitibus sive titulis auctior servatur Lipsiae in Paulino, quibus nuper usus sum. Tertia post loco incerto excusa, infinitis modis auctior, ordineque prorsus immutato, atque in Alphabeticam seriem redacta; ubi & ultimarum Poëtarum Scriptorumque Hildeberti, Gaufredi, Henrici Pauperis, Galteri &c. adduntur, in publica hîc Bibliotheca adservatur. Sed nolo porro taedio esse hisce minutiis. Tu vive, vir Magne, diutissime in Reip. literariae magnum ornamentum praesidiumque, favorem perge salveque. Dabam Cygnae Kal. Octob. R. O. R. CIOIOCLXXIX.

EPISTOLA CCXXVII.
CHRIST. DAUMIUS

Nic. Heinsio.

Vianam.

Literas tuas, vir Nobiliss. Kal. Febr. Julianis, ac Hieronymum Graecum, Avitumque Gagneii die quinto Aprilis demum ad me salvos pervenisse nuncio. Rescripseram statim ad literas, nisi Ampliss. *Carpzovius* noster Dresdam profectus in negotio Senatus. Lips. domo abfuisset. Interea me domestica & publica negotia infinita ab his libellis recte usurpandis avocarunt. Descripsi tamen jam Hieronymum, praelo quam proxime subjiciendum, ut & pro Amicis meis, & tibi, quae tuis, quia tam rara merx est, distribuas, exempla suppetant. Alcimum & Victorem Gagneii cum Fabriciana editione committere coepi, brevi absolvendos. Video autem Parisiensem hanc *ἐκδοσιν* ex priore Anni 1536. apud *Vincentium Portonarium* expressam, quam & ipsam una cum *Moltberi* A. 1546. Basileae procuratam, aut Coloniensem A. 1509. videre posse in votis habeo. Interea accepit a me *Carpzovius*, Mularum Patronus, Eobani vitam a *Camerario* descriptam, quam rogabas, ad te ut cum nonnullis *P. Lotichii* Elegiis in ejus Poëmatis non reperiundis, a me in gratiam *Graevii* nostri descriptis, mitteret, quod mihi essent gemina ejus libelli exempla. Caeteros an possim alicunde e latibulis eruere, dabo operam. *Hildegardis* Physicam & *Guibertum* de Myrrhinis ipse nondum vidi. *Reinesianae* de lingua Punica Diatribes olim multa habebam exempla, quae tamen praeter unum amicis jam pridem cesserunt omnia. Inquiram autem in illam diligentius. *Mabillonii* Analecta nondum oculis meis objecta fuerunt. Vellem scire vel unius alteriusque Poëtarum nomen, quos suo ille inseruit, ut sic de reliquis, cujus census forent, conjecturam possem facere. *Becmannus* ad nuperrimas meas, quas *Carpzovius* illi misit, nondum respondit, nec causam satis exputo. Cl. *Munckero*, si vivit adhuc, quod opto, prosperam ac perpetuam voveo valetudinem. *Paulinum Nolanum* & *Hildebertum*, ubi prodierint, prae caeteris mihi expetam. De Panegyrico Berengarii fors venaturo favebit Delia. Lactantio de mortibus Persecutorum comitate *Carpzovii* praelaudati usus fui. In eo cap. 23. pag. 21. Vox injurietas aures meas radit, quae genii ac oris Lactantiani vix credetur, dum sic vulgatum est: *Mendici supererant, a quibus nihil exigi posset, quos ab omni genere injurietatis miseria & infelicitas fecerat.* Legendum mihi videtur: *quas ab omni genere injuriae tutos miseria & infelicitas fecerat.* De qua emendatione sententiam tuam & acutissimum judicium praestolor. Syllabum auctiorem abs te desideratorum librorum exspecto. Forte enim unus & alter obveniat adhuc, quem tibi jucundum fore nobis persuademus. B. V. & diu vive, summo literarum commodo, Bataviae tuae, imo totius Germaniae φέλος, Maecenas Opt. Max. Dabam praepropere Cygneae a. d. iv. Maii A. cīdīdclxxx. His vix scriptis appulit ad me exemplar Valerii Flacci tui: cui utinam & notae

fuissent additae, quas impatienter abesse ferimus. Quam gaudio exultaverim eo viso, vix dici potest. Post Avitum & Victorem expeditos, Valerii quas habeo editiones, ut excutiam diligentius excitabor. Quas vero pro exoptatissimo hoc munere gratias satis tibi, vir munificentissime, agam non habeo, denuo nomen in tuas tabulas relatum vix unquam expungendum. Apud Ovid. 7. Met. 276. an legi queat: *mortari marmore*, pro *mortario marmoreo*?

EPISTOLA CCXXVIII.

CHRIST. DAUMIUS

Nic. Heinsio.

Vianam.

Q Uos pridem restituere cum gratiis libros tuos, vir Nobiliss. tibi cogitabam, & me oportebat, eos retinere haecenas me vel invitum coegit dira haec temporum infelicitas, quae vias ad vos fere omnes interclusit, ob Lipsiam contage pestifera famosam. Exspectamus spe ducti exstinguendae brevi penitus malae luis, ut itinera denuo aperiantur commerciis nostris literariis, & sic Hieronymus tuus, Gagnerii Alcimo comitatus, ad te redire possit, cum fasciculo exemplarium meae editionis Illustri tuo nomini inscriptae, cujus unum nunc exemplum speciminis loco jussus adjiciet Ampliss. noster *Carpzovius*, qui Paulinum *Barthii* e meis forulis protractum beneficentia sua luci sistit. Ignosces autem, vir *ἐνδοξότατε*, si quid in meis displicebit, qui variis curis senioque obrutus, segnior indies ad expedienda ejusmodi negotia, nec ingenium in numerato habeo. *Flacii Illyrici* Antilogium quid libri sit, explorare nondum potui; nec norunt Jenenses, quos consului; quippe apud quos olim ille Theologiae Professor vixit. Non desinam tamen inquirere ulterius. Spes fuit nuper facta *Porti* de computatione Graecorum potiundi, quae si minus decollat, habebis una. Ovidii recensioem te meditari lubens cognovi. Nactus sum nuperrime MS. Chartaceum *Metamorphoseos*, & aliud *Artis amatoriae*, item de *Remedio Amoris*. Sed admodum recentia utraque. Ne cum tua editione conferrem, Hieronymus, Avitus & Victor tui usurpandi a me, & nonnulli rari libri, quos eximius *Carpzovius*, dum nobiscum ageret, secum advexerat, nonnullos & usui meo benigne hinc reliquerat, impediunt, & postea Paulinus notis *Jureti*, *Barthii*que illustratus. Dabo vero operam, ut his expeditus, ad Ovidium conferam me, si quid modo boni eruere inde valeam; quod vix tamen credibile mihi, ita unus & alter locus jam inspectus votis minus satisfacit. Librorum, quorum mentionem fecisti, nullum vidi ego, excepto *Baluzii* Miscell. tertio tomo, quem cum prioribus Jenense bibliopolium suppeditavit. Poëtas *Mabilloni* ut pararem mihi allaborarem, nisi magnitudo, quam ais, pretii & me absterret. Aveo tamen rescire, undecunque potero, Autores illi quinam sunt, quos ille edidit, & an inter eos appareant Henricus Septimellensis sive Samariensis, ut apud nonnullos dicitur, vulgo Pauper; Geta, hoc est, Vitalis Gallici, cujus quere-

lus

ius exstat, Amphitruo, Bernardus Geistenfis, imprimis Bernardus Silvester. Sic enim nec grande abnuërem pretium. In emendando Lactantio actum egi. Observavi enim interea, quod prius non attenderam, ab ipso *Baluzio* hunc locum inter errata emendatum jam fuisse. Clm *Munckeri* Fulgentium (nam Hyginum, nisi secunda ea editio est, habeo) nondum vidi. Etsi in Catalogo nundinali jam visatur tanquam editus. Commodiano & Panegyrico Berengarii utinam ex auctione aliqua, exposito aere a me certe solvendo, per te, vir honoratissime, potiri queam. Victoris Massiliensis a *Cauchii* manu notati usum a te mihi, viis, deo nos respiciente, reclusis, mihi polliceor. Cujus ô si & Lugdunensem 1536. (nam in tua Parisiensi multi hinc inde versus omissi sunt, quos tamen alii ex Gagneiana producunt) & Basiliensem *Moltheri*, vel commo- dato habere daretur. Forfan adjutus energetae mei Magni *Carpzovii* auspiciis ille & a me, si vivo, prodire sic valeat. Sed interturbatus desinere jubeor. B. V. salve, & diu diuque sospes age, *τεπρόθυτον ἐμὸν ἀνχημα*. Dab. Cygn. IV. Id. Decembr. CIOIOCLXXX.

EPISTOLA CCXXIX.

BERN. ROTTENDORFFIUS

Nic. Heinsio.

Amstelodamum.

TAndem aliquando, licet tamen serius, libero fidem meam in transmittendis codicibus MSS. Vir Clariss. quidquid hîc illatum morae, aut culpae commissum: totum illud vitae meae desultoriae, & praxi negotiosae admetiendum est. Ab illo enim tempore, quo te anterioribus mensibus Amstelodami salutavi, vix tribus diebus continuis domi substiti; ita perpetuis excursionibus occupor; inprimis vicinorum Principum aulis. Mitto itaque in praesens Claudianum MS. & ejusdem libros de raptu Proserpinae: quibus ultro sese adfociant Ovidii libri de Ponto, de Arte amandi, item ejusdem Metamorphoseon lib. adservantur adhuc in meo musco Glossae in membrana in lib. amorum & artem amandi; in quas ut jam inquiram non vacat; si tamen illas desideraveris, proxima occasione submittam. Idem esto judicium de editione Aldina operum Ovidii antiquissima, & aliis in eundem auctorem commentariis. Juvenis olim quaedam annotavi ad illum auctorem: quae videntur periisse: nec libet, nec licet, ut inquiram quorsum devenerint. Mitto aliquid ex nugis meis. Noli ridere, mi Heinsii, quod strepam velut anser inter olores. Videbis alia propediem, quae magis forte propitiabunt genium tuum. Clariss. *Gronovium* ad vos rediisse laetanter accepi: praevia salute, velim ipsi indices; me a Caesaria Majestate nactum omnia opera Auli Gellii eleganter MSS. quae ipsi suppeditabo libens. Ab eo petes Glossas in Metamorp. Ovidii & alia in eundem auctorem, quae mea sunt. Vale, Vir Cl. Monast. CIOIOCLVII. 19. Febr.

EPI.

EPISTOLA CCXXX.

BERN. ROTTENDORFFIUS

*Nic. Heinsio.**Amstelodamum.*

DOctissime Clarissimeque vir. Quod parvus sum & infrequens in scribendo, perpetuis meis itineribus & excursionibus adscribendum est. Ante obsidionem nostram plusculas septimanas commoratus Bonnae in Aula Electoris Colonienfis. Inde redux arctissima premor obsidione cum meis concivibus, qua soluta avocor Padebornam & Osnabrugum, atque apud eorum locorum Principes itidem aliquot dies substiti: nunc me Rittperga tenet. Et haec causa est, mi optime Heinsi, quo minus quam deceat, vacem amicis. Nuper Coloniae Tristia Ovidii nactus MSS. & Epigrammata Martialis, quae alias rarius MSS. vidi. Si iis indigeas, velim verbo notifices. Habeo itidem duas Martialis primaevas editiones, ipso MSS. non deteriores. Si tibi animus fuerit adornare novam editionem, prompte omnia suppeditabo. Idem esto iudicium de Lucano, qui pariter tertio vel quarto adservatur MS. cum tribus primaevis editionibus in meo Museo. Quando ante quadraginta annos, & quod excurrit, studiorum causa commorabar Rostochii apud *Eilhardum Lubinum* virum Cl. quaedam ad Ovidium annotavi; quae mihi tamen perierunt. Ne tamen totus sim asymbolus, pauca transmittito. Ubi ex nostris mercatoribus non nemo ad vos excurrerit, jubebo ut codices meos, quos tibi utendos submiti, reposcat: tam diu velim apud te delitescant. Est mihi Editio Claudiani Antverpiensis, cui subtextus Avianus; quem itidem MS. secundo habeo. Tollo manum de tabula, avocor enim ad mensam. Vale. Rittpergae CIOIOCLVIII. 20. Martii Spero nos visuros Ovidium & Claudianum in majori sto. ut reliquos Poetas Virgilium, Horatium, Juvenalem &c.

EPISTOLA CCXXXI.

BERN. ROTTENDORFFIUS

*Nic. Heinsio.**Amstelodamum.*

CLarissime Heinsi, amicorum optime. Transmittito Tristia Ovidii, & Epigrammata Martialis MSS. quamvis multarum Bibliothecarum forulos perreptarim, nusquam Martialem offendi MS. Est mihi elegans Martialis Editio Romana in fol. de anno 1573. quam adornarunt *Conradus Schweinheim* & *Arnoldus Pannartz*; quae codice MSS. non deterior, & alia Aldina in sto. Habet itidem noster *Gronovius* Glossas in Metamorphosen Ovidii. Item *Thomae Walleis* Moralizationes in eundem Auctorem; omnia MS. quae si servire poterunt, repetes ab eo. Adservantur & aliae adhuc Glossae in lib. Amorum & de Arte amandi in meo museo, quas itidem submittam, si desideraveris. Na-
ctus

Etus sum nuperis diebus cum aliis codicibus calamo exaratis amplissimum commentarium *M. Arnulphi Aurelianensis* in Lucanum; velim me edoceas, quis ille *Arnulphus*, num editus? extat in membrana apud me MS. Scias praeterea, quod Viennae in Bibliotheca Caesarea extet *Metamorphosis* Ovidii secundo MS. Item omnia illius Auctoris opera; quae verbo impetrassem ab Imperatore defuncto, nunc omnis spes decollavit. Asservantur item Monachii in Bibliotheca Electorali, Ovidii *Metamorphoseon* lib. 15. Item de arte amandi lib. 1. de remedio amoris lib. 1. & 2. Item alii de arte amandi lib. item de Ponto, Fasti, Claudiani de Raptu Proserpinae lib. 3. Vale. Monast. CIOIOCLVIII. 9. Maii.

EPISTOLA CCXXXII.

BERN. ROTTENDORFFIUS

Nic. Heinsio.

Holmiam.

ANterioribus diebus, mi optime Heinsi, Holmia per *Elzevirios* geminas a te accepi; quibus a me Virgilii duos codices MSS. petis, quos jam mitto, quibus ultro sese adsociant septem illustrium virorum Poëmata, in quibus ¹ *Archontorus* noster choragium ducit; & Musae Juveniles *Alexandri* VII. ab eodem *Archontoro* in lucem productae. Velim isthaec boni consulas. Post octo dies praeterpropter cum Sereniss. Electore Colonienfi Hildesum, inde Wolfferbytum excursurus, habebo tui rationem; Scio enim inibi extare innumeros codices calamo exaratos. Nasonem tuum nuper Neuhusii vidi apud *Furstenbergium* nostrum, istius loci Antistitem, dedit is etiam geminas tuas mihi legendas: Magna mihi cum illo intercedit necessitudo: Princeps totus politiori literaturae addictus jam adornat Patriae Historiam, quae etiam propediem manumissa lucem adspiciet. Jam gemunt ipsi tres scriptores terrae sanctae Westphali sub praelo; qui hactenus omnes MSS. delituerunt in meo Museo. Pulcherrimam adornari curavit Typographiam in Arce sua Neuhusiana. Fecimus saepiuscule honorificentiss. Tui mentionem. Ab *Elzeviriis*, nec codices MSS. nec imagines Cardinalis, nec Nasonis opera accepi; monebo illos, ut sese tuae voluntati conforment, scio illos esse paratissimos. Ubi incideris in Dn. *Rosenhan*, Aulae regiae in Suecia cancellarium, si recte memini, ipsi omnem cultum & observantiam ex me deferas. Fuit is septem annos, & quod excurrit, inquilinus meus tempore tractatum pacis in hac urbe; velim item ipsi offeras unum exemplar ex plausibus votivis, si etiam possideas Musas juveniles *Philomathi*. Et septem Illustrium virorum Poëmata, quae jam transmittito, optarem ipsi offerri, sin minus, tibi servabis. Praeterea Hildesio redux praepropere ad te scribam, quas membranas MSS. nactus, item illis adjungam Catalogum omnium meorum Cod. MSS. Haec occupatissimus illino papyro. Vale: & salve Monast. Westphalor. CIOIOCLXII. 6. August. *Archontorus* noster valde anhelat ad Elegias tuas in Italia editas.

¹ *Ferrandus Archontorus* est *Ferdinandus Furstenbergius*, ut conferenti editiones Antverp. 1662. & Amstel. 1672. patebit.

EPISTOLA CCXXXIII.

BERN. ROTTENDORFFIUS

*Nic. Heinsio.**Holmiam.*

Clarissime vir, amice pl. colende. Transmitto antiquissimum Virgilium cum notis Servii, quem nuperis diebus nactus: his adjungo geminum exemplar Silii Italici; cujus ad marginem varias lectiones ex antiquissimis membranis Ecclesiae Colonienfis desumptas sua manu adscripsit *Joh. Livineus* vir Clariss. *Laevisii Torrentii* ex sorore nepos; alterum nescio cum quo Romano Codice collatum; his frui, si libet. Si literatissimo meo Principi Episcopo Paderbornensi Silium tuum, vel Val. Flaccum inscripseris, feceris ipsi rem gratissimam, & experieris re ipsa illius liberalitatem: nec mihi molestum erit, ut tibi vel torquem auream, vel simile quid, quod possit propitiare genium tuum, elaborem. Ego hac hora, dum haec illino papyro, cum dicto Principe excursurus Ratisbonam ad Comitata Imperialia: inde reversus, si deus vitae pepercerit, plura suppeditabo. His vale & salve. Monast, Westphaliae MDCLXIV. 14. Januar. Velim dicas domino *Rosenhan* magnam ex me salutem, addatur quod jam utroque filio, juvenibus ab eruditione solida clarissimis, oratus sim.

EPISTOLA CCXXXIV.

NIC. HEINSIUS

*Bern. Rottendorffio.**Monasterium.*

Quas tu Januario mense ad me dedisti litteras, cum membranarum Maroniarum & Silii exemplaribus editis, eas hesterno demum accepi die. Absentia tua opinor factum esse, vir Clarissime, ut ii, quibus tu Ratisbonam discedens provinciam fasciculi curandi demandares, minus diligenter officio suo sint functi. Certe menses duo vix sunt, quod *Elzevirius* de fasciculo ad se perlato, ac simul nautae Holmienti tradito, me commonuit. Virgilio ut opitulari pro virili pergas, etiam atque etiam te exhortor. Cui ante veris adventum manum a me fore imponendam confido. Morantur nonnihil editionem cum occupationes publicae, tum codices vetusti, quos amici de novo nuper admodum subministrarunt. *Marquardus* in primis *Gudius* misit proximis diebus exemplar longe praestantissimum ex Italia allatum. De Silii exemplaribus exosculor sedulitatem tuam & singulare mei demerendi studium. Utroque tamen codice jam pridem sum usus, quod *Johannes Bollandus*, vir doctissimus, bibliotheca S. I. Antverpiana depromptos, mecum communicavit *Livinei* exemplar. Praeter ea, quae *Modius* in Novantiquis lectionibus, & in Emendationibus *Carrion* ex membranarum Colonienfibus longe optimis publice jam castigant,

runt, si qua ipsius *Livinei* accedunt, ea satis sunt jejuna, ut quod res est, dicam. At quantivis pretii illa Gryphiana minoris formae, cum discrepantiam omnem complectatur libri Colonienfis, quem *Modius* & *Carrion* jure toties laudarunt. Multa autem continet, eaque omnino praeclara, quae nec *Modio* nec *Carrioni* intellecta sunt, ut ex meis in scriptorem illum animadversis facile deprehendes. Puto autem *Carrionis* manum in illo codice apparere, quod cum *Modianis* excerptis non ubique convenient. Coloniae cum essem ante hoc decennium, in bibliotheca Cathedralis Ecclesiae multo studio has *Silii* membranas perquisivi, sed frustra, jam enim cum aliis multis, quas idem *Modius* in Novantiquis laudavit, erant ablatae custodum, ut opinor, socordia. Ex quo postremum te compellavi, de Prudentio dedicando *Principi Paderbornensi* cogitabam. Sed in *Silium* & *Valerium*, quae annotavi, multo paratiora sunt editioni, praesertim in *Valerium* notae, quae tantum a me perlegendae sunt; ut supremam manum desinant requirere: si quid ex his *Principi* nostro omnium acceptissimum fore opineris, ne dissimula, quaeso, tum & dignitates & honores, quibus fungitur, diligenter expressos quamprimum ad me mitte. De munificentia ejus quod bene sperare me jubes, etsi est gratissimum, praecipuum tamen praesidium in benevolentia & affectu tanti herois collocavi. Prodibit, ni fallor, propediem *Claudianus* meus, aut jam prodiit, cujus ut exemplar geminum confestim ad Reverendissimum Principem per tabellarios mittatur, quorum alterum tu tibi vindices, *Elzevirio* hodie in mandatis dedi, scripturus & ipse ad Principem proxime. *Rosenbanius* anno proxime elapso e vivis excessit. Ego solitudinem tuam atque orbitatem, qui filiis jam duobus ad praeclara contendentibus sis privatus, doleo vehementer. Vale, vir Clarissime; Holmiae Suecorum CICICLXIV xv. Kal. Sept. Jul.

EPISTOLA CCXXXV.

BERN. ROTTENDORFFIUS

Nic. Heinsio.

Holmiam.

Virgilii membranas & *Silii* exemplaria edita, recte tibi reddita esse, lac-
tanter accepi. Sciscitatus sum ex Episcopo & Principe Paderbornensi;
quem ex tribus hisce Poëtis, Prudentio videlicet, Valerio Flacco & *Silio*
Italico, sibi malit inscribi. Respondit sequenti verborum tenore. *Cl. Heinsio*
de cognita ejus in me benevolentia gratias ago, & plurimum debeo, quod amicitiam
inter nos Romae initam, publico aliquo testimonio confirmare & insignire cogitat. Si
mibi auctoris dedicandi optio datur, malo Prudentium, Christianum Poëtam Eccle-
siastico Principi convenientiorem: quod ejus humanitati poteris suggerere, & persua-
dere, omnia illius scripta a me fieri maximi. &c. Subnectit postea; *De Heinsio*
curabo, ne illum operae, ac suae in me voluntatis poeniteat. Haec sunt verba Prin-
cipis. Ne ego jam totus sim asymbolus in negotio hocce promovendo, mitto
Prudentium integrum MS. In quo, circa initium & finem *Enchiridii* veteris

& novi instrumenti reperiuntur, quaedam carmina, quae non extant in editione *Victoris Giselini*, quae venit in apicum circa Anno 1564. ex officina Plantiniana. Mitto etiam Prudentii *Psychomachiam* MS. elegantem satis. Et ejusdem libros contra Symmachum urbi Praefectum itidem MS. Dum haec illino chartae, casu incido in *Antonium Liberum*, qui Hymnum unum interpretatus est. Habeo itidem antiquissimam Daventriensem editionem, quae *Giselino*, ut ipse testatur, ubique tantum opis tulit, quantum ullus alius. *Murmeli* item commentaria in Martyrem Romanum extant in meo Museo. Sed non possum in praesens in illa inquirere. *Liberum* mitto in Hymnum,

Inventor rutili dux bone luminis &c.

Valde anhele, ut videam Valerium Flaccum a te recentatum & manumissum. Idem esto iudicium de Silio Italico. Mihi pronuper ex comitiis imperialibus reduci, alicubi praeda facti aliquot Codicis MSS. In his Statius totus elegans & vetustus, Seneca Rhetor, Solinus Polyhistor, Martianus Capella & in illum commentarius, Sidonius Apollinaris, Fulgentii Mythologiarum lib. 3. & ejusdem de Allegoria libror. Virgilii lib. 1. Sextus Aurelius Victor, Vegetius de re Militari, Tusculanae Quaestiones Ciceronis, Chalcidius in Timaeum Platonis, Codex antiquissimus ante 800. annos scriptus, & plures alii in membranis eleganter scripti. Euthanasiam meam, ut spero, brevi videbis, quam fummo Pontifici inscripsi, & plura alia. Valde aveo videre novam illam Claudiani editionem. Vale, & me ama. Monast. cccccclxiv. 14. Decembri. Si Dn. *Barenklau*, olim hic meus inquilinus, Holmiae subsistat; velim multis nominibus ex me salveat.

P. S. Petis, mi optime Heinse, ut Principis mei honores & dignitates, quibus fungitur, diligenter expressas ad te mittam. Nosti illius singularem doctrinam & morum suavitatem, ut vere possim dicere,

*Doctius aut melius nondum Germania pectus,
Vidit honoratâ sceptrâ tenere manu.*

Inscripsi ipsi olim quid, cujus dedicationem mitto. Reliqua patent in catena aurea, quam subnecto. Hoc certum est, quod Barones *Furstenbergii* inter illustres Germaniae Proceres a tempore Caroli Magni non sine gloria inclaru-
rint, & quod ex eadem familia tres S. R. I. Principes, ut pote *Gulielmus*, Magnus Ordinis Teutonicus in Livonia Magister; *Theodorus* Episcopus Paderbornensis, & noster *Ferdinandus* prodierint. Non addo in praesens plura. Siquidem,

Esset id in vastum mittere ligna nemus.

Vale iterum.

EPISTOLA CCXXXVI.
NIC. HEINSIUS*Bern. Rottendorffio.**Monasterium.*

TU vero, quantum video, demereri me non cessas, Rottendorffii eximie. Perlata quippe sunt ad me diebus proximis Prudentii exemplaria in membranis exarata cum tuis litteris, merum mei amorem spirantibus. *Principis Paderbornii* sententiam tuo beneficio penitus exploratam mihi nunc esse laetor. Mavult nimirum heros litteratissimus Christianum poëtam sibi ecclesiae columni dedicari, quam ex ethnicis quemcumque. Nec dissentio ego, aut in contraria eundum mihi duco. Memineris solummodo velim, animadversiones in illum scriptorem meas mihi etiamnum apparandas esse, quas in Valerium Flaccum & Silium Italicum tantum non confectas in scriniis servo. Sunt tamen in promptu farragines scripturae discrepantis ex variis iisdemque vetustissimis Prudentii codicibus a me jam olim inter peregrinandum collectae. Inter quos principatum facile tenet Puteanae bibliothecae codex litteris majoribus Romanis, quas capitales vulgo nuncupamus, exaratus, sed magna sui parte mutilatus & truncus, cum in eo libri adversus Symmachum conscripti, aliaque nonnulla desiderentur. Usus quoque sum libro Bodlejanae apud Oxonios bibliothecae pervetusto, qui Prudentii omnia complectebatur. Usus & Vossianis membranis & *Laevini Torrentii* schedis. Sed quod ad rem non minimum facit, a *Langermanno* impetrari poterunt, quae ille ante annos hos duodenos, cum Lutetiae una corvivebamus, ex antiquissimo Thuanorum codice excerptis. Haberi quoque poterunt, quae *Emericus Bigotius* ex Ambrosiano libro longe veterrimo, ac litteris itidem conscripto majoribus Romanis, Mediolani sibi comparavit. Esse tamen *Daumium*, virum in Saxonia eruditum ac humanioribus litteris probe instructum, in eo, ut Prudentium recenseat, non nemo ex amicis nuper monebat. Sed nil prohibet duplicem curam scriptori egregio sub eandem tempestatem a duobus consecrari. Majus impedimentum majorque procrastinatio incumbit ac subverenda porro videtur a publicis occupationibus, quae, minitantibus nunc bellum foederato Belgio Britannis, solito densiores me circumstant, cum nunquam soleant intermittere, sic ut absit minimum, quin nuntios humanioribus litteris mittendos parem, nisi vitae privatae reddar, quo votis omnibus adspiro. Claudianus meus jam pridem publice circumfertur, & nisi augurium me fallit, exemplar ejus tibi destinatum in manus tuas pervenit, sin non recta per Monasterienses tabellarios via, at opera Celsissimi *Ferdinandi*, quod illi te adesse sim opinatus, quando *Elzevirio Danieli* in mandatis dabam, ut geminum Claudiani exemplar Paderbornam curaret perferri, una cum historia *Loccenii* Suecica, quam princeps optimus videre desiderabat. In Virgilio parum negotii mihi est reliquum, nisi quod *Christina Alexandra* spem fecit, fore, ut subsidia haud exigui momenti ex aeterna urbe secum ad me perferat, cum pedem illinc movebit. De poëmatis

etiam meis lentum est negotium, in quibus tamen edendis occupari jam typographus coepit. Praeter *Schefferi* de Pythagorico dogmate commentarium, prodire nuperrime ejusdem cura apud Ubsalientes *Tactica* Arriani & Mauritii haecenus inedita: prodibit propediem ejus de stylo opusculum. *Barenklavius* in regni Suecici Senatorem proximis comitiis est erectus, conspirante omnium suffragio, quae dignitas raro confertur in illos, quos natalium splendor haud comitatur. Nactum te esse codices membraneos complures in itinere Ratisbonensi laetor. Chalcidii in Timaeum Platonis commentarius alicubi integer in praeis bibliothecis latere creditur. ita certe persuasum habebat ut crederet *Hofstenius* ὁ μακρότης, qui eo scriptore plurimum delectabatur; cujus alteram tantum partem publice circumferri haud ignoras. Celsissimo Principi, quem in oculis assidue fero, me ut de meliori nota commendes, etiam atque etiam rogo. Vale, Flos amicorum, & festinatae scriptioni ignosce. Exarabam Holmiae Suecorum Anno MDCLXV. Kal. Februariis.

EPISTOLA CCXXXVII.
NIC. HEINSIUS

Bern. Rottendorffio.

Monasterium.

Dilex vicefimus, ni fallor, nunc exactus est, quod pro Prudentii scriptis Exemplaribus ad me perlatis gratias qualescunque agebam, mi Rottendorffio, pari gratiarum actione nunc apud te defungor pro epistola herois *Ferdinandi*, tuo beneficio proximis diebus reddita, ad quam responsum hinc habes minime procrastinatum, ne tantae viri Principis benevolentiae videar defuisse. Caeterum, quod proxima occasione significare nescio quomodo neglegbam, alibi curis occupatus, id nunc addo, esse nonneminem ex amicis meis, in foederato Belgio, qui aveat doceri, quid factum sit schedis postumis *Mallincrotii* ὁ μακρότης, praesertim isti apologiae, quam Erasmo nostro dederat. Parari quippe a bibliopolis in Gallia Lugdunensibus operum Erasmanorum editionem novam, cui Apologiam hanc non inconcinne aut praeter ordinem, aut praefigi posse, aut subungi, si vobis harum rerum censoribus acerrimis id minime inconsultum videatur. Tu quaeso nonnihil rescribe, ut desiderio hominis amicissimi, is est *Hadrianus Wallius*, satisfiat.

Plura

¹ Vide Epist. xv. & xvi. *Walli* & *Heinsii* tom. III. pag. 869. Apologiam vero illam, quam pro Erasmo scripserat, prodisse nescio. *Martinus Lydius* olim scripserat, de qua vide *Baylii* Lexicon tom. II. pag. 1100. quam *Merulae* edenti vitam Erasmi submiserat *Joannes Lydius*, ut discimus ex Epistola ejus ad *Merulam* tom. II. Sylloges hujus pag. 376. & quam frustra diu quaesivi in *Merulae* vita Erasmi Anno 1707. Leidae edita. Sed quae nunc legitur in x. tomo operum Erasmi novae editionis. Aliam apologiam edidit nuper 1713. *Marsollerius*, quam Jesuitae Trevoltenses cum in ephemeridibus suis maligne carpissent, partes *Marsollerii*, vel ipse, vel alius suscepit in dissertatione inserta commentariis literariis (*memoires litteraires*). Hagae 1716. tom. II. pag. 336. *Joh. Richardus* etiam Coloniae Anno 1688. edidit libellum, quo illum cum Ecclesia Catholica sensisse probare conatus est, quae *Lydi*, si eam vidisset *Richardus*, contraria esset.

Plura quae nunc subtexam, haud sunt in promptu. Nisi id unum, ardentem anxieque memoriam mei me velle tibi commendatam esse, nec minus illi Principi, quem ego prae caeteris mortalibus unice in oculis fero. Vale. Exarabam Holmiae Suecorum *cicidclxv.* a. d. vi. Kal. Mart.

EPISTOLA CCXXXVIII.

NIC. HEINSIUS

*Bern. Rottendorffio.**Monasterium.*

DIU est, vir clarissime, quod me rerum tuarum status omnino latet. Nec opinor tamen mei studium apud te frigere, cujus singularem benevolentiam tot argumentis habeo perspectam. Diviserunt nos bella, ne sola ab intervallo locorum esset injuria. Bella inquam, quae cum patriae & tuae & meae minus fortunata obvenerint, mihi tamen & privatim damnosa sensi. Missis quippe Amstelaedamo ad me Octobri mense Anni *cicidclxv.* centum aureis per tabellarios ab *Elzevirio*, cum a bello metus haud esset, resignatas ajunt a Principe vestro praeter expectationem litteras, & rei pretiosae quod in iis comparebat, fisco addictum. Mihi certe aureos illos periisse invitus deprehendi. Sed ab hisce ingratiss ad alia transeamus. Poëmata mea, cum difficillimis hisce conflictata aliquamdiu temporibus, lucem vix tandem vident, quorum exemplar aut accepisse ab *Elzevirio* jam debuisti, aut mox es accepturus. Vile hoc munusculum ut pro cetera tua comitate in partem haud malam interpreteris, enixe te rogo. Maroniani & Prudentiani codices, quos ex bibliotheca tua depromptos benigniter omnino communicasti, jam ad te rediissent, (sum enim iis jam magna ex parte usus) si obsessis per militem viis liceret. In Prudentio praeter libros adversus Symmachum conscriptos vix alia mihi enotanda restant: ut paucorum dierum otium, quod propediem captabo, *Principis Paderbornani* desideriiis utcumque possit respondere, cui tanto viro gratificari unice cupio. Virgilianae lucubrationes tanto plus curae ac temporis requirunt, quanto scriptor divinus poëtas omnes carminis felicitate post se relinquit intervallo. Ut in publicum observata ista non tam cito sint proditura. Res tuae quo sint loco, quid mediteris ipse: quid Princeps ille, purpuratorum ac Germaniae universae decus, de quo dudum est quod nil audio, si me docueris, habebis insigni beneficio tibi obaeratum. Vale, humanissime & amicissime Rottendorffi. Exarabantur Holmiae Suecorum Anno *cicidclxvi.* a. d. xv. Septembr.

EPISTOLA CCXXXIX.

BERN. ROTTENDORFFIUS

*Nic. Heinsio.**Holmiam.*

Nobilissime, Amplissimeque Domine. Quod anterioribus hebdomadibus domi meae non offenderis me, dolenter tuli, quod testor syncera mente; obtulissem domum meam, rhedam & equos, immo quidquid est fortunarum, nec passus fuisset ut declinasses in hospitium publicum. Sed alias erit alia occasio concurrendi, & sese mutuum salutandi tam amica pectora. Adfui nuperis diebus *Principi Paderbornensi*, cujus jussu Numum aureum, illius Principis effigiem continentem, & alium ejusdem ponderis & pretii pro clariss. *Vossio* fieri hîc curavi. Sub idem tempus nepos meus ex sorore excurrerat Lovanium, & Amstelodamum transiturus: concredidissem illi ipsa agalmata, si tum ultima manus ipsis fuisset imposita. Quaerenda itaque alia tutior occasio; nollem enim illa tabellariis ordinariis committere, quorum nonnulli fluxae sunt fidei. Si recte memini, petiisti olim a me, in omne id minutatim inquirerem, quod adornasset olim *Mallinckrotius* noster de vita, religione & doctrina magni *Erasmii*; scias ex iis quadaem adservari in museo meo, & ab ultima auctoris manu, & plura expecto. Sed caute hoc in passu mihi gradiendum, nec nimium haec apud talium possessores sollicitanda; aut debuccinanda, alias ex facili possent ire in favillas, ut ita prorsus memoria tanti viri oblitteraretur. Magnus ille vir, cum quo mihi ab annis pluribus intima, immo fraternissima, intercessit necessitudo, paucis mensibus ante mortem, suorum ad praelum paratorum scriptorum mihi submisit catalogum; quem tecum in praesens communico. Extat etiam vita illius apud me, ipsiusmet manu consignata. Dum haec illino papyro vere ingemisco, quod tantus vir in tantas miseras praecipitatus. Non dubito quin legeris *Job. Pierii Valeriani* Dialogum de Infelicitate litteratorum, vere poterat in illo choragium ducere *Mallinckrotius* noster. His vale & salve. Monast. CIOIOCLXVII. 20. Maii. Quid, quaeso, fit nostro *Gronovio*? citius ex pumice elicerem aquam, quam unicum literarum apicem ex illo. Rescribe quid fieri velis numis illis aureis, nollem illos cuivis concredere, non enim contemnendi sunt pretii. Alias tradam illos fido alicui amico excurrenti Amstelodamum, ut Dn. *Elzevirio* in manus tradat: Notifices idem velim Cl. *Vossio*.

EPISTOLA CCXL.

BERN. ROTTENDORFFIUS

*Nic. Heinsio.**Holmiam.*

Libero tandem fidem meam in transmittendo numo illo aureo, *Principis* nostri *Paderbornensis* effigiem continente: extimum illius schema fateor rudiusculum est, ast interior substantia melior. Substiti apud illum integrum mensem & quod excurrit, cum intensissimis conflictantem febribus. Nunc, Deo sint laudes, opera mea iterum in solido locatus; hinc hesternae die illinc domum reversus; sub quod tempus tabellarius ordinarius Amstelodamum cogitabat; cui mox duos illos numos, unum pro te, alterum pro Clariss. *Vossio*, ad Dn. *Elzevirium* deferendos concredidi, a quo utrumque capsula inclusum petes, & aequi bonique consules. Vale, & me ama. Monast. Guesfal. CICIOCLXVII.
18. Julii.

EPISTOLA CCXLI.

FR. BEN. CARPZOVIVS

*Nic. Heinsio.**Hagam.*

Ingens doctrinae tuae longe majoris admiratio, saepe haecenus per literas eam exprimendi mihi commovit desiderium, quod quo minus exequerer, me cohibuit pudor, qui conatibus meis semper adversatus fuit haecenus, ne ignotus te, virum illustrem & maximi nominis fama celeberrimum, intempestivis literis & alloquio forte ingrato interpellarem. Sed confirmavit animum, summa humanitatis tuae laude jam erectum, quae se modo offerebat occasio, quam sicuti negligere nequaquam oportuit, ita hujus fiducia benevolentiam tuam magnifice mihi promitto. Noveris, vir summe, pluribus abhinc annis, in monumentis, quae *Grutero* vel neglecta vel visa nondum fuerunt, colligendis illustrandisque occupatam fuisse *Reinesii* nostri τοῦ ἐν ἀγίοις industriam, feliciori sane, si quid judico, quam ullius alius ante ipsum successu. Qui sicut in inquirendis undique explicandisque (iis non magis, quas noviter invenerat ipse, quam quas ante collegerat *Gruterus*) inscriptionibus fuit optimus; ita in edendis iisdem, & ad lucem publicam promovendis minus fuit secundus: & expertus est adversum magis, quam prosperum optimi viri labor fatum; de quo dixi quaedam in excusa, quam sollicitatus a bibliopola nostro, cui persuasi ut edendo egregio operi sumtus impenderet, scripsi, epistola; Hanc una cum specimine, quod ad aulam mittendum fuerat, ut Illustrissimi Senatores de typo & aliis ad isthoc opus necessariis cognoscerent, ad te quoque, vir amplissime, qui in quibusdam partibus beatum Autorem juvisti, tuumque exactissimum judicium fero, ut de hoc consilio nostro sententiam dicere, & de suc-

Tom. V.

Mm

cessu

cessu ejusdem ominari possis. Facies id autem libere: nam de candore quidem tuo non dubito, cujus fidem & integritatem exploratam habet, quam in aliquot orbis partibus abunde perspexit, Patria tua, cujus publica & ardua negotia summa cum laude nec minore fide gessisti. De mea quidem maximi tui nominis observantia, in eoque colendo indefesso studio, securus esse poteris; & quam velim, ut egregio aliquo documento istud tibi confirmare possim. Ergo nisi indignum me obsequii erga te gloria, qua maxime inclarescere cupio, existimaveris, audacter quidvis oneris, quam laudis meae maximam partem interpretabor, mihi injunges: & si quid in his terris nostris curandum habueris, me uteris, qui tui causa maximas etiam molestias suspicere cupio. Literariae frugis etsi non adeo fertiles, prorsus tamen nec steriles nostrae jam sunt terrae; & prodiit modo hic Excell. *Thomasii* de Exustione mundi liber, quem quod existimarem serius ad vos perventurum, sarcinulam his literis appendere volui. *Job. Ludolfus* amplissimus vir, & in aula Saxo-Alterburgenfi, cujus Cameram curat, magnae dignationis, Historiam Aethiopicam (lexicon ejus linguae jam olim in Anglia edidit) adornat, cujus en specimen. Dn. *Wagenseilius* his modo diebus dissertationem epistolicam de *Legislatore pedum* Gen. 49. qua modestissime & eruditissime ab eodem viro doctissimo (nam emiserat hic superiori anno dissertationem de duce Judaeorum sublato, in qua ducem exercitus pedestris a Jacobo per legislatorem de pedibus designari probaverat) disserit, editam ad me misit. *Loccenii* Historia & Antiquitates Suecicae, majori apparatu quam extiterunt hactenus, nunc apud nos eduntur, & cis unum vel alterum mensem absolventur. Ad *Bigotium* virum doctissimum, cum quo crebrum literarum a te coli commercium accepi, qua ratione literae perferantur, scire velim: per mercatores enim nostros, qui saepius in Galliam proficiscuntur, frustra inquirimus eruditorum sedes, & literas ad hos perferendi ii modum ignorant, nisi locus, vicus & aedes, ubi habitent, indicetur, aut nominetur mercatorum aliquis celebrior, ad quem literae mittantur *Aeg. Menagius*, Gallorum clarissimus, an adhuc in vivis agat, unde cognoscam? Rogavit me bibliopolarum nostratum aliquis, ut Amoenitates Juris Civilis recudendas ipsi suppeditarem, nempe ut eadem forma, qua Canonici Juris delicias *Strauchius*, quas collegerat & is ediderat, imprimi has quoque curaret: quod tamen fieri nollem, si adhuc viveret nobilissimus & eruditissimus vir, aegre forsan laturus ab externis scripta sua involari. Varias lectiones *Reinesii* auctiores & emendatiores propediem dabo; praelo eas jam superiore mense commisi. De tuo quid Valerio Flacco fiat, de quo jampridem praeclara nobis promissimus, qualia in Claudiano, Prudentio & cumprimis Ovidio, miramur; avide expectamus. Vale. Dabam Lipsiae Nonis Januarii Anno *MDCCCLXXVI*. quem ut subinde alii excipiant tibi felicissimi, studiorum ratio Deum venerari jubet.

EPISTOLA CCXLII.

NIC. HEINSIUS

*Fr. Ben. Carpzovio.**Lipsiam.*

Nihil profecto auspicius optatiusque per vitam omnem adfulsit mihi, Clar. *Carpzovi*, tua illa compellatione nupera, quae cum per se jucunda in primis ac perhonorifica praeter spem supervenit tempore prorsus funesto, ac fragoribus armorum miserrimum in modum nos obtundente, sic nuntios tulit longe gratissimos super re litteraria, cui unice jam a teneris unguiculis volo, totque ac talibus donis adfatim cumulatam sese insinuavit mihi, quibus ego ne Persarum quidem gazas potiores duxerim. Ita & luculentam adfectus tui aequae ac munificentiae tesseram in una eademque epistola sum amplexus, & complura didicisse me cognovi, quae maeroris nubem, animo meo pridem adfusam, per summas hasce temporum difficultates plane detergant atque amoliantur. Nam ut pereruditum & laude debita haud quaquam fraudandum Cl. *Thomae* commentarium de Stoica mundi exustione nunc non tangam, quem nondum perlegisse totum mihi contigit, quod judicarem sciagraphiam Historiae Aethiopiae Ludolphianam multa continere, quae morari oculos Magni Etruriae ducis merentur, Principis, ut artium bonarum cognitione pulcherrime instructi, sic rerum exoticarum prae caeteris mire curiosi, ipsum libellum per tabellarios, ut primum licuit, Florentinam in aulam mittendum curavi, acceptum haud dubie illic, ut qui maxime, futurum. De specimine vero inscriptionum antiquarum quid narrem? Cum conclamata omnino illius operis editionem rerer, sic enim ferebant rumores, incredibile dictum est, quanta voluptate ad conspectum ejus sum perfusus. Auguror profecto fore, ut Serenissimus Saxoniae Elector apud feros posteros mercedem tanto beneficio parem sit consecuturus, meritissimam nominis immortalitatem, quando saeculi hujus non est referre gratiam pulcherrimo facinori satis convenientem. Quae a me olim collata sunt ad lucubrationem illam exornandam, exilia illa plane & perpauca, tanti mehercules non erant, quorum tam invidioso mei nominis cum praeconio in ipsa praefatione meminisses. Eram potiora longe ac ulteriora communicaturus, quae in Italia collegi olim, praesertim e schedis *Pyrrhi Ligorii* a *Luca Holstenio* suppeditata, nisi morte praeventus magnus *Reinesius* nos id agentes destituisset. Fieri etiam potuit, ut aliunde ea sit nactus senex optimus. Sed asservantur praeterea penes me nonnulla post obitum ejus effusa, quae conquiram in scriniis meis, ubi primum bibliothecam omnem licebit excutere, ut tibi cedant utenda, si quam fortassis marmorum vetustorum appendicem lucubrationibus *Reinesianis* attexes. Audio Marmorum *Arundelianorum* a *Seldeno* illustratorum editionem locupletiore, sed nondum mihi inspectam, apud Britannos prodiisse. Exspecto etiam ex Italia propediem ejus

argumenti nonnulla suppeditaturos codices, illic terrarum recens juris publici factos. Sed hac de re plura, ubi instituti tui rationem propius cognovero. Multum equidem demereberis orbem eruditum hoc labore tam pio tamque utili. Nec parum debebunt tibi posteris pro variis ejusdem *Reinesii* lectionibus, quarum te moliri editionem multum adauctam ex tuis intelligo, praesertim si partem illius operis secundam, haecenus desideratam & prodeperditam habitam, luce publica donabis. Valerio Flacco, quando scire postulas id, manum admovebo, ubi a rei familiaris componendae molestiis, quae me totum nunc exercitum habent, nonnihil emergam, quod ante decursum fore proximae aestatis confido, sed inter haec bella quis seriae meditationi locus? aut quid concinnum chartis illinatur? interpellat praeterea valetudo, nec lucubrandi contentionem admittit. Cum Gallis rarum propter haec bella mihi nunc intercedit litterarum commercium, sublato praesertim e vivis viro illustri *Joanne Capelano*, a quo frequentes admodum accipiebam epistolas, antequam colliderentur Belgae cum Gallis. *Aegidius Menagius* etiam vivit & valet, daboque operam, ut proxime ex me cognoscat, & quid ille comprobet editionem illam *Amoenitatum juris*, quam apparatus. Scribo enim non numquam ad *Emericum Bigotium*, illi in paucis amicum, qui Rotomagi nunc fixit sedem, ac vicinus habitat in illa civitate Patribus Orastorii, quos vocant. Si quid voles ad illum litterarum, mihi permittas licet. Quod reliquum est, vir Clarissime, ita de me statuas volo, neque fore ut commitam mea supinitate interverti mihi benevolentiam singularem, eo luculentior, quod sponte oblatam; operamque a me dandam fore pro virili, tum munificentiam tuam, non quidem pari liberalitate, sed tamen animo non prorsus ingrato foveam ac remunerem. Vale, meque in tuis, quod cupio vehementer, numerare perge. xx. Februar. Gregor. cicioclxv. Hagae Comit.

EPISTOLA CCXLIII.

F. R. BEN. CARPZOVIIUS.

*Nic. Heinsio.**Hagam.*

Molestias difficillimi itineris, ex quo heri demum redii domum, postquam per quatuor septimanas Dresdae mihi commorandum fuit, humanissimae tuae litterae bona fide absterferunt, in quibus cum benevolentia certare animadverti elegantiam, neque adhuc decernere licet, penes utram harum victoria sit. Nam sicuti confusa res gaudium est, & varia atque indiscreta animo objicit, ita difficile mihi fuit definire, majorine cum admiratione cultum atque inusitatum istum dicendi ornatum (quem haereditario jure ab incomparabili Parente nactus, cum accedere ei nihil posse videbatur, novis tamen incrementis auxisse videris) prosequi; vel amore & observantia insignem, quam e literis prolixissimis humanissimisque intellexi, humanitatem colere deceat.

In

In qua dubitatione haerenti, & undique circumspicienti, qua ratione tam insignem benevolentiam remunerari possim, dum omnis nunc quidem praecisa occasio est, malorum nominum exemplum succurrebat, quibus dum praesens pecunia non suppetit, qua se debito liberent, solutionem differunt. Pari modo & literarum tuarum exhibitum honorem, quem maximi beneficii loco habeo, & sancte testor nihil per integram vitam mihi contigisse gloriosius, quia alia ratione nequeo, nuda & simplici confessione, adjecta simul promissione, nequaquam in ingratum aut immemorem istum collatum fuisse, colere volui. Et his quidem literis intervenientibus cuncta mea officia in quavis etiam re, quam vel mihi committere voles, vel ego exequi potero, tibi devincta habebis, meque ipsum perpetuo pietatis atque observantiae nexu obstrictum. Ad *Ludolfum* de cura tua circa sciagraphiam Historiae Aethiopicae, in Hertruriam ut promoveatur, scribam proxime; ipsius interea nomine amplissimas tibi ago gratias. Reinesiani operis successus vereor ut impediatur per belli calamitates, quod nostris regionibus proximat: copiis Brandenburgicis & Caesareanis non hostilibus quidem, sub specie tamen amicitiae omnia vastantibus, & ipso bello magis exitialem pacem colentibus, in agris provinciae nostrae aestiva non minus, quam hiberna haecenus, agitantibus. Mira sane est bellorum hodie facies, queis copiae, ultra quadraginta milliaria saepe dispersae sunt ejusdem ducis, saltem ut vicinis male sit, & eidem bellorum ruinae involvantur omnes. Nostrum sane Serenissimum Electorem, a bello alienissimum, blandissimis haecenus verbis ad istud invitarunt Caesareani, de Suecorum clade summopere gaudentes; & cum parum hac ratione consilia sua proficere intelligant, nunc provinciam depopulationibus vexant, ut bello eam implicent. Id metuentes bibliopolae, qui probe intelligunt inter armorum strepitus non exaudiri teneras Musarum voces, mercem librariam inembram relinqui, ad majoris operis editionem, cujus lucrum non praesens est, trepidant, neque temere eam aggrediuntur: potius Concionatoribus vel Advocatis, quorum seges uberior est quam eruditorum, idoneos libros, ut schedas Volusianas, quae praesente pecunia emuntur plebi, excudunt. De *Brummero* ita est, ut scribis, in torrente Arberino eum interiisse: quod hoc ipso die cum accuratius inquirerem, confirmaverunt ipsius fratres, mercatores; & neglexeram cum schedam conscriberem, id scrutari, contentus eo, quod audiveram antea, Lugduno Genevam abiturientem aquis suffocatum esse, quas putabam fuisse lacus Lemanni sive stagni Genevensis. Neque multum adeo hic error nocebit, siquidem scheda isthaec, quam rogatus a bibliopola scripsi, saltem ut aulae gratia instituto huic magis conciliaretur, nunquam futura est ipsius operis accessio, in paucissima etiam dispersa exemplaria (neque plura quam viginti excusa sunt) adeo ut paucis, ad quorum conspectum ea perveniet, possit imponere. Alium eumque graviorem in ea commisi errorem, dum *Pyrrhi Ligorii*, qui seculo abhinc vixit, benevolentiam praedicavi in juvando isthoc instituto, cujus tamen laus omnis tibi debebatur, qui e schedis *Ligorii* ista suppeditasti τῷ μακαρῆτι. nempe de *Ligorii* aetate mihi non recte constabat antea, & passim tamen eum

laudari animadvertēbam in syntagmate. *Daunium*, cum quo alias nullum mihi intercedit literarum commercium, proxime de fasciculo, num transmiserit, interrogari curabo. *Loccen*i Historia Suecica, quam curae meae commisit Autor, Senex optimus, auctior multum prodiit apud nos, quam extabat antea: neque enim gloriae gentis, a qua damna & beneficia non exigua accepit provincia nostra, invidemus, ego quidem optime cupio. Indices ad eam contēxui, & ut emendatior ederetur, curavi. Jam in Antiquitatibus Suegothicis excudendis occupantur operae. *Marsham*i Canonem Chronicum ex consilio meo, cum pauca ad nos perferri exemplaria cernerem, eaque pretio majore divendi, recudi curavit aliquis nostratium biblipolarum: multa & innumerabilia menda, quibus prior scatebat editio, e nostra sublata esse, ipsi etiam agnoscent Angli. Francofurti vastum Antigrotianum *Calovii* opus biblicum, cujus haecenus prior sectio, quae vetus Testamentum illustrabat, saltem extitit, nunc integrum absolutum esse, ab Autore ad me venientes literae nunciarunt; addidit, doni loco sibi mille Imperiales a Serenissimo Electore esse oblatos, laboris pretium, quem tamen jam antea, cum seorsim quaeque exiret ejus particula, sive bibliopolae sive Respondentes (nam sub Disputationum schemate frustra ejus prodibant) pensaverant. Cum *Calixto* Hehnstadiensi ingentes eum iterum suscitare lites, ad me perscriptum est, de quibus, quamprimum infestis signis concurrerint, te faciam certiorē: ipse enim adhuc earum rationem ignoro. *Thomasius* hac hebdomade Regulas Philosophicas justo emisit libello in publicum, quibus tamen parum quod te capi existimem, non immorabor. *Rappolti* in Horatium Commentarium superiore jam anno apud nos editum, te vidisse arbitror: quae-so quid de eo sentias, indices; parum sane tibi placere posse, ex causa non una suspicor. Frater meus adversus *Masenum* Jesuitam libellum futuris nostris vernalibus nundinis emitter, jussus ut eum scriberet a quibusdam Proceribus in aula. Mihi vero cum isthoc hominum genere manus conferere semper displicuit; raro enim integra dignitate paratur, saepe convitiis infamis redditur victoria. Alter Fratrum *Ligtfortii* Hebraice Talmudicas in Evangelistas notas nuper recudi curavit, pro quo studio invidiam & obtrectationes reliquorum Theologorum aegre ferentium Calvinianorum, quos vocant, in nostris nidis denuo excludi pullos. Adeo nempe hīc vigent partium studia, quibus nunquam me immisceo, malo otiosus eorum esse spectator. Vale, vir amplissime, neque me quemquam tui studiosiorem existima; quod si noster hic scribendi impetus tibi non displicet, crebras hujusmodi literas a me postula, quibus quantum abest elegantiae, tantum observantiae & cultus inesse existimabis. Dabam Lipsiae d. iv. Kal. Mart. Anno CIOIOGLXXVI.

EPISTOLA CCXLIV.

NIC. HEINSIUS

*Fr. Ben. Carpzovio.**Lipsiam.*

Irascor mihi met ipsi non leviter me hercules, quod sub ipsum necessitudinis nostrae exordium, quando aequum omnino erat operam cum maxime a me dari, ne quid peccarem in peculiarem illam, vir Clarissime, benevolentiam, qua me immerentem artificissimis es complexus modis, partibus meis defuisse argumento tam manifesto deprehendor. Quod si jam paria tecum facere non poteram in hoc mutui adfectus certamine, tuis certe vestigiis tuoque exemplo erat insistendum; ut vel passu non aequo subsequerer saltē, quem non dabatur aemulari. Ceterum cum culpa omnis dilati tanto tempore responsi jure optimo conjicienda sit in unam valetudinem; quod malum mihi jam pridem adeo familiare factum est, ut raro intermittat, tuae nunc erit benignitatis arbitrari, ignoscendumne sit consentienti reo, an implacabiliter succensendum, deque ultione cogitandum habeas, quam ipse praesumsi quodammodo, indignitate facti gravissimum in modum commotus. Hoc unum pro causa tamen mala interim dixisse liceat, immane quantum aberrasse a vero, si suspicaris, quicquam alloquiis tuis, tam exultis omni litteratura, tamque amabilibus offerri posse jucundius mihi acceptiusque. Praesertim cum inde cognoscam, atque ediscam complura semper harum lucubrationum, quibus inter vos, communi hac bellorum, Europam paene universam concutientium, calamitate vacuos, multumque hoc nomine felices censendos, viri eruditionis laude spectati, humaniora studia illustratum eunt, ac pro virili exornant. Videbaris ultimis tuis frigidam quodam modo affudisse ardentissimae expectationi meae, de Reinesianis inscriptionibus in lucem tua opera mox proferendis, sed bene habet, quod nundinarum Francofurtensium Catalogus desperare nos vetat. Cum ego amicos Gallos Italosque tam laeto nuntio haud quaquam fraudandos esse sim ratus, qui opus illud, publicae utilitati egregie consulturum, non minus avide quam ego ulnis ambabus, ubi prodibit in lucem, amplexuros esse uno consensu profitentur. Audeoque ominari serenissimum Electorem haud subtrahiturum impensas, quas promovendae editioni operis tam eximii abs se suffectum iri spondit pridem, laudabili in primis exemplo. Specimen Ludolfianum Historiae Aetiopicae, quod in Etruriam per tabellarios miseram, juxta meam commentarii ipsius expectationem ea in aula, cum apud Ducem ipsum, tum alios apud proceres excitavit, ut non possit vir doctissimus sine certa nominis sui gloriaeque contumelia procrastinare libri editionem. Utinam & apud nos homines litterati, qui e multis perpauci nunc supersunt, vestra cognitione dignum nonnihil moliantur. Quod tamen ne sperari quidem par est, nisi profligato bello pax adfulgeat quam primum. Meursianas trium insularum anti-

qui-

quitates, a me inventas Holmiae in Bibliotheca regia, ac typis apud nos descriptas, ut meo nomine ad te perferendas curaret Elzevirium rogavi. Prodiunt etiam hac aestate Ciceronis epistolae, animadversionibus *Joh. Georgii Graevii* illustratae, fortassis & operum Grotianorum pars Theologica, in tres tomos ingentes divisa. *Pyrrhus Ligorius* Italus in lucem nihil emisit, praeter exiguum libellum vernaculo sermone conscriptum, editumque ante annos plus minus cxx. quo antiquitates illustrantur Romanae. Parabat immensum opus de iisdem antiquitatibus in volumina circiter xxx. distinctum, cujus tomos duos aut tres eminentissimus Princeps *Franciscus Barbarinus* curavit describendos, ac suae Bibliothecae vindicavit. E quibus inscriptiones antiquas manu sua *Lucas Holstenius* excerptis mecum communicatas ante annos hosce xxviii. Quinquennio post missus denuo in Italiam a Suecorum Regina, quod ea cognovisset opus omne *Ligorii* in Taurinensi Ducis Bibliotheca adservari, ejus describendi copiam a matre Ducis in usus regios flagitavi, responsumque tuli se donaturam ipso autographo Reginam; ad quam liber ipse postea, ni fallor, est perlatus, in quo longe plurimas exstare inscriptiones hactenus publico non exhibitas ut credam, facit specimen Holstenianum e paucis vasti operis corrasum voluminibus. Londino litteras accepi modo, quibus narratur, prodiisse illic marmora Arondeliana curis secundis *Seldeni* partim, partim aliorum animadversionibus illustrata. Theologorum istae contentiones tam acerbae utinam interquiescant tandem, cum plus conferre videantur ad Christiani nominis dispendium, quam incrementum. Apud nos quoque nescio quis nuper exortus est Coccejanismus, qui Theologos nostros, ni mature provideatur huic malo a proceribus foederatae Belgiae, atrocem in modum collidet. *Rappolti* in Horatium commentarios, quos memoras, haud vidi. Nec eorum exemplaria hactenus, quod sciam, ad nos sunt advecta. *Emericus Bigotius* ad me scribit, consultum a se per litteras *Aegidium Menagium*, de nova Amoenitatum juris editione, quam bibliopolae vestrates meditantur, respondisse amicum suum, auctores se vobis esse, ut editionem in breve tempus differatis. Ita fore, ut exemplar ab ipso auctore variis in locis auctum atque emendatum consequamini. Supremam epistolae verbosiori plus aequo manum impositurus unum, quod a te petam, hoc est, ut familiariter inter nos in posterum agamus, ut amicos decet minime fucatos, procul habitis verborum phaleris, omnique orationis lenocinio, cum invidiosa laude conjuncto. Nam & ego instrumentum supellectilis meae tam curtae abunde habeo perspectum, & uno candore, quem amicis praestare semper sum paratus, censerem malo, quam iis laudibus, quas in me nec agnosco, nec aliis liquere sum certus, qui me minus amant, quam abs te diligor. Vale, & mihi velle perge. Hagae Comitum a. d. iv. Idus Majas cidioclxvi.

EPISTOLA CCXLV.

FR. BEN. CARPZOVIIUS

*Nic. Heinsio.**Hagae.*

EA infelicitate laboro, ut locorum intervallo, quo disjungimur, temporis quoque, quo literae tuae ad me pertingunt, respondeat diuturnitas, seroque ad me perveniat gratissimus earum usus. Et nescio unde factum sit, ut *iv. Eid.* Majas datae his demum diebus ad me perlatae sint, pro qua omnem aliam facilius ferrem moram. Tantam sane, postquam redditae sunt, attulerunt voluptatem, ut nulla major afferri potuerit; tum quia tuae sunt, cujus omnia admiror & diligo, (ne quid amplius dicam, quod prohibes) tum etiam quia ex illis etiam cognovi multa rem literariam attinentia, quae jucundiora cognitu mihi sunt, quam existimare facile possis. Cum primis de *Grotii* incomparabilis & vere divini viri operibus junctim edendis gratum fuit cognoscere. Etsi enim omnes ab ipso editos libros possideam, quippe quos tanti aestimo & in tantum laudandos existimo, in quantum eruditio & doctrina intelligi possunt; de Belli etiam & Pacis jure *ῥαυμασις* libros per quotidianum usum adeo familiares mihi reddiderim, ut memoria complexus fuerim complura eorum capita; quippe in istis ex suis penetratibus erui civilem sapientiam, ex opulentissimis thesauris depromi prudentiam, nec nudam eam aut inornatam, sed magnifico apparatu instructam animadverti: tamen cum non ignorem, quam multa adhuc *Maximi* viri scripta *ἀνέκδοτα* lateant; cum primis epistolae, (has vero in maximis deliciis habeo omnium autorum, siquidem in iis varia & multa eaque miscellanea est eruditio) quarum apud *Dn. Blavium Sen.* cum tribus abhinc annis *Amsteoldami* essem, amplissimum vidisse memini fasciculum, ipsius Summi viri *νῦν ἐν ἀγλαῖς* manu scriptum; magna spes est hac ratione & occasione istas reliquis operibus accessuras esse, & rem literariam egregia hac accessione veluti laetissimo incremento auctum iri. Quo loco non possum non indignari quodammodo iis, quorum in manu & copiis hujusmodi opes delitescent, quas tamen publico invidentes premunt, & ad instar pervigilis arboris aureae custodis apud *Nasonem* tuum, ne ad ullius conspectum tanta perveniant bona, cavent. Quo in numero ne te quoque habeam, cujus beneficio praeter Poëmata & Orationes vix quicquam ex amplissimis paternis bonis ad nos pervenit; propriorum foetuum praestantissimorum prohibet exclusio, qua illorum desiderium quodammodo cohibuisti vel explevisti. Sed ne schedae Paternae pereant, & cum primis epistolae, quarum maximum orbi erudito excitarunt desiderium nonnullae hinc inde sparsae, quas indice collegi omnes, in his talibus conquirendis assiduus, prohibebis. Credas sane me ultra eruditionis & doctrinae ipsius terminos in pretio habere, & velut sanctius quiddam atque divinius in *Divo* tuo *Parente*, *Grotio* & *Salmasio*, quos identidem *Reip.* Litterariae triumviros soleo appellare, venerari: quorum postremus etsi saepe

in famam & illustre nomen summi Parentis tui injurius fuerit, exorto inani de Lingua Hellenistica certamine, placet tamen etiam furor & febriculosa mens quasi accessus. Dum epistolarum mentionem feci, incidunt *Cunaei* viri eruditissimi elegantissimique literae ad amicos, quas uno volumine congestas & descriptas vidisse memini inter *κεμήλια* Gronoviana. Maximi facio hujus viri opuscula alia, neque enim multa magnaue in publicum emisit, & quae emisit, possideo & amo amnia, superiori etiam anno, ut apud nos Orationes recuderentur, Autor extiti; & quovis pretio comparare vellem epistolarum usum, proinde eas edi, sicut superioribus annis Barlaeanae nitidissime editae sunt cura Generi, maximopere cuperem. *Meursii* trium Insularum descriptionem, cujus in literis tuis spem mihi fecisti, nondum accepi, eamque apud mercatorem Amstelodamensem, qui literas tamdiu penes se habuit, haerere existimo: in antecessum vero gratias ago maximas, & qua ingens hoc beneficium demereri possim, omni ratione studebo. Unus fane tu collabentium in Belgio studiorum adhuc agere videris causam, & maximi Parentis exemplo eorum sustinere gloriam, nisi quod major quodammodo prae isto tibi debetur laus, qui solus & sine pari agis, quod is cum *Grotio*, *Vossio*, *Barlaeo* & aliis maximis seculi viris perfecit. Ab injuriis quoque temporum & iniquitate factorum ut vindicentur istae, quas dixi, Antecessorum tuorum reliquiae, omni ratione providebis, neque patieris intercidere antea ista seculi ferrei fragmenta, quod nunc nescio quid ferro gravius minari videtur, & belli calamitate & fato quasi omnibus bonis artibus in exilium actis. Ex Italia superioribus diebus missas accepimus *Ferrarii* Origines Linguae Italicae, eruditae sane & elegantes, quarum autorem solum quoque in Italia, eruditorum olim sede, fugientium Musarum cursum sistere intelligo. Quae de *Pyrrho Ligorio* narras in tuis literis, nunquam antea audiveram, neque de ipso *Pyrrho* quicquam resciveram; saltem ex libello, quem *Schefferus* de re vehiculari edidit, mihi erat cognitus. *Menagii* & *Bigotii* humanitatem cum summa eruditione conjunctam exosculor, & consilium edendarum J. C. Amoenitatum bibliopolae ut in aliud tempus differat, auctor ero: jamdum etiam quorundam amicorum desiderio accersitis a Nob. Dn. *Elzevirio* nonnullis libelli elegantissimi exemplaribus satisfeci. Religionis nova dissidia apud vos iterum oriri, & factiosa *Cocceji* aliorumque citari nomina, doleo: relatum autem jam antea mihi fuerat, senem optimum *Heidanum* officio ob partium nimis acre studium esse exutum. Quod factum miror, senium & merita viri reputans; sed quid non facit religionis inepta persuasio, quae Fratres, saepe etiam Parentes cum liberis committit, & intempestiva semper movet certamina? qui affectus errori atque falsae opinioni innixus, non pietas dicendus aut religio est, sed superstitio. Hic *Gomari* apud vos olim & *Arminii*, apud nos hodie *Calixti* & *Calovii* collisit animos, & in ipsis partibus diversa excitavit studia. Et tamen de iis capitibus nonnunquam acerbe contenderunt, quae ad pietatem nihil omnino conferunt, quaeque utut se habeant, genuinum amorem adversus Deum, ac debitum erga homines officium nec promovent nec impediunt. De iisque interdum dimicatur, de quibus

bus revera nullus inter partes est dissensus, ubi neuter errat, nisi eo solum, quod alterum errare credit, sibi que adversarium fingit. Scilicet insidet eorum animis occulta quaedam & subtilis arrogantia, qua fit, ut semel susceptum bellum non facile deferant, malintque animosius disceptando victores ac superiores videri, quam modesta conciliatione & pacificatione in imbecillitatis, propriarum virium diffidentiae, vel erroris etiam ac incogitantiae suspensionem incidere. Accedit praerapidus ingenii fervor, quo fit, ut de iis, quae paulum obscurius aut incommodius dicta sunt, praeceps iudicium feratur, ne adversariorum sententia, qua par est, patientia audiatur; ubi vero de Antagonista vel semel iniquius sentire coeptum, tum quicquid ille dicit, in pejorem partem rapitur, & aliud ex alio bellum seritur, quaeque optime atque innocentissime dicta sunt, in novam altercandi materiam convertuntur. A qua ratione animus meus longe abhorret, quantum a bellis, quibus hodie totus orbis flagrat, tantum a controversiis huiusmodi alienus. Verum enim experior, nihil Musis cum Marte esse commune, & humaniores literas ineruditas istas pugnas & contentiones averfati, quas barbara illa ingeniorum corruptrix, iudicii vastatrix, eloquentiae inimica, prodigiosarum tum cogitationum tum locutionum mater Sophistica movet, qua nihil nisi vitilitigare & inanibus mente ac sensu cassis vocibus tum nobis tum aliis imponere docemur. Ergo sicut praelia non aliter, quam in chartis hebdomadalibus spectro, quas nobis nuncii advenientes impertiunt, ita nec istis me immisceo turbis, quae in ecclesia aut scholis moventur indies, quas satis habeo e chartis, quarum amplissima seges nascitur, cognoscere. Castra & partes nec amo nec sequor, nisi nunc illa forte, in quibus imbellis cum matre puer semotis arbitris belli damna resarcit, quae inire animus est. Nam ut de privatis etiam rebus meis aliquid ad te perscribam; cum lectissima Virgine *Anna Elisabetha Jegers*, celeberrimi apud nos Mercatoris filia, & vitae & fortunarum contubernium facere constitui; & nuptiis quidem earumque solennibus dies ix. Kal. Novembr. dicta est. Ambo floremus aetatibus; & ut studiis Musisque commodius servire possim, nec molestis officiis (quae nancisci facile possem) ab iis abstrahar, lautius tamen vivam, simul ut ipsius fortunae me magis similem reddam, ad mercaturae studium animum applicui: ita Musis & Mercurio simul vacare, & dies posthac inter eruditas & Mercuriales literas, noctes inter somnum & Cypridem partiri potero. Epithalamium num a te exorari possit, vir amplissime, maximam mihi gloriam allaturum, quamvis dubito; tamen ne desperem, animum addit insignis tua benevolentia & humanitas, quam in literis tam abunde promissisti: quae si ad hoc officium adduci aut ulla ratione conciliari possit, credas me non neglecturum eam esse, & quidvis oneris subiturum, modo sciam quo demereri te possim. Proxima occasione cum pulvisculo conradam schedas, quarum lectione te capi posse existimem; & quam vellem, ipse ut occasionem talia subministrandi suppeditares, & quae grata forent, indicares. Literas, si quas ad me dare volueris, ad *Elzevirium* mittes; huic enim jam indicavi mercatorem Amstelodamensem, qui mea in Belgio curat, ut ipsi tradat. Vale. Dab. Lips. ipsis Aug. Non. cicioclxvi.

EPISTOLA CCXLVI.

NIC. HEINSIUS

Fr. Ben. Carpzovio.

Lipſiam.

Nescio quo fato meo fiat, *Carpzovi* praestantissime, ut litteras ad te daturus, quod facio equidem quam libenter, tamen procrastinatae scriptionis culpa mihi & frequenter subeunda sit & deprecanda. Sic nuper dum in eum, ut litteris tuis longe suavissimis copiosisque nonnihil reponam, morbus repentinus in ipso vestigio hoc agentem adortus, non permisit hactenus, ut officio defungerer, vel tralatitium in morem, quod permolest me habet, praesertim cum occasionem tuis desideriis gratificandi peropportunam, quam ipse anxium in modum curaue omni circumspicere debebam, ultra offerres. Significabas enim de nuptiis te cogitare ineundis, meque, pro amicitiae nostrae jure hortabaris, ne quid gravarer versibus epithalamiis haec sollemnia prosequi. Non ignoras tu quidem qua es animi aequitate, quis publicae rei apud nos status sit, quamque bellis hisce calamitosissimis jugulum nostrum ac ipsa vitalia infestentur. Mihi vero prae aliis meorum popularium haec bella praecipue sunt incommoda, quod dudum adversae valetudini obiecto portus circumspiciebatur quietus, & ab agitatione & curis publicis remotus, in quo vitae reliquum Musis studiisque vacaturus tranquille componerem, idque jam ante tempestatum atrocissimae exortum. Qui casus oppido funestus adeo me ab omni proposito vitaeque instituto prorsus dejecit, ut durante hoc bello non corpore magis quam animo dejectus, nihil magis egerim, quam oblectamenta studiorum haberem procul, solatiis ipsis altissimum animi maerorem exulcerantibus. Recordatus tamen quo tu adfectu, qua mentis benignitate me nuper ad amicitiam tuam invitaveris, videbar mihi graviter peccaturus in ipsas humanitatis ac naturae leges, si quicquam tibi cupienti ac postulanti denegarem: quapropter si quid non inconditum videbuntur hi versus spirare, amoris tui vim ac genium in iis osculare, sin aegroti hominis deliramenta agnoscis, & agnosces puto, sic arbitrare, quaeso, nihil esse, quod corpore ac animo dejectum me possit erigere, quem ne tu quidem, quem in oculis assidue fero, & tua commoda excitaverint. Reliquum est, ut deus Opt. Max. inceptis tuis adspiret, novumque vitae genus, sed cum publica conjunctum utilitate amplectenti, adsit. De operibus Grotianis ita est, ut dicebam pridem. Prima in publicum prodibunt scripta viri magni Theologica. Reliquorum partim conficient Epistolae, quibus ingens incrementum debebat accessisse ex iis, quas collegeram olim ad Parentem meum ac Avunculum *Janum Rutgersum* conscriptas. Sed quando post diuturnas lites super scriniis paternis, judices voluerunt, ut eorum non nisi pars altera ipso haereditatis jure ad me devolvatur, video futurum, ut pars horum magna intercitat. Exstabant olim in iisdem scriniis non dico centuriae, sed myriades aliquot epistolarum, non tantum ad Parentem ac Avunculum, quos dixi, sed

sed ad *Josephum* quoque *Scaligerum*, *Geverhardum Elmenhorstium*, aliosque a primariis hujus ac superioris seculi viris scriptarum, quae cum blattis tineisque diu luctatae, non nisi minima sui parte ex hoc forensi naufragio emergunt. Est in hoc oppido vir illustris *Constantinus Hugenus Zulichemius*, qui possidet in armariis bibliothecae plura literarum volumina ad *Justum Lipsium* exarata, quae certe in publicum proferri merebantur. Memini videre in iis multas *Scaligeri*, *Casauboni*, *Cujacii* aliorumque praestantium virorum haecenus ineditas. Similitates Theologicae de die in diem apud nos crudescunt, non sine praesentissimo reipubl. incommodo periculoque. In aliis scientiis, si quid earum professores rixantur ac decertant, de suo id omne ludunt corio, uti Athletae solent pugilesque. At Theologicae vitiligationes, ut caeteris asperiores, ita sanguine Christiano pascuntur ac pinguescunt. De pernicioso isto more plura subtexerem, nisi omnia in tuis jam occupasses, quibus libens subscribo. Tradidi *Elzevirio* tres libellos ad te mittendos, e quibus Antoninum Liberalem tibi vindicato. Plinium *Claudii Minois* & *Vlitii Gratium*, ad *Cl. Daumium*, rogo, cures perferendos, cui dudum promissos scito. de *Reinesii* variis lectionibus inscriptionibusque percunctandum nonnihil restabat, ac plura de communibus studiis addenda, nisi scirem animum tibi totum esse in nuptiis, alio igitur tempore id fiet. Vale. Hagae Comitum 5. Octob. MDCLXXVI.

EPISTOLA CCXLVII.

F. R. BEN. CARPZOVIVS

*Nic. Heinsio.**Hagam.*

Ingens visis tuis literis me gaudium, carmine vero perspecto incessit praedmiratione stupor, neque vel carminis nitorem, vel benevolentiae tuae admirabilem vim amplecti aut intelligere potui: ac inter negotia mercurialia, quibus per nundinas hoc mense nostra exercetur civitas, vere obtigit;

*Tale tuum carmen nobis, divine Poëta,**Quale sopor fessis in gramine, quale per aestum**Dulcis aquae saliente sitim restinguere vivo.*

Sic ut inter gaudii, quo animus meus jam occupatur, argumenta isthoc potissimum versatur, sic inter solennia & sacra nuptialia praecipuum hoc extabit summi Poëtae & maximi hoc seculo viri amoris & benevolentiae testimonium, quo primus ego in hac turbe inter reliquos meos cives me ostento. Utinam vero pro ingenti hoc beneficio quicquam in copiis meis, quod reddere possem, extaret, aut ingenium nostrum aequae ad exhibendum, ac animus, promptum foret; efficerem sane ut intelligeres nullum mihi hoc beneficio majus obtinere potuisse, nec majori me ac vitae meae sic institutum genus affici posse gloria, quam ut multi inviderunt haecenus, ita imposterum hoc velut gravissimo praepjudicio firmatam, dubiam amplius reddere nequaquam poterunt. Non parvo tamen me moerore simul affecit minus firma tua, de qua scribis, va-

letudo, quam & patriae calamitate & aetate ingravescente & tot itineribus collecto morbo affligi facile credo; ac voveo, ut Deus eam confirmet, tibiue tandem a molestissimis & arduis publicis functionibus otium & tranquillitatem concedat, ut Musis ex voto tuo non magis ac universae reip. litterariae vacare, & a muneribus istis, quod de Vestricio Spurinna Plinius ait, receptui carere possis. Praevideo enim, magnis tunc & amplissimis incrementis rem litterariam auctum iri atque opera editum, quae longe praestant schedis & chartis, quibus hodie potius laborat, quam gaudet orbis. Nuper quidem cum occasionem aliquid ad te perferendi mihi praeberet aliquis mercator, illico corrafi, quae ad manus erant confusa atque indiscreta, eaque ad te jam pervenisse existimo: sed reperies in iis non multa, quae animum tuum oblectent: nam ne oculis quidem eruditis tuis digna inter ea multa puto, intelliges tamen inde meae erga te observantiae & voluntatis promittitudinem; quae etiam in minimis rebus se tibi probare, si majoribus non licet, satagit, & simul quantum tua ac tui similium scripta his talibus, aeraque lupinis distent, agnosces. *A. Borremanii* nuper ad me missus Variorum liber, (pro quo & Meursiano modo edito detribus insulis ingentes tibi ago gratias, ac velim hos, quos misi, quasi in vicem missos accipi libellos, majus enim longe istis debetur redhostimentum,) admodum placet & varietate sua me oblectat: multifariam fane eruditionem ostendit & felices successus ingenii; si in simili studio vir eruditus pergat, pollicetur. *Meursii* autem curae collectionis magis & diligentiae laudem, quam ingenii merentur, ut pleraque illius πολυμαθεσάτης viri in Adversariorum seu Collectaneorum modum adornata opera. *Cuperi* etiam Harpocratem & *Bartholinorum Thomae & Caspari* libellos de Armillis, Inauribus & Puerperio Vett. Lugduni apud vos editos accepi; diverso tamen & dispari studio conscriptos: neque hi ad *Lipsii*, *Scaligeri*, *Casauboni*, *Grotii*, *Turnebi*, *Woweri*, & divi Patris tui Philologiam & hujus fastigium unquam accessuri videntur. Nostrae veroque terrae harum frugum minus feraces sunt: *Bosius* enim extinctus est; cujus cum memoriam gratam tibi fore considerem, funebria his diebus, cum sarcinulam ad te componerem, addebam: *Thomasius* autem pueris in schola, cujus Rectorem & Ludi magistrum agit, informandis; *Frankensteinius* in Academiae rationibus computandis, non sine rei litterariae damno occupantur, ut libris scribendis incumbere non possint. Quid de *Rappolti* in Horatium commentario censeas jam antea ex te quaesivisse memini, & iterum sententiam tuam ut exponas rogo, nam ejus exemplaria jamdudum ad vos esse perlata non dubito. *Grotii* operum editionem novam avidissimis votis expeto & expecto: Nam ut hujus, & *Episcopii* & *Curcellaei* in theologicis rebus mirifice se mihi probant sententiae, sive jam Arminianorum, sive Remonstrantium, sive aliis nominibus veniant, ita in Politicis ejus prae omnibus aliis admiror θεῖον scribendi modum, & singulare ac proprium ipsi verborum ὀργανον. Quorum autorem cum primis in epistolis ejus veneror, & ô utinam collectae tandem in publicum emanarent omnes summi & admirandi viri schedae, nec quicquam periret, quod ab ingenio & calamo ejus provenit. Idem quoque de Maximi Parentis tui sparsis & quasi dere-

derelictis scriptis sentio voveoque: neque enim parvo cum dolore animi quam male ab haeredibus ea habita sint; dum tu abes solus paternarum opum dignus vindex, intellexi; quarum unam plagulam praestare aliorum voluminibus mihi semper fuit persuasum. Non omnem tamen abjicio spem, quin tuo adhuc quaedam in lucem sint perventura beneficio *ἀνέδοτα*, aut recusum saltem iri edita, sed quibus caremus, ut Silium Italicum, Theocritum, & quaedam sacra. Haec enim majori cum animi moderatione eum tractasse, quam vulgo hodie fit a nostris aequae ac adversae partis hominibus; ex Homiliis binis inter Orationes editis, & Aristarchi prologo ac aliunde clarum est. Apud nos quidem litium & rixarum nullus nec finis est neque modus; in ipsis etiam partibus novae partes: jamque *Calixti* & *Calovii* eriguntur iterum adversa & infesta signa, quorum in adjectis chartis calumniis refertis extat specimen. Bibliotheca nostrae Academiae haecenus neglecta, cura magistratus nunc iterum adornatur; novusque ei praefectus est Bibliothecarius, cujus, quam sub auspiciis muneris Orationem habuit, mitto cum Catalogo MStorum in ea extantium. *Vorstius* superiore mense maxima cum rei literariae jactura nec minore meo dolore, qui conjunctissimus ipsi vixeram, Berolini diem suum obiit. Heri etiam *Knupferus* profunde doctus Musicus, & qui de Veteri Musica egregium opus adornabat, in quo *Marco Meibomio* neglectos Autores recenseret, & *παρορμήματα* in editis ab eo nonnulla notaret, e vita discessit: cujus morti brevi carmine, quod hic adpono, maximo cum luctu & moerore animi scripto illacrymavi. Scilicet quotidie res literaria damna patitur haud exigua, nisi quod tua incolumitate adhuc ea contineri se gaudet. Hanc igitur ut tibi servet, & collapsam reddat ac erigat omnis boni dator Deus, ex animo voveo. Dabam in nundinis autumnalibus d. xvi. Kal. Novembr. *ciōiōclxxvi.*

EPISTOLA CCXLVIII.

FR. BEN. CARPZOVII

*Nic. Heinsio.**Hugon.*

PRidie ad *Elzevirium* aliquot exemplaria misi carminis tui, meo honori quod consecrasti, & quo nuptiis nostris maximum splendorem ac decus conciliasti. Gratiae, quas pro hoc officio & honore mihi exhibito tibi unquam agam, nequaquam attingent gloriae magnitudinem, quae inde ad me derivata prae aliis civibus omnibus meis peculiaris mihi obtigit, ac tantum non invidiam apud quosdam excitavit: erit tamen ejus memoria apud animum meum aeterna, aequae ac amplissimi tui nominis fama, quam doctissimis tuis carminibus meruisti, divinae vates, apud orbem eruditum. Hugenianum apparatus epistolarem Cl. Virorum sane diu est cum suspicarer ingentem esse, & confirmarunt modo tuae literae: utinam vero claustris tandem effractis, quibus invidiose asservantur, publicae luci exponeret aliquis doctas has celeberrimorum virorum schedas, ut & Maximi viri *Hug*, *Grotii* *Semonis*, & Parentis tui,

tui, cujus laus & fama immortalis in memoria hominum vigeat, epistolarum partem tot votis desideriiisque expetitarum conspiciere liceat. Illustri viro ipsi tantum otii suppetere, ut scrinia sua excutiat, non & haec quasi melioris aevi fragmenta colligat digeratque, facile intelligo; alios tamen ipsi domesticos & familiares οἱς γόνυ χλωρόν non deesse confido, quibus haec provincia ab Ampl. Possessore, te auctore, rectissime imponi possit. Ab *Elzevirio* nuper tres missos accepi libellos: *Minois* Plinium; *Vlitii* venatica & Ant. Liberalis Metamorphoses. Duos ad *Daumium* destinatos esse facile conjiciebam: & priori id inscriptum erat; postremum vero, quia in literis tuis ante hac mentionem ejus feceras, Munckerianae editionis ad me pertinere putavi. Itaque cum retinui, & prioris geminos saltem *Daumio* misi, transmissurus & hunc, ut primum sententiam tuam aliter cognovero. Commode enim & carere possum hoc libello, cum utar editione *Berkeliana*; & eundem possidebo, si cum venia & gratia tua id posse, intellexero. *Loccenii* Historiam & Antiquitates Suecicas mea cura apud nos ex Autoris voluntate recusas, a me etiam indicibus auctas, cum epithalamiorum exemplis ad *Elzevirium* pridie misi, & confido recte ad te perventura esse omnia, unde voluntatis nostrae promittitudinem intelligere possis. Neque enim aliter accipi velim omnia nostra erga te V. A. officia, quae nunquam merita tua aequabunt, si maxime summa cura & studio id laborem. Aeterno itaque nexu tuus manebo, & ut gloria, quae divino tuo carmine mihi obtigit, in memoria civium meorum & aliorum eruditorum perpetua erit, sic certo statuas, me non minus gloriae ac famae tuae aeternum fore studiosum. Vale. Dabam Lipsiae d. 17. Novemb. st. Gregor. CIOIOCLXXVI.

EPISTOLA CCXLIX.

N. I. C. H. E. I. N. S. I. U. S.

Fr. Ben. Carpzovio.

Lipsiam.

Et si perspectam quodammodo videbar in te habere miram ingenii facilitatem, indulgentiamque, superasti tamen hanc expectationem improvisus, fateor; *Carpzovi* praestantissime, qui tam levi opella tibi sic passus satisfieri, versibus inquam epithalamiis, si numerum horum metiris & loquacitatem meam, sat multis, si pretium, paucillis sane, nec dignis, qui aut tabellariis per itinerum longinqua essent oneri, aut te legentem & melioribus assuetum delassarent. Cumulasti hanc benignitatem missis ad me voluminibus non paucis, quae nuper apud vos in publicam prolata lucem haud parum prae se ferunt, quo oculos curiosos & bonarum artium amantes morentur. Qua propter Germaniae vestrae jure optimo gratulari posse videor, quae in decus litterarum juvenes tot egregios, nec mihi notos hactenus nunc fovet & emittat. Ut de aliis nihil dicam, is, qui observationum suarum specimen in Julii Pollucis onomasticon dedit proxime, multum nos jubet de ingenio suo sperare. Sic & mecum *Graevius*,

vius, sic alii sentiunt litteraturae Graecae non imperiti, quibus contigit libellum inspicere. Ipsius Pollucis mire depravati codicem vetustum optimumque, etsi mutilum, Mediolani comparatum possidebam olim, sed hunc *Isaacus Vossius* a me tulit, cujus bibliotheca praestantissimis codicibus scriptis instructa in Britannias pridem hinc emigravit, dominum secuta, & cum illo nobis intercepta atque ibi terrarum moratura. Hanc tuam tam insignem liberalitatem oporteret equidem a me quodammodo pensari, sed is non est rerum nostrarum status, ut inter tantos reipublicae graviter quassatae fluctus, ad ornandas augendasque litteras, Pacis nutriculas, enitamur. Ut cognoscas tamen quid Ecclesiam apud nos Academiamque turbare nuper de novo coeperit, mitto *Frid. Spanhemii* epistolam super controversiis istis recens apud nos editam, quam auctor a praelo Typographico adhuc madentem proximis diebus ad me mittebat. Felicia profecto primaevae ecclesiae tempora, quibus fides adhuc statuta, nec tot phaleris, tot strophis fucata jurgiorum ac dissensionum, se Deo ac hominibus simplicitate quadam illibata commendabat. Nunc eo perventum est, ut, dum quisque ecclesiam in partes suas trahit, vix partes Deo ullas ac ecclesiae relinquat. Ferrem tamen haec utcunque, ac nimio pietatis studio fieri arbitrarer, nisi amotis modestiae ac charitatis repagulis, internecivis odiis res hinc inde gereretur, & conviciis inter textrina vix ferendis, idque tanta ambitus, tanta iracundiae ostentatione, ut legis divinae securos esse prorsus appareat, dum existimationem suam in tuto collocent, nec erroris sua confessione convincantur. Sed ut missa haec faciamus, nuptiarum sollemnibus jam te defunctum, vir eximie, cum Musis in gratiam rediisse audeo augurari: ac proinde sperandum, ut magni *Reinesii* postumis, quae debes publico, pertexendis jam totus denuo occuperis. Mihi certe nihil optabilius acceptiusque obtingat audiendum. Meursiana complura Holmiae in regio armario adservantur, luce nondum donata, quae edenda hinc terrarum curassem, nisi intervenissent tempora musis ac bonis artibus adversa. Grotianorum operum editionem cum haec ipsa tempora, tum *Petrus* filius nonnihil morantur; olim non uni in reipublica muneri amplissimisque legationibus admotus, nunc vero nescio quorum criminum in reatu, & tantum non oppressus a magnis adversariis. Hanc illi conflaverunt invidiam inventae in scriniis Viquefortianis epistolae nonnullae, liberius sententiam ferentes de mutato post Wittiana fata reipb. apud nos statu. *Rappoltii* in Horatium commentarios etsi jam perlatos in Bataviam nostram vix dubito, tamen haecenus nec legi nec vidi, quod ad Leideneses meos, Amstelaedamiosque, quo deferri id genus merces ut plurimum primae solent, rarius excurram, tricis forensibus domesticisque adfixus etiam, & curandae valetudini: locum tamen unum alterumque Petroniani fragmenti ab illo sollicitutos Cl. *Graevius* per litteras pridem communicabat mecum, in quibus versatus videbatur non omnino feliciter. Quamquam e tantillo argumento commentarium omnem si metiri aggrediar, merito videri possim injurius. In orationibus parentis mei Homilias binas non inelegantes exstare recte mones. Nam tertiam, quae de quinque articulis egit in Synodo Dordracena ventilatis, omisit

illic Typographus, credo, ne mercem minus redderet vendibilem inter pontificios. Hanc si non vidisti, quaeram in scriniis meis, & ad te perferendam aliquando curabo cum offeretur: nam in officinis librariorum raro admodum occurrit. V. Cl. *Joannis Vorstii* excessum fero indigne: nam & magno studio ejus scripta conquisivi, & nisi funesta haec intervenissent tempora, jam ut conciliarer illi fuisset adnitus. Nos *Gysbertum Voetium* Theologum celebrem, sed acriorem multis visum, amisimus. *Joannem Priscaum* etiam Romae audio excessisse. Epigramma, quo *Knupfero* parentasti, mirifice mihi placet, omnia illic arguta brevitate se commendant: certe post *Buchnerum* e vivis sublatum nihil elegantius hoc in genere scriptum apud vos memini videre, nec aliter arbitraturum reor *Graevium*, cui tam politi carminis copiam sum facturus. Habes hîc iterum ad *Daumium*. Aliorum supinitas, quorum opera pridem in meis ad illum curandis sum usus, facit, ut plus aequo tibi sim molestus. Vale. Hagae Comitum 25. Novemb. CIOIOCLXXVII.

EPISTOLA CCL.

FR. BEN. CARPZOVIIUS

Nic. Heinso.

Hagam.

QUO acrioribus stimulis nostrum erga te urgetur officium, eo procedit tardius, incertum quasi atque dubium, qua ratione partibus suis recte defungi possit. Hinc dies aliquot, imo menses, dum domo absum, effluxerunt, antequam animum literas ad te dandi sumerem, veritus, ne si illico prolixis tuis elegantissimis, omnique volumine mihi charioribus, literis responderem, promittitudine hac velut arrogans, & qui paria me iis reddere posse confidam, argui possem. Nolui etiam inanes prorsus ad te venire literas, sed ei sarcinulam addere, cujus perferendae per servum nostrum, merces in Belgio coementem, oportuna jam mihi dabatur occasio. *Loccenii* Suecicam Historiam cura mea hîc editam, a me etiam indice auctam, ad te binis abhinc, cum epithalamiis nostris, mensibus missam, recte pervenisse existimo: interea indidem, unde Historia pervenerat, *Pufendorfius*, gentium & naturae excellentissimus in Scania doctor, Suecicae gentis adversus Germanorum, & cum primis Brandenburgicorum, criminationes defensionem suscepit, quam ad nos advectam, etsi hominum nostrorum & Reipublicae rationibus parum consentaneam animadverterem, tamen quia pessimae causae non malum patronum hunc intelligebam, ab ipso etiam praestantissimo autore libellum missum acceperam, recudi curavi, ejusque exemplar mittere volui: gentis enim hujus amore te quoque, qui ad eam Legati amplissimo antea munere praeclare functus es, teneri conjiciebam: & memineram adhuc in aere tuo me esse, quod *Meursii* trium insularum descriptione, & *Borremansii* variarum Lectionum libello me contrahere voluisti, *Spanhemii* etiam historica, de qua in postremis tuis spem nobis fecisti, epistola, sed quae ad manus meas nondum pervenit. Caeterum:

Meur-

Meursii (ut ad nomen nostrum, quod nomen nostrum tibi adeo obstrinxit, redeam) plura *ἀνέκδοτα* Holmiae latere jam' audiveram antea, & certior factus sum e tuis literis: ac gratum quidem & proficuum commodo publico & literariae rei fuerit, ea edi omnia, sed nescio tamen, quomodo minus ad palatum meum vir antiquitatis Graecanicae callentissimus, & in congerendis hujusmodi literis laboriosissimus scripserit, multitudine librorum praestantiam eorum quasi elevans, & plura congerendo, quam digerendo, materiam potius librorum idoneam, quam justum volumen Lectori relinquens: fane Locorum Communium instar habere mihi videntur ipsius scripta pleraque, neque ad *Casauboni*, *Scaligeri*, Divi tui Parentis (quas omnes Graecae eruditionis antistites & Achaiae in literis Reip. Triumviros appellare soleo) monumentorum dignitatem accedere, in quibus lectionis varietati ingenii acrimoniam & idoneum ordinem junctum suspicimus, dictionis autem elegantiam prorsus admiramur. Hic contra exsucca atque indigesta omnia, ac quod ille de Seneca dixit, *Sine calce arenam* deprehendimus. Nimirum paucis ea ingenii contingit felicitas, ut lectionis multitudinem stili elegantia & justo ordine distinguere, ac suo quidvis loco adhibere possint, plures cruda protrudunt studia sua, saltem ut librorum editorum laude vehantur, & fama nominis inter autores referatur. Dolendum contra, eos qui idonei sunt praeclaris operibus edendis, sive metu invidiae, sive fastidio gloriae, ab iis se abstinere: quod de te quoque jampridem questus est literatus orbis, cujus causam in epistola ad te data oravit *Rolandus Maresius*, in quam his diebus forte incidi. *Martinus Hankius*, qui antea de Historicis Graecis & Latinis Commentarios dedit, nuper de scriptoribus Historiae Byzantiae libellum ad me misit edendum, jamque de eo cum bibliopola conveni. *Bisselius* etiam doctissimus Jesuita in Palatinatu superiore, eadem qua illustrium ruinarum decadas ratione composuit, singularem hujus xvii. seculi tria septennia edidit, & excusa ea mihi transmisit. *Job. Schilterus* Consiliarius in aula Jenensi Saxonicus, amicus noster, superiori anno Manuductionem ad Philosophiam moralem edidit: quam, ut doctissimi viri, fortasse antea non cogniti, notitiam acciperes, adjiciendam duxi: nam aliud eruditum, quod mitterem, non suppetebat, neque nugis eruditos tuos oculos defatigare volebam: larga alias harum fuisset seges. Nostram tamen in *Rappolti* obitum elegiam adponere volui: etsi enim noctuas Athenas portare argui possem, dum tibi elegantissimarum elegiarum conditori summoque artifice, rudes nostros atque inconditos versus offero: persuasit tamen amor in me tuus, ne conspectui tuo eos subducerem. Huic ergo atque adeo tibi ipsi audaciam istam imputabis: & per hunc, quem coepimus, ac plures secuturos annos recte valebis. Dabam Lipsiae e comitiis provincialibus Dresdae per aliquot septimanas habitis redux modo factus. d. x. Kal. Februar. crioCLXXVII. A *Daumio* fasciculum transmissum domui reditus inveni. Excusabis ergo hujus aequae ac harum literarum tarditatem: festinataeque jam scriptioni ignosces. Sero ad officium redii, & jam ultra quam justum est istud accelero, adeo modum inter nimium & parum ignoramus.

E P I S T O L A C C L I .
N I C . H E I N S I U S

Fr. Ben. Carpzovio.

Lipſiam.

Novembri menſe te compellabam proxime, mittebamque *Friderici Spanheimii* libellum, de Coccejanismo, quem vocant. Ex illo tuas accepi jucundiffimas die *xviii.* ejusdem Novembris exaratas, quibus & epithalamii mei exemplaria complura, & Loccenianam Sueciae historiam videris addidisse. distuli, fateor, responsum diutius, quam par est, dum sarcinas istas operior, auguratus fore, ut una eademque opera & tuis respondeam, & gratiarum actione defungerer, qui non cessas continuis munificentiae argumentis me cumulare. Caeterum cum *Emericus Bigotius V. C.* proxime ad me perſcripſerit, Amacinitates juris Menagianas ex editione secunda praelo Parisino esse pridem commissas, id nescire te nolui, ne bibliopolae vestri spem vanam fovere pergant, libri ejus typis suis describendi. Hoc labore defunctum idem *Menagius* observata sua in Cujacianas observationes luci donaturus est. Praeter capitularia Regum Gallorum duobus ingentibus tomis edita Lutetiae, & Poenitentiale Theodori Cantuariensis, ac voluminibus *xiii.* Spicilegii Dacheriani, *Vailantii* numismata antiqua, & alterius nescio cujus de Diis ignotis commentarius Lugduni prodiit, cui inscriptiones antiquae complures haecenus in publico haud visae inferuntur. Occupatur & *Huetius* in commentario suo de veritate religionis christianae, opere a multis laudato. Antonini Liberalis Metamorphoses jure optimo tu tibi vindicasti, neque enim alteri a me destinabantur. Plinii epistolas & Gratium recte perlatos esse ad doctissimum *Daumium* augurari licet. Quod litteras, quas haecenus Hamburgensi & Leidensi via ad illum dedi, frequenter in via perditas cognoscam, audeo tibi denuo molestus esse, ne vir officiosissimus suas compellationes a me negligi aut insuper haberi arbitretur. Leidenses *Palmerii* Graeciam antiquam suis typis describunt. Vale, vir eximie, & mihi, ut coepisti, velle perge. Hagae *xii.* Februar. *MDCLXXVII.*

E P I S T O L A C C L I I .

F R . . B E N . C A R P Z O V I U S

Nic. Heinſio.

Hagam.

MAluiſſem epistolae comitem fasciculum dare, nonnulla apud nos, quae prodire, continentem, ut mole quasi tarditatem meam redimerem, & tuarum literarum elegantiam compensarem, sed defuit haecenus istum ad vos perferendi occasio: & menses interea bini effluerunt. A *Daumio* etiam cum literis fasciculus in museo nostro jam per aliquot septimanas ad vos pertingendi rationem circumspicit, sed quam tamen nondum licuit indagare, neque ante
nun-

nundinas vernaes ejus nanciscendae spes est: itaque simplici litterarum officio defungi malui, quam frustra sperando apud te, virum amplissimum, negligentiae culpam contrahere. Non parum autem miror, quam pari fato & tuus ad me destinatus *Spanhemius*, & tibi transmissus a me *Loccenius*, cum epithalamiis in binis fasciculis urgeantur, vel potius cohibeantur, ne ad suum quisque perveniat dominum. Ac ego quidem mercatori Harlemensi unum eorum ad vos ferendum dederam, & *Dan Elzevirio* commendaveram, a quo interea literas accepi, nihil a me ad ipsum esse perlatum profitentes. Nimirum itineris longinquitas & hiberna tempestas, sed super omnia hominum incuria hoc nobis incommodi afferunt, ut usu talium rerum, quae ab amicis proveniunt, careamus. Non prorsus tamen despero, interea ad vos perlata esse, si non omnia, quaedam tamen, quae transmiserim. Menagianarum Amaenitatum editionem dissuaseram bibliopolae, ante quam auctiores eas nos sperare juberes: superstitum enim in auctorum scripta semper mihi displicuit aliquid juris sibi sumere; & vel ea saltem recudere, absque auctoris consensu, religio mihi fuit ut suadeam. Ergo potius *Tanaquilis Fabri* epistolis manum & sumtus admove jussi, si omnino cupiat Criticum libellum e taberna sua protrudere: nam isto auctore non alius nostra aetate in studio critico & humanioribus literis fuit praestantior, & libelli ejus in nostris tabernis non prostant, sed e Gallia arcescendum est, si quis desideret exemplar: In demortui etiam bona relicta speciosiori jure succedere possunt, quam vivi spirantisque sibi arrogare libros eorum institores. Recentium, quos prodituros memoras, librorum in vicem non habeo quod nunciem, nisi quid nundinae Francofurtenses novi afferant, quae sicuti semper aliquid novi, ita crebro etiam monstra alunt. Vale. Dabam festinante calamo, quem incitat abiturus in Belgium mercium conquirendarum causa noster famulus. Lipsiae. d. 24. Mart. MDCLXXVII.

EPISTOLA CCLIII.

NIC. HEINSIUS

Fr. Ben. Carpzovio.

Lipsiam.

Quicquid librorum ad me dedistis, tu ac praestantissimus *Daumius*, tua hinc usque opera, id omne recte ad me perlatum est, nisi quod in ultimis tuis nescio cujus fasciculi mentionem video injectam, quem opinor viae nondum esse commissum: Debebam, fateor, non modo remunerari tam luculentam munificentiam, sed etiam matura gratiarum actione professus esse tempestivius aliquanto animum tanti beneficii intelligentem, nisi secessus ab hac aula multum remotus, atque illic valetudo superveniens satis diu me attinuisent ruri, atque ab officio praestando invitum revocassent. Ita fit, ut duabus tuis longe jucundissimis suavissimisque responsum debeam. *Spanhemii* epistolam super controversiis inter Theologos nostros nuperius exortis, quid causae sit, cur tuo conspectui tamdiu subducatur, vix comminisci possum. Addo nunc

Petronium *Job. Boscbii* annotatiunculis illustratum, quibus cum conjecturas non paucas inferuerit ex ore meo in familiari colloquio exceptas, in nonnullis harum tamen mentem meam haud satis esse affecutus videri potest. Sed in tam parco frugis litterariae apud nos proventu, quid ego exhibeam, nisi tenue & jejunum, cum tu interim hanc messem totis horreis mihi admetiaris. De Meursianis scriptis recte omnino judicas, non quidem in eis apparere eam scriptio- nis limam atque elegantiam, qualis & requiri soleat & praestari ab homini- bus emunctae naris in hoc litterarum genere, sunt tamen conjuncta cum emo- lumento publico, quod locorum instar communium cujusque argumenti res prae- cipuas in unum collectas oculis subjiciunt, quae sparsae ac divulgatae apud scrip- tores antiquos proferuntur. Ut omnino rei litterariae intersit, quae reliqua viri praestantissimi non pauca in armariis regiae apud Holmianos Bibliothecae delitescunt, qua auctiora quam circumferuntur haecenus, qua luci nondum commissa, erui quamprimum ac luce publica donari. Cl. *Loccenius* vellem res sub hoc rege a Suecis domi forisque gestas haud invidisset nobis. Schilterianam manu- ductionem ad Philosophiam moralem & legi & probavi, miratus in hoc viro haud protritam antiquitatis cognitionem, quem mihi commendant & me- rita ipsius, & tu lucubrationis tam eruditae donator, & doctissimus *Graevius*, cui viro, multa mihi conjuncto necessitudine, aut affinis est aut consanguineus, ut audio. Sed & carmen elegiacum, quod exsequiis doctissimis *Rappolti* dedi- sti, haud publici saporis est, & mire elegans. Meum tanti non erat, quod ty- pis apud vos publicis describeretur. Sed, quae benignitas tua est, ut non ex omni parte me demereris, voluisti nimirum amicitiam tuam, qua unice glo- rior ac triumpho, publice testatam esse, meque tibi debere, quod a memet ipso mutuari nequicquam sperem. Tuum mercaturae studium, quia non satis aperte illic tetigeram, venit postea in mentem subjungere hos duos versicu- los,

*Quin & Mercurio probatus aequo
Lucri praemia tollit adfluentis.*

Idque post illum, *Ne Census male deteratur obstat*, ut Mercurii in superioribus meminisse jam nihil sit necesse. De *Tanaquilli Fabri* epistolis apud vos de novo edendis, si rem maturius rescivissem, poterat a me agi cum *Emerico Bigotio*, & adhuc agam, quamquam metuo, ne serius id sim factururus, ut ille *Ἐμμαναῖτς* filiam *Annam*, feminam eruditionis laude insignem, quae & *Florum* commen- tariis suis & *Callimachum*, quod magis mirere, illustratos nuper publico dedit, per nonneminem ex amicis suis (vivit enim ea Lutetiae) curaret compellari, si fortassis opuscula illa parentis auctiora atque emendatiora, quod reor, possi- deat, ac vobiscum communicata velit. Erat *Tanaquillus* vir peramaeni sane, sed procacioris ingenii, & qui in castigandis scriptoribus vetustis nimium in- dulgeret, ac permetteret sibi quandoque, nullis adhibitis aut consultis membra- nis, sed lubrica hariolandi arte, quae sagacissimo cuique imponit, ut nosti. In his ipsis epistolis alicubi exagitavit parentem meum, ut proterve fatis, sic nullo jure, ut demonstravi in meis ad *Nasonis Artem Amatoriam* annotatis, digres- sione

sione satis longa, qua effectum est, ut illum postea facti temerarii poenituerit, quod ex *Graevio*, qui inter amicos ejus potiores fuit, aliquando cognovi. Sed per istas velitationes nunquam fiet, ut ego viri meritis detractum velim. Viri boni & eruditi apud nos nunc occupantur in Stephano Byzantio illustrando, opinor fore, ut & *Hofstenianae* in eundem scriptorem animadversiones typis *Elzevirianis* propediem describantur. Editur & *Palmerii* Graecia antiqua, opus postumum. Romae typis *Barberinīs* eduntur *Geographi* veteres partem majorem *Graeci*, nec visi haecenus in publico, quas idem collegerat *Hofstenius*. Tu quid de *Reinesianis* nos jubes sperare? Vale ꝑ. Maii. MDCLXXVII.

EPISTOLA CCLIV.

FR. BEN. CARPZOVII

Nic. Heinsio.

Hagam.

Q Uod non citius, & tum cum per mercatores e nundinis nostris vernalibus ad vos redeuntes licebat, ad multo gratissimas tuas literas responderim, febriles languores, quibus per aliquot septimanas vexabar, causa fuerunt; His per Dei gratiam & medicorum opem dispulsis, nihil prius aut antiquius habui, quam ut isthoc respondendi officio defungerer ad jucundissimas tuas: quarum quo plures accipio, eo magis amoris & benevolentiae tuae certus reddor, neque ulla re magis, quam hujus constantia & firmitate me affici sentio. Et sane inter Mercuriales, quas modo agebamus, minime feriatas, ferias molestissimorum negotiorum eruditissimam tuam epistolam quasi condimentum, inter febriles vero ardores levamen, quasi sopor fessis, sensi. Ergo nec in respondendo me lentum esse decebat, qui tamen per morbum aliter non poteram, cui hanc tarditatem nostram imputari velim. *Spanhemii* interea epistolam de Theologorum vestrorum moderis dissidiis recte a mercatore Amstelodamense, cui forte *Elzevirius* tradiderat, missam accepi, nec sine indignatione, interdum etiam ob falsa & faceta Auctoris dicta, risu, frivolas in gravissimo religionis negotio contentiones inde cognovi. Cui vero bono in detrimentum charitatis armata loquacitas? quid conducunt tot chartarum folia nigrae loliginis succo illita, quibus liquidae pietatis succus inest nullus, & quarum tamen ambitioni Numen praetenditur? Indignatur sane quisque probus nova indies dogmata cudi, & hinc schismata nasci, animorum dividas ali, & in Christiano corpore sectarum pertinaciam & contentionum pruritum vigere. Sed nimirum his fati vestrae non magis quam nostrae urgentur ecclesiae, ut internis motibus agitentur, ac licet cum externis hostibus satis habeant, quod agant, malint tamen in sua potius viscera arma convertere, cognatasque acies, ut Poeta ait. Rectius consilium suscepit frater meus, dum Pontificia castra invasit; edito superioribus diebus adversus *Masenum*, societatis Jesu Presbyterum, & editis de humanioribus literis compluribus libellis clarum, qui novam Praxin intra octidui exercitationem Pontificiam religionem amplectenti fuerat commentus, Examine, quo sacram scripturam & Augusti-

num

num a Jesuiticis detorsionibus & calumniis vindicavit, & nostrae pariter ac Pontificiae religionis dogmata ad lancem veritatis iusto volumine expendit. Nescio num affectus mihi imponat, an rei veritas impellat, ut praeclare de libro sentiam, solida certe, quae non sine dictionis cultu ab eo pro causa nostra allata sunt, argumenta iudicem. Ad humaniores literas pertinentium libellorum rarus est apud nos proventus. Francofurtenses *Vossii* vestri de Historicis Latinis & Graecis Commentarios recuderunt, eadem ratione, qua antea ejusdem de Physiologia & Theologia gentili, vitiis item Sermonis ediderunt opera: adeo nobis vestra saltem legendi vestigia & denuo excudendi, quae publici juris fecistis, opera relicta est gloria. Unus tamen *Martinus Hankius* novi operis tibi nunciandi nobis copiam dedit, emisso de Byzantinarum rerum scriptoribus graecis Commentario, in quo vitas & scripta auctorum quinquaginta, qui de Constantinopolitanis aliisque Graecis antiquitatibus monumenta nobis reliquerunt, distinctiorem in modum recensentur, judicia etiam de eorum scriptis feruntur: quem in modum jam superioribus annis idem Clarissimus autor de Rerum Romanarum scriptoribus geminos ediderat libros: de quibus aeque ac nunc publici juris facto Commentario sententiam non dico, quam amor erga virum optimum, qui mihi etiam librum, ut typographum & editorem ei conciliarem, Uratislavia miserat, cohibet. Id tamen profiteor, ut colligendi & varios Autores evolvendi laboris laude se commendant, ita ingenii gloria se minus mihi probare hujusmodi Collectanea, magis placere ab ipsorum autorum ingenio profecta opera, de quibus rectius etiam sive in bonam, sive in alteram partem ferre iudicium licet. Juxta horum (sed exactos & cum iudicio digestos) nulli mihi praestantiores videntur labores, quam qui edendis illustrandisque bonis autoribus impenduntur. Et sane cum ad famam acquirendam duae literatis propositae sint rationes & quasi viae, una per suas lucubrationes, quas cujusque ingenium ex se parit, altera per alienas: licet illam priorem multi tanto huic praeferant, quanto parentem nutrici ante ponere solemus, ego tamen audacter dixerim, melius fore hac nostra aetate locatam operam in scriptis veterum emendandis atque illustrandis, quam in novis quasi foetibus ingenii concipiendis & pariendis. Quae causa est, cur tuum, vir amplissime, qui tot nobis praeclaros autores, Ovidium, Claudianum, Prudentium, & horum obscura loca, illustrata dedisti, institutum plane probem; ac quamvis saepenumero cum *Rol. Marefio* doleam, non crebriores proprii ingenii ex toto foetus tuos videre; cum ad novi scriptoris laudem adspirare tamen tibi non difficile sit, quique Poëtae atque Oratoris partes perfecte implevisti; studia tamen tua, si recte iudico, collocare fructuosius & ad extruendam tibi nominis immortalitatem firmiora ac solidiora fundamenta isthac ratione jacere videris. Simili in opera se exercuit studium amici nostri *Ulrici Obrechtii* in Argentoratensi Acad. P. P. & celeberrimi *Boecleri* successoris ac generi, qui superioribus mensibus Augustae Historiae sex scriptores vulgo junctim edi solitos, denuo emendatiores edidit, & notis additis illustravit, in quibus post literarum Principes *Casaubonum* & *Salmasium*, spicilegium, quod relictum sibi deprehendit, instituit.

tuit. De Valerio tuo Flacco ut simile quid proxime experiamur, & hic ad summas tuas laudes, queis per Orbem literarium veheris, cumulus accedat, votis contendere non desinam. Affinis tui Nob. Dn. *Goefii* de justitia Pilati Commentarium summa cum voluptate perlegi, sed multa praeterea adferri posse, quae omnino ad rem faciunt, nec minus momentum causae afferunt, judico. Hic in vicinia superioribus annis quidam *Job. Stellerus* advocatus, & qui fortasse plurimis pessimisque causis in foro adfuerat, publice edito libello Pilati etiam causam defendendam susceperat, profano plane ausu, qui etiam per magistratum exemplarium confiscatione coercitus fuit. Eum postea sub *Maphanasi* nomine quidam Dan. *Hartnaccius*, & tandem publice apud nos habita Juridica Dissertatione, *Job. Frid. Moebius* confutandum putavere: sed utraque ex parte minus solidis rationibus pugnatum existimo, neque Reip. qualis eo aevo Judaeorum erat, aut Imperii, quod sibi in hos Romani sumebant, statum satis & ut par erat, fuisse excussum. Ad Hebraeorum potissimum jura, & Pontificum circa capitalia supplicia infligenda potestatem, Judiciorum item formam respiciendum erat, non juris Romani apices Pilato objiciendi, quod a plerisque JureConsultis factum deprehendo: atque hic *Seldenus* aliquis, *Cunaeus*ve vestras, in partes venire debebat, qui Rabbiorum volumina & Jura Ebraeorum excuteret, & quid a Cajapha in forma Judicii aberratum, in quantumque Pilato licuerit examini a Judaeis de fonte habito adsentire, vel contradicere, aliaque ad hanc causam necessaria doceret. *Hulsi* specimen Theologiae Hypotheticae non parum mihi lucis ad Spanhemianam a te transmissam epistolam (pro qua adhuc tibi debeo) intelligendam attulit. Coccejanam sane Theologiam & vigentes apud vos contentiones plenius quam a *Spanhemio* factum fuerat, exhibuit. Salisburgi Pater *Otto Aicher* varias inscriptiones veteres hinc inde extantes, templorum, tumulorum, imaginum, aliorumque locorum in publicum emisit. A *Christophoro Philippo de Waldenfels* editi selectae Antiquitatis libri, Noribergae modo excusi, vix typis, nedum eruditorum oculis digni sunt; nec *Angeli Gallucci* Historia Belgica, ad Romanum non ita pridem editum exemplar a Noricis jam recusa, opera isthac digna videtur, adeo jejuno & Historiam parum decente stilo conscripta, ut ad quodvis potius, quam Historici munus idoneus is scriptor censendus sit. Circa Anglos scriptores non inutile studium adhibuit *Martinus Kempius*, Regiomontanus, praestantissimorum istius gentis Theologorum, qui integro currente seculo ad praesens usque tempus floruerunt, partim etiam adhuc florent, scripta per certas classes, cuivis materiae Theologicae datas, recensens, cum appendice de Regia Londinensi Societate: ubi quaedam haecenus nobis parum cognita reperire licuit. Ex Italia, Romae hoc demum anno excusa *Latini Latini* Viterbiensis, qui superiori seculo floruit, Bibliotheca, Observationes, Confectiones, Conjecturas & Varias Lectiones in sacros juxta ac profanos scriptores continens, ad nos pervenit, ubi felicius optimum senem circa sacros, quam externos scriptores rem gessisse, cognovi. Ex Scania Danicis armis hodie oppressa, (quae vereor ne istam iterum ad gentem redeat) *Samuelis Puffendorffii*,

praestantissimi juris gentium & naturae doctoris, exercitationes cultissimas accuratissimasque casu quodam accepi: nam aperte ne epistolam quidem ex istis oris huc ferri, quam maxime etiam laboremus, integrum est: Has ut primum accepi, avide perlegi, nec sine ingenti admiratione, ingenii acumen, flili nitorem, praestantissimorum ex bonis Autoribus locorum applicationem & profundam viri doctrinam complexus sum, ac aegre tuli nitidissimum libellum Germania extorrem esse oportere: Ergo typographo eum recudendum tradidi, ne nostri homines tanti boni copia careant, & exemplum ejus, cum primum fuerit expressus, ad te mittam. De *Tanaquilis Fabri* epistolis recudendis consilium suspendam, donec rescivero, num a *Bigotio* supplementum iis a filia *Anna* conciliari possit. Verum sane de eo viro judicium tuum est, & procacitate ingenii eum multos eruditorum irritasse constat, ac ex alieni nominis arrofone & morfu gloriam sibi quaesivisse, dum Codicum antiquorum securus, suis saltem inventis sibi placens, de ingenii fama plerisque detractum ivit. Electus tamen ejus stylus recondite elegans, rerum varia cognitio, inventionum subtilitas, & alia quae delenifica habet, in amorem rapuere imae & mediae caveae literatos, sic ut apud nos complures copiam ejus librorum sibi exoptent. Sed jam epistolae statuendus est a me modus, a te concedenda venia, tum ob prolixitatem, in quam, dum non animadverto, excrevit, tum ob parum servatum dictionis cultum rerumve ordinem, quas pro ut in mentem venerunt, in calamum fluere volui. Quare elegantissimarum a te literarum amplius particeps fieri non meritis, ad benevolentiam tot modis haecenus sollicitatam, confugio: inde non minus, literis meis ignoscendi, quam responsione eas porro dignandi gratiam mihi promittens. Vale. Dabam Lipsiae Prid. Kal. Jul. Anno MDCCCLXXVII. P. S. A *Daumio* superiori mense diversos fasciculos accepi: quos quia ad vos pertingendi occasio nulla interea erat, neque literas ego per rationes antea expositas dare poteram, in hoc tempus asservavi, quo eos cum aliis schedis (quae, dum epistolam signo, ad manus erant) transmittendos duxi. Vale iterum.

EPISTOLA CCLV.

FR. BEN. CARPZOVII S.

*Nic. Heinsio.**Hagam.*

Nolui occasionem ad te perferendi fasciculum Daumianum, de quo nudiustertius scripseram, praetermittere; cui quam vellem, ut jungere aliquid possem, quod tibi gratum fore existimem. Sed recentia non suppetunt, & vetera, olim apud nos edita, quae vel nondum habeas, vel desideres, ignoro: ut omnino mancum hinc officium nostrum esse oporteat. Pridie cum literas ad te darem, Salmasiani operis indictricem schedam mittebam, ad exemplar Graevianum, quod doctissimus vir huc misit, excusam, simulque studium nostrum circa istius editionem indicabam: Interea incidit, ejus autorem cum Magno tuo Parente aliquoties in re literaria fuisse collisum, ac graves controversias viris in-

intercessisse; proinde veritus sum, ut studio huic nostro, veluti manibus Paternis iniquo, minus faveas, certe quidem libellos existimationi Heinſianae injurios recudi aegre feras. Sed reputans tamen apud animum meum, virtutem etiam in hoste laudari ſolere, ac reconciliatos fuiſſe, dum viverent, eruditione illuſtres ambos viros, in ſpem erectus ſum, operis editioni te nequaquam refragaturum, iſtud potius communicatis cum doctiſſimo *Graevio* conſiliis promoturum eſſe. Nuper cum inter alios de Claris viris ſermones apud Illuſtrem aulae noſtrae Heroa, *Henr. Friſium*, ſupremum Conſiliorum Electoralium Moderatorem, tui, & quo ſe familiariter uſum fuiſſe quondam, cum ſtudiorum cauſa Belgium perluſtraſſet hîc gloriabatur, Divi Parentis mentio incidiſſet, nihil adhuc videre ſibi licuiſſe iſ querebatur, unde diem vel annum emortualem Maximi hujus viri, *Danielis Heiſſi*, cognoscere potuerit. Qua in re nec ego, iſtius aequae ignarus, quicquam ſuggerere poteram; neque tamen dubito, parentationis aut ſermonis funebris honorem ipſi ceu reliquis claris Profeſſoribus habitum fuiſſe, poſtea in literas miſſum typiſque deſcriptum, unde aetatis & fati rationem cognoscere liceat. Qua in re conſilio & ope tua me indigentem (nam ſummo viro talium indagatori curioſo fidem dedi ſedulo me ſciſcitaturum eſſe) ut juves, quam maxime rogo. Idem vir Illuſtris de *Cunaei* epistoſis, quas ſcriptas ſe aliquando vidiffe meminifſet, me rogavit, an non ad modum Barlaeanaſum interea prodierint? Contubernio enim *Cunaei* ſeſe uſum fuiſſe, (cui *Buchnerus* ipſius ſtudia commendaverat) & propterea maximis in deliciis ſe viri ſcripta habere, graviterque dolere, quod tam pauca prodierint, ajebat. Num hac quoque in parte eruditam viri curioſitatem explere, meque voti compotem reddere, & docere poſſis, *Cunaeanae* reliquiae prorſuſne interierint, digno deſtitutae herede, an adhuc expectandum aliquid ſit, experiri auſus ſum. Sed ignoſces huic confidentiſſimae petitioni, quam, quia a nemine rectius talia reſciſcere licet quodammodo, neceſſitati tribues. Rationem autorum edendarum *Graeviana* omnibus noſtris hominibus valde placere, in ſuperioribus literis, indicaſſe memini. Et eſt in hac urbe bibliopola, qui *Juſtinum*, quem *Lugdunenſes* in Gallia typi cum *Bongarſii*, *Berneggeri*, *Thyſique* integris notis, appendice notularum doctiſſimi *Joh. Georgii Graevii* addita, excuderunt Anno 1670. recudere mallet, ſi pace *Graevii* id fieri liceret: quo nomine ut ad Clariffimum virum literas darem, me rogavit. Sed cum litterarium commercium cum eo haecenus mihi non interceſſerit, & credam *Elzevirianis* typis hunc autorem a Clariffimo viro non ereptum iri, proindeque religio mihi ſit occaſionem iſtud auſpicandi e negotio captare, ubi reſpuſam pati poſſim; malui officium meum bibliopolae denegare, quam periculum iſthoc experiri. Quod ſi per te reſciſcere, vel, qua auctoritate apud *Graevium* vales, impetrare liceret, ut cum ejus venia iſthaec editio hîc recudere-

r Hae anno proximo, me curante, prodierunt, & inter eas leguntur Illuſtris hujus *Friſi*, ſummi eruditorum Maecenatis, Epistoſae ad *Cunaeum*, & ejus reſponſiones, ut & *Buchneri*, quibus *Friſium* ad Academiam Batavam abeuntem commendavit.

deretur, aut notas, si paratas in istum autorem haberet, submitteret; pretio-
iis, quod vellet, posito: tibi non minus ac ipsi auctori, apud quem autoritate
tua hoc beneficium conciliabis, bibliopola ejusque ego nomine, obstricti eri-
mus. Vale. Dabam Lipsiae d. Kal. Sextil. c1010CLXXVII.

EPISTOLA CCLVI.
NIC. HEINSIUS

Fr. Ben. Carpzovio:

Lipsiam.

SUB nonas, quantum recordari datur, Majas ante hos duos menses litteras
ad te dedi, ut uberes verborum, sic & bonae frugis parum copiosas. Nunc
quod scribam, etsi vix occurrit quicquam, tamen cum Theodulphi Aurelia-
nensis opuscula, diu multumque desiderata a nostro *Daumio*, e Galliis tandem
essem consecutus, non aliam offerri videbam viam, qua ad amicum communem
pervenirent, nisi opem hinc tuam implorarem, cujus studia mihi demerendo ex-
posita semper & parata esse non uno argumento sum expertus. Ea igitur ad
Elzevirium nunc mitto, addito & altero libello, quem *Daunius* ad *Bigotium*
mitti pridem volebat: sed cum Euthalium ipse manu sua descripserit, *Bigotio*
tradendum, haud fore e re sum arbitratus addilibellum typis descriptum, qui
licet ad dominum nunc suum revertatur. *Stephani Byzantini* binas apud nos pro-
curari editiones pridem, puto, narravi. Alteram Commentariis *Abrahami Berce-*
keliis, Hebraei *Pinedo* alteram animadversionibus illustratam. Nunc persuaderi
se per me *Elzevirius* est passus, ut *Holstenianas* in eundem scriptorem curas,
eruditas illas ac luculentas, typis suis describat. Opinor etiam fore, ut idem
nobis det *Ammianum Marcellinum* curis secundis a *Valesio* & *Lindenbrogio* illu-
stratum. *Lutetiae* prodiit *Eusebius* ejusdem *Valesii* editionis secundae. Ibidem
sub praelo fervet *Cangii* glossarium ad scriptores mediae & infimae Latinitatis,
opus eruditum sane, cujus specimen *Bigotius* ad me nuper misit. *Thomas Munc-*
kerus Mythologos Latinos luci paratos habet, sed iis typographus vix est, ut
manum admoveat ante vernam tempestatem proximam. De *Fabri* epistolis
apud vos edendis proxime agebam, eaque de re hodie ad *Menagium* scribo, a quo
litteras nuper accepi, quibus nuntiat *Amaenitates* suas juris jam prodiisse cum
aliis quibusdam libellis, se auctore, quas propediem ad me oblata opportuni-
tate sit missurus. *Ciceronis* Epistolae familiares variorum, ac praecipue *Graevii*,
animadversionibus illustratae jam lucem vident. In Galliis prodiit jam, aut
proditurum proxime novum volumen, scriptores *Historiae Byzantinae* tres
quatuorve hactenus ineditos complexurum. tum orationes *Themistii* auctiores,
& *Zonaras*. *Britanni* in *Jamblichio* edendo occupantur. Vale. *Hagae Comit.*
8. Julii c1010CLXXVII.

EPISTOLA CCLVII.

F R. B E N. C A R P Z O V I U S

*Nic. Heinsio.**Hagam.*

VIX dederam ministro nostro, mercium conquirendarum causa in Belgium ablegato, ad te ferendas cum fasciculo literas, cum a te iterum epistolam accipio, amoris & benevolentiae, ac diuturni mei silentii indulgentissimae tolerantiae testem: cui etsi quod respondeam vix habeo, pudore non minus confusus, quam argumenti copia destitutus: nolui tamen bis peccando graviolem apud te notam contrahere, si iteratae tuae benignitati pari tarditate, qua nuper cum per morbum aliter non liceret, iterum salvus respondeam. *Daumium* de Theodulpho mox accipiendo, (nam in via ad nos eum haerere conjicio) literis tuis certior factus, securum esse jussi: Ac misit is ad me cum fasciculo epistolam, quam hinc solam vides: iste enim occasionem ad vos pertingendi apud me manebit. *Graevii*, de quo scribis, Ciceronianae epistolae ad nos perlatae sunt, binis voluminibus nitidissime editae, cum integris variorum notis, quod genus edendi libros admodum mihi placet: Schrevelianus semper displicuit mos, quo resectis optimis observationibus, quandoque levissimas notas loco selectarum accepimus. Atque utinam doctissimo viro integrum Tullii opus istum in modum adornandi & edendi, de quo spem praeclaram fecit, otium & vita sufficeret: quorum alterutrum ferme bonis scriptoribus deesse solet. Quemadmodum duobus abhinc septimanis doctissimum virum *Joh. Conr. Durrium* vita destituit, qua cum maximo eruditorum dolore Altorfi, ubi publice summo cum studiosorum fructu & magna laude docuerat, *Virdungi*, *Piccarti*, *Rupertique* dignissimus successor, excessit. Et jam solus in ista Academia super est *Wagenseilius*, qui famam antecessorum sustinere quodammodo possit; *Durrus* quidem quod parem iterum sit sortitura, qui hunc stili nitore, Aristotelicorum dogmatum exacta scientia, Historiarum cognitione, & Theologicarum rerum exquisitissima doctrina aequet, vix sperare licet. Circa *Salmasii* operum editionem studium nostrum hinc colliges, quod epistolam Celeberrimi *Graevii*, ut cernis, hinc recudi curavi, qua plures in societatem pretii repraesentandi invitent. Aequas censeo condiciones, nec intelligo, quid desiderare in iis quis possit, qui modo serio maximi viri lucubrationes aestimet: (quas equidem plane admiror, licet alicubi male digestas, quandoque etiam magnorum virorum famae & existimationi, & cum primis Magno tuo Parenti, nimis iniquas) cum praesertim jucundum etiam sit, singulos vel binos semper ordine, quo prodeunt, tomos impetrare: nec dubito plures repertum iri operis tanti fautores, qui bibliopolam sumtibus sint adjuturi, quem nec *Graevius* consiliis destituet. Vale, vir celeberrime, & me porro ama. Dabam Lipsiae d. xix. Kal. Sept. CIOICLXXVII.

EPISTOLA CCLVIII.

NIC. HEINSIUS

Fr. Ben. Carpzovio.

Lipsiam.

NON leviter, *Carpzovi* ornatissime, res nostras haec bella conturbant, me certe a studiis adeo reddiderunt alienum, ut vix meminérim ea fideliter ac intentiore cura a me tractata, dum sedeo Deos omina meliora poscens. Qua in re vide an rusticum illum imitatus, qui amnem, dum deflueret, expectabat spei suae irritus. Propediem me Musis reddam, aptis tempori fallendo solatiis, ne semper haeream in contemplatu funesto luctuosorum temporum. Vides causas, quae me pridem avocant ab officio epistolari, quod cum sponte tibi deberem, nunc tanto magis debeo, quod tribus tuis sub unum fere idemque tempus mihi redditis, rescribi pridem oportuit. Tardavit etiam nonnihil officium spes mihi facta gratificandi amico communi, ad quem litteras hinc mitto non obsignatas, ac tuis oculis delibandas, ne quae iis sum complexus super re litteraria, apud te denuo sint repetenda. Vidimus diebus proximis hinc terrarum Principem *Paderbornium*, virum omni litteratura perpulchre instructum, & ipsis Gratiarum manibus formatum, mihi autem amicum veterem ac Romae olim cognitum. Cujus recordatio facit, ut ausim munus tibi auferre Antiquitates ejus *Paderbornenses*, pridem quidem editas, fateor, sed tamen cum frequenter me provocet & laceffas singulari munificentia, jure debitas a me tibi, quod praefatio operis a me profecta est. Adderem poemata ejusdem tibi *Daumioque* a me destinata, sed libellus nunc non est ad manum, quem in armariis meis, nunc nescio ubi oberrantem eruam aliquando, & ad te perferri curabo, minime indignum qui a te pervolvatur aliquando. Ceterum silentium tuum, vir praestantissime, cur operosum excuses in modum, nihil rationis videbatur, nisi humanitati ceterae hinc quoque satisfactum ipse velles. Nam tanti erat litteris tuis, nunquam non acceptissimis, tanto tempore carere, ut post morbum diuturnum te convalescere iis nuntiares. Cl. *Spanhemii* epistola, cum pacis studio videatur data, nonnullis, fateor, tamen locis occultae nescio quid praefert loliginis, cui ille praetexit causas insultus frequentissimos Coccejanae, quam vocant, partis; a quibus, etsi neutra, ut credi vult, castra secutus, se lacerari idemtidem ac proscribi senserit odiis minime occultis. sed nos hanc litem nostram non facimus, qui eruditionem virorum praestantium veneramur, affectus nimios, quibus in se aguntur, non approbamus. *Masenius*, quem narras, in contubernium Principis *Paderbornensis* adscitus est, ac *Scatenio*, vivis nuper erepto, successor datus, quem tamen e solis scriptis habeo cognitum. Fratris tui opus *Masenio* oppositum, cum ad nos perferetur a librariis, quod propediem fiet, ut evolvam minime sum intermissurus. Apud nos nihil fere rei exquisitioris parturiunt typographi. horum bini jampridem occupantur in Stephano Byzantio luci permittendo, binis commentariis illustrato. Quibus
acoe-

accedit tertius *Elzevirius*, Holstenianas in eundem scriptorem animadversiones longe doctissimas prolaturus in publicum, unde veteri Geographiae plurimum lucis atque ornamenti accedit. Quando vix est, ut ad veterem ingenii illam polituram accedant, qui aetate nostra hoc agunt, ut per scripta in publicum emissa orbi innotescant, proximum est, ut tu recte arbitraris, ut antiqua monumenta ab oblivione ac mendis, quibus aspersa sunt per librariorum incuriam, vindicentur. Dum id sic fiat, ne alienos labores ipsi fucorum instar involemus, quaeque ante nos dicta sunt, pro nostris publice ostentemus. a qua scabie dum multi sibi non temperant, existimationis suae ac vigiliarum naufragium faciunt modis sane turpissimis. *Ulrici Obrechtii* nihil horum prae se ferentis annotata exquisita in *Historiae Augustae* scriptores vidi, ac multum, ut omnia quae ab hoc ingenio proficiuntur, approbavi; velim eo excitentur exemplo alii, qui dum in omnes se vertunt formas, ut ingentes procudant commentarios, multum ex alienis plumis ornamenti mutantur, e suis parum. Affinis mei *Pilatus* iudex adversarium acuit. *Cl. Burmannum Heidani* generum, qui se immerito provocatum queritur ac indignatur. Nec diffiteri possum virum clarissimum aliquanto acerbius habitum. De inscriptionibus antiquis ab *Aicherio Salisburgi*, ut ais, editis salivam movisti. si tamen in antiquis illis nova ibi omnia nec haecenus in publico spectata. *Latini Latinii* lucubrationes non respondent expectationi meae. Mendae enim pleraeque, quas in bonis scriptoribus deterget, pridem ab aliis sunt notatae. Quid, quod ejus in *Ciceronem* lucubrationes illic omittuntur; cum tamen illi scriptori prae ceteris castigando insudarit senex optimus, quod dedisse typographo credo editores, ne opus in molem nimiam excreceret. A *Bigotio* super epistolis *Tanaquilis* Fabri nullum haecenus responsum accepi. *Claudium Salmasium*, ut erat concitatoris ingenii, graves cum Parente meo exercuisse similitudines ignorari a litterarum amantibus non potest: quem petulantissime passim exagitavit, quo magis gaudeo nihil hisce maledictis omnino repositum a Parente meo, qui contumelias hasce contemnebat, ut latratum lividi ingenii, deque suis in rem litterariam meritis ad posteritatem provocabat. Graviores longe sunt censenda, quae in *Hugonem Grotium* sibi permisit idem *Salmasius*, ejus quippe vivi cum amicum se professus esset, mortuo procacissimis modis insultavit, idem peccaturus in *Justum Lipsium*,

I Gaudeo ipsius *Heinsii* testimonio, morosi affinis procaciam damnari: si enim umquam indignis modis habitus pater fuit, a *Goesio* certe injuriam insignem accepit, qui cum *Rev. Woodewartio*, Pastori Hagensi, Ultrajectum proficiscenti, libellum a se conscriptum tradidisset, ut patri meo legendum daret, addiderat preces, ut si quid animadversione dignum inveniret, eum moneret. Quod in aliena scripta arbitrium cum pater recusaret & deprecaretur, instare jussus *Woodewartius*, tandem permovit patrem, ut quasdam adnotationes in chartam conjiceret, gratiarum actionem pro amica & expetita monitione sperantem. Sed ita visis stricturis impotens animus exarsit ira, ut acerbissimis animadversionibus come officium pensaret. Nec defuit pater famae, sed responsum typis mandandam jam confecerat, cum mors inceptum destitueret: habeo quidem istius responsi formam & primas lineas, sed descriptum nitide exemplar, inter manus strangulatum, periit. Satis conjicere licet, cujus in gratiam id factum fuerit, sed quod vulgari minime publice interest.

sum, si suis de militia Romana commentariis supremam manum imposuisset. Hos scopulos vitemus potius ipsi, quam aliis in eos impingentibus irascamur. Ego certe cum plurimos *Salmasii* errores in adversaria mea redegerim, eos si acerbius exagitarem, metuebam, ne viderer oblitus & me hominem esse, tantum abest, ut existimationi ejus ac famae perperam consultum vellem. Parens meus, quando id doceri cupis, obiit supremum diem senio ac morbis confectus Anno *MDCLV*. a. d. xxv. Februar. Gregor. hoc resciscat ex te illustrissimus *Frisius* licet. Vale. Nonis Octob. *MDCLXXVII*.

EPISTOLA CCLIX.

F. R. BEN. CARPZOVIVS

*Nic. Heinso.**Hagam.*

EUM vero amicitiae usum censeo longe maximum, ex quo plures nobis amici contingunt, & novi nostrae qualiscunque virtutis aestimatores conciliantur. Quo circa non possum non immortales tibi agere gratias pro conciliata Doctissimi *Graevii* benevolentia, quam humanissimis literis & praestanti munere Ciceronianarum modo cultissimo editarum epistolarum is mihi testatus est. Ac quasi ex compacto olearii eodem tempore benevolentissimis literis & gratissimis muneribus me aggressi estis uterque, ille quibus dixi epistolis, tu vero nitidissimo Monumentorum Paderbornensium volumine, quod inter praeclara librariae meae suppellectilis cimelia primum locum semper tenebit, perpetuus grati redhostimenti monitor. Licet enim isthaec Monumenta aequae ac Herois ejusdem Poëmata, (quae etiam in collectis ab *Elzevirio* septem Illustrium virorum, Poëmatibus Anno 72. excusa extant) jam ante possederim, coemta ab ipso Dn. *Elzevirio* cum Anno 1673. Amstelodami essem, tamen grata tui memoria & hoc praestanti munere testata mihi benevolentia, in immensum hujus exemplaris pretium intendet, & existimationem ultra modum augebit; ut rejecto priori isto & ad amicum relegato, hoc in oculis animoque sim gesturus. Et sane rarum in Principe eruditionis decus meretur admirationem, quam ipsi apud eruditos non magis haec proprii ingenii Monumenta, quam vestrae, tua, inquam, *Graevii*que in justorum Panegyricorum modum adornatae praefationes Prudentii & Suetonii conciliarunt; ut in maxima felicitatis parte ponendum sit Principi, quod vos tantarum virtutum claros Praecones nactus sit. Quid apud nos praesens autumnus literariae frugis tulerit, adjectus Catalogus indicabit, cujus beneficio ego recensendi singulos libellos labore supersedere possum. Ex Anglia allata sunt *Seldeni* Marmora Arundelliana copiosiora edita & insignibus additamentis auctiora; relatum praeterea, ibidem prodiisse *Joh. Leslie* Episcopi Rossensis de origine, moribus & rebus gestis Scotorum libros x. *Guil. Outrami*, Ecclesiae S. Petri apud Westmonasteriensis Canonici, de Sacrificiis libros duos. *Joh. Windet* librum de vita functionum statu ex Ebraeorum & Graecorum comparatis sententiis concinnatum, cum

cum Corollario de Tartaro Apostoli Petri, in quem praevaricatores angelos dejectos memorat. *Guil. Brigge* Ophthalmographiam. Sed haec frustra vobis narro, qui maturius hosce libros habetis, quam eorum ad nos notitia pervenit, magna orbis parte divisos a Britannia. Ex Italia venientes literae nunciarunt Romae *Ambrosii de Altavera* Bibliothecam Dominicanam usque ad Annum 1600. absolutam esse. Ibidem monachos S. Basilii Breviarium imprimere in lingua Graeca vulgari. *Joh. Bapt. Verum* Venetiis Historiam suam libris aliquot auctiorem evulgasse. *Sertorium Ursatum* Historiam Patavinam praelo commisisse, cujus secundum tomum Marmora erudita sint impletura. *Donatum Calvum* ephemeridem historicam de Bergamo tribus voluminibus edidisse. Ex Gallia praeter Ephemerides eruditas Anni 75. Gallice scriptas nihil accepi. *Puffendorffii* Dissertationes, quas in postremis meis memoravi cura mea jam recudi, una cum *Val. Alberti* Compendio juris naturalis orthodoxae theologiae conformato, modo edito mitto, ut vel aliqua parte debiti, quod Monumentorum Paderbornensium dono me contrahere voluisti, exsolvar. Nondum equidem apulerunt ista, sed apud Dn. *Adrianum van Hoek*, cui Dn. *Elzevirius* tradidit, adservantur, oblata occasione ad nos perferenda. tamen perspectus pridem elegantissimus liber me muneris, licet nondum accepti, magnitudinem agnoscere & infinitis modis tibi obstrictum esse cogit. A *Daumio* allatus hac ipsa die cum literis fasciculus commodissime hac occasione ad vos mittendus fuit, nec dubito Corippum interea, binis adhinc mensibus ablegatum, recte appulisse. Vale. Dabam Lipsiae d. xx. Octobr. *MDCCCLXXVII.*

EPISTOLA CCLX.

NIC. HEINSIUS

Fr. Ben. Carpzovio.

Lipsiam.

Bini proxime fasciculi ad me perlati sunt abs te ac *Daumio* nostro, vir praestantissime, quorum uterque varios complectebatur libros, munificentiae vestrae, nimis quidem profusae, indices; quorum conspectus in ruborem me dedit: ita alia ex aliis beneficia me cumulant ac premunt. Monumenta Paderbornensia haud ingrata tibi fore confido, si non meo, illius certe Principis nomine, qui per Germaniam vestram sui ordinis propemodum solus rei litterariae decus ac majestatem splendide tuetur. Is Septembri mense, cum adesset nobis, qua est humanitate, multis me obtestabatur, uti hanc hiemem secum in dioecesi sua exigerem, idemque postulatum per litteras longe humanissimas iteravit postea. Jamque in eo eram, ut convalescis sarcinis optimo Principi gratificarer, nisi morbus supervenisset, qui etsi remittens nunc nonnihil, tamen praescribit mihi imperatque quodammodo, ut nunc paucioribus, quam velim, tecum agam. Iter vero propositum erit differendum, si non in verum tempus, certe dum vires dejectas nonnihil erexero. In Italia typis describi audio *Bartholomaei Scalae* Florentinam historiam haecenus ineditam. Ad

Tom. V.

Qq

hunc

hunc *Scalam* circumferuntur Epistolae *Angeli Politiani* nonnullae, saltae maiorem partem, & in quibus hunc hominem assidue ludit, ut mirum videri possit, si historia ea, quam jubemur sperare, elegantiam sit praelatura. Romae sub praelo est Bibliotheca magna Rabbinnica, de scriptoribus & scriptis Hebraeorum, auctore Dn. *Julio Bartholoccio de Celleno*. de ceteris libris apud nos, aut in lucem proxime prolatis, aut mox proferendis ago cum nostro, ut vides, *Dau-mio*; mitto hic imaginem Avunculi mei *Johannis Rutgersii*, quam aere incidendam curavi nuper, ac libro vernaculo, qui de familiis Dordracenis apud nos produci-tur, inferendam. Exemplaria complura inter amicos tuos, meosque dividenda mittam opportuniore tempore. Vale, Hagae Comitum Kal. Decembrib; CIOICLXXVII.

EPISTOLA CCLXI.

FR. BEN. CARPZOVII S.

Nic. Heinsio.

Hagam.

NOlui committere, ut annus ante elaboretur, quam ad humanissimas bene-volentissimasque literas tuas respondissem, simulque gratias pro accep-tissimo nitidissimoque munere Monumentorum Paderbornensium doctissimi Principis, qui in tanto culmine jam solus ferme litterarum ac verae eruditionis gloriam & decus tuetur, egissem: sed quas non reperiō tanta benignitate dignas. Neque enim in censum aliquem aut ad ἀντιδωps dignitatem pervenire possunt transmissae hactenus diversis vicibus schedae apud nos natae. ita ut praeter nudam ac simplicem grati animi testificationem nihil mihi relictum hic esse sentiam: & extabit pulcherrimus hic Codex inter reliquos meos libel-los magni non minus debiti mei, ut sic dicam, exactor, quam favoris tui in-dex. Rutgersiana icon mire placuit non magis ab sculptoris artem, quam sub-jecti epigrammatis elegantiam; & cuperem sane omnes, qui eruditione clarue-runt, sive hoc, sive superiore seculo, viros hac ratione excusos esse, quorum non contemnendum numerum, tam conjunctim a certis autoribus (ut *Miraeo*, *Boissardo*, *Sambuco*, *Reusnero*, *Meursio*, *Tomasino*, *Imperiale*, aliisque) col-lectorum & editorum, quam e Gallia Belgioque sparsim accersitorum equidem possideo; desunt tamen adhuc multi, sive quod incuria hominum isthoc ho-noris & memoriae genere eos non coluit, sive quod excusi licet, ad conspe-ctum tamen meum non pervenerunt, eosque adeo indipiscendi mihi copia non data est. *Casauboni* sane, *Petavii*, *Sirmondi*, *Petiti*, *Heraldi*, *Turnebi* & quo-rundam aliorum, patrum nostrorum nostraque aetate eruditione praestantissi-morum virorum icones nunquam videre contigit; cum contra levissimorum autorum saepe imagines singulis eorum ineptissimis libris parietinae instar her-bae adhaereant: praesens etiam aevum, circa *Boeclerum*, *Rupertum*, *Eccenium*, *Schefferum* aliosque nonnullos minus curiosum esse doleo, & priorum temporum erga praecclare meritos viros hac in parte pietatem praedico, cujus egregium docu-

documentum Athenae Belgicae sive Lugdunenses a *Meursio* publico juris factae praebent. Hujus institutum praeclarum ut quis apud vos continet, & secutos illa tempora egregios & praestantes viros, quibus Belgium semper claudit, orbi sistat, famaeque temporum ac memoriae hominum mandet, optandum fuerit: ne forte & tua, vir celeberrime, imago, & doctissimi *Graevii* (Gronovianam nuper ab Amico missam accepi) & reliquorum clarorum virorum vultus cum vita orbi aliquando subducantur. Quare quod de monumento *Virginii Rufi* *Plinius* in epistolis queritur, post decimum mortis annum neglectum & imperfectum illud jacere: & quia tam rara in amicis fides, tam parata oblivio mortuorum, monet, ut ipsi nobis conditoria extruamus, omniaque haeredum vel amicorum officia praesumamus. Simile quid ut de tua icone statuas, & quemadmodum summus & immortaliter meritis vir *Parrens* tuus, vivus spiransque aliquot formis excusus fuit (quarum tres ipse possideo) ita & tu isthoc a posteritate debitum officium praesumas; quodque *Rutgersio* praestitisti, ipse tibi non invidas, autor fuerim. *Schefferi* doctissimo libro de Militia navali difficile erit, nec fortasse ulla ratione consequi poterō, ut conciliem typographum sumtus praebiturum. Nam prioris editionis jam Anno 54. adeoque viginti & tribus abhinc annis, quae prodiit, supersunt exemplaria; unde colligit minus vendibilem hunc esse librum, & si altera editio excreseat multum, pretio aucto difficiliores repertum iri emtores ejus metuit bibliopolarum natio. Ergo nisi *Zunnerus* *Frankfurtensis*, qui de Re vehiculari libros satis emendate excudit, persuaderi poterit, ut & hos de Militia navali, argumento non porus illis dissimiles, typis suis excubet libros, aegre sive apud nos, sive in superiori Germania alibi aliquis ut sumtus necessarios impendat, inducetur. Nescio enim, quam malint hi homines Postillas, quas vocant, saepe aliquot tomos grandes, aut libros Juridicos Medicosve excudere, quam philologicos historicosve, quos tamen per universum orbem apud Pontificios non minus & per Italiam, quam apud aliarum religionum nationes divendere licet: cum isti libri conciones aut fori formulas continentes, non nisi in certo tractu suos reperiant aestimatores emtoresve. Sed ita seculum est, & tale literarum bonarum fatum! Apud nos bibliopola quidam *Pierii* Hieroglyphica recudit, quae metuo ne plurimis mendis ab operis conspurcentur: nam pars *Frankfurti*, pars *Jenae* excuditur, quae dispersis facile naevi occasionem dare potest, cum praesertim istorum locorum officinae imperitos & negligentes correctores alere consueverint; ut proinde nihil emendati vel nitidi nobis de hoc libro promittere, vel apud vos jactare possimus. *Christianus Weissius* quidam, vir satis eruditus mihi-que amicitia cognitus, de inscriptionibus earumque origine natura & usu libellum his diebus praelo submisit, quem non indignum eruditis oculis vestris futurum existimo, & quibusdam, cum primis absolutus fuerit, adjiciam; simulque *Puffendorfi* de Controversiis circa jus naturae sibi motis tractatum, qui nunc in vicinia (quando hic per Antecessores non licet) excuditur, transmittam: ut vel sic aliqua parte debiti, quod eleganti tuo munere me contrahere voluisti, me expediam. Cujus in gratissima mentione, gaudio non minus, quam rubore

iterum suffusus defino, teque multum valere jubeo, utque porro faveas, sum-
mopere rogo. Dabam Lipsiae penultima ruentis Anni *MDCLXXVII*. die:

EPISTOLA CCLXII.

NIC. HEINSIUS

Fr. Ben. Carpzovio.

Lipsiam.

Decembri mense, post valetudinem diuturnam cum ex aula Hagana re-
cessissem in hanc solitudinem, recidiva confestim sum tentatus, quae
adhaesit mihi haecenus. Nunc tamen cum mitius mecum nonnihil agat, nihil
habeo prius, quam ut excusam deprecorque tantam litterarii commercii cessa-
tionem, quam longe odiosissimam detestor execrorque, non alio magis no-
mine morbum expertus molestum, quam quod interea temporis fructu omni
ac voluptate tecum per litteras colloquendi sim fraudatus. Ceterum cum lu-
cem jam aspiciat Vellejus Paterculus animadversionibus meis hinc illic illustra-
tus, auctor typographo fui, ut libelli ejus exemplaria ad te *Daumiumque* simul
nostrum perferenda curaret, additis fasciculo septem Illustrum virorum Poë-
matis, quae tibi ac amico nostro pridem sum pollicitus, tum & Rutgerfiana
imagine, cujus copiam facas, rogo, eidem *Daumio*. Vix tanti, fateor, erat Vel-
lejus, qui ad te mitteretur, cum opus in ipsa valetudine festinatum plus satis
majorem limam requirat, & animum defaecatiorem. Coepi tamen jam caedere
vineta mea, tertia sui parte adauctis meis annotatiunculis, compluribusque
erasis ac mutatis, in quibus videbar mihi scopum non satis consecutus. Muni-
ficentiae tuae longe praestantiora, fateor, opponi oportuit, sed in hac ege-
state quid possim praestare praeter nudam te demerendi voluntatem? Imagines
virorum illustrium non paucas possidebat pater meus, quas inter *Scaligeri* utri-
usque, *Casauboni*, *Lipsii*, *Petri Victorii*, *Joschimi Camerarii*, *Laurentii Medicis*,
Andreae Alciati, *Laevini Torrentii*, *Dominici Baudii*, *Johannis Secundi*, aliorum-
que, quorum pleraeque penes me asservantur etiamnum. *Anna Fabra*, *Tanaquilis*
filia, possidet quidem epistolas parentis sui multo auctiores, quam publice cir-
cumferuntur, sed nescio quas ob causas gravatur eas communicare nobis aut
publico. Menagianas juris amoenitates altera parte auctiores diu est, quod ac-
cepimus ab auctore. *Pierii Hieroglyphica* qui apud vos excudunt reliqua ejus-
dem opuscula, quae rara inventu sunt, huic operi deberent attexere. Difficilis
praesertim ejus est libellus de fulguribus. Puffendorffianum librum, eique addi-
tos complures alios recte accepi pridem, gratiasque pro iis actas a me aliquanto
maturius oportuit, si fuissim meus. Verbofus tecum agam, ubi vires adhuc
jacentes nonnihil erexero ac confirmavero. Vale, Vianae ad Leccam *XXIIII*.
Jun. Gregor. MDCLXXVIII.

EPISTOLA CCLXIII.

FR. BEN. CARPZOVIVS

*Nic. Heinsio.**Vianam.*

Memoriā Amplissimi tui nominis sub discessum Excellentissimi *Graevii*, epistolari officio colendam duxi: quod epistolam, quae de affectu & obsequantia nostra indicis munere fungi debet, a nemine rectius, quam cultus socio afferri posse crederem; qui pluribus etiam coram obsequium erga vos nostrum, cuius unius gloria mihi relicta est, exponet. Utinam vero, quam exhibere par erat officiorum promptitudinem, ita explicare licuisset, quamdiu apud nos fuit vir excellentissimus, ut & ejus desiderio & nostro officio factum fuisset satis, nec is de neglecto hoc queri apud te posset, & detertere, ne idem experiaris aliquando & ipse: verum tum absentia mea, in quam adventus exoptatissimus inciderat, tum valetudo ipsius, qua sub discessum affligebatur, multam occasionem nobis furripuit meritissimo viro inserviendi, a cuius benevolentia veniam expectamus studiorum qualiumcunque: pro quibus ut & tu, qui multum apud ipsum vales, intercedas, rogo. Tibi vero quas gratias pro transmissis cultissimo Vellejo & septem illustrium Poëtarum farragine agam? quasve laudes ob illum dicam? Ergo ne sola Poëtarum cohors tibi debeat, quorum praestantissimos, ut cultiores legerentur, expolivisti; Historicos pari felicitate nunc aggredieris, labore quam utili nobis, tam glorioso tibi. Maeste hoc secessu tuo amoeno, in quo tot praeclara ingenii felicissimi monumenta paras, vir celeberrime, & otium tuum, quod velut alter Cato gravissimis occupationibus diluis, ei que operam reddis, vegeta semperque viridi senecta ex voto transige: nos admiratores tantarum virtutum, quas agnoscere satis non possumus, praedicare nunquam desinemus. Ad *Daumium* hac ipsa die, qua commodum fasciculus advenerat, qua etiam epistolam, quam Cl. *Graevius* afferet, acceperam, utriusque libri exemplar misi, pro quo beneficio tibi proximis literis gratiasaget: pari inopia, de qua ego queror, reddendi officii laboraturus, sed qui tamen ab ingenio suo aliquid quod reddat, in diem promittere possit. Quo cum ego prorsus destituar, nec aut mihi ipse, aut aliis quicquam promittere possim solidi, quod eruditorum censuram sustineat, nuda & simplici imbecillitatis confessione defungar, a gratia tua ejus veniam expectans. Apud nos Lipsiae quid in literarum bonarum studiis agatur, ferme pudet scribere, & narrabit coram *Graevio*, non absque Academiae nostrae dedecore. Professorum Philosophorum modernas operas recitat programma, quod excellenti viro ad te perferendum tradidi, cuius auctor *Thomasius* est, ejus ordinis Decanus. Ab *Obrecht*, doctissimo viro, Brunsvicensis ducis ad Philippoburgum caesi laudationem funebrem mitto, quod ingenium ejus & eloquentiam vobis non improbari considerem, cuius ad Historiae Augustae scriptores annotationum cuius vestrum tulisse calculum ex Cl. *Graevio* intellexi. *Sturmi* Clarissimi apud

Noricos Mathematici non inerudita de Cartesianis disputatio tuis eruditus oculis non indigna videbatur, sicut nec *Schurtzfleischii* Historia Badensis: nam in hoc studiorum genere, & Genealogiarum cultu palmam apud nos fert hic scriptor, quam convitia in eruditos Germaniae viros, quae Satyrico libello superioribus annis sparserat, ambiguum ipsi fecere. *Ziegleri* iconem, nec cultu nec epigrammatis vigore *Rutgersiano* parem, in hujus tamen vicem mitto, *Diomedea* officiorum permutatione. *Elzevirius* iconis istius exemplaria *Vellejo* adjicere sine dubio neglexit: descripsi ergo ex meo pridem misso exemplo cultissimum epigramma, & *Daumio* pridie transmissi: ut si minus oculi, ingenium ejus tamen in participationem hujus oblectationis venirent. De statu rerum nostrarum *Cl. Graevius* narrabit, cujus itineri has literas signans maximoque cum desiderio ex oculis eum dimittens, quem nunquam animo, prospera quaeque, cum primis bonam valetudinem, quam tibi quoque perpetuam esse velit Divinum numen, apprecor. Dabam Halis Saxonum in comitatu Clariss. viri, cujus quo saepius nomen occurrit, tanto desidebabilior existeret memoria. d. xxvii. Aug. Gregor. Anno MDCLXXVIII.

Ediderat enim *Conradus Samuel Schurtzfleischius*, sub ficto *Eubuli Theofdati Sarckmasii* nomine, *Judicia de novissimis Prudentiae civilis scriptoribus* Anno 1669. qui liber plurimos concitavit, qui in eum insurgerent. Vide *Placcii* Theat. Pseudonym. n. 2427. pag. 557. ipsa vero *Sarckmasii* judicia cum pluribus contra eum libellis in unum conjuncta edidit *Theodorus Crusus* Anno 1711. hoc titulo, *Acta Sarckmasiana ad usum reipublicae Litterariae in unum corpus collecta*. adjectis simul notis, quae obscuriora illustrare possint: si quid vero juvenilis aetatis fervore in illis peccaverit, id ingentibus in rempb. litterariam meritis abunde postea pensavit vir eruditissimus, qui meliorem post fata praeconem meritis erat, personato illo & inerudito *Adolfo Claramundo*, qui ejus vitam lingua Germanica edidit Anno 1722.

EPISTOLA CCLXIV.

FR. BEN. CARPZOVII

Nic. Heinsio.

Vianam.

A negotiis nundinalibus vix tantum mihi est otii, comites ut *Daumianis* literis & *Victori Mario* ablegem: neque tamen committere potui, ut sine alloquio, exiguo licet & prolixitati affectus ac cultus nullatenus respondente, quicquam ad te hinc discedat: ignoscas igitur, si tumultuaria scriptione officium isthoc meum, quasi sacrum propter viam, faciam. Rerum nostrarum statum, tum & quid in literis nostri agant homines, ex *Cl. Graevio* tuo te intellexisse existimo: inane ergo foret meum studium, ea si repetere vellem: & siquidem parum ex dignitate literarum & muneris, quod gerunt, isti studia colunt, literariumque ocium alienis magis negotiis, quam severioribus studiis impendunt, ingrata mihi est apud eruditos, quorum tu Princeps es, eorum memoria. *Cellarius* in vicina Citicensi schola, & *Schurtzfleischius* ex *Wittebergensi* Academia praeclaram de se nobis spem faciunt, nostrisque Professoribus, si non eruditionis, certe quidem industriae atque diligentiae laudem ambiguum red-

reddunt: quasdam istorum schedas, ne nihil mitterem, in vicem elegantissimi tui, nuper quem accepimus, Velleji, adieci, non ignorans, me plus quam Diomedea permutatione officium, quod debebam, hac ratione colere. *Buchneri* epistolas, quas *Dresdae* procerum quorundam instinctu bibliopola excudit, ad Cl. *Graevium* misi, cujus non magis, quam tuum judicium super istis exquiro. Utinam vero incomparabilis Parentis tui simili forma liceret conspiciere literarii cum doctissimis sui seculi viris commercii monumenta: ut quemadmodum cum *Baadio*, *Grotio* & *Barlaeo* Poëmatum uno Volumine junctorum editionem habet communem (quam postremam nitidiorem & copiosiore reliquis tibi debemus,) Epistolarum etiam, si non omnium, quod fieri vix posset, plurimarum tamen, quas in scriniis & pluteis paternis delitescere quis non credat? post fata gloriae ipse particeps, nec nos tanti beneficii expertes essemus. Qua de re inter alia ardua studia & negotia cogitationem suscipere tuarum plane partium esse existimo, ad quem quia nominis paterni gloria pervenit, quam illustribus ex proprio ingenio ornamentis quotidie auges, hac quoque accessione eam extendere pertinet. Episcopi Monasteriensis nunciata nuper mors maximo nos gaudio affecit, non magis ob turbulentum atque inquietum rei publicae Germaniae superioris inferiorisque exitiosum ingenium hominis, qui non alia nisi mortis legibus coerceri poterat, quam tranquillum animum optimi & vere incomparabilis successoris, qui pacis studio nihil habiturus est antiquius, quippe qua praecclaras artes & literarum studia, quorum is jure optimo principatum hodie tenet, ali ac foveri intelligit. Et jam animo percipio, quem ingenio assequi non possum, tuum illum divinum spiritum, qui secum rapiet omnem Poëtarum turbam, cujus tu veluti caput es, in laudes & gratulationes Summi Herois Musarumque statore se effundentem, & quod antea saepius a te factum est, hoc potissimum temporum officiosam tanti Principis honori & laudibus venam exerentem. Cujus ardui pulcherrimique laboris cognitione ut careamus, qui hujusmodi foetum praestantissimorum ingeniorum, religiose colimus, quaeso, ne permittas: sed data occasione, quae deesse non poterit. *Elzevirio* nostro, quicquid honori excelsissimi Principis consecratur scribitur ve nobis pro benevolentia tua imperti. Audacem & ferme impudentem in sollicitando me facit amor, quo divina tua Carmina prosequor, & cultus, quo sanctissimum Praesulem veneror: quem si maxime his oculis nunquam vidi, tot tamen praestantissimorum virorum elogiis & illustrissimis Poëmatum, Paderbornensiumque & simul Germaniae antiquitatum monumentis (quae tuo munere possideo) ac tua in Prudentium, Cl. *Graevii* in *Suetonium* praefationibus, adeo in stuporem principalis hujus eruditionis ac doctrinae datus sum, ut antea neminem sive in sacra, sive seculari dignitate, constitutum extitisse, nec hodie aliquem extare *Ferdinando* tuo comparandum, omnino mihi persuaferim. Servet Deus hoc tam sacrum terris depositum, & sero inferat coelo cognatam mentem: sed te quoque, vir ampl. cum excell. *Graevio* diu sospites florentesque rei literariae cum bono servet. Vale. Dabam Lipsiae ruentibus autumnalibus nundinis d. xx. Octobr. cicioclxxviii.

EPISTOLA CCLXV.
N. I. C. H. E. I. N. S. I. U. S.

Fr. Ben. Carpzovio.

Lipsiam.

REverſo jam pridem a vobis ad nos *Graevio* noſtro, homine elegantiffimo, & qui frequenter ad hanc ſolitudinem ſolet viſere, in tanta vicinia, vix enim miliari Germanico remoti alter ab altero, multus inter nos jam non ſemel de te ſermo fuit, quem & valere, & mei meminiffe equidem libens, ſi quid unquam, intellexi. Libellos vero, quos mittebam proxime, recte ad te perlatos eſſe, illud quoque voluptatem mihi tulit. Nam de *Rutgerſiana* effigie, quam libellis additam oportuit, ſatis mirari *Elzevirii* noſtri, cetera non indiligentis, ſupinitatem non poſſum: praefertim cum plura hujus imaginis exemplaria ſub unum idemque tempus illi miſerim, in Gallias, Sueciam ac Germaniam ad alios omnes deſtinata, eaque probe curavit, hinc operam ejus culpae cogar. Pertendit tamen ille, ad te quoque pari fide ac cura eſſe miſſa, ſed inſerta libris ſibi feſtinanti aut alibi occupato non apparuiſſe. Quicquid ſit, vile damnum eſt, & quod minimo negotio, cum faſciculi nonnihil ad te daturus ſum denuo, reparari queat. Sunt enim in promptu mihi complura exemplaria. Pro libellis ad me miſſis gratias ingentes, & quantas reſerre non poſſum, ago. Cl. praefertim *Obrechtii* orationem funebrem Brunſvicenſi Principi dictam, facundam plane, & ceteris illius viri ſcriptis, quotquot haecenus in manus meas venire, reſpondentem legi multa cum voluptate. Apud nos litteratura humanior nunc friget, ſed pax nuper inſtaurata eriget fortaiſſis, ac dignitatis priſtinae reponet. Habes hinc reſponſi nonnihil ad viros duos praefantiffimos. Si ad *Arnoldum* ſcribendum nil habes, litterae curabuntur per *Daumium*, a quo *Arnoldianas* accepi. Tu, quaefo, moleſtiis toties a me exhibitis, toties tibi devorandis, clementer ignoſcas. Cum nuntiandum nihil haberem, placuit verſus nonnullos addere, quos exſultabundus ad primum pacis nuntium effundebam non ita nuper. Vale, *Carpzovi* Poliſſime, & me, quod facis, ama. Vianae ad Leccam Eidibus Novembrib. Gregor. CIOICLXXVIII.

EPISTOLA CCLXVI.
F. R. B. E. N. C. A. R. P. Z. O. V. I. U. S.

Nic. Heinfio.

Vianam.

CUM ſub finem autumnii literae tuae ſuperiori anno duae afferrentur, Drefdae eram, ad nuptias, quas ſororis meae ſupremo aulae Concionatori & Sereniſſimi Electoris Confeſſionario ac Conſiliario Eccleſiaſtiſco *Martino Gero* matrimonio junctae filia celebrabat, profeſtus, ſub exitum anni demum

Lip-

Lipsiam rediens: ubi cum aliis pluribus epistolis tuae mihi redditae sunt longe gratissimae literae: ad quas quod adulta hieme demum respondeam, ob hanc ipsam, quam dixi, causam, veniam tanto faciliorem mihi promitto, quanto magis literarum hanc tarditatem fasciculi, qui interea succrevit, magnitudine expiare studebam. In quo si maxime non reperiesset, quae singula ad gustum tuum sint eruditum, *Buchneri* tamen epistolas ob earum auctoris gravitatem & dictionis elegantiam ac puritatem; *Reinesii* vero commentariolum ob eruditionis variae praestantiam, non ingrata tibi futura confido. Spero etiam cultum & pietatem meam, qua divina ingenii tui monumenta prosequor, non improbatum iri, a qua profectum est, ut elegantissimum epigramma, quod ad primum pacis vestrae nuncium te effudisse scribebas, & commune mecum fieri voluisti, typis nostris exsculpi curaverim: nam cum pluribus amicis & fautoribus, cum primis iis, quos Dresdae reliqueram, id communicandum esset, & vererer ne inter amanuensium manus venustissimo operi maculae aspergerentur, aut structura ejus depravaretur; satius existimavi, typographo id committere, cujus beneficio in plures istud emendatius dispergi posset, quam permittere, ut a calamorum lapsu sordes contraheret. Mirifice istud placuit nostris in aula Heroibus, maximasque auctori gratias & laudes dixerunt, Deum precati, ut idem argumentum nobis etiam suppeteret aliquando, & funestissimum bellum solida ac sincera pace componeretur. *Schubartus*, elegantis ingenii Juvenis, Dissertationem suam de Comitibus Palatinis, *Reinesianae* de Palatio Lateranensi attexam, *Excell. Graevio* nostro dedicavit, ejusque amplissimo nomini geminas has exercitationes inscripsit. Accepi a typographo exemplar, antequam liber esset absolutus, & ad ipsum Celeberrimum virum, cujus gloriae dicatus est, mitti posset, accessuram enim audio Praefationem & indicem: sed imperfectum istum ad te mittere volui, ut jocandi gloriandique apud ipsum argumentum suppeteret, honorem te prius attingere, qui ad ipsum pertinebat. Cum ex eodem Cl. viro forte intellexerim, cum praeterita aestate hinc esset, *Merilli* in Historiam Passionis Dominicae observationes tibi nondum esse visas, & in manus hae meas nuper incidissent, mittere eas volui. Patruum autem a me nuper curatam iconem eum in finem adjeci, ut avunculum tuum nitidius longe exsculptum, ab *Elzevirio* hactenus negligenter habitum, evocaret, & ejus ad nos iter promoveret. Ad *Daumium* & *Arnoldum* literas nuper recte curavi tuas: ab hoc etiam sub nundinas, quae modo abierunt, nostras responsum, quod hinc habes, tuli: & quia is ita voluit, *Fureriana* Monumenta abs se & *Wagenselio* erecta, pridem licet transmissa, sed ob religionem, qua amicitias colo & voluntati mihi bene cupientium obsequi studeo, iterum mittenda. Nec alterum sollicitare, ut officium simile faciat, cessabo. *Arnoldus* ut apud te *Welferianarum* ad *Scaligerum* epistolarum copiam sibi impetrare studerem, maximis me precibus rogavit; iis enim operum *Welferianorum* editionem promotum iri: non dubito idem a te in adjectis literis optimum virum contendisse, nec pario me ulterius indigere. Argentorato nuper literas ab *Obrechtio*, cujus eruditionem & eloquentiam magni facis, accepi, quibus spem fecit, proximis Franco-

furtenfibus nundinis Aeneam Sylvium de rebus Friderici Imp. (quem librum edere B. Socer ipfius *Boeclerus* exorfus fuerat, quam vero curam superveniens mors abruptit) praemiffis rerum Germanicarum fcriptoribus, quos *Freberus*, *Reuberus*, *Pistorius*, *Urftifius* aliive omiferant, fua opera editum iri: Ejufdem etiam ftudio Dictyn Cretenfem ad MStum Argentinenfis Bibliothecae & Merceria-
nam, antiquiffimasque duas, Venetam & Mediolanenfem Editiones exactum, novam confpecturum effe lucem. Quorum doctiffimorum operum defiderio interea tenebimur: primum tamen, quod ad me perlatum fuerit, eorum exemplar ocys ut ad te perveniat, ftudebo. Vale, vir Ampliffime, & Cl. *Graevio*, ad quem proximis diebus literas & fasciculum adornabo, multam meo nomine falutem impertire. Lipfiae d. xvi. Januar. CIOIOCLXXIX.

P. S. Epiftolam fasciculo comitem futuram jam fignaveram, cum recordor jam olim mentionem a te factam fuiiffe Schefferiani de Militia navali operis, cui ut bibliopolam conciliarem, qui fumtus editioni impenderet, mihi injungebas. Quod quidem eo mihi tempore praeflare non licebat; fed interea nactus fum optimum virum *Henricum Ellingerum*, cui perfuafi, ut relictis aliis inutilibus has doctiffimas & fuos emtores reperturas commentationes excuderet, haftenus a *Jansonio*, quod doctiffimus auctor paffim in notis ad Phaedrum queritur, neglectas. Huic igitur fi Clariffimus *Schefferus* ligneas iftas cupreasve formas a *Jansonio* obtinere; exemplar ficut imprimi debet, mittere, nec argentum pro labore honorarii loco postulare, fed impreffis exemplaribus contentus effe velit, editorem doctiffimo libro repertum effe Excell. auctori nunciabis. Vale. Addebam *ὡς τάχις* d. xvi. Januar. CIOIOCLXXIX.

E P I S T O L A. CCLXVII.

N I C. H E I N S I U S

Fr. Ben. Carpzovio.

Lipfiam.

NOvembri Menfe, quantum datur recordari, litteras ad te dabam, quibus inter alia de amici communis *J. G. Graevii* ad nos reditu, poft iter Germanicum feliciter peractum, agere memini. Nec multo poft supervenerunt tuae, quae omni elegantiarum neftare affatim delibutae, quafi in femet ipsis non fatis praefidii haberent, infigni comitatu fcriptorum recens apud vos in lucem editorum adfuerunt. In his praeter munificentiam tuam ingenia auctorum concinna ac polita fum exofculatus: recte enim judicas de duobus illis, qui Wittebergenfi Academiae & Scholae Cizenfi operam fuam addixerunt; nam & ego plurimum de his ipsis mihi promitto. Apud nos nihil jampridem, quo te remunerer, in lucem profertur, adeo poft libellum nuperum remisit impetus ac frigus ingeniorum. Cl. *Spanhemius*, inter Theologos Leidenfes, vir eruditione confpectus, differtationes Ecclefiafticas ad Hiftoriam Ecclefiafticam fpectantes, fed quae nondum ad nos funt perlatae, in publicum dediffe dicitur, quas aliae argumenti non diffimilis fubfecuturac funt.

Anno

Anno praeterito quatuor aut quinque Professores, artium bonarum huic Academiae subducti sunt immatura morte, quorum in locum ut alii substituantur agitur a Curatoribus Lycei. hos inter ad Professionem eloquentiae Graecarumque litterarum evocatus est nuper Daventria *Jacobus Gronovius*, qui Livium paternum suis adauctum notationibus propediem emittet. Cl. *Buchneri* epistolas apud *Graevium* nostrum vidi, sed tantum: nam ut excurrit frequenter vir optimus Vianam e vicinia, ita raro apud me pernoctat, nisi hoc ut fiat feriae permittunt Academicae. De paternis litteris luci dandis cogitavi saepenumero jam olim, jamque satis multas hinc inde collegeram, quae schedae postea, me foris degente, sunt dispersae. Nec video, unde damnum reparari possit, quod earum exemplaria senex noster raro suos in usus asservabat. Episcopi Monasteriensis mortem publicum apud nos gaudium exceperit; nemo certe haecenus est inventus, qui beneficia ab illo in quemquam merentem collata praedicet. Milites inconsolabiliter defunctum plorant tanquam publicum castrorum parentem. In aula Romana per occultos cuniculos hoc agitabat acriter jam pridem, ut Principem Paderbornensem jure successionis, in quam eum adsciverat, deturbaret. Sed alterum & mores sui & gratia, qua pollet plurimum in urbe; adversus hunc dolum tuebantur non minus, quam olim, cum Elector Agrippinatum eum administratione Episcopatus dejectum cupiebat. Modo vita & pacatum regimen meritis tanti Principis respondeant, non dubia spes est, fore, ut dignitas litterarum adversus seculi contemptum egregie ab illo asseratur. Nam ut miti ac comi est ingenio, non minore studio litteratos omnes, quam ipsas litteras complectitur, in quibus quantum possit non uno jam argumento palam fecit. Nisi morbus ab instituto me revocasset, hyemem totam anni proxime decursi, aut certe majorem ejus partem illi dedissem: ita enim inter nos convenerat. Nunc minime committam, ut aestas mihi transigatur, illo non salutato, ducturus comitem *Graevium* nostrum, aliosque eruditionis laude praecipuos e popularibus meis viros, quos Musagetes ille patrocinio suo complectitur. Versus novo ejus honori datos a nostratibus vidi nullos, praeter oden brevem *Hadriani Wallii*, quam aliquando mittam. Minatur & nescio quid *Petrus Francius*, sed cujus nondum mihi facta sit copia. Pontificios, quorum praecipue hoc regnum est, in oblata hac palaestra graviter desudasse non est quod dubitemus. Vale, Vianae ad Leccam 9. Februarib. CIOIOCLXXIX.

EPISTOLA CCLXVIII.

NIC. HEINSIUS

Fr. Ben. Carpzovio.

Lipsiam.

VIX meas diebus proximis ad te dederam, cum ab *Elzevirio* ad me mittitur non fasciculus, sed fascis libris compluribus notae praestantioris refferus, quem una cum suavissimis litteris ad me jusseras perferri. De libris quid

R r 2

di-

dicam? nisi hac tua tam profusa munificentia pudorem meum gravissime oneratum, aut potius oppressum esse, quem si fui aliqua ex parte levatum cupis, enixum te in modum obsecro quaesoque, ut indicem ad me mittas eorum codicum, quos praecipue in tua bibliotheca desiderari, quosque usui fore praeter ceteris arbitraris. Possideo enim in pluteis armarii mei complurium librorum duplicia exemplaria, quos in officinis librariorum nequicquam quaeras. Quid? quod frequentes admodum hîc sunt auctiones insignium bibliothecarum, quas viris litterarum studiosis, vitae subductis, haeredes distrahunt. Hoc igitur si egeris quamprimum, incredibile dictu est, quanto opere me tibi habiturus sis adstrictum. Accessit enim & alterum beneficium litteris tuis, quod quando in virum mihi amicissimum a te collatum, non possum non mihi praestitum interpretari, atque ea prae ceteris causa me compulit ad responsionem festinandam, cum nunties inventum a te typographum, qui Schefferianos de militia veterum navali commentarios typis suis descriptos velit. Dedi hodie litteras ad virum eruditissimum, quae rei totius eum certiore facerent. Nec dubito conditionem oblatam ab eo amplectendam fore. Ceterum figuras sive tubulas, quae aeneas, quae ligneas ad opus id spectantes, cum *Daniel Elzevirius* ab heredibus *Joannis Janssonii* redemerit, rogavi illum ut significaret tibi, quo eas pretio typographo sit traditurus, mihi quidem jam olim data fide, nihil inde lucri ad se redundaturum esse, sed laminas istas tabulasque eodem, quo sibi constitissent, pretio velle translatas in illum, qui operi huic edendo sese foret accincturus. Quorum a me est admonitus. Porro salivam haud leviter movisti nobis spe facta, fore, ut *Dictyn Cretensem*, scriptorem sane non inelegantem, *Cl. Obrechtus* e membranis Argentinis castigatum proferat in lucem. Quae de re si tempestiviores nuntii ad me venissent, communicassem codicem meum, non quidem vetustum, quippe descriptum in charta, praestantis tamen notae e codice perantiquo descriptum, cujus opera locos centum & plures *Josiae Mercero* intactos, hoc in scriptore diu est quod castigavi. Minabatur ante hoc quadriennium ejusdem editionem post *Florum* & *Callimachum Anna Fabra Tanaquilis* filia, usumque codicis mei petebat; sed an liber in lucem sit prolatus haud dixerim. Non vidit *Mercerus* inscripsisse *L. Septimium* hoc opus *Q. Aradio Rufino*. *Rufinus* enim vocatur sub finem epistolae, & *Aradii* non *Arcadii* nomen disertim praefert codex meus. Ut jam sciri possit, quae aetate *Dictys* Latio sit donatus. Vixit enim *Q. Aradius Rufinus* aetate *Crispi* & *Constantii Caesarum*, ut patet ex inscriptionibus *Gruteri* non unis, quae meminerunt ejus perhonorifice. Laudatur & a *Symmachō* versibus, quas imagini virorum quorundam illustrium subscripsit. Sed de his alias. Epigramma paci instauratae a me datum, tanti sane non erat, quod typis describendum curares. Nunc aliud ecce monumento sepulchrali, quod publico nomine hîc excitatur *Duci fortissimo Michaeli Rutero*, inscribendum. Accedet brevis narratio vitam ejus & res gestas complexa. Sed jam nimius sum. Vale, vir eximie. Vianae ad Leccam 12. Februar. CIOICLXXIX.

in p. 316. 11

35

EPI-

EPISTOLA CCLXIX.

F. R. BEN. CARPZOVIVS

*Nic. Heinsio.**Vianam.*

TEneo institutum meum, & ab aliquo iterum intervallo appello te literis, vir celeberrime, observantiae meae & cultui testando: quod ingratum tibi non esse puto, qui mihi, si omittam, ingratus adversum tua merita videar futurus. Nunc quidem tanto minus silere debui, quo magis tibi geminare officium placuit, & binas ad me literas, quas eodem tempore accēpi, dare: e quibus amorem erga me tuum abunde cognoscere licuit, maximamque oblationem cum e reliquis earum partibus, tum ea inprimis, quae de Monasteriense Episcopo, ultra Maecenatis sortem & merita erecto Principe, narrabat, capere. Nec minores delicias cultissimum epigramma & fortissimo Heroe *Rutero* dignum monumentum, stilo tuo quod dignatus es, praebuit: ad quarum participationem quod nos invitare voluisti, gratias verbis modicas, affectu tamen ingentes, & rei ipsi prorsus pares ago, studeboque omni officii ac cultus genere hanc benevolentiam demereri. De *Schefferi* opere, quo antiquitates & Historiam veteris navalis militiae illustriores & priori editione auctiores elaboravit, ubi certiora ab ipso clarissimo autore resciveris, nobis indicabis. Quandoquidem is, quem ad sumtus editioni novae huic impendendos pellexeram, proposita lucri inde redundaturi spe, & aliis idoneis argumentis, nunc graviter decumbit, & vita ejus a maligna febre, quae ipsum superioribus diebus incessit, extremo periculo exposita est, veremur, ut cum vita spes novi hujus apud nos prodituri eruditissimi libri extinguatur; qua ratione *Salmasianorum* etiam operum expectatione, ob mortem *Someri*, quae intervenisse nunciata est, nos excidisse animadvertimus. Multum sane valuit oratio apud istum hominem; nec alium fortasse persuadere possim, ut sumtus praebeat ad promovendum hunc librum necessarios, nec exiguos: quippe quos intendunt formae, sive eae ab *Elzevirio* redimantur, sive conficiantur novae: quod genus librorum plerique hīc recusant, cui vident non magnum conciliari apud nos posse pretium, & impensas abhorrent, quibus dubitant an lucrum sit certo responsurum. Praeterea eo bibliopolae sunt ingenio, ut, cum animadvertunt primam alicujus, optimi licet, libri editionem cito distractam non esse, alteram suscipere in se formident, nec temere aggrediantur: ac tanto magis hīc trepidant, quod soli *Elzevirio* ex *Janssoniana* venditione octuaginta exemplaria superesse intellexere, passim etiam adhuc in tabernis alia prostant. Postquam ex Suecia certiora cognoverimus, an nullo oblato pretio Cl. Auctor editionem permittere velit? (de quo tamen dubito,) rectius cum bibliopola, modo is convalescat, transigere licebit. De Musicis rebus ex his oris nihil ad te referre jam novi licet. *Boxhornii* epistolas & *Gruteri* discursus ad Tacitum denuo recidunt nostrates typographi, nulla tamen accessione locupletiores, proinde

Rr 3.

nec

nec gratum fuerit de his cognoscere. Nec Juridicos aut Theologorum labores, quos hîc moliuntur, referre attinet. Lutetiae Parisiorum superiori aestate repertum atque in lucem editum esse opusculum quoddam Lactantii ἀνένδοτον, rumoribus nescio utrum certis an incertis acceperim: de quo siquidem certiora vobis constare existimo, nemo quam tu melius docere me poterit. Ab *Arnoldo* en literas ex Norico allatas, ad quas si quando respondere voles, mea opera uteris. Vale. Dabam Lipsiae Idibus Februar. cıııııCLXXIX.

EPISTOLA CCLXX.

FR. BEN. CARPZOVIIUS

*Nic. Heinsio.**Vianam.*

CRebrae haëtenus fuere cogitationes de gratiis reddendis pro gratissimo Virgilii & vere augusto munere, sive auctorem, sive editorem & ejus in concinnando textu curam, sive maximum Regem, cui istud consecratum est, sive denique chartam, cui impressum, spectem Quae dum singula frequenter animo expendi, ancipiti cura istum distrahi sensi, quodnam dignum reperirem ἀντίδωπον. Accedebant & reliqua, quae ad me venere, benevolentiae tuae signa, Rutgerfiana icon, *Francii* Bucolica, Ode item nescio a quo scripta in novos Principis Paderbornensis honores, quae omnia identidem aures & animum mihi de gratiis exsolvendis vellicarunt. Neque tamen rationem haëtenus invenire licuit, summo licet quaesitam studio, qua nomen hoc expungerem. Ergo mala mihi imitanda nomina censui, quae in diem promittunt, ubi solvere nequeunt, & spe, qui fidem ipsorum sequuntur, alunt, exquisitissimis verbis orantes, accipiat interim creditor & consulat bene, quod est in manu, cum totum ac solidum numerare praesentis copiae haud sit. quo in censu paucae adjectae schedae haberi debent. *Daumio* alterum Virgilianum (tertium *Arnoldo*) exemplar & *Marium Victorem* cum Rutgerfiana icona misi: quae antequam ad ipsum pervenirent, literas huc miserat, ut ad te curarem. Hoc dum epistolare officium differo, sperans e nundinis sive Francofurtensibus sive nostris suppetias interea venturas debito nostro exsolvendo, in museo in hunc usque diem delituerunt, quarum ut tarditati ignoscas, aequae ac nostrae in literis dandis morae, etiam atque etiam rogo. Lactantii de Persecutione libellus, modo genuinus sit, de quo dictio haud dubiam faciet fidem, avide a nobis expectatur: ac devinciet sibi ejus editione doctissimus *Baluzius* quosvis, qui has eruditae elegantis & sacrae antiquitatis reliquias, ceu χρίσθα λέιψα, aestimare sciunt. Forte & reliqua Lactantii opera denuo edet, ut integrum hunc castigatissimae dictionis Patrem, quo nemo disertius contra paganos & Tullianam ubertatem propius scripsit, ei imputemus, cui jam ob *Salvianum*, & *Vinc. Lirinensem* & *Reginonem Abbatem Prumiensem* nitidiori forma editos debemus. Utinam & pari felicitate alia sancti Patris haëtenus deperdita, quae habita sunt opera, Symposium, Hodoepericum, Grammaticum, libros

libros epistolarum & alios, quorum notitia ex Hieronymo ad nos pervenit, reperire daretur; ut integro hoc sacrae eloquentiae flumine gauderemus. *Berkelii* cum Lusitano pugnas haud inviti spectabimus, licet, ut verum fatear, magis amemus tranquillum ac sedatum quam litigiosum istud scribendi genus, muliercularum quod potius ora, quam doctorum calamos decet. In vicinia acerrimae inter Wittebergeneses & Jenenses Theologos exercentur rixae, de quibus etiam editi extant grandiores libri: Sed compescuerunt eas Serenissimi nostri Electoris & reliquorum Saxoniae Ducum mandata, quanto cum scandalo de sacris negotiis & fidei mysteriis inter ejusdem religionis Doctores certamina & contentiones exerceantur, advertentium. De Boxhornianis ad Parentem tuum *vv év áγίοις* exaratarum in scriniis tuis delitescentium epistolarum mentio a te facta desiderium iterum excitavit nobis, apparatus istius publici juris facti aliquando videndi: precesque extorquet, ne omittere velis curam egregiis his & doctis schedis si non ipse impendere, alteri tamen demandare, ut uno volumine elegantes hae Magni Parentis ad aevi sui Doctos, & horum ad ipsum epistolae collectae prodeant. Extant hunc in modum vulgatae plerorumque Doctrina clarorum literae, quas tamen nitore sermonis & varietate doctrinae, vestrae longe superabunt, & paterni nominis gloriae, editis tot praeclaris ingenii & eloquentiae monumentis illustris, haud contemnendum cumulum adjicient. Quod si ergo Ciceroni, prudentissimo viro, non minor epistolarum suarum, quam divinarum Orationum cura fuit, ac aequae insignis, si non praestantior ex istis, quam ex his utilitas ad posteros dimanavit, tibi etiam, cui tersissimam Paternarum Orationum & Poëmatum collectionem debemus, incumbit par studium Epistolis adhibere, eodemque beneficio & de beatis defunctorum manibus, & superstitum studiis praeclare mereri. Bibliopola, cui *Schefferi* de Militia navali librum obtrusi, & ut recuderet persuasi, dudum convaluit: sed fidem meam apud *Elzevirium* pro obtinendis aeneis ligneisque formis & residuis exemplaribus nolim interponere. nam quandoquidem hoc hominum apud nos genus in argento exsolvendo & liberanda fide aequo tardius est, & ingratas creditoribus moras necit, ego, ne *Elzevirius* de me querendi causam habeat, intercedere ambigo: sed ut ipse bibliopola super eo negotio cum *Elzevirio* transigat, monui. ante vero quam cum isthoc conventum sit, exemplar, si maxime e Suecia advenerit, huc mittendum non erit: ne si postea & noster eodem, quo *Jansonius*, malo laboret, eadem de ipso & me simul, qui hunc conciliafsem, doctissimo viro querendi detur occasio. Vale, vir amplissime, & de studiis elegantioribus bene mereri perge, me quoque, qui ista assidue colo, favore & benevolentia porro complecti ne dedignare. Dabam Lipsiae. Idibus Junii *ciocioclxxix*.

EPISTOLA CCLXXI.

F. R. BEN. CARPZOVII S

*Nic. Heinsio.**Vianam.*

T Ardorem me esse officii, quod gratissimis tuis Quintili mense ad me datis literas debeo, cultorem haud diffiteor, nec parum in ruborem datus sum, postquam geminare tibi epistolas placuit, iterataque humanitate me mei officii admonere, atque e veterino quasi excitare. Sed nulla mea ignaviae aut negligentiae culpa accidisse credas, quod integrum & amplius mensem abire passus fuerim, antequam ad respondendum me componerem, verum longiusculi itineris per Noricum & Bojemiam moras, quas superiori demum septimana reditus noster in patriam abruptit, fecisse, ut lentum fortasse tibi nomen videar. quod si maxime lentum, minime tamen malum experiaris, spero me tua benignitate ab omni crimine absolvi posse. Complura autem e doctissimis juxta & humanissimis literis tuis didici, eaque in aliorum communium amicorum illico notitiam perferre studui *Daumii* & *Arnoldi*; nostrorum etiam hujus Academiae Professorum, qui omnes litterarum tuarum elegantia admodum capiuntur, nec praestantius istis sibi quicquam offerri posse fatentur: cumprimis nos exhilaravit spes *Flori* & *Catulli Graeviani*, quos e tuis litteris mox prodituros intelleximus. *Vossii* item de Sibyllis & earum vaticiniis Commentarius avidos nos istius conspiciendi reddidit. A Cl. *Graevio* Amaenitates *Menagii* nuper accepi, & cum bibliopola, ut typos elegantes & nitidam chartam illis impenderet, jam egi; ac promisit is, nihil operae, studii aut impensarum se subterfugere velle, quae ad libelli cultum facere possint. Nam cum domi nobis non nascantur hujusmodi foetus eruditi & elegantes, foris omnino quaerendi sunt, & inventi lautius delicatiusque habendi, ne autores poeniteat, amaenos suos libellos in loca inculta incidisse. *Baluzii* Miscellanea e Galliis arcessivi, literisque indidem allatis certior jam sum, in via ad nos ea haerere: sed doleo primum saltem tomum venire, alterum, cujus in fronte *Lactantii* de Persecutione libellum ἀνέκδοτον comparere indicasti, comitem ei datum non esse: forte quod nondum absolutus esset, cum is urbe excederet. Studebo tamen, ut eadem via ad me alter perveniat, qua priorem me intra paucos dies nacturum spero. *Arnoldum* de *Welsarianis* ad *Scaligerum* epistolis, quarum quadraginta in scriniis tuis repertas nunciabas, hac ipsa die datis ad ipsum literis certiolem feci, eique apographum gratissimae tuae epistolae ad me super iis datae misi: nec parum hoc lactissimo nuncio ipsum gavisurum confido, cujus gaudii testes proxime literas ad te dabit, & ut *Welsarianas* istas epistolas huc mittas, unde rectissime & omnium tutissime *Noribergam* perferri poterunt, rogabit. Igitur in fasciculum collectas colligatasque *Elzevirio*, vel hujus ministro *Jacobo Zettero* tradere poteris, si libuerit, is *Adriano Hoekio*, mercatori & civi apud *Amstelodamenses* primario, & quem *Elzevirius Zetterusque*, ipse etiam

Cl.

Cl. *Graevius* optime norunt, reddet, a quo nil dubitandum recte ad me omnia curari. Ego vel ipse per amanuensem acceptas describi, vel in Noricum mis-
 fas, quo singulis hebdomadibus tutissimae se occasiones fasciculos mittendi of-
 ferunt, ut *Arnoldus* describat, & manu *Welferi* scriptas iterum huc mittat, ut
 ad te inde redire possint, providebo. Omnibus enim modis cavebimus, ne
 ἀδουλία & benevolentia tua aliquid patiaris detrimenti. Ammianum Marcel-
 linum iterum Parisiis prodire, curis secundis *Valesianis* auctiorem, summo cum
 gaudio accepimus, quod si enim ullus alius inter bonos auctores, hic sane eru-
 ditum commentarium & luculentum desiderat, obscurus caeteroquin, & tum
 propria, tum aliena culpa lutulentus. Harpocrati & Hesychio idem fatum
 cupimus, ut ille *Valesium*, hic *Heinsium* sospitatore nanciscatur: nam *Schre-
 velio* praeter chartae & typi nitorem nihil Hesychius debet. Memini me, nes-
 cio tamen quando & ubi locorum, supplementa Harpocrati & Hesychii vidisse edita,
 quae nec ipsa tamen omnem lacunam explerent, & damna farcirent, quae *Le-
 xicon* hoc expertum est: forte ei felix *Valesii* sagacitas majorem salutem affe-
 ret. Vita doctissimi hujus viri ab *Hadriano* fratre edita & scripta an ad vos
 pervenerit, scire velim, ad nos quidem sola mentio, quam Eruditi in Diario
 Gallico fecerunt, & titulus ibi consignatus pervenit, libellum ipsum consequi
 non potuimus, licet omni studio passim amicos sollicitarim, ut ejus me compo-
 tem reddant. Ex Anglia Jamblichum *Galei*, quem memoras, accepi, prae-
 terea Mythologos veteres, Palaephatum, Heraclitum, Phurnutum, Sallu-
 stium, Ocellum Lucanum, Timacum Locrensem & similes ab ipso junctim
 editos; Historiae item Poeticae scriptores, ut sunt Apollodorus, Antoninus
 Liberalis, Parthenius, uno volumine ejusdem cura & studio comprehensos.
 Porro Maximum Tyrium minori forma excusum, Dionysii Alex. *ἑρμηνείαν*
 cum amplissimo *Guil. Hilli* Commentario, Theocritum cum graecis Scholiis,
 Herodianum & Platonis quosdam Dialogos a *Job. North* collectos. Sed
 praeter nitorem chartae & elegantiam typi nihil peculiare quidam ex his li-
 bris habent, ut ferme poeniteat quosdam grandi satis, si eorum spectem te-
 nuitatem, pretio ex tam longinquis oris alleotos esse. *Vossii* tamen de Sibyl-
 lis & earum vaticiniis Commentarium quovis pretio redimere vellem, si ejus
 potiundi daretur facultas: nam ob ingenii & doctrinae ubertatem, qua Cele-
 berrimi viri scripta pollent, magna mihi de hac Commentatiuncula, licet mole
 non grandis sit, promitto. E Suecia superioribus diebus *Olai Rudbeki* de Suc-
 ciae origine, Antiquitate, latitudine & ubertate opus vastum, sub nomine At-
 lanticae (quo Sueoniam veteribus dictam fuisse tradit) editum, beneficio Cl.
Pufendorffii accepi, atque argumenti praestantia & tractandi solida atque eru-
 dita ratione captus sum, ut ab ejus lectione nondum divelli queam. Mira
 quidem & paradoxa in eo traduntur, cum primis Deastros & Heroas veterum,
 omnem litteraturam Europae, ipsaque ejus elementa & plerasque nationes sep-
 tentrioni suo originem debere; quae omnia tamen tam solide, copiose atque eru-
 dite, tum ex autoribus antiquis, tum monumentis Sueciae demonstrat & tractat,
 ut eruditus etiam hac sua opinione (quam falsam, quicquid conetur ostendere,

existimo) imponere possit. Ipse *Pufendorfius* Introductionem in Historiam recentem Holmiae emisit in publicum: & nunc totus est in Historia contenda, cujus decem libros jam absolutos nunciavit, duodecim adhuc restantibus. *Boecleri* Historiam Belli Danici cum Suecis Anno 43. & 44. gesti ibidem excudi, tribus libris parum prolixis, nitidissimo tamen stilo scriptis, adjecit; *Schefferi* *Ἡ φύς ἐν ἀγίοις* de Insignibus Regni Sueciae Commentarium jam prodierit. Sed huc nondum appulit in nostras oras. *Huetii* demonstratio Evangelica, grandiusculus liber, quo Delphino Veritatem Religionis Christianae Euclideo modo persuadere & ostendere sategit, e Gallia his modo diebus allatus est, sed quem nondum evolvere & perlustrare licuit: ut primum tamen liberos ab occupationibus variis spiritus ducere potero, & ad eruditas curas me recipere, a negotiis vel forensibus publicis vel domesticis mercurialibus, primum erit perlegendi libri hujus studium nostrum: Neque enim vulgaria mihi inde polliceor, tum ob auctoris celebritatem & famam, tum Delphini augustam dignitatem, cui plebeja a tanto viro munera haud offerri existimo. De Angliae Regis morbo, & suspitione causae istius varia multorum sermonibus hinc circumferuntur; certiora e septentrione de pace inter Potentissimos Reges conciliata nuncii afferunt. Utinam veri hi sint, neque pax minus vera, sincera ac solida, ut tandem aliquando coalescant Regum ac Principum animi, nec in orbis perniciem amplius, sed salutem & emolumentum conspirent. Vale, vir amplissime, meque, quem tuorum in numero haberi intelligo, benevolentia & favore porro complectere. Dabam Lipsiae d. x. Septemb. st. Jul. Anno MDCLXXIX.

E P I S T O L A CCLXXII.
N I C. H E I N S I U S

Fr. Ben. Carpzovio.

Lipsiam.

Ecce tibi, vir excellentissime, *Marci Velseri* litteras ad magnum *Scaligerum* exaratas, quotquot in scriniis nostris comparuerunt. Si quid ejusdem auctoris in manus meas postea inciderit, id ad te perventurum esse aequè ac illa, quae nunc mittuntur, ne dubitato. Si aliquis hinc locorum in promptu fuisset mihi, cui cura describendarum epistolarum tuto potuisset concedi, te liberasset hoc incommodo, ac simul evitasset omne discrimen, licet perexiguum, quod autographis hisce in itinere erit subeundum. Habui hesternò die ab *Emerico Bigotio* litteras, quibus narrat Lutetia se Rothomagum cogitare, sed ita, ut Parisios post exactum Paschatis proximis festum sit denuò aditurus, interea temporis fore, ut prodeat in lucem vita Chrysostomi, suo studio ex antiquis eruta membranarum, cum variis sanctorum vitis atque scriptis, ut hactenus ineditis, ita ad Ecclesiasticam historiam majori ex parte spectantibus, quorum indicem ad me mittit. Ceterum, quod a te multis precibus rogatus erat, ut inter armaria Mazarinianaee Bibliothecae *Velseri* ejusdem commentarios MSSos

in

in vetus Kalendarium indagaret, id se haud indiligenter tentasse, sed frustra, asseverat. Neque enim Catalogum illius bibliothecae ullum exstare, nec libros eum in ordinem esse redactos, ut inquiringibus facile se fiant, multos adhuc ibi desiderari, qui olim comparuerunt, prius quam sub hastam missa fuit bibliotheca, ipso proscripto Cardinale. Has *Bigotii* litteras e Gallia ante paucos dies redux misit ad me *Elzevirius*, additurus complures amicorum litteras, quas Lutetia secum advexerat, nisi coactus esset sarcinas Valencenis festinabundus relinquere, mox tamen adfuturas, in quibus & *Hemici Valesii* in Harpocratonem annotationes, & observationes *Petri Petiti*, apud nos typis describendae, cum aliis opusculis ineditis. Aderit & brevi quicquid in Galliis operum eruditorum annis proximis luce donatum est, cum indice accurato mox edendorum, quem subministravit idem *Bigotius*. Auguror in his fore etiam Lactantii libellum de persecutione, quem Miscellaneorum *Baluzii* pars exhibet secunda. Tomum priorem proximis diebus apud *Graevium* nostrum inspexi, qui binas Sulpicii Severi epistolas haecenus in publico non visas, cum aliis exquisitae notae opusculis non paucis complectebatur. Narrat porro *Bigotius Cingium* amicum suum, hominem pereruditum, qui praeter Glossaria *Labbaei*, Lexicon nobis nuper dedit Latino Barbarum multae eruditionis ac diffusae opus, trinis voluminibus comprehensum, pari nunc studio diligentiaque Lexicon Graeco-Barbarum adornare; quo, quicquid *Rigaltius*, *Meursius*, & alii congeffere jam pridem, suis observatis immane quantum sit locupletaturus. plura habebam narranda, sed temporis angustiae non permittunt. Vale, vir praestantissime. Vianae ad Leccam XXI. Octob. MDCLXXIX.

EPISTOLA CCLXXIII.

FR. BEN. CARPZOVIVS

Nic. Heinsio.

Vianam.

AD suavissimas & auro contra cariores mihi literas tuas Sextili mense datas nullum prorsus haecenus respondendi otium concessum fuit; subinde intervenientibus urgentibus negotiis, quae ne id, quod maxime cupiebam, facere possem, impediabant. Accidit hinc, ut optimi viri *Arnoldi* epistola superioribus autumnalibus nundinis huc allata in hunc usque diem in museo meo delituerit, de die in diem protracto literarum officio, quo comitari eas volebam. Quod quando jam serius facio, ignoscas huic tarditati, a nullo animi & obsequii erga te languore, sed pluribus intervenientibus obstaculis profectae. Rogari te autem a me quoque *Arnoldus* voluit, & studium, quo in bonas litteras fereris, sollicitari, ut Epistolas, quas a *Scaligero* ad *Welferum* datas habes, huc mittere, & Cl. *Bigotium* de Kalendario Velferiano iterum monere velis, ac operam dare, ne istis elegantibus chartis eruditior orbis porro careat. De quibus cum in adjectis literis prolixius eum sententiam exposuisse intelligam, nihil addere voluissem ego, nisi amicitiae ratio prohibuisset, exiguum isthoc;

officium optimo viro, qui in precibus meis aliquid praesidii sibi futurum credebat, denegare. An *Elzevirius* ex itinere Gallico redux *Valesianarum* chartarum quicquam attulerit, quas ab haeredibus eum obtenturum esse nuper indicasti, cognoscere velim: ex animo certe cupio id factum, ob reconditam, quam doctissimi viri meletemata, brevissimae etiam notulae & observationes spirant, eruditionem. Ipsius *Theodoretum* & *Euagrium* juxta *Parisinum* exemplar hoc anno a me persuasus recudit *Beckensteinus*, cui meum e *Galliis* allatum exemplar, aeque ac antea Anno 1677. *Socratem*, & *Sozomenum*, & Anno 72. *Eusebium*, imprimendum tradideram, quod animadverterem nulla optimorum horum librorum in *Germania* haberi posse exemplaria, nec nisi infano pretio e *Galliis* accerfi. In eodem proposito, quod in hisce libris secutum esse bibliopolam non poenitet, ut pergeret, & *Ammianum* cum *Valesianis* *Notis* recuderet; ac *Lindenbrogianas* iis jungeret, suaseram: nunc vero posteaquam a te intellexi, secundas *Clarissimi* editoris curas superventuras esse, autor extiti, ut hanc curam tantisper seponat. Sane rectius consilium sequi librarios existimo, qui *typos* & *chartam* bonorum autorum veterum melioribus editionibus applicant, quam qui nostrorum quorundam hominum jejunis commentationibus in publicum proferendis argentum impendunt; & iisdem saepe chartas maculant. Accedit, quod bibliopolarum nostrorum nemo in *Gallias* vel *Britannias* aut *Belgium* excurrit, ut melioris notae libros huc ferat: qui non *Francofurtensem* in mercatum veniunt, ad nos (nisi ab *Amicis* id rogatis nobis quandoque coemantur, sed quorum tamen advehendorum rara est occasio) nunquam pertingunt. Multos ergo in *Diario* *Eruditorum* *Gallica* lingua, quod quotannis prodit & *Amstelodami* plerumque recuditur, deprehendo, qui in urbem nostram, nisi a me evocentur, nunquam pervenirent. Ut ecce *Glossarium Caroli du Fresne Domini du Cange*, quod in tuis ad me literis aliquoties laudasti, *Petri Dan. Huetii* demonstratio *Euangelica*, *Henrici Valesii* vita ab *Hadriano* fratre scripta, *Baluzii* *Miscellanea*, *Systema Bibliothecae S. I. Coll. Paris.* *Historia summorum Pontificum* per numismata a *Claudio du Molinet* deducta, hoc ipso mense ab amico *Parisiis* nunc degente aere meo comparati sunt, nulli nostrorum tabernariorum nec fando cogniti, nec forte nunquam acquirendi; Igitur penuriae nostrae haud rectius subveniri posse intelligo, quam si meliores (non rariores, nam hi non semper optimi sunt) quique recudantur typis nostris, nec solis *Theologicis* *homileticis*, *Juridicis*, *Medicisve* *practicis* & *Scholasticis* libellis & operibus tabernae distendantur. Eodem consilio jamdiu bibliopolam quaesivi, qui *Petri de Marca*, illustrissimi *Archiepiscopi* *Parisiensis*, egregium opus de *Concordia Sacerdotii & Imperii*, cum doctissimis *Baluzii* accessionibus, quo absolutius elegantiusque in hoc genere dari non poterit, typis *Germanis* exscriberet, ut nostri homines quid in istis literis & *Canonicis* doctrinis adhuc lateat, & quanta istis inferri possit eruditio cognoscant, ac discant quam severa lege ab istis hominibus studia haec colantur. Nondum tamen invenire licuit promptum ad sumtus necessarios suppeditandos, plerisque inepte causantibus & a male doctis persuasis, *Gallicanae* saltem *ecclesiae* istum

librum

librum esse utilem, nostris studiosis parum profuturum. Volui haec apud te queri, vir celeberrime, & causam afferre, ut opinor, satis gravem & idoneam, quae me, ut identidem exterorum libros recudi curem, (quod *Bocharti Phaleg*, *Gramondi Historiae Gallicae*, *Cambdeni Annalibus*, *Marshami Chronico* Canoni, ut minores libellos taceam; seu studio seu consilio meo contigit) impellit. Nunc (ne de externis saltem me sollicitum putes) de *Reinesiano* Inscriptionum Syntagmate, quod quantum per Reipublicae, (cujus in partibus gerendae cura mihi imposita est nuper) rationes & domestica negotia rei familiaris licet, quam cultissimum prodire studeo, quaedam referenda sunt tibi: nam ad te, horum studiorum optimum praestantissimumque Magistrum, novi hujus operis, quam J.Cti vocant, nuntiatio pertinet. Disiectum & sparsum per mille chartas in ordinem & munditiem redegi, & typographiae necessariis usibus omnia aptavi, ut jam nullis inquinatae minutissimaeque scriptionis remoris impediti pergere in eo operae, si velint, possint: sed emendationi singularum plagularum per negotia praeesse & incumbere nequeo, aegre ferentibus typothetis, si quandoque per integrum diem, antequam vacuum mihi sit ad perlegendam & emendandam plagulam tempus, otiosi detinentur. Accidit hinc, ut adeo emendatae non proditurae sint omnes paginae; sed defectum tamen hac in parte explebit Erratorum indiculus, sub finem operis adtexendus, in quo fideliter notabo, quaecunque vitiosa, disiecta minusve sana deprehendero. Binas hinc speciminis loco accipe plagulas, & ex ungue leonem cognosce: mit tam integrum, ubi absolutum fuerit, opus: cui si carmen praefigere volueris, ingens & solum hoc (plura non corrogabo, nec literariam stipem ostiatim petam) splendidum accedet, & Antepagmenti illustris loco extabit monumentum. Quod haudquaquam necesse est ut acceleretur, tardus enim procedit typorum labor, nec antequam annus vertat, absolvetur, ut proinde commodo tempore, & animus ubi fuerit serenior, quem ad scribendos versus tuus requirit Naso, istum ad hanc curam applicare possis. Herodotum & Jamblichum de Mysteriis ex Anglia accepi, verum doleo de vita Pythagorae non simul prodiisse Jamblichi libros, quos *Arцерii* cura editos habeo, sed qui passim emendationem postulant: forte & hos dabit nobis alio die doctorum, & inprimis de Graeca literatura praecclare merentium, Anglorum industria. *Vossii* de Vaticiniis & Oraculis Sibyllinis nondum mihi visus est liber; praeclara tamen de eo mihi omnia promitto, & quamprimum videre eum gestio, inque mandatis amico Londinensi dedi, ut primo quovis tempore ad me istum, ubi prodierit; mitat. E Galliis nunciatum est, Diurnum Romanae Ecclesiae, vitam Chrysostomi per Palladium Graece, & Acta SS. Martyrum Tarardri, Probi, Andronici & Bonifacii Romani, Historiam item Constantinopolitanam & veterum Constantinopoleos Imperatorum a *Cangio*, qui Glossarium edidit, cum multa congerie veterum nummorum & iconum adornatam, mox proditura esse. Cl. *Graevii* triumviros amorum optimis Commentariis instructos accepi, Florum vero expectamus avidi, quippe ad cujus cultum plura ab ingenio ejus limatissimo accessisse spes est. Nolui inanibus literis ejus morari tempora, studiorum-

que in publica & literarum commoda proficientium cursum sistere: salutabis igitur cum meo nomine, & quaedam hujus epistolae, si quid gratum inde cum cognoscere posse judicas, argumenta, & praeterea *Frankensteinii*, familiariter ipsi cogniti, quem heri extulimus, mortem, (cujus testes funebria adposui carmina) narrabis: novi enim saepius ad te ipsum excurrere. *Annae*, *Tanaquilis Fabri* Filiae, *Florum* nuper accepi; unde potiora (si quae talia judicat) in editionem suam deducturum Doctissimum virum confido; proindeque consilium istius mihi comparandi abjeci. E. nundinis nuper mihi fasciculum per mercatorem ad vos forte tendentem; cui inerunt a *Daumio* literae & fasciculus; & librorum semestris Catalogus: recte singula ad te pervenisse, puto. Vale, vir summe, & benevolentia ac amore, quem crebris argumentis expertus omnia mea tibi deberi intelligo, me ulterius complectere, nec e numero tuorum excidere patiaris. Dabam Lipsiae d. xii. Novemb. cccloclxxix.

E P I S T O L A CCLXXIV.

F. R. B. E. N. C. A. R. P. Z. O. V. I. U. S.

Nic. Heinſio.

Vianam.

HIS demum diebus Octobri mense datas cum epistolarum Welferianarum fasciculo tuas accepi literas: neque enim per tabellarium, sed cum mercibus in Belgio ab institore nostro comparatis advehébantur, ut testudineum earum oportuerit esse gradum. Proxima autem tuta occasione ad *Arnoldum* fasciculum Welferianum perferri curabo, & ut, postquam descriptae fuerint epistolae (si non idoneum hominem hic nanciscor, qui describat, ne periculum itineris Norici ipsis subeundum sit) integer ad te redeat, curabo: simul indicabo, quod nuncias, frustra expectari e Mazariniana bibliotheca *Welferi* hujus manuscriptos in Kalendarium Romanum Constantiniani aevi commentarios, ac propterea sollicitudinem de iisdem & spem animo dimitti debere. *Valesii* ad Harpocratonem observata, & *Petiti* Miscellanea per *Elzevirium* e Gallis in Belgium allata esse; typis ibi vulganda, laetus intellexi; & optandum foret, ut plura, quae relicta a *Petito* audiui, in publicum protraherentur, & e tenebris ac situ vindicarentur ingenii ac doctrinae excellentis monumenta, de quorum praestantia fidem nobis pauca, quae edita ab ipso habemus, scripta faciunt. *Baluzii* Miscellaneorum institutum omnino laudandum est; quo e pulvere monastico & bibliothecae Colbertinae adytis excitat illustria veteris aevi monumenta: ac placuerunt mihi quoque prae caeteris in primo tomo duae istae *Severi Sulpicii* nunc primum editae epistolae; quas ex Anglia allatas commemorat; nec parum libelli dignitatem *Rhabani Tuldensis* de supputandi ratione seu computo, qui in fronte extat, commendat commentarius. Alterum tommum proximis diebus spero ad me perlatum iri, nam in itinere complures per septimanas jam haesit; cujus moram vel ob unius *Lactantiani* fragmenti excutiendi desiderium impatientius fero. Eadem sarcina *Cangii* etiam glossarium; & *Thua-*
neae

neae bibliothecae catalogum ab *Ismaele Bullialdo* adornatum apportabit, quorum utrumque avidus opperior. *Perizonii* dissertationes tres, quas memoras, vidi: & eruditam hominis libertatem in summis viris notandis exosculor; nam modo loligo absit & veteres insectandi protervitas, patrum nostrorum ut minus bene acta rescindere, sic cogitata & dicta emendare haud indecorum vel iniquum existimo. Praeclaram quoque de se doctissimus Juvenis fecit spem, plura ingenii & doctrinae monumenta proferendi, & perpetuas in Valerium Maximum notas, deque nominibus commentarium edendi: quam ne fatum intercipiat, quod saepe hujusmodi praeclaris & capitalibus ingeniis manum injicit, vovemus. *Jacobum Gronovium* in gratiam cum valetudine, quam afflictam mense Octobri fuisse nuncias, interea rediisse spero & opto: nempe ut bonis auctoribus pluribus ornamentum afferre valeat, & lampada a clarissimo patre sibi traditam multis literis praeferre. *Josephi*, qui in Anglia studio *Barnardi* jam excuditur, aliquot accepi plagulas, & exiis rationem editionis cognovi, quam in lectione genuina potissimum constituenda occupari animadverto: nec imparem huic labori doctissimi viri censeo industriam, quam tamen ad ritus & antiquitates Judaicas quoque extendi optarem, in quibus occupata fuisse *Cunaei* & *Petiti* circa hunc scriptorem studia plane mihi persuadeo, nec quicquam magis cuperem, quam doctissimorum horum virorum in publicum proferri & ab interitu servari posse, si quae ad Judaicam *Josephi* Historiam adhuc supersunt & ullibi latent, analecta: quorum ipsi in scriptis suis editis subinde fecere mentionem. *Vossii* de Sibyllis libellum aliquid monstri aliturum, ut plerique de hujusmodi argumentis clarissimi hujus ingenii foetus facile conjicio, & confirmor tuis literis, quibus ob hanc causam editionem libri in Anglia differri indicasti, quam potius accelerari cuperem. Cum *Scheffero*, optimo viro, curam iterandae editionis librorum de Militia navali interiisse, nec haeredibus adeo cordi amplius esse, aequo animo fero; quando promissi fidem implere, & idoneum bibliopolam iterum nancisci, qui sumtus necessarios impendat, postquam his rebus ereptus est is, qui condixerat, haud in proclivi fuerit. *Julium Obsequentem* cum annotatiunculis ejus tum adhuc superstitis vestri excuderunt typi: nec dubitandum, plura in scriniis beati viri restare, unde bonis literis lux accedere possit, a genero protrahenda. Nam quos filios reliquit praeter nomen nihil paternum habere, indicavit Amplissimus *Pufendorfius*: qui de Insignibus Regni Sueciae ejusdem scriptum proximis ante beatum viri obitum diebus absolutum fuisse adjecit. *Bigotii* doctissimi viri, sed communi magis omnium doctorum fama quam scriptis editis mihi cogniti, studio vitam *Chrysostomi* publicam lucem aspecturam, non ante cognoveram quam a te edoctus: quod si parem in *Chrysostomo* operam praestat *Bigotius*, qualem in *Origenem* *Huetius* bina ante lustra contulit, nae sanctissimorum Patrum manes eruditae his Gallis multum debebunt: certe ad vindicandas a situ & squallore eorum reliquias industriam haud immodicam sedula haec gens hodie confert; & magnam eo nomine jam consecuti sunt laudem *Baluzius*, *Dacherius* & *Cotelerius*, hoc institutum adhuc acriter & cum laude urgentes. Nostri homines,

ad

ad hujusmodi operas publicis licet stipendiis conducti & otio abundantes, torpent, neque animos aut ingenium istis applicant: inde exiguus eruditarum frugum in his terris proventus. *Barthii* in Paullinum, de vita B. Martini Poëmatibus conditorem, forte superioribus diebus ad me pervenit commentariolus, ipsius manu scriptus (quales in Phoebadium, Gallum, Rutilium & quosdam alios ipse emisit:) quem cum interire nefas existimem, *Daumio* tradam, in his studiis sedulo, ut edat: nam mea quidem tempora iis vacare non possunt, impedita mercaturae studio, quam satis amplam facio: & reipublicae negotiis, quae saepius extra urbem in vicinos agros me propellunt: ac finitis nundinis Januariis, quae imminet, Dresdam ad comitia trahent, ubi unus vel alter mensis exigendus erit. Huic commentariolo cum omnino consentaneum existimem *Jureti* notas addi, nec noverim, unde earum copiam indipisci queam, tibi autem eas suppetere ex accuratissimis tuis Prudentianis notis constet, haud difficilem te in commodandis iis, ut calamo describantur, futurum spero, si fidem meam interposuero saluum & intaminatum ad te rediturum tuum exemplar. Sed ante veris adventum & Paschatis festum ejus usu non indigebimus: ut adeo nec parvam haec res ferat moram, & opportunam expectare possimus occasionem. Fasciculum superiori mense ad te missum cum literis interea pervenisse confido: iterum adornarem unum, modo copiae, quae instrui posset, dignae suppetere, neque eruditos oculos tuos, quicquid ferme hinc excuditur formidaret: cum pulvisculo tamen corradam quicquid se mihi obtulerit, ut e nundinis nostris antequam hinc discedam, sarcinulam ad te dimittere possim, si non aliis usibus, amoris tamen & cultus erga te mei testandi idoneum. Vale. Dabam Lipsiae d. 27. Decemb. labente A. MDCCXXXIX. quem qui excipient, ut salvo a te & incolumi exigantur, Deum precabor.

E P I S T O L A CCLXXV.

N I C. H E I N S I U S

Fr. Ben. Carpzovio.

Lipsiam.

TU vero profusae munificentiae modum non ponis, vir Ampl. aliaque ex aliis munera litteraria tantum non assiduus sufficis, unde Bibliothecae meae incrementum uberrimum maximusque splendor accedunt. Quapropter ambiciose expeto flagitoque, quod jam ante memini rogare, ut indicem ad me pervenire patiaris, horum codicum, quas usibus tuis profuturos cum maxime reris, quosque bibliopolarum pergulae per Germaniam superiorem raro solent venditare: ut explorem, si quam fortassis ab armariis meis opem sperare detur, in quibus duplicata unius ejusdemque libri exemplaria nonnunquam occurrunt, si in librariis auctionibus hinc terrarum nihil praesidii nobis erit. Id si feceris, rem profecto feceris ut longe mihi gratissimam, ita curae ac sollicitudinis plurimum demturam mihi. Quando enim valetudo pertinax praescribit quietem a studio, ne desit quod agam, perferri ad me jubeo catalogos insigniorum

rum bibliothecarum, quae vicinis in civitatibus venales proponuntur apud nos haud rarae. Quo fit, ut amicis juxta ac mihimet ipsi consulatur. Dedi ad te non ita nuper fasciculum, cui insertos invenies Hieronymi Graecum libellum, & Alcimi Aviti ac Victoris Massiliensis Gagneianam editionem, quos utendos a me petiit noster *Daunius*. Praeterea destinatum tibi specimen Meibomianarum in vetus Testamentum annotationum. Additurus his eram novas *Jacobi Perizonii* observationes, sed auctor, cum hoc agenti interveniret, suo nomine ut libelli exemplar ad te mitteretur petiit, nec difficulter impetravit. Adornat nunc luci juvenis pereruditus alias decem observationes rem antiquariam illustraturas, una cum annotatis in Valerium Maximum. Nam commentarius ejus operosus de nominibus Romanis nondum extremam ab auctore accepit manum. Holstenianus in Stephanum Byzantium commentarius toto semestri interquiescit, typis Elzevirianis, majore sui parte, jam descriptus, idque ob morbum *Theodori Ryckii* gravissimum, qui editionem curat, & lente convalescit. Livium Gronovianum recens editum nondum vidi. Florus *Graevii* nostri ad te propediem venturus est, vix tandem nunc prolatus in lucem. *Elzevirius* partem primam publico nuper dedit operis postumi, quo *Emundus Richerius*, doctor quidam Sorbonicus, adversus communem Pontificiorum sententiam, quod mirere, contendit auctoritatem Papae conciliis obnoxiam semper fuisse. Idem, puto, Patris *Simonis* librum, cujus exemplaria in Gallia suppressa esse audisti post ipsam editionem, & adversus quem vir Ampl. *Ezech. Spanhemius*, dissimulato tamen nomine, epistolam Gallicano idiomate dedit, praelo suo commissurus est. Mythologos Latinos commentariis suis illustratos jam Typographo tradidit *Thomas Munckerus*, sed ipse valetudinis adeo adfectae, quam contraxit nimiis lucubrationibus, ut vix videatur diu superviturus. Ceterum, quod tua praecipue interest non ignorare, accepi diebus proximis litteras Rhotomago ab *Em. Bigotio*, quibus nomine *Aegidii Menagii*, cui est conjunctissimus, me rogat, ne typographi vestri editionem Laertii *Dio-genis* maturent adornare, si librum praelo jam commisere. Ipsum enim *Menagium* annotata in hunc scriptorem sua castigatiora multo & adauctiora illis esse mox daturum. Exspectabimus ab eodem *Bigotio* vitam B. Chrysostomi aliaque veterum Graecorum opuscula in unum collecta, jamque typis descripta, sed moram injecit editioni Galliarum Cancellarius, negata venia librum emittendi, nisi demeretur epistola Chrysostomi ejusdem ad Caesarium Monachum hactenus inedita, quae dogmatis Ecclesiae, qualis nunc est, Romanae nonnihil adversatur. Quare vix ante proximam aestatem proditurus est liber in publicum; erunt enim infulcienda libro demtorum loco, quod fieri non poterit, nisi vir optimus Lutetiam revertatur, & nonnihil e priscis investiget bibliothecis, quo lacunam hanc adimpleat; revertetur autem post Paschatis proximi festum exactum. *Scaligeri* ad *Velferum* exaratae litterae penes me nullae servantur, praeter illas, quae typis descriptae publice jam leguntur. Annotata *Henrici Valefii* in Harpocratonem, ab heredibus impetrata *Elzevirius* secum e Galliis tulit, ac *Sandio* in mundum redigenda tradidit, ut praelo mox submit-

tantur. Eusebius ejusdem curis secundis illustratus, prodiit non ita nuper Lutetiae, una cum vita *Henrici* ab *Hadriano* fratre liberrimum in modum scripta. Aequae enim, quod mireris, vitiis illic fraternis ac virtutibus configmandis indulget, eandem hanc vitam minori quoque forma excusam vidi. Laudabile in primis institutum esse judico bibliopolarum vestrorum, per quos fit, idque te consulente, ne libri tanta referti eruditione raro occurrant venales in tabernis librariis, aut pretio illic insano sint redimendi. *Petrà a Marca* commentarios editionis tertiae de Concordia sacerdotii & imperii, si quis apud vos recudat, auctor sum, ut varias ejusdem viri dissertationes super antiquitate Ecclesiastica pereruditas, quas apud me omnes existimo exstare, iis adjungat: Nam Bearnensis historia, ut Gallico Idiomate conscripta, ita est diversi argumenti: Ceterum praeterito vere rogatus ab illo, qui Jamblichi partem primam in Britanniiis publico nuper dedit, ut Scaligerianas castigationes, & Parentis mei adnotata in Arcerianam editionem parum accuratam complura, quae penes me extare cognorat, secum communicem, postulatis hisce sum gratificatus. necdum tamen sum edoctus librum sub praelo jam desudare. *Isaaci Vossii* commentarium, quo de Sibyllinis agit oraculis nondum, opinor, luce donatum, etsi *Graevius* noster id sibi nuntiari e Britanniiis pridem adfirmat: moram libro obicere Theologi aliquanto difficilius ejus editioni annuentes propter paradoxa nonnulla operi interspersa. Vale, vir Amplissime, meque, quod facis, perge amare. XXI. I. Januar. CIOIOCLXXX.

EPISTOLA CCLXXVI.

FR. BEN. CARPZOVIIUS

Nic. Heinio.

Vianam.

Rebra, quae superiore hieme mihi peragenda fuerunt, itinera, & pertinacior a lienis intemperie excitati vis morbi, lentum me fecere in colendo quod tibi debeo, officio, ad quod geminis me literis provocasti, misso etiam cultissimo *Valerii Flacci* libello urges. Quare non minus anxium de venia tarditatis impetranda, quam sollicitum de gratiis pro munere gratissimo agendis me esse credas, & quamvis occasionem arrepturum, qua silentium tam longum expiare, & gratiam pro venusto libello aliquando reddere possim. Fasciculus in quo *Hieronymi* graecus libellus & *Avitus Alcius* cum *Meibomii*, docti sane & monstroae eruditionis viri, annotationum in vetus instrumentum specimine nuper ad me mittebantur, recte huc pervenit, & priores istos duos libellos illico ad *Daumium* ablegavi; heri etiam ad eundem *Valerii Flacci* alterum exemplar, quod sic volebas, misi; & uterque pro insigni hoc beneficio tibi sumus devincti. Ad *Perizonium*, doctissimum virum, qui eruditarum suarum dissertationum editarum libellum ad me misit, en literas, quas ad ipsum curabis. Ingentem sane de se praebet erudito orbi spem, & *Gronovii Graevii*que vestigia haud impari passu premere videtur, ad quorum celeberrimi nominis famam.

nam quoque, nisi fata invideant, brevi perveniet, spartae non minus (uti con-
jicio) Daventriensis, quam gloriae successor. *Menagii* Amaenitates Juris jam
typis hîc descriptae sunt, sed iis optimum virum *Zetterum*, Elzevirianum in-
stitorem, onerare non licuit, quod majorem sarcinam ferre secum non posset;
& *Welferi* ad *Scaligerum* epistolas e Norico reversas ei utpote tuto homini com-
mittere vellem, tibi cum maximis *Arnoldi* gratiis reddendas. Editio autem
Laertii, quam juxta Menagianam iterare nostri homines coeperant, & jam
binas plagulas impresserant, quia sic jubes, cessat, chartaeque abolitae sunt:
& sive ad nos castigatiores auctioresque suas animadversiones mittat, sive in
Gallia easdem excudi curet doctissimus auctor, nequaquam ipsius ingratiis ut
alibi imprimatur denuo vetus illa editio, autor ero. Pro copiosis tuis & per-
jucundis narratiunculis, quas ad me superiore mense Januario datis literis, de
re litteraria ejusque novis per Galliam & Angliam incrementis facere haud de-
dignatus es, non assem, quem Plinius Calvisium parare jubet, sed me totum
ex asse debeo: neque tamen e nostris oris talia auribus tuis eruditis oculisque
reddere possum. Nam si quid apud nos prodiit, id ad Gallorum cultum aut
vestram ingenii elegantiam neutiquam accedit, a quibus nos procul abesse, vel
chartae squalor ac inemendati typi, qui libris nostris adhibentur, produnt.
Reinesianarum sane inscriptionum Syntagma, in quo expoliendo, ut a praelo
nitidius prodiret, allaborare studebam, levissimae chartae imprimitur; & dum
bibliopola sumtibus, correctioni mendarum, & formarum imaginumve sculp-
turae impendendis parcit, nec ad faciendos eos, & doctum aliquem virum
correctioni istius praeficiendum a me adduci potest, (ipse enim propter crebra
itinerata & plures occupationes, quae ab urbe saepe per longum tempus me ab-
esse cogunt, isti vacare non possum) plurimis iisque crassissimis mendis conta-
minabitur: ut proinde ego quidem, postquam descripsi, & idoneum istud pa-
ravi ad praelum, plane ejus ulteriorem curam abjecerim, nec meum studium
in eo evulgando (quod parum ex dignitate isthac ratione prodibit) aliquod
fuisse profiteri ausim: quare nec carmen, quod in commendationem operis a
te nuper rogavi, amplius flagito: quod indignum hominem *μικρολόγον* censeam,
cujus lucrifaciendi studio velificetur tam venusta suspensa hedera, quae vel
sola emtorem libro conciliet. *Sponius* quidem Lugdunensis Medicus, libellis
aliquot gallico idiomate editis cognitus, augustiori longe habitu & magnifica
forma supplementi Gruteriani volumen nunc adornat, cujus specimen e mercatu
Francofurtensi allatum est: unde intellexi, bibliopolam istum nullas nec im-
pensas nec operam subterfugiturum, quae ad decus & cultum operi concilian-
dum facere possint. Et tamen si verum fateri volumus, eruditionis copia &
doctrinae varietate, qua omne omnino litterarum genus complexus est, longe
post se *Sponium* relinquit *Reinesius*: sed quod cultu & externo habitu nostrum
hoc destituitur, palmam haud dubiam Sponianum feret opus, & emtores plures
fortietur. Qua de re tamen parum sollicitus sum, qui Reinesiani operis curam
ut abjicerem, negotiorum multitudine & varietate, itinerum frequentia, &
bibliopolae tenacissimi hominis (ad id quod ego praestare porro non poteram,

idoneum hominem justo conducere pretio nolentis) pravitate permotus sum. Vale, vir summe, & si quid a *Bigotio* tuo rursus acceperis, de literariae rei per Galliam felicioribus fatis, & laetissimis incrementis, quaeso vel amanuensis opera me in notitiam ejus perducas. Ego sane quando in simili argumento non possum, quovis tamen alio officii genere, obsequium, studia, & inferendi promittitudinem tibi approbare nunquam defugiam. Dabam Lipsiae e nundinis vernalibus, inter complura studiis literarum prorsus aliena negotia. Kal. Maii CIOIOCLXXX.

EPISTOLA CCLXXVII.

FR. BEN. CARPZOVIVS

*Nic. Heinso.**Vianam.*

O Cto abhinc diebus sarcinulam ad te curandam Elzeviriano ministro, *Zet-tero* commiseram, cum *Welferianis* e *Norico* reversis epistolis: nunc *Dau-mius* Cygneâ literas & ab *Camerario* Eobani vitam conscriptam mittens, ut adicerem has, impetravit; & nolui sane occasionem libellum ad vos perferendi praetermittere; cui quominus prolixiores ipse iterum litteras adderem, negotia varia & impedita admodum & a literis prorsus aliena, qualia nundinae nobis imponere consuevere, prohibuerunt. Id tamen nunciandum duxi, *Cangei* Glossarium, quod magno pretio e Galliis nuper obtinui, nunc *Frankfurti* imprimi iterum: quod bibliopolae persuasi; ut Germani mei leviori pretio utilissimum sibi librum comparare possint. *Petavii* etiam *Epiphanium*, & *Reatini* Hieronymum alii excudent in Germania nostra bibliopolae: quos ad veteres potius, & exterorum melioris notae libros recudendos, quam recentiora nostrorum hominum corrasa undique & interdum male digesta volumina excudenda, adhortari non desino. Vale. Dabam Lipsiae d. XII. Eid. Mai. CIOIOCLXXX.

P. S. *Epiphanio* si quid lucis opisve e scriniis paternis, vel proprio ingenio, adferre velis, ut isthac ratione auctior, & *Parisiensi*, quae Anno 1622. prodiit, melior, nostra *Lipsiensis* aliquando extet editio, non magis celeberrimi nominis *Heinsiani* famae, quam bibliopolae rationibus consules. nam multo vendibilior hujusmodi accessione liber reddetur, & de felicitate fati *Epiphanius* cum *Alexandrino Clemente* contendet, qui post *Sylburgium* a beato Parente tuo, immortalis memoriae & infinitae eruditionis viro, annotationibus, licet minus prolixioribus, illustratus, tot emtores reperit, ut aliquoties imprimendus fuerit; neque tamen amplius in tabernis superent exemplaria: cum *Epiphanius* a *Petavio*, aequè doctissimo viro, id impetrare non potuerit, ut simili aviditate divenderetur, quare nec plus simplici vice excusus fuerit. Quod si alios, sive in Gallia, sive inter tuos Belgas, viros doctos noveris, qui symbolas ad praestantissimum autorem hunc asferre possint, hos quaeso sollicita. Quam curam
ut

ut tibi imponam, fiduciam animo meo addit egregium literarium, cui tu natus es, & (utinam diu porro salvus ac viribus integer?) vivis. Addebam praepropere, exeuntibus nundinis vernalibus Lipsiensibus, ineptissimi hominis, *Hekelii* cujusdam, de numo Constantini epistolam, saltem ut intelligas, quam iniquis fatis res literaria, stupore quorundam maleferiatorum hominum, inter nos urgeatur. Nonne foret satius in spongiam vel potius foricas incumbere has chartas, nec Italis ludibrium dare?

EPISTOLA CCLXXVIII.

FR. BEN. CARPZOVIVS

*Nic. Heinsio.**Vianam.*

IN calamitoso & perturbato rerum nostrarum statu, quem superioribus diebus superveniens mors Serenissimi Electoris nostri haud parum afflixit, omnium harum regionum animis civium prostratis, eorum autem, qui publicae rei moderantur, mentibus percussis & attonitis, amoenitate litterarum tuarum, quas geminas, Cygnaeas unas, domui redditus alteras accepi, erigi me & difficiles curas discuti sentio. Sive enim amicitiae ea vis est, ut quo magis & longinquo ejus positus est usus, eo exhilaret fortius; sive doctrinae haec virtus, ut abjectos attollere possit animos; utroque nomine plurimum apud me humanissimae tuae & eruditae admodum valuerunt litterae, in gravissima pestis, qua affligimur, calamitate solatium & veluti medicinam mihi afferentes. Tam varia enim refertae sunt praestantissimarum rerum cognitione; ut ea imbutus animus noster, dolorem suum ob recentem patriae cladem, quam optimi piissimique nostri Principis obitus attulit, & crebra quotidie decedentium peste correptorum, familiarium & ignotorum, funera augent; iis leniri, atque se levare intelligat. Nec est, quod levia munuscula litteraria, quae interdum, sicubi occasio libellos hujusmodi ad vos perferendi oblata fuerit, missito, ejus momenti vel esse existimes, vel a me existimari putes, ut de redhostimentis sollicitus, quem te esse fers, esse debeas. Nam cum quaevis a te venientes litterae plures apud me sint, quam quorundam nostrorum hominum, quorum schediasmata quandoque ablego, justis libri: facile intelligo, chartis a me venientibus nomen meum nequaquam apud te expungi, tantum abest, ut in aes meum te istis redigi, mihi persuadeam. Quod si tamen saepius mihi oblata benevolentia tua frui liceat, & a te quicquam petere fas sit; etiam atque etiam te rogem, ut copiam mihi vel paucarum & abjectarum schedarum manu clarorum litteris virorum, Beati Parentis tui, vel *Scaligeri*, vel *Grotii*, vel *Casauboni*, vel *Scriverii*, vel *Baudii*, vel *Salmasii*, aliorumve scriptarum, quas in scriniis tuis complures sparsas esse puto, mihi facias. Nam inter alias delicias literarias librariasque, juxta cum imaginibus doctorum virorum, *idiotæ & flav* eorum aestimo, & schedas etiam minimas nulliusque alias momen-

ti, propriis ipsorum manibus exaratas, pluris facio magnis voluminibus, quae aere parare possum. Quod si quis forte puerilem in hac parte ludum ludere me putet, facile feram; interim si res exigeret, me aliorum exemplis tueri potero, qui non minus *idioxetia* magnorum virorum se delectarunt, & in eo studio amicorum ope & liberalitate libenter usi fuerunt. Quare cum saepius in litteris, voluntatis tuae nobis exhibendae insigni aliquo testimonio occasionem tibi ut praebeam, efflagitaveris, subrustici pudoris notam me effugere posse ratus sum, si aperte nunc profiterer, qua in re benevolentiam tuam quam maxime cuperem experiri. Quod si ad manus doctorum hujusmodi virorum schedae, ab ipsorum manu conscribillatae, forte non sint, aequiori animo iis carebo, quam cum molestia quadam a te conquisitas eas fuisse intelligam, ac tum munificentiae tuae exercendae materiam praebere poterit e jampridem excusorum librorum (quorum copiam tibi largam esse, & indicas ipse, & accepi ab aliis) numero, isthaec Virgilii editio, quam beatus tuus Parens anno seculi sexto & tricesimo emisit in publicum, & tibi dicavit; cui ad te praefixam epistolam jampridem descripsi, ut soleo omnes venerandi Parentis tui epistolas colligere; sed ipsum impressum exemplar, tua manu signatum, possidere mallet. Quod si etiam a te praefigatur epigraphe, unde posterius mei aliquando intelligant, quam honesto & glorioso titulo is libellus ad me pervenerit, summi beneficii loco isthoc munus sum habiturus: qui ipsorum autorum aliorumve clarorum virorum vel levi manu notatos Codices maximè aestimo. Sed ignoscas, & germano candori tribues hanc audaciam, qua voti & desiderii mei rationes tibi expono: in quo si quid pecco, fretus benevolentia tua & iustus a te id committo. *Cuperum* Consulem Daventriensium, virum omnino doctissimum, cujus quatuor Observationum libri mihi summopere placent, cathedras scholasticas doctrina sua animare, admiratus fui, quod nostris moribus Consules functionibus scholasticis se adhiberi vix patiantur; sed commentarios in antiquum lapidem agri Romani proximis effossum annis moliri, in Lucianum etiam novas Animadversiones muginari, libenter intellexi: nam eruditum, quicquid eo a viro prodibit, futurum esse, ea quae jam prodire fidem faciunt. Byzantini Stephani fata admodum lenta esse, & *Holstenii*, *Berkelii*que notarum editionem variis remoris identidem sufflaminari doleo: spes tamen est, si minus celeritate, eruditione tamen & accuratiori cura has editiones *Pinedonis* Lusitani studio profectam superaturas esse. Ex nostris oris & hac urbe quominus litteraria res incrementa nunc capere possit, quae tibi narrare liceat, communis patriae calamitas impedit. Nam cum antea frigus saltem studia nostra tenuisset, jam ipsa mors eadem occupasse censenda est; gravi pestilentia, quae provincias has depascit, Musis oppressis & cum ipso coeli tractu corruptis. Quae ipsa impetum quoque Epiphanii recudendi (ad quem Appendicem Animadversionum Epiphanianarum *Petavii*, *Maturino Simonio* oppositam & Parisiis 1624. editam, tertium item, quartum, quintum & sextum caput Miscellanearum Exercitationum, Juliano subjectarum, & alias utiles accessiones conduxeram) nostris hominibus & animos fregit; omnibus officinis hoc malo

malo infectis, & plurimis earum operis morte sublati; ut tam vasto operi vix suffecturi, qui supersunt, videantur homines. Accedit, quod in Anglia jam sub praelo istud fudare *Thomes Gale* in nupera Herodoti editione sua indicaverit, ut si maxime apud nos in id sumtus & operam aliquis collocare velit, omnem tamen proventum ab Anglis interceptum iri, maturiori & nitidiori fortasse editione sua, verendum sit. Igitur quandoquidem chartam & typos recentes ad volumen aliquod Graeco-Latinum exscribendum, quidam nostratium bibliopolarum comparaverat; autor huic extiti, ut potius Clementi Alexandrino, qui integer dimidiam Epiphanii partem vix aequat, ac proin dimidiatis saltem sumtus postulat, his difficilibus temporibus eos impendere velit. Cui consilio exequendo istam, quae Parisiis anno seculi quadragesimo cum *Sylburgii* & beati Parentis tui notis a *Frontone Ducaeo*, uti conjicio, (nam ipse nomen suum non professus est editor) curata est, editionem conducendam existimo: terrior enim & haud paulo amplior Lugdunensi vestra mihi videtur, notis certe quibusdam locupletior est. Dedicatariam tamen ad *Gustavum Adolphum*, felicissimae memoriae Regem, Heinsianam epistolam, qua Parisina editio caret, addendam duco: nec parvam gratiam, imo ingens pretium accedere huic nostrae editioni posse sperem, si tuis ea prodiret auspiciis, & vel notis quibusdam e beati Parentis exemplari, aut scriniis tuis aliunde, vel proprio ab ingenio depromptis, vel Praefatione saltem aut, si malis, dedicatione nova & carmine, in quo scribendi genere regnas, & universa resp. litteraria, quam tot praeclaris monumentis ingenii exornasti, tibi submittit fasces, exornaretur. Et me, qui te rogo; & librarium, cujus gratia & commodis id a te peto; denique urbem hanc, quae sibi gloriae ducet, in hac sua calamitate & ferali litterarum otio, a summo earum vindice tanti monumenti edendi copia beari, tibi devincies, votis si annuere nostris placuerit, & a divo Parente relictam spartam hac ratione suscipere volueris: cujus post fata virtus & gloria tecum superstita futura communis est, & in omne aevum tuae innexa durabit. Barthianas Animadversiones in Paulini Petrocorii de vita B. Martini sex Carminum libros, forte nuper aere mihi redimendos ipsius auctoris manu cum textu descriptos, oblato comparavi, & *Daumio*, ad superstitionem usque Pogoniani nominis admiratori, cum Cygneae superiori mense agerem, obtuli, utque earum editionem in se susciperet, haud invitum adduxi; bibliopola, qui sumtus efficiat, ipsi conciliato. Nam alias Barthiani libri huic hominum generi sordent, vestigiis aliorum territo, qui nescio quam infelici fato majoribus olim operibus *Barthii*, Adversariis, Commentariis Statii, Claudiani, & aliis, quae emtores raros invenerunt; minus favente Deo Lucio, sumtus impenderunt. Ex Barthianis autem ad Paulinum animadversionibus, *Juretum* quoque, clarissimi nominis Jure-Consultum & Symmachianis Miscellaneis mihi cognitum, hos Paullini libros Commentariolo superiori seculo illustrasse, eundemque *Pithoeo* inscripsisse, didici: quem cum adjiciendum omnino existimem, nondum vero haecenus vel mihi vel *Daumio* istum videre contigerit, ut in cujusquam nostratium supelle-ctile reperiri datum fuerit, majorem in modum te rogo, qui beatam hujusmo-

di librorum habes copiam, & unde peti possint intelligis, ejus libelli usum quamprimum mihi conciliare velis; saluum & integrum intaminatumque ad te eum rediturum esse, cumprimum vel mea vel *Ἀντίχρητος* Cygnei manu descriptus fuerit, neutiquam operarum manibus in officina sordidandus, ea fide tibi spondeo, qua amicitiam tuam semper colui. *Menagii* Amaenitatum juris complura exemplaria, nitidiori chartae, quam nostrorum regionum alias ratio fert, impressa, jamdudum binis fascibus, diversis itineribus & vicibus in Galliam ablegavi; ad celeberrimum tamen suum auctorem pertigisse nondum certior factus sum. Tibi vero ingentes debemus gratias, qui ab isthoc doctissimo viro *Dio- genis Laertii* editionem novam, typis Lipsiensibus adornandam, nobis conciliare studes. Ubi istius copiam nacti fuerimus, gloriae venusti operis haud exiguum partem in te redundaturam esse, & si istud egregio carmine (quod peto & spero) exornare volueris, a te majorem laudem & honorem in librum derivatum iri, plane velim tibi persuadeas. *Henrici Valesii* vitam ab *Hadriano* fratre scriptam typis nostris subjeci, *Menagianarum* amaenitatum veluti futuram accessionem. Quam cuperem utriusque ad vos deferri exemplar! Sed ob metum contagii, ne id ex urbe nostra latius serpat, arctis finibus inclusi a vicinis tenemur, nec vel minoris fasciculi exportandi nobis conceditur facultas, ut proin melioribus temporibus & occasionebus isthoc servandum sit officium. Mitto interea plagulae impressum Amaenitatibus a me praefixum graecum epigramma, quod doctissimi auctoris gratia composui; quem Graecarum litterarum deliciis capi constat. Hoc brevi Catone contentus esto, usque dum latius se explicandi officio nostro concessa fuerit facultas. Cl. vir *Christophorus Arnoldus*, ut filio suo nunc *Leidae* agenti benevolentiam tuam conciliarem, me rogavit, nec dubito fores istius apertas ipsi futuras, si quando *Vianam* excurrens istas pulsaverit. Si quos libellos in *Germania* superiore nostra vel olim vel nuper excusos desideras, mihi quaeso potius quam alteri indica; qui studio erga te & obsequio a quoquam me vinci aegre fero. Clarissimo *Graevio* multam & officiosam salutem a me dices, & me, meosque, fratrem quoque ipsius cum domesticis suis bene valere, & salvos nos indulgentia Dei omnes esse, nec pestis calamitate, quae in provincia nostra & urbe hac ingentem stragem edit, affligi, nunciabis. Proxime ad ipsum litteras dabo, quarum nunc nec argumentum nec otium suppetit. Serenissimi nostri Electoris Saxonici mortem Serenissimi Palatini Electoris excepit obitus, qui modo nunciatus est: Ingentes in imperio Rom. & provinciis, quae his Dominis parent, mutationes haec illustria fata post se trahent. Vale. Dabam Lipsiae a. d. ult. Augusti. CIOIOCLXXX.

EPISTOLA CCLXXIX.

FR. BEN. CARPZOVIVS

Nic. Heinsio.

Vianam.

Articulari te morbo decumbere, nec eruditas manus fertili in litterarum commoda ingenio pares posse praestare operas, non sine dolore ex doctissimi *Graevii* datis ad me litteris intellexi nuper. Et licet domestica & communis calamitas urbis, quam pestilentia diripit, lugendi causas quotidie supeditet, nescio tamen quomodo magis me afficiant, & tantum non mei simul corporis artus discrucient, animo me certe haud leviter angant tui illi cruciatus, postquam communem quasi tecum sensum mihi reddidit ingentis tuae virtutis & elegantis eruditionis admiratio. Cum vero non dubitem, in gratiam te interea cum tortore tuo rediisse; ut diuturna ea sit & fida precor, quo strenuam manum tot desideratis jamque affectis tuis operibus admove, & supremam feliciter imponere possis. Urbis nostrae, (cujus statum nosse cupies, & ut saepius indicem desiderat *Graevius*, quem de eo certiore reddes, multa a me salute dicta) tristis adhuc imago est, cadaverosa facies; sed quae minus jam nobis videtur horrida, adspectui ejus assuetis. Emendet eam, & pristinum ei nitorem induat corporum & animorum sospitator Deus, ut reddita provinciae sanitate, rectius quae invicem debemus, & nostris hominibus praestare possimus studia, & vobis, quae cupimus, exhibere officia. Litterarum autem, quod conjicere ipse poteris, in urbe nostra jacent, & ipsa pestilentiae veluti malo laborant studia, Academicis plerisque fuga dilapsis, officinis typographorum & eorum magistris deletis, litterariisque artibus, & commerciiis mali violentia extinctis & interdictis: ut proinde nihil, quod ad palatum sit vestrum, vel hinc nunciare possim, vel mittere liceat. Binas tamen lugubres adjicere visum fuit schedas: nam quicquid a publicis difficillimis his temporibus superest otii, in funestis hujusmodi studiis consumendum est. Plures mittam alias, cum fasciculos mittere liberum fuerit; quod tempus jampridem *Menagii* amoenitatum libellus cura nostra hic excusus, praestolatur: cui accedent, qui jam prela fatigant, Paulini de vita Martini sex libri, notis *Jureti* denuo excudendis, & Bibliotheca Patrum Parisina Bignei Anno 1589. quae prodit, depromptis; & *Barthii* animadversionibus, nunc primum publici juris quae fiunt; adjunctis *Gronovii* & *Daunii* emblematis, illustrandi. *Valesii* etiam vita a fratre *Adriano* descripta, typis nostris, qui funestas caetera nunc agunt ferias, juxta Gallicas schedas excula, jungetur; & si quae alia, pauca licet nec magni momenti quae futura sunt, ab aliorum, non nostro (quod aetatem latura proferre nescit monumenta) profecta ingenio, interea ex calamitoso nostro solo nascentur. Cygneae *Daunius* recte valet, & Hieronymi Graeci *ὡς βαπτίσματα* plagulam, a *Morello* seculi superioris Anno xci ix. editam, tuo beneficio quam indeptus est, se typis subjecisse, litteris nuper allatis (nunc enim harum quoque nobis-

Tom. V.

V v

cum

cum vicinis urbibus interdictum est commercium, insano Principum metu) affirmavit; nec dubito, quin grata mente, non sine praefatione amplissimi tui nominis, ad te absolutum libellum archetypum tuum, cum novis exemplaribus remissurus sit: id enim se facturum, cum superiori aestate apud ipsum agerem, mihi indicabat. *Arnoldus* Noribergae salvus adhuc & incolumis vivit, deque benevolentia tua, quam filius suus, in Belgio jam agens, expertus sit, admodum gloriatur. In edendis *Welferi* operibus studium posuit suum; quorum cursum satis feliciter procedere nunciavit. Si quid habes, quod ad me destinare volueris, Elzeviriano institori *Zettero*, viro optimo, mihiq; amicissimo committes; cui in mandatis dedi, qua ratione mea negotia libraria & litteraria Amsterdami curet. Utinam meliora tempora Deus quamprimum duit, ac urbi & provinciae salubritatem reddat, & liberas vias aperiat, ut officia vobis explicare possimus. Ovidii *Metamorphoseon* libros membranae inscriptos ab Amico accepi nuper dono, quod in te derivare mallet, cujus usus eos rectius cedere posse intelligo, quando editionem novam Poëtae hujus te moliri constat, si per vicinorum malevolentiam, omnibus viis obseptis, id esset integrum: differenda igitur haec & alia in aliud tempus sunt officia Vale, & Cl. *Graevium* officiose a me saluta; omnesque, quos hinc notos habet, interque eos fratrem clarissimum, compatrem meum optimum, optime valere, nuncia. Dabam Lipsiae a. d. xxvii. Novemb. cicioclxxx.

EPISTOLA CCLXXX.

F R. B E N. C A R P Z O V I U S

*Nic. Heinso.**Vianam.*

L Iteras ad te dandi geminas satis graves habeo causas: officii alteram, quod tibi, alteram quod *Daumio* meo debeo; qui me exquisitissimis rogavit verbis, ut has suas ad te litteras, & editum modo Hieronymulum mitterem: quod jampridem fecissem, si apertum haecenus fuisset iter, neque tantus pestilentiae, quae urbem hanc diripuit, terror exterorum vicinorumque invasisset animos, ut innocentissimis etiam litteris iniquiores fuerint, & omnia tuta etiamnum timeant. Sane postquam divini numinis indulgentia liberati sumus a pestifera lue, quominus salubritatis recuperatae fructus ad nos pertingat, Principum metus ferme ridiculus prohibet, qui non homines saltem & res nostras formidant, sed ad epistolarum etiamstrarum conspectum perhorrescunt, severisque edictis a commerciis suis nos arcent, subditos autem suos, vel merces vel litteras nobiscum commutare vetant. Ingens hinc fortunae nostrae patiuntur damnum, quas nisi, in ordinem redactis & ad saniora consilia versis Principum Germanorum animis, Deus erigat iterum, certum urbi nostrae, omni commerciorum genere ante hoc florentissimae, imminet exitium. Intelliges autem hinc causam, quare *Alcimum* *Avitum* & *Graeculum* *Hieronymum*, quos ad te curandos mihi commisit *Daumius*, nondum miserim; fasciculum item plurium exem-

exemplarium Hieronymuli tibi dicati, quorum unicum saltem adjeci, apud me detineam: coactus nempe intermisi officium, dum occasio defuit, neque adhuc ulla comparet, ad te quae cupio perferendi: utprimum autem dabitur, me non neglecturum eam certum te esse jubeo. Igitur cum ipsa re praestare nil liceat per temporum acerbicatem, animum tamen tibi exhibere, & quod alterum litterarum volui esse argumentum, voto defungi fas est. Cumque alias semper tibi, vir illustris, bene ominari, & pro salute tua, cui litterariae rei salus innectitur, vota facere conveniat; quibus haec cordi est: hoc sane ineuntis novi anni tempore in eam curam incumbere decet. Ergo ut quem agere coepimus, annus ex voto a te peragatur, tibi que animi & corporis viribus integro cum multis sequentibus, felix undiquaque & fortunatus exeat, voveo. Audiat haec vota Deus, & quae tibi ipse cupis in te conferat propitius, cumuletque, quae virtus tua & rara totique Orbi admiranda eruditio meretur, praemia; nec vel imbecillitate vires corporis atteri, vel languore divinae mentis vim imminui permittat; sed incomparabili ingenio idoneas corporis vires sufficiat, hisque constans animi robur deesse patiatur nunquam, ut de incolumitate tua tibi non magis quam egregio litterario gratulandi causae nobis suppetant perpetuo. Postquam meae pietati in te, vir devenerande, satisfecisse in praesenti videor, vellem etiam voluntati tuae obsequi; cui nulla re magis quam narratiunculis de rei litterariae incremento responderi posse, sentio: sed de eo apud nos promovendo ne suspicari quidem jam licet, litterarum studiis pestilentiae vi oppressis, & intempestivo exterorum metu una nobiscum ita coarctatis, ut in angustis his, dum fortunis quemque suis invigilare oportet, & ne plane intervertantur temporum diritate providere, de bonis litteris cogitandi vix relictus sit locus. Paulinum tamen, qui de vita Martini sex libros carmine scripsit, & ineditas hactenus ad istos *Barthii* Animadversiones, *Jureti* etiam notas, & *Gronovii* ex observationibus ad Script. Ecclesiasticos cap. x. quod emendationes quasdam scriptoris hujus exhibet, typographo commisi, qui libellum etiam profligavit & ad exitum perduxit. Annotata quaedam adjiciet adhuc *Daunius*; quae ubi absoluta erunt, & libera fasciculos ad vos perferendi data fuerit facultas, libellum ad te pertingere omnibus studebo modis. *Anna*, eruditissima *Tan. Fabri* filia, *Diſcryn* *Cretenſem* in *Galliis* evulgasse dicta hinc est, ipse tamen liber visui nondum oblatus, neque spes est praeclaros exterorum libros conspiciendi intra breve adhuc tempus, siquidem oppidorum vicinorum excludimur commercio, tantum abest, ut e longinquis oris id nobis polliceri possimus. Reddat Deus meliora tempora, & urbem fortunaeque nostras in pristinum statum reponat; nec vel intestinis diffidiis provincias has collidi, vel lue amplius affligi patiatur; ut studiis litterarum suus honos redeat, & cum anno se ista in novum florem induant. B. V. Dabam Lipsiae Nonis Januariis CIOIOCLXXXI.

EPISTOLA CCLXXXI.

FR. BEN. CARPZOVII

*Nic. Heinsio.**Vianam.*

Publica horum temporum calamitas, ex qua jam sumus eluctati, vicinorum nostrorum consortio & consuetudine nobis interdixit, exterorum tamen amicitias delere prorsus non valuit, quin eorum subinde litteris admoneremur, nostram ipsorum animis nequaquam excidisse memoriam. Haec vero aerumnis nostris haud levis extitit accessio, quod litteris ab amicis e longinquo profectis nec recto itinere huc tendere, neque justo ad nos tempore pervenire licuerit; sed praepostero contagii metu innoxiarum etiam Lipsiensium, epistolarum usum prohibuerint Germani Principes, & pessimo exemplo tabellarios vel ad nos ituros, vel ex his regionibus venientes severis legibus arcuerint, & tantum non omni litterario commercio nos privarint. Factum hinc ut serius, adulto jam anno hoc, tuae & *Graevii* tui ad me perferrentur litterae, exeunte superiori scriptae: quas mox infecutae sunt aliae nuper modo datae. Dignum proinde me vestra existimabitis venia tardius exsolventem officium, quod maturius facturum eram, si justo ad me tempore perlatae essent gratissimae vestrae litterae. Has autem inter maxima cladis, quam perpepsi sumus, & exantlatarum molestiarum solatia numero; iis sane me haud leviter erigi sentio: siquidem tenacissime in vestris me haerere animis inde intelligere, & praestantissimarum ad rem litterariam pertinentium rerum cognitionem haurire licet: quod utrumque maximi instar muneris mihi est, cui reddendo vires meas haud pares sentio. Sed cum vos beneficia vestra non foenerari constet, aequo laturos animo confido, si maxime fructum studii vestri non feratis alium, quam ejus confessorem animum nostrum, ex quo incredibilem vestram humanitatem nulla unquam delebit oblivio. De statu autem rerum nostrarum bona omnia praedicare licet: vivimus enim dei munere & vigemus, brevique soteria celebrabimus. Fama saltem adhuc laboramus, qua infesti vicinis & exteris reddimur simul & invisi. Rumores sane late sparsi sunt, minimam superesse civitatis partem, tantamque apud nos esse grassatam nec haud defaevuisse pestilentiam, ut prae ea nulla videatur famosa illa olim apud Cecropes, Lucretii celebrata versibus. Tibi vero & cuivis de nobis vel sollicito vel curioso affirmare possumus, prorsus desiisse contagium, nec meorum aliquem id malum tentavisse; licet aedibus admodum vicinum, quibus secedere & stationem deferere, quam tenere eos quam maxime fas erat, quibus cura publicae rei commissa est, haud sine turpissimae praevaricationis, ne quid gravius dicam, liquisset crimine. Fuga quidem salutem sibi quaesiverunt nonnulli ex Senatorio nostro & Academici regiminis ordine, & vel in vicinas salubres regiones secesserunt, vel longiori suscepto itinere absentiae causas commenti sunt: illud unum neglectis humanitatis officiis ob oculos habentes, ut mature discedentes, longe absint

sint tardeque redeant: digni tamen hi mihi sunt visi, qui extra omnem hominum coetum extrudantur, cujus dissolvunt vincula: ac propterea ipse quidem nec mei neque familiae tantam habendam duxi rationem, ut quid patriae debeam in tanta necessitate, qua cumprimis opem cives flagitant, oblitus, praeposito mortis metu ab humanitatis officio & ratione muneris me dimoveri passus fuerim. Interim hac fatali calamitate oppressis dum succurrendum, & ne contagium serpat latius providendum fuit, bonarum litterarum vix ullam rationem habere valuimus, inque Academia aeque nostra ac reliqua urbe & provincia nullam ferme eruditionis curam gesserunt, quibus ea incumbit, vel fuga dilapsi vel metu confusi. Exiguus hinc litterariae frugis proventus; quam nec juvare studuerunt librarii, timida hominum natio, & grandiusculis libris operam & argentum impendere vix audens: hoc cumprimis tempore, quo libros & alias merces ex urbe nostra Francofurtum ad mercatum ferre severis interdictum est istorum legibus. In *Reinesiano* tamen syntagmate & *Epiphanio* ut pergerent, nec desponderent animum, precibus & pretio ipsos permovi: Paulinum etiam cum *Jureti*, *Barthii* & *Daumii* notis ut absolverent; *Thomasii* quoque Oratiunculas, quas sub auspiciis suarum dissertationum Academicarum habuit & mihi dono obtulit, ut excuderent autor extiti, argentoque, quo carebant, typographos juvi. Exemplaria autem Paulini, quae in Vaticana & Lutetiana bibliotheca extare indicas, conferri non potuisse, nec variantes lectiones excerpti, ut lacunae ac depravata Juretiana editionis, quam nec ego alibi quam in Patrum sub Bibliothecae nomine facta collectione extare arbitror, loca restituerentur, dolet admodum *Daumnus* vir optimus, & jam septuagenario major, nam heri annum aetatis implevit septuagesimum. Forte curata nostra opera editio, cujus exemplaria prima, quae dabitur, occasione mittemus, vel *Bigotio* Cl. V. vel eruditis aliis textum meliorem aliquando exhibendi animos addet. Epiphanii editionem, quae jam adornatur, cujus specimen nuper Francofurtum, ut cum Daumianis libellis inde in Belgium perferatur, misi, si ulla in parte tu vel *Graevius* tuus juvare poteritis, quaeso ne istius curam animo abjiciatis vestro. Petavianum exemplar $\pi\epsilon\delta\alpha$ sequuntur nostri typi, ita ut & paginarum numeri ac modi servantur iidem prorsus: quod si Petavianas accessiones e Gallia vel *Bigotii*, vel *Menagii* vel *Valesii*, vel alterius amici, quorum pluribus vos uti arbitror, opera impetrare possitis, vestrove ab ingenio aliquid cupiatis adjicere, studii hujus vestri magna vos manebit apud Eruditos gloria. *Menagii* Amaenitatum exempla nondum plura ad celeberrimum autorem pervenisse doleo, & indignor minus officiosis hominibus, quibus grandiusculos eorum commiseram falces, ut diversis itineribus per Noricum & viam Lugdunensem alterum, alterum per Belgium Lutetiam curarent. Ac hunc quidem *Elzevirio* $\nu\upsilon\epsilon\epsilon\alpha\gamma\iota\sigma\iota\varsigma$ misi, & exquisitissimis modis ut quamprimum in Gallias eum promoveret rogavi: quid interea factum sit, nescio; tibi quidem & *Graevio* destinata ligata jacent in museo ultra septem octove menses exemplaria, quae Francofurtum mittere, quia nemini nostrorum hominum eo tendere licet, quum maxime cuperem, non poteram. Reddat Deus liberta-

tem itinerum, ut beneficio peregrinantium officia nostra mutuo explicare valeamus. Vale. Dabam Lipsiae d. xii. Kal. April. cldcclxxxi.

EPISTOLA CCLXXXII.

FR. BEN. CARPZOVIVS

Nic. Heinſio.

Vianam.

JAmpridem occasionem ad vos aliquid perferendi speculor, quae nulla nobis haecenus, inclusis praepostero contagii metu omnibus viis, necdum apertis, data fuit: nactus vero in Belgium abiturientem, & suspenso gradu negotiorum causa recipere ad vos se cupientem hominem, fasciculum ad Ampl. Graevium ei committere, istique hunc ad te includere non negligendum ratus sum, cui innexa aequo animo & serena fronte ut accipias etiam atque etiam rogo. Catalogum librorum, quos Francofurtenses & nostrae jam tulerunt nundinae, ad Graevium misi; a quo istum petere licebit, & cognoscere, quid novae opis Germani attulerint rei literariae. Glossarii Cangeani quidem iteratam Francofurti impressionem, bonum factum! intelligo, quod nec successus destituit, satis feliciter nitorem Gallicum aemulantibus typis nostris. Nec minorem cultum Aethiopicae Amplissimi Ludolfi Historiae attulerunt; quem librum exteris haud improbatum iri mihi persuadeo. Wagenſeili vero doctissimi mihiq; amicissimi eruditum & recondita Hebraeorum, Rabbiorum, & alia doctrina refertum opus, Judaeorum calumnias doctissime solidissimeque retundens, in admirationem eos, qui isto litterarum genere delectantur, rapiet: sed quia autoris sumtibus exculum fuit, & paucos emtores reperit, (quod fatum meliores ferme omnes libros exercet) magno rei familiaris detrimento, quam inde nanciscetur, optimo viro constabit gloria. Paulinum de vita Martini Daunius noster ut ad te curarem me rogavit: quod officium cum alias tibi debeam, tanto majori studio jam faciendum putavi. Vale, & animum, quem optime mihi cupere intelligo, ferva. Dabam Lipsiae exeuntibus nundinis vernalibus d. vii. Maii. cldcclxxxi.

EPISTOLA CCXXXIII.

CHRISTOPH. ARNOLDVS

Nic. Heinſio.

Vianam.

Congruum mihi visum fuit, veteris amicitiae novam quasi tesseram transmittere, ut post annorum tot inter nos velut divortium, tibi reddar & uniar: Imprimis quia Daunius & Carpzovius noster hanc in se curam recipiunt, quasi Tuum mihi favorem gratiamque denuo conciliaturi. Id ipsum vero est, quod mihi aliisque volo: Illustris Welſerorum, Augustae pariter ac Noribergae adhuc superstitum, familia Marci sui opuscula omnia in unum volumen cogere, &

& epistolas, quarum quaedam adhuc ineditae, illis adjungere decrevit: Quare si nos in hoc ipso juvare negotio poteris, juva, quaeso: & magnam apud *Welferos* inibis gratiam. *Camerarius* in novissimis suis *Peirescium* asservasse ait literas *Welferi* magna cura, qui illum cultorem sui in Gallia habuit: Quo autem *Peiresciana* pervenerit bibliotheca, tu solus docere nos poteris; vel certe alius nemo. Emendationes ac lectiones varias in *Catonis* mei *Diras*, te quidem offerre gaudeo: sed nulla prorsus spes in Belgio affulget, ut juvenile schiedasma illud a bibliopolis vestris recudi queat: etsi vel maxime velim. De ipsius *Ovidii*, qui plane tuus est, exilio, & reditu, & sepulchro, & calamo, in Hungaria (si Diis placet) reperto, dubitant quidem eruditi, & pro figmento Pontem habent: verum quos de hac ipsa controversia consulere queam, fateor, non liquet: Quapropter tu mihi *Pythias* esto. Mihi vicissim hinc impera, quod possim; agam id omni fide ac dexteritate, ne quid porro in me desideres. Misissim nunc memoriam meam *Familiae Furerianae*, apud nos nobilissimae; sed metus erat, ne istaec oculis ac manibus tuis indigna prorsus videretur. Si quid vero aliud in urbe mea impressum expetas, vel a me curatum velis, haud deero sane desideriiis tuis. Ad ultimum latere te nolim, quod magni *Hetruriae* ducis auditor (ut vulgo vocant) *Ferrante Caponi*, ob nequissimas *Sodomiae* artes, ipsumque atheismi crimen, jubente domino suo, in furcam agendus, in triremes tandem pertractus fuerit; qui in Sp. S. templum *Florentiae* primo confugerat: Sic ruit dierectus iste, qui *Grenovio*, aliisque doctissimis viris, ruinam saepe paraverat. Plura die alio. Vir Celeberrime, & mei porro haud immemor vive. Norimb. d. 2. Augst. MDCLXXVIII.

P. S. Est mihi filius unicus, qui per annos quatuor mathematicis & historicis studiis in Academia nostra operam navavit, & adhuc navat; quem aliquando *Lugdunum* vel *Hagam* libenter emitterem, si alicujus magnatis, vel mercatoris saltem, favore uti posset.

EPISTOLA CCLXXXIV.

NIC. HEINSIUS

Christoph. Arnoldo.

Noribergam.

A Moris tui constantiam equidem sum exosculatus, insignem plane & perararam hoc seculo, acceptis nuper literis, quas per *Daumium* nostrum ad me curatas voluisti. Annus, puto, tertius est, quod *Roberto Goefio*, sororis meae filio, iter in Italiam molienti, in mandatis datum, si forte per urbem vestram transiturus (de eo enim si certius constitisset, literas addidissim) te meis verbis salutaret, deque statu tuae valetudinis, quo is loco esset, ad me perscriberet. Fecit ille quod petebam, uti postea ex ipso cognovi ad nos pridem reverso. Atque adeo augurari datur, instaurata nunc pace, post atrocissimam tempestatem bellicam, ut literaria commercia, quae cum ipso literarum nomine jacebant interrupta, redintegrentur propediem, & ad pristinum cultum post
li-

liminio revocentur. De *Marci Velseri*, viri ut dignitate, sic doctrina illustris, colligendis ac luci permittendis operibus, non possum non probare vehementer consilium. Extare memini in scriniis meis complures ejus ad *Josephum Scaligerum* exaratas literas, quae ex haereditate paterna ad me venerunt, conquiriturus has, ut primum animus ex angustiis temporum funestorum nonnihil respirare coeperit. Peiresciana Bibliotheca publice distracta est, ex qua ipse *Papirii Massoni* de fluminibus Galliae commentarium possideo, numismata ejus aere suo *Harlaeus Thuani* cognatus. In omni antiquitate nihil fere exstat magis depravatum librariorum culpa Catonis tui Diris, nec codices manu exarati, quos complures vidi pervetustos, multum juvant. Loca tamen nonnulla ductus conjectura videor persanasse. De Nasonis calamo in Hungaria reperto, deque ejus sepulchro illic exstante mera impostura est, cum Tomi a Pannonia longo terrarum intervallo distent. E *Gronovio* patre olim edoctus sum in Rittershusiana Bibliotheca codicem *Metamorphoseon Ovidianarum* exstitisse non contemnendae notae. Vale Vianae. 8. Novemb. *MDCLXXVIII.*

EPISTOLA CCXXXV.

CHRISTOPH. ARNOLDUS

Nic. Heinso.

Vianam.

Dici non potest, quo triumpharim gaudio, cum epistolam tuam solvi, & memorem mei, & lectu gratissimam. Gavisi etiam sunt *Welseri* nostri, qui familiaribus Augustae in mandatis dedere, ut singulari studio in tabulas Eugubinas *Balei* pro te inquirerent, & quovis pretio compararent: Id cum circumspecta cura agunt, ut mutuam servitutem inserviant, certa spe freti, fore, ut ipsis *Welsarianas* ad *Scaligerum* epistolas aliquando mittas; pro quibus exemplar integrum verbis meis pollicentur. Memoriam *Furerianam* quia haud negligo, istam una cum altera *D. Wagenfeilii* a *Carpzovio* nostro, data occasione, accipies. *Welseri* Commentarium in Calendarium Rom. plerique omnes mecum nesciunt. Quae ad Val. Catonem observasti, cadent mihi gratissima, juveniles quippe errores meis facile agnoscenti: utinam vero Batavi opellas meas aliquando recuderent; quod vix sperandum. Ovidii *Metamorphosin* MS. *Georgius* accepit *Rittershusius* ex hereditate paterna; quod *Nicolaus* frater dudum mihi indicaverat: Hic enim sorte contentus juridica fuit, Philologis illi relictis. Verum *Georgius* ille, Marchionis Baruthensis quondam consiliarius, una cum immorigero filio (quem noxam adagio vocant) & omni familia ante annos plus quam viginti e vita hac discessit. Non ita pridem in Ciceronis ac Senecae epistolas MSS. haud contemnendae aetatis incidi; sed annum invenire non licet. Postremo filium meum abs te amari laetor; nam semper illud poetae in mentem est mihi: *Melius cras forsân habebis*. Bene vale, vir Celeberrime, & amae constanter. Norimb. d. 23. Novembr. *MDCLXXVIII.*

EPI-

EPISTOLA CCLXXXVI.
NIC. HEINSIUS*Christoph. Arnoldo.**Noribergam.*

NUdius tertius copia mihi facta est, idque beneficio *Carpzovii* nostri, tum epistolae tuae, tum memoriae *Furerianae*, quam tibi & Cl. *Wagenfeilio* conservatam debitura est olim posteritas. Seposui librum intentius a me perlegendum simul illos, qui nunc prae manu sunt, absolvero, quod fiet brevi. De Tabulis Eugubinis *Baldi* non est, quod tu & nobilissimi *Welferi* multum laboratis: est enim quo carere possim, nisi forte pretio salubri ultro vobis offerantur. Idem dictum esto de Geographis Graecis, quos *David Hoeschelius* olim in publicum dedit: nam exemplar ejus libelli, quod me in Sueciam comitatum est aspersum fluctibus marinis, labem inde contraxit; sed haec obiter. Cum V. C. *Emericus Bigotius* ad me scripserit rure se excursurum propediem Lutetiam, ut magnam ea in urbe quadragesimae partem exigat, rogabitur a me per literas, si Calendarium illud, quod a *Naudaeo* mihi exhibitum recordor, adhuc supersit in Mazariniana bibliotheca; quam postea auctione publica distractam, sed sic, ut libri majorem partem ad veterem dominum sint reversi, fando fortasse audieris. Ubi primum per otium & valetudinem licuerit, scrinia excutiam mea omnia, etiam illa, quae jure haereditatis ad me a patre pervenerunt, ut *Marci Welferi* ad *Scaligerum* epistolas, & si quae praeter has offerentur, e ruam ac tibi, vel potius posteritati, vindicem. Hoc tantum in transcurso. Vale, vir optime, & Cl. *Wagenfeilio* aliisque apud vos viris literatis salutem dicere velis. Vianae 13. Februar. CIOIOCCXXIX.

EPISTOLA CCLXXXVII.

CHRISTOPH. ARNOLDUS

*Nic. Heinsio.**Vianam.*

Nobilissime Heinsi, ingens seculi nostri decus: non credis, quibus gaudiis Nexsultarim, postquam *Carpzovius* noster nunc Senator amplissimus, e tuis summam indicavit benevolentiam, te nempe submissurum nobis *Welferi* ad *Scaligerum* epistolas, bona fide a me describendas, & eidem restituendas; dummodo de secura mittendi constet occasione. Gratias ago & *Velferorum* & meo nomine singulares, ac ulterius rogo, ut ad Maecenatem nostrum Lipsiensem digneris emittere; qui recte, ceu pollicitus est, curabit omnia: & eadem redire ad te jubebit via, qua ad nos pervenere. Ab Augustanae bibliothecae Curatoribus figuras, Venetiis aeri incisas, quae ad Historiam Vindelicorum inprimis attinet, *Welferi* imperialibus quinquaginta redimere coguntur; neque hi recusabunt, quod illis, ni fallor, dedecori est. Ad *Bigotium* celeberrimum, cujus

Tom. V.

Xx

no

nomen majus est, quam ut manu mea attentari debeat, quia ipsemet literas exarare non sustineo; rursus iterumque oro, ut eundem denuo, per salutem ac gloriam rei literariae, horteris; quo Calendarium Rom. *Velferi* comment. illustratum, Lutetiae expiscetur; aut saltem tale illius indicium faciat, quod vitae Velferianae inseri aliquando a me possit. Redhostimentum adhuc me tibi debere doleo, pro aurea Virgilii editione, qua obscuram illustrare bibliotheculam meam voluisti: desiderio tuo nondum inservire potui, ceu pollicitus eram; melius cras forsan jubebo. *Phorbaeum* ea collegisse audio, quae beatissimus Parens tuus haud pauca in Hesychii Lexico observavit illustranda: statim recordatio subiit, *Joh. Vitum Pergerum*, hominem doctissimum, sed in obscuro Thuringiae angulo Ilmenavii degentem, anno superiore *Pricaei* indicem scriptorum, qui in Hesychii vocabulario laudantur, ostendisse mihi, diligenter a se recognitum: Praeterea annotationes suas ad Schrevelianam illius editionem, in quibus *asterisco* notavit, quid rejiciat; *cruce*, quid ipse nondum allatum afferat. Verbo: Graecus & inops is est, cujus admiranda eruditio promotoribus caret. Denique, ni grave sit, auctoris nomen indica, qui origines, ni fallor, Delphenses Belgice nuper descripsit; his enim Illustris *Rutgerii* tui imago, quam tibi quoque debeo, tunc inferebatur. Vale pancratice, Amicorum optime, ac porro vive, ut vivam. Norimb. d. 26. Septemb. MDCLXXIX.

EPISTOLA CCLXXXVIII.

CHRISTOPH. ARNOLDUS

Nic. Heinso.

Vianam.

Nobilissime Heinse, ingens seculi nostri Decus. Magna sensus laetitia tuae me affecerunt; perge ita res Velferianas promoverè, ceu coepisti! Ad Hoeschelii Geographos Graecos quod attinet, in officinis quidem nostris, jamdudum evacuefactis, haud amplius occurrunt; memini autem, non ita pridem apud antiquarium quendam eos me vidisse: Revertar itaque ad eundem, operam daturus, ut quovis nanciscar pretio; dummodo rem gratam tibi fore intelligam. Dein ad Augustanos, *Spizelium* meum imprimis, aliquas exarabo, ut mecum inquirat. In Glossario, ni fallor, Pithoeano ad Leges Caroli M. Ludovici & Caroli Calvi, in voce *Eunna*, lego, *Velferum* nostrum haec ipsa edidisse Capitula, nunquam a me visa: De his, inquam, ulterius me doce; quia Oedipus es. In bibliotheca Bosiana exstant *Genesii*, Byzantini scriptoris, libri IV. βασιλεῶν ἀνέκδοτοι: qui Parisiis istam historiam ediderunt, nihil de *Genesio* habent; forte quod mecum ignorarunt? Praeterea *Carpzovius* ex tuis olim me docuit, in Galliis duo evulgari Glossaria mediae, ut opinor, & ultimae aetatis *Cangii*; Haec ipsa autem quoniam usurpare oculis meis haud licet, indica nobis quaeso, unde nummis *Bisantinis*, & *Marmotinis*, quos pro denario Petri Ecclesiae olim Papae exsolverunt, nomen illud sit? *Marmotta* Ferrarii in Orig. Ital. magis videntur ad rem facere, quam *Marmotte*, i. e. majus mona-

monasterium S. Martini, in Orig. Gall. Menagii: verbo: haeret aqua. Ad ultimum me latet, quid sit *Academia Recuperatorum*, cūjūs inter alios quoque socium ὁ πᾶν *Ferrarium* esse perhibent: ut huic eruditorum militiae nomen darem, una cum *Wagenfeilio*, *Patinus* ferme persuasit: sed quia exiguum nominis mensuram implco, haud consultum satis videtur, ut annuam. Vale, vir Celeberrime. Salutat te filius meus quam demississime. Norimb. d. 8. Mart. CIOIOCLXXIX.

P. S. Bene sit, precor, Bigotio cum studiis suis rusticanti!

EPISTOLA CCLXXXIX.

CHRISTOPH. ARNOLDUS

Nic. Heinsio.

Vianam.

Magnas tibi gratias persolvo pro Velsarianis ad Scaligerum epistolis; maximas vero pro his ipsi debent, ac verbis meis nuntiant Velsari. Opera Marci *Endterus* noster, per hanc aestatem, certo imprimet, dum Velsariana familia, in figuris cum cura aeri incidendis, sumtibus haud parcit; additis Itinerarii illius schedis, quod Hornius in orbe vetere jam exhibuerat. Nihil interea vovemus magis, quam ut *Velsari* nostri comment. in Calendarium vetus Rom. (cujus in illis epistolis haud leve indicium extat) ὁ πᾶν *Bigotius* e Gallicanis communicet bibliothecis, τὰς ἀντιγραφὰς. Cimelia vero illa MSS. ipsi potius *Carpzovio* nostro, quam meo, qui has affert, filio tradenda ac restituenda esse duxi; ne scilicet in itinere periclitarentur, quod ille meus modo ingressus est: mercatores enim magis, quam viatores, talia servant atque custodiunt. Oro autem reverenter, ut quod ultro pro insignita tua humanitate facturuss es, mei quoque gratia, Heinsiani nominis observantissimum hominem ad alloquium admittas; curesque sentiat, paternam allegationem sibi non omnino nihil profuisse. Praestabit is operam suam in Mathematicis, aliisque Politicorum studiis; si qui fortasse sint Hagae, Leidae, vel Ultrajecti, aut alibi, qui illa uti haud recusent. Quid multis? Θεῶν ἐν χάριτι κέρται. Consilio ipsum juva, habebis obsequentem & gratum. Postremo scire saepius desideravi, quando, & quomodo *Balsacus* iste, qui omnes eruditos in epistolis suis satyrico sale perfricuit, ludibrium mortis factus sit? & quia tu. solus potes, doce me, quaeso, ubi locorum extet sive MS. sive, quod vix audeo fari, editus Scholiastes Graecus in N. T. cujus praeter Celeberrimum Parentem, meminere Salmasius, Montacutius, P. Simon, Spanhemius, Colomesius, alii. Anonymum esse constat; sed fortassis conjectura saltim aliqua assequuntur viri doctissimi auctorem; si de filo staminis judicium ferant. Sed contineo me. Da veniam & fave. Norimb. d. ult. Marti. CIOIOCLXXX.

*Thom. Munckero.**Delfs.*

Ultimo congressu nostro, vir doctissime, ne ardor ille de studiis communibus confabulandi tecum, quo ferebar, me nonnihil transversum egerit subverendum videtur utcumque, dum & in multam vesperam protracti sunt sermones, & de iis agebatur nonnunquam, quae festi illius sanctimoniae ac religioni minus respondebant. Postea nil equidem prius habui, quam ut super rebus tuis convenirem Amplissimum Senatorem *Rulandum Kinschotium*, qui te fratri suo commendavit hîc nota de meliore. Addidissem & meam, nisi fat superque praesidii fore in hac una commendatione credidissem. Praeterea differebat rumor, Syndicum vestrum abesse a civitate. Is ubi rure redierit, aut scribam, si voles, in rem tuam, aut coram negotium illi omne commendabo. Tu, utrum malis, eligito. Vale, & me tuis accensere perge. Hagae Comitum CIOIOCLXXV. Kal. Juniis

*Nic. Heinsio.**Hagam.*

Innoxias confabulationes illas iis de literis, quas in gloriosis suis titulis legi gaudent prisci illi Christianismi antistites, donabit, spero, facile nobis, tametsi sacra luce habitae sint, divinum numen. Atque utinam ne unquam majus ejus majestati inferamus probrum! Sed ut eatenus nulla captus sum religione, ita non parum metuo, ne nimium tibi nimiumque sim visus simplex. Vix videre cupere hunc hominem significaras, cum, ecce, advolo statim, & tam familiariter tecum sermones caedo, ut si esses unus de meis tribulibus. Quaeso pro caetera facilitate tua abire & hoc mihi finas. Tam promptus erat ad servitium tibi deferendum animus, ut omnis ipsi mora longa videretur. Fulserit forte olim candidi mihi aliquot soles; sed illo candidior, quo ad te iter tetendi, surrexit nullus. Cujus viri nomen omnis adorat orbis Europaeus, eum *σῖμα πρὸς σῖμα* appellavi, & quam bene his literis humanitatis indidisset nomen antiquitas indidem didici. Ante, Hercules, mei mihi nominis, quam illius diei excidet memoria. Haec ego, vir illustris, ut a te discessi, identidem meo cum corde tacitus volvo, ut ne ignorare me felicitatem meam forte putes. Quod autem laudare insuper me & tradere *Kinschotiis* voluisti, eo nexu me & mancipio adeo tuum fecisti, ut libenter vale libertati dicam. Tuum erit mancipium hoc, si dominus sedulo inservierit, tueri. Sed haec haecenus. Quae ad Petronium a te scripta ostendere mihi dignatus es, injurius videri possis in posterita-

tem

tem nisi proferas. Edideris licet opera multa immortalia, uti Libitinae voracitatem nihil necesse sit amplius a te timeri; nullum illo tamen magis ad quorumlibet, crede, hominum facturum stomachum. Invento tandem Cereali munere, stupebunt mecum tam diu glande se fuisse pastos. Accedat hoc ad caeteras laudes tuas, ut unicus Petronii audias sospitator. De *Odopeta* vel *Otlopeta* nihil verisimile conjectare possum. *Dasypodem* scriberem, si quicquam adjuvarent MSS. *Dasypus* est lepus. Vox, ut videtur, non intellecta Plinio, alium a lepore *Dasypodem* facienti. *Sclopeta* Reinesii ferme risum mihi movet. Quis enim unquam *Stlopetas* voravit? Propemodum certum mihi aliquod ferae nomen heic desiderari. Nam sagittarius ille, notante Germanici Scholiaſte, in venatu vitam exegit. Initio Petronii non satis arrident illa: *quod quisquis perperam discit*. Mallem, *quod quis juvenis*, ut sit ἀντιθεσις. vel certe alterum quis delerem. In coena Trimalcionis legitur vulgo, *bubale frustum*. In Fragm. *bubulae*. Invenio tamen in Glossis, *bubal*, βόειον. Post paulo visitur: *Qui tanquam togae virilis stolam sumsit*. Videbatur mihi rectius legi: *tanquam virilem togam*. vel extruſo τῷ *tanquam*, *die virilis togae*. In medio ferme: *Tanto magis impedit inguina* &c. Legendum puto: *expedit*. Magnam illius pulchre peculiati prae sua non mali poëtae praedicat fortunam. *Injuriamque Eumolpo ad-vocationemque commodabam*. h. e. favebam vapulanti, aderam ipsi, ut magis vapularet. Sed convenientius huic sententiae mihi videtur posse scribi: *Injuriaeque Eumolpo ad-vocationem commodabam*. Quint. Declam. in pag. 45. edit. novissimae. *ut illam in ad-vocationem sacrae mortis adducam*. Nisi si figuram illam, quam ἐν Ἀγῇ θανάτου appellitant Graeci, comminisci heic quis malit. Sub finem legas: *Idaeo frutices in gurgite sistam*. Rescribo: *Idaeos frutices*. Haec paucula ideo ad te mitto, vir illustris, ut videas, in quam minutis etiam nos semitarii literatores haerere soleamus, & quam nihil tibi, quo illud scriptum magis reddi possit perspicuum, sit relinquendum. Vale multum, & diu vive. Delfis Batavis Prid. Nonas Junias Anno ciccicclxxv. De Syndico nostro id facias rogo, quod tibi maxime sic futurum commodum.

EPISTOLA CCLXXXII.

NIC. HEINSIUS

Thom. Munckero.

Delfos.

Quod exploratum satis non haberem, essetne in civitate vestra Syndicus *Kinschotius*, an, quod frater videbatur velle, rus se contulisset cum nova nupta, neque litteris compellandum mihi illum duxi haecenus, neque ad vos excurrendum, ne frustra plane irritoque coepto volverem hoc saxum. Tu vero de qualicunque hac opera mea statues pro arbitrio, quod e re tua fore potissimum videbitur. Nam & ipse credo nondum rediisse ad vos potuit, & frater in Zelandiam profectus cis paucos dies ad nos recurret, qui pollicitus jam est, se commendationi meae sua auctoritate apud civitatis vestrae Magistratus

X x 3

esse

esse suffragaturum. E Petroniano loco de *Odopeta* vel *Oclopeta* non possum me expedire. Cogitabam aliquando minima mutatione, *super sagittarium Ocypoda*. ὠκύπους λαγώς poëtis Graecis, Hesiodo in primis scuto Herculis. quomodo *lepus* tanquam *levipes* Varroni, qui & Lacedaemoniis ταχίνης eadem de causa dictus, eodem teste. Sed & hoc longe quaesitum. Deinde non est credibile bis leporem in caena tam lauta opiparaque convivis appositum. Fuit cum putarem *Scolopacem* vel *Scolopaca*, quorum rostra sagittae respondent. Sed locus iste altioris est indaginis. Porro in codice meo annotatum video, legi debere, *quod quis perperam discit*. In illis, *quid ille alter, ô dii, qui tamquam togae virilis stolas sumpsit*; V. C. Scaligeri, *quid ille alter die, vel, qui tamquam die*. Videntur transponendae voces; *quid ille alter? quid inquam? qui die togae virilis stolam sumpsit*. nec multum abludit Gonzalii conjectura, *quid ille alter, qui die inquam. ô dii! a Lipsio est*. Tale illud Ciceronis in Philippicis: *sumpsisti virilem togam, quam statim muliebrem togam reddidisti: dies virilis togae apud Suetonium non semel occurrit. tanto magis expedit a Schoppio est occupatum. Injuriae advocacionem probo*. Ultimo loco scribendum videtur, *Edono frutices in gurgite sistam*. nam mare Thracicum procellis frequenter agitatam. Apud Nationem alicubi in Tristibus etiam ex veteri codice *Edonas* pro *Ideas* memini restituere.

— — — ut Thracia Bacche,
Cum stupet Edonis exululata jugis

Sed haec alterius erant loci fortasse. Haftenus ad tuas literas. Nunc corollarum loco habe alterum Petronii locum, si quid video, longe mendosissimum.

*Talis Herculeâ Stympthalidas arte coactas
Ad caelum fugisse reor, poenaeque fluentes
Harpyias, cum Phineo maduere veneno
Fallaces epulae.*

ita vetustus Cujacii codex, e quo Petronium Scaliger descripsit. Altera ejusdem membrana, *peneque ferventes*. scribendum videlicet, *pennaeque furentis Harpyias*. Nam quod alii ad aves Stympthali referebant, id nonnulli ad *Harpyias* ut pennas suas pro sagittis ejaculatae dicantur, inter quos & Hyginum, puto, & in hac ipsa Argonautarum cum Harpyis pugna Apollonius Rhodius. Sed de *Phineo veneno* quid demum sibi velit narratio, Mythologis omnibus intacta, me praeterit: Suspicio *veleno* exaratum fuisse pro *Celaeno*, unde *veneno* factum, ac reliqua interpolata. Scribendum forte.

*Cum Phineam pavere Celaeno
Fallaces epulae.*

Sic & Seneca in Tragoediis *Phineas* aves *Harpyias* vocat. Vale. Hagae Comit. MDCLXXV. 10. Junii.

EPISTOLA CCLXXXIII.

THOM. MUNCKERUS

Nic. Heinſio.

Hagam.

DE *Odopeta* vel *Oclopeta* sane crepera res est. Interim satis certum de pisce, quicum venatori nihil negotii, nihil esse cogitandum. Inter varias conjecturas tuas palmaria est illa, & verisimillima *Scolopacem* vel *Scolopaca*. Nemesianus, vel quicumque alius est auctor fragmenti de Aucupio,

Praeda est facilis ὁ ἀμφοτέρωθεν Scolopax.

Nisi poeta in syllabae modulo peccavit, scribendum in Aristotele & Hesychio σκολώπαξ pro σκολόπαξ. Apud illum Hist. Anim. lib. ix. cap. 26. invenio etiam ἀσκολώπας. Corrigit Casaubonus, ὁ σκολώπας, vel ὁ σκολόπαξ. Sed lexicographi eandem avem σκολόπακα & ἀσκολόπακα vocari credere nos volunt, unde acceperint, ipsi viderint. *Ocypoda* substantive, ut loquuntur Technici, nusquam vidi usurpari. In Plinio invenio lib. x. cap. 63. *Superfoetant dasypus & lepus*. *Dasypus* ibi sine dubio illi est cuniculus. Sed male *Dasypodem* a lepore, qui & ipse *dasypus* est, distinguit. Bene enim, καὶ τὴν ἐμὴν κείσιν *Bodinus* ad Opp. Cyneget. pag. 100. *Dasypoda* genus, species λαγῶν & κύνικλον facit. Sit igitur Petronio *Dasypus* cuniculus, ne in tam opiparo convivio nimis rustice bis *lepus* apponatur. De *quisquis* idem mihi, quod tibi, venisse in mentem vehementer gaudeo. *Quid ille alter?* &c. Non dubito, quin omnes docti ambabus heic ulnis amplexuri sint emendationem tuam. *Edono gurgite* nil fieri pote elegantius. Pulcherrima est antithesis inter profundissimum mare & summum verticem. In Corollario ignis videtur suppositus cineri doloſo. Quamvis licet easdem esse *Stymphalidas* & *Harpyas*, nescio quo auctore, scribat Natalis, nec dum tamen pennas ejaculasse *Harpyas* apud antiquos invenire quitus sum. Sin id constaret, statim pedibus irem in sententiam tuam. Cum ego istos olim versiculos, ut vulgo eduntur, legerem, Virgilii illam *foedam ventris proluviem* innui per *famem* putabam, & pro *Phineo* reponebam *Phineae*, ut uni substantivo more Graecorum duo adjungerentur epitheta. Sed haec nauci non sunt. Tuam correctionem, *Phineam pavere Celaeno* vel a Petronii ipsius manu esse, vel esse Petronio dignissimam, negare sustinebit nemo. Atque utinam Petronium aliquando Heinſianum videamus! aut omina me fallunt, aut nemo, nisi tu unus, restituet nobis illum scriptorem. καὶ ταῦτα μὲν ταύτῃ. Quam tibi me hac tam benigna ac quaesita nostra responsione obstrinxeris, quam gratas minerim gratias, & similia, quae ab iis dictitari solent, qui solvendo non sunt, cum totum tibi addixerim, prudens omitto. Syndicus noster jam biduum est, cum in urbem rediit, & fratris procul dubio, quas ad aedes ejus deferri curaveram, accepit literas. Multum amplissimum Senatorem apud fratrem posse necesse est. Sed Heinſianum nomen quin plus valiturum sit quis dubitet? Ut coram cum illo de negotio nostro agas, tametsi efficacius futurum videatur,

cum

cum per epistolium confici possit, rogare non audeo. Summa petitionis meae huc redit, ut convictores meo relinquantur arbitrio, nec ex illis apud Delphenenses pendeat existimatio mea. Si quis interim ex civibus mihi committere voluerit puerum, recipere illum in convictum & disciplinam non gravabor. Id modo, ne exterorum quemquam, nisi si vel docti viri filius, vel aliqui generosae indolis sit adolescens, admittere cogar, obtineam. Speciosus erit color, si apud nostrum jacias, profuturum me aliquando plus publico scriptis meis, quam convictoribus alendis. Revocandum esse antiquum morem, quo ante illum lucripetam, cujus in locum surrogatus sim, ab isto onere semper Collegii Moderator (est & hic, ne nescias, inter meos titulos) fuerit immunis. Prorectori, ne Rectori geminaretur labor, datas fuisse illas partes. Denique uxorem mihi esse valetudinariam, nec ad ipsas molestias sufficientem. Atque haec sunt, vir illustris, quae pro causa nostra dici possunt; ex quibus tu ea feligas velim, quae maxime videbuntur praegnantia. Ita vale, & diu vive bono publico. Delphis Bat. a. 1111. Idus Junias Anno CIOICLXXV.

E P I S T O L A CCLXXXIV.

N I C. H E I N S I U S

Thom. Munckero.

Delfos.

REcTe omnino es arbitratus, vir litteratissime, processurum negotium feliciorum utique in modum, si coram viva voce commendetur amplissimo *Kinschotio*, quam si per epistolam id fiat. Jamque ad vos procrastinationis omni repagulo amoto me conferrem, hoc acturus omni studio, nisi essent oblata praeter expectationem, quae me ad Leidenenses evocarent sub hanc vesperam: unde cis biduum triduumve reversurus rebus tuis curandis nihil habebam antiquius. Adcrit interim redux e Zelandia *Kinschotius* Senator, quem succenturiaturum non oscitanter hic nobis audeo polliceri. De *Scolopace* conjecturam meam haud improbatam abs te esse, viro in hisce litteris perspectae mihi sagacitatis ac industriae, est sane cur impense laeter. *Oclopacem* vel *Oclopecam* turbato nonnihil litterarum ordine videtur dedisse primo festinans librarius, omissa, ut fit, prima littera ad vitandam soni durioris asperitatem, unde postea *Oclopeta* & *Odopeta* sunt enatae. Sic *Mylax* pro *Smylax*, *Myrrha* pro *Smyrna*. & mille talia; *Molus* pro *Tmolus*, *Marus* pro *Tmarus*; quomodo vetustissima exemplaria apud Maronem: quem bis eo in vocabulo castigavi. De Harpyjis pennas suas ejaculatis agit puto Apollonius Rhodius libro 11. in Phinei hac ipsa fabula, & Hyginus fab. xx. ita video in schedis meis annotatum: certe ad conjecturam illam *pennaeque furentis Harpyias*. Tu utrumque sodes consule, quando neuter horum mihi nunc est ad manum. *penna furens*, quomodo *ensis furens* & *bellum furens*, Poëtis usitato loquendi modo, de quo nos plura ad Silium Italicum annotabimus. De Hystrice Claudianus, *Tantus in angustum strepitus furit*. videlicet dum pennas ejuculatur. *τὸ sanie*, commentum est criticorum, nec comparet in scriptis aut
veru-

vetustae editionis libris, qui *paene* aut *pene* ad unum omnes. Volebam olim penna^{ae}que fluentis Harpyias. Sed praestat alterum. Vale. Hagae Comitum MDCLXXV. XII. Junii.

EPISTOLA CCLXXXV.

THOM. MUNKERUS

Nic. Heinsio.

Hagam.

NUlli repertas a me pennas ejaculantes Harpyias nuperius cum scriberem, vir illustris, jam consulti a me erant Apollodorus & Hyginus! Περοβόλῃς, ut ita loquar, Stymphalidas uterque, non Harpyias facit, neuter, ut Natalis, cum Stymphali avibus confundit. Inspice Hygini cap. 19. & 20. Apollon. pag. 171. 184. 249. Edit. Elzevirianae. Hyginus in hac narratione de Stymphalidibus mirificus est. Cap. 20. *Ex insula Dia hastarum & clypeorum sonitu ab Argonautis fugatas* scribit. Atqui insula illa non Dia, sed Aretias erat, si credimus erudito Apollonii Scholiastae ad vers. 384. & 1092. lib. 11. Capite autem 30. *ab Hercule sagittis in insula Martis interfectas memorat.* Apollonius, quem alias sequi solet, longe aliter; non interfectas esse, sed crotalis ex Stymphalio lacu fugatas. Deinde *insula martis est Aretias*, Ἀρετῆς νῆσος etiam Apollonii Scholiastae: verum ibi non Hercules, sed Argonautae his cum monstris sunt congressi. Ut in multis aliis, & heic Hygini requirimus diligentiam. Certe complures istiusmodi Hyginianas mittere tibi possem ἀνισορησίας, si vel is scriptor tua esset dignus censura, vel res mei pudoris iterato fatigare humanitatem tuam. Reservabimus haec alteri, quam horis subsecivis paro, fabularis istius historiae editioni. Ut dies docere diem solet, non pauca jam mihi in mundo sunt, quibus priores commentatiunculae nostrae multo & meliores possint fieri & auctiores. Unum hoc te rogem finas de stylo & aetate Hygini quid censeas. Non optimi esse aevi scriptorem, nec epitomistam ejus propemodum mihi certum. Cl. Schefferus, ut nosti, in Hygino quis stylus vere sit humilis & plebejus, apparere nobis contendit. Qui quaeso magis, quam in Servio, Lutatius, Scholiaste Germanici? humilem novi stylum Terentii, Nepotis, & Phaedri: sed quam longe Hyginus ab optimo aevo, tam longe illi ab Hygino absunt. Tamen ita loquebatur plebs Antoninorum tempore. At plebs rudis & literarum experta, quae ita soloecissabat, non iis de rebus, quae ad humanitatis pertinent studia, scribebat libros. Plebeitatem vocat, quam ego stribliginem. Cur illam ergo exemplis illorum, qui circa Antoninorum tempora vivere, non adserit. Potuisse hoc fieri dicet forsitan, si aliorum plebejorum, qui isto aevo scribillabant, opuscula ad nos pervenissent. Hoc quidem divinare, non probare est. Cur verbum non facit de versiculis Prudentii, ita ut in *Micylli* editione comparent, a me adductis? An hoc jam occuparat *Morellius*? Non licuit mihi haecenus videre ejus editionem. Sanctandream, quam nunc demum nactus sum, illos omittere deprehendo. Non poenitet me tamen judicii,

Tom. V.

Yy

dicii,

dicii, quod de iis, etsi omnibus antiquis editionibus destitutus, & sola ductus divinatione, in publicum dedi. Centuriae doctorum aliae, quas de Hygini fabulis profert Cl. Schefferus, contra ipsum stant. Ut alios omitam, Scaliger ex Graeco conversas esse, Barthius ex variis Mythologorum libris consarcinatas autumat. Graecos fuisse Mythologos, unde maximam partem conservata sit haec congeries, suadere videtur stylus, & passim occurrentia Graecanica vocabula. Utrum vero Hyginus ipse, cum non paucae pericopae ex hoc scripto in aliorum visantur commentariis Latinis, versionem instituerit, an vero alii, unde sua excerpserit, est cur dubitare possis. Quoniam adhuc chartam superesse video, lubet adjicere aliquid de illis *gastrarum fragmentis*, quae ut olim sociorum Eumolpi pedes, ita nunc criticorum vexant cerebrum. *Glaedarum* alii, alii *Grumorum* reponunt. Ego nihil puto mutandum in illa voce. *Γαστήρ* & *γαστήρ* vasa ventricosa sunt, a *γαστήρ* sic dicta. *Gastrum* vas aeneum angusto fundo in glossis Arabicolatinis exponi invenit Vossius. Verum non ad aenea tantum, sed & fictilia extendendum hoc esse vocabulum, vel ipse Petronius docere nos potest in Fragm. Trag. cap. LXX. *Notavimus ostrea petlinesque e castris labentia*. Rescribo indubitanter, *e gastris*. Amphoras modo appellaverat. Sed pro *eminentium* existimo scribendum *eminentia*, & locum totum ita constituo: *per omnes scrupos gastrarumque eminentia fragmenta*. Quando tanta est benignitas tua, ut mea causa huc venire constituas, faciendum videtur, ut de hora adventus, ne in quaestione sit, ante fiat certior Syndicus noster. Amplissimo Senatori jam nunc testor aeternum me devinctum. Gratias ipsi postmodum agam per epistolum. Vale multum, vir illustris, & tueri perge hoc mancipium tuum. Delphis Batav. a. d. xvii. Kal. Quint. Anno cicioclxxy.

EPISTOLA CCLXXXVI.

NIC. HEINSIUS

Thom. Munckero.

Delfos.

Nondum e Zelandis redux comparet inter nos *Kinschotius* Senator, vir praestantissime, qui tamen abesse diutius hoc triduo vix potest, si quas mihi discedens ipse exposuit, profectionis hujusce causas satis habeo perspectas. Mihi quoque cras ad Leidenfes meos necessaria de causa erit redeundum. Veneris igitur die proximo aut Saturni ad vos me conferam, ut res tuas pro virili Syndico vestro commendem; modo nequid is pedem Delphis interea moveat. Poteram & alios compellare, in primis *Bleisvicium*, sed & ille abest a vobis frequentissimus, & unus instar omnium mihi *Kinschotius* est tentandus, si tantum velit pro me, quantum se velle non semel est professus. Cum Hygini & Apollonii loca investiganda de Harpyiis Petroniano margini adlinebam, hoc volui haud dubie, fabulas Harpyiarum & Stymphalidum confundi, ut & hae Argonautis ac Phineo negotium exhibuisse sint creditae. Tibi interim, cui copia librorum nunc est in promptu, pro fide atque erudita admonitione est quod gra-

gratias debeam peringentes. Apud Hyginum multa occurrere parum Latina; & fecem sequioris aevi redolentia, diu est quod deprehendi, tum in ipsa fabularum narratione a semet illum dissentire haud raro. Unde liqueat interpolatum esse non una ab manu, poetarum Scholiastas praecipue ac Mythologos Graecos compilante: sic Arati Scholiasten Graecum memini videre donatum Latinitate in membranis Germanici Caesaris Arateorum Puteanae bibliothecae perantiquis. Certum si scripsit, uti nunc circumfertur, Hyginus ille, quicumque is tandem est, vix ad Theodosii Junioris assurgit tempora; sed cum & Servius, & reliqui Poetarum commentatores adeo mutilati interpolatique ad nos pervenerint, ut vix umbram sui met ipsorum circumferant, potuit & Hyginus id ipsum fati subisse. De *Gastris* in fragmento Traguriano reponendis pro *castris*, diu est quod in codice meo annotavi, & *Gastrarum* (nam ita quoque codex Scaligerianus) *fragmenta*, adversus Gronovium *testas* reponentem, defendi, qui & male alterum tentabat locum a Trimalchionis coena, ubi legendum est e vestigiis libri Traguriensis, *postquam omnia textorum dicta consumpsit*. Loquitur de ipso Trimalchione, qui dicteria omnia, quibus textores, faex plebis, uti assolent, inter ludendum consumserit. Vale. Hagae Comitum xviii. Jun. cldcclxxv.

EPISTOLA CCLXXXVII.

THOM. MUNCKERUS

Nic. Heinsio.

Hagam.

Spem de studiis nostris aliquam concepisse te, vir Illustris, cum antehac non semel ex *Ryckio* nostro, tum nuperius etiam *Maresio* intellexi. Contra quam alias fieri assolet, pudor me simul & gaudium, ut audivi, cepere. Ut humanitate tua in ruborem datus sum, ita ἐνφρημία ista animus demissus non parum mihi erectus. Sed utinam in Hyginiana opella melius dedissem praeludium! deproperata pleraque in ea & minus exacta. Quaeso dones hoc frigori, quo me ferit fama, scriptorem illum narrans jam a Cl. *Scheffero* occupatum. Quod si mihi δὲ ξημερὶν tam diu superesse voluerit, donec δευτέρως dem. φροντίδας, spero fore, ut melius litem. Nam ut nemo melius novit, quam tu, ipsum adhuc illud scriptum Augiac est stabulum. Nunc me habet totum Antoninus Liberalis, quem nostro commentario instructum suis typis excudere coepit Amstelædami *Waesbergius*. Unum in eo locum cap. 31. offendi, in cuius explicatione non admodum mihi satisfacio. τὸ δὲ ἀπὸ τὴν ἐν τὸς ἑτάροις ἐγένετο Πευκετίων. Quò de loco si mihi tuas cogitationes miseris, rem hominibus elegantibus perfecris gratam. Deinde illud ἔρρεσκεν Cap. 41. ut pote plane Jonicum, non satis concoquo, & mutatum vellem in ἔρρησκεν. Quid tibi videatur, noli invidere tyroni, qui te in paucis colit & admiratur. Interim, si quid hac scribendi licentia peccaverim, tuam facilitatem in causa fuisse ut credas, & tibimet ipse ignoscas, oro quaesoque. Quamvis licet saepius me, ut tandem aliquando te

compellarem, hortatus sit Cl. *Ryckius*, & ipsemet non parvas ob causas impense id cupiam, impetrare tamen a pudore meo haecenus non potui. Responsum unum ad has quaestiunculas, ut propius tuam adorare purpuram audeam, mihi pararii vice erit. Vale multum, seculi nostri Decus, & diu vive. Delfis Batavis a. d. xiv. Kal. Quintiles Anno cicioclxv.

E P I S T O L A CCLXXXVIII.

N I C. H E I N S I U S

*Thom. Munckero.**Delfos.*

Minimum medius fidius abfuit, quin re longe gratissima exoptatissimaque fraudatus forem, hoc est compellatione tua, dum in illa oppidi parte iisque in aedibus me quaerit tabellarius, quas inhabitatas olim ante hoc triennium deserui, vir praestantissime. Revocavit tamen aberrantem nescio quis bonus Genius, & ex amicis nonnemo commodum superveniens, qui quomodo curari literas oporteret, demonstravit ignaro. Ceterum ex iis, quae ad Hygini fabulas annotata publico proxime dedisti, quantus esses in re litteraria, perspectum habui abunde: ut jam ignorare non possim, quid de tuis ad Antonini Liberalis Metamorphoses animadversionibus sperari a nobis par sit. Nec defuere, qui spem mihi fecerunt, de non paucis perpulchrum in modum abs te observatis ad Epigrammata veterum Poëtarum Latina: qua in palaestra cum & ego nonnihil desudarim aliquando, propius me tibi ipsa hac studiorum societate conciliari agnosco. Nec patiar elabi occasionem oblatam, familiarius uberiusque tecum hisce de rebus dissertandi, si non gravaberis ad nos quandoque excurrere, dum sedem hoc in oppido, tam propinquo vobis, figendam mihi propono. Quae quidem opportunitas in longum proroganda vix videtur: cum thermas Germanicas sub exortum mensis proximi adeundas valetudinis causa voto ac destinatione praesumam, post expeditas, quae me haecenus hic morantur, supra re privata occupationes. Antonini Liberalis Metamorphoses si in promptu nunc essent, possem fortassis nonnihil lucis adferre locis hisce, in quibus te caligare ac haerere asseveras. Quamquam quid ego post te Roscium huic scenae me committam! sed relictis ruri libris omnibus, etiam Antonino hoc Liberali, qua nuperae, qua Xylandrinianae editionis, symbolam conferre vix ausim, nisi temerarius plane & inconsultus, *ἔργον* pro *ἔρεσκεν* scribendum tamen in altero loco est cur tibi accedam. De altero deliberandum amplius. Vale, vir clarissime & mihi velle, ut coepisti, perge. Hagae Comitum cicioclxv. a. d. xi. Kal. Quinctil.

EPISTOLA CCLXXXIX.

THOM. MUNCKERUS

*Nic. Heinsio.**Hagat.*

TAndem aliquando segni typographo paene conviciis extorſi noſtrum Antoninum. An aliquod operae fecerim pretium eum denuo publicando, ubi hanc editionem cum illis, quae antehac prodierunt, contuleris, tu iudicabis, vir nobiliſſime. Niſi proprii me foetus amor occoecat, videor illum non paucis in locis ab iniquis aliorum cenſuris vindicaſſe. Libuit interdum etiam paulum exſpatiari, ut, ſi opera noſtra in Antonino leviuscula forte videretur, eam in aliis lectori approbaremus. Ad ſummam; ne plane paedagogicum olerem paedorem, virum me feci magnificum, & ſtudiui quaſi criticus loqui. Nec id, credo, reprehendes, cum ſtultiſſimum eſſe ſcias, non optimos imitari. Populum & ſuffenos, qui hoc tantum, quod ipſi faciunt, rectum putant, cum ſapientiſſimo viro Diogene κρόμνα ἐσθλείν libenter jubeo. *Heinsio* modo placeam, ſat habeo. Si vera eſt fama, ſtylum in me ſtringere minatur ὁ δαίνα. Sed modestiam noſtram ubi viderit, facile a ſe impetrabit, ut eum condant. Certe ſi ſapiet, malo cavebit. Jam viſa eſt ratio, qua pulcre me poſſim ulciſci. Ut interdum ab aliis diſſentiam, unius veritatis amor me cogit. Nec, quod erraverit, cum id ſummis quoque viris nonnunquam accidat, ideo aliquis mihi vilior. τὸ γὰρ μὴδὲν συνόλως ἀμαρτάνειν ἴδιον θεῶν. Monſtret mihi alter eadem, qua ego heic uſus fui, modestia errores meos, gratias meminero gratiſſimas monitori. Nunc accingo me abſolvendo commentario, quem ante annos aliquot in Catalecta, quae *Pitboeus* orbi literato dedit, auſpicatus ſum. Etſi non tam ſum ſtultus, ut omnes, quae adeo denſae congeriem illam occupaverunt, ſublaturum me inde mendas confidam; ſpero tamen fore, ut operam non inutilem juventuti navaſſe, certe lectionem ejus reddidiſſe faciliorem, videar. Subſidiis nonnullis iſtum conatum noſtrum adjuvare ſi dignatus fueris, caeteris beneficiis tuis, quibus aeternum me devinctum tenes, non parvum addideris cumulum. Vale multum, vir nobiliſſime, & favere perge clienti tuo. Delphis a. d. vii. Kalend. Novembrib. Anno C. cīdīcclxxv. Alterum ex libellis his nobili Senatori *Kinſchotio* rogo tradendum cures. Vehemens febris, quae heri ſub vesperam me corripuit, quo minus ſcribere nunc ad ipſum poſſim, in cauſa eſt.

EPISTOLA CCC.

NIC. HEINSIUS

Thom. Munckero.

Delfos.

A Mistelaedamo redux, quo ante paucos concesseram dies, Antoninum Liberalem hîc inveni, tuis animadversionibus pulcherrime illustratum, vir clarissime, quem munus ad me pervenire voluisti. Agnosco facile ex hoc focu, uti & jam ante tuo ex Hygino, ut linguae utriusque, sic antiquitatis universae, Mythologicae in primis cognitione prorsus intima, egregie te instructum esse. Quapropter injurius omnino futurus in tam praeclaras dotes, quibus te publico bono unice cumulatam Deus voluit, si a coeptis auspiciato lubricationibus interquiescas posthac, nec pertexas ea, quae hujus generis complura a te nobis exspectanda scimus. Quo magis indignor, nondum impetrari posse ab avocamentis hisce diuturnis, quae me ab omni seria cogitatione indignis modis jamdudum divellunt, ne ea animi contentione, quam scripto tam pererudito deberi intelligo, lectioni ejus totus incumbam. De paranda veterum Epigrammatum nova post *Pithoeum* editione quod cogitas, laudo equidem approboque vehementer institutum, quod in nonnullis forsan foveri atque exornari a me possit. Ceterum cum multae dissertationis id omne sit negotium, deque compluribus monendum te habeam, quae parum commode hac epistola complectar, in congressum nostrum hunc sermonem differamus praestat. Exemplar libelli tui jam oblatum est a me Ampl. *Kinscho*, qui te multa gratiarum actione imperit benignum oppido in modum. Vale, virorum praestantissime, & bonum commune litterariae rei porro, ut coepisti, cura. Exarabam Hagae Comitum Nonis Novembrib. *MDCLXXV*.

Antonino tuo sic delinitus sum ac adfectus, ut exemplar ejus cum aliis libellis, quos in hanc rem habeo paratos, in Gallias ad *Emericum Bigotium* praestantissimum virum mittendum mihi proponam, aliud itidem mittendum ad *Carolus Datum* veterem in Etruria amicum.

EPISTOLA CCCI.

THOM. MUNCKERUS

Nic. Heinsio.

Hagam.

QUod here in literis scribendis valde te animadvertebam occupatum, interpellationis meae ut ipsemet damnavi tacite impudentiam, ita tu eam ut ignoscas oro quaeoque. Attuleram *Betuleii*, & *Ἰδὲνα*, nominis Heinssiani in primis studiosi, libelli cujusdam mythici editiones, ut, quam iniquum in tam aequum agere institueret ille censor, tibi ostenderem. Cum praeter duas

Ab. Berckelii: Betula enim nostratibus *Berkbeem* dicitur.

duas aut tres ad summum nullam, nisi vel falsam, vel errati solummodo typographici dedisset emendationem *Betuleius*, non improbe facturum se existimabat, *δὲ ἄρα*, si opusculam illud ut utilissimum, ita pessime habitum denuo publicaret. Quae haec invidia, vir maxime, immo quae tyrannis est? ergo non licet ulli, etiamsi modestissime id fiat, ullum attingere scriptorem, ad quem alter aliquid sit commentatus, nisi ut conviciorum eum maneant plaustra? Hoc est revera, ut recte censes, literis plus satis hodie spretis majorem adhuc conciliare vilitatem. Qui ad Rhenum haec studia profitentur, quam de istius hominis conquerantur maledicentia, non, puto, ignoras. Cur ergo non dedit jam pridem illis poenas? Hoc ipso primum, quo laedit, tutus est, maledico, inquam, isto ore, deinde contemptu. Ne tamen diutius juventuti, apud quam magnificum se facit virum, imponeret, personam ei suam aliquatenus detrahendam putasse *τὸ δὲ ἄρα*, non fore quenquam, quin probaturus sit, facile mihi persuadeo. Quos his literis adjunxi libellos, eos rogo illis muneri mitas, quos vel in Italia vel alibi literarum noveris amantes: & ante omnia, ut *Bleisvicio* de meliore nota hunc hominem commendes, ubi te convenerit. De epigrammatum veterum editione quae monuisti, faxo in memoria habeam. Sed hac de re alias plura, simul rediisse ad Bibliothecam intellexero. Amici nostri epistolium, ut, quo praemio remuneretur modestia, videres, una cum hoc fasciculo ire ad te jussi. Vale multum, unicum litterarum decus. Delphis ipsis nonis Decembrib. Anno *MDCCCLXXV*.

EPISTOLA CCCII.

NIC. HEINSIUS

*Thom. Munckero.**Delfos.*

IN litteris exarandis nonnihil occupatum, quod me nuperius deprehendebas, est sane cur id ego deprecandum anxie ducam. Tu cur excuses, nihil equidem rationis video. Quod nisi in Italiam destinatae fuissent illae litterae, ut postero mane Amstelædamum perferri eas oporteret, non dimissem profecto e manibus tam bellam occasionem tecum pluribus colloquendi, vir Clarissime, quod feci mehercules perquam invitus. Quando non grave erit tibi ad me invisere in posterum, excludam & procul arcebo avocamenta quaevis, ut te fruor longius. E binis Antonini exemplaribus ad me missis alterum, si per te licet, in Etruriam deferri curabo ad *Carolus Datum*, alterum ad *Emericum Bigotium* in Gallias, utrumque artium bonarum peramantes, atque hoc ipso tuae eruditionis, ne dubita, multum studiosos. Non deesse apud Leideneses meos, qui visus sit succensuisse tibi quodammodo ob repetitam Antonini editionem, noli quaeso altius ad animum tuum revocare. Jam enim inter res quotidianas, atque utinam minus frequentes, id genus jurgii inter homines litteratos, quod ignorare non potes, numeratur. Ego, si possum, hunc impetum animi concitati in tuo adversario sufflaminare nitar. Et si non is est ille, qui me in consilium so-

soleat adhibere. Sin persistet in proposito, tuae sapientiae ac moderationis erit, cogitare victorem haberi apud homines probos in hoc certamine, qui maledictis vincatur. Nequid ad haec arma tibi sit confugiendum, abunde praesidii habes in nuda eruditione tua, qua retundes insultum omnem. Amplissimus *Bleyfvicius* cum a me convenietur, tui ne obliviscatur curae habebō. Vale, vir doctissime, & mihi, quod facis haecenus, in posterum velle perge. Hagae Comitum viii. Decemb. cicioclxv.

E P I S T O L A CCCIII.

T H O M. M U N C K E R U S

Nic. Heinso.

Hagam.

Q Uod minus prospera per hosce dies usus es valetudine, vir nobilissime, ita valeam, ut ex animo doleo. Recreavit tamen anxium animum non parum *Boschius* noster, qui here jam meliuscule habere te coepisse mihi narravit. Quod ut magis atque magis, & diu possis, illum veneror, qui salutis nostrae fons est unicus. Tametsi plane nec ego nunc temporis ex voto valeo, facere tamen non possum, quin de illis, quae sane quam docta & ingeniosa in Fragmento illo Traguriano me docuisti, eas tibi gratias agam, quas debeo, id est, immortales. Vere Petroniana omnino *παρ' ἐμοί γε κατ' ἤ* sunt, Cap. 45. *hyacinthus, burdibatta, de silicernio equites, ad affem secuerunt*, Cap. 46. *in nave morbosus est*. *Morbosus* enim *παθικός*, ut recte exponunt vett. Glossae. Suspiciatus & ego sum leviter, *'in nates morbosus est*. In qua tamen conjectura expolienda quo minus perseverarem, faciebant, quae sequuntur, *cardueles*. Jam illa Cap. 43. *malam parram pilavit*. proverbii habere speciem, vides & mihi venisse in mentem. Quid si scribas? *mala eum parra pilavit*. hoc est, initia parum auspiciata illum despoliarunt. Sed ista, Cap. 42. *mulier quaeque mulier, milvinum genus*. Duplex praeferre adagium mihi videbantur. Nec forte insulse dixeris, *mulier quaeque mulier, milvinum genus*. Sententia esset, *πᾶσα γυνὴ κακὴ*, & milvinum genus. Tale illud est, Cap. 63. *simia est simia. strigae stridere coeperunt* non displicet. nec displiceret tibi, *strigae ingruerunt*, nisi longius a vulgata scriptura recederet. Ibidem ex *Vavatone* feci *homuncionem*, ex *manuciolo* *homunculum*, an, te probante, scire desidero. Barbare loquentes induci de industria Trimalchionem & ejus collibertos, omnino tecum statuentum, ne quis cum Patavino editore miretur, Cap. 44. *Futiles aediles male eveniat*. Quanquam non improbet quis forsan, *ut isti aediles male eveniat*. Elegans enim particulae *ut* in detestando usus. Quod lecturum me cum cura fragmentum illud scripseram proxime, id ut instituisse jam videas, examinanda tibi mitto paucula, quae hac hebdomada in eo notabam. Cap. 37. *lupatria providet omnia*. legerem libenter, *lupula ei providet*. Cap. 38. *Tanta est animi beatitudo*. melius, *homini*. Aspirationes nosti frequenter omitti in MSS. *Lacte gallinaceum*. lego, si mutandum quid putes, *lactem gallinaceum*, invenitur Cap.

71. *Unum lactem* pariter barbare. *Unum lacte* dicendum erat. cap. 39. *sicut ille fericulusta*. lego, *sicut ille ferculus statim mihi dabit praxim*. Illud *sicut* accipio, ut *tanquam* in editis cap. 118. *Tanquam, si placet hic impetus*. Cap. 41. *Pataracinam*. lego, *pateram vini*, & *Ibidem cum summam coenam vindicasset*. malim, *summam coenae*. hoc est, *caput coenae fuisset* quamquam & illud tolerabile. Cap. 44. *nescio quid asia dis*. an scripsit, *siccitatis*, vel *aciditatis*. Cap. 45. *Centonarius*. Ita puto dictum, qui centones vendit, ut *scrutarius*, qui scruta. *Ibidem Dominam suam delectaretur*. ita infra Cap. 64. *nihil nos delectaris?* male haec mutarunt. Cap. 47. *sua re causa facere*. Eandem locutionem infra quoque usurpari deprehendi. Malim, *suae rei causa*, sic sane melius expressero, *facere quod te juvet*. *Ibidem, spero jam ventrem pudorem sibi imponit*. lego, *spero, jam venter pudorem sibi imponit*. *spero*, est, ut *spero*. *Ibidem ne jovis potest*. malim, *nec jovis*. Cap. 49. *Rogamus, mittes*. lego, *rogamus mittas*. Cap. 50. *Argentea corona*. lego, *argenteam coronam*. & mox *nisi quis Corinthum habeat*. *Concinnius foret, nisi quod Corinthus habeat*. Cap. 51. *Ignoscetis mihi quid dixero*, lego, *quod dixero*. hoc est, *donabitis mihi*, vel *dabitis*. mox certe nolunt. Caeteri nolunt praferam. quamquam videtur deesse, *etsi* vel simile quid. Cap. 52. *Patronorum meas* Puto fuisse, *Patronus mihi meus*. Cap. 53. *Reliqua animalia cromaticas &c*. An legendum, *Reliqua omnia talia acroamata nugas meras esse?* Cap. 54. *Periculo aliquid catastrophae quaereretur*. Corrigo *ferculo*. Non uno loco *periculum* pro *ferculo* dedit librarius. Cap. 57. *peduclum*. lego, *pedunculum*, ut *offla* pro *offula* in sequentibus. Paulo post. *Hac illac tamen*. malim, *hac illinc tamen*. Mox *Hircus inervilia*. Non absurdum videtur, *hircus Mercurialis*. Nisi enim memoria mihi imponit, cum hirco aliquando pingebatur Mercurius. Longius recedit, *in sterquilinio*. Cap. 58. *Si quid vis tu &c*. Hic locus sic, puto, restituendus est: *Si quid scis tu, & ego*. *Sponsiunculam, ecce, defero*. *Jam jam scis &c*. Paulo ante, *Bene nos habemus aut isti*. lego, *bene nos non habemus*. Deinde, *Ita bene moriar, aut populus*. lego, *ut populus*. Cap. 59. *modo versa, modo supina*. lego, *modo verso, modo supino*. & refero ad *mucronem*. Cap. 60. *Respicens ad mensam*. lego, *respicimus*. *Sacrum esse periculum*. lego, *ferculum*. simile, imo idem vitium notavi Cap. 54. *Consurreximus altius*. malim, *ocyus*. Deinde & *ipsius mappas implevimus*. lego, & *ipsi mappas* Cap. 61. *pulcherrimum bacciballum*. an, *pulcherrimam culcitellam?* dein, *corporaliter autem &c*. Puto legendum: *Sed ego non mehercules corporaliter illam aut propter res venerias curavi, sed magis, quod, ita bene moriar, si quid ab illa &c*. Cap. 62. *Scruta scita*. Posterius vocabulum videtur a glossa esse. *Scite, quod volebat Schefferus, non placet*. *Mihi in animo, in naso esse*. Procul dubio legendum, *mihi anima in naso esse*. *Et mata vita tau umbras*. lego, & *tanquam vivus umbras cecidi*. *Per bifurcum volabat*. Malim, *per frontem desfluebat*, nisi per *bifurcum* intelligit *crura*. *in larvam intravi*. lego, *ut januam intravi*. Cap. 63. *Intröversus*. malim, *intro reversus*. Cap. 67. *inde-cens imam rubore*. Malim, *incidens*. Cap. 68. *Sicut Venus*. malim, *sic ut Venus*. Cap. 71. *Faciatur, si tibi videtur, & triclinia*. lego, *faciantur*. Cap. 72. *vero, vero*. lego, *ego vero*. Cap. 74. *dum bonatus ago*. an *bonus esse satago?* Cap. 75.

ut effrangeret. lego, ut se frangeret. *Fulcipedia*. Non male heic quadraret, *vulpis uda*, nisi jam in praecedentibus illud convicium habuissemus. Ego tamen & ipsimae dominae satisfaciebam. lego, ego tamen & ipfimo & dominae. ipfimus nomen esse *κῦρον* videtur. vid. Pag. 50. Cap. 76. Quod dii volunt. malm, quomodo dii volunt. Sed haec haecenus, quae, sat scio, ignoscenda tibi potius quam cognoscenda videbuntur. Sunt enim deproperata pleraque omnia & intra biduum quasi sub manu nata. Vale multum, illustris Heinfi, & vive nostri memor; sed tunc praesertim, cum aliquando ad bibliothecam tuam redieris. Vacillantes literulas rogo infirmitati nostrae imputes. Erimus alias diligentiores. Scripsi Delphis Batav. a. d. xii. Kal. Januarias Anni cicioclxvi.

EPISTOLA CCCIV.

THOM. MUNCKERUS

Nic. Heinfi.

Hagam.

Joannes Boschius, juvenis non Heinfsiani nominis minus, quam literarum in primis studiosus, fecit ut denuo appellare te sustineam, vir illustris. Is nuperius ad me cum inviseret, Lactantii, an Lutatii Ovidianarum Metamorphoseon argumenta cum veteribus libris collata, si una cum Hygini fabulis publicare vellem, non difficulter a benignitate tua impetraturum credere me volebat. Ego vero ut nihil malo, quam emendatiora proferendo veterum ingeniorum monumenta aliqua prodesse publico, ita faveo vehementer huic spei, quae tam mihi ex improvviso adfulsit. Quamobrem noli facere, ut ea nos fallat, mi patrone. Vix, puto, commodiorem nancisci possis occasionem, praeter alios immortales labores tuos, etiam ista opella elegantiores literas demerendi. In Hyginiano commentario tantum jam profligavi, ut brevi typographum quaerere proponam. Locus est vexatissimus Hygini cap. 125. *Qui loton*, inquit, *ex foliis flore procreatum edebant*. varie corrigunt: *ex foliis florem procreatum*: *e foliis rore procreatum*: *ex foliis & flore procreatum*. Ego aliquando cogitavi: *ex trifolii flore procreatum*. Gloss. Vett. *Trifolium*, λωτὸν, τριφυλλον. Scio alios arborem fuisse velle. Sed Apostolius Cent. xii. 40. herbam facit ad proverbium λωτὸν ἔφαγες. "Εστὶ δὲ πῶς, inquit, τὸ λωτὸν, λήθην ἐμποῖν τῷ φαγόντι. Scrupulosus & ille locus cap. 145. *Inde in Scythiam transnavit, unde Bosphorus fines sunt diētae*. Cl. Schefferus suspicatur, *Bosphori fines* &c. An rem acutigerit dubito. Nec placet nunc amplius, quod mihi antehac in mentem venit, *Bosphorus finis fuit diētus*. Doceas nos, si vacat, vir nobilissime. Hyginum ubi protuli, aliquid lucubrationis impendere Fulgentio fert animus, sed editionem ejus novam quo reddam commendabiliorem, videndum mihi prius erit, an dare ei comitem possim Anonymum illum mythologum, quem a *Vessio* possideri in notis ad Palaephatum docuit me *Tollius*. Quaeso consilio me

me tuo hac in re adjuves. Nam impetrabili aliquo proxeneta nisi usus heic fuero, ab heroe illo impetrare istum thesaurum videtur mihi fore ἐν τῷ ἀδυνατῶν. Vale multum, & diu vive, unicum literarum decus. Delphis Batav. postridie Kalendas Majas Anno CIOIOCLXXVI.

EPISTOLA CCCV.

NIC. HEINSIUS

Thom. Munckero.

Delfos.

DEbebas jam pridem rem omnem ex me didicisse, Munkere praestantissime, de Antonino tuo in Gallias ad *Bigotium* perlato, nisi frequentes ex urbe excursus & valetudo, quibus obnoxium plus quam vellem me sentio jam pridem, procrastinari officium voluissent. Multa equidem prosecutus laude lucubrationem hanc tuam vir eruditissimus, gratiasque tibi peringentes pro tam eximio munere, ut suo nomine agerem vehementer me rogavit. Exemplar *Carolo Dato* quod destinaveras, quoniam ille jam excessit e vita, in Germaniam a me mittetur. Hygino si & alios Mythologos Latinos a te recognitos subjunges, facies profecto rem utilissimam. De Lactantio sive Luctatio, qui Nasonianas Metamorphoses argumentis suis illustravit, edendo, cum & ipse cogitarim aliquando, habeo nonnulla, quibus hoc acturus adjuvari possis. Admovit huic operi jam manus *Victor Giselinus*, in editione Plantiniana Nasonis, usus ea in re codicibus vetustis, uti prae se fert. Sed an bonis castigatisque haud dixerim, certe multum discrepantibus a Lactantio. Sed de his melius inter nos agetur coram. Auguror interim fore, ut ante decursum hujus aestatis, composita re familiari, quae me hactenus invitum avocat a studiis, bibliothecam omnem excutiam, ac seponam tibi ea omnia, quae tuo instituto conductura judicavero. Fulgentii exemplar scriptum, ni fallor, servat bibliotheca Leidensis publica. Multa ejusdem restituit *Franciscus Modius* in novantiquis lectionibus. Albericum auctiorem possidebat olim *Vossius*, alium mihi Mythologum in bibliothecam ejus visum haud recorder. *Trifolium* in Hygino recte omnino & erudite videtur a te restitutum. In altero loco quid si scribimus, *Unde Bosphorus fines ejus sunt dictae*. Ut velit Scythiam Bosporo terminari. Meliora fortassis darem, si liber esset ad manum. Vale, vir doctissime, & mihi velle perge. P5. Maii CIOIOCLXXVI.

EPISTOLA CCCVI.

THOM. MUNCKERUS

Nic. Heinso.

Hagarr.

NON alius aequè mihi laetus accidit nuncius, ac ille, quem nudius tertius Delphos apportavit *Boschius* noster de Hygini Astronomico cum

tribus MSS. collato. Agnosco illam plane singularem, & jam toties spectatam liberalitatem tuam, vir nobilissime: agnosco, inquam, sed ita, ut interim, dum quam indignus ea sim recogito, rubore suffundar non tralatitio. Hoc uno tamen conscientiam meam consolor, quod eum me esse sciam, qui amore & observantia tui cum quivis contendere ausim. Atque utinam huic pectori oculos inferere posses, ut, quam omnium illud doctorum hominum, ceu totidem numinum, sed Heinsii ante omnes, sit reverens, videres. Diceres, quae tua est benignitas, si non alio, hoc certe nomine meritum, ut favore eruditorum non omnino indignus videri possim. Quo magis indignor, quod in hominem immerentem & omnium, qui literis cupiunt, in primis amantem, conviciis tot & calumniis invehiri non dubitaverit Leidenfis ille Zoilus. Scilicet alia grassari via non potuisse eum, qui etsi bonitate causae destitutus, qualitercunque tamen ab illo, a quo nullus erat laesus, vindicare se praesumsisset. In bibliopoliis nostratibus non venit horribilis libellus iste. Missus ad externos dicitur, ut meliores industriae Berkelianae in ista gladiatoria spectatores. Haec facto huic umbra praetexitur, quae quam speciosa sit, ipse viderit. Ego certus sum timere hominem vindicias; quibus tamen an uti consultum sit nondum statui. In Hygini fabulis multus fui, & ut non spero tantum, sed confido, non frustra. Praeterquam quod fabularum quasi florum quoddam feci corpusculum, & Hygino manus medicas pro mea sapientia adhibui, etiam aliorum scriptorum ὡς ἐν παρόδῳ loca examinavi non pauca. Tanquam adhuc heri, cum Isidori glossaria relegerem, adverterunt me illa: *Anilia, fatuitas, amentia. Anilita* rescribit Swarthius Anal. lib. 11. cap. 12. & Gothice locutum Isidorum censet. Ego verius putavi, *anilitas*. quod Catullianum nostri esse vocabulum. *Anconiscus, incastrare*. Swarthius: *Ancon, sciens incastrare. Castratores*, inquit, *olim celebres ab regionibus, ut Deliacus apud Varronem & Petronium*. Miror me Hercules. Scribendum procul dubio, *anconiscus, incastratura*. Habet id vocis Isidorus ex vulgata versione Bibliorum. Quos ἀγκωνίσκῃς Deuteron. cap. xxvi. 17. dixerunt οἱ ὅ, *incastraturas* transtulit vulgatus interpres. *Balastrum, balneum*, Swarthius: *Badastrum*, vel *Badstratum*, veteri lingua Germanica. Non accedo. Si ex τῷ *balastrum* tollas *ba*, quas literas ad sequentem vocem pertinentes male illuc transtulisse videtur librarius, remanebit, *lastrum*, unde facio. *labrum*, & lego: *Labrum, balneum*. Quo minus curas Hyginianas typis haecenus mandare coeperimus, in causa est typographus, qui Schefferianae editionis superesse adhuc quaedam sibi exemplaria causatur, & id genus alia, quae praetexere lucri cupiditate solent illi, qui nisi illud nihil inhiant. Interim, dum moratur trico ille, admoliar, te auspice, manus Astronomico. Fave, quaeso, mi Patrone, hoc est, fac brevi habeamus, si fieri id sine incommodo possit tuo, illum cum MSS. collatum codicem; & jam olim promissum Luctatium sive Lactantium, quem Fulgentio dabimus comitem, cujus librum MS. ex bibliotheca Leidensi in dies exspecto. Nisi memoria mihi imponit, possidet bibliotheca tua etiam primam Hyginiani Astronomici editionem, quam Itali nobis dederunt. His talibus instructus adjumentis quanto animosior

ad

ad opus me accincturus sim, tute cogita. Ipse equidem dicere satis nequeo. Vale multum & diu vive, Illustris Heinsi, literarum litteratorumque praesidium unicum. Scripsi Delphis Batav. a. d. v. Idus Octob. Anni CIOIOCLXXVI.

EPISTOLA CCCVII.

NIC. HEINSIUS

Thom. Munckero.

Delfos.

ITA de me statuas in posterum rogo, nihil esse, quod tua causa non velim, & quidem libentissimus, quo magis indignor frequentem mihi objici moram a valetudine, ne res eas, quas in hac aula peragendas habeo, ad optatum finem perducam. Illis enim turbatis atque incompressis vix est ut aut studiis, aut bibliothecae excutiendae vacare detur. Hygini Astronomica cum scriptis exemplaribus collata, primamque horum editionem Venetam, Aldina certe vetustiore, ut & Lactantium, seu quicumque tandem est scriptor, qui argumenta Metamorphoseon Nasonianarum confecit, cum pervetusto Codice a me commissum, & si quid praeter hos in armariis meis delitescit, tuis, hoc est publicis usibus, profuturum a me feres, simul offerent se mihi, quod ante decursum hyemis fore spes est. Antagonistae tui libellum haecenus non vidi, nec in ipsum Antagonistam tuum a tribus jam mensibus incidi. Nisi gravissimum in modum ab illo laesus es, recte feceris, si fines contemptu solo omnem injuriam obsolescere. Illud tamen *anconismus*, *incastratura*, ab alio nescio quo occupatum videor meminisse. Multus in hisce glossis castigandis est in adversariis *Ludovicus Cerda* prae caeteris, & in variis lectionibus *Rutgersius*. Rectum & illud *Anilitas*, *fatuitas*. Sic *fatui senes* apud Martialem v. 10.

Si veterem ingrati Pompejam quaerimus umbram,

Et laudant fatui Julia templa senes.

Ita enim istos versus castigandos aliquando sum opinatus: instauraverat porticum Pompejam Domitianus, & pro uno nemore silvis duabus exornaverat, quod aliunde ex nostro liquet, *Pompeji dona nemusque duplex*. Instauraverat & templa pleraque urbis ab Augusto olim exstructa, non solum capitolium, & quidem sic, ut meliora reddiderit, si nostro credimus, in quo adulationis tota vis consistit. Augustus e lateritia Romam marmoream reliquerat, plus urbi contulisse vult Domitianum, & sane multum contulit. *Julia templa*, ut *leges Juliae* ab Augusto latae, qui adoptione in gentem Juliam transferat. *Julianas naves* vocat Paterculus Actiacam Augusti classem. & *Julia rostra* Propertius, si memini. Pro *Balastrum*, *Balneum*, aliquando tentabam *Alabastrum balani*, vel *balaneum*, id est unguenti. Sed tuae conjecturae absit ut refrager. Vale, vir doctissime, & mihi velle perge xi. Octob. CIOIOCLXXVI.

EPISTOLA CCCVIII.

THOM. MUNCKERUS

Nic. Heinſio.

Hagām.

Quod tam benigne promittis, quae conatus mei deſiderant, tam comiter doces, quae ignoro, quemadmodum & quas dicere tibi grates debeam, non ignoro quidem, vir illuſtris; ſed non ea homini huic valde infanti *εὐγλωττία*, ut ad ea, quae mente concepit, proferenda ſufficiat. Rogo ſinas ea gratiarum cum actione apud te deſungi, qua apud deum uti ſolet, hoc eſt, animo potius devoto, quam composita & nocte meditata oratione. *Fatuos ſenes* tuos apud Martial. lib. v. Epigr. x. quiſquis non fatuus fuerit, lubens mecum amplectetur. Familiare eſſe ſenum auribus fatuitatis convicium, vel ex iſto Graeculi illius diſcas, *καὶ σὺ γέρων εἶ καὶ μαρς*. De *Biſſula* Auſonii quod mones, comperi etiam in mentem veniſſe *Demſtero*. Rationes, quae a te adducuntur, genuinam eam eſſe lectionem, evidenter omnino evincunt. Ex illis, qui de profeſſo emaculare Iſidori Gloſſarium intenderunt, praeter ampliſſimum *Rutgerſium* videre mihi licuit neminem. *Ludovici de la Cerda* Adverſaria non poſſidet paupertina bibliotheca mea. Niſi potiora otium tuum flagitant, vide, ſodes, & iſta, quae occupata forte jam aliis ſine operoſa commentatione inter legendum in libri mei marginem conieci.

Apicioſus, calvus, calvaſter. lego, *alopecioſus*. Sunt enim alopeciae capillorum deſluvia. Ad eundem modum barbaris *cancerofus*, dicitur, qui cancro morbo laborat, & *Elephantioſus*, qui elephantiaſi.

Arcites, ſagittarii. lego, *arcitenentes*. Sic *anguipedes* ſuperius paulo dixit Gigantes.

Attibernalis. lego, *attubernalis*.

Auteritas, antiquitas. lego, *anteritas*, ab *ante*, unde *anterior* apud Prifcianum.

Belluus, moribus beſtirium. Apparet legendum, *belluinus. moribus beſtiarum.*

Gloſſ. Steph. *Belluinus*, *θνητὸς ὁμοῖο*. lego. *θνητῶ*.

Blenones, puditi, hircorius, lego, *Blenmones, putidi, hircofi.*

Bobinatores, inconstantes. lego, *bovinatores*, a *bovinari*, quod tergiverſari interpretantur. Notum eſt quemadmodum *b* & *v* inter ſe commutentur. Gloſſ.

Steph. *Bibilles*, *διμαλλοί*. lego, *bivelles*, quod vocabulum licet barbarum

etiam iſte locus flagitat, *bicerres*, *διμαλλοί*, *διυροστοί*. Sic aries ille Phrixii, qui Graecus *χρυσόμαλλος* eſt, *Chryſovellus* audit apud Germanici Scholiaſtem.

Buiis, Stella cometes. lego, *bolis*, *λογχωτὸν* alias dicunt. U pro O poſitum poëne innumeris locis nemo neſcit, niſi qui veteres Gloſſas non legit.

Buvinare; ſanguine inquinare mulieris menſtruae. lego, *bubinare & menſtruatae.* ex Lucilio.

Capar-

Caparcus, pistor. lego, *Caprarius*, pastor. Gloss. Steph. *Caprarius*, ἀπό-
λῳ.

Casona, acus, qua mulier caput scalpat. lego, *Cnason*, acus. ex Festo.

Castorinum, vebrinum. *Fibrinum* lego, a *Fiber*, ut ab *aper aprinus*.

Catadocta, multorum cantica. Legerim divisim, *cata dicta*.

Clivior, nobilior. lego, *Cluitor*. *Cluis* est nobilis *Capellae*.

Cloaca, *burca*. lego, *burga*. dixerat superius, *Burga*, *Cloaca*. Ex Teutonismo
ortam eam vocem non difficulter persuadet mihi Vossius.

Culpa piabunt, peccatum solvent. lego, *culpam*.

Depelata, manifestata. lego, *depalata*. Vox est Fulgentiana.

Diffultores singulares. an *désalteres*?

Fabarii, cantores. *Fabarius*, cantor. legerim, *Fabularii* & *Fabularius*.

Lubrica, vallum, imo fossae. Amplissimus *Rutgerhus*: *Ludicrum*, vallum sine
fossa. malim, *Lubrica*, vallum, caveae, fossae. Verba sunt *Apuleji* I. Miles.

Barbuscinus homo, qui fert barbam plenam prorisinis. an scripsit, *porci setis*?

Broia, ulva marina. legeram, *bryon*, vel *brya* numero multitudinis ex Gr.
βρύον, alga. Steph. Gloss. *Bria*, Εἰδῶ αἰτίς. lego, φύκίς. φύκῳ enim
& φύκῳ alga.

Curio, sanguis. lego, *cruor*. Bene Gloss. Steph. *Cruor*, αἷμα πεπηγός.

Dalum, velum minimum. lego, *dolon*. docuit ipse *Isidorus* lib. XIX. Orig.
cap. 3.

Danius, foenerator. lego, *Dardanarius*. Gloss. Steph. *Dardanarius*, παντοπό-
λης, Σιτοκάπηλῳ.

Duellio, rebellis. lego, *rebellio*. Gloss. Steph. *divelliones*, πόλεμοι, ἀρπαγαί. lego,
duelliones.

Plura nunc non addam, ne forte magno molimine actum me agere dicas. Vi-
des interim ex parvo hoc specimine, opinor, si quid in me sit ingenii, il-
lud non omnino esse ineptum ad aliquid boni faciendum antiquis glossariis.
Vulcanius quid praestiterit, si scirem, haud paulo essem securior: Sed non
licuit mihi haec tam esse felici, ut ejus viri curas alicubi nanciscerer.
non morabor diutius tempora tua, vir nobilissime, ultimum illud est, ut
nostri sis memor, ubi redieris ad Bibliothecam tuam. Quod ut brevi con-
fiat optamus speramusque. Vale. Scripsi Delph. Batavis a. d. IV. Kalendas
Novembres Anni CIOCIOLXXVI.

P. S. Scripseram haec, cum incidit mihi *bryan* *sylvestrem* dici *Plinio* lib.
XII. cap. 21. quae *erica* est aliis, reposuerim ergo in Gloss. Steph. ἄδῳ φύτῳ.
Isidorus *bryan* cum *brya* confundere videtur.

EPISTOLA CCCIX.

NIC. HEINSIUS

Thom. Munckero.

Delfos.

Fatuos senes, quos reddebam Martiali, non improbari abs te hanc conjecturam laetor. Certe verisimilius est, opera publica a Domitiano exstructa, iis, quibus Augustus Caesar urbem exornaverat, praelata ab homine artis adulatoriae perquam perito, quam composita cum monumentis in capitolio a Catulo dedicatis. *Ludovicus de la Cerda* Glossarium Isidori in adversariis totum percurrit, sic ut vocabulum vix ullum ejus libelli relinquat intactum, qua castigationibus, qua interpretamentis. Hoc, unum est, quod asseverare nunc possum. Cum dabitur aditus ad bibliothecam meam, scrutabor majore cura, quid *Vulcanius*, quid alii annotarint ad loca abs te tentata. ista tamen, *Barbuscinus homo*, sic videntur scribenda, *Barbiricinius homo. qui fert barbam plenam porriginis*. Vale, iv. Novemb. cicioclxvii.

EPISTOLA CCCX.

THOM. MUNCKERUS

Nic. Heinsio.

Hagam.

MEmini equidem me aliquando inter caeteras fabulas de *Mutio* quodam *Placentino* jecisse aliquid apud te, vir nobilissime: sed an tute quoque ejus memineris valde dubitem. Is *Mutius* ergo cum aliquoties me per literas appellavit, tum etiam, cum praelum Antoninus meus exercet, amice monuit, ut sui in eo libello facerem mentionem. Neglexi id tamen, quod & homo mihi esset ignotus plane, & amicus meus Cl. *Ryckius* dissuaderet. Respondi nihilominus viro, ut debui, perquam humaniter, & quo minus ejus petitioni satisfacissem, tabellarii fecisse tarditatem. Caeterum, si vellet, oblaturum me illi Hyginum curis meis secundis illustratum. Mitteret interim titulos, quibus nomen suum insignirem. Misit, ecce, cum epistola satis barbaram libellum hunc sibi dicatum. Quod si hominem domi esse nobilem, & in aliqua apud municipes suos dignatione, constaret, nihil esset cunctandum & nihil mallet, quam eum promereri. Sed epistolae non videntur spirare magnum virum. Quid tu, mi Patrone, cui notissimi Itali, auctor esses? In *Sutpicillae* locum *Bissulam* apud Fulgentium esse substituendam tecum docet in Paralipomenis ad Rosinum *Demsterus*. *Vulcanii* notarum in Vett. Glossaria ante dies aliquot usuram impetravi a D. *Hanselaer*, Ecclesiae nostrae pastore, homine & in paucis docto, & εὐεριστοφίλῳ: comperio illum sentire partim mecum, in aliis ire in alia omnia, nonnulla autem relinquere intacta, ut *Apiciosus*, *Fabarius*, *Caparcus*, *Dalum*, *Butis*, *Casona*, *Culpa piabunt*, *Duellio*, *Rebellis*, *Arcites*. &c.

ex quibus perperam ego nuper facere volui *arcitenentes*. Legendum enim *arquites* ex Festo. quod vocabulum & Glossario Philoxeni restituendum; ubi itidem vitiose legitur, *Arcutes*, τοξόται. Caeterum τὸ *Bibilles* recte mutat in *bivilles*, non *bivelles*, ut ego volebam. Nec dubito, quin & *Chrysovillus* legendum sit apud Germanici Scholiastem. Quod autem *bicerres* esse ait, qui sectos habent pilos, id haud recte capio. existimo legendum, *bicirres*. *Cirrus* enim est κίρρος. *Bicirres* ergo δικίρροι. Quod ad caetera attinet, tuum *porriginis* etiam illi placuit, ut & meum *Bryon* pro *Broia*. Sed in Glossario Latino-Graeco legit, *Bria*, ἐίδω ἀγλαίς. melius sane, quam quod ego volebam, ἐίδω φυτῆ. Est enim *Bria* vasis nomen apud Arnobium. τὸ *Fabarius* recte habere docuit me nunc Isidorus ipse in de Offic. Eccl. lib. 11. cap. 12. *Antiqui pridie quam cantandum erat, cibis abstinebant: psallentes tamen legumine in causa vocis assidue utebantur. Unde & cantores apud gentiles fabarii dicti sunt. τὸ incastratura*, quo frustra mihi placebam nuper, etiam illi venit in mentem; quanquam emendationis illius, ut a me factum, nullam addit rationem. Quid de illo loco tibi videtur, vir magne? *Flegua*, *Martis filia*. Legerim libenter, *Flegyas*, *Martis filius*. Respicere videtur versum Virgil. Aen. vi. *Phlegyasque miserrimus omnes Admonet*. Lactantius ad I. Theb. Stat. *Phlegyas Martis filius, qui apud Delphos templum Apollinis incendit: cujus Virgil. meminit, Phlegyasque miserrimus &c.* Non pauca sane in illis Glossis Virgiliana animadvertere est vocabula. Exemplo uno vel altero contentus ero. *Artificem, Duplicem, dolosum*. Corrigit Vulcanius, *Alterplicem*. nollem factum. Virgil. Aen. 11. 124.

— — — *Multi crudele canebant*

Artificis scelus. — — —

h. e. duplicis & dolosi Ulyssis. *Durica castra, Stationes navium*. lego, *Dorica* ex eodem Virgilii libro. Vale, vir Illustris, diu multumque. Garrulitatem nostram pro caetera facilitate tua, quaeso, aequo animo feras. Scripsi Delph. Bat. a. d. 11. Id. Novembr. Anni MDCLXXVI.

EPISTOLA CCCXI.

NIC. HEINSIUS

Thom. Munckero.

Delfos.

DE Mutio Berretto nihil equidem habeo quod dicam. Nobili patricioque loco, quae minus distinguuntur ab Italis, natum facile persuadeor ut credam. Hos Illustrissimos nunc vocant, plebei homines praesertim, quorum e numero scriptor ille dramatis adulatorii in laudes Venetorum conscripti, mihi plane ignotus. Illud miror, hominem natales & majorum gesta jactantem tanto ambitu laudationem suam, cujus nulla aut in te, aut in rem litterariam exstant merita, a scriptis tuis flagitare. Pervenit jam pridem ad aures meas rumor, quem disseminavit ipse, Hygini fabulas e codice vetusto, locis plurimis ab illo esse castigatas. Urge hominem, quaeso, ut harum lucubrationum specimen

Tom. V.

Aaa

cimen

cimen nonnullum ad te mittat. Tum videbimus, quid ab illo nobis sit sperandum. Sunt complures & in Italia, & alibi terrarum homines levi litteratura imbuti, qui cum per se nec ausint, nec possint ad famam promerendam eniti, aliorum adminiculo eam sese consecuturos sperant. Mihi olim contigit incidere in aequae importunos praeconii sui captatores, splendido haud dubie ac illustri loco, cum Venerae, cum Florentinae civitatis, prognatos, nec ineruditos, sed hoc ipso contemptos a me, ac neglectos, quod laudes suas imperiosis ac intempestivis precibus assidui praescriberent, & tantum non extorquerent. Isidori, quae sub nomine circumferuntur Glossae, manu Scaligeri descriptae, exstant in Leidensi bibliotheca, si memini, nonnihil a vulgatis discrepantes. Vale. 25. Novemb. MDCLXXVI.

E P I S T O L A CCCXII.

T H O M . M U N C K E R U S

Nic. Heinsio.

Hagam.

DE Mutio nostro quod suades, vir nobilissime, id exequi studebo quam primum. Musrius ille, non magister, non me minus, quam alios habuit exercitum. Quae in margine libri mei notavi, tametsi exigui sint momenti, nec istiusmodi, ut placere exactissimo iudicio tuo possint, non illibenter tamen, quoniam ita jubes, tecum communicabo. Erant ergo ista: An milvius? selem esse pullariam verius, quam magistrum, sic innuerit. Sed fortean melius, Mulleus. aequae hoc dignum babecalo & ebrio convicium, ac illa, vasus fictilis, lorus in aqua. Simul alludere videri possit ad τὸ μᾶλλον, unde dictus mulleus. Ex varatione quid si faciamus bacarionem? Bacar, bacarium, bacario vasis aquarii est genus: quicum non male conferas vacuum intestinis cada-ver: isto non deterius, quam cum maniciolo, Maniciolum enim, non manuciolum legendum putem in verbis proxime praecedentibus. A manica est manicum, inde maniciolum. Gloss. Cyrilli: χειρὶς, manicum, manuela. legendum, manulea cum Vossio. χειρὶδιον, manicillum. quod etsi retinet Vossius, rectius tamen forte mutaveris in maniciolum. Sic a delictum declinatur deliciolum. Non minus vexatus est ille locus: Quibus prae mala sua cornua nascuntur. divinavi aliquando: Quibus per malas cornua nascuntur. Ut per cornua intelligi velit genas extantes, quales videmus esse macilentis illis & monogrammis. Lupercus Catal. lib. 1.

Extantes mala deficiente genae.

Facit huc ridicula illa cujusdam Rabbini opinio, qui ob quadraginta dierum jejunium ossa faciei Moysi, velut acuta cornua, prominuisse existimat. Legitur praeterea pag. 36. Edit. Blav. Noveram hominem olim olivorum, & adhuc salax erat. Non placet heic Schefferi correctio, mulierarium. repugnant enim sequentia. Legerim: hominem L. annorum. etiam, quae praecesserunt: & quod putas illum annos secum tulisse septuaginta. & supra. corrigo: Et quot putas illum an-

annos secum tulisse? septuaginta & supra. pro puellarius legendum esse pallarius tibi debemus. A Petronio transibo ad Hyginum; apud quem Cap. 14. Harpylae dicuntur Thaumantis & Ozomenes filiae. Quae illa sit Ozomene, nusquam hactenus invenire potui. Cap. 79. narrat a Paride duas cum Helena ancillas, Aethram Thesei matrem & Phisadien Pirithoi sororem, abductas. De Phisadie illa sive Thisadie, ut scribitur cap. 92. altum apud alios silentium. Clymene est dicta lib. 1. & Anonymo Troicis. Adjutes, quaeso, si potes, Scio longe esse tibi bibliothecam. Sed capacior multorum bibliothecis una memoria tua. Vale multum, vir illustris, & fave, ut coepisti, clienti tuo. Delphis Bat. Prid. Kalendas Decembr. Anno C. cidoCLXXVI.

EPISTOLA CCCXIII.

NIC. HEINSIUS

*Thom. Munckero.**Delfos.*

ERudita sunt omnino, quae ad illa Petroniana *Mufrius non magister* annotasti, nisi quod longius aliquantum abeunt a vulgata scriptura. putabam aliquando *Murcius* ex Festo, vel *Murcidus*: sunt & in promptu aliae conjecturae, sed quarum nulla satis approbatur: nam & ante id didicimus nonnihil desideratur. *Milvius* nescio an satis sit Latinum. *Milvus* dicebant antiqui, quod trisyllabum faciunt. Poetae *Milvus*. Sub *varatione* videtur latere vocabulum rusticum aut plebejum, inter ea, quae non intelligo, ejusdem significationis quod *Manuciolus*, vel *Maniciolus*, quod & ipsum plebejum vocabulum puto. Certe Romae in antiquis Marmoribus frequenter notavi, qualia & ipse descripsi, & apud Gruterum inveni complura. Miles *Mamialaris* pro *Maniplaris*. Quidquid sit praeter loca ante annotata e Labbaei Glossariis haec excerpti in margine fragmenti Traguriani, *Manicillum*. *μανικίον*. *Manicium* *μανικίς*. *Manicula* *μανικώτιον*. denuo *μανικίδιον* *Manicillum*. *μανικίς* *Maniculum*. *Manilea*, *Manica*. vides & in Glossis Philoxeni & in Cyfillo bis *Manicillum* occurrere. In altero loco legebam, quibus prae malo suo cornua nascuntur. Ut denuo hic lateat adagium plebejum, prae malo suo videtur requiri, ut ad *aerumnosos* referatur. Ridicule autem & pro caetera sua inscitia sub Capricorno monet nasci *aerumnosos*, cum nascerentur felicissimi. Illo loco, *noveram hominem olim oliorum*, legendum utique *olim mulierosum*: exciderunt aliquot litterae ut passim in Petronio, vel illico. Cicero de Fato. *hunc scribunt ejus familiares & ebriosum & mulierosum fuisse*. Mox tolle id dixit. Haec *Phileros*, ad illa *Ganymedes*. Narrat is quod nec ad caelum, nec ad terram pertinet, cum interim nemo, inquit, curat annonam ordeï. Festivissime. Hoc ipso enim *Ganymedes* ostendit hordeo vilissimo cibi genere se pasci: Cujus praeter rem in tantis lautitiis recordatur. Inter loca, quae non intelligo, est & ille pag. 56. Ed. Blauvianae. & *Gingilipho ingenti clamore exsonabant*. legebam aliquando, & *singuli sophos ingenti clamore*. Sed hoc praecesserat pag. 36. & ubique *Trimalchioni* in hac coena applauditur. De Hy-

gini locis quid dicam nihil prorsus habeo. Clymenes & Aethrae Helenen comitatarum ad Trojam, & Homerus & Naso meminerunt. Sed cum Theus vixerit ante bellum Trojanum, cui filii ejus Demophoon & Acamas interfuerunt, quomodo mater ejus inter comites Helenae numeratur? confuderunt nimirum duas cognomines foeminas. Idem & de Clymene Pirithoi sorore dictum esto. Vale, vir doctissime, Kal. Decemb. CIOIOCLXXVI.

E P I S T O L A CCCXIV.

N I C. H E I N S I U S

Thom. Munckero.

Delfos.

VIX ultimis meis tabellario traditis, dum recogito, quae ad te scripsissem, ferius agnovi errorem meum: nam in Petroniano loco, *quibus prae mala sua cornua nascuntur* nihil est mutandum. Frequenter enim soloecissat noster, quoties Trimalchionem aut collibertos ejus homines inscitos introducit loquentes. *prae mala sua pro prae malis suis*, *prae adversis*, *prae aerumnis*. Sic pag. 40. Ed. Blauw. *scimus te prae litteras fatuum esset*, & paulo post, *aliqua die te persuadeam, ut ad villam venias*, & mille talia. Nondum poenitet illius conjecturae, *noveram hominem olim mulierosum*. Nempe cum erat in flore aetatis. *Et adhuc salax erat*, nempe sub ipsam mortem, cum annum aetatis excesserat septuagesimum. *Illud musfrium* non est nauci. quid si *Muscio verus*, vel *Muricidus*: alterum in glossis interpretantur *μύσγιος*, alterum *μυοκτόν* & hoc & illud in obscaenam quoque significationem potest detorqueri. Sed hoc in medio relinquamus praestat. Sed & illa mihi plurimum negotii faceffunt. pag. 39. *non est mixcix*. Sequentia scribenda sunt, *ferrum optimum daturus est*, (nempe, gladiatoribus) *sine fuga*, (sine missione) *harenarium in medio*, *ut amphitheatrum videatur*. Ut & illa aequae corrupta pag. 40. *alter burdibasta*, *alter loripes*. & paulo ante, *de lucerna equites*. Sed modus non esset. Si quid ad illa observasti, communica sodes. Vale. Hagae Comitum Nonis Decembrib. CIOIOCLXXVI.

E P I S T O L A CCCXV.

T H O M. M U N C K E R U S

Nic. Heinsio.

Hagam.

EGO vero libenter *Musfrium* illum aliis curandum delegabo: nisi *Muricidus* tuus facit, ut minus aliorum curam desiderem, praelertim cum recolo, quae de murium salacitate Plinius lib. x. cap. 65. & Aelianus XII. 10. memoriae prodiderunt; unde venuste *murem* posse dici puerum delicatum plane persuademur. Nec forte displicebit admodum tibi, quod, dum haec scribo, mihi in mentem venit, *merum rus*, *non magister*. *Maniciolum* esse legendum pag. 50.

res

res ipsa clamat. De *Vavatone* nihil adhuc verisimile, quo manipulum exprimam, excogito. Hoc certum mihi, mendosum esse in eadem fabula, *strigae ceperunt. lego, irruerunt.* Nec extra mendum, *caccitus.* Fecerim inde, *acriculus.* Pag. 39. lego: *Et Titus noster magnum animum habet, & est caldicerebrius. aut hoc, aut aliud. erit quid utique.* Nam illi domesticus sum. non est nugax. hoc est, homo certus est. c pro g quoties a librariis ponatur, Heinsio nemo novit melius. Illa porro pag. 40. *Jam meliores bestiarios vidi. Occidit de lucerna equites. putares eos gallos gallinaceos. alter burdubasta, alter loripes &c.* Non meum, vir magne, sed tuum flagitant ingenium. Sed tu potes dicere, quid videatur. Primum *bestiarios* non temere mutem cum *Reinesio* in *bustuarios.* Gloss. Isidori. *Bestiarius, venator bestiarum. Bestiores, tiraces.* apparet legendum *Thraces.* An ita vocavit, qui in arena cum bestiis congregiuntur? Gloss. Steph. *Edones. Θέζνες.* vel *Bestiones* etiam ibi, vel utrobique *Edoni* rescripserim. Nec *occidit de lucerna equites. Putares eos Gallos Gallinaceos,* cum Scheffero parenthesis includam. Quae enim sequuntur, *alter burdubasta &c.* ad equites illos pertinere mihi videntur. quos *equites de taberna* opinatus sum aliquando dixisse Petronium, quasi tabernarios *είρωνικῶς.* voluit *νεόπλαστ* ille equites videri, qui ex plebe tabernaria operam suam arenae locaverant. Allusum simul ad equites Neronianos, de quibus Tranquillus. *Satagis, inquis, tanquam mus in matella.* Non nego, mi patrone. Nunquam cum cura legi hoc fragmentum; quod tamen jam nunc facere instituo, a te inductus, qui omnium primus, ut placere illud non parum mihi incipiat, effecisti. Eadem pagina conjectavi: *& bono filo etiam. Sed in aves morbosus est. In aves morbosus dictum videtur, ut insanire in libertinas.* Horatio lib. 1. Sat. 2. Mirificus est lusus, quem describit pag. 51. *non moratus ille &c. lego, non moratur ille. Ususque equo manus palma scapulas ejus subinde verberavit. interque risum proclamavit, butabuta, quot sunt hic.* Certe pro *buttabata* MS. Festi, ut notavit Vossius, exhibet, *butabuta.* Nec male retineas *moratus*, ut subaudiatur verbum substantivum, ut pag. 35. *sed liberti scelerati, qui omnia ad se fecerunt.* Intellego, *sunt. Manu plana,* quod minus discedit a vulgatis, parum Latine dici puto. pag 37. *sed mulier que mulier milvinum genus. an legendum? Sed mulier est mulier; milvinum genus.* pag. 38. *malam parram pilavit. lego, malam parram habuit.* hoc est, initia male auspicata habuit. *Parrae malum est omen.* Vide Horat. lib. 111. *Fuit. Aediles male eveniat.* Putes scribendum, *Ut aediles malum inveniant. vel, ut aedilibus male eveniat.* De caeteris emendationibus tuis tam doctis & ingeniosis, quas communicare mecum dignatus es, gratias ago humanitati tuae immortales. Atque utinam virorum doctorum preces eo te perducere aliquando possent, ut publico dares emendatiora Petroniana ista *λείψαντα*, quae praeter te a nemine credo intellecta haecenus. Vale multum, vir illustris, & diu vive bono litterarum. Delphis Postridie Nonas Decembres Anno c1010cxxxvi.

EPISTOLA CCCXVI.

NIC. HEINSIUS

Thom. Munckero.

Delfos.

AD fragmentum Tragurianum, quae annotabam proxime, non improbari tibi, Munckere praestantissime, est sane cur operae pretium haud exiguum retulisse possim videri. *Mures* pro pueris delicatis dici ex Plauto aliisque liquet. in hoc ipso Fragmento idem vitiligator, ubi Gitonem puerum cogitabat, *mus*, imo *tuber terrae*. Sed cum muris nomen soleret in blanditiis potius esse, non satis iracundiam hominis graviter commoti videtur decere, ut forte scripserit illo loco Arbiter, *pus*, imo *tuber terrae*. ad quem locum plura congeffi de *pure*, *verruca*, *carcinomate* conviciis. *rus merum* prae omnibus aliorum conjecturis mihi placet. de veritate tamen lectionis adhuc dubito utriusque. Illo loco *strigae coeperunt*. reponis *irruerunt*. Sed ex sequentibus nondum videntur irrupisse. Opinabar aliquando τὸ *strigas* absorpsisse vocabulum *stridere*, ob cognationes litterarum, *strigae stridere coeperunt*. Naso in fastis.

Est illis strigibus nomen, sed nominis hujus

Causa, quod horrendum stridere nocte solent.

Pro *caccitus* lege, *Margaretum*, *Hyacinthus*, & *omnium numerorum*. Margaretam & gemmam vocat puerum illum. *Hyacinthi* nomen saepe depravatum occurrit in antiquis membranis, qua de re ad illum locum. pag. 31. *Caldicerebrius* omnino legendum est, quod dudum animadverti: Pro *Mixcix* videtur reponendum verbum aliquod Graecum aut Campanum, quo *μικροφυχία* non laborasse editorem hujus muneris designetur. forte a *μικνός* derivatum. pag. 40. *Bestiarii*, non sunt loco movendi, ut recte mones, & miror Reinesium non vidisse *Bestiarios* etiam dici Gladiatores eos, qui cum bestiis mittebantur. De *Lucerna* equites, legebam aliquando de *laterna*, hoc est sicciore cornu: nam *Laternae* corneae. Sic Priapum in obscaeno carmine de puella uvis passis aridiore.

Laternae videor fricare cornu.

Nunc tamen potius est, ut arbitrer excidisse syllabam unam alteramque, ut frequenter in hoc fragmento. Ac legendum esse, de *silicernio* equites. De *Silicernio* vide Vossii Etymolog. per *equites* autem intellige Gladiatores, qui ex equis pugnabunt. Sic & *mulierem effedariam* habemus. Quapropter mox lego, adeo de magno numero *andabatae* pauci erant. Caeterum cum totus hic muneris apparatus sit splendidus, tamen extenuatur narrando, quo Petronius malignitatem hominum tenuiorum voluit taxare. *Alter burdibasta*, *alter loripes*. quid si *burdobatta*, vel *Burdibatta*. *burdionum* cibus *batta*. Glossae veteres a Labbaeo auctae, *Batta*, βαττ, βαττ *rufus*, *rubum*, *sintex*, *batta*: *Mannos* vulgo & *Burdos*

dos dictos Porphyrio interpres Horatianus monet alicubi. Sed ille mannos cum hinnis & Burdonibus videtur confudisse. Per *Burdibattam* igitur hominem aridum & exsuccum designari, quomodo *Corvorum cibaria* Gitonem post alter per convicium vocat. Eutropium Eunuchum jam veterem non dissimili convicio Claudianus *Stipitem exhaustum* vocat alicubi. *Codex non mulier* infra nostro. in Glossis Isidori scriberem *Bistones, Thraces*, & in aliis Stephani Glossis, *Edonis Oegyni*. Mox pro, *Sed in naves morbosus est*, sic enim V. C. lege, *in nave morbosus*. ludit in idiotismo plebejo nequiter, ut solet ancipiti joco. Morbosus pro morbis obnoxio, aut valetudinario plebi in usu fuit. Sed apud Latinos scriptores *morbosus* pro Pathico ponitur. *Morbosior omnibus Cynaedis* in obscaeno Carmine. Catullus *Mamurrae pathicoque Caesarique, morbofi pariter. in nave* rursus est obscaenae ambiguitatis. Nam ut partes mulierum obscaenae *naves* dictae, ita & puerorum pars postica. Hinc jocus Juliae Aug. Filiae, quae vectorem se negabat tollere nisi plena navi. Apud Caelium Apicium certe *navem* avium observo non semel pro ano poni. Huc & referendus Ciceronis jocus, nec magno Turnebo, nec aliis puto, satis intellectus. Cum adversarius multis disputaret de *Nave dividenda*, respondit ille, ut eluderet instantem, *navem si divides, pedes, non perdes*, quod nihil habet acuminis aut joci, ut vulgo apud Quinctilianum aliosque circumfertur. Vides *dividere navem* ad obscaena detorsisse Ciceronem praeter expectationem adversarii. *Diffissa nate pedere* Horatius dixit. *dividere* obscaenum esse vel ex illis Petronianis liquet, *sic dividere cum fratre nolito*. pag. 51. *bucca, bucca, quot sunt hic?* Micabat digitis puer, & divinandum hero injungebat de numero digitorum protensorum. Satis hoc quidem familiariter. Caeterum lusus iste adhuc apud nos obtinet & videntur in eo Romanae antiquitatis superesse vestigia: *Bock, Bock (bucca, bucca) hoe veel boornen steekender op. manus plena* ibidem non est immutanda, nam ostendit irreverentiam pueri erga dominum, qui plena manu humeros ejus non leviter verberabat. pag. 35. loco mendoso legebam. *Sed liberti scelerati, qui omnia ad assem fecerunt*. Patronum narrat a libertis compilatum. pag. 37. lege, *sed mulierculae mulvinum genus*. τὸ mulier postorius redundat. Sic pag. 41. *gratias agimus libera liberalitati* & multis aliis locis. pag. 38. *malam parram pilavit*, non est sollicitandum: nam & aves *depilari* dicuntur, quibus detrahuntur plumae. Hinc apud Senecam Rhetorem *struthiocamelus depilatus*. *Fuit aediles male eveniat*. affectavit hic denuo, ut solet, solaecismum. Caeterum pro *fuit*, lege *futi*. Deinde syllabam fugitivam repete ex ultima *Aediles, Fuitiles aediles male eveniat*. Vale, vir praestantissime. Hagae Comitum 8. Decembrib.

CICICLXXVI.

EPISTOLA CCCXVII.

NIC. HEINSIUS

Thom. Munckero.

Delfos.

REverfus ex secessu Vianensi, nihil habeo prius, quam accingi ad officium litterarum, qui pulchre meminerim ultimis tuis, perquam exquisitis responsum a me deberi, Munkere eruditissime. Inter caeteras conjecturas, quas fragmento Traguriano dabam proxime, haud improbari tibi τὸ *burdibatta* laetor equidem. Nec video quid commodius dari posset, nisi longe deflectimus a vestigiis scriptae lectionis. *Horridior rusco* Galatea Polyphemo dicitur apud Nasonem, quamquam hoc ad Galateae mores referendum: nam Theocritus, unde Naso ista deprompsit, non est ad manum. Illo loco, *malam parram pilavit*, tutius erit nihil tentari. *Mulier quaeque mulier, milvinum genus*, conjectura haud displicet. *strigae stridere coeperunt* praeter rationes jam allatas, cur amplexus sim, faciunt quae subsequuntur, de cane leporem persequente, is enim crepat & stridet dentibus, dum, ut Nasonianis utar verbis, *vacuos exercet in aëre morsus*. Pag. 51. Sub *varvatone*, vel *babatone*, quod tantumdem est, videtur latere plebi Campanae bilingui usitatum de infantibus a Graeco βαῖβαζων derivatum, de quo amplius cogitandum. pag. 34. *Lupatria providet omnia*, recte jam alii, *Eupatria*, pro *εὐπάτρεα*. false hoc & satyrice, ut omnia. Paulo post ridicule legitur, *nummorum nummos pro cumulos: lacte Gallinaceum* haud necesse tentari, ne cum *lactibus* confundatur. *Lac Gallinaceum* abiisse in proverbium Plinius nos docet, praefatione magni operis. Talia infinita sunt in hoc fragmento, pleno occultae eruditionis, quae fingi aetate nostra ab impostoribus haud potuerunt. Ibidem cogitabam aliquando. *Tanta isti animali beatitudo*. Sed vulgata potest tolerari. *Sicut ille Fericulusta a me habuit praxim. praxim* nihili est hoc loco vocabulum. videtur autem excidisse, ut saepe alias, unum vocabulum ob cognationem litterarum. *Sicut ille fericulus lucem a me habuit proxime*. Hoc *fericulum* & contracte *ferculum* dicebant veteres, & saepe in hoc fragmento occurrit, quod Trimalchio more suo masculinum: maluit enuntiare. refer autem ad *Ferculum* modo sublatum signorum caelestium, cui interpretamentum de suo noster addiderat, ut paulo ante est videre. pag. 37. *pataracina*, videntur excidisse syllabae complures: recte sensum loci habes perspectum. Sed gravius latet ulcus in *clamat*. cuius loco reponi par est nomen liberti nescio cuius, a quo verba fiunt. Scripsi jam olim. *Damas itaque primus cum patéra capaci vina* (vel una) *poposcisset*. *Damas* & *Dama* dicebatur. *Marcus Dama* libertate donatus apud Persium. *Cum summam coenam vindicasset*. Scribebam, *cum se summa coena vindicasset a convivis*. Sub ultimam coenam erat appositus jam saturis convivis, atque vindicatus in posterum: pag. 38. *Nescio quid asiadis*. Nil mutandum vidit jam *Reinesius*. Homines Asiatici sicco corporis habitu, testes Herodotus, Varro apud Nonium, alii: *Centonariorum* frequens mentio apud Gruterum

terum in inscriptionibus. *Dominam suam delectaretur* non esse sollicitandum recte vidisti. *suae rei causa facere* pluribus exemplis in animadversionibus adstruxi ex Cicerone & aliis. Mox minimum discrepat mea conjectura a tua, *spero, jam venter sibi pudorem imponet, & nec jovis, & regamus mittas, & argenteam coronam.* pag. 42. *legebam quid aes autem Corinthium, nisi qui Corinthum habeat,* praesolita Trimalchionis jactantia, quasi totam in hoc aerario Corinthum possideret. pag. 43. *putabam, ignoscetis mihi si quid dixerō, & caeteri nolint.* Ibidem corripiebam, *habeo capidem, quam reliquit Patrono meo Mys.* Mys in his talibus summus artifex cum Myrone & Mentore. Hujus frequens mentio apud Graecos, & Martialem. Pro cetera autem impudentia nebulo mentitur ab ipso Mye patrono suo relictam capidem, cum Mys aliquot saeculis vixerit ante Patronum Trimalchionis. pag. 44. corripiebam, *reliqua anilia acromata, ac tricas meras esse,* ut alludat simul ad naenias aniles. *Anilia* pro *Animalia* superfluenta una syllaba, quam librarius supinus temere repetiverat ex proxime sequenti vocabulo. Sic & pag. 47. scribendum, *non didici geometricas tricas, & alogicas naenias.* De alogis in Geometria nos suo loco. Ibidem scribe, *perridiculae aliquid catastrophae quaereretur.* Quales nimirum jam & ante occurrebant. pag. 46. puto, *in alio pediculus vides, in te ricinum non vides.* dixi alias. Et paulo post, *tu lendiculofus, ut pediculofus.* hac illac tamen enatavi nil mutem. Ut hic illic elutatus sum per incommoda. *Hircus in ervilia* eleganter, ut ad epulas haec tam lautas referatur. *ervilia* nos adhuc *Bockeboonen* appellamus, quod hirci hisce gaudent. *ervilia* & *ervum* eadem apud Maronem in Bucolicis, *Eheu quam pingui macer est mihi taurus in ervo,* quam veram lectionem scripti codices & veteres Grammatici asserunt. Pag. 47. pridem volebam. *ad summam, si quid vis, ego & tu sponsiunculam, exi, defero lamnam.* *exi* formula provocantium. alioqui & ecce ego olim conjeceram. Caeterum provocantes offerebant provocatis tabellas (libellos vocat Ovidius) in quibus sponsiones, formulae & nomen sponsorum perscribebatur. Servi autem & plebs infima pro tabellis lamna plumbea utebantur, quales & hic designantur. Paulo post emendandum videtur. *Bene nos habemus, haud isti agagae, qui tibi non imperant.* *Agagula* leno est in Glossis Isidori, si recorder probe, & alias in hoc ipso convictu id vocabulum occurrit. Mox sequitur locus, qui *Reinesum* mirifice torquet cum sua *Sagana*. *Sathana tibi irata sit curabo, & qui te primus decuro defecit.* Prima littera in *Sathana* perperam repetita est ex ultima proxime praecedentis verbi *Habeas*. *Githoni* autem, utpote discipulo iratam imprecatur *Palladem*. Sic paulo, ante, *curabo jam tibi Jovis iratus sit;* ita enim legendum. *Ridiculi causa autem Athana* dixit sive Ἀθάνα, pro Ἀθήνη, Ionica usus enuntiatione, quae per magnam olim Graeciam obtinebat, cujus & pars Capua, ubi haec caena exhibetur. Deinde scribo, *qui te primus de corruda fecit.* E corruda fiebat asparagus, diuturno cultu herba utilis ex inutili: haec autem respiciunt Gitonis magistrum, cui is adstabat. Quomodo e corruda fieret asparagus Columella nos docet inter alios. Adagium denuo a rusticis & plebe infima hoc est mutuatus. pro *volpis uda*, ibidem literis transpositis scribendum est *volsa picla*. *Cynaedum* designat. Superiori pagina de eodem,

*etiam tu rides pica cirrata? itidem transpositis litteris, quod vidit Reinesius, puto. picam pulvinarem Fortunatam vocat alibi. Ut populus per exitum meum jurer, annotavi & ego in ora codicis mei. modo versa, modo supina Schefferus, nū fallor, ut ad frustra referatur, quae mucrone in ordinem redigebat chironomus. Post lego, respicientibus ad mensam, & sacrum esse fericulum religioso apparatu perfusi, &, ipsi iis mappas implevimus. pag. 49. pulcherrimum Bacciballum. locus inquinatissimus. Excidit autem syllaba una, ut alias saepe. Bacc. cimbaliū fuerat olim, hoc est Bacchi Cymbalum. Cymbalum *ὑποκορεσιμὸς*, pro Cymbalistria. Sic Crotalia in hoc fragmento & apud Plinium Nat. Hist. Margaretis tympaniis in jure: erat autem haec copa, & ut puto Bacchi in Cymbalistrias relata. Talis & illa Copa Syrisca in Catalectis. *Cr'spum sub crotalo docta movere latus.* in inscriptionibus Gruteri occurrit alicubi faeminae nescio cujus epitaphium, cui additur in fine *Bacchi Cymbalis.* id est cymbalistria, ut ego interpreter. Apionem Grammaticum Tiberius Caesar, etsi paulo aliter, *Cymbulum mundi* appellabat. pag. 49. lege, sed ego non mehercules corporaliter eam aut propter res venerias curavi, sed magis quod bene morigera fuit. Ibidem, *scruta scite expedienda* Schefferianum puto probum esse. Paulo ante lego, itaque per scrutum, per scoream aegre aginavi. Aginare in glossis Labbaei varias significationes habet. pag. 49. *animus in naso esse*, hoc quidem iracundiae est indicium, sed hīc de timore agitur. Legebam itaque, *mibi animus in ano esse.* Quod pluribus interpretantur notae meae. Deinde & *matutinas umbras cecidi.* Nam sub gallicinium haec fiebant. Mox, in *aream intravi*, villae scilicet. pag. 57. *scribe, indecentissimam rubore faciem.* De *bisurco* alias. Plura enim volebam, sed charta deficit, & jam nimius sum. Vale. Hagae Comitum xii. Januar. CIOIOCLXXVII.*

E P I S T O L A CCCXVIII.

T H O M . M U N C K E R U S .

Nic. Heinſio.

Hagam.

Literas tuas quo saepius lego (lego autem saepissime) eo plus disco, vir illustris; adeo undique in illis stricturae relucet coelestis ingenii tui. Quamobrem habeo, cur summopere laeter, quod salvus nobis e secessu Vianensi, cui jam coeperamus invidere, redieris. Licebit nunc denuo, quando hoc juris dedisti nobis, oraculum Heinſianum consulere. Legitur in Frag. Trag. pag. 34. *modo modo quid fuit?* Recte, opinor, si sequentia, in quibus ista geminatio non semel comparet, consideres. Perperam ergo editi illud alterum *modo* omittunt. pag. 35. *Lana, credrae, piper.* Vide, an locum habere heic possit, *cedria.* Capella lib. 11. *Alia ex papiro, quae cedro perlita fuerant, videbantur. Membranae Leidensis Bibliothecae, quibus utor. Alia ex papyro, quae cedria perlita fuerat, videbantur.* Glossator interpretatur resinam cedri. Cum hoc titulo *proscriptis.* Illud cum videtur mihi ex compendio scripturae natum, & mutandum.

dum in coenaculum. Pag. 36. *Et arietem illi. laudamus. Emendabam, Et arietes. collaudamus. Heu est Heu. lego, heu hebeu. pag. 37. Minoris quam muscae. suus tamen. Videtur non incommode posse legi: Minores quam muscae. muscae tamen. Pilare parram recte dici firmat Apicius lib. vi. Perdicem ibi cum pluma sua elixabis, Et madefactam deplumabis depilabisve. Satis placet illud tuum pullarius. Alioqui posset scribi, puerarius. Gloss. Steph. Puerarius, παιδεργής. Vexatissimus est locus: Similia Sicilia interiores. An legendum? Similes Sicilia habuit heroes. pag. 39. Laborat hoc tempore. nec haec sua. Legerem, nec hoc suo. Suum cuique dicitur, quod ei favet. Sall. Jug. cap. 61. Suo loco pugnam facere. Sed repugnat Cicero, qui tempus suum, tempora amicorum pro periculis ponit. Scribendum ergo potius esset, Et hoc suo. quanquam nec hoc placet. pag. 41. tæda ex aceto. Ad ventrem solvendum magis faceret beta. Cum mundatis ad Symphoniam mensis. Puto explicandum esse, Simul ac mundatae essent mensae. nisi legi mavis, commundatis. Penthiacum, volueram, pullum Parthicum ex Apicio, cum vidi a Reinesio minori mutatione rescribi, Phasiacum. pro quo tamen malim, Phasianum ex eodem Apicio. pag. 45. Ceciderunt memoriae meae. castigaveram, exciderunt. Et canem contubernalem. Si quid mutandum censeas, libenter legam, etiam contubernalem. tametsi contubernalem canem recte vocare possit, quod secum januam custodierit. Ad summam quisquam me bis poposcit. lego, non quisquam vel quispiam. pag. 47. Sum natura caldus cicer ejus cum cepi. Sententia aperta esset, si legeres: Sum natura caldicerebrius. Cum coepi. vel, sum natura caldus. fervere cum corpi. Sed nimium abire a vulgata scriptura videbuntur. Constitutum habui nunquam. In memoriam mihi haec redigunt, quod est in vulgatis: veniremus ad interdictum. An hoc est venire ad diem dictum? Pag. 54. Ova pilleata. an legendum, pilulata, vel pastillata? ut vocet sic ova in pastillorum vel pilularum morem praeparata. Sed rectum esse ova hapala, jam pridem, ni fallor, me docuisti, cum Hagae ad te inviserem. Invenio illa hapala apud Apicium lib. vii. cap. 17. de ovis in pastilli morem paratis Platina lib. ix. agit. Catillum congagatum. Ex congagatum videtur faciendum oenogaratum. Apicius lib. vii. Ova frixa, oenogarata. Excatavarisasti me. Aptius putem, Exoonacisasti ex Gr. ἐκονακίζαν. pag. 53. Indecentissimam rubore faciem etiam mihi venerat in mentem, dum curis mecum secundis, quid ad te scrip- sisssem, recogito. pag. 59. Gloriosus volo efferrī. lego, gloriosius. Viperæ hujus sessorium. Pressorium mallem. Gloss. Steph. Pressorium, πιαστήριον. Ex catillo vide an formari possit, conobacula, cujus saepe facit mentionem Apicius. Commentariis nostris Hyginianis, quibus laborem sane aerumnabilem impendi, jam dudum quaero typographum. Waesbergius, qui Schefferianae editionis adhuc sibi exemplaria non pauca dictitat,*

Causando nostros in longum ducet amores.

Apud Hackios frustra laboravit Ryckius noster. In causa mos est & quasi pactum conventum inter typographos, quo prohibentur singuli alterius, ut loquantur, copias describere. Non desistam tamen πάντα λίθον κινεῖν, ne pereant mihi sudores isti. Quid das consilii, amice magne? seponere me illud

opus si iusseris, tanquam jam publicatum, feceris ut protinus his studiis calcem impingam. Vale. Delph. a. d. xvi. Kalend. Febr. Anni cıııııclxxvii. quem tibi felicissime decurrere opto. Obsignaturus eram epistolam, cum succurrit pag. 52. emendandum, *Catillum conchularum*. quod quin probaturus sis vix dubito. Celsus lib. i. cap. 29. *Omnes fere conchulas*. Ubi & *betam* inter alvum moventia, non taedam, recenset. Porro pro *maleicorum* scribendum *mallicorium* ex Plin. lib. xxiii. 6. non *mallicorium*, ut volebat Cl. Schefferus. qui & pro *gizeria* ex Nonio & Festo rescribendum censet, *gigeria*. invenio tamen apud Apicium pag. 50. *Zizeria*, quod mutaverim in *gizeria*. pag. 31. scribendum existimo: *Iliada* & *Ulyxeam*, inquit, ac *Laenatis gladiatorum munus*. non licebat multum eas considerare. Jam perveneramus. Illud nos videtur mihi ortum ex non, quod praecessit. vel certe mutandum in quod. quod tamen, aridet.

E P I S T O L A CCCXIX.

N I C. H E I N S I U S

*Thom. Munckero.**Delfos.*

DUM non habeo, quod agam, & per valetudinem a curis avocor identidem & fallendo tempori diverticula circumspicio oportuna, interpello te epistolis meis frequentius, Munckere clarissime, e vicinia, quam occupationes fortassis tuae ferunt. Nam quod tu ingenii mei sollertiam, perspicaciamque laudas ob locos nonnullos Traguriani fragmenti in integrum restitutos, amice magis id a te fit, quam vere. In penultimis tuis litteris restabant nonnulla, ad quae nuperius rescribi oportuit, nisi agnovissem tunc ultro in molem nimis magnam excrevisse meam epistolam. Pag. 66. *faciantur triclinia*. Sic & ego, & auctoritate veterum Tragicorum illustraram: Pleraque autem horum libertorum obsolete potius dicta sunt, quam barbare. Nam quae in scena ac theatris audiebant quotidie ex Accio, Pacuvio ac Comiciis jam antiquata recitari, ea perperam in usum loquendi convertebant. Pag. 56. *vero vero*, frequentes sunt istae repetitiones apud nostrum. pag. 57. *dum bonatus ago*, putabam, *dum bonis natus ago*. vel *bonis prognatus*. Etiam hoc pro cetera Trimalchionis jactantia, quasi optimo loco natus esset, qui alibi in fragmento e pistrino sese fateatur ipse emeruisse. adeo verum est, quod ait Petronius, nihil hoc Trimalchione fuisse sibi dissimilius. pag. 58. *effrangere. te frangere*. Sic in epistola Penelope Nasoniana,

*Ille tamen pietate mea precibusque pudicis**Frangitur:*

Plura de hoc loquendi modo ego ad Nasonis amores. Ibid. *Fulcipedia*. legendum *falcipedia*, hoc est *Vatia*. a *falcatis pedibus*. opinor hoc aut *Reinesium* aut *Schefferum* jam monuisse, qui nunc non sunt ad manum. Ibid. recte vetus liber, ego tamen & ipsi meae dominae satisfaciebam, hoc vult se & catamitum heri

heri fuisse, & revera rem quoque cum hera habuisse: nam superiora sic legenda, *ad delicias foemineas ipsissimi domini annos quatuordecim fui*. Ibid. lege, *cito fit quod dii volunt*. Nunc ad ultimas tuas veniamus. pag. 35. *lana, cedrae, piper*, redundat una litera, legendum enim *cerae*. hoc est favi. in Fastis Nasonianis *in ceris aurea mella suis*. paullo post narrat Trimalchionem *arietes Tarenti, apes Athenis emisse*. Ubi vides lanas & ceras quoque conjungi. Vide Erasmi. in Adag. *neque mel, neque apes*. Cum hoc titulo proscripsit. Optime vidisti pro cum legi debere, *coenaculum*. Sic & ego in annotatis, addito loco altero, qui sequitur in eodem fragmento, *auctionem proscribere*. Mille locis apud nostrum exciderunt syllabae, de quo alibi. Sed qui sunt *apri gausapati* eadem pagina? pag. 36. & *arieti illi*. lege, *arietilli*, puto & hoc alios observasse. Sic apud Columellam in veterrimo codice, quo Lutetiae olim sum usus, *cicer arietillum*, non *arietinum*. *heu est heu*. putabam *heu iisti?* *heu! ire & abire* pro mori. Horat. *ibimus, ibimus*. Ceterum amat repetitiones has; sic pag. 43. puto scribi debere *μαδλα, perite, μαδλα*: nam ubique acclamatur & applauditur Trimalchioni. pag. 37. *τὸ muscae* repetendum est, quod & tu recte vidisti. *Minores quam muscae sumus, muscae tamen*. vel *minoris*. de depilandis avibus alibi plura annotavi, quibus & *sua vellera*, sic *vellera cygni* Gratio. *Pullarius* cur malim quam *puerarius*, rationes sunt in promptu; quod & eruditius hoc & ad veterem scripturam propius accedat. restitui id semel iterumque Apulejo: hinc *pullipremo* Lucilio, & Aufonio. *feles pullaria* pro *paediconc*. Vide Festum in *puer*. *Similia Sicilia interiore* non est mutandum. Ubi intelligendum, *fiebant*. sic auctor orationis sub nomine Ciceronis contra Sallustium, *Africam interiorem obtinere*. pag. 36. lego, *laborat hoc tempore, nec est sua, non sum meus*. Nasoni saepius loquendi hunc modum restitui, ut lib. xi. Met. fabula Ceycis. *Quod quo magis illa tuetur, hoc minus & minus est amens sua*. pag. 41. ego quoque in schedis, *betam ex aceto* legebam. Quod & pag. 52. videtur restituendum, & *ex aceto betam*, pro & *certe betam*. Ibidem paulo post lege. *oxycominia* hoc est olivae ex aceto. *Cominia* inter olivas recensentur a Plinio. pag. ibid. *Commundatis ad Symphoniam mensis* vera scriptura. de quo verbo plura ego in notis. *Emundare* etiam dicebant, quod saepe degeneravit apud scriptores veteres in *emendare*. *Gallum Gallinaceum Penthiacum* non debere sollicitari puto. est enim quem Galli apellant *un poulet fricassé*. in modum Penthei discerptus. in Catalectis auctor iudicii inter cocum & pistorem huc alludit. *Est & mihi de bove Pentheus*. pag. 46. *exciderunt memoriae* recte tu mecum. *Canis contubernalis* ancillae nomen est. Deinde lego, *ad summam quis quicquam me bis poposcit?* pag. 47. *sum natura caldus, cicerejus*. nil muto sum natura calidus in modum Ciceris: est enim caldum cicer, sic ut adurat terram, qua feritur, teste Plinio. supr. pag. 38. *Piper non homo. is quacumque ibat, terram adurebat*. infinita habet id genus adagia rure petita: De *Corruda* jam vidimus. pag. 39. *Hermogenis filicem* habes, hoc est filiam pravam. quod mendosum erat in editione Patavina. nos Belgae adhuc hominem nequam *Onkruyd* vocamus. *Constitutum habui numquam*. Cicero Epist. ad Marium. *Si quod constitutum habes cum podagra, fac in alium diem differas*.

adeo huic stercore plebejarum locutionum gemmae nonnumquam interlucent. pag. 52. *Ova hapala* bis nostro restituenda sunt. Ceterum tota haec narratio caenae novendialis, quam per ironiam vocat *lautam novendialem*, sic enim scribendum, characterisum exhibet servilis & illiberalis ingenii in Habinna, qui maligne describit caenam ex qua ebrius redierat: similia supra habuimus de Norbani munere gladiatorio. Enumerat autem Habinnas vilissimos cibos, & qui infimae plebi in quotidiano essent victu. Nam *Calvae arbitrato*, nuces calvas designat, quarum unusquisque, quantum vellet, posset sumere. de *Calvis* plura notae meae. Mox lego, *fordae frustra*, hoc est bovis gravidæ, cujus caro maxime insipida habetur. a *forda fordicia* in Fastis. Paulo ante & *arsinae frustra* pari modo. Deinde lege, & *catillum conchiclae*, tum (*pax*) *pelamides*. *Conchis* seu conchicla cibus vilissimus, e fabis concinnatus, de qua Martialis, Juvenalis, alii. *pax* interjectio admirantis, sic supra *babae!* de *Pelamidibus*, puto, vidit Reinesius. *Eccatharifasti* videtur formatum verbum ab ἐκκαθαρίζω expurgo, detergo. non dissimilia apud Plautum occurrunt, ridiculi causa. pag. 56. putabam, *viperæ hujus subsefforium* pro latebra. *Malicorium* apud Columellam quoque ter quaterque occurrit. *Gigeria* opinor probum esse. sed pronuntiationem secutus est, qui haec Petroniana excipit ex ore dictantis. Sic pag. 37. *Bacalusias* habes pro *Bacelogias*, vel *bacalogias* Dorice, & similia. pag. 31. puto, non licebat *muncra* ad *aciam* considerare: nam jam ad triclinium perveneramus. nam *Tragurianus* codex *multaciam*. sic pag. 59. *Ab acia* & *acu* omnia exposuit. ita correxeram ex fragmento veteris Comici apud Nonium, sed video id Schefferum jam occupasse. & haec quidem hactenus. Hyginum quidem vellem unice in publicum prodire quamprimum, sed quando haec sunt tempora bonis artibus parum opportuna, non dubium est mihi, quin inter hasce Typographorum procrastinationes multa tibi sint exortura, quibus editionem hanc reddas ornatiorem. Vale. Hagae Comitum XXI. Januar. MDCLXXVII.

E P I S T O L A CCCXX.

T H O M . M U N C K E R U S

Nic. Heinio.

Hagam.

Q Uod serius, ac debui, ad tuas respondeam; vir magne, imputes rogo occupationibus meis, quibus semper ἐνθ' ἐν ἑνὶ νοστί me incingi in pulvere hoc Scholastico, adeo ut ne domi quidem per non paucos convictores vix unquam sim meus. pag. 56. Ego vero cur mallem, fecit usus meliorum scriptorum, quibus pro immo illud video usurpatum. Ter. Eun. 111. 5. Ego homuncio hoc non facerem? ego illud vero ita feci, ac lubens. pag. 35. *Lana*, veræ probo omnino. Quamquam *cedriae* mentio occurrit quoque apud Celsum lib. v. 18. De *apris gausapatibus* quid faciam ignoro. Est quidem pag. 48. *vitutus galeatus*, sed tantum ut scenae serviatur. Mox. ead. pag. legerim, *David vocor*, *pistores*? ut intelligatur loquar. pag. 36. *facto* non puto mutandum in *facio*. Ad eandem novi-

novimus formam lecto & scripto dicta ab Horatio. pag. 48. ex lance clunaria finxit centenariam Reinesius, quod non improbem, cum apud Plinium inveniam pondera centenaria, & apud nostrum alibi, Cochlearia non minus selibras perdentia. Cogitaveram aliquando Cumana, qua non uno loco inferri fercula sua jubet Apicius. pag. 32. Quidquid ergo est dono vobis eum. In vulgatis legitur: Quicquid ergo est, dono vobis. dignum existimo expendi utra melior sit lectio. Non incommode videtur dici, donare aliquem alteri, ἀντὶ δ' alterius causa ei ignoscere. Deinde illud, quid ergo est? usurpat etiam infr. pag. 35. Caeterum ex eadem pagina colligo in editis legendum esse una vocula auctius, ne diutius absentivus morae vobis essem. pag. 31. amplector libens emendationem illam, nam jam ad triclinium: ut & alteram, multa ad faciam. quanquam, dum ad picturas respicio, putabam non male legi, multum eas jam. Illas picturas dicit in medio haberi. Minima mutatione corrigam, & forsan vere, in cavaedio. nam cavaedia juxta triclinia aedificabantur. Plin. lib. 11. epist. 17. Est contra medias cavaedium hilare. Mox triclinium. vel certe deleverim τὸ porticu. nam medias vides absolute porticus medias dici a Plinio, id quod jam observatum ejus interpretibus. pag. 38. haud intelligo illa, cui datum est, non cui destinatum. Intelligerem, si legeretur, Cui datum est, datum est, non cui destinatum. h. e. haeredi. pag. 39. character hominum ἀρεβῶν postularet, nec omnes ridebantur dii, tanquam mures. ridiculum enim animal mus. Flaccus: Nascetur ridiculus mus. Ead. pag. ex μῦκός nihil, quod formem apte, succurrit, nisi μῦκός, ut illud μεταφορικῶς a corpore transferatur ad animum. pag. 40. destinavi eum artificium docere. legunt, artificii. Latinius foret, artificii quid? pag. 41. in toto corpore fluctum facit? an structum? Ead. pag. cocum potentiae admonitum in culinam obsonium duxit. Legerem cocus & admonitus, nisi argutiolam aliquam in eo affectavit, quod non cocus absonium, sed obsonium duxit cocum. pag. 42. Porricino pollicem extorsit. forte scripsit, porrecto vino. pag. 45. pro sub hoc epigrammate cepit, mallem, ab hoc epigrammate. pag. 37. ab hoc ferculo. vel, sub hoc epigramma cepit. pag. 34. Qua milvi volanti puto sanum esse. qua est quo usque. Sallust. Jug. 101. Postremo omnia, qua visus erat, constrata telis. Haec haecenus. De typographo Hyginianis nostris commentariis circumspiciendo quaeso memor sis. Nam si quis in Hygini fabulis edendis me occupaverit, parum aberit, quin criticae meae calcem impingam. Vale multum, vir illustris, & diu vive feliciter. Delph. Batav. a. d. iv. Kalend. Februarias Anno MDCLXXVII.

Pag. 45. jubent saepe anatinam parari. ita vocat medicamentum ad ani vitium? an scripsit vomitivam? Gloss. Steph. vomitiva, ἐμετ. ita sopor dicitur medicamentum soporiferum apud Severum Sulpicium.

Thom. Munckero.

Delfos.

HYgino tuo si apud Traiectinos Typographus forte detur percunctatus sum proxime *Graevium* nostrum, quando in Lugdunensibus ac Amstelædamiis parum nobis praesidii videtur esse, vir doctissime, a quo responsum propediem exspecto. Caeterum quod ille narrabat in proximis ferri rumorem de *Berckelii* Hygino in publicum prolato, vix fidem meretur, cum illi abunde sit, quod in Stephano agat. Ad Petronium ut revertamur, non magis in illo *agros gausapatos* ferendos esse, quam *praetextatos* opinor. Quid igitur? Timide dico fors esse, ut Arbiter dederit, *apras gauna pastos* literis transpositis, vel *gaunea saginatos*, quod longius abit, *gauna* vel *gaunea* pro *cauna* vel *caunea*: nam utrumque dicebant veteres pro caricis vel ficibus. Sic aprum, quem convivis infra Trimalchio apponit, Thebaicis & cariotis pastum fingit. & sane luxus Romanorum incredibiliter in hisce talibus sibi indulgit. *Vitulum galeatum* in fragmento non memini occurrere, sed *Ajacem galeatum*, qui vitulum convivis partiretur. *Opera pistoria* saepe occurrunt apud antiquos, etiam in Suetonio & Glossis Graecolatinis. Caeterum plura excidisse hinc opinor, & species enarratas esse plusculas lautitiarum, quae praesertim in piscibus immani pretio redemptis constabant. Neque enim credibile est, homines tam lautos solis apris & operibus pistoriis victitasse. Iis enumeratis egit de familia ejus, in qua recenset, *aucupes, cocos, pistores*. Sic enim lego. & infra *aucupes* habes Trimalchionis. pag. 48. pro *lance clunaria* lego, *lance clibanaria*: *clivanaria* antiquitus erat scriptum, hinc natus error. *Lancem clibanariam*, argenteam procul dubio, cum & in argento servi Trimalchionis pisum purgarent, cui clibanus suppositus. Sic in clibano panem fuisse allatum in trichinio noster hoc ipso fragmento narrat. Alias, puto, monui libertos Claudianos potissimum taxari in hoc libello. De lancibus argenteis Drusillani, qui in Claudii libertis, vide Plin. xxxiii. ii. & Tertullianum de pallio. De luxu libertorum Petronianorum idem Plinius: pag. 32. legebam, *quidquid ergo est? dono vobis reum*. quasi diceret, *sed quidquid sit, dono vobis reum*. Sed & paulo ante scribendum, *vestimenta accubitoria*, quibus in convivio utebantur, *caenatoria* vocat pag. 45. lin. ult. *ne diutius absentivus morae vobis essem*, jam occupavit Gronovius monente *Boschio*. pag. 31. *quas in medio picturas haberent*; Codex optimus Scaligeri, & alii complures, *in medica*, non *in medio*, quare legebam, *in aedicla* pro *aedicula*. ut passim noster, & superiora confirmant. Nam si picturae fuissent in media porticu, poterant apparere deambulantibus, nec opus foret ex Atrienſi quaeri, quales essent. Sed quid sibi vult *grex cursorum* paulo ante, qui se cum magistro exercent, an & magister currebat? nugae: scribebam, *gregem cirratorum*, sic discipulos appellabant, de quo alibi. pag. 38. *cui datum*

datum est, non cui destinatum sic capiebam, fruitus & ille opibus suis dum vixit, cui datum est, ut frueretur, non cui destinatum, hoc est heres, ut tu recte. Posses & τὸ is inferere post vixit. pag. 39. & omnes ridebant ut dii tanquam mures. τὸ ut dii repetitum male ex sequentibus, quare putabam, & omnes rodebant tanquam mures. panem scilicet, nisi id excidit. Certe totus locus agit de annona. pag. 40. legebam, destinavi illum nonnihilum artificii docere, ut cognitio litterarum conturbarit in utroque vocabulo. pag. 41. in toto corpore fluctum facit, sic capio, ut fluctus facere in simpulo. Ibid. lego, Cocum potentiae admonitum in culinam obsonium abduxit. Revertebatur nimirum cocus in culinam, ad reliqua obsonia apparanda. pag. 42. scribebam, foricino pollicem extorsit. Sorcinus a forice convicii loco est, ut noctuinus, a noctua in catalectis Maronianis. Naenia foricina apud Plautum. pag. 45. ab hoc Epigrammate, video etiam annotatum in meo codice. pag. 34. qua milvi volant video quid velit, sed locus est luxatus, alius diceret, quantum uno die milvus circumvolat. pag. 45. post varias conjecturas, nihil probabilius videtur, quam, jubent saepe enema matutinum parari, pro clystere. Sic supr. pag. 49. locus similiter luxatus matutinas umbras cecidi, quomodo apud Maronem, basta volans noctis diverberat umbras. & haec quidem haftenus. Hagae 3. Februar. ciciocxxvii.

EPISTOLA CCCXXII.

THOM. MUNCKERUS

Nic. Heinsio.

Hagam.

QUOD nostra causa Cl. Graevium de typographo commentariis Hyginianis circumspiciendo appellare dignatus es, ita valeam, ut rem supra quam dici potest fecisti mihi gratam, vir illustris. Haud recuso, quin cum opella illa, quam adeo publicare, ne occupemur, festino, aut stet aut cadat qualiscunque existimatio nostra. Quod ideo scribo, ne vos poeniteat de meliore eam nota commendasse librariis. Si non gravaberis inspicere, afferam proxima hebdomada partem ejus, ut per otium perlegas. Petronianae illae emendationes, quas denuo nobiscum communicasti, vere Heinsianae sunt, hoc est, perquam eruditae & elegantes. Pag. 34. In illis verbis, *qua milvi volant*, illud *qua* accipiebam pro *quo usque*, ut apud Sallust. Jug. 101. *Qua visus erat*. Proverbialem esse locutionem innuit Scholiastes Persii ad Sat. v. vers. 26. *Arat Curibus, quantum non milvus oberret*. Scholion habet: *Secundum proverbium, quantum milvi volant*. Juvenal. Sat. ix. 55. *Tot milvos intra tua pascua lassos*. Schol. *Ut nec milvi transvolare ea possint*. Nisi cedimus Persiano interpreti, possemus interferere τὸ non. pag. 35. *Pistoria opera recte tueris*. Fit illorum mentio quoque apud Celsum. lib. 11. 28. *Esse praeterea locum mancum omnino credo tuae fidei*. *Aucupes tecum in divitis familia ponit* & Varro pag. 310. *Catal. Steph. Cohortes cocorum, bamiotarum, aucupumque*. pag. 50. *plus sciae non satis concoquo*. Mallem *plures sciae, vel quam plures sciae*. Festus in *Querquetulange*.

Tom. V.

Ccc

lanæ. sed faeminas antiqui, quas sciens dicimus, viras appellabunt. Pro sciens margo habet sagas. Ego scias praeferam ex hoc Petronii loco. Ead. pag. necdum dimittere possum *varatonem*. Sagaciter notatum a te, vir magne, alludi non raro ad loca celebriora ex antiquiorum scriptis. Forte est ergo, ut respexerit titulum unius de Varronianis Satyris, *Stramentitius Ajax*, & scripserit, *stramentitium Ajacionem*. *Ajacio* ἰπποευσινόν est ab *Ajax*, ut *senecio* a *senex*. pag. 58. *Sterteia* non temere mutem. Ut ab *impeto impetejus* formatur, ita a *Sterto stertejus* videtur non male derivari. Gloss. Steph. *Impetejus*; Blau. Vale multum, & ut fecisti hactenus, tueri perge clientem tuum, humanissime Heinfi. Delphis Batav. a. d. x. Kalend. Martias Anno ciorclxxvii. In notis, quae Tyroni & Senecae adscribuntur, inveni *volpicida*. quod an pag. 47. melius quadret, quam *volpis uda*, tuo ingenio pensitandum relinquo.

EPISTOLA CCCXXIII.

NIC. HEINSIUS

Thom. Munckero.

Delfos.

A Graevio, quod miror, nihildum responsi tulimus, vir praestantissime, In Traguriano Fragmento ut mea caedam vineta pag. 39. non est necesse tolli *ut dii*. Scriptum erat antiquitus *vidi*, omiſſa una littera. & omnes *rodebant avidi, tanquam mures*. *rodere* proprium murium esse haud ignoras. Cicero lib. ii. de divinat. *quasi vero quicquam interfit mures diem & noctem aliquid rodentes scuta an cribra corroserint*. apud Juvenal. & *divina opici rodebant carmina mures*. sed hoc promptum. pag. 34. opportune admonuisti de loco *qua milvi volant*, sed nihilominus sententiae nonnihil deesse videtur, forte, *qua milvi vix volant*. Deceperat me locus Nasonis Met. xv. de Cippo. pag. 35. post *opera pistoria*, quod locum esse mutilum adsentiris mihi, gaudeo. Opinor similes hiatus & alibi occurrere, ut pag. 56. sub finem, ubi cum Triclinium Fortunatae describat, vix sit verisimile nihil aliud ibi commemorandum occurrere praeter *Aeneolos piscatores* supra lucernas, ubi tamen pro *piscatoribus* forte scribendum, *aeneolos disci actores*. *Discobolos* Plinius dixit. In iis exprimendis multus artificum antiquorum labor. De piscatoribus nil tale memini. pag. 50. *Mulieres plus scias*. opinor esse mutandum in *luscitias*. *Lusciosus* dicitur & *Luscitius* & *Luscitiosus*. *Luscitius* a *Luscitione*, quod in veteri jure verbum est. De Mulieribus sagis, duplicem oculorum pupulam habentibus, multa annotavi curis secundis ad Nasonis lib. i. Amor. 8. ubi habes, & *geminum lumen ab orbe venit*. sed plebs, ut alia, inscite credebat has faeminas esse luscitias. Quare & paulo post forte scribendum, quod *sursum est, deorsum aspiciunt*, non, *faciunt*. in Festo forte legendum, *quas praescias dicimus*. Glossae Labbaei, *lusciosus vox-rogus*. *Luscitius* *μωψ* lege, *Luscitiosus*; rursus *μωψ* *Luscitius Mopscus*. lege, *Luscitius*, *Myopticus*. De *Stramentitio varatone* haereo adhuc. forte Canipanum vulgus *βαβάζειν* formaverunt *Babazonem*, vel mutato *z* in *t*, *babatonem*.

Recte

Recte tu mones allusum hîc saepe ad scripta veterum. Sic pag. 38. *longe fugit, quisquis suos fugit*. Ita enim scribendum: titulum Varroniae Satyrae hoc pro-
verbio est complexus. De *Stramentitio* tamen *Ajacione* dubitari adhuc possit,
etsi ingeniosissime excogitatum. pag. 58. *Stertejam* non esse tentandam recte
admones. Sic *mulier secutuleja*; nam pro *partumejo ventre* Horatiano ex scrip-
tis *Paetumejum* esse reponendum monui. Tua ad Hygini fabellas adnotata cum
exhibebis, erit mihi pergratum. Modo ne absim, cum huc venies. Vale,
vir eruditissime. xx. Febr. cicioclxvii.

EPISTOLA CCCXXIV.

THOM. MUNKERUS

Nic. Heinsio.

Hagam.

VEnit ad te pars comentarii mei Hyginiani, vir nobilissime, ut per otium
perlegas, & an publicari dignus sit, inde dijudices. Hyginum ipsum ei
dedi comitem, quo examinares facilius *ἐπανορθώσεις* nostras, & sicubi a vero
aberraverimus, castigares. Id quod summopere a te peto. Laudes esse cense-
bo, non culpas, miniatulas ceras tuas. Ubi evolutum a te libellum intellexero,
veniam, ut de locis nonnullis, quae adhuc me torquent, te consulam. In
Fragm. Trag. videtur legendum *cacabundus* pro *cantabundus*. Non enim can-
tabat, qui itellas numerabat. Pertinet huc illud pag. 55. *Ne in monumentum
meum populus cacatum currat*. Vale, mi patrone. Delphis Bat. Kalend. Mart.
Anni Gregor. cicioclxvii.

EPISTOLA CCCXXV.

THOM. MUNKERUS

Nic. Heinsio.

Hagam.

QUod semper volui apud te videri, virorum puta doctrina insignium in-
primis, vel potius, ut nemo magis, & amans & reverens, de eo ne se-
cus judicare possis, putavi hac mihi epistola satisfaciendum. Quae tua
est humanitas, nobilissime Heinsi, jam ter ad me invisere dignatus es; primum
ante meridiem, quo forte die medicamentum catharticum sumseram; dein
advesperascente jam coelo; tertium heri, idque denuo horis matutinis. De
prima vice ut expurgem me, quod non id egerim, quod humanitatem decet,
nihil opus esse arbitror. Quod secunda non obtulerim coenulam & domum
meam ad pernoctandum, imputes rogo pudori meo, qui tametsi non utilis
ἀνδρὶ πενιχρῶ, mihi tamen admodum familiaris est. *Boschio* nostro cum postri-
die, quid mihi accidisset, non parum sollicitus narrarem, non aëgre laturum
te fuisse censebat, si familiariter ad coenam invitasssem. Cum regererem,
quis ego sum? tamen, aiebat, debuisti facere. Non nosti satis, quam indul-

genter ferat vir ille simplicitatem nostram. Quid quaeris? damnavi vehementer rusticitatem meam, & exinde nihil magis meditari coepi, quam quomodo eam emendarem. Quod heri quo minus fecerim, cum bellissimam nactus essem occasionem, in causa fuit, quod ipse vocatus ab illo eram, cui fidem datam fallere neutiquam audebam, hoc est, *Trompio*, viro consulari, & apud Delphios nostros praecipuae auctoritatis. Quod si ergo in posterum contigerit, quod futurum tua humanitate fretus non despero, ut iterum casulas nostras subieris, tametsi non es nostrae fasciae, audebo tamen offerre prandiolum vel coenulam. Aude hospes contemnere opes. Inveniemus unde saturi fiamus, pullum, ova, & belle erit, ait Arbiter noster. Multus heri sub vesperam fuit mihi cum *Bleiswyckio* nostro, qui te in oculis fert, sermo, quam pauci in his oris essent literatas literas docti, & quemadmodum tu unus hodie tuereris famam Belgarum. Quibus accedebant vota, ut diu viveres, ut & in convivio apud *Trompium*, dictumque illud, volui dicere bibitum, more Hollandico, *Heinsio* feliciter. Petronii illum locum, quem heri tentabam, puto emendandum, *sedeo cogitabundus*. Scriptum forte fuerat, *Cocitabundus*, unde factum deinde *cantabundus*. Raptim, dum nauta exspectat, Delph. Batav. postridie Kalend. Mart. ^PX. CIOIOCLXXVII.

EPISTOLA CCCXXVI.
NIC. HEINSIUS

Thom. Munckero.

Delfos.

DE prandio non oblato, cum proxime te domi compellabam, cur operosum excusares in modum, nihil profecto rationis erat, Munckere praestantissime. Nam quod domum revocarer Amplissimo quoque *Bleisvicio*, comiter jam ante invitanti, me convivam negaram. Auguror fore aliquando, ut in secessu Vianensi ad me invisas, quando dies plusculos una jucunde comburemus. Ad Hygini fabulas, quae annotata abs te sunt, mirificum in modum mihi placuerunt omnia, de quibus singulatim coram. Die enim Saturni proximo, si licebit per tempestates, ad vos excurram postmeridianis horis. Quando te vacare a negotiis Scholasticis opinor, nisi tu eo die huc tibi excurrendum proposuisti. Locus Petronianus mutilatus videtur, quem sic constituebam. *Homo meus coepit ad stellas verba facere; sed & ego eo cantabundus*. cantabant enim ut plurimi viatores. apud Maronem

Cantantes ut eamus, ego hoc te fasce levabo.

ad stellas verba facere habes & apud Nasonem in Fastis

ad stellas aliquis talia verba facit.

Vale & me ama, IV. Mart. CIOIOCLXXVII.

EPISTOLA CCCXXVII.
NIC. HEINSIUS*Thom. Munckero.**Delfos.*

Locum Petronii de *aedícula* sic capiebam, tanquam in transitu eam obiter inspexissent, ut pote valvis apertis: Ceterum quod ab atriensi perducerentur in triclinium, non licuisse illis omnia *ad aciam* considerare, quod sequitur. Atque inde factum, ut quidem viderint lares in ea expositos, & Veneris signum marmoreum, & pyxidem auream, sed non licuisse picturas ibidem in pariete expressas usurpare oculis; quapropter ex atriensi quaesiverunt, quanam illae essent. Diem Saturni vobis feriatum esse autumabam, qua in re quia falsus sum, constitui Dominico die a prandio tibi adesse. Tum enim Roterodamo quo nunc vocor, transibo vestram per civitatem. 5. Mart. CIOIOCLXXVII.

EPISTOLA CCCXXVIII.
THOM. MUNCKERUS*Nic. Heinsio.**Hagum.*

Credo equidem nihil excusationis super ea re fuisse apud te necessarium, vir illustris: attamen quia conscientiam tuam non minus quam meam, timeo, supervacuo hoc timori dedisse me puta. Feriae nostrae hebdomadales tametsi in Lunae & Veneris dies incidunt, vacare tamen die Saturni potero amicis ab hora quinta pomeridiana. Impetrem siue a facilitate tua, ut unam apud nos, quo defaecato animo possimus *συμφιλολογεῖν*, maneas noctem. Noctem non amplius unam oro. Praebebimus cubiculum remotum ab omni strepitu. Quae in Hyginum nostrum, a doctissimo Juvene *Jacobo Perizonio* annotata heri peropportune ad me perlata sunt, facere non potui, quin tecum communicarem. Nec dubito, quin tibi, ut valde erudita, non parum placitura sint, sicut tua mihi insigniter arrisit Petroniana emendatio. Offendit me semper illud *ad stellas facere*, quanquam quid inde exsculperem, frustra invenire laboraverim. Caeterum de illo, *quas in aedícula picturas haberet*, incidit mihi dubium, quod quomodo solvas exspecto. Dixerat modo quid in aedícula vidisset, Lares argenteos, Veneris signum, pyxidem auream. Quomodo ergo non vidit picturas, & quae essent, inquit? Vale multum, vir illustris. Delphis Batav. a. d. III. Nonas Martias Anni CIOIOCLXXVII.

EPISTOLA CCCXXIX.

THOM. MUNCKERUS

*Nic. Heinsio.**Hagam.*

T*Heodoram Osterviciam*, illam jucundissimam mihi per annos septem vitae sociam, ex vitae hujus statione evocare visum heri summo imperatori. Ut in flore ipso esset aetatis, ut summa concordia cum marito ageret, ut nemini unquam faceret volens injuriam, tamen abiit. Abiit innocentissima anima, & me miserum, cujus vita ex illa semper pependit, reliquit heic incredibiliter moerentem. Si de pago essem, astra clamarem crudelia, orcum immiserabilem, Paream ferream, quaeque praeterea dolor aegris mentibus verba suppeditat, ea cuncta non immerito effundere videri possem. Nunc homini melioribus sacris initiato non idem jus. Parere nostrum est, nec exigere velle ab eo facti rationem, a quo, ut bonitatis fonte, nisi bonum, derivari nihil potest. Quod possum unum praestare defunctae, eo defungar proximo die Martis, quo iusta ei exequiarum molior. τὸ γὰρ γέγρας ἐς τὸ θανάτων. ei officio nostro, quod pietati debemus, si interesse & tu, vir illustris, dignatus fueris, rem feceris, ut mihi longe gratissimam, ita a caetera comitate tua forte non admodum alienam. Cum longe ab omnibus ferme cognatis remotus sum, quod amicos & bene notos in eorum adsciscam locum, qui mihi vitio vortat, non arbitror fore quenquam. Nec tu, mi patrone, id te rogari aegre feres, quod ut ego simpliciter a te peto, ita tu jure mihi neges. Vale multum, mi Patrone, & vive memor nostri. *Sic fati nunquam te dolor exanimet.* Scripsi Delphis Batav. a. d. iv. Kal. Jun. Anno C. cicciclxxvii.

EPISTOLA CCCXXX.

NIC. HEINSIUS

*Thom. Munckero.**Delfos.*

LAudo consilium tuum, quod differri mavis in ver proximum editionem Mythologorum a nostris Typographis sub id tempus inchoandam, quam exteris, & illotis manibus opus eximium permittere. Pensabit hanc moram, uti auguror, editionis nitor concinnitasque. Albericum utinam a *Vossio* consequaris. Is litem, qua multum distrahebatur in Britannia, jam majori ex parte profligavit. De Lactantio pudet equidem me tam diu expectationem tuam frustrari. Sed Vianam excursurus propediem, videbo, si libellus in armariis mei indagari possit. Vale. Hagae Comitum xxi i. Junii cicciclxxvii.

EPISTOLA CCCXXXI.

THOM. MUNCKERUS

*Nic. Heinsio.**Hagam.*

NON vanae redeat sanguis imagini, ut multum torqueam miserum spiritum, mi Patrone. "ΑΥΟΣ illa via, quae serius ocyus omnibus calcanda. Nec ipsa, si quid nostri manes sentiunt, ut erat mei amantissima, lacrymis me & luctu confici libenter vident. Quo magis id, ad quod tam amice me hortaris, agere studeo, hoc est, doloris mei a literulis nostris solatii nonnihil interdum peto. Etiam amicorum alloquia, praesertim tua, qui comitati benignitatisque factus es totus, paulatim, quae adhuc residuae, animi nebulas dispellunt. Quod tam lenta sit typographi illius opera, etsi perquam aegre fero, exspectare tamen proximum ver, quam committere *Hogenhusio* scripta mea, satius puto. Videbo interim, si nancisci possim Albericum illum, quem edito longe auctiorem adservari in *Vossii* bibliotheca audio. Si vera est fama, quae invilire proximis feriis ad eum ait Cl. *Lamoinium*, forsan impetrabilis ille mihi foret orator. Scripsi ea de re heri ad Cl. *Spanhemium* virum humanissimum, & mei etiam amantem. De *Lactantio* quod pridem promissisti, ejus rogo ne obliviscaris, ubi ad libros aliquando redieris. Sed *Fulgentii* non alibi noiti alios exstare codices, qui cum editis conferri mereantur? optarem equidem; & esset operae pretium. Quod tam aegre se tecum conciliare salutem scribis, ex animo doleo, qui probe sciam, quantum facturae essent damni politiores literae, si quid tibi accideret. Meliora auguror, & immortale numen, ut longam tibi & laetam largiatur senectutem, supplex adoro. Vale multum. Dabam Delphis Batav. postridie Kalendas Quinctiles Anno C. CIOIOCLXXVII.

EPISTOLA CCCXXXII.

THOM. MUNCKERUS

*Nic. Heinsio.**Hagam.*

IN Hyginianis commentariis ut non segnem esse videas operam meam, Specimen ecce tibi alterum, mi Patrone, quod rogo ex consuetudine tua & legas & emendes, quo melius ad me redeat. Mereri nugas nostras, ut publicentur, si judicaveris, valde velim, ut typographum, ne fidem forte mihi fallat, hortere ad audendum. Fatebor tibi pusillanimitatem meam. refrigeror non parum, & pigrior reddor ad absolvendum, quae affecta habeo, dum vereor identidem, ut dictis maneat homo meus. Quo enim aerumnosa ista lucubratio, si ea scribam, quae nemo sit lecturus? Quae restant in paucis diebus mittam, ubi typographi intellexero operam nobis non defuturam. Incendimur ad studia gloria. eam si sperare non licet, nec laborare tanta contentione

tione libet. Neque non, quod agam, satis habeo, etiamsi non conscribillem chartas nihil profuturas. Quos utendos nobis dederas libellos, ut ad te redirent, fasciculo addidi. Gratias eo nomine benignitati tuae memini gratissimas. Spero me brevi easdem habiturum. Hyginiani illius Astronomici, quod ab amico oblatum tibi ajebas, videndi valde sum cupidus. Quod si ad manum tibi est, committas quaeso nautae huic ad me deferendum. Vale multum, vir magne, & tueri nos perge. Delphis Batav. Prid. Nonas Octobres Anno C. CIOIOCLXXVII.

E P I S T O L A CCCXXXIII.

T H O M . M U N C K E R U S

Nic. Heinsio.

Hagam.

Q Uem videre me voluisti codicem, vir illustris, cum ut conferre cum aliis coepi, comperi per omnia facere cum editione Sanctandreana. Sed nimium profecto credulus fuit Soteri, quicunque tandem ille fuit, qui veterum astronomica ex illa officina in publicum emisit. Quamvis enim quibusdam in locis scopum ferierit ille Soter, plura tamen sunt, quae vel licenter & absque necessitate immutavit, vel plane corripuit. Ad hoc nonnulla hic illic ita video ab eo repraesentari, ut ea in nov-antiquis suis restituit *Modius*. Quid dicemus? ignoravit hoc *Modius*, an dissimulavit? Interim gaudeo me deprehendisse, unde orta sit, quam in Sanctandreana mirabar ante hac, illa tam audax, ne temeraria dicam, tot locorum castigatio. Caeterum pro eo, quod lib. 11. cap. 20. exhibent plerique libri, *ideo quod ortum severit ante*. Soter & Sanctandreana habent, *ideo quod hortum severit ante*. Veneta Annis 485. & *to ortum severit ante*. Puto legendum, *ideo quod tostum severint ante*. vel, *quod id Ino tostum severit*. Fabulam habes cap. 2. Mythol. Quod si acerrimo iudicio tuo emendationem istam probavero, fecisse mihi vel hoc uno nomine operae pretium videbor evolvendo istam tam misere a Sotere interpolatam editionem. Vale multum, vir magne, & diu vive. Delphis Batav. 2. d. XVI. Kalend. Novembr. Anni CIOIOCLXXVII.

E P I S T O L A CCCXXXIV.

N I C . H E I N S I U S

Thom. Munckero.

Delfos.

I N Hygini Astronomicis, *quod id Ino tostum severit*, abs te restitutum impense placet. Soteris editio quando non respondet expectationi tuae, velim alia conferre usui majori futura. Morellianam certe editionem Vianae habeo in promptu, donec alia illa offeratur, quam cum codicibus Gallicanis *Janus Vlitius* commisit. Tuas in Hygini Mythologica observationes, omni fruge

fruge eruditionis cumulas jam majori ex parte perlegi ad te redituras prope-
diem. ad Fab. 126. in Sulpiciae versu a te producto scribendum est,

Fabellam permitte mihi detexere pacis.

non *paucis*, quod ex contextu satyrae in subsequen-
tibus verum esse plenius, puto, apparebit. *Iis*, inquit, *numeris*, quibus heroas & arma celebras, per-
mitte mihi pacis fabellam detexere, in quam porro tota satyra invehitur. fab. cxxx. pro *genus suavitatis*, videtur castigandum *genus suave vitis*. fab. cxii. *in hospitio cognito discesserunt*. scribebam, *hi hospitio*, alterum manifeste falsum est, nec satis Latinum. fab. civ. legendum omnino, *Simulacrum cereum*, quod Naso adstruit non uno loco Epistola Laodamiae. fab. 139. pro *adamantera* uti-
corrigendum. *Amalthea*. Fabulam omnem Naso Fast. iv. si bene memini, co-
piose praequitur. De ceteris coram. Vale. cicioclxvii. 17. Octobr.

EPISTOLA CCCXXXV.

THOM. MUNCKERUS

Nic. Heinsio.

Hagam.

Plusculum auribus nostris dederunt nuperrimae literae tuae, vir illustris.
Nisi aliter amicos scirem, aliter Aristarchos censere, nae tu fecisses, ut ego
& me esse aliquem putarem. Sed haec est unica illa comitas tua, qua exacu-
ere amas tyronum diligentiam. Habes jam heic, quod perficiendis commen-
tariis nostris restabat. Quod, si caetera non invitatus perlegisti, nullus dubito,
quin adhuc & hoc *λεΐψανον* facile idem sit a te impetraturum. nunc accingor ani-
madversionibus in Fulgentii Mythologias describendis. Prodiisse eum libel-
lum anno 1521. cum *Jacobi Locheri* commentariis narrat in Bibliotheca sua
Gesnerus. Sed nusquam reperti haecenus a me illi commentarii, ut nec Bap-
tistae Pii in eundem Fulgentium annotationes. Adjunxi fasciculo, quem com-
modaveras nobis, Hygini codicem. Majus fecit operae pretium cum editis
contendendo editionem Venetam anni 1485. ut ex ungue, quod ajunt, vi-
deas leonem. Lib. ii. cap. 3. legendum ex illa, *Nonnulli etiam dixerunt*. ubi
perperam *enim* pro *etiam* substituerunt, & quasi quaedam desiderarentur, locum
signarunt asterisco. Etsi non multa mihi de illis, quos dixi, Fulgentii edito-
ribus, promitto, vidisse tamen valde vellem. Quo circa, si forte quadam in
eos incideris, nostri rogo memor sis. Aratum & Historiae poeticae scriptores,
ut & Apollodorum jam nactus sum, & nactus me gaudeo. Vale multum, &
tueri nos perge, si merebimur. Delphis Batav. a. d. vii. Idus Novembres
Anni cicioclxvii.

Nic. Heinſio.

Hagam.

Gratias ago quidem, ut debeo, quas possum maximas, sed majores multo Gadhuc habeo, quod tam benigne dedisti nobis operam in exigendis Hyginianis nostris, Heinſi nobilissime. Jam describere coepi, ut significabam in ultimis meis, quae ad Fulgentium illum Planciadem observavi. Interim avide exspectabo, si quid e Saxonibus forte veniat vel Britannis, quo ornatiora nostra fieri possint & orbi literato acceptiora. De emendationibus tuis judicare ipse nosti non esse meum, cum quicquid a te, hoc est, viro undequaque doctissimo & acerrimi judicii excogitetur, non possit non placere mihi summo opere. Est ergo ita, ut scribis, tota ista satyra invehi in pacem Domitianam Sulpiciam. Quamobrem *to pacis ei restitui aptissime negaturum opinor neminem.* Illud porro *genus suavitatis* cap. 130. ideo mutare non sustinui, quod & cap. 174. rursus exhibeatur, *significantes suavitatem invenisse, ἀντὶ δ, suavem vini potum.* Sed & isthic *suavem vitem* levi mutatione corrigere licet, ut in altero illo loco *genus suave vitis*, quemadmodum acute a te emendatum est. Jam illa *cereum, Amalthea, hi hospitio cognito, ἀναμφοισβύτητα* sunt & aperta. Sed doce me, ubi vacas, quid tibi velint illa cap. 134. *Quisquis se praecipitaverat in Delphini effigiem transfiguratus est, unde Delphini Tyrrheni sunt appellati &c.* Non memini usquam legisse Tyrrhenos esse dictos Delphinos. An scribendum? unde *vicini Tyrrheni sunt appellati, & mare Tyrrhenum est dictum.* Sed ita si scriptum fuit, stulta glossemata videri illa possint. Neque enim a nautis illis Tyrrheni vel mare Tyrrhenum dictum est. In Fulgentio non segniorem fuisse, quam in Hygino operam nostram, judicaturum te spero, ubi inspexeris. Quod ut brevi fiat, quantum potest, allaborabo sedulo. Aut ego multum fallor, aut mihi met ipse blandior, aut tu inter Fulgentii vindices non infimum mereri me locum censebis. Inter alios scriptores, quos in transcurso emendamus, est etiam Macrobius lib. 1.1. Sat. cap. 17. ubi de Saliis agit. *Optime, inquit, mehercule, fecisti Herculis mentionem, in cujus sacra hic vester gemino errore commisit.* Ita omnes editiones, etiam ultima illa Cl. Gronovii. Quid illud in heic agat? Faceſſat protinus, & sensus erit venustissimus Latinissimusque. *Committere sacra* dixit, ut *committere ludos* Virgilius, *committere judicium* Cicero, *committere agonem* Cyprianus 11. ep. 6. Facere autem poeta ipse dicitur eleganter, quod alios facientes inducit. Opto te semper bene valere, nobilissime humanissimeque virorum. Dabam raptim Delphis Bat. a. d. xiv. Kalend. Decemb. Anno c1c1oCLXXVII.

EPISTOLA CCCXXXVII.

NIC. HEINSIUS

Thom. Munckero.

Delfos.

Quid responsi dederit *Koffius* de Alberico, manus haec ejus te docebit, vir praestantissime. Reliquum nunc est, si tanti rem putas, apud *Tollium* indagare, quid scriniis fratris sui *Cornelii* sit factum. Cum *Daumio* de Fulgentii editionibus, agam cis paucos dies: hoc die enim litteras ab illo accepi, ad quas propediem erit rescribendum. De meis ad Sulpiciae satyram & Hygini Mythologica conjecturis benigne nimis judicas, quo es erga me adfectu. Erant complura, de quibus agerem, si commodius valerem. Nunc jaceo totus corpore animoque. fab. CLXXIV. *significantes suavitatem invenisse*. festinans librarius videtur conturbasse ac lucrifecisse ut saepe alias, syllabas cognatas, ut ab Hygino relictum videri possit *suavitatem vini invenisse*. Sed liber nunc non est ad manum. *vini & inveni*, in *invenisse*, non multum inter se differunt: sic in fragmento Traguriano, *Rogamus anus nocturnas*, ut *suis se sedibus teneant*, ubi vulgo *anus & sedibus* sunt omissa. fab. CXXXIV. unde *Delphini Tyrrheni*, sic capiebam, ex illa transfiguratione nautarum Delphinos, qui in mari Tyrrheno sunt frequentes, origines ducere. Locum Macrobiani pulchre & feliciter sanasti. Vale, mi Munckere. Hagae Comitum CIOIOCLXXVII. 20. Novemb.

EPISTOLA CCCXXXVIII.

THOM. MUNCKERUS

Nic. Heinsio.

Hagam.

Quod argumentum non leve suppeditare mihi visus sit, quo Fragmenti Traguriani antiquitas ostendatur, operae pretium duxi locum illum Isidori, cujus mentionem nunc nuper apud te faciebam, subjicere oculis tuis. Invenitur Orig. lib. XVI. cap. 19. *Corinthium est omnium commixtio metallorum: quod casus primum miscuit, Corinthio, cum caperetur, incensa. Nam dum hanc civitatem Hannibal cepisset, omnes statuas aeneas & aureas & argenteas in unum rogam congeffit, & eas incendit. Ita ex hac commixtione fabri sustulerunt, & fecerunt parapsides. Sic Corinthia nata sunt ex omnibus in unum, nec hoc nec illud. Proverbii illius, fundos habet qua milvi volant, originem narrat Juvenal. Schol. ad Sat. I. vers. 109. ubi de Licinio agit: decessit sub Tiberio, proinde dives, quod Cassii opes etiam exhausisset: & dictus est babuisse nummos quantum milvi volant. Haec ille. Dignus & hic locus erat, ut tibi mitteretur, si forte in eum nondum incidisses. Castigandus interim est, & pro nummos & Cassii cum Pithoeo emendandum *fundos & Crassi*: Apud eundem interpretem ad Sat. VI. vers. 478. repperi *τὸ λorus*, itidem, ut apud Petronium, ἀποεινῶς usurpatum. *Scutica*)*

tica) lorus latus, corium non confectum. Nosti τὸ *facere* usurpare Petronium pro coquere & parare in coenam. Video & ποιῆν eo significatu usos fuisse τὰς ὁ. Genes. xviii. 7. ἡ ἔλαβεν ἀπαλὸν μοχάριον ἡ καλὸν, ἡ ἔδωκε τῷ παιδί, ἡ ἐτάχυνε ἡ ποιῆσαι αὐτό. De Trimalchionis apophoretis cum omnia, quae observasti, valde me delectarunt, tum mirifice illud de *beta*. Quo pertinent ista Isidori lib. xvii. cap. 10. *Beta apud nos oleris, apud Graecos litera est.* Corrige *olus*, vel *oleris species*, sive *genus*. Etsi barbarus est scriptor ille Isidorus, docuit me tamen non nulla, quae nescire nollem: tanquam illud, quod legitur lib. xvii. cap. 4. *Ervmum a Graeco trahitur vocabulum.* Hoc enim illi ἔρβον (leg. ἔρβορον) appellant. quod cum sit quibusdam pecoribus infestum, tauros tamen pingues efficit. Quibus verbis non parum id confirmatur, quod apud Virgil. *taurus in ervo* legendum esse pridem me docuisti. Sed quid ago? Ἀθῆνας γλαῦκα, quod ajunt. Si tamen non omnino ingratum fuit tibi hoc schedium, rogo & tu mihi tuum illud mittas. in quo nonnulla ad Hygini nostri emendationem facientia annotasti. Volebam tollere manum de tabula, cum de *apris gausapatis* venit mihi in mentem aliquid, quod etsi ridiculum tibi videbitur, scribam tamen. Venit ergo in mentem, forte *gausapatos* dictos, quod crusta referente *gausapam* circumdati a pistore fuerint. & illa *opera pistoria* auferendi casu esse accipienda, quam *artem pistoriam* vocat vulgatus interpres Genes. x. vers. 17. Vale multum, vir illustris, & nobis bene, quod facis, velle perge. Delph. Bat. vi. Id. Decembr. Anni cicioclxvii.

EPISTOLA CCCXXXIX.

NIC. HEINSIUS

Thom. Munckero.

Delfos.

PRO loco Isidori egregio plane gratias, uti par est, peringentes tibi ago, Munckere praestantissime. Mirus profecto stupor viri illius, cetera non indocti, fuit, mira rei historicae imperitia, quod pro Mummio Achaico Hannibalem nobis supposuit, antiquarium Trimalchionem secutus. *Qua milvi volant* bene in fragmento Traguriano se habere nunc opinor, habita ratione eorum, quae tu partim suggessisti, partim & meo Marte in adversariis annotaram, in quibus & locum Scholiastae Juvenalis, quem tu proxime subindicabas, invenio. *Crassus* tamen pro *Cassio* an supponi illic debeat, dubitari potest. Videri potest Licinius iste Cassii bona post proscriptionem involasse. τὸ *lorus* etiam apud Apulejum occurrit, ni fallor, & Labbaei Glossas non semel. De sorte illa convivali apophoretorum saepe ambigua & jocosa habes in Suetonii Augusto: sed Trimalchio nimis quam ineptus est in iis, ut in omnibus. De *ervo* tauris utili, rem Isidorus hausit ex rei rusticae scriptoribus. *Opera pistoria* apud Suetonium quoque occurrunt & in Glossis antiquis. Festus. *lucunter, genus operis pistorii.* Sic *dulciarium opus* & *opus lactarium* in Spartiani Heliogabalo. Ad Hyginum quae annotabam, etsi tanti non erant, quia flagi-
tas

tas tamen, ecce tibi. Piget in his tantillis morari. *Franciscum Junium* ad plures abiisse e Britannii nunciant. Ego post biduum triduumve, bruma jam remittente, Vianam cogito. Vale, vir amicissime. Hagae Com. *CICIDCLXXVII. XII. Decemb.*

EPISTOLA CCCXL.

THOM. MUNCKERUS

Nic. Heinsio.

Vianam.

PRO notulis tuis in Hyginum nostrum gratias tibi ut debeo, vir magne, ita memini immortales. Sed persuasissimum, opinor, pridem hoc habes, qui alioqui toties tam munis (agnoscis Lipsii veneres) in me prorsus immunem neutiquam fuisses. Habet nunc te tandem aliquando tamdiu ille desideratus secessus, sed utinam laetum & validum! opto id equidem ex animo, & spero etiam, tametsi timide, cum turbidum hoc coelum invalidis corpusculis, quale tuum est, non valde videatur amicum. Nisi nauta mihi imposuit, instat jam tempus illud, quo revisere Hagam constitueras, sanequam avide exspectat adventum tuum Fulgentius meus, in quo perpurgando immane quantum laboris exhausti, nunc Lactantio manum admoveere coepi, & contendere inter se *Reinesii* & *Gisellini* editiones. De *Gisellino*, multo plus mihi promiseram, quam praestitum ab eo comperi. Quippe in ipso propemodum limine, hoc est, ad libri quarti initium substitit, diffusus, ut ipse fatetur, probitati librorum suorum. Quo magis tua ex antiquo codice excerpta videre desidero. Mereretur profecto ille scriptor, ut purior, quam hactenus, in manus hominum veniat. Sed sperare id vix licet, nisi tua ope fuerit adjutus. *Boschius* noster sperare me jussit ex Bibliotheca *Menzonidae* Hygini Astronomicon cum antiquis MSS. collatum. Otium modo & vitam non nimium brevem obtineam a Deo meo, edam & illud aliquando cum Scholiaste Germanici. Placuisse tibi locum ex *Isidoro* de aeris Corinthii origine, est quod impense gaudeam. Insignis profecto heic ejus, non indocti alioquin hominis nec inepti, fuit incogitantia, quod in re tam aperta sequi maluit unum delirantem Trimalchionem, quam tot certos historicos. Mirum, ni hoc quoque, quod lib. xx. cap. 3. scribit, *Nam mus terra est, unde & humus*, hausit ex male intellecto loco *Petronii*, *mus, imo terrae tuber*. Praeterea, ut *corneolum* *Petronius* hominem solido & bene compacto corpore dixit, ita ille lib. xvi. cap. 3. *cornea corpora nauticorum*. In eodem Fragmento (pag. 36. Ed. Blaw.) *nihil sine ratione facto* legitur. An *ro facto* in *facio* recte mutarint, nonnihil addubito. *Scripto* sane & *lecto* dixit *Horatius*, *Festus* in *nare*. *Natare igitur est saepius nare, ut dubitare, factitare*. Leidenensis Bibliothecae membranae, quibus ad tempus usus sum, *dictare, factare*. Quam puto genuinam esse lectionem. Admonet me *Festus* alterius loci *Petroniani*, qui pag. 33. legitur. *Timeo, ne jam concepta sint*, hoc est, pullum conceperint, in pullum coierint, Putes ad eundem modum *conceptam alvum* dixisse *Festum*

in Egeriae. Quod eam, inquit, putabant facile conceptam alvum egerere. Sed Leid. cod. habet alvo. Unde suspicor scripsisse, conceptum alvo egerere. Sic alvo ejicere dixit in *Exterraneus*; *Scriptas* idem vocatas ait mulieres nugatorias & despicendas. Videtur mihi idem vocabulum restituendum Petronio, & legendum, non pluris eam facies, quam scriptam, ἀντὶ & sportam, quod editiones praeferunt. Sed de eo tu, mi Patrone, videris, qui unus intelligis Petronium. Vale multum. Scribebam Delphis Batav. a. d. xii. Kalend. Februarias Anni cicioclxviii. qui ut tibi feliciter decurrat, deum immortalem veneror.

E P I S T O L A CCCXLI.

N I C. H E I N S I U S

*Thom. Munckero.**Delfos.*

VIX tandem, post continua valetudinis infirmæ avocamenta bibliothecam excutere datum est, non quidem omnem, majori tamen ex parte. Quapropter promissi reus nunc mitto Astronomica Hygini cum quatuor scriptis codicibus Lutetiae a *Jano Vlitio* olim collata, quorum tres Petaviani, quartus Regiae bibliothecae. Aldinam editionem si non vidisti, & hanc libens suppeditabo: Addidi & fabulas Hygini, quae studiis meis olim inservierunt, quamvis non magnae rei, si quid fortassis inde ornamenti editio tua mutuari possit, quod perexiguum aut nullum potius fore praevideo. Habes & *Laetantium*, seu quicumque est, qui argumenta fabulis *Metamorphoseon* *Nasonianarum* addidit, collatum cum pervetusto codice Florentino. De vetustis ejusdem editionibus quod sperare te jusseram, nunc falsum me fuisse video. Sola enim haec, quam mitto, argumenta fabularum exhibet, cum tres quatorve hac vetustiores operum *Nasonis* editiones ea non agnoscant, aliter ac eram opinatus. Ante *Majas Kalendas* *Thermas Germanicas* sum aditurus, ut valetudini consulam, tu interea utere, ut lubet, his libris. A *Cl. Daumio* parum opis exspectandum *Fulgentio* e *Barthianis Schedis* invitus audio. E quibus haec mittit excerpta ad paginas editionis *Comelianae*. Ob ea, quae ad *Petronium* proxime annotabas, plurimum te amo, quae meis animadversis ingens ornamentum accedent. *Paterculum* typis suis nuper descripsit *Elzevirius*, cui notas breves addidi, quae tamen quando lucem sint aspecturae haud satis scio, quod subitanea *Elzevirii* in *Britannias* profectio opellam hanc abruperit. Vale, vir praestantissime. Vianae ad *Leccam* cicioclxviii. prid. Kal. April. Gregor.

EPISTOLA CCCXLII.

THOM. MUNCKERUS

Nic. Heinsio.

Vianam.

ERgo evenit hoc, quod de valetudine tua metuebam ego, vir illustris? Nimium inique, si dicere fas est, comparatum est cum rebus humanis. Valido & vegeto sunt corpore inutilia terrae pondera, quae nata, ut essent, crederes: viri sapientes & ornamenta aevi sui cum morbis & doloribus tantum non perpetuo conflictantur. Vix adeptus plenum robur suum animus est, cum languescit illico corpus. Abstinentum tamen ab istis querelis, ne quis coelum, ut sapere videamur, vituperare nos forte dicat. Quos studiis nostris suppetidasti libros, praestantissimi sunt profecto, & auro contra non cari. Lactantium longe alia exhibet facie Florentinus ille codex cum vulgatis a te commissus, ut & vetus Nasonis editio, comes ei data. Imo, nisi multum fallor, expressa ista ex codice illo eximio; adeo in omnibus conspirant. Nisi tu nevis, mi patrone, τὸ κείμενον, quod textum vulgo vocamus, ex illa editione describi faciam, & sicubi in minutiis quibusdam variet, ex tuis excerptis emendabo. Quaeso te, de proposito hoc nostro quid sentias, & ubi excusus sit liber iste (est enim, ut nosti, ἀκέφαλος) reddas nos certiores. Quod de notulis nostris mentionem facis, etiam id animum tuum indicat, homini huic praeter omne ejus meritum insigniter faventem. Memini scripsisse me aliquid de *ovis conceptis* apud Petronium, & quaesisse ea occasione τὸ *conceptum* an alibi active reperiatur. Inveni postilla in Maronis culice, *Foemineum concepta decus*. Sed locus is an menda omni vacet, non meum est judicare, sed tuum. Dubito nonnihil, an miserim tunc temporis locum insignem & plane mirificum, qui est apud Tertull. libr. ad Scapulam cap. 4. *Sathanam in omni aversatione & aspernatione & detestatione pronuncias*. Idem alterum hunc, etsi non tanti momenti, non spernendum tamen, ejusdem libri cap. 6. *Cujus es totus, qui tibi omnia est*. Pro Barthianis conjecturis gratias cum Cl. Daumio, tum etiam tibi memini longe gratissimas. Meliores sunt, quam pleraeque illarum, quae in ejus libris publicatae sunt. Sed in prooemio *Melos quoddam carminis expectorabat*, non valde arridet; cum *expectorare* veteres pro pellere & abigere ex pectore usurparint. Certe *expectabat* praeferam. Sed verbum id non puto ferendum in Petron. cap. xvii. *Attoniti expectavimus lacrymas ad ostentationem doloris paratas*. lego, *adspectavimus*, fleverat enim jamdiu ista nequissima. lib. i. cap. 18. *Mercicurium* elegans est. cap. 25. *amabilissimus auctor* probarem protinus, si certum esset, de Teio loqui illum Anacreonte. Sed non unus eo nomine celebratur a veteribus. lib. ii. cap. 6. *Improvissibilis latro* probo. Etsi non ignoro *impossibilem* pro impotente, & *impossibilitatem* poni pro impotentia apud hoc genus scriptores. lib. ii. cap. 15. *In femore insuit*, cum pridem & mihi in mentem venisset, inveni postea idem quoque in margine libri Tolliani.

lib.

lib. 111. cap. 9. *Aliena sulcando sua utilius pascunt.* Vehementer placet. Visum ab Isidoro Fragmentum Tragurianum, nullus, opinor, dubitas amplius. Facit ad hoc probandum forte etiam illud lib. vi. Orig. cap. 5. *Romae primus librorum copiam advexit Aemilius Paulus.* Tametsi ita etiam Obsequens cap. 43. *Ne unquam Romae reverteretur;* & quod ex veteribus hausisse videtur Charisius Gram. lib. 11. *domi venit.* Gregorius Dialog. lib. 111. cap. 4. *Corinthe devenit.* cap. 6. *Appiae carpebat iter.* Sed ibi viam potius intelligit. Soloecissat ergo non solus Trimalchio, cum dixit, *Capuae exierat.* Sed quando in publico videbimus Trimalchionis coenam, tuis commentariis tam luculenter illustratam? dici vix potest, quam avide ab omnibus, quibus hae deliciae cordi, expectetur. Vale multum & diu vive feliciter, decus unicum literarum. Scribebam Delphis Batav. postrid. Nonas Apriles Anni C1010CLXXVIII.

E P I S T O L A CCCXLIII.
N I C. H E I N S I U S

Thom. Munckero.

Delfos.

Litteras tuas quo frequentiores hoc acceptiores ad me perferri, non est quod Labs te dubitetur, cum semper emolumenti ac profectus nonnihil studiis meis inde accedat. Nam quod iis rescribo quandoque tardius, tota valetudinis culpa est, quae nolenti ut plurimum imperat, ac officiis praestandis ut desim, facit. Lactantium, sive quicumque is est, qui argumentis jam olim fabulas Metamorphoseon Nasonianas illustravit, non ingratum tibi venisse est sane, cur impense gaudeam. Quamquam metuo, ut manum meam in iis, quae mihi soli scripseras, satis assequaris. De editione ejus libelli statues pro arbitrio. Ipsarum Metamorphoseon cum inter numero propemodum infinitos, quos oculis meis usurpare contigit, in pulvere veterum bibliothecarum, codices nullum viderim hoc S. Marti Florentino exemplari praestantiorum, de argumentis, quae in membranis recentioris notae foedum in modum sunt interpolata, quamquam in plerisque codicibus scriptis Nasoniani operis desiderantur, facile per te judicabis. Vidi in Bibliotheca Magni Ducis Laurentiniana haec argumenta in codice chartaceo seorsim descripta sine Nasoniano poemate, cum hoc titulo, *Donati breviatio fabularum Ovidii.* Typis descriptam editionem Venetiis opinor esse procuratam Anno MCCCCLXXXVI. quod alicubi in ipso codice a typographo designatum invenies. *Ova concepta* apud Petronium interpretabar pro pullis in ovo conceptis, ut foetum in utero materno conceptum apud alios scriptores. Codex Maronianus foedissime depravatus est etiam in antiquissimis membranis, quominus editis in publicum ejus exemplaribus credendum. Vale Vianae xvi. April. C1010CLXXVIII.

EPISTOLA CCCXLIV.

THOM. MUNCKERUS

*Nic. Heinsio.**Vianam.*

DE Lactantiano exemplari quae docuisti me proxime, ingratiſſimus merito dicar, ſi non protinus, quam mihi grata acciderint, ad te reſcribam, vir illuſtris: tametſi vereri interdum ſubit, ne crebra iſta interpellatione impudentiae incurram crimen, vel ex ruſticis illis eſſe videar, qui verba honoris non intelligunt. Sed tu pro reliqua indulgentia tua ſumma illi, quo te proſequimur, amori, quicquid heic deliquimus, non aegre, ſpero, donabis. Amo te quidem, ut familiarem, ſed eo non minus, ut virum maximum, & ſaeculi huius aeternum decus, ſuſpicio & veneror. Utinam modo diu te nobis, ſed vegetum magis, quam ab aliquo jam tempore, & valentem fata ſervent, quo praeclara illa ingenii tui monumenta, quae in ſcriniis adhuc habes, communicare cum orbe literato tibi liceat. Illorum, quae ad Hyginum congeſſi, brevi ſpecimen me primum ſperare juſſit ex typographia ſua *Lerſius*. Quod ideo ſignificandum tibi putavi, quia id juxta mecum gavifurum nullus dubito. *Boschius* noſter edere parat Phaedri fabellas; in quas ſi nonnulla, quae nunquam antehac ſint vulgata, poſſideas, ea ut ſuppeditare illi velles, rogare me comiter ſuo nomine juſſit. Per valetudinem tuam fieri, quo minus deſcribere haecenus potueris, quae ad coenam Trimalchionis tam docte & eleganter commentatus es, dici haud poteſt, quantopere doleam. Cum hiſce diebus ridiculo illo carmine, quod iudicium coci & piſtoris inſcribitur, me oblectarem, advertit me iſte verſiculus,

Me ſterilem Niobe, linguam Philomela rogat me.

Sed *ſtericula* aliorum non diſplicet in Petronii illo loco, ubi Tragur. Codex exhibet, *ſteriliculam*, quaſi τὸ vulva eſſet intelligendum. In eodem poëmate inveni etiam *coptoplacentas*: Ita enim in illo verſu legendum,

Nos facimus populo ſtudioſi coptoplacentas.

Comptolacentas perperam ediderunt. In Petronianis pridem editis vereor ut ſana ſatis ſint illa cap. 131. *Totoque corpore in amplexum ejus immiſſus non precantis uſque ad ſatietatem oſculis fruor.* Mallem, non deprecantis, vel non recusantis. cap. 86. *Ad hoc votum ephebus ultro ſe admovit, & puto vereri coepit, ne ego obdormiſſem.* Praeferam, *obdormiſcerem.* cum ὑπερσυντελικῶ uti pro imperfecto *Afro-*rum ſit. Tu haec me doces? inquires. *Sus* Minervam? nihil minus, mi patrone. Sed amorem tibi meum, quo ſcriptorem illum proſequor, oſtendo, ſi tute inter alia & eo paulo magis ſtimulare ad tuas in eum animadverſiones publicandas. In Phaedrum conjecturas meas, quas pluſculas *Boscbio* ſuppeditamus, brevi admodum videbis publicatas. Sed poſt tot tantorumque virorum in iſta arena exantlatos labores, nimis improbum fuerit, adhuc inde velle ſperare laureolam aliquam; quam tamen noſtrorum in Hyginum & reliquos My-

Tom. V.

Eee

tho-

thologos commentorum editionem non omnino desperamus. Vale multum, & diu vive feliciter, nobilissime & humanissime Heinſi. Delph. Bat. a. d. v. Idus Majas Anni CIOIOCLXXVII. *Verwejus* ille, qui tertianos heic docebat, vocatus est hinc ad Gaudani Gymnaſii regimen.

E P I S T O L A CCCXLV.

N I C. H E I N S I U S

*Thom. Munckero.**Delfos.*

S Erio tandem cogitare typographum de Hygino tuo in publicum dando, quod narras, vix credas, quanta voluptate me perfuderit hic nuntius. Scrip- tor quod non longe ab initio operis. *Axenum* recenseat inter fluvios, alias, puto, subindicavi locum vacare mendo. Designari enim hoc nomine Euxinum pontum, qui Αἰνῶ, & licentia Poëtica Αἰνῶ olim sit nominatus, ut restan- tur cum alii ex antiquis, tum Naso in Ponticis, *Dictus ab antiquis Axerus ille fuit*. Uti inde liqueat quodammodo haec, ut multa alia, e Graecorum com- mentariis ab Hygino, vel quicunque Mythologiae hujus auctor est habendus, esse deprompta. At quis locus Euxino, inquis, inter fluvios? Certe fluvii no- men latius se extendit apud Graecos Poëtas, quam Latinos. Praesertim cum Euxini aquam marina dulciorem esse, ac proinde gelu facilem in modum con- creſcere veteres observent, compluribus septentrionis fluviiis in eam sese exone- rantibus. Magis mirum utique, quod Hesiodus in Θεογονίᾳ, ὠκεανὸν ποταμὸν dixerit, & Apollonius Rhodius lib. iv. Aegeum mare simili modo Ἀγαίης ἐδάμναρεν ἰσθμὸν ποταμοῦ. *Boschium* nostrum de Phaedro edendo cogitare si rescivissem maturius, poterant nonnulla a me congeri, ornamentum quale- cunque operi latura. Hunc scriptorem cum suis illustraret lucubrationibus Cl. Schefferus, complura suggesti, quae ille annotatis suis majorem partem infe- ruit, nec tamen omnia. De nonnullis certe post profligatam editionem a me monitus, quae cum perscripſissem, negavit eas litteras sibi fuisse traditas. Ut lib. v. Fab. LXXXVI. ubi bis *verum pro verrem* legitur. *Verrem subesse pallio con- tenderent*, &, *pervellit aurem verri, quem celaverat*. Ibidem codex scriptus Pithoei, *multis onerant lancibus, non laudibus*. Quomodo editum oportuit. Mittebant enim munera esculenta spectatores in lancibus aëtori ludorum aut gladiatori, si cui favebant. Vetus Epigramma in Catalectis Martiali adjudicatur a *Scaligero*, cujus initia, *Cum traheret Priscus, traheret certamina Verus*. Habes ejus- modi munera multa a Domitiano, *quod licuit lances donaque saepe dedit*. Sic & in sacris apud Maronem, *lancesque & liba feremus*. Ibidem legendum, *Facturus ludos quidam nobiles*, aut si vulgatum retinemus, ita capiendum *et nobiles*. Ibid. l. c. Pithoei, *Et derisuros non spectaturos sites. lege, jam favor mentes tenet, Ut derisuros non spectaturos scias*. Vale 12. Maji CIOIOCLXXVIII.

— Vide Munckeri notas ad Hygin. pag. 5.

EPISTOLA CCCXLVI.

THOM. MUNCKERUS

Nic. Heinsio.

Vianam.

Vivere tam memorem nostri ut gaudeo vehementer, ita dolet mihi ex animo adhucdum cum iniqua valetudine te conflictari, mi Patrone. Sed dabit, spero, benignum numen huic quoque malo brevi finem. De *Axeno* quae observasti, erudita omnino sunt, ut omnia tua. Gratias pro illis tibi habeo, quas debeo, immortales; nec minores pro donato mihi Velleji tui exemplari: quod perquam avide una cum tribus illis, quae *Wallio* & *Bleiswiciis* destinasti, indies exspecto. Quae in *Phaetro* felicissime restituiſti, ea cum *Boschio* protinus communicavi. Hagensem illum bibliopolam hominem scito esse insignis levitatis, ne quid in eum dicam gravius. Quid enim? novem jam vel decem sunt menses, cum mea opera commentario perpetuo illustratos susceperat excudendos Mythologos, quos inter Principes esse nosti Hyginum & Fulgentium. Illud opus cum per amanuenses describendum illi curassem, & jam jam primum ejus praeli habiturum me sperarem specimen, ecce ibi derepente ille nebulo minutulo typo Graeco destitutam cautatur ejus officinam, cujus opera usus esset; nec adduci posse, ut tantum impensarum faciat. Etsi credo hominem mentiri improbe, vide tamen mihi puerilem temeritatem condicentis, quod an praestare possit, ipse ignorat. Haec ideo apud te queror, Heinsi nobilissime, cum quia ego favere te, etsi praeter omne meritum meum, studiis nostris, habeo persuasissimum, tum etiam quod unus literarum tantum in hac nostra Belgica pater es & Princeps, sed & literatorum patronus unicus. Inter illos tametsi nomen meum cenſeri haud postulo, bonae tamen mentis profiteri cultum non nimis arroganter posse videor. Nec alia mihi mens fuit, cum primum publicare illa, quae ad fabularem historiam illustrandam congeſſeram, te audendi auctore, consilium cepi. Quid nunc das consilii, pater? Typographi illi majorum gentium *Elzevirii* vel *Hackii* ab infimi subſellii magistello vix credent quicquam posse proficiſci, quod aetatem sit laturum, nisi tu istam opinionem ex animis illorum evelleris. Quod occasione data, ubi volente bono deo cum salute redieris in gratiam, facturum te aliquando non despero. Alioqui, si heic nihil fit, ad aliquem ex Germanis, quibus vilior est opera typographica, decurrendum erit. Nam tot vigilatas noctes Vulcano si temere dedero, aequo fortius videri possim ulciſci dolorem meum. Hyginus cap. 134. ubi fabulam de nautis Tyrrhenis narravit, addit tandem: unde *Delphini Tyrrheni* sunt appellati, & mare Tyrrhenum est dictum. *Ryckio* nostro videbatur legendum, unde *Delphini turſiones* sunt appellati. Sed tu istis verbis, ex illa Tyrrhenorum transformatione originem ducere Delphinos, qui in mari Tyrrheno adhuc sunt frequentes, velle illum antehac me docuiſti. At postea apud Senecam Agamem. vers. 451. cum legerem: *Tyrrhenus omni piscis exsultat salo*. h. e. Delphin, suspicari

coepi *Tyrrhenum piscem κατ' ἐξοχὴν* dictum Delphina. Est mihi lis cum *Pertizonio* de loco Servii ad Aen. 111. 466. *Jupiter quondam Hebae filiae tribuit duas columbas humanam vocem edentes* &c. Censet ille errare Servium, & perperam Hebae filiam facere ex Thebe Jovis nutrice, de qua Hyginus cap. 275. Etiam a Silio hanc designari libro 111. extremo, cum canit: *In gremio Thebes geminas sedisse columbas.* quod non nego. Sed in Servio nihil esse mutandum arbitror nisi τὸ *Hebae* in *Thebae*. Thebae enim Aegyptiae secundum quosdam a *Thebe* Jovis filia dictae, ut multis docet Tzetzes ad Lycophron. pag. 180. Ed. Steph. Idem Servius ad ejusdem libri vers. 111. Corybantes *Jasonis* facit filios. quam legisse alibi genealogiam haud memini. Forte corrigendum, *Apollinis* ex Tzetz. in Lycophron. pag. 19. Sed de hoc tu, rogo, per otium attentius cogites, ut & de versiculo, quem ex Seneca modo produxi. Deus te mihi & omnibus bonis per multos adhuc annos conservet. Delphis Batav. a. d. v. Idus Junias Anni CIOIOCLXXVIII.

EPISTOLA CCCXLVII:

THOM. MUNCKERUS

Nic. Heinso.

Vianam.

Utrum tibi pro aureolo Vellejo illo prius, an pro data tam benigne opera, in promovenda editione Mythologorum nostrorum, gratias, vir illustris, agam, ut anxius haereo, ita immortales utroque nomine debere me cum facile video, tum lubens agnosco. Quae ingenua & simplex confessio, si recte novi incomparabilem humanitatem tuam, pluris tibi erit, quam quaelibet, ut ut compta & nocte meditata oratio. Tametsi a nequissimi illius typographi refrigeratus aliquantulum sum perfidia, non desisto tamen, quae affecta utcunque habeo, praesertim autem commentarium Fulgentianum, in quo describendo nunc multus sum, exasciare pro mea virili. Etiam Lactantianis argumentis jam manum admoveere coepi, videorque in illis integritati pristinae restituendis vel praecipuum operae facturum pretium, adeo quo magis Venetam tuam evolvo editionem, eo evidentius se prodit praestantia MS. illius codicis, cujus a te nobis suppeditata excerpta. Phaedrum suum non ante dies caniculares, quod scholis habendis, ex aliquo jam tempore valde districtus fuerit absoluturum se autumat *Boschius* noster. Typographum interim, qui curas ejus excudat, in hoc oppido inveni. Castigationes tuas Vellejanas judicio prorsus admirabili conscriptas summa cum voluptate nec minore fructu paene jam omnes evolvi. Dignus fane erat tanto vindice politissimus scriptor, ad quem etiam a me triviali Critico inter legendum annotata obiter olim nonnulla, quorum heic mitto gustum, sed ad palatum tuum parum, opinor, facientem. Petro-

1. Non operae pretium visum schedam, in qua quasdam ad Vellejum conjecturas scripserat, hic adjicere, cum omnes paene ad verbum curis suis secundis, grata cum *Munckeri* mentione, inseruerit *Heinsius* & mox Epistolis seqq. responderit.

troniana tua, opus tam delicatum, ut prodiisse vix quicquam crediderim elegantius, utinam tandem aliquando committeres publico! Ex quo a te primum conciliatae mihi fuere epulae illae Trimalchionis, saepius exinde cum heroe isto, & quidem suaviter coenavi. Nondum triduum est, cum haec inde mecum tuli analecta. Cap. 33. *Timeo mehercules ne jam concepta sint. tentemus tamen. Si adhuc forbilia sunt, sorberi possunt.* Postrema duo vocabula etsi in vulgatis non comparent, addita tamen a Petronio suspiceris, ut stulta oratio stultitiam proderet Trimalchionis. *Ova concepta* pro illis poni, quae in pullum coierint, mirari non immerito antehac videbar. Repperi tamen postilla non dissimilem in modum *ovum abortivum* dici a Martial. lib. vi. 93. Cap. 41. *Staminatas duxi, & plane matus suum.* Pro *staminatas* esse legendum *heminarias* a te, nifallor, didici. τὸ *matus* vel *mattus* vindicat etiam Ciceroni Salmasius inter variorum notas ad Martial. lib. vii. 72. Cap. 36. *Carpe, carpe.* Juvenal. Sat. ix. 109. *Archimagiri, Carptores.* Schol. *Infertores, qui illata carpunt.* malim; *infertores, & qui &c.* Neque enim *infertores* iidem & *Carptores*. Cap. 36. *Magister ejus sibi placens sit.* Convenit huc quod in Gloss. Philox. legitur, *sibi placens, ἀνθαδὴς*. Cap. 50. *Statuncula.* Vet. Gloss. Fragmentum a Barthio publicatum Advers. lib. xxviii. 19. *Iconisna, vel Icosma, staticulum, stignia.* lego, *Iconisma & Statunculum.* illa vel *Icosma* a librario videntur profecta. Etiam *signum* pro *stignia* malim. Quanquam nec hoc absurdum. Cap. 78. *Certe in loco adhuc amphoras habebant.* lego, *in loro, vel ambo.* Sed prius verius puto. Cap. 72. *vero, vero, inquit Habinnae de una die duas facere nihil malo.* Volui antehac, ego vero. sed vero pro etiam vel ita ad eundem modum ab initio periodi ter positum ostendit a Cicerone ipso Giphanius Append. Observat. pag. 283. Simile ergo illud in editis: *Ita, ita, inquit, Quartilla.* Quae deinde sequuntur, nisi orationem infinitivam pro ablativo, ut loquuntur; accipi placet; vel de industria soloecam orationem tribuit Habinnae, ita ordinem: *nihil malo, quam de una die duas facere.* Plura erant, & longe his, credo; ineptiora; sed abuti otio tuo diutius non audeo. Vale. Delphis Batav. postrid. Nonas Quinctiles. Anni ciciocclxxviii. *Bleisvicii* pro Vellejo gratissimas tibi meminerunt gratias. *Wallio*, cum forte is Amstelacdami id temporis esset, *Elzevirius* ipse dederat cum libellum.

EPISTOLA CCCXLVIII.

THOM. MUNCKERUS

Nic. Heinsio.

Vianam.

Quid responsurus ad illa sit, quae commendare nunc nuper ei de meliore nota es dignatus, *Elzevirius* tuus, vir magne, avide valde exspecto; nec minus nobiscum amplissimus *Kinschotius*, qui & ipse pro caetera humanitate sua causam nostram apud hominem illum egit perquam diligenter. Sed hoc tute satis nosti, ut scribi a me nihil sit necesse. At reperisse me heri puto,

Ecc 3.

quod

quod mitti ad te, nisi multum fallor, & placeo mihi nimium, ipse non indignum judicabis. Nosti quaesisse te antehac, quid in Petronii fragmento esset, Cap. 45. *non est mixcix*. Torfi me diu, nec tamen quo mitterem suspensiones invenire poteram. Nunc dejerare ausim, scriptum fuisse, *non est cimbi*. $\kappa\iota\mu\beta\iota\zeta$ est $\mu\iota\kappa\rho\lambda\acute{o}\gamma\omicron$ & $\omega\epsilon\iota\tau\alpha$ $\chi\rho\eta\mu\alpha\tau\alpha$, homo parvi animi & contracti, sordidus, illiberalis. At hoc ipsum est, quod heic flagitat sententia. Eiusdem Fragm. Cap. 53. *Ortum ex acdibus nastae villici*. Nocte ediderunt Patavini. perperam. Scribendum, *Nastae*. Servile id nomen etiam apud Martialem occurrit lib. ix. ep. 88. *Modo liberum esse iussi Nastam*. Cap. 71. *Quemadmodum te iussi*. Ex-turbant e Latio phrasin istam Scioppius Dissert. de Stylo Histor. Vossius Construct. Cap. 36. Gronovius ad Martial. lib. ix. ep. 66. Latine ergo non scivit Hyginus meus Cap. 196. *Nam iussit eos, ut in feras bestias se commutarent*. Nec Appulejus in Floridis. *Aegrum jubet ut bono animo sit*. nec Cyprianus Singular. Cleric. *Qui ergo nos iussit, ut in sacris suis cum foeiminis triumphemus*; Nec Quintil. Declamat. tertia: *Ferres dicentem, iussit me tribunus?* Hinc juberi quid aliquis dicitur, cui aliquid imperatur. Quintil. Declam. v. *Quid imprecer homini; qui primus fecit, ut pietate juvaremur?* Corrigit Gronovius, *ut pietatem juberemus*. Omnino legendum, *ut pietatem juberemur*. Sequitur paulo inferius: *quamquam & huic jubetur necessitati pietas vestra succurrere*. Eodem Cap. *ne effluant vinum*. Effluat correxerunt Patavini. Frustra. effluere active usurpatum est, ut emanare. Incertus auctor de Orthographia. *Emanat fons sive terra aquam, id est, gignit & producit*. Catal. lib. i. *Effluas dulcem liquorem comparandum nectari*. Pithoeus emendat, *ut pluas*. nihil erat necesse. Cyprianus pag. 108. Edit. Gryph. *Quod in mentes nostras dominus influxit*. Minucius Felix Octavio: *Licet terram fundaverint pondera, licet mare influxerit liquor*. Cap. 63. *Et qui volebat poterat Jovem iratum tollere*. Omiserunt ut supervacuum $\tau\omicron$ poterat Patavini. Ego legirim, *Et qui, si valebat, poterat*. Cap. 53. *Puerum iussit per gradus in summa parte odaria saltare*. An scripsit? *iussit ire per gradus & in &c.* Cap. 67. *Stateram afferri & circulatum &c.* lego, ¹ & singulorum pondus approbari. Cap. 68. *Abiectum aut diminutum clamorem*. Videtur oppositio flagitare, adjectum. Cap. 57. *Lamellulas paravi*. lego, *lammellulas*. Cap. 61. *propter res venerarias*. Corrigunt *venerias*, nihil puto necesse. *Venerari* est $\alpha\phi\rho\delta\iota\sigma\iota\acute{\alpha}\zeta\epsilon\iota\nu$ apud Hyg. cap. 73. Occurrit eadem vox apud Cyprian. Tract. de Aleat. *Scimus quoniam foris maleficus & venerarius*. Quo loco Venerarium esse putat Pamelius, qui veneratur idola. At mihi certum legendum ibi esse, *venenarius*, h. e. $\phi\alpha\rho\mu\alpha\kappa\iota\varsigma$. Respexit locum Apocalypf. xxii. vers. 5. Inter caetera opuscula, quae eidem Cypriano adscribuntur, est *dispositio coenae* valde illa ridicula, & tanto viro indigna. Initio ejus legitur: *Igitur, qui temperius loti in Jordane, adfuerunt in convivio*. Tunc *commundavit Naaman, aquam sparsit*. Amos. Pro *temperius* procul dubio legendum, *temporius*. sed *commundavit* perperam in *commendavit* mutat Rigaltius. *Commundare mensas* memini me nuper restituisse etiam Petronio. Inter cibos, qui in coena illa positi sunt, *Polypum accepit Pharaio, turpitudinem* Lea.

¹ Ita Tilebomius jam conjecerat.

Lea. An turpitudine heic est aeschrophagia Petronii? non dixerim. Lego, torpedinem. Vale multum, mi patrone; & vive diu feliciter. Delphis Bat. Postrid. Kalend. Sextiles Anni MDCLXXVIII.

EPISTOLA CCCXLIX.

NIC. HEINSIUS

*Thom. Munckero.**Delfos:*

Rubore tacito equidem mihi suffunduntur ora, quoties cogito, quod fit frequentissime, responsum a me deberi ad tuas epistolas, easque ut fruge plurima rerum refertas, sic mihi perquam acceptas. Sed virium mearum non est legem valetudini & diuturnae & perquam incommodae dicere, quae me haecenus ab officio, quod tibi praestitum unice voluissim; invitum avocavit. Augurabar adhuc fore, ut *Elzevirius*, quocum egeram per litteras de Mythologis tuis suo praelo committendis, responsi nonnihil ad me daret, qui quia spem meam frustrari pergit pertinaciter ac insueto silentio, recurrendum duxi ad opem *Graevii* nostri, si is forte apud suos typographum operi tuo indagaret. Sed & ille negat quemquam eo impelli posse, post tentamenta sedula, quod per hanc temporum calamitatem a manifesto lucro plerique deterreantur: causatos praeterea, Hygini Schefferiani plurima in bibliopoliis passim inveniri exemplaria; nec mercedem hanc satis esse vendibilem. Certe a *Plumero* bibliopola impetrare non potui, ut *Valerium Flaccum* a me recognitum, & jam ante annos complures, typis suis det publico, missa ante sex menses jam in eum praefatione, quam paene cum convicio urgebat ipse & flagitabat assiduus. Sed & *Elzevirius* apud me aliosque questus est per chartae inopiam fieri, ne *Holstenianis* in *Stephanum Byzantium* annotatis edendis manum admoveat, quod facturum se sponderat anno proxime decurso, eamque causam esse, ut nec *Gronovii Livium* absolvat, nec in *Cicerone Graevii* nostri pergat, ut pridem coepit. Incipiunt nunc adfulgere pacatiora tempora, quae spondent fore, ut minus difficultatis posthac sit devorandum iis, qui rei litterariae scriptis suis, ut tu, egregie laudabiliterque consultum eunt. Scripsi hesterno die denuo ca de re ad *Ryckium* nostrum; multisque obtestatus sum, omnem uti moveret *Lugduni lapidem*, si quis illic inveniri posset librum editurus: nam in illo uno reliquum omne spei nunc vertitur. Si hic quoque frustra erimus, non dissuaserim, ut *Fulgentio Lactantioque* typographum circumspicias, *Hyginum* servaturus, dum ex hisce temporum angustis nonnihil emergamus. Ad *Vellejum* quae annotasti, lubenti equidem animo, ut tua soleo, perlegi. Nam quod multa laude cumulas opellam hanc nostram, subitaneae nec satis meditatae descriptionis calore primo in publicum prolatam a destituto libris paene omnibus, benignitatis tuae id omne est, & eximii adfectus, quem mihi soles praestare, non mei meriti. Multa exinde ad limam revocavi exasciata, addidique prioribus, postquam copia mihi facta est bibliothecae meae, ut opusculum

ter

tertia parte nunc auctius castigatiusque possit publico permitti: libro II. cap. 17. apud Paterculum τὸ *factum* tuebatur eodem modo, quo tu, Cl. Graevius, nec repugno. Cap. 33. *Et qui pro ut qui* dederunt perperam operae typographicae: quae non hoc uno loco peccarunt in mea editione, nam qui Rhenani codex quoque praefert. Mox *Neuterque ab eo qui arguebatur*, valde mihi arridet. Cap. 68. *umbram facit* de eo diligentius cogitabo. Cap. 76. *eo fraudabo* placet. nam τὸ *in* plurimis locis ab inscita manu est inculcatum. Cap. 85. *ne dubites*, sic & ego legebam, sed aberravit, ut saepe alias, typographi manus, qui non pro *ne* dedit. *Ut ne* (vel *ne*) *dubites*. Cap. 87. placet conjectura tua, sed τὸ *immorsum* nolim mutari, quod curis secundis uberius adstruxi. Sic apud Symmachum lib. I. Ep. 24. *admorsus. ne libellus tuus admorsu duri dentis uratur*. Nec habeo quod caeteris a te observatis opponam: facitque gustus horum omnium tam delicatum, tamque exquisitum, ut reliqua, quae ad hunc scriptorem annotasti, flagitare ausim. Complura ex meis retractavi. CIOCIOLXXVIII. 3. Novemb.

E P I S T O L A CCCL.

T H O M . M U N C K E R U S

Nic. Heinso.

Vianam.

UT laetius accidere mihi nihil potuit, quam quod ex literis tuis suavissimis perspicxi, quam constanter & longe ultra meritum meum in studiis nostris fovendis perseveres; ita acerbissimum contra fuit, quod adhuc conflictari iniqua te valetudine eadem nuntiabant. Sed dabit, spero, tandem, dabit finem huic quoque malo aliquando dei benignitas: quam eo nomine, id quod unum possumus, votis & suppliciis sollicitè fatigamus. Quod irritus omnis fuerit labor, qui hactenus in quaerendo typographo, qui Mythologica nostra excudat, a nobis est adhibitus, in eo agnoscere me oportet insignem fortunae, vel potius fati mei iniquitatem. Quid enim reputem aliud? Ecce etiam *Johannes Somerus*, Amstelodamium illum dico Bibliopolam, etiam ille *Somerus* spem nostram fefellit, tametsi non sua culpa. Febri enim extinctum virum optimum magno cum dolore accepi. Spero tamen fore, ut haeredes impleant, quod ille morte praeventus praestare minus potuit. Staturus enim bona fide promissis videbatur, cum ultro operam suam obtulerit. Sed missis ingratis istis & funestis, redeo ad literas tuas, quae in manus profecto nunquam sumo, quin deosculer. Tam mellea earum suada, tam erudita oratio, ut dictatas ab ipsis Musis censeas. Quod conjecturam nostram *non est cimbix* non omnino absurda tibi visa fuit, instar hoc quamlibet magni mihi operae est pretii, tametsi libens fateor tuum *mykus* loco illi fore non paullo accomodatius. Sed libet scire de *vavatione*, qui tamdiu nos exercuit, quid tandem feceris. Venit nuper admodum in mentem *Bobatorem* scripsisse forte Petronium. Gloss. Philox. *Bobantes*, *Coῶντες*. *Bobat-*

¶ Vide notas nostras ad Petron. pag. LXIII.

Bobari sive *Baubari* est βαύζεν, ὑλακτῆν. Proprium hoc canum quidem, sed ita tamen, ut perquam crebro ad homines transferatur. Etiam Batavi nostri *een Kaffer* garrulum appellitant. Sin minus hoc arrideret, non ineptum videbatur *blatone*, ut prima syllaba perperam fuerit geminata a librario, quemadmodum in *babecelis* pro *bacelis*. Gloss. Philox. *Barbo*, βάκηλ. leg. *baro*. Glossae caedem: *Blato*, ματαιολόγ. *Vaniloquus*, *blato*, ματαιολόγ. Cap. 64. *Inter quam risum*. lego, *interque ea cum risu*. Cap. 66. *Saucunculum*. lego, *lucunculum*. De quo Scaliger ad Festum. Cap. 69. *nisi omnia ista defacta sunt*. Scheff. *de Karta*. Puto post τὸ de excidisse vocem. Cap. 71. *Valde enim falsum est* coniciebam, sic pag. v. *insulsum est*. τὸ in absorbit praecedentem vocula terminans. Cap. 62. *mibi in animo in naso esse*. Acutissime tu quidem, vir ingeniosissime, *mibi anima in ano esse*. Sed vide, si defendi, quod ego antehac volebam, *mibi anima in naso esse*, illo Anacreontis possit od. vii. Κεχδὶν δὲ ῥινὰς ἄχας ἀνέβαινε. h. e. tantum non animam agebam. κεχδὶν enim ibi, quod heic anima. Cap. 61. *Et ipsius mappas implevimus*. leg. *Et ipsi nostras mappas*. natum vitium ex compendio scripturae. Cap. 67. *au, au*. Male ista mutat Schefferus. Agnoscitur illa interjectio a Charisio sub finem lib. iii. & saepe apud Terentium occurrit. Cap. 76. *Haec jactura mihi gusti fuit*. an gutta? Caeterum, quoniam tam benignus nugarum nostrarum es interpres, non dubito, quin aequi boni sis factururus, quae praeter ea, quae proxime mittebam, ¹ ad Vellejum annotavi. Velleji tui exempla non ante venditurus dicitur *Elzevirius*, quam ea, quae ex Vossiana editione adhuc restant, distracta fuerint. Quod si ita &, te sciente fit, addere interim non incommode castigationibus tuis alterum libellum possis, qui curas secundas exhibeat. Ex Vlitianis illis excerptis, quibus beneficio tuo utor, vix credas, quam multa aliis haecenus invisa eruerim. Pro gustu sit hoc unicum exemplum. legitur lib. ii. Astron. cap. 2. *Postea autem de septem stellis, ut Parmeniscus ait, quinque sunt a quibusdam astrologis constitutae, ut ursae species non septem stellis perficeretur*. Micyllus cum Sanctandrea, *quinque Et viginti sunt*. quod firmannt mss. 2. quanquam lib. iii. cap. 24. xxi. numerat. Schol. autem Germanici xxiv. Sed nec dum restitutus integritati est locus, nisi mox legas cum 3. MSS. *Non septem stellarum*. h. e. septemtrionum. Qua lectione quid apertius? Qui signo illi figuram septentrionum dabant, vii. id stellis, qui autem ursae, xxv. deformarunt. Misere heic haeret Cl. Schefferus. Vale multum, unicum musarum decus. Delph. Batav. Postridie Idus Novembr. Anni cicioclxviii.

Fragm. Petron. cap. 62. *Quid est Sudor mihi per bifurcum volabat? an per nates & crura? Nam inferiora hominis in duas partes, velut furca bidens, divisa sunt*. Horat. i. Sat. 9. *mibi sudor ad imos manabat talos*.

¹ Et hic sequebantur quaedam in Vellejum conjecturae, quarum nulla erat, quae non legitur in Heinsii curis secundis a me in lucem prolatis.

EPISTOLA CCCLI.
NIC. HEINSIUS

Thom. Munckero.

Delfos.

DOmo aliquamdiu abfui; hinc altum inter nos tanto jam tempore silentium, cuius causam in me redundare non sine multo rubore equidem agnosco, Munckere clarissime. Interim curas frequenter meas occuparunt Mythologi tui, quos ut vehementer cupio in lucem prolatos quamprimum videre, quod jubebant proximae tuae sperare, ita metuo ne *Someri* typographi nuper e vivis subducti res, quas satis conturbatas reliquisse dicitur, spem nostram aut differant ad tempus, aut omnino frustrentur. Ad Petronii Trimalchionem rarus devertō, cuius tamen tuae litterae, omni semper eruditione cumulatae, desiderium acuunt atque accendunt nonnumquam. De *vavatore* seu *vavatore* congeffi olim varia, sed in quibus parum mihi satisfecerim. Fit quippe verisimile omnino, non tantum Graeca complura huic libello inserta fuisse, sed Osca etiam nonnulla, mendose post descripta a librariis. Campanos enim ac vicinos Campanis populos linguae utriusque praeter Romanam gnaros fuisse, unde & *tricolor* Ennius sit dictus, quem Osca quandoque vocabula annalibus suis adhibuisse constat, haud te praeterit. Nunc propemodum persuadeor ut credam, formatum a Campanis *vavatoris* vocabulum, ex sono, quem infantes recens nati primum edunt, *va va*, unde & *vagire* & *Vaticanum* agrum ac Deum Varro derivare contendit apud A. Gellium. Noct. Attic. lib. xvi. cap. i. ut *Vavator* sit infans, quomodo *hauhator* a sono canis. Porro *habaecali* cum bis apud Arbitrum in fabula Trimalchionis occurrant, vix mutandi videntur in *bacelos*. Conservavit id nobis vocabulum Arnobii codex vetustissimus, & unic. Regiae in Galliis bibliothecae, etsi ante Salmasianam editionem locus mendose sit circumlatus, qui exstat libro iv. de Jove. Nec injuria forsan dubitetur, an non apud A. Gellium quoque hi ipsi *babaecali* sunt restituendi, ubi nunc *barbascali* nescio qui circumferuntur. Vale. 22. Januarius, ccccclxxxix.

EPISTOLA CCCLII.

THOM. MUNCKERUS

Nic. Heinsio.

DE Mythologorum nostrorum editione, quam curae non parvae tibi esse tam amanter significas, ex literis istis viduae Somerianae velim ipse arbitrare quid sperandum habeamus, mi Patrone. Aut ego profecto nimium simplex sum & injuriae oportunus, aut nunc ludos aliquando facere nos immerentes desinet fortunae insolentia. Ut est imperitum illud hominum genus, non tam de commentario nostro, quam de siderum Iconibus, quibus exornare, ut vendi-

bilio-

biliorem reddat librum astronomicon intendit, videtur sollicita. Jussi ut pro
 archetypis haberet, quas in Arateis Grötius exhibuit: qua de re quid tu sen-
 tias, rogo certior me reddas, cum primum poteris. Quod Trimalchionis
 te coenae creberrime admoneo, id ea fieri tantum gratia velim credas, ut
 promissum tuum de illa publicanda tanto maturius exsolvas. Tu enim non unus
 tantum scriptum illud ingeniosissimum intelligis, sed & infinita in commen-
 tario congeffisti, quibus promereri possis orbem eruditum. Nunc doce me,
 sodes, quid illa sibi velint Cap. 57. *Homini mali isto.* Schefferus, *malisto.* Quid
 si rescribamus *majesto*? majus est magnus, unde Majesta: uxor Vulcani apud
 Macrobiū. Cap. 74. *mibi asciam in crus impegi.* Miror interpretum nemini
 in mentem venisse eodem proverbio & Apulejum usum III. Miles. *An, inquit,*
vulpinaris amasio, meque sponte asciam cruribus meis illidere compellis? Cap. 52.
demisso labare, Recte Schefferus *demisso labro orare.* Idem Apulej. eodem libro:
Quod solum poteram, postrema dejecta labia, humidis tamen oculis obliquam respi-
ciens ad illam, tacitus expostulabam, Cap. 42. *medicus nihil aliud est quam animi*
consolatio. locum hunc perperam tentat Reinesius. Quintil. Declamat. VII. I.
Fato vicinus, languemus, convalescimus, morimur: medicina quid praestas, nisi ut
juxta te nemo desperet? Cap. 39. *Expudoratam frontem.* Cyprian. de singularitate
 Clericorum: *veneranda, pudica, pudorata cum foeminis negotia peregerunt.* Ibid.
Prae mala sua cornua nascuntur. De industria soloecam orationem tribuit Tri-
 malchioni, uti tu rectissime observasti. Sed imperitia fecit, ut ad eundem
 modum *prae omnem mundum* scribat vetus interpret Cosmographiae a Godofre-
 do editae pag. 19. & *vinum habundantem* pag. 17. Cap. 40. *Quas porcus ille syl-*
vaticus totus glandem comederit. Malim *lotam glandem* h. e. lautam, delicatam, ut
copo pro *caupo* aliaque, nisi tamen totam glandem opposuit comminutae. Cap.
 44. *Populus est domi leones.* Sidonius: *cum sint in praetoriis leones, in castris lepo-*
res. Cap. 77. *Satis vivus pervenero.* Malim *provenero*: h. e. crevero. Sed haec
 haftenus. MSS. illos codices, quos cum Hygini astronomico contulit Vlitius,
 video in plerisque locis asserere editionem Morellianam, quam & ille sequu-
 tus est, qui Sanctandreae praefuit. Hinc in magna sum *zomeia*, utrum tex-
 tum illud vetus, quod Schefferus exhibuit, an vero Morellianum dem exscriben-
 dum. Adjūva me, oro, consilio tuo. Scribit Fulgentius lib. 1. cap. 23. ubi
 anquiritur, cur fur & celer dicatur Mercurius: *tantum celerius omnibus planetis*
currit, ut septima die permeet suos circulos. Stant heic contra Fulgentium & ratio
 & auctoritas veterum. Nam, ut est in fragmento astronomico, quod Ful-
 gentio adscribit in Catalectis Pithoeus, *Semonis dii completur circulus anno.* Spis-
 siores istae tenebrae, quam ut dispelli a me possint. Ut uno fasciculo compre-
 hendatur, quicquid Fulgentii hujus exstat, Mythologicis & Continentiae
 Virgilianae fert animus comitem dare etiam libellum de prisco sermone,
 quem cum membranīs bibliothecae Leidensis non sine fructu contendi. Quod
 institutum meum quin probaturus sis, nullus dubito. Vale multum, & favere
 nobis perge, nobilissime humanissimeque Heinsi. Scribebam Delphis Batay.
 die IX. Februar. Anni MDCCCLXXIX.

Thom. Munckero.

Delfos.

VIX est ut multa quantumvis oratione tester maximam voluptatem, quam mihi tulit nuntius, de invento Mythologis tuis typographo. Modo ne quid vacillent postea: novi enim hominum genus, quod ne fiat, assidue premendi sunt, & instandum acriter conditionibus ultro-oblati. Sub idem fere tempus e Saxonia amicus scribebat, *Johannis Schefferi* V. C. Commentarios de Militia veterum navali post priores curas altera sui parte adauctos, qui susciperet in publicum emittendos reperisse se inter suos bibliopolam, quem eo acceptiorem habui nuntium, quod ante hoc octennium inveneram apud nos, qui libri editorem cum se fore esset pollicitus, promissis non magis stetit, quam vester ille, a quo tam nequiter delusus es. De Iconibus non habeo quod dicam, nisi meminisse me ab *Hadriano Wallio* nostro, rerum, ut scis, caelestium satis perito, laudatas illas prae vulgatis, quas apud Coloniam Agrippinam typis descriptas aliquando utendas tibi dedi laminas aereas, quibus suas illas ex optimis membranarum *Grotius* curarat exprimi, apud Amstelodamios puto alicubi adhuc delitescunt, nam postea rursus in publicum fuerunt emissae. Sed vix est ut respondeant formae editionis, quam Someriani parant haeredes. Sed hac de re agendi tecum superest puto tempus: quando inchoabunt operae, ut auctor tibi sum, a Mythologis. Nam Astrologica Hygini peculiarem tomum conficient, si Scholiasten Germanici his addendum cures. Fulgentii reliqua opuscula quae chartas non multas occupabunt, nihil puto impedit, quominus castigatiora per te prodeant. In libello de prisco sermone fucum facere nonnunquam is videtur, prolato plurium auctorum testimonio, qui di-reptis jam tum per Gothos ac Christianos bibliothecis, nunquam exstiterunt. Nunc ad Petronium cap. 52. *demissis labris orare vel rogare.* *Demissis labris* etiam apud Terentium habes. & apud Senecam contrav. III. *demissis labris modesta.* Istis cap. 77. *Satis vivus pervenero* Chironium & prorsus inveteratum ulcus inhaeret. aut fallor tamen, aut non infeliciter jam olim me expediti ex hoc loco, cujus mendum omne residet in *satis*. Sub quo latet certa pecuniae summa, quam ab illo haeredibus relinquendam fore praedixerat Mathematicus. Excutiamus igitur litterarum ductus omnes hujus vocabuli. Si pro at reponimus *ad*, nam haec duo non in membranarum tantum, sed marmoribus antiquis passim confunduntur. Post primam autem litteram inferendum *i*. habes si *ad*. pro *is* reponere *HS*. & habes mille sestertia. per *HS*. enim sestertia designabant veteres, cui linea superducta mille denotat. Sic passim veteres membranae. Ut totus locus sit scribendus hoc modo, *Quid si contigerit fundas Apuliae jungere? si ad HS trecenties vivus pervenero.* Nam sic & in fragmentis jam olim editis locutus est noster, *si ad HS trecenties salvus pervenero.* quid arbitrere de

de hac conjectura exspecto sententiam tuam. Proxime agebamus de *vavatore* aut *babatore*. Opinabar vocabulum esse in magna Graecia a plebe corruptum, $\delta\alpha\beta\acute{\alpha}\zeta\epsilon\upsilon$, & sane sic Itali hodieque $\delta\alpha\mu\beta\acute{\alpha}\iota\upsilon\epsilon\upsilon$ ejusdem significationis, in usu habent *bambino* infantem: Nam ab inarticulato infantium sono multa ejusmodi formabantur. Sic $\mu\acute{\alpha}\mu\alpha$, $\pi\acute{\alpha}\pi\omega\alpha$, $\acute{\alpha}\tau\alpha\tau\alpha$ aliaque. $\kappa\alpha\kappa\chi\acute{\alpha}\nu$ apud Aristophanem. Unde Latinum *cacare*. Sed de his haecenus. Vale, vir praestantissime, & me, quod facis, perge amare. Vianae ad Leccam $\epsilon\iota\delta\iota\sigma\text{CLXXVII}$. 16. Februar.

EPISTOLA CCCLIV.

THOM. MUNCKERUS

Nic. Heinsio.

Vianam.

Faciam, ut jubes, mi Patrone; calcaribus assidue, ut quam primum matrem operi admoveat, urgere non desinam hominem. Quod non displicuisse ais, quae ad Petronium observabam proxime, eo animum mihi addidisti, ut denuo periclitari ausus sim ingeniolum meum. Male habet procul dubio, quod legitur Cap. 39. *Orbis vertitur tanquam mola, & semper aliquid mali facit.* Quid si rescribamus? *semper aliquid miraculi facit.* infr. cap. 47. *portenta aliqua facturos.* Sequitur ibidem: *nihil sine ratione facto.* Mutarunt postremam vocem in *facio*. Nollem *factum*. Festus in *nare*. *Natare igitur est saepius nare, ut dictare factare.* Sic habent membranae codicis Leidensis. Ejusdem notae est *ventare* apud eundem Grammaticum. *Scriptare & lectare* apud Horatium. Sed hoc leviculum est, ut & illud cap. 35. $\tau\acute{o}$ *rienes* non fuisse mutandum in *renes*. $\alpha\rho\chi\alpha\iota\acute{\nu}\omicron\nu$ enim *rien*, ut jam olim Festus, & non uno loco Charisius annotarunt. Nec placet, quod cap. 58. *nec tibi parsero* legit Reinesius; nota interrogantis perficit sententiam: *Nec tibi par ero?* Cap. 35. *ejusmodi methodio lactus.* Annotat Douza, *methodium* pro *methodo*, id est, fictione sive ludificatione poni. Non improbo quidem. Sed miror nec ullum alium ex tot interpretibus monuisse *methodia* recenseri inter ludorum vocabula in notis Tyronis pag. 173. Cap. 44. *Larvas sic istos percolopabant.* lego, *percolaphabant*. Amat illam compositionem noster, ut ex verbis *percoqui*, *perbasiare* aliisque apparet. *Colaphare*, colaphis caedere, ut *alapare* dare alapas, unde *alapator*. Gloss. Philox. $\kappa\alpha\upsilon\chi\eta\tau\acute{\iota}\varsigma$ *Alapator*, minus novum hoc verbum, quam, *nausfragare*, quo cum nostro etiam Cyprianum sermone de orat. Domini usum comperi. *Nausfragaverunt*, inquit, *a fide*. Cap. 27. *Russea tunica.* Charisius lib. 1. *Russeum* Grammatici non magis dicendum putant, quam *albeum* aut *prasineum*, sed *russum* & *album* & *prasinum*. Nihilo magis ergo, quam Petronius, Grammaticos audivit Palladius lib. iv. tit. 13. *Colores hi praecipui, badius, aureus, albineus, russeus &c.* Russeum ergo aeque bene dicitur ac *russum*, ut *Iantinum* & *Iantineum* in notis Tyronis pag. 59. *Coccinum* & *Coccineum* in Scholiis ad Juv. Sat. iii. vers. 283. *Carbasinum* & *Carbasineum* apud Nonium cap. xiv. *Aprinum* & *Aprineum* apud Hyg. cap. 69.

quomodo *apruna aprugineum* (leg. *aprugneum*) visitur scriptum in notis Tyronis Cap. 28. non satis sanum videtur *sudore calefacti*. fort. *vapore*. Palladius de balneis lib. 1. tit. 40. *Fortius vapor inter angusta luctatur*. Sed quid est apud illum scriptorem ejusdem libri tit. 18. *Basellis altioribus impositas*. an scripsit *Besalis*? *βήσαλον* enim est later coctus, unde *Besalia* apud Charisiū lib. 1. Non minus torquet me iste locus, quam *comula betalis* apud Petronium. Cap. 58. *Staminatas duxi*. Quomodo tu istum locum emendes, quamquam nihil tuis in eum observatis sit eruditius, non ignoro, vir nobilissime; non possum tamen facere, quin narrem tibi, quid nuper admodum mihi in mentem venerit, *staminarias* nempe, voce a *στῆν* *stamen* deductā, videri posse appellare potiones meracas, ut continuet figuratam orationem, qua caldam potionem dixerat vestiarium. Laberium in *Staminariis* nosti laudari a Gellio lib. xvi. 7. Cap. 64. *Plena manu*. Lucianus in Asino: *παίσειν ἄθρόα χειρί*. *Nastae* vocabulum, Cap. 53. quod villico Trimalchionis ibam assertum, sumptum videri possit ex Homeri Iliad. B. ubi Amphimachi frater ita appellatur, cujus & Ausonius meminit Epitaph. Heroum xvi. 1. sed haec haecenus. Quae boni ut consuleres multis rogarem, nisi jam dudum tua mihi comitas quidvis garriendi, dummodo de literis sit sermo, indulgisset licentiam. Tua illa emendatio si ad HS ∞ vivis pervenero quantivis omnino pretii est, & vere palmaria. Si nihil aliud in Petronio restituissem, operae tamen mihi pretium fecisse videreris vel unius istius loci tam felici correctione. Nec aliter, sat scio, videbitur rei literariae proceribus, qui jam diu est cum expectant, ut ad Trimalchionis illas epulas a te invitentur. Ego nunc multus sum in Hygini Astronomico, nec, ut spero, frustra. Quanquam hinc illic occurrant nonnulla interdum, in quibus ante egregie sudandum sit, quam me expediam. Inter illa est etiam iste locus lib. 11. cap. 6. ubi *ὡς δὲ τὸ ἐργόνασιν* agit. *Existimatur Aegaeus sub eo saxo Pelopium ensē posuisse*. Ita edidit Micyllus, quique secuti sunt, sed Morell. Soter & Sarrandrea *Ellopium ensē*. Veneta omnium antiquissima *Elopium*. MSS. Codices diversimode *Elopi*, *Allopium*, *Hellopium*. An Pelops cum ensē antea possederit? Plane aqua haec mihi haeret. Vale multum & diu vive feliciter. Scribebam Delphis Prid. Nonas Martias Anni ciccicclxxix.

Heinsii epistolae nos defecerunt abhinc, sed quid, responderit ipse Munckerus ad illum Hygini locum narrat.

EPISTOLA CCCLV.

THOM. MUNCKERUS

Nic. Heinsio.

Vianam.

PRO Marone tuo, quem inter amicos reliquos etiam ad me pervenire minus voluisti, debeo omnia benignitati tuae; mi Patrone. Carmen tui praefixum plenum revera deo; nec sine horrore a me legitur. *Sic ubi fata vocant*. Nosti caetera. Sed absit omen. Veniebat hoc ex eo in mentem; quod lecto fuisse

fuisse te affixum tam diu audiebam sanequam invitus. Spero nunc lactiora, & morbum illum, qui remittere nuper coeperat, jam plane esse profligatum. De Mythographorum meorum editione quid sperandum habeamus, ex *Bernardi Someri* Ecclesiastae Amstelodamensis, viri perhumani & mihi amici, ut arbi-
 treris ipse literis, mitto eorum exemplum. Primum folium, cen specimen
 quoddam, ante duos jam menses excusum est. Cum sperarem deinde fore,
 ut redux a Mercatu Francofurdenſi serio tandem aliquando manus operi ad-
 moliretur bovinator ille, denuo caussari solemnia coepit. Sed inter taedia illa
 tam molesta hoc unum me recreat, quod cum nactus sum nunc ἐργασίαν, quem
 summopere reveretur, quique omnia apud eum possit, adeo ut metuen-
 dum nihil habeam; ne forte rursus ad ingenium redeat, ubi dicta venerit dies.
 ἢ ταῦτα μὲν ταῦτα. Quae in fragmento *Traguriano* me docuisti, talia sunt;
 qualia omnia tua, id est, ex latentibus literis, quae omnino requiruntur ad
 illud scriptum emaculandum. Sed cum Cap. 69. pro *stigmam* habeat reposue-
 runt *stigma* Patavini, locum non emendarunt, sed corruperunt. ἀρχαϊσμός enim
 est, ut Cap. 44. nec *Schemas* loquebatur. cum Cap. 39. rescribere tentarem,
 attendebam quod *Trimalchio* ait, *coelum fieri taurulum* & similia. id quod re-
 vera miraculosum est. Quod *Astron.* 11. 6. a te excogitatum est *Cecropium*
 verisimillimum videtur: ego certe nihil invenio convenientius. Cacterum in
Astronomico illo dici haud potest, quam multa detexerim ulcera, quae *Aescu-*
lapiorum nostrorum oculos hactenus fugerunt. Dabo in hac charta specimina
 quaedam ex tribus primis capitibus lib. 11. cap. 1. *A quibusdam Aetolorum.*
 Emendo *aepolorum*, hoc est, *capratorum*, ex *Eratoſthi.* cap. 1. & *Theon.* in
Aratum pag. 7. qui *Eratoſthenem* ad verbum descripsit. *Schol. Germ.* Quae
 dum in montibus vagaretur, a quibusdam pastoribus apprehensa, cum puero adducta
 est ad *Lycionem*. *Cetei filiam*: Ita & *Veneta*. *Micyllus* & alii dederunt *Caetei*.
 MSS. 2. & *Caetei*. Putes scripsisse *Heracei*, & mox *Heraceae*. Ἡρακλῆος enim di-
 ctus fuit unus ex *Lycadonis* filiis. Vide *Apollod.* Lib. 1. pag. 163. ed. *Com-*
mel. Forſan & in Prologo scribendum, & *Heraceum* pro *Caeteum*. Cap. 2.
Hestiaea. *Hestiaea* *Soter*. *Iſtoe* *Veneta*. *Iſtoe* MSS. 2. ex *Vlitianis*, ut & uterque
Morellianus. Atque ita omnino scribendum. *Iſol* enim *Graecis* est. *Erato-*
ſthenes cap. 2. Ἀγλαοσθένης δὲ ἐν ταῖς Ναξικοῖς Φήσι τροφὸν γενέσθαι Διὸς Κυνέσσαν,
 εἶναι δὲ μίαν τῶν Ἰδαίων Νυμφῶν, ἀφ' ἧς ἐν μὲν τῇ πόλει τῇ καλεσμένῃ Ἰσοῖς τὸ τοῦ
 τῆνομα. &c. *Iſtoe* ergo *Iſol*, ut *parallelus* ἀδελφῆλοι cap. 4. lib. 1. *Eutygram-*
mo εὐθύγραμμοι, *antoecoe* ἀντοικοι cap. 2. & 4. Fragmenti veteris, quod *Cen-*
ſorino tribuitur: servavit rectam scripturam *Germanici Scholiastes*. *Agathosenes*
 in *Asiaticis carminibus* *Cynosuram* dicit *Jovis* fuisse nutricem, unam de *Idaeis nym-*
phis, a qua in *Cretae oppido* *Iſtoe Nicostratus* constituit portus, & circa eum locum
 fuisse *cynosuram*. Pro portus lege portum ex *Eratoſthene*, unde haec desumpta.
 Viderur *Hyginus* in vitiosum codicem incidisse, & legisse apud *Eratoſthenem*,
 vel alium ex *Graeculis*, ἀφ' ἧς μὲν τῇ πόλει τῇ καλεσμένῃ &c. Sed quomodo a
 nomine *Cynosurae* dici potest urbs *Iſtoe* constituta? quae in illis nominibus
 appellationis similitudo? Scripsit ergo, aut certe scribere debuit, Ab ejus quo-
 que

que nomine in urbe, quae Histoe vocatur a Nicostroto & Sodalibus ejus constituta, & portum, qui ibi est, & agri partem majorem Cynosuram appellatam. Ibidem Constituerunt, & non arctum, sed plaustrum &c. Locus sine dubio mendosus, cum nulla inde elici sententia tolerabilis possit. Soter dedit, constituerunt, non arctum &c. Micyllus & alii, constituerunt, quod non arctum &c. Agnoscet manum suam Hyginus, si τὸ quod ex alieno in suum locum revoces & scribas, constituerunt, non arctum, sed plausirum nominaverunt, quod ex septem stellis &c. Deinde Quinque & viginti. Ita recte Soter & MSS. 2. quamquam Hyginus infr. lib. III. cap. I. XXI. tantum, Scholiastes autem Germanici & Theo in Aratum pag. 7. XXIV. numerant. Quod non videre se ait vir doctus, unde stellae istae viginti quinque veniant, id ei ignoscendum est, cum vitium, quo sequentia infecta sunt, turbet sensum. Rescribe ergo, ut videas, quid velit auctor, septem stellarum ex MSS. 3. pro septem stellis. Sententia est eos, qui signo illi figuram septentrionum dederint, VII. id tantum, qui autem ursae, XXV. deformasse stellis. Cap. 3. Terram invenisse ferentem. Emenda venisse ferentem. Eratosthenes: ἥ γῆν ἐλθεῖν φέρουσαν τὰ χρύσεια μῆλα. Schol. Germ. Terra quoque obtulerit aurea mala cum ramis. Stabiliunt eam emendationem MSS. 2. Haec in gustum sufficiant, cui caetera ut respondeant, praestabo. Vale, vir Illustris, & favere studiis nostris perge. Wallius tuus salvere te peramanter jubet, & pro Marone gratias tibi meminit gratissimas. Delph. Batav. Prid. Kalend. Quint. Anni CIOIOCLXXIX.

E P I S T O L A CCCLVI.

T H O M . M U N C K E R U S

Nic. Heinsio.

Vianam.

Q Uod serius, ac debui, ad ultimas, omni profecto humanitate affusim cummulatas, respondeam, ne mireris forte, mi Patrone, scito & me ex aliquo jam tempore minus crebro adversa conflictatum valetudine: quae etsi necdum plane restituta est, remittere tamen jam coepit, & sperare me jubet meliora. Etiam de te meliora exspecto, quam augurari videris; opto quidem certe ex animo, & Deum immortalem veneror, ut per multos adhuc annos incolumem te praestet bono publico literarum, quarum pater tu & Princeps. Sed de his satis. Quod specimen eorum, quae in Hygini Astronomico observavi, non displicuisse tibi significas, meo non parum acuiisti diligentiam nostram, quam ne quis desiderare merito possit, sedulo annixus sum. Ex editionibus Aldina antiquioribus illam tantum possideo, quae prodiit anno M CCCCLXXXV. quam deinde Parisiis denuo exscribendam dedit Anno M CCCCXXXVI. Ludovicus Vives: sed nec alteram triennio antiquiorem, nec Aldinam vidi unquam. Feceris ergo rem animo tuo ad quovis modo de publico bene merendum promptissimo non indignam, si cum veteres editiones istas, tum excerpta antiquorum codicum, quae inventa in armariis tuis scribis,

bis, usui nostro ad tempus indulseris. Fulgentii mythologi inspexi quicquid est fere antiquitus editorum. Unum illum Baptistae Pii instructum notis frustra haecenus quaesivi. Ac Germanici Scholiastae nonnullae mihi editiones sunt, Hervagiana Anni MCCCCXXXV. Morelliana Anni CCCCCLIX. Leopardi manu hic illic castigata. & Parisina Anni M CCCCCLXXVIII. Edam eum libenter, si praeclara praesidia illa, quae dives bibliotheca tua possidet, impetrare potuero, sed una cum Germanico ipso, & separatim a reliquis Mythographis. Emendatio in Dicty Cretensi palmaria omnino est. Nec laude minori digna altera illa in Petronii Traguriano fragmento. Ignorantiam istiusmodi archaicae scripturae non unum corrupisse veterum scriptorum locum persuasissimum habeo. Inter illos numerare liceat etiam Fulgentium nostrum, ad cujus cap. 7. lib. III. ita commentatus sum. *Ischiadicos*. ἰσχιδιακὸς Graeci appellant. Aliter *Ischiaci* dicuntur, quomodo *Ischiacos* heic repraesentant 4. antiquae edd. Vide Gell. lib. IV. cap. 17. Sunt autem ἰσχία τὰ ὑπὸ τῷ ὀσφύν ἐξ ἑκατέρων τῶν μηρῶν ὅσα, ἐν οἷς ἔγκειται τὸ ἱερὸν ὅσεν, ut ait Schol. Theocriti ad Eid. VI. Sed MS. Leid. habet *Sciaticos*. Gloss. *Scia enim femur dicitur, unde Sciatici, qui ibi infirmantur*. Atque ita omnino credo scripsisse Fulgentium. Nam & Theodorus Medicus *Sciaticum morbum* dixit pro *Ischiadicum*. *Sciaticam* vocat interpres Bingizlae. Sic *scias* pro *Ischias* est apud Capellam, & σχίον pro ἰσχίον in vett. Glossis, observante Vossio in commentariis de vitiis sermonum, & Salmasio ad Pall. Tertull. pag. 133. Ad eundem modum *scara* pro ἐχάερα dicitur a Junioribus medicis. *strio* pro *histrion* in Glossis Isidori. *spania* pro *Hispania* in Chron. Gothorum ejusdem, Anonymi Cosmograph. pag. 37. Ed. Godofr. & in epistola Pauli ad Rom. cap. 15. Tale etiam est *stera* pro *hystera*, de quo Reines. ad Fragm. Petron. Tragur. *Sciasin* vocat morbum Ischiacorum Macer ille nescio quis lib. 1. cap. 2. *Sic sciasin curat, sic sumptum menstrua purgat*. Cap. 8. *Sciasin quam Graeco nomine dicunt*. Eodem capite & *stera* pro *hystera* habes: *dicitur atque sterae causas siccando juvare*. ut & cap. 3. *Conjuncto sibi sterae si subditur herba*. Unde *stERICUS* pro *hystericus* cap. 1. *duritias levat stericas, pellitque tumores*. Quae loca pessime corrumpit Cornarius. Cl. Schefferum diem suum obiisse non libenter intellexi. Nam in tanta paucitate doctorum hominum omnis jactura damnosa est. Ejus conjectura in Petron. Fragm. pag. 59. *aves, aveberis*, pro *habes, habeberis*, nuncquam valde arrisit. Puto enim hoc voluisse Petronium, si habes opes, coleris, frequentaberis, & in aliquo eris numero. Nam χρήματα ἀνὴρ, ὁ δὲ πενιχρὸς ἔδεν πέλεται, ut ille ait: nec recte pag. 38. oppugnat Reinesii emendationem *oricularios servos*. Gloss. Ibid. *Auricularius, auscultator*. Sed quid sibi volunt illa in iisdem Glossis? *Musiae, nidi foricum*. *Musiarius, qui per musia quaerit*. Nec sana ista: *Necolatum, stultum* & *elanguentem*. *Nicolaum, stultum*. An scribendum *Necoleum*? hoc esset, ἀνορχιν, coleos non habentem. Ita *Nesapium* vocat Trimalchio, qui non sapit: Petronius, *si nos coleos haberemus*. Vale multum, vir illustris, & favere studiis nostris perge. Dabam Delph. Batav. a. d. XVII. Kalend. Septembr. Anni CIOICLXXIX.

EPISTOLA CCCLVII.

THOM. MUNCKERUS

Nic. Heinsio.

Vianam.

Quominus, ut aequum fuerat, pervenisse in manus meas, quae Hygini suppeditare studiis nostris exemplaria pro caetera benignitate tua dignatus es, dudum reddiderim te certiore, in causa fuit morbus pertinacissimus, quo per undecim jam menses graviter affectus fui, sed tempore hoc autumnali ita debilitatus, ut tametsi mori non potuerim, vivere me tamen vix senserim. Melancholiam esse hypochondriacam ajunt ἰατρῶν παίδες; unde terribilis orta cordis palpitatio ultimam non raro denunciare mihi diem videtur. Hygini nostri, cui tandem aliquando serio se accinxit typographus, excusa jam aliquot folia, quorum unum, ut chartam & typos videres, mittendum ad te duxi; quod ubi perlustratum a te fuerit, velim ad me redeat. *Boschium* nostrum Lutetiae, id quod magno mihi dolori fuit, a. d. ix. Kalend. Novemb. Dysenteria extinxit, ita ut una cum eo spes obtinendi codicum Fulgentii, quae in urbis Bibliothecis latent, excerpta nobis perierint, nisi tu aliam viam, qua ea nanciscamur, indicaveris. Qua aetate scriptor is floruerit, juxta tecum ambigo. *Modius* nov-antiq. Lectionum epistola lxi. aequalem fuisse, vel certe supparem Ruspensi episcopo, & vixisse in Africa arbitratur. Afrum fuisse manifeste arguit stylus; idque multis demonstrare possem, si opus foret. Sed facimus alibi. Accedit huc, quod Presbyter ille, cui *Mythologias* suas inscribit, Carthaginiensis fuerit, ut volunt vett. editiones. Id quod & a membranis Leidenlibus confirmatur. Nec displiceat forte admodum, quod aequalem fulgentissimo illi Fulgentio faciat, qui in Numidia Episcopum gessit, cum ex praefatione lib. i. apparet gravem ejus tempore orthodoxorum fuisse persecutionem, quae alterum illum vel in primis nobilitavit. Adverterunt me statim, ut primum in manus Planciadem hunc cepi, verba illa pag. 2. *Quia nunquam est malum immortale mortalibus, tandem domini regis felicitas adventantis velut solis crepusculum mundo, tenebris debiscentibus, pavores absterfit.* Quis ille *Domnus* sive *Domnus*, ut membranae vett. habent, Rex? Glossa interlinearis codicis Leidensis Zenonem intelligendum monet. In quo etsi errat, apparet tamen inde, circa quae eum tempora vixisse aestimatum olim sit. *Locherus* rectius, meo quidem judicio, *Hildericum* innui censet, qui in Africa Ecclesias Orthodoxas restituit, episcopos ab ejus patre Trasimundo relegatos revocavit. Sed turbat paululum, quod paullo ante dixit: *Sospitis in favilla silentii raucisonis jurgiorum classicis, quibus me Galagetici quassaverant impetus.* *Salmasius* in ora codicis sui emendaverat, *Gallogetici* Gallogetae essent turba miscellanea ex Gallis & Getis orti. Sed an ita vocari possent Vandali? deinde, an ita loqueretur sub rege Vandalo? Illud, inquam, turbat me, & item alterum istud, quod libellum de Virgiliana continentia & de prisco sermone ad Chalcidium scripsit. Quod

si Chalcidius ille is est, qui Timaeum Platonis interpretatus est, ut videtur existimasse *Gesnerus* in Bibliotheca, & affirmare non dubitat *Godofredus*, cum titulum libelli de Prisco sermone ita conceptum ediderit; *Fulgentii libellus de Prisco Sermone ad Chalcidium Grammaticum, Platonis Ecphrastem?* vixerit tempore Constantini Magni, ut ex illis non vane colligas, quae *Adversar. lib. XLVIII. cap. 8.* congeffit *Barthius*. Sed ego inclinaverim magis in priorem sententiam, in qua *Modius* & *Locherus* conspirant, nisi quod hic episcopum illum fuisse senserit. Nec longe ab eo, quod ad aetatem attinet, discedit glossator ille modo laudatus, cum Zeno annis non admodum multis praecesserit Justinianum, sub quo Hildericus regnum obtinere coepit in Africa. Caeterum ut aetas huius scriptoris, ita & ipsum nomen controversum est. *Lundorpius* in Homologumenis de Petronio auctorem Mythologiarum appellat *Furium Publicum Fulgentium*; Continentiae Virgilianae, *Flavium Calpurnium Fluentium*; Libelli de prisco sermone, *Fabium Fulgentium Planciadem*. Sed fallitur multum vir doctus. Nec diversorum scriptorum sunt foetus ista opuscula, nec auctor eorum Furii vel Flavii habuit nomen. Disertim etenim vett. membranae *Fabium Planciadem Fulgentium* vocant cum Mythologiarum, tum continentiae Virgilianae scriptorem. *Fabium* fuisse dictum liquet ex ipsius verbis, quibus de Musis unam se compellantem introducit in Praefatione lib. 1. *Eia, inquit, Fabi, Anacreonticis &c.* Nec recte *Placiadem* pro *Planciade* videntur facere vett. editiones, cum *Planciades* in libris habeatur manu exaratis: quod *Vossio* in de vitiis sermon. cap. 8. lib. 1. videtur factum a *Plancius*. Atque haec sunt, quae de Fulgentio isto dicere mecum habui: quibus si quis certiora me docuerit, gratias ei meminero gratissimas. De illis, quae de Germanico & ejus Scholiaste promittis, multum amem te necesse est, mi Patrone. Quod si magnus ille in coelo medicus sanitati me pristinae restituerit, aggrediar eorum recensionem perlibenter. Nunc doceas me quaeso, an Tenedos una Cycladum fuerit, ut apud Hyginum nostrum habetur cap. 276. *Isidor. lib. XIV. 6.* *Ampelium cap. 6.* *Orosium lib. 1.* *Tenos* rescripsi in Hygino, eamque emendationem multis veterum testimoniis confirmavi, & inter alios etiam isto *Vellej. lib. 1. cap. 4.* *multasque in Aegaeo Icarique occupavere insulas, Samum, Chium, Andrum, Tenum, Pharum, Delum, aliasque ignobiles.* An *Parum* scribendum pro *Pharum*? sed *Ampelius cap. 6.* qui duodecim cycladas cum *Eustath. in Dionysium pag. 75.* numerat, utramque *Paron* & *Pharon* inter eas recenset. In Hygino advertit me, quod lib. 111. in *Delphine* habent cum *Morell. 2.* codices *Vlitiani: Habet supra caput ad verticem versus.* quia video non placuisse tibi in *Vellejo lib. 11. cap. 101.* *Omibus ad orientem versus provinciis.* Usitatus sane omittitur ista praepositio, ut & *in*, quod tamen addit lib. 1. cap. 15. *In palatium versus.* Ad eundem quoque modum dixit *Curtius lib. IV. cap. 7.* *In meridiem versus Arabes spectant.* & *Sallust. Catil. cap. 56.* *In Galliam versus castra movere.* Vale multum, Heinsi nobilissime, vive feliciter. Delphis Nonis Novembr. Anni CIOICLXXIX.

P. S. Folium Hygini, de quo feci mentionem, *Perizonius* noster tibi afferet; quod

quod si placuerit, spes est fore, ut nec caetera displiceant, utpote magis elaborata, quam illa prima, quae per annum integrum & amplius apud typographum delituerunt.

E P I S T O L A CCCLVIII.

T H O M. M U N C K E R U S.

Nic. Heinſio.

Vianam.

Q UOD sperare vix poteram hieme proxime praeterita, qua cum terribilis cordis palpitatio & syncope, tum haemoptysis & asthma miserum in modum me afflixere, adhuc vivo, mi Patrone; vivo, inquam, & libros tractare jam rursus incipio, quanquam valde etiamnum imbecillus. Quid de me porro futurum sit, novit ille solus, qui novit omnia. Interim sic vivo, ut milites illi, qui signum proficiscendi quotidie exspectant. Vasa pridem collecti & ex scriptis meis, si qua praelo visa sunt matura, typographo commisi, qui absolutis tandem aliquando Hyginianis, nunc Planciadae nostro admove manu coepit. specimen curarum nostrarum per Cl. Ryckium mittendum ad te curavi, unde de reliquo opere facias conjecturam: nam responsura ad tuum gustum caetera promittere posse haud vane videor, conscius mihi laborum, quos iis impendi. Te sic satis belle jam habere, nuper admodum perlibenter ex Evaldo Rulao, juvene politissimo, accepi. Faxit Deus ut diu te salus oculis tam placidis aspiciat. Sed quid agit commentarius tuus in Fragmentum Tragurianum; si verum dicendum est, injurius videri possis in Remp. Literariam, quod tamdiu thesaurum cum premas. Pro eo quod cap. 34. habetur, *tangomenas faciamus*, visum mihi nuper rectius fore, *τέγχε πνέυμονας faciamus*, hoc est, canamus cantilenam illam Alcaeï, *τέγχε πνέυμονας δίνω*, & volup nobis faciamus. facere heic pro dicere positum existimo, ut cap. 62. *Homo meus coepit ad stellas facere*. Vetus interpretes Lucae cap. xvi. vers. 18. *Fratribus vale faciens*. vers. 21. *Vale faciens & dicens*, cap. xxi. *Cum vale fecissemus invicem*. At ille interpretes barbarus est. Sed non tam barbarus, quam multis visus est. Culinarium verbum est *facere* cap. 47. *Gallum gallinacem, penthiacum, & istiusmodi naenias rustici faciunt*. Eodem sensu usurpavit Ambrosius libr. de Cain & Abel cap. 8. *Accepit vitulum tenerum & bonum, & dedit puero & festinavit facere eum*. Translata illa ad verbum ex versione Graece τὸ. Genes. cap. xviii. vers. 7. *καὶ ἔλαβεν ἀπαλὸν μοσχάριον καὶ καλὸν, καὶ ἔδωκε τῷ παιδί, καὶ ἐτάχυνε ὃ ποιῆσαι αὐτό*. Phrasin sacrae scripturae non uno loco deprehendi. Legitur Cap. 43. *Niger tanquam corvus*. Pariter in Salomonis Cantico Cap. v. vers. 11. *Nigrae quasi corvus*. Cap. 30. *Quid ergo est? dono vobis eum*. Ita melius eum locum concipi puto, quam quomodo in pridem editis habetur. *Quicquid ergo est dono vobis*. At *donare aliquem alteri* etiam in sacris frequens est locutio. Vet. Interpr. Act. xxi. *donavit tibi deus omnes, qui navigant tecum*. Epistol. ad Philem. vers. 22. *Spero per orationes vestras donari me vobis*. Sic & Justinus lib. xxxviii. 6. *Ut ne victum quidem*

dem memoriae patris donarent. Valer. Max. viii. i. ex. 9. Quorum salus propriis obruta criminibus proximorum calamitati donata est. Flor. iiii. 5. Ingratissimos hominum sacris suis famaeque donavit. Libros illos, quas utendos a te accepi, ubi voles remittam. Vale, vir illustris, & vive diu feliciter. Delph. Batav. a. d. x. Kalendas Sextiles Anni ciciocclxxx. Bellissimum est illud Trimalchionis pag. 58. Corcillum est quod homines facit. Non dissimiliter S. Jobus cap. xii. vers. i. Ergo vos estis soli homines, & vobiscum morietur sapientia? Et mihi est cor sicut & vobis.

EPISTOLA CCCLIX.

THOM. MUNKERUS

Nic. Heinsio.

Vianam.

DE Philippo Labbaeo quod scribis, eum in nova bibliotheca sua MStorum, tanquam haecenus ἀνέκδοτον, proferre praefationem libelli Fulgentiani de Prisco sermone, miror equidem vehementer, vir nobilissime, cum omnes ejus editiones, quas ego quidem consuluerim (consului autem amplius decem, & inter illas etiam omnium, ni fallor, antiquissimam a Baptista Pio anno 1487. procuratam) eam repraesentent. Verum una cum Isidoro & Capella edidisse etiam *Bonaventuram Vulcanium*, eundem libellum, nondum venerat in mentem; itaque eo indicio rem longe fecisti mihi gratissimam; dabiturque a me opera, ut ejus vel a Wallio tuo vel aliunde ad dies aliquot usuram impetrem. Addidi literis hisce cum iconum, quibus Hygini Astronomicon exornatum ivimus, tum & curarum, quas impendimus Planciadae, specimen aliquod: utrumque, spero, aequi boni pro caetera aequanimitate tua facies. Feci istud, quod potui pro mea sapientia, ita ut is, cui minus forte placuerim, non diligentiam, mihi, sed vel ingenium, vel fortunam defuisse, censere debeat. Ἐὰν ὁ κύριος θελήσῃ, καὶ ἡμεῖς ζήσωμεν, prodibimus in lucem proximo vere cum mercimoniis nostris. Ex Planciade tametsi qua ope MS. Leidensis, qua diligenti meditatione mendorum vim non parvam fustulisse videor; fatendum tamen mihi, restare in eo nonnulla, quae a nemine quamvis perspicace, nedum a nostra mediocritate, emendari absque melioris codicis subsidio queant. Quod si tuo rogatu ex doctis quis hominibus non nostra, sed literarum causa, quantum interest, ut emendatior & Planciades in hominum manibus versetur, videre vellet Lutetiae Parisiorum, quomodo loca nonnulla, unde me non extrico, in MSS. codd. bibliothecarum illius urbis legantur, mitterem ad te illa in scedula aliqua enotata. Verum haec ita rogo, si commodò valetudinis tuae fieri possint; nam oneris imponere tibi quicquam nec volo nec debeo. Quos utendos a te accepi libros, eos faciam ut brevi ad te referat nauta ille, qui quorquot hebdomadis per oppidum hoc Vianam contendit. Interim multum diuque vale, optime & nobilissime virorum. Dabam Delphis Batav. a. d. iiii. Non. Octob. Anni ciciocclxxx.

EPISTOLA CCCLX.

THOM. MUNCKERUS.

*Nic. Heinsio.**Vianam.*

SI vales, bene est, mi patrone, & habeo quod juxta tecum gaudeam. Ego miser mortalis a veteribus illis malis meis, cordis palpitatione & asthmate, miserrime adhuc affligor. Quid putem aliud, nisi ad labores tantum natum me & dolores? A prima adolescentia exercita aetas mea fuit: & nunc, ecce, stultis modo diebus praeteritis, cum sapere, hoc est, vivere incipio, lenta paullatim tabe in flore ipso absumor. Flagellum voces me licet, & miraculum medicorum, ut qui animam tam saepe agam, nec moriar tamen. Verum etsi evasi huc usque, facturus tamen dubie semel sum, quod minari toties videor. Interim omnis in eo sum, ut animum quantum potest, ne ultimam illam necessitatem plus justo expavescat, confirmem. Sed funesta ista missa faciamus. Mythographorum meorum, qui nunc se nuper praelo tandem aliquando subduxerunt, mitto heic, quod meritissimo tibi debetur, exemplum. Id boni ut aequique, quemadmodum omnia frivola nostra soles, consuleres, & cum venia, si quando bonas male collocare horas velles, legeres, etiam te atque etiam rogarem, nisi haec talia rogari te multum nolle, persuasissimum haberem. Additi sunt fasciculo, quos commodaveras nobis libros, pro quorum usura quantum tibi debeam vix est ut verbis exprimam, cum absque eorum praesidio, quod nunc utcunque effeci, frustra omnino aggressus fuissim. Unum ex illis, in cujus margine varias emendationes in Germanico adscriptas offendi, cum pace tua paucis adhuc hebdomadis retinebo. Vale multum, vir illustris, & favere nobis perge. Scrib. Delph. Batav. a. d. vii. Kalendas Aprilis Anni MDIOCLXXXI.

EPISTOLA CCCLXI.

PHIL. MUNCKERUS

*Nic. Heinsio.**Hagam.*

CUM pristinae illiusque eximiae humanitatis tuae memor, vir illustris, ante hos sex menses denuo amicitiae tuae fores pulsarem, forte fortuna per absentiam tuam accidit ut voto illo meo excederem. Dedi nihilominus tum operam, ut si minus ore, at scripto saltem te compellarem, relicto in aedibus vestris, tanquam summae observantiae & promptissimi obsequii mei obside, Orpheo nostro; de quo non dubito, quin ad manus tuas pervenerit. Huic primo igitur obsidi adjungo nunc etiam alterum, Imp. nempe Carolum Magnum, non minore scholarum, quam totius olim Europaei orbis cura ac regimine insignem. Lege, quaeso, si tanti putabis, & judica, an aliquod saltem ope-

operae pretium fecerim; post tot erecta mihi (ita enim semper credidi) tropaea a *Matthia Bergio* in *Phaedro Rittershusii* pag. cxx. a *Philippo Melancthone*, a *Martino Crusio* passim, & inter tot alias ut inprimis a *Daniele Heinsio* τῷ πάνυ, cum sequenti hoc unico carmine,

Nunc Graeco ac Latio, nunc Belga ludere versu,

Ille meus tali Reuius ore fuit.

tum universo populo suo Graecorum Epigrammatum. Te tanti parentis pari filio auctore ut pergam in hoc incepto ulterius, vel etiam calamos hosce meos Graecanicos protinus incidam. Vale, vir illustris, & in meliorem quaeso partem audaciam & confidentiam hanc meam interpretare. Dabam Harlemi xvi. Decemb. Anno C. cicioclxiv.

EPISTOLA CCCLXII.

NIC. HEINSIUS

Phil. Munckero.

Harlemum.

ET Orpheum & Carolum Magnum Graeco abs te carmine expressos, cum Latinis nonnullis additis, vir praestantissime, fuisse mihi traditos scito. Utrumque munus habui profecto, ut debebam, acceptissimum. Video enim te veteres illos in utraque lingua certissimos castigatae locutionis magistros ubique in numerato habere, eorumque ad imitationem scripta tua componi. Ut jam plane talem te agnoscam, qualem *Gronovius* noster olim praedicabat, in familiari apud me colloquio. Quo iniquius fero, non fuisse me domi, cum ad nos accedebas sub aestatem decursam proxime. Nec diffido tamen fore, ut compositis in tranquilliore statu rebus domesticis, Harlemum quandoque excurram, te prae caeteris illic compellaturus, quem mihi propius conciliatum cupio. Nam nunc ne liceat uberiori indulgere sermoni, per morbum coërceor, qui ita remisit, ut omnem hactenus animi contentionem excludat atque aversetur. Vale & mihi favere perge. Hagae C. cicioclxiv. xx. Decemb.

EPISTOLA CCCLXIII.

PHIL. MUNCKERUS

Nic. Heinsio.

Hagam.

POST motam mihi, vir illustris, a *Daniele Heinsio*, incomparabili Parente tuo, salivam, hoc est, jam inde a juventute mea, plus quam epoptarum suspiriis inspicere desideravi Aldi Manutii Platonem, Leoni x. oblatum, eisdemque praefixum admirandum illud *Marci Musuri* carmen Graecum, cujus ille beneficio & meritis ab exilii sui latebris Epidaurensis repente Archiepiscopus emicuit. Priore autem anno demum accidit, ut Leidae in Basileensi quodam

dam exemplari in praedictos illos *Musaei* cothurnos inciderem, metaphrasin-
que eorundem, perquam sane egregiam, ab Acciajolo elegiaco itidem Latino
carmine adornatam. Verum uti terra diuturno solis calore arida uno imbre
nequaquam satiatur, ita ego carmine illo lecto descriptoque tantum abfuit ut
acquieverim, ut multo etiam magis videre exoptarim primam illam Venetam,
sine dubio rarissimam editionem Aldi; eaque propter praesenti hac epistola a te
expiscandum censui, an illa alicubi in hac Hollandia nostra visenda exstet. Quod
ego si scirem, non molestiae, non sumptibus ullis parcerem, donec his oculis
semel iterumque perlustrassem, & nonnullis meo. iudicio corruptis locis spera-
tam medicinam fecissem. Musaeo quoque poetarum Graecorum tersissimo ju-
cundissimoque praefixum est aliud *Musuri* epigramma, in quo me non capere
fateor verba haec de Lychno amorum conscio,

— — — Σιδήρειον δὲ λελογχῶς
Λίμα πολυπλάγκτης πρῶτον ποθεῦντας ἀέλλαις.

Aldus in elegantissima editione ab Anno MDLXXVII. ita vertit:

— — — *Ferreum autem illa (lucerna) sortita
Sanguinem, multivagis prodidit amantes fluctibus*

Hunc sanguinem unde, quaeso, nata est lucerna, & quare vocatur ille *fer-
reus*? An vero improprie per eum indicare vult oleum infelix, ut quod occa-
sionem praeberit crudeli isti & misero Leandri exitio? Quod posterius con-
jiciebat nuper Clar. *Superus*, Professor Daventriensis meritissimus. Cum tamen
& hoc satis durum videatur (licet norim ex *Salmasio* ad Solinum, saevum planta-
rum saepe vocari sanguinem) ad tuum hic confugio oraculum, vir illustris, ro-
goque quam possem humanissime, ut me haerentem vado, summae eruditionis
& experientiae tuae, ut sic dicam, tridente, ad instar illius aquarum domito-
ris apud Maronem nostrum, levare non digneris. Vale, vir illustris, Maecenas
plurimum honorande, & fiduciae huic meae & importunitati nimium fortassis
magnae ignosce. Dabam Harlemi VII. Januar. MDLXXV. Postquam die-
bus his vacivis admirandi illius Musuriani carminis versionem verbalem sive
propriam adornassem, in tribus autem vel quatuor locis omnino haererem,
subito calore & prae nimio discendi desiderio modestiae meae oblitus, etiam
has post humanissimum responsum tuum, quo plane hunc hominem beasti, de-
nuo exaravi. Ad quas, si ob animi infirmitatem & nauseam ex morbo reliquam,
tacueris, aequo, ut par est, animo feram; sin vero vel tribus solummodo verbis
de visendo alicubi Aldi Platone, propediem erudieris; ipso me Croeso opu-
lentiozem reddideris. Iterum Vale.

N I C. H E I N S I U S

Harlem etc.

EPISTOLA CCCLXV.

PHIL. MUNKERUS

Нагаш.

Tom. V.

H h h

dura

dum fuit *Lasarium*; sed quia nomen est proprium, magis arridebat *Lasarium*, uti *Lemurum*, & huic similia. vers. 60. in *τι προσωποφανής* num vitium statuimus typographicum pro *δι προσωποφανής*? An vero quia in antiquitatibus Rosini, quando primum intuemur Janum quadrifrontem, quarta facies non apparet, ideo Janum dicimus *τε προσωποφανή*. vers. 152. *ἡμεῖν*, Acciaiolus vertit *pacem*, ego *diem*, qui aliam ejus significationem non reperiēbam. Forte putavit Acciaiolus per metaphoram diem vocari pacem & omnem felicitatem, uti per noctem & tenebras indigitare solemus res adversas & miseras. vers. 167. & 168. distinxi Platonis auditores in juvenes & viros doctos, contra quam Acciaiolus fecit. Nunc autem poenitet me, quia Musurus hic videtur exprimere voluisse peculiarem illam Platonis ibi loquentis opinionem de *ἀναμνησεὶ ψυχῶν*. olim ergo mutabo; pro reliquis vero ponendum *ipsos*. Non incidit mihi nisi hac demum hora dum haec scribo. De aliis olim coram. Illud ne nunc quidem tacitus ferre possum; correctorem nempe Junianum ante paucas dies abunde mihi suppeditasse, unde Deo risui litarem. Cum enim dedicationis pag. 8. scripsissem, *id omne, hoc certe respectu postquam a Deo O. M. discessi, soli tuae &c.* ibi homo meus plane horrendum & ab omni pietate ac religione alienissimum credidit, *velle quenquam a Deo discedere*; ideoque per iteratam eamque seriam typographi petitionem me compulit ut mutarem. Tu vale, vir illustris, praecipuum & unicum seculi nostri ornamentum; quaecunque hoc meum, quod tuae quoque humanitati in partem debeo, munusculum aequi bonique consule. Dabam Harlemi a. d. xii. Kal. Quintileis, Anni C. cxciclxxvi.

EPISTOLA CCCLXVI.

PHIL. MUNKERUS

Nic. Heinsio.

Vianam.

U Nicus ille, controversus non minus, quam difficilis Ciceronis de Calendis intercalariis prioribus locus, qui exstat lib. vi. ad fam. epist. xiv. intra proximum triennium peculiarem hunc a me extorsit libellum; cujus titulos ideo in antecessum hinc tecum communicare volui, ut, si quando Harlemum nostrum transire contingerit, apud nos interjungere, & singula ejusdem capita mecum perlustrare non dedigneris. Typis describendum obtuli eum nuper *Danieli Elzevirio*. Sed ille absque consilio tuo nihil videtur tentaturus. Tu ergo, vir illustris, qui solus potes, tanquam Juno Lucina fer opem; & serva me foetumque hunc meum, obsecro. Vale & nos ama. Dabam Harlemi xxi. Maji cxciclxxii.

EPISTOLA CCCLXVII.

NIC. HEINSIUS

*Phil. Munckero.**Harlemum.*

IN eo eram, ut nonnihil ad te litterarum exararem, Munckere ornatissime, comitaturum novam Maronis mei editionem, quam una cum hifce, ab *Elzevirio* typographo, ut auguror, accipies, cum tuae mihi hesternodie tradebantur, quamque bonam uti in partem accipias enixum in modum obsecro. Non permittit valetudo, ut pluribus tecum agam, cujus ne ignarus sis, nuntio, totis jam tribus mensibus lecto adfixum me haesisse. Negotium interim tuum seriis verbis *Elzevirio* commendavi, apud quem utinam auctoritate tantum valeam, ut voti compos evadas. Vale. CIOIOCLXXIX. 26. Maji.

EPISTOLA CCCLXVIII.

PHIL. MUNCKERUS

*Nic. Heinsio.**Vianam.*

NUnquam verius, vir illustris, in ipsum illud antiquum Latium deferri, Maronemque nostrum ibi redivivum cernere, canentemque audire mihi visus sum, quam cum nuper illum, summa & incredibili quadam cura a te recensitum ad me misisti. Unde facile quoque existimare potes, quanto etiam promissarum in eundem annotationum tuarum desiderio tenear. Interim pro insigni isto munere humanitati & liberalitati tuae gratias ago habeoque plane immortales. Exiguum hoc quoque, quod vides, redhostimentum, libellum videlicet meum de Intercalatione, benigno, quaeso, vultu accipe. Quo per otium inspecto, si quando me errantem monere, harentemque extricare, aut novis etiam ad secundam olim editionem ditandam adjumentis sublevare non fueris dedignatus, immenso prorsus me tibi beneficio obstrinxeris. Vale, vir illustris, & honestis conatibus meis porro favere perge. Dabam Harlemi a. d. VII. Maji Anno C. CIOIOCLXXX.

EPISTOLA CCCLXIX.

PHIL. MUNKERUS

Nic. Heinſio.

Vianam.

Toti olim laetitia incedebant Romae, ſi qui eruditorum ſuffragiis Apolline Palatino dignum munus aliquod compleviſſent. Si rogas, vir Illuſtris, quid mihi quoque animi fuerit tum, cum literis tuis politiſſimis nuntiares nuper, Intercalationem meam a te (hoc eſt, a vero & unico Apolline noſtro Belgico) non modo plus vice ſimplici lectam, perque omnia probatam, ſed ea etiam illuſtris Bibliothecae tuae in parte, quae venerandae antiquitatis interpretes ac vindices complecteretur, depositam fuiſſe, ingenue fateor, me, etſi ſingularem quandam ea in re humanitatem agnoſcerem, facere nihilominus non potuiſſe, quin liberrimo illo minimeque fucato iudicio tuo vehementer delectarer, aperteque non ſemel prae me ferrem, ſolam hanc tuam, tanquam praeconis alicujus Olympici vocem, ingens mihi omnique ſpe majus cunctorum in libello iſto adornando exantlatorum laborum operae pretium exiſtere; neque hoc ſolum, ſed inſuper etiam perpetuum mihi deinceps calcar futurum ad materiam eandem magis magisque indies amplificandam & expoſiendam, poſtquam praefertim juxta *Wilhelmum Langium* de annis Chriſti, & *Johannem Seldenum* de anno Civili Hebraeorum, etiam *Franciſcum Balduinum* in leges xii. Tabularum naſtus eſſem, quem ipſum exiſtimem pleroſque reliquos JCtos in graviſſimos illos circa legem xcvi. de V. S. errores diduxiſſe. Sed de me haecenus verborum ſatis: poſtulat enim, cheu! neceſſitas pietasque, ut etiam de *Thoma* noſtro Delpheni, τῷ νῦν ἐν ἀγίοις, pauca ſubjiciam. Vix ille quoque toto nuper menſe exultarat ſuper praeclaro illo iudicio tuo de editis recens & illuſtratis per ſe Mythologis, cum ſubito, ecce, hora illa fatalis ſupervenit, jubetque naturae debitum perſolvere a. d. xxi. Maj. hora vespertina ſexta, expleto vixdum aetatis anno xxxix. Qui ergo gaudebas nuper nobiſcum de exorto, nunc viciffim dole de erepto tam propere novo hoc Critico, qui morte ſua etiam confirmavit vulgare illud, praecocia ingenia raro eſſe vivacia. Sed longus ſum. Tu vale, vir illuſtris, diu vive, & me laboresque meos, quod facis, etiam deinceps favore tuo proſequere. Dabam Harlemi a. d. xi. Junii, Anno C. ciciocclxxxi.

EPISTOLA CCCLXX.

LUC. HOLSTENIUS.

*Nic. Heinsio.**Florentiam.*

EA parentis tui viri summi & incomparabilis in rem literariam beneficia extant, ut qui Heinsianum nomen non veneretur, humanitatem aut induisse nunquam aut ejurasse videatur. Me autem multis & immortalibus meritis ita sibi devinxit, ut quicquid haecenus mediocri studiorum conatu assecutus videor, id ferme totum illi acceptum feram. Quo magis gaudeo, quod quam haecenus gratiam referre non licuit, ejus saltem testandae occasionem tua haec peregrinatio mihi obtulerit. atque hoc tibi persuadeas velim, optatissimum mihi tuum adventum complexumque fore, nec commissurum me ut quicquam obsequii officiique desideres, quod quidem a me praestari possit. Tu vero, mi Heinsi, valetudinis rationem diligentem habe; quae si quam labem ea qua nunc es aetate contraxerit, in reliquam vitam omnem transmittet, non levi mentis & studiorum impedimento. Florentiam tibi placere non miror: quem enim illa splendore, elegantia, tantaque civium principumque humanitate non capiat? sed ut aestati transigendae optima est, ita acriori autumnii hiemisque aëre minus commoda valetudine utentibus noxia. Quocirca ultra Kalendas Novembres te isthic commorari nolim. Sed quis recta inde ad urbem te accedere vetat? nec ipsum Aesculapium ista suadentem auscultaverim: menses enim frigidiores commodissime hinc transiguntur. Tu ergo, ni quid aliud iter impediat, aut divertat, recta ad nos propera, caeli Romani clementiam experturus, utinam & βιβλιοφυλάκων humanitatem! sed quantum quidem in me erit dabo operam, ut hujus commorationis fructus tibi constet. Sane Barberianam bibliothecam MSSis Codicibus non male instructam tibi offero, qua perinde ac tua uteris. Poëmatum tuorum elegantiam *Donius* noster jam mihi commendarat. & quid nisi polita & erudita omnia expectemus ab eo, qui in Musarum gremio natus & educatus fuit; & cui ipse elegantiarum parens Ovidius nitorem suum debebit? *Gronovii* emendationes Livianas jamdudum expecto. Earum specimen cum Romae nobis adesset, vidi & magnopere probavi. tum enim totus erat in antiquis exemplaribus conferendis. Sed quod aliis tum potius, quam sibi morem gerere cogeretur, minus sibi satisfecisse videtur: nam postremis suis indicem ad me misit aliquot locorum primae decadis, de quibus antiquum exemplar Mediceum consuli cupit: autographum ejus ad Cl. *Donium* misi, qui & mei & amici communis causa conferendi laborem, ut spero, non recusabit. nam a te tuis in studiis occupatissimo id contendere non ausim. Vale, vir egregie, & quamprimum ad nos vise. Cl. *Allatius* quoque officia defert & veramianter te resalutat. Romae III. Id. Octob. CXCXCVI.

E P I S T O L A CCCLXXI.

L U C. H O L S T E N I U S

*Nic. Heinſio.**Neapolim.*

Mitto literas, quas promiſi, ad Eminentiff. Cardinalem & Archiepiſcopum Neapolitanum, cujus auctoritas aditum tibi parare poterit ad bibliothecam Auguſtinianorum, ſi forte abſuerit pater ille *Nicephorus*, ad quem alteras ſcripſi. ad D. Joannis bibliothecae curam habebat P. *Joannes Chryſoſtomus*, & in quo nihil officiorum deſideres. Eum meo nomine plurimum ſalutes rogo, ut & P. *Boluitum* Clericum regularem ad D. Pauli, qui & ipſe bibliothecarii munere apud ſuos fungitur. Memini etiam me aliquot veteres codices vidiffe apud Patres Benedictinos ad S. Severinum. ad quos facile acceſſum tibi parabit P. *Nicephorus*. Hoc etiam rogo, ut officioſe a me ſalutes doctiſſimos viros *Camillum Peregrinum* & *Camillum Tutinum*, qui literarum nomen decuſque praecipue tuentur in ea civitate, & cum quibus vetus mihi amicitia eſt. Vale, Cl. Heinſi, & feliciter rem gere, ut ſalvum te & incolumem quantocyus recipiamus: id ex animo voveo. VIII. Id April. MDCCXLVII.

E P I S T O L A CCCLXXII.

L U C. H O L S T E N I U S

*Nic. Heinſio.**Neapolim.*

GAudeo profectionem Neapolitanam ex voto tibi proveniſſe, & tam facilem te reperiffe aditum ad Carbonianam bibliothecam. Id doleo P. *Nicephori Comneni* humanitate te fraudatum, quam *Gronovius* aliique mea commendatione prolixam experti ſunt. Nunc cum P. *Chryſoſtomum* fatiſ conceſſiſſe nuncies, vellem ejus indicaffes nomen, qui in bibliothecae cura ipſi ſucceſſit; jam enim curaffem officioſiſſimis literis hominem demulceri ab ordinis ſui ſubpraefecto, ut facili illo promptoque utaris, quamdiu libuerit. Aëris Campani clementiam tibi placere non miror, nihil enim caelo illo mitius, nihil ſuavius. adeoque ſuaſerim, ſi cum parentis venia fieri poſſit, ut aeſtatem iſthic exigas, qui valetudinem morbis afflictam confirmes. Magnopere enim thoracem humorum defluxu debilitatum ceteraque pectoris vitia benignioris aurae uſus diuturnior corriget. Elegiam ad magni Maronis & Sannazarii manes natam lubentiſſime viderim, eritque mihi omni Sirenium captu jucundior. Viros optimos *Tutinum*, *Peregrinum* & *Boluitum* quam humaniſſime a me ſalutes rogo. Inducias Belgicas Galli omni conatu diſturbare conantur, & regium Oratorem pleraſque provincias in partes ſuas pertraxiſſe ajunt, Hollandis interim firmiter pacis conſtitutionem urgentibus. Vale & rem feliciter gere. Romae die XI. Maii MDCCXLVII.

EPI-

EPISTOLA CCCLXXIII.

LUC. HOLSTENIUS

*Nic. Heinſio.**Neapolim.*

Invitus sane scribendi officio ante octiduum defui: quod tardius tuas ad me tunc miserat mercator, tum etiam quod unius horae angustiiis circumscriptus de Grammaticis quae scire avebas, expedire non potuerim. De hisce quae studium & consilium tuum dirigere possint, schedula adjuncta exhibet. *Putſchii* etiam συγγραμματα, si jusseris, mittam, ne qua veteres scriptores ab interitu vindicandi occasio tibi pereat. *Arausianum* *Messium* integris adhuc *Sallustii* & *Ciceronis* scriptis usum vix dubito, multa quoque ἐν τοῖς σωζομένοις restitui aut confirmari ejus beneficio posse. Sed tu rectius ista dispexeris: cui bona fors ἐμαίον illud in manus dedit. Parentis tui incredibilis humanitas pudorem meum onerat, qui id mihi gratiae apponit, quod me haudquaquam promeruisse scio. Et quis promerendi locus relinquatur mihi tot tantisque nominibus devincto, quae nec vitae impendio expunxerim. Illi enim bonam rectamque mentem & veteris sapientiae amorem acceptum refero, hoc est, summum illud in vita bonum, sine quo vitam vitalem non ducerem. Hoc utrique tamen persuasum cupio, quamvis praestare nihil possim, omnia vestri causa me velle. Sed aliud quoque suavitatis condimentum literae tuae habuere *Gronovianam* epistolam; quae tanto majori voluptate me perfudit, quod opportunissima advenit; eodem scilicet momento, quo & alias a *Puteanis* facribus acceperam, ad magni illius amici & municipis mei studia spectantes. Eorum rogatu *Alexiadem* *Annae Comnenae* *Lutetiam* misi, ut porro inde ad *Gronovium* curetur, cujus Latinam interpretationem regii typographi efflagitant. Epistolas ab amicis *Parisiensibus* fasciculo inclusas *Christophorus Puteanorum* frater, tui amantissimus, mittit. *P. Stradae* decas secunda adhuc sub praelo haeret. ego non nisi post menses aliquot proditurum existimo, cum figurarum sculptura tardius procedat, quarum lenocinio adornari debet. *Scoppium* horribilem in eum cudisse librum non ignoras. Illum nunc typis publicandum amici *Pavio* nuntiant. nec deerunt vapulanti fautores. Modos huic dramati faciet tibiis paribus *Ludio* ille noster ex *Hetruria*. Vale Cl. & amicissime *Heinsi*, & communes jam amicos a me officiose saluta. Romae VIII. Kalend. Jun. CIOIOCLVII. Elegiam de *Pausilypi* laudibus nunc accipio. eam *Musae* & *Charites*, aut *Parthenopea Siren* tibi dictavit. Commodum hoc lenimentum mihi ineptissimis quibusdam versibus legendis fesso adfuit, ut taedium inficeti carminis animo detergeret. Adeoque duplices tibi gratias ago pro isto *Musarum* nectare.

EPI-

*Nic. Heinſio.**Neapolim.*

Tardius forte quam par erat suavissimis tuis literis respondeo, quod pro tua humanitate occupationibus meis haud gravatim condonabis. Gaudeo te in evolvendis veteribus istis Grammaticis tam egregium fecisse operae pretium. Ita plane praesagierat animus. Nec poterat illud ἔρμαιον in meliores manus incidere. Alexiadem meam jam ad *Gronovium* perlatam spero. Hoc enim *Puteani* fratres, ad quos eam misi, se curaturos promittunt. Qui regio typographio praesunt avide versionem ipsius expectant. Ubi eam acceperint statim subjicietur praelo. Moliuntur magnum & absolutissimum historiae Byzantinae corpus. & subsidia undique conquirunt. Submisi etiam Joannem Sinnanum, qui Alexii tempora proxime excipit, & Caloioannis filii ejus & nepotis Emanuelis res gestas persequitur, in quibus multa extant, quae regni Neapolitani historiam illustrabunt, quod Normanni pugnacissimi homines tunc sibi vindicabant, & fortiter tuebantur adversus Graecos pariter & Germanos armis id sibi repetentes. Misi etiam Συλλογὴν antiquitatum CPnarum multo copiosiore ea, quam a *Douſa* & *Meursio* habemus. *Petrus Lambecius* nepos meus post Gellianas lucubrationes Eunapii Sophistis ex regio MSto persanandis manum admovit, novam additurus versionem, & post unum alterumque mensem editionem absolutam nos expectare jubet. Ego interim ingenii ardorem sufflamino illo, σπεῦδε βεγθέως, donec Mediceum codicem optimum & antiquissimum inspexerit in suo ad nos accessu. Etenim sub principium Octobris cum mihi adfuturum spero. Nam vix continere cum potui, quin adulta jam aestate huc properaret. Rumor de tumultu populi apud vos exorto anxium me sollicitumque tua de salute habet. Non dubito quin genium morisque ejus civitatis jam perspexeris, hoc tamen moneo, dum populus in fermento est, ne temere in publicum prodeas, sed apud mercatorem aut popularem aliquem te contineas. Scatet enim urbs illa hominibus sceleratis, quos ad facinus quodcunque perpetrandum & projecta audacia & extrema egestas facile impellit. Eo enim velut in sentinam totius regni colluvies confluit. Sed non diffido prudentiae tuae. Doleo tamen temporis & amoenissimae commemorationis fructum tibi interim perire. Vale, amicorum suavissime, & num omnia vobis satis salva quam primum potes significa. Romae III. Id. Julias CIOIOCXLVII.

EPISTOLA CCCLXXV.

LUC. HOLSTENIUS

*Nic. Heinsio.**Patavinum.*

Vererer ne ἀπροσγυοεῖν diuturnior amicitiae nostrae fraudi esset, nisi meum animum tibi perspectissimum esse crederem, sciremque te affectum potius quam sollicitam officiorum ostentationem ab amicis exigere. Interim tuis responsum debeo. harum primae, quas Bononia mense septembri scripseras, sub exitum Novembris mihi ex Pelignis & Marrucinis redeunti adventoria longe gratissima fuere; quod te ex Neapolitano tumultu feliciter elapsum nunciarent. Paulo post binae Patavio supervenerunt negotiis collegii nostri, quorum causa iter intempestivum susceperam, etiam tum occupatissimo. Haec longioris silentii causa, cui veniam spero impetrabit ea, quam toto illo itinere circumtuli, tui & Nasonis tui memoria. Etenim Sulmone, ubi substiti triduum, diligentissime inquisivi in codices schedasque *Ciofani*, magno te gratissimoque munere beaturus, si quid eorum bona sors obtulisset. Sed quod nobilium plebisque factionibus commota civitas tota tunc in fermento esset, haud tutum fuit versari in publico, & privatorum aedes curiosius rimari. hoc duntaxat rescire potui, ad nescio quem obscurum & ignobilem hypodidasculum pervenisse adversaria *Ciofani*, qui primarius magister ludi fuerat. Ita quidem re infecta inde discessi: sed operam mihi sedulam polliciti sunt *Jo. Ant. Tabassius* Canonicus & patricius, & *Mutius Febonius* chorepiscopus, quos isthic amicos habeo, nec a pervestigando desistent, antequam certum quid exploraverint. Faveat diligentiae nostrae ἔρμης ὁ λόγος. quicquid ille obtulerit, tuum erit, mi Heinsi. De Alexiade factum nollem, quod tibi nuntianti non credidissem, nisi me paulo post submissum a regio typographo protreptico confirmasset. Id fidem meam nostramque amicitiam testor, me non alio animo codicem meum Lutetiam misisse, quam ut *Puteanorum* fratrum opera porro ad *Gronovium* nostrum perferretur: idque tuo me fecisse consilio haud dubie recordaberis. Nunc manu veluti praedae injecta & mihi beneficium periisse, & amicissimo homini editionis spem laudemque interceptam video: mirorque plurimum, qua fronte in protreptico Cardinalis *Barberini* jussu codicem submissum scripserint; quem *Gronovio* destinatum injecta, ut duxi, manu interverterunt. Neque enim ex Barberina, sed ex Medicea bibliotheca describendum curavi; eique rei hominem graecum Roma Florentiam meo sumptu perduxeram. Neque vero concoquere potui, quin acriter ea de re conquererer apud regii typographi praefectos, quod ipforum culpa fides mea vacillet apud eum, cui studia & obsequia mea probare impense cupio. Poëmatum pulcherrimorum editione Musas & Charites omnes tibi devinxisti; me vero etiam insigni benevolentiae testimonio. Non poterant se meliori elogio bonis doctisque insinuare, quam equitis *Puteani* illustri & venerando nomine. Hoc enim

virtutis & humanitatis sacrarium omnes merito amant, colunt, suspiciunt. Operae pretium haud dubie feceris, si scriptorem illum veterem rerum Berengarii, haftenus nec fama notum, ex tenebris protraxeris. Inscriptiones Zelandicae pergratae mihi fuerunt. De Nehelennia frustra inquiri puto; fuit enim haud dubie numen nomenque *ἱεὺς ὡς*, cuius generis non pauca in magno opere Gruteri extant; de quibus haud temere quisquam, nisi forte Goropius aut Schrickius, pronuntiaverit. Vale; mi Heinfi, & parentem tuum officiosissime a me saluta. Lambecius nepos meus cum amicissima salute gratias pro munere maximas agit. Romae ix. Eid. Februar. ciorcxlviij. Adjunxi literas ad Fran. Bern. Ferrarii bibliothecae Ambrosianae praefectum, veterem & optimum meum amicum, ille unus tibi instar omnium erit.

EPISTOLA CCCLXXVI.

LUC. HOLSTENIUS

Nic. Heinfi.

Patavium.

UT videas, quam non sine successu nobis fuerit amicorum diligentia in Ciofani observationibus pervestigandis, mitto ad te literas Mutii Febonii Chorpiscopi Sulmonensis. Is Antverpiense exemplar apud fratres Franciscanos se reperisse nuntiat Ciofani manu passim interpolatum & emendatum. verum cum exemplar nec prece nec pretio obtineri possit, suam in transcribendo operam offert: quam ego minime negligendam ratus meum codicem ad ipsum misi, ut in ejus margines accurate quicquid id laboris fuerit, transcribat. Rogavi praeterea ut porro in perquirendo pergat. Idque eum sedulo facturum non dubito. Librum meum statim ut recepero, ad te perferendum curabo, & si quid amplius erui in lucem poterit. Literas meas, quas ante paucas septimanas ad te dedi, recte perlatas spero. Adjunxissem alias ad amicos Mediolanenses, si humanitatis ac doctrinae tuae praestantia aliorum commendatione egeret. Vale, vir praestantissime, meque tibi omni affectu addictissimum, quod facis, porro ama. Romae prid. Kal. Martias ciorcxlviij.

EPISTOLA CCCLXXVII.

LUC. HOLSTENIUS

Nic. Heinfi.

Mediolanum.

ANxium me diu sollicitumque habuit valetudo tua: parum enim commoda Patavii re usum amici nuntiarant. Nunc itinori etiam vires suffecisse cum intelligam, gaudeo sane tibi gratulor: eoque confirmatiorem experieris spero, quo ad patrium caelum accesseris propius. Interim recte facis, quod lenite festinas, gradumque subinde sistis, praesertim ubi Musae de via invitant, & morae pretium ostendunt. Quod Mediolani haud poenitendum feres, nisi me

me concepta de Ambrosianae bibliothecae praestantia opinio fallit, & eruditissimorum hominum, qui eidem praesunt, humanitas. Et quia in Latinis poetis restituendis tua maxime versatur opera, excutias quaeso Catulli exemplar, quod *Ripamontius* in Card. Borromaei vita mirifice praedicat. Ovidianos codices optimos bona favensque fortuna tibi afferat: nam Sulmonensis spes plane decollavit: cum hactenus summa diligentia effectum sit nihil. Mitto *δευτέρας* *ὀροντίδας*, quas ipse Plantiniano observationum exemplari appinxerat. Sed nebulam videbis pictam in pariete, ita levia sunt & bonae frugis vacua haec annotamenta; quae veterum librorum adeo non meminere, ut de fide hominis dubitem, verearque, ne MSSis Codicibus praedicandis fumum venderit. Interim hoc unum impensi laboris pretium nobis erit, ut quod perisse videmus, perditum ducamus, nec frustra quaerendo amplius laboremus. Opem in libris apud vos parandis quod tam liberaliter & benigne offers, gratias, quas debeo possumque maximas ago; nec repudiat beneficium herus meus bonorum librorum, quod nosti, cupidissimus. *Pollius* tuos puto Amsterdamum misit. Id enim se facturum quantocyus promittebat, cum indicem eorum conficerem. Eos quoque quos Neapoli reliqueras salvos tibi futuros confido. Nam incendiis aediumque demolitionibus post discessum tuum grassatores illi abstinerunt. Nummis antiquis onustum ad tuos te redire gaudeo: ita non solum praecellentiam sed & instrumenta eruditionis perdit Italia. Habebunt enim nostri homines, quo semidoctorum antiquariorum saltum retundant. Prostat hic magna numismatum supellex, studio impensaue incredibili conquistata a Cardinali *Boncompagno*. Sed emptorem vix inveniet Romae aut alibi per Italiani. Sed quid ais? *Allatius* noster in Melampygmum incidit? Id saepe futurum praedixi, quo intempestivam maledicendi pruriginem compescerem. Sed qui alios convitiis defricare amat, se ab aliis probe depexum haud aegre feret. Neque enim obstinatum doctos viros praesertim *ὁ δὲ βορέυους* suggillandi voluntatem nisi cum vita deponet. Parentis tui summi optimique viri effigiem mihi periisse doleo. Etenim lubenter ex tanto intervallo recognoscerem, quam animo adhuc infixam servo. De *Alexiade* nuper rem ut gesta est planissime exposui. maxime enim fidem & candorem meum tibi & *Gronovio* nostro probatum cupio. Salutat te *Lambectus* noster, qui studiis ac famae tuae summopere favet. Vale, amicissime Heinsi, & quod facis rem porro feliciter gere, & me tibi addictissimum ama. Romae Idib. Maiis. *MDCLXVIII.*

EPISTOLA CCCLXXVIII.

LUC. HOLSTENIUS

*Nic. Heinsio.**Leidam.*

QUO te hactenus regna & provincias externas obeuntem constanter prosecutus sum affectu, amicissime Heinsi, eo nunc reditum tibi ad Batavos tuos gratulor, teque in suavissimum illum Musarum sinum, in quo na-

tus es, & parenti optimo restitutum gaudeo. Id nunquam tibi obscurum fuisse existimo, quanta nobis venerationi virtus tua & summa humanitas interim fuerit; quamvis silentio eam magis quam ambizioso literarum officio coluerim. Hoc enim vere tibi affirmo, eorum, qui a multis annis ad urbem accessere, fama faventiore usum neminem, neque memoriam altius impressam omnium animis reliquisse; quod ad paterni ingenii laudem, & illustrem tantis nominis gloriam felici aemulatione te non contendere, sed pervenisse cognosceret. Mihi autem praecipua causa est, cur prae ceteris obnixè te omni quæ obsequio colam, parentis tui, summi viri, aeterna in me studiaque mea beneficia: cui ego quidquid in veterum sapientia cognoscenda hactenus assecutus videor, totum me debere profiteor. Claudianum tuum, munus longe gratissimum, ab Illustrissimo equite *Puteano* accepi. idemque Cardinali *Barberino* tuo nomine exemplar elegantissime compactum obtulit, quod pro eo amore, quo optima studia complectitur, accepit legitque lubentissime, ita ut ingenii tui sollicitiam & ἀνεξίβητον^{ἀνεξίβητον} iudicii in eo scriptore restituendo summopere probaret. Et sane tantum te praestitisse iudico, ut ceteri ante te nihil egisse videatur, neque quod alii post te amplius agant vel tantillum reliqueris. Eoque magnam nobis Ovidianae editionis expectationem commovisti, quo nullum praestantius eruditionis tuae monumentum consecrare poteris posteritati. Atque hoc etiam nomine in Belgium te rediisse gaudeo, ubi ista bono publico procures; nam valetudini tuae ab arctoi coeli inclementia non leviter metuebam, utcunque benignam regii favoris auram te expertum non dubitem. Vale, & parentem tuum veteresque amicos quam officiosissime a me saluta. Romae III. Kal. Mai. CIOICLI.

EPISTOLA CCCLXXIX.

LEO ALLATIUS

Nic. Heinso.

Patavium.

NON dicere effabile est, quantum indoluerit animo meo, turbis illis Parthenopeis, quae usque dum non remittunt aliquid, sed in dies ingravescent, & auxiliis Gallicis, & classe navali magis ac magis furoribus exardet, pacatissima tua, & summe perficua studia, non modo interrupta fuisse, sed suppellectilem etiam litterariam, ingenti inter alia nostri *Vossii* damno surreptam. At summae postea voluptati fuit mihi, cum evitato malo, te incolumem Liburnum, ac tandem Patavium evasisse, ex gratissimis tuis accepi. O rerum humanarum vices, & nunquam non circumvertentem rotulam. An non ridiculus ille fuisset, qui tibi Neapolim properanti dixisset, Dominationem Hispanicam, tot suffultam praesidiis, in florentissimo ac tranquillissimo regno, ab hostium machinis disjunctissimo, nulla gravi de causa, a pueris non aere obstitis, sed tremulis cannis armatis, antequam Parthenope exires, per clades, sexcentaque alia infortunia in discrimen tam certum adactum iri. Re nondum tota explicata, risum movisset, & tamen effectum deprehensum est. Malumque

que ita defaeviit, ut jam restitui res in antiquum statum nullo modo possit, & suis jam fortunis & dominio diffidant Hispani, qui licet multa commententur, ut verbis saltem dignitatem sui imperii apud Siculos sustineat, nihil tamen proficiunt. & jam res haec apud summum Patrem geritur, & infra paucos menses conficietur, cum non minoribus turbis Sicilia fere omnis vacillet, & undique tentata auxilia concidant. Ita regna nascuntur, & occidunt. Faxit Deus, provideat. Ipse interim, idque ingenue fateor, quicquid sum, tuus sum. Impera, habebis me promptum, & ad servitia, si quae imposueris, ingeniosum. Statim atque cum D. *Albano* sermonem habui de carminibus Claudiani describendis, ex Codice Epigrammatum, te ea flagitante, humanissime librum communicavit, & ipse percurrens, sub ejus nomine Carmina, notas ad eadem in margine exscripsi, quae modo transmitto, ut editio, quam moliris, Claudiani illustrior exeat; beneque judico factum, si unde haec carmina hausta sint mentio indicatur, laudemque quam ipsa meretur, habeat bibliotheca Vaticana. Vale, vir optime, Republicae litterariae & politioris litteraturae commodo natus. Valeat quoque ex me disertissimus ac omni generis eruditionis parens D. *Daniel*, pater tuus. Quid agit noster *Vossius Isaacus*? eum quoque velim salvere jubeas. Vale iterum. Romae cicidcxlviij. xv. Decemb. Romae.

EPISTOLA CCCLXXX.

LEO ALLATIUS

Nic. Heinsio.

Leidam.

Luculentum hunc mihi diem dedisti humanissimis litteris tuis, quibus nuntias ad tuos te reversum: sed voluptas eo mihi multo maxima est, post tot labores itineris ad tuos receptum incolumem, & fructum domi capientem, in domestico Musaeo negotiosum esse, librisque pluribus ex partibus advectis, complicandis, componendisque studere. Ne dicam de prudentia, quam ex Urbium & hominum moribus, quos hac tua peregrinatione invisisti, affectum te esse, certissimo mihi constat, dum & ingenium tuum & studium, & τὰ πᾶντα ἐν θυμῷ mecum recolo. Vive diu, mi Nicolae, & quam sustentasti, bonam valetudinem, sedulo accura, ut quae inde sperantur ab omnibus commoda largius effundantur. Sane, si jusseris, non deero tuae industriae usui aliquantulum esse. Tiberius, ceterique Rhetores nondum lucem omnes aspexere; morae non alia causa fuit, quam nostrorum Typothetarum infelix inopia, qui uno tantum litterarum charactere contenti, eo in aliis praepedito non possunt ad plura animum advertere. Spero tamen eo expedito editionem prosequendam. Pervenit ad vos Syntagma meum de consensione Ecclesiae Orientalis atque Occidentalis perpetua. Nuntiatur mihi a viris ingenuis, in vestris regionibus, licet plerisque placuisset, displicuisse tamen *Salmasio* & *Hagio*, parareque eosdem in me meaque calamum. Scripsit praeterea *Salmasius* amicis Parisinis, qui me de eo certiores fecerunt, fidem

astringens suam, se velle haec mea acriori examini subigere. Summopere mihi gratulor a tantis viris impeti, dignumque irae eorum judicari. Sed cum petant calamo, securus interim ipse vivo. Nonnulla *Salmasii* in opere de Primatu non ad veritatem, ut ipse existimo, ab ipso relata perstrinxi. Si ipse meliora adducet, cautior & libens fiam. Sed videat prius in rebus Ecclesiasticis, & rebus fidei, ex quibus verum exsculpendum est. Rogo iterumque, ut si quid ipse de hoc argumento in publicum edet, nam quid privatim inter familiares edisserat, non aveo scire, quam celerrime indices. Sic quam opportune mihi operique providebo. Dignus est Claudianus notis tuis, ne diuturna mora animos expectantium angas. Quare precamur rerum familiarium citam expeditionem, ut amotis impedimentis similibus studiis incumbas. Gaudeo *Isaacum Vossium* a Suecorum Regina evocatum. Erit semper paratus ad majora promerendum. Dominus *Albanus* resalutat, polliceturque cum quidpiam in rem tuam recurrerit, officia sua omnia. Legit mihi inter *Balsaci* epistolas selectas lib. 3. sextam, gaudebamusque te laudari a viro laudatissimo, & merito, virtutum tuarum admiratores. Vale Romae xi. Kalend. Mart. cix. cclxix.

Claudianus inter auctores Chymicos recensetur. Codex meus Manuscriptus, in quo habentur varii illius artis scriptores. *ονόματα τῶ ποιητῶν τῆ τέχνης. Πλάτων, Ἀριστέλης, Ἑρμῆς, Ἰωάννης ἱερεὺς, Δεμόκριτος, Ζωσίμους ὁ μέγας, Ὀλυμπιόδωρος, Στέφανος ὁ φιλόσοφος, Ζάφας ὁ ἐν Περσίδι, Ζυνέσιος, Δίοςκωρος ὁ ἱερεὺς τῆ μεγάλου Σαράπιδος τῆ ἐν Ἀλεξανδρείᾳ, Ὀΐανης ἀπ' Αἰγύπτου, ἡ Μαρία. Πελάγιος. Πορφύριος. Επιβόχιος. Κλεοπάτρα ἡ γυνὴ Πτόλεμαίος τῆ βασιλέως, Ἀγαθοδαίμων. Ἡρακλείος ὁ βασιλεὺς, Θεόφραστος, Ἀρχέλαος. Κλαυδιανός. Σεργίος. Meminit quoque illius Stephanus Alexandrinus epistola ad Theodorum, εἰσὶ δὲ οἱ περὶ κλαυδιανὸν, καὶ τῆς ἄλλης, ὅμῃ πάντες ἀδελφοὶ ἦσαν εἰ μὴ μόνον χρήσιμοι δύο ἐκ εἰσιν καὶ ἡλσοκάργενος πάσα ἄχρης. loquitur de agricolis inutilibus in arte Chymica. Stephanus hic scribēbat tempore Heraclii Imperatoris.*

Haec de Claudiano Chymico leguntur ante Claudianum *Heinsii*, nisi quod Graeca verba Theodori desunt, forte quia Allatius minutissimo caractere literarum difficilem lectionem verborum fecerat, nec ego me satis expedio. Vid. & Conring. de Hermetic. Medic. cap. 3. Borrichii Hermet. pag. 79. & 80. & de Ortu & Prog. Chymiae pag. 97.

EPISTOLA CCLXXXI.

LEO ALLATIUS

Nic. Heinsio.

Leidam.

FUimus nos hoc eodem anno jactura litteratorum hominum, & studiis doctrinisque illustrium vobis multo miseres, nimis enim ad hunc diem proventum est nequiter & morbis quotidie ingravescentibus, metuimus ne infortunatiora accidant. *Paganinum* enim fere continuo, quos forte & ipse nosti, consecuti sunt, *Franciscus Ingolius* Congregationis & fidei propagandae a secretis, eruditore literatura, & Mathematicis scientiis instructissimus. Ipso anni exordio familiaribus indixerat, se hoc anno, si aliquo valetudinis morbo tentatus fuisset.

fuiſſet, vitam abſque dubio poſturum; & cum cubaſſet in morbo, ſtatim de-
 oimur poſt diem amici ſalvemini, quod & comprobavit effectus: namque,
 die illuſcente undecimo, viſa deſunctus eſt. *Caesar Becillus* oratorii Presby-
 ter, qui multos abhinc annos concordiam Euangeliorum non ſine laude edide-
 rat, & poſtmodum rebus Chronographicis animum advertens pro Calendario
 opus doctum ſane & laborioſum apertiffimis tabularum demonſtrationibus, &
 aliarum gentium annorum cum Romanis collatione, examinatis ac diſcuſſis ad-
 verſariorum rationibus terminaverat, & jam parabat editioni. Mors tamen
 conatus ejus intercepit. Antequam ad Oratorii Patrum album referretur Me-
 dicinae fortunatiſſimae operam navaverat. *Joſephus Moronus* in rebus Theologi-
 cis pertractandis clarus, multa in ſacram ſcripturam commentatus eſt doctiſſi-
 me. Quorum nonnulla ad guſtum Lugduni & Romae emiſſa ſunt: reliqua
 digna lumine apud haeredes ſed non conſanguineos, miſeros atque inopes,
 omniaque ad lucellum vel minimum revocantes, vel extinguuntur, vel alio
 avolabunt, cum ſua Bibliotheca librorum & copia, & raritate conſpicua. Fuit
 patria Mediolanenſis, & humaniſſimis moribus. *Petrus Baptiſta Burgius* Hi-
 ſtoriae de bello Suecico & commentariorum de Reipublicae Genuenſis digni-
 tate, & dominio in mari Liguriſco ſcriptor, aetate prima adhuc & valida,
 deſideratiſſimus amicis Januae emoritur. *Syncreticus* quoque Patavii, J. U. Do-
 ctor praetantiſſimus, & alii alibi exſtincti ſunt, ut amicorum litteris nuntia-
 tur. Nec rabies morborum declinat: imo in ſingulos dies magis ac magis quaſi
 tum exorſa, in atrociores & funeſtiores calamitates deploranda clades, genus
 humanum involvit. Miſerum ſane eſt, una omnes ſimul, & qui virtuti & li-
 teris, & qui luxui atque ignominia, & qui fatua rerum omnium ignoratione
 belluas exaequant, eodem pondere aeſtimatos, eodem morbo elatos, in com-
 munem tumbam damno irreparabili praecipitari. Miſerum eſt. quis hanc con-
 ditionem humanam non deteſtatur? ſed tamen verum eſt. Quis poteſt di-
 cere Domino; cur ita facis? bonum eſt, opportunum eſt, feliciffimum eſt,
 quod deo collubitum eſt. Nil obſtat, ſi ipſe non intelligo, & illius arcana
 non aſſequor. Non quod mihi videtur rectum, ſed quod Deus facit, id rectum
 eſt. Diſcurſus humanus fallax & neſcius inferatne Divinae ſapientiae legem?
 ſed vide quo me traxit de tanta amicorum jactura dolor. Dolet cordi meo,
 miſerisque crucior modis, dum ſimiles amici ſeſe mihi rapiunt. Homo ſum.
 Sed ſedato cogitationis illo impetu, imperio rationis fraeno me. Chriſtianus
 ſum. Gaudeo ex infortuniis ereptos, ſalutis ſuae ſecuros Beatorum ſedes te-
 nere, & Deo creatore ſuo perfrui. Male caeleſtia cum terrenis, incorrupta,
 ſempiterna cum lubricis, abſone felicitas cum infortuniis conferuntur. Sed
 ad rem. *Salmaſius* ad familiares ſcribens multa in me, meumque Syntagma de
 Conſenſione Eccleſiarum obloquitur, minaturque mirabilia. Vidi ego ipſius
 autographa. De minis non curo. Ubi notae ſe patefecerint, meum erit illas
 excipere, excutereque. Ut aliquid me adverſus dicat, neceſſum eſt illud ante
 omnia probet, concordiam, quam ipſe compono, non eſſe concordiam, quod
 nunquam faciet. Res nimis aperta eſt. Quidquid ille ex Grammaticorum
 penu

penu de veritate Dogmatis eduxerit, sciat id contra me non esse, qui tantum probo, quod tenent tenueruntque Graeci, id tenuisse tenereque Ecclesiam Romanam. Si sanus est, nec ipse negabit, ni solem etiam interdum lucere negaverit. Sed negabit ex rabie, & volumina nobis, pro una re, de qua agitur, reliquis omnibus infarciet; ne cesset pro periculo esse sapientibus, qui perpetuam hominis delirationem, reddo illi verba sua, deplorant. Indigna porro agit, dum scommata & dicteria in me, amicis scribens; a me nusquam lata exoneret. At dicta sua oppugnavi. Quid tum? Defendat ipse, & liberet se, si potest. In theatro uterque sistimur. Communis palaestra est. Quid certat verbis, ubi factis opus est. Nec ego, nec ullus alius ex Catholicis, imo etiam ex discordantibus plurimi eum judicem dogmatum agnoscimus. Qui enim judicem agnoscamus eum, qui aequae Astrologica, Juridica, & Moralia, Philosophica & humana novit & tractat, & sui existimatione larvarum plenus debachatur. Homo τῇ φύσει παρὰ δερμῶς, ἢ ἀσθενέειν καὶ, ἢ πάντα δυνάων μανίᾳ προσημφορῶς. At locutionis & sententiae reliquis modum imponit. Ne aegre ferat, in literaria Palaestra alios aliter atque ipse & loqui & sentire. Non est quod amplius in occulto misset. Liberet fidem suam, & edat. Nec negligat illud, Promissio boni viri est obligatio. *Albanus* salutem tibi plurimam, & tui nimium studiosus atque observans. Vale. Romae CIOIOCXLIIX. XI. Kal. Jun.

EPISTOLA CCCLXXXII.

LEO ALLATIUS

Nic. Heinio.

Leidam.

INGenue fateor, mi Nicolae, multis me tibi nominibus, & antea fuisse conjunctissimum, sed nunc potissimum studiis tuis neminem unum esse, qui me tibi devinctior sit. & vide obsecro. Absentes alii obliviosi fuere, tu ita animo tuo Leonem affixisti, ut continuo & memoria repetas, datisque ad alios literis illius nomen obsequentissime inculces. editis quoque libris voce & sententia comprobas, & memoriam illius quam longissimam reddere conaris, & certe reddis, immortalitati commendas, ultroque postmodum ad me delatum Claudianum tuum dono das. Quemadmodum itaque me tot tibi beneficiis obnoxium: neque enim ferreus sum & lapidem exui, fateor, ita & planum facio apud me optime fuisse collocata, ne dicam foenorata. Nunquam siquidem desinam, dum vita est, tua in me benefacta memoria prosequi, & si fere ferat occasio, aperta ante omnium oculos ponere. Idque si nequeam, rogabo, ut dii persolvant grates dignas, praemia debita. Claudianum tuum accepi ab Illustriss. *de Puteo*, quo sane in amicis pleniore obsequio demerendis neque sanctior neque probior, neque diligentior quisquam est. Eum avidius percurri, & admiratus sum in Notis & acumen ingenii, & multarum rerum cognitionem, sed in primis verae antiquitatis notitiam, quibus Claudiani verba examinas, sententias in integrum restituis, & manca ac mutila supple-

Si

Si tantum valet in juvene eruditio, quid futurum est in perfecta aetate? servet Deus haec nobis bona, ut similibus studiis alii quoque scriptores bene proveniant, & Respublica litteraria novis semper laboribus collocupletetur. Interim scias quoque id velim, me ad nutus tuos paratissimum esse. Vale xi. Kal. Jun. CIΘIOCLI.

EPISTOLA CCCLXXXIII.

LEO ALLATIUS

Nic. Heinsio.

Panetias.

Breviter ad tuas mihi gratissimas, Heinsi praeclarissime. Edidit *Carolus Stephanus* Lutetiae Graece typis, ut scis, elegantissimis & vere regiis Appiani Historias, sed Illyricae tantum principium, quum postea nactus *Hoeschelius* integram ex Bibliotheca Augustana typis Augustanis publicavit: demum *Henricus Stephanus* ab *Arnoldo Arlenio* cum aliis Appiani Ibericam atque Annibalicam acceptam typis suis minutissimis in octavo cum Eclogis Ctesiae, Memnonis, & Agatharchidis exhibuit. Accepit vero ita depravatam, ut ipse scribit ad *Carolus Sigonium*, cui libellum nuncupat, ut & *Arlenius* cum aliquo litteratorum fructu edi nunquam sperare auderet, & ipse *Stephanus* tanta depravatione deterritus, de illis corrigendis, deque earum etiam editione desperaret. Edidit tamen utcumque ab se correctas. Quare mi Heinsi, quamvis dictae Historiae prostant, codex si manu diligentiori exaratus, & autographum, unde tuus extractus est, correctius quam *Stephani* fuit, nae iste tuus multi faciendus est, cum nos ex eo pleraque sperare possimus, quae plane desperaverat *Stephanus*. Et haec de Appiani tui historiis. Scribunt mihi *Vossium* minis tantum contra *Salmasium* agere, nec posse amorem insitum, quo illum semel persecutus est, ex animo ejicere. Quare ut putant, similitates & odia citius extinguuntur, & ego certe id percuperem. Similes enim ipse scriptiones detestor, atque inutiles judico. & potissimum si de rebus levibus concertatio sit, in quibus nonnisi garrulitas emicat, & mutuae injuriae, & sui & familiae famam dedecorant. & ὅ κατὰ γελασότερα, dicebat ille, ἐτι ἔχοιμεν ἄν, ἀλλ' ἅτλα πρᾶττοντες, ἢ τοιαῦτα ἐπιδεικνύμενοι. Vale, vir praestantissime. Romae vi. Kalend. Mart. CIΘIOCLI.

EPISTOLA CCCLXXXIV.

LEO ALLATIUS

Nic. Heinsio.

Vianam.

Reddidit mihi tuas *Fustembergus* noster, officiis & humanitate refertas, de quibus nunquam dubitavi. Res erat cum Heinsio, in quo & humanitatem ipsam, & antiquam probitatem admiramur. Doleo vero me non potuisse pro & arbitrato meo, & ut virtutes tuae poscebant, symbolam tuis doctissi-

Tom. V.

K k k

mis

mis studiis conferre. Animus certe non deficit, de quo nobiles animi magis delectantur. Jam ex Italia petiturus es lares paternos, Deus iter fortunet, & postquam domum accesseris, res domesticae tuae omnes & studia ex sententia pulcherrime procedant; & tuus Ovidius eam consequatur lucem, quam tute ipse & tibi & illi desideras. An post Claudianum & Ovidium alius, tertius te in Italiam nostram conducatur? Et quis hic fuerit adeo Diis dilectus? Utinam hoc modo mutes saepius lares, sed cursu sospite, ut res quoque literaria adprosperetur. Interim si quid hinc Romae mihi mandaveris, quod in rem tuam fore existimaveris, rem mihi gratam faceris, & si res prospere provenierit, gratiosam: & ut proveniat, conatus ipse meos omnes infumam. Deus det mentem *Salmasio*: namque ut video, videtur in rabiem verti, quando rem non ultra agit rationibus, sed conviciis. In Solinianis exercitationibus non deerit *Vossio* seges & fertilissima, cui salutem solidam, & *Gronovio* nuntio. Deus te sospitet superstitetque, vir praestantissime. Romae c1010CLIII. Ultimo Februarii.

E P I S T O L A CCCLXXXV.

J O A N N . R H O D I U S

*Nic. Heinso.**Florentiam.*

GRatissimum fuit creditum civi meo felicitis ingenii tui novaeque in me benevolentiae monumentum. Nihil enim eo literarum genere mihi jucundius, in quod inclinat animus, quamvis eo parum excultus. Gratulor seculo nostro optimoque patri, mihi olim noto, cujus genium, si quid judico, secundis cruditorum judiciis ad vivum exprimis. Ita perge faventibus Musis. Sed in primis relictos Ovidio & Claudiano naevos deme: quibus nec levem in nostris heic bibliothecis operam conferes. Optimi Principis indulgentia. Celso nostro binos fere menses impendi, quum liber omnium, quos vidi emendatissimus. Biblia Hebraea ibidem castigatissima percepi. Virgilium ei similem vidi, quem aliquando Heidelbergae. Tacitum & Apulejum caractere Longobardico lustrasse, tua curiositate non indignum fuerit: Cionis pariter in Lucretium ac Virgilium expositionem, vel meo hortatu, qui per graviores occupationes tantum inspexi. Est pluteo, ni fallor, xxiv. volumen decumanum Latinis Graecisque literis variatum. Quonam titulo quove auctore id notatum neglexi: mea tamen ut sciam interest. Tuo si factum hoc fuerit beneficio, plurimum tibi me devinxeris. Ne quid porro tuae desit diligentiae, moneo in veteri palatio chimaeram servari aeneam paucis visam: quam vel eo nomine considerabis, quod minus accuratam ejus ideam exhibeat *Aldrovandus* de Quadrup. digit. vivip. lib. i. Pag. 56. Nec Pandectas mihi omiseris. *Claudio Berigardo*, primae notae amico, Doctori Patavino subtilis ingenii, te nuper commendavi, quo viae comitem vix reperiess optatiorem. Interim vale, ac valetudinem tuam, satis ut intellexi dubiam, diligenter cura. Patavii xvi. Aug. A. c1010CXLVI.

EPI-

EPISTOLA CCCLXXXVI.
JOANN. RHODIUS

Nic. Heinsio.

Venetias.

JAM rheda prae foribus erat, quum tuae redderentur. Officio ne deessem D. *Offredo* contubernali meo negotium dedi meo nomine responderet. Reversus D. *Gasparem Vichefort Francisco Bernardino Ferrario* studiose commenda- vi. Genuae te ipsum Roma expectaturum laetor: ne te fraudemur, tuve iis, quae in rem tuam futura. Clarissimi *Crassi* summa istic auctoritas: cujus opera in qualvis bibliothecas, in cimelia magnatum, apud quos plurimum valet, praecipue *Ruzini*, aditus erit. Nec opus fuerit alio ad *Paulum Caortartam* Senatorem optimum parario, qui numis & statuis delectatur: quanquam & *Ferrarius* hac vespera ipsum compellaturus. *Grimanni* bibliothecam ne praetereas. Imo, si vacat, rariores ibi nota libros, vel in gratiam Reverendissimi Praefulis *Toma- sinii*, qui Bibliothecas Venetas MSS. coepit operis committere. In coenobio D. Antonii, & D. Joannis atque Pauli erit aliquid tui saporis: in primis vero in D. Marci bibliotheca libros novi Graecos, quos investigasse operae fuerit ex indice, quem olim Sozomenus vulgavit. Ad *Vintimigliam*, quas misisti, diligenter curabo. Plura non occurrunt. Vale ac vive. Patavii VI. N. Oct. CIOIOCLVII.

EPISTOLA CCCLXXXVII.
JOANN. RHODIUS

Nic. Heinsio.

Venetias.

NECESSITUDINIS nostrae jucundius nullum mihi pretium tuis commodis: quibus unice advigilandum censeo. Si nonnunquam minus ex voto, eventui adscribendum, quem semper praestare vix integrum. *Barisonus* adhuc Venetiis moratur. Ubi redierit, mox virum compellabo. De numis, quos nosti, est res dubia. *Zabarella* quos habet mihi se missurum promittit. Ovidius & Claudianus cura *Offredi* hodie in tuum reditum sepositi in bibliotheca, e qua libros efferri vetitum. Carmen mitto, pro quo D. *Occo* novem libras expendit, pretium sane ferendum. Quae jussisti mutavi. *Tentiginis* autem Aureliano quum longe alia sit potestas, versum omnino revocavi ad Medicorum sententiam. In autographo *Specus* plane *Species* videtur. Nec ipse aliter judicabis. Nudius quartus *Puteanus* eques nunciavit Italiam *Holstenio* mire placuisse tuam, suum pleno verborum modio in te animum testatus. Quae supersunt Anatomiae apud me seposita sunt in tuum & amicorum usum. Illustrissimo *Lauredano*, *Bollano*, & *Crasso* mea obsequia dico. Contubernales saluto, in primis *Oeconem* tuum, ad quem annexae mihi hodie traditae. Vale, mi Heinsi, ac vive. Patavii XIX. Febr. CIOIOCLXIX.

EPISTOLA CCCLXXXVIII.

JOANN. RHODIUS

Nic. Heinsio.

Venetias.

Statuinae Musis parum aequa fore dudum praevidi. Sed quae tua est prudentia, ferendus leniter ille gentis mos. Propediem omnia ex voto cadent ominor. Flacci & Ovidii interim utilem fuisse operam spero. *Barisonus* Venetiis reversus in vicinum rus abiit, unde perendie expectatura. Gratulor de conquisitis tam levi pretio nummis. *Rosini* Museum parario Cl. *Craffo* plane tibi lustrandum putabis; ubi vis ingens nummorum, ceteraque tua curiositate digna. *Gisberti Bodri* Galli aurificis rariora popularis mei opera: in quibus foetus ille in lapidem versus doctorum commentariis notus. D. Marci, Antonii, Joani & Pauli bibliothecas excussisse operae fuerit: praecipue primam, in qua Graecae doctrinae non parum multa. Verbo, nihil intermittendum censeo quantivis temporis pretio. Claudianus hic apud Canonicos geminus est. Italiae tuae aliquot exempla commode attuleris, & Parentis optimi effigiem, permutata si libet charta, cujus humanitati plurimum debeo ob curatas magnae diligentia literas. Vegetium *Salmasii* decumanae formae sub praelo esse nunciat amicus. *Schelus* Doctorem suum Juris Civilis admodum depraeclat. *Gaudentio* necdum respondi; nec ille quidquam reponit. Pacatiorem fore opinor, silente prorsus altero, quem videbatur timere. Neapolitana cras remittam. D. *Oconi* hasce tradas quaeso; meoque nomine cum reliquis plurimam salutem impertias. Vale ac vive. Patavii xxiv. Febr. cldccxliix.

EPISTOLA CCCLXXXIX.

JOANN. RHODIUS

Nic. Heinsio.

Mediolanum.

Unas a tuo discessu 4. April. Veronae exaratas, 13. primum accepi: diversorum quaternas Equitis *Ponae* diligentia traditas credo. Fasciculum 9. Aprilis a *Balthasare* & *Gaspere van Collen* habui Venetiis: in quo *Goefii* Vindiciae, Apologia pro D. *Heinsio*, Ejusdem Alloquium funestum; quatuor singulorum exemplaria. Nescio tamen qua incuria Vindiciarum particula reliquis ad litteram *H* accesserit. Fragmentum iis, quos mihi reliquisti, libris addendum censeo, ne quid inde bibliopola detrimenti capiat. De iis quid velis, accurate perscribas cupio. Italiae tuae Romam nulla se adhuc obtulit occasio. Spero tamen brevi Germanum eo concessurum, qui elegantissimum attulit *Beringi* nostri carmen heroicum Austriacis Nuptiis dicatum, cui *Frambottus* operas condixit. Sed ad nostra Mediolani versaris. Viri optimi *Ferrarii* comitate quae in bibliotheca tui fore arbitrii prospicio. Ejus aliquando catalogum

gum vidi apud amicūm; in quo librorum postremus fuit *Petri Paludani* in Psal. expositio. nec tamen cetera integrum fuisse opinor, quod phyliras decem non expleret. Ipsum si qua posses arte perficere, nostrum utrique foret commodum. De reliquorum enim copia sum certus. Precibus interim si quid possum contendo, de libris in scheda notatis me diligenter instruas. Cujus nempe illi notae, cujus aevi, ac molis, omnesne manuscripti? De Celso nihil moneo, praeterquam apud R. P. *Sfondratum* prudenter explores, num ei, quod jam diu in se recepit, manum admovent. Si Vegetii Mulomedicinam istic aut aliis in locis scriptam offenderis, si Varronem, Columellam, melioris notae Plinium, Q. Serenum, Macrum, sed in primis Celsum, indica quaeso. De Scribonio res ferme deplorata. In quem de tuis Hypercriticis proxime. Plura enim non licet. Valetudinem cura, ut ex communi voto vivas. Amici te salutant. Patavii XIX. April. CIOIOCLXIX.

EPISTOLA CCCXC.

JOANN. RHODIUS

Nic. Heinso.

Mediolanum.

BInae tuae ordine prorsus inverso hoc mense mihi redditae. Quas enim IX. Kal. Maj. dederas, hodie accepi, quas III. Kal. VI. Non. habui. Gratulor in bibliotheca Ambrosiana rem ex voto procedere. Nec dubito, quin istae morae pretium sis habiturus. De MSS. numero quod refers, olim a Cl. *Bernardo Ferrario* accepi. Quae in scheda notavi, ubi commodum fuerit, edoceri cupio. Magnopere te interim oratum volo, de Re Nummaria Breviarium diligenter inspicias, & mecum post *Pignorium* magni *Lipsii* censebis. Ejus apud me servatur exemplum: sed parum accurate descriptum. Quae mihi suspecta seorsum notavi, ut diligentia tua mihi redeant emendatiora. De fasciculo quod jubes, bona fide peragam. Quod me muneris participem volueris, plurimum debeo. *Datus* in recognoscendis quibusdam Vegetii locis nimium se laboriosum obtulit: cujus operam compendio sublevavi. *Gaudentii V. C.* typis descripto tui nominis elogio hodie onustiores traditae, cetera praeter morem brevissimae, nihil tamen abs te literarum diu redditum monent. R. P. *Sfondratus* bonam Celsi partem sua opera castigatam scribit. Quousque ille progressus, si licet, explora. *Ferrarius* enim reliquum se persequuturum promittit, oculis etiam non valde firmis; quem aegre molestiam hanc subire patiar, si studium hoc valetudini nocivum putaveris. Quanti faciat animi in se tui studium Reverendissimus Aemoniae Praeful *Tomasinus*, ex ipsius literis cognosces. *M. Aurel. Severinus* adhuc Neapoli bene agit: cujus mense Augusto superioris anni exaratae nunc primum traditae sunt. *Manfredi Septalii* D. Consiliario mea manu dedi. Illustrissimus *Schellius* adhuc Florentiae commoratur. Clarissimo *Ferrario* ex me salutem nuncies, cui hac vice non rescribo. Nationis negotio impeditur.

K k k 3.

Joan.

Joannes la Nouue ait se mox ad ipsius respondisse. Vale Patavii VII. Id. Maii.
CICIDCXLIIX.

In Breviario de Nummaria.

Cap. 2. sub finem. *inclinat. scrib. f. inquinat.*

Cap. 4. non multum ab initio. *Sed & progressu temporum, &c. cum mirificis ingen. aut invent. usus. F. cum mirif. i. a. i. usu.*

III. Regula. *tum alio compendio utor,*

Atque hic tu. tum

quod tu. libentius p. g. p. dicunt

aut exemplo. eodem autem f. c. d.

sensit Georg. Agricola.

potuit. posui

Sciri volo i. a. p. d. f. e.

Fanni. fiunt in libram.

Convenerit. Sed inquit Plutarchus:

Quod mihi Prisciani a. o. f. legentis: ego v. i. i. L.

Quinario. & ille

Post Tabulam.

Exempla pluscula sunt, de b. fidei. F. de quibus fidei

Sub finem Capitis. *Trecies sestertium*

Cap. 5. sub finem. *Ita enim vetus Codex. alii enim. F. alii autem*

In fine libelli numquid praeter Cujacium Hotomanni, aliorumque mentio?
Sic enim retulit mihi B. Bartholinus.

EPISTOLA CCCXCI.

J O A N N. R H O D I U S

Nic. Heinio.

Mediolanum.

Quam vellem te minus obstrictum scribendi officio, quo nihil dubiae va-
letudini gravius. Tua vero humanitate dum alios ad mutua studia pro-
vocas, tibimet non parum officis. Ego sane non committam, ut a ne-
cessariis te avocem, nisi fortassis publicae utilitatis causa: quae nunc tuam po-
stulat operam circa *Lipsii* de Nummis Breviarium, quo *Veslingii* aliorumque
praestantium virorum iudicio accuratius in lucem proferatur. Doleo equidem
egregiis conatibus tuis non superesse abunde tempus. Quid vero abitum valde
flagitat praeter optimi patris desiderium? Nudius tertius e Belgio *Thomae Fu-*
renii literas habui: quibus una cum *Vossio* & *Waleo* me salvere jubet. *Waleus*
autem quibuscumque *Celsi* scrupis e suo MS. expediundis paratum sese obtu-
lit: cujus humanitate utar, postquam Cl. *Ferrarius* a P. *Sfondrato* relictâ per-
fecerit. Quod mones de *Scaligeri* in *Guilandini* Papyrum stricturis, non satis
adsequor. Itineris Genuam versus periculum facile declinabis *Ferrarii* consilio
&

& auxilio; cui noti negotiatores omnesque bonae fidei veredarii eo commean-
tes. *Molthenium*, qui hasce dabit, enixe rogavi Brixiae *Rossi* Memorias tibi
pararet. Idem quoque *Offredus* ei suggessit. Vindicias *Goesii M. Aur. Galuano*
destinatas tradidi. Quae supersunt *Octavio Ferrario* dabuntur; *Bernardino* nunc
Apologia adfertur. *Berigardo* nuper Florentiam secedenti quos iussisti ad *Gau-*
dentium commisi, pariterque ad humanissimum *Datum*, quae in *Vegetii Mulo-*
medicina mihi e paucis vere suspecta, ad MS. Mediceum recensenda. *Allatius*
postremis ad me datis etiam solenni voto prolixum valde in te animum testa-
tur. Praefuli *Tomasino* brevi sum responsurus. *Aurelio Severino* necdum licuit
maxime, quoniam nihil adhuc de ipsius commentariis cum *Frambotto* confe-
ctum: qui *Scribonio* etiam typos condixit. De quo ad te propediem. Fac
autem sciam primis num *Genoa* *Mediolanum* rursus cogites. *Lipsius* noster
Roma rediit, de quo *Molthenius* plura. Omnes tui officiosissimam salutem
nunciant. Vale, meque de rebus tuis crebrius edoce. Patavii xv. Calend. Jun.
CICICXLIX.

EPISTOLA CCCXCII.

JOANN. RHODIUS

Nic. Heinsio.

Mediolanum.

CREdo a *Molthenio* nunc traditas, quas nudiusquintus ad te dedi. Spero
etiam *Rubei* Monumenta ipsius diligentiae tantopere commendata, com-
parasse: *Holstenii* & *Putei* heri redditae. Narrat hic *Parutae* librum de Num-
mis Siculis verisque priscorum notis brevi proditurum. De tuo itinere ali-
quid propediem certi exspecto, maximeque de locis *Breviarii Lipsiani* dubiis.
Genevae Casparem Bartholinum civem meum salutes rogo. ad quem de te jam
pluribus. Tuo interim scire aveo iudicio, quis ille, qui *Lutetiae Harpocra-*
tionem adornat. Nam & mihi optimum nosti, ex quo aliquid fortassis tam
egregio labori posset accedere. Quis alter, a quo *Glossariorum sylloge* desi-
deratur? Apud quos *Macer*, *Q. Serenus*, & *Fannius* calamo scripti. Putesne
apud *Scrivarium* esse *Vegetii Mulomedicinam*, in quo unus alterve deploratae
spei locus. *Waleus Thomae Furenio* civi meo se bona fide promisit excerpturum
e suis variis *Celsi* lectionibus, quaecunque mihi suspecta. Archiepiscopum *Sal-*
isburgensem de suo Codice nuperrime sollicitavi. Si quid ejus generis porro
offenderis, mone quaeso; ne quidquam me praetereat. Vale, tuamque va-
letudinem cura. *Mancinus*, *Galvanus*, *Ferrarius*, *Veslingius*, *Offredus*, ceteri-
que tibi salutem adscribunt, & ego *Bullialdo*. Patavii x. Kalend. Jun.
CICICXLIX.

EPISTOLA CCCXCIII.

JOANN. RHODIUS

Nic. Heinſio.

Genuam.

Breviorem solito me facit summa temporis angustia, quandoquidem tuae *Ferrariique* serius traditae. Clarissimo *M. Aur. Galvano* & *Offredo* tuas dedi: ad quas ipsi ex commodo responsuri. *Ferrario* jam scribo, *Cl. Holſtenii* ad *Molikenium* tuae fidei committat, quo recta, sicut mones, Lutetiam mittantur. Quam ille rectius, vel in Principis gratiam, unum adhuc diem Mediolani traxisset. De *Gioſanii* curis, *Vegetii MSS.* *Scrivenianis*, maximeque de *Celsi* nostri in bibliotheca Ambrosiana codicibus quae addidisti, pergrata mihi fuere. Perge porro in itinere quidquid occurrat hujus generis diligenter suggerere. Si quid mihi tuam in rem obvenerit, mutuum exspectabis. Illuſtrissimus *Schelius* nuperrime significat se denuo Romam cogitare, & forsitan ulterius. Vereor autem ne laudabile institutum evertant novi, qui dubiis autoribus feruntur, Neapolitanae gentis motus, appulsa Gallorum classis postquam sese in conspectum dedit. Ad *Severinum* nihildum dedi literarum, quamvis Hortum Messanensem *P. Castelli* supra annum in via haerentem nunc pridem habuerim. Clariss. *Veslingius*, *Ferrarius*, ceterique tui studiosissimi salutem nunciant. Vale, saepiusque hoc mecum iter, dum licet, itera. Patavii Prid. Kalend. Jun. CIOCCXLIIX.

EPISTOLA CCCXCIV.

JOANN. RHODIUS

Nic. Heinſio.

Leidam.

Silentii tui pertinaciam expugnaturus jam calamum sumseram, en primae Sa discessu tuae sub initium hujus mensis redditae. De binis fasciculis *Venetias* missis quid factum, ipse consulto provideris. Quae plures apud me latuere menses, nescio cujus, nunc mitto de tua tandem mora certior: quae tanto mihi gratior futura, quanto in mea te vota semper alacriorem scio. Q. *Serenum* in bibliotheca *Leidenſi* manuscriptum perspexi. Tuo commodum si cum vulgato contuleris, rem sane mihi pergratum feceris, publicaue professione dignissimam, quam *Holſtenio* pariterque aliis debeo. *Walaeo* jam defuncto, si ante omnia quae ad oram *Celsi* sui habebat notata pari cura miseris, de publico plurimum promereberis. *Thomae Bartholino* nostro parario mihi ea promiserat. Sed inexpectata fati vis spem istam praecidit. Credo librum adhuc in defuncti bibliotheca esse, quem, si venalis foret, mihi aequo pretio parari cuperem. Secus, abs te ejus mihi usum impetrari, quem possessor concessurus erat. Suum hac aestate codicem *MS.* aliquo cum fructu indulſit Archic-

chiepiscopus Salisburgius, quem dudum remisit. Parum fane superest, quod in scriptore gravissimo desiderem, dummodo exspectatam mihi operam commodaveris. Marcellum, qui in Cl. *Vossii* museo est, meliori otio reservo. Si quis Macer calamo scriptus occurrerit, si etiam Plinius Valerianus de re medica, fac sciam. Quid item Cleopatrae *Elichmanni* accidit, cujus *Joan. Antonides vander Linden* inter Medicos scriptores meminit. A Vegetium de Mulo medicina ad libros Mediceos denuo mihi recenset *Datus* noster. Expiscare quaeso, num & ille, quod olim putabas, apud Cl. *Petrum Scriverium* MS. & quinam libri finis. Nam ei, quem *Sambucus* vulgavit, quaedam aliunde opinor accessisse. Quam mihi suspicionem firmari, aut eximi velim. *Petrum Cunaum*, felicitis memoriae virum mihi quondam notum, in Plinium majorem nonnulla parasse memoravit heic Gallus quidam ejus domesticus. Quae & ista, curiose pervestiges operae fuerit. Si quid porro in meam Aciam contuleris, novo me maetabis beneficio. *Grotii* versionem Sophoclis petiissem ad Scribonium tuo monitu. At vero Hippodamia Poetae a Stobaeo de jurejurando in testimonium vocata hodie desideratur. Largi Compositiones nudius tertius quantum licuit emendatissimas absolvit *Framboitus*. Notis recens typus prope diem Venetiis exspectatur. *Galvanus* ex ejusdem officina De usufructu varium opus profert, in quo & honorifica tui nominis mentio. *Panvinus* etiam integer prodiit. *Argoli* quoque secundi Mobilis Tabulae. *Severini* vipera Pythiasub eodem praelo mirum quam ingens mihi & *Offredo* negotium faciat. De lucernis *Licetus* plurima studiose conquirat: qui singularem Cl. *Smetii* humanitatem in conferendis symbolis dilaudat. Reverendissimus *Tomasinus* Votum Cecropis paucarum nuper exposuit pagellarum. *Bernardinus Ferrarius* hisce diebus respondit quam gratissimum sibi fore epigramma tuum. Nepos primo vere Mediolani graviter decubuit; mense Augusto Venetiis febris correptus dubia salute jam primum evasit, nec Patavium redire ipsi adhuc integrum fuit. Hetruriam toto ferme anno infestavit exitiosa febris, quae in quosvis praesertim Florentiae saevit: tractum quoque Picenum pervasit. Patavii autem vicinisque locis a fluminum per crebros imbres inundatione crescente confestim calore plurimos invasit febris, quae initio levior, mox perniciem attulit. Amplissimo *Silvatico* ad Mutinensem Ducem evocato ceterique melioris notae Medicis parum valentibus *Veslingius* noster morbi die undecimo febre maligna lenticulari xxx. Augusti cum sole occidit, solemnii pompa ad D. Antonium ex testamento elatus. Mihi cum *Ferrario* epitaphii curam reliquit: sua praeterea scripta mihi legavit omnia. Sed quod maxime dolendum affecta in iis pauca. Viri jacturam dolent omnes, maximeque plebs infima, cui consilio operaque indefessus adfuit. Sed plura vetant negotia, quae in gratiam viduae filiaeque in dies mihi succrescunt. Tu Vale, mi Heinse, & cum Amplissimo patre diu felix vive. Amici omnes virique Clarissimi tui nominis studiosi plurimam salutem adscribunt; quam & ego Cl. *Gronovio*, & *Isaaco Vossio*. Vale; festinanti calamo perscribebam Patavii ix. Kalend. Octobr. ciccxcxlix. *Scioppius* tertiana, quam vocant, duplici laborat. *Martinum Schavenium* civem meum commendo

tuae humanitati, si te compellaverit. Fratrem heic habet optimum, linguarumque perstudiosum.

EPISTOLA CCCXCVI.

J. O. A. N. N. R. H. O. D. I. U. S.

Nic. Heinsio.

Leidam.

SI meas ad te superiori mense datas, ut spero, accuraverit *Abrahamus van Collen*, voti me brevi compotem fore credo, cujus praecipua haec fuit summa, *Walaei* & *Manaxii* Celsum conquireret, ut in meam, seu verius boni publici, gratiam, quas orae adscripserat ille aliisque lectiones tuo mihi commodo excerptas mitteret. Has enim fere solas desiderare videor, & quas legati *Veneti Bassadoni* beneficio ex Hispania opperiri. Suum quippe codicem illustrissimus *Salisburgensis* Archiepiscopus liberaliter concessit. *Scribonii* libellum satis elegantem emendatumque edidit *Fambrottus*, notas mox additurus. Annuli heic ferrei mentionem nosti. Cujus generis mihi quidam pervetustae notae ab aurifice donatus aureo tuo persimilis. Eum, quo firmior mihi sit memoria, delineatum quaeso tuis ad me primis inferre. De *Vegetio* alicubi laudatum vidi *Antoni Codri* judicium. Si apud vos in ea optimorum librorum copia autor, in illud haud gravatus inquires. Ingens istic laudatae memoriae *Vossi*, nec minor optimi parentis tui bibliotheca est. Sed nec desunt tibi *Oxoniae* amici, quorum opera id confeceris, ut satis meae factum sit curiositati cui & optime addideris, in *Terentium* si quid ab eruditissimo patre in lucem emissum. Quem tecum diutissime valere cupio. *Cl. Octavius Ferrarius* convaluit. De *Scioppia* fere conclamatum. *Offredus* ceterique amice salutant. *Fambrottus* Panvinium complebit, ubi omnia indicaveris. Vale, & salve. Patavii xlii. Kalend. Nov. CIOIOCXLIX.

EPISTOLA CCCXCVI.

J. O. A. N. N. R. H. O. D. I. U. S.

Nic. Heinsio.

Leidam.

NON minus jucundae, quam ex istis Septentrionalibus oris inexpectatae, labente Aprili redditae sunt tuae. Notus jam orbi praecellens heroinae animus dignatione satis nunquam laudanda omne laboriosi itineris taedium jure tibi diluit. Quod vero in patriam remeans aulam denuo invisere cogites, mirantur non pauci. Quam te morae brevitatem occupatum reddet, praevideo: tua tamen singulari humanitate rebus meis consultum velis. Nosti quid flagitet coeptus in restituendo *Celfo* labor: cui nihil ferme deest praeter paucula ad *Walaei* laudatae memoriae codicem notata, atque in bibliotheca D. Lau-

rentii Hispanica ad MS. cuiusdam non admodum vetustioram, ab *Antonio Augustino & Mendoza*, ut *P. Sfondratus* olim monuit. Horum jam mihi specti fecit excerptorum Illustrissimus *Bassadonus* Venetorum ibi Legatus. Reliqua, si *Walaei* liber venalis, para quaeso: secus, periti manu describantur omnia, quae jam parario *D. Thoma Bartholino* ipse mihi promiserat. Nec minus de *Cleopatra* te sedulum cupio, ut *Epiphanio* de *Mensuris* nondum edito *Cl. Holsenii* Romana consuetudine aliisque ejus argumenti fragmentis accedat. *Macri* libros a *Cl. Boxhornio* facile impetrabis; quem jam nominis mei studiosum gratus agnosco. Q. *Sereni* quicquid isticia vulgatis diversum mitte: cui nunc *Vaticanus & Florentinus* liber aliquid contulit: si quid porro Doctissimi *Vossii*, in lucro erit. *Vegetii* *Mulomedicinam* denique recenset eximius noster *Datus*. Cui si quid a *Scrivario* expectandum, mone. Mea namque interest, id mature sciam. Nec dubito quin tuo de mea fide apud omnes vadimonio singulos in mea vota sine magno negotio pertraxeris. Beneficii namque gratiam ingenua professione polliceor. *Claudianum* tuum expectamus avidi: quamquam *Nasonem* maluisset *Cl. Octavius Ferrarius*, in quo non poenitendam te operam posuisse opinatur. *Gronovii* *Senecae* suade ad *Frambrottum* perferantur, qui procuratorem istic habet civem tuum *Joannem la Noue*. *Scribonium Largum* ante sex menses emendatum satis ac politum dedit *Frambottus* noster. Notis vero meis in hunc usque diem *Offredo* laboris socio moram iniecit *Severini* vipera innumeris intricata offendiculis. Ea nunc ad metam properante, meis manum admovebo. *Cl. Liceti* de *Lucernis* opus *Utini* inchoatum: cui e rarioribus *Serenissimi* *Electoris* *Brandenburgici* auctarium quam fuerit gratum, ex ipsius pernosces. *Octavii Ferrarii* *Prolusiones* ac *Epistolae* sub praelo fervent: quas ceteri de *Re vestiaria* libri excipient. *M. Aurelii Galvani* *Commentarium* cum *Cecropis* voto ad te curabimus. *Veslingii* nostri, praeter *Anatomicum Systema*, nihil adeo perfectum graviter fero. De *Pullitiae* namque *Aegyptiae* novem tantum *Capita* leguntur: successores habuit in *Botanicis*, quem nosti, *D. Georgium Turrianum*; in *Anatomicis* *D. Antonium Molinettum* *Venetum*. *Scioppius* post duplicem tertianam *Medicis* neglectis repetentem inedia tandem exsolutus *Novembri* mense discessit. Selectiora ejus quaedam *Politica & Grammatica* brevi licem videbunt. *Promtuarium* vero *Latini Sermonis* typographum postulat opulentiozem *Gallum*, aut *Belgam*. *Germani* enim sumtibus ferendis impares. Vestros, si juvat, pertenta. *Crassus* recte valet. *Bernardino Ferrario* epigramma tuum mittam, candidum sane atque perelegans. Vides, amicorum optime, quam tua ego abutar patientia. Si *Deus* te *Suecis* reducem velit, *Salvium* rogo virum Amplissimum officiose meo nomine salutes, meique *Regis* *Oratorem* *Petrum Julium* virum Nobilissimum; quem de *MSSorum* indice, quos e *Germania* transmisit *Augustus* ille *Gustavus*, non ita pridem per amicum sollicitavi. Quod, ut verum fatear, tua fieri mallet opera, quoniam de singulorum aetate atque pretio non mediocri jam usu edoctus optime iudicium ferre poteris. Cui molimini, honestisque mentis optimae consiliis *Deus* te diu superstitem praestet. Ita vovent omnes tui solidam tibi salutem nunciantes, quos inter *Offre-*

dus noster haud postremus. Vale, & cum Cl. Isaaco Vossio plurimum salve.
 Patavi III. Non. Mai. CIOIOCL.

E P I S T O L A CCCXCVII.

J O A N N. R H O D I U S

Nic. Heinsio.

Holmiam.

ANxius haerebam, num recte traditae fuissent meae, jamque Venetias reversus *Joan. la Noue*, cujus fidei eas credidissem, sciscitaturum se promiserat; en tuae, quibus nihil curiositate nostra dignum intermisisti. Claudianum tuum in lucem venisse gratulor. Italiam vero attigisse dubito, quum nuperis ejus non meminerit incomparabilis noster *Puteus*. Nemo mihi crediturum est, qui tuum non expectet avide reditum: in primis ego, qui vel ea opportunitate Sereni excerpta cum codicibus Macri Clar. *Boxhornii* humanitate, forsan & de *Smithii* Ponderibus aliquid, sperare possim. *Gorlaei* supellex antiquaria ubinam servetur facile cognosces, si per Galliam transferis. Cl. *Liceti* de Gemmis annularibus commentarium de Lucernis alter moratur a priore longe diversus, duobus libris clenchico & historico, elegantissimisque supra centum in aere celatis iconibus auctior, qui nunc metam prospicit. Largus vero meus, ut festive *Crassus* noster, Longi fere nomen meruit. Annum quippe integrum operae aliis distractae meas protrahunt meditationes. Cl. *Ferrarii* Prolusiones epistolasque interim protrudere: cujus nunc Panegyricus Reginae scriptus Generosi *Banneri* suasu Venetiis editur. *Kircheri* Obeliscus jam Romae prodiit. *Angelonus Bonani* titulo sui de Nummis commentarii Apologiam texuit. *Veslingii* Anatome ab extrema auctoris manu emendatior mea cura *Frambotti* praelo est commissa. Invitus nunc meis ad *Septalii* Animadversiones & Cautiones Medicas Analectis, quicquid temporis reliquum impendo, majori fortassis diligentiae, quam ingenii laude. Nolim tamen Scribonium diutius premi, ne penitus decoxisse videar. *Ferrarius*, quantum publica permittunt, Rem vestiariam conficit. *Tomasinus* Praesul Gymnasii ceterisque patriae ornamentis expoliendis totus operam commodat. Reliqui suam quisque provinciam sustinent. Unum rogo, mi Heinsi, Amplissimum Senatorem D. *Salvium* de mea in pristinam necessitudinem nostram observantia certiolem facias, unaque Clarissimo *Isaaco Vossio* salutem renuncies, quam viri Clariss. *Licetus*, *Galuanus* uterque, *Ferrarius*, *Bustronus*, & *Offredus* tibi quoque vicissim reddunt. Vale, ac salve amicitiae nostrae decus. Patavii VII. Kalend. Mart. CIOIOCLI. Si quicquid istic in MSS. est medicum subnotaveris, rem mihi pergratam feceris, nec tuo indignam iudicio.

EPISTOLA CCCXCVIII.

JOANN. RHODIUS

Nic. Heinsio.

Holmiam.

OSTRIDIE quam alteras ad priores tuas dedissem, jucundissimae Lugduno mihi traditae sunt tuae. Veras in Sueciam reditus causas agnoscunt, quotquot heroinae virtutes mirantur: quam *Salmasium* quoque accivisse fama est. Gratissimum mihi tuum de Macro, Sereno, ac Vegetio Mulo-Medico indicium. Nihil autem gravius, quam omnem de *Walei* Celso spem decollasse, nisi eam Lutetiae *Naudaeus* restituerit vir, ut nosti, non minus mei quam literarum studiosus. *Moraeum* vero memini significasse olim, ea in urbe nullum. Noli proinde, mi Heinsi, cessare, si quid per optimum parentem aliosve apud heredes moliri fas est. De Macro scio quantum valeas apud Cl. *Boxhornium*. Bremae amici sunt, qui Sereni quicquid est prompti curabunt. Qui Hafniae sunt libri nihil negotii faceffunt. De Vegetio apud Anglos, cura mihi altior est: quam sua memoria amantissimus nostri *Vossius* facile subducet. Quae Scribonio morae causa jam intellexisti, eam in Claudiano expertus ipse. Dictu mirum, *Severinus* tres prope menses operis sui nuncupationem detinet, quamvis crebrius efflagitarim. Quanti *Licetus* fecerit *Smithii* lucernas, ex ipsius perspicies. Eclypta quum caelator delinearit, ad te redibunt. Si quae apud V. C. pondera, inquire; itemque apud *Gorlaei* heredes quas memorat in Dactyliothecae Praefatione *Vorstius* Fibulas. Cl. *Galuanus* ipse suas tradidit pridie, quum in patriam discederet. *Frambottus* ubi quidpiam ad *Joannem la Noue* vestrum miserit librorum, ad te fasciculus accedet. Tu interim de Scioppii Promptuario rem promove. Novi typographos. Libris *Pierucio* praemium repōnant par est, si aes negant. Aliquid tamen extorqueas vide, qui opus merito commendare poteris. Reverendus P. *Sfondratus* te salvere jubet: itemque *Tomasinus* Praesul ex Istria reversus, nolterque *Ferrarius* pridem a dubia valetudine restitutus, pariterque *Offredus*. *Novarinus* magna conatus fatis cessit. Reliqui omnes tui recte valent. Quod tibi etiam atque etiam ominamur. Patavii Kalend. Jul. c1616.

EPISTOLA CCCXCIX.

JOANN. RHODIUS

Nic. Heinsio.

Leidam.

UPERIS tuis nihil mihi jucundius, quas magno amoris argumento inter amicorum salutationes ab itinere difficili vix otio redditus domestico tam diligenter ad me perscripsisti. Quam viae rationem tenueris, coram expedias aveo; calamo, si res aliter ferat: quanquam illud mihi ceterisque tuis necessariis foret gratissimum, quorum animis frequens tui obversatur memoria.

Claudianum interim desideramus tuum, cujus jam dudum spem fecit humanissimus eques *Puteus*, ut primum ad ipsum pervenerit. Poëmatii Reginae dicati fors eadem, quae operis Cl. *Galvani*, qui superioris anni autumnos geminum *Frambotto* exemplum tradidit ad te curandum, ut alterum affini tuo cederet. Sed quam fassus ille negligentiam brevi refarciet. Liber, ne ignores, decumanus est variae doctrinae, Gymnasii Moderatoribus inscriptus. Auctori nunc is demum honor habitus, quod *Alexandro Sinclitico* magni nominis, dum fuit, Jurisconsulto in primam cathedram successerit. Cl. *Licetus* tuas efflictim exspectat, ut de Gemmis aliquid constituat: quod opus *Bolzetta* protrahit, licet nec impensae admodum graves futurae. Panegyricum eximii *Ferrarii* nostri habes emendatiorem eo, quem *Bannerius* absente auctore typis commisit. Factum id per Saturnalia, quibus operas *Offredus* noster vix retinere potuit. Sed, quod gravius, quum *Bannerii* ephoro parum placeret vox *evanuit*, ei substituta fuit alia vix Latina *disparuit*: quam in hac editione prior eiecit. Auctor tamen maluisse *abscessit*. Quod moneo, si quando tua forsitan cura in unum volumen illic redigantur, quaecunque ejus argumenti prodierunt. Vides itaque, mi *Heinsi*, quanti intererit, libellus hic in Reginae manus decore fatis deferatur. Sed tuis comitatus, qui optimi viri de literis & de publico merita pro tua prudentia, qua par animi significatione, si non ipsi Dominae, iis saltem insinuaveris, quos interioris admissionis nosti; e quibus si noster est *Salvius*, fac sciat, *Ferrario* paucos nobis cariores. De re vestiaria quae sunt reliqua jam pertexit. Me vero cunctantiorum ne mireris, qui multorum sic vereor judicia, ut aegre calamum sumam. *Grenovii* nostri felicitati applaudo. Quae mihi reliquit in Livio dubia, Romae fortassis per *Allartum*, & Florentiae *Caroli Dati* industria diluentur. De Ponderibus quicquid impetraveris, pergratum erit. Serenum & Macrum, quae es sollertia, facile percurres. Quae in Hispania fuere ad Celsum notata, hac hieme Illustrissimi *Petri Bassadoni* legati Veneti benignitate obtinui. Vide, sodes, *Walaeci* librum: quem si cum Regio contulerit Parisiis, non est quod tantopere ambiam. Quid tamen sit, fac sciam. Vale, ac vive cum Ampliss. Parente, quem tibi literisque diu sospitem precor. *Boeclero* propediem respondebo. Ubi *Salmastrus*? Clarissimo *Vorstio* & *J. Vossio* salutem adscribo. *Tomassinus* Praeful adhuc est Aemoniae. Reliqui te amice salutant, praesertim *Offredus*. Iterum Vale. Patavii XIII. Kalend. Maii. CIOIOCLI.

E P I S T O L A CCCC.

J O A N N . R H O D I U S

Nic. Heinsio.

Leidam.

Panegyricum Clarissimi *Ferrarii* recte traditum gratulor, tuisque ad Augustam comitatum: quamvis Reginae jussu *Vossii* nostri literae omni benevolentia refertae ab Illustrissimo *Adamo Bannerio* antea missum significant. Meo auctor

auctor consilio nunc alium sua manu emendatum tibi donat: de quo recudendo quicquid fuerit visum statuas. Carmen tuum in Italiam necdum perlatum. Claudiani *Galvano* soli & mihi *Putei* equitis humanitate copia fuit: quem *Ferrarius* effictim desiderat, ac *Offredus*. Vivam Reginae imaginem si habere liceret, curarem, non minori loco esset, quam Patris maximi, passim magnatum effulgens atriis. De *Smitbii* doctissimi ponderum indicio plurimum debeo: nec minus de *Celsi* Rhetorica, quam saepius Coloniae a me frustra perquisitam elegantissimis *Elzevirii* typis tua cura publico reddi operae pretium censeo; aut mihi saltem describi, si alia tibi mens fuerit. De *Macro* & *Q. Sereno* ex tuo comodo mihi omnia jam rata. De *Walaei* ad *Celsum* notis ex voto si rem confeceris, faxim ut nec heredes benevolentiae, nec laboris te poeniteat. Hae nampe solae mihi cogitationes producunt. Clarissimus *Vorstius* magni *Scaligeri* varias lectiones *Thomae Bartholini* mihi excerpendas concessit: ei que par facilitate suas jam receperat *Walaëus*, quas fatum intervertit. Quod vero eas tantopere desiderem, causa non est alia, quam ne quicquam alicujus notitiae intermiserim. Legati Veneti *Petri Bassadoni* beneficio aliquot hinc mensibus Regis Hispaniae indulgentia e Bibliotheca D. Laurentii pauca quaedam mihi submissa. Tuum erit, omnem heic movere lapidem: si quid etiam *Vegetii* Mulo-Medici ab edito diversum apud eximium *Scriverium* aliumve, id explorare sedulo. De *Lucernis* celeberrimi *Liueti* opus paulo melius procedit: cui ego indices attexo: de *Gemmis* aliud nondum *Bolzettae* procraftinatione coeptum. Sunt & in *Siminiam Rhodium* ejusdem tres commentarii non in amoeni, quos nuper legi: forsitan rectius istic excudendi. *Ferrarius* de Re vestitiaria quae restant prioribus libris addet. *Scribonio* meo varia moram injecere: inter alia *Laconicum Pisanum* pervetusti operis a *Robortello* descriptum; quod *Duti* munere *Franciscus Maria Cessinus* eleganti ad me epistola, & ad vivum penicillo delineatum transmisit. Eam notis inseram meis, forsitan & *Robortelli* dissertationem non usque obviam, quum paucarum sit pagellarum. *Salmasii* pro Rege Apologiam depraedicant, qui viderunt. eam mihi promisit *Anglus* quidam. Argumentum credo periculi plenum, si meminero, quid olim *Scioppio* & *Puteano* acciderit. *Crassus* recte vivit, in pertexendis Venetorum elogiis totus. Ponam Imperator Historiographi titulo decoravit. *Petrum Scavenium* civem meum virum optimum doctissimumque te compellare jussi: tuo genio amicum sponde. Unum te celare non possum, nec debeo. Ima epistola, sic Regina jubente, a *Ferrario* quaesisse *Vossium*, verumne esset, intercessisse *Danos*, ne oratio ista prodiret. Quam hoc verum, cogita. Unus mihi tunc adfuit nostrae nationis *Langius*, libro de Annis Christi satis notus, quo plurimos heic sibi peperit amicos, in primis *Ferrarium*, cujus ille nomini maxime studet. De me nosti, qui non minus quam *Salvius* Senator Amplissimus meam expertus es ingenuitatem. Hominis parum prudentis merum est commentum, quo suum erga Dominam studium alienae famae ruina testatius reddere voluit. Missis ejusmodi fucis, tu, mi *Heinsi*, cum amplissimo patre, ceterisque viris eximiis, vale, ac vive. Patavii III. Kalend. Jul. CIOIOCLII.

Liceti, Galvani, & Offredi habes. *Aprosius* Genuae habitat, ad quem tuas curabo per Illustrissimorum Praesulem *Tomasinum*, qui te salvere jubet.

E P I S T O L A CCCCI.

J O A N N. R H O D I U S

*Nic. Heinsio.**Leidam.*

Q UAS XXIX. Junii cum *Ferrarii* literis & Panegyrico ad te commisi *Abrahamo van Collen*, recte traditas opinor ante tuum ad nos reditum, quem postremis xx. Julii Lugduni perscriptis indicasti. Secus si factum, eas ab optimo Patre Lutetiam missas puto. Vides ut me desiderium premat variarum lectionum in Celsum apud *Walaei* heredes: quibus si aliquando Rhetorica ejusdem accesserit, me plurimum beaveris. *Macri* & *Q. Sereni* jam certa mihi spes est. Omnibus autem hoc tempore mihi gratiorem profiteor *Vegetium Mulo-Medicum Hadriani Junii* manu interpolatum, ut meis in hunc scriptorem conjecturis lucem adferat, ceterisque ex Codice Vaticano & duobus Mediceis emendationibus, quas *Carolo Dato* denuo recognoscendas misi. Numquid & in Britannia, quod *Isaaci Vossii* indicio nunciasti, ulla ejus copia, vel in itinere tuo, praesertim Lutetiae, diligenter quaeso perquire, ut conatus noster tua etiam opera sit literis commendatior. *Smithii* obitu quantum iis discesserit, vix exprimo. In bibliotheca *Thuani* est *Jordanus Calaber* de equorum natura MS. qui & penes me valde mutilus. Si & alii sunt istic Veterinarii MSS. Graeci, mone. Vidi enim quos *Ruellius* Latinitate donavit. *Licetus* aliquamdiu valetudine usus adversa nunc melius habet, teque amice salutat, pariter *Ferrarius*, ac Reverendissimus Praesul *Tomasinus* adhuc lecto adfixus. *Vintimiliae* tuas mittam. Plura posthac apud *Naudeum* expectabis. Vale, decus meum, & vive. Patavii x. Augusti CIOIOCLI.

E P I S T O L A CCCCII.

J O A N N. R H O D I U S

*Nic. Heinsio.**Venetias.*

I Mbribus ac tempestate grave coelum serius vestras admisit, quam ut quicquam effectum dare liceret, nisi unum *Miltonum* ut mittam. De famulo si quid erit, primis Florentiae scies. *Ferrario* ceterisque quid sit plane ignoro. Neque enim domo pedem efferre integrum. De excerptis quae monuisti in commentarios referam. *Langermanni* epistolam *Offredus* apud Bergömensem tabellarium perquiret. Florentiae si *Gulielmum Langium* Danum Hafniae Professore apud S. Laurentii Priorem inveneris, in tuam virum optimum admitte necessitudinem. Sic enim viri integritas, eruditio meretur. Unum te monitum velim, vivam Serenissimo Reginae effigiem primae nobilitatis viris

expeti. Uno fac exemplo plurimorum desiderio satisfiat. Vale, mi Heinſi, dique ſoſpes vive. Haſce num acceperis, mone. Patavii xii. Januar. cicioclii.

EPISTOLA CCCCIH.

JOANN. RHODIUS

Nic. Heinſio.

Roman.

GAudeo, mi Heinſi, poſtremas meas humaniſſimi equitis *Putei* cura optime traditas, gratulorque novam iſtic natam diligentiae tuae materiam: quam tamen valetudini adverſam nolim. Claudiano ſane operam commodare plurimum refert. De Celſi autem indicio plurimum debeo, cujus utinam aliquod mihi ſpecimen eſſet. Quamvis enim recens admodum videatur, ex vetuſtiori forſan deſcriptus fuit. cujus generis Cl. *Gronovius* apud me deprehendit Statium; nec ita dudum Illuſtriſſimus Salisburgi Archiepiſcopus Celſum mihi e Germania miſit, vel una lectione omnibus, quos haecenus vidi, praeferendum. Panegyrici ad Berengarium ſcripti exemplum invenies apud Cl. *Holſtenium*, mea cura excerptum, cujus apud me alterum eſt. Si librarium Romae offenderis, *Valeſii* deſiderio celerius ſatisfeceris. Qui mea exſcribebat *Analecſta*, ſummo meo incommodo in Germaniam diſceſſit: quanquam hoc mihi ſolatii, quod paucae ſuperſint philypae. Quid Cl. *Liceti* Lucernis lucem moretur, ex ipſo cognosces: quod antea ſignificare nolui. Apud Eminentiſſimum *Barberinum* non parum heic poſſe crediderim optimum *Holſtenium*, qui tua cauſa nihil non tentaverit. *Galvano* tuas tradidi, ſed exeuntibus prope acroaſibus publicis in confe- rendis honoribus Academicis occupatiſſimo. Illuſtriſſimo *Tomaſino* pergrata erunt Teſſerarum ecſtypa: quem ad Pentecoſten adfuturum ferunt. *Datusne* Florentiam redierit, fac ſciam. *Frambottus* Patricii opera ſepoſuit, quorum de Nova Phi- loſophia alterum rariſſimum ac plane recens, utrumque nitidiſſimum. *Guliel- mum Sobierum* Belgam, longa mihi neceſſitudine conjunctiſſimum, tibi ob ſin- gulares animi dotes per *Holſtenium* innotescere aveo. Virum ad unguem factum videbis. *Ferrarii* noſtri de Re veſtiaria opus recognitum *Frambotti* operis recte procedit. De Reginae ſalute admodum ſollicitus tuas deſiderat, ubi aliquid inde habueris certi. Cum *Puteo*, *Holſtenio*, & *Kirchero* viris maximis *Langer- mannum* Achatem tuum ſalvere jubeo, teque una *Offredus*. Vale, ac vive de- cus meum. Patavii xix. Aprilis Anno Chriſt. cicioclii.

E P I S T O L A C C C C I V .

J O A N N . R H O D I U S

Nic. Heinſio.

Romam.

VIX te denuo compellaſſem, mi Heinſi, ni haſce Cl. *Galuanus* addidiſſet humaniſſimas, tuamque *Licetus* noſter expeteret vigilantiam atque dexterritatem, ut non ambigenti modo Quaefitori Utinenſi omnem ſcrupulum eximi cures, verum plenam ulterius *Auguſtae* ſua quaecunque monumenta dicandi facultatem viro optimo impetres eorum indulgentia & auctoritate, cui parendum reliquis. Indicem jam miſit typographus. Quid moretur lucem vides. Tuo ſolum opus conſilio, qui volumen adornandum, holotero rubro, an corio puniceo Conſtantinopolitano, quod mea ſententia durabilius, elegantiusque ad morem Gallorum auro variatum: fibuliſne argenteis, an ſericis tæniis ejusdem coloris auro intertextis; quanquam haſce gratiores credam; aut ſi malis involucrum a vinculis plane ſolutum. Quod genii & conſuetudinis Heroinae haud neſcius primis optime decreveris: ne libro ceteroquin egregio deſit quod & oculis lenocinetur. Analectis in *Septalium* meis jam coronidem addo. Notis in Scribonium heri manum admovit *Frambottus* noſter, qui tuam de Patritii libris mentem opperitur. Clariffimum *Datum* Florentiae fratrem amiſſum lugere nuper ſignificavit *Langius*; qui Bibliothecae Mediceae operam non poenitendam commodavit. Haec dum ſcribo, tuae mihi redditae. *Liceto* mandata cras referam: *Ferrario* tuae forſitan hodie tradentur. *Altempſii* bibliothecarium non ita contra gentis indolem ab omni humanitate alienum fore putaverim, ut librorum MSS. maxime veterum, qui nunc publici juris, medicorum indicem velit negare. Quid rerum ſit, quantum licet, explora. Equitis *Putei* ſolito tardius traditis reſpondere non licet. Virum eximium meo nomine plurimum ſaluta, & *Kircherum*, cujus ad *Delmum* in ipſius e Germania reditum ſervo, niſi aliter jufferit. Vive cum *Langermanno* tuo, ac valetudinem ſerio cura. Patavii III. Maji MDCLII.

E P I S T O L A C C C C V .

J O A N N . R H O D I U S

Nic. Heinſio.

Florentiam.

AUdax infeſtae fortis tentamentum in ſacrum caput non ſine horrore percepimus magno divinae providentiae argumento: rem tamen ut geſta nemo vere cognovit. Dato ſcripſi de Mulo-Medicina Vegetii, quem ſe denuo perlecturum promiſit. Vide, quaeso, cujus aetatis uterque liber ſcriptus, in membranis an in charta; & quodnam auctori praenomen. In meliori editione *Sambuci* P. praepſcriptum, *Hadriani Junii* libro *Flavii* praemiſit *Albertus vander Laen*,

Laën, aut nescio quis alius, quod postea deletum. *Langii* Amstelodami per-scriptae xxvi. Augusti traditae; amicos tantum se Lutetia salutasse memorat, mox ingenti discrimine ac pretio cum veredario Bruxellensi abiisse: in patriam contendere: vidisse interim in Belgio libellum *Vandalini* Dani, quo ejus de Annis Christi sententia non sine felle examinatur. *Ferrarius* hoc mense Mediolano exspectatur. *Liceti* de Lucernis librum adhuc icones morantur. De Gemmis alter, cui & ego indices paro, sub finem futuri mensis cum eruditis communis erit, etiam vestris: sed κατ' ὁδὸν ἐτέεον, de qua coram. Popularem de literis *Frescobaldi* nuper compellavi sine responso. Vale, meique nominis studiosos saluta. Patavii ix. Augusti ciciocclii.

EPISTOLA CCCCVI.

JOANN. RHODIUS

Nic. Heinsio.

Florentiam.

Seneectus ipsa morbus est. Eoque ferenda aequius adversa parentis optimi va-
 Sletudo, quae id habet solatii, quod per inducias natura quandoque sumat vires.
Liceto nuper cum febre non temnenda ei aetati paucis diebus urina supprimeba-
 tur. Blandis medicamentis magni *Silvatici* suasu mota mali causa excernitur sine
 dolore calculus: mox ille melius habuit, sueta nihilominus intermisit studia. In-
 dex geminus operis de Gemmis tantum superest *Frambotti* operis, quum typogra-
 phorum alteri desit numerorum copia. *Augustae* casum ex tuis verius intellexi,
 quam ex vulgari fama, quae de ponte praecipitatum ferebat equi culpa. Quic-
 quid sit, divinam heic agnoscimus providentiam. Quae de Vegetii Mulo-Medi-
 cina monuisti, fuere pergrata. Me tamen sequior librorum aetas non multum
 monet, siquidem & recentiores interdum ex optimae notae antiquis descripti: qua-
 lem apud me *Statium* Cl. *Gronovius* deprehendit. Si meliores apud *Scriverium*,
 omnem monebo lapidem *Lindanus* medicus eos inspiciat. Vereor autem ne
Flavium de Militia videris, quem is jam satis tersum dedit. Lucernae *Ron-*
daninii ectypus non poterit non esse *Liceto* carus, quemadmodum & *Tomasino*
 Praefuli Tesseræ olim promissus. *Rosenkrantzium* tibi conciliem, non est opus,
 sua quem virtus commendat. De navali praelio nihil certi. *Octavius Ferrarius*
 Mediolano exspectatur, qui interruptum de Re Vestiaria opus est repetiturus.
 Meis hodie in *Septalium* Analectis manus extrema imponitur. Cui licet ani-
 mum oculosque adverterim, nevum tamen omnem quacunque diligentia effu-
 gere non licuit. Majorem operæ vigilantiam *Scribonio* promittunt. Sed
 quam mihi video incumbere. Nosti mortalium genus. ideoque plura non ad-
 do. Reverendissimus Praeful *Tomasinus*, *Licetus*, *Galuanus*, *Offredus*, te salutant:
 ego Reverendissimum *Frescobaldum*, *Gaddium*, *Ceffinum*, *Datum*, *Langermannum*,
 ceterosque mei studiosos. Vale Patavii xii. Sept. ciciocclii. *Claudium Berigar-*
dum Philosophum eximium istic tibi cupio innotescere. Circulus viri *Pisanus*
 Reginae placebit scio. Naturalem quippe scientiam ad experimenta revocavit.

EPISTOLA CCCCVII.

JOANN. RHODIUS.

Nic. Heinſio.

Florentiam.

Pietatem in optimum parentem summe laudo: quam & *Augustae* placuisse gaudeo. Vide autem ne dum intempestiva per nivolas Alpes festinatione ipsius, cui vitam debes, valetudini consultum velis, tuae officias, desideratumque officium moreris. Eam si patri meliuscule procedere significarint literae, in Martium mensem iter differendum censerem. *Oedensteinio* quondam Archiepiscopi Salisburgensis nepoti a studiis ante de Ovidio certior factus negotium dedi sedulus inquirat, si quid ejus in ea bibliotheca, hodieque rem de-
nuo commisi, qui tui studiosissimus omnem operam promittit. Securus igitur esse suadeo. *Dinum* si offenderis, gratissimus erit: quem semel apud *Silvaticum* videre contigit. Plinium Medicum olim Florentiae paravi: quem nunc vellem, ut cum Aldino & Basiliensi possit conferri. Aldinum pluribus locis haecenus emendavi ex ingenio. Tentabo id ipsum Plinii Majoris ope, cujus plerasque sequioris aevi scriptor ille Christianus excerptit: quo Plinii nomen apud vulgus meruit. *Langermannus*ne Romae diu commoraturus, fac sciam: ut mihi tralatitia sit ejus opera, quam de te expectabam. *Langii* Hafniae. ix. Octobris perscriptae xvi. hujus mensis traditae referunt gravi dysenteria ad quartum & vicesimum diem decubuisse, jamque de se pene conclamatum: saevissimum in maximam regni partem crebris funeribus vulgari morbum, etiam in optimates ac luculentiores; qui tamen eo tempore paululum remittebat. Aliorum quoque sermonibus accepi, *Bordingum* ex eodem malo convaluisse. Legatus vester cum Senatoribus Regni primis res magni ponderis pertractabat: nostri e Britannia rediere. Analecta in *Septalium* mea lucem videre: quorum exemplar ad Cl. *Nardium* misi. Cetera in Scribonium *Frambottus* nunc aggredietur. *Dato* salutem, cujus proximis respondere jam mihi non est integrum. *Ferrarius* ceterique te salvere jubent, ego *Langermannum*. Vale, ut vivas. Patavii xxii. Novemb. Anno Christ. cicioclii. inclinante die.

EPISTOLA CCCCVIII.

JOANN. RHODIUS.

Nic. Heinſio.

Florentiam.

EA heic asperitas hiemis, ut sinus etiam Venetus rigeat frigore, vixque Ecymbis aditus. Si & istic, nivibus Apennini hoc mense te non satis tuto commiseris. Serius ea de causa literae adferuntur. Hasce tamen exaro, licet ealamum aegrius ducam. *Oedenstinio* nullae adhuc Salisburgo redditae. *Raschius* quoque mutata sententia Italiam antea lustratam reliquit. Roma nuntiatur,
Ange-

Angelonum intestato excessisse, ejusque rariora cessisse *Pamphilio*; equitem *Puteum* colicis doloribus vexari; novas inter Suecos & Danos dissensiones pullulascere. Dî meliora? Si quid habes certi, mone. *Naudaeum* & *Fresnium* nostros in Succiam concessisse intelligo; *Vossium* Augustae gratia excidisse; quod certe nollem. Gallus quidam nescio quid retulit de *Salmasii* obitu. *Licetus* de Lucernis volumen elegantissime adornatum civi cuidam Hamburgensi nuper tradidit, qui recta in patriam tendens *Mullero* S. M. curatori committeret. De Gemmis alterum brevi sequetur. *Ferrarii* de Re Vestiaria pars prior ante Natalitia Christi ad umbilicum perducta. Chartae defectus alteram, meas etiam in Scribonium Notas, moratur. Emendationibus interim tuo beneficio in Celsum excerpendis leniam frigoris taedium. Quod ut aliquando bono fiat publico, quis ille *Sponius* Lugduni Medicus, fac sciam: quid etiam puncta passim subnotata velint. *Gaudentii* nostri sanctae memoriae in Tertullianum salebrae diu multis frustra desideratae recudantur cura. *Forstneri* fratrem, si libet, apud *Gadium* perquires, meum popularem *Petrum Ostenfeldium* apud *Datum*, cui octavo hinc die respondi. *Ferrarius* minus recte valet. *Offredus* te plurimum salvere jubet. Vale, mi Heinsi, & vive. Patavii x. Januar. MDCLIII. Fr. Pona Saturnalium Prolusionem quartam tuo nomini dicavit.

EPISTOLA CCCCIX.

JOANN. RHODIUS

Nic. Heinsio.

Florentiam.

Valerudini tuae, Clarissime vir, qualicunque mora optime consuluit, forsitan & conatui literario: cui coeli benignitas & omnia favent. Utinam & Musis amica tranquillitas. Nescio enim quid Roma nuncietur de ingenti Suecorum apparatu. Multa etiam circumferuntur de Regis mei providentia, qui jam communem Belgii vestri tutelam in se recepit, operam subditorum nactus promptissimam, nobilibus classi annonam, ecclesiasticis equitum suppeditantibus. Interim tanti moliminis eventum patienti animo expectantes quod nostrum agamus. Ovidii quidquid apud nos, c schedae cognosces. Parum id est, ideoque minoris operae. *Oedenstenius* pridem reversus Salisburgum se de novo scripturum promisit. *Dinum* Florentiae si non offenderis; Bononiae fortassis, Ferrariae, aliove loco sese offeret. Parvae molis est. Cetera ejus apud me sunt: haec sola mihi desiderata, licet Venetiis edita: quae semel apud Cl. *Silvaticum* visa. *Argenterii* opus a *Lindano* vestro Leidenfi Professore nominatum nulla in hunc diem sedulitate pervestigare licuit. De cujus fide coepi dubitare, quum noster ille non pauca in Medicorum catalogum alienis titulis admitterit, nec Germani, cetera oculatissimi, tam eximii argumenti libro subtilissimi auctoris opus locupletarint. Isne unquam commentarius Florentiae prodierit, apud Cl. *Nardium* ceterosque Medicos provectiores, imo bibliopolas ac typographos celebres, vel solius *Lindani* causa, non gravatus expiscaberis: quan-

quam & mea interfit id pernovisse, ut secundis Analectorum curis aliquid inde accedat. Nec tibi molestum fuerit, non in Medicea modo bibliotheca, & S. Salvatoris Bononiae, sed in aliis, quas in itinere passim perlustrabis, eos indagare scriptores cujuscunque notae calamo exaratos, quorum tibi indiculum addidi: ut ipsorum notitia reliquis in me beneficiis hoc etiam accedat. De Tessera ceterisque *Tomasino* Praefuli ornamento futuris aurem vellico. Si tibi perscribendum in Sueciam, omni opera fac sciam, quaeso, num Illustrissimus *Cornificius Ulfeldt* eques Danus ea sit in aula, & quamdiu commoraturus. Meus enim ille a multis annis patronus, ne dicam familiaris; de quo plura coram, unum hoc rogans inclusas ad Illustrissimum *Gustavum Bannerum* accures, quas mittit *Julius Comes Placentinus*, ei Nationique plurimum addictus: quem virum officii memorem heic agnosces. *Ferrarii* pars altera de Re Vestiaria sub praelo est. *Argoli* de Cometa pridem viso Dissertatio brevi exhibit. *Liceti* de Gemmis Hieroglyphica in dies a bibliopego Veneto praestolamur. Uterque te salvere jubet, in primis *M. Aurel. Galuanus*, qui me invisit heri, quum a Natalitiis Christi pedem non extulerim domo: adfuit etiam *Licetus*, ac *Ferrarius*. Omnes recte valent. *Offredus* pariter salutem adscribit, quam & ego *Langermanno*. Vale, decus meum. Patavii VII. Februarii MDCLIII.

E P I S T O L A CCCCX.

J O A N N. R H O D I U S

Nic. Heinsio.

Venetias.

Opinione mea serius ad proximas respondeo, ut aliquid serio. Omnem tentavi modum, quo tuo satisfaceret voto. Sed in vanum, siquidem libri sine peculiari indulgentia deportari non possunt in aedes nostras, nedum extra urbem; quod diris vetitum. Testes erunt *Ferrarius*, quem nunc primum compellavi, & *Offredus*, qui in Cathedrali bibliotheca, & apud Canonicos Lateranenses jam ante aliquot dies libros seposuit, ne iis quaerendis quid morae foret. Si Venetiis aliquamdiu expectanda fuerint, quae in Sueciam mittenda, non ab re crederem Patavium concedere, nisi bidui taedium deterreret. *Langermannum* meliuscule habere gratulor, pariter *Bannerum*. *Ursatus* noster tibi & bibliothecae Regiae suorum monumentorum bina exempla destinavit; Abbas *Papafava* suae etiam gentis seriem, ut bibliothecam augeant Regiam: *Licetus* tibi editum recens utrumque librum. Ego & meam adderem Aciam cum *Lipso* de Re Nummaria, si ea in bibliotheca desideraretur. Quicquid sit, nec mea spero ingrata fore, quum mei studiosos ibi habeam non paucos; quos inter nemo *Ulfeldio* prior, qui in Gallia & Italia mihi semper fuit conjunctissimus; de quo coram plura. Comes *Scotus* vir optimus te plurimum salvere jubet. Celsum utrumque, si libet, remittam. Vegetium *Datus* protraxit. Quidquid constitueris, factum puta. *Licetus*, uterque *Galuanus*, *Ferrarius*, ac *Turrianus* salutem adscribunt. Tesserae ad Praefulem *Tomasinum* memineris,

ris, antequam convasandum. Vale, vir Clarissime. Patavii xiv. Martii Anno
Sal. cidiocliii.

EPISTOLA CCCCXI.

JOANN. RHODIUS

Nic. Heinsio.

Venetias.

Proximas meas xii. Martii ad *Abrahamum van Collen* missas necdum tibi
visas, quum tuas xvi. dares, vel inde suspicor, quod nihil de *Liceti* ac *Ul-*
sati libris ad te transferendis perscribas. *Turriano* res tuae quam sint curae, jam
ex *Offredo* intellexisti. Venetiis Ovidii *Metamorphosis* in bibliotheca D. Marci
pluteo tertio reperitur; de Arte ejusdem liber cum Scholiis apud *Roccum Fide-*
lem Cornianum Jurisconsultum, virum optimum, qui *Crasso* procul dubio ami-
cus, cui nec ego ignotus. Ceteri, quos apud *Brugnolum* bibliopolam e meis
notavit schedis Praesul *Tomasinus*, jam apud *Gaffarellum* sunt, qui eos paravit
me praesente. Fuit etiam De Arte apud *Vintimigliam* exemplar in coenobio D.
Stephani, quod fortassis nunc in bibliothecam D. *Augustini* Genovae reposi-
tum, in quam se suos transtulisse libros omnes indicat suis nudius quartus tra-
ditis. Tuas quamprimum expecto. Vale, mi Heinse, ac vive. Patavii xxi.
Mart. cidiocliii.

EPISTOLA CCCCXII.

JOANN. RHODIUS

Nic. Heinsio.

Venetias.

Hesternae luce libris colligandis occupator in eam redactus fui temporis
angustiam, ut vix eos tribus verbis persequi foret integrum. *Colonium* ta-
men hodie tradidisse spero. Aderant & *Liceti* ad te literae, pariter *Ursati*.
Ille utrumque opus de *Lucernis* & *Gemmis*, praeter duo volumina *Augustae*
dicata, misit, quod in tuam vel publicam bibliothecam transferatur, perinde
habet: hic bibliothecae Regiae Monumenta in charta Imperiali excusa offert,
alterum tibi exemplar. *Cottunius* inscriptione mentem significavit. Credo epi-
grammatum exemplar *Langermanno* superesse. Addidi & ego meam in charta
regia *Aciam Septalio* meisque in hunc *Analectis* in usum bibliothecae regiae,
si tibi commodum videbitur, itemque de *Re Nummaria* *Lipsum* cum *Parae-*
nesi viri fortissimi *Nestoris Martinengi*, quae fortassis Dominae ob prudentiam
non displicitura. *Patricii* *Philosophia Universalis* Illustrissimo *Delphino*, le-
ctissimorum librorum possessori, dudum divendita. *Corniani* liber continet
Fastorum libros *Amorum*, *Tristium*, de *Ponto*, & cetera opuscula Venetiis
impressa Anno 1474. forma decumana oblonga, sine Scholiis. Una ad *Li-*
viam *Consolatio* nonnullis in locis est calamo emendata. Quem tuum in ad-
ven.

ventum cum Metam. MS. diligenter servo. Vicetiae nullus est natione Graecus. Sed presbyter quidam *Annibal Gradarius* Graecae linguae non imperitus, & *Cadamustus* alter civis nobilis mihi a multis annis notus. *Offredus* hac vespere aut summo mane libros, quorum memini, MSS. conquirit. Herum enim non licuit heri hodieve offendere. Vale, mi Heinfi, ac vive cum tuo *Langermanno*. Exarabam Patavii Kalend. April. CIOIOCLIII.

E P I S T O L A CCCCXIII.

J O A N N . R H O D I U S

Nic. Heinfi.

Parisiis.

Nihil tuis jucundius, mi Heinfi, quem semper in animo, in oculis fero. Binas tamen solas a tuo discessu accepi. Helveticos motus si patientius tulisses, itineris tam laboriosi aliquem fortassis fructum percepisses. Genevae nonnulla tui saporis fuisse credo. Hesychius erat in bibliotheca *Deodati*, quem *Porta* emendaverat, additis passim Homeri versibus. Num & illic, noveris. Omnia heic lenta. Ex quo Mediolanum xiiii. Maji concessit *Octavius Ferrarius*, hodie tertiam mihi philyram exhibuit typographus. Nec ullis mihi precibus impetrare licuit, ut vel primam daret mearum conjectationum in Scribonium. D. *Antonio* ea vis fuit, quod omnes moraretur. Nec tamen colophonem attigit ejus Historia, quae annuae solemnitati exponenda fuerat, non sine gravi bibliopolae detrimento. *Argolus* interim de Cometa pagellas aliquot conscripsit: librum integrum *Licetus*. Praefulis *Tomasini* Gymnasium Patavinum optime procedit: qui de Tesseris magnas tibi gratias habet. Comes *Scotus* dubia destillatione conflictatus naturae jam pridem salutem debet. *Datus* valetudini haecenus operam dedit: communem ei *Cessinus* obtulit in Vegetio recensendo apud *Gaddium*. Plura in eum non male divinavit *Junius*. Vide, si quicquam hanc in rem apud Cl. *Scriverium* aliosve possis investigare; ac mone, quaeso, ne frustra spes tantas alam. De Macro jam *Langermannum* sollicito. Si per Daniam commeaveris, *Bangium* affinem salutes cum *Vormio*, *Bartholinis*, ac *Fureniis* viris egregiis, qui tuam merentur necessitudinem. In Suecia meas ipse Illustrissimo *Cornificio Ulfeldio* protinus reddas cupio, meaque simul obsequia serio testeris. *Naudeo*, *Bourdelotio*, *Raphaeli du Fresne*, ceterisque mei studiosis salutem adscribo; tuo in primis Parenti optimo firmam valetudinem roveo; V. Cl. *Vorstio* & *Vossio* fausta omnia. Vale, mi Heinfi, ac vive. Amici te salvere jubent. Si quid ad me dederit responsi Eques ille noster, tuis includatur. Cave tamen lino muniantur literae. Venetiis enim aperiuntur ejusmodi omnes, nec denuo signantur. Patavii xxiv. Jul. CIOIOCLIII.

EPISTOLA CCCCXIV.

JOANN. RHODIUS

*Nic. Heinsio.**Holmiam.*

Desideratissimis tuis mense Januario redditis, quibus nihil mihi jucundius, respondeo serius, ob adversam Clarissimi *Ferrarii* valetudinem: cui mea manu Regias tradidi, pariter *Liceto*. Utriusque habes. Ad *Banierum* etiam *Co. Scoti*, qui Dissertationibus de Paedia Peripatetica nuper editis prolixè Augustam laudavit, nec te ceterosque de se bene meritos praeteriit. Inopinato superioris mensis frigore, *Puteo* etiam, ut scribit, Romae admodum infesto, *Argolum* domi seclusum videre non fuit integrum. *Licetus* cum suis ad Augustam mihi Cometae historiam commisit, quam civi meo Hafniam dabo ferendam, ut prima occasione ad vos curetur. Scribonium addidissem, nisi *Frambottus* jam tres menses aliis impendisset operas: quo postulationibus ipsius parum aequis cederem. Quod hodie factum. Nec melior *Ferrarii* sors: cujus de Re Vestiaria opus quintum jam mensem lentas trahit moras. De Celsi Rhetorica plurimum debeo. Tu interim vide recuperes eam, quae istic erat. *Bangio* vix licuerit sine meo indicio reperire Ovidii exemplar: de quo ad ipsum perscribam. Literas meas ad Illustrissimum *Cornificium Ulfeldum* tuae curae creditas ipsi tradi cupio. Si nondum istic, expiscare quaeso, ubinam vivat. Si *Stralsundiae*, ut suspicor, tibi non erit difficile per aulicos vestros, aut *Ulfeldum* alterum Regiae, ut audio, Custodiae Praefectum, cui non sum ignotus, id perficere. Malo tamen apud te aliquamdiu haereant, quam dubiae fortunae committantur. Mea enim plurimum interest, ad ipsius manus perveniant. Quod tua opera futurum quam maxime confido. De ceteris ad te per Germaniam, ut monuisti. V. C. *Isaacum Vossium* saluto, & *Langermannum*. *Kirstenius Dieterico* fatis functo pridem Romam concessit. Omnes in urbe recte valent. *Holstenius* bibliothecae Vaticanae praefectus. Vale, mi Heinsi, ac vive. Patavii v. Martii MDCLIV.

EPISTOLA CCCCXV.

JOANN. RHODIUS

*Nic. Heinsio.**Upsaliam.*

Regias literas mea manu *Liceto* ac *Ferrario* traditas, jam procul dubio intellexisti, modo meae ad Amplissimum Patrem tuum missae recte fuerint curatae. Nec aliam nunc viam insistere tutum duco, tametsi aliis de causis ad *Jo. Georgium Volcamerum* Noribergensem Medicum perscribam. Habes *Argoli*, & quibus priorem fasciculum vix licuit onerare *Offredi* nostri. *Licetus* suum de Cometa responsum una cum literis ad Augustam apud me reliquit;

Tom. V.

N n n

suum

suam praeterea *Co. Scotus* ad te Paediam Peripateticam; quae civibus meis in patriam redituris committenda censui, qui Hafnia libros in Sueciam accurabunt, ubi te aestiva acturum opinor. Dignitate ac munificentia Regia quantum tibi accesserit, satis perspexi. Mihi semper spes angusta, hisce potissimum temporibus, quibus pax dubia Musis obstacula minatur. De *Langermanno* aliquid scire aveo. Nullo ferme discrimine Theocritum Trevisanorum MS. in ipsius gratiam coepi cum edito conferre. *Ferrarii* de Re Vestiaria opus integrum nunc metam prospicit, quam & meus attigisset Scribonius, nisi ultra menses quatuor cessassent operae. *Holstenium* Bibliothecae Vaticanae praefectum nosti. Magno id factum rei literariae commodo: siquidem in ea reficienda is totus. Adversa valetudine affectus focii opera Oedipum suum perficit *Kircherus*. Virum bene meritum a *Meibomio* acrius habitum adeo grave fuit summo Pontifici, ut nisi deprecatus fuisset ipse *Kircherus*, in posterum ei vetitum fuisset advenarum omne commercium. Vale, mi Heinse, ac responde, nisi haec ante verteris. Iterum Vale. Patavii VII. Maji Anno MDCLIV. *Isaacum Vossium* V. C. ex me salutes, quaeso, Te haec omnes: e quibus *M. Aurelius Galuanus* aliquamdiu febre catarrhali decubuit.

E P I S T O L A CCCCXVI.

N I C. H E I N S I U S

Joan. Rhodio.

Florentiam.

Responsorias, Rhodi Clarissime, *Octavii Ferrarii* viri eximii litteras & tradidi jam pridem Reginae, & tradidisse me paulo post tibi nunciavi, misso ad *Abrahamum Colonium* fasciculo. A quo tamen cum nihil haecenus intelligam, quod de fasciculo securum me reddat, parum absit a suspitione perditarum litterarum, nisi tu hunc mihi scrupulum tempestive eximeris. Respondebam eodem tempore & ad *Ferrarianas* & ad alias, quas mittebas, amicorum litteras. Magna post secuta rerum apud Suecos mutatio; quam tamen operose nunc non recensebo, quod Famam non fuisse parcam in iis omnibus per Europam disseminandis confidam. Imperio postquam sese abdicasset Regina, nihil habuit prius, quam pedem ex Suecia movere, sparso prius de Spadanis fontibus adeundis rumore, credo, ne discedenti Senatus obniteretur. Spadam tamen non videbit, ut arbitror. Hamburgo Amstelodamum recta contendisse ultimi ferebant nuncii, inde Bruxellas abituram: quo jam advenisse debuit, dum haec scribo. Hibernaturam illam in ea civitate quidam adfirmant, negant alii. Moram certe nonnullam istic tractura existimatur. Jusserat ut sese in hoc itinere comitaret. Sed oblectatus est parens meus, quod negotia sua videret in hac aula trahi. Ea ubi confecerō, sequar fortassis. Quanquam malo nonnihil etiamnum differre cogitationes istas, dum plenius intelligam, quo spectet ista peregrinatio, de qua non desunt hic, qui minus bene augurentur. Deteruit hoc *Langermannum* quoque: qui nuper ad suos discessit ex hac urbe,

ope

operam, ut opinor, Duci Mecklenburgensi addicturus. Jussit illum Regina & Rex sperare Consilarii munus in Senatu Vismariensi, ubi locus in illo collegio vacaret. In Theocrito excutiendo non est quod labores, nisi exquisitae notae sit exemplar istud Trevisanum. *Vossius* jampridem in Bataviam profectus est, ubi Reginam expectat. Ducis Holsatiae filia Regi nostro desponsata est. Ferrarianos de Re Vestiaria libros & Scribonium tuum avide expecto. De *Meibomio* recte existimas. Nimis inclementer profecto excepit optimum *Kircherum*, idque instante *Salmasio*. Is apud Regem vestrum bibliothecarii munere nunc fungitur. Amicos omnes jubeo salvere. Vale, optime & clarissime vir. Holmiae. Anno MDCCCLIV. xv. Aug. Gregor. Tuae multo tempore in Batavia detentae fuerunt, quod domi expectarer. Unde fit, ut tardius nunc iis respondeam. Eadem licet via tuae mittantur impofterum. Spero enim ante hybernā fore tempestatem, ut mihi hinc liceat abire. *Liceti* librum populari tuo creditum perituum metuo, nec ad me fore perferendum.

EPISTOLA CCCCXVII.

NIC. HEINSIUS

Nat. Rondinio.

Romam.

Versus tuos, Rondini Illustrissime, quibus merito Juveniles *Philomathi*, viri maximi, Musas celebraſti, quanta cum voluptate quantaque cum admiratione legerim, verbis testari foret arduum. Diutius illi, fateor, quam par erat, penes me haeserunt: quod itineri Neapolitano *Furstenbergii* nostri licet imputes, non meae negligentiae: Nec diffiteri tamen possum me haud invito factum, quod tanto tempore tam insigni depositum meae fidei commissum fuerit, & cujus solo conspectu animum jacentem ac fractum excitari sensi ad poësin, & repente incallescere. Nunc quoque aegre avelli eos a me patior: patior tamen, quod spes sit fore, ut brevi publice legantur: Venerationi certe, qua jam ante non exigua virtutes tuas proſequebar, multum accessit, postquam contubernio meo frui Musae tuae non sunt dedignatae. Dum autem in eo sum, ut eas dimittam via ruta, ac *Furstenbergii* reditum ad vos operior, ecce nova comitate, literis inquam tuis, me circumventum ac oppressum deprehendo. Nam quod anxie excusas protractam scriptionem, meas invaſisti partes, cujus erat silentium diuturnum deprecari. Convenire vos semel iterumque tres aut quatuor simul, singulis hebdomadis, haberique tum eruditos a vobis sermones, nūnciat *Furstenbergius*, cujus felicitati sane invideo, quod in partem veniat hujus consuetudinis. Atque adeo certus esto, si meus essem, nihil prius mihi fore, quam ad vos citato gradu properare, sed injectae mihi sunt compedes in bibliotheca Medicea: quae cum codicibus Ovidianis manu exaratis satis sit instructa, huic pistrino non possum me subducere. Multos jam examinavi magna cura, plures evolvendi restant. Velim enim post confectum iter Italicum poëtae maximo lucem foenerari. Sunt autem loci

fere infiniti adhuc indignis modis depravati, quos in integrum posse restitui diffido, sine ope vetustiorum, quam quae haecenus fuerunt ad manum, exemplarium. Quapropter per Germaniam iter facere decrevi: quod illo terrarum in tractu bibliothecae etiamnum veteres supersint satis multae, quas opem conatibus meis aliquam laturas auguror, a te interim contendo supplex, ut si quas in membranas Ovidianorum operum incidis (dubium enim non est quin ex privatis apud vos bibliothecis possint nonnullae erui) eas meis usibus vindices ac in lucem protrahas. Ita & maximus accedet cumulus caeteris tuis erga me beneficiis, & erit, quo publice testari possim, quantum tibi debeam. Vale.

EPISTOLA CCCCXVIII.

NAT. RONDININUS

Nic. Heinſio.

Florentiam.

Vide nimium ne mihi sumam, & si a te me non minimum diligi sciam, quantumlibet amori concedam, si eum tamen in partem aliquam earum laudum, quibus plenum scazontem meum dimisisti, nullum velim venire. Quid ni enim ita me amem? cum optime perspectum habeam candorem illum tuum, qui nihil magis quam omnem assentationis labeculam reveretur. Eas itaque sic deinceps observabo, ut veluti ὄφρον μοι εἶναι recte putaverim. Profecto sic habeto, hanc gloriam adeo amplam lautamque a me existimari, ut huic privatae domesticequae luci, quid a publica illa, & quam jam appetit Scazon, addi possit, haud videam. Utinam vero ejus authore, ac teste praeclarissimo diutius perfrui liceret. nec modo praeceps valetudo parentis, verum etiam augustissimae Principis ingentia jussa reditum in patriam adurgerent. Ignosco autem maximae Reginae, castrorum literarumque matri, quae ab hujus immanis barbariae faucibus ereptas Musas, magnorum ducum exemplo, eodem exemplo quo Martem colit; & Patris laureatos fasces non ut olim in Jovis, sed in ipso Apollinis gremio reposuit; si ab Italia carissimum pignus tam a vide reposcit, & concessam hanc nobis brevem usuram morae saepe reflagitat. Magnum illi tamen munus referes, Ovidium nempe pejus a librariorum inscitia, quam ab exilio mulctatum, per te iterum civitati donatum, suaeque ingenuitati restitutum. Quod jubes ut manu exaratas membranas, quas possim, conquiram, curabo libenter, cupio enim plus satis, & de egregio vate, & carissimo amico aliquid mereri. Sed tua ipsa industria, & diligentia, quam mihi significas, qua omnes bibliothecarum rimas angulosque pervios fecisti, non nihil ab incepto retardor. Nihil tamen omitam. Malo enim impudentior fortasse, quam minus officiosus existimari. Germania hac copia longe Italiam praeterit. Nosti enim ut Vaticanorum codicum numerus luculenter ab ea instructus auctusque sit. Mea consuetudo maxime uno *Furſtembergio* ac *Favorito* celebratur, in utroque summa eruditio,

&c.

& poëseos studium incredibile. Quod si ad eam etiam aliquid tuæ suavitatis accederet, Croeso major incederem, sed & in ipsam non parum confers tuis epistolis, quas a te quantumvis absis crebras eliciam. Vale. Romæ XIX. Kalend. Januar. CIOIOCLII.

EPISTOLA CCCCXIX.

NIC. HEINSIUS

Nat. Rondinio.

Romam.

Inter multa, quæ Romæ periucunda mihi acciderunt, plurimumque attulerunt voluptatis, peream, si quicquam prius duco antiquiusque tua consuetudine. Visus enim sum eam in te morum, vir Illustrissime, observare amabilitatem, cum summæ ingenuitatis candorem, quem millenus quisque hominum eruditorum, quorum in agmine multum es conspicuus, præstare vix possit. Testis erit *Furstenbergius* noster, quantopere gratatus mihi sim felicitatem tui cognoscendi eximiam. Non ibo tamen in tuas laudes, ne beneficiis injuriam, & modestiæ pulcherrimæ foedam reponam assentationem. Ne fas tamen sit silentio involvi benignitatem istam, omni commendatione majorem, qui firmum satis effectus tui vinculum non putasti, nisi obviæ liberalitatis & munificentiae tessera insigni sanciretur. Loquor de præclaris rei antiquariæ monumentis, quæ tui *μνημόσυρον* ad me venire voluisti, quanquam inhaeret animo meo nunquam elapsura virtutum tuarum imago. Quod ego tui pignus omni liberalitate duco præstantius. Nunc quidem nihil magis mihi est in votis, quam ut te præsentem frui denuo possim. Id confidebam omnino fore, cum Roma ante menses duos discederem. Supervenit postea ingratus nuncius de afflictissima parentis optimi valetudine, qui incertum animi dubiumque me fecit, & in contemplatione calamitatis domesticæ multo tempore defixum tenuit. Nam nisi deus adsit e machina, & opem inexpectatam ferat, pedem ad lares paternos citius referre cogar, quam velim. Dolor hic iustissimus in causa fuit, vir Illustrissime, quod literis te meis tardiuscule compellem. Cave enim credas hanc animi ingrati notam esse, quem ego procul habeo & averfor, sic ut nihil magis. Vix opinor fore, ut ante tempus hibernum hinc me proripiam. Si quid interea curatum voles, scias velim, cum in promptu tibi sint amici plurimi, iique potentissimi, neminem tamen inter illos inventurum te, qui operam tibi suam ardentius probatam cupiat. Vale. Florentiæ CIOIOCLII. prid. Non. Septemb.

EPISTOLA CCCCXX.

NAT. RONDININUS

Nic. Heinſio,

Florentiam.

IN exſpectatione tuarum litterarum, in qua ſane diu fui, nihil mihi jucundius accidit *Furſtembergio* noſtro, qui ſpem certam fore pollicebatur, amantiffimum noſtri Heinſium, non laturum ab ſe has amoris veluti *ὑποθήκας* longius deſiderari. Ut verus autem fuit. Nam ecce a te plena amoris, & humanitatis epiſtola; quaeque hanc moram abunde ſarciverit. In his vero, cum de multis te amo, tum eo praefertim quod in hac praeclara ingenii laude, qua flores, diligis tamen, qui tecum ad eandem palmam, ſed longo ex intervallo aspirant. Quo etiam, quoniam me tuis laudibus provocas, jam omnes artus, & nervos contendam ardentius. Quid autem de antiquis illis munuſculis memoriam injicis vir? cui etſi tota ſe proferat e ſuis tenebris eruta vetuſtas, tamen pro opera a te in ea illuſtranda naviter impenſa, plura ſe debere, & majora ipſa ſua voce teſtetur? Fatebitur hoc certe, ſi antiquos ſuos mores velit antiquitas obtinere. Sed male ſit fortunae, quae te a noſtra Italia tanto terrarum ſpatio interjecto jam dividet. At quando te ſuprema in parentem officia, ipſa denique pietas convicio penè compellit properare; molius eſt ferendus hic dolor. Perge porro: ſuaviſſimi enim filii aſpectu, vel ex ipſo rogo allevabit oculos parens, parataſque luctui lacrimas jucundiſſimos inter amplexus abſumet. Eris tu forte deus illi, quem non niſi e machina prodire poſſe in ſcaenam putas: utinamque faxis ut tragicus hic ornatus, ut olim Plautinus ille Jupiter, exitu lætiore ſe convertat. Hoc certe, qui litteris ex animo factum vellent, ſpectatores optumi mallent. Tu cura ut valeas, & quoniam inter nos videndi languidior jam ſpes eſt: amorem noſtrum non ſinas tuarum litterarum deſiderio tabeſcere. Iterum Vale. Romae xvi i i. Kalend. Octob. cldcclii.

EPISTOLA CCCCXXI.

NAT. RONDININUS

Nic. Heinſio.

Florentiam.

DIU a me nihil litterarum. *Furſtembergii* enim abſentia factum eſt, ut hoc amoris noſtri iter, ut ait ille, interromperetur. Non fuit autem, cui adhuc recte darem. Hodie ſub vesperam, dum Agonalem plateam praetervehor, viſus ſum videre *Furſtembergium*. Is num eſſet vix ſatis primo conjeci. Ita enim totus prorſus erat in typis quibuſdam, qui ibi propalam venales proſtant, ſpectandis, ut quamvis ſumma voce, & quantam ex inſperato gaudio extuleram, de curru ſaepius clamarem, nullus tamen adverterit. Nolui, aliquid forte meditan-

dicanti, quod maxime sit in communem rem nostrorum studiorum, odiosus intervenire. itaque ocius domum revertor, calamus posco, perscribo, ut eadem opera me hac molestia, ut ne quid à me ineleganter admissum putares, & hujus epistolae, quam dudum debeo, fidem liberarem. Optimum certe fuerat dum mihi unice carissimum juvenem Roma Neapolim decedentem, ire laetum, ire felicem jubeo, eique secunda omnia polliceor, huic quoque epistolae faustum iter exposcere. Sed & ipse fidem faciet, vix me ut huic generi urbanitatis aliquid darem, tantulum temporis invenisse. Sed ut ab his tandem abstineam, amabo te, ni J. Heinsii, de Scazonte etiam atque etiam videas, quippe in has solum leges ut mitterem vix tandem expugnavit, cui nihil unquam negatum velim, *Furstembergicus*. Multa in eo ex sanguine sunt, & sine cultu, quem a tuo stilo colorem aliquem nitoremque desiderant. Ille namque spiritus, quo maxime poetica vivit oratio, qui in eo quam exilis sit sentio, in majus quiddam exurgat scio, ubi divina illa tua veluti Delphicum antrum attigerit. Apud suavissimum parentem rectene sit aveo scire. illo enim incolumi spes nostrae maxime nituntur posse te in Italia longius frui. Quid si etiam Romae! Palladium merito hanc hyemem appellarem, si per eam una esse liceret, & omnes tuae suavitatis intermissos fructus exigere. Ama me, ut facis, & Vale. vii. Idus Novembris. CCCCCLII.

EPISTOLA CCCCXXII.

N. A. T. RONDININUS

Nic. Heinsio.

Florentiam.

TU vero adhuc es meis in laudibus, quibus quoniam ut veris frui non licet, saltem ut falsa imagine recreor. Sinam jam nunc Scazontem, velut amplo fatis instructum viatico, quocunque velit exire. De Ovidianis codicibus etiam atque etiam videbo, siquid dignum diligentia tua reperero, non omittam. Sed quis ad beatam illam Mediceae Bibliothecae copiam adspiret? perterritus enim non nihil sum, fateor, & numero & alacritate illa, qua ad unum omnes pene decurristi. Sed quoniam mones esse etiam in novis istis quod feligas, & unde aliquid mutes, & puram illam incorruptamque vetustatem, non adeo recentiores has Grammaticorum maculas infecisse, quin aliqua latebra interdum teneri possit, quae indiligentem illorum diligentiam effugerit, sedulo incumbam ut humanitati tuae in hoc genere aliquid respondeam. Amari a me Regnam tuam ais. Injuria certe literarum illarum, quas ipsa adeo exornat, quaeque ut in me aliquae sint indies curo, secus facerem. Magna quippe laus quaeque in paucissimis contigit, posse eodem animo, quo bellā geras, & canere, & Philosophiam, pulcrum illud, sed plenum invidiae nomen, non modo in urbes, ut olim Socrates, evocare, verum etiam in Aulam inducere. *Furstembergicus* ad *Alexandrum Pollinum* elegantissimam odem dedit. ad me etiam aliquid. in hoc vero semibarbarum quendam, Scotum, an Britannum nescio, qui
prae

prae te uno omne Latinum nomen gentemque togatam, suo oceano frigidiorē putat, mirifice traducit. Si nondum misit, exigas, gratulaberis sat scio felicitati meae cum leges, sed abunde nosti ejus ingenium moresque cultissimos. Tu modo ut *Furtembergium*, sic etiam Natalem tuum fac ames. Vale. Roma III. Idus Januar. CIOIOCLIII.

EPISTOLA CCCCXXIII.

NIC. HEINSIUS

Nat. Rondinino.

Romam.

O Bleetandi animi causa diebus proxime elapsis nobiliores aliquot Hetruriae civitates perlustrabam, Rondinini illustrissime, comitem itineris nactus *Carolus Datum* elegantis virum ingenii. Nunc Florentiam reversus nihil habeo prius, quam ut suavissimae tuae respondeam epistolae, quae amabili eloquio itineris molestias omnes languenti mihi ac nauseanti excussit. In Ovidianis codicibus conquirendis quod operam tuam non defuturam mihi pollice- ris, amplector officium. Optime enim optimo auctori volo, quem si non omnibus, plerisque saltem foedioribus absterfis nevis, in lucem prodire tandem comptiorem rei publicae literariae interesse censeo. Nec est quod Mediceorum codicum copia ac numerus te deterreat, saepe enim fit, ut exemplar unicum instar plurimorum sit. Potioris ducō illum, qui ad Divi Marci hūc adservatur, Metamorphoseon codicem, quam Mediceos omnes, etsi & inter hos nonnulli sint eximii. Regina nostra quod magni a te fiat, felicitatem ejus, quam assiduam hactenus comitem in omnibus negotiis experitur, agnosco. Quanquam enim singulares, quae in illa elucent, dotes bonorum ac praestantiae virorum venerationem mereatur; tamen non nescis, raro dignum magnis virtutibus poni pretium. *Furtembergium* pro innata sibi comitate Oden ad *Alexandrum Pollinum* suam, alteram etiam tibi inscriptam mecum communicavit. Dignus utorque parente suo foetus. Angli illius putidam arrogantiam graphice descripsit. Ego vapulanti faveo, qui hominis ineptias, superbiam & φιλαυτίαν cum alieno contemptu conjunctam satis olim superque perspexi. Post dies quatuordecim hinc Bononiam & Venetias cogito. Italiam tamen vestram non reliquero, nisi te rursus per literas convento ac salutato. Vale. Florentiae Kalend. Februar. CIOIOCLIII.

EPISTOLA CCCCXXIV.

OCT. FALCONERIUS

*Nic. Heinsio.**Leidam.*

CUM duobus ab hinc annis Amstelodamum venissem occasione peregrinationis, quam per Bataviam vestram institueram in coetu nobilium aliquot Itolorum, non sine aliquo numine factum existimo, ut ad ix. Kalend. Sept. (ipsum enim diem memoria teneo) incenso mihi magna cupiditate tui visendi, propter singularem doctrinam tuam, inclytumque Patris tui, clarissimi viri, nomen colloquendi tecum plane divinitus copia oblata sit. Nam cum in tabernam quandam divertissemus in ea urbis via sitam, quam *Warmoestraat* vernacule appellant, nescio quo pacto aliquamdiu soli fuimus in triclinio, dum alios nonnullos ad prandium conveniendi moram facientes officii causa praestolaremur. Accedis ad me perhumaniter, ut ad externos fieri solet, interrogas nonnulla de patria, de itinere, de sociis. Respondeo me Florentia oriundum, Romae quidem degere, sed Francofurdianorum comitiorum fama excitatum, una cum *Julii Sachetti* Cardinalis ex fratre nepotibus illuc ab urbe properasse, ut conventui nostra aetate celeberrimo interesssem, quo absoluto solemni Caesaris inauguratione per Rhenum in Bataviam descendisse, trajectionem illinc in Angliam fore, inde in Belgium, postremo peragratis Galliis in patriam reversurum eo animo, ut ex ea peregrinatione, quam oblectationis gratia susceperam, nonnihil etiam fructus a conveniendo illustres omni optimarum artium genere viros perciperem. Constitutum mihi esse paucis post diebus commigrare Lugdunum Batavorum, ut *Nicolaum Heinsium*, *Danielis F.* viserem, quem studiis litterarum florentem, & singulari eruditione virum acceperam. Dii boni! quam omnibus laetitiis cumulatum me sensi, cum te insperato Numinis favore praesentem cognovi! Cave quicquam putes mihi ea agnitione jucundius accidisse unquam, qua poni ante oculos mihi, veluti reducto sipario, simulacrum elegantiae omnis litterariae visum est. Memini etiam te post officiosa ultro citroque verba mentionem honorificentissimam fecisse *Francisci Barberini* Card. Amplissimi, a quo, cum Romae fuisses, summae erga te benevolentiae non vulgaria indicia recepisse memorabas. Quo deinde fato acciderit, ut te vix repertum omiserim nescio. Illud certe non mediocriter dolui, nullum arctius inter nos necessitudinis commercium initum esse, me tibi vix notum quod scirem, & vehementius etiam doluissem, nisi mihi spes adhuc superfuisset visendi te iterum Lugduni Batavorum, ibique dandi pignus aliquod observantiae meae, & amicitiae nostrae auspicandae facultatem futuram. Eo cum venissem indictas studiorum vacationes, te rusticatum divertisse, non facile est dicere quam moleste tulerim. Quamobrem cum me ex itinere Romam recepi, nihil mihiprius faciendum curavi, quam ut jacta Amstelodami amoris nostri fundamenta litteris confirmarem. Eas habes elegantiae, & ornatus omnino vacuas, sed

Tom. V.

O o o

ple-

plenas obsequii erga te mei, quibus si effecerim, ut te a me tantum amari, observarique credas, quantum profecto cupio, nihil est, quo beari magis possim. Quod necessitudinem tuam, ut facio, tam enixe expeto, id causae est, quod & litteratos viros, tuique similes veneror majorem in modum, & iis studiis animum adjunxi, in quibus mirifice me a te adjuvari posse, non ita te ignoro, ut non intelligam. Hoc commune nobis est a natura, ut nihil non alicujus commodi gratia ii agant, qui tantum distant a brutis animantibus, quantum propter aliquem finem agere a Philosophorum sapientissimis dicuntur. Tuae humanitatis erit efficere, ne voto decipiar, communione eruditionis, & doctrinae tuae, quam non sine invidiae susceptione addiscendi cupidis denegare potest quisquis in iis excellit; illudque e contra polliceor, quantum in me est, quicquid ab ingenio, & grato homine proficisci poterit, tibi a me fore paratissimum. Vale. Romae XI. Kalend. Maji CIOIOCLX.

EPISTOLA CCCCXXV.

NIC. HEINSIUS

Oët. Falconerio.

Roman.

EX quo ante triennium apud Amstelaedamenses in caupona forte congressi sumus, conspectus tuus suavissimus animo meo identidem est obversatus. Ex brevi enim, quem tum instituebas, sermone, paucisque verbis, gustum haud dubium habere mihi visus sum praeclarae indolis tuae, & ingenii ad venustatem omnem facti. Quo indignius atque impatientius tuli, uberiorem, (quem tum mihi promittebam, si Hagam excurreres, nam excursurum te pollicebare) fructum tuae consuetudinis interverti. Sed quid causae fuerit, cur conspectu postea tuo sim fraudatus, divinare haud possum: nisi quod fortuna mihi visa est hoc uno se benignam praestitisse, ut tui desiderium intempestive subducti majus acriusque in me excitaret. Nec intermissem primas literarii hujus commercii occupare partes, & absentis amicitiam ac consuetudinem ambire: sed nec nomen tuum habebam exploratum, nec qua via aut ubi terrarum compellendus esses sciebam. Dum in hoc cogitationum aestu fluctuo, oportune accidit, ut opera ac beneficio *Caroli Antonii Putei*, viri longe humanissimi, epistola mihi a te sit reddita, sed tardius, quam fieri oportuit, quod sub adventum tabellarii domo abessem. Mox responsionem paranti, cum alia ex aliis avocamenta sese offerrent, alteram a te epistolam *Emericus Bigotius* ad me mittit, nihil priori cedentem, sive elegantiam & leporem, in ea spectes, sive singulare mei studium. Pudebat jampridem, ut dicam ingenue, quod res est, semel a te vinci officiis: quid factum censes, postquam cumulus prioribus tuis erga me meritis accessit ingens secunda compellatio? Barbarum profecto fer-

reum-

1 Hanc prodere hic minime necessarium credidi, qui ejusdem, quo prior, quam intercidisse suspicabatur *Falconerius*, erat argumenti. Vide *Nic. Heinsii* Praefationem ad lib. III. Elegiar.

reumque esse me oporteat, nisi comitati tam profusae dem manum. Quapropter sic de me statuas velim, ut certus sis impofterum, neminem in rerum natura esse, qui te sancte constanterque observando; maximeque merito tuo faciendo, me antevertat. Quod ut liquidius appareat, creber te posthac per literas conventurus sum, quando majoribus officiis bene te mereri non datur. Neque consuetudini nostrae literariae damnum quid aut impedimentum laturum est iter, quod sub aestatem proximam in Septentrionem paro; nomine Reipublicae nostrae aulam Suecicam aditurus: dabo enim operam, ut ante profectionem meam plenius cognoscas, quae via literis tuis sit insistenda, ut tuto citoque ad me perferantur. *Francisci Barberini* Cardinalis Amplissimi in me merita non frustra praesens olim apud te praesentem praedicavi, sunt enim tanta, ut majora esse vix possint: quorum omnium me memorem esse, si Princeps optimus ex te aliquando intelligat, cumulus perquam ingens caeteris tuis beneficiis accesserit. Ad Eminentissimum *Sacchettum* saepe a me tentatus est aditus, dum in urbe aeterna haerebam, sed nescio quo casu evenit, ut pararium non invenirem, qui virum tantum mihi conciliaret. De studiis communibus ut & non nihil addam, paro editionem novam Operum P. Ovidii Nasonis: ex quo scriptore incomparabili naevos plurimos sustuli, idque potissimum instructus veterum membranarum ope, quas hanc in rem magno studio conquisi ac perfolvi. Eandem operam caeteris quoque majorum gentium poetis Latinis navaturus, si auxilia necessaria sint in promptu. Sed de his plura ex Cl. *Bigotio* cognosces. Viros urbis aeternae celebriores, *Furstenbergium*, *Pollinum*, *Favoritum*, quos maximi facio, si nosti, meis quaeso verbis officiose saluta. Vale. Hagae Anno MDCLXI. Februar.

EPISTOLA CCCCXXVI.

OCT. FALCONERIUS

Nic. Heinsio.

Hagam.

Cumularunt me omnibus laetitiis eae litterae, quas mihi abs te attulit nudius tertius Clarissimus vir, ac tui amicissimus *Emericus Bigotius*: ex iis enim cognovi meas tibi redditas esse, non eas modo, quas ipsi ad te mittendas dederam, sed illas ipsas, quos anno superiore statim atque Romam a diuturna peregrinatione me receperam, observantiae meae erga te testes, ad te miseram. Cum enim unis atque alteris litteris ad te datis quo minus meae ad te aut tuae ad me pervenirent, fato quodam agi videretur, vereri sedulo coepi, ne nimis temere in spem venissem jungendae tecum amicitiae, ac perfruendi consuetudine litterarum tuarum, quo quidem bono frui *μὴν ἀρεστὸν* tantum fas esset, quemadmodum & ambrosiam potare iis tantum olim dabatur, quos Deorum convivio Jupiter dignaretur. Verum ista me sollicitudine liberarunt, quas dixi, litterae tuae, quas cum primo statim occurso afferre se *Bigotius* nuntiasset, tantum in me voluptatis motum excitari illico sensi, ut eas de manu porrigentis

abreptas avide, ut nunquam alias, perlegerim, ac saepius regustarim. Ac de iis quidem libellis, quos tibi in causa fuisse narras, ne promptius mihi rescriberes, jam ad nos allatum fuerat, ac tum praesertim de Sulmonensi illo Musarum ocello, quem cum V. V. MSS. collatum, & commentariis perpetuis illustratum te propediem in lucem editurum nuntiabatur. Perge, vir eruditissime, paternam gloriam aemulari, & litterariam Rempublicam juvare monumentis ingenii ac doctrinae tuae. Legationem illam tuam Suevicam paulisper distulisse te a *Bigotio* audio. Cum vero primum id iter susceperis, cures velim, ut nequid locorum distantia, aut absentia tua ab Haga consuetudo litterarum nostrarum detrimenti capiat. Angit me quippe is metus, ne diutius iis caream, quam patitur amor erga te meus. Idque eo magis quod cum brevi *Bigotius* ab urbe discessurus videatur, neminem habiturus sim internuntium amicitiae nostrae, a quo de te, rebusque tuis cognoscam, cuique si quid de te scire velim, id credere confidenter possim, ut de eo certior fias. Quapropter si me amas, de toto isto litterarum ad te mittendarum negotio, quibus tabellariis scribendae, si cuiquam Venetias committendae, quo tutius ad te perferrentur, ecquem certum hominem (si id faciendum existimas) huic rei praeficias ante tuum ex Haga discessum, fac diligenter ad me scribas. Ceterum licet *Carolus Antonium* equitem a *Puteo* veterem amicum Romae habeas, humanissimum certe virum, ac tui studiosissimum, quo uti in iis, quae isthic tibi usuvenerint, consueveris, scias cupio, si quid in re litteraria aut alibi uti velis opera mea, hoc mihi gratius nihil accidere unquam posse. Luculentiores illas litteras tuas, quarum mihi ingens desiderium prioribus hisce injecisti, vehementer expecto. Vale Roma. cicciclx. Non. Mart.

EPISTOLA CCCCXXVII.

OCT. FALCONERIUS

Nic. Heinso.

Holmiam.

EX iis litteris, quas a te nuper allatas communicavit mihi eruditissimus ac suavissimus vir *Ezechiel Spanhemius*, intellexi quantum tibi debeam, qui in tam praeclaro doctorum virorum coetu, quos ipsi in urbe conveniendos inprimis putas, me haud praetereundum censuisti. Hoc sane tam egregium opinionis de me tuae testimonium ego tanti facio, quam quod maxime, sed vide ne tu hoc ipso studio dignitatis meae eum me hominem promiseris, quem praestare haud facile possis. Atque ego quidem in jungenda cum *Spanhemio* nostro amicitia litteras tuas anteverteram, nam, cum proxima aestate Florentiae commorarer, eam ipse occasionem avide arripui, quam fors obtulerat fruendi consuetudine doctissimi, atque ornatissimi viri, quocum viro mihi adeo arcta jam amoris necessitudo conglutinata est, ut quos aequae diligam, ac observem multos habeam, quem plus neminem. Florentiae ingens sane desiderium tui apud omnes, qui litteris delectantur, quod ego ac *Datus* noster per saepe jucundis de

de te sermonibus leniebamus. Ovidium tuum idem vehementer expectare nuper ad me scripsisti. Nostri vero Bibliopolae adeo quid in re libraria apud vos agatur ignorant, ut mihi quantum ad ipsos est in unum aut alterum annum spes egregio tuo isto labore perfruendi rejicienda sit. De *Holstenii* operibus sic accipe. Codex regularum monasticarum propediem Vertumnum visurus est, Janumque bifrontem. Concilia Romana in proximo edenda speramus, ac subinde Frontinum de aquaeductibus. De Stephano, seu potius Polemone, longinqua spes. Atque haec omnia *Francisci Barberini* Card. Ampliss. beneficio, quem si tibi laudare, ac praedicare velim, γλῶσσα, ut ajunt, eis Ἀθήνας. Id certe de optimi Principis humanitate haud praeteritum volui, quod cum nudius tertius, me voluntati tuae occursurum existimans, ipsum tuis verbis salutassẽm, eas amoris ac benevolentiae erga te significationes exhibuerit, atque existimationis, quam habet virtutis ac doctrinae tuae, ut nil supra. *Famianus* ille *Nardinus*, cujus de Roma antiqua commentarios in epistola tua Spanheimiana desiderare videris, haud multo abhinc tempore diem obiit. De ejus libro edendo altum apud Typographos silentium. Quod si mihi ullus unquam aditus aperietur juvandi ejus libri editione amatores antiquitatis, curabo ut propensione saltem in bonas litteras is videar, quem tu pro tua humanitate fingis. Saltem ope amicorum dabo operam, (nam mihi cum *Nardini* haeredibus aut consanguineis nulla necessitudo, quippe cum oppidanis atque obscuris hominibus) ne is liber eodem, quo auctor suus, fato pereat. Quod mihi jam diu pollicebaris, te, quo litteras ad te mitterem, cuique darem, ac de tota commercii nostri ratione scripturum, id ut quamprimum conficias, abs te enixe postulo. Nam ista tua Holmia Samavobrivae mihi loco esse incipit, ac si sexto tantum quoque mense accipiendae sint mihi a te litterae, vix continebo me, quin Gothos literis infensos ac bonarum artium deturbatores iterum appellem. Extra jocum, litteris tuis carere non diu possum sine luctu. Quod si me amas, curabis, me eas ita certis intervallis accipere, ut cum negotiorum tuorum, tum amoris nostri rationem habere velle videaris. Vale, Roma x. Kalend. Januar. CIOICLXII.

EPISTOLA CCCCXXVIII.

NIC. HEINSIUS.

Ost. Falconerio.

Romani.

Excursus in Septentrionem meus non alio magis nomine molestus mihi fuit, vir Nobilissime, quam quod perceptam ex tuis alloquiis voluptatem mihi interverterit. Scripsi ego bis ad te ante meam ex patria profectionem. Priores tibi redditas fuisse ex jucundissimis tuis Martio mense exaratis facile cognovi. De posterioribus nihil mihi haecenus est intellectum, quarum jacturam insuper habendam esse arbitror, dummodo exploratum habeas, officio scriptio-

nis me non defuisse. In procinctu stabam, cum postremae tuae ad me perlatae sunt. Quibus opportunius videbar rescripturus post meum in hasce regiones adventum. At vero vix superatis feliciter itineris longinqui molestiis tanta publicarum occupationum mole oppressus sum, ut curam omnem rerum familiarium ac privatarum, quanquam invitus, a me rejecerim. Redeo nunc ad officium postliminio, hancque tui compellendi oportunitatem minime passus sum mihi elabi, cum forte literarum nonnihil ad *Carolus Datum*, virum, ut scis, mihi amicissimum, pararem, quem totis octo aut novem mensibus non compellaveram. Ad illum jampridem per *Elzevirios* bibliopolas Amstelaedamenses missa sunt nonnulla exemplaria operum P. Ovidii Nasonis, quem poëtam annotationibus meis illustratum typis suis illi descripsere. Ex iis exemplaribus ut unum tibi tradat, rogatus a me est *Datus* noster, non quod lucubrationes istas dignas esse censeam, quae tibi exhibeantur, sed quia benevolentiam meam in re etiam tantilla probatam tibi cupio, quando majori id a me fieri haud potest. Mox novam editionem suavissimi Poëtae notis perpetuis atque uberioribus adornatam moliar, modo ne desint nova veterum membranarum subsidia, quarum ope loca, quae etiamnum satis multa hîc illic mendosa occurrunt, si non omnia, at pleraque corrigam, atque emendem. Interim *Claudianum* secundis curis illustratum nunc paro. Quo labore perfunctus de aliis etiam primi ordinis poëtis emendandis fortasse cogitabo. *Emericum Bigotium* optimum atque officiosissimum virum ad suos jam reversum esse opinor, nam quas postremas ad me dedit mense Julio Mediolani exaratas, eae satis indicabant de patria repetenda illum cogitare. Quamdiu is vixit in aeterna urbe, frequentibus literis non sine magna voluptate mea me docebat, quid homines eruditi per Italiam operum novorum molirentur, quo pede incrementa bonarum artium procederent. Nunc illo simul & *Ferdinando Furstenbergio*, literatissimo Principe, Italia digressis, vix est reliquus, qui rerum vestrarum me cupidissimum vel levi illarum cognitione me imbuat. Opus veterum inscriptionum, quod a V. Cl. *Carolo Morono* luci paratur, quando nobis expectandum sit, si verbis vel tribus significaris, tum si quae alia non dissimilis notae praela typographica apud vos exercent, immane quantum me beaveris. Amicos meos duos domo patriaue Germanos Italia nunc tenet, alterum ex iis *Ezechielem Spanhemium* Serenissimi Electoris Palatini Consiliarium, alterum *Marquardum Gudium*, utrumque egregie literis instructum; in hosce si fortassis incides, ut benignum te experiantur & propitium rogo. Literarium commercium quia videris non fastidire, epistolas, quibus me impofterum dignaberis, Amstelaedamum perferendas cura, *Ludovico* & *Danieli Elzeviriis* bibliopolis inscriptas. His si tradentur a tabellario, quin ad me in hasce regiones tuto perventurae sint, vix est ut dubites. Solent autem, ni fallor, Roma non Venetias, sed Mantuam mitti, atque inde Amstelaedamum. Hoc certe moris habebat vir incomparabilis *Cassianus Puteus*, cum ad me scriberet, quod faciebat frequenter. Ejus patri nobilissimo *Carolo Antonio* ut salutem tuis verbis dicas vehementer te rogo. Vale, vir Eximie, meque tui observantissimum bene-

volentia tua fovere ac complecti perge. Dabam Holmiae Suecorum Anno
MDCLXI. a. d. x. Novemb. Gregor.

EPISTOLA CCCCXXIX.

OCT. FALCONERIUS

Nic. Heinsio

Hagam.

Quod forte serius, quam par erat, respondeo litteris tuis, quas a *Dato* nostro ab usque Idibus Januariis acceperam, peto a te, vir Nobil. ut id non, negligentiae meae tribuas. Si enim ubi hae datae sint animadvertes, cognosces facile me haud de nihilo Florentiam properasse, ubi tertium mensem desiderabar. Utinam quavis alia de causa quam obitu avunculi mei, in quo praeter lucrum domesticum multae accesserunt curae, ac sollicitudines, quae me antehac occuparunt & adhuc occupant. Redeo nunc ad humanissimas, ac jucundissimas illas litteras tuas, quae me sane laetitiis omnibus cumularunt: vehementi enim de te, rebusque tuis desiderio flagranti nil gratius accidere poterat, quam ut ex iis, & te recte valere, & me a te amari intelligerem. Cujus quidem tui erga me amoris haud obscurum argumentum est te me dignum existimasse, cui Nasonis a te nuper editi exemplum tam humaniter mitteres. In quo certe munere elegantissimo, cum multa mihi reputanda sunt, tum id maxime, quod & abs te venit, & benevolentiam tuam erga nos egregie testatur. Ego vero pro eo ago tibi, habeoque gratias quamplurimas, Ovidiumque tuum ea voluptate legam, quasi nunquam alias legerim. Non dubito scilicet, quin per te suavissimo Poetae plurimis in locis lux addita, in multis suis veluti color, ac venustas reddita esse videatur. Caeterum quod a me postulas, ut, quid literati homines hic moliantur, ad te scribam, id & ultro seu iis litteris, quas *Ezechieli Spanhemio*, viro Erud. tradidi ad te perferendas, & in posterum cum quod mittam habebo, exequar diligenter. Illud vero piget scribere, quod & fateri cogimur, & tu satis nosti, Italiam nostram, urbemque aeternam nunquam minus, quam hoc temporis in rem litterariam contulisse, sive ita ferat rerum necessitudo, sive ea sint nostrorum hominum ingenia, ut ad Criticam, quod hodie usitatissimum scriptionis genus, ac quasi regnum virorum Eruditorum est, minus apta nataque sint. Optimus ille senex *Allatius* in scribenda Apologia Concilii Florentini totus est. Fervidum ingenium ac quietis impatiens! *Holstenii* concilia Romana, atque Epistolae Pontificum adhuc ineditae jam nil nisi praelum desiderant. Codicem autem regularum Monasticarum ideo tibi non misi, quod nec expectatum tibi fore, nec jucundum eum librum existimavi, qui nil praeter barbariem, & pauca quaedam haud ante edita de instituto Monachorum continet, quam etiam partem Ecclesiasticae eruditionis abunde implevit, uti nosti, eruditissimus *Mennardus*. *Carolus Morenum* Venetiis redeuntem hic praeter spem in Bibliotheca quadam offendi. Ab eo id didici, quod haud sane sperabam, ipsum in paranda

vete-

veterum inscriptionum editione alacrius, quam unquam antea, laboraturum, quas tamen haud ita statim lucem visuras operis magnitudo suadet, quod editarum a *Grutero* inscriptionum volumen facile excedet, ut & *Moronus* ipse testatur. Ita ex itinere pleno alioqui maeroris ac curarum, id voluptatis fructusque percepi, ut & desiderio tuo de veterum inscriptionum editione cognoscendi maturius satis facerem, & *Marquardum Gudium* hîc reperirem, de quo ego, ac *Spanhemius* noster nihil adhuc compertum habebamus. Quem sane virum & quam amicitia tua dignum! Ei, quo in praesentia potui officii genere profecutus, litteras tradidi commendatitias ad *Stephanum Gradium*, secundum, ut appellant, Bibliothecae Vaticanae custodem, quocum viro lectae eruditionis arcta mihi necessitudo intercedit, cujus opera, homo ad Remp. literariam suo labore juvanda natus, perquam commode in eas res quas molitur, uti poterit. Caeterum cum primum Romae fuero, curabo, ut intelligas, me praeter eam existimationem, quam debeo ejus virtuti, ac doctrinae, auctoritatem ac commendationem tuam plurimi facere. Si quid ad me scripturus es, Romam mittas velim, non enim diu Florentiae me futurum suspicor. Vale. Dat. Florent. vi. Kalend. Martii Anno ab Incarnat. ut Florentiae mos est CIOIOCLXII.

P. S. Minervam Sanctianam *Schioppii* propediem Patavii lucem visuram audio.

EPISTOLA CCCCXXX.

NIC. HEINSIUS

Oët. Falconerio.

Romam.

CUM multa sint, quae debeam humanitati *Caroli Dati*, viri, ut scis, ad demerendos amicos unice facti, non postremo loco numerandum inter haec beneficium est, quo me affecit, dum curandi ad te Nasonis mei molestiam minime detrectavit aut subterfugit. Eo enim ad res meas fovendas studio ferris ac raperis, ut meditationum mearum nihil tuis oculis possim subtrahere, nisi & sim & palam videri cupiam omnium mortalium unus maxime inurbanus, & praecipuarum necessitudinum oppido quam negligens. Ego autem cum amandum te constanter mihi proposuerim, ut plenius intelligere potuisti ex litteris, quas Februario mense ad te dedi, Spanhemiana opera in iis curandis usus, non committam impofterum, ut ineptiarum mearum quicquam oculis tuis sese subducatur, quando iis applausum tam benigniter indulges. Doctissimi *Allatii* interest profecto, ut credamus, populares suos omnes, totamque ecclesiam Orientalem cum Roma non minus consensisse olim, quam nunc consentit ipse. Quapropter dubium mihi non est opus, quod hanc in rem molitur, multa eruditione refertum fore. Holsteniana omnia plurimi facio. Ut irascar quodammodo mihi, quod hîc terrarum sedem fixerim, quo scriptorum Italicorum nihil perferri solet, nisi cum jam amisit gratiam novitatis omnem,

ac magna sui parte est obsoletum. *Carolus Moronus* duram provinciam suscepit de edendis inscriptionibus antiquis post *Gruterum*. Utinam opus luculentum brevi videamus! aut quia ob immensam ejus molem id sperare non datur, ex parte saltem prodeat in lucem, ne expectatione nimis diuturna enecemur. Tu & quot jam paginae hoc in opere typis descriptae sint, & quando opineris fore, ut suprema ei manus a typographo imponatur, fac quaeso tempestive intelligam. Audio catalogum *Barbarinae Bibliothecae* ab eodem *Morono* mox publicandum fore. Quid in Belgio nostro ac Germania moliantur homines literati, ut hîc denuo subtexam minime necessarium duco, cum ubertim de re tota hodierno die literis ad *Datum* nostrum exaratis egerim. Ampl. *Spanhemius*, si etiamnum Romae est aut Florentiae, salveat quaeso. Salveant amici caeteri, qui perquam pauci in urbe aeterna mihi sunt reliqui, *Cassiano Puteo*, *Holstenio* & *Furstenbergio* inde ablatis. Horum tamen in numero ducendi mihi & *Leo Allatius*, & illustrissimus Eques *Carolus Antonius Puteus*, cujus aman- tissimis literis propediem respondebo. Vale, mi *Falconeri*. Exarabam *Holmiae Suecorum* CIOICLXII. a. d. III. Maji mensis.

EPISTOLA CCCCXXXI.

NIC. HEINSIUS

Ost. *Falconerio*.*Romam.*

Totum saeculum mihi visus est hic annus, quo non nisi duas a te epistolas accepi, *Falconeri* humanissime; alteram quarum *Spanhemius* Romae, alteram *Datus* Florentiae exaratam ad me miserunt. Responsonis officium neutram in me desiderare sum passus, & tamen nec de te, nec de *Dato* nostro, nec de *Spanhemio Gudioque*, nec de Amicorum Italorum quoquam post acceptas illas quicquam mihi intellectum est. Quam ego sollicitudinem impatienter mehercules fero, misereque metuo, ut satis salva apud vos sint omnia. *Bigotius* aestatem totam Lutetia abfuit, unde factum est, ut & ille praeter solitum tacerit, deque rerum vestrarum statu nil nunciorum ad me miserit. Scribe ergo & quidem quamprimum, quî tu, quî reliqui amici valeatis, si vis ut ego quoque valeam ac salvus sim. *Virgilium* ex auctoritate veterum membranarum, *Medicaei* codicis longe antiquissimi praesertim, castigatum jam ad typographos misi in patriam edendum. Plura membranarum veterum subsidia circumspicio, quorum ope lucubrationes istae ornatiores fiant. Sed de hisce omnibus scribam uberrime, ubi edoctus ero, qua via mihi compellendus sis. Tu quaeso tuas ad *Elzevirios* *Amstelaedamenses* mitte, quorum opera ad me perventuras esse ne dubita. Vale. *Holmiae Suecorum* CIOICLXII. a. d. III. Novembr.

EPISTOLA CCCCXXXII.

OCT. FALCONERIUS

*Nic. Heinſio.**Holmiam.*

PRaeter eas litteras, quas tute recentioribus tuis a. d. XIII. Novembris accepisse te scribis, binas aut fortasse plures a meo in urbem reditu scripsi, quas tibi redditas non fuisse miror ac plane doleo, nisi fortasse earum alterae, quas *Gudio* nostro dederam, quo tutius ad te perferrentur, post datas ad me litteras ad te pervenerunt. In iis enim de tota hîc Romae re litteraria ac de nonnullis ad antiquitatis studia pertinentibus, quo te delectari inprimis scio, satis luculenter scriptum erat. Verum si quid iis litteris amissis detrimenti passus es, curabo, ut aliis, quas ad te quamprimum daturus sum, id satis superque refarciam. Mittam enim tibi dissertationem quamdam meam, in qua occasione explicandae cujusdam inscriptionis, in uno ex iis lateribus repertae, quae e ruinis veteris muri prope Pantheon reperti sunt, nonnulla prisca aevi illustrantur, quae tibi placere posse speramus. Interea quod ad *Nardinii* librum attinet, id te scire oportet, authoris ipsum autographum jamdiu apud me esse, quem ego Pontifici de ejus editione cogitanti jamdiu obtulissem, nisi publica negotia ei impedimento fuissent, quo minus id genus curis animum adverteret. Scripseram in hanc spem versiculos aliquot, re ipsa argumentum praebente. Hos nunc ad te mitto nihil esse existimans, quod amicos candidiores ac tui similes latere debeat. Caeterum ipse satis novi, quam parum e re mea agam, qui tibi homini naris tam emunctae, ac poëtae nostrae aetatis celeberrimo, nugae istas meas offerre velim. Sed talia mecum reputantem id me impulit, ut eos qualescunque essent ad te mitterem; quod te inter Horatianae illius Satyrae amicos numerandum esse nunquam censui, neque is es, qui,

— — — in amicorum vitiis tam cernis acutum,

Quam aquila aut serpens Epidaurius.

Amici hîc nostri *Gottifridus*, *Carolus Antonius a Puteo*, *Pollinus*, *Favorinus* optime valent. *Spanhemius* is, quocum de te jucundissime saepe loquor, totam minus hiemem futurum se Romae pollicetur. *Gudium* aut profectum jam Florentia, aut profectionem indies parantem a *Dato* nostro audio, ante aliquot dies vehementer nephritide laborasse. Quantum verò ad rem litterariam, de Frontini editione vix est, quod expectes. Neque plus spei a *Morono*, quem ineditarum adhuc inscriptionum volumen promittere tibi, jamdudum est, significaveram. De iis enim apud Cardinalem *Barberinum* mirum silentium. De *Nardiniana* verò re conjicio, ut ipsam, neque adeo cito neque omnino non conficiendam esse censeam. Nosti Typographi Romani quam pusillo animo sint, quamque in suscipiendis haud ita magni sumptus librorum editionibus morosi, difficilesque sint. Virorum illustrium Imagines, sive e gemmis, sive e numismatibus expressas praeter eas, quas *Fulvio Ursino* τῶ πᾶν debemus, Pictor

hîc

hic quidam, huic negotio satis aptus incidendas aere, edendasque curat. Sed utinam me ab jucundissimo, quo fruor, otio bellum, in quod nos ac simul Italiam omnem conjici video, non avertat. Quod si contingat, nam aequae jam conditiones pacis in Gallia sperni videntur, vides quam parum loci hujusmodi rebus sit. Verum haec θεῶν ἐν γένεσσι κῆται. Ac nos qui tandem casus maneant, scito me in adversis rebus nullum aequae solatium habiturum atque amicitiam tuam. Vale, ac si quid de rebus isthic publicis quod scitu dignum sit, quodque nuntiari commode possit, me certiore feceris, multum est quod debebo humanitati tuae. Roma xv. Kalend. Februar. CIOIOCLXIII.

R O M A

AD ALEXANDRUM VII. PONT. MAX.

Cum se A Famiano Nardinio restitutam
Ipse supplex offerret.

Illa ego clara olim imperio, modo certa sacrorum
Sedes, antiqua & pietate urbs proxima Coelo,
Illa decus quoque nunc orbis tua maxima Roma,
Quam leni imperio gaudentem, munere Divum,
MAXIME ALEXANDER quatuor bis jam regis annos,
Te precor, haud unquam dubii per foedera amoris,
Reddere quo mihi me properas, senioque labantem
Sustentas, ne quae Victor NARDINIUS Aevi
Restituit nostrae (lacrymis sine talia fari
Vix possum infelix) vestigia splendida sortis,
Rursum aevo patiari tegi, condive tenebris.
Namque haec, quae doctis operosa volumina chartis
Ipse referta vides, sculpendisque aere figuris
Haec urbis monumenta tuae, mihi credere si fas,
Aequatas coelo moles, decora alta Quiritum,
Quidquid opes, quidquid luxus, vel victa Corinthus,
Grajugenumque artes quidquid potuere recondunt.
Seu per septenos sese flectentia colles
Moenia obire juvat, nitidas seu marmore thermas
Visere, & aërio pendentes fornice rivos.
Tu, modo si fert haec animus cognosse, laborem
Nec tenuem, curasque leves, Pater Alme, recusa.
Aspice, Romanum qua se inter culmina rupis
Edita Tarpeiae pandens, clivumque Palati
Amplum, illustre forum, populos, gentemque rogatam,
Aeneadum sobolem excipiebat. Curia centum

Patribus hîc, ubi subiectis nova jura Britanncis,
 Vindelicisque dabant; Rostra en male fausta deserto
 Romulidum ante omnes, lacus en hic Curtius, arcus
 En Fabii, en Janus medius, putealque Libonis.
 Hinc se sacra oculis offert via, certus ut illam
 Invidiosa feri praecludunt atria Regis,
 Vivida syderei qua fulgent aera Colossi,
 Vicinique patet sublime opus Amphitheatrici?
 Cernis, ut ad laevam Paci sacrata beatae
 Insurgunt astris fastigia, quaeque imitandae
 Vix unquam, superant monumenta uxoria taedae,
 Et quae, nunc meminisse juvat, de nomine Templi
 Dicta olim nostro! nobis quoque condita Templi.
 Parte sed adversa coelo, Capitolia celsa
 Aspice, ut attollunt sese! illic vertice summo
 Imminet arx centum gradibus subeunda, virescit
 Fronde sacra geminus prope lucus, colle sub imo
 Nunc quoque, quae antiquae molis pars magna, columnae
 Stant quatuor, geminae fuerant delubra vetusta
 Fortunae: Imperii en opibus loca certa tuendis.
 Saepe hîc sublimi tecto concordia Patres
 In subitos belli casus pacisve coëgit.
 Marmore conspicuus Pario Tiberinus arcus
 Ultum hîc testatur Varum, repetitaque signa,
 Cui sacra respondent canae penetralia Vestae,
 Aeternumque ignem, & Phrygios servantia Divos.
 Quod si tantus amor tenet instaurare ruentem
 Urbem, jam rerum Dominam, terrisque potitam,
 Quid molem senio informem, si coetera confers,
 Magnanimi Agrippae mens est decorare? columnas
 Niliaco aut quorsum immanes de marmore rursus
 Tollere humo effossas? quorsum labentia busta
 Restituisse libet Cestl? majora patent jam,
 Quis mihi dulcis honos, si quae spes ulla, vetustae,
 Auspice te, longo redeat post tempore formae.
 Haec modo, quae laeto monumenta insignia Avorum
 Romulidae vultu aspiciant, squalentia dudum
 Rudera, & indecores aevo potiente ruinas
 Lucem nosse dedit NARDINIUS: area in orbem
 Tu qua utrinque licet se Vaticana coërcet,
 Porticibus vastis, tanto & te Principe dignis
 Aequaris solus priscae decora incluta Romae;
 Tu tamen attonitq; defiges luminis vultu,

Quodque satis dixisse fuit, mirabere, celsa
 Seu Capitolini lustrabis Tempia Tonantis,
 Aurea tecta, aureos postes, fulgentia gemmis
 Signa, Orientis opes, domiti spolia orbis opima,
 Seu magis Augusto celebrata Palatia luxu,
 Trajanique forum, Magnique aurata theatra,
 Septaque, seu geminos Circos, hortosque Luculli
 Conspicies. Nostris ergo, Pater optime, votis
 Annue, NARDINI spectata volumina caecis,
 Invida preffit adhuc queis fors, erepta latebris
 Nomine freta tuo volitent astra usque, Quiritum
 Excepta ac merito plausu, studiisque virum per
 Ora, per assiduasque manus laudata ferantur.
 Tunc demum, mihi quae facies dum sceptrum manerent
 Terrarum, Oceano, & gelido metuenda Nyphati
 Agnoscent, quotquot Rhenum, Ligerimque, Ararimque
 Et Betim, placidique bibentes flumina Scaldis,
 Reliquias utcumque mei, celebresque ruinas
 Visuri properant Ursae glacialis ab axe
 Suspicientque iterum redivivam Saccula Romam.

De Vetere Favianae Nardinii Roma
 Marmoream Augustus fecit se principe Romam,
 Quae tantum lateres Roma prius fuerat.
 Reddidit antiquam Romam Nardinus, aevo
 Collapsaeque urbis rudera restituit.
 Confer utrumque: illum vincet tanto hic, minus urbem
 Quanto ornasse est, quam restituisse decus.

EPISTOLA CCCCXXXIII.
 NIC. HEINSIUS

Ost. Falconerio.

Romam.

ANxius atque aeger animi pendebam super tua valitudine, de qua ut segnius
 sentirem, ac male augurarer, silentio tam pertinaci fiebat. Annum quip-
 pe jam totum compellationibus tuis fraudabar, rerum Italicarum incertus,
 cum & caeteri illic terrarum amici tacerent interea, & Bigotius in Neustriam
 profectus Lutetia abesset, solitus alioquin frequentes de rebus vestris nuntios
 ad me dare. Nunc quemadmodum laetor, & quidem maxime, demptam mihi
 esse hanc sollicitudinem, ita doleo & indigne fero literarum jacturam, quas
 non unas te exarasse anno proxime elapso testaris. Affirmabat quidem postre-
 mis suis Gudius, misisse se non ita pridem epistolam a te mihi inscriptam ad

Plumerum librarium Amstelaedamensem, sed cum Plumerus ipse jam pridem ad me perscripserit, nil sibi multo tempore de Gudianis rebus esse auditum, ac simul obsecrarit, si quid rescissem, ejus ne sese ignarum esse paterer, facile hinc colligi potest, periisse in via, aut perperam curatas esse literas; cum tamen tutus certusque tabellariis vestris in Belgium sit excursus. Opinor alias me monuisse, quod denuo nunc repetendum esse censeo, recte te impofterum atque ordine facturum, si *Elzevirii* bibliopolis Amstelaedamensibus inscribas, quas ad me perferri voles, easque Mantuana via in Belgium ut mittendas cures. His vestigiis cum institerit haecenus amicissimus utrique nostrum *Datus*, aut nullas aut raras admodum ex suis ad me perscriptis desideravit. Pollicitus quidem fuerat, fidemque dederat *Spanhemius* noster, cum in procinctu stabat, ante hoc biennium Alpes transiturus, fore, ut literis frequentibus absens me conveniret, sed istas pollicitationes excusserunt illi, ni fallor, illecebrae coeli Italici & vitae aulicae continua affectatio. Neglectam ab illo fidem eo aequius fero, quod Sororem suam hinc terrarum degentem haud certiore quam me rerum suarum jampridem facit. Invideo equidem illi felicitatem suam, qui in otio uberrimo, ita Italiae se affixit perlustrandae atque excutiendae, ut amicorum quicquid Transalpinorum sibi ante acquisiverat, tam securus possit contemnere. Mihi quanquam deest quod in bonum publicum agam, impetrari tamen a me non sino, ut amicorum obliviscar. Sive quod sic a natura factus sim, ut amicitias vita ipsa longe jucundiores esse ducam, sive quod haec solitudo, quae me ab omni literario commercio quodammodo amovit, desiderium in me excitat pristinae voluptatis, quam sane maximam ex consuetudine praestantium ac tui similium virorum percipiebam. Qua re fit, ut augurer res meas hoc anno sic componi posse, ne Italiae tertium videndae spem pro conclamata haberem. Adspiro enim unice ad privatam vitam: & in Musarum cultu innocentissimo plurimum praesidii collocavi, quo Italiae vestrae genius, & instructissimae libris optimis bibliothecae, quarum magna illic terrarum est ubertas, aliud nunc agentem ultro invitant. Sed de tota hac re alius confabulandi locus, & fortassis oportunior, sese aliquando dabit. Carmen, quo *Famiani Nardinii* Romam veterem exornasti, mirifice mihi placuit. Ego typographum circumspiciam, qui editionis curam in se suscipiat. Interest enim rei literariae, ne antiquitas Romana hoc sui ornamento nostra supinitate fraudetur. Literas, ex iis, quas ad me dedisti, non unas periisse permolestum est. Nam ut omnes, quotquot a te mihi exhibentur, habeo gratissimas, ita praecipuo apud me sunt in pretio, quae rerum Italicarum statum enarrant, atque in studiorum communium illustratione occupantur. Quapropter, si me amas, quod facere te sum certus, perditarum desiderium frequenti inscriptione mihi ut lenias sum auctor. Praesertim ne oculis meis subtrahas ingenii tui foetus felices, si quos aut jam enixus es, aut porro eniteris. De inscriptionibus antiquis *Moronum* spes nostras tanto tempore frustrari indignor. Impelle quaeso hominem, quantum potes, ne enecare nos pergat irrita expectatione operis longe utilissimi. Quamquam ingens periculum est, ne bello Gal-

Gallico, quod magna animorum contentione parari vobis dicitur, ingens detrimentum capiat res literaria. Spero in melius Deum optimum Max. hanc procellam tam atrocem conversurum esse. Imagines virorum Illustrum, quas *Fulvius Ursinus* ex variis antiquitatis monumentis collegit, ac publico conjunctas in unum volumen dedit, possideo ex duplici editione tam Romana, quam Antverpiensi: Possideo & illas, quas *Leonardus Augustinus* ante hoc quinquennium in lucem emisit, perlatas ad me munificentia *Caroli Antonii Putei*, viri longe humanissimi. Si quid hujus argumenti praeterea est proditum, id uti ne me sinas ignorare quaeso. Tum quantum operae Typographicae jam promoverint in Inscriptionibus vetustis edendis. Stephanum Byzantium & Frontinum *Holstenii* e latebris proferri vehementer velim. De studiis meis copiose ago jam nunc cum amicissimo *Dato*, agerem & tecum, nisi subverceret nimia loquacitate odiosus esse. Interim ex illo intelliges, si quid sit quod cognitione tua non indignum fore arbitrabitur. Proximis diebus in hac aula e vivis excessit *Konings-Marckius*, magni nominis imperator. Amiserunt Sueci spatio anni unius militiae utriusque Magistrum *Kaggium*, tum *Marfchallos* uti vocant, exercituum tres, *Duglasium*, *Lilium*, *Konings-Markium*. Quartus etiamnum superest *Stenbockius*, Scaniae provinciae praefectus. Amiserunt & *Bielckensternium* rei maritimae strenuum ducem & proximum a Thalassiarcha *Vrangelio*. Amicos omnes jubeo plurimum salvere. Vale, vir eximie. *Holmiae Succorum* MDCLXIII. VII. Mart. Gregor.

EPISTOLA CCCCXXXIV.

OCT. FALCONERIUS

Nic. Heinsio.

Holmiam.

NON oblivione sane amicitiae nostrae factum est, mi Heinsi, ut tres ferme integros abhinc menses nihil ad te litterarum dederim. Ex quo enim x. Kalend. Septembr. Allobroges esse desimus, ipse tibi facile persuadeas nullam mihi scribendi ad te occasionem oblatam esse, nihilque plane otii adhuc usque e longinquo itinere redeunti fuisse ab iis, quae aulicorum natio officia atque amoris declarationes, ego meras nugas, & maximum societatis humanae incommodum appello. Tu vero pro tua in me humanitate si quid mihi negligentius actum est, quam mea erga te observantia atque amor singularis postulabat, boni & aequi consulas velim. Erimus certe posthac in te colendo diligentiores, neque te patiemur tam diu sine litteris nostris esse. *Schefferus* vester, quantum Florentiae ab *Dato* nostro audi, Urbicii atque Arriani tacticorum editionem jam aggressus est. Rogo te, si me amas, ut me quam citissime de tota hac re certiore facias. Mea enim interest id utrumne verum sit scire, qui, ut alias ad te scripsi, nisi fallor, Arriani *Tactica* una cum Leonis Imperatoris *Problematis* militaribus, atque Anonymi de *Arte Rhetorica*, quatenus ad rem militarem spectat, commentarios edere meditabar. Quod si

Ar-

Arriano meliore quidem fato sub Cl. *Schefferi* auspiciis in litterariam lucem prodire contingat, prope est ut ab evulgandis, de quibus modo aiebam, opusculis plane deterrear. Verum de his fortasse pluribus ad te alias scribam, teque, quem plurimi semper faciam, super tota hac re consulam. Petronianum fragmentum, ante multos abhinc dies Patavii edi coeptum, propediem expectamus. Atque ego quidem incredibili cupiditate vellem utique, ut ipsius exemplum ad te mittendi quamprimum occasio daretur. Non dubito enim, quin ipse quoque vehementissimo ejus legendi desiderio flagres. Quae de re litteraria te scire oporteat haec habeo. Edita nuper ex *Holstenii* schedis opuscula quaedam ad Historiam Ecclesiasticam pertinentia, nempe Acta S. Felicitatis & Perpetuae, atque Fastidii cujusdam Episcopi nonnulla, quae adhuc D. Augustino tribuebantur. His accedunt locupletes ipsius *Holstenii* ad Martyrologium notae, quas ex antiquissimo ejus codice, qui penes Reginam est, olim deprompserat. De Frontino ac Stephano nihil. Scholiastes quosdam Graecos in Euangelium D. Marci nunquam antea editos brevi publici juris faciet *Petrus Possinus* e societate Jesu is, cui Annae Comnenae Historiam, ac Nicephori Bryennii commentarios debemus. Eiusdem opera fruemur quamprimum Georgii Pachymeris Historia, quam a *Petavio* olim editam ipse ab innumeris mendis repurgavit, ac locos antea inextricabiles illustravit. *Allatius* in confutanda historia Concilii Florentini a *Crygthonio* edita totus est, ac prima quidem pars ejus operis quam primum sub praelo erit. Dissertationem suam de Numismatum usu atque utilitate brevi pollicetur *Spanhemius* noster, quem concivem jam jam appellare licet. *Carolus Antonius de Puteo* optime valet. Tibi, nisi longiores ad me miseris, harum prolixitatem minus placuisse existimabo. Vale, Roma XIV. Kalend. Decemb. CIOIOCLXIII.

EPISTOLA CCCCXXXV.

NIC. HEINSIUS

*Oct. Falconerio.**Romam.*

FRaudatus multo tempore suavissimis alimentis tuae compellationis, quippe post illas, quas a. d. xv. Kalendas Februarias hujus anni exararas, nil de te nobis intellectum erat, nisi quod illustrissimo *Rasponio* in comitatum legationis & itineris adscitum te rumor publicus ferebat, fraudatus, inquam, ea voluptate, quam sane ex alloquiis tuis capio incredibilem, post longas irritae expectationis ambages, ecce nunc tandem accipio illas, quas Romam redux a. d. XIV. Kalend. Decembris ad me misisti. Nam eas, quas ultimae tuae penultimaeque meminerunt, nullus vidi, quam jacturam, uti debeo, fero aegerrime mehercules; vide igitur sodes, quorum fidei eas ad me perferendas commiseris. Nam Roma in nostrum Belgium literis solebat iter esse tutissimum, praesertim si quae Amstelaedamum mitterentur, quo tabellarii ex diversis orbis terrarum partibus, ut noscis, ob frequentiam & celebritatem commerciorum, tam-

tamquam ad commune Europae universae emporium, assidui contendunt. *Elzevirii* autem *Ludovico & Danieli* bibliopolis ea in civitate fixam habentibus sedem, ac mihi perquam familiaribus, inscribi ac concredi posse, quicquid ad me perlatum velles, non nunc primum, si prope recordor, a me moneris. Tu quoque vicissim si non gravaberis significare, cui viae sit insistendum, ut meae impofterum celeriter tutoque in manus tuas perveniant, confido fore, ut omnis impofterum querela de perditis aut perperam curatis epistolis cesset utrimque & amoveatur. Illud praecipue te rogare volo, ut, si quid illis, quae periire in via, rerum novarum complexus es, quod non ignorari mea interesset, ad me iterare de novo, ac verbis vel tribus palam facere molestum non ducas. *Holsteniana* opuscula nonnulla in lucem tandem prodiisse jucundissimum intellectu fuit. Vitam beatæ Felicitatis ac Perpetuae apud illum videram jam olim ante hoc decennium typis descriptam, idque egregium antiquitatis monumentum maxime sum veneratus. Infelicem me, qui illic terrarum nunc aetatem agam, quo aut numquam aut sero perfertur, si quid rei eximiae luce publica apud vos donatur. *Stephanum Byzantium & Frontinum* ut editos quoque intelligamus auguror curae tibi fore, nam nisi tu hoc agis, neminem acturum esse praevideo. *Petronianum Fragmentum* si paucarum pagellarum est, & a reliquo *Satyrici* libelli opere seorsum editum, per tabellarios non inopportune ad me deferri potest: idque ut ad curam tuam digneris revocare, te obsecro atque obtestor. Quamquam melius in commune consulturi sunt, qui fragmentum id edendum susceperunt, si omnia illius exemplaris simul depromunt. Non enim dubium mihi est multa illic emendate integreque exstare, quae in vulgatis codicibus mendosa nunc circumferuntur. Sed tu de his videris. De *Urbicii* sive potius *Mauritii Tacticis* sic res sese habet, uti ex *Dato* nostro intellexisse te scribis. Commisit ea jam praelo *Schefferus*, & majori operae ex parte jam librum describere: accedent iis & *Arriani Tactica*, cujus exemplar admodum mendosum in manibus sibi esse idem *Schefferus* jam non semel apud me est conquestus. Tu si in codicem non nihil castigatiorem incidisti, est quod tibi gratulemur, mi *Falconeri*. Quapropter causae nihil est, cura proposito desistas. Certus enim sum in instructissimis Italiae vestrae bibliothecis complura hujus latere argumenti, quae *Schefferus* nec vidit umquam, nec visurus est fortasse, nisi tuo beneficio. Leonis *Tactica* cum optimo exemplari & vulgatis codicibus auctiore collata possidebam olim, unde *Meursiana* ejus operis editio & correctis locis propemodum infinitis & luculenta accessione ornari posset, quem librum *Reginae* a me donatum ante annos hos duodecim & plures, postea apud *Isaacum Vossium* vidi, ubi eundem etiamnum asservari vix dubito: nam alteri exemplari manu exarato, quod haec ipsa *Regina* eodem tempore a me donum tulit, quid sit factum, vix est, ut pro re certa & explorata possim adfirmare. Significavit etiam, ni fallor, *Bigotius* noster ex pervetusto codice complura in iisdem Leonis *Tacticis* se meliora atque auctiora reddidisse, qui, ut est vir ad humanitatem omnem & ad demerendos amicos unice factus, horum nihil tibi invidet, si in-

telliget instituto tuo operam suam hîc posse utilem esse. Idem *Schefferus* post publico datos in *Phaedri Fabellas* commentarios nunc in suo de Italica *Pythagoreorum Philosophia* volumine typis describendo occupatur. *Brunnerus*, qui *Schefferi* apud *Ubsalien*ses est collega, atque illic Graecas proficitur literas, *Palaephato* in lucem prolato, nunc *Thomae Magistri* dictionum *Atticarum Syllogen* adornat, cui *Moeris Atticista* alique hactenus inediti, qui dialectum *Atticam* illustrare, fortassis accedent. *Gronovius* *Lugduni Batavorum* *Livium* & *Plautum* a se recensitos praelo jam subjecit. *Isaacus Vossius* adversariis suis super argumento Philosophico partim de *Luce*, partim de aetate mundi *Chronologica* non unum nuper libellum apologeticum reposuit, ipse postea in *Angliam* est profectus, in procinctu certe illum stare postremae, quas e *Belgio* accepi, literae nunciabant. *Graevius* *Hesiodum* & *Polyeni* strategemata parabat. *Gudius* ad nostros redux quid moliatur, aut quid *Galli*, nihil nunciandum succurrit, nisi operum *Origenis* editionem Graeco-Latinam ab *Huetio Cadomi* adornari. Sed de rebus Gallicis tu melius certiusque me omnia novisti: ut de me hoc addam. *Castigationes Virgilianas* jam propemodum absolvi. *Ufui praecipuo Mediceus* codex fuit omnium, quotquot per *Europam* inveniri possint, ni fallor, veterrimus, quamquam duo tresve asservantur in *Vaticanis* scriniis litera majore *Romana* quoque exarati, & *Mediceo* non multum recentiores, quibus usum me non esse, cum facultas dabatur, doleo nunc equidem, & indignor. Ex sua bibliotheca auxilii nonnihil *Regina* jusserat sperare, cujus impulsu potissimum hanc spartam suscepi adornandam. Sed cum neminem in comitatu familiaque jam habeat literarum gnarum, non video, quid opis illinc polliceri studiis meis possim. Eminentissimo *Barberino* cum oportunum erit, ut obsequia mea sistas, enixe te rogo. Tum ut salutes equitem *Puteanum*, cujus benignitati plurimum debere me haud nescis, ac *Leonem Allatum*, & si quos praeterea mei studiosos in urbe cognovisti. Adderem his & *Spanhemium*, nisi illum mei esse oblitum opinarer. Quo magis mirum mihi est visum, quod narras de re nummaria illustranda cogitare illum, quem literas aequae ac amicos negligere atque insuper habere arbitrabar. Coepi tamen parcius illi succensere ob contumacissimum silentium, postquam ex *Sore*re ejus cognovi, communem mihi cum illa esse hanc querelam, seque toto jam biennio nullam a *Fratre* epistolam accepisse. Vale, suavissime & nobilissime *Falconeri*, cum *Senatus Regius* ob solemnia festi instantis ferias ac secessum pareret, solito sum nunc occupator. Haec causa est festinatae scriptionis, quam tu pro caetera comitate tua in bonam partem interpreteris velim. Iterum vale. *Holmiae* Anno *MDCLXIII*. a. d. *XXIII*. Decembris.

EPISTOLA CCCCXXXVI.

OCT. FALCONERIUS

*Nic. Heinsio.**Holmiam.*

Commodum redditae mihi sunt literae tuae a. d. xxiiii. Decemb. datae. Nam cum ex eo, quod ipse non semel mihi affirmaveras, nullus mihi dubitandi locus superesset, quin posteriores nostras accepisses, quas *Elzevirii* ad te perferendas miseramus, vehemens suspicio inciderat, ne de valetudine tua ita esset, ut nos profecto cupiebamus, quae me sane sollicitudo plurimum torquere coeperat. Ego vero miror summopere illas meas, quas tibi in Gallia Sabaudiaque scripseram, minime ad te pervenisse. Utrasque certe *Holmio* vestro Lutetiam miseram, quo tutior iis in Bataviam, atque isthinc per *Elzevirios* in Sueciam ad te cursus foret. Caeterum si quid in illis erat quod te scire oporteret, aut jam ex iis, quas te accepisse scribis, suppletum est, aut his demum supplebitur. Neque sane alia deinceps via ad institutum litterarum commercium opus erit, cum nulla adhuc feliciter successerit, quam ea, qua nuper te monente usus sum. Quapropter, ut ipsorum etiam *Elzeviriorum* fidei eas, quas ad me in posterum scripturus es, committas, enixe suadeo, quibus & ipse cum literas, tum si quid aliud ad te ex Italia nostra perferendum erit, omnino mittam. Nam a te nunc mecum praeclare agi, ac pro amicitia nostra existimabo, cum ea libertate, qua amicos decet, omnia, quae hinc tibi opus fuerint aut in re libraria aut alibi a me tibi comparari iusseris. Atque ex iis sane libris, qui hinc ante biennium in lucem prodierunt, ipse ultro tibi misissem, si quos eruditi hominis, ut tu inprimis es, bibliotheca dignos agnovissem. Nam quae ex *Holstenii* schedis haecenus edita sunt, non ea mihi videbantur, quae tibi in remota adeo Europae parte degenti tam magno itinere mitti operae pretium esset. Haud ita vero statuo de Petronii fragmento, quod ubi primum ad nos afferetur, deberet autem quotidie, si vera Patavini amici nuntiant, per Tabellarium ad te mittam, ut de illo germanumne sit, an spurium ipse harum rerum peritus aestimator sententiam feras. Illud interea scias, editionem istam Patavinam nihil aliud continere, quam quae nusquam antea prodierant, neque alia multa esse in ejus autographo, quibus Petronius emendari aut lacunae suppleri possint. Doctissimi *Schefferi* opera tacticorum facile principem publici juris fieri vehementer gaudeo; verum haud satis miror ipsum provinciam istam suscepisse inconsulto Mediceo illo codice celeberrimo, in quo cum Urbicius, tum Arrianus alique rei Tacticae scriptores plurimi continentur mutili sane, atque ut alibi aevi vitio laborantes, sed a quibus tamen facilius fortasse, quam ex quibusvis aliis, codicibus auctores alioquin mendosissimi restitui possint. Ac de Urbicio quidem, si bene memini, *Holstenius* in accuratissimo indice selectorum Mediceorum codicum a se confecto animadvertit, eum, qui Mediceum ac Regium habuerit, integrum Urbi-

Qqq 2

cium

cium haud ita magno negotio litteratis sistere posse. Arrianum haud mihi per tempus licuit serio ad examen revocare, cum quicquid otii a domesticis negotiis superesset, quamdiu Florentiae ante triennium commoratus sum, id omne in describendis Leonis Imperatoris problematis militaribus, atque Anonymi de arte Rhetorica militari commentariis insumpserim, quorum versioni, ac subinde editioni concinnandae incumbam, nisi me, ut proximis fere annis, dura itineris alicujus necessitas ab opere avellat. Vaticano Codice si in Virgilianis curis, quibus modo occupari te narras, aliquid opis afferri tibi posse judicas, non est, cur illum a te praeteritum magnopere doleas, modo locos, in quibus haesitas, ad me mittas cum ipso Vaticano conferendos. Id mihi cum gratissimum erit, tum autem facillimum ob eam, qua utor, familiaritatem cum *Stephano Gradio* viro Eruditissimo, ac Vaticanæ Bibliothecae custode, ut appellant. *Spanhemius* noster hac ipsa die dissertationem suam de Numismatis veterum praeulo consignare coepit, qua denique fiet, ut nisi antea te litteris compellaverit, quod mihi querelas tuas significanti facturum se nudius tertius pollicebatur, silentium suum diutinum fane, ac contumax occasione sumpta tandem perrumpat. Illustrium imagines ad cl. e gemmis, ac numismatibus depromptas, ac nondum Antiquitatis studiosis publice visas, jam excusas apud se habet Pictor quidam Romanus harum rerum curiosus. Sed vereor ne in commentariis adornandis, quod arduum homini licet historiae veteris haud ignaro negotium futurum est, diutius haerear, quam eruditorum curiositati explendae par esset. Cardinalis *Barberinus* mirifice erga te affectus est, tibi me quodcunque a se proficisci poterit, serio jussit polliceri. Equitem *Puteanum* atque *Allatium* a me tuo nomine salutados scias, atque utrumque eo animo erga te esse, quo ipse maxime velis. Tu quamdiu apud Suecos futurus sis fac, ut cum primum se occasio dederit, ad me scribas, nam praeterquam quod de discessu tuo nonnihil ab amicis audio, atque ab ipso ni fallor *Spanhemio*, multum mea interesse arbitror scire Holmiaene Suecorum an Hagae Comitum degas. Id fane omnium mihi optatissimum est, ut in loca te digniora atque amicitiae nostrae excolendae magis opportuna quamprimum redeas. Vale, vir Clar. & te a me quam maxime amari observarique tibi persuadeas. Roma Kalend. Mart. cicioclxiv.

EPISTOLA CCCCXXXVII.

OCT. FALCONERIUS

Nic. Heinſio.

Holmiam.

Quod nullas ante duos abhinc menses a me litteras acceperis omnia fuisse in causa praeter oblivionem tui persuadeas tibi velim V. Clar. Erubesco equidem in omnibus fere, quotquot ad te damus, literis ab excusatione initium mihi sumendum esse, sed ea si homini amicissimo quicquam credis, per id tempus nostra conditio fuit, ut nullus mihi plane de his rebus cogitandi lo-

cus

cus relictus sit. Ceterum bene est, quod *Flavium Chisum* Cardinalem, cum potestate Legati a latere proficiscentem, sequi minime jussus sum. Nunc enim otio tandem nostro reddi licebit, ni, contra quam sperare interea occurrit, ab eo iterum iisdem occupationibus evocemur. Ego vero dolui aliquamdiu, partes meas a *Dato* nostro occupatas in mittendo ad te Petroniano, ut vulgo credebatur, fragmento. verum, ut illud legendi facultas facta est, quod nudius tertius tantum contigit, minus poenitere coepit, quod in donando tibi, ut nonnullorum opinio erat, puro puroque auro, sed, ut res est, scrutis quisquiliisque minus diligens accuratusque fuerim. Quam vero notam apud eruditos is liber mereatur, tute judicabis. Ego certe nunquam adducar, ut Petronio elegantiarum Arbitro sribligines, barbariemque infelicis alicujus imitatoris tribuam. Neque quisquam erit opinor, qui Pseudo Petronii hujus stili tantum a Petroniano distare non intelligat, quam quod maxime. Ita plane insulsum, inficetum, illiteratum ubique elocutionis genus, sententiae e pistrino gurgustioque productae; quaeve, ut *Ferrarius* noster ad me belle scripsit, Neronianas Thermas refrigerent, ut Idiotismos non paucos, adagiaque ac modos loquendi Italicae linguae peculiare omittam, e quibus commentitium istum Petronium explodere, fraudemque deprehendere manifesto licet; In qua quidem re eum, qui typographi partes gerit, adeo confidenter agere perquam inique fero, qui ut privato lucro consuleret vel cum aliera jactura, nescio quam explorata eruditorum hujus urbis de Petronio illo suo sententia liquido pronuntiare non dubitavit, id fragmentum doctissimi cujusque in urbe censurae subiectum opinionem sui, quam e Dalmatia Venetiisque ac Patavio attulerat, facile retinuisse. Mihi vero compertum est eos, qui hic nominis hujus honorem merentur, tam fragmentum illud Petronii germanum existimare, quam Berossi monumenta, quae circumferuntur, qui criticae artis vel leviter curiosi sunt. Namque ex iis unus, quicum vetus mihi necessitudo intercedit, cujusque fidei iudicioque plurimum tribuo, id mihi persancte affirmavit, sibi ab eo, qui apographum possidebat, vix unam aut alteram ejus paginam semel lectam, nam ut amplius legeret amici cujusdam interventu minime licuisse. Se, quoniam ille *Jo. Rhodii*, viri sane docti, sed ante quinquennium extincti auctoritate uteretur, non sane quod in rem judicatam transiturem arbitraretur, sed, ut fit, occasione sermonis; neve amici hebetes oculos, crassumque palatum statim explodere videretur, id sibi *ἔκρον ὀδόντων* effugere passum esse, si ita ferret libido, fragmentum illud publici juris faceret, quidque de eo sentiendum esse Eruditis integrum relinqueret. Quae prolixius ideo tecum egi, ut cum ipse scias, tum vero alios, quotquot isthic hisce literis delectantur, certiores facias non adeo obtusa esse Romanorum hominum ingenia, ut vappam pro Falerno, lutum pro auro venditari sibi patiantur. De *Nardinii* libro nescio an alias scripserim, me tandem cum Bibliopola hic transsegisse ut typis edatur. Id vero in praesentia addam, illum opinione citius sub praelo futurum. Nam ante Kalend. Aug. se operi vacaturum Typographus pollicetur. *Holstenii* observationes in Geographiam Ecclesiasticam

Monachi cujusdam ex iis, quos Gallice *les Fevillants* appellant, brevi prodibit in lucem, quibus subinde Concilia Africana ejusdem opera concinnata, notisque illustrata accedent: *Spanhemii* nostri liber jam est ad umbilicum ductus, ac propediem publici juris erit. De Stephano silent omnia. Tu si me amas, quid apud vos in litteris agatur scribere, ne graveris, diu est enim, cum nihil a te litterarum accepi. Ante omnia nos, ut facis, amare perge, ac plurimum vale. Roma 3. Kalend. Jun. *MDCLXIV*.

EPISTOLA CCCXXXVIII.

NIC. HEINSIUS

*Oct. Falconerio.**Romam.*

Q Uas tu Kalendis Martiis ad me dedisti, eae perlatae quidem in manus sunt, sed serius, quam desiderium earum, quo tenebar sane flagrantissimo, videbatur pati, credo dum expectabatur, ut Petroniano fragmento operae typographicae edendo defungantur, Florentiae eas aliquantum temporis substituisse. Compensarunt tamen moram odiosissimam insigni munificentia lautitiaeque, opiparo Trimalchionis convivio, recreante stomachum latrantem & esuritione quodammodo enectum: sententiam de ipso fragmento meam hac occasione non inviderem tibi, si perlegissem omnia ea animi attentione, qua judicem decebat. At vero cum vix semel lectione tumultuaria festinataque percursum Ubsalienses amici, atque in his *Schefferus* noster facile princeps, abstulerint a me, atque involarint, premo etiamnum sententiam, ne temere quid aut incogitanter videar pronunciaffe. Nec possum dissimulare tamen incidisse me in complura, quae vetustatis reconditae venerem genuinam redolebant. Fuisse quidem suspecta non pauciora & legentem offendisse, sed quae librariorum incuriae accepta referri queant. Tibi interim, mi Falconeri, & nostro *Dato* debitorem valde obaeratum me profiteor, quorum officio ac sedulitate sit factum, ne genius meus tam exquisitis deliciis, & quales unice ad gustum mihi faciunt, defraudetur: pari munificentia certare vobiscum vehementer velim: sed & curta oppido elegantiarum supellex mihi est in scriniis, & illic terrarum aetatem ago, unde nil ad rem Romanam redundavit umquam, praeter stragem praesentissimam & ingens detrimentum. Nec desunt tamen hac tempestate, qui veterem gentis infamiam abolere contendunt, prolatis in medium, quae antiquitati tam Graecae quam Latinae illustrandae ornandaeque haud parum conducant. *Schefferus* certe hoc anno Mauricii & Arriani *Tactica*, partem potissimam typis jam expressa, publico est daturus. Nam supremam manum jam nunc librarius imposuit ejus de Italica Pythagoreorum Philosophia commentario. Mox subsequenter ejusdem lucubrationes de Re navali veterum curis secundis plurimum adauctae. *Brunnerus* totus est in adornando Thomae Magistri vocabulario Attico, cui Moerini Atticistam subjunget haecenus ineditum: de me polliceri nil equidem possum:

Fer-

Fervet tamen sub praelo typographico jam pridem Claudianus meus, & nisi fallor ad finem festinat. Novam poëmatum editionem flagitare bibliopolae a me non desinunt, quibus fortasse mos erit gerendus. Quod si fit, inter amicorum primos tuum isti libello nomen inferetur. De Virgilio, Valerio Flacco, Silio Italico cogitare me non sinunt occupationes publicae solito nunc densiores, quanquam scriptores illos animadversionibus tantum non praelo jam paratos illustravi, sed venient tranquilliora tempora, ut spes est. Auguratus eram pedem a me ex septentrione movendum fore ante Caniculae exortum, qua de re etiam per litteras egeram cum Serenissimo Electore Palatino, a quo rescire rem *Spanhemius* potuit, sed jussus sum discessum differre in annum proximum ab his, a quorum nutu nunc pendeo. Tuarum interim litterarum frequentia nil jucundius, nil optabilius, Octavi suavissime, continget. Easdem Mantuana via si Amstelaedamum ad *Elzevirios* bibliopolas recte miseris, uti ab Equite *Puteano* olim factum est, ac etiamnum a *Dato* nostro confieri solet, spondeo fore, ne oleum operamque perdas. *Holmius* iste qui sit, per quem tuae tam negligenter sunt curatae, haud scio. Id scio, si *Elzeviriis* fuissent traditae aut ab illo, aut a tabellario quocunque, nunc eas nequaquam a me desiderandas fore, quarum equidem jacturam indignissime, ut par est, fero. Mauricii, sive is *Urbicius* est, *Tactica* ex Medicæis, ni fallor, membranis deprompta studio *Holstenii* & *maxaeirs Schefferus* a Serenissima Suecorum Regina est nactus. *Arrianum* a *Bigotio* nostro habuit, uti & *Basilii Naumachica*, quae commentario de Re veterum Nautica est additurus. Tu quae ex pulvere bibliothecarum corrasisti jampridem, bono publico invidere, quaeso, diutius noli. Atque utinam sit ex vestratibus, qui *Hori Etymologicum*, quod *Urbino* in Vaticanam est translatum, in commune aliquando sistat; dubium enim non est, quin multa nobis ignota illic tradantur, quae publicari rei litterariae intersit. Tu si provinciam hanc detrectas, *Allatium*, *Possinum* alios quoscunque impellas atque adhorteris velim, ne publicae utilitati hîc defint. Sed inscriptiones illas *Caroli Moroni* Romanas quando tandem videbimus? Nihilne preces orbis litterati ardentissimae, nil imperium mandatumque eminentissimi *Barberini* apud illum possunt, ut veterno excusso, ac amota procrastinatione omni sese tandem contentione accingat huic labori, unde certam nominis immortalitatem, mutuetur, ac universum litterarum nomen egregie demereatur? Sin cessare & cunctari pergit, ut haecenus, ingens neglecti officii invidia apud posteros illum manet, qui praesentissimam oportunitatem in commune consulendi insuper habuerit, ac perire passus sit. De Virgilio agetur a me alias. Habeo interim acceptam, quam sperare me jubes, operam tuam. *Spanhemius* pergit, quantum video, sui esse similis, nam nec scribit ipse, nec quo res suae sint loco per alios significari curat. Sunt tamen, qui adfirmant mandatis publicis instructum brevi huc venturum. Id si vere asseveratur, complexu ejus frui nobis licebit. Proxime *Plautum Gronovii* ex Belgio accepi. *Livium* ejusdem vix hoc anno videbimus. Cujus partem tertiam restare edendam, prioribus duabus jam confectis, *Elzevirius* monet. Equidem *Carolus Antonium Puteanum*, *Allatium*, *Possinum*, &

& si quid praeterea hominum apud vos est mei studiosorum, jubeo salvere. Cum occasio feret, Eminentissimum quoque Principem *Franciscum Barberinum* de obsequiis meis ac cultu constantissimo certiorum uti facias enixe rogo. Vale, vir Eximie. Exarabam Holmiae Suecorum Anno *MDCLXIV*. a. d. xx. Junii Gregor.

EPISTOLA CCCCXXXIX.

OCT. FALCONERIUS

Nic. Heinio.

Holmiam.

ACcepi nudius octavus a *Dato* nostro litteras tuas a. d. xx. Jun. datas, quod mihi sane peropportune accidit, nam cum jam, ex quo postremum ad te scripseram, menses ferme quatuor essent elapsi, nihilque abs te litterarum ad nos pervenisset, dubitare coeperam, ne eodem fato, quo aliae nonnumquam, eae ipsae periissent, quas tamen; ut ipse monueras, ad *Elzevirios* per Mantuanum Tabellarium perferendas curaveram, quo tutius tibi redderentur. Nunc vero quando id prospere successit, atque expeditior deinceps, ut spero erit cursus litterarum nostrarum, efficiam sedulo ut observantiae erga te meae luculenta testimonia frequentius accipias. De Petronii fragmento, quae prima pars est litterarum tuarum, haud praeter expectationem accidit iudicium tuum. Quamvis enim in iis, quae proxime ad te scripsi, in quibus id egi, ut aliorum potius opinioni obsequerem, quam meam proferrem, nihil tutius persuadere mihi videar, quam illud Petronio esse tribuendum, non is sum, qui praejudicium utcunque meum (nam vix ipsum percurrendi otium habueram, cum ad te scripsi) vel reclamante veritate mordicus tuendum mihi esse censeam. Ac tum sane, qui cum ex jam pridem disseminatis rumoribus, tum vero ex literis Patavinorum amicorum adversam de Petroniano isto fragmento opinionem animo inbibissem, illud ita affectus legi, ut iis perconsendis, quae Petronianae notae non videbantur, sedulo haererem. ea vero, quae ut tu recte mones, atque ipse postmodum observavi, vetustatis reconditae venerationem ingenuam redolent, incuriosius negligere. Neque tamen id facile assentiar ejus generis esse complura, quae in eo deprehendi, ut librariorum *παροργματα* censerem debeant. In multis quippe locis non una, aut altera vox corrupta, aut e margine ingesta, quod sane amanuensibus vitio verti possit, sed cum locutionis genus, tum ipsa sententia, ac incessus is est, qui a Petroniano stylo tantum distet, quam quod maxime. Ego vero de illo sic demum statuo, quicquid in eo continetur, non ejusdem farinae esse, atque in eadem officina cusum. Aliter catulos olere, aliter fues. Nam quis aut Petronio ipsi, aut ei, qui tanto successu ipsum sit imitatus, quanto eum oportet, qui, quae tute elegantissima ac plane Petroniana observasti, conscribere potis fuerit, longe adeo diversa excidisse in animum inducat, adeoque ab iis omni ex parte difformia. Inesse multa igitur arbitror, quae, ut tulit antea semper Petronianorum

norum scriptorum fortuna, sparsim interpolateque e diversis codicibus traducta
 sint, e quorum aliquo Traguriense istud recentius apographum extet. Iis in-
 termixta non pauciora, quae ab infelici quopiam litteratore infarta sint ad
 fucum sui similibus faciendum, aut librarii incuria irrepsierint, qui, ut saepe
 factum constat, omnia, quae ad idem argumentum facere videntur, sive illa
 ejusdem scriptoris sint, sive alterius, quasi per satiram, non sine litterarum
 detrimento, promiscue describunt. Quod si *ὑποβολιμαῖον* aliquid in eo depre-
 hendere manifesto lubet, confer modo, quae hîc de decantato illo apud tot
 Authores vitri flexilis invento narrantur, cum iis, quae de eadem re habentur
 apud Isidorum, statimque agnosces nostrum hunc ita ab illo ipso mutuatum,
 ut dissimulandae fraudi pauca admodum, eaque in deterius mutaverit. Cete-
 rum quod *Rhodium* attinet, cujus auctoritate ac testimonio Typographus
 Patavinus plurimum crescere videtur, compertum mihi est, haud ita pridem vi-
 rum eruditum, *Rhodii* xxx. annorum spatio contubernalem atque intimum,
 apud communem amicum conquestum viri doctissimi manes iniquo mendacio
 sollicitari, cui nunquam visum hoc fragmentum conceptissimis verbis jurare
 paratus sit. Illum accepisse tantum a quodam Dalmata, id nescio quid Tra-
 gurii repertum, cumque id *Scioppio* communicasset, retulisse eum, se de eadem
 re cum Romae esset, aliquid audivisse, verum arbitrari esse id alicujus Ascetae
 foetum infelicem, natum in culina ad laevam manum. *ἢ ταῦτα μὲν δὴ ταῦτα.*
 Nam vobis, penes quos stant regni Critici jura, massam istam excoquere
 curae erit, atque aurum a scoria seponere, jamque ut audio Amstelodami
 nova Petronii editio cum mantissa hac Traguriensi, atque eruditorum vi-
 rorum in eam animadversioibus adornatur. Quae isthic a V. V. Cl. Cl. *Scheffero*
Brunneroque in emolumentum rei litterariae parari nuncias, praeclara sunt,
 quaeque ab omnibus, quotquot hoc genere studiorum delectantur, summo cum
 plausu excipiantur. Mihi certe Mauricii atque Arriani tactica salivam jam nunc
 movent. Claudianum tuum vehementer expecto, cui tantum curis tuis ac-
 cessurum confido, ut nulli amplius ad spicilegium locus relinquatur, ac ne
 me gloriolae ejus parum cupidum putes, quam vel summos viros immortalita-
 tem per se satis adeptos ultro affectasse constat, scito torqueri me expectatione
 novae, quam polliceris, poematum tuorum editionis, quorum ope diuturnam
 apud posteros nostri memoriam serio jam augurari licet. Quod suades ut Hori
 Etymologicum ex Urbinate bibliotheca vulgare aggrediar, in eo amoris erga
 me tui vim agnosco, qui me ei spartae ornandae parem arbitraris, quae viros
 longe doctiores, longeque alio eruditionis ingeniique censu instructos postula-
 ret: Ego vero jam antea animadverteram, quantum Graecis litteris esset acces-
 surum, si Orionis Grammatici Etymologiae aliaque id genus, quorum mentio-
 nem fieri apud *Gesnerum* ex Phavorino videbam, in lucem aliquando prodiissent.
 Nam quin Horus is, quem tu in Urbinate Bibliotheca latere existimas, idem
 sit cum Orione Alexandrino Phavorini ac Thebano Suidae dubitare vix ausim.
 Neque parum conjecturam meam juvant *τὰ πρὸ ἐτυμολογιῶν*, quae in Vati-
 cana sub Orionis Thebani nomine reperiuntur, cum interea nihil aut in ipsa,

aut in Urbinatē ex Hori scriptis extet, nisi me atque ipsum *Allatium* accuratissimi fallant indices nuper confecti. Horum verò exemplum una cum his idcirco ad te mitto, ut tu, ac Cl. *Brunnerus* deliberetis operae ne pretium sit, Orionem istum, seu potius ejus ἐκλογὰς, una cum Thoma Magistro ac Moeri Atticista edere. Quod si haec demum sunt, quae tantum ex ejus authoris scriptis superesse conjicere liceat, aut majora in praesentia sperare non contingat, quid ad rem magis fieri possit, quam ut is geminis argumenti scriptoribus tertius adjungatur. Ignorare nos interea non oportet, Siculum quemdam Praesulem nomine *La Farina* ante aliquot annos nescio quid simile Hori aut Orionis edere coepisse, descriptum ut ipse aiebat, ex bibliotheca S. Laurentii, vulgo Escurial, cujus tamen conatus quatuor aut quinque folia non excessit. Quantum vero ex Typographo ipse didici, qui ejus opusculi editionem susceperat, pauca erant, quae supererant in autographo. Quod si vel ea ipsa folia videre licuisset, quid de nova hac re statuendum esset, ex iis facile patuisset. Sed neque illa Typographus tanti fecit, ut asservanda sibi esse duceret, neque mihi apud alium quemquam reperire contigit. Ceterum nostri hujus Vaticani membranae, optimae notae videntur, quasque ego ante quingentes ab hinc annos scriptas judicem. In Medicea vero nihil Hori aut Orionis extare *Datus* noster nuperrime ad me scripsit. Ac de his sane vos amplius deliberabitis. Mihi certe consilium fuit, quod a me praestari poterat, ultro conferre, ut & tibi Orionis editionem pro virili promovendo rem gratam facerem, & Cl. *Brunnero* vel hoc levidensi munusculo meam erga ipsum observantiam declararem. Tu vero, si me amas, voluntatis hujus meae interpretem agere, ipsique omnia polliceri, quae a me proficisci poterunt ne graveris. Tacticorum, quos e Medicea ante triennium descripseram, editioni adornandae liberius deinceps, ut spero, vacare dabitur. At illa, si quae haud ita pridem meditamur perficere contingeret, majoris operis mantissa erunt: nam de edendo simul scriptorum aliquot *ἑλληνικῶν ἀνέκδοτα* nuper cogitare coepimus, sed de his alias *ἐν δεῖν*. *Carolo Morono*, ipsique Cardinali *Barberino* per occasionem de Inscriptionum editione aurem vellam. *Holstenii* observationes ad Geographiam Ecclesiasticam *Caroli a Sto Paulo* brevi prodibunt. Ejusdem notae ad Stephanum ex autographo Reginae nunc describuntur, quo deinde Typis edantur. *Spanhemii* dissertatio de praestantia & usu numismatum antiquorum jam ante aliquot dies in lucem prodiit, magnoque favore excepta est omnium, quotquot hinc sunt homines eruditi, neque dubito, quin eandem de se opinionem apud viros doctos ubicumque retentura sit. Ejus exemplum ad te perferendum jam nunc *Dato* misit *Spanhemius*, ut ex ipsius litteris agnosces. *Possinus* Pachymerim suum quamprimum typis committet. *Nardini* Roma proximo mense sub praelo erit. *Franciscus Barberinus* Cardinalis delatum sibi a me tuo nomine obsequium mirum quam comiter excepit. Utque se ad omnia tui causa facienda paratissimum esse tibi significarem, impense rogavit. Eques *Puteanus* atque *Allatius* te plurimum salvere jubent, tibi quoque gratias agunt quam maximas, quod eos adeo amanter benevolentia tua complecteris. Vale V. Cl. & me litteris tuis beare perge. Roma XVI. Kal. Aug. CIOICLXIV.

EPISTOLA CCCCXL.

NIC. HEINSIUS

Ost. Falconerio.

Romam.

SI perlatae sunt, quas mense Junio ad te dabam, non potes ignorare, Falconeri nobilissime, redditum nobis esse Petronii fragmentum officiosa *Dati* nostri opera, qui ut mei demerendi studio singulari concessit hominum amicorum haecenus nemini, ita nunc quoque nihil praeter solitum fecit, quod spes meas, quas de libello nec dum in lucem prolato conceperam, non est frustratus. Ego autem quamquam monumentorum veterum sum longe avidissimus, horum praesertim, quae cum tineis & blattis in hoc aevi conflictata, luce publica nunc demum donantur, nescio tamen qui sit factum, ut unica eaque admodum festinata libelli hujus lectione defunctus, tam levi opella tamque tralatitia satiari facile me sim passus, siue quod alibi & in publicis graviter jam pridem occupatus, uti eram illo tempore, quo fasciculus ad me pervenit, atque uti nunc sum, non potui plenius indulgere voluptati, quam ex antiquis scriptoribus evolutis capio mehercules maximam, siue quod hae schedae Genii Petroniani nervis illis vegetis ac felicissimae elegantiae nequaquam visae sunt satis respondere. Soloecca quippe & semibarbara illic non pauca occurrunt, qualia Petronio ipsi excidisse absit, ut credamus. Facundia supra sermonem plebejum raro adsurgit, facetiae ut plurimum frigent, sales minime aculeati vix feriunt lectoris palatum, & leviter tantum tergent atque radunt. Sunt tamen hic illic ex interiori antiquitate deprompta, quod dicebam proxima compellatione, quae vix quisquam temporum nostrorum scriptor potuisset excogitare. Ut minimum absit, quin accedam accuratissimi *Gronovii* sententiae, cui viro plurimum a me deferatur, dum arbitratur, esse quidem recenter confectum id fragmentum, sed tamen, quicumque tandem hic os sublevit nobis habuisse illum Petronii aliquanto plura, quam publice haecenus circumferuntur. Nonnulla etiam, quae manifeste mendosa illic occurrunt, litteris postremis nuper admodum ad me delatis, feliciter satis corripiebat. Admovi & ego manum medicam locis depravatis non paucis, idem de se *Schefferus* noster testatur. Qui meo beneficio libellum consecutus variis jam nunc observationibus illustravit, juris publici fortasse faciendis aliquando, nisi per scriptores tacticos ab hac cogitatione nonnihil avocaretur vir doctissimus. Fatetur ille, & nobis assentitur plurima sordere in Petronii fragmento: sed contendit schedas, ut veterrimas, sic depravatissimas, ex quibus apographum Dalmaticum profluxerit, ab homine scio fuisse descriptas, qui quicquid non assequeretur, pro libitu inverteret, atque interpolaret. Hoc ut aegre nobis persuadet, ita nihil praeter ordinem faciemus, si expectabimus animadversiones ejus in hunc libellum, unde liquidior nobis fiat haec sententia. Is ipse *Schefferus* de dogmate Philosophiae Italicae commentarium publico nuper

Rrr 2

dabat.

dabat. Mauricii etiam & Arriani omnia typis jam descripta sunt, nunc in annotatis *Schefferi* procudendis operae occupantur, quae & ipsa lucem prope diem videbunt. Alius vir eruditus Ubsaliensi praelo commisit libellum historicum veteri idiomate Gothico conscriptum, quem notis illustravit. Uti & *Franciscus Junius* longe vetustissimum codicem Novi Testamenti Gothici, quem *Ulphilae* primi Gothorum episcopi manu descriptum esse sunt, qui opinantur, *Amstelædami* edendum curat. Sed haec non sunt tui gustus, & tamen nunciantur, quod alia majoris rei vix occurrant, aut in promptu sint, quae nunciare possim. *Claudianus* curis a me secundis illustratus jam in eo est, ut colophonem a typographo expectet. Mox poemata mea praelo subjicientur. Ut ad vos quamprimum itinere maritimo subvehantur, operam dabo: etsi in *Claudio*, quem adolescentes emaculavimus, nihil est, quod eruditos & tui similes oculos invitet: *Virgilium* hyberna tempestate absolvemus, si non omni ex parte naevis liberatum, at saltem longe castigatiorem quam legi vulgo nunc solet. Sed adeo non sum meus, ut privatis studiis nihil temporis elargiri possim, quod non publicis negotiis, & spartae, quam suscepi adornandam, detrimentum ferat quaecumque. Et sunt tamen, quae me continuum hîc exercent adeo non magnae rei, adeo publice non profutura, ut praestaret omnino, privatis studiis me frequenter insudare, quam mercatorum lucro patrocinari, & alienis litibus, atque adeo magno conatu magnas a me nugas agi. Nam quae cum publica rei patriae conjuncta sunt utilitate, ea & sustineo libenter & facile fero. Et hoc quidem in transcurso. *Nardinii* *Romam* quod polliceri pergis, gratulor tuae industriae, per quam fiet, ne blattis in praedam cedant hae lucubrationes hominis, uti rumor fert, minime indocti. *Petronianum* fragmentum quod pro spurio & a te & ab homine *Venerum* *Latinarum* inprimis gnaro, *Octavio Ferrario*, quem honoris causa nomino, habeatur, gaudeo equidem vehementer, quibus longe plus hîc a me defertur, quam centum *Rhodiis* & *Dalmatarum* cohorti universae. Perlegam illud denuo, atque inde excerpam, quae videri possunt pro iis militare, qui vestigia antiquitatis indubitata in eo scripto passim exstare contendunt. Sunt autem paucissima, si quid ipse hîc judico, quae scrupulum mihi injecere. *Augustinum Favoritum* diu est, quod in oculis fero. Unde fit, ut invitus plane exceperim rumorem, qui de rebus ejus nonnihil turbatis spargitur. Auguror tamen fore, ut ille mox redeat in gratiam magni Regis, post Romanos omnes, ne unus in hoc numero plectatur, qui praeclaris animi dotibus, antiquum nominis Romani splendorem inter primos tuetur. Tu, quid polliceri hîc nobis aut sperare debeamus, significa quaeso, ne scriptionis argumentum desit. *Carolo* autem *Morono*, ne quid dissimulem, irascor, qui *Marmorum* *Romanorum* in lucem proferendorum laudem solidam hominibus transalpinis *Apiano*, *Smetio*, *Grutero* relictam cupit, dum ipse oneri suscepto post hos *Atlantes* externos successor *Hercules Romanus* succumbit, certe desideria nostra cunctando frustratur & ludit promissi securus: *Spanhemii* sororem cum proxime compellabam, negabat illa res fraternas sibi magis compertas esse, quam essent mihi. Quantum video amicus

ille

ille desultor primas etiam necessitudines hîc terrarum jubet frigere. Vale, mi Falconeri, & mihi, quod in praecipua felicitatis parte pono, favere ac bene velle imposterum perge. Exarabam. Holmiae Suecorum Anno MDCLXIV. 2. d. xv. Kalend. Septembr.

EPISTOLA CCCCXLI.

NIC. HEINSIUS

Oët. Falconerio.

Romam.

REâte tibi redditas fuisse, quas mense Junio scribebam, ex tuis Sextili mense exaratis licuit mihi cognoscere, Falconeri humanissime. Unde fit, ut optime sperem de iis, quas a. d. xv. Kalend. Septemb. prioribus subjunxi, etsi eas pari fortuna usas ex te nondum percepisse datum est. De meo autem silentio tam pertinaci quid dicam? aut quo colore taciturnitatem excusem? Ex rumore publico novisse jam potes, Britannos, qui Regum cervicibus atrociter insultabant nuper, nunc vicinis ac foederatis Belgis pari quoque iniquitate permolestos esse, bellumque in illos meditari maximo conatu. Nec hoc tantum, sed missis circumquaque ac subornatis legationibus sollicitare in partes suas ac avellere a nobis quicquid possunt Regum principumque tam Europaeorum, quam remotas orbis regiones accolentium: & hoc quidem in primis, quos sacrosancta atque arcta pactorum religione adstrictos potissimum foederatis Belgis haud nesciebant: quorum in numero praeter Regem Christianissimum Suecorum ac Danorum Reges. His illorum subdolis ac clandestinis machinationibus dum pro virili in hac aula eo obviam, plurimum equidem negotii mihi faceffitur, plurimum molestiae a me devoratur, sic ut excussa omni de Musis cogitatione jam per menses quatuor poene continuos curis publicis unice vacarim. Quae ut absque furo aut mendacio tibi commemorantur, ita confido, te prae caetera aequitate tua dilatum tanto tempore scriptionis officium in partem haudquaquam pessimam esse interpretaturum. Venient, ut spero, tempora, per quae diligentiori mihi imposterum esse concedatur. Fragmentum istud, quod sub Petronii nomine lucem nuper admodum adspexit, commentariis de stylo suis *Schefferus* subtexendum curat, additurus & observationes nonnullas, per quas loca passim mendosa aut corrigat aut obscuriora illustret, otium abunde nunc nactus, post tacticos scriptores publico commissos. De ipso fragmento an iudicium suum probaturus sit nobis mox videbimus. Certe totum illud scriptum ut Petronianae lucubrationis esse credam, nequaquam nobis persuadebit. Pro Orionis libello gratias immortales ago: quem *Brunnerus* Thomae Magistro Moeridique additurum esse pollicetur. Sed quantum video, lente haec ejus cura procedit. Si vera sunt, quae *Gudius* noster prae se ferre dicitur, allatum abs se ex Italia Hori aut Orionis Etymologicon, quod uno alteroque magnis constet voluminibus, libellus ad me missus pro excerpto exiguo operis immensi erit habendus. Ego in rem

Rrr 3.

totam.

totam diligentius inquiram. Hujus interim scriptoris meminerunt cum auctor Etymologici magni, tum Eustathius commentariis in Homerum. Ex Belgio nostro quod super re litteraria nuncietur, aut nihil est aut parum. *Vossius* annum totum domo abfuit, dum in Britanniam Galliamque excurrit, abfuit & plus aliquanto temporis *Christianus Hugenus*. *Gudius* quoque aestatem proximam in Germania sua exegit, nec litterarum quicquam ad me dedit, ex quo Gallica Italicaque peregrinatione est defunctus. Misit tamen ad me per *Elzevirios*, pervetustum & quantivis pretii codicem Maronianum. *Livium Gronovii*, quantum ipse postremis litteris significabat, propediem videbimus, nisi jam nunc, dum haec scribo, in publicum est prolatus. Idem *Quintiliano* manum admove coepit, cujus editionem adornabat ante illum *Cornelius Schrevelius*, sed illo e vivis nuper sublato, institutionibus oratoriis summi scriptoris jam praelo exemptis, id negotii *Gronovio* reliquum fuit, ut *Declamationes* castigaret, qua in cura nunc occupatur. *Aeschyli* tragoedias cum suis & aliorum observationibus majori forma Londini *Thomas Stanlejus* edidit. Ex hoc septemtrionis tractu quod nunciari possit, nil in promptu est. *Claudianus* meus lucem jam pridem videt, sed ad vos quando perventurus sit, vix certo potest affirmari, adeo maria depraedationibus Britannicis nunc infestantur. Poëmatibus meis nec dum edendis typographus vacat: sub limam revocabam nuper epigramma, quod olim manibus viri summi optimique *Cassiani Putei* a me fuit consecratum, id, si tanti est, a *Dato* nostro, ad quem mittetur, flagitabis. *Nardinii* Romam quando videbimus? Quando *Holstenianis* ex scriniis quod edendum restat? Quando vetustas inscriptiones? In Galliis prodiisse audio *Lupi Ferrariensis* epistolas aliquando auctiores cum aliis opusculis illorum temporum, & *Salvianum Massiliensem*, & *Petri a Marca* nonnulla haecenus inedita. *Henricus Valesius* praeter historiae Ecclesiasticae volumen secundum de *Clemente Alexandrino* edendo cogitare dicitur, nec minus de matrimonio ineundo, etsi ea sit aetate, quae in senium vergat. De Regina *Christina* quid sperare debeam ignoro. Eam aestate proxima huc excursum quidam adseverant, negant alii. *Virgilii* editionem quia urgebat olim apud me ipsa, per litteras eam obsecrare ausus sum, ut si quid huic instituto profuturum, aut ex sua, aut ex aliis aliunde bibliothecis indagare possit, hoc ne me fructu fraudari sinat. Sed responsi nihil haecenus ab illa ad me pervenit, ut periisse in via litteras prorsus opiner. Equitem *Puteanum* ejusque generum *Rondinium* cum VV. Cl. *Allatio*, *Pessino*, *Favorito* jubeo salvere. Vale, Falconeri nobilissime, & me affectu tuo perpetuum dignare. Exarabam Holmiac Suecorum Anno MDCLXV. a. d. XXVII. Januarii Gregor.

EPISTOLA CCCXLII.

OCT. FALCONERIUS

*Nic. Heinsio.**Holmiam.*

N^Ullae unquam gratiores mihi litterae tuae, quam quae, *Dato* nostro curren-
tante, proximis diebus redditae mihi sunt a. d. xxviii. Januarii datae.
Cum enim multa faciebant, ut eas avide expectarem, tum vero maxime solli-
citus, quam mihi valetudinis tuae incusserat cessatio ista tua tam diuturna,
quamvis cum ante duos ferme menses de *Elzevirii* Amstelodamensis obitu certior
factus essem, ejus rei causam in id rejiciendam esse duxit, ut ejus morte cu-
randarum litterarum nostrarum munus ad eos homines devenisset, qui parum
diligenter eo fungerentur. Utinam vero non eorundem negligentia occasio
tibi praebita sit, me quoque cessatorem appellandi, quamvis post eas, quarum
ipse meministi, bis ad minus ad te scripserim. Ego certe nihil postea ad te
litterarum dedi, quod cum de hoc ipso valde dubitarem, expectabam meque
sustinebam, ne prius ipse ad te scriberem, quam litteris a te acceptis esse ali-
quem cognovissem, qui defuncti vices in ea re suscepisset. Gaudeo equidem
summopere accepisse te *Orionis* libellum, quem exeunte anno superiori ad te
miseram, ut pro virili *Cl. Brunneri* curas in illustranda Graeca-Lingua promo-
verem, communicando ipsi qualequale est ejus authoris fragmentum, quod
mantissae loco esse posset editioni, quam parabat, *Thomae Magistri*. Ac si
bene memini ea potius *Orionis* ad te mittere scribebam, quae apud nos reperi-
rentur, quam quae extare ejus scriptoris arbitrarer, cum multo plura ex ejus
Etymologico a *H. la Farina* typis excussa ex *Mascardo* cognovissem. Neque
tamen, quantum ipse meminisse videbatur, tantae molis erat libellus ille, ut
ea omnia complecti posset, quae in Codicibus *Gudianis*, si vera sunt, quae
nuncias, continentur. Ille certe *Romae*, atque alibi multos optimosque di-
versorum Authorum codices *M. S.* parvo pretio sibi comparavit. Sed ego
non possum, quin tecum de homine, tui causae omni genere officiorum ex-
culto, parumper conquerar, qui postquam ab urbe discessit ab hinc fere trien-
nio, ne verbum quidem unquam ad me scripsit, quo saltem, ubinam gentium
degeret, certior factus ipsum ultro compellare, atque amicitiae partes pro-
virili implere potuissem. Rem itaque mihi gratissimam facies, si ipsum oppor-
tune moneas, si minus ille nostri, me certe ejus memorem ad absentis, ut cum
Martiali loquar, amicitiae officia praestanda paratissimum esse, ubi & quo mit-
tendae litterae, & cui dandae, ab ipso certior fiam. At tibi, *Heinsi* huma-
nissime, ago habeoque gratias quam plurimas pro iis, quae amanter adeo ac
diligenter, immo & luculenter, ad me scripsisti. Neque fane adeo officiorum
ignarus sum, ut abs te gravissimis pro Republica negotiis occupato quotidie
litteras exigere audeam. Id fane optandum mihi potius est, quam sperandum,
cum, quod & ipse vehementer cupere videris, in Patriam atque in suavissimum
lit-

litterarum otium te receperis. Versiculi tui in obitum Equitis a *Puteo* & *μαναρίτῃ*, quos *Datus* ipse, vota nostra antevergens, ultro ad me misit, sum-
mopere mihi placuerunt. Quam Latini illi! quam succi pleni, quam te, at-
que eo digni, in cuius laudem conscripti sunt! Ut vero me non tam malum
Poëtam, quam confidentem amicum experiaris, mitto ad te exemplum ejus
Carminis, quod *Alexandro* VII. Pont. Max. ejus Natali die obtuli, una cum
codice Commentariorum Caesaris, illo quidem satis eleganti atque optimae
notae. Atque id quidem ipse plane nescio quo pacto mihi quidvis aliud agen-
ti, atque Astronomicis observationibus intento occasione Cometis, qui paullo
ante in corvi asterismo effulserat, e calamo exciderit. *Allatii* exercitationes
adversus *Creygtonium* jam manibus hominum circumferuntur. *Nardinii* Ro-
ma, quamvis Typographum quotidie urgere non desinam, non nisi aestate
proxima, quantum conjicio, publici juris fiet. *Barberinus* Cardinalis in edi-
tione *Pachymeris* totus est, qui hoc ipso anno, ut audio, prodibit in lucem.
Ceterum de Stephano atque aliis Holstenianis curis edendis mirum silentium.
Ego vero quam primum ipsum alloquendi copiam habebo, ei stimulos addere
tuae hujus epistolae lectione non praetermittam. *Puteanus* atque omnis hîc
amicorum chorus te salvere plurimum cupiunt. Vale. Roma VIII. Kalend.
Maji CIOIOCLXV.

ALEXANDRO VII. PONT. MAX.

Dona Natalitia.

A Urea lux redit ecce, mihi celebranda quotannis,
Qua te olim, Alme Pater, dias in luminis auras
Nascentem, magnisque datum succedere rebus
Arbia, felices fatis monstrantibus ortus,
Excepitque sinu, & fluvio veneratus amico est.
Et jam collucet festis altaria flammis
Undique, te nobis pro sospite sacra Quirites
Instaurant; castasque aras; delubraque divum
Accumulant donis, dumque omnis gaudia laetis
Urbs sua testatur votis, faustasque frequenti
Ingeminat plausu voces, atque omina laeto
Murmure responsant septem alto e vertice colles.
Quid faciam? coelo cui nec fas numen ad aras
Elicere, & cultu superos propiore vocare:
Nec tantum sperare jubet Musa, inclyta facta
Aequare ut possim tua fando, & carmine saltem
Quod poteram meritos hodie tibi solvere honores.
Praesertim hîc primus quoniam mihi ducitur annus,
Qui sanctus mihi semper erit, mortalia supra

Ex

Ex quo sorte datum attolli, alloquiisque beatis
 Dignari & sacris adytis & nectare Divum.
 Ergo hominum quando nec Dii munuscula parva
 Contemnunt, tenuesque rosas, & thuris honorem
 Exigui, haec tibi quae suadet dare, munera felix,
 Te nascente, dies, illo Pater accipe vultu,
 Urbem quo rerum dominam populosque serenas.
 Hoc quamvis geminas Tyrion non murice frontes,
 Non auro ferat insignes, gemmisque volumen;
 Ast illi pretiumque facit sat longa vetustas,
 Illi & docta manus simulacra hominumque ferarumque
 Addidit, & pietas volucres & florea sarta.
 Fusile & arte nova late intermiscuit aurum.
 Hic animum tibi quae capiet mage nota voluptas,
 Gesta olim, & magno patrata a Caesare bella,
 Horrida bella leges, Rheni vada caeca bicornis
 Incassum haud tentata unquam, Gallosque feroces
 Servitiumque pati, Romanaque jura coactos,
 Et domitos, toto avulsos licet orbe, Britannos.
 Nec vero ante mihi paullo longum meditati,
 Natali quae dona die tibi more vetusto,
 Obsequii monumenta mei, Pater Alme, dicarem,
 Haud ducibus fatis, fausto & sine Numine Divum
 Crediderim praeclaro oblata volumina, magni
 Quae decora Herois sublimiaque acta referrent,
 Laetus & accipio hinc omen fore, grandibus olim
 Ut fretus te dante ausis (si tanta decebunt
 Mortalem) res ipse tuas, divinaque facta
 Aggrediar fati securis tradere chartis,
 At te florentem nulla non laude, verenda
 Insignem pietate, animis ingentibus astra
 Aequantem, implentemque vices & jura Tonantis,
 MAXIME ALEXANDER, similem sperantia secula
 Nequicquam, te sera nimis venerabitur aetas,
 Tu Vaticanæ decus immortale thyaræ,
 Hesperiae faustum tu sidus habebere semper.
 Te patria aeternum celebrabit clara vetustas
 Te tua gens titulis, & nunc te clarior ipsa,
 Unum omnes, quotquot servabunt atria longa,
 Inter avos atavosque augusta in imagine quaeret,
 Magnanimosque trahent in magna exempla nepotes
 Dulcis amor famæ venientis, & aemula virtus.

EPISTOLA CCCCXLIII.

NIC. HEINSIUS

Ost. Falconerio.

Romam.

QUI de morte Elzeviriana persuasum esse te voluit, ut nuntio mendaci crederes, incurius omnino, si quis umquam fuit, Falconeri nobilissime. Sunt enim *Ludovicus & Daniel Elzevirii* in civitate Amstelædamia etiamnum incolumes. *Joannes Elzevirius*, qui Lugduni Batavorum fixerat sedem, e vivis ante hoc triennium excessit. Sed nihil ille ad nostrum commercium. Tu igitur me auctore confidenter perge quicquid litterarum in manus nostras cupies perlatum per Amstelædamenses *Elzevrios*, ut solebas, curare: qui si apud vos elati jam sunt, apud nos revixere. Orionis libello quid factum sit, ex quo *Brunnerus* eum a me accepit, quidem ignoro: Ubsaliam enim excurrere non permittunt jam pridem occupationes cum frequentes, tum molestae, quas intentatum a Britannis foederato Belgio praeter jus fasque bellum nunc parit invito mihi longe maximas. Opinor tamen *Brunnerum* de libello edendo etiamnum cogitare. Percunctatus eram *Gronovium* per litteras, fidesne esset habenda rumori, qui ad nos pertulerat ingentem Orionis hujus commentarium in scriniis Gudianis ineditum adservari. Nam ipsum super ea re consulere & scitari *Gudium*, supervacuae prorsus ac inertis operae videbatur fore: quod is interrogatus haud soleat respondere, a litterario commercio plane aversus atque alienus. Ad me certe, ex quo Italica ac Gallica defunctus est peregrinatione, ne verbum quidem etsi semel iterumque compellatus, dedit: ne tu censeas benignius officiosiusque ab illo agi mecum, quam tecum agitur. *Gronovius* quoque nil rescripsit hactenus, caetera amicorum absentium haudquaquam negligens: credo, quod omni cura ac cogitatione jamdudum defixus haesit in Livio suo, qui publicum, ut ajunt, nunc tandem videt, locis infinitis castigatus. Ipse *Gudius*, ni fallor, Haganam sedem habitandam sibi delegit. Sed quid moliatur, aut quid publico paret, minime exploratum habeo. *Spanhemius* ad suos rediisse jam debuit, si quid credendum iis, quibus ipse ad me anno proxime elapso perscribebat. Sed nec laudatissimos ejus super re nummaria commentarios licuit videre. Dantisco accipiebam heri Hevelianum de cometis nuperrimis prodromum, opus accuratum omnino. Novi complures in Germania tam superiori quam inferiori, qui in eadem palæstra defudent. Qui si quid operae facturi sint pretium post Hevelianam lucubrationem, propediem videbimus. *Schefferus* post *Tacticos* scriptores deque dogmate Pythagorico commentarios in lucem prolatos, de *Stylo* opuscula publico dedit: nunc observata ejus in *Petronianum* fragmentum, *Tragurii* apud *Dalmatas* repertum annis proximis, sub praelo typographico fervent. Versus Pontifici maximo dedicati abs te mirifice mihi placuerunt. Multus in iis orationis nitor, multa leporis Latini copia. Felicem hoc praecone *Alexandrum Septimum*: Felicissimum,

num, si bona sua intelligit, & laudatorem tam disertum pro meritis remuneratur. Epicedion manibus *Puteani* nostri a me datum quod tanto opere commendas, vide ne frustra sis. Id tamen quaecumque sub limam postea revocavi, versibusque nonnullis auxi, ut videre poteris in poematum meorum editione, quam *Elzevirii* nunc moliuntur. Complectetur hoc volumen Elegiarum libellos quatuor, quorum tertius tuo nomine est inscriptus, Silvarum ternos, binos Juvenilium. Elegiae typis jam nunc propemodum sunt descriptae. Sed quod pagellae singulae huc terrarum, ut menda typographica a me corrigantur, sint mittendae, tardius, quam velim, conatus hic procedit, totoque hoc anno, quantum apparet, operas typographicas exercebit. Claudianus nec dum ad vos mitti potuit, maria infestantibus piratis Britannicis. Quid quaeso Moronianis inscriptionibus fiet tandem? Hanc epistolam libuit non obsignare, quo legi a *Dato* nostro posset. Id e re mea fore videbatur, ne ad illum quoque perscribenda essent, quae ad te perscripseram. Vale, Falconeri jucundissime, meque quamvis immerentem, solito adfectu dignare impofterum. Amicos omnes jubeo salvere. Exarabam Holmiae Suecorum Anno *MDCLXV*. a. d. *XXIII*. Junii Gregoriani.

EPISTOLA CCCCXLIV.

OCT. FALCONERIUS

Nic. Heinsio.

Florentiam.

EX iis literis, quae a. d. *XXIII*. Junii datae superioribus diebus mihi reddita sunt a *Dato* nostro cognovi, ut alias saepe, quanta sit vis amoris erga me tui, quem turbae istae Britannici belli, occupationesque, si quae unquam molestissimae, non prohibent, quin ad me scriberes, neque vero tantum scriberes, sed de inscribendo mihi tertio Elegiarum tuarum libro cogitares; quo quidem amplissimo testimonio benevolentiae tuae nihil gratius accidere poterat, nihil honorificentius, atque ut verum fatear, optatius: ea enim nostra est in primis ambitio, ut nos quoque ex iis esse, qui amicitia tua beantur, publice pateat. Ego vero pro praeclaro adeo munere gratias tibi ago habeoque quam maximas, ac deinceps curabo, ut, si quid unquam moliemur in litteris, quantum declarationem istam animi tui faciamus, palam sit. Cardinalem *Barberinum* triduo post acceptas tuas litteras de Inscriptionum editione compellavi, qui fane mihi fidem suam obligavit, ubi a *Pachymeri* se expediverit, quod intra paucos menses futurum conjiciebat, de iis edendis serio cogitaturum. Interea ut exemplar earum, quae jam olim ipso curante editae sunt, neque tamen publici juris factae, mihi ad te mittendum concederet, impetravi. Sed *Moronum* vereor, cujus e manibus non nisi magno cum labore, ac plane aërumnoso is liber mihi extorquendus erit, quem ut primum accepero, curabo diligenter, ut per *Datum* nostrum ad te quam citissime afferantur. Hae vero morae levius tibi ferendae erunt, quod quamdiu nobis bellum cum Britannis

crit, non video quomodo haec ad te mitti possint. Quae res magno sane detrimento nostro facit, ut *Schefferi* tacticos scriptores, commentariosque de dogmate Pythagorico adhuc desideremus. *Nardinii* liber brevi prodibit in lucem, cui si per tempus licebit nonnulla adjiciemus mantissae loco, quae antiquitatis studiosis haud ingrata fore speramus. *Spanhemius* noster dissertationem suam de Nummis veterum secundis curis auctam jam praelo subjecisse recentissimis litteris nuntiabat. Miror vero te illam Romae editam adhuc desiderare, cum ipse ab eo non semel audierim, antequam Roma discederet, se illius exemplar ut ad te perferretur curasse, una cum litteris, in quibus se de diuturno illo tecum silentio purgaret. De *Gudio* quoniam is est, ut neque amicorum tui similium litteris rescribere dignetur, omnem plane cogitationem abjiciam. Tu vale, mi *Heinsi*, ac quantum occupationes tuae patiuntur, me litteris tuis beare perge. Roma. Kalend. Septemb. *MDCLXV*. Inscriptiones *Barberinianas*, quas modo a *Morono* accepi, propediem *Dato* nostro mittam, ut is quamprimum, ut ad te perferantur, curet.

EPISTOLA CCCCXLV.

N I C. H E I N S I U S

Ost. Falconerio.

Romam.

NON te praeterit, ut puto, rem foederatorum Belgarum publicam magnis hac tempestate difficultatibus objectam esse, idque per illos, quos id facinus haudquaquam decebat. Qui exsul & extorris patria in sinum nostrum confugit, quem opibus nostris ad extremam redactum egestatem fovimus atque sustentavimus per annos complures, qui revocatus denique in regnum a suis nobis se ac fortunas credidit suas, Gallis atque Hispanis diffusus, ac e nostro litore in Britanniam postliminio se recepit, imperio restitutus, nunc oblitus beneficiorum omnium jugulis nostris & libertati insidiatur, eamque hospitalitati sanctae mercedem refert. Dum inter has atrocis belli & fortunae parum haecenus faventis angustias foederatorum Belgarum populus jactatur, inveni & ego, mihi crede, quod agerem, Vir Nobilissime: Idque eo magis, quia Suecos prae caeteris foedere tentandos Britanni sibi, nec sine successu proposuere. Distuli ea propter ad suavissimas tuas responsum, quas Kalendis Septembribus anni superioris exarasti, dum nuntios de die in diem nequicquam opperior, qui poematis meis supremam a typographo manum esse impositam significarent, cujus te rei certiolem per me fieri unice cupiebam. Sed iniecit moram haud modicam operi instituto miles Monasteriensis, interceptis in via libelli nonnullis, quae ad bibliopolam addendae volumini hinc Amstelaedamum mittebantur, paginis. Resarcivi damnum, ut potui, & opinor, omnia jam nunc ad finem esse perducta. Sed viam non invenio, qua liber ad te perferri possit, infesso per piratas mari. Unde factum est, ut & Claudianum meum amici Itali haecenus desideretis. Exemplaria vobis destinata Lutetiam deferri

curarem, si inde Romam aut Florentiam tutius mittenda fore certo persuasus essem. Eminentissimum Principem *Franciscum Barberinum* de pertexendo inscriptionum antiquarum opere desideria nostra fovere gaudeo, ut qui maxime. In Pachymeri edendo cum fervide desudare operas typographicas nuntiarit proxime *Datus* noster, hoc labore illas jam defunctas esse augurari licet, ac proinde inscriptionibus praelo committendis accingi. quod utinam ex tuis propediem intelligamus! *Nardinii* Romam & parietinas D. Pauli accepisse se testatur munus abs te mihi destinatum idem vir amicissimus. Si quid imposteriorum ejus rei per itinerum compendia mihi tempestive redditum cupies, Lute-tiam id ad *Bigotium* aut *Capelanum*, quibus illic utor conjunctissimis, mittas necesse est, unde ad *Elzevirios* Amstelaedamum, & per illos Hamburgum Hafniamve mox curetur. Eminentissimo *Barberino* pro singulari munificentia cum reponi nonnihil a me par sit, audebo fortassis tuam operam implorare, ut poëmatum meorum exemplar Heroi tradas meo nomine, perge interim, quod facis, illi propius propiusque me conciliare, quando alia re demereri mea studia luculentius haudquaquam potes. Navis illa, quae *Schefferi* Tacticos Amstelaedamum ferebat, in Codano sinu tempestatibus jaëta hybernavit, atque inde Lubecam contendit, ibique sarcinas ac mercem omnem exposuit, metu piratarum Britannorum. Nec constat nobis hætenus Tacticos Amstelaedamum devenisse, quod bibliopola Lubecensis, cui rei ejus cura incumbebat, domo aliquando abfuerit, Francofurtum profectus. *Schefferus* ipse Tragurianum Petronii fragmentum ex quo animadversionibus illustravit, quod & ipsum a juvene quodam Norico nunc fieri fert rumor, nunc in Upsalia antiqua edenda occupatur, qui liber mox in publicum proditurus creditur. Hac defunctus lucubratione secundam Phaedri editionem dabit. *Gronovii* Livium & Quintilianum nuper publici juris factos vidisti, credo. Videtur ille nunc cogitare de revocandis sub limam iis, quae ad Silvas Statii ante hos triginta annos in lucem dedit, quod propositum ut tenere pergat, valde illum sum adhortatus, suggestisque conjecturas complures, quae operi ornando augendoque inserviant. *Spanhemium* Heidelbergam rediisse, ac Commentarium suum de praestantia nummorum veterum auctiorem praelo typographico subjecisse audio, qui liber in conspectum meum nec dum pervenit. Sed nec ipse *Spanhemius*, quod mireris, quicquam ad me, ex quo ad suos reversus est. Non ita diu est, quod *Bigotius* per litteras significabat, Serenissimam Sueciae Reginam selectiores veterum nummorum plurimos ex hisce, quos ipsa possidet, aut jam edi curasse, aut mox esse curaturam. Quid nobis inde sit sperandum, tu omnium optime me docebis. Neminem enim ex ejus comitatu cognitum habeo, quem hac de re possim percunctari. Ajunt prodiisse partem epistolarum secundam *Tanaquilli Fabri* apud Salmurienes, in quibus noster *Gudius* male excipiatur. Haec injuria virum doctissimum fortassis instigabit ad pro-perandam Phaedri sui editionem. Virgilium neglectum a me relinqui jubent occupationes publicae. Prudentium a me castigatum cum brevibus animad-versis Episcopo Paderbornensi sum pollicitus. Sed *Bigotius* me moratur,

qui sperare jubet excerpta codicis Ambrosiani longe vetustissimi, quem Mediolani excussit ipse, nec mittit tamen. Credo quod in Neustria diutius ob fraternam mortem detineatur, quam opinatus erat fore. Amicos omnes plurimum salvere jubeo. Equitem *Puteanum* in primis, & *Leonem Allatium*. Tu Vale, & me, ut soles, ama constanter, Falconeri nobilissime. Exarabam Holmiae Anno MDCLXVI. a. d. xxvii. Februar. Gregor.

EPISTOLA CCCCXLVI.

OCT. FALCONERIUS

Nic. Heinsio.

Holmiam.

ETSI perspecta antea mihi satis erat tua erga me benevolentia V. Cl. non potui non gaudere vehementer luculentissima amoris in me tui significatione, cujus sane vim in iis litteris agnovi, quas diebus superioribus a *Dato* nostro accepi a. d. xxvii. Febr. datas. Quod enim illustrius amicitiae nostrae testimonium a me expectari potuisset, quam ut de scribendis ad me litteris cogitares, inter tot tantasque turbas negotiorum, quibus post coeptum inter Britanniae Regem ac Foederatas Provincias bellum, te plus nimio obrui mihi persuadeo. Id certe me proximis mensibus deterruit, ne quicquam literarum ad te darem, quem publicis curis, supra quam vellem, occupatum intempestivis officiis compellare parum opportunum censebam. Quod si quicquam hac in re a me peccatum est, in eo tantum peccasse tibi persuadeas velim, quod cum omnia apud vos, terra marique turbata esse nunciarentur, caute, dicam quod est, nimis egi, qui ut amicitiae nostrae satisfacerem, ne epistolam quidem fortunae casibus committendam esse censui. Ego vero vices tuas summopere doleo, quem literis natum literisque novis semper ingenii tui monumentis illustrandis intentum, administratione Reipublicae honorifica illa quidem atque optimo cive digna, sed cum alias semper, nunc vero maxime aerumnarum atque inconditi laboris plena, distineri, atque e Musarum sinu plane avelli video. Nobis vero vestrum hoc bellum haud parum detrimenti in re litteraria attulit; magna enim librorum ex Batavia vestra penuria, ex quo mare infestis classibus implicitum ac pene clausum est, atque inde accidisse arbitror, ut de *Gronovii* Quintiliano fama tantum ad nos pervenerit: Claudianum ac Poëmata tua ita avide expecto, ut eorum desiderium vix ferre possim. Utinam horum saltem exemplum Lutetiam ad *Bigotium* nostrum misisses! Quam opportune librum ille ad me perferri curasset occasione oratoris Regii, qui ad obeundam apud Pontificem legationem propediem discessurus recentissimis litteris nunciabatur. *Schefferi* *Tactica*, si ut quam primum possideam curaveris, obligabis me haud vulgari beneficio. Cum enim nunc sim in vertendis *Julii Africani* *Cestis* atque aliis id genus Auctoribus, satis vides quanto mihi usui is liber deinceps futurus sit. *Wagenselii* atque *Hadriani Vatesii* Dissertationes,

nes, de Petronii fragmento Traguridensi nuper Lutetiae editas, hoc ipso die a *Bigotio* nostro accepi, quarum ad vos quoque famam pervenisse ex literis tuis conjicio. Eam quoque spartam a *Schaffera* adornari non sine magno litterarum emolumento continget. Ego quid de tota hac re sentiam non semel alias ad te scripsi: *Spanhemio* erit cur minus iratus sis, cum a me etiam ejus literas jam diu desiderari scies. Ex quo enim Lutetiam se contulit, quo versus se postridie discessurum, ante tres ferme menses ad me scripsit, nihil plane litterarum ab eo mihi redditum est. Eminentissimo *Barberino* de Inscriptionum antiquarum editione iterum aurem vellam, sed quantum conjectura augurari licet, non ita statim id opus aggressurus videtur, ipsumque potius editionem audio parare B. Nili Abbatis epistolarum, quarum ad mille jam in Latinum sermonem verfas penes se habet *Leo Allatius*. Serenissimam Sueciae Reginam de vulgando insigni sup. nummorum veterum Musaeo cogitare locupletem auctorem habeo Eminentissimum *Azzolinum*, qui apud Reginam plurimum gratia & auctoritate pollet. Hunc cum heri alia de causa convenissem, non destiti urgere hominem gloriae cupidum, ut Reginam ad opus adeo illustre, adeoque literatis omnibus exoptatum, impelleret absolvendum, quod a *Francisco Gottifredo*, quem satis nosti, inceptum promotumque haud leviter fuerat. Nam Tabulae jam supra sexaginta excusae sunt, in quibus series integra Nummorum, qui magni apud Antiquarios appellantur, ac nonnulli etiam ex majoribus, quos *Medaillones* vocant, continentur. Sed quis tandem rerum maneat exitus *θεῶν ἐν γένεσι καὶ τῇ*. Ego certe operam meam, quam *Gottifredo* jam senio satiscienti gratam ac necessariam plane fore video, ipsique pollicitus abunde sum, praestabo, quantum in me erit, strenue ac diligenter. *Natalis Rondinini* ἔμνηται carmina nulla huc usque inter ejus scripta reperiri contigit, quae aut tibi inscripta sint, aut tui quoque modo mentionem faciant. Id ego nudius tertius a *Nicolao* ejus fratre didici, quem antea hac de re non semel conveneram, quique omnia facturum, ut desiderio tuo, quantum in se est, satisfaciat, perhumaniter pollicitus est, Vale. Roma xv. Kalend. Maji cxciclxvi.

EPISTOLA CCCCXLVII.

OCT. FALCONERIUS

Nic. Heinsio.

Holmiam.

ETSI post eas literas, quas paucis ante diebus ad te dedi, nihil plane erat quod scriberem, nolui tamen pro mea erga te observantia occasionem amittere, quae ab inopinata serenissimae Reginae ad vos profectione mihi sese obtulit, amoris nostri officii satisfaciendi. Quae res cum hoc ipso peropportune mihi accidit, tum vero magis, quod cum *Pachymerianae* Historiae exemplum tibi mittere vehementer cuperem, nesciebam, quo me verterem hoc temporis, quave via utendum mihi esset, quo illud tuto ad te perferretur. Librum
vero

vero ipsum una cum hisce literis reddet tibi *Caesar Macchiatus* Reginae Medicus, mihiq̃ue non vulgari necessitudine conjunctus, quem tanti facio, ut & amicitia tua dignum judicem. Ab eo plura de me rebusque meis, si libitum fuerit, cognosces. Ne autem, quod ad Pachymerim attinet, plus mihi sumam, quam res est, scito me isthic nihil aliud egisse, quam ut librum ad te mittendi onus in me susceperem, caetera debere te humanitati Eminentissimi Cardinalis *Barberini*, qui & doctrinam, eruditionemque tuam plurimi facit, suaeque erga te benevolentiae declarandae occasionem libentissime amplexus est. *Schefferi* *Tactica* satis erit, si *Macchiato* Romam redeunti tradideris ad me perferenda, non est enim cur jam de ejus libri lectione vehementer laborem, nam recentissimis *Bigotii* nostri literis admoneor virum quemdam doctum (*M. Hardy*) hanc ipsam spartam jam multo antea adornare coepisse, Africanum, Apollodorum, Philonem, Byzantium, Atheneum jam pridem in Latinum vertisse, quin & schemata ipsa, quae in eorum Authorum scriptis, ac praesertim Atheneo occurrunt, jam excusa, ita ut opus integrum nihil amplius nisi praelum expectare videatur. His auditis mirum quantum in me incepti operis prosequendi studium refriguit. Quamvis enim Anonymi tractatum de Concionibus Militaribus instituendis, & Africanum jam in Latinum verterim, *Bigotiusque* ipse me hortetur ad symbolam in id opus conferendam, Auctoresque supra dictos peculiari quoque editione typis vulgandos, non video quis mihi locus supersit operam meam in hanc rem utiliter collocandi, post eum, qui his ipsis Authoribus illustrandis jam multis abhinc annis insudavit, nisi plane velim actum agere. Satiùs igitur erit animum ad alia convertere. Tu vero occasionem, quam tibi divinitus oblatam esse censeo, Regnam auctoritate tua impellendi ad edendum Nummorum suorum Thesaurum nequicquam sine fructu elabi sine. Eas nunc ad te partes delatas esse satis vides, operamque adeo eruditus omnibus utilem ut egregie praestiturus sis nullus dubito. De Reginae inopinato isthuc adventu multi multa dicunt, majoraque latere arbitrantur, quam quae ad privatas ipsius rationes pertineant. Ego certe non parum commodi ex eo mihi auguror, quod quamdiu Regina apud vos commorabitur, frequentiores ac longiores abs te literas postulare jure posse mihi videor. Ac mihi sane rem gratissimam feceris, si quantum commode abs te fieri poterit, omnia quae hominem Reginae res cognoscendi cupidum scire intersit, ad me diligenter scribes. literas, si opportunum videbitur, *Macchiato* ipsi trades, ut ad me in Reginae fasciculo mittendas curet. Vale, & me, ut facis, ama. Castro Gandulsi, ubi apud Pontificem rusticamur. Idib. Majis MDIOCLXVI.

EPISTOLA CCCCXLVIII.

NIC. HEINSIUS

Oët. Falconerio.

Romam.

Fator, Falconeri eximie, toto hoc biennio non defuisse quod agerem. Quamquam enim res Britannicae satis superque negotiorum exhibuisse mihi poterant, in iis tamen multo minus desudavi, quam in Suecicis. Sueci quippe, etsi foederati nobis, tamen fortunam potius, quam nos secuti, in eo jam dudum sunt, dum arma nostra parum auspicato procedunt, ut Britannis sese adjungant. Unde illos revocare, & ad saniora convertere non nobis tantum, sed Gallicanis quoque Oratoribus difficillimum haecenus fuit. Danorum Regi maximum minabantur malum, quod ille nostras partes esset amplexus. Sed cum illis Mosci armata immineant manu, in hac, opinor, palestra invenient, cum quo exerceantur. Quamquam & injuria contumeliaque non una a Britannis adfectos jam quodammodo poenitere coepit consiliorum adversum nos agitatorum, cum aliquando agnoscant, ab iniqua & superba gente non sibi minus imminere periculum, quam nobis, si victores evadant. Sed in hac qualicunque occupationum publicarum congerie cave credas non vacasse mihi de te cogitare, quem in oculis tantum non assiduum fero. Ne studia quidem bonarum artium ex toto intermisi, proximis diebus festis inter res aulicas prolatas recensendo Prudentio concessis, quem laborem ut sibi darem *Episcopus Paderbornensis* non semel a me postularat: Perduxi animadversiones nostras usque ad libros adversus Symmachum conscriptos, qui fere soli castigandi supersunt. Codicibus pervetustis tribus quatuorve sum usus, sed partem maximam mutilatis. Paucorum dierum otio est opus, ut supremam manum huic lucubrationi, satis perfunctoriae, imponam. Poëmata mea vix tandem nunc lucem, ni fallor, vident, certe propediem videbunt. Misit enim paginas libri omnes typis jam descriptas ad me *Elzevirius*, praeter illas, quae titulum operis & praefationem complectuntur, ut nihil typographos morari possit. Nec in me mora fuit, sed in illis, quibus curam editionis demandam, per occupationes domesticas alio interdum advocatis. *Elzevirio* in mandatis jam nunc a me datur, ut libelli specimen nonnullum cum hisce ad te mittat. In Belgio prodire nuper praeter quatuor Euangelia vetusto sermone Gothico conscripta, praeterque *Alberti Rubenii* postumum de Re Vestitaria commentarium, *Isaaci Vossii* de incremento Nili opus. Praelo typographico etiam permisit noster *Gronovius* eruditas admodum *Palmerii Grentemesnilii* in Graecos scriptores animadversiones. *Schefferus*, post editum nuper admodum de Upsalia veteri commentarium, *Phaedri* fabellas observatis suis illustratas secundae parat editioni. Atque haec haecenus. *Christinam Alexandram* Hamburgi propediem exspectari fert rumor, inde ad nos venturam. Si illa pervetustos Maronis Codices, quos possidet complures, secum feret, uti erat pollicita, a

Tom. V.

T t t

me

me pervolvendos, pertexam tandem aliquando, quae ad illum scriptorem haud pauca observavi. Utinam hac occasione tam opportuna usus *Nardinii* Romam, & si quid praeterea apud vos operum hujuscemodi prodiit, per quemcumque ex familiaribus comitibusque ejus ad nos misisses, quae alioquin fero huc perventura sunt, hoc tam turbato temporum statu. Vale, jucundissime Falconeri, & mihi fave, ut haecenus. Holmiae Suecorum MDCLXVI. a. d. III. Quintil. Gregor. *Elzevirius* Hesiodum cum notis *Grævi* publico mox dabit. Inde curas convertet ad Homerum & vetustum ejus Scholiastem, quem *Didymum* vulgo volunt. Sed cum optet nonnulla subministrari sibi Scholia ex vetustis membranis, quae lucem haecenus non videre, vide quaeso, an laudabili ejus instituto prodesse possis, quod negotium *Dato* etiam nostro verbis feriis commendavi. Rogatus est per me *Elzevirius*, ut cum *Claudiani* nostri, tum poematum exemplaria bina ad *Bigottum* deferri curet quamprimum, quae per illum ad te ac *Datum* nostrum in Italiam confestim itinere terrestri mittantur, quando mari id haudquaquam tutum aut consultum est. *Arriani* *Tactica* vellem ad te dare, si possem. Librum illum nec dum constat mihi aut in Gallias aut in Bataviam perlatum esse. Nescio enim ubi oberrant exemplaria jam ante menses vices nos illuc missa.

EPISTOLA CCCCXLIX.

NIC. HEINSIUS

OEt. Falconerio.

Romam.

Postremis tuis, Falconeri Nobilissime ac humanissime, rescripsi non ita nuper. Quam meam epistolam ad *Datum* nostrum gnauiter ab *Elzevirio* curatam, ac proinde tibi redditam confido. Nunc id tantum monebo, missa esse Lutetiam complura Poematum meorum exemplaria, curante eodem *Elzevirio*, inter amicos illic ac litterarum amantes viros, mei que nominis studiosos, dividenda per *Emericum Bigottum*, aut potius, quia ille praeter expectationem nostram ab urbe est digressus, per *Johannem Capelanum*, quem *Bigotio* non minus rebus tuis favere compertum mihi est quodammodo atque exploratum. Rogavi jam hunc ipsum *Capelanum*, ut occasionem opportunam indagaret, qua destinatum tibi exemplar, una cum altero, quod Eminentissimo *Barberino* oblatum volui, ad te per viarum compendia tuto & sine procrastinatione ulla, aut certe minima, perferri posset. Si cunctatur paululum *Capelanus*, est enim illi res, ut nosti, cum valetudine parum prospera, rogo ne graveris ipse viam circumspicere, qua liber iste quam celerrime, quia id in votis tibi esse tuis adverte, Romam perveniat. Totidem exemplaria Florentiam ut curseti, idem *Capelanus* per me est rogatus, quorum alterum Serenissimo Principi *Leopoldo* ab Etruria tradatur, alterum Clarissimo *Dato*. Habet & in mandatis a me *Elzevirius*, ut hanc in rem duo *Claudiani* mei exemplaria huic ipsi *Capelano* tradenda curet, quorum alterum tibi, alterum eidem *Dato* cum.

cum Poëmatibus mittatur. Sed metuo, ne in nimiam molem fasciculi exerescant, si Claudianus accedat, qui per se volumen satis copiosum efficit. Quicquid est, vobis ac *Capelano* incumbet, vestris desideriis hinc invigilare. Nam, quin jam nunc, dum hasce exaramus, exemplaria Lutetiam, quae dixi, devenierint, vix videtur dubitandum: Mari foederatos Belgas ac Italos inter iter ac commercium omne, ut vides, occlusum abruptumque est bello hoc nefario, quod nobis ex Britannia intentatur. Sine quo esset, jam maritimo itinere Liburnum recta curassem perferenda cum haec ipsa exemplaria, de quibus modo agebam, tum alia utriusque libri complura, quae viris apud vos bene de me meritis jure optimo debentur. Nunc apud illos, uti confido, temporum ac viarum difficultas pro me intercedet, ac legitimae excusationis locum obtinebit qualemcumque. Auguror annum proximum pacem nobis esse relaturum & daturum molliora ac Musis magis amica tempora. Quibus plane invitis inter atrocissimam bellorum procellam graviter jactati ista conscripsimus, certe sub luminis oras prodire passus sumus: cum absque hoc incommodo tumultuaria vita, aulica & publicarum occupationum tempestas a studiis publicis abunde alienum effecisse me potuerit. Et haec quidem haecenus. Accepi proximis diebus varios hinc inde libros, recenter in lucem emissos: quos inter *Hevelium* de cometa Anni MDCLXV. Statium cum commentariis *Barthii*, *Catonis* Disticha cum notis ac observationibus *Daumii*, *Sallustium Gronovii*, *Rubenii* de re vestiaria, deque nummis ac gemmis variis commentarios postumos, tum Gallica nonnulla rem publicam & aulicam magis, quam litteras humaniores tangentia. Accepi & a *Reinesio* in Petronii fragmentum Dalmaticum annotata, quibus *Schefferianae* notas subjunxit. Accepi a *Francisco Junio*, *Isaaci Vossii* avunculo, quatuor euangelia antiquae versionis cum Gothicae tum Anglo Saxonicae. *Schefferus* ipse *Phaedri* fabellas praelo typographico rursus permisit cum observatis auctoribus, post editam Upsaliam veterem, jamque totus est in recensendis iis, quae super Re. Navali veterum commentatus est. Si quid viro optimo credimus, opus editionis primae vix umbram ejus, quod nunc molitur, expressit. Vossianos de incremento Nili commentarios nec dum vidi. Vale, jucundissime Falconeri. Holmiae Suecorum CIOIOCLXVI. a. d. XXIV. Sextil. Gregor.

EPISTOLA CCCCL.

OCT. FALCONERIUS

Nic. Heinsio.

Holmiam.

VIX credas V. Cl. quam jucundae mihi fuerint posteriores literae tuae, quas ante paucos dies a *Dato* nostro accepi: jam diu enim, multumque earum expectatione tenebar, quod & de te rebusque tuis certiores fieri cum alias semper mihi gratissimum, tum vero maxime hoc temporis, cum abs te procurandis Reipublicae vestrae negociis, si unquam alias, ut opinor, occu-

pato gravioribus ac certe insignioribus frui mihi videor amoris tui testimonio. Quid jam de exemplo dicam amantissimae, ne humanissimae, quod parum est, dicam illius epistolae tuae, in qua amicitiae nostrae historiam publice extare voluisti? Quid de cultissimis, atque elegantissimis carminibus ad *Montauzerium*, quarum lectione, ne quid suavissimis hisce literis tuis deesset ad cumulum deliciarum, beare me profecto voluisti. Ego vero pro singulari ista tua erga me humanitate ago tibi, habeoque gratias quam maximas, ac si quid unquam moliar in literis, quod publica luce haud indignum censuerim, curabo ut in hac quoque parte observantiae erga te meae satisfiat. Claudianum tuum vehementer, ut omnia, quae a te proficiscuntur, expecto, sed interim de illo ne verbum quidem a *Bigotio* nostro, cujus etiam literas jam diu desidero. *Pachymeris* historiam non dubito quin *Reginae Medicus* jam tibi reddiderit, aut saltem ad te perferendam curaverit, si diutius ipsi *Hamburgi* commorandum fuit, ut vulgo ferebant. Misissem ad te eadem occasione, quod in primis cupere videris, *Nardinii* Romam, librumque nuper editum, in quo selectae marmoreae tabulae, dimidiae, ut appellant, eminentiae, e variis antiquorum monumentorum cimeliis collectae, graphice excusae sunt, adjunctis explanationibus unius ex nostris Antiquariis, haud sane ineruditi, opera, sed vix obtinere potui ab eo, cui in ipso *Reginae* comitatu expeditis itineribus maturandum erat, ut *Pachymerim*, quod haud ita sane modicum volumen est, se allaturum reciperet, quem ego librum omnibus praeferendum esse duxi, cum ob ejus praestantiam, tum vero ejus causa, a quo mittebatur. Caeterum quoniam in *Pachymeri* sumus, scias jam partis alterius ejus *Historiae* versionem a *Possino* coeptam, in qua, ut ab ipso audio, plus fortasse, quam in prima, haud minus certe, insudandum erit. Index nummorum, quem a *Gottifredo* ad praedium me adjuvante comparari ad te alias scripsi, jam ferme in promptu est, sed deterret me *Typographorum* nostrorum inscitia, ac plane socordia, quibus nulla nisi in forensibus libris lucri spes. Verum huic incommodo medendo opportune accidet, quod amici *Parisienses* nunciant, *Petri Segui* proximo autumnio Romam adventus, qui pro ea, qua est in *Gottifredum* benevolentia, ac studio in rem nummariam singulari, facile id negotii in se recipiet, ut de hujus libri editione cum *Typographo* quopiam *Parisiensi* transigat. *Benedictus Millinus*, quem tu fortasse nosti, vir doctus, atque eruditus, qui in *Anastasio* Bibliothecario multum curarum collocavit, dissertationem quamprimum se editurum pollicetur, in qua vitas Pontificum, aut majorem certe ejus operis partem perperam *Anastasio* tribui contendit. *Allatius* in recensendis Nili epistolis quotidie versatur, quas brevi in lucem daturus est *Eminentissimi Card. Barberini* beneficio. *Holstenii* Notae ad Geographiam sacram *Caroli a S. Paulo, Cluverium & Ortelium* jam prodierunt, quibus accesserunt etiam dissertationes duae de Ministro & forma confirmationis apud Graecos. De *Homeri* editione, quam ab *Elzevirii* comparari scribis, jam a *Dato* nostro fueram admonitus, atque etiam interpellatus, ut si quid ad illam ornandam e *Vaticana Bibliotheca* posset accedere, mea opera procurarem, qua de tota re jam tum statim cum

cum *Allatio* egi; sed quo minus negotium ulterius promoverem impedimento fuerunt aestivae feriae; quae cum intra paucos dies cessaturae sint, de Homericis Interpretibus, quorum nonnullos inter Vaticanos codices reperiri audio, *Allatio* rursus aures vellam. Heri recentibus Amstelodamensibus literis atrox nuncius vulgabatur de incensis a Classe Britannica ad CL. vestris onerariis navibus in portu nescio quo, quae plaga supra bis millies HS. aestimabatur, quae si vera sunt, ego vehementer tui causa doleo, vereor enim ne majora etiam detrimenta a Britannis, impetu victoriae elatis, Reipublicae vestrae afferantur. Tu vero, ut haec evasura sint, vale, & me, ut te facere satis video, impense ama. Roma Idibus Septemb. MDCLXVI.

EPISTOLA CCCCLI.

NIC. HEINSIIUS

*Oct. Falconerio.**Romam.*

UT quod res est, dicam ingenue, mutuis officiis certare tecum praecipuae mihi sit voluptati, si res sic ferat, adeo numquam deest in tuis litteris, Falconeri jucundissime, quod me oblectet simul & erudiat. Sed neque tu tam severus es beneficiorum exactor, ut graveris continuam in hac palaestra palmam, & ego scio illic terrarum me positum, ubi scientiarum nomen, si alibi gentium, negligitur & friget. Nec tu alios fortassis ex septentrione nuntios a me expectes, praeter hos, qui narrent, nihil hinc, quod scientiis promovendis conducatur atque ornandis, agi. Adest in hac civitate nunc nobis *Johannes Schefferus*, qui litteras humaniores & jus publicum apud Upsalios profectur. Is Phaedri fabellas curis secundis illustratas propediem prodet in lucem. Mox de re navali veterum commentarios longe auctiores atque elimatiores dabit. Sed deest per hosce tractus bibliopola, qui typis paullo concinnioribus opus eruditum curet describendum ac publici faciendum juris, ut foris illi circumspicienda sit rei hujusce oportunitas, quam domi nusquam inveniet. *Brunnerus*, qui Moerin Atticistam nobis debet promissi reus, & calculo graviter laborat & supremum in Academia patria gerit magistratum, ut hoc quidem temporis curae privatae vix vacare possit. *Schefferi* Mauricius & *Arrianus* jam ad te pervenissent munus a me, si obtulisset se via, per quam mitterentur. Nec deero officio, si aut Regina ipsa, aut nonnemo ex comitatu ejus sub hybernam tempestatem huc excurrat, cui tuto fasciculus ad te peferendus committi possit. Ita quidem speravit ipsa, sed nescio quid difficilius rei intervenit nuper, quod propositi illius impetum in medio cursu interruptit quodammodo ac sufflaminavit. Ultimis certe litteris princeps Augusta prorsus ignorare me voluit, quid de adventu suo promitti nobis fas esset. Excurram fortassis ipse Hamburgum ante aestatem proximam, si pedem hinc a me moveri permittent foederatorum Belgarum Patres conscripti, qui votis ac precibus meis hactenus hinc pertinacius obnituntur. Interim amicos, quos Hamburgi complu-

res habeo, adhortabor, ut cum Medico Reginae agant de Pachymeris historia, eamque arreptis occasionibus tempestive huc perferendam curent. Ardeo enim desiderio libri illius conspiciendi. Idque eo magis, quod opinor munificentiae ac benignitatis Barberinae argumentum hunc scriptorem bibliothecae meae ab Eminentissimo Principe destinatum esse. Diu est, quod poematum meorum exemplaria complura in unum fascem coniecta, Lutetiam perlata oportuit, inter quae duo ad te curanda per *Bigotium*, aut quia is ab urbe abesse pergit, per *Capelanum*, quorum alterum vindicares tibi ipsi, alterum Eminentissimo *Barberino* a me dares. Sed quod in Artesia sarcinas istas detineri sit rumor, ob contagii metum lue pestifera Flandros ac Brabandos fines infestante, tardius haud dubie libelli, quam velim, ad vos perferentur. Interim habes hîc breve epistolum nulla facundia instructum, sed plane subitaneum, quo & muneris paupertatem excusare, & cultum meum longe impensissimum magno Principi insinuare sum aggressus. Nec de successu desperandum est, si tu infantiae meae solitis & toties mihi jam perspectis studiis subvenire dignaberis, tuaeque auctoritatis praesidio hunc hominem sedulus fovebis. Caeterum quia scribis, meam ad ducem *Montozerium* Elegiam haudquaquam tibi displicuisse, quae operis initium facit, reliqua quoque non prorsus abs te damnanda fore aut rejicienda spes aliquanta suboritur. Claudianum eadem via ad vos perventurum sperabam, sed quia moles voluminis detertere latores potest, & alias praeter hanc ab *Elzevirio* difficultates moveri video, nihil hîc pro certo polliceri datur. Adeo vix quicquam mari securum finit esse aut tutum Britannus hostis, etiam portibus ac stationibus navium quandoque apud nos infestus & gravis. Cujus factum barbarum, quod in postremis tuis designas, ultus est ac vindicavit pro nobis Deus nuper admodum exusta fere universa civitate Londinensi, eamque in rem lusi paucis hisce versibus, quos una cum hisce litteris a *Dato* nostro, ut opinor, accipies. Epigramma ipsum pro bono ac concinno absit, ut ipse venditem: & tamen dubito, an meliora hinc terrarum tibi expectanda sint: vides quam superbum ac arrogantem me barbaries haec nostra reddat. Amicos omnes jubeo salvere, te autem agere feliciter aetatem. Vale, vir Eximie, & mihi, ut hactenus, perge bene velle. Litteris & properatae scriptioni ut benigniter ignoscas etiam atque etiam mihi es rogandus. Exarabantur Holmiae Suecorum a. d. xxv. Octobris Gregor.

P. S. Has exarabam, cum audio propediem Hamburgo nobis adfuturum esse *Adamium*, Cardinalis *Azzolini* ex sorore nepotem, missum a Regina. per quem cum copiam mihi fore faciendam augurer Historiae Pachymeris, distuli promissam ad Eminentissimum *Barberinum* scriptionem, dum liber ipse compareat. Et sane opinor melius me consulturum esse mihimet ipsi, si via Parisiensi una cum poematum meorum libello epistola Romam mittatur.

EPISTOLA CCCCLII.

OCT. FALCONERIUS

*Nic. Heinsio.**Holmiani.*

Mihi sane gratæ sunt, eruntque semper literæ tuæ, illæ vero etiam suaves fuerunt, quas recens a *Dato* nostro accepi a. d. xxv. Octob. datas, ex quibus cognovi esse tandem aliquid, in quo tibi placere, amoremque erga te meum testari possim, quodventunitatis meae rationibus accommodatum sit. Vix enim aliud officii genus a me proficisci posse video, quo tu delecteris magis, quam si te de iis, quæ Romæ in re literaria sunt, certiores faciam. Praestabo verò id diligenter, quantum potero, curaboque ne quicquam te lateat, quod eruditione tua dignum sit. Doleo interim haud modice mihi in Pachymere ad te mittendo parum adeo feliciter successisse, sive id casu, sive negligentia Medici Reginae, quem tamen modis omnibus rogavi, ut librum ad te quam citissime perferendum curaret. Verum an non tu suaviter nugaris, qui me a te nihil expectare jubes in iis literis, in quibus tam praeclara de eruditorum apud vos virorum studiis narras, quodque deliciarum omnium cumulus est, me elegantissimo illo tuo Epigrammate de Incendio Londinensi beas? Tu vero ne indonatus a me omnino abeas, optimo dierum, hoc est Kalendas ipsis Januariis, accipe strenarum loco, bina hîc Epigrammata Graeca, quæ e Bâsi haud ita pridem circa Thermas Trajani effossa ipse descripsi atque notis etiam illustravi, quas cum annotationibus ad Inscriptiones nonnullas Athleticas adhuc ineditas brevi, si per ocium licebit, vulgabo.¹ Mihi vero in secundo Epigrammate non parum negotii facit illud ² εὐχησον, quod huic loco minime quadrat, ut tu quoque animadvertendo cognosces, si ea notatione accipiatur, qua vulgo solet accipi: verba enim, ni fallor, Nicomedis hæc sunt Aesculapium rogantis, ut signi a se dedicati donum libenti animo suscipiat, acceptum gratumque habeat, qua significatione verbum εὐχεσθαι a Graecis scriptoribus usurpatum nullibi comperio. Sed de hoc pluribus suo loco. De Homeri editione jam non semel Cl. *Allatium* consului, a quo hæc didici, nullos in Vaticana Bibliotheca reperiri veteres Scholiastas; qui Homerum, ut Didymus utque Eustathius, perpetuis commentariis illustrarint. Esse equidem nonnulla Tzetzis Joannis, si bene memini, versus nempe, ut recentiores Graeci appellant, Politicos, quibus versibus agit de iis, quæ Bellum Trojanum præcefferunt aut consecuta sunt. Isaaci Porphyrogenetae Descrip-

¹ Ipsa epigrammata, quæ sequebantur, hîc exhibere minime necessarium visum, quia legi possunt cum doctissimis ad ea notis post Inscriptiones Athleticas pag. 127. & seq.

² in edito non occurrit id verbum, nec in notis de eo aliquid monetur. & pro οὐκ εὐχέσθω δὲ δόν, legitur οὐκ εὐχέσθω δὲ δόν, εὐχέσθω δὲ δόν. Ita enim post hanc epistolam scriptam Falconerius meliora se doctum scribit Epistol. seq.

scriptiones Heroum Homericorum *Allatii* ipsius opera editae sunt, ut nosti. Superesse tamen ejusdem Authoris nonnulla de eodem argumento, quae lucem non viderunt. Caeterum in diversis, quos habet Vaticana Bibliotheca, Homeri codicibus, multa sparsim adnotata legi Scholia, quae sintne luce digna, nec ne se profecto nescire. Haec mihi *Allatius*, vestrum nunc erit dijudicare, num haec ad editionem, quam paratis, faciant. *Petrum Seguinum* propediem, avide vero, quantum ipse conicere potes, expecto, quocumviro eruditissimo, tuoque, ut ex ejus libro cognovi, non vulgari amico, non dubito quin saepius de te rebusque tuis mentionem faciendi occasio sese oblatura sit. Commodum vero ille aderit promovendae editioni indicis nummorum *Gottifrediani*, de quo alias ad te scripsi: vix enim ulla est spes, nisi ille ejus operis edendi negotium suscipiat, reperiri posse aliquem e nostris Typographis, qui suis sumptibus librum id genus imprimere audeat. Nili Epistolae jam sub praelo sunt, brevique prodibunt, etiam libri sex reliqui *Pachymeris*; iis enim vertendis *Possinus* strenue incumbit, De Poëmatum tuorum exemplis quamprimum mihi curandis scripsit nuper ad me *Bigotius* noster, sed poëmata ipsa adhuc non video. Cl. *Schefferi* observationes ad fragmentum *Petronianum* *Reginam* Cardinali *Azzolino* misisse audio. Postremo, quod tu facis, vicissim a te peto, ut de literis & properata scriptione mihi ignoscas, vix enim his diebus tantillum temporis ab occupationibus superfuit, quo raptim haec ad te scriberem. Vale, & me tui amantissimum amare perge. Roma Kalend. Januar. ciciöclxvii.

EPISTOLA CCCCLIII.

OCT. FALCONERIUS

Nic. Heinso.

Hagam.

REdeunti mihi e Germania, quo, ut nosti, a felici recordationis *Alexandro* viii. Pont. Max. missus fueram ad Cardinalatus insignia deferenda Cardinalibus *Salisburgensi* ac *Spinulae*, redditae sunt Florentiae a *Dato* nostro literae tuae a. d. vi. Aprilis datae, quibus sane quod tardius, quam par erat, rescripserim, facile me abs te veniam impetraturum spero; nam audito nuncio de Pontificis Maximi obitu, bonis omnibus luctuoso, mihi vero etiam peracerbo, tibi satis persuasum erit, me tum maerore confectum ob amissam unicum optimo Principe spem omnem dignitatis meae, tum vero etiam occupationibus distractum, a quibus vix fieri poterat, ut in tanta rerum mutatione me explicarem, scribendis literis imparem fuisse. *Alexandri* vii. Pont. Max. funus alterum excepit Reipublicae ac literis sane luctuosissimum *Sfortiae Pallavicini* Cardinalis, quocum ego, clarissimo aetatis nostrae viro, arctissimo amicitiae vinculo conjunctus fueram; ut inde possis conicere, quanta mihi ad recentem luctum doloris atque aegritudinis accessio facta fuerit: sentio enim quam magna mihi rebusque meis plaga inflicta sit; sed ferenda haec modice, ut omnia humana sunt, mihiq; ad litteras, tanquam ad portum, in ista per-
tur-

turbatione confugiendum: quamvis & ipsum studium literarum salubre minus futurum mihi video ob necessitatem vulneris refricandi, ubi animum recordatio habeat, quantum in literis quoque praesidii amiserim doctissimi ac sapientissimi Cardinalis morte. At de his quidem satis, de quibus aliquanto prolixius ad te scripsi, non tam ut dolori meo indulgerem, quam ut tibi persuaderem, non vulgares profecto causas fuisse, quae me a rescribendo tuis literis integrum fere mensem distinuerint. Redco nunc ad illas ipsas tuas literas, ac primum maximas tibi gratias ago, habeoque, quod communicatis *Ferdinando* Episcopo Paderbornensi literis meis, licet inelegantibus, ac nequaquam tam diserto lectore dignis, memoriam mei excitaveris in optimo atque humanissimo Principe, cujus virtutem atque eruditionem semper unice colui; mihi vero rem gratissimam facies, si opportune illum de mea erga ipsum observantia, ac, si fas est ita loqui, etiam amore certum feceris. Epigrammata illa Graeca tibi placuisse summopere gaudeo, nec est jam, cur aut tu, aut Cl. *Langermannus* ingenium torqueatis in difficili illo, ut tunc videbatur, loco explicando, εὐχῆσον ἢ δόσιν: recenti quippe marmoris hujus inspectione haud dubie cognovi, quod antea non deprehenderam, legendum ibi esse εὐχῆς ὀλίγην δόσιν, unde si minus facilis, haud incommodus certe sensus elici possit. Haec ipsa Epigrammata a me explicata ac notis illustrata una cum insignibus aliis Inscriptionibus Athleticis jam praelum subiissent, si per Typographum liceret, a quo in excudendis Nili Epistolis, quarum editioni *Leo Allatius* incumbit, occupato vix maximo conatu impetrare potui, ut dissertatiunculam illam meam de Apamensi Nummo vel meis sumptibus excuderet. Neque alii (pudet dicere) Romae sunt Typographi, apud quos typos Graecos invenias ea majorum characterum copia, ut, quod in hoc genus libris frequenter usuvenit, nummorum aut lapidum Inscriptiones exprimi possint. Caeterum recentes quidem literas a *Capellano* superioribus diebus accepi, exemplum vero poematum tuorum neque ad me pervenit unquam, neque quid de eo factum sit scio. Tu vero, si me amas, modis omnibus curato, ut voti tandem aliquando compos fiam; jam ferme enim annus est, ex quo optatissimi libri legendi expectatione torqueor. De Comitiorum exitu si quicquam augurari libet, meo & omnium ferme judicio inter eos qui currunt, *Ruspigliosus* is erit, qui brabiolum accipiet. De tuo in patriam reditu tibi ex animo gratulor, sed ut de re mihi alioquin optatissima parum solide gaudeam, facit, quod a nescio quo audiivi te Suecicae illi tuae legationi obnoxium adhuc esse. Quae si vera sunt, quid tandem spei superest, te Bataviae tuae restitutum serio literis, ut facis, illustrandis vacaturum: fac igitur ut a te ipso, quid hac de re statuendum mihi sit, quamprimum sciam, meque interim tui amantissimum invicem amare perge. Vale. Roma iv. Id. Jun. cīccīōLxvii.

EPISTOLA CCCCLIV.

OCT. FALCONERIUS

Nic. Heinsio.

Hagam.

JUcundissimae, si quae aliae fuerunt, mihi posteriores litterae tuae a. d. 11. Non. Sextil. datae, quas de more mihi curavit, vir utriusque nostrum amicissimus, *Carolus Datus*. Ex iis namque cognovi, quod usque adhuc ignoraveram, delatam ad te tandem Dissertationem meam de Nummo Apamensi, quam in meo ab Urbe discessu, occasione itineris Germanici, fasciculo alligatam ad te miseram, neque in iis angustiis temporis, quod brevissimum mihi datum fuerat ad me itineri comparandum, spatium utique fuit illam, ut debueram, literis prosequendi, quod aequi bonique consulas velim. Venio nunc ad ea, quae ipse in iis literis scribis, ac primum, plurimum me tibi debere sentio V. Cl. quod Dissertatiunculam illam dignam putaveris, quae te conciliante Doctissimorum virorum manibus teratur, quorum ego iudicium vereri potius debueram, quam laudem expectare, ac ne quidem sperare. Erit vero cur vel hoc ipso nomine tibi amplius debeam, si illos de eo certiores facias, quod vellem ex ipsa Dissertatione mea intellexissent, me circa *Noë* nomen ex Nummo illo Apamensi ita differuisse, ut ea dicerem, non quae vera putarem ipse, aut ab aliis existimari vellem, sed quae verisimilia magis, aut certe a vero minus aliena videntur. Nam quae objici possent, multa sane novi: sed in re obscura, ac difficultatis plena quidvis aliud volui, quam nihil omnino dicere. Illud etiam ultro ingenue fateor, me, si mihi eorum vices subeundae sint, vix unquam mihi persuasurum, hoc nomen in Nummo verbis reperiri posse, cum tamen nihil certius, quam tres illas literas N, Ω, E, in arcae fronte extare, alias praeterea nullas, quas si de NΩE minime accipiendas esse duxerint viri, quos nominas, doctissimi sane atque eruditissimi, libenter ab iis meliora ac certiora discam. Ego in Dissertatione illa conjecturam, aut suspicionem potius meam, non opinionem aperire profectus sum. *ἡ τὰντα μὲν δὴ τὰντα*. Quod de tuo in Sueciam reditu scribis, mihi sane permolestum est; Jam enim spes longas inchoaveram, te a munere pleno curarum ac laboris expeditum omnino fore. Jamque mihi saliva moveri coeperat, non modo de Prudentio tuo, quo, ut video, propediem eruditis fruendum erit, sed de Virgilio atque aliis ingenii tui foetibus, quibus nemo te fecundior. Quin & paraveram indiculum librorum, qui cum hinc rarissime appareant, vix a me alia opē, quam diligentia tua conquiri possint. Sed ut ut discessurus sis, non antea spero profectum adornabis, quam Hagam pervenerit *Paulus* frater meus, qui una cum *Laurentio Magalotto* Patricio Florentino, summi ingenii juvене, bonis artibus, Philosophia praesertim, ac Mathematicis imprimis exculso, peregrinationem per Europam suscepit, neque multum, postquam hac nostrae tibi redditae fuerint, a Batavia vestra abesse poterit; nam ad vos Vienna brevi
cur

cursum directurum posterioribus literis nunciabat. Utrique vero in iis cognoscendis, quae isthic scitu aut visu digna sunt, quae sunt profecto plurima, non parum opis, ac praesidii erit ab humanitate tua, quam freno potius, quam calcaribus egere certe scio. De Poëmatibus tuis brevi accipiendis nova spes mihi affulsit a *Bigotii* nostri recentibus literis, quibus expectare se propediem nescio quid librorum ab *Elzevirio* narrat, quos inter exempla illa tuorum Poëmatum extare nullus dubito. Illud vero quod ad Cardinalem *Barberinum* ante aliquot menses miseras, missumque ad me fuerat a Serenissimo Principe *Leopoldo ab Etruria*, redditum a me Cardinali statim est una cum epistola, quae libro ipsi erat alligata. Inscriptionibus Graecis, quarum desiderio magnopere teneris, ad praelum comparandis in praesentia incumbo, quae si minus hîc, Lutetiae certe accurante viro doctissimo atque amicissimo *Petro Seguino*, brevi prodibunt. Caeterum sancitam inter Rempublicam vestram, ac Brittanos pacem tibi ex animo gratulor, ac mea etiam causa vehementer gaudeo; maritimo enim commercio restaurato optimorum librorum copia erit a vestris Typographis, quos libros jam diu frustra desideravimus. Utinam esset quod reponere possent nostri Romani, a quorum praelis praeter Nili Epistolas, quarum editionem curat *Allatius*, Eminentissimi Cardinalis *Barberini* munificentia, nil est, quod ut nunc expectari possit. De *Clemente* IX. Pont. Max. credo jure literis ac bonis artibus gratularis; a Principe enim in primis munifico, atque animi tanto fastigio haud imparis omnia polliceri sibi possunt, qui florent genere aliquo laudis. Sed praeterquam quod ille in nostris hisce studiis non ita est versatus; ut ingentem illis apud eum gratiam futuram augurari liceat, vereor utique, ne tamdiu superstes sit, quamdiu & e republica esset, & nos impense optamus. Sed haec Θεῶν ἐν γένεσι κῆται. Vale, Heinssi nobilissime, & me tantum ama, quantum te a me amari tibi persuadeas velim. Roma. VI. Id. Septemb. CIOIOCLXVII.

EPISTOLA CCCCLV.

OCT. FALCONERIUS

Nic. Heinssio.

Hagam.

Mitto ad te una cum his literis librorum indicem, de quo superioribus ad te scripseram. Eorum acquirendorum spem omnem ego in humanitate, ac diligentia tua collocavi: nam eorum complures, nec Bibliopolis nostris unquam visi, nedum apud ipsos venales habeantur. Pecuniam, qua ipsis comparandis opus erit, iidem a me curabunt Florentini negotiatores, a quibus nostrae hae tibi reddentur. Utinam bonis libris ita nos hîc abundaremus, ut a me vel in hoc saltem reponi aliquid contra posset pro iis, quae beneficio tuo me consecuturum spero. Caeterum quos ex iis, quos in indice notavi, libros reperire contigerit, apud te serves rogo, donec frater meus isthuc venerit: nam ipse eos ad nos mittendi negotium suscipiet. Nudius tertius a *Spanhemio*

VVV 2

nostro

nostro literas accepi Bredae datas, quibus postridie se Heidelbergham versus iter suscepturum nunciabat, tum vero *Gudium* de itinere Italico iterum cogitare. Nollem de Suecico tuo mentionem injecisset: nam id sane mihi permolestum: sed quando nihil non faciendum Reipublicae causa, nil nobis superest, quam vel hinc faustum tibi iter adprecari. teque, ut tibi persuadeas rogare, te, ubicumque terrarum sis, impense a me amari & coli. Vale igitur, & me vicissim ama. Roma VII. Kalend. Octobres CIOIOCLXVII.

EPISTOLA CCCCLVI.

OCT. FALCONERIUS

Nic. Heinso:

Hagam.

Suavissimas tuarum literarum eas mihi fore, quae sint longissimae, jam alias quidem ad te scripsi, nunc vero quid de iis dicam, quas a.d. xv. Octob. exaratas *Dato* nostro curante diebus superioribus accepi? In iis siquidem tuus in me amor passim elucet, quo te impulsus sentio, ut me diligenter adeo de iis, quae isthic in re literaria aguntur, certiolem faceres, quod quidem & mihi per se gratum erat, multo vero gratissimum, quod diu est, cum quid apud vos viri docti molirentur cognoscere avebam, quibus meam de Apamensi Nummo Dissertationem non displicuisse ita mihi persuadeo, ut te potissimum suffragante eorum favorem, si quem meruit, is liber adeptus sit. Quod tu innuis circa verbum ΝΩΕ, illud ex ΑΛΕΞΑΝΔΡΕΩΝ inversis vitio sculptoris literis fieri potuisse, ipse etiam observavi, si recte meministi, sed quo minus id verisimile videatur, ea obstant, quae ad ipsum locum animadverti. Mallem & alia multa monuisses, quae a te, acerrimi iudicii viro, ibidem corrigi potuisse non dubito. Jam enim de secunda ejus editione cogitandum mihi est, cum ipsam mantissae loco, meis ad veteres Inscriptiones notis addere decreverim, quae notas Lutetiam, ut ibi typis edantur, propediem mittam. Literas meas VII. Kalend. Octob. datas, tibi redditas esse gaudeo, id enim summopere cupiebam, ut tua ope eos libros, de quibus ad te scripsi, consequi possim. Eorum certe nonnulli ejusmodi sunt, ut non nisi per occasionem a viro rei literariae perito, ac in primis diligenti, qualem te esse novi, comparari possint. Utinam vero & posteriores nostras acceperis, quibus Indiculum librorum ad te misi, quos excerpti ex Catalogo Bibliothecae cujusdam, cujus auctio ad Kalend. Nov. apud vos fieri debebat. *Scheffero* eruditissimo quid nunc praestare possim ad opus, quod parat de re Vehiculiaria veterum, sane non habeo, sed omnia ille sibi in eam rem, quae a me proficisci poterunt, ut te sponse parata esse sciat, vehementer cupio. Cl. *Graevio* multum est jam quod debeo, cum, ut ex recentibus *Bigotii* literis audiui, dignum me existimarit, quem Hesiodo suo donatum velit. Ejus enim libri exemplum una cum Claudiano tuo Lugdunum misisse, ut ad me perferatur, *Bigotius* idem nunciabat. Homeri Apotheosin formis excusam ex marmore Columnensi, jam diu est cum *Bigotio* misi, qui.

qui eam a me *Graevii* nomine postulaverat. De *Homeri Scholiaste*, quem in Bibliotheca *Salviatorum* latitare ajunt, videbo diligenter; sed vereor ne quid perficere possim; cum difficillime hîc pateat ad hujusmodi Bibliothecas aditus dominorum inscitia, qui famam omnem Bibliothecis suis eo quaerunt, quod ad eas complures accessum postulent, consequatur nemo. *Graevium* vero eundem, ut certiorē facias rogo, me *Nardini* Romam, cujus desiderio teneri illum ex *Pauli* fratris literis cognovi, ipsi, cum primum per occasionem licebit, curaturum. *Bovini* libellus, quem ipse a me petiisti, raro admodum venalis hîc reperitur; sed omnia tentabo, ut desiderio tuo satisfaciam. *Latini Latinii* Epistolarum volumen alterum nuperrime in lucem editum, quod tibi gratum fore existimo, *Dato* nostro mittam, ut ad te perferendum curet. Nili Epistolae, de quibus alias ad te scripsi, nondum prodierunt. Ejusdem scriptoris opuscula nescio quae brevi se publici juris facturum pollicetur *Franciscus Maria Suare-sius*, Episcopus Vasionensis. Pachimeris Historiarum pars altera propediem sub praelo erit. *Paulum* fratrem ad vos minime adhuc pervenisse miror. Plura ille de mea erga te observantia, ne quid de amore dicam, nuntiabit. Tu iis nihil verius esse credito, meque interim impense, ut facis, ama. Roma a. d. x. Novemb. cccclxvii. Eram in his ipsis consignandis, cum alterae a te mihi perlatae sunt, ex quibus cognovi te & meas illas, de quibus eram sollicitus, accepisse, & te a librorum nonnullis, quos abs te petieram, coemendis immunitate pretii deterritum sapienter abstinuisse: in quo tibi plurimum etiam debeo: non enim mea interest libros, quibus aliquamdiu carere sine magno etiam incommodo possim, tanti emere. Ceteros, quos a te facilius neque iniquo admodum pretio comparari posse non diffidis, libenter expectabo. Librorum indiculum, quem postulas, raptim a me descriptum hîc habes.

EPISTOLA CCCCLVII.

OCT. FALCONERIUS

Nic. Heinsio.

Hagam.

JAM ab ipso quidem *Pauli* fratris in Bataviam vestram adventu cognoveram ex ejus literis, quanta tuis in me meritis facta esset accessio, Heinsi suavissime, ob eximia beneficia, quibus ipsum ac *Laurentium Magalottum*, virum amicissimum, dum isthic apud vos commorati sunt, adfatim cumulatōs novi. Neque sane commissem, ut significationes earum gratiarum tam diu desiderares, quas tibi ob singularem istam tuam erga me humanitatem habui jam tum, nunc vero ago quam maximas; nisi quod superioribus literis tuis acceperam de proximo tuo in Sueciam reditu, me in debito erga te officio persolvendo aliquanto segniores effecisset, quod crederem te in longo difficilique itinere consummando diu, ut erat verisimile, immorante, mihi vel serioribus literis tuum in Sueciam adventum praeventendi spatium futurum. Nunc vero quid dicam de suavissimis literis tuis, quas nudius tertius a *Dato*

nostro accepi a. d. xxvii. Febr. datas, quibus ex literis illud tandem statuen-
dum mihi esse cognovi nullum plane esse officii genus, in quo te a me aequa-
ri, nedum superari posse confidam, unumque mihi superesse, ut in te aman-
do observandoque nemini concedam. Ergone ad Prudentium ac Poëmata
tua, quibus me donatum paulo ante voluisti, tot optimos rarosque libros acce-
dere oportuit? Ego fane tibi pro tua hac in me liberalitate nihil est quod non
debeam; sed vide ne illa omnem mihi posthac viam intercludat petendi abs te
optimos rarissimosque libros, quos te accurante comparandi mihi spem fece-
ram. Impudens enim omnino sim, si eos isto pretio abs te elicere pergam,
cum praesertim vix ullam mihi fore occasionem sperare liceat tibi de libris,
qui hîc edantur, par referendi. Quamobrem si me opera tua uti vis in re,
qua nulla magis afficior hoc tempore, munificentiam istam tuam in me tantif-
per cohibe. Obligabis certe me vehementius, tibi que vel hoc ipso nomine
plurimum debebo. Epistolam tuam *Francisco Barberino* Cardinali statim red-
didi, eidemque spem feci de Prudentii exemplo, quantocius ipsi sistendo. Se-
renissimum namque Etruriae Principem mense Majo ineunte Florentiae ex-
pectari nunciant; quod ubi primum acciderit non dubito, quin libros a te
Moneliae traditos *Datus* statim ad me mittat. Novit enim quam magno Pru-
dentium ac Poëmata tua legendi desiderio ardeam. Epistolarum Nili exem-
plum, quod tibi Cardinalis *Barberinus* dono dat, *Dato* eidem misi, quo tutius
ad te peferatur una cum aliis libris, quos ille se propediem ad *Elzevirios* mis-
surum nunciabat. Eodem quoque fasciculo accipies volumen alterum Episto-
larum *Latini Latini*, ac bina Apotheoseos Homericae exempla, quod a me
munusculum accipias rogo. Erit fane illud, si cum tuis comparetur, tanquam
χάλκεια χρυσείων; sed veniam saltem meretur, qui praestat quod poterit. *Bovini*
libellum, cujus desiderio teneris, nusquam adhuc reperire potui. De *Roma*
Alexandri Donati rursus edenda fuit, cum cogitaret Typographus Romanus,
qui eam primum edidit; sed post vulgatam *Nardinii* Romam omnem ejus rei
cogitationem abjecit. *Martinus la Farina*, Siculus tibi fama saltem notus, nu-
per ex Hispania huc rediit, integrumque Orionis Etymologicum ex M. S.
Codice Bibliothecae Scorialensis secum attulisse narrat, quod se publici juris
facturum quamprimum pollicetur. Ego vero currentem incitare non desinam,
ut & tibi in eo morem geram. Memini enim Orionis hujus Etymologicum a
te olim vehementer desiderari. Vale, amicorum optime, ac suavissime & quod
nobis praecipue est in votis, te ab ista tua aerumnosissima legatione quantocius
expedi. Romae. Pridie Kalend. April. cicioclxviii.

1 Vitam hujus viri doctissimi, cujus supra jam semel iterumque mentio facta fuit, accurate
descripsit nuper Cl. *Mongitor*, in Bibliotheca Sicula, part. 11. pag. 53. ubi inter ejus libros, re-
censet Additiones ad librum quemdam Graece scriptum, ad vocabularii formam digestum,
qui Romae excudebatur, sed non absolutus fuit: quem hoc Orionis Etymologicum fuisse sus-
picari licet. De *Orionibus* vero variis, & *Oro* etiam *Alexandrino*, quos confundi supra jam
suspiciatus est *Falconerius*, Vid. Cl. *Fabric.* Biblioth. Graec. lib. v. cap. 7. pag. 67: & lib. v. cap. 40.
tom. x. pag. 42.

EPISTOLA CCCCLVIII.

OCT. FALCONERIUS

*Nic. Heinsio.**Holmiam.*

N ullum occupatiorem esse hominem, quam cui cum praelo res sit, ipse experientia, puto, didicisti: me vero mei libri editio maxime occupavit, tum aliis de causis, tum vero praecipue, quod cum is extra aliorum conditionem esset, qui apud nostros hosce Typographos excudi solent, colluctandum mihi fuit cum operarum imperitiâ, ac non tam in correctionem, quam in ea ipsa, quae Typographi erant, incumbendum. Haec prolixius ad te, ut silentium meum diuturnius illud quidem, quam & ego voluissem, & observantiae erga te meae officio convenire videbatur, in bonam partem accipias, quod ut pro tua humanitate facias te etiam atque etiam rogo. Caeterum ejus libri exemplum ut ad *Elzevirium* perferatur jam *Dato* nostro misi. Erit deinde *Elzevirio* curae, ut illud tibi quam primum reddatur. Libros, quos ab eo tuo beneficio accepturus sum, nondum accepi, aliosque etiam avide exspecto, quos ille tuo jussu a *Plumerio* mihi comparasse postremis literis suis nunciabat. Quid novi in re literaria ad te scribam, nihil prorsus habeo post ea, quae superioribus literis tibi significavi. Illud non praetermittam, quod tibi antiquitatis omnis amantissimo scitu non erit, opinor, injucundum, repertas nuper in effodiendis ruinis antiquorum, ut videtur Balneorum parietinas graphice depictas, in quibus non solum varias Deorum imagines videre est, sed etiam oppidum ad mare situm, aedificiis frequens, arcuato ponte, seu potius mole in altum procurrente, cui moli gemini arcus, statuæ equestres, atque alia etiam ejus generis ornamenta loco insistant. Hujus picturae aetatem, si quid mei judicii sit, non multo superiorem Constantini aetate duxerim, idque praecipue conjicio ex inscriptionibus ad nonnulla ex iis aedificiis apposis, quae sequioris aevi Barbariem redolent ut illae, *Forus Boarius*, *Forus Olitorius*, *Portus Neptuni*, *Aquae Pensiles*. Id procul dubio est, illam Antonini Pii tempora non excedere, nam id constat ex alia Inscriptione, quae ibidem legitur *Bal. Faustinae S.* Harum omnium picturarum Iconismus est jam, ut audio, qui formis excudendum curat, quod si verum erit, habebis quam primum, unde desiderio tuo luculentius satisfacias. Eminentissimi Cardinalis *Barberini* Epistolam huic fasciculo alligatam ad te mitto. Vale, & si me amas, ad me quam frequentius poteris aliquid literarum dato. Roma. xiv. Kalend. Septemb. CXCCLXVIII.

EPISTOLA CCCCLIX.

NIC. HEINSIUS

Oft. Falconerio.

Romam.

ANxius profecto, ut qui maxime, de rebus tuis haerebam, a quo post meam ex patria profectionem vere proxime decurso institutum nil litterarum prorsus accepiſſem, nunc ſcrupulum omnem exemere mihi, quas a. d. xiv. Kalend. Sept. Roma ad me additis Eminentiffimi Principis *Franciſci Barberini* longe officioſiſſimis litteris, dedisti. Ex quibus ſum edoctus, quod alioquin neſcirem, Prudentii mei exemplaria Romam eſſe perlata. Ut ſpes ſit Poëmatum quoque meorum copiam tibi ſimul eſſe factam. Ceterum quod magnus ille Princeps ſubindicat Clementis exemplar ſibi a me deſtinatum Eminentiffimo *Rospigliosio* munus ceſſiſſe, id quidem laetabundus cognovi; jamque *Elzevirio* in mandatis eſt datum, ut aliud paretur, quod Barberinae bibliothecae addatur, ſi ſit tanti. Monui praeterea rogaviſſe optimum *Capelanum*, ſi occaſio ſic ferat, ut exemplar ſuum Romam curet deferri ad Emin. Principem: ſibi aliud apud *Elzevirium* praesto eſſe: nam Amſtelaedamo Romam libros mittendi rara, quod ſcis, opportunitas ſe praebet. Picturae illius antiquae ectypon videre impatienter deſidero, utinam vero iſtiusmodi cimelia ex urbe aeterna ad nos recta deferri poſſent: Nam amicus Florentinus, ut libere dicam quod res eſt, etſi ad omne genus officii a natura factus, & mei perquam ſtudioſus, tamen, ſive morbo frequenter obnoxius, ſive alibi occupatus, aliquanto tardior eſt in curandis voluminibus apud vos recens editis, cum nec *Nardinii* Romam, nec *Spanhemii* de praestantia veterum nummorum diſſertationem haecenus acceperim: & hoc quidem haecenus. Recentem ingenii tui foetum longe avidiſſime exſpecto inhioque. Mihi toto hoc menſe cum valetudine adfecta negotium fuit ſatis moleſtum, a quo nunc vix tandem nonnihil reſpiro. Quapropter, quae tua ſingularis eſt benignitas, aequi bonique conſulas, quod paucis nunc tecum ago. Conveniebat me nudiſſe tertius *Johannes Schefferus*, quem res privatae Uſſalia in hanc civitatem evocarant, tradebatque exemplum militiae ſuae navalis, *Elzevirio* mittendum, qui ejus editionem parabit. Ejusdem commentarium de re vehicularia poſt publici quoque juris iſſdem typis faciendum licet augurari. Rogavit me vir optimus, ut ſe tibi de nota meliore commendarem. Vale, Falconeri nobiliſſime. Exarabam Holmiae a. d. xxiv. Octob. ciciocclxviii.

EPISTOLA CCCCLX.

OCT. FALCONERIUS

*Nic. Heinsio.**Holmiam.*

Occupato mihi, si unquam alias, compluribus negotiis redditae sunt ante integrum ferme mensem literae tuae a. d. xxiv. Octobris datae, gratissimae illae quidem, ut tuae mihi omnes esse solent, sed quibus lectis non potui, quin adversus amicum nostrum Florentinum, ne quid gravius dicam, vehementer non commoverer. Itane vero desiderare te adhuc *Nardinii* Romam atque *Ezechielis Spanhemii* dissertationem de praestantia & usu numismatum antiquorum, quorum librorum uterque ante quadriennium lucem videt? Quod si vel toto orbe divulsi a nobis essetis, ut ille Britannos ajebat, tamen debuerant illi tanto temporis spatio jam diu ad vos pervenisse. Atque ego quidem pessimum nostrum hoc fatum nimis quantum dolerem, nisi profecto scirem tribuendum id potius amici negligentiae aut incogitantiae, quam locorum, quo distamus, intervallo. Huic autem incommodo ut ea ratione, quae opportunior visa fuerit, occurratur, tuum erit curare: nam Romae vix ullum novi Bibliopolam, cui cum Amstelodamensibus vestris commercium intercedat, si unum excipias, quo *Petrus Blavius* utitur in libris huc ad amicos mittendis. Hac si via deinceps uti me libuerit in iis curandis, quae ad te perferenda erunt, necesse erit ut per *Elzevirium* cum *Blavio* agas, ut homini de mittendis ad te quaecumque a me illi tradentur, det in mandatis. Sed vereor, ne hac ipsa via certa fatis atque expedita commercii nostri ratio futura sit; raro enim admodum, ac quantum ego scio, vix quot annis homini huic quicquam ad *Blavium* mittendi sese occasio obtulerit. De his autem tute videris, tum vero si quam aliam opportuniorem viam ad librarium hoc commercium mecum instituum haberas, ad me quamprimum ac diligenter scribas. Haec ad eam partem, quae praecipua est tuarum literarum. Ceterum jucundissimum mihi accidit, quod ex eisdem literis intelligo, tantam esse Cl. *Schefferi* erga me humanitatem, ut de me adeo amanter cogitet inter assiduas, gravissimasque occupationes, quibus juvandae reipublicae literariae distinetur, cui quidem non mediocri accessio fiet, si ejus de Re Navali Commentarius secundis curis auctus iterum prodibit in lucem, ne quid dicam de eruditissimo ac singulari Syntagmate de Re Vehicularia veterum, cujus tu spem facis. Utinam ne illa longa sit! nam tu salivam mihi vehementer movisti, nec nisi egregia omnia expectanda ab homine eruditissimo atque antiquitatis omnis consultissimo. Ei tu singularem observantiam meam testatam quamprimum facere cave praetermittas, cujus quidem quaecumque pignus Inscriptionum Athleticarum exemplum accipiat meis verbis rogabis, quod jam *Elzevirio* misi ipsi tradendum. Tibi vero de rebus, quae hîc geruntur, unum habeo quod nunciem, acerbissimum illud quidem ac literis maxime luctuosum *Leonis Allatii* obitum, quo

extincto magnum literarum Graeciae columnam amissum vehementer, opinor, mecum dolebis. Scripta sua ac MSS. Codd. *Barberino* Cardinali legavit *Alatius*, cujus in Bibliothecae Vaticanae praefectura successorem futurum audio *Franciscum Slusium*, Canonicum Leodiensem, quem ut nostratibus omnibus Pontifex anteponeret, adductus est diligenti commendatione *Jacobi Ruspigliosi* Cardinalis, fratris filii, quocum *Slusio* magnus fuit usus, dum ille Apostolicae sedis Nuncium in Belgio ageret. Bibliotheca scriptorum Hispaniae, quam concinnavit vir eruditus, *Nicolaus Antonius*, qui Ecclesiarum Hispanicarum negotiis apud Pontificem procurandis praeest, jam sub praeco est, cui prope etiam est, ut *Benedictus Millinus* Christianae Reginae a Bibliotheca Anastasiana suum committat, quem notis Criticis, ac Chronologicis etiam illustratum publici juris propediem facturus est. Exciderat pene, quod quidem scire Cl. *Schefferum* interest, allatum huc tandem e Dalmatia Petroniani fragmenti codicem, quem constante eruditorum omnium suffragio ante trecentos circiter annos scriptum fuisse constat, ut inde validissimum telum peti possit ad eorum opinionem evertendam, qui id fragmentum supposititium asserere praecipiti iudicio conati sunt. Nemo enim erit, cui persuadeant ea aetate quemquam fuisse, cui Petronii larvam gestare, atque in auctore supposititio edendo, qui ea tempestate, ut credibile est, vix eruditioribus notus fuerit, gloriam quaerere in mentem venire potuerit. Sed de his plura vir doctus, qui *Statilei* partes adversus *Vagenseilium* & *Valesium* scripto etiam tuendas suscepit. Ectypum picturae antiquae, cum primum per occasionem licebit, ad te mittam. Tu vero meam in rescribendo tibi negligentiam aequi bonique consule, & me, ut facis, benevolentia tua complectere. Romae Kalend. Februar. CIOCLXIX.

EPISTOLA CCCCLXI.

NIC. HEINSIUS

Oct. Falconerio.

Romam.

EX quo in ultimos hosce terrarum tractus non ita nuper emigravi denuo vix intermissum mihi cum valetudine dubia negotium fuit. Sub exitu tamen anni proxime decursi adeo inruduit morbus, ut ab illo tempore aut lecto, aut cubiculo haeserim adfixus, pedem certe domo in publicum non extulerim. Confirmavi quidem jam instauravique vires utcunque, sic tamen ut caelo horrido ac prorsus hiberno exponi non ausim, museo inclusus & lentae febriculae adhuc obnoxius. Felices vos, & meliore fato prognatos, quibus aestivum tempus jam adfulget, dum nos nivem inter ac gelu mense quinto luctamur multa cum coeli inclementia: Nam ne quid erres, Falconeri nobilissimae, aquis omnibus circa civitatem hanc glacie etiamnunc adstrictis, mare navibus interclusum imperiumque est omnino, sic ut Januario mense non magis. Verum omissis hisce tam ingratis, amicum communem nobis Florentinum

num illum horteris & impellas rogo obsecroque, ut mei aliquando meminisse dignetur. Annus jam est, & quod excurrit temporis, quando significabat, sese copiam librorum satis luculentam habere paratam, cum iis navibus mittendam ad nos, quae tunc in statione portus proximi ventos opperiebatur commodos. Postea nuntiavit expectasse sese nescio quid fasciculi Roma, quod tu libris mittendis addi voluisses. Id quia non comparuisset in tempore, elapsam fuisse e manibus opportunitatem, quam iussisset sperare. At mihi comperitum est, ex illo navem non unam e numero bellicarum nostratium, patriae repetendae accinctam, in portu Etrusco haesisse: quas occasiones cum amicus noster negligat, atque elabi alias ex aliis patiat, facile colligo, aut cum morbo illi esse negotium, aut alio cogitationem conversam. Solebat enim sedulitatem omnibus numeris absolutam & longe exactissimam prae se ferre. Urgebo & ego cessantem, ubi ex hoc languore diuturno emergam, quod ut spero sub hirundinum adventum fiet. Rumor est in Belgio atque etiam hinc terrarum Serenissimam Suecorum reginam iter denuo in Germaniam meditari, ad res privatas componendas, quas in hoc regno praeter suam opinionem non satis compositas reliquit. Si res sic sese habet, quod tu certius poteris rescire, vide quaeso, an commodis meis gratificandi opportunitas apud illam tibi detur. Sin ipsam illam venerari coram non soles, aut soles infrequentior, te commendante fortassis ex domesticis ejus nonnemo causam meam suscipiet agendam. Cum ex me cognovisset aliquando de Marone recensendo consilium agitari, curae sibi fore promisit, ut quicquid codicum divini Poëtae paullo vetustiorum in scriniis bibliothecae suae possidet reconditum, usui meo subministraretur id omne. Proxime cum Roma ad nos excurrerat, promissi hujus fuisse oblita mihi visa est, nec ego ejus admonere illam potui, quod viae jam se commisisset, priusquam de profectionis consilio certi ad nos nuntii essent perlati. Vide ergo, si qua ratione effectum dari possit, ut studiis meis hinc consulat, excursura in septentrionem. Nam nisi sarcinis ejus codices addantur, negotium sit prorsus arduum, & de quo promovendo nolim cogitari, ne importunus, ut qui maxime, atque odiosus arguar. Pollicitus eram praeterea magnae Principi, curae mihi fore, ut Stephanus Byzantius cum annotatis Holstenianis in Belgio nostro Typographum inveniret, qui jam inventus est, si exemplar voluminus ipsum, aut ejus apographum mittetur. Videmur autem periculi omnis, quod in via subeundum erit, aleam eo minus formidare, quod Em. *Barberinus* annotata haec Holsteniana in suos usus describenda jam curarit, quantum ex fama colligo. Ut si alterum pereat in itinere exemplar, in altero tamen lucubrationes Holstenianae salvae sint futurae. Sed haec tanti non sunt, ut meae in spem gratiae discrimen subeas repulsae, si rem ancipitem ejusque eventum cum difficultate conjunctum fore deprehendas. *Allatii* fatum deploro. De successore ejus gratulor: est enim mihi jam perspectus vir ille, ut egregium in modum litteratura instructus, praesertim Graeca, ita comitatis laude apud nos clarus. *Scheffero* gratissimum fuit de Dalmatico Petronii fragmento rem cognosse; uti ex ipsius viri optimi

litteris manifestum tibi fiet. *Petrus Blavius* est mihi in amicorum numero, utiturque eo familiariter sic satis *Elzevirius*, ut illi tuto videatur posse committi, quicquid ad me voles: nisi tu opinaris tutiorem fore viam Gallicanam ac *Bigotii*, aut quia is Lutetiam rarus emigrat ex Neustria sua, amici cujuscumque Parisii operam. Spanhemianum commentarium de praestantia veterum nummorum typis Elzevirianis jam majori ex parte descriptum esse nuntiant ex Belgio amici, ac militiae navali Schefferianae manum a typographo propediem fore admovendum. Prodituras mox etiam in publicum Gronovianas ad Plinii Historiam Naturalem castigationes, opusculum non magnae molis. Tacitum ejusdem *Gronovii* ac *Graevii* Suetonium lentius procedere. Esse tamen in recognoscendo Cicerone occupatum *Graevium* ipsum: editionis auspiciis ab epistolis familiaribus fore inchoandum, *Gronovii* filium in Polybio Macrobioque luci parandis versari. Prodiisse *Vossii* patris de Idololatria Gentium commentarios auctiores. Anastasii vitas Pontificum Romanorum a Cl. *Millino* nobis exspectandas esse gaudeo. Ejus scriptoris pervetustum exemplar, alterumque in charta exaratum in Bibliotheca Leidensi vidisse me recordor. Utrumque *Damascii* nomen, si probe recordor, praeferebat. Curam Bibliothecae illius nunc habet *Gronovius*. Percurrebam Silvas Statianas nuper, ad quas jam olim complura observavi, sunt enim mendosissimae etiamnum. Codices vetustos ejus Poëmatis nullos omnino in Bibliothecis inveniri opinor, notae recentioris nonnullos, etsi rariores & illos, scio hîc illic exstare. Vaticanos quinque cum vulgatis libris in meos usus *Langermannus* commiserat ante annos hosce xv. Sed schedae illae naufragio nobis paullo post periere. Cum Vaticanum alia de causa adieris, rogo, codices illos, & si qui alii postea accessere, inspicias, consulasque super locis hîc a me annotatis. Lituris, quae ob assiduas amicorum interpellationes sat multae irrepsere, benigniter rogo ignoscas. Viro perillustri *Carolo Antonio Puteano*, si adhuc in vivis est, ejusque genero *Nicolao Rondinino* plurimam salutem dico. etiam *Francisco Slusio*, si jam in Urbem advenit. Quid *Pollinus* & *Favoritus* nunc agunt? Quid Etymologico Orionis sit, quid inscriptionibus antiquis, quas *Moronus* tanto tempore promittit? Quid *Athleticis* tuis? nam eas ardeo videre. Jam rediissem in patriam, si per valetudinem licuisset, cui hoc nomine vehementer irascor. Ad Reginam ipse propediem litteras dabo, sed metuo ne serus. Vale, Falconeri Illustrissime, & tuis annumerare me perge. Holmia Suecorum a. d. xxiv. April. Greg. cxcxcclxix.

Codicem habeo Silvarum Statianarum ex editione Parmensi, ante annos fere ducentos juris publici factum, quo interpretum nemo hactenus est usus, ejusque ad marginem vir eruditus nonnemo Italus (nam Florentiae codicem redemi, si probe recordor) illorum temporum discrepantes scripturas ex libro veteri adnotaram: multa illic castigatus, quam in exemplaribus vulgatis leguntur. Equo Domitiani vers. 18. *Exhaustis martem non amplius armis Bistonius portat sonipes*. Parmensis non alius. Unde suspicatus sum scribere oportere, *Exutis martem non alius Armis* B. p. s. Ut procedat comparatio: nam & ipse Domitiani Colossus inermis: nisi quod Gladio cinctus. *Exutis ar-*

mis, quia Mars Gradivus, seu pedester, totus a capite ad calcem armatus, quomodo in antiquis nummis exhibetur. vers. 23. *adsertae munere prolis) adscitae* Gronovius vere, ut opinor. vers. 30. *Te signa ferente, Et minor in leges iret Gener & Cato castris)* *et castris* prorsus inconcinnum est. Pater meus, *in leges iret gener & Cato nostras*, hoc est sub leges Caesarianas isset, quibus nos paremus: Sic hoc ipso libro Silva iv. Soteriis pro Rutilio Gallico vers. 28.

seu plana solutis

*Qua struis orsa modis, seu qua tibi dulcis in artem
Frangitur, & nostras sentit facundia leges.*

Sic editio Parmensis probe. Pro *qua, qua*, vulgati *cum, cum*. *Nostras leges* Poë-
ticas vocat. Silv. i. 67. *Septem per culmina montes It fragor, & magnae fingit va-
ga murmura Romae.) et fingit* parum arridet, putabam, vincit. Sed nec montes
satisfaciunt. Nam Romae & quidem in foro erectum fuisse colossium jam de-
signavit. Putabam *molis it fragor*. Sic initio carminis, *super imposito moles gemi-
nata colosso*. vers. 98. 99. *Quem tradere es ausus Pellaeo, Lysippe, duci. Mox Cae-
saris ora Aurata Cervice tulit*, versus suspecti, quia in fidem historicam pec-
cant. Videndum an in libris scriptis existant. Silv. ii. Epithalamio Stellae vers.
9. *Alternum factura pedem)* alii aliter, ego, *tractura*. vers. 21. *Et olenti spargere
thymbra*. MS. nimbo. quod placet, si ab aliis codicibus confirmatur. vers. 32.
promissaque numine dextro Vota paves. permissaque videtur scribendum. vers. 41.
Hanc propter tutum: votum corripiebam. Gronovius *justum*, Parmensis editio;
licuit. forte *hanc propter libeat*. vers. 47. *attulit hic mecum. et mecum* videtur cor-
ruptum. vers. 80. *& inermi strinximus arcu*. Parmensis, *inerti*, quod multo re-
ctius. vers. 91. *Supereffe per aestus)* Parm. *durasse* & hoc concinnius. vers. 100:
Hic juvenum lapsus, suaque haud hesternae revolvit Vulnera. Parmensis *suaque aut
externa*. forte, *hinc juveni plausus: suaque aut externa r. v.* vers. 122. *Querit-
ur jam Seras avaros Augustum.)* videtur a manu Statii esse, *querimur jam Seras
avaros Augustum spoliare nemus*. vers. 131. *Erraret Daphne secura: in litore Naxi)*
sic distinguendum cum Parmensi. Male Vossius in Grammatica, *si curvo in
litore* ex Senensi codice. vers. 155. *Perspicui vivunt in marmore fontes)* forte, *in
murmura*. vers. 189. *Raptor erat)* *Raptorem* cum Parmensi & Gronovio. vers. 203:
Prendisti portus, tumidae sic transfuga Pisae, locus mendosus. Cur enim *tumida
Pisa?* Gronovius hic se multum jam torfit. Forte, *prendisti portum: udae sic
transfuga Pisae*. vel *portus*, si hiatus iste in carmine te offendit, cujus generis
tamen versus plurimi in Marone, Horatio, Juvenale, aliisque occurrunt;
etiam apud nostrum. sic pag. ultima Silvarum, *Uberibus tibi parve dedi: heu mu-
nera nostra Ridebas. Uda Pisa* propter Alpheum & Arethusam. Theb. iii. 479:
Branchus, & undosae qui rusticus accola Pisae. ultimam syllabam in *portum* male
geminat librarius. Vide fides codices Vaticanos. vers. 240. *Dat Juno ve-
renda Vincula & insigni geminat Concordia taeda)* quid est *geminare vincula taeda?*
aut fallor aut corrigendum, *insigni geminat concordia nodo*. *Nodus* pro vinculo:
sic *nodus amicitiae*, & talia complura. *Nodus Acidalius* pro cesto sive cingulo

Veneris apud Martialem. vers. 251. *Extremo fraudatis opus*) *Opes* fortasse. Silv. 111. Tiburtino vers. 16. *Arte manus concessa locis*. Parmens. *antiqua locis*: si scriptura ab aliis etiam codicibus adstruitur, putem, *arte manus quaesita*. Gronovius, *adjecta*. Sed taedet in his minutiis haerere. Silv. iv. Soteriis. vers. 60. locus valde corruptus.

Hinc alti gaudens datur aggredienda facultas

huc Parmensis. Liber MS. *Hinc arti gaudens*. vers. 76. *Hunc Galatia vicens ausa est incessere bello*, *Hinc quoque perque novem timuit Pamphilia messes*) haec sunt corruptissima. Parm. *Hunc Galathea ingens*. Deinde, *me quoque perque novem tenuit Galatia* tertia producta suspectum est. etiam *vicens*. forte *hunc Galatae*, atque *ingens a. e. c. bella Maesia*, (vel *Mysia*) *perque novem tenuit P. m. tenuit*, ut apud Lucan. de Caesare, *Bellantem geminis tenuit te Gallia lustris* *Ingens Maesia* ut apud Claudian. *cum Geticis ingens premeretur Moesia plaustis*. paullo ante scribendum quoque, *ferrumque recingi*. Lib. 11. Epiced. in Glauciam vers. 84. *jura animis sociare datur*. Parmensis *sanare*, puto, *sancire*, Sic lib. 1. Silv. 111. 92. *Fronte gravis sanusque decor*. forte, *sanctusque*. nam *sanusque* suspectum est, cujus loco Parmens. *sociusque*. Eodem Tiburtino vers. 89. lego. *Daunia nimbofa revocabunt litora bruma*, non *avia*. nam quemadmodum aestate Tibur & loca jam ante designata Romani veteres petebant, & quodcumque jacet sub urbe frigus, ut cum Martiali loquar, ita sub hibernam tempestatem, villas in Calabria Apuliaque ad mare positas, *ver ubi longum tepidacque brumae*, causas reddente Horatio. Sed haec fusius in Adversariis sum prosecutus. Etiam pecus ex Sabinis, Lucanis, aliisque Italiae partibus hyemem in Daunios tractus easdem ob causas compellebant. Si *to avia* tuemur, non liquebit, in qua parte Italiae Vopiscus hibernaverit, mox etiam ibidem scribendum, *Hic premitur facunda quies*. *Docta otia* paullo post habebimus. Deinde ibidem vers. 95. *Pliadumque nivofum sidus* & *Oleniis dignum petiisse sub astris*. Parm. *placidumque nivofum*. Puto *Hyadumque n. s.* & *Olenii dignum petiisse sub astri*. Sub sidus Hyadum & Olenii astri sive haedi Olenii; *Pliadum ferri* non potest, cum peccet in legem metricam. vers. 103. denuo scribendum censeo: *Vibres pro turbes*, *Liventem Satyram nigra rubigine vibres*. quomodo apud Catullum *truces vibrare jambos*. vers. 109. eodem Tiburtino, *sic omni detectus pectora nube*. Scribe meo periculo, *detersus*. Horatus, *Notus obscuro coelo nubila deterget*. Sic & alii scriptores passim. Noster Silvarum 11. Epiced. Glauciae vers. 193. *Te videt & similes tergentem pectore curas*, ita Parmensis. Quod & Gronovius in uno alteroque codice videtur invenire. Unde is conjectabat, *repetentem pectore curas*. frustra, si quid video. vulgo *volventem*. Sed *tergentem* pro *detergentem*, solantem, solatia curis & dolori quaerentem. Haec quoque diligenter & multis sumus complexi in adversariis. Lib. 11. Silv. 11. Surrentino vers. 150. *non frontem vertere minae*. Parmensis *visere*. MSS. *traxere*. latet aliquid. proximo versu malim, *rugarum ignara voluptas*, quam *curarum*. Silv. vi. Epicedio Pileti vers. 48. *Nam pudor inde novae mentis*) *An pudor ingenuae mentis*. Ut Epicedio

cedio Glauc. *ingenuosque super crines*, vers. 44. Parmens. *Unde notae mentis.* Paulo post vers. 54. *Dignus & Hdemonium Pyladem praecedere fama.* locus manifeste corruptus, nam Phocetus fuit Pylades, non Theffalus. MS. Cod. cujus descrepantes scripturae in Parmensi apparent editione, *Haemonium juvenem, Forte, Haemoniam Pelidae accidere fama, vel, Haemoniam Pyladaeque accedere fama Cecropiamque fidem.* ut tria exempla singularis amicitiae jungat, Achillem, Pyladem, Thesea. Paulo ante, *Carmina quae donasse queant.* Parmensis, *Carmine quo potasse queam,* pro *dotasse.* Sed non satis haec cohaerent, & jam nimius sum. Lib. III. Silv. I. Propempt. Metil vers. 30. *Sunt quibus exploret rupes gravis arte molorchus,* Parmens. *explores prios gravis.* Sed rō *Molorebus* omnium ingenia hactenus exercuit, & est mendosum profecto. Sub finem Silvarum pagina postrema sunt perquam mendosa omnia. vers. 80. videtur legendum, *primo genitum quem protinus ortu. Implicui fixique mihi.* Plin. lib. VII. Ep. 12. *Calestrium Tironem familiarissime diligo, & privatis mihi & publicis necessitudinibus implicitum.* Sed & illa corrupta sunt, *questusque & vulnera caeca resolvam.* pro *exercere genas,* forte *extergere genas.* ut *genas natantes* pro lacrimis posuerit. Deinde non cohaerent illa, *ludusque tenello Risus.* forte, *multusque tenello Risus, & e nostro veniebant gaudia vultu.* ridenti Statio puer suevit arridere. Habes plura quam velles. Si non grave est consulere Vaticanos Codices super hisce locis, facile tibi erit arbitrato, si quis inter illos sit notae haud contemnendae, & qui mereatur excuti ad alia complura loca, de quibus tecum agam, ubi id ex usu meo fore judicabis. Hac properantissime in hancce schedam conjiciebam, cum primo paucis tecum agere mihi esset propositum: crevit sub manu, ut vides, locorum, de quibus consultum te volebam, numerus. Vale iterum iterumque, Falconeri nobilissime.

EPISTOLA CCCCLXII.

NIC. HEINSII U S

Qd. Falconerio.

Romam.

A Prili mense, si recte calculum pono, compellabam, aut interpellabam potius non paucis, vir Perillustris, exhibito negotio de inspiciendis Silvarum Papinianarum Vaticanis codicibus. Fugiebat tum me locus iste libri IV. ad Marcellum vers. 87.

jam Sidonios emensa labores

Thebais optato collegit carbasa portu;

Votiferaque meas suspendit ab arbore vittas.

Ita castigavit ex Senensi codice, quo usum esse scimus Scaligerum, Gevartius. Sed cum alia exemplaria scripta editaque a me consulta vulgatum, *pomiferaque ab arbore,* mordicus arripiant, habeamque compertum, membranas istas

Se-

Senenses locis compluribus a mala manu fuisse interpolatas, vix assentior *Gevartio*, nisi per te doctus *Pomiferaque* a Vaticanis etiam in *Votifera* mutari. Designat nimirum Papinius in Albano suo supremam manum Thebaidi fuisse impositam. Alba autem non minus quam Tibur arboribus pomiferis celebrata. Unde illud Silii Italici lib. VIII.

*interiorque per udos
Alba sedet campos, pomisque pendit aristas.*

Pluribus haec alibi illustramus. Unde fit, puto, manifestum non esse adeo ineptam & haftenus receptam in Statio scripturam, ac *Gevartio* videtur: nam *votiferam* fuisse arborem, de qua agit, vel hinc liquet, quod in ea vittas Papinius post detextam feliciter Thebaidos telam, suspenderit. Sed ut missa haec faciamus: habui a *Capelano* proximis diebus epistolium, quo is testatur Prudentii exemplar Eminentissimo *Barberino* destinatum sibi ab *Elzevirio* traditum, suaque opera jam Romam missum esse, per popularem nescio quem, qui id ipsum se in manus magno Cardinali traditurum sit pollicitus. Fac, quaeso, cum occasio dabitur, Princeps optime de me meritis ex me cognoscat mandata sua curae mihi fuisse. Proxime significabam cum morbo diuturno pertinax negotium mihi hiberna vernaque tempestate fuisse. Ex qua *Charybdi* etsi necdum penitus emerisi, jubeor tamen *Sarmatas*, sive *Moschos*, adire publico nomine. Sed unde pes amovendus sit ante hiemem. Si quid litterarum a te mihi illic reddetur, taedium solitudinis majore ex parte profligatum agnoscam. De re litteraria quod addam nihil nunc quidem habeo in promptu. De *Graevio* Ciceronis novam editionem moliente verba, ni fallor, faciebam proxime, deque *Gronovio* Tacitum nobis parante. Scribit ille nuntiatque annotata in Plinii Historiam naturalem sua jam lucem spectare, tum quae in Plinii junioris Epistolas observarit, una cum curis in Plauti comœdiis secundis. *Thevenotum* Leidæ Geographiam Arabicam praelo typographico commisisse. Si in Virgilium editionis Aldinae ab *Andrea Naugerio* castigatum incidet quandoque venalem, & in Valerium Flaccum *Baptistae Pii* Bononiensis commentariis illustratum, eos codices ut mihi vindices enixe peto. Haec in transcurso & opera plane tumultuaria, cum litterarum nonnihil forte parandum esset Florentiam. Si Reginae persuaderi potest, ut *Stephanam Byzantium Holstenii* trans Alpes in Batavia nostra curet edendum, operam eam suscipiet libentissimus, ut mihi jam est testatus, *Daniel Elzevirius*. Vale, Falconeri optime, & ignosce nimiae festinationi. Dabantur Holmiae Suecorum a. d. XIX. Junii Gregor. CIOIOCLXIX.

EPISTOLA CCCCLXIII.
OCT. FALCONERIUS*Nic. Heinsio.**Holmiam.*

Serius equidem, quam pro instituto meo, rescribo literis tuis a. d. xxiv. Aprilis datis, quas mense proxime ineunte acceperam, verum eam tarditatis meae excusationem affero, quam quin tibi legitimam probaturus sim, nullus plane dubito, ipsam scilicet ea negotia, de quibus ad me scripseras, procurandi difficultatem, cujus explicandae ratio cum in aliorum potius arbitrio ac commodis, quam in opera aut diligentia mea sita esset, nihil magis quam opportunitates temporis postulabat, quibus dum captandis haereo, utinamne illud immerito mihi acciderit, ut me cessatorem ac tantum non Florentino amico negligentiorum apud te existimaveris. Illa vero longae hujusce morae potissima fuit causa, quod aestivis feriis jam coeptis nullus mihi ad Vaticanam Bibliothecam patebat aditus, ut reliquo anni tempore; quamobrem expectanda mihi fuere Custodis commoda, qui ejus mihi copiam faceret. Ceterum Silvarum Statii Codices non quinque, ut ipse *Langermanno* auctore affirmas, sed quatuor tantum in ea extant, aut quintum certe reperire non licuit. Ex iis Codicibus variantes lectiones ad eos locos, quos in scheda adnotasti, hîc habes cum ipsa scheda. Qui numeris 3283. & 3871. notati sunt quadringen-
torum circiter annorum antiquitatem praeferunt: 3595. aevi paulo recentioris est, sed scholiis perpetuis minioque scriptis illustratus. Quartus, qui numero 3282. recenti scriptura ex antiquiorum uno videtur descriptus, ac multis in locis ad exemplum melioris codicis emendatus. Ex hoc specimine Variarum lectionum, quid praesidii sperandum tibi sit a Vaticanis Codicibus ad editionem Statii, quam meditaris, facile intelliges; mihi illi non aliis correctiores visi sunt. Sed de his tute videris. *Christinae* Reginae repertum a te esse Typographum, qui Stephani Byzantii editionem aggrediatur, tuis verbis nunciavi, quo nuncio mirifice illa delectari visa est, statimque jussit ad te scribere, se autumno proximo familiarium quempiam de rebus suis in Hollandiam missuram, ea occasione *Holstenii* Notas ad Stephanum, tum vero etiam Virgilii Codices e Bibliotheca sua, quorum ipse desiderio teneris, curaturam, ut ad te perferrentur. Prudentius ac Poëmata tua, quae anno superiore per *Monelium* Principis Etrusci medicum ad me miseras, jam olim ad me allata sunt, quod ego sane iis tibi literis significavi, quibus Cardinalis *Barberini* epistola erat alligata. Exemplum aliud Prudentii, quod missurus erat *Bigotius*, nondum accepi, verum illud propediem expecto, nam sic sperare me jubet recentibus literis suis *Bigotius* idem: libros ab *Elzevirio* missos, quorum bonam partem liberalitati tuae debeo, jam diu est cum possideo, quod & me tibi scripsisse arbitror. Unam Philostorgii Historiam adhuc desidero, quam, ut videtur, tu mihi ex auctione illa Amstelodamensi comparasti. Sed forte

Tom. V.

Y y y

aut

aut ipse fallor, aut liber alicubi in fratris mei sarcinis latitat. Tu de hoc me certiore facias velim, si ne vere is liber a te mihi comparatus, & *Elzevirione* an fratri traditus. Amicus Florentinus, quem officii sui admonueram, postremis literis ad me scribit, libros, quorum ipse curandorum onus susceperat, jam ante menses aliquot oneraria navi Amstelodamum ad *Elzevirium* missos, sibi vero neque de libris neque de navis illius adventu ab *Elzevirio* quicquam nunciari, quod te ex *Dati* ipsius literis cognovisse non dubito. *Carolus Antonius Puteanus*, *Nicolaus Rondininius*, *Alexander Pollinus*, *Augustinus Favoritus*, quibus tuis verbis salutem dixi, salvere te jubent etiam atque etiam, virtutisque tuae memoriam amice colunt. *Franciscus Slusius*, quod jam, ut opinor, ad te allatum est, Vaticanae Bibliothecae praefecturam recusavit, valetudinis excusatione usus, neque alius adhuc, quod sciam, ei muneri destinatus. A *Morono* veterum Inscriptionum editionem aut aliud quidvis frustra expectas. *Mellini* Anastasius nondum praelum subiit. Prodiit tamen ejusdem Dissertatio brevissima de Anno nativitatis & Passionis Christi, quam ille Anastasio Prodromi loco esse voluit, ac veluti basim Chronologiae, quam ipse ad eum Auctorem concinnavit. Georgii Pachimeris Historiarum libri sex, qui supererant, jam lucem vident *Possini* opera, & *Barberini* Cardinalis munificentia. Cl. *Scheffero*, ad quem litteras huic fasciculo alligatas mitto, ut observantiam meam testatam facias vehementer a te peto. Vale. Roma Non. Jul. MDIOCLXIX. De Etymologico Orionis, quod scribenti ex animo exciderat, nil habeo quod nunciem. Id certe scio, qui Romae de eo edendo saltem cogitet, esse neminem.

EPISTOLA CCCCLXIV.

OCT. FALCONERIUS

Nic. Heinso.

Holmiam.

CUM ante tres ferme menses Florentiam venissem, ut *Paulo* fratri praesto-
cessem, quem a diuturno itinere redeuntem, post Europam prope univer-
sam, in comitatu Serenissimi Etruriae Principis, peragratam, gravis ac pene
exitialis morbus exceperat, redditae mihi sunt a *Dato* nostro literae tuae, quas
a. d. XVI. Sept. Narvae Ingrorum ad me dederas, quibus literis de suscepta a
te ad Moschos legatione certior sum factus, quam sane tibi feliciter, fauste-
que evenire opto, atque auguror. Sed, ut verum fatear, tua ista profectio
in longinquas adeo ac barbaras regiones non mediocri me affecit sollicitudi-
ne, quo fit ut nuncios de te tuaque valetudine avide, si alias umquam, expe-
ctem. Ad illas vero tuas rescribere adhuc distuli, cum quod quicquid litera-
rum ad te darem, ad te non nisi in reditu Hamburgi, aut in istis locis uspiam
perventurum esse crederem; tum vero etiam quod ad eorum pleraque, quibus
respondum oportebat, ut tum quid rescriberem non habebam, quod sane nunc
Romae plenius faciam. Prius vero quam ad alia veniam, peto abs te, ut quod
ami-

amicitia nostra maxime postulari videtur, *Δυσωπλαν* istam tuam plane abjicias, qua adductus molestam mihi provinciam fuisse suspicaris Vaticanos Codices super nonnullis Sylvarum Statianarum locis consulendi. Ego vero contra affirmo, nihil suavius mihi accidere posse, quam ut opera mea, ubicunque opus fuerit, utaris familiarissime, ut ego quidem tecum facio; quod nisi tu quoque feceris, edico tibi, mihi nunquam persuasum fore me a te tantum amari, quantum me existimare velle pro certo habeo; interea voluntatis hujusce meae pignus accipe, quod a te sine ullo pudore aut verecundia peto, ut ante tuum in patriam reditum, libros nonnullos rariores, qui Hamburgi, Altórfii, aliisque istarum regionum locis excusi sunt, qui quidem apud Bibliopolas vestrates difficile reperiri possint, diligenter mihi compares. Eorum indicem ad te non mitto, quod titulos plerorumque ignoro; unumque te scire satis sit, me praeter Censorinum de die Natali, *Reinesii* epistolas & varias lectiones, vix libros ullos in isto terrarum tractu editos possidere, quamobrem id tibi curandum est, ut libros omnes rariores, qui ad Historiam & Philologiam pertinent, quorumque pars major hoc aut superiori seculo in lucem prodiit, sedulo conquiras, eosque minime praetermittas, qui ad veteris Germaniae partes illustrandas faciunt, illosque praesertim, si qui sunt, qui Collectiones rariorum scriptorum continent medii aut recentioris aevi. Ut autem urbanitatem hac in re meam magis perspectam habeas, scito me ducentos aut trecentos amplius florenos in hujusmodi libros libenter impensurum. Pecunia, qua ad id opus erit, ut tibi Hamburgi curet Mercatorum Italorum aliquis, qui Amstelodami negotiantur, si fieri potest, efficiam, quod si id minime successerit, erit Amstelodami *Franciscus Ferronius*; quem opinor nosti, qui argentum, quodcumque tibi a me eo nomine debebitur, statim solvet. Quod si forte alicubi incideris in Epiphaniae opera editionis Petavianae, aut Antiquarum lectionum *Canisii* Tomum quintum & quarti partem secundam, Collectionesque praeterea scriptorum Germanicorum *Urstisi*, & *Lindenbrogii*, monitum te volo eos libros a me summopere desiderari. De Stephani editione Reginae iterum aures vellere non dubitavi, quod tuae & *Elzevirii* recentes literae a me postulare videbantur, iniecique etiam mentionem *Theodorii Ryckii*, cui in Hollandiam brevi redituro Cod. MSS. tuto credi posset; sed quantum conjicio Reginae ejus consilii, quod te auctore suscepisse videbatur, exequendi saltem ut nunc haud magnam spem facit: nil enim aliud, ad ea, quae dixeram, respondit, nisi MSS. illum Cod. haud hujusmodi esse, ut cujusvis fidei facile committi possit, seque ea de re amplius deliberaturam. Prudentius tuus, quem a meo statim reditu *Ryckius* mihi tradiderat, *Barberino* Cardinali, vel Pontificiis comitiis occupatissimo, fuit gratissimus, ejusdemque lectionem sibi magnae voluptati esse mihi nudius tertius Cardinalis ipse affirmavit, a quo alterum Pachymeris Historiae volumen, quod nuper in lucem prodiit, jamdiu sum nactus, mihiq; curae erit, ut per *Ryckium* aut aliqua alia via ad te, cum primum licebit, perferatur una cum *Allatii* Apibus Urbanis, quem librum olim a te desiderari novi. Philostorgium in sarcinis *Pauli* fratris repertum tandem accepi.

De re hîc literaria vix quicquam est, quod nunciem, nisi prodiisse ante paucos Typis Barberinis *Theodori Episcopi* Ancyrani expositionem Symboli Nicaeni; *Luca Holstenio* interprete, qui paucarum paginarum libellus est; Bibliothecamque Scriptorum Hispaniae jam ad finem properare. *Mager* ille, cujus opera editum est utrumque Epistolarum *Latini* volumen, ejusdem Auctoris emendationes & animadversiones in diversos scriptores ex Codd. Bibliothecae Viterbiensis brevi se publici juris facturum pollicetur, idemque de Anastasio suo sperare jubet *Benedictus Mellinus*, qui Bibliothecae *Christinae* Reginae praefectus est; sed vereor ne ea, quam cum *Francisco Levera*, Reginae ejusdem Astronomo, nuper suscepit controversiam de Anno Natali & Passionis Christi, ipsum a proposito abducatur. Vale vir Ill. meamque in hisce scribendis literis negligentiam aequi bonique consule. Roma Kal. Febr. MDCLXX. *Petri Lambecii* Commentarios Rerum Hamburgensium jam possideo, *Demosthenem* editionis Francofurdensis si alicubi iusto pretio venalem reperias mihi comparato.

EPISTOLA CCCCLXV.

OCT. FALCONERIUS

Nic. Heinſio.

Holmiam.

Quod me de tuo Holmiam Suecorum reditu, legatione apud *Ruthenos* feliciter obita, certiore facis, literis tuis a. d. XIII. Decemb. datis, beasti me plane, mi Heinſi. Eram namque, si umquam alias, de tua valetudine sollicitus, post acceptas haud ita pridem ab *Elzevirio* nostro literas, quibus tibi non bene cum ea esse nunciabat. Ego vero tibi ex animo gratulor, non tam quod ex intima illa septentrionis barbaria salvus incolumisque remearis, quam quod in patriam quam primum redeundo te simul ac me voti compotem efficies. Id enim jam diu est cum aveo. Te namque in Bataviam reverso longe melius amicitiae nostrae rationibus consuletur, opportuniori litterarum commercio. Quod ad libros attinet, quorum indicem superioribus literis ad te miseram, ut in iis conquirendis opera tua uterer, integrum penes te arbitrium esto, ut scilicet eos tantum compares, cum per occasionem licuerit, quos commodo pretio mercari contingat. Inscriptionum Athleticarum exemplum, quod unicum mihi superest, quando de iis, quae *Elzevirio* miseram recuperandis nihil jam spei reliquum, *Dato* nostro quam primum mittam, ut cum aliis libris, quos ille propediem missurum se tibi nunciabat, ad te perferantur. Nam quod de iis Lutetiam transmittendis monebas, vereor ne parum opportunum in hoc rerum statu consilium futurum sit; imminere namque vobis bellum a Galliarum Rege constantes sunt rumores. *Pachymerianae* Historiae volumen alterum, partemque alteram Gemmarum Antiquarum *Leonardi Augustini* curabo, ut una habeas. Virgilii editionem Aldinam, & si quae aliae sunt vetustio-

stiores, diligenter conquiram. *Ryckii* libellus, cui titulus *Apes*, ignotus mihi plane est. Caeterum quod in editione *Virgiliana* symbolam conferre non sum potis, equidem doleo. Operam tamen meam tibi promptam paratamque polliceri in iis, quae tibi a Bibliotheca Vaticana opus erunt, possum. Sed tu in hac re voluntatem ad me tuam enucleatius perscribas necesse est. Stephanum Byzantium Lugduni Batavorum sub praelo esse vehementer gaudeo: non dubito enim, quin hac ipsa editione *Holstenii* ἡ μακροτέρη in eum auctorem animadversiones publici juris fiant. In hoc certe fidem suam obligavit *Theodorus Ryckius*, Popularis tuus, cum me suatore codicem ipsum *Holstenianum* anno superiori a *Christina* Regina obtinuit. De *Allatii* curis in *Oppianum*, *Carolum Moronum* Card. *Barberini* Bibliothecarium, penes quem *Allatii* scripta omnia extant, quamprimum conveniam. *Pollinus*, *Favoritus*, alique viri docti, quorum tu in literis tuis mentionem facis, tibi pro tua ista erga ipsos humanitate gratias agunt quam plurimas, teque salvere ex animo jubent. Tu, si me amas, properatae scriptioni ignosce, & ad me de te rebusque tuis quam saepius scribe. Roma. Prid. Kalend. Mart. CIOICLXXI.

EPISTOLA CCCCLXVI.

OCT. FALCONERIUS

Nic. Heinsio.

Holmiam.

PRincipio te post intimam Ruthenorum barbariem peragratam sospitem in Sueciam rediisse, tibi ex animo gratulor, mi Heinsi, quod ex recentibus literis tuis a. d. xvi. Aprilis datis cognovi, quae quidem hoc nomine, si aliae unquam, gratissimae atque jucundissimae fuerunt. De nova Maronis editione, quam meditaris, animum ego quidem tuum vehementer laudo ac probō, verum ad hanc spartam adornandam quid conferam nescio, nisi quid tibi a Vaticana Bibliotheca est opus, in quo ego tibi operam meam jam antea sum pollicitus, iterumque polliceor. Catalectorum vetus aliquis MSS. Codex an ibidem extet, equidem ignoro, sed hac ipsa de re, quamquam feriae jam coeperint, Bibliothecam quamprimum adibo, atque ad te propediem scribam. Jacturam librorum, quos olim ad te miseram, resarciendam curavi. Eos *Datus* noster ad te mittet, quem suo periculo cautiores factum fuisse in libris isthuc curandis minime dubito. Itaque praeter *Nardinii* Romam Inscriptionesque Athleticas meas, habebis *Pachimerianae* Historiae volumen alterum, itemque *Leonardi Augustini* Gemmarum partem secundam. Librorum, quos tu nuper a me petieras, nullum adhuc inveni, neque enim nunc, ut antea, licet Bibliopolarum Agonalium forulos rimari, in quibus libros id genus facilius reperire est. Servius, quem ajebas, editionis Florentinae mihi aequae ac *Dato* nostro est incognitus. Caeterum nihil hinc agitur in literis, quod te scire operae pretium sit. Nobis tam beatis esse non licet, ut Batavis vestris, quibus praela

nunquam vacant a bonis doctisque libris. Bibliotheca Scriptorum Hispaniae brevi lucem videbit, nec non *Alexandri Farnesii* & *Ambrosii Spinulae* vitae Latino sermone conscriptae, quas quidem nescio quantum eruditi homines sint probaturi. *Franciscus Bernardinus Ferrarius*, *Andreas Marianus*, & *Camillus Peregrinus* ante hos tres, aut quatuor annos fato omnes cesserunt. *Paulum Sfondratum* qui novit Mediolanensium, qui hîc degunt, reperi neminem. *Ovidius Montalbanus* vivit adhuc, sed ut audio, jam in peculio Proserpinae, & in orci familia numeratus, ex quo apoplexia correptus jacet. Amici omnes Romani *Carolus Antonius Puteus*, *Nicolaus Rondininius*, *Augustinus Favoritus*, *Stephanus Gradius*, *Alexander Pollinus*, & *Carolus Moronus* recte valent, teque salvere plurimum jubent. Cum *Barberino* Cardinali multus mihi nudius tertius fuit de te sermo, qui sane te & magni facit, & amat vehementer. Vale, amicorum suavissime, & me tantum ama, quantum te a me amari velim tibi persuadeas. Roma Prid. Non. Jul. cicioclxxi.

EPISTOLA CCCCLXVII.

NIC. HEINSIUS

Oët. Falconerio.

Romam.

Narro tibi, Falconeri nobilissime, adfuisse nobis proximis diebus *Pantichum* Abbatem, virum ingenii unice elegantis, cujus ego raram eruditionem & plane concinnam, quod vobis Etruscis patrium est & perquam familiare, sum equidem miratus, ut qui maxime. In tanta vero felicitate id mihi praeter votum ac prorsus inopportunum accidit, quod tentatus articulari morbo, qui in ipsa via me oppresserat, atque aeger delatus in patriam, non potui homini meritissimo ea praestare officia, quorum intermissorum pudore medius fidius praesentissimo tangor. Quod nisi is pro cetera animi benignitate aequi bonique consulat deserti per valetudinem vadimonii hanc culpam, opinionem, quam de meorum officiorum promittitudine qualemcumque concepisti, quî tueri possim ac sustentare salvam, non video. Maronem nostrum sic commendatum tibi esse volui, ut nil propterea tamen de rei majoris negotiis tibi decederet. Absit enim ut ludum nostrum tuis feriis anteferendum putem, quae quanto rei litterariae cum emolumento conjungantur, haudquaquam me fugit. De Servio etiam Florentinae editionis cum menui, non alia mihi mens fuit, quam ut libri a me desiderati ne meminisse gravareris, si forsan is in bibliopolio venalis tibi occurreret. Scio enim, atque exploratum plus satis habeo, codicum sub initia artis typographicae inventae, procusorum mercem rarius proflare, atque inventu esse difficillimam. *Pachymerianae* historiae partem alteram quando nansciscar cum libris reliquis abs te missis, non intermittam gratum me per litteras pro munificentia singulari apud Eminentissimum Principem *Franciscum Barberinum* profiteri. Sed & voluminibus abs te de-

desideratis, quorum indicem jampridem ad me misisti; conquirendis, si indagari in Bibliopolarum pergulis possint, sedulus incumbam. Virorum illustrium excessum apud vos, quem enarras, indigne equidem tuli. Exstabant enim illorum in me ut privatim, sic publice in rem litterariam universam officia sane luculenta. *Paulum Sfrondratum*, illustri loco apud Insubres prognatum, Augustiniana aut Theatinae familiae Monachum, non enim satis memini, virum artium bonarum amore ac cognitione non levi instructum; Mediolani ante annos plus minus duodevicesenos cognitum habui. Parabat is tum in Hispanias peregrinationem, ubi ad Episcopatum nescio quem haud multo post evectus mihi nuntiabatur. Ex illo quid factum sit viro mire officioso cognosse neutiquam est datum. Viris eximiis, *Carolo Antonio Puteo*, *Nicolao Rondinino*, *Alexandro Pollino*, *Augustino Favvito*, *Stephano Gradio*, *Carolo Morono* mei memoriam constanter inhaerere laetor, quibus plurimam salutem si meis verbis dixeris, quando opportunum videbitur, agnoscam animo non ingrato singulare beneficium. *Gronovium* hic vidi adhuc ex diuturno ac periculoso morbo languentem. Is in Tacito ac Gellio recognoscendis potissimum nunc occupatur. Vidi & *Cuperum*, cujus observationes nuper admodum Ultrajecti prodire. Vidi & *Tennulium*, *Gronovii* affinem, qui in Jamblichi operibus publico parandis se exercet. *Graevii* Suetonium propediem videbimus. Deinde ad Epistolas Ciceronis familiares castigandas is transibit. *Theodorus Ryckius* quotidianus mihi adest, cum in hoc oppido sedem fixerit. Is salvere plurimum te jubet. Plura narranda nunc non occurrunt. Vale, decus musarum & ocelle. Hagae Comit. Nonis Septemb. Gregor. MDCLXXI.

EPISTOLA CCCCLXVIII.

OCT. FALCONERIUS

Nic. Heinsio.

Hagam.

EGO vero mi Heinsi, pro tuo in patriam reditu, cujus literis tuis Nonis Septembribus exaratis certior sum factus, Apollini & Musis litandum a me censeo, qui tam charum mihi caput deque literis adeo praeclare meritum, magno bonarum artium beneficio, Athenis Belgicis reddiderunt. Non dubito enim quin in isto otio, quod tibi vacatio a muneribus publicis hoc tempore conciliabit, praeclare aliquid, quodque rempublicam litterariam egregie juvet, sis moliturus. Id certe augurari licet, amicitia nostra fruendi crebriores posthac occasiones futuras, quod impense gaudia nostra auget, facitque ut tu nobis prope redditus atque in conspectu ipso esse videaris. Caeterum cave tibi persuadeas, quicquam mihi antiquius esse, quam ut commodis tuis serviam, quod ideo tibi dictum volo, ut scias operam meam in omnibus, quibus opus fuerit, promptam paratamque fore. Ad indicem librorum quod attinet, peto abs te, ne graveris ejus exemplum ad me mittere. Illum namque recudere est.

est animus, ne in iis conquirendis, quos ab illo tempore comparavi, operam perdas. *Cyriaci Spangenbergii* historiam Manicheorum Urfellis editam circa finem superioris seculi adhuc desidero, petoque abs te vehementer, ut, si me amas, latebras omnes istarum Bibliothecarum excutias. Ejus libri conquirendi provinciam susceperat pro sua in me humanitate *Theodorus Ryckius* noster, quam quidem strenue gessisse minime dubito, sed hujus laboris implendi sortem tibi reservatam esse auguror. Quo me hoc singulari beneficio ad alia multa obstrictum habeas. Ecquid vero *Ryckius* Stephani Holsteniani editionem molitur, an Typographum adhuc quaerit, qui opus a viris eruditis avide expectatum publici juris faciat. Me certe ille usque dum fidem suam liberet ἐργασίαν habebit, ut fidejussionis ejus eventum praestem, qua *Christinam* Reginam impulsi, ut Codicem ipsum illi crederet, quantocius excudendum. *Jo. Georgio Graevio* neminem habeo praeter te, cui debeam magis inter amicos Batavos. Ille me prior literis compellavit, libris, quos edidit, donavit, *Paulo* fratri Ultrajecti commoranti humanitatis officia omnia praestitit. Hisce nominibus cum ipse me obligatum sentirem, arripueram libenter occasionem observantiae erga illum meae, ut poteram, faciendi satis, mittendo illi exemplum Notarum mearum ad inscriptiones Athleticas exemplar, quod cum aliis nonnullis, quae amicis Batavis donanda *Elzevirio* ante triennium miseram, nescio quo casu periisse nosti. Neque habeo unde jacturam resarciam. Unicum siquidem exemplar quod supererat *Datus* noster ad te perferendum curabit in eo fasciculo, quem se propediem (melioribus, ut spero, auspiciis) ad te missurum postremis suis literis nunciabat. Quamobrem rem mihi gratissimam feceris, si exemplar ejus libri, quod forte apud Bibliopolas vestrates reperire liceat, vel certe Francofurti, quo a Bibliopola Veneto, qui majorem eorum partem coemit, quam plurimos missos fuisse scio, *Graevio* meo nomine sistendum cures, in quo quidem vel mea causa operam suam praestitutum *Elzevirium* plane confido. Novit enim ille, quam in ejusmodi re meam paratam habuerit, cum Observationum Geographicarum *Holstenii* exempla gemina a me petiit, quae idem ac libri alii inauspicati ejus fasciculi fatum subierunt. Apud nos in re literaria nihil plane fit, quod te scire interfit. Historiam rerum in Belgio gestarum ab Ambrosio Spinula *Angelus Gallucius* e Societate Jesu nuper vulgavit, in qua vereor, ne ille operae pretium fecerit. Bibliotheca Scriptorum Hispaniae, de qua alias ad te, ni fallor, brevi prodibit. De *Paulo Sfondrato* quaeram diligentius, quodque de eo compertum habuero, quamprimum ad te scribam. Crebriores scilicet a me literas in posterum habebis. Vale interim, & me ut facis ama. Roma Kalend. Octobr. CXCICLXXI.

EPISTOLA CCCCLXIX.

NIC. HEINSIUS

*Oct. Falconerio.**Romam.*

Pergratum mihi equidem, sic ut nil magis, & longe acceptissimum est, memoriam nostri sensibus tuis inhaerere etiamnum constanter, vir eximie. Metuebam enim, ne frigus illud, cum quo mihi tanto tempore luctandum fuit in ultimo septemtrione, urbem etiam tentaret, meque parte meimet ipsius potiore, id est amicitia tua illa tam jucunda, excuteret ac fraudaret miserum. Vitae privatae etsi nunc ex voto redditus, ac restitutus quodammodo mihi, tamen neque ob valetudinem minus confirmatam, neque ob domesticas lites, quae me indignis occupant modis, & ab omni seria cogitatione avellunt, impetrare haec potui, ut studiis ac Musarum contubernio me totum darem. Perve-
lim quippe omnes animo molestias deterfas prius videre, ne male initiatus ad sacra ista accedam, quorum cultus, ut nosti, hominem requirit totum. Huic oneri tam odioso ut humeros subducam, omni conatu jam nunc ago, nescio an voti futurus aliquando compos. Atque utinam solus is querelis nostris daretur locus, non esset profecto contentio nunc sustinenda adversus quam minime oportuit, quamque ego summa pietate praesentissimisque obsequiis semper maximum in modum sum veneratus. Ea est *Christina* Suecorum regina, quae cum abdicato ante annos hosce plus minus duodeviginti regno florentissimo, in meo aere sese esse chirographo sollemni jam tum esset testata, simulque pollicita expensas in rem suam toto quinquennio, quo clientelae me suae habuit addictum, a me factas cum usuris, ut par fuit, solide restituendas fore, integratis ex illo identidem per litteras pollicitationibus, renovatoque, quadriennium nunc fere est, chirographo, tamen cum nuper admodum ante ultimam ex Suecia emigrationem invenissem viam, eamque illi scripto indicassem, qua sine ullo redituum suorum dispendio commodum maxime in modum ex aere meo tandem aliquando posset liberari, tertium monita ac obsecrata submissis verbis, cum alias obviam semper familiaremque precibus meis sum expertus, rescripsit haecenus nihil. Causam silentii rerum intelligentes aliam non suggerunt, nisi esse apud illam auctoritatis praecipuae purpurati ordinis Principem virum, cujus ad nutum omnia regali in aula apud illam administrantur. Hunc animo ab litteris hominibusque litteratis, praecipue transalpinis, mire esse alieno. Sed, ut demus illum, cujus nomini nunc parco, litteras & bonas artes odio prosequi plusquam Vatiniano, vix persuadeor tamen ut credam, adeo eundem oblitum esse & sui ordinis & existimationis Regiae, ut non solvenda esse contendat, aut non deberi, quae debeantur. Haec exponenda tibi esse duxi aliquanto verbosius, ut consilio tuo mihi adesse ne graveris, Octavi, fidissimum caput. Evocavit me renitentem plus vice simplici magnis ad se pollicitationibus Regina anno saeculi hujus quadagesimo nono.

Tom. V.

Zzz

Parui

Parui tandem, etsi a vita aulica multum ingenio alienus, meque clientelae ejus permisi, uti innuebam modo, totoque quinquennii tempore ita me gessi, ut aliorum haudquaquam fortunis inviderem, qui lauto apud illam fruerentur stipendio, ac luculentis praeter hoc afficerentur & assiduis muneribus. Nihil unquam horum ego aut ambivi aut tuli, solo favore regio contentus, ac obsequii mei cum fide, tum constantia inculpatissimus, quod Regina ultro & Livor ipse non gravate, credo, fateantur. Canonicatus aliaque emolumenta, cum dare posset, sperare jussit frequenter non rogantem, sed ut largiretur aliis. Sunt autem facultates meae haudquaquam amplae, ut si mea quadra, quo nunc adspiro, mihi sit vivendum, non e publico, vix eae suffecturae sint ad me alendum, sustentandumque, nisi fruar iis omnibus, quae mea sunt, ac in his quae a Regina debentur. Scribam illi denuo, etsi invittissimus, qui ab artibus mendicatoriis immane quantum abhorreo, petamque, ut quotannis bis mille aureos, vel millenos saltem annumerare mihi jubeat, dum erepat ex aere meo, quoniam lente festinat ipsa. Si tacere perget, pro repulsa silentium interpretabor, ac vindictam optimae causae omnem Musis & Apollini mandabo plorare jussis. Tuum interim consilium, uti designabam modo, imploro, ut si potes docere, cujus praecipue mihi favore sit opus ad arcem Regiam illam longe tenacissimam perfringendam, ejus rei ignarum esse me ne sinas. Obtulit jam olim operam hinc mihi suam Princeps Paderbornensis, sed an multum ille possit inter hos, qui intimae apud Reginam sunt admissionis, haud scio. Quicquid sit, omnia experiri certum est, & si nil aliud, bona fide tandem aliquando desperare, ac sapere incipiam, quando nihil est sperandum. Alias lactoris argumenti litteras me daturum ad te reor. Cum *Theodoro Ryckio* de *Historia Manichaeorum Cyriaci Sprangenbergii* sermo fuit mihi: quem librum etsi frustra haecenus quaerimus, tamen quaerere non intermitteremus. *Holstenianas* in *Stephano Byzantio* recensendo curas exquisitissima, ne edantur, moratur editio *Leidenensis* ejusdem scriptoris, quae nunc sub praelo desudat typographico, additis *Berckelii* cujusdam commentariis. Ea vix est, ut ante annum seculi hujus septuagesimum tertium in lucem sit proditura. Opinatur autem *Ryckius* non esse pro dignitate lucubrationis *Holstenianae*, ut simul cum *Berckelianis* animadversis in lucem proferatur. Ego interim adhortari cunctabundum pergam ac polliciti admonere. *Elzevirium* quoque monui, ut modo quocumque *Athleticas* inscriptiones conquirat, ad *Graevium* nostrum munus tuo nomine ituras. Altum hinc in litteris silentium, nondum enim fruuntur luce, aut *Gronovii Tacitus*, aut *Suetonius Graevii*. Tuas si ad *Elzevirium* mittes in posterum, non *Hagam Comitum*, ubi sedem nescio an fixurus sis stabilem, recte omnino ac tuto facies. Vale, Falconeri Nobilissime a d. XIII. Nov. MDCLXXI. Libris illis, quos *Datus* se missurum propediem spondet, misere metuo. Adeo ille optimus amicus noster, ex *Dato* *Lentulus* ac *Cunctator* factus videtur. Indicem librorum, quos desiderabas ante hoc biennium, hinc habes, sed ea lege, ut auctior mox ad me revertatur. Scribit hodie *Elzevirius* inscriptiones tuas *Athleticas Graevio* nostro, ut volebas, abs se esse traditas.

EPI-

EPISTOLA CCCCLXX.

OCT. FALCONERIUS

*Nic. Heinsio.**Hagae.*

Serius equidem, quam & ipse volueram, & officiorum meorum ratio postulat, respondeo literis tuis XIII. Novemb. datis, quod integrum fere mensem stomacho supra morem usus imbecillo, & non semel etiam levi febricula tentatus, valetudini tantum curandae dare operam Medicorum jussu sum coactus. Tuas vero illas humanitatis atque amoris erga me plenas non sine stomacho, ne dicam indignatione, legi V. Clar. *Christinam* scilicet Reginam, quam instar Musarum decimae quicquid est hominum literatorum hujus aetatis omni genere laudis ornavit, *Heinsium* Musarum ocellum ludificari, atque indignis modis habere. Id ego sane a regiae indolis faemina, ac benevolo alioquin in viros literatos animo adeo alienum puto, ut non aliam ejus, quam aiebas, silentii causam esse mihi persuadeam, quam quod cum in iis angustiis rem suam familiarem versari intelligat, ut aeri, quo tibi obstricta est, dissolvendo imparem se agnoscat, quidvis aliud maluerit, quam se minime solvendo esse, literis ultro fateri. Eo quippe res adducta erat, ut aut fidem suam chirographo & literis etiam non semel obligatam solvendo pecuniam liberaret, aut, quod reliquum erat, silentio sibi consuleret. Ceterum, quid ego consilii afferam in re non modo difficili, verum, si quid judicii mei est, prope deplorata, equidem nescio. Illud procul dubio est, si qua via super sit hujus negotii conficiendi, eam positam esse in eo, quem tu innuis, quem ego quidem non alieno in literas, & viros literatos animo, ut tu existimare videris, adductum existimo, ut rebus tuis minime faveat, sed iis ipsis angustiis regiae arcae, quas ab aliquot annis manifesto produnt imminuti Regiae aulae sumptus, vel circa ea, quae Reginae in primis oblectamento sunt, ut Musici, Histrones, & alia ejusmodi. Quod si ea, quae ipsi cum *Barberino* Cardinali arctissima olim intercedebat, necessitudo integra nunc quoque esset, non aliud magis suaderem, quam ut optimi Principis, ac tui amantissimi patrocini implorares, sed ita postremis Comitibus Pontificis mutata sunt omnia studio partium, ut nulli quam *Barberino* infensior sit Purpuratus ille, alique ejusdem factionis. Operam Principis Paderbornensis in hujusmodi negotio haud sane multum profuturam tibi existimo, verum si hujus quoque periculum facere lubeat, habes nunc ejus experiundae opportunam occasionem; nam cum ejus frater nuper Romam reversus intimis Pontificis cubiculariis sit adscriptus, habebit Princeps Paderbornensis optimum administrum, cujus opera utatur in rebus tuis auctoritate sua promovendis. Tu vero quando extremis malis extrema remedia sint adhibenda, vide sodes ac, caute dicam, diligenter, num antequam nomen non levis sane momenti, ut conjicio, e tabulis expungas tuis, id quoque experiri praestet, quod unice superesse in prae-

Zzz 2

sen.

sentia judico, ut tute scilicet hac ipsa de re Romam venias. Ego sane vix adduci possum, ut credam, id nihil profuturum ad rationem aliquam inveniendam, quo saltem Regina de parte aliqua pecuniae, quam tibi debet, solvenda tecum transigeret. Quantum ad me attinet, id unice cupio, ut hoc consilium expeditum optimumque tibi videatur. Quid enim mihi suavius, quam Heinsum Romae amplecti, observare, colere? sed de his tu videris. Inscriptiones meas Athleticas *Graevio* nostro curatas esse ab *Elzevirio* vehementer gaudeo, cui hoc nomine meis verbis gratias abs te peto. *Ryckium*, *Gudium*, *Gronovium* salvere a me plurimum jubeas. Indicem librorum, quos a te mihi comparari volo, revisum auctumque quamprimum ad te mittam. Literas deinceps abs te crebriores vehementer postulo, ut de rerum vestrarum statu me identidem certiore facias. Vale mi Heinse, & me ut facis ama. Romae Idib. Februar. CIOIOCLXXII.

EPISTOLA CCCCLXXI.

N I C. H E I N S I U S

Oët. Falconerio.

Romam.

NOVEMBRI Mense, Octavi jucundissime, litteras ad te dabam, in quibus cum alia, tum praesertim negotii nonnihil exponebam tibi, quod mihi cum Regina jam ab annis compluribus dispungendum restat. In eo si non gravare consiliis tuis adesse mihi, rem equidem percommodam mihi facturus videbare. Poenituit postea, fateor, instituti hujus, quod ex silentio tuo, aut saltem longius protracto responso, satis colligebam rem cum difficultate conjunctam mandasse me tibi: certe quam cautius aliquanto tractari oporteret. Quapropter etiam atque etiam verbis enixissimis oro te quaesoque, meae in spem gratiae, ne cui molestiae temet exponas. Alia enim via poterit tentari fortassis hoc negotium, quod omnium optime ex principe Paderbornio, a me, si per valetudinem licebit, sub aestatem proximam conveniendo agnoscam. De re litteraria quod rei privatae superaddam, nuntiandum vix quicquam nunc occurrit, nisi ante Kalendas Januarias ereptum nobis *Gronovium*, cui hydrops fatalis fuit, non sine praesentissimo artium bonarum damno. Tacitum ejus propediem videbimus. Reliquit & alia complura per liberos in lucem proferenda. Editus hic est proxime *Marci Meibomii* de fabrica triremium antiqua commentarius. Nisi bella nos interpellant, exemplar ejus cum aliis libellis ad te mari aperto mittam. *Graevius* athleticas inscriptiones ab *Elzevirio* accepit. In *Baccium* de thermis ac vinis cum incides, mihi vindices a librariis rogo, tum Papiac vocabularium. Sed de his alias, quando indicem mihi remittes. Erasmi opera hinc terrarum venalia haberi, nisi pretio infano, vix possunt. Libros ad me complures *Datus* jam misit, atque in his nonnullos tuae munificentiae tesseram. Eos ubi accepero, non intermittam gratiarum actione debita defungi apud Eminentissimum *Barberinum*. Vale. Hagae Comitum Anno CIOIOCLXXII. a. d. XII. Februar.

EPI-

EPISTOLA CCCCLXXII.

NIC. HEINSIUS

*Oct. Falconerio.**Romam.*

Dies agitur nunc decimus quartus, quod paucis te compellabam, dum litterarum nonnihil paro ad utrique nostrum amicissimum *Carolus Datum*, Falconeri optime. Eis ex epistolis didicisse potuisti, turbatum non leviter mihi animum anxiumque, dum revolve mecum, quae Novembri mense tibi peragenda, consilii tui atque opis indigus, exponebam. Eadem sollicitudo etiamnum curas meas acriter exercet. Etsi testari persancte possum, non aliam mihi tum fuisse mentem, cum aperiebam tibi rem de rationibus, quae cum Regina subducenda mihi restarent, quam sententiam ut explorarem tuam, censeresne profecturum me quicquam, si nonnemini ex hisce, qui gratia atque auctoritate apud ipsam Reginam inter procures Romanos praecipue pollent, per litteras serium in modum res meas commendarem, sin minus, aliamne compertam haberes viam, cui insistendum hoc in negotio arbitrare. Nam ego, qui indolem magnae Principis quodammodo notam me habere opinabar olim, nunc re hac in omni coecutire prorsus agnosco mihi animum:

Tantum aevi longinqua valet mutare vetustas.

Nolo igitur, cogitationes ad seria conversas, & commodis rei litterariae insistentes, hisce in frivolis quoquomodo teneas occupatas. Ego quidem desideriiis meis abunde te gratificatum rebor, si hoc abs te impetravero. *Gisbertus Cuperus*, cujus observationes, credo, vidisti, Apotheosin Homericam marmori antiquo inscriptam, quam *Athanasius Kircherus* Latio suo insertum nuper ibat, commentario illustrandam sibi proponit, uti per litteras ipse significavit mihi. Typographia Blaviana Amstelædami proximis diebus conflavit tota cum vicinis aedibus nonnullis. Vale: Exarabam Hagae Comitum: CIOIOCLXXII. a. d. xxv. Febr. Indicem codicum horum, qui desiderantur in bibliotheca tua, velim quamprimum ad me redire.

EPISTOLA CCCCLXXIII.

NIC. HEINSIUS

*Oct. Falconerio.**Romam.*

Purimum medius fidiis sollicitudinis exemptum mihi, perlatis nuper admodum meas in manus litteris tuis jucundissimis amicissimisque, vir Eximie: per quas & valere te sum edoctus, & meis rebus diligenter studere. Metus quippe pectori huic obversabatur haud perfunctorius, sed tenacissimum adhaerens in modum, ne aut in partem interpretarere sequiorem, quod consilium

Zzz 3.

tuum

tuum imploratur a me super negotio arduo inprimis ac perplexo: cujus propositi
 me postmodo poenituisse ex iis cognoscere potuisti, quas ultimas penultimaque
 ad te dedi. De capeffenda ad vos via, brevique excursu moliendo, rem fore
 omnium tutissimam plane tecum sentio: sed adeo vires instaurare non est da-
 tum, post molestias in itinere Ruthenico & longe plurimas & perquam in-
 gentes toleratas, ut sine praesentissimo vitae discrimine, maximaque illius in-
 vidia, quae hoc ipsum non semel quoque & ipsa a me flagitavit, quod tu
 suades, viae tam longinquae memet sim commissurus. Cogitationes igitur
 istas ut valere jubeamus est omnino necesse, ingruente praesertim finibus
 nostris bello, quod immani molimine a vicinis in Belgas foederatos nunc ap-
 paratur. Quas inter patriae calamitates, quando procellam magis magisque
 appropinquantem dissipare aut amoliri non est meum, lacrimas tamen ac sin-
 gultus ut dem publico annimorum furori, pietatis lex sacrosancta & boni civis
 officium videntur postulare. Ceterum, quod persuasum tibi sedere quoammodo
 ex tuis licet colligere, Reginam debito, quod apud me jam olim contraxit,
 expungendo parem non esse, permitte, quaeso, ut a te hac in re dissentiam.
 Nam nisi certo constaret mihi, ipsis illis haud diffitentibus, qui reditus ejus
 omnes intime exploratos habere debent, minimum aeris alieni apud illam su-
 peresse, unde quotannis magis magisque sese expediat, minus acriter urgerem
 negotium. Annuum jam tempus est, quod Regni Suecani Cancellarius alique
 magnates viri asseverarunt mihi religiosum in modum, intra biennium illam
 nullius aeri fore obnoxiam, si, ut proximis annis compluribus fecit, fruga-
 litati ac parcimoniae studere pergat. His adde *Gustavum Kurckium* regni ejus-
 dem Senatorem, ac facultates regias administrantem, ingenue mihi confessum
 esse, posse illam sine ullo suo incommodo satisfacere mihi, si velit, seque re-
 perturum viam minime difficilem solutionis praestandae, si jubeatur a Regina.
 Quid quod alii ex ministris Regiis, quos nominare nolo, jam pacta mecum
 inire sint parati, per quae utrimque conveniatur, si debitum expunxerit, alte-
 ram ejus partem sibi cessuram renumerationis loco, pro exhibendis hanc in rem
 abs sese officiis: Quod etsi pudendum sit in primis tantae principi, quae litte-
 rarum tutelam inter paucos sui ordinis suscepit, nec obsideri a vulturibus id
 genus togatis debebat, amplectar tamen potius conditionem duram ac ini-
 quam, quam perire mihi omne debitum ut sinam. Observant interim illi,
 qui sese videre nonnihil in rebus ejus arbitrantur, factam prorsus illiberalem ac
 sui dissimilem, ex quo in urbem est delata, remque domesticam tractandam
 permisit illi, quem ego ex fama, tu propius aliquanto, cognitum ac perspe-
 ctum habemus. Jamque in eo sunt plerique, de Transalpinis nostris homini-
 bus loquor, ut quicquid laudibus ejus dederunt, jam olim retractent ac tene-
 bris involutum velint. Ego, qui ferme solus supersum constantiae infelicis
 exemplum, poenas fidei ac pietati parum consentaneas luo. Et haec quidem
 haecenus. Nam de eminentissimo *Barberino*, esse illum optimo, ut olim,
 apud Reginam loco, credebam mehercules, sperabamque ejus interventu ad
 mitiora revocari illam ac benigniora posse. Audiui certe merita viri Principis
 prae-

praestitaque sibi officia non semel praedicantem. Nunc quando hîc etiam fortuna me frustratur, reliquum est id unum, quod dicebam modo, ut faeci Hebraeae aliisque id genus vulturiis, quos in domesticis suis illa numerat complures, expilandum me tradam. Libri tui, quos munus ad me pervenire voluisti, jam navigant, immo in fretum Gaditanum pervenisse salvi perhibentur, ut propediem nobis sint expectandi. Nam si diutius aliquanto commorantur in via, metus est, ne, infesso a Gallis Britannisque mari hostiliter, in praedae piraticae partem veniant, quod profecto nolim. Quicquid sit, Kalendas ante Majas proximas omnem rei eventum ex me cognosces. *Gronovium* interemptiva morte sublatum nobis jam puto significavi non semel. Tacitumque ejus luce publica propediem fore donandum, uti & *Suetonium Graevii*, & *Schultingii Senecam*. Monumenta Paderbornensia Celsissimi *Furstenbergii* lucem jam vident: quorum exemplar tibi sepono cum aliis libellis occasione prima mittendum. Voluit enim Princeps Optimus, ut *Elzevirii* typographi nomine praefactionem de me huic operi adjungerem. *Gisbertus Cuperus*, cujus observationes videre potuisti, in illustranda Apotheosi Homerica nunc totus occupatur apud Daventrienses, ubi litteraturam humaniorem publice profitetur, teque verbis meis enixe rogatum cupit, ut qua ope propositum hoc foveri atque ornari abs te potest, ne sibi desis. *Meibomius*, non ignotus tibi credo per Musicorum veterum editionem, de triremium antiquarum fabrica commentarium anno proxime decurso apud nos luci permisit: in quo sibi prae aliis, qui jam ante id ipsum argumentum illustrandum susceperunt, visus est uti oculis Lynceis. Quid vero de hac lucubratione sit judicaturus *Schefferus* noster, aut quam laturus sententiam, est enim ejus haec, ut scis, palaestra, propediem dabitur scire. *Theodorus Ryckius* peramanter te resalutat, quem ego *Gronovio* successorem dari vehementer velim, & spes adfulget fore, ut voto potiamur. Ego quod nunc abs te sedulus contendam hoc est, ut me viris Clarissimis, *Carolo Antonio Puteano*, *Nicolao Rondinino*, Abbati *Gradio*, *Augustino Favorito* commendes. Nam *Pollinum* ad plures abiisse sunt, qui ferant. Eminentissimi Principi *Francisco Barberino* gratias acturus sum per litteras, quamprimum munus ejus, quod nostri, litterarium ad me perferetur. Vale. Exarabam Hagae Comitum Anno MDCLXXII. a. d. XXII. Martii. Virgilium meum typis suis describit *Elzevirius*. Catalecta cupiebam editioni huic addita, sed destitutus omni ferme praesidio, per quod libellus mendosissimus aliquanto castigatior prodiret in lucem; differam puto istas cogitationes, dum observata ad Maronem mea publico permittam. De quibus edendis a me cogitabitur, ut primum ex litium domesticarum pelago ingenti, quo premor, emergam. Sunt enim pleraque editioni parata, nec quicquam requirunt, nisi summam manum, per quam in mundum redigantur. Iterum Vale.

EPISTOLA CCCCLXXIV.

OCT. FALCONERIUS

*Nic. Heinsio.**Hagam.*

Binas tuas Februario mense datas, quas mihi curavit *Datus* noster, nuper accepi, Heinsi amicorum optime, ex quibus intellexi, te non levi sollicitudine anxium super iis, quae Novembri proximo ad me scripseras de eo negotio, quod tibi est cum *Christina* Regina, in quo equidem, quemadmodum singularem humanitatem tuam atque modestiam vehementer admiror, ita nimiam erga veterem amicum verecundiam atque, ut uno verbo dicam, *Ἀνωπίαν* probare minime possum. Dolco equidem, quod superioribus litteris ad te scripsi, omnem mihi interclusum esse aditum, quominus quicquam te in eo negotio adjuvare opera mea valeam, verum si quid ipse videris, in quo ad ipsum explicandum, officiis meis, gratia atque auctoritate, si quidem ullam habeo, uti tibi opportunum fuerit, ita utaris, ut te mihi non modo molestiam ullam allaturum, sed rem etiam gratissimam facturum, tibi persuadeas. *Gronovium* nobis ereptum magno literarum damno, omnes lugent Musarum alumni, neque sane levem plagam bonis artibus injectam esse arbitror incendio officinae Blavianae, quod ego quidem acerbius tuli *Petri Blavii* causa, viri in re libraria promovenda industrii, ac strenui. *Marci Meibomii* de fabrica triremium antiqua Commentarius salivam movit, jamdudum exoptanti mihi quempiam reperire, qui nodum hunc solvat, neque enim faciunt satis, quae ad Athenaei locum nuper adnotabat *Grentemesnilius*, vir alioquin acris iudicii, ac multae eruditionis, quamobrem rem mihi gratissimam feceris, si eum librum, cum primum per occasionem licebit, ad me miseris. *Baccium* de Thermis ac vinis tua causa sedulo conquiram. Papiæ vocabularium ipse adhuc desidero. Vale & me, ut facis, ama. Romae iv. Non. April. ciciocclxxii.

EPISTOLA CCCCLXXV.

NIC. HEINSIUS

*Ost. Falconerio.**Romam.*

Binis tuarum debeo jam pridem responsum, Falconeri Nobilissime: quarum priores iv. Nonas Apriles sunt exaratae, posteriores certum diem non habebant adscriptum: ad compellationes tam amicas, quo minus rescripseram haec tenus, causam accipe. Perlata ad nos jam ante menses duos hac nave, quae libros abs te ac *Dato* nostro complures mihi munus missos vehebat, totus in expectatione fui haec tenus, ut horum ego conspectu mox fruerer: sed contra, ac opinatus eram, accidit omnino: nescio quibus exortis rixis ac contentionibus mercatores inter, ad quos mercium pars spectabat potissima. Hisce ne
nunc

nunc quidem penitus finitis, ne debitae gratiarum actioni deessem, tamen aliquid dandum ad te litterarum duxi, quo scrupulum omnem eximerem animo tuo de libris ipsis, ac simul solenni gratiarum actione pro munere tam luculento defungerer apud te simul ac eminentissimum Principem *Franciscum Barberinum*, quorum munificentia singulari arctissimo nexu mancipatum me profiteor, relaturus gratias fortasse tempore minus studiis ac patriae nostrae, si id sperandum, iniquo. Premimur enim ac circumvenimur undique tempestatis atrocissimae nube bellica, quae rei litterariae ornandae ac provehendae studium in omnium animis videtur deletura, nisi profligatur mature. Quas ego molestias, cum praeviderim jam pridem, ac fortunas meas qualescumque tutior in portum subduxerim, quantum in me, quo liberior ac majori cum jure meus essem, quod mihi cum Regina ratiuncularum dispungendum restat, confici equidem optaram, fateor: cujus incommodi in partem tamen te vocari minime oportuit. Audio jussisse illam, ut ex reliquis nescio quibus satisfiat mihi intra triennii proximi decursum, sic ut quotannis debito pars tertia decrescat. Nec iniquam ego rerer conditionem aut aspernandam, nisi essent ex familiaribus ejus Judaei & pejores Judaeis Christiani, qui alteram debiti totius partem suam facerent, atque traherent ad sese, imputantes hac lege mihi beneficium solutionis impetratae. Sed haec tantis cum sordibus conjuncta, nec ego admiserim facile, & ne tibi sint audienda in posterum, diligenter cavebo, Falconeri jucundissime. Non exspectas, credo, ut de re litteraria nuntios secundos a me accipias inter res Patriae turbatissimas. Est tamen in eo *Graevius* post sexennem procrastinationem, ut Suetonium suis animadversis, integrisque *Casauboni* ac *Torrentii* commentariis illustratum publico permittat. Idem de *Gronovii* Tacito, deque Seneca variorum, cui observationes *Schultingii* hactenus ineditae accedunt, dictum accipias velim. desudat & sub praelo Amstelædamenti *Meursianus* de trium insularum Cretae videlicet, Cypri ac Rhodi antiquitatibus commentarius, tum & agrimensores antiqui animadversis *Gulielmi Goesii* additis. Ajunt in Germania prodiisse Valerium Maximum cum notis *Johannis Vorstii*, hominis non ineruditi. *Marquardus Gudius*, ex quo in Holstiam ad Paternum larem emigravit, animum matrimonio applicuit. An de litteris ornandis cogitare pergat non dixerim: est enim in compellendis per litteras amicis longe tardissimus. Virgilius meus jam ferme typis est descriptus, etiam majori ex parte Flaccus Valerius. Notas in utrumque scriptorem pressurus tamen adhuc videar, dum tempora adfulgeant magis pacata. Vale.

CICCIOLXXII. a. d. XII. Junii.

P. S. Edoctus sum per amicum, exstitisse olim in bibliotheca V. C. *Lucae Holstenii*, atque adeo etiamnum fortassis exstare S^{ti} Euthalii in epistolas Paulinas commentarium, octava, quam vocant, forma Graece ac Latine Francofurti ad Oderam ante annos plus minus LX. typis descriptum. Hunc libellum cum illa in civitate, in qua fertur luce publica donatus, multo studio curarim indagandum, nec inveniri possit: rogo te obsecroque vehementer, cum alia de causa Holstenianam, quam dixi, bibliothecam adeundam tibi proponas,

Tom. V.

Aaaa

cum

cum investigare ne graveris, meque certiore facere, quo anno sit in lucem prolatus hujus seculi, tum Francofurtine ad Oderam, an ad Moenum sit divulgatus. Potuit enim aberrasse amicus, qui de libello rem me docuit, in nomine civitatis. Quod si ita sese habet, Francofurti ad Moenum erui fortassis possit. Quamquam in civitatis nomine vix erratum esse opinor. Libellum *Sprangenbergii* de Manichaeis per nostratum forulos frustra quaesivi. Virgilius meus ubi prodierit in lucem, quod credo propediem fiet, nisi propositum interpellabit bellica haec tempestas, exemplar sum missurus cum ad alios viros in Italiam illustres, tum ad Eminentissimum Cardinalem *Barberinum*, ac simul gratias acturus meritissimas optimo Principi pro singulari munificentia, qua me cumulatam voluit, illi interim ac me de meliori, quod potes, nota commendes, tum equiti *Puteano*, ejusque genero *Nicolao Rondinino*, *Augustino Favorito*, *Stephano Gradio*, viris clarissimis salutem edicas meis verbis. *Alexandrum Pollinum* elegantissimi virum ingenii e vivis excessisse opinor, nec certus tamen id scio.

EPISTOLA CCCCLXXVI.

OCT. FALCONERIUS.

Nic. Heinio.

Hagam.

Mitto ad te, V. Cl. exemplum antiquae Inscriptionis, de qua fidem tibi meam obligaveram, digna quippe mihi visa est, quae inter praeclara id genus antiquitatis monumenta locum sibi vindicaret, quibus Musaeum tuum refertum esse nullus dubito. Literas tuas vehementer expecto cum tua inprimis causa, ut de tua valetudine certior fiam, qua quidem haud ita firma uti videbaris, tum vero etiam, ut ex iis cognoscam, quid mihi de MSS. Arabicis *Golii* statuendum sit, quos venales adhuc proflare haud ita magno pretio audieram, quamobrem abs te peto majorem in modum, ut de toto hoc negotio diligenter quamprimum ad me scribas. Illud etiam mihi erit gratissimum, si per te scire liceat, num inter Codd. MSS. Arabicos Academiae Lugduno-Batavae reperiatur Historia Haeresis Manichaeorum *Mahomed Ben-Isaack* auctore, is enim liber maximo mihi emolumento foret ad scribendam (quod animo jampridem agitabam) haereseos ejus historiam, quam quidem; quantum per occupationes licebit, deinceps promovere non desinam. Biblia Hebraica sine punctis editionis Amstelodamensis, aut Antverpianae sicubi venalia reperias, ut spero, mihi compares velim, nec non librum aliquem Arabicum itidem sine punctis, e multis, qui Lugduni Batavorum prodierunt, qui quidem versionem Latinam columnatim adjectam, aut saltem e regione habeat. Vidi ipse olim historiam Mulsulmanicam Arabis cujusdam scriptoris, cujus nomen memoria excidit, ab *Erpenio*, ni fallor, interprete Latine redditam, ac columnatim in folio, ut ajunt, impressam. Hunc librum, si quidem venalem nat-

ctus.

Stus fueris una cum aliis, quos habebis ad me perferendos, Baroni *Dell' Isola* tradere licebit, qui propediem isthuc profecturus videbatur, breviq̃ue ad nōs rediturus, ut Aquilgranum, quo de pace ineunda legatus a Caesare designatus est, quamprimum se conferat. Cum haec scripsissem, redditae mihi sunt literae tuae a. d. ix. Maji datae, quibus vix habeo, quod rescribam. *Cupero* viro docto ad illustrandum antiquum marmor *Apothefeos* *Homericae* symbolam quam conferam in praesentia non habeo, caeterum si ectypum ejusdem marmoris Romanis formis excusum usurpare oculis ipsi fuerit opportunum, ejus exemplum, quod penes me est, statim ad te mittetur. De classe vestra, quam se jam pelago commisisse audio, ubi quidquam huc allatum fuerit, quod scitu dignum videatur, ad me scribere ne graveris. Vale interim V. Cl. & me ut facis ama. Bruxellis Idib. Maji cicidclxxiii.

Biblia Hebraica aut saltem eorum partem aliquam si forte apud Judaeum quempiam eorum, qui isthic degunt, reperiri contigerit majoribus caracteribus expressa, quam quae vulgo videntur, editionis Amstelodamensis, erunt mihi multo gratiora, & oculorum meorum hebetudini magis accommodata. Antverpiana illa in 12^o. ut ajunt, minutis apprime caracteribus exarata cave mihi compares, vix enim illis vel perfunctorie legendis sufficiam.

EPISTOLA CCCCLXXVII.

OCT. FALCONERIUS

Nic. Heinsio.

Hagam.

Commodum redditae mihi sunt heri in ipso Tabellarii Italici discessu literae tuae xxvi. Mart. datae, ut, quod de alteris ad Serenissimam Reginam curandis dederas in mandatis, e vestigio exequerer, quas quidem, ut desiderio tuo facerem satis, ad *Franciscum Commelium* misi, hominem mihi omni officii genere devinctum, quo Regina ipsa utitur familiariter. (ipsi namque ab obitu *Benedicti Mellini* Bibliothecae Regiae cura est credita) neque vero dubito, quin ipse operam diligentem ac fidelem in tradendis Reginae literis sit praestiturus. Caeterum Reginae ipsius hortatu scripserat nuperrimis ad me literis *Barberinus* Cardinalis, ut per te *Theodoro Ryckio* de Stephani editione iterum aurem vellerem, teque interprete ab eo discerem, ecquid ipse cogitet de fide sua, qua se ante sexennium Reginae obstrinxerat, liberanda. Elegia tua, cujus mihi copiam fecisti, mirifice sum delectatus, nam praeterquam quod elegantissima est, ut tua omnia sunt, diu est, cum mihi ejusmodi elegantiarum compotem esse non licuit a molestis negotiorum occupationibus, gratulorque interim Bataviae vestrae post foedus initum cum Britannis, te auspice in gratiam cum Musis reditum tandem esse. Libellum Arabicum, & Catalogum Bibliothecae Hemmianae avide exspecto; nam fasciculus, in quo utrumque una cum Athanasio ad me perferendum nuncias, nondum mihi

est redditus. Pecuniam, quam tibi eo nomine debebam, a *Laurentio Magalotto* nostro curatam fuisse mihi persuadeo, quando per amicum *Amstelædamentensem* id assequi non licuit. Vale, *Bataviae* tuae decus, & me, ut facis, amare perge. *Bruxellis* 11. April. *CICIDCLXXIV.*

EPISTOLA CCCCLXXVIII.

N I C. H E I N S I U S

Ost. Falconerio.

Bruxellas.

Quando gravatus non es, litteras a me tibi concreditas curare perferendas ad *Reginam* per amicum tuum ejus familiarem, est profecto id beneficium majus, quam quod nudis verbis remunerari sese patiatur. Quod unum polliceri possum, grati animi testificationem in me desiderari abs te, permittam numquam. Etsi in meis ad *Eminentissimum Principem Franciscum Barberinum*, tua opera non ita nuper curatis litteris, aperueram causas, quae *Theodorum Ryckium* revocassent hactenus ab edendis in publicum *Holstenianis* lucubrationibus, hodierno tamen die repetivi scriptionem, ut intelligat hanc rem nobis esse in praecipuis curis. Calamitati temporum acceptum referri par est, quicquid hîc peccatur nimia procrastinatione. Unde & fit, ut in illa quoque *Stephani Byzantii* editione, quam *Berckelii* animadversis illustratam sub praelo *Typographico* totum jam quadriennium apud nos exerceri alias admonebam, minimum promoveatur hactenus, vix tertia totius operis profligata parte. Haerent fato non dissimili inter typographorum manus antiquitates *Meursianae* trium *Graeciae Insularum* nobiliorum, quas ego nondum in lucem publicam emissas ex *Regia bibliotheca Holmienti* ante hoc quinquennium impetrarem, mea interposita atque adstricta proceribus *Suecanis* fide, mox publicandas fore. Queruntur tanquam ex compacto bibliopolae, propter infessos a milite praesidiario hostili fluvios, chartam editioni promovendae necessariam subvehi ex *Germania* ad nos haudquaquam posse. Nec memini fane quicquam prodire durante hoc bello, quod sit numeri alicujus praeter agrimensores antiquos *Wilhelmi Goesii* cura nuper emissos, & *Antonium Liberalem* publico proxime datum, cum *Berckelii* brevibus animadversis. *Athanasii* opera cum libello *Arabico* inter manus *Petri Francii* hactenus versantur, quod hiberna tempestas navibus ad vos iter intercluserit jampridem. Rem sedulo fatis a me commendatam sibi hac una causa dilatam, ipse indignatur. Si per *Wolfgangum* bibliopolam mox expediri non potest, ut *Danielis Elzevirii* aut alterius cujuscumque opera utatur, auctor fui, ne quid traharis expectatione irrita exoptati codicis. Nam de pretio & satisfactum sibi per *Laurentium Magalottum* fatetur ipse, & meae fidei adstrictus non uno nomine jampridem id egerat, ut librum omni mora procul habita ad te curaret perferendum. *Catalogum Hemmianae bibliothecae Daniel Elzevirius* misisse se scri-

scribit Bruxellas *Henrico Frixio* bibliopolae, ut ab illo tibi tradatur. Si quid ex iis libris coemptum cupis, ejus indiculum ad me mitte, addito singulis codicibus pretio, quo tuos velis. Mihi curae erit ut inveniatur homo fidus, qui rem ex sententia tua det effectam. Vendetur & mense proximo Hagae Comitum bibliotheca satis instructa libris rarioribus, quam typis descriptam proxime tui juris faciam. Quotidianae ferme sunt apud nos hae auctiones, sed exquisitam mercem rarius prae se ferunt, quare & indicibus earum ad te mittendis supersedeo, nec defuturus tamen officio, si id gratum habebis. Vale, virorum decus, & nobis favere perge. Ex *Frederico Spanhemio* bibliothecae Lugduno Batavae custode intelligebam nuper, inventum sibi illic inter libros Arabicos nescio quid lucubrationis de secta Manichaea, quod tuae in spem gratiae describendum curaret. Hagae Comitum Anno MDCCCLXXIV. xi. Aprilis.

EPISTOLA CCCCLXXIX.

OCT. FALCONERIUS

Nic. Heinsio.

Hagam.

Bene est V. Cl. quod moras, quae nobis Stephanum Holstenianae editionis haectenus inviderunt, non nisi calamitati temporum imputare liceat, spes enim est brevi fore, ut, pristinae tranquillitati Republica prope restituta, otium quoque apud vos Typographis concilietur ad eruditos literatorum foetus in lucem asserendos. Athanasium & libellum Arabicum adhuc desidero, quibus, si per tempus adhuc licet, adjungas velim Antoninum Liberalem, & *Danielis* patris tui epistolas. Pecuniam, quam mihi eo nomine expensam referes, curabit tibi *Joannes a Venazzano* Patricius Florentinus, qui Amstelædamii negociatur. Bibliothecae Hemmianae Catalogus nondum ad *Henricum Frixium* Bibliopolam Bruxellensem est perlatus, quod sane doleo, instat enim jam tempus auctionis. Indicem alterius Bibliothecae, cujus ipse spem facis, avide expecto. Lucubrationis de secta Manichaea, quam inter Codices Arabicos Bibliothecae Lugduno-Batavae repertam nuper significabas, auctorem esse auguror *Mahomed Ben-Isaack*, cujus mentio apud *Hottingerum* in Bibliotheca Orientali. Quae si vera sint, est plane ut a me μήνυτρον jure postules pro indicio scriptoris a me diu multumque quaesiti. Caeterum *Frederico Spanhemio* V. Cl. multum erit, quod debeam, si ejus opera diuturni voti compotem esse licebit. De ea lucubratione cujuscumque tandem illa sit, plura a te, cum vacaverit, expecto. Vale. Bruxellis xxii. Aprilis MDCCCLXXIV.

EPISTOLA CCCCLXXX.

NIC. HEINSIUS

Oët. Falconerio.

Bruxellas.

NEC Athanasium nec indicem Hemmianae bibliothecae ad te perlatos esse haëtenus, equidem miror, cum uterque missi sint diversa via, nec aberrasse potuerint. Quapropter fit; ut nuntios propediem a te expectem, qui scrupulum omnem mihi eximant, teque voti compotem esse factum testentur. In mittendo indice rem indigere festinationis, ac periculum in mora esse, cum plus satis *Elzevirium* docuerim, caute ab illo actum oportuit, sicut mihi erat pollicitus. Athanasium *Wolfgangus* Librarius ad te curavit. Index alter Mylianae bibliothecae tibi apud me paratus est cum Antoninò Liberali editionis nuperrimae. Ea Lunae die proximo ad te mittentur per nautam, qui solet statim diebus hinc Antverpiam contendere. Spondet is curae sibi fore, ut fasciculus inde Bruxellas confestim feratur. Tabellarios hoc fasce oneratos nolui, ne te impensis parum necessariis gravarem; Epistolas parentis mei nullas junctim editas fuisse possum recordari: alioquin harum quoque copia tibi jam a me esset facta. Leidam proximis diebus me contuleram, ut cum *Frederico Spanhemio* agerem de libello Arabico, ad Manichaeam sectam spectante. Verum illo domi non reperto, dicebatur enim rusticari in villa suburbana, cum & ego reditum sub noctem maturarem, recepit in se *Theodorus Ryckius* (a quo responsum expecto propediem) acturum sese de hoc libello aut cum ipso *Spanhemio*, aut cum illo, cujus nomen mihi excidit, qui Catalogum codicum Arabicorum publica in bibliotheca apud Leidenenses existantium concinnare dicitur. *Berckelius*, qui Liberalem edidit, est is ipse, qui in Stephano Byzantio publici juris faciendo nunc occupatur. Fratrem tuum, vir illustrissime, natum maximum e vivis excessisse audio & indigne fero, cum nihil illarum rerum, quae ad te pertinent, alienum a me censerì oporteat. Quanquam iis sapientiae praeceptis abunde instructum te novi, ut doloris solatia omnium optime a temet ipso mutuari & possis & debeas, cupiam tamen cum maxime conferri a me in medium non nihil posse, quod iustissimo maerori tuo vel ex parte mitigando, si non tollendo penitus, conducat, Vale. In Hemmiana vel Myliana auctione, si quos libros tibi addictos cupis, mihi negotium per mitte quaeso, sed ea lege, ut cuique codici pretium certum adscribas, ultra quod licitatori non sit integrum se proferre. Circumspiciam hominem exploratae fidei, cui negotium omne mandetur, si mihimet ipsi interesse auctioni minime licebit. Hagae Comitum Anno MDCLXXIV. IV. Maji.

EPISTOLA CCCCLXXXI.

OCT. FALCONERIUS

*Nic. Heinsio.**Hagani.*

Reditus mihi tandem est a *Foppenio* Bruxellensi Bibliopola fasciculus, in quo Athanasii opera & libellus Arabicus. Indicem Hemmianae Bibliothecae adhuc desidero, eumque nescio quo fato alicubi, ut opinor, interceptum non possum non aegre ferre, quod occasionem adeo praeclaram Bibliothecam meam rarioribus libris instruendi elabi omnino videam. Et is mihi sane alicui solatio fuisset ad maerorem, quo jam dudum oppressus jaceo ob acerbissimum fratris casum, qui magnum cum mihi tum familiae universae luctum & vastitatem attulit. Verum, quando sic visum est superis, modice id ferendum est, ut hominem Christianum decet. Tu, si me amas, Indicem Mylianum quantocius ad me perferendum curato, ne hoc quoque voto frustremur. Codicibus, quos mihi comparandos seligam, certum adscribam pretium, quo illos mihi coemptos velim. Pecuniam, quae tibi a me non uno nomine debetur, quamque deinceps in meos usus erogabis, curabit tibi *Joannes a Venazzano* Patricius Florentinus, qui Amstelædamii negotiatur, ad quem nuper ea de re dedi literas. Vale, amicorum optime, & in te amando colendoque me nemini concedere tibi persuadeas. Bruxellis XIV. Maji MDCLXXIV.

EPISTOLA CCCCLXXXII.

NIC. HEINSIUS

*Oët. Falconerio.**Bruxellas.*

Traditis mihi litteris tuis oppido jucundis ac gratis, nihil habui prius, quam agere cum *Plumeri* non ita nuper vivis subducti filio, uti libros in auctione Hemmianae bibliothecae vaenum expositos, cui illum interfuturum haud ignorabam, nobis addiceret. De iis loquor, quos scripto commissos mihi designare haud quaquam es gravatus, si haberi possent pretio non infano aut valde insalubri. In eo tamen haesitabam fateor, quod *Antonius Maliabeckius* vir Clarissimus, & tibi perquam familiaris, eosdem poene omnes nomine Serenissimi Etruriae Magni Ducis jam ante coemendos mihi injunxerat. Sed neque desperandum est alias propediem in promptu occasiones fore, per quas comparari possint libri abs te designati, & persuasum habeo ut credam, desiderii tanti Principis haud gravatim te concessurum esse. Quanquam nec spondere possum, libros omnes hac auctione comparari posse, quod ex rumore cognoscam, plerosque illic distrahi iniquum plane in modum. Utinam vero & tempestivius eos, quos desiderari abs te intelligo, & numero plures designasses. Rebus enim nostris non ita nuper in praesentissimum discrimen adductis, complures bibliothecae vili admodum pretio sunt distractae:

nunc

nunc cum respirare e periculo paulatim incipiamus, de die in diem pretium libris non minus quam fundis accrescit. Sed tamen cum auctiones tantum non quotidianae per civitates Batavicas bibliothecarum soleant institui ut minus celebrium, sic emptores parcius trahentium; tuis invigilare commodis non intermittam; ut, quod confieri in praesens per me nequit, id mea post opera consequaris. Utere igitur me in posterum tanquam eo, quem ingentibus meritis tuum omni ex parte fecisti. Post octiduum ad Amstelaedamios excurram, visurus, quid effectum in rem nostram a *Plumero* sit datum: idque ut cognoscas, opera a me dabitur. Descriptio veteris sepulchri plurimum sane voluptatis mihi tulit: parumque abest, quin felicitati vestrae invideam, quibus nihil non rerum prosperarum soleo apprecari; tamen, cum vobis quotidianae obtingant istae deliciae, vix annuae nobis longissime remotis, & in solo constitutis bonae frugis infaecundo plane; cum ea sit telluris vestrae ubertas, ut ex ipsis etiam sepulchris eruditae semper antiquitatis quid gignatur prodeatque. *Laurentium Magalottum*, tui nominis studiosissimum audio Hamburgum pervenisse, sed minus valentem, quam velim. Auguror per litteras proximas non solum me intellecturum faustiora omnia de restituta in integrum sanitate: sed cogniturum quoque, iter Suecanum ex voto processisse. Nunc ingentis beneficii loco nescio an ausim flagitare, ut Serenissimo Principi Cardinali ab Etruria obsequia mea, ubi opportunum videbitur, sistas. Nihil enim prosequor majore cultu, nihil impensius veneror. Vale. Hagae Com. A. MDCLXXIV. xv. Maji.

Opera historica & poëtica Principis *Paderbornii* nondum perlata Florentiam miror equidem, cum Serenissimo Principi Cardinali ante menses jam multos per me sint missae.

EPISTOLA CCCCLXXXIII.

OCT. FALCONERIUS

Nic. Heinsio.

Hagam.

Scipfi jam ad te superioribus literis Bibliothecae Mylianae Catalogum fuisse Sad me perlatum, misique etiam nonnullorum librorum indicem, quorum possidendi desiderio teneor. De Hemmianis non adhuc conclamatum esse ex posterioribus literis tuis, quae mihi heri sunt redditae, lubens agnosco. *Laurentii Magalotti* nostri valetudo non est, cur te sollicitum habeat, jam pridem enim ipse nuntiabat, se a morbo, quo fuerat tentatus, convaluisse, jamque Stokolmum cogitare. Romae nihil in re literaria novi quod sciam. Geographiam Urbis Aeternae e marmoribus seu mavis fragmentis Farnesianis descriptam, atque observationibus *Joannis Petri Bellorii* illustratam, quae *Camilli Mancini* Cardinalis beneficio publici iuris est facta, propediem expecto; ejusque tibi copiam statim facere non omittam. Serenissimae Reginae literas *Tabellario Italico* proxime ad me adlatas hîc adjunctas habes. Vale & me ama. Bruxellis xvi. Maji MDCLXXIV.

EPI-

EPISTOLA CCCCLXXXIV.

NIC. HEINSIUS

*Oët. Falconerio.**Bruxellas.*

PErлатis ad me hoc ipso mane literis tuis plurimum equidem sum miratus Hemmianae bibliothecae catalogum tam nequiter fuisse curatum. Idque *Elzevirio* per epistolam exprobravi: quanquam idem quoque fatum videtur subiisse Catalogus Bibliothecae Mylianae, quem ipse nautae Antverpiensi traderam. Sed hoc damnum jam nunc per me refarcitur, cum tempestive possit. De Hemmiano indice res non est integra: cum bibliotheca partem majorem jam distracta sit ac vaenum data. Pro solatio tamen minime vano queat esse, quod infano pretio codices illius bibliothecae plerique dicuntur ab emptoribus addici. Adeo quidem, ut exiguam partem illorum quoque, quos Magnus Etruriae Dux coemendos injunxerat mihi, sim consecutus; Inter quos Dionysium Halicarnassensem Sylburgii Joachimicis, seu pataconibus xi. Lucianum Bourdelotii vii. Unde de reliquis conjecturam facile feceris. Sed id genus auctores Graeco-Latini praestantium editionum nunquam non care, ut novisti, prostant. Fit tamen quandoque, ut distrahantur bibliothecae minus celebres; e quibus salubriore pretio libri comparantur, ut plurimum. Codices Chifletianos vetustos a te redemptos, & Florentiam missos fert rumor. An tota viri doctissimi bibliotheca aut distracta sit aut distrahenda cupio ex te rescire. Pro Athanasio, quod debebatur, pretium *Laurentius Magalottus* jam persolvit *Petro Francio*, ante suam ex hisce regionibus emigrationem. Mihi si deberi quicquam tuo arbitraris nomine, vir Illustrissime, fugit te ratio. Age tamen, occasionem praebe, sodes, qua debeas nonnihil illi, qui totus est tuo in aere jam pridem. Peracerbum funus Germani tui plurimum equidem moeroris mihi quoque attulit. Sed nolo vulnus intempestiva consolatione rescindere. Haec festinans, ne Mylianae bibliothecae Index serus ad te perveniret, Vale. Hagae Comitum Anno MDCLXXIV. XIX. Maji.

EPISTOLA CCCCLXXXV.

OCT. FALCONERIUS

*Nic. Heinsio.**Hagam.*

Bibliotheca Chifletiana jam ab Augusto mense superioris anni tota quanta erat distracta fuit, si Plinianum illum codicem aliosque MSS. Graecos excipias, quos heres secum Vefontionem comportavit. Bibliothecae Mylianae Catalogus una cum literis tuis mihi hoc ipso mane est redditus, ex quo libros

Tom. V.

Bbbb

quos

quos hîc descriptos habes, mihi coemptos velim. Pretium cuiusque adnota-
vi, ut a me postulasti, ea tamen lege, ut si pro raritate librorum amplius quid
censueris erogandum, penes te arbitrium sit. De libris, quos selegeram
ex Hemmiana actum esse ex tuis cognosco, quod jam minus moleste fe-
ram, quandoquidem immani adeo pretio venduntur. Bruxellis XXI. Maji.
CICIDCLXXIV.

EPISTOLA CCCCLXXXVI.

NIC. HEINSIUS

Oët. Falconerio.

Bruxellas.

ALterum certe Mylianae bibliothecae Catalogum, quem proxime mitte-
bam, ad te perlatum esse confido, quando prioris curam hominibus sub-
lestae fidei demandatam fuisse cum nostro malo nunc experimur. Nauta,
qui fasciculum susceperat curandum, compellatus super hac re asseverat, ante
dies quatuordecim eum abs se traditum horum uni ex nuntiis, quos vocant,
qui statis vicibus alternis Bruxellas Antverpia soleant commeare, nomen ejus
non esse compertum sibi: nihilominus operam abs se dandam fore, quando
Antverpiam cis paucos dies rursus cogitet, ut deprehendat illic hominem ac
exploret causas, cur fidem in se claudicare sit passus. Si retrahi e fuga aut
latibulis fasciculus non potest, Antonini Liberalis aliud exemplar ad te mitte-
tur, una cum Stephani Byzantii fragmento & periplo Hannonis, quos libellos
notis illustratos abs sese idem *Berkelius* in publicum propediem esse prodituros
nudius quartus adfirmabat mihi. Post acceptas ultimas tuas confestim de coe-
mendis, quos desiderari abs te testabare, libris rem *Plumero* dedi in mandatis.
Saltem illos comparare conaretur, qui nondum essent distracti. Nam ad Geo-
graphicos codices die hesterno in ipsa auctione jam erat perventum. In My-
liana bibliotheca, si quid jusseris, felicius me tuis commodis gratificari posse
spes est, quando ipse auctioni sum interfuturus. Memini videre hoc in Cata-
logo nonnullos ex Germanicarum, Britannicarumque rerum scriptoribus,
quos ex Hemmianis libris te cupere coemptos serus significasti. Roma si quid
in re litteraria novi proxime allatum est, ejus quaeso ignarum ne me sine.
Vale. Hagae Comitum CICIDCLXXXIV. XXIV. Maji.

De *Laurentio Magalotto* cum nihil audiam jampridem, habet ejus valetudo
mire me sollicitum, quam nutare datis Hamburgo litteris sub initio mensis
nunc vertentis testabar.

EPISTOLA CCCCLXXXVII.

NIC. HEINSIUS

Oët. Falconerio.

Bruxellas.

Quid librorum bibliothecae tuae accesserit per auctionem nuperam ex hoc licet indice cognoscas. Reliqui pretium, quod posueras, cum excesserint, alium dominum sunt nacti. In Hemmianae bibliothecae auctione animose satis, addo & stulte, res a licitatoribus gesta est. Nihil majoris unquam distractum inter nos iis libris. Unde fit, ut non nisi codices paucissimos ex quam plurimis, quos jusseram comparari, meis usibus addictos teneam, Tibi vix quicquam assertum ex tanta librorum copia; quos emendos designaras, nisi unus fortasse Sardus de nummis antiquis, quem inter meos video relatum. Nec magno Etruriae Duci gratificari, quod volueram unice, nobis licuit, nisi in paucis. Alias, ubi commodi vestri ratio a me habenda erit, fortunam magis annuentem ut experiar fore equidem confido. E binis rerum Britannicarum exemplaribus alterum, minus utcunque mundum, florenis x. venit & assibus quinis: alterum tibi asservo satis nitidum: opinor fore, ut plures bibliothecae hoc anno venum apud nos exponantur, quarum indices suo tempore ad te perferendos curabo. De Chiffletiana mature rescivissem velim: quam libris rarioribus fuisse satis instructam vix dubium est mihi. Et solent per Brabantiam minoris longe distrahi boni codices, quam hîc terrarum. Quadrienium jam agitur, quod *Ludovici Nonii* illius, qui *Huberti Goltzii* opera antiquaria animadversis suis illustravit, supellex libraria Antverpiae distracta est pretio perquam vili; cum tamen ex rumore partim, partim experientia atque usu edoctus habeam compertum, rarissimis voluminibus bibliothecam eam conspicuam fuisse: audio complura antiquitatis monumenta in agro suburbano recens esse effossa. Sed de iis plura proxime, uti & de *Santini* litteris, cui responsum a me debetur, quo ab officio nunc me valetudo avocat parum firma. Mirari video Reginam, expungendi debiti negotium adhuc vacillare, cui tamen ipsa litteris suis ante hoc biennium in Sueciam datis cavisse se profiteatur. Persuasus est *Stantinius* ut credat, nusquam terrarum inveniri me potuisse. Sed occaecavit illos, quibus id negotii erat demandatum, ne me viderent satis obvium, præpostera avaritia, & averfus a meis commodis animus. Vale, Virorum Nobilissime, & mihi, ut hætenus, velle quaeso perge. Hagae Comitum MDCLXXIV. XIII. Junii.

EPISTOLA CCCCLXXXVIII.

OCT. FALCONERIUS

*Nic. Heinsio.**Hagae.*

Minus est quod doleam V. Cl. mhi auctionem Bibliothecae Hemmianae parum feliciter successisse, quando & majoris fastigii licitantibus res ad votum minime processit. Multum interea debere me tibi sentio, quod opera, ac diligentia tua spes nostras omnino irritas esse non siveris. De auctione Bibliothecae Chifletianae, quae, ut monui, anno superiore distracta est, eo te certiore facere praetermisi, quod crederem vobis in tanta librorum copia, quae passim vaenundantur, de iis, qui alibi terrarum venales exponuntur, non esse laborandum. Caeterum si qua ejusmodi in posterum occasio se obtulerit, non committam a te desiderari officium meum. Quae narras de antiquis monumentis isthic recens effossis, mirifice salivam mihi moverunt; nosti enim quantus sim ejusmodi cimeliorum amator. Quamobrem cum primum vacaveris fac ut de tota re diligenter ad me scribas. Ego Ichnographiam urbis Romae statim atque accepero ad te perferendam curabo. Vale, Bruxellis. XVIIII. CIOIOCLXXIV.

EPISTOLA CCCCLXXXIX.

NIC. HEINSIUS

*Oct. Falconerio.**Bruxellas.*

NON defui sane officiis tibi debitis in nupera illa Hemmianae Bibliothecae auctione, sed praeter solitum morem tanta animorum contentione certatum est a licitatoribus prodigis & tantum non insanientibus; ut simile apud nos nihil meminerimus gestum. Ego certe ex plurimis, quos meos in usus comparari jusseram, non nisi paucissimos sum nactus codices, & quidem vulgaris notae omnes, quos in bibliopoliis minoris longe prostantes licuisset invenire. Plerosque ex his, quos coemendos mihi injunxeras, jam ante *Antonius Magliabechius* noster comparandos designarat: sed neutri vestrum hac occasione licuit gratificari. Ipse ut arbitreris pretio immodico distractos esse partem potissimam libros, specimen subjeci horum codicum, quos emptos cupiebas, adscripto eo pretio, quo aliis una licitantibus sunt comparati. Multas auctiones promittit nobis autumnus proximus, ut bibliothecarum nimis celebrium, sic spem facientes fore, ut libri minoris illic veneant. Quod si sub illam tempestatem hic terrarum mihi contigerit degere, tuis commodis desideriisque quin omni in id collata opera sim invigilaturus, dubitare noli. Dum Amstelodami distrahuntur hi codices, quorum Catalogum jam vidisti, instituta fuit Hagae Comitum auctione Bibliothecae alterius, in quo libri ut pauciores nume-

ro, sic selecti rarique partem maximam venales occurrebant. Sed nihil illic codicum abs te desideratorum, praeter unum Dionysium Halicarnassensem Sylburgii, qui simili fere, quo Hemmianus, illic pretio distrahebatur, quod minimum mihi visum, etsi decursa hyeme Leidae distractum memini videre pataconibus xiiii. utinam plures libri ex hisce, qui abs te desiderantur, designasses! Sic fieri poterit ut ex multis paucos tibi assertum ivissem: idque ut facias etiamnum vehementer rogo: cum tui studium, quod singulare prorsus prae me fero, non dubio argumento compertum tibi approbatumque cupiam unice. Monumentum illud sepulchrale, cujus descriptionem ad me misisti, in via suburbana effossi nuper, est profecto quantivis pretii ducendum. Fore aliquando, ut aeri incidatur, ac publici juris fiat, vix dubito. Nos, ex quo tempestas bellica nonnihil detonare coepit, tarde sic satis ad intermissa studia redimus, paulatim tamen. *Andream Bosium* in Germania superiore vivis subductum audio. Vale, vir R. praestantissime, & me in numero vestrorum habere constanter perge. Hagae Comitum cccclxxiv. xviii. Junii.

P. S. Chisletianam mihi ignaro elapsam nolim. Ejus Catalogum tuo beneficio si dabitur nancisci, exosculabor mei demerendi singulare in te studium. Sollemne enim mihi est indices praestantium bibliothecarum asservare in scriniis, quorum copia ingenti sum instructus. *Santini* literis rescribere nondum datur mihi, quod Hamburgo nonnihil responsi expectem a *Langermanno* & ab amicis e Suecia, unde cognoscam, quis in culpa sit, quod regii mandati notitia tamdiu sim frustratus. *Texeira* mihi hîc offuisse suspicor, quanquam ille omnem facti invidiam a se conatur amoliri.

EPISTOLA CCCCXC.

OCT. FALCONERIUS

Nic. Heinsio.

Hagam.

HAec sunt V. Cl. quae de antiquo, quod innuis, monumento in agro suburbano nuper reperto perscripta ad me sunt ab amico rerum quidem antiquarum parum perito, sed ejusmodi elegantiarum non incurioso. Effossam scilicet secus viam Flaminiam ad secundum ab urbe lapidem prope prata Quintii sepulchralem cellam e vivo silice excavatam, in qua urnae nescio quot e Tiburtino lapide cadaveribus condendis, quorum unum aut alterum in ipsis urnis integrum repertum, statim ac lucem viderunt, prae nimia vetustate in cineres protinus diffluxere. Cella ipsa affabre concamerata atque egregiis picturis ornata, quae Ovidianas Metamorphoses exhibebant, pavimento etiam tessellato ex opere musivo. Inscriptiones binas ibidem repertas infra descriptas habes.

D. M.

Q. NASONIUS AMBROSI
US SIBI ET SUIS FECIT LI
BERTIS LIBERTATIBUSQUE.

Bbbb 3.

NA-

OCTAVII FALCONERII

NASONIAE URBICE ET...
 UCI SUAE ET COL... CONLI
 BERTIS SUIS E... LI...
 POSTIRISQUE EOR.....

D. M.

L. VOLUSIO VALENTINO
 FECIT SCARIA FORTU
 NATA COJUX QUAE
 VIXIT CUM JUM ANN.
 IS x. M. III. COJUGI BE
 NEMERENTI QUI VI
 XIT AN XI. M. III. DIE
 BUS VI. BENE MEREN
 TI FECIT

Libros ex Miliana Bibliotheca tua opera mihi comparatos, nisi eos ad me mittendi occasio sit in promptu, proximum erit, ut *Petro Blaeu* tradas ad me perferendos una cum volumine tabularum Geographicarum, quod propediem ad me missurus est. De Catalogo Bibliothecae Chifletianae faciam tibi tatis, ut primum hominem nactus fuero, cui isthuc proficiscenti fasciculum tuto credere possim. *Andream Bosium* virum doctum, & de re literaria bene merentem, fato cessisse tecum doleo. Ceterum de nova Josephi editione non est, cur adeo sis sollicitus. Edico namque tibi, si nescis, hanc ipsam spartam adornari ab Oxoniensibus, quorum in usum, me procurante, describuntur jam variae lectiones ex Codicibus Vaticanis. *Laurentius Magalottus* noster jam ineunti mense Junio Stokholmium appulit, ubi integram aestatem peracturus videbatur. Vale Bruxellis 11. Jul. CIOIOCLXXIV.

EPISTOLA CCCCXCI.

N I C. H E I N S I U S

Oët. Falconerio.

Bruxellas.

Lites privatae, de quibus & alias conquerentem me audisti, totum me caligine quadam mentis occaecatae involutum habuerunt; idque eo magis, quod rebus forensibus mox proferendis, ob ferias aestivas jam nunc ingruentes, Judex quotidiana prece fuit conveniendus, ut rem daret expeditam ante Kalendas Sextiles. Jam intelligis credo, quid in causa fuerit diuturnioris silentii, cum nil majori sit in voluptate mihi quam tecum loqui, tibi que operam qualemcunque vel in minimis negotiis approbare. Cis dies paucos Amstelodamum cogito, laturus mecum libros, quos designabam nuper, ut aut *Blavio* tradantur ad te mittendi, aut alia quacunque via tui juris mox fiant. Retardavit, fateor, me nonnihil expectatio Hannonis in publicum prodituri apud Leidenenses, cujus exemplar tamen tuis destinatum usibus ab editore nondum accepi.

cepi. Quae mecum communicata voluisti super monumento sepulchrali recens in via Flaminiana effosso, plane respondent iis, quae ejusdem argumenti *Panciatichus* & *Antonius Magliabechius* complura ad me non ita nuper perscribere. Addebat *Carolus Datus*, alibi quoque reperta nonnulla vivis expressa coloribus faberrime, quae aeri incudenda ac publico permittenda mox forent. De *Andrea Bosio*, quem e vivis sublatum volebant nuper, an res sic sese habeat, nondum satis est exploratum. Vidi enim, qui huic rumori obloquerentur. Rem totam aut ex *Graevio*, aut aliunde resciscam propediem, nec te sinam ignorare. Habes hinc responsi nonnihil ad Abbatem *Santinum*. Id aequo longius proferendum fuit, quod certiores a Suecia nuncios opperibar, quid super mandato Regiae Majestatis D. *Kurcius* sibi faciendum proposuisset. Sed cum sim edoctus, utrumque horum, ad quos Holmiam ea de re scripseram, inde perfectos pedem movisse, tertius amicorum super re eadem a me proximis diebus est compellatus. Interim *Santino*, ne quid sequius interpretetur silentium meum, gratias in antecessum agendas existimaui, dum praestolor certiores a D. *Kurckio* nuntios, qui ante Septembres Kalendas vix apparebunt hinc terrarum. Vale, Decus & Ornamentum artium bonarum singulare. Hagae Comitum MDCLXXIV. xxx. Julii.

EPISTOLA CCCXCII.

NIC. HEINSIUS

Ost. Falconerio.

Bruxellas.

Dies nunc agitur, quantum meminisse datur, vicesimus tertius, cum libros, quos in auctione Mylianae bibliothecae tibi addictos penes me asservabam haecenus, De *Venazzano* negotiatori apud Amstelodamios Etrusco tradendas curavi, sic suadente *Blavio*: qui asserebat, ejus opera sese solere uti, quoties supellectilis librariae nonnihil aut rei alterius mittendum ad te sibi foret. Reliquum est, ut sperem, ipsum officio non indiligenter esse perfunctum. Ceterum e re utriusque nostrum erit fortasse, si designes nonneminem ex amicis tuis Antverpianis, ad quem curari a me possit, si quid in posterum ad te perferri velim. Ita enim nimiae hujus procrastinationis compendia, uti opinor, fient; cum naves ex hoc oppido Antverpiam versus bis terve statis per hebdomadem diebus, nautae Bruxellas recta contendant. Septembri mense post res Academicas & forenses prolatas, ab auctionibus bibliothecarum apud nos instituendis, denuo initium fiet. Quando operam dabo, ut illos, quos jam indicasti, & si quos porro indicabis, codices nanciscar. Solent enim Catalogi ut plurimum, non nisi paucis ante ipsam auctionem diebus in publicum proferri, ut ad te tempestive satis vix queant mitti. Conabor tamen & hinc desideriis tuis gratificari pro virili, si jusseris. Hannonis Periplus cum Stephani Byzantini fragmento, *Berckelii* opera, jam prodiiisset in lucem, nisi quod monumentum *Adulitanum* hisce libellis editor adjectum velit, cujus exemplar a me impetravit. Plura de studiis communibus nuntianda non occurrunt.

De

De *Bosio* vivis nuper admodum subducto nimium veros fuisse rumores audio perquam invitus. Vale, Reverendissime & Illustrissime Domine. Hagae Comitum CIOIOCLXXIV. XXVII. Augusti.

EPISTOLA CCCCXCHII.

OCT. FALCONERIUS

Nic. Heinsio.

Hagam.

Reditus heri tandem mihi est fasciculus librorum, quem *Joanni Blaeu* tradideras ad me perferendum. Hujus ut me compotem fuisse nunciarem distuli haecenus rescribere posterioribus literis tuis, quibus alligatae erant alterae ad *Santinium*, quas quidem *Paulo* fratri statim misi, ut earum curandarum negotium in se suscipiat. Jam enim ab obitu communis fratris ille Romae egit, ut negotia domestica procuret. Ichnographiam urbis Romae adhuc desidero. Eram in his ipsis scribendis, cum redditae mihi sunt literae tuae XXVII. Aug. datae, quibus nihil habeo quod rescribam, nisi me tibi plurimum debere ob ea, quae de re libraria nuncias, in quo agnosco humanitatem tuam, meque tibi vel hoc nomine maxime obstrictum sentio, quod operam tuam in auctionibus Bibliothecarum, quae proxime fient, ultro pollicearis. Hannonis periplum Monumenti Adulitanii accessione tuo beneficio fuisse locupletatum vehementer gaudeo gratulorque antiquitatis amantibus. Tu vero ejus exemplum, statim atque in lucem prodierit, fac ad me mittas. Vale V. Cl. & pro tua humanitate praeproperae scriptioni ignosce. Bruxellis VI. Septemb. CIOIOCLXXIV.

EPISTOLA CCCCXCIV.

NIC. HEINSIUS

Oct. Falconerio.

Bruxellas.

Dilutius fateor, responsum ad tuas jucundissimas distuli, quam obsequii mei, tibi jam pridem devoti, rationes postulabant. Sed dum *Abramus Berckelius* spondet mox fore, ut ipse Stephani Byzantii, abs se nuper editum fragmentum ad te mittat, quod a me expectabas, nec tamen is promissa praestet haecenus, inter hanc hominis lenti procrastinationem video invitus temporis non parum effluxisse. Cis paucos tamen dies, cum denuo mihi ad Lugdunenses nostros sit excurrendum, opera tunc a me dabitur, ut aut per *Berckelium*, aut, si is pollicitis deesse pergit, per memet ipsum libelli hujus exemplar nanciscare. Illa enim via in agrum Ultrajectinum iter meditor, quo Bibliothecam ex Suecia recens allatam curavi devehendam in villam suburbanam, ut a turbis remotus, eam tempestate hiberna usurpare oculis dudum non inspectam, & excutere majore cum otio possim. Sed sunt
prae-

praeter litem incommodam & diuturnam, nunc tamen in extremis agentem, alia complura, quae nondum permittunt me ab hac aula abesse. Ea propter non nisi dierum paucorum hunc excursum mihi instituendum proposui. Caeterum, vir illustrissime, perlatos tandem ad te libros, quos in auctione Mylianae bibliothecae tuis usibus compararam, id equidem impense gaudeo. Reliquos abs te desideratos, ut nanciscar quoque, curae inprimis mihi erit. Fore nimirum opinor, ut hyems proxima copiam bibliothecarum uberrimam nobis venalem proponat. In editione Monumenti Adulitanani *Berckelius* secutus est apographum *Leonis Allatii*, typis Romanis olim descriptum, cum satius omnino foret, expressum id fuisse secundum *Indopleustae* a Theveneto editi scripturam, aliquanto emendatiorem, ut puto. Negotium meum quod fratri tuo voluisti commendatum, exosculor profusam tuam humanitatem. Vale, rei Romanae decus eximium. Hagae Comitum MDCLXXIV. VIII. Octobr.

EPISTOLA CCCCXCV.

NIC. HEINSIUS

Oët. Falconerio.

Bruxellas.

B*erckelium* apud Leideneses meos cum nuper in transcurso viderem, dum in villam Trajectini agri contendo, significavit is mihi, fragmentum Stephani Byzantii tibi destinatum una cum litteris in promptu esse, quod ego in reditu me oblaturum pollicebar. Sed oppressus in ipsa via a valetudine promissum praestare non potui. Nunc nuntio, Annales Ecclesiasticos Saliani venales me invenisse Amstelodami, quos tu in auctione bibliothecae Hemmianae comparatos cupiebas, pretio iis posito, si recordor probe, scutatorum XII, sed frustra. Alterum exemplar quod *Plumerus* bibliopola penes se extare mihi asseveravit, haberi poterit scutatis VIII, ita enim cum illo convenit mihi, si tu emptionem haberes ratam. Posse enim fieri, ut librum aliunde jam sis nactus. Quapropter scribe quaeso quamprimum, quid statuas ipse. Nactus sum quoque Saxonem Grammaticum editionis Danicae Trajecti. De reliquis suo tempore videbitur. Et haec quidem haecenus. Hamburgo nuper perlatus est ad me Hyginus *Schefferi*. Sed frivolis imtempestivis occupationes tuas interpellare religio est mihi. Vale, vir summe. Hagae Comitum MDCLXXIV. XXV. Octobr.

EPISTOLA CCCCXCVI.

OCT. FALCONERIUS

*Nic. Heinsio.**Hagam.*

A Sfiduis amicorum precibus, atque amicorum hortatu adduci tandem sum passus, ut plagam nuper familiae meae inflictam ab obitu fratris praesentia mea refarcirem, quamobrem impetrata venia e Belgio discedendi propediem me in viam dabo, ut ante Brumam urbe aeterna potiri liceat, ubi pro veteri nostra familiaritate habebis me ad omnia officia paratissimum. Saliani Annales, dummodo sint editionis Parisiensis, scutatis VIII. libens mihi comparatos velim. Quamobrem emptionem a te factam ultro ratam habeo. Sed cave ne pro ipso Annalium corpore, quod sex voluminibus constat, Epitomen tibi obtrudat Bibliopola. Vix enim credere audeo tam vili pretio illud tibi stetisse. De Saxone Grammatico gratias tibi habeo permagnas. Pecuniam in utrumque erogatam curabit tibi *Joannes de Venazzano*, cui etiam libros ipsos ac Stephani fragmentum quamprimum trades, in Italiam cum sarcinis mari devehendos. Ichnographiam veteris Romae tandem a *Spanhemio* accepi, quam ante discessum *Foppenio* Bibliopolae Bruxellensi tradam, ut cum primum occasio se obtulerit ad *Elzevirium* mittat. Vale, mi Heinsi, & tanquam in procinctu properanti ignosce. Bruxellis XXIX. Octobr. CIOIOCLXXIV.

EPISTOLA CCCCXCVII.

NIC. HEINSIUS

*Oct. Falconerio.**Bruxellas.*

NON opinabar fore equidem, ut tantum vulneris acerba mors fratris tui, praestantissimi viri, inflictura mihi esset, quantum infligi nunc intelligo, perlectis litteris tuis, quae tuum consilium de deferendo ante brumam Belgio hoc nostro mihi aperiunt. Fluxa nimirum & caduca spe ratio mortalitatis tota constat: cum ego vere proximo excursus mihi Bruxellas moliendum pridem proposuissem, ut te illic complecterer tuisque satiarer alloquiis, quorum fructus brevissimus contigisset mihi anno proxime decurso, quando ab urbe ad nos recens adventabas. Sed cum utilitatis tuae pars praecipua me tangat haud modice, quem multis beneficiis obrutum jamdudum habes, oportet, ut dolori temperem, ac solitudinem aequo animo feram, quam mihi discessus tuus minatur: obtestatus te & benignitatis tuae genium unice, ne immensa locorum intercapedine memoriam mei tuo in animo patiaris oblitterari. Ad *Plummerum* bibliopolam hodie scribo, ut Saliani Annales, eo, quo inter nos convenit, pretio seponat mihi cessuros, ubi Amstelodamum venero, quod fiet cis dies pauculos. Ea tamen lege, ut editionem praestet Parisinam in senos dige-

digestam tomos, sed tribus voluminibus collectam, eamque munde habitam, qualis notae esse exemplar illud suum mihi est professus. Saxo Grammaticus haeret apud *Graevium* adhuc Trajecti, quem Saliano addendum curabo, ut & Stephani fragmentum, & si quid praeterea occurreret tuis usibus utcumque profuturum. Quid quod Eadmeri Seldeniani, & Historicorum Germaniae a *Scardio* editorum spes est facta, quos si nanciscar, reliquis tibi a me destinatis adjungam. Indiculum pretii expensarum ad te propediem Romam missurus sum, ut horum vice, alios codices, in urbe nuper editos, ad me perferendos cures, quos designabo. Columnam Trajani imprimis, & si quid praeterea, quo res antiquaria illustretur, in lucem apud vos sit prolatum. Ichnographiam Romae veteris, & Catalogum Bibliothecae Chifletianae, si habes Antverpiae, qui res tuas curet, illa ex urbe per nautas, qui bis singulis hebdomadis inde ad nos recta contendunt, Hagam Comitum deferri velim, per viarum compendia, ne expectatione libri desideratissimi (de Ichnographia loquor) diu multumque macerer nequicquam. Typographus Leidentis, qui Stephanum Byzantium *Berckelii* Commentariis illustratum sub praelo habet, agebat diebus proximis mecum, de conferendis in tomum secundum Holstenianis ad eundem scriptorem observatis. Significabat praeterea doctum sese a nescio quibus, exstare Romae collectionem non unam Geographorum veterum maximam partem Graecorum, ab *Holstenio* partim, partim ab *Allatio* congestam, quam eidem tomo secundo, si daretur copia, insertam cuperet. Proinde se rogare, ne quid gravarer, litteras ea de re dare ad Eminentissimum Principem *Franciscum Barberinum*. Quod facturum me negavi, nisi viderem priori tomo, hoc est ipsi Stephano, manum supremam impositum. Haec in antecessum tecum communicanda duxi, quamquam tempore parum opportuno, dum in publicis totus occuparis, & viam hac anni tempestate molestam cura praecipis. Vale, flos dignitatis Romanae. Hagae Comitum *MDCLXXIV. IV. Novembr.*

EPISTOLA CCCCXCVIII.

NIC. HEINSIUS

Oft. Falconerio.

Romam.

QUI haec ad te perferet *Conradus Ruischius*, nonnullo consanguinitatis jure conjunctus mihi, patrem habuit *Nicolaum*, foederati Belgii, dum vixit, patribus ab actis & epistolis ministrum primum. Hunc peregrinationis studium in Italiam evocavit. Caeterum cum jure arbitretur majorem fructum ex hoc itinere haudquaquam sperari abs se posse, quam si viris eruditionis ac virtutum laude conspectis ubique innotescat, ego, qui Juveni, majorum vestigiis gnaviter insistenti, deesse opera mea multis nominibus haudquaquam possum, auctor praecipue fui, ut Romam aditurus te sibi conciliare maximum in modum contenderet. Promitto enim mihi, a toties perspecta

Cccc 2

illa

illa comitate tua fore, ut ne fores tuas in cassum accedat. Quo officio luculentum equidem in modum me tibi, si unquam, vir Illustrissime, es demeriturus. Neque arduum tibi opinor fore, per nonneminem e regiis familiaribus seu ministris effectum dare, ut ad Serenissimam *Christinam* admittatur, tum & ad viros in urbe aeterna celebriores. Ignosce, quaeso, confidentiae, quam ego quovis officii genere in posterum excusare satagam, tuis vicissim commodis pro communi invigilaturus. Decursum jampridem iter omne inoffensis pedibus, ac larem Romanum a te salutatum salvo atque incolumi, spe tacita praesumo; Quod utinam ex te ipso propediem sim edocendus! Saliani Annales ex editione Gallicana apud *Plumerum* adservantur tibi, quibus & alios libellos sum additurus, simul atque Amstelodamum pervenero, in his novum Leidensis bibliothecae Catalogum, cum indice Arabicorum codicum ex Legato Werneriano, tum Stephani Byzantii fragmentum Berckelianum, ac Saxonem Grammaticum. Sed de his, ubi habebo compertum, pervenisse te salvum in patriam. Vale, Falconeri illustrissime. Exarabam praepopere. Hagae Comitum CIOIOCLXXIV. XII. Decembr. Sprangenbergiani de Manichaeis Commentarii spes mihi ab amico facta est, utinam non vana.

EPISTOLA CCCXCIX.

OCT. FALCONERIUS

Nic. Heinsio.

Hagam.

EGO vero jam ante Brumam, ut fuerat in votis, Romam sospes veneram, verum ne quid adhuc usque ad te literarum dederim, fecerunt occupationes permultae, quibus & vehementer antea distractus sum, & adhuc non modice distineor. Nosti enim in patriam reduci quantum negotii confletur a civilibus officiis, ab amicorum salutationibus, quibus accessit cura rei familiaris, quae me diu absentem dominum profecto desiderabat. Haec, ut cessationem meam apud te purgem. Caeterum ut ad tuas veniam XII. Decemb. datas, quas mihi superioribus diebus reddidit *Conradus Ruyschius* vir ornatissimus, ego illi, quamdiu Romae fuerit, ita in omnibus praesto ero, ut intelligat tanti apud me ipsum fuisse, quanti eum par est, qui tibi sit non modo amicitia, sed etiam necessitudine conjunctus. Interea quod a me ut nunc postulare videbatur, ut per me aditus ipsi pateret ad Serenissimam Reginam, diligenter praestabo. De Saliani Annalibus, quos jam mihi apud *Plumerum* assertos scribis, valde te amo. Sprangenbergianum vero Commentarium de Haeresi Manicheorum si, quemadmodum spem facis, oculis usurpare tandem licuerit, plane me beabis. Quamvis enim is mihi deinceps vitae cursus sit tenendus, ut consilium, quod inieram ejus spartae adornandae, abjiciendum aut saltem deponendum mihi esse videam, erit tamen gratissimum voto, quod me diu anxium habuerat, beneficio tuo potiri. Vale, Bataviae decus & me amare perge. Romae II. Februar. CIOIOCLXXV.

EPI-

EPISTOLA D.

NIC. HEINSIUS

Oët. Falconerio.

Romam.

Multa equidem sollicitudo animum meum super tuo itinere exercuit & discruciauit haec: quam omnem discutere suavissimae litterae, proximis diebus huc abs te per tabellarium ex urbe allatae. Ad haec *Conradus Ruischius*, necessarius meus, verbis amplissimis apud me professus est singularem plane comitatem, qua abs te ac fratre tuo est exceptus. Unde colligatur, tanquam argumento indubitato, favorem vestrum, quo triumphabam haec unice, perennaturum mihi. Id quod faxit ille, a cuius nutu mortales pendemus. Post tuum e Belgica discessum, forensibus aulicisque turbis confestim me subduxi, fomenta valetudini a successu solitario quaesiturus; sed, quod nollem, successus propemodum omnis defuit huic proposito, adeo ut ne bibliothecam quidem ordinare ex sententia aut totam excutere licuerit. Spes tamen adfulget fore, ut ante decursum huiusce mensis me expediam ex laqueis tricarum forensium, ac rus recurram. Ubi libellos nonnullos tuis usibus sepositos adseruo, praeter Saxonem Grammaticum, & rerum Germanicarum scriptores a *Simone Scardio* editos, nec non Eadmerum *Seldeni*. De *Saliani* Annalibus scripserat *Plumerus*, in adventum meum eos abs se fore seponendos. Non datum est quidem mihi ab illo tempore Amstelædamum excurrere ob valetudinem ac vires dejectas, spero nihilominus vel sic promissis statutum *Plumerum*, quorum cras aut perendie litteris meis admonebitur. Sub vernam tempestatem erit, puto, ut librorum nonnihil per me mittatur ad V. Cl. *Carolus Datum*; eadem opera & tui hi ad te commodum, ni fallor, perferentur. De Manichaea *Sprangenbergii* Historia error fuit amici cuiusdam mei, qui librum hunc una cum Saracenica *Curionis* abs se redemptum in auctione nescio qua volebat credi. Sed post accuratam inquisitionem comperit Hussiticam fuisse Historiam, eamque non huius auctoris. Invigilabo tamen hic porro commodis ac desideriis tuis. Quamquam si rumores non fallunt, fore praevideo, ut mittendus a te sit nuntius hisce studiis, quae praesidium in tuis lucubrationibus nuper collocabant, cum dicaris adscriptus esse in familiam summi Pontificis honorato loco: quamquam nec tu, quae tua est modestia, nec ipse *Ruischius* hac de re quicquam ad me perscribatis. Nos vana haec spe pacis propediem adfuturæ lactamur. Ita fit, ut universum artium bonarum nomen apud nos jacere pergat, ne typographis quidem quicquam rei majoris molientibus. Ego, si vires respondebunt satis proposito, in Germaniam excursus meditor, sub aestatem proximam. Si quid & illic tuos in usus indagatum per me cupis aut effectum, tui ut erit laboris, id quale sit non dissimulare, sic mei obsequii, desideriis tuis subscribere ac gratificari pro facultate. Vale, vir summe, meque, ni molestum est, & fratri tuo, & aliis,

Cccc 3

quos

quos olim in urbe notos habui, viris praestantibus commenda. Hagae Comit. MDCLXXV. VI. Mart. Stephano Byzantio *Berckelii* typographus nunc denuo manum admove coepit, post longam operis intermissione. Spero editionem voluminis hoc anno profligari posse, quando tutum ac tempestivum erit, de Holsteniano ad eundem scriptorem commentario in lucem proferendo cogitare. Opinor significatum jam per me tibi, egisse mecum typographum de adjiciendis huic lucubrationi scriptoribus Geographicis haecenus ineditis, quos idem *Holstenius* complures per varias Italiae bibliothecas hinc inde dicitur collegisse, ac supremis tabulis Eminentissimo *Barberino* legasse. Tu, cum aliis de causis virum Principem accedes, sententiam ejus super re omni poteris indagare, meique obsequii constantiam illi testatam relinquere. Nec tamen auctor sum vobis, ut typographo scriptores Geographi ab *Holstenio* collecti permittantur, nisi animadversis viri illius eximii in Stephanum jam praelo subiectis. Iterum vale. Ichnographiam urbis antiquae laudabili diligentia *Bellorii* erutam e rudibus & publico donatam, quam munus ad me pervenire voluisti, diu est quod accepi ab *Elzevirio*: tibi que plus, quam quod verbis possit exprimi, me debere, ob donum longe praestantissimum, lubens agnosco.

EPISTOLA DI.

OCT. FALCONERIUS

Nic. Heinio.

Hagam.

Illud primum omnium a te peto, vir amicissime, ut cessationem meam laequi bonique consulas, tibi que ita persuadeas, me quavis alia de causa officio huic defuisse, quam aut oblivione tuorum in me meritorum, aut quod te minus amem, quam quod te a me amari, ni fallor, certum perspectumque est. Et vero ante hunc mensem Aprilem adeo incommoda valetudine sum usus, ut praeter molestiam, quam tussis assidua non sine magna pituitae copia afferebat, fuerim etiam levibus febriculis tentatus, quae res me alioquin, ut quod est, ingenue fatear, in scribendo segnem inhibuit, ne posterioribus tuis literis rescriberem VI. Mart. datis. Accessit etiam quod cum inter ea, quae his ipsis literis tuis ad me scripseras, ad id praecipue respondendum a me tibi esse viderem, quod est de indaganda Eminentissimi *Barberini* sententia super scriptoribus Geographicis Stephano Byzantio mantissae loco addendis, mihi eo convento opus erat, quem nosti non adeo facile sui copiam facere. Egi tandem hac ipsa de re cum humanissimo Cardinali, isque quantum ex sermone mecum habito augurari licet, non gravabitur eorum scriptorum exemplum ad te mittere, si modo, quod ultro offerre videris, in te recipias, te non antea ejus Codicis Typographo potestatem facturum, quam de Stephani Holsteniani editione fidem suam liberaverit. Caeterum id quoque mihi ab adversa valetudine incommodi accidit, ut *Conrado Ruischio*, viro omnium numerorum praesto esse, ut equidem optabam, minime licuerit. Quamvis ea ille est huma-
nita-

nitate, ut, quemadmodum ex literis tuis cognovi, tantum studio & voluntati meae tribuerit, quantum vix ego re ipsa assequi potuissem, ut ejus testimonio tibi liqueret, quo loco te tuosque habeam. De libris, quos in meos usus comparatos penes te adservas ad nos mittendis in Cl. *Dati* fasciculo summopere te amo, eorum quippe non mediocri desiderio teneor. Saliani Annales eorum e numero vehementer opto, nam ex epistola tua adhuc ambigo, sintne illi mihi a *Plumero* adserti an secus. Suavioribus hisce studiis ac prope Musarum contubernio valedicendum mihi esse recte conjicis, & ipse invitatus sentio. Ad forensia quippe negotia, quibus pro magistratu, quem gero, non possum, quin sim addictus: accedit cura rei familiaris, quae, quod magis displicet, minimis de rebus identidem habet occupatum. Verum enitar, quantum potero, ut si minus de hisce literis curis & vigiliis meis bene mereri liceat, in eo saltem cursum a nobis institutum teneamus, ut tibi aliisque viris doctis, in ejusmodi studiis magno Reipublicae bono desudantibus, strenuam diligentemque operam praestemus, si quid e Bibliothecis nostratibus conatibus vestris promovendis arriserit. Id sane tibi serio ac persancte pollicemur. Quod me in Pontificiam domum adscriptum gratuleris, agnosco amorem in me tuum, agoque ut debeo, gratias quam plurimas. Vale. Roma 14. Maji MDCLXXV.

EPISTOLA DII.

NIC. HEINSIUS

*Oct. Falconerio.**Romam.*

Voletudinis omne crimen est, gravissimum nuper in modum adfectae, quod scribendi officio jam pridem desim. Ea toto Quintili mense permolesta lecto me adfixum inclementer exercuit, unde & fit, ut Graeviana epistola tarde ad te perferatur. Nunc respiro nonnihil, & ad me paulatim redeo. Meritis tuis eam, quam par erat, ab aula Romana haberi rationem, equidem summa animi cum voluptate accipio: sed nolim tamen occupationes aut forenses aut aulicas adeo te totum sibi vindicare, ut, ab litteris humanioribus exornandis, in quibus plurimum potes, avellare in posterum. *Sprangenbergii* de Manichaeis commentarium nequicquam investigari a nobis video invitatus, fortassis publico haecenus non commissum: sed quicquid hujus est jacketurae, id *Vossianus* ejusdem argumenti liber postumus, quem ab *Isaaco* filio inter alios paternos edendum nuper *Elzevirius* impetravit, abunde puto compensabit. In Stephano Byzantio, post longam intermissionem nunc assiduae sunt operae typographicae: ut ante Januarias Kalendas editio voluminis videatur posse sperari: praesertim cum *Judaeus* nonnemo eundem scriptorem suis illustratum commentariis juris quoque publici anno proximo apud Amstelaedamenses sit factururus. Leidenenses Harpocracionem *Mausaci* praelo commiserere, cui notarum nonnihil sit additurus *Nicolaus Blanckardus*. Antonini Liberalis *Metamorphoses* animadversis *Thomae Munckeri* illustratas in publico propediem vide-

videbimus, ut & dissertationem *Gisberti Cuperi* super sigillo Harpocratonis aeneo. Quod si pax optata nos respexerit, plura id genus in publicum mox erunt proferenda. Ad Clarissimum *Datum* ante hos tres menses cum librorum nonnihil esset mittendum, in eandem cistam codices tibi promissos, etiam *Saliani* Annales, conieci; quos in Etruriam jam delatos aut mox deferendos fore auguror. De negotio pecuniario, quod mihi cum Regina conficiendum restat, alias tecum egi. Fecit mihi copiam anno proxime decurso Regiarum litterarum *Santinius*, quas illa ante hoc triennium ad *Gustavum Kurckium* regni Suecici Senatorem dederat (is enim facultates Reginae per id regnum administrabat) quibus litteris serium in modum jubebatur rationes antiquas mecum dispungere, sic ut intra proximum triennium, quod jam effluxit, ex aere meo penitus liberaretur ipsa, cum tamen nihil omnino hactenus sit actum. Nam & *Kurckius* apud me fraudulenter dissimulavit id sibi in mandatis à Regina datum, & cum aliorum is criminum post convinceretur, à Regina loco motus est, substituto alio. Si per valetudinem & haec bella, quae itinera per Germaniam omnia intervertunt plane, liceret, jam ad vos advolassem, supremam isti negotio impositurus manum ante fatalem diem, quod quia non datur, sororis filium ante tempestatem hibernam hac de causa ad vos ablegare cogito. Si in *Santinium* interim forte incidēs, rogo obsecroque, ne graveris indagare, quid mihi tandem sit exspectandum. Neque enim unius *Kurckii* haec culpa est. Nam & *Texeira* Judaeus, qui Reginae res apud Hamburgenses agit, & qui solutiones debiti in se receperat, tantum praemii loco pro solutione flagitat pecuniae, ut dimidia summae debitae pars ad me non sit perventura, si avaritiae hominis sordidissimae subscribam. Vale, vir Eximie, & si quid tuam in rem videbor posse, impera pro arbitrio. Hagae Comitum MDCLXXV. a. d. ix. August.

EPISTOLA DIII.

N I C. H E I N S I U S

Ost. Falconerio.

Romam.

Quas Augusti mensis decursu nuper ad te dabam litteras satis copiosas, eas recte omnino redditas tibi fuisse augurari licet. Nunc commendo tibi *Robertum Goesium*, qui hasce est oblaturus, sororis meae filium, non alio nomine ad vos contendentem, quam ut rationes antiquas, quae mihi intercedunt, ut nosti, cum Regia Majestate, si fieri possit, dispungat. Habet a me in mandatis, ut ad consilia tua, tanquam ad sacram anchoram unice confugiat, teque adiutorem prae ceteris imploret; cum & gratia & auctoritate in aula vestra possis longe plurimum. Operosius anxiumque magis in modum hac in commendatione me nunc exercerem, nisi perspectum omni ex parte haberem singulare illud studium, quo ferris in demerendis iis omnibus, qui tibi se tradunt. Hisce ex oris quod nuntietur, nihil omnino nunc occurrit. De
Stc-

Stephano Byzantio lentum pergit esse negotium, etsi promovetur nonnihil. *Gisbertus Cuperus*, qui commentarios luculentos in Apotheosin Homericam praelo typographico paratos habet, nuper edidit dissertatiunculam de sigillo Harpocratis argenteo, apud Neomageneses invento. Ejus exemplar tibi tradendum mitto ad Clariss. *Datum*. Auguror ita componi atque ordinari rem familiarem a me posse, ut propediem defungar omni cura molestiaeque, qua premor per annos complures, nihil aut prius tum aut antiquius habiturus, quam ut Maroni pridem intermissio manus a me denuo admoveatur. Quod si tantum otii fortasse adspiravit tibi inter occupationes assiduas, ut tuorum nonnemi jubeas, ne quid gravetur e Bembino Catalectorum, qui in Vaticana asservatur Bibliotheca, codice, specimen breve variantis scripturae meos in usus excerpere, unde conjecturam faciam, quid de exemplaris istius praestantia in reliquis sit arbitrandum, immane quantum equidem me demerearis. Sed hac de re pluribus fortasse post mihi exploratum *Goesii* in urbem adventum. Vale, virorum praestantissime, & me, quod supra meritum meum abs te fit hactenus, amare perge. Hagae Comitum 4. Decemb. CIOICLXXV.

1 Non reddita haec *Falconerio* fuit epistola, obierat enim jam ante hanc scriptam, ut ex Epistola *Caroli Antonii de Puteo* ad *Heinsium* data XXII. Novemb. hujus anni didici: nimirum nocte inter diem Sabbati & Dominicam, ante diem istius epistolae scriptae. Ita ut hinc error *H. Wittii* appareat, qui in Diario suo biographico *Falconerii* mortem sequenti anno, incertus quo mense, adscripserat. Ex Epistolis etiam ad *Graevium* CCCXVIII. & seq. hoc anno obisse constat. adjecimus etiam epistolam *Heinsii* ad *Octavii* Fratrem *Paullum*, qua mortem amici sibi luctuosam accidisse testatur.

EPISTOLA DIV.

NIC. HEINSIUS

*Paulo Falconerio.**Roman.*

Quantum moerorem conceperim ex peracerba morte *Octavii*, fratris tui, viri omnibus numeris absoluti, meque adfectu tenerrimo supra meritum meum complexi, nec est, ut verbis satis adsequar, & si detur adsequi, ut vulnus tuum nunc rescindam importunis querimoniis, post tantum ab excessu ejus intervallum temporis, prorsus incongruum videri possit. Nec defuissem consolationis officio tempestiviori, si habuissem exploratum, in qua Italiae parte mihi venires compellendus. Id unum testari nunc licet, sacrosanctam viri longe peramantissimi memoriam numquam non apud me fore. Cumulavit vero ingentem jacturam, quam mihi casus funestus tulit, subsecutus excessus *Caroli Dati*, nec multo post *Laurentii Panciatichi*: ut intra decursum unius anni amicis fere omnibus, iis certe qui vinculo artiore mihi jungebantur, in Italia sim orbatus, nisi tu superesses, & ut diu supersis Deum unice veneror. Quod si partem vel exiguam illius benevolentiae, qua frater tuus complectebatur hunc hominem, in me derivare non gravaberis, fomentum maximo do-

Tom. V.

D d d d

lori

lori meo non omnino vanum admoventi sentiam. Ne desperem facit singularis illa comitas, quam Sororis meae filio in Urbe peregrinanti non ita nuper exhibebas, quamque is verbis apud me amplissimis praedicare non intermisit. *Mureti* in *Ciceronem* adnotata ubi ad me perferentur (nondum enim advenere) ut *Joh. Georgio Graevio*, vestri nominis mecum studiosissimo tradantur, cui ea destinaverat Frater tuus, novam *Tullianorum* operum editionem molienti, curabo, tibi quoque plurimum pro hac opera debere profitebor. Ceterum anno proximae decurso misi *Liburnum* cistam libris compluribus repletam, quos partim a *Carolo Dato*, partim a Fratre tuo desideratos, in usum utriusque eorum collegeram hinc terrarum. Navi *Christinae* erat nomen, Nauta natione *Britannus*, qui *Decembri* mense *Liburnum* appulisse certo mihi dictus est. Ipsa cista inscripta erat a *Daniele Elzevirio*, *Carolo Dato*, quam tutius *Liburni* mercatorum nonneminis commendasset. Erepto nobis non multo post *Dato* ad *Laurentium Panciathicum* bis dedi literas, ut rescirem ecquid cista ipsis in manus *Dati* pervenisset, sed responsum non tuli. Nunc cum supersit nemo, ad quem hinc confugiam, praeter te, ne graveris rogo, cistam illam, fortassis *Liburni* adhuc haerentem, ab interitu vindicare, aut si saltem pervenit ad *Datum*, libros inde, qui fratri tuo destinabantur, Tibi vindicare. Vale, Illustrissime Domine, & me in tuis nonnullo loco habere ne dedignare. Hagae Comitum XXVIII. Octob. CIOIOCLXXVI.

EPISTOLA DV.

GUIDO PATINUS

Nic. Heinsio.

Romam.

VIR Clarissime, eas revera accepi, quas Florentia miseras, & ad eas responsum misi Venetias, ad eos mercatores, quos mihi designaveras. Nunc vero alias accipio, Romae datas, ex quibus disco Te nunc illic agere, inibique moraturum ad minimum adhuc tres menses. Servet Te Deus salvum & incolumem per totum illud spatium, quo Te detinebit tota tua peregrinatio Italica, ut ad nos tandem vegetus firmusque redeas. Grates ago quam possum maximas, quod mei crebro memineris, & de tua valetudine dubitantem, nova descriptione certior me feceris. Beneficiorum in Te meorum commemorationem puto Tibi risum movere, ut me ad indignationem provocat, & infortunium meum mihi objicit, qui, si paucos quosdam aegros excipias, nulli unquam beneficus esse potui, adeo sum infelix, & sinistro natus omine. Sed sic est natura mortalium, & multi inter eos infortunati: plurimi inutiles aut pravi: pauci, quos aequus amavit Jupiter, aut ardens evexit ad aethera virtus, de genere bonorum, aut Reip. utiles nascuntur, & in iis, Tu, vir Clariss. magnum locum occupas, quem utinam diutissime bonis tuis & Reip. rebus, ut mereris, feliciter retineas: ut in Te vigeat, citoque ad posteros transeat eximia illa & nobilis indoles a Clariss. Parente Tibi tradita. Quod spectat ad

li-

libros ex Italia, quia super iis toties & tantopere me urges, ut aliquid per Te requiram, ecce perfrico frontem, Teque rogo ut mihi emas, (pretium refundam quaecumque fuerit) *Fabii Pacii Vicetini commentarios in sex priores Galeni libros methodi medendi, ut & comm. in 7. ejusdem operis: duo sunt mediocres tomi, Vicetiae editi 1598. & 1608. in folio. Romam tuam, Romam illam, spurcum cadaver pristinae venustatis, & turpem imaginem puritatis antiquae, non est sane quod mihi offeras: quid enim mihi cum Roma? quid viro bono & occupato cum negotiosa illa tot otiosorum matre, corrupta, constuprata, contaminata? sane abeat illa a me, habeatque sibi res suas. Ocellus ille quondam, nunc lacuna Fortunae: quae, ut scite ait Petrarcha, nihil est aliud, quam impura illa officina, in qua cuditur quidquid scelerum, fraudum & imposturarum spargitur per universum Orbem terrarum; imo, ni bene Te nossem, amicorum suavissime, lubens monerem Te, ut ab ejus illecebris & infidiis Tibi caveas, dum illa Te detinet: rogaremque, ut saltem Tibi renovares in memoriam elegantissimam epistolam I. Lipsii ad Phil. Lanoyum nobilem adolescentem Belgam, Cent. 1. epistola 22. cui funesta fuit ista expeditio transmarina. Precor tamen, amicorum mellitissime, da veniam, quod Te moneam, quamvis monitorum non indigeas: hoc facit amor in Te meus, & gravis ille metus, per quem manu tremula ista ad Te scribo. Sed facessat ille timor meus, neque enim de Te tam male sentio: & amotis seris, jocorum aliquantulum. Princeps Condaeus, summus olim Lojolitarum patronus, anno aetatis 58. hinc obiit abiitque εἰς τὴν χεῖραν τῶν πολλῶν: ibi agnosceret fidem Sociorum illorum, quibus antehac tantopere favit, non sine dolore bonorum. Sponius noster officiose Te salutat. Naudaeus aliquot Germaniae urbes invisit, quarum solitudinem deplorat, praesertim vero virorum eruditorum pene nullos deprehendit, praeter Buxtorfium Basiliae: tandemque media hyeme sanus & incolumis ad nos reversus est, cum multis librorum: hinc illic collectorum fascibus. Frater Ludovicus in variis librorum nomenclaturis totus est: & hoc unum agit, quia aliud quidquam agere non est idoneus. Meministi quid Bataviae vestrae decus immortale, Des. Erasmus, dicat de Monachis: & Alciatus in Embl. ubi de Essenis.*

*Segnities specie recti velata cucullo,
Non se, non alios utilitate juvat.*

Dum autem Roma Te habet, vide quaeso eximium virum *Fam. Stradam'*, & ab eo disce quandonam historiae suae partem 2. nobis non invidebit. O utinam cito fiat istud! Multa hinc circumferuntur de Pace, quae naris emunctae homines, & viri πολιτικώτατοι, non aliter habent, quam pro artibus Imperatoris, quibus decipitur populus, & pecunia emungitur. Eheu! quam bene nobiscum ageretur, si coelestis illa Virgo Catholica, jure postliminii ad nos rediret. In re libraria nihil hinc novi. Vive & vale, meque quod facis, ama, Vir Clariss. Dabam Parisiis, die 8. Januar. ciciocxlvii.

EPISTOLA DVI.

GUIDO PATINUS

Nic. Heinsio.

Florentiam.

GRatias Tibi ago amplissimas, Vir Clariss. quod ab oris nostris adeo remotus, & quasi in alieno orbe positus, mei plane immerentis tam benigne memineris. Et sane, ut verum dicam, quod soleo, mentem meam affecit non leviter isthaec tua recordatio, quam vidi in tua ad *Aegid. Huylenbroeck*, & *Maestertium*, Dendermondanum, optimum virum epistola data Neapoli, 12. Junii. hujus anni: honestus enim ille vir a Te monitus, statim me convenit, iterumque se ad me rediturum promisit, priusquam revertatur in Belgium, speroque fore, ut Te paranymphe vel, mediatore, quamvis Hispanus affectu sit, eum tamen amicum in suo Belgio habeam, talemque per aliquot literarum tandem connubium aliquando experiar: de quo amore in me tuo gratias officiosissime ago. Antehac memini me per literas rogasse Te *Fabii Pacii comment. in Gal. Methodum*: nunc vero rogo Te, ne super eo mihi comparando labores: eum enim tandem in hac Urbe deprehendi. De libris nihil hîc aliud novi, quam quod *Balzacius* selectarum Epistolarum Gallicarum tomos duos nuper edidit: in quorum secundo una ad Te scripta legitur, in qua Tibi gratias agit de carminibus tuis Latinis. Omnes amici tui literati hîc bene habent, *Puteani*, *Menagius*, *Colletetus*, *Naudacus* & alii: tu vero Vir Clariss. cura ut valeas, ut sanus & incolumis ad nos cito revertaris. Hîc indies expectatur *Pars 2. Historiae de bello Belgico Fam. Stradae*, quae tamen diu haeret in via: dicitur eam retinere, & inhibere quo minus prodeat in lucem, Rex Hispaniae: & hoc, quamvis non unum, doleo, quod istius Principis gravissima illa & tyrannica potentia etiam ad libros usque se extendat. Dii meliora. In ipso, de quo magnus hîc rumor est, Neapolitano tumultu, servet Te Deus ab omni injuria sartum tectum atque incolumem. Ego & *Sponius*, Medicus Lugdunensis, invicem Te salutamus: utrumque Te medullitus amantem redamare quaeso non pigeat. Vale, vir clarissime. Datum Parisiis 16. Aug. MDCCXLVII.

EPISTOLA DVII.

GUIDO PATINUS

Nic. Heinsio.

Leidam.

ELegantem tuam pro more Epistolam accepi per *Menagium* nostrum, vir Clariss. cui paucis sic respondeo. Revera Tui saepius memini, nec immerito, ut agnoscis per *Utenbogardum* nostrum, & per alium illum popularem apud *Elzevirios* commorantem: sed longe aliter istud officium meum agnovisses, si antehac a me Tibi scriptam epistolam accepisses, qua tibi gratias age-

agebam pro duplici munere, tuo nempe Claudiano, & Panegyrico carmine Serenissimae Sueonum reginae. Eam ideo scripseram, ut de iis gratias Tibi agerem, quod iterum facio ex animo, eamque tradideram Philiatro cuidam Germano, Anhaltino, Leidam proficiscenti, ut inde pedem referret in patriam: abeuntem quoque viatico fueram prosequutus: sed levis est jactura pecuniarum, imo & iterum pereant, modo ex tali epistola a Te non accepta, (quam tamen periisse graviter doleo) oblivionis & ingratitude notam, a qua procul absum, mihi non impresseris. Amicos tuos & nostros nomine tuo nuper salutavi, praesertim vero *Colletetum*; *Fr. Jacobum* & mellitissimum *Naudaeum* in pago suo Gentiliano, ubi nos opiparo convivio excipiebat, cum summa jucunditate & hilaritate; ubi quoque gratissima Tui mentio facta est, postquam singulis illis spem novam feci, Te iterum hoc anno Parisios venturum, quod mihi tunc nuper innotuerat, per epistolas *J. Vossii* datas *Bidalio* mercatori, ejus ante annum hospiti, qui eas mihi ostendebat. Sed utinam venias tandem, & iterum Te videam, & erudito illo fruar aspectu, a quo nonnisi melior & eruditior fiam. O felicem & fortunatum diem, quam ardentem Te videre cupio! qui ubi mihi illuxerit, Quanti complexus, quae gaudia, quanta futura! si iterum mihi videre datum fuerit docti patris doctam sobolem, principis eruditorum D. *Dan. Heinsii* eruditissimum filium *Nic. Heinsium*, in nova mea domo, ab anno mihi empta, 30. millib. libr. Turon. clara, pellucida, commodissima & elegantissima. Sed, dum sese offeret laetus ille dies, ecce quod voluisti facio, & mitto, ut petiisti, quaecumque in libro tuo Paraviis edito, & a Te in patriam revertenti mihi relicto, latebant: subjungo quoque correctiones quasdam tuas, ut per me nihil Tibi desit ad integram & omnibus numeris perfectam tuorum Poëmatum editionem, in quibus certa aeternitate donantur eorum nomina, quibus illa inscripisti. Sed heus, amicorum gemma & ocelle, quia epistola non erubescit, patere ut Tibi Cynthus aurem vellat: fac ut in aliquo angulo tertiae illius editionis, novo hexasticho vel tetrasticho, imo si volueris, brevi disticho, elegantissimus Poëta sui *Guidonis* meminerit: hanc olim gratiam Plinius junior, aeternandi nominis cupidissimus, ambiebat & petebat a suo Tacito: ego tamen, qui Plinius non sum, eadem postulo, nec tacite, nec impudenter: ea tamen lege, si Tibi probetur, nec displiceat votum meum, tot eruditis & elegantissimis viris accenseri. Quod si feceris, certe Rex ero, & triumphabo: sin minus, consilium tuum laudabo, & in tuas partes transibo. Nihil hîc novi geritur quod scribi debeat: adeo inter bellicos tumultus sunt attritae nostrorum Bibliopolarum facultates, ut nullam pene editionem ausint aggredi. Ab excessu praestantissimi viri D. *Sarravii*, quem duobipedes nequissimi, & teterrimi nebulones caco-Chymici stibio suo misere necarunt, nullus hîc obiit de familia eruditorum. Tu vero, Vir Clarissime, salve, vive atque vale, cum eximio viro Dom. Parente tuo, quem meo nomine, si placet, salutabis. Vale, inquam, & me ama. Parisiis die Veneris 14. Julii.

CICICCLII.

EPISTOLA DVIII.

CAR. ANN. FABROTUS

*Nic. Heinsio.**Romam.*

Litterae tuae nudius tertius mihi redditae sunt. ex quibus cognovi te Romae lagere magis, ut veteres Ovidii codices conquiras, quam ut S. P. pedes deosculeris: Libet enim heic tecum jocari. Plures autem istic invenies: non enim Augustus efficere potuit, ut libri cum auctore exularent. An autem eruditus pateat Vaticana bibliotheca, sic ut Marciana & Florentina, valde ambigo: nam ea de re conquestus est *Jacobus Sirmandus*. Versione Basilici defunctus serio cogitare coepi de edenda replicatione nostra adversus refutationem *Claudii Salmasii*, eruditorum tyranni: idque jussu D. Cancellarii: eamque edendam *Sebastianus Cramoisy* in se recepit. Ago tamen Tibi gratias, quod in me tam pronus sis, ut dudum pollicitus sis operam affinis tui, qui editionem ejus cura sua faceret, si typographum heic non invenirem. Cedrenus pene absolutus est auctior Glossario nostro mixto-barbaro & notis. Sed & bene multas lacunas supplebimus ex Joannis Curopalatae historia manu exarata. *Heraldi* amici nostri Apologia ad finem perducta est, & primo quoque tempore in lucem exhibet. *Salmasius*, qui maledictis certavit, ea quoque ipse audiet. Si Lutetiam redieris, rem longe mihi gratissimam feceris, si aedibus nostris, uteris hospitii jure: nam cum heic esses, tam spatiosae non erant, ut hospitem recipere liceret. Cum primum parenti tuo eruditorum principi scribes, salutem verbis meis ei dicas. Vale Cl. V. Lutet. III. Januar. CIOIOCLVII.

EPISTOLA DIX.

CAR. ANN. FABROTUS

*Nic. Heinsio,**Venetias.*

Queri non immerito potes Cl. v. quod a scribendi officio haecenus temperaverim. Sed spes adventus tui in rependendis tibi litteris me paulo segniorem effecit. Licet autem infrequentiam litterarum incuses, nolim tamen ut assidua scriptione amicitiam acstimes. Etiam qui procul agunt affectum retinent, si verus, non simulatus fuit: nec longa peregrinatione vel silentio quidquam ex non fucata amicitia deteritur. Tuae tamen absentiae damna ferre diutius non possumus ego & *Menagius* potissimus amicorum: quippe dum veteres codices poetae exulis quaeris, exilium tibi quodammodo a Laribus tuis & ab amicorum consortio videris indixisse. Omnes, opinor, bibliothecarum forulos excussisti. Macrocola omnia perlegisti, & hoc sine dubio effecisti, ut si Ovidius ipse superas ad auras evaderet, omnino manum suam agnitus esset. Quamquam autem summa voluptas sit, quod in me interdum experior,

ex

ex veterum Librorum collatione veram auctoris scripturam plerumque indagare: non tamen infitior viros eruditos sagaci mente sua ad verum collineare. Quam autem plurimi in Italia sint, me non praeterit, cum quibus de locis dubiae sanitatis communicare potuisti. Inter quos merito posuerim eruditissimum virum *Joannem Baptistam Donium*, cujus amicitiam expeto, vel eo nomine quod honoris plurimum ex ejus testimonio mihi accessisset, si versus elegantissimos, quos transmisserat, editioni Basilicorum inferere potuissem: sed jam absolutae quicquam addere non licuit. Nec tamen velim existimet, me tantae gratiae unquam debitorem immemorem futurum. Quin imo si vita suppeditet, editioni novae ornamentum adferent. Si reditum tuum nondum impetrare possimus, curabo equidem sedulo, ut accusare silentium meum desinas. Interim, dum nuntium aceto Italico remittas, & doctissimo viro *Donio* salutem meis verbis dicas. Parisiis XII. Januarii A. S. CIOCIOLVII.

EPISTOLA DX.

CAR. ANN. FABROTUS

*Nic. Heinsio.**Mediolanum.*

Reddidere mihi litteras tuas praestantissimi fratres *Puteani*, ex quibus novi te reditum in patriam adornare. Hoc igitur tantum expeto, ut secunda navigatione Massiliam pervenias, πόλιν μεγάλην, Φοκαίων ἀποικίαν, ut eam Marcianus vocat in Periegesi. De Aquis Sextiis quidquam dicere verecundia prohibeor: ibi natus sum, ibi educatus, ibi litteris imbutus, ibi amici, quibus ut te commendem petis: quanquam nomenclatore magis eges, quam commendatitiis. Nominis enim tui fama doctorum animos facilius tibi conciliare potest, quam commendatio. Mitto tamen eas jussu tuo ad amicos, quibus curae erit, ut Rectorem Provinciae salutes, Principem non Latine modo, sed etiam Graece doctum, qui te perquam humaniter excipiet, ut erga eruditos omnes bene affectus est. Caeterum agnosco errorem in nomine *Donii* & μακαρίτη, hunc ut emendes etiam atque etiam rogo, hoc est ut meo nomine *Paganino Gaudentio* V. Cl. salutem dicas, cujus ἐν τοῖς ζῶσιν ἔντ' amicitiam non minus expeto, quam olim *Donii*, qui e rebus abiit. ipsi autem cum primum sese occasio offeret, vicem laudis exsolvam. Vale, vir Cl. & me tui amantiissimum redama. Parisiis CIOCIOLVIII. Maji VII.

EPISTOLA DXI.

CLAUD. SARRAVIUS

*Nic. Heinsio.**Romam.*

NE prioribus tuis literis, statim atque illas accepi, responderim, vir Eximie, obstitit iter Aquitanicum, in cujus procinctu me deprehenderunt,
Post

Post quadrimestrem fere absentiam tandem, Deo favente, non sine magnis, ab hieme & parum firma valetudine, difficultatibus, in urbem redii. De te quid factum esset & ubi gentium degeres sollicite subcunctatus, intellexi valere te & in Urbe Aeterna vigere, in qua Thesauros eruditionis & gloriae inaeestimabiles labore improbo & industria pari solertiaque comparares. Non mediocri voluptate nuntio isto affectus sum. Sed quod jam ab alteris tuis me abs te semper amari etiam cognosco, mentiar, ni dixero me totum suavissima laetitia perfundi. Utinam vero possem insigni aliquo officio testari, quanti virtutes tuas faciam! Nulli rei parcerem, ut affectus meos tibi paratissime recluderem. Aliquando forsitan sese dabit id praestandi commoda occasio. Interea hoc animo meo contentus esto: & ad nos redi gazis illis onustus, quas ab iniquis possessoribus extorseris: verae enim & solidae eruditionis cara dudum istic est annona. Sed paucissimos Romae reperiri, qui saltem elegantiores & humaniores literas religiose colant, nisi affirmares, vix credibile. Atqui ipsum coelum, ipsae illae, quas merito laudas, statuae, quam multa solo sui aspectu docere possunt, quae in libris frustra saepe quaerimus? A mutis istis Magistris, nec fastidiosis disce, quae postea toti orbi explicabis. Nec illis invidemus tanta decora, ubi eorum verum usum chartis mandaveris. Quin invidebunt Rerum Domini Batavis tam eruditum suarum divitiarum dispensatorem, tamque solertem mysteriorum suorum interpretem. Certe tu, *Gronovius* & *Vossius* sequuturos deinceps caeteros docueritis, quid in Italia iter facientes praecipue conquirere oporteat. Ex hujus peregrinatione Ignatius jam tersus & nitidus, sine ullis offuciis, omnium manibus teritur: qualis scilicet Theodoreto, Athanasio & Antiocho legebatur. Ex alterius discursationibus, post Livium mille locis meliorem, tres Senecas docto pumice expolitos brevi habebimus. Quin tertius illis accedas & amplam symbolam Musarum convivii conferas dubitare nefas. Ego, qui de meo nihil possum, de alieno liberalis esse cogor. Magnam enim copiam collegi Epistolarum Magni *Hugonis*, qui sicut in omni scientiarum genere vir fuit sui nominis, ita, si quid mei iudicii, in isto sicuti & in carminibus, omnino incomparabilis & divinus. Quod autem sponte offeras e divite tuo penu, & quod ostentas e *Galilaei* haereditate, auctarium non recuso. Hanc quaeso veteri Parentis tui amico, & bonis omnibus impende. Mihi sane rem feceris gratissimam. Te cum discederes rogaveram, & si pateris iterum rogo, ut sedulo exquiras an in MSS. exemplaribus Anastasii Bibliothecarii reperiatur, suo ordine inter Leonem IV. & Benedictum III. vita Johanna Papissae. Retulit ad me olim Amicus, cui idem mandaveram, laceros esse omnes, quos vidisset, codices, eo loco ubi ea narratio esse deberet. Vidisse se tamen in Ambrosiana unum non in membranis sed in charta exaratum, qui eam haberet; sed describendi copiam factam non fuisse. Si per te compos esse potuero istius historiae fragmenti, plurimum tibi debebo, vir Praestantissime, quin in tuorum numero habere me velis, fortem bonumque quaeso precorque. Lutetiae Parisiorum v. Martii, ipso Hilariorum die CIOIOCLVII. Prohibet has obsignare *Priceus*, donec te suo nomine salutarem.

Idem

Idem num Mediolani *Bernardinum Ferrarium* conveneris, eique literas suas tradideris, scire desiderat: quamque officiose te prosequutus fuerit.

EPISTOLA DXII.

DESID. HERALDUS

Nic. Heinsio.

Leidam.

Tardius ad tuas respondeo amantissime scriptas, quia de quodam spes mihi erat facta, qui literas meas tibi in manus traditurus esset. Id quia adhuc incertum est, eas malui fidei publicae permittere, quam diutius cessare. Acceperam egregium specimen *Salmasii* ἔκ πάλιν, quum tuae mihi redditae sunt: quin & quanquam variis occupationibus, & praeter solitum avocatus, librum septimum animadversionibus meis adjicere jam coeperam, qui erit pro responsione; is sub praelo est. Nihil aliud exspectaram ab homine perduto, qui cum innata petulantia, & impudentia, quoslibet sine ullo discrimine, probris & conviciis appetere in deliciis habeat, nihil fecit contra jus, quod unum novit, si in eum, qui cessantibus aliis multo doctioribus, φενάκην illam, qua tamdiu hominibus illufit, & terrorem ac formidinem literatorum vulgo injecit, detrudere ei est ausus, toto furoris impetu insurgere, ac debacchari, eumque maledictis, & mendaciis, quae sola sunt ejus tela, obruere conatus est. Sane furere ei per me licet, & rugitu, qualem effingere potuit, omnia complere, modo cuti suae redditus, & exuviis Leonis nudatus seculo nostro qualis est per me, quando alii hac opera superfedere malunt quam cum furioso luctari, innotescere incipiat. καλὸς μὲν πίθων ὡρᾷ παίσιν ἀεὶ καλός. Quando opus meum proditurum sit, recte dicere non possim: quin libri tres rerum, & quaestionum juris quotidianarum, quos adjicere animo destinavi, nondum sunt parati, nec fere delineati. feriis tamen paschalibus rem omnem confectum iri ξὺν Θεῷ spero. Clariss. virum patrem tuum, florem eruditorum delibatum, si nomine meo salutaveris, rem gratissimam mihi feceris. Vale, tanto patre dignissime fili, & me ama. Lutetiae Parisiorum a. d. viii. Kalendas Januar. exeunte Anno ciciocxlviii.

EPISTOLA DXIII.

DESID. HERALDUS

Nic. Heinsio.

Leidam.

Literas tuas viii. Junii scriptas accepi, quibus nullam mentionem facis, neque literarum a me ad te datarum mense Decembre anni superioris, neque primi ternionis Libri vii. Animadversionum mearum in *Salmasii* observationes, quem bibliopola mihi dixit Leidam a se missum eodem tempore, ut tu & viri docti, qui istic ettis, quid specimen confutationis continuerit, ex eo con-

Tom. V.

Eccc

jice-

jicere possetis. Mendacia hominis impudentissimi, quae salutis desperatio ei dictavit, legi lubenti animo; de literis, & rebus ad literas pertinentibus quae observavit, non item, quippe quae ad infamiam seculi redundant. Itane esse adversa hominum nostrorum judicia, si ad tantam, tam stupendam, tam manifestam hominis nihili imposturam non excitentur tandem, neque τὸν οὐκ ἐπὶ Κύνῃ tamdiu sibi illudere patiantur? de illustrissimatu ejus quod scribis, prospexi mihi, atque desperatae homini dementiae nihil adjici, neque eos, qui vesaniae isti ancillantur, magis sanos puto. Sed valeat tota illa fatuitas. Statim atque bellum illud mendaciorum specimen ad me allatum est, (allatum autem, quum ad decimum, ut ego quidem existimabam, operis mei terniorem perventum esset) ei manum admovi jamque paginae aliquot excusae erant, quum tumultus domesticus pacem publicam interpellare coepit, & typographorum operas alio avocare; quo ex malo tamen hoc accepi commodum, quod meditationibus istis, a quibus quotidianae, & ἑγκύκλιοι occupationes me identidem revocabant, serio vacare licuit. Libris igitur animadversionum sex, quem intra numerum opus meum concludere destinaram, septimum adjeci, quem in duos secuissem, si quum eum inchoavi, quousque progressurum esset, providissem. Erit igitur liber hic septimus, quolibet aliorum longe spissior; jamque ad finem typographus properat, supersunt autem rerum, & quaestionum quotidianarum libri alii tres, inchoati sane illi tantum, sed quos, rebus prolatis ad umbilicum producturum me, εὖν θεῶν δὲ εἰρήσεται, pene confidam, atque exeunte anno opus integrum in lucem proditurum. Vale, vir eruditissime, & Clariss. virum patrem tuum, meo nomine plurimum salvere jube. Lutetiae Parisiorum Kalend. Jul. CIOIOCLIX.

EPISTOLA DXIV.

IS M. BULLIALDUS

Nic. Heinsio.

Patawium.

VIR Clarissime, pluribus jam mensibus Illustrissimi Puteani fratres, quos mihi mecum pari affectu colis, hoc mihi objecerunt, quod ad te a reditu meo ex orientalibus regionibus litterarum nihil scripserim. Negligentiae, fateor, crassioris merito me insimulabant, quae tamen ad fraudem amicitiae tecum contractae factam accedere dici jure nequeat. Alio equidem advocatum animum curae aliquot & occupationes distinuerunt, & me officio, quod benivolentia & amor, quibus me prosequeris, exigebant, deesse coegerunt. Te accuratum ac diligentem rescivi in sciscitando ab amicis nostris, quo loci res meae, dum abessem, essent, num viverem? num valerem? quam promptus futurus esset reditus? Quid suis ac necessariis amantius quisquam praestare potest? Quare cum me esse puta, qui tanti erga me amoris memoriam tenacissime retenturus sim; nec apud te locum poenitentiae feceris, quasi in solo ingrato excolendo operam perdideris. Sancte polliceor, & ubique fugo omni deterfo cultorem ingonuum amicitiae cum tui similibus sociatae cunctis me approbabo. Id mihi con-

concedi solummodo velim, ut, si quando viribus impar ero, ingratus non traducar. Solum natura sua non infelix fidere infausto si tabuerit, nec agricolae votis responderit, deferendum illico non est, & tribulis ac lappis infelici- busque herbis tradendum. Te ea indole aequitatis adeo amante esse novi, ut hoc a te mihi praestandum stipulari prorsus supervacuum sit. Sed haecenus fortasse in ejusmodi officiosis verbis prolixior fucum facere videri possum, a quo me longe abesse asserui. illa itaque missa faciamus. Tibi gratulor fortuna- tam prosperamque ad hancce diem peregrinationem, ejus quod reliqui est feli- citer tibi cessurum opto. Maximam inde tui voluptatem percepturi sunt, & Resp. literaria dives emolumentum reportatura. At vero quæ te in hacce expe- ditione tua ex omni parte beatum praedicem? cum tot tantorumque virorum, qui Italiae praecipua ornamenta erant ac elegantiora, efferri funera videris, & tantum non profecutus sis. Alte in animum ista adversantis omnibus literatis fortunae tela penetrarunt: omnium desiderio crucior: verum, qui mihi noti erant *Bonaventura Cavalerius*, *Job. Bapt. Donius*, *Euangelista Toricellius* & *Vicentius Renerius*, eos tam acerbo ac immaturo fato e vivis exemptos ac nobis praerep- tos esse gravius ac iniquius fero, Deos rectos ac magis propitios experiri cæte- ros superstites cupio. Tuam porro postremam epistolam Illustrissimis *Puteanis* scriptam, ut & alias tuas priores, vir clarissime, legi. Video te strenuum ac acrem adhortatorem: serio quippe me excitas, ut Pisanam Matheleos pro- vinciam, praefecto suo optimo, ac eruditissimo *Renerio* orbatam, ambiam. Illam profecto vires meas longo intervallo superare mihi conscius sum, & in- nata mihi familiarisque a puero timiditas a tali proposito me retrahit. In Se- renissimi Magni Hetruriae Ducis ditione plures sunt, qui hoc munere applau- dente corona fungi possint. Inadsuetus ego illi arenae, in qua viri praestan- tissimi tanta laude deludarunt & stipendiis ac militiae tempore exactis rude donati fuerunt, in illam si descendam, quid nisi me ridendum propino, & confossus pereor? Praeterea hoc te latere minime volo, rerum Italiae statum adeo fluxum & in praecipiti esse mihi videri, ut casum aliquem horrendum, vel a suis vel a Turcis, ruinaeque iis impendere reformidem. Quis ita de futuro securus spe firma animum sustentare potest, ut aestate etiam proxima Othma- nicum exercitum Calabriae & Apuliae oris non appulsurum sibi polliceri queat? Venetus Senatus Secretarii sui *Ballarini* CPolim destinatione, de pacis ineun- dae conditionibus cum Imp. CPolitano convenisse, vel saltem, quascum- que ille tulerit, accepturi esse videntur. Quae si componatur, quid de Nea- politano regno decernendum ac statuendum? Turcos has turbas rerumque confusionem latere, ne tibi persuasum habeas; Orbem Christianum sympto- matico morbo laborare & compertum habent & jactant. bellum internecivum exitum haud invenire posse Musulmani probe sciunt. Cum vel fata urgeant, resque nostras praecipites dare festinent, sive hominum, vel, ut cum *Deside- rio* vestrata loquar, duorum vel trium &c. nequitia publicae tranquillitati constituendae obstet. Gens illa barbara si resumtis bellicis spiritibus in Ita- liam per haecce tempora irruperit, de Hispani, de summi Pontificis caeterorum-

que Italiae Regulorum rebus actum est. Ubi exercitus, ubi pecuniae & com-
meatus? ubi triremium classis, Reip. Venetae pace cum illo Imperatore Oth-
manico sancita, caeteraque ad hostem acriter ac valide repellendum necessa-
ria? Si discordibus belloque intestino se mutuo laceffentibus Hispaniae Regi
plebique ac Nobilitati Neapolitanae supervenerit potentissimus hostis, rebus
eorum hac seditione domestica fractis & accisis utrosque debellabit. faxit Deus
ut insomnia ista mea per portas eburneas avolent, si tamen quae cervicibus im-
minere oculis cernimus, insomnia appellare aequum fuerit. Gratias nihilominus
quam maximas possum tibi habeo; eoque nomine, quamdiu vixero, in aere
tuo me habebis. Meo quoque nomine Illustrissimo *Dato* gratias ingentes age,
qui me tanti facit, tamque humane invitat, viamque commonstrat, qua ad
illud publicum munus perveniendum sit. Optime mecum agi crederem, &
fortuna propitia me uti, si huic obeundo aliquatenus parem me agnoscerem,
alacri tum demum animo, prompta manu ac lingua Reip. inservirem. Nunc
verfor in notis Historiae Byzantinae propediem edendae attexendis, cujus ver-
sionem ante mensem absolvi, non penitus inutilem fore operam meam spero.
Cum hanc epistolam acceperis, te etiam atque etiam rogo, ut Illustrissimum
ac Reverendissimum *Thomasinum* Aemoniensem Praesulem, Illustrissimos *Joh.
Rhodium, Vestlingium, Ferrarium, Berigardum* & caeteros Patavii commorantes
mihi notos nostro nomine salutes. Tibi fausta ac prospera omnia precor.
Vale, vir Clarissime & amicissime. Parisiis E. A. D. V. Nonis Mart.
CICIDCXLVIII.

EPISTOLA DXV.

ISM. BULLIALDUS

Nic. Heinso.

Venetias.

JAM diu est, vir clarissime & amicissime, cum debueram tibi testificari
animo me esse erga te memori, qui litteris ad Illustrissimum *Jacobum Pu-
teanum* scriptis salutationibus crebris me compellare voluisti. toto equidem
pectore te tuasque litteras, quas *Puteani* humanitate indulgente legere semper
licuit, amplexatus sum; isque, quem nosti, perduro. Optarem equidem oc-
casionem aliquando concedi, qua affectus in te meos non verbis inanibus, sed
re ipsa approbare possem, nusquam melius locatam operam meam putarem,
quam in stabilienda tecum amicitia, arctioribusque vinculis constringenda. Ve-
reor tamen ne in contrarias partes discedere videar; & alia verbis exprimere,
alia mente volvere: cum tibi operam meam paratam scribam, tuam interea
exigam. Obnoxium me magis ut habeas, hoc ago. itaque qua tu indole opti-
ma praeditus es, Musarum tenellus alumnus, & *χαρίτων γλυκὺ τέκνον*, sustine
me etsi importunum; Quanta cum voluptate in memoriam revocem amoenos
illos dies, jucundissimaque colloquia, quibus in Serenissimi Magni Hetruriae
Ducis Bibliotheca aliquot, imo plures, hebdomadas transegimus; haud satis

explicare verbis queo. ante paucos vero dies dum chartas meas revolve, in quaedam excerpta ex Bibliothecae illius volumine incidi, & relegi. inter caetera vero occurrit Christianorum Syrorum Kalendarium, quod num integrum descripserim addubito; cum autem ex usu meo aliquando futurum sit, integrum illud penes me habere, quantis possum animi viribus a te flagito, ut ea in re mihi subvenias. Utque minimo negotio hoc officium valde mihi gratum praestes, rem totam indicabo. Kalendarium illud extat in Codice Graeco, qui Syntaxim Astronomicam Persicam continet, & alia insuper varia completur. in papyro exaratus est manu non eleganti, at non torpenti, ferrea catena, ut & caeteri, alligatus est pluteo xxviii. aut alicui proximo, in ordine videlicet qui Bibliothecam ingredientibus ad sinistram procedit. In illo itaque volumine post Syntaxim Persicam habentur Kalendaria Musulmanorum, Persarum, & Syrorum Christianorum. Hujus titulus est Διαίρεσις ἐβδομῆ εἰς τὰς παρχαλίας τῶν χειριστιανῶν. αἱ μεγάλαι ἡμέραι. τὰ ὀνόματα τῶν μηνῶν. Mensium nomina sunt Τασιεὶν ἀνάλ. Τασιεὶν ἀλλάχειρ, Κανοῦν ἀνάλ, παρχαλία & Ζαμονί. ἡ εἶναι μμερμα ματάδδιδι. & τὸ ὁ μὲν λε ἡμέρας, ἢ εἰς τὸ χρόνον & Καπισᾶ ἡμέρας λς. Sequitur in meis excerptis, Σουμπατ. cum tamen, si nulla in Codice Florentino lacuna extat, sequi debuit Κανὲν ἀλλάχειρ, id est *Canun posterior*, qui Decembri nostro respondet. Consule itaque, humanissime vir, volumen illud, & illum mensem *Canun posterior* & παρχαλίας ipsi affixas, id est festos dies, transcribe & ad me mitte. ad tres vel quatuor versus scriptura tantum excurret. Gaudeo admodum Clarissimum *Langermannum* Manethonis apotelesmatica descripsisse, illius auctoris primos versus & ultimos transcripsi. hisce postremis auctoris γενεθλιακὴν θέμα describitur. In pluteo xxxi. locatum est aliud volumen, quod Euripidis, Sophoclis & Aeschyli Tragoedias continet; in calce legitur alicujus recentioris Graeci Tragici θεῶμα, cujus argumentum Xerxis clades fuit. imperfectum opus est & ab his versibus incipit, τὰ δὲ μὲν Περσῶν τῶν ἐνχομένων, ἑλλὰ δ' εἰς αἴαν πῖσᾶ καλεῖται. Si mihi otium ac tempus suppetisset, id poemata libentissime transcripsissem, ut, quam bene ad poemata Graeci recentiores sint nati, barbaris nobis constaret. an *Langermanni* animum hoc ineditum opus, ut ipse describeret, non invitavit? illum tuis verbis meoque nomine ut salutes rogo. Nuncium porro gravem cum ultimis tuis accepi, in Hollandiam quippe per Germaniae provincias te recipere cogitas, ut superstites ex rapinis & incendiis bellicis Bibliothecas evolvas. Si per Helvetios iter capefferis, Tigurinam adi, multa illic optimae notae volumina adservantur. At vero si ad Germaniae intima penetrare tibi libuerit, Juvaviam, hodie Salisburgum, te confer. habet illa Bibliotheca, ut ex *Gronovio* intellexi, poetas plures antiqua manu scriptos. Ingolstadiensis aliquot spolia ex Heidelbergensi retulit. Viennensem optime instructam audio, sed situ operti & oblivioni demandati miselli libri jacent, nec ullus hodie ex illis quicquam profert. Tecum coram colloqui in votis praecipue habebam. Verum spe frustratus hoc unum precibus ad deum Opt. Max. fufis toto animo precor, ut sanus sospesque ad tuos redeas, & ad Serenissimam Reginam, novum arctoae plagae Sydus, illinc revertaris, &

gratia apud ipsam, ut hactenus res ex animo cessit, valeas. ex tuis literis percipio, Serenissimo Principi *Leopoldo* te innotuisse, hac de re tibi gratulor; tales siquidem Principes adire, & ab illis nosci honorificum duco, qui de hominum pretio ac meritis rite judicare possunt; si ita inciderit, ut de me apud illum mentionem obiter facias, te rogo. ab ipso ante paucos dies literas accepi humanissimas, quibus ad meas respondet, & observationem meam ultimi defectus Lunaris se accepisse significat. Vale, vir Clarissime, & me, tui amantissimum, semper ama. Scribebam Lutetiae Parisiorum E. A. D. III. Kal. Decembr. Anno CIOIOCLII.

EPISTOLA DXVI.

NIC. HEINSIUS

*Ism. Bullialdo.**Parisios.*

Chrisrophorum *Puteanum* cum ob singularem probitatem ac raras animi doctes veneratione magna complectar, tum hoc praesertim nomine laudandus & diligendus mihi venit, quod illo tanquam internuncio, quid amici Parisienses moliamini subinde intelligam, nec rerum vicissim mearum ignaros omnino vos esse patiat. In curandis utrimque literis mira certe ejus est diligentia, nec unquam satis commendari potest. Quae senis optimi officia cum perquam mihi grata sint, tum nuperum illud longe prae ceteris gratissimum, quia insolens & inexpectatum, quod tuis, vir *Eximie*, literis ac suavissimo alloquio me bearit. Dolebam fatum meum non leviter, qui facto jam bis aut ter per Galliam vestram itinere, complexu tuo semper fraudarer; nec illud tamen tam me macerabat, quod ipse domo abessem, dum tu in Bataviam nostram non ita nuper excurrisses: nam & praevidebam fore, qui gentis nostrae mos est non nimium urbanus ac Gallicae comitati multum impar, ne pro meritis illic tuis excipereris: & ardenter optabam mei erga te affectus monumentum aliquod extare. Ex quo enim haec civitas nos conjunxit olim & *Mediceae* bibliothecae sacrarium, nullum majorem fructum ex continuis, quibus tum exercebar, lucubrationibus visus retulisse, quam quod virtutes tuas propius contemplari, & quantus esses, non prorsus ignorare contigisset. Nunc quoque pluteos illos nunquam excutio, excutio autem frequentissime, quin tu succurras mihi recordatione jucundissima. Haec cum ita se habeant, teque in oculis feram assidue, vide quam iniquus sis in illam, quae tecum intercessit mihi, necessitudinem, qui anxie roges multa verborum ambage, quod imperare confidenter debebas, si pro tuo mecum jure ac antiqua illa necessitudine ageres. *Mediceam* non accessi festis hisce diebus, quod feriarum cupidissimos esse *S^{ti} Laurentii* canonicos probe sciam. Tentabo hodie an admitti possim, ut describam, quae petis: sin minus, cum proxime literarum aliquid dabo, ad nobilissimum *Puteanum* nostrum, curae mihi erit, ut voti fias compos: Velim in rebus magis arduis operam meam explorares. Serenissimo *Heururiae* Principi

Leo-

Leopoldo nunciavi, quæ jusseras. Est is tui amantissimus. Expecta brevi ab illo luculentam descriptionem Phænomeni illius, quod nuper apparuit. Manethionem descripsit *Langermannius*. Dramatis illius oblitus eram, & si meminissem, non putassem tamen consultum in glorio labori juvenem amicissimum objicere, cum valetudine sit dubia ac infirma. Romæ nunc conflictatur cum custode Vaticanæ bibliothecæ, homine difficili admodum ac rerum imperito. Bibliothecas Germanicas cum cura perlustrare cupiam: nec deerit, ut auguror, aliquando opportunior occasio. Nunc in parentis gratiam fore festinandum prælagio. Vale. Kalend. Januar. MDCLIII.

EPISTOLA DXVII.

ISM. BULLIALDUS

Nic. Heinsio.

Amstelodamum.

NON dubito, quin alte in animum tuum descenderit dolor, quem ex erepto nobis Illustriss. *Jacobo Puteano* concepisti. cum omnibus honestis probisque viris commune damnum sensisti; quin etiam ad te propius, quam ad caeteros spectat: arctiori quippe vinculo amicitiae cum ipso conjunctus eras, & apud eum auctoritate ac gratia omnino valebas. Illum enim plurimi te semper fecisse animadverti, famaeque tuæ & virtutum tuarum studiosum fuisse, illasque omnibus commendasse. Rationem quoque mei rerumque mearum, hunc casum dum defles, te habuisse penitus persuasus sum; jacturam enim gravem me fecisse probe intelligis, cum ob amissum, cujus imago meis quotidie obversatur oculis, desideriumque defuncti facit: tum etiam ob memoriam antea actæ cum ipso vitæ, quæ me inofficiosi testamenti querelam instituere cogit. In contrarias sane partes abriperer, si commodi rerum mearum privatarum diligentior essem, quam juris amicitiae, cujus me prae caeteris studiosum esse mecum constitui. Ab Ampliss. *Wiquefortio* multa de his, quæ testamento jussit *Jacobus* ille *Puteanus*, audire potuisti; unum tamen aliquis ipsi perperam significavit, Veteres nempe Manuscriptos Codices Illustriss. *Thuano* ab ipso fuisse legatos, quos Regiæ Bibliothecæ consecravit, eo etiam casu, si Rex excusorum librorum Bibliothecam accipere recusaret. Ovidianos propterea Codices, quos videre cupis, in Illustriss. *Thuani* potestate amplius non sunt, nec illos ad te ferri, cum in Hollandiam proficiscetur, possibile est. Alios tibi non visos, si penes illum aut me essent, alacriter mecum terrem. Neque diligentissime curare omittam, quicquid Dominus *Philibertus de la Mare* Senator Divionensis ad te perferendum fidei meae crediturus est. Ex Bibliotheca Memmiana aut Cardinalitia parum te sperare jubeo. Illa cum blattis, araneis, muribus ac foricibus luctatur, literatis paucis vel nullis olim permessa, nunc penitus apud viduam abscondita. Eminentiss. Cardinalis Bibliothecæ usus aliquomodo conceditur, & si Parisiis degeres, illam tibi patere aliquis ex amicis curaret. Habet equidem Illustriss. *Thuanus* pluresi Parenti suo & *Puteanis* a

Patre

Patre tuo viro Clariss. scriptas epistolas; cum ipso tuam epistolam communicabo, ut quid velis ac cupias ipse intelligat, utque tibi perficiat, quantum penes me erit, adlaborabo. De die vel tempore, quo hinc ad vos abiturus est Illustriss. *Thuanus*, certi quicquam affirmare non ausim. Quamvis plura ut hîc remaneam, suadeant, abeuntemque retineant, gratissimum mihi erit & Illustriss. *Thuano* morem gerere, & operam ei, quam potero, diligentissimam navare. Jucundissimum etiam erit moeroris levamen te alloqui, tecum amicitiae foedera renovare, & de literis humanioribus caeterisque ad artes liberales spectantibus argumentis inter nos confabulari. Reipub. etenim curisque gravioribus aliquid detrahendum est, & solatium in levioribus est quaerendum. Si pluribus epistolae tuae, ut par est, non respondeo, aliis, quibus occupatus sum, negotiis culpam transcribe. Omnes amicos nomine tuo salutabo. Interim vale, & me amare perge. Scrib. Lutetiae Parisiorum Die 13. Februarii CIOIOCLVII.

E P I S T O L A D X V I I I .
I S M . B U L L I A L D U S

Nic. Heinsio.

Amstelodamum.

GElu asperrimo, a die *Στοκρέσεως τῆς Σελήνης*, seu plenilunio proxime peracto Gad ultimum quadrantem, non solum aquae concretæ ac induratae steterunt: sed & animalium artus innato calore vix renitente fere dirigerunt. Scribenti manus digitique frigore torpentes & adstricti officium consuetum maligne praebebant, conversumque in glaciem atramentum literas pingere vetabat. Nihil propterea ad postremam tuam epistolam superiore hebdomade reponere potui, ut me tuas ad *Capellanium* nostrum, *Mariumque* in Divionensi Senatu consiliarium statim curavisse significarem: ac deinde Academiæ novas hac in urbe Parisiorum hominum frequentia celebres nunc spectari ea de causa narrem, quod intra ipsius muros ingeniorum ac eruditionis regnum esse scribas. Ad Regem nostrum Orator Venetus e gente Justinianeæ ortus Academiæ novæ apud nos author, singulis Saturni diebus eruditorum, non qui situ pulveris Bibliothecarum aut Manuscriptorum librorum squallent, sed lepidissimorum, comatulorum ac delicatulorum hominum coetum in aedes suas admittit: ibique ad instar aliarum per Italiam Academiarum quaestiones tractandæ proponuntur. Inter caetera argumenta hæc fuerunt, quibus vinculis, ex quove metallo aut materia factis, Aeolus ventos inantro compesceret & comprimeret. Alterum festivum equidem jucundumque, an remo, an velis cymbam animas trajiciendo Charon ageret. Unum ex illis Academicis monui, controversiæ statum non plane ac integre propositum fuisse: dubitari etenim posse, an illa cymba fune in utraque rixa alligato, ut hippago solet, ageretur. Aliam diversi longe a Veneta illa instituti Academiæ Illustrissimus Domin. *Mommorus* libellorum supplicum Magister apud se etiam instituit. In

ea namque de rebus Mathematicis & Physicis tantummodo differitur. Venetos Academicos ridēt, vanitatisque & ἀδολειχίας, ne dicam futilitatis, hi νεοπυθαγοεῖται insimulant, inque eos invecus est quidam *Petitus* dictus militaris Architectus, qui ludum Academicum habita apud *Mommorium* oratione inaugurali aperuit. Neutri sum adscriptus: non priori, quia lepos & ornatus illi ad aures & oculos saeculi accommodati me prorsus deficiunt, aliis studiis severis magis ac austeris assuetum. Non etiam alteri, cui interesse mihi non licet: quod longissimo itinere Illustrissimi Domini *Thuani* aedes a Mommorianis diffinitae sint; cum etiam die Veneris, quo plures mihi epistolae necessario exarandae sunt, Academici illi conveniant. A quibusdam intellexi Venetos suaviores, magis expolitos, urbanioresque esse, ac inter colloquendum officiosis verbis uti. Mommoriani acriores sunt, atque vehementius, ut pote qui de veritate adsequenda decertant, inter se differunt: quandoque etiam sese libentius carpunt, ac investigare profiteantur, singuli inventae auctores esse volunt; nec in partem praedae, si quis illam veritatem venatus comprehenderit, sponte libentique animo caeteri venerint: cum famae suae ac gloriae detractum unusquisque putet, si victori cuipiam herbam dederit, inventoremque agnoverit. Gratissimum nuncium de *Gronovii* ac *Vossii* operibus mox edendis tuae mihi attulerunt. Illum virum probum sincerumque & vere eruditum meo nomine ut salutes, impense rogo. *Vossium*, etsi omnino me neglexerit, insalutatum dimittere nolo. Hoc igitur a te impetrare percupio, ut meis eum verbis salutes: moneasque nihil a me in ipsum admissum esse, quod ejus a me animum alienare debuerit. De Hyantis fidere ad te quae scribam, paucissima mihi occurrunt. Scis Ovidium tuum non longe ab initio libri 5. Faestor. de Hyante fabulam seu historiam persequi: sororumque in fratrem a lea occisum pietatem ipsas inter sidera collocasse, deque fratris Hyantis nomine Hyadas fuisse appellatas.

Victus uterque parens tamen est pietate sororum:

Illa dedit coelum, nomina fecit Hyas.

Inter varias appellationis causas & origines eandem recenset Poet. Astron. lib. 2. Hyginus, atque etiam fabula 192. Dicit Pherecydes Athenaeus nutrices Liberi patris Hyadas fuisse, quae Dodonides nymphae appellabantur, cumque captivitatem a Lycurgo timerent, Thebas fugisse; ne vero a Junone aliquid paterentur, a Jove coelo illatas, & siderum honore affectas. Hyadas autem Jupiter appellavit, quod nascente Libero eas invenerit, quas in signum temporis posuit. Quibus adjungere oportet, Theonem ad Arati phaenomena notare, quod Liber ὕψ etiam vocetur: cujus ratio talis reddi potest, quia vindemiae tempore, e vite amputato Baccho, & in dolia infuso sub ortum vespertinum Hyadum, copiose ineunte in Graecia autumnopluiebat. & Bacchus ὕψ dicetur ad innuendum vindemiarum tempore pluvias cadere. Plura a me nunc non habebis. Vale & me ama. Scribeb. Lutet. Parisior. Kalend. Febr. CIOICLVIII.

Impresso, jam priori folio, vidi hanc epistolam debuisse postponi sequenti.

Tom. V.

Ffff

EPI-

EPISTOLA DXX.

ISM. BULLIALDUS

*Nic. Heinsio.**Amstelodamum.*

EX eo, quem erga me semper gessisti, animo, quemque perspectum satis habeo, persuasus firmiter sum, jucundum tibi fuisse ac gratum nuntium de designatione nuper ab Eminentissimo Cardinali *Mazzarino* facta, qua ad Bibliothecae suae curam me admovere velle demonstravit. Haec profecto, quam abunde mihi demonstras, benevolentia tua, ut me tibi addictiorem jure merito habeas, teque ut diligam magis, magisque observem, facit. Reditum in Hollandiam intercipit equidem hic novus fortunae meae status; verum ab officiis meis tibi exhibendis operaque praebenda non abstrahet aut avertet; magnam quoque mihi voluptatem animi perire sentio, quod, prout speraveram, coram colloqui & sermones conferere tecum mihi non conceditur; literarum commercio hoc damnum refarciendum propterea erit. Cum nullo autem amicorum hoc negotium communicare, antequam perfectum foret, statueram: cum moribus, coque sim ingenio, ut de me quicquam praedicare, vel famam de iis rebus adhuc infectis praecipere non possim, atque a jactantia & vanitate omnino sim alienus. Illustrissimo *Thuano* Regis ad vos Legato totum, pro ut gestum fuit, soli perscripsi, cum id ex officio meo esset, eoque inscio aut invito ab aedibus ipsius ad Mazzarinianas transire indecorum adeoque impossibile fuisset. Quod probe cum intelligeret Eminentissimus Card. *Mazzarinus*, ut ad Illustrissimum *Thuanum* rem totam referrem, quaeque decrevisset ac mihi aperuisset, ut scriberem, me jussit. Quae intervenerunt negotia, quaeque Eminentissimi Cardinalis pedes invasit podagra, quo minus ipsum adierim, ab eo tempore obstiterunt. vacuas enim ab occupationibus gravissimis paucissimas horas habuit. Ejus mandata quietus expecto: cujus familiae cum postea adscriptus fuero, procul ab omni sollicitudine praeposteraque festinatione eventus casusque rerum praestolabor. Plures dignitatibus Ecclesiasticis inhiantes, pinguique sacerdotia appetentes diu multumque honorem illum ambierunt: frustra quoque amicorum officiis, artibusque quibuscumque adhibitis repulsam passi sunt. Mihi ne cogitanti quidem ultro oblatus est: quo nomine obnoxium me sibi magis Eminentissimus Cardinalis fecit. Cujus judicio & consilio cum id debeam soli, ea praerogativa fretus tranquillior securiorque de rebus meis vivam. Quodque dignitatis aut fortunarum augmentum accesserit, mihi non dissimilis factus, nec demissiori scilicet nec elatiori animo accipiam. Si minus vero externa illa incrementa, votisque ab omnibus expetita commoda mihi obtigerint, immutatus nihilominus permanebo. Rei literariae operam procul dubio non inutilem praestabo, si Catalogum librorum, quibus Bibliotheca constat, perficere mihi liceat; absque enim ejusmodi vehiculo per librorum tam ingentem multitudinem recta ferri, viam sibi facere, eosque noscere possibile

bile non est. Ad Illustriss. *Montosarium*, ut & ad *Capellanium* epistolas tuas omnes curavi, famuloque ad ipsos perferendas tradidi: molestiam aegritudinemque animi acerrimam mihi crearet famuli negligentia, si eas non reddiderit, quod tamen in animum inducere facile haud possum. Postremae tuae, quibus nunc rescribo, *Capellano* nostro redditae sunt, eademque semper sedulitate ac diligentia caeterae curabuntur: cum jucundius quicquam accidere mihi nequeat, quam si rebus tuis inservire utcumque valeam. De Melae editione, quam egregiam luculentamque Cl. *Vossii* opera habituri sumus, lactis nunciis me beasti. adornati a Cl. eruditissimoque *Gronovio* Senecae ambo non minori me gaudio perfundent; Tragicus imprimis, quem in Bibliotheca San-Laurentiana Florentiae cum MSS. ut bene meminisse potes, olim contuli. *Menagius* noster optimus versus suos & opera poetica praelo iterum subjicit. *Valestique* Eusebius ab operis typographicis ad umbilicum paulatim perducitur. Caeterum apud nos Philologiae ac critices studia cessarunt. Quapropter quidam concivis, ut mihi retulit optimus *Gronovius*, recte dixit saeculum Philologicum ac criticum abiisse, Philosophicum vero ac Mathematicum successisse: Claudii Ptolemaei opusculum, quod me tibi jam significasse puto, *ἡ δὲ κεντρικὴ καὶ ἡ γεωμετρικὴ* cum commentariis meis editioni paratum habeo: cui monumentum etiam ab eodem Ptolemaeo Canobi, ejus ipse incola fuit, olim consecratum adjunxi. Utrumque haecenus ineditum cum in lucem prodierit, a viris doctis benevole suscipiendum fore spero. Vale, vir Clarissime, meque, qui te amplector ac veneror, semper redama. Scribebam Lutetiae Parisiorum die April. 12. Anno MDCLVII.

EPISTOLA DXXI.

ISM. BULLIALDUS

Nic. Heinso.

Hagam.

Ure redeunti epistola tua officiosissima, vir egregie, septimana superiori mihi reddita est. Si per temporis angustiam contractamque ex profectio-
 ne, etsi non longinqua, lassitudinem licuisset, statim tibi rescripsissem, ut quantopere tuo erga me resque meas animo ac benevolentia ad te amandum observandumque moveas ac suavissime trahar, verbis meis, etsi tenuibus, declararem ac exprimerem. Officio nunc fungi, gratiasque ingentes agere tibi libet de illo, quo rationes meas ac commoda prosequeris, affectu. Mihi vicissim te tuaque carissima esse credas velim, nihilque gratius jucundiusque contingere posse, quam si meritis tuis debita praemia rependi audiam. Cum itaque ex Illustrissimi Domini *Thuani* Regis apud vos legati epistolis te honore auctum intellexerim, de illo tibi, & in Republ. vestra munere publico a Celsissimis Praepotentibusque Ordinibus tibi delatus,atulabor. Ornarunt te equidem illi ad majora provehentes, sed & ipsi multum decoris ac gloriae sibi quaesierunt, cum te, virum tot virtutibus clarum, tam recto judicio, & ad

re-

rerum suarum utilitatem ac claritudinem egregie accommodato, ad munus illud gerendum elegerunt. Quem enim eloquentiorem, inque scribendis Latino sermone epistolis elegantiorē nancisci poterant? Habebunt te mentis suae consiliorumque suorum peritissimum prudentissimumque interpretem: imperii sui Majestatem, cum tuenda erit, grandi sublimique eloquio, spirantibusque minas verbis hostibus ostentantem: amicisque aut in amicitiam rationumque societatem pertrahendis Suadae ipsius voces fundentem. Fruantur itaque vestri diutissime opera tua, teque deinceps ad altiora evehant. Ad mea quod attinet, eo loci sunt, ac ante sermones ab Eminentissimo Cardinali de Bibliotheca sua mihi committenda agitados fuerant; negotium totum interturbatum abruptumque reor. Cum enim apud Eminentissimum me excusarim munusque, quia *Naudaei* olim famulum adungere mihi decreverat Eminentiss. propterea detrectarim, nostri amborum neutrum sententia ac proposito discedere velle certus sum. Id Eminentiss. Cardinalis consilio, non aliena suggestionē factum; quod ab aequitate nec alienum censeo, nec quempiam aliter sentire vellem. familiae quippe patroni ab annis quatuordecim adscriptus gratusque satis est ei *Poterius* (sic enim *Naudaei* famulus iste appellatur.) Mihi vero turpe ac indecorum foret, cum eo inerudito ac imperito societatem inire, etsi illam maculam attributo mihi magisterii nomine ac magistri titulo eluere Eminentissimo visum sit. Invidis, si jūverit eos hic casus; lactique recedentem me adspexerint, succensebo nunquam: ista voluptate potiantur, in sinu interea gaudebo, & tranquillitate ac sanitate fruar, quas incomposita indigestaque librorum multitudo manibus tractanda procul dubio corrupisset, molestiaque affecisset non prorsus indignum, qui majoris momenti rebus admovear. De Ptolemaei opusculis, quae ad edendum parata habeo, nihil aliud significare tibi possum, quam typographum huc usque me non invenisse, qui sumptibus suis illa typis mandare velit. nec penitus miror, cum tales libri paucorum sint hominum, nec se ab omnibus tractari patiantur. De re literaria apud Italos plura ex tuis cognovi, quam ex nostris, quibus non ita frequenter ex Italia libri hodie apportantur. Euclidem restitutum libenter viderem ac considerarem, si deperditos libros tanti Geometrae, aut argumenta saltem illorum *Job. Alphonsus* ille *Borellus* restituit. *Toricellii* quoque scripta avide cupio, nota quippe mihi fuit hominis, dum viveret, in Mathesi sagacitas. Caetera quoque opera & illas antiquitatum collectiones maximi facio, & ad nos perferri opto. De ducum Urbinensium Bibliotheca in Vaticanam translata ad me jam te scripsisse memini: literatorum usibus facilius forsan Romae quam Urbini patebit. Laetor admodum *Vossii* Melam tandem in lucem proditurum, ipsum hinc salutare per te mihi liceat. Fortunam tibi propitiam in omnibus faventemque precor. Vale, vir Clarissime, & me ama. Scribebam Lutetiae Parisiorum die 12. Julii Anno c1710CLVIII. Epistolam tuam ad *Capellanium* nostrum curavimus.

EPISTOLA DXXII.

ISM. BULLIALDUS

Nic. Heinsio.

Hagam.

AD maritum Illustrissimum Legatum Domina Thuana proficisci hactenus, vir Clariss. non potuit, cum per aestatem negotia domestica non levis momenti expedienda fuerint. Imparatam adhuc ad iter ingruente autumno plures rationes eaeque graves, in quibus valetudinis anceps status praecipue censendus est, ne capefferet illud, intercesserunt. eam deinde invasit morbus, natorumque majorem natu ac tertium; hic quinquennis absumptus est; primogenitus ex febris quotidiana, quam tertianam duplicem vocant, post dies sexaginta convaleuit. Ipsa vero, quae gravius periculosiusque aegrotavit, pro corporis tenui macilentaque habitudine, paulatim vires, adspirante numine, resumit. In veris itaque adventum profectio illa necessario differenda fuit. Valetudinem interea, qua fere dubia ab annis aliquot utitur, quam recte poterit, curabit, caeterisque rebus suis providebit. Ipsi me comitem fore puto, & ad vos iterum accessurum; non longam tamen in regionibus vestris moram facturum me existimo. Quod munus in Republica vestra Tibi delatum, ut ex nunciis intellexeram, postremis literis gratulatus fuerim, non me poenitet; gaudio namque perfusus, persuasusque rem ita esse, scribebam, & erga te ut sum affectus, significabam. at non successisse negotium, quod ad me pertrulerant nuncii, ingratum valde ac permolestum mihi est. Brevi tamen a vita privata ad obeundum aliquod munus publicum, quod virtutes tuas ac merita cohonestet, ac exerendi se occasionem eis praebeat, transcribendum te esse spero. Res meae apud Eminentissimum *Mazzarinum* eo loci sunt, ut de Bibliotheca aliave de re non agatur; ex quo enim ab onere isto me excusavi, ob socium, quem adungere mihi voluerat, aliae subierunt animum cogitationes rationesque, cum aetatis tum virium mearum valetudinisque, quae ad conficiendum Catalogum, tamque ingentem librorum acervum tractandum non sufficiunt; easque quibusdam cum viris communicavi, ut per hos rescirent, qui negotium illud gesserant, & Eminentissimo Cardinali *Mazzarino*, si forte inter tot negotiorum ambages de me incidisset mentio, referrent. De me itaque aut de rebus meis nunquam cogitabit. Qui, res ut primo sese offerunt, accessu aestimant, earumque specie capiuntur, in culpa deprehendere me volent. Verum de meis rebus nemo, quam ipse ego, qui me optime novi, judicare rectius potest. Ovidium tuum tam maligne ab operis typographicis haberi aegerrime fero, utque tu longiores morasnectere nolis, impense rogo. *Vossi* Melam ad nos attulerunt Bibliopolae, illum evolvam, & quae mihi obscuriora erunt, ab eo ut elucidentur, petam. Ante duos menses Serenissimus Princeps *Leopoldus* ab Hetruria Apollonii Pergaei libros 5. 6. & 7. in Medicaeis gazis repertos, ex Arabico sermone in Latinum versos publici juris fieri, per Magni He-

Hetruriae Ducis Prolegatum nunciari mihi fecit. Illos videre peropto, ut & Archimedis, si tamen hujus viri inventa sint, lemmata. Quamvis e memoria Eminentissimi *Mazarini* exciderim, ut quales erga ipsum animos geram, testificer, Ptolemaei, quae penes me habeo, opuscula ipsi nuncupare, utque in Typographia Regia excudi jubeat, rogare decrevi. Ad *Vossium* recurrit sermo, quem vellem vivum potius *Salmasium*, quam mortuum lacezivisse; modeste dummodo, ac veritatis studio id fuit, nullus improbare poterit. Vir enim ille summus in multis lapsus est, & quae explicanda suscipit, obscuriora aliquoties quam lucidiora reddit. *Capellano* literam tuam reddidi, cujus responsum hactenus non misit; ubi accepero ad te transmittetur. Vale, Vir Clarissime & me redama. Scribebam Lutetiae Parisiorum die 13. Decembr. CIOICLVIII.

EPISTOLA DXXIII.

ISM. BULLIALDUS

*Nic. Heinsio.**Hagat.*

NON is sum, vir praestantissime, qui tantum mihi adrogem, ut te mihi quicquam debere existimem: aut qui te rebus feriis gravibusque vacantem, vel otio liberali fruientem, Musisque operam dantem ab illis avocandum abstrahendumque credam, ut per literas frequentiores, tanquam ex officio id facere tenearis, me adeas. Beatum me putabo, beneque mecum agi, cum epistolam ad me obiter ὅς τις πάρεργον quandoque scripseris, ita ut tibi temporis nihil pereat. Ex damno quippe tuo, quin potius ex Reipubl. literariae detrimento, voluptatem commodumque percipere ac compendium facere praeter aequum fasque omne fuerit. Quod porro mei memor vivas, recte facis, mutuasque vices rependis, frequentem namque de te mentionem facio; singularesque morum tuorum probitatem ac sinceritatem, eruditionemque tuam laudibus, ut par est, omnibus commendo ac praedico. Nec minori affectu omnes amici tui, qui in hasce Thuanas aedes quotidie ventitant, te complectuntur. Quod porro scribis te assiduum esse mei laudatorem, vereor, ne parum decore ac minus convenienter facias, illaeque laudes nimiae tibi vitio vertant, mihi vero, quod eas non convenire cuncti merito judicabunt, invidiam creent ac concilient. Si parcius in me congesseris, eo beneficio obnoxium me tibi feceris, & melius utriusque nostri famae & veritati consulueris. Proderunt illae mihi apud Illustrissimum dominum *Thuanum*, & apud caeteros, quibus notus sum, quibusque in posterum innotescam, si mediocres fuerint, & meritis meis congruant, nec a vero longius discedant. Illustrissimo Excellentissimoque Domino *Thuano* & tibi familiarem illam consuetudinem, quae ex amicitia ab utriusque parente olim contracta inter vos coaluit, gratulor. Tuis siquidem colloquiis adeo eruditis suavibus jocundisque, contractum ab eo ex assidua negotiorum tractatione taedium multum levare scio; animumque ipsius curis ac solli-

sollicitudinibus asperis edacibusque confectum recreari & exhilarari. Teque vicissim viri tam eximii omnibusque bonis artibus, ac doctrina instructi voluptatem fructumque non sine aliqua honoris specie percipere. Optarem profecto vobis adesse, & familiaribus eruditisque vestris dissertationibus interesse; Sed plura cupientis voto obstant, & aetas, quae senectutis limen supergressa, ut tranquilliorē minusque desultoriam vitam degam, nunc interpellat ac monet; & opera qualiscumque mea Illustrissimo *Thuano* ex ipsius magis usu hīc, quam apud vos erit. De Dominae *Thuanae* in Bataviam abitu nihil ad te scribere possum. Clarissimo conjugī suo quid de se statuāt, significare poterit; dubia admodum valetudine ipsa utitur, etsi medicorum usū consilio & arte, eam quam diligentissime curet. De *Vossii* in *Melam* commentariis brevi aliquid ad te scribam, & de dissertatione de *Mundi exordio*, ubi fuero illam nactus. Retulit mihi *Bigotius* noster ejus sententiam a Theologis vestris exagitari. Apollonii Pergaei Canicorum libros v. vi. & vii. brevi nos visuros spero, urget opus Serenissimus Princeps *Leopoldus*. Quod *Vossius* & *Gronovius* *Salmasium* carpant, vel etiam discerpant, nullus miror; ipse quippe vivus nec mortuis nec vivis pepercit. Sed qui caeteros redarguere sibi semper proposuit, in plura *Σφάλματα* erroresque imprudens incidit; dumque gladium in latus alterius intendit, nudum ipse latus, quod adversarii ictibus petant, ostendit. Nomini tamen eruditissimi viri si non amicitiae legibus, jūris saltem naturalibus ac humanis coerciti, injuriam facere non debemus; quis enim ab errore tutus & immunis. Clariss. Viros *Christianum Hugenum Zulichemium*, *Goliūm*, *Schotten*, *Gronovium* & ipsum *Vossium* ac caeteros vestrates eruditos meis verbis ut salutes, te etiam atque etiam rogo. Vale, vir Clariss. & me redama. Scribam Lutetiae Parisior in aedib. *Thuanis* die 25. April. *MDCLXXIX*. Salutant te omnes amici. literas tuas *Bigotio* reddidi, ad *Capellānum* & *Marium* quas ipsis destinasti, curavi.

EPISTOLA DXXIV.

ISM. BULLIALDUS

Nic. Heinsio.

Hagam.

Nollem sane, vir Clarissime, ut, quas ad me frequentius scriberes, a feriis tuis occupationibus studiisque, epistolae te averterent; neque etiam hoc a te flagitare aequum esset, & honestum, cum mihi quicquam ejusmodi adrogare non debeam, quo tuis ex incommodis aliquid lucro apponam. Cum ex usu tuo fuerit, vel tibi libuerit, beatum me ac honore affectum acceptis a te literis putabo. Si me oblivioni traderes, aut inītam inter nos amicitiam mihi renunciāres, quod tecum jure expostularem, haberem; sed de tua fide & aequitate ita sum securus, ut immutari animum erga me tuum, mihi amicitiam tuam constanter colenti persuaderi nunquam sinam. Te igitur in me quicquam admittere aut errare, si rarius scribas, dicere noli, cum obnoxium me potius ac tibi

tibi nexum habeas; quod apud Illustrissimum Dominum Legatum tam officiosus commendationibus tuis erga me sis, tamque frequentem de me mentionem facias. Felicem illum praedico; quod animum negotiis assiduus fessum familiaribus colloquiis tuis, eruditis quidem & amoenis, recreare queat ac reficere. Optarem equidem, ut nostri homines, saeculi praeteriti memores, literarum studia diligentius colerent; sed ad ea tempora devenimus, quibus paucissimi illis serio incumbunt. Aevum illud doctorum virorum abiit, succeditque pejor aetas: avaritia namque, luxu & nugis corrupta ingenia & obruta ad meliorem ac exquisitiorem eruditionem sese vix erigunt; hac de causa bonae notae opera valde infrequentia, quae tibi indicare queam, hodie apud nos extant. *Andree a Quercu*, Historiae Francicae nostrae olim peritissimi, Filius Gallorum Cardinalium Historiam proximis hisce diebus edidit. *Launojus* opuscula varia sua cum *Jacobi Sirmondi* quibusdam recudi, aliaque inedita juris publici fieri curavit. Sacra Biblia voluminibus octodecim, magna commentariorum glossarumque mole assurgentibus, brevi prostabunt. Hujus editionis author est quidam Divi Francisci familiae Religiosus Parisiensis, qui vocatur R. P. *de la Haye*. Ediderunt *Valesii*, *Henricus* scilicet Eusebii historiam Ecclesiasticam, & *Adrianus* Historiae Franciae volumina II. & III. Eusebii versionem Latinam sunt, qui multis in locis carpant, nec ab erroribus immunem esse contendunt. *Auberius*, qui Cardinalis Jousae vitam antea scripsit, Richelii Cardinalis vitam quoque prolixè a se descriptam in lucem emittit, opusque ad finem operae typographicae brevi perducent. *Menagius* noster in Diogenis Laertii vitas Philosophorum notas congerit, quodque miraberis, amanuensi in illis describendis non usus singula folia typis proprio sumptu expressa, nec ex singulis formis uno plura, in Angliam, ubi denuo liber ille adornatur, transmittit. Nollem equidem famam hamis aureis ejusmodi piscari: sed bonus amicus noster, ut literariam Rempublicam augeat, nec sibi, nec pecunae suae parcat. Fabulas alii amatorias contexunt: epigrammata alii consuunt. Quae argumenta sibi tractanda quidam sumpserunt, epistolis mandavere, ex quorum numero sunt *Sorbierius* & *Motha Vayerius*; quorum ille ante tres menses suas Latine edidit; hic vero in publicandis idiomate Gallico suis occupatus est. Alii virorum Illustrium potentiorumque gratiam atque etiam pecunias scriptis encomiis & elogiis captant. R. P. *de Billi* e Societate Jesu quaedam in Diophantum, quae ad Algebram pertinent, cum Mathematicis juris publici facta communicavit. Ex Arabico sermone conversos Apollonii Pergaei de Sectionibus conicis libros jam diu est cum publicare debuisset Clariss. *Golijs*, hanc palmam Florentini ipsi praeripuērunt: neque illis irasci jure potest, cum spatium temporis ad edendum, caeterisque praevertendum abunde ipsi suppetierit. Opera illa Clarissimorum Virorum *Schelii* & *Gronovii* absoluta & perfecta quam ocissime cupio. Ovidium imprimis tuum, quem nativo nitori, quantum ingenii humani solertiae ac industriae licitum est, reddidisti, videre magnopere desidero. Quantum ad me spectat, plura sunt, quae ab edendo illo Ptolemaei libello, de quo olim per epistolas tecum legi, nunc retrahunt, cum mihi com-

modum magis fuerit id praestabo. Ad Clariss. celeberrimumque *Huglium*, ut de rebus Astronomicis cum eo communicem, ojusque magnifice ac exquisitissime elaborata organa Astronomica intuear, me conferre Polonium pacem meditor. Hipparcho ac Tychoe minorem illum ne credas, inique meam profectionem, si eam suscepero, inculpes. Adierunt Pythagoras, Platon alique multi Aegyptios, Babylonios, Indos. Navigavit in Dariam *Jacobus Scotiae Rex*, & Tychoem ejusque arcem Vraniburgicam invisit. *Christianus Hugenius* officiosissime resaluto, Virum in Mathematicis admirandum. Quae porro de Serenissimi Principis *Leopoldi* ab *Hetruria* in respondendo ad te libellus epistolas longiori mora allegas, cum litteris, quas ab Illustrissimo Dominici Legato accepi, non concordant, quibus *Hugenius* nostrum a Serenissimo Principe responsum tandem accepisse mihi significavit. Ipsum Pisis aliquandiu acrogatasse nuntii ad nos perreuerunt, moribusque dilati tandiu responsum, quam quae in mentem amico nostro subierunt, potior causa fuerit. Clarissimos *Jacobum Golium* & *Is. Vossium* omnesque eruditos viros vestros amplector, quibique & ipsis omnia laeta ac prospera voveo. Vale, & me amali. Scribebam Parisiis die 5. Martii Anno MDCLX.

EPISTOLA DXXV.

ISMAELI SUBULI ALIDI

Nic. Heinsius

Hagae.

ANte tres septimanas priori epistolae tuae, vir Clarissime, Junii die 26. ad me datae respondissem, nisi quaedam intervenissent, quae animum distraxerunt, negotia. Citius quoque profectionis nostrae in Bataviam diem cessurum, meque praesentem tuis desideriis obtemperaturum speraveram. Et si vero sarcinulae meae leves sint, curtaque suppellex, nec ad illas convasandas, ut me itineri accingam, grandibus machinis & longa mora sit opus, quibusdam tamen fuit mihi attendendum, quae me etiam occuparunt. Cum vero ab inanis nostrae tempus haecenus fuerit ob maximi momenti rationes protractum, officium meum diutius deferere, tuamque expectationem commorari minime civile & honestum foret, & nimiae negligentiae culpandus merito venirem, qua propter ad utramque epistolam tuam, praenotatam nempe, ac postremam 22. Julii decurrentis scriptam, sum hacce mea quam poterò diligentissime respondurus, pluribus autem, ut spero, cum vestras regiones adiero, tecum acturus. Mecum saepius agitavi ac expendi, quid causae subesse posset, quamobrem a Sereniss. Principe *Leopoldo* ab *Hetruria* noster Clariss. *Christianus Hugenius* solitis comitate & humanitate illi innatis virtutibus exceptus non fuerit, nihilque propterea responsum acceperit, ita ut exhibiti ab amico nostro obsequiosi officii & dedicati operis nulla sit gratia. Ob parcius laudatum summum virum *Galileum*, vel assertam terrae mobilitatem, & ob retentum systema mundi Pythagoricum a *Copernico* reductum, id factum vix persuadeor, nec favorabili responso suo concep-

tas

tas de purpuræ adipiscendæ honore spes suas imminuturum Principem illum putasse existimo. Conjicerem potius, Principes illos Serenissimos nostrum *Hugenium* de plagiato suspectum habere, adque ipsum caeca quadam & ignota via inventum a *Galileo* pendulum, & Horologio adaptatum, mansisse fere persuasos, quod postea tanquam suum toti orbi venditarit. De illis *Hugenium* monui, & apud illos Principes ipsum excusavi non solum, sed etiam ipsius, ut pote viri probi, ingenui, & sinceri, causam egi, quorum tamen suspiciones amoliri penitus aut diluere me non potuisse deprehendi. Optimi ac eruditi *Bigotii* ad *Menagium* literis *Hugenii* systema Saturnium ab Italis exagitari cognovi. Quid ipsi opponere, præter illa, quæ a me sunt antea objecta, possint non video. Infra quadriennium Saturnus ipse, quam est in Sagittarii dodecaterorio ostensurus, facie sua ac forma litem dirimet. *Schotenum* obuisse scripto carmine elegiaco optimus juvenis *Samuel Tennullius*, Clariss. *Gronovii* sororius, nobis Parisiensibus significavit. Artes mathematicæ earumque cultores virum illum desiderabunt, qui multa sane pulchra & utilia jam ediderat. Illustrissimos viros *Petrum* & *Jacobum Puteanos*, sine laudum titulis mihi nunquam nominandos, in concedenda Historiæ concilii Florentini e Regio Codice transcriptione minus faciles ac indulgentes optassem; illam enim vulgari & publici juris fieri nec regni nec Reip. litterariæ multum intererat. Tantas tamen turbas inde excitandas non prævideo, neque ad *Leopoldi Allatii* revincendam erroneam assertionem illa historia opus erat, aut unquam erit; cum tentata aliquoties nec tamen feliciter, Ecclesiæ occidentalis & Orientalis reconciliatio libri ipsius titulum futilem, ejusque probationes omnes infirmas manifestissime arguat. Jamdiu est cum Clarissimi *Gronovii* in Senecæ tragoedias lucubrationes videre cupio. Tacitus vero cunctorum politicorum & criticorum manibus contrectatus, deterius, expolitus, quid splendoris & claritatis a quoquam referre queat? nisi a bipede illo. *ῥολόσιον, ζωὴ, ὁ πρῶτος καταγελάσιν*, ut *Arriani* Stoici verbis utar, *Peiræedio* Aquitano critico; qui hunc Historicum, solus se intelligere, nullosque ante se intellexisse, credit, jactat, prædicat. Militiam Romanam divite messe, fortasse etiam spicilegio, *Schelio* non relictis, felicioribus avibus tractasset summus noster *Salmasius*, quam usuras, nauticum foenus, mutuum, dies criticos versavit & computavit. Opera & *Gronovii* & *Schelio* aliquando inspicimus, & ad studia juvenilia, ubi tuus totus mihi legendus *Ovidius* prodierit, redibō. Superiori hebdomade fasciculum a Serenissimo Principe *Leopoldo*, quo *Kicentii Kiriani* de Maximis & Minimis opus inclusum erat, per euniores huc ad me missum accepi. Recte judicarunt, in quorum sane numero Clariss. *Hugenius* reponendus, qui tantum opus feliciter absolutum pronunciavere. In eo sane raptim a me, & obiter hætenus pervolutum multa profundæ meditationis ac subtilissimæ industriæ in rebus Geometricis tractandis certissima indicia sese mihi obtulerunt. Responsum hodie ad Serenissimum Principem *Leopoldum* dedi, & de tanta in me benevolentia grates ipsi egi. Ad *Carolum* etiam *Renaldinum* in Pisana Universitate Philosophiæ professorem, super duobus Problematibus Geometricis ab ipso mihi propositis

rescripsi. Idem quoque Sereniss. Princeps Apollonii editionem strenue promoveri mihi benigne ac comiter significavit. De Clariss. ac Doctiss. *Golio*, ejusque in publicandis Apollonii libris studio & opera collatis me tibi antea scribere memini: debuerat, cum ipsi tempus suppetierit longissimum, caeteris praevertere; Ipsius tamen laboribus, si integrum Apollonium penes se habeat, Compendii editio Florentina non officiet, famamve obscurabit. Dominum *Gudium* Holsatum semel aut bis ante sex menses vidi, deinceps vero quicquam de illo aut quid ipsi contigerit, à nullo audiui. Ad ultimam epistolae tuae prioris partem nunc respondeo. *Labbaei* Glossaria nondum absoluta sunt, testudineo gressu typographicae operae gradientes intra unum mensem sex vel octo folia excudunt; neque hoc anno vaenum profliturum spei faciunt. De Themistii orationum editione nova, non est etiam quod citius expectes. *Tanaquillus Faber* in Aelianum quaedam commentari incepterat; sed illa omisit; & Anacreontis Sapphusque poematum, quae supersunt, editio elegans satis, ab ipso notis eruditis additis curata est; & Salmurio Parisios ante menses aliquot advecta, cujus unum exemplar ad te perferam. Laertio *Menagius* quotidie incumbit, interim vero a Londinensi Typographo nuntios nullos literasve a longo tempore se habuisse queritur. Ipse ad Cl. *Medonium* epistolam tuam curavit. Ad alteram tuam eamque postremam epistolam tandem responsum hic dabo. Quam recte, quam te dignam rem agis, cum Serenissimi Principis Electoris Palatini desideriis, ut foetum tam nobilem, Lucani emendatissimam editionem in lucem emittant, manus tuas obstrictrices porrigis. Opera tua raritate principum, qui simili utantur, non vilescet. Quo pauciores literis eruditique hominibus favent, eorum nomen famaue, virorum etiam doctorum operam suam ipsis commodantium, majorem in modum celebrabuntur. Jussit me illustrissimus Dominus *Thuanus*, Reginus ad PP. Foed. Belgii Ordd. Legatus, ut in omnibus morem tibi geram ac obtemperem, & libros per te indicatos MSS. celeberrimae Bibliothecae suae, cum hinc discedam, ad te perferri cum caeteris sarcinis curem. Ex familiari consuetudine, quam cum ipso jamdiu habes, ejus recta ac generosa indoles, & ad omnes res eximias honestasque disciplinas propensio notissimae tibi erant; Hinc etiam, quod se tam facilem praebeat, tamque libenter librorum suorum translationem concedat, eum eruditus Viris summo studio ac generosa magnanimitate genti suae ingentis favere; & quisnam sit librorum legitimus usus, quos tineis & blattis corrodendos avare ac invidie non occultat, nec quos inter luxus instrumenta, sicut hodie more pessimo ac depravatissimo apud nos vivitur, ut ignarae hominum ostendet turbae, possidet, ipsum apprimere etiam doctum probe tenere quivis cognoscere potest. Monasterii S^{ti} Germani Bibliothecarium adibo, & Illustrissimi Domini *Thuani* nomine rogabo, ut votis tuis & precibus annuere velit. Apud Illustrissimum Senatus Praefidem *Memmium* per amicos sum acturus, ut, quid ab illo sperandum sit, exploratum habeam. nec omittam praeterea ad S^{ti} Victoris Bibliothecam me conferre, ut cum illis de hoc quoque negotio colloquar; verum aliquid apud hos omnes me perfecturum esse

esse tibi non recipio. Prolixiori epistolae, salutatis amicis *Hugenio*, *Golio*, *Vossio*, *Gronovio* caeterisque, finem imponam. fausta tibi omnia, prosperosque ac faciles rerum successus precor. Vale, vir eruditissime ac celeberrime, & me semper ama. Dabam Parisiis die 30. Julii Anno MDCLX.

EPISTOLA DXXVI.

NIC. HEINSIUS

*Roland. Marefio.**Parifios.*

Potissima aestatis hujus pars foris exacta mihi, vir Clarissime. Domum reversus, post Flandriam vicinasque perlustratas provincias, epistolam tuam offendi, gratam sane illam & acceptam, sic ut nihil magis. In ea quod antiquarios nostros & obsoleta passim verba capantes reprehendis, placet miris modis argumentum. Afflavit jampridem labes illa, ceu pestilenti fide-re, non solum eruditorum vulgus, sed plurimos etiam praecipuosque rei litterariae antistites. Quorum a te numero *Justus Lipsius* recte accensetur, vir, ut subacti limatique in caeteris judicii & vere magnus, ita indulgens hinc nimium sibi & existimationis suae plus aequo securus. Nec defuerunt tamen illi suae Veneres. Habet nescio quid, quo lectorem trahat, & quod prorsus improbare non possis. Ut non tam illi succenseam, quam ineptissimis mortali-bus, qui imitandum sibi illum proponunt. idque tam praepostere, ut vitia ejus exprimant plerumque, virtutes non assequantur. Neminem imitatur *Lip-sius*, ac proinde nemini imitandus. Hanc ipse legem servis istis animalibus videtur posuisse. Exprimunt tamen obluctantem, & sequuntur quodammodo invitum. quasi desint inter antiquos, quos sequi possis, & quidem longe tu-tius. Ita existimo, Marefi politissime, Genium esse quendam, sive bonum illum, sive malum, sine quo victura non scribantur. Multos aeternitati nugae nequitiaeque consecrarunt, cum ex seriis scriptoribus plurimi nobis erepti sint. Multos etiam perversum dicendi genus, & quod sani nemo judi-cii velit imitari. quam multi temporis injuria interciderunt, qui superesse me-rebantur! quam multi supersunt, quos interciderisse praestaret! Pressit premet-que semper hoc fatum miseros scriptores, ut cum lectorum captu conflictentur, quid quod judicia illa ne constant quidem sibi, ut in humanis rebus diuturni nihil est, & quasi cum hoc universo circumvolvuntur. Floret quandoque orationis nitor, & in pretio est, quandoque jacet ac contemnitur. Julii & Au-gusti aevo laxum fluidumque dictionis probatum genus, post arguta abruptaque scriptione capi ceperunt. & si dicendum quod sentio, primi declamatores elo-quentiam Romanam, masculam illam vividamque, perdiderunt, dum non tam bene quidvis, quam succincte acuteque proferre conantur. Cogor igitur hinc

I responsio ad editam *Marefi* epistolam lib. I. 49. quam unicam reperi, licet plures ad *Heinsium* editae fuerint.

Gggg 3.

hîc a te dissentire, mi Maresi, qui ad Trajani Imperatoris usque tempora Latini eloquii limites protendas. Tam paucos invenire est post Augusti mortem, qui terse nitideque scripserint, si juniorem Plinium excipiamus. Sed ne tam alte haec repetantur, Apulejum pessimum sane Latinitatis auctorem quis legebat superiori saeculo? nunc in omnium manibus est. Erit, cum rursus negligetur. Unum Ciceronem non sequi flagitii loco inter Italos habebatur; qui nullos aut paucissimos imitatores nunc inveniat. Caeterum ut illos non ferendos existimo; qui malos imitantur scriptores, cum bonos possint: ita praeter ordinem fieri contendo, ut bonis etiam nonnunquam quantumvis auctoribus servilem prorsus quidam in modum adhaereant, in illorum verba jurent, nihil ausint promere, quod ab illis ante dictum non sit, illorum denique ore loqui malint, quam suo. Formandus quidem mihi videtur dictionis character ex aevi optimi scriptoribus tribus quatuorve, quos ubi in succum sanguinemque convertisti, naturae tuae, non alienae instinctum sequaris necesse est. Ita tamen, ut neque nimis luxurieris, nec abruptae isti brevitati plus aequo studeas, sed illum consistas intra terminum, quem non unus ex optimis, sed optimi simul omnes sibi praescripserunt. Quis tam abjectae indolis est, ut servire velit, cum libertate possit frui? Si serviendum tamen, nec eae domi facultates tibi sint, ut juris tui queas esse, abjecti animi notam haud evades, si infimis quam summis servire malis. Vilis mediocrium scriptorum imitatio est, cum nunquam supra illum possis insurgeret, quem imitandum proposuisti. Sic ab ingeniis quibusdam non contemnendis fui desperatio expressit, ut Claudianum quam Virgilium aemulari mallent. Habes hîc sententiam meam, vir praestantissime, non quam secutus ipse sum, sed quam sequerer, si eloquentiae studerem, & cujus leges omnes felicissime tu expressisti in eleganti illa epistola, cui nunc respondeo. A *Lipso* quod dissentis, nihil periculi est. Modeste enim id facis, ut offendi non posset ipse, si viveret. Memoriam ego tanti viri sancte veneror. Non negarim tamen magna illi ex parte labem eam deberi, quam tu Belgis nostris non immerito adscribis. Quod nisi *ὁ Θεωμάτης* *Scaliger* juventuti nostrae pessum eunti, succurrisset salubribus monitis, in *Lippi* locum ab ampliff. hujus academiae curatoribus oportune subrogatus, futurum vix erat, ut tantam tot praeclarorum ingeniorum messem, quae annis quinquaginta proximis in Batavia nostra eluxerunt, mirarentur exteri: Nec labes tamen ea solos Belgas aut Germanos occupavit, sed vos ipsos etiam infecisse videri possit. Novi virum doctum, popularem vestrum, quem nonnulli ex vobis solem Galliae appellatis, tam impolite, sordide, negligentè scribentem, ut voces non modo Accianas pro gemmis & unionibus passim ostendet, sed Terulliani, Arnobii, caeterasque infimi aevi faeces cum iis tam frequenter confundat commisceatque, ut dictiones ejus chaos quoddam omnium saeculorum appellari possint. Accedant huc verbosus & non ferenda loquacitas continuaque illorum, quae jam abunde dicta erant, repetitiones, quae lectorem obtundunt enecantque potius, quam fatigant, ut Echo sui ipsius mera videatur. Atque hunc tandem toties iteratae *πολυλογία* fructum fert, dum nimis anxie cupit intelligi,

ut

ut ne intelligatur, dumque omnia exacte fecisse sibi visus est; mera faciat mapalia. Hoc felicius certe *Lipsius*, quod Genium aeternitatis propitium expertus est, etiam cum male scriberet. Alterum tota cura id credas agere, ut vix nata pereant, quae scribat, tam negligens est omnis elegantiae. Sed nimius jam sum, & alienae garrulitatis notam mihi inuro. Ferendum tamen hoc tibi, quia provocasti. Satis superque hac epistola expertus es, quam non in-pune ad scribendas litteras invitet. Vale, Clarissime Maresi, cum fratre tuo, illibato illo flore Gallicae poësis. Lugduni Batavorum A. D. xiv. Kalend. Septemb. Anno cldxcxix.

EPISTOLA DXXVII.

BERNARDUS MEDONIUS

Lutetianus. Rubuiffem profecto, vir Illustrissime, te meis non fuisse exceptum episto-
lis, si te Lutetiam attigisse; aliunde quam abs te rescire potuiffem; sed
quandoquidem tua voluit Generositas, me suis officiis cumulatam prius, non
graviter feram, me abs te humanitate vinci, quod licet cuique molestum,
tamen nequaquam mihi ingratum esse potest, quod honestum tibi. Communi-
cavit liberaliter Nobilis *Reltiacus*, quam facis de me honorabilem mentionem,
quae mihi eo gratior jucundiorque accessit, quo a te laudari aliquid majus est,
atque honorificentius, quam ab viro alio: si enim ut verum, tantum habeat
laudatio ponderis, quantum est meritorum laudanti, aequo jure dicere possum
& absque ulla animi dubitatione pronunciare, neminem unquam tam nobi-
lem Panegyristem nactum, qui unica periodo tam de me praedicat honorificen-
tiae: hocque unum addam verius omni fide, nihil mihi in votis charius fore
& antiquius, quam me tuis haberi in leporibus, ut ajebas, sed quam sui temera-
ria atque inverecunda existimatio haec est, quasi vero, qui totus barbarus, totus
inconcinuus, ineruditus totus est, viro perquam Litterato, atque omni ge-
nere virtutum ornatissimo, possit esse in deliciis. Heinſianum deberem aliquid
habere in me, ut Heinſii benevolentia dignus essem, spirantis divinitatis illius
vestrae (Paternam complector) inesse mihi aliquid necessum foret, ut incom-
parabilis humanitatis tuae dulce, ut ita dicam, pondus valerem sustinere. Ve-
rum quia tanta tua est generositas, vir clarissime, ut unquam nullo modo possit
esse exhausta, pergat quaeso me deliciis cumulatam velle, efficiatque in poste-
rum, ut quod in me non est commendatione tuarum Epistolarum famae meae
accedat. Triumphabo, si hoc me beas munere, nec eas minori cum gaudio ac-
cipiam, quam si dignitate aut munere aliquo regio onerarentur, sat est, si tua
benevolentia onerentur, ut mihi regiae. Caeterum quamdiu expectatione Clau-
diani languebimus? quem non lacerum, non mendosum, sed pristino restitutum
nitore intuebimur industriae tuae beneficio, non amplius etiam Ovidium vitia-
tum visuri sumus, nullus naevus apparebit illius in vultu, sed totus concinnus,
totus

totus ornatus, totus denique elegans incedet, nunquam magis Corinnae dignus concubitu. Perge ergo, heros illustrissime, Giganteo ut ajunt passu, quo graderis solito, totamque rem litterariam restitue; interim dum curabo majori qua potero industria me a te dignum reperiri. Tolosae Id. Septembrib. CIOIOCXLVIII.

EPISTOLA DXXVIII.

BERNARDUS MEDONIUS

*Nic. Heinsio.**Leidam.*

Quam innocens meum esset istud peccatum, vir illustrissime, si grave tantum quod humanum nimis, paeniteret me sane ab hoc usquam absolvi crimine, unde tam ampla mihi seges triumpho veniret. aliis injuriosum scelus, mihi gloriosum ducerem ornamentum; nec minus esset quod exundarem gaudio, ob meam hanc, quam in me reprehendis, urbanam inhumanitatem, quam si a quibuscumque aliis illustribus licet viris, abs virtutum vel maxima commendarer: voluisti absque dubio non vulgari hac industria, neque minus sagaci, quam ingenioso strategemate, tuam in me omnem manu prodiga humanitatem rependere: quae si cum omnibus sic se haberet, exhaustura procul dubio foret, nisi ab incomparabili meo Heinsio duceret originem, sed quis humanitate adaequare te, ne dicam superare unquam posset, qui tam honeste tamque gloriose humaniores literas excolis, ut non modo humanum te dixerō, sed in sinu tuo gestare totamque servare ipsam & humanitatem. Inhumanum te tamen dixerō, ne dicam crudelem, quod fidelissimum meum in te amorem dissimulatione arguas. Sane nunquam tecum superstitiose velim videri egisse, quam cum meritis tuis longe infra titulos aliquomodo accommodatos aut idoneos, non ut ajebas inanes, addere contenderim. Male, testor ipsum numen, meam omnem interpretatus es sententiam, in causa fuit tua modestia, quam totis animi affectibus veneror, ut minus te dignum iis titulis reputares, quod & majoribus, & nobiliori pracone dignus fores. Quam divinum tuum istud temperamen? aegre molesteque fers laudari, quod supra omnem sis laudem; & quandoquidem mihi quoque censuram permisisti, pollicitusque, hanc lubens amplexurum ne mirere, si tam audax & temerarius sim, qui tuos mores, quos mihi perspectos voluisti, minus honeste reprehendero, uno scilicet peccantes, quod me tecum parum amanter egisse reprehenderint, injuria sane non levi affecerunt me, qui te unice diligo, quique tui semper impressam altius in animo imaginem intueor: in dubium sane revocare istud poteras tunc, cum Illustrissimus *Mon-schallus* meum in te amorem verbis suis significarat, sed in praesentiarum haud potes, nec debes: nam quam mihi dulce sit atque volupe, tui recordari, te somnare, te desiderare, tibi animum vovere, ipse scio. Sentio profecto, quod antea dixerat facundus & bene moratus Isocrates de Demonici parente; ἡγᾶτο γὰρ εἶναι πρὸς ἐπαίρειαν πολλῶν καὶ τῶν φύσιν νόμις, καὶ τὴν τρόπον γένεος, καὶ τὰς ἀρετὰς ἀνάγκης.

Expe-

exerior id ipse ex quo mihi fortuna obtulit, optanti, amplexari te, totque amoris excitatos ignes, ut pene languidum & parum firma valetudine me tui refocillet memoria. Memoriam appellem faelicissimam, quam amanter sic tuae epistolae corroborarunt, memoriam gratissimam, quam altius tua beneficia in animis incussere, ô nunquam abolituram Memoriam! quamdiu mihi Deus optimus Maximus servabit mentem. Verum quod ad iter Hollandicum me impellis amanter facis ut omnia, super quo quid responsurus sim haud ipse scio: aureis hic arctor compedibus, nec minus duris quia aureis; catenae; quibus astringor, non ob id tolerabiles magis quod Paternae Maternaeque sint, quin imo atrociores mihi videntur, quod non infringendae. Parentibus unigenitus sum, qui sic me in oculis ferunt, ut iis sese captos facile crediderint, si non ante ipsos continuo obversarer. Hanc ergo copiam, licentiamque, a morte mihi tantum sperandum est; quam conditionem avertat D. OP. M. vel meae vitae dispendio, & licet te visendi maxima tenear cupiditate, eorum tamen gratia hunc omnem animum libere deponerem, hoc unum meae huic solitudini meisque incommodis solatium adhibens, quod cum insit rebus quidam velut orbis, & sicut temporum vicissitudines, ita mores hominum volvantur, sustentabo hac spe, nimirum fretus forsan mutatione temporum eorum animum immutatum iri. Quam optarem vestras Athenas propius cum reverentia demirari ob hoc unum illustres, quod ab Heroibus Heinsiiis lumen, & ornamentum suum omne desumant atque derivent, non unquam periturae, ut veteres, quamdiu vobis Atlantibus erunt suffultae. Faelix Batavia supra omnem reliquam Europam, quae sola Heroum ferax es! Sane quum vestram eruditionem omnigenam intueor, caelum reliquisse Musas credere cogor, ut una vobiscum habitarent, una viverent, vestris denique amplexibus luxuriarent. Sed quam male ipsis res cessit, Per Deos! haud enim quiete aut amanter, ut antea vitam vivunt, sed omnino tumultuose pugnant atrociter, & decertant, nullo discrimine, non in legitima tamen causa pugnae, quae tota in hoc consistit, utra earum magis industriae in efformando te, plusque operis, officiique contulerit, grave sane istud discidium, si sese ad victoriam offirment, nec potest aliter esse quam calamitosus exitus pugnae, in re tam dubia atque difficili. Deponant iram totis viribus. Illas compello, faedus iterum ineant, totumque iurgium eo deveniat, ut unaquaeque ad solatium te simillimum sibi fecisse triumphet. Sed quo me rapit tecum confabulandi impetus, sistendum est atque ardorem cohibendum, ne te obruat barbara mea Latinitas. Est modus in rebus, sunt certi denique fines. Ne ergo illos hac in epistola praetergrediar, & ne videar laudationem affectare voluisse potius quam epistolium, colophonem appono, non nisi invito tamen: nam abstrahor, dum vale dicere meditor. vale ergo raptissime, sed amantissime, ne metire quaeso amorem meum ab inelegantia scriptionis: qui per quadriennium totus septem variis linguis fuit, haud potuit uni Latinitati invigilare. Patere demum, vir amantissime, Parenti tuo vere divino, salutis meae copiam facere, nec ideo Thraſonem dixeris me, qui tantum Herum affari ausim, totus enim Pamphilus.

Tom. V.

H h h h

Mu-

Museum *Sambiacati* mei de rebus Gallicis opus ad te mittam: jacturam, quam de Thesauro fecisti, facile est refarcire, habeo illum penes me Hollandiam meditantem. Tolosae 9. Dec. MDCCXLVIII. Commendant se tibi omnes Amici: in primis meus *Casanova* & meus *Reliacus*.

EPISTOLA DXXIX.

BERNARDUS MEDONIUS

Nic. Heinsio.

Leidam.

SCRIPSI ad te bis, aut ter, Heinsi mi, ex quo ab illustrissimo Archiepiscopo Tolosano tuo nomine salutatus plurimum fui: Nescio tamen, an ulla ad te pervenerit; dolerem profecto perisse omnes, non quod eas tanti faciam; ut vel mihi ipsi dolendas putem, sed quod verear, harum si nullas acceperis, ne me tui parum memorem fuisse credideris, quod tam impium, absit de tuo Medonio judicium tuleris, etenim non minus falsus esses, quam si innocentissimum quemque damnasses. Haesisti hercle & tenacius haesisti menti meae, nec ulla res se se magis ante oculos offert, quam tui veneranda imago; illam certe, Heinsi mi, nullum tempus laedet, nulla vetustas obliterabit, nulla denique locorum minuent intervalla. Sed vicissim tu literatorum amor, pari vester & simillima meae rependet benevolentiam. Audio a Clarissimo *Menagio* te in Sueciam brevi iter paraturum esse: ô si tecum geras mei memoriam, si illius inquam memoriam serves, qui tui solum causa Hollandiam visurus erat, beabis me adeo, ut beatior esse nequeam. Ergo te sospitet D. Op. M. tuas res mirum in modum fortunet, tuis studiis vigiliisque faveat teque mihi diu servet, vehementer precor. Scias interim me ad uxorem animum appulisse, & praeterea Senatoris mihi ascivisse provinciam. Quid est, anime mi, horres, audito uxoris nomine? uxorem duxi, uxori non nupsi, unde de Musis nihil est, quod timeas, Uxor te ignotum salutat, tamquam nobilissimum ex animi puriori affectu. Vale & nos ama. Plura nequeo neque addere, neque scripta relegere. Tol. VII. Kalend. Junii MDCCXL.

Salutant te amantissime *P. Poussinus*, qui gesta Dei per Francos meditatur. *D. Casanova*, qui origines linguae Gallicae in lucem brevi daturus est.

EPISTOLA DXXX.

BERNARDUS MEDONIUS

Nic. Heinsio.

Holmiam.

URARUNT ad me nuper viri clarissimi, fratres *Puteani*, quas a te IX. Kalend. Decem. A. D. M. DCL. accepi epistolas, quibus subito respondi: non quidem eadem elegantia, qua tuae, sed pari saltem amoris vehementia. Quam

dolc-

dolerem eas intercidiſſe, ſi hinc adduci potueris, ut me lentum crederes, aut indiligentem? verum haec ita eſſe, in animum meum nunquam inducam, ne ſi inducerem, non poſſem hanc tui partem non laedere; qua melior ſum pars mei: nec illud etiam ſuſpicari de me potes, ſi me habes partem aliquam tui. conſtantiffima voluntate ut amavi, amabo te. O ſi coram contingat amplecti meum Heinſium, illum ad pectus premere, meque illo oblectari; quis me viveret unquam fortunatior? ſed retinetis me durae compedes, roſeae compedes; amantem me retinetis, ne te meum teneam: quare qua parte tecum eſſe poſſum, meaeque ſimul *Armidæ* non deeſſe, ea certe ſum: non enim cum hac praefens ut omnino ſim, poſtulat tuus amor, nec mea patitur *Συζυγία*. Quid ſi redires ad nos, ut te non deſperare inquis, agrosque Tectoſagum inviſeres? mirum quanto exultarem gaudio? non ſic Suecia laetatur ſua *Chriſtina*, quam gauderet mea domus ſuo *Heinſio*: illa mihi reddita eſt iv. Eidus Jun. huiusce anni, cum omnis literaturae me pene ſatiās haberet, diſputabam tunc fere mecum non ſecus ac alter Phedria ad Thaidem reditūrus, maſtus ac cunctabundus, an ad Muſas ſuſceptum iter pergerem: horrebat animus exantlandorum laborum, quos praevidebam, anguſtas pene fracta valetudo ſpes deturbabat omneis meas, ingenii praeterea vires tanto labori impares non parum a deſtinato curſu revocabant, cum ecce illa *Chriſtina*, tua inquam *Chriſtina*, optimum amoris in me tui *μνημοσύνη*, corporis, ingeniique vires ſuſcitāt, plenos animos confidentiae addit, tuaque tutela & aeſtimatione adverſus me optima, nil non audendum ſuadet. Quid ergo non agam? aut quid a Muſis non impetrabo, quando non ſolum ab iis tibi nihil negari poteſt, ſed nec ob incomparabili illa *Chriſtina*, quam mirum in modum tua effingunt carmina, quamque totus Orbis Muſarum Principem veneratur. Atque illa eſt, cujus majeſtate ſimul & gratia divino quodam velut afflatu in tam elegantia carmina caleſcit animus tuus, quippe in iis nil niſi regium eſt, nil niſi dignitatis plenum, adeoque *ἀρχαῖον τι καλόν*, ut praeter ſolita, in quibus tamen nil non Heinſianum elucet, ſapiant iſta magis aliquid grande, & prae ſe ferant numen aliquod egregium. Plane dicam Chriſtinam ubique ſpirent, ut in manus ſumpſi, ſenſi totum me oppleri Deo, & licet tua omnia confidentius tractem, ad haec nihilominus, inſolens adeo reverentia animum meum perſtringebat, ut tanquam de gente profana, atque haud ſecus ac in tuam Dianam ſaltantem ſpicula furtim figere tremebat amor, non niſi perterritus acceſſi: videbatur quidem illa gracili agilique poplite ad molles numeros tuos deſiliens, meis votis innuere, nulliusque non voluptati dicaffe ludos, ſed feſtivitati tanta majeſtas accedebat, ut quod illa ſuaderet, diſſuaderet haec, hortabaris me etiam tu, herentemque compellabas, cum factus ſubito paulo audacior ſecuriorque, coepi ego quoque choreas agere, atque e ſymbolis vobiſcum eſſe, & haec omnia, amantiſſime *Heinſi*, tua in me benevolentia facta ſunt, meque tam magnificis ludis adeſſe voluiſti tuorum carminum beneficio, quae mihi ita rem omnem ob oculos poſuere, ut dubius ipſe ſim, an a tanto ſpectaculo abſuerim, qui me Tolofa haud egreſſum fuiſſe

probe sciam. Vides quanto plus, quam forsan putabas, gratiae in me contulisti, quam volueris non inquo, qui te mei amantiorem neminem arbitror, quod abunde declarat novum istud *φιλανθρώπενυμα*, & supra merita ultro a te delatum mihi. Quo prae omnibus, quibus plus oculis charior es, erga te eminet amor meus, is certe a nullo vinci potest, tum quia nemo plus quam ego ex animo te diligit, tum quod me tibi beneficiis devincto magis nullus est. Haec dum scribo, ecce ultro ad me venit noster *Poussinus*, rogans si quae de te acceperim, sibi inpertirer, tum ego in manus sumens tuam *Christinam*, en inquo, omnium admiratione opus dignissimum, subito ille sane; nihil a tanto viro consignari potest, quod eximium non sit, lectisque aliquot carminibus, nam secum parans deferre, plura noluit, ô monstrum inquit, ô Musarum operae pretium. Quam bene agnosco manum Heinisianam, verum nescis, subjunxit, quid mihi scribat *Cramoysinus* noster? Heinsum Lugdunum Batavorum appulisse, ibidemque typis Elzevirianis Cinnamum ante hac ineditum cum sua metaphrasi Latina non ita nuper mandasse, ad haec inquo, est quod tibi gratuler, mi Poussine; quod rivalem habes praeter morem tui amantissimum, adde quod ambo Typographi certatim studentes Cinnamum elegantiorum reddere, curas adhibebunt diligentiores, haec ubi dixi, abiit is suo nomine salvere jubens, quod ut diutius sit deum optimum precor: interim fac Ovidium hyemi proximae destinatum cito habeamus. Claudianum tuum legi, Deus bone, quam castigatum! interim si scire vis, quid agat tuus Medonius? plane feriat, tamen Suetonium brevi dabit, notis illustratum, si quid ab illo illustrari potest, qui in obscuro est, porro, quod studium me magis habet, linguarum Orientalium est, quod postquam absolvero, me totum Mathematicis dabo: salutat te maximus clarissimusque *Fermatus*, quid agat Parens tuus comitatus & elegantiarum Parens unicus, fac sciam, & an prospera valetudine utatur. *Casanova*, qui te salutat quam potest humanissime, edendum parat, *les Origines de la Langue Francoise*: vidisti quid magnus *Menagius* praestiterit, videbis alterius portentosae operae opus. *Samblancatus* emisit Elogia Illustrum virorum nostrae Galliae, exterorum noluit, ne quidquid praestiturus esset, in vestras laudes minus semper esset pro vestris meritis.

Illustrissimus Archiepiscopus *Monscallus* te mirum quantum diligit, numquam de republica literaria incidit sermo, quin te ejus nominet tutorem. Vale, vir Clarissime. Tolosae ex Musaeo VIII. Kalend. Jul. CIOCCCL.

EPISTOLA DXXXI.

BERNARDUS MEDONIUS

Nic. Heinsio.

Lutetiam.

Carptim ad te scribo, Heinsi mi, quando aliter non finit acerbissimus dolor, quo ob fatum nostri quondam *Monscalli* Archiepiscopi Tolosani, vehementissime excrucior. Abiit is x. Kal. Septembr. hujus anni intra triduum

dira exustus febris, cum Carcassonae alter a primo Occitaniae provinciae, comitiis praecesset. Tantum Heroem satis lugere nequeo, nec ipse totus orbis lugebit satis. Interim mihi videor non leviter meis verbis perculsum te videre, quare doleo multum, quod non nunquam laetari possis, praesertim meo ministerio: Sed acquissimum est tuis hunc lacrymis prosequaris defunctum, qui dum vixit toto animo prosequutus est te; hujus rei quoties fidissimus testis fui? quoties quos de te sermones habebat excepi; quoties dixit. ô Si Heinsium iterum ad pectus usque premerem. ô duram legem! hunc amisi, Heinsi, qui me suis oculis chariorem habuit, quique me sic amavit, ac si Heinsius fuisset. Tu interim fac tanto funeri cum suis neniis tua non desit Musa: curabimus ejus monumentum ego & meus *Casanova*, cui si tuum anathema appenderis, tantae animae abunde erit satisfactum, plura non patitur lacrymarum vis. te solum moneo bene valeas, si me vis bene valere. Tolosae ix. Kalend. Septemb. Anno MDCCCLII. Noster *Reliacus* poenitus exanimatus est, solamque praefert imaginem viventis mortui, horreres, si interesses, videre domum oppletam ululatibus & lamentis. Mea Chariclia te mirum in modum salutat, teque videre exoptat, ex quo ei tuum animum significavi. Hanc obsignabam, cum ecce ad me tuas detulit noster *Poussinus*, quibus ut primum erit copia abunde respondebo. Nunc tecum uno verbo, curabo tibi, quos potero, manuscriptos codices. habeo unum de Ponto jam penes me manu satis antiqua exaratum, quem mittam, quo volueris, & si quos aliunde nactus fuero. Scribam viro mei amantissimo *Thomae* Montalbanum, a quo omnia certius impetrabo: modo, quae speras, habeat: vale iterum:

EPISTOLA DXXXII.

BERNARDUS MEDONIUS

Nic. Heinsio.

Lugdunum in Gallia.

EX quo tuas ad me tempore curavit *Cramosinus* noster, per quas mihi significabas, plerosque & omnes bonos fato Clarissimi *Monballi* adeo fuisse perculsos, adeoque quasi exanimatos, non secus, ac si jactura illa cuique fuisset peculiaris, tres Ovidii Codices, quos satis antiquos existimo, tibi, quando me monueris conceptis verbis, mittendos, felici fato nactus sum. an alios hinc inde eximere possim nescio, hoc certe scio, me omnem curam, studium, & diligentiam adhibiturum. *Petiti* praeterea membranae ut vel qualibet re redimantur, nam una cum Bibliotheca venditae sunt, plane omnem dabo operam, nullisque precibus, pretio, & amicis parcam. Sed, ô mi Heinsi, quid volebas cum de impensis mecum egisti? Scito, inquis, pretium apud me paratum fore. Scito, inquit, non solum vilem pecuniam, quantamcumque praestare possum, remque omnem domesticam & familiarem tua causa me velle effundere: sed & ipsam vitam, quae, fateor, aliquo nec vulgari pretio apud

Hhhh 3

me

me est, ex quo in illam tam blanda, tam faventia vota facis perge? per te felix & diuturna sit, ut experiare melius quam tota tua sit, namque Heinsii melius quam Medonii. Vale & memor sis mei, nostrique *Monchalli*, cujus Manes tua expectant carmina: de Claudiani Codice maximi *Maußaci* quid factum sit nescio. D. *Thomas* Montalbanensis ille mihi ultro aliquando obtulit Aldinum Codicem manu illustris *Thomae* ejus, qui consilio Tridentino interfuit, perpetuo notatum, si quid sit, quo uti possis, bene erit, ubi miserit illum, mittam ad te: salutat te Amplissimus *Fermatus*, a quo circa Mathematicas scientias, quas melius quam quisquam mortalium possidet, nil extorqueri unquam poterit, nisi Reginarum praestantissima *Christina*, velit aliquando post hujus aevi Litterarum omnium vota, post Franciae Cancellarii preces, sua etiam jussa adjungere; quibus, ut puto non surdus esset. Si tua cura posset id fieri, faceres toti Europae rem pergratissimam. Vale, iterum, & quod facis, me constanter ama. Tol. vii. Kalend. Octob. ciciocli.

EPISTOLA DXXXIII.

BERNARDUS MEDONIUS

Nic. Heinsio.

Florentiam.

Quas ad me Lugduno discessurus misisti, equidem recepi, iisque non tantum aut quater tantum meis epistolis respondi sed & quinquies, eisque verbosissimis. Quatuor D. *Rigolio* Lugdunum, quintam una cum Manuscriptis Ovidianis D. *Vander Straeten* Genuam misi, doleo quod harum adhuc nullae tibi redditae sint, ego vero non ita nuper certior factus sum, manuscriptorum fasciculum mercatori *Vander Straeten*, summa tum fide, cum diligentia de manu in manum, ut ajunt, traditum fuisse; cujus si cura studioque nunc ad te pervenerit, quamprimum, rogo, fac intelligam. Enecor, si perierit, non tam Membranarum jactura, quam quia nolim te tua frustratum expectatione; quae si meis omnibus fortunis expleri posset, nunquam certo certius, mi Heinsi, staret aut per me, vel per animum, quin cumulatissima foret: Nil enim mihi esse potest antiquius, quam aliquo saltem nomine, quamvis fere inani, tuis rebus non omnino esse inutilem. Interim non male opinatus es circa nostrum *Possinum*; scripsit enim ad hunc *Isaacus Vossius*, cujus epistolam non quidem vidi; sed tamen acceptam fuisse a P. *Possino* aliunde, quam ab illo compertum habeo, an Divinae *Christinae* gratias ferat nec ne, non minus quam quod de *Anna* sub herba latuit, nescio. Quis enim Societatis perscrutari secreta valet? Quatenam vero me habeat suspicio vis plane dicam? profecto puto de Reginae nomini inscribenda *Anna* notuisse cogitare, non tam forsan ex ingenio, quam ne cum hujus Religione, ut ita dicam, habuisse commercium videretur. Sed ô quam hominis irreligiosa Religio, ô arcana Loyolismi Mysteria & plus quam cerealia sacra! Pene obliviscebar te monere, me tibi misisse *Possini* unicam epistolam, qua, ut quidem tunc dixit, tibi abunde satisfac-

fecisse putabat: an illam unquam mentem habuerit, ipse scit, constat tandem D. *Seguerio* suam operam dicasse. Vale, meum decus 111. Eid. Februar. A. D. 1612. Tolosae noctu inter cruciatus laborantis Matris, has quidem ego, ut vides, tumultuaria opera effudi. Utinam eadem, qua tu tuas effudisse urbane magis quam vere, dicis, non enim unquam facti poeniteret. Iterum vale, & me ama tui nominis studiosissimum.

EPISTOLA DXXXIV.

BERNARDUS MEDONIUS

*Nic. Heinsio.**Florentiam.*

Mitto tibi, Heinsi praestantissime, quam in obitum magni *Petri Puteani* subito calore, ut quidem agnosces, luctuosam plane orationem effudi: quae si nullas habet videres, aut lepores, quibus concinna sit & decora; habet certe lacrymas, & suspiria, quibus dolorem, quem de tanta jactura percepi, saltem significet. Tibi soli datum est magnarum Animarum, quae cum corpore non extinguuntur (qualis illa *P. Puteani*) posse explere vota, tantoque Heroe dignas inferias adhibere. Quare non nega haec extrema illi officia, qui dum vixit nihil habuit prius, aut antiquius, quam tuus amor. Mitto praeterea *P. Possini* nostri epistolam, ex qua, ut quidem puto, omnia de Anna Comnena intelliges, quae ex ejusdem altera, quam Dom. *Rigolio* Lugdunum jamdum misi (nescio an illam acceperis,) poteras abunde intellexisse. jurat per Musas, & Apollinem, juraret forsan & per Ignatium, etiam conceptis verbis, nullam ibi latere fallaciam: ei tamen tuam epistolam, quam Venetiis ad me misisti, cuique respondi verbosius, non solum non legendam praebui, sed ne quidem ostendi. Scio enim optime qua lege, aut quibus moribus, cum hujusmodi Societatis viris vivendum sit. adde quod, ô mi Heinsi, ita laetor me interiori necessitudine tecum esse conjunctum, ut absit cujusquam alterius fidei tantum thesaurum committam; Quin etiam mihi ipsi vix fidam. Interim omnia hîc vastantur armis Condaeavorum, nemoque est, qui, ad insaniam usque, partium studio non laboret: Hi Condaevani, isti Mazariniani appellantur; Quodque pessimum est, silent leges & Musae nostrae inter arma. Silebo nunquam tamen de tuis laudibus. Vale 111. Eid. Martii 1612.

Scripsi misisse me tibi Codices Ovidii Manuscriptos Genuam; responde quaeso diligentius, an illos acceperis. Iterum Vale & nos ama. Salutem tibi plurimam dicit Dom. *Casanova*. & Dom. de *Samblancat*, quisque suam spartam ornat, hic historiam Gallicam, & Elogia magnorum virorum, quos tulit Gallia; iste vero origines Linguae Gallicae & Historiam Occitaniae nostrae. Pater *Possinus*, parat Historiam terrae Sanctae, brevi daturus in lucem Codicem manu-

1 Editæ est cum vita *Petri Puteani* a *Nic. Rigaltio* scripta, & multis carminibus in obitum viri illustris. subjecto etiam Tumulo *Claudiani Puteani*. Paris 1652.

manuscriptum ex Historia Byſantina, quem Nomini Divinae veſtrae *Chriſtinae* ſine dubio inſcribet. Quid acceperis ab Hollandis tuis quaefo impertire, praecipue quid agat Hollandiae decus unicum maxime *Daniel* Parens tuus, numquamne dabit *Ariſtotelem*?

EPISTOLA DXXXV.

BERNARDUS MEDONIUS

Nic. Heinfio.

Romam.

QUI tuas nunc ad me curavit epiftolas, *Anthoſius Martinus* mercator Lugdunenſis, ipſiſſimus eſt, qui Manuſcriptorum faſciculum Dom. *Strateno* Genuam fideliffime certo certius miſit. huic conceptis verbis ſcribebat meo nomine clariffimus *Bernardus*, ne cujuſque operae committeretur ſarcinula haec; niſi probatae fidei viri, qui illam de manu in manu, ut ajunt, *Strateno* traderet. nequaquam puto illam periſſe, tandem, ut ſpero, ad te perveniet. Scribe interim *Strateno*, ubi pedem fixeris, ne, quo ſarcinam mittat, ignoret. Nebulonem impudentiſſimum *Rigolium* diris devoveo, quippe hanc, qua te dicit nunciaviſſe mihi *Stratenum* aliquot menſibus Genua abfuſſe, non accepi. nil inhumanum magis in vita mihi accidit iſtorum hominum perfidia, quid enim crudelius Medonio eſſe poteſt? quam quod, Heinfio mi, tua fruſtreriſ expectatione. Moriar niſi te plus oculis diligo. Clariffimo *Petro Puteano* utraque oratione utcunque potui pro tempore parentavi, aliquam inferiarum partem ad te mittere non puduit. Poëmata tua anhelans expecto, ſperoque horum veneribus caleſcere mirum in modum. Vale, mea vita & vive diu. Tolofae Eidibus Aprilis *cicidclii*. Gregor. Scribo *Martino* noſtro, de Manuſcriptis quid factum: de *Poſſino* & *Kircherio* quod addis, non miror, novi enim *Kappadoces*.

EPISTOLA DXXXVI.

BERNARDUS MEDONIUS

Nic. Heinfio.

Romam.

DE manuſcriptis Codicibus ad te, & ad *Martinum* mercatorum illum Lugdunenſem, ſcripſi eidibus Aprilis proxime elapſis, quid factum erit vehementer ab illo renunciari mihi expecto, quave via, aut per quas manus mittendos ad te, ut multo ante monuerat, curavit. Dabit procul dubio omnem operam, ſi reſciverit ubi ubi ſint quovis pretio, meliori in poſterum excipiantur fortuna. Ego vero viri liberalioris curae committendos eſſe non putavi: tum quod ejus humanitatem expertus ſit abunde *Bernardus* Senator, quo cum arctioribus neceſſitudinis vinculis conjunctus ſum, quique te, tuamque eruditionem mirum quantum diligit, cum quia tunc temporis, quo illi haec provincia demandata fuit, *Bernardi* ſumma egeret auctoritate & gratia. Sane me quaedam

dam in tam saeva forte solatur spes, fore ut salvi ad te aliquando perveniant: at, proh. dolor! tempori non aderunt, si sint tandem salvi. Plane ego mortaliū infelicissimus si interciderint, qui quo nomine me tuis usibus inservire posse primum sperem; eodem nunc tibi, mihiq̃ue, molestiam creari contingat. ô quam praeter omnem expectationem toleranda mihi haec esset intolerabilis jactura! mitto interim ad te elegiam, quam in obitum Clarissimi *Moncalvi* Archiepiscopi Tolosani precibus fratris post longum tempus, ut vides, victus edidi. Elegans erit, si tibi flebilis videatur, non enim alterius ornamenti capax, quam ejus, quod luctum deceat. nisi praeterea orationem funebrem, qua Maximo *Petro Puteano* parentavi. At poteris tu Apotheosim mei *Moncalvi*, toties pollicitam haecenus mihi negare? noli Heinſi mi, Heroem, qualem non saecula tulerunt, hoc ultimo officio frustrari, obstrinxi meam fidem *Petro Moncalvo* fratri, quae ne inanis sit per te, rogo effice. Vale, mea vita & meum decus. Tolosae XIII. Kalend. Maii A. D. CIOIOCLII. Salvere jubent, *Casanova*, *Samblancatus*, *Possinus*, & mea *Glycerium*. Sacratissimae Reginae tuae, mores, habitum, elegantiam, doctrinam, caeteraque tum corporis, cum animi dotes, si vacat, describe mihi. Iterum vale.

EPISTOLA DXXXVII.

BERNARDUS MEDONIUS

Nic. Heinſio.

Romam.

PRaedicas liberalem me, Heinſi clarissime, non minus liberaliter, quam venuste; non enim mihi adeo fortunam indulſiſſe video, ut aliqua in te beneficia conferre unquam potuerim, unde me glorioso illo nomine, quo Heroibus de te bene mereri solum datur, cohonestare debueris. Rationem quidem habuiſti liberalitatis tuae, non meae; idque gratiae addidiſti mihi ex tuo, quod ego, fateor, non sine summa animi verecundia, tibi de meo non potui rependere: quamvis una haec me semper habuerit ambitio. Praeterea orationis meae non solum meministi, sed etiam illam ab elegantia laudas; idque adeo delicatulis, & exquisitis verbis, ut non quae sit illa, sed qualis esse debuerit manifesto ostendas. Egone tibi fidam, mi Heinſi, qui plenus ruris ſim, & inficetiarum? egone delitias illas sermonis in medio luctu habuiſſe confiſam? ubi niſi lacrymis, & gemitibus locus fuit. fugit moerentes nos omnis ornatus atque orationis lepos, neque non abhorre animus poteſt ab iis pigmentis; cum ei omnes deficiunt vires. Quis enim illas retinere potuiſſet in tanta ſui conſternatione? non ego ſaltem. Quare orationis meae duplici nomine, imbecillitatis uno, anguſtiarum altero, asperitatem praetexo; mihiq̃ue nihilominus gratulor, & meo conatui, quod ſi non jure tuas laudes meruerim, bene tamen meritus ſim de tua humanitate. Verum ne ea in praesentiarum abutar, de manuſcriptis Ovidianis quid innotuerit mihi, breviter expono. Scripſit ad me *Vander Straeten* incolu-

meos illos tandem ad se pervenisse, atque eodem fere tempore, quo ei animus erat de re me certiore facere. Fasciculum ad te Romam subito curasse, puto: illumque jam tuis prae manibus esse. Non sunt tanti illi codices, ut misere hinc inde a fortuna jactari debuerint, sed & illud in fatis erat, nosque ob illos animo angere. Rescribe quamprimum, an illos habeas, nam si aliter est quam puto, *Stracteni* mittam ad te literas, ut de mea erga te voluntate optima, cura & diligentia, tibi per ejusdem literas abunde constet. Doctissimi *Petri Possini* in manus tuas literas, salutemque iis omnibus, quibus jubebas dare; dedi. *Perrinus* adhuc vivit, quamquam ejus vita potius aliquod mortis, quam vitae sit genus: non enim ambulat; sed repit, non videt; sed caecutit, non loquitur; sed balbutit, vixque etiam audit, denique imaginem fert spirantis mortui: salutem tamen mittit homo nullius salutis. Gratulor tecum de bona Parentis tui valetudine, at quaeso, pro ea qua es apud illum auctoritate, & gratia, Aristoteli lucem; nobis vero insignem gratiam largiatur, effice. Vale mea vita. Ex Musaeo Eidibus Maii ^P X CIOIOCEII. *Gronovium* vitam functum putabam; gaudeo tanto viro rempublicam litterariam non carere, de *Carolo Moncalvo*, quondam tuo, noli filere. Elegia mea in ejus funus edita nescio an ad te pervenerit. *Martino* Lugdunensi Mercatore semper utere. Salutem tibi dicunt *Samblancatus*, *Casanova*, *Fermatus*, *Reilbacus*. & Doctissimus *Possinus*.

EPISTOLA DXXXVIII.

N I C. H E I N S I U S

*Bernardo. Medonio.**Tolosam.*

F Lorentiae mense toto jam ago, mi Medoni: quam in urbem advenienti: tuae eidibus exaratae Maiis sunt redditae ab *Eberizio* negotiatore. Responsum cur traxerim praeter morem meum haecenus, duplex est causa. Morbus primum paternus, qui supremam necessitatem illi videtur minari maximo meo cum dolore. Deinde, praeter ordinem facturus videbar, si quicquam ad te literarum darem, nisi primo copia mihi codicum Ovidianorum esset facta. Liburnum eos advenisse salvos cum ex amico intellexissem, gemina epistola *Petrum Stratenum*, Genuensis illius fratrem, rogavi, ut eos ad me mitteret. Post moram longam hesterno demum die voto potitus sum, partim quod Genuam profectus esset *Petrus*, partim quod fida & amica manu eos ad me perlatos cupiebat. Quas vero gratias nunc agam tibi, mi Medoni? Non possum dignas, fateor: nec tu, qua es benignitate, expectas. Libris ipsis ubi usus ero; tibi & Amplissimo *Thomae* restituentur, cujus nomen codex unus praefert. Tu perge conatus meos porro fovere, & quicquid conferre potes ad auctorem praestantissimum illustrandum, sedulus imperti. Multos *Gaffarellus* possidet, olim Venetis a se emptos, quos se communicaturum mecum spem.

spem facit. Suos etiam *Naudaeus* offert. Tantis praesidiis instructus, nullam in me diligentiam desiderari patiar, faciamque, ut ingenii atque eruditionis defectum magna sedulitate compensem. *Petro Puteano* parentavi nuper prolixa ¹ Elegia, ita petente literis continuis ejus fratre *Jacobo*. Proxima de *Mon-schallo* debebat cura esse. Sed hoc agentem nuncius de fratre funestus interpellavit. Differri promissa possunt, mi *Medoni*; non possunt fallere. Veniet aut illius aut alterius argumenti aliquando ad te carmen. Volo enim omnino aliquod mei erga te cultus documentum publice extare. Quas Romae ad te dedi omnes an acceperis ignoro. Scripseram ad *Huguetanum* Lugdunensem librarium, petieramque, ut inquireret in epistolas mihi inscriptas, quas perire passus esset nequissimus mercator. Eidem fasciculo unam tibi, alteram nobilissimo *Boisacio* Viennensi tradendas inserueram. Sed cum nec *Huguetanus*, nec *Boissacius*, vir humanissimus, respondeant, facile colligo fasciculum interceptum in via. Scriptorum tuorum in maximi *Mon-schalli* exequias nihil vidi, praeter Orationem. Vale, mi *Medoni*, cum tuis omnibus. Amici communes salveant. Has effundebam aliud agens. adeo cogitationes omnes avocavit aegrotus pater. Tu ignosce, mi *Medoni*. Nam nisi fallor, est & tibi talis *Anchises* genitor. Florentiae Anno ^PX^CICIDCLII. XII. Aug. Reliquam aetatem huic civitati dabo.

¹ ea legitur lib. II. Eleg. 3. & in obitum *Mon-schalli*, quem & *Moncalvum* vocant, ad *Medonium* ibid. Eleg. 6.

EPISTOLA DXXXIX.

BERNARDUS MEDONIUS

Nic. Heinſio.

Florentiam.

ADhucne post tot & tantas miseras, quibus oppressus fui, curae vobis sum, Dii immortales, qui inter medios solitudinis horrores jucundissimis *Heinsii* literis recreor? Tholosa discesseram, vir amantissime, a tribus jam mensibus, vitandae luis causa, qua lugendum in modum florens civitas depascebatur: perque inamaena rura miserae Aquitaniae Condeanorum furore vastatae, fugae salutem credebam, nihil aliud auribus meis excipiens funestissima praeter nuntia. audiebam, inquam, quotidie amicorum extinctum aliquem, & lugebam, nullam eis opem, aut officium tulisse pudebat, *Casanovam*, atque *Samblancatum* (scis tu quam utrumque amavi) perhorrebam meminisse defunctos, tantis viris orbatum me ferre. Sane non poteram, atque adeo magnus animum meum invasit dolor, ut nisi tempestive tunc in meam salutem redditae mihi fuissent tuae epistolae, actum erat de me, conclamatum penitus de tuo *Medonio*. Accedebat ad meas illud adhuc maeroris, quod aderat nullus necessarius, quocum lugere familiariter possem, nemo aderat, qui verbo aut scripto meis opitularetur malis, aut vulnus leniret, nihil mihi caneabant Musae praeter quid triste, cum Manibus solum res erat, deque libris vix, ac ne vix quidem

cogitabatur. Solus tu, amicorum princeps, nostri nunquam immemor per mille mortium genera salutem mihi misisti: gavisus subito sum & solide gavisus, unum hoc mea turbavit gaudia: cum intellexi divinum hominem parentem tuum gravi morbo laborare, haesi subito maestus, proque ejus valetudine non secus ac mea numini vota feci, atque in has erupi voces, aeternum vivat necesse est, qui sua virtute effecit, ut nunquam sit moriturus. Tu vero interim noli dolori habenas permittere teque nimium macerare. non est gemendus virtute quisquis abstulit fatis iter. habes de contemnenda morte domestica praecepta; quibus haereditario jure uti debes; nec potes vulgarium hominum conditione lugere, quando tua te virtus supra hominum conditionem evexit, Heroismque in oculis honestae minime sint lacrymae. Ovidium tuum Galliae omnes expectant Literati, nemoque est, qui divinum authorem felicem non putet, quod in tuas manus inciderit, qui ei solus potes contaminatas injuria temporum veneres, aut omittas cum dignitate restituere. Unum est, de quo te certiores velim, & ad quod animum, puto, haecenus non advertisti, per te scilicet non levi injuria ipsummet Ovidium offici; quod in inquirendis, discutendisque ejus operum manuscriptis totus sis, quum honestius putet sibi que decorum magis tuo ingenio restitui, quam vilium ope membranorum, quas blattae tineaeque turpiter faedarunt. & amabo quis non malit sequi quae restituerit Heinsius (Ovidio ingenio par) quam quae suggererit inficeta cujusdam Monachi scriptura? quaerit Ovidius salvas apud te suas reliquias, tuumque ingenium agnoscit pro suo. Ego vero dum vivam, agnoscam te decus meum unicum, & Reipublicae literariae lumen atque ornamentum. Salutem tibi plurimum dicit Nobilis *Reliacus* de multis, quos habuit Tholosa, literatis unus superstes, tertianis fere exustus, cui vix satis spiritus superest, quo te jubeat salvere. Quae scripsisti in obitum *Petri Puteani*, modo fiat tuo sine incommodo, ad me mittas velim, nequeo ego scriptorum tuorum aliquo carere, cum aliqua dignitatis meae pars imminui videatur. adhuc est, quod a te petam, non sine verecundia, munus quippe regium, Effigiem tui: temeritatem tamen meam hoc praetexam nomine, quod si sine te transigenda mihi vita sit, saltem aequum est tabellam habere me, quae te mihi fideliter referat, hoc solatii impertiaris mihi, rogo enixe per animorum nostrorum communionem, per Musas & Apollinem, per denique ipsum te, & me. Salutem tibi plurimam dicit mea Glycerium. Vale. ex Agro Aufiliano. Anno Dec. cxcxcclii. vi. Kalend. Decemb.

EPISTOLA DXL.

BERNARDUS MEDONIUS

*Nic. Heinso.**Florentiam.*

TRes a te, fere intra duos menses, accepi epistolas; Florentiae omnes datas: primam nempe xii. Augult. alteram, vii. Novemb. tertiam, una

una cum clarissimi *Caroli Monſchalli* epicedio, Nonis Decembr. eundem characterem referunt omnes; liberalem plane, & nobilem: teque mirum in modum spirant; hoc est, humanitatem ipsam, & lepores. De mea valetudine te valde esse sollicitum, etiam omnes indicant; & quid agam, te nescire molestum inquis: Quod de me nullas praeter solitum a longo tempore responsorias acceperis. male curantur, dubio procul, meae ad te epistolae, cum mense Augusto, antequam vitandae luis causa Tholosa discederem, verbosissimam miserim; quam tamen redditam tibi, non video. Est quod irascar adversae fortunae meae; quam tamen mihi meliorem fore aliquando existimo, ubi apud tuos reversus fueris. parum fideles indies experior Italos, sperandum melius de fide Germanica. Jam ad tuas redeo. Duabus mense proxime elapso, plena satis, & ampla charta respondi: usus semper opera *Martinii* mercatoris Lugdunensis; viri sane expectatae fidei. alterius, non ejus negligentia, nostrae intercidunt: Quare iisdem insiste vestigiis. Tertiis nunc respondeo: adhibita prius cum bona venia Ciceronis nostri solenni illa formula: *Si vales bene est, ego quidem bene valeo.* Nam tum, cum ob morbum Parentis tui graviter laborare te nuntiabas; graviter ego quoque laborabam; ob interitum *Samblancati*, & *Casanovae*. Orbari me tantis viris, & mei studiosis, sine maerore summo pati non potui: ex quo magno vitae periculo saevum, ac fere inauditum morbum contraxeram. Verum favente Deo optimo, rediit pristina valetudo, cujus impotenter, ne de ea sis tu, multum ero sollicitus. Interim tuum omnes Ovidium exspectant, sed me nemo magis. Promissus a Magno *Daniele* Aristoteles sperandus igitur non est? igitur haec te cura manet: nec Parentem tuum desiderabit ille; modo sui curam velis suscipere. Alienis manibus quam vestris tractari se non pateretur. Naturae Genius, noli ideo per te sua illum fraudari gloria. Gratias ago tibi magnas & ingenteis pro Epicedio. Elegantes Lacrymae, Deus immortalis! quae duras Parcarum Leges mollire quasi valeant: sed lacrymis, lacrymis pascuntur Parcae. cum primum accessus ad Typographos liber a Peste fuerit, Elegiam tuam, ipso dignam Ovidio, *Monchalli* Pius Manibus dicabo; quibus gratulor tantum decus, & mihi gloriam non vulgarem, tam grande a te munus accepisse. Debent se tibi omnia mea studia, labores, & vigiliae, debent tandem quaecunque moliar tuo inscribi momini: Sed quid tam debeo! quam de tua benevolentia bene mereri. Vale meum decus. Tholosae IV. Non Januar. A. ^PXCIOCLIII. Mone me, rogo, cuinam inscribendae erunt meae, postquam Florentia discesseris. Cura valetudinem tuam in Germanico itinere, & interdum certiorrem fac me de rebus tuis, salutem tibi plurimam dicit mea *Glycerium*. Saevit adhuc lues in hac misera urbe furitque adhuc, in tota fere Gallia inpius Mars. Vale iterum.

EPISTOLA DXLI.

BERNARDUS MEDONIUS

*Nic. Heinsio.**Florentiam.*

REspirabamus aliquantulum, Heinsi amantissime, a publica illa calamitate, qua nihil horribilius ante visum; cum hujus anni tuae Epistolae, Florentiae, Kalend. Januar. datae, ad me redditae fuerunt. Tempori oppido advenire mihi in solatium, quamvis jam praeteritum malum, & meas jacturas quasi refricarent; quippe erat eorum recordationis gratia, quae cum aliqua securitate spectari posse videbantur: sed non diu tale nobis illuxit sydus, rediit enim solito saevior Pestilentia; tantoque illa, quam evasisse laeti putabamus, intolerabilior, quanto a misera isthac urbe, quod foris undique militibus obfessa sint omnia, tuto, & sine summo vitae periculo, egredi non liceat. En quo redacti sumus miseri, ut ultima aut a Peste, aut a Milite, mors imminet; nec vel sperare, quod extremum miseriae est, nobis liceat meliora; cum Bellum Pesti sit, malum malo aptissimum. Utinam! hinc, in tuum sinum evolare possem, ubi immortalitatem, non venena spirat Apollo. Parceret forsan capiti meo, si me tuo praesidio cinctum videret: Sed

Nec spes Libertatis erit, nec cura Salutis.

Interim, haud ideo minus literis incumbam; quin potius magis, ac magis animum intendam: quod illae mihi solum videantur esse, quae lenire meas molestias possint, interrumpant mea studia durae Praeficae, Bellique horrendi apparatus, animum certe non frangent. Inter mille Mortium genera, quae quasi aperto Marte vitam nostram oppugnant, ¹ *Casanovae*, ac *Samblancati*, vitas, quas tuo inscribam nomini cum edi poterunt, consignavi. potero forsan & alia, modo persistet valetudo: quam veluti palpo. Pro Epicedio magni *Monchalli* Archiepiscopi Tholosani quam potui magnas gratias ago; quando quas debeam nequeo.

*Qua celebrem mea vota lyra, quas solvere grates
Sufficiam? non si pariter mihi vertice laeto
Nectat odoratas, & Smyrna & Mantua lauros
Digna loquar.*

Aurea tua illa carmina, quibus famosissimum funus prosequeris,
arduaque voce

das solatia grandibus Sepulchris;

quot

¹ Hanc vitam Latine edidisse narrat Simon Val-Hebertus in praefatione ad Originēs Linguae Gallicae per *Casanovam*, editas simul cum *Menagii* originibus Paris 1694. & unde Praefationem suam instruxit. *Longus* vero in Biblioth. Histor. Francic pag. 870. memorat Gallice, & prodiisse simul cum libro de origine ludorum Floraliū. Tholosae 1669. nuper vero Anno 1711. edita Uratissavia in vitis selectis pag. 170. unde vidi *Nic. Heinsio* hanc inscriptam. *Samblancati* vitam non reperi.

quot erunt defuncto honoris aeterna monumenta, tot erunt mihi amicitiae tuae, qua nihil antiquius, pretiosissima documenta: quibus addidisti tu compendario velut, plus gloriae meae, quam ab omni diligentia, & solertia sperandum videbatur. Quî enim obscurus fieri verear apud posteros, quem non obscure amaveris? perge ergo, quando sic vis augere ex tuo meum decus, meque tua existimatione commendatissimum facere. De Ovidio ope Manuscriptorum restituendo, idem quod ante sentio etiam nunc: minori opera, & certius ex tuo ingenio emendari posse; quam ab istis rancidis membranarum. Quis enim literatorum est, qui quod ex Ovidio pronunties, non aequius amplectatur (cum in te omnes Ovidii ingenium agnoscant) quam quod infidæ saepius membranae suggerunt. Alii, quibus minus ingenii est, huiusmodi diligentiam sectentur; tu vero cui inest ardua vis animi, cuique solito benignior natura suas omnes dotes largita est, te solum consule: Liberaberis sic a maximis aerumnis; nec ideo minus prudenter rem promovebis, curabo tibi tamen, ut spero, alios codices, nisi deludar ab homine, a quo illos exspecto. *Philippi Berterii* Pithanôn Florentiam, ut vis, mittam, cum primum sese dabit occasio, & erunt obsessa minus militibus itinera, mittam praeterea *Emanuelis Magnani* Philosophiae, quae tota constat experimentis, tria volumina. Scriptorum nunc apud nos nullus reditus, nemoque hîc est, qui *Berterii* nitorem, aut elegantias assequi valeat: scis quanti illum fecerit divinus *Scaliger*? de *Possino*, deque *Fernatio*, nostris, quod ubi, & an viverent nescirem, nihil ad te scripseram. quare, quod olim *Vitellii* apud *Livium*, nunc de Peste dicam, rem surdam esse, & inexorabilem: haec nunc scripsi, miraberis, inter ululatus jam parturientis uxoris, quae te ex animo salutat, Gratulaberis spero novo Nato, meque aeternum amabis. Vale. Tolosae Kalendas Februar. A. D. cıııııııııı. cum ex Italia discedes mone, cuinam meae ad te inscribendae erunt.

EPISTOLA DXLII.

BERNARDUS MEDONIUS

Nic. Heinsio.

Leidam.

Q Uas a te postremum accepi binas, has quidem Kalend. Januar. hujus anni Florentiae, Illas xvııı. Februar. Bononiae erant datae. Superioribus fuse respondi, ultimis respondendi tempus ad hunc usque diem distuli (quamvis nihil quidquam ex animo magis, & diligentius agere soleam) verebar scilicet, ne eo deferrentur illae unde discessisses, uti monueras, ante quam tibi reddi potuissent. Quare visum est mihi non male me esse facturum, si sic earum, ut ita dicam, salutis consularem: etsi scio non ejus esse elegantiae, aut ponderis, ut ea diligentia, vel animi sollicitudine curari debuerint. Nam cum Epistolae fideles animi imagines sint, quod per illas cum amicis liberaliter agamus, ideoque nihil eximi ex me praeter summum amorem in te candorem-

que

que referre valeant; qui meae mihi tenuitatis probe sim conscius, cur huic insaniae indulgerem, ut si inficetae & inamaenae illae tibi periissent, aliquid periisse putem. Equidem non eo dementiae adducor, suavissime *Heinsi*, nec etiam vereor tibi meum istud displiceat factum; qui tot luculentis mutuae benivolentiae tuae argumentis dives sim. Solide quippe experior ego illud in te, quod in plerisque non tam verae, quam decantatae paroemiae est, Caelum non animum mutant qui trans mare currunt, cum verius istud Senecae, peregrinantibus hoc evenit, ut multa hospitia habeant; nullas amicitias: Nam homines magno cum pudore sapientiae, ut diversi aëris, sic diversorum hominum intemperiem imbibunt; adeoque diverse cum illis vivendum est, quod sinceræ pati nequeunt amicitiae, ac si cum totidem populis, cum quibus vivere, agendum foret, hinc versutum magis Ulysses evasisse certum, non quidem sapientiae capaciorem, aut amicum magis. Quare cum attentius in te animum applico, teque altae meditationis opus contemplor, te tot maria; tot urbes tot populos vidisse, *πολλὰ δ' ἄντα, κατὰντα, πάρεχντά τε δόχμια* percurrisse, atque etiam cum tam variis hominum moribus rem intimam habuisse, nec de te quidquam immutatum videam, est quod arbitrer, istud solum de te ex omni parte verissimum oraculum esse dictum, Caelum non animum mutant, qui trans mare currant. Non mutasti propensionem illam in me tuam, quamvis, si mihi liceat hoc usurpare, plurimos caelos mutaveris, & ulu venit in paucis, quod innatum tibi, in amicitiiis aeternum perstare. Mirum adhibuisse saltem animo tui semper itineris comitem me, qui adeo inaequabili passu tecum incedam, cum impar sit congressus Achilli. Verum metiris ab ortu absolutissimum consummatae vitae cursum, non lubricas, & ambiguas hujus aevi hominum vias, cum nihil virtutis ab exteris mutuandum tibi sit, quia optima quaeque, atque elegantia copiosius habes penes te, quam ab aliis sperare poteras. Sufficis tibi ipsi, nec est quod aliis invidias, cum unus possideas cuncta, quae tibi invidere omneis possent, si tua valerent tam noscere, quam demirari. Invidia Heroum comes, inquit parens tuus, tecum sim assidue, tecum habitem dea! sed frustra vota haec cum superetis invidiae ipsius, atque hominum captum. Virtutem illam etiam, quae major vulgo est, laceessere certe solet invidia; summam qualis vestra, ne quidem pertingere. Quemadmodum enim missi e coelo ignes montium cacuminima, quae excelsae solo eminent, saepe deprimunt, portentosas tamen illas summitates, tanquam sacras, inlaesas sinunt; quia minime ipsis subjacent, sed ultra insurgunt, Sic vos, vestramque virtutem illibatam. Livor finit, sint licet ceteri omnes, vel eximii suae expositi audaciae, aut inclementiae. Certe sic est, suavissime mortalium, nec me mea perversum habet opinio; cum ea sit orbis universi confessio, nihil supra vestra merita majus quidquam posse concipi: Quare cum in te Reipublicae literariae posita sit omnis dignitas, atque gloria, veneres; atque elegantiae; cures valetudinem, postulant omneis Musae, postulant amici quotquot sunt, qui virtutem colunt, postulant hoc omneis, penes quos cura aliqua est sapientiae. Magnis itineribus si tuus erga me amor laedi non potuit, quod ego nun-

nunquam veritus, certe potest valetudo quae nostri non est, sed temporis, & dubiae fortis, cui nulla rationis lege moderamur. Statue melius, tutiusque de te, ut par ingenio sit tibi valetudo. hoc enixe rogo, pro hoc quotidie numini vota facio, ne vivam sine te, ἐν σοὶ τὰ ἐμὰ ζῶμεθ', τε καὶ μὴ: quando in te totus honor meus, & gloria, quibus solum vivo. Vides praeclaram confidentiam? & ut mei causa etiam hortari te non pudeat? quasi vero tanti debeam esse apud te: sed vide, quid non faciant amicitiae, quibus insanire usque amem? at equidem insanirem altero nomine, si te diutius morarer verbosa nimis epistola, peccaremque in Musas, & Apollinem, si te ab illis abstraherem. Sed quid pertimescam ab iratis Musis favitore te? me tamen teneo, quippe jam — atris nox incubat alis, quam, quia barathrum adeo ipsum, & loca Ditis horrida sub hoc pestifero caelo redolet, deliciarum mearum nolim consciam, dī talem terris avertite pestem. Vale igitur meum decus. xi. Kalend. Maii. CIOIOCLIII. Tolosac. Misi ad Clarissimum *Jacobum Puteanum P. Berterii* Pithanōn libros, quos una cum aliquot membranis, quae vetulam Ovidii ajunt praese ferre, falso suspicor ex prospectu, non etenim legi, tibi ille deferendos curabit. undique Ovidianos codices conquiro, adhucque spero promissos mihi ab amico. Interim sine te vincam meis precibus, & me tui effigie beatum effice, salveat, amabo, quidquid est virtutis, & meriti in sene illo Divino parente tuo, & me in album suorum adscribe, nemo me magis ex animo illum veneratur. Salutem tibi plurimam dicit mea Glycerium cum nostris amoribus Maria, & Dominico nostris. Fato functus est maximus *Fermatius*, & *Thomas Montalbanensis* ille, cujus erat codex Ovidianus, quem penes te habes: festinae huic scriptioni ignosce, afflictum sapit.

EPISTOLA DXLIII.

BERNARDUS MEDONTUS

Nic. Heinso.

Leidam.

SCripti non ita nuper ad te Lugdunum Batavorum, vir amantissime, & si dici bene memini, xi. Kal. Maj. meas jam ad te pervenisse nullus dubito: cum earum curam suscepit diligens, aeque ac probus amicus noster *Jacobus Puteanus*. Ergo casus omneis evasisti? & tandem post errores bene multos, multaque pericula, quibus tandiu patuisti, redditus es dulcissimae Patriae? cum sacris penatibus in gratiam rediisti? Divinoque demum seni, cujus vita es, & medulla senectutis suae solatium unicum, optato advenisti? tuum ergo tam felicem adventum gratulor: laetorque, si fasciculus iste in tuas manus pervenerit. Alios *Berterii* libros si nancisci potuisssem, una etiam cum hoc mitterem; sed apud librarios nostros nullum extat exemplar: eoque raritatis ventum est, ut paullo ante quam *Philippi* filius, princeps Senatus Tholosani, diem ultimum clauderet ex duobus exemplaribus, quorum iste unus, quos habebam in Bibliotheca, rogavit ipse ter, & amplius me, unum sibi darem: asseverans nullum exemplar

Tom. V.

K k k k

habe-

habere penes se, sequē paternae haereditatis hac parte etiamnum carere. tanto amico eo lubentius tunc morem gessi, quod de nova eorum editione cogitabat, verum extincto illo frustra hanc sperabimus. de Membranis Ovidianis quidquid sit aequi bonique consule; verēor quippe ne omnino alia res sit postquam legeris, quam quae titulo indicatur: festinante enim veredario, quo tempore datae sunt mihi, eas legere non potui: solum licuit eas consarcinare, si quid habent, quo uti possis, gaudebo: si nihil, minus dolebo, quod praeter opinionem non evenerit istud. Interim si quid est in Gallia, quo egeas, quaeso, significa: quid non ego pro te? plura tecum in posterum, modo sensero istas ad te pervenisse; eaque etiam utar libertate, ut meas cogitationes circa rem literariam, dubia, atque difficultates tibi, modo sit tuo sine incommodo, aperiam. Salutat te ex animo mea Glycerium, amores nostri Maria, & Dominicus mutuo adhuc habent ex me quam tibi salutem mittunt. Vale amantissime. Kalend. Mai. CIOIOCLIII. priori monueram te de morte *Fermatii*, vivit adhuc, nec desperatur de ejus salute, quamvis paulo ante conclamata. Pestis non amplius fuit apud nos, utinam non esset majus malum Bellum! festinae scriptioni ignosce.

EPISTOLA DXLIV.

BERNARDUS MEDONIUS

Nic. Heinso.

Genevam.

Totus eram in respondendo, viro humanissimo *Jacobo Puteano* nostro; cum tuae ad me Venetiis XXI. Martii datae, optato offeruntur literae. Illas, subito eo diligentius, ac magis avide arripui legique; quo, hoc pacto liberari me a magno valetudinis tuae metu sperabam vehementius. Ergo uti optabam, omnia tibi evenerunt laeta? placidaque fortuna usus es, qualem tibi in posterum etiam, atque etiam precor adfuturam. Ab urbe Veneta praeter hanc nulla alia, de qua in praesenti mentionem facis, innotuit mihi epistola: doleo igitur tanto me fraudari ornamento: adde quod sic tuas amplector; atque exosculor, ac si ipsum te, adeo venustae sunt, teque mirum quantum referunt, ad pectus meum premerem. Quod celebriores Italiae Musagetae, quibus ferax est illa delicata orbis pars, encomiis, & poematis incomparabilem *Christinam* prosequuti sint; teque ejus eximium alumnum, pretiosa gaza onerarint, certe gratulor, quamvis non ideo spectandus magis ad illam redibis; qui per te sis illi ipectatissimus. Sic pronuntio debere omnes affici, ut Naturae, aut potius Dei operae pretium istud, nemo non ex animo debeat venerari. Ego certe, mi *Heinso*, si mihi tantum indulisset numen, ut in ejus splendorem, dignitatemque ex ingenio conferre aliquid valerem; vigilas omnis, labores, & contentiones tantae Divae consecrarem: sed mihi iratas esse experior Musas & faveant licet; non adeo insanio, ut post divinum panegyricum tuum, cujus dignitas Regiae ipsi par est dignitati, disperdam milerum carmen.

Nam

*Nam neque adhuc Varo videor, nec dicere Cinna
Digna, sed argutos inter strepere anser Olores.*

Verum quod a *Samblancato* meo, paulo ante, quam occumberet, praestitum est, quodque de *Christina Augusta* carmen magnificum meae commendavit fidei, cito suo Numini inscribam: Nunquam enim ista Taciti a meo animo excident; *Non hoc praecipuum amicorum munus est prosequi defunctum ignavo quaestu; sed quae voluerit, meminisse, quae mandaverit exequi.* Tandem deo favente pestis desit furere, afflictiisque cives a miseriis patitur respirare, sed seditiosis semper furor arma ministrat: nec spes libertatis erit, nec cura peculi: quippe omnia foris vastantur a militibus insanis: En queis consecimus agros? *Berterii* *Pithanôn* libros una cum aliquot Ovidianis membranis, misi ad *Jacobum Puteanum*, optime ille pro sua sapientia rem omnem curabit, efficietque dubio procul ne tibi pereant, scribit ille ad me te aliquot dies *Genevae* commoraturum, quare quos habeat literatos viros haec urbs, lubentissime a te intelligam: nullius enim praeter clarum illud *Gotofredi* nomen ad nos pervenit. *Basileae* vivitne adhuc *Buxtorfius*, *Linguae sanctae Thesaurus* ille? de literatis etiam viris, quos in *Italia* familiares habueris, modo tuo cum commodo, mecum opto confabule-
ris. *Fermatius* ab *Elysiis* gradum revocavit, superasque rediit ad auras, praeter spem omnium: cum esset conclamatum de sua salute. Adorno quotidie volumen *Graecum* hactenus ineditum, de officiis *Ecclesiae Constantinopolitanae*, quod suum in *historiae Byzantinae* collectione *Luparica* habebit locum. Vidisti *Annam* nostri *Possini*, & amasti? hactenus injuria temporum oculis meis subducebatur, ut vidi, ut perii. *Novam* editionem meditatur cum magis plenum codicem nactus sit, cujus beneficio ornatior in lucem denuo prodeat. Valete, vos omnes, quas in delicatissimo meo *Heinsio* suspicio veneres, a vobis enim me jam media nox avocat. Valeat quoque parens tuus. Salutat te ex animo conjux mea, aliter enim non potest, quae mea est: festinae scriptioni ignosce.

Tolosae iv. Eid. Junii Anno ^PX ciciocliii.

EPISTOLA DXLV.

BERNARDUS MEDONIUS

Nic. Heinsio.

Lugdunum Batavorum.

Quam Nonis Junii *Geneva* mihi abs te scriptam, accepisse nondum nunciaram; elegans plane illa, a *Puteano* nostro demum reddita est: cui continuo respondi; idque, ni fallor, sub initium mensis Septembris: cujus epistolae magis memini; quod cum illa variantes aliquot lectiones, ex *Ovidii MS. Cod. de Remedio amoris*, una mitterem. omnia nobilissimi *Puteani* fidei commendavi, Sic, ut quin ad te tandem deferatur fasciculus hic, minime dubitem: & forsan jam delatus est. Certe bis ante ad te scripseram: quas periisse tibi non multum doleo: non enim erant tanti; ut suo pondere

Kkkk 2

dere meliorem fortunam sperare deberent. Ultimis vi. Eid. Junii exaratis nunc respondeo. gratulabar tibi antea paternos tandem lares, post tot, & tanta pericula sanum, & incolumem attigisse te: Nuncias enim de tuo adventu epistolae *Puteanus* miserat, ecce iterum, atque iterum, gratulor. Sed quod audiam te tam cito in Sueciam difficillimum iter facere, principue hac horrida tempestate, eo durior tibi futura; quod ex clementissimo coelo, suavissimoque Italiae solo jam jam redux venis, laetari nequeo vehementer. Quid fiet de divino viro Parente tuo, annis fatiscenti, & vigiliis, laboribusque exhausto? quid fiet, inquam, de illo, absente te, cum non aderis ejus vita, in cuius suavissimum sinum, senii maerorum partem ille aliquam deponat? Subibit saepe saepius, subibit cari Genitoris imago, quae tibi omnem voluptatem adimet; teque taedebit, mihi crede, ab illo toto orbe divisum esse; cuius ut adhaererem lateri, si mihi tantum indulgerent meae fortunae, totum terrarum orbem excurrerem. Tua, & ῥ μαχαρίτῃ *Rutgersii* poëmatia videre gestio: quae ni cito viderim, Musas mihi iratas putem. Deus bone quot lepores, & veneres ipsas, conjunctas simul, videbimus! tuto auguror ex factis. De bello, quo nunc vestrae Athenae infestantur, quaeso, quoties erunt de quibus me certiore facere possis, sedulo ad nos scribe: tui quippe amore, meas cum Batavorum conjunctas esse fortunas scito. *Samblancati* carmen incomparabili Reginae *Christinae* dicatum brevi accipies. De rebus a te in Italia gestis si les omnino? quamque Manuscriptorum onustus gaza redieris, ne γέῃ quidem. Mortem doleo *Gothofredi* nostri. *Claudium Salmasium* audio subito extinctum: cum per biduum tantum laborasset: iterum cum *Petavio* in coelis bellum? iterum ad arma? verum non illa regio est; in qua tam inutiles curae nos exerceant. Salutem tibi plurimam dicunt mea *Glycerium*, nostri que amores, *Maria*, & *Dominicus*. raptim haec, uti vides, Bacchanalia festa colimus: Musaeae igitur scriptioni ignosce: ex qua laurum non quaerimus. Vale, anime mi: ex Albiniano meo III. Non. Octobr. Anno ^PX cxcicliii.

EPISTOLA DXLVI.

BERNARDUS MEDONIUS

Nic. Heinsio.

Holmiam.

Verbosissimas dedi tibi epistolas, suavissime Heinsi, pro tuis, quas Dor-draci, Nonis septembribus scriptas ad me miseras. Praeiverant aliquot aliae; omneisque fidei, & diligentiae humanissimi nostri *Puteani* commendatae: quae an ad te pervenerint, est quod vehementer scire desiderem. Multum enim vereor, ne bello, & discordiis, perturbatae res vestrae in causa fuerint, quo minus prospera fortuna uti potuerint. Utinam eo demum res deveniat, ut sola literarum mearum jactura, quam aliunde pensarem, non vero periculorum imminetium metu diutius affligar! Sed audiuntur heic tam sinistri de bello rumores; ut quin in illo nomine, ob unum te, qui mihi es instar om-

omnium, totus expalleſcam fieri nullo modo poſſit. Avertat Deus immortalis a finibus veſtris infanda mala haec & ſtrages, fidos belli comites! Quid non tum perpetratur? quod jus ſanctum media in indomabili armorum licentia non violatur? quod ſacrum, & religioſum non polluitur? Belluarum arbitrio, non hominum iudicio vivitur: Quod nimium heu! nos non ita nuper in Aquitania noſtra, miſera, & calamitoſa experti ſumus, nec adhuc, puto, nobis magna libertatis ſpes eſt habenda; dum hinc inde omnia miſcentur. Lugent interim lacerae Muſae: & totus maerore conficitur bonus Daphnis; cum ſua, quae amat, ocia armorum fragore ac ſtrepitu ſentit perturbari. Sane hiſce temporibus nemo non toto eget Petrarcha, cum ejus de remediis utriuſque fortunae. Ego vero me quandiu amaveris egere nullis videbor. Vale, meum decus, Tolofae die Natal. Domini Anno cııııııııı. Proximas foelices tibi opto Kalendas. Salvere te jubet mea *Glycerium* cum amoribus noſtris *Maria*, & *Dominico*: interim dum nova expeſtatur proles, mea de officiis Aulae Conſtantinopolitanae commentaria ſub praelo eſſe renunciant mihi: quum primum prodibunt in lucem, tuum ad te exemplar cito advolabit. Vitas Heroum meorum non ſine legitima cauſa, ad hunc uſque diem publicare diſtuli: ſed perendie ad illarum editionem me comparabo. deſunt Panegyrico Reginae *Chriſtinae* ultima edenda verba; alioquin nunc ad te exemplaria mitterentur. Iterum Vale, qui mihi vere & ſolide amicus es. feſtinae ſcriptioni ignoſce.

EPISTOLA DXLVII.

BERNARDUS MEDONIUS

Nic. Heinfio.

Upſaliam.

AB eo, quo tuas Dordraci datas ad me miſiſti tempore, plures ad te reſponſorias Holmiam miſi: Non tamen adhuc perſpectum habeo, earum aliquam ad te perveniſſe, quamvis humaniſſimi viri *Jacobi Puteani* fidei, ac diligentiae, quam ſemper expertus ſum ſingularem, ac maximam, eas commendaviſſem. Quam ob rem illum, ad quem audio te ſaepius ſcribere, quotidie de te percunctor, perinde quippe mihi eſt, hac, an iſthac via quid agas intelligam, quanquam abs te ipſo audire multo jucundiſſimum, modo te certo certius valere ſciam. Quam ſis rebus magnis intentus ſane non me latet, quominus huiusmodi literario commercio, plerumque otii pleno, poſſis indulgere. Alio te avocant divinae *Chriſtinae* juſſa, atque Aulica officia, quam ut obſcurum me media in ſolitudine degentem inviſas: ac tanto Reipublicae damno cum homine privato feriari debeas. Frequentiores a te quidem epiſtolas optem: modo ne iſtud gratiae, quod a te eſſagito, melioribus rebus officiat. Amicitiae tuae, quam ſemper oculis chariorem habui, ac habebo, dum vivam, nolim injurius eſſe importuna iſthac petitione; qua vereor ne plus dignitati, ac gloriae meae, quam tuis commodis videar conſuluiſſe. Certe nil mihi eſt antiquius, quam de te bene mereri: nec magis Heinfii eruditionem, ac ingenium divinum ſuſpicio, quam amo ejus optimos mores, ac exquisitam

indolem. Extitere multi, quos nobis ipsa proponunt saecula, rerum omnium cognitione illustres, industria commendabiles, & magnis nominibus decorati; paucos tamen videre est, qui summam eruditionem, cum eximio animi candore, integritateque conjunctam habeant. Talis vero ipse es, qualem te omnibus hisce dotibus ornatum veneremur omnes, mirentur posterii. Verum inter tot, & tantos virtutum tuarum aestimatores, a nullis finam me officii erga te vinci: qui benevolentia, studio, atque observantia, omnibus superior sim. infra tamen affectus meos in te sunt verba magis significantia: nec minus difficile est, quae animo sentio dictis exprimere; quam caeli immensos orbes digito metiri: rudi penicillo, uti vides, amoris mei quandam imaginem veluti delineare enitor, quam si suis coloribus valerem depingere, fieri nullo modo posset, quin mirum in modum tibi arrideret. quamquam non sum nescius, me a te vicissim redamari, cum tot illustribus testimoniis mutuam tuam benevolentiam exploratissimam habeam, enimvero pudet me aliquando tantam esse tuam in me propensionem, quanta satis esset ad illustriores aevi nostri viros demerendos. perge tamen me sic beare. Rogasti me saepius ut circumspicerem, qua in re mihi gratificari posses: plurimis, sane & infinitis potes, sed nusquam magis, quam si mihi tui absentiam Imaginis tui praesentia liceat tolerabiliorem reddere, noli unquam sperare fore, ut cessem rogare te, rogo te igitur per quidquid sacrum, sanctumque est, sinas te exorem. Quid statuerit Regina de *Vossio*, cui iratus erat ob *Salmasium*, & quinam sint viri literati, qui ejus Aulam frequentant, fac subinde intelligam. Vale Eid. April. Anno ^PXCIDCCLIV. Hanc dum parabam obsignare, ecce tuae a *Puteano* nostro ad me deferuntur, Deus immortalis quo gaudio perfusus fui! centies exosculatus sum tam jucundas literas, saepiusque iterata lectione earum brevitatem pensando, hac arte voluptati meae consului, quo major esset, ac diuturnior. Sed nondum plane depulsi a te morbi, Parentisque adversae valetudinis commemoratio mihi multum abstulit voluptatis. Magnanimae Reginae mentem mirari satis nequeo. temperamen istud animi vires humanas excedit, verum frustra quaerit *Christina* sceptrum deponere, ac Regno cedere: cum omnium hominum animis moderetur, ac imperet. Supellectilem, quam ex Italia tibi comparaveras, ab Anglis doleo ereptam fuisse. reddetur illa tibi mortalium urbanissimo, nisi illi urbanitatem omnem aequae exuerint ac Regis legitimi Principatum. *Samblancati* panegyricum carmen accipies a *Puteano* nostro, ad quem exemplaria mitto. Interim quaeso te, cum omnia apud nos *Adolfi* Suecorum Regis panegyrici exemplaria divendita sint, unum ad me mitte, ne Parentis tui divino hoc opere caream. Vale iterum, salvere jubet mea *Glycerium*. gaudeo nunc Jure trium liberorum: & haec quae geruntur apud me. Parenti optimo salutem ex animo diuturnam precor: festinatae scriptioni ignosce, non vacat relegere. Quod inaudisti ex *Puteano* de Ovidianis quibusdam codicibus nescio quid sit.

EPISTOLA DXLVIII.

BERNARDUS MEDONIUS

*Nic. Heinsio.**Upsaliam.*

Quas VI. Kalend. Mart. Upsaliae datas misisti ad me, accepisse jam verbosissima nunciavi epistola. postremis IV. Non. ejusdem mensis exaratis, responsi id solum, quod vix licet, nunc dō: quō tibi constet, a *Puteano* nostro diligentissime mihi redditas fuisse. Inaudieram aliquid de tuis Poëmatibus ab ipso *Puteano*: & ut, quod rei est ingēnue fatear, non sperabam tantum; sed & expectabam morae impatiens, destinatum mihi unum exemplar. de illis libere quod sentiam, & ut amicum decet, brevi, ubi aderint, intelliges. de *Augusta* incomparabili illa Regina, qualem orbis non vidit, quid dicam mi *Heinsi*, tantam animi magnitudinem, quantam non habuere ipsi Heroës, in faemina potuisse contingere ventura saecula vix credent. Male sit Musis nostris, si tantum, tamque stupendum facinus posteritati non commendent, haec certe manet te provincia, atque hoc a te ipsa expectat *Christina*. Solus potes dignitatem facti tuo aequare ingenio. Panegyricum *Samblancati* carmen cito, si nondum accepisti, ad te perveniet: ejus enim aliquot exemplaria sunt penes *Puteanum* nostrum: Divinae *Christinae* ut illud offeras te etiam atque etiam rogo. Te confirmatae nondum esse valetudinis doleo multum. Quaeso te, amicissime *Heinsi*, si me vis saluum, noli te nimis literis macerare. de Magno Daniele parente tuo fac aliquid intelligam: metuo enim, ne quid ei finistri accidat. Vale VII. Kalend. Maji MDCLIV. Tolosae. Salutem tibi mellitissima indicit mea *Glycerium*, quae tibi aliquando subirata est, quod timeat, ne te magis amem quam se. festinae scriptioni ignosce.

EPISTOLA DXLIX.

BERNARDUS MEDONIUS

*Nic. Heinsio.**Upsaliam.*

Ex tuis ultimis, quas ut ab hominum humanissimo *Puteano* nostro mihi reditae sunt, nullas, ex quo ad septemtrionem appulisti, periisse mihi lubentissimo animo intelligo: tres quippe uti indicas ad me missas accepi. Mearum tamen quasdam ad te, periisse certissimum est: qua de re ab tuo super mea aliqua rogatione silentio conjecturam mirifice capio. Quidnam istud rei fuerit, rogas? pudet dicere, cum, quia siles, repulsam videor pati. Pudorem tamen meum, amor erga te, Hercle quam maximus, frangit: meque ut te exorare coner, si non facundum, ut alterum, certe audacem facit. Amantissimi mei *Heinsii* effigiem a te tunc petebam: idem nunc efflagito: nec cessabo, si sic obdurueris, dum vivam, *Heinsium* objurgare. Quod, inquam, ita amicitiae nostrae

nostrae injurius fueris, ut cum tui tabella praesens, a te minus absens viderer, nolueris. Quaeso te, virorum exoptatissime, ore, & scriptis hunc popularibus meis liccat spectandum praebere, cujus benevolentia, & commendatione quotidie me inclarescere sentio. Jure amicitiae nostrae nolui hactenus tecum agere, ut id a te gratiae impetrarem; cum mihi tui effigiem negare nequeat; quae in me suos omnes affectus effudit. Nunc me tuae epistolae monent, ut respondeam: xv. Kalend. Maji. Musae, Musae, inquam, ipsae venerunt ad me. Nunquam, Deos, Deasque testor, pari lepore ac venustate loquutas memini. Verum quanta cum voluptate eas exceperim, quove gaudio ingeniosissimam earum poësim audierim, facundiae quidem meae non est dicere: nisi & ipsae Deae, quae elegantissima Elegia blandiri mihi visae sunt, divinam artem inspirent. At tute ipse collige, qui me intime noris: cum tantam ab illis gratiam insanum sit sperare. Praeterea postquam in earum consuetudinem me magis familiariter insinuavi; profecto nihil sese meis obtulit oculis, quod admiratione dignum non esset: quodque hinc elegantias, inde gratias ipsas non spiraret. Ita me Deus amet, non Heinsium, sed Ovidium ipsum mihi visus sum legere: adeo sunt omnia omnibus numeris absoluta. In primis satiabor nunquam tuis Italicis, quae meo & aliorum virorum quorundam, quibus non est cornea fibra, judicio, nativum illud, & elegiacum decus mirandum in modum referunt. hoc certe assentationis omnis purus affirmare sancte possum, praete nihili facere me Transalpinos Politianos, ac Bembos; quibus, quod nemo non debet fateri, & ipsa Italia, non tam facilis & amoena, quam tibi vena fuit. De tuis vero Praefationibus vis dicam quid sentio? Elucet in illis cum putissima Latinitate exquisitissimum judicium, ac divinum plane ingenium in demerendis illustrium virorum amicitis, & in reddendis officiis humanitas, & diligentia singularis. me vero quod inter heroës collocaveris, loco certe nimis invidioso, est quod serio mea gaudeam gaudia, tantamque gratiam mihi palmarium ducam. Abite livor, & invidia, pestes generis humani abite: securus sum de nominis mei immortalitate. *P. Possino* nostro quod ad eum tuorum Poëmatum exemplar miseras, statim dedi: qui humanissime tuum munus accepit: tibi que sic habet gratias; ut majores nunquam sit redditurus. Vale, meum decus. iv. Eid. Maji Anno cicciccliv.

EPISTOLA DL.

BERNARDUS MEDONIUS

Nis. Heinsio.

Holmiam.

Holmiam quas ad te postremum misi, quibus tua Poëmata me tandem cum summo gaudio accepisse nunciabam, tibi jam perlatas esse, *Puteani* nostri diligentia fretus, confido, qui cum studio singulari, ut quotidie experior, nostras utrinque curat. Ego vero quas Upsaliae vii. Junii ad me exarasti, ultimas etiam accepi: unde est quod mihi plurimum gratuler, tanta securitate,

tate, tantos thesauros ad me asportari: cum plerunque hîc in Gallia suos etiam hostes infensissimos habeant epistolae, quos non minus metuam tuarum causa, quam si bonis meis, ac fortunis insidiarentur. & amabo, cur amoris tui erga me significationes prae bonis omnibus non aestimem, cum tot addunt mihi honoris, ac dignitatis titulos, quibus nomen meum, alioquin obscurum & ignobile, posteritati transmittatur? quanquam non sum adeo aeternitatis cupidus, qui quidquam aliud praeter tuam benevolentiam, de qua semper meis officiis bene mereri conabor, ambiam. Missa prae isthaec sint, Heinse amantissime, tamquam solennis formula mearum omnium epistolarum; nunc ad tuarum omnia capita. Poëmatibus tuis nihil unquam memini me legere elegantius, nihil certe quod spiraret magis ipsas Veneres: & quod, ut uno dicam verbo, Heinsum melius referret. De erratis ut te moneam etiam, atque etiam me adhortaris; per Deum, atque hominum fidem, quid tibi vis? errata in hominum politissimo suspicer? errem ipse, si errata quaeram. Legi librum integrum, iterum, atque iterum, amicis etiam legendum praebui: nusquam tamen comparuit quod me, aut ipsos offenderet. Solum *Servitus*, qua voce pro Daëtylo uteris Ital. lib. 11. Eleg. 1.

Maxima libertas haec Servitus, ite Batavi,

aliquantisper dubitavi: non tamen eo adduci potui, ut crederem carere te auctoritate. Ingenue tecum ago ac libere, ut quidem vides, qui vel meos scrupulos in sinum tuum effundam. Incomparabilem *Christinam* ad portum tandem appulisse, sciunt omnes, nollem tamen apud Hispanos commoraturam: vereor enim ne gens illa non humana multum ejus desideriis ac libertati ipsi officiat. Secure certe magis in Gallia aut Italia viveret, quam ibi, ubi nunc est. Lucubrationes aliquot meae, quibus corpus historiae Byzantinae auctum jam jam sperabam, haerent adhuc in scriniis Bibliopolae, earum editioni adversante Cardinale *Mazarino*, qui praela omnia Regia historiae, nescio cui, nostrorum temporum, misere addixit. brevi tamen, ut quidem me & *Possinum Cramoissius* monuit, liberabimur ab hac tyrannide. *Possinus* intra mensem Romam contendet, allectus sine dubio *Holstenii* pollicitationibus, qui Bibliothecae Vaticanae jam jam praefectus est. Audio Holmiae te adhuc manere: ad Eburones tamen Reginam debebas comitari, quid causae sit, quo minus haec facta fuerint libentissime abs te intelligam. Successus adhuc tuos a *Puteano*, ut quidem voluisti, expecto: a quo tantum accepi, tibi non deesse causas de Regina conquerendi. de omnibus certiore me facias etiam atque etiam rogo.

1 Hoc viderat etiam vitium *Janus Vlitius*, & *Heinsium* monet Epist. xxxvii. tom. 111. hujus Sylloges. pag. 752. quid responderit *Heinsius* nescio, sed correxisse in secunda editione patet hoc modo,

Liberius nexu nihil hoc datur, ite Batavi.

Sunt qui tueri syllabae brevitatem voluerunt, sed vide, quae diximus ad Ovid. 1. Metam. 123. Naevi vero hi minime deformant pulcherrimam summi Poëtae venam. talia exciderunt *Scaligeris*, *Dousae*, D. *Heinsio*, & quibus non?

Tom. V.

L 111

rogo. Imaginem tuam rursus doleo negatam mihi, illam tamen impetraturum me tandem spero. effice quaeso me hoc munere beatum. Quod aspiret ad ocium *Vossius*, est quod Reipublicae literariae gratulentur omnes, quibus haec cura est; quando sic est perpaucorum hominum, qui decorare illam scriptis mirifice valeat. Panegyricum *Gustavo* magno a Parente tuo consecratum natus sum, de eo noli amplius laborare. Vale, meus festus dies: cum divino Parente tuo. Uxor mea tibi salutem plurimam impertit. Tolosae x. Kalend. Septembr. CXCICLIV. curabit ad te *Puteanus* noster *Orationum* volumen *Possini* jam jam editarum, iudicium a te tuum de iis scire velim, mihi nimiae eruditionis affectator videtur, alioquin eloquentissimus.

EPISTOLA DLI.

BERNARDUS MEDONIUS

Nic. Heinsio.

Holmiam.

NON is profecto sum, amicorum praestantissime, qui ut quidem amice magis tu, quam vere dicis, ad gloriam nominis tui conferre aliquid valeam mea commendatione. Nam etsi, apud populares meos ullam occasionem ornandi te meis laudibus non praetermittam; tamen certo certius scio, nihil hoc extendi posse tuam famam, quae ubique gentium jam jam propagata est: aut augeri tuum nomen, quod abunde propriis titulis inclarescit. Ecquid ego in solitudine degens obscurus, nobilissimo notissimoque Heinsio affulgere praesumam? Non sum adeo ambitiosus, ne dicam bonae mentis expers, ut me huiusmodi ludat infania. Si laudavi tua poemata, egi, quod me agere decebat, quodque veneres, leporesque, quibus plena sunt, ipsa denique ratio postulabat. Neminem certe scio, Deos atque homines testor, qui tua legerit, qui illa non veneretur. Ego quidem, quo magis illa repeto, eo in dies novas veneres, quas non praevideram, agnosco. Imaginem tuam non amplius petam, donec te Lugdunum Batavorum contuleris, illa tandem carere nequeo, nisi me tua benevolentia indignum censeas. de Augusta vestra plura heic circumferuntur. Lutetiam, puto, non amplius cogitat, ex quo Hispanicis partibus favet. de Panegyrico quod addis, miror unicum ad te tantum exemplar pervenisse, cum plura miserim. *Miltoni* librum in *Salmasium* scriptum alias legeram, novum istum in *Alexandrum Morum* expectabo. Non dubito, quin ingeniosissimus vir ille sit, & qui meliora etiam istis possit praestare; verum a Natura ita constitutus sum, ut huiusmodi maledictis non faveam: Ovidium tuum expectant omnes, sed me nemo magis, qui tuis mirifice capior, ac delector. Vale, meum decus. Salutem tibi plurimam dicit mea Glycerium; scriptioni festinae ut ignoscas te etiam atque etiam rogo. Dabam Tolosae v. Eid. Novemb. CXCICLIV.

EPISTOLA DLII.

BERNARDUS MEDONIUS

*Nic. Heinſio.**Holmiam.*

HEus tu, mortalium suavissime, cur miraris, si te longissimis a me remotum intervallis; ac fere toto orbe divisum, cum non nunquam egregia tua indoles, optimi mores, ingenium exquisitum, totus denique totus qualis quantusque es animo meo obverseris? Quid, inquam, meum istud facti adeo praedicas, quasi verò glaciale oceano nobis interposito meae quodammodo deterreri potuerint epistolae, quominus crebrae te invisere festinarent? miraris earum audaciam? mirari desine: summa quippe mea erga te benevolentia, qua plenissimae sunt, non solum id obtinet; sed & efficit paene, ut ego ipse ad te advolem. Maria certe quantumvis ferocia, atque ipsas tempestates, tui causa obeundas, non reformidarem. Haec autem tam animo, quam ore a me esse dicta velim existimes: utroque hercle fidissimo. Mores meos, opinor, satis perspectos habes; ut fidere mihi sine ullo periculo possis: eosdem saltem, quos hactenus, aeternum experturus. Amicitias contrahere paucas soleo: contractas medullitus foveo: dirimo nunquam. Sicque sum; vel erga vulgares illos, quia sanctissimum mihi semper visum est amicitiae nomen: quod violare nemo, nisi qui impius, potest. Qualis vero erga tuam haberi velim ex singulari virtute, qua alios anteis, tute existima: quod ut ego semper, ita nunc maxime Illustrissimi Foederati Ordines de te iudicium fecere, cum te Residentis apud Suecos plenissimo dignitatis munere auxerunt. Illorum sapientiae praeclarius specimen nunquam habuimus; quam cum tibi sapientissimo provinciam istam demandarunt. Sic enim abunde Reipublicae saluti, & meritis tuis utcumque consultum est. Ita me Deus amet, ut solide tua gavissus sum gaudia! ut Ordinum prudentiam laudavi! ut parenti optimo tacitus gratulatus sum! ut *Puteano* denique nostro *Menagioque*, ac caeteris amicis omnibus, tantam laetitiam, quantam antea nunquam acceperam, communicavi! Interim mihi hinc augurari liceat, clarissime Heinſi, te, ad summa natum mediocribus istis consistere non posse: foreque aliquando, ut ipsum Reipublicae clavum teneas, qui literarum Principatum jam jam occupasti. Quod de *Christina* tua, ideim antea ad me *Puteanus* scripsit: ad nos enim citius, puto, quam ad vos perveniunt, quae *Bruxellis* peraguntur. Histrioniam mihi agere videtur, quae sceptrum cum huiusmodi vita desultoria & instabili commutarit. *Θεατρικὸς γὰρ βίβη ἐστὶ τῶν θεάτροις ἐχολακώτων*: Utinam Phrygia non sit, de quibus, *Sero sapiunt*. Quod familiae tuae debitam a Regno pecuniam maximam intra quinquennium, quo ipsi tua officia fide praestitisti, dum Regno potiretur, non solverit; totus horreo. ô indignum facinus, praecipue Pallade! melius prospectum erit dubio procul cum illius Regni Senatu, quam fuit hactenus cum illa prioniore, ut quidem video, erga homunciones, & quibus non

est mica salis, quam heroës & magnates, plerunque ob nimiam virtutem contemptos. Laudo mirum quantum te, quod Regiae huic servituti vale dixeris, qui mereres aliis imperare, si meritis Imperia decernerentur. Uni tibi imperare perge, nobiliorem certe principatum tenes: sapienti enim imperas dum plaerique alii stultis.¹ Pantomimum e Burgundia perbelle novi: virum elegantem narras: ô infelicem & infaustum, qui in se suam ipse artem non exerceat! post lolliginis plenum caput & ΚΟΥΦΟΝ ΣΠΕΡΜΑ! Quas semper intellexti in me sitas fidem, & taciturnitatem desiderabis nunquam: Amicorum enim res sacramento obfigno. Verum tu per quos reddendae tuae mihi sint epistolae serio circumspice, hae ipsae, quibus nunc respondeo, suspecta admodum manu mihi redditae sunt: non tamen erant referatae. Uni *Puteano* fide, quandiu nobis illo uti fata dabunt. Senio quippe in dies, ut inaudio, conficitur. Imaginem tuam confidentius expecto, & jubes sperari? Salutem tibi plurimam impertit mea vita Glycerium. Vale Tolosae Tectosag. III. Non. Februar. Anno Gregor. CIOIOCLV. Haec dum scribo continuo deferuntur ad me, quas Non. Januar. exarasti, quibus nunc respondere media jam nox non patitur: ubi primum nactus ero aliquid otii, huic officio non deero. Unum interim te monitum velim, *Possini* orationes a tribus mensibus *Puteani* nostri via ad te missas. Quo tanto infortunio exceptae sint, ut ad te non pervenerint nescio. Iterum vale & me constanter ama. Somno certe obruor, indigner licet multum illi e meis domesticis, qui ad hanc horam istas sibi imprudens servaverit, vigilando dormienti aut dormiendo vigilianti erroris & inveniustam orationem imputes velim.

¹ *Bourdelotium* Medicum Christinae:

EPISTOLA DLIV.

BERNARDUS MEDONIUS

Nic. Heinsio.

Holmiam.

NUdius tertius dedi ad te Epistolam longiorem, quam ut mihi nunc aliquid supersit, unde novam concinnem. Nam si de mea erga te benevolentia, qua te intime prosequor, aut de tuis, quibus me beneficiis innumeris devicisti, tecum colloquor, neutrum plane legitimum videtur argumentum epistolae: tum quod utrumque tam augustae scriptionis limites excedat; quum quod nullis significationibus te putem egere: quibus exploratior tibi sit animus meus. Nam quam te amem, nec tu ignoras, nec ipse ego ulla verborum copia exprimam. Verus ac sincerus affectus auream, quam caeteris in rebus non satis laudes, mediocritatem, nescire se jaëtat excelsitatis amans, ac intemperantiae. Sane de tuis in me collatis beneficiis nimis etiam operosum dicere: novaeque id tuae gratiae tribuero, si optimae Amici conscientiae sis securus: quando Medonii non est tecum beneficiis contendere, etsi benevolentia non cedat. Perge ergo me sic beare, suavissime Heinsi, nosque illa
ami-

amicitia invicem complectamur, quae Laelianam, perillustrem, quidem & nulli non notam, apud posteros nostros obscuret. Proxime est, ut te participem faciam meae voluptatis, qui mea te sciam solide gavisurum gaudia. Abierat ad superos, jam menses duo sunt aut plus eo, mira elegantia puerorum meorum alter: Ecce mirae parcimoniae Mulier mascula iterum prole damnum subito refarcit: atque ita factum est, ut tristitiam omnem, quam ex illius abitione perceperam, namque homo sum, istius laeta accessione depulerim. Refer interim vagientem servulum in album tuorum: dabo enim operam, ut quantum ego, tantum ille aliquando te colat, atque observet. licet liberos probae indolis tam parentum amicitiarum, quam bonorum haeredes fieri. Haec dum scribo continuo afferuntur ad me *Sarravii* adhuc e praelo madidae Epistolae, non inenustae omnino, aut illepidae, verum paullo insuaves & amarulentae. auctor, *Salmasio* ut maxime faveat, aliorum illustrium virorum gloriae parum aequus est iudex & aestimator. Certe *Danielis* obtrectator pessimus, tuae favitor insignis: unde ipsi pessime hinc; inde vero optime velim. Barbarus sim, ni illum amem, qui praeclarum de te iudicium scriptis reliquit! *Aliquando adest mihi Nicolaus Heinſius vir eruditus, cujus virtus multas habet viſſas, quae me ad ſe trahent.* aurea verba non potui non hîc referre; alata velim, qualia apud Homerum, & in remotissimas orbis partes advolent. Verum id abunde meritorum tuorum fama jam praestitit; noscerisque, ubicumque virtutis nomen pervenit. Vale, mea lux. Tolosae VI. Eid. Februar. CIOIOCLV. *Menagius* noster miris pollicitationibus a Regina Christina vocatur, ut iter Italicum secum suscipiat: non tamen ire vult in hanc sententiam: *Puteanus* certe non probat.

EPISTOLA DLV.

BERNARDUS MEDONIUS

Nic. Heinſio.

Holmiam.

DUas a te epistolas brevi intervallo temporis, Holmia accepi, easque luctum, maeroremque justissimum, ob duram *Danielis Heinſii* parentis tui abitionem, spirantes. Uni statim respondi; alteri, in qua praeter hoc funestum nuncium, de his, quae Bruxellis agerentur, quanquam fama ad nos advolante, inaudieram, nonnihil etiam loquebaris, jam nunc respondeo. Sed quid pro tantis venustatibus, gratiis, leporibusque tuis, quibus omnia sparsa referta omnia rudis & impolitae scriptionis meae reponam, Nae plane insanirem, si tecum in hanc palestram descendero; non illam quidem, periculosaе aleae plenam, sed meae plenissimam impudentiae, ac dementissimae temeritatis. Uni tibi hominum politissimo, elegantissimoque, egregie a Musis datum est, facere omnia arbitrio tuo politissima, atque elegantissima. Meae certe partes erunt, quando non ita indulgere Divae, tuis maximam praestare reverentiam. Quare cunctas tibi elegancias istas, & humanitatis sales relinquo. Nam quid tam al-

tis consiliis minorem animum fatigem? Venio ad epistolae reliquum: ô rem indignam & praeter omnium expectationem ac mentem; Lesbia nostra, Lesbia illa, illa Lesbia Heinſi! impudentissimum facinus, haud ideo turpe minus quod tam veteribus quam hodiernis exemplis praejudicatum est. Nihil quippe sua natura faedum ulla quantumvis potentum virorum depravata auctoritate potest comprobari. Nemini virtutis limites praetergredi aut honesti leges violare licet: & quamvis haec aut illa aetas proclivior sit ad vitia, neutra tamen si decidat, a culpa vacat. Ille mihi Monarcha, ille Rex & omnia, qui vitii integer & sceleris purus, sua decore vivit contentus sorte. Vale igitur, tu meum decus, quod sic vivas. Tolosae Tector. raptim XIII. Kal. Jun. MDCLV. Uxor te jubet salvere. De Ovidio quid factum?

EPISTOLA DLVI.

BERNARDUS MEDONIUS

Nic. Heinſio.

Helmiam.

E*Rgo: Senem nostrum perpetuus sopor
Urget? cui pudor & Justitiae soror
Incorrupta fides, nudaque veritas*

Quando ullum invenient parem?

Occidit ergo nobis vir tantus, atque una tot bona, ad quorum jacturam refarciendam, nisi superesses, tu vir eximie, alium Hercle non haberet aetas nostra, quantumvis magno literatorum numero abundare videatur.

Multis ille bonis flebilis occidit:

Nulli flebilior, quam mihi.

Venerabar enim egregie virtutem illius singularem; judicium solidum, & excelsum; doctrinam longe lateque amplissimam; divinum denique ingenium adorabam. Quibus animi dotibus cumulate praeditum esse, singulare Deorum beneficium est, paucissimis concessum: atque hinc tibi, mihiq; in tam magno maerore haud inanis solatii causa exoritur; quod moriendo tantam sine dubio, quantam vivendo Numinum charitatem senserit. Quanquam non aliae defunt rationes, mi Heinſi, quae jubent lacrymis modum ponere: longa enim senectus, quae plerumque vitae taedium parit, amaro gravis pondere: pleni dignitate dies transacti: necessarius cunctis vitae exitus, ad id quasi voce edita hortantur. Me vero mirum in modum solatur jucundissima tui recordatio, atque aegrum animum una spes reficit; fore ut nutanti literariae Reipublicae, ac jam jam ruinam minitanti, tua opera, tuisve curis subvenias. nec dubito, quin ita mecum omnes sentiant, cum nemo suis meritis melius, quam tu, omnium oculos in se convertat, nemoque illam aestimationem, quam de tua

vir-

¹ *Daniilem Heinſium.* Vide Heinſii Epist. ad Gronov. cclxxvii. tom III. Sylt.

virtute concepere summam, dignius possit sustinere: implere, atque superare.
Haec una te cogitatio sollicitum debet reddere

Cum nec tricenis, quotquot eunt dies,

Amice, places illacrymabilem

Plutona taukis:

Caeterum adeo eximii Manes debitis a me suis inferiis non fraudabuntur: mihi que videbor magnum honorem consequi, si tecum una funus curavero, quod si nequeam aliquot saltem tristes cupressus spargam. Vix diu, mi Heinsi, & me constanter ama, qui te vicissim amo medullitus. Tolosae Tector. xi. Kal. Jun. cixcclv.

EPISTOLA DLVI.

BERNARDUS MEDONIUS

Nic. Heinsio.

Holmiam.

Saravium antea non amabam; nunc ejus nomen vix patior: indignus enim sum tua benevolentia, de qua si meis aliquando officiis bene mereri possim; mortalium ero felicissimus, nisi hujusmodi Nebulonis mores, quos equidem non noram, penitus abhorream. Salmasiani levitatem ingenii perspectam habebam: In eoque semper plurimum judicii desideravi; unde merito illo gloria- tur Gallia nostra. Quanquam acerrimi acuminis nunquam mihi visus est fuisse. Et lectio illa immanis ac ingens auctorum omnium hominem vere eruditum, aut sapientem plaerumque non efficit, saepe quidem importunum reddit. Saravium vero neque magna rerum copia divitem, neque multo ingenio fuisse praeditum, etsi nominis aliquid sibi apud Parisienses comparasset, facile credam: Elapsa hebdomada bis ad te scripsi, quas a Puteano accipies. Hagam ait profecturum te: faciliiori igitur commodiorique via meae illic pervenient. Tibi interim tranquillum mare opto diesque laetos, ac vitam longaevam. Scribam saepe, ut jubes, & ego vehementer cupio: quid enim amabo mihi suavius tuis alloquiis? Vale, plura in praesens nequeo. xi. Kalend. Jul. cixcclv. Tolosae Tectoragum. raptim:

EPISTOLA DLVII.

BERNARDUS MEDONIUS

Nic. Heinsio.

Holmiam.

Tuas epistolas, una cum Epithalamio accepi, vir Clarissime, hoc est, meros amores, ac Veneres accepi. ô divinum carmen, quod tenera ipsa basia, mol-
les-

lesque amplexus spirat! habent profecto in illo celsissimi¹ Principes, quo suavissimarum noctium voluptates in diem usque protrahant, & tam eorum ingenia, quam corpora delicias faciant. At quid sibi volunt isthaec tua, Musas non respicio? fieri ne possunt adeo polita, adeo elegantia sine Musarum ope & auxilio? Ovidium tuum sine notis, *Christinae* inscriptum vidi, verum maioribus characteribus velim, certe notas tuas legere pervelim, in illis enim maximam eruditionem fore certo certius habeo. ab huiusmodi autem lucubratione, occupationibus aulicis te totum divelli laetor: malo quippe Heinsium meum in dirimendis Regum controversiis intentum, quam in membranarum vetustate corruptis excutiendis; pulchrius, crede mihi, castrorum quam librorum pulvere oppleri. Et magis decorum ex Rerumpublicarum cura, quam ex literarum studio lauros meminisse. Quanquam tu alios, quibus par incumbit provincia, longe superas, qui utraque Pallade maxime polles. Ecquis enim, praeter te, medio in bello, inter difficillimarum partium studia, armorum strepitus, ac fragores, nuptialia condat, ac gratos canat Hymenaeos? Vale, meum decus, memorque sis a me morae impatienti tui effigiem in dies expectari. Orationem in obitum Divi *Danielis* parentis tui an acceperis, fac intelligam. *Puteani* diligentiae nihil non debeo, Vale iterum. plura scribere nequco; & forsân plura tibi legenda quam per occupationes liceat. Tolosae Tectosagum.

XI. Kalend. Septembr. Anno ^PX CXCICLV.

¹ Credo intelligi Epithalamium in nuptias *Gustavi Adolphi* Mecklenburgici, & *Magdalenae Sibyllae* Holsatae, quod legitur lib. *Silvar.* pag. 159. inter Poëmata *Nic. Heinsii*.

EPISTOLA DLVIII.

BERNARDUS MEDONIUS

Nic. Heinsio.

Leidam.

CUM me non ita nuper de afflictæ valetudinis tuæ statu certiore fecisset *Puteanus* noster; gravissimum maerorem, quo subito affectus fui, atque etiam nunc afficior, tumultuario epistolio, tibi; clarissime Heinsi, testatus sum meum. Non quidem uti totus in te defixus animus voluisset; verum ut per acerbissimum dolorem licuit, qui effecit magis, ut sibi, quam scriptioni indulgerem. Dum in ea sum calamitate, ecce tuæ succurrunt epistolæ, quæ sin minus adferunt esse te valetudine integra, ex quo solide exultem; saltem adferunt magnam spem, fore ut brevi eam recuperes, ex quo non inclementius saeviat dolor. Quanquam horreo; Imbres, Nimbos, Procellas, Turbines, animosas denique, ac pertinaces Tempestates, tam charo capiti, integros octo dies, incubuisse! Quaeso te, quando te nobis salvum reddidere Di boni, noli tam infidum iter amplius remetiri. Cole Musas Batavas, atque inficetum saeculum politissimis scriptis ditare perge. De Oratione mea quod addis, amanter facis, ut omnia. Verum ego ipse nunc quod nuper ad te, auctor essem, ut eam Laribus potius, quam eximiis magni *Danielis* Manibus dica-

dicares. De locis, de quibus mōnes me, tuum erit pro sententia statuere, nam ego id praestare nequeo, cum Archetypi vix aliae pagellae apud me supersint. Quo fato aliae perierint nescio. Id solum quod a te mutatum videbo, habebō optimum; quando integram opellam nullius esse momenti existimarim, etsi mihi tu plus aequo soles favere. Caeterum laudo studium conquirendi antiqua numismata, quae mirum quantum ad Historiam pertinent. Dabo imposterum omnem operam, ut in his diligentiam meam sentias: de mea enim benevolentia securum te esse facile mihi persuadeo. Haec dum scribo, altera tua mihi redditur epistola Holmiae scripta xxiii. Julii nempe, antequam adversam adeo experireris fortunam. in ea de *Berterii* diatribis: quas ne mihi remittas te etiam atque etiam rogo. Aliud exemplar nactus sum, non ideo tamen quia abundo, ut illas retineas jubeo. Sed ô inofficiosum *Bidalium*? is est nempe, qui *Puteani* nostri diligentiam, ac meam expectationem fefellit, penes quem diutius delituere. Vale, suavissimum meum pectus, plura tecum vellem, sed me jam media nox revocat. Vale iterum atque iterum. Tolosae Non. Januar. cidoiclv. Gregoriani. festinae scriptioni ignosce. mittam *Petri Casanovae* vitam nomini tuo inscriptam.

EPISTOLA DLIX.

BERNARDUS MEDONIUS

Nic. Heinsio.

Hagam.

Quaquam mihi semper pergratae sunt tuae epistolae, hae certe, quibus convaluisse significasti, multo jocundissimae fuisse. Valetudo quippe tua adeo ad me pertinet, ut non magis mea. Cura igitur illam, si me amas, quam poteris diligenter, nec patere, dulcibus hisce Musarum curis, reduces vires tuas corrumpi iterum, atque iterum labefactari. heu! fuge Parnassi crudeles terras, etsi floribus pictas, latet anguis in herba, atque hîc, ut scis, ac nimium forsan expertus, Pallor, & Macies sedem suam fixere, te totum jocis, ac vitae amoenitatibus da, quibus florentissimi dies, color vividus, denique lacerti succi pleni comparantur. Sed surdo loquor, & literarum irretito; cui vitae tantulum, sine illarum commercio degere, piaculum est! Quare, quaeso te, saltem animum relaxa; donec te pristinum robur, tanti laboris tolerantissimum fecerit. Adeone faves *Mazarino*, ut valetudini tuae parum consulas? at inquires, hujusmodi munificentiae insolentem *συνεχῶς* laudari oportuit. bona verba, sed timeo Danaos & dona ferentes. *Casanovae* vita jam, puto, ad te pervenerit. Caeterum de mea Oratione, quam eximiis Parentis Manibus luctuosam consecravi, utere tuo arbitrio, & quae in Italos scripsi, aut tute dele, aut corrige. vix enim illius pagellas aliquot habeo, atque ea ipsae, in quibus de Italis, fato periere. Ego interim sic tui effigiem spero, atque etiam expecto, ut hujus desiderio penitus langueam. hîc magna est literarum calamitas, nullus librorum reditus, denique solitudo. Autorum

Tom. V.

M m m m

rei

rei veterinariae editionem Graecolatina adornabo intra paucos menses, quare si quid penes te est, unde auctior, nitidiorque prodire possit, impertire amico. Suetonium adhuc premo, cui curas secundas adhibeo. Vela contrahoscriptionis meae, ne si altum metiar, huic, tanquam scopulo imbecillis *ὁ ὠκεὺς ἐν εἰρήνῃ σαλεύσῃ*, tua allidat valetudo. Vale, meum Suavium. Uxor mea te vicissim refalutat. Tolosae III. Eidus Martii CIOIOCLVI.

EPISTOLA DLX.

BERNARDUS MEDONIUS

Nic. Heinsio.

Hagam.

NUnquam antea, per Deum atque hominum fidem majori, quam nunc, voluptate tuae me affecerunt epistolae. eram enim jam victus animi, timens summopere, ne mihi mortalium clarissimo *Heinsio*, a febris illa scelerata & impia, sinistri quid accidisset. Sed me tandem ab hac calamitate liberaisti, duplicique nomine explesti animum gaudio, tum quod tibi auctae vires, tum quod ipse nova ac egregia auctus es dignitate. Tibi ergo mihiue atque Reipublicae Literariae utrumque etiam atque etiam gratulor. Sane non potuit digniori dari tantum munus, nec in dando sapientior haberi unquam potentissima Respublica, cui illud acceptum debes. Non sic Principes, proh-dolor! non sic, eximios virtute viros excipiunt. Quaerunt illi tantum homines ad servitutem natos, & ad quodlibet audendum scelus idoneos. me teneo; longa enim est & publica querela, & me alio vocant urgentissima aliquot negotia. De tui effigie sperata tamdiu ne *γὰρ* quidem tu. ne tamen putēs cessare me unquam pultare ostium. Vale, decus amicorum, & me ama ut ego te. Tolosae Tectosagum IV. Eidus Septemb. CIOIOCLVI.

EPISTOLA DLXI.

BERNARDUS MEDONIUS

Nic. Heinsio.

Hagam.

Tuae a *Menagio* nostro die hesternae redditae mihi fuerunt epistolae, vir summe, desideratissimae illae quidem & expectatissimae; quod ipse facile credideris, si me tantum ames, quantum ego te. Dii vestram fidem! quid in amicitia durius silentio diuturno? quo quidquid habet jocunditatis aut solatii vita nostra, alioquin per se miserrima, vel aufertur penitus, vel certe subducitur. Mihi Hercle, ut nihil amici alloquio suavius, tuo praecipue, quo quantum capiar dicere, nullius est facundiae; ita eo carere crudelius nihil esse potest. Quare si tuo Medonio cupias, mi *Heinsi*, si illum ames, si te illo oblectes, maiorem in posterum in mittendis epistolis diligentiam, quam jubes expectare, adhibebis. Sic fiet, ut omnia litterarum taedia, quibus fere confici-

cior,

cior, facillime diluantur, aut certe mitius in me saeviant. Quem enim hic non taedeat litterarum, ubi non secus ac in media Turcia tenellae & deliculae frigent musae nostrae? nostrorum hominum capita loliginis succo sunt penitus infecta: nullus bonarum artium gustus: litterarum commercium nullum: omnia solitudo & vastitas. Felicem te, qui in illis oris positus es, in quibus & litteris & litteratis indulget coelum, habesque bene multos virtutis tuae aemulos; invidos nullos. His ergo deliciis fructu longum & aeternum, & mei aliquando recordare tui nunquam immemoris, inque uno te Musas omnes, Gratias, venustates, leporesque venerantis. Caeterum de Aristotele paterno vellem scire quid statueris deque Ovidio tuo. *Guieti* In Terentium notas posthumas nondum vidi: salutem tibi plurimam precatur uxor mea: de Tabella sis quaeso memor, eamque curam adhibe, in curanda valetudine reficiendisque viribus, ut cito te mihi succi plenum referat expectata effigies. de edendis epistolis paternis num cogitas? habeo quasdam ad *Maussacum* praesidem nostratem. Vale & me ama, si tui observantissimos amas. VII. Kalend. Novembr. CIOICLVII.

EPISTOLA DLXII.

BERNARDUS MEDONIUS

Nic. Heinsio.

Amstelodamum.

ME sane multum taedet expectare diutius tui effigiem, Clarissime Heinsi; jam enim biennium agimus, ex quo illam toties promissam, adhuc etiam desidero. o, te parum sollicitum deliciarum mearum! qui unicum absenti Amico solatiolum neges. Ego te medullitus amo, eoque animo sum erga te affectus, eroque aeternum, ut nullam non occasionem tibi gratificandi velim arripere: quae si defuit, infoelicitati meae, non negligentiae tribui certe debet: Tu vero habes in te ipso facilem, atque idoneam oportunitatem beandi me, nec ulla propterea te rerum mearum cura tangit, precesque omnes amici, non ficti, sed synceri, obstinatum queunt mollire mentem, fregissem medius fidius, fregissem, ex quo tuam imaginem expeto, vel intractabilioris puellae durum pectus, ipsaque forsitan pudicitia votis amantis succubuisset. Quam enim non annuae curae funditus evertere? Pertinacior rigidiorque tu, qui tui animosius tueris umbram corporis, quam puella ipsummet corpus! Sine ergo te tandem expugnem; non enim decet virum, quem Veneres, & Gratiae deliculis suis finxere manibus, derogare amico gratiam roganti. Non desunt, vobis praecipue liberalium artium amantissimis huiusmodi artifices, qui formas hominum penicillo mire exprimant: non dees ipse tibi: deeritne igitur animus, quo Medonium tuum singulari beneficio velis cumulare? Apage Stoicam severitatem: illam enim vera amicitia respuit; quae quidem remissior esse debet, & ad omnem comitatem facultatemque proclivior. Haec jam satis ad objurgandum: acturus olim magnas & ingenteis gratias; cum expectatissimam ta-

bellam nactus ero. Vale interim, & me aeternum amare perge, quod etiam atque etiam rogo. Uxor plurimam tibi salutem precatur. Tolosae Non. Maji cıııııııııı. Scripsi ad te non ita nuper epistolam, quam Clar. Menagii nostri diligentiae commisi. de Musis Batavis fac quaeso aliquid intelligam, nostrae enim penitus squalent. Vale iterum & iterum vale.

EPISTOLA DLXIII.

BERNARDUS MEDONIUS

Nic. Heinsio.

Amstelodamum.

SIC est, uti conjeceras, Heinsi clarissime; quas ad te & ad Cl. Bullialdum spōstremas scripseram, eodem plane involucro tegebantur. Verum praedonem, qui has dilaniavit, esse illum, cui erant commissae, suspicari, fides ejus, quae jam dudum mihi perspecta est, nisi sim inhumanus, ac ferreus, pati non potest. Caeterum quisquis ille fuerit, non ego quoque moleste fero: quando hujusmodi testimonia meae erga te observantiae, nec truces invidorum hominum manus, nec malevolos Sycophantarum oculos reformidant. Thesmophoria non sunt haec, quorum varia superstitio prodire in vulgus metuatur; sed verissimae amicitiae innocua sacra; in quibus omnia sic pure synce- reque peraguntur, ut lucem potius, atque ipsum solem, quam umbram & solitudinem affectent. Tales aeternum simus, quales decet Musarum Sacerdotes: non sicuti sunt, quibus continuo placet, partium studio laborare. gratiorem profecto nobis litterarum materiam praebebit semper venustus Ovidius tuus, per te venustissimus; quam bella, & strages, quae funestas solum narrationes pariunt. Equidem, mi Heinsi, malim potius luxata Ovidii carmina, quibus Dioscuri cum Lynceo pugnant, a te restituta legere, quam ipsos pug- nantes videre. Sed ὦ Ζεῦ καὶ θεοί, quam beasti ipsum poëtam! dum tot ver- sibus desperatae, ut ita dicam, salutis, tam felici successu, medicam manum adhibuisti. beasti & Hecaten, cui, cum illa antea nisi vili ¹ *Menta* pascere- tur, nunc Haleces quadragesimariorum nostrorum βεῖματα reddidisti. ô fa- ctum bene! beasses & nos, si tam illa quadragesimam nostram, quam mox ingressuri sumus, quam pisciculos hosce esset voratura. Verum pro dolor! ad tantam rem, mi Heinsi, nulla tua est ars, nulli sunt Codices, neque Εἰκό- τες quantacunque sit fames. De membranis Ovidianis agam propediem cum Mauffaco filio: quanquam non magna est spes quidquam ab illo recuperandi. Parentis enim litterariam omnem supellectilem jam dudum Librariis nostris vendidit. Etsi ejus est dignitatis & muneris; ut libros & litteras colere debeat. Uxor mea tibi mirum quantum salutem precatur. Vale, meum decus. Tolosae 10. Kalend. Mart. cıııııııııı. at, at, pene memoria exciderat: cum Episto- las

¹ Respicit locum Ovid. 11. Fast. 578. egregie ab Heinsio emendatum; *obsutum maenae torres in igne caput.*

las aut quidvis aliud mihi in posterum inscribes, qua solebas formula, *Senatori Tolosano* quanquam nec has phaleras amo, perge uti: nullos quippe alios titulos admitto, essetque gratus, si apponeres tantum, Romanorum more, *Heinsius Medonio*. de deferendo Senatorio ordine, ut me totum Musis dem, sedulo cogito. Quid parturiant Athenae vestrae, quid *Gronovius*, quid *Vossius*, viri clarissimi, moliantur, fac quaeso sciam. De edendis posthumis paternis cogitabisne unquam? Tabellam, quae te mirum referat, jam diu expecto. Haec pede stans in uno, verum animo mirum quantum in te defixo. Iterum Vale, vale & me ama.

EPISTOLA DLXIV.

BERNARDUS MEDONIUS

Nic. Heinsio.

Amstelodamum.

SVavissimis litteris tuis orbari jamdiu aegre molestaeque ferebam, vir praestantissime, tuisque amoenissimis alloquiis carere, dudum erat intolerabile. Nescius interim quam in partem me verterem, quave arte solitudinis taedia & molestias fallerem, in me severi Judicis personam sustinens, tanti & tam gravis infortunii causas diligentius inquirebam. Sed cum nullam meam culpam agnoscerem, aut laesae amicitiae, aut violati foederis antiqui, aut imminutae existimationis, quam de te semper habui maximam, tanto tunc augebatur dolor meus, quanto durum erat cogi, totum istud crimen oblivionis in ipsum te transferre. Quod si me tantum amas, quantum amare significas, amas autem vehementer, cogita perturbati animi curarum aestus. Sic eram, vir Amantissime, tu tamen interim de me, deque meo ornando nomine cogitabas. ô me silentii tui infelicem interpretem! Tum enim conquerebar, cum egregium usque adeo specimen affectus omnis in me tui ubique terrarum editurus eras, ut majus desiderare bonae mentis non fuerit, cum minori abunde cumulateque cupidissimus expleri potuisset. Nam quid tam honestum tamque magnificum mihi obscuro homini, quam nullius juris nomen meum exquisitissimis lucubrationibus tuis praeposuisse? ingens profecto & inauditum benevolentiae argumentum! Ergo inclarescet nomen meum splendore tui, quique antea ignotus omnibus fui, per omnium hominum ora volitabo? compendiosa fane via ista haec ad immortalitatem; quippe sic sine ullo labore multorum laborum gloria facile comparatur. Equidem expectabam leves tantum aliquot notas haud extincti amoris; ingenteis tu intimae necessitudinis profers: diluere maerorem poterat litterarum aliquid tuarum; depellit penitus omnem omnium litterarum venustissima: satis erat denique, vel tuo nomine salutari, ut bearer; Tu vero, ô faelicitatem insperatam! divini ingenii tui non degeneres factus in sinum meum deposuisti. Hos igitur blandulos, horrido licet sinu, tenerrime tamen excipiam, suavissime Heinsi, fidemque do, fore mihi semper oculis ipsis cariores. Enimvero ut adversus illos ita sim affectus, postulat natalium splendor,

M m m m 3

singu-

singularis humanitas tua, & meum in te studium & observantia nunquam defutura. Verum nae tibi ipse injurius es? qui ut amicum egregium te praestes, rerum iniquum aestimatorem te praebeas. Nam dic fodes, quid est in me meriti, quo adduci potueris, ut me tanto honore dignareris? non certe nominis splendor, non magni ingenii laus, non ubertas venae, aut oris facundia, quid ergo? fingis profecto, fingis tibi causas mortalium ingeniosissimas. Quas si quidem amor non respuit, dedignabuntur tamen omnes, qui meam norint tenuitatem, & tuae dignitati consultum vellent. Quod usque adeo verum est, ut & ipse verear, cujus tamen gratia peccatur, ne tibi iratas Musas reddideris, quod tam imprudenter earum bona & thesauros prodiga manu in immerentem profuderis. Sed quid pro tanto munere rependam tibi, vir praestantissime, quando vel agendarum gratiarum impar sum? bonam mentem medius fidius & bonum animum in te, quod unum Diis ipsis semper placuit, cum nihil aliunde pro dignitate suppetat, praestabo. Vale 111. Eidus Aug. A. D. CIOICLX. Tolosae Tectos. De Musis nostratibus nihil est, quod te deceat audire: ita plenae sunt ruris omnis & inficetiarum. Nam quae olim Palladem Artesque omnes liberales summo studio venerata est Tolosa, nunc tantum Palladis nudum nomen vix retinet, Gotthorumque barbarie misere iterum laborat, & quod olim illi odio litterarum fecere, faciunt jam nostri bonarum artium neglectu. Clariss. Gronovii Melam nondum vidi, non tamen dubito, quin opus eximium non sit: quam in sententiam facile adducor aliorum ejus operum praejudicio. Hic ingens terrae motus factus est, seseque ultra Leucas extendit, luctuosus imprimis urbi, cui nomen *Banieres*, a balneis sic dictae, cum multarum domorum ruina, tum plurimorum hominum nece. Ignis ex sulphure in visceribus Pyrenaeorum montium conceptus tantam nobis jacturam intulit, unde qui a voce graeca *ωûε* nomen ipsis inditum volunt, argumentum habeant certe maximum conjecturae. Vale iterum atque iterum. Si septentrionem revisas, incolumem quaeso reduc mihi meum Heinsum. Tabellae quae te egregie referat expectatione interim non possum non excruciar. quare quamprimum illam a te expecto. Salutem tibi plurimam dicit mea Glycerium.

EPISTOLA DLXV.

BERNARDUS MEDONIUS

*Nic. Heinso.**Amstelodamum.*

ENimvero, clarissime Heinsi, si benevolentiam tantum meam spectarem, sique tuam in exarandis ad me epistolis diligentiam ad amoris & desiderii mei normam, ut ita dicam, exigere, te quidem ingentis negligentiae reum peragerem. Sed quia rationem habeo dignitatis tuae, teque gravissimarum rerum unda jactatum scio, modum adhibeo cupiditatis meae, in eaque litterarum tuarum orbitate, quando ita respublica postulat, tui me causa lubens

ma-

macero. Scio namque florentissimam Amstelodamensem Rempublicam, cujus fines ad extremas usque mundi partes extenduntur, te sibi a Secretis virum tantum in illo otio versari, quo literae nostrae egerent, nullo modo pati posse. At Hercle faelicissimum te, qui Reipublicae causâ otium amittas, & hoc est quod olim merito laudabat Tacitus, *Privatas necessitudines publicis esse anteponendas*. De te igitur amplius minime conquerar; quod si hac in re mei aliquando minus compos sim, id certe fit amoris quodam impetu, quo invitatus rapior. Cujus tamen minime me pudet, quum nusquam meliori damno frons poni possit. Verum etsi hac parte finem posui meis querelis, non ideo tibi non succenseam, quod saepe promissam mihi tui effigiem haecenus non miseris. Deberes certe tu hoc solatii absentibus nobis indulgere, non vero inanibus promissis amici spem toties ludere. Quare demum te quantum possum enixe rogo, sinas te exorem, & noli quaeso inclementi Sueciae caelo te prius dedere, quam mihi pignus tam charum, tam expectatum fueris impertitus. Atenim dices, num tibi vividior spirat imago nostri in iis lucubrationibus, quibus jam jam nomen tuum decoravi, quam quae corporis illa arte effingi possit? fateor, sed & isthaec magis ac magis alterius auget desiderium. tantoque minus istam mihi negare potes, quanto lubentius illam ultro mihi detulisti. Caeterum de Ovidio nostro est quod te moneam; me scilicet tandem nactum codicem Manuscriptum Clariss. olim *Samuelis Petiti*. Verum ex illo varias tantum lectiones excerpere, non ipsum codicem mittere, puto, licebit. Attamen persuasissimum habe, debere te multum humanitati Amplissimi *Ranchini* Camerae ex edicto Castris constitutae Consiliarii, cujus est liber. Is enim statim ac sensit hoc nomine promovere rem tuam posse, dici non potest, quibus officiis & quanta comitate preces meas exceperit, quamque vellet aditum hinc sibi munisse ad amicitiam tuam. me certe si audias, ipsum in album tuorum adscribes: fane vir est magni nominis in Republica literaria, tum suis tum Avorum praeclaris meritis, & quod summum, ut ipse verbis disertissimis mihi significavit, gloriae tuae ac famae studiosissimus: expecto igitur Codicem, quem statim atque accepero singulari diligentia illum excutiam: a negligentia autem aut oscitatione mea securus esto, res oppido bene peragetur. Sed amabo, quid vis tibi cum tanta tua illa manuscriptorum indagine? desperas, inquis, desperas infinitis locis mutilatum Ovidium pristino nitore restitui posse sine magna & nova Manuscriptorum copia! di vestram fidem! tequaeso respice, mi Heinse, tuamque supellectilem, quippe habes in te uno veneres omneis & lepores, qui in Ovidio desiderantur. Et quis non malit luculentissimo delicatissimoque ingenio tuo lucem istam & nitorem debere, quam inficetis membranis Monachorum olim plurima barbarie corruptis. Quam ob rem inter te & ingenium tuum mitius impofterum agatur: alioquin tibi concinam;

Faelix tua si bona noris.

In mittendis Epistolis inibo viam, quam aperuisti, quare jam jam ad Ill. *Capellanium* scribam, ut istud officii tuo nomine impetrem. Noli alteri vicissim tuas credere; nam ultima, quae ad me pervenit, inter infidas manus diu multum.

tumque versata est, parumque abfuit, quin omnino interciderit, & quamquam in iis de everfione Rerumpublicarum aut regnorum a nobis non agatur, necessitudinem tamen nostram infestis oculis profanari molestum est. Nobil. *Christiani Hugonii* Systema Saturnium ego & *Fermatius* in dies expectamus; nondum illud videre contigit, non proinde amici tui ingenium & eruditionem maximis laudibus non prosequimur, quidquid obganniant Cucullati nostri, gens, paucis exceptis, plena ruris & inficetiarum: gaudeo igitur & gratulor tibi ipsique, quod eos perbelle exceperit, atque ufferit. Neque pati certe possum illorum impudentiam, qui quidquid in eorum cucullo non cuditur adulterinum ubique praedicant. Modicum adhuc: quidam amicus meus rei antiquariae studiosissimus non ita nuper nactus est fictilem urnam tanta industria fictam, ut huic parem nescio an habeat totus orbis. Illius circa collum jacet inscriptio isthaec, quae cum me plane fugiat, a praestantissimo *Golio* quid praese ferat scire pervelim, putem fuisse quondam *Onuphri Panvini*, huicque creditos *Neronis* Imperatoris cineres. Quidquid sit videbitur.

A clariss. autem *Golio*, quem suspicio ac summe veneror, id gratiae veritus sum postulare per Epistolas, confisus nempe rem melius tua commendatione obtineri. si me in tanti viri amicitiam insinues, tam mihi id erit gratum quam quod gratissimum. Reliquum est quod te etiam atque etiam enixe rogo, in tam longinqua tamque aspera peregrinatione serva te mihi incolumem, meque de rebus tuis certiore fac. vale, meum decus, salutem tibi plurimam impertit mea *Glycerium*. Si Clar. *Hugenium* hîc aliquando videre contingat, dabo operam, ut pro suis meritis & dignitate excipiat. habes epistolam verbosiores fortasse quam velles, quod tibi ita videri putabo, nisi mihi longiorem remiseris, quae me recreet. Vale, Non. Januar. A. D. cicioclxî. amplius neque animi neque oculorum neque manus plane sum compos, quare si quid perperam scriptum ignosce. Iterum, Vale mea vita.

EPISTOLA DLXVI.

BERNARDUS MEDONIUS

Nic. Heinsio.

Amstelodamum.

Scripsi non ita nuper ad te, amicorum princeps, jamque meas Epistolas. Sin manus tuas pervenisse cura & diligentia clariss. viri *D. Capellani* persuasissimum habeo. attamen an tibi fuerint redditae, velim quamprimum renunties. His ego tibi significabam Manuscriptum codicem Ovidianum *Samuelis* olim *Petiti*, nunc *Nob. Ranchini*, Senatoris in Curia Castris ex edicto constituta, in dies expectare me; nunc vero addo pervenisse illum in manus nostras. Quare mi *Heinsi*, mihi fidem omnem adhibe, me moram nullam facturum in excutiendo illo. Notabuntur omnia vel vitiosa: scio quippe non parum interesse, ne vel literula mutetur: saepe namque vel mendosa lectio mendum ipsum tollit. Illum autem codicem cum edito a te *Ovidio* confero, quo facilius

lius variantia agnoscas & locus libri recurrat. Reliqua meae, epistolae ad tabellam, quam scis, spectabant. Ego, mi Heinse, diutius deludi non patiar, illam cito mitte, meque de rerum tuarum statu certiore fac. haec pede stans in uno & negotiis valde inficetis totus implicitus. Vale, meum decus. Tol.
 III. Non. Mar. CIOIOCLXI.

EPISTOLA DLXVII.

BERNARDUS MEDONIUS

*Nic. Heinse.**Amstelodamum.*

Mitto ad te, mortalium suavissime, MS. Codicis Ovidiani Clar. *Ranchini* ab Medito a te discrepantes lectiones, quas quidem tanta religione excerpti, ut piaculum duxerim vel manifestos errores, atque ipsas ineptias (in quas incidere saepe saepius contigit) diligenti manu non annotare. Atque ad hanc nimis anxiam & scrupulosam indaginem eo magis adductus fui, quod alias non semel expertus fuerim ex huiusmodi turpissimo caeno exoriri aliquando non inelegantes flosculos, atque etiam interdum gemmas. Quidquid sit aequi bonique consules: scis enim nihil nisi minimum in te a me conferri unquam posse. Insaniam medius fidius, si sperem divitias illas tuas ingentis augeri aliquando mea tenuitate. Ectypi Arabici enodationem Golianam misit ad me humanissimus *Johannes Capellanus*, ultroque obtulit, usum se ea, qua valet, apud *Vatierum*, Linguae istius professorem eximium, autoritate & gratia, quo res iterum excutiat; unde mireris viri egregii liberalem animum, & officiosam urbanitatem. Ego vero quidquid eluxerit, mittam statim, etsi non dubito, quin plane & oppido rem attigerit praestantissimus *Golius*. Et hoc ipsum antea suspicatus fueram, quidquid imperitorum quorundam Loyolistarum jactasset audacia ad Romanos pertinere. Nam quid Arabica inscriptio isthaec cum cineribus Neronianis? in mittendis autem Epistolis *Johanne Capellano* nostro semper, uti vis, utar: quanquam me monet desperare, cum in Suecia fueris, meas ad te suasque se tuto curaturum. Quamobrem, quaeso te, vel Leydae vel Amstelodami portum nobis beneficium statuas, in quo nostrae, hinc vero in Sueciam mittendae, summa securitate excipiantur. De Polyaeo cogitavit nunquam *Fermatius*: verum tu cogita de imagine tua, quam jampridem expecto. Confirmatur in dies sensim valetudo mea, quam sedulus curabo, quo diutius sis tuus. Vale, meum decus, & te incolumem mihi, Reipublicae, & literis serva. Tolosae Tectos. Pridie April. Anno CIOIOCLXI.

Cl. *Ranchino* Codicem MS. non prius remittam, quam ad me rescripseris. Mitte ad me pagellas Ovidianarum notarum, quascumque habueris editas. Vale iterum.

EPISTOLA DLXVIII.

BERNARDUS MEDONIUS

*Nic. Heinsio.**Holmiam.*

DIU multumque maceravit me adeo tam altum tamque diuturnum tuum silentium, vir Amantissime, ut si moerorem, ac taedium, quo sum hinc affectus, tibi penitus vellem exponere, non aliqua certe verba, quibus pede stans in uno vix mihi nunc licet indulgere, sed nec quidem bene longa sufficeret oratio mea. Humanissimo *Capellano* nostro gratias semper agam non leves, sed ingenteis, quod huic malo, verborum suo lenocinio meliorem praesentio-remque quam potuit saepius adhibuerit medelam. At potuit id utcumque praestare, nunquam certe callum obducere. Istud solum a te expectatur, nisi te forte nativae illius urbanitatis taedeat, Suecorumque malis induere inclementiam. Averruncet ab hominum venustissimo luem istam Numina, nobisque te cito talem e Suecia eximant, qualem te elegiacis Paternis Livia olim exoptavit. Gaudeo interim, quod a *Capellano* accepi, pervenisse ad te variantes lectiones e MS. Cod. D. *Ranchini*: beabor si inde ornatior aliquando in lucem prodeat Ovidius tuus. Monent etiam ille & honestus vir Dom. *Cassianus* scripsisse te ad me uberem epistolam; est quod humanitatem exosculer tuam, & quod cum fortuna expostulem, quod perierit. Salutem tibi plurimam dicit mea Glycerium. Vale, pridie Kalend. Januar. MDCLXII. hac transiit honestissimus vir *Marquardus Gudius* Romam proficiscens, apud illum me mirum quantum commendavit meus erga te amor. Vale iterum, festinae scrip-
tioni ignosce.

EPISTOLA DLXIX.

NIC. HEINSIUS

*Bernardo Medonio.**Tolosam.*

STabam in procinctu itineris Septentrionem jam jam aditurus, jucundissime Medoni, cum ecce fasciculus a te mihi traditur, qui diversas lectiones ex vetustis Nasonis membranis summa diligentia industriaque congestas complectebatur. Non ferebant quidem res tunc meae, ut gratias tibi, quas debebam, pro singulari officio agerem; sed defunctus itineris longinqui molestia, ac fixo hic terrarum pede, nihil prius habui aut antiquius, quam ut animum tibi gratum per literas indices testarer. Invidit tamen fati malignitas tibi earum conspectum, ut nuper admodum ex utriusque nostrum studiosissimo *Capellano* licuit cognoscere, ad quem epistola erat missa. Verbosam fuisse fatis memini, nec recordor tamen quid praeter luculentam gratiarum actionem contineret: nisi quod anxie rogabam, ut amplissimo *Ranchino* pro membranis tam obvia comi-
tate

tate suppeditatis significares obstrictum me nexu arctissimo teneri. Quod & ipsum ut nunc quoque facias, quando literis istis fraudatus es, vehementer a te contendo. Agit in hac aula res Regis Christianissimi *Chassanius*, domo Tholosae, Amplissimo *Fermatio* cognationis jure conjunctus, vir mihi perquam amicus, qui & fratrem, ni fallor, habet in civitate vestra viventem, cujus opera in curandis literis possis uti, quoties imposterum ad me scribes: nisi tutius tu opinaris opera *Capelani*, ut jam coeperas, uti. Labor iste, quem excutiendis Ampl. *Ranchini* membranis dedisti, altissimum ruborem mihi expressit: quod unum possum, cavebo diligenter, ne cum ingrato rem fuisse tibi dicas. Nasonem curis secundis exornare jam coepi: nam priores illae nequam mihi satisfaciunt. Tum editio ipsa, quam *Capelani* nostri opera te jam consecutum esse auguror, parum elegantiae aut nitoris prae se fert. Quae ad me misisti mox examinabo, & cum cura perpendam. Si qui imposterum codices vetusti in manus tuas pervenient, auctor tibi sum, ut & alias fui, ne iis ad vulgatas editiones excutiendis te accingas, sed paucis pagellis evolutis gustum eorum mihi praebeas, unde arbitrari possim, operaene pretium sis factururus, si totos percenseas ac percurras. Ex multis enim, qui per veteres Bibliothecas passim occurrunt, paucos oppido est invenire castigatos, aut magno mihi futuros usui. De inscriptione Arabica an feliciter *Golia* conatus cesserit, & quid viri apud vos eruditi de ea censeant, doceri exopto. In Claudiano recensendo nunc occupor, quem *Elzevirii* flagitare non desinunt. Interpellor tamen frequenter, & identidem ab istis cogitationibus avocor per publica negotia. Nativitati Delphini Gallici duo epigrammata nuper aliud agens consecrabam; quae rumor fert popularibus tuis non displicuisse. Mitterem nunc ea, nisi subvererer ne & haec in via periturae sint. Habet *Capelanus* tamen epigrammata, a quo peti possint & impetrari, si tanti ea ducas, quae a te legantur. Scribam pluribus, cum intellexero has non aberrasse. Literae tuae qua via curandae sint jam indicavi. fasciculorum si quid ad me perlatum cupis majoris rei aut molis, id Amstelaedamum suadeo destinari cures ad *Ludovicum* & *Danielem Elzevirios*, aut Lutetiam quoque ad Illustrissimum *Beuningium*, unum ex Oratoribus nostris, quem tamen diu illic moraturum esse vix opinor. Vale, delictum Musarum, vir Amplissime. Exarabam manu praepropera Holmiae Suecorum. Anno MDCCCLXII. a. d. III. Februar.

i. leguntur lib. IV. Eleg. 4. lib. III. Silvar. pag. 205.

EPISTOLA DLXX.

BERNARDUS MEDONIUS

Nic. Heinſio.

Holmiam.

Epistolam tuam, quam modo optatissimam accepi, centies exosculatus sum, suavissime Heinſi, a quo enim Amstelodamo abes, fere autem annus est, nullam aliam accepi. Tolerabam, utcunque poteram, meam istam orbita-

Nnnn 2

tem,

tem, eque Republica esse mecum ut omnino sileres, aegre minus ferebam, non tamen non aegre multum & anxie; cum erga te ita semper animatus sim, qui si jucundissimo tuo alloquio caream, vitam mihi acerbam putem. Agnosco igitur singularem tuam diligentiam, quod foederatorum Ordinum curis deesse volueris, ut ignobili & obscurae amicitiae, non sine publico damno, indulgeres. Minus certe fuit, nec vereor pronuntiare, lucubrationes nuper tuas, quamvis eximias, medio in otio literarum nomini meo inscribere, quam e continuis magnarum rerum fluctibus, mei desiderio & ornandi causa emergere: non, inquam, tantum beare me isto munere, quanquam maximum, quippe quod omnibus me *ζηλωτόν ἢ περίβλεπτον* facit, quam sempiternam mei memoriam servare, & in aspero ultimi septentrionis frigore ineffabilem amorem in me tuum non, ut ita dicam, deferbuisset. Enimvero, in *ἀφρόνοις θεοφείς* ut es egregie; Ingenii divitias tui temere ubique & imprudenter non dedecet profundere; at ipsum te non aequale licet: adde quod facilius est viro liberalissimo divitias quam animum largiri. Utrumque tamen mirum in modum praestas; cum enim me pretioso auxisti dono, tum constanti prosequeris benevolentia. His ergo auxiliis aeternitatem nominis & gloriam mihi jam jam videor consequutus, nihilque amplius esset, quod cuperem, unum si ingenti non obesset felicitati, taedium scilicet tenuitatis meae & male meritaе famae, quam mihi fecisti. Sustinebo illam nihilominus omni arte, omni industria atque conamine non tam meae, quam ut tuae consulam dignitati, cujus multum oppido interest, integra ut sit, ne mei nimio studio malus animorum spectator audias. Id autem si accidat tuo malo, te certe poenitebit saltem nunquam, animum si meum non meritum spectes, male collati beneficii. Atque id unum tibi pro me summa fide spondeo, suavissime Heinsi, dum proh dolor! sperare non licet, tuorum erga me meritorum magnitudinem meis quibuscumque officiis assequi. Iterum ago tibi ingentis gratias pro Regio plane munere, quo me decorasti, testorque Numina, mihi semper ipsis oculis carius gratiusque futurum. Attamen illo licet penitus expleri potuerit cupiditas omnis mea, adhuc maxima mihi superest imaginem tuam exosculandi. Quare quamprimum quaeso illam mitte, sed quae te mihi perbelle referat ipsissimum, & *μετεῖώς μὲ ἀποκινάεις πειλάγων* me. Vale, Amicorum Princeps. mea Glycerium Janus inprimis & Dominicus salvere jubent. Scribam Ranchino, plurimisque verbis meis sentiet tuam erga se humanitatem. Vale iterum, & te mihi incolumem serva. Tolosae pridie Kalend. Martii Anno Gregor. *MDCLXII*. barbarae scriptioni ignosce.

EPISTOLA DLXXI.

BERNARDUS MEDONIUS

*Nic. Heinſio.**Holmiam.*

BInas jam jam a te literas & eodem tempore, easque summi tui in me amoris, & omnium elegantiarum plenissimas accepi. Quae quanta me voluptate totum perfuderint, si velim exprimere ipsa eadem voluptas efficit, quo minus id plane possim. Tu tamen oculis mihi & vita charior, suavissime Heinſi, ex mea in te teneritudine, & ex earum anxia & diuturna expectatione abunde ni fallor agnosces. Nam quid iterum memorem nuperum illud & immortale gaudium, quo me nomini meo inscriptus Ovidius tuus cumulavit? illo expleor medius fidius, & ita expleor, ut prae ejus magnitudine pro more suo nequeat erumpere, adeo intercludit adhuc spiritus, viresque omneis debilitat, quae tamen omneis vel levis quaedam & tenuis significatio oppido exhaustiat. Fidem Numinum! ecquis me vivit hodie fortunatior? Ego nullius meriti, nullius gloriae, aut famae, nulliusve autoritatis, placere adeo ne potui mortalium venustissimo, politissimo, & multis pro Republica rebus gestis clarissimo Heinſio, ut eximios divini ejus ingenii foetus tam infelicibus auspiciis in lucem ederet. Verum amicitiae operae pretium est istud, quae non minus ad fingendas sibi causas ingeniosa est, quam opibus ingenii dives tu ad augendum amicum. Ergo sis aeternum tui similis, sit tibi nemo par, sis orbis & ingenio & industria praestantissimus, ego vero sim nullius expectationis; emoriar tamen si me vel paula unquam invidia tangat felicitatis tuae. At liceat per te mihi caeloque irasce, quod me adeo inopem fecerit, ut nullis tecum officiis, ne dicam beneficiis certare possim, dum de amicitia pugnaciter certabo. Nam quod in excutiendo MS^{to} Codice Ranchiniano sedulitatem aliquam meam commendes, nae lepidum istud & facetum, nugas, quisquiliasque magni aestimare. Amplissimo autem *Ranchino* saepe saepius egi gratias tuo nomine, quam potui magnas. & quanquam nulla mihi insit orationis vis aut facundia, illi nihilominus hac parte mihi videor abunde cumulateque satisfecisse; unde securus impoſterum esse debeas, ab omni metu male praestiti officii. Clarissimo D. *Cassando* nostrati laetor provinciam istam obtigisse, & etsi mihi decora fama solum notus, gratulor tamen hanc fortunam, atque exosculor; quid enim illi viro non optem, cujus in Rempulicam & omneis bonos praeclara ejus esse scio merita, & cujus fratris singularis virtus, stupendaque eloquentia Tolosae nomen nostrae in dies decorat. Illorum igitur opera, quando tu & ipsi jubent, utar impoſterum in mittendis epistolis. Non tamen praestantissimi *Capellani* nostri industria proinde velim carere, quis enim illo humanior, aut diligentior? verum cum nihil sit prius in votis quam multas occasiones nancisci, atque omneis arripere, testandi tibi & omnibus singularem meam in te observantiam, omnium officia lubentissimo animo ample-

etor. Ne tamen audacior videar *Cassando* tuo, velim quaeso, ut venustas, comitas, & mellita oratio isthaec tua audaciae meae lenocinetur. Inscriptio-
nis Arabicae genuinum sensum, quanquam ὡς ἀργαλέον πρῶγμα, ὦ Ζεῦ καὶ Θεοί! praestantissimus *Golius* mirum in modum, puto, assequutus est. gratias ego egi jam diu pro tam difficili suscepto labore. Nunc etiam accepi interpretatio-
nem viri magni nominis D. *Vatieri* Parisini, quam mihi *Capellanus* noster ultro procuravit. Is est, qui Tamerlani historiam ex Arabicis vulgavit, nec a mente Cl. *Golii* recessit multum, quod mirum in modum facit, ut explicationi *Golianae* plenior fidem habeam. Rem alii etiam in se recepere, *Hardisius* Parisinus, & *Ath. Kirkerus* Jesuita: volupe erit videre, quid ejus ex tripode. Claudiano tuo, quid amabo, post primas secundae curae addent? ô portentosam ubertatem ingenii tui! Epigrammata, quae Delphini Gallici gloriae consecrasti, *Chassandus* meus ultro dedit, miratus sum styli semper puritatem, felicitatemque ingenii. de urbanissimo *Marquardo Gudio* nunc est quod tecum pluribus. Tolosam appulit decimaquinta die mensis Octobris Anni proxime elapsi, una cum *Sam. Schas* Gandensi. Subito illos morbus corripuit non aequè gravis, quippe *Gudius* quinque solum dies decubuit, alter quindecim, & non sine summo periculo, quum conclamatum esse de salute ejus putarent medici. cumque interim de me aedium dominum, in quibus pedem fixerant, percunctati essent, dicto citius ad illos advolo, si quid possem officii praestiturus. Statim plura, de te praecipue, deque literis nostris inprimis Graecis, & hercle non sine summa voluptate, quae major tamen futura erat, nisi macror periclitantis hominis ipsam *Gudio* mihiq̃ue minuisset. Post aliquot dies rhedae sese committunt vix recuperatis viribus, atque ideo me valde reluctante, sed nullis precibus, nullis rationibus, nullo denique sui respectu & male confirmatae valetudinis adduci potuere, ut iter suum retardarent, tanto desiderio efferebantur Italiam citius invisendi lustrandique: Tolosae igitur vale ultimum dicunt. Mihi vero suavissimus *Gudius* aeternam amicitiam non sine arrhabone despondit, ego vicissim meam certe non sine lacrymis, nihil enim ejus moribus vidi amabilius. Ab illa autem die nihil de ipsis inaudiivi proh dolor! quod certe me non parum macerat: cumque saepius amicos, quos in Italia habeo praecipue *Possinum* nostrum, de iis compellarim, respondent de illo ejusque socio habere nihil quod scribant. Quare mi Heinse, si quid accipias, quando in Belgium redituri sint, si caelum ipsis vitalem auram non inviderit, quamprimum quaeso, me certiore fac. scis namque quam alte me afficiant amicorum res. Tabellam, quae te mihi perbelle referat, noli amplius desiderem, quam a longo tempore expectare jussisti. Salutem tibi plurimam impertit noster *Relhacus*, cujus pietas in Deum tam apud nos conspicua est, quam apud omnes nomen tuum illustre. Uxor mea non minus me nomen etiam Heinseanum veneratur. Vale, meum suavium. v. Eid. Aprilis Anno D. Greg. ciorcclxii. totus adhuc sum in perquirendis Ovidianis Membranis atque etiam Claudianis. Clarissimo *Chassando*, ni grave, est felicitatem meo nomine precare.

EPISTOLA DLXXII.

BERNARDUS MEDONIUS

*Nic. Heinsio.**Holmiam.*

NAE tu potius quam ego mortalium omnium venustissimus, suavissime Heinsi? qui tuo nomini per universum terrarum orbem virtutis & ingenii laude celeberrimo, ex meo nullibi gentium noto accessisse multum splendoris praedicare non cessas? ô insolentem benevolentiam, ô vehementissimum affectum! cui parem nescio an ipsa aurea tulerint unquam saecula: me vero tanto magis felicem, quanto minus a te ingenti hac invidiosae laudis gloria cumulari debuerim! Peccas profecto graviter ipse in virtutem tuam, amicorum ocelle, dum nimius es in ornando me: famae namque tuae male consulis, neque te respicis, ipsos quoque rationis fines lubens & sciens praetergrederis, quodque magis mirentur, qui nostrum utrumque norint, poenitere te nunquam facti, nec desistere, me omni officiorum beneficiorumque genere explere. Atqui omni pacto jamdiu me ultra modum omnem usque adeo explevisti, ut ipse verear, ne si ultra contendas, temeritate potius quadam tua, quam bona existimatione adductus, tantum gratiae in immerentem me effudisse videaris. Vide quae-
so, quam bonae fidei vir sim, qui cum nihil mihi honorificentius sit singulari hoc tuo studio, nihilque dulcius tot exquisitis titulis insignem commendatione tua posteritati transmitti, nihilominus tantum decus fortunamque deprecor, quo Heinsiani nominis claritudinem dignitatemque adversus ipsum te tuear. Enimvero quid habeas non video, unde purges te, apud posteros ex tanto clarorum virorum numero unum me egregie elegisse, quem observes, colas, in oculis feras denique. Quam ob rem horum alterum accidat necesse est; aut me falso magnum virum excipiat posteritas, aut ipse malum nomen sis posteritati, quod me in Heroicum ordinem, quo jure, quave injuria, intrudere conatus fueris. Quod si pergas & perstes in ea sententia, adhibenda tibi omnis ars, ingenium, & industria (res enim agitur tam tua, quam mea,) apprime ut conveniat persona, quam feram, utque os habeam humerosque Deo similes; alioquin impostura isthaec tua (verbo absit injuria) perbelle omnibus perspecta, risum hercle & cachinnos, non admirationem movebit, quamquam ἀγαθή πλάνη ἢ δε βροτοῖσι. cave igitur ne accidat; ἵνα ἐν μὴ ἢ αὐτὸς ἐλέγχωμαι πάνι μῆζον τ' ἐμαυτῷ κεφαλῇς προσωπείον περιείμην. Sed quid disputo? quasi vero amor, qui nullis cohiberi potest repagulis, certo beneficiorum modo terminetur, & quin quo velit feratur impediri posset? nugae, aspera & inominata oratione velle tibi persuadere, debere te parcius bona tua largiri, neque prodiga manu ea ubique spargere. Sed indignum esset te hominum liberalissimo parcimonia isthac uti: cum a Natura rerum omnium copiam ea solum conditione accepisse videaris, ut spargereres. Incidisse te in tantum Thesaurum Meursii operum ineditorum, est sane quod mirum in modum tantam sibi for-
tunam

tunam literaria Respublica gratuletur. Dabitur enim dubio procul edendi copia. Ecquis tam durus, tam barbarus, tamque dulcibus Musis nostris infensus, qui a tua non humanitate frangatur? nemo admodum, nemo. Plus certe poterit lepor & urbanitas tua, quibus & dicta & facta tua soles condire, quam tenerae ipsae illae virgines. fac igitur cito luce sua fruantur infelices diu Meurfiani foetus, suo malo fato tamen felicissimi, quod tuo nunc patrocinio excipiantur. de *Gudio* nostro beati, ad illum jam jam scribam. Tabellam, quam scis, expecto, quam ardentissimis votis expetivi, tuam tibi mihiue valetudinem serves incolumem etiam te atque etiam rogo. τίδ' ἀνὲν ἔς ὕγιαλινον? salvere te jubet mea Glycerium & noster *Reilhacus*. Tolosa viii. Kal. Jul. cidoiclxii.

EPISTOLA DLXXIII.

N I C. H E I N S I U S

*Bernardo. Medonio.**Tolosam.*

EX quo Oratores nostri Lutetia deserta pedem retulerunt ad suos, interruptum quodammodo fuit literarum commercium, quod oportunitate isthac usus cum amicis vestratibus solito frequentius exercebam, quamdiu legationis tempus protrahebatur, mi Medoni. Huc accessit alterum incommodum, *Emerico Bigotio* in Neustriam abeunte Parisiis relictis, a quibus aetatem totam haecenus abest. Solebam autem literarum fasciculos illi inscribere, quod *Capelani* nostri aedes remotae ac reconditae tabellariis parum obvias atque expostas sepe praebeant. Viri amicissimi absentiam diuturnam valde damnosam rebus meis esse comperi, amisso non uno ex meis fasciculo, quos Lutetiam, ut soleo, ad aedes ejus recta hinc miseram, post adornatam ab illo, quam designavi, profectionem. Ita factum est, ut distulerim responsionem ad jucundissimas tuas a. d. viii. Kalend. Juliarum exaratas, auguratus interim tradendas tibi fore, quas *Chassanii* nostri usus opera a. d. x. Junii mensis satis verbosas, quantum recordor, deproperaram. Iis tamen quid evenerit, nec dum cognosse contigit. Earum quae satis multa in buccam tum veniebant mihi, nihil memini, nisi quod de Virgilii editione mox a me paranda egisse me scio, ac studia illa verbis amplissimis tibi commendasse, de indagandis ac conquirendis hinc inde vetustis Maronis codicibus potissimum sollicitus, quorum ope ac subsidio fretus maculas poetae divino, quae illi etiamnum adhaerent non paucae, detergeam. Negotium illud fore tibi commendatissimum confido, cujus industriam singularem in fovendis promovendisque lucubrationibus meis jam ante saepe numero sum expertus. Quapropter quod anxie deprecariis invidiam praeconiorum, quae meritis tuis longe inferiora in te congesti haecenus, injurium te & mihi & tibi ipsi hinc praestas. Mihi enim, ex quo beneficiis compluribus adstrictum tenes, id unice reliquum fuit, ut ingrati ac mali nominis contumeliam, quantum possem, a me amolirer. Hinc dum conatibus meis obluctaris, odiosum plane & iniquum te praebes. Tibi vero ipsi mul-

multum a te deteritur, dum virtutes tuas orbi universo spectatas ac praedicatas a me uno negligi vis ac tacitas praeteriri. Non potes itaque praeripere mihi libertatem te colendi observandique, nisi cum vita. In civitate vestra quid moliantur homines literati diu est quod ignoro & doceri cupio. Ex hoc Septentrione vix est, ut harum elegantiarum, quibus vos redundatis, quicquam exspectes. Edidit tamen *Johannes Loccenius* nuper admodum historiam Suecicam, qua complexus est res cum ab aliis regibus, tum ab ultimo hoc & nuper elato *Carolo Gustavo* gestas. *Johannes Schefferus* Phaedri fabulas commentario suo illustratas brevi prodituras esse pollicetur. In Belgio *Gronovius* Observationum suarum editionem secundam publico jam dedit, daturus brevi Tacitum Liviumque, animadversis suis doctissimis exornatos: *Graevius* Ceramici duplicem *Johannis Meursii* haecenus ineditum divulgavit. Lutetiae quid fiet, longe rectius me nosti. De *Gudio*, caeterisque amicis Italis, multi jam menses sunt, quod nil prorsus audio. Haec nunc, ut valere me & tui meminisse non minus quam mei intelligas. *Glycerio* tuo & *Cl. Reilhaco* plurimam salutem adscribo. Vale, Medoni jucundissime, mi ocelle, mi lepor. Exarabam Holmiae Suecorum, ubi annum fortassis totum adhuc alterumque hibernabo. Quidni enim sic loquar, cui media etiam aestate frigendum est? ut simillimus sim illi, quem Seneca in Ludo lepidissimo totis annis celebrantem Saturnalia festive perstringit. a. d. xx. Novembr. CIOCIOLXII.

EPISTOLA DLXXIV.

BERNARDUS MEDONIUS

Nic. Heinsio.

Holmiam.

Quod a multo jam tempore de me, deque meis studiis, rebusque nihil acceperis, mihi ipsis oculis carior suavissime Heinsi, plures certe causas fuerunt, quas verbosius omnes enumerare, etsi is est mos excusantis sese, supersedeo tamen, ne videar, si scrupulosam hanc purgationem instituerō, vereri, ne tam inofficioso meo silentio non peperceris, quod abunde te pro singulari in me affectu fecisse scio. Nec etiam est, cum de litterarum mearum paucitate quereris non ita nuper in tuis ad *Clariss. Capellanium* nostrum, quod ideo minus a te amari existimem; imo hercle hujusmodi querelis egregie augeri benevolentiam tuam agnosco. Uno igitur verbo silentii causas omnes contraho. aeger diu decubui: Tolosae abfui: denique litibus aliquot usque adeo vexatus fui, (vae litibus) ut mei vix ac ne vix quidem meminerim: persancte tamen affirmare possum, dum me haec totum habet carnificina, tui memoriam & desiderium nunquam non animo vehementi retinuisse, semperque ob oculos versatam esse imaginem illam tui, quam sibi mens fingit: quando aliam, quae te mihi coloribus referat, longum expetitam, facpius promissam, frustra expectatam indulgere amico haecenus noluisti. Sed quid ego commemoro. aut quid repulsae istius memoriam refrico? decet enim

Tom. V.

Oooo

ita

ita appellare tuam procrastinationem, cum statuerim, ex quo injecta spe tanti muneris immerito deludor, tacitus mecum huiusmodi molestiam concoquere, neque amplius hac in re tibi molestum fore. Hac parte securus sis in posterum. Nec adeo rusticus aut inoficiosus sum, qui cum tanto tuo incommodo tantam in me voluptatem transmoveri velim. Alia certe mihi mens, alius animus; qui nihil habeam prius, quam me tibi rebus in omnibus morigerum præbere. Temperabo mihi utcumque potero, & hanc cogitationem circumcidam; me teneo, suavissime Heinsi, meque totum ad posteriores tuas epistolas converto. Duæ sunt, quas cura Clariss. *Chassanni* accepi a fratre unam x. Junii; alteram xx. Novembr. Anni præteriti. Utrique ista, quæ a me nunc exaratur, respondebitur, quamquam, ni me mea memoria fallat, priori puto tempori respondisse. Agebant ambæ de nova Virgilii editione, quam haberes præ manibus notis illustrandam, meque hortabantur, si quæ membranae divini Poëtae in istis oris reperiri possent, eas ad te mitterem. mirum! hortabantur: quasi non sat erat uno verbo monere me, me inquam tui studiosissimum. Sed quid hîc studium commemoro? cui ne schedam unam debes. Equidem licet Tolosanas omnes Bibliothecas summa diligentia pervolverim, pluteos lustrarim, secretiores loculos excusserim, de Virgilio tamen ne *γερὺ* quidem. Præterea viros litteratos bene multos, qui mihi in vicinis urbibus non leviter favent, sedulo percunctatus sum, omnemque lapidem non movi. Sed omnia hæc incassum. Restat ut de Bibliotheca Fuxensi, quam & ipse olim laceram vidi, pauca dicam, nec enim præbet illa materiam longae orationis. Fuit quidem primis temporibus magni nominis & pretii, quippe quæ ingentem bonorum authorum gazam contineret, nunc vero inficetas tantum & pulvere corruptas insulforum veterum Jurisconsultorum membranas servat. eximia esca hæc blattis, tineis & muribus, boni omnes authores hinc inde distracti nunquam habuere animum redeundi, & si habuissent, per manus prædonum non licuisset. Sane qui supersunt, quantacunque sunt mole & numero, non unius assis facienda sunt, nisi quod pyrotechnicae arti aliquando inserviant. felices Codices, si sors hæc ista melior eos exceperit: solum ab hac calamitate, aut potius laniena incolumes fuere: Papiæ Glossarium: Macrobius: Valerius Maximus: Quintilianus: Remigius quidam in Martianum Capellam; Plinii Histor. Natur. quo usus *Dalecampius*, & Bedæ Historia Angl. Deus immortalis quanta jactura hæc! tanto studio tot volumina a Petro Fuxensi Cardinale olim conquista, præter istud rus periisse funditus; de quo merito dixeris, fuit Ilion! A me ergo in ornando Poëta auxilii nihil est quod expectes, nemo hîc fuit unquam cupidus colligendi tales antiquitatis reliquias; unum si exceperis illustrissimum amicum quondam nostrum *Carolus Montchal*, sed eas omnes, extincto illo, mortalium miserrimus, *Fuquetius* summa pecuniae vi sibi compararat, a quo aut illis, qui ejus perditissimis rebus invigilant, qui pauci sunt, nihil huiusmodi rerum expectandum vides. Tanti viri ruinam est quod litterati omnes doleant: nemo enim illo humaniorem experturae erant Musæ. Jamque in fovendis promovendisque litteris totus erat, seque omnibus,

qui

qui Maecenatis gloriam nominis adepti sunt, praestantiorē prae buisset, nisi atrox & perversa fortuna ingens hoc bonum Musis nostris invidisset. Alterum est quod animum meum labefactat, elegantissimi *Pelissonii* jactura altera, quem casum Musae Gallicae lugere satis nequeant. Illarum profecto res agitur, dum *Pelissonii* res agitur, neque non omnino marcescere Parnassia Laurus potest, si flos hic decerpatur. felix, si sub tam decoro tegmine imminens fulmen effugerit, licueritque, coronatorum jure, veterem formulam usurpare, & ὃ μὲ τυπτήσεις, σέφανον έχοντάγε. Se dignam rem ageret Regum potentissimus *Ludovicus*, sibi que Musas omnes mirum quantum conciliaret, si *Pelissonium* illis suum reddet: cujus crimen in nimia solum fortuna, non in scelere aut culpa positum est. Quorsum haec? deliravi fateor imprudens, sed me puto excusabit apud te misratio isthaec, quae me huc adduxit. Ad membranas iterum recurro. De Apulejo & exemplaribus Senecae, quae laudat *Gronovius*, aitque asservari in Bibliotheca Fuxensi, nihil est quod te doceam. aderant forsan illic olim, nunc certe absunt, solaque haec purgamenta, de quibus antea, eorum locum obtinent. Auguror interim feliciorē me *Gudium* nostrum fore, qui dum totus est in pervolvendis codicibus Italis, quibus scatent Bibliothecae, fieri non potest, quin desiderium tuum plane expleat. At mirari satis nequeo, cur ille saepius ad te non scribat. Nam quod ad me attinet, mei penitus memoriam abjecisse existimo, cum a quo Tolosam reliquit, nihil de eo ad me perlatum sit. Quanquam sacramento sese mihi obstrinxerat, continuo me de litterariis suis fortunis certiorē facturum. Ego nihilominus ejus nunquam obliviscar. Sic sum perpaucorum hominum, qui susceptas semel amicitias nunquam renuntiem. de hoc, si ad illum scribas, commonefacias hominem pervelim. Quid superest, clarissime mi *Heinsi*? nihil prorsus, nisi rogare te & obtestari, ut tot tantasque laudes, quas in immerentem me conjicere non cessas, reseces. me certe meae tenuitatis conscium pudore nimio suffundis. Quod si aliquando in meas laudes lubeat excurrere, & temperatae orationis limites transilire, per me licet, modo non a merito nescio quo supposititio & quaesito, sed ab amicitia me solum laudes. Liceat inquam si velis, amantium more ad voluptatem de me tibi somnia fingere; verum hujus rei nolim alios habere testes, quam unum te. Nam quod ultro polliceris nomen meum novis a te laudibus decoratum iri, cum aliquando Ovidianarum lucubrationum tuarum editionem alteram adornabis, exosculor splendida benevolentiae monumenta, sed si tam palato, quam nomini meo favere statueris, abstineas quaeso a magnifico apparatu, quippe phaleras, istas non amo, hoc solum unice optem testatissimum posteritati relinquo, nostrum unam fuisse mentem, unum animum, atque una eadem studia. Sit ergo jubeo unica haec inscriptio, *Bernardo Medonio* egregie amico. Quod ad epistolam spectat, jucundissima erit illa mihi & mirum quantum arridebit, si te solum & Musas referat. Ex omnibus autem rebus, quibus constari potest, saltem istam noli attingere Senatoriam dignitatem, a qua non minus abhorreo, quam a pistrino. Riderent certe hic homines nostri & perbelle riderent, si me hac sparta commendari audirent,

quam nunquam ornaverim. Ego, mi Heinſi, domi me ſic cum Muſis continēo, ut nullos fere unquam admiferim clientes. Quare iterum rogo te & ſerio, deſpecte ſtylum tuum ab hoc ſcopulo, ad quem illideretur maxima pars voluptatis illius, quam e dulciſſimo pignore ſum accepturus. Nec id a me efflagitari modestiae illo praetextu exiſtumes. Nam cum ſerio & ex animi ſententia tecum antea ſemper egerim, nunquam tamen magis, quam nunc a me velim actum putes. Plura non vacat addere ſeſtinae ſcriptioni, cujus ſtylum, ut probe agnoſco, deformavit omnem barbaries Pragmaticorum, a quibus credo me jam nunc oppido revocatum, in eoque ſtatu res meas collocare, ut me totum deinceps tibi Muſiſque reſtituam. Haec dum ſcribo, ictu nescio quiſ pultat fores adeo crebro, ut nuntium mihi aut inſigniter bonum, aut malum afferri autumem. Hui expectato advenis, jucundiſſime *Carteri*, me namque mali metu pene exanimaras: (Is eſt, quem olim noſti in itinere Gallico doctiſſimum medius fidiuſ) ecquid tandem novi advehiſ! felix fauſtumque dubio procul: etiam, inquit, *Paſſeratii* lucubrationum Virgilianarum aliquid apporto, quod illuſtrem amicum tuum N. Heinſium non taedeſcit forſan legere. quidquid ſit iſtud, ſat eſt ſi benevolum animum meum in illum teque oſtendero. Ego viro humaniſſimo quas poſſum ago gratias, acceptoque munere cum anguſtiae temporis introſpicere non ferant, obſignatum mitto. Vale, mea voluptas atque animae dimidia pars meae. XII. Kalend. April. CIOIOCLXIII. Uxor mea tibi plurimam ſalutem impertit & fratres Medoniani. Interim ſi quid inter ſcribendum exciderit, quod delicatulas caſtigatiſſimaſque tuas aures offenderit, ignoſce: non enim vacat relegere.

EPISTOLA DLXXV.

N I C. H E I N S I U S

*Bernardo Medonio.**Teloſam.*

M Irabar quid praeter ſolitum ſileres tanto tempore, Medoni jucundiſſime, & indigne, ne quid diſſimulem, ferebam, voluptatem, quam ex tuiſ alloquiis capere ſoleo longo maximam, mihi intercipi, ignorata taciturnitatis pertinaciſſimae cauſa. Nunc *Chaffanni* viri humaniſſimi amiciſſimique fidem, toties exploratam, in dubium vocabam, nunc in fratrem ejus omnem ſilentii tui culpam convertebam, cujus abſentia fieri, ne meae tibi traderentur, nunc cum valetudine parum proſpera rem Medonio meo eſſe ſuſpicabar, quo timore jam enecatus propemodum, tuas ecce ſuaviſſimas, & oppido quam gratas, *Capelani* noſtri oportuno mehercules beneficio, accepi, quae te mihi amiciſſimum caput, ſalvum ſoſpitemque tandem reddiderunt poſt tantam dilatae ſcriptionis procraftinationem. Imaginem meam toties poſtulatam debere me tamdiu pudet. Habebis illam aliquando, qualem deſideras, cum manus artifex offeretur, quae deſiderio tuo reſpondeat. Interim ſperare te propediem jubeo Muſas Heinſianas iterato edendas, quibus te oblectes. In hiſ ſpectari & placere

cere tibi equidem malo, quam in corporis fluxi ac caduci umbra & nebula. Nam carmina major *inago* Sunt meae, quae mando qualiacunque legas. Maronis membranae complures jam huc adfluxere, per quas divinum poëtam longe castigatiorem proditurum spondeo, quam hactenus circumfertur. Duos praesertim codices, cum pervetustos, tum sinceros admodum integerrimosque *Emericus Bigotius* suppeditavit, quos ex bibliotheca *Jacobi Mentelii* deprompserat. Omnia dum sedulo atque accurate nimis, qua minima, qua maxima in membranis etiam recentibus perpendo atque examino, operosiores in diem curas subnasci video, quam inchoato primum labore eas fore eram mihi pollicitus. Sed vel sic quoque annus hic, ut spero lucubratione omni defungetur feliciter. Bibliothecas vestrates, *Fuxensem* praesertim, tam inanes esse factas in tanta literarum luce, atque in civitate tot praestantium ingeniorum matre, indignor profecto, sed quando ita res est, aequo animo hanc literarum jacturam necesse est feramus, interim est quod mihi gratuler de *Carterii* obvia comitate, qui *Passeratianas* schedas tam benigniter communicarit. Nam quamquam vereor, ne dictata isthaec minoris sint rei, atque adeo excerpta ea esse appareat a studiosis adolescentibus ex ore interpretantis *Passeratii*: nam ipsum libellum properante oculo vix in transcurso delibare mihi hactenus vacavit alibi occupato: constat tamen *Carterio* humanissimo suum apud me beneficium, quod ut ex te intelligat, cum opportunum videbitur, obsecro. *Pelissonii* fortunas merito luges, quem virum ingenii elegantis fuisse audio. Sed audio tantum, nam mihi quidem nullus cum illo necessitudinis in hanc diem usus intercessit. Spero augurorque emersurum esse aliquando ex paedore diuturno *Tulliani* hujus molesti. Videbam nuper inscriptam ejus nomini poëmatis *Lucretiani* novam editionem, quam *Tanaquillus Faber* in publicum dedit *Salmurii*, & mirabar homini literato patronum in vinculis & latomiis fuisse quaerendum, magna cum rei Gallicae invidia, hoc praesertim Rege, qui tantum artium bonarum amorem prae se fert, ut me quoque subobscuri nominis mortalem a munificentia sua non removerit. Hac liberalitate cum alios viros praestantes, tum te etiam in iis, mi *Medoni*, excitandos fore spes est ad instauranda elegantioris literaturae adyta, ne cum clamoso foro vobis in perpetuum res sit, qui ad majora nati estis. *Gudius*, si promissis staret, jam in *Bataviam* advenisse debuit. Nam *Decembri* mense *Florentia* missis ad me litteris spem faciebat, se trienni itinere ante aetatem hanc esse defuncturum. Quamquam ex illo tempore de rebus ejus ne quid quidem cognovisse mihi est datum. Vale, cum tuis omnibus, & salve, vir amicissime. Exarabam *Holmiae* Anno *MDCCCLXXIII*. a. d. *xxviii*. *Sextilis* *Gregoriani*.

EPISTOLA DLXXVI.

BERNARDUS MEDONIUS

*Nic. Heinsio.**Holmiam.*

TUlisti puto humaniter & ut mei amantissimum decebat, intermissionem litterarum mearum, vir Clarissime: tibi que jam abunde satisfactum est, habere contentum reum, quem oppido culpae poeniteat. Silentii causas nolo repetere, aut novas addere, quibus te mihi conciliem, cum per elegantissimam epistolam, quam nudius tertius a te accepi, eximia, ut ita dicam, benevolentia conditam, atque ipsum mel spirantem, dubitare non liceat, quin non omnis isthaec molestia penitus diluta fuerit. Ergo, quod felix faustumque sit, jucundissime mortalium, antiquum commercium, cum summa voluptate conjunctum renovemus; atque ita renovem ut continuo aeternum sit. Nobis illud nullae amplius lites, quantumvis saevae atque inhumanae, intercludant, fervent & frequentissimae sint nostrae epistolae, talisque sit rerum omnium conjunctio, talis vitae ratio, atque officiorum omnium societas, ut uni morti liceat eam impie dirimere. Moriar si te non amem plus ipsissimis oculis, & ni malim quantavis causa cadere, quam charo capiti Heinsio me vel levem aliquam morositate mea molestiam creare. Quamquam fateor novo quodam nomine vehementius amarem nunc te, si te possem amare vehementius, quod mei causa tam animi anxius fueris. Hoc enim pacto certissimo mihi argumento constat, me a te efflicti diligi. Sed nae inficetus plane amicus sum & durus voluptatis artifex, cui tua taedia in deliciis fuerint. Amem te melioribus conditionibus, mi Heinsi, atque utrique nostrum pares amor adferat jucunditates. *Chassannorum* noli in curandis ultro citroque nostris epistolis culpae diligentiam; quas enim illorum fidei credidimus, redditae omnes tibi mihi que fuere. Enimvero utriusque summa est humanitas, singularis in demerendis amicis solertia, & in fovendis sedulitas. de tuo tu periculum in dies facis, ego de meo candide & ex animi sententia pronuntiabo officiorum omnium illo plenior nemo. Sic decet esse virum bonis disciplinis apprime informatum, Patronum elegantem, & juris & aequitatis eximium interpretem. Imaginis tuae toties expetitae noli prae desiderio me diutius languere. Iterum dico, minori hercle conatu saevam quantumvis virginem, ab eo tempore quo te meae urgent preces, ac veluti obsidione cingunt, facilius expugnassem quam te. Neque ideo quod carissimam tabellam habuero, Heinsianas Musas minus desiderabo. Imo vero duplici munere & gaudio beabor. Maronis membranas plures ad te delatas, est quod multum gratuler. Sed indigne fero nostrates Bibliothecas nihil habere hujusmodi gazae: unam si excipiam Ampliff. *Pugetii*, viri, dum vixit, mei amicissimi, ex cujus codice variantes Lectiones, quas brevi mittam, majori qua possum diligentia excutio. Doctissimo *Carterio* meo gra-

gratias egi tuo nomine singulares, qui pro comitate tua ingentis refert. Si tam tuis ille rebus adferre posset adjumenti, quam vellet, quamque te observat, haberes profecto, quo te tam illi, quam ulli mortalium agnosceres debitorem. *Tanaquilli Fabri* Lucretii novam editionem *Petissonio* inscriptam videre nondum contigit, ex quo enim ille de Divino *Daniele Heinsio*, non magis Parente tuo, quam bonarum Artium, male coepit mereri, indignus mihi visus est, qui alicujus esset pretii apud hominem, penes quem aliquis esset sensus humanitatis. Excors & demens sit ille necesse est, qui viri incomparabilis memoriam, tot claris monumentis decoratam, tam longe lateque diffusam non reverenter attigerit. Te vero, mi *Heinsi*, quis erit unquam adeo impudens & scelestus, qui tuam famam audeat laedere, praesertim nunc te postquam Regum maximus *Ludovicus* non muneribus solum auxit, sed & sua dignatus est benevolentia, qua te malim affici, quam inaurari. Ego autem ut primum de isthac beneficentia per illustrem *Capellannum* certior factus sum, dici sane non potest, quam solide tua gavissus sim gaudia. Nam quod me jubes sperare; perbelle ludis me aut temet ipsum, quasi pusilla & minutata virtus quaedam mea ingentis adeo spes animo possit addere. Sat erit mihi fortunarum, Amice, si tibi mortalium politissimo nugae aliquando meae non displicuerint. Ego Regem interea non tam a bellica virtute, civili prudentia, aut regnandi peritia, quae tamen dotes in illo maximae, quam a rara in dignoscendis hominibus sapientia commendabo. Audiet ille apud omnes animorum spectator elegantissimus, tanto consummatae sapientiae edito praejudicio. *Gudius* si promissis stetit, scripsisset ad me saepius ex itinere, meque de rebus litterariis, quod erat ultro pollicitus, commonuisset. Sed ab ejus memoria penitus excidi. Plures epistolas Romam & Florentiam ad ipsum miseram: sed puto aberat, unde omnes interciderunt. Una tamen, quae prima omnium fuit, salva non ita nuper ad me rediit, quae quia continet emendationem quandam *Hippolyti* sui, prima vice, qua tibi res erit cum illo, tuis velim adjungatur. Uxor mea cum Liberis salutem tibi plurimam impertiunt, quorum natu major videre te aliquando mirum in modum gessit. Quid agant viri egregii *Gronovius* tuus, quid *Vossius*, quid *Freinsheimius*, quid *Golius* atque alii seniores, fac quaeso praecise intelligam. Hic adhuc te admonitum velim de imagine, quam nisi a te brevi accepero, illam ab elegantissima sorore tua, quam habet sine dubio domi suae, exposcam, & te puto blandiorem, quae peculiaris faeminarum dos est, exorabo.

Vale, vir mihi instar omnium jucundissime, *Heinsi*, & ama tuum me. I. E.
Eidibus Octobr. Anni Pom. CIOICLXIII.

EPISTOLA DLXXVII.

N I C. H E I N S I U S

*Bernardo Medonio.**Tolosam.*

AD conspectum literarum tuarum, tam amabilium, tam mellitarum, equidem exsilui prae gaudio, mi Medoni, ut minimum jam absit, quin consulto te tacuisse credam per tot menses, quo amorem tui in me excitares, intermisso solitae scriptionis officio. Nam ut elegantes & superbæ in scena formæ ipso contemptu ac fastidio amatores urunt acerrime, ita tu, credo, pro stimulis lentum & pertinax istud silentium adhibuisti, quo vehementius incalescerem, & tamquam ex fomite praeduri filicis illam mihi elicerem. *Chassanorum* fratrum diligentiam ac fidem in curandis ultro citroque literis nostris gratulor mihi quam maxime. Hunc certe, qui nobis publica Regis auctoritate hîc adest, ob eximiam indolis elegantiam & mores suavissimos habeo conjunctissimum. Tu de vestro illo cum paria praedices, non jam miror fratres esse hos sibi perquam similes. Imaginem toties flagitatam, si abs Sorore mea tibi promittis, numquam obtinebis. Fuit enim optima matrona nobis in ipso ætatis flore extincta ante menses hosce septem & denos, & jam parentatum illi per me est, missis non ita nuper ad *Capelanum* nostris Elegiacis versibus, quos *Gronovio* inscripseram. Artificum, in hoc terrarum tractu, qui imagines ad vivum graphice exprimant, magna est infrequentia, quamprimum dabitur pedem ex Septentrione nobis movere, postulatis tuis obtemperabitur, quod æstate proxima confieri posse ominor. Sin annus etiam alter hîc mihi erit exigendus, quod nolum, morem nihilominus desiderii tuis geram, ne quicquam videar denegasse homini in omnibus mihi hætenus immane quantum gratificato. In codice Maronis Pugetiano excutiendo ne te fatiges obsecro: cum & ipse membranas divi poëtae jam complures evolverim, & vix quicquam subsidii inde sit expectandum, nisi a manu pervetusta commendentur codices. Observationes meas ante æstatem proximam praelo typographico subjiciendas fore mihi promitto. Si quid auxilii exinde ab amicorum opera accesserit, id curis destinabitur secundis. Nunc enim otium non est accurate omnia percensendi. Venient fortassis oportuniora tempora, quorum beneficio Musis solide litem, quas nunc vix in transcurfu venerari aliud agendo conceditur.

Me, si fata meis paterentur ducere vitam

Auspiciis, & sponte mea componere curas,

vitam sectarer solitariam, & a solo literarum amore laudem captarem ac applausum, quod nunc non possum,

Nec

*Nec patiens corpus, nec mens satis apta labori,
Sollicitaeque fugax ambitionis erat.
Et petere Aoniae suadebant tuta sorores:
Otia, judicio semper amata meo.*

Sed vide, ne Horatianum illud mihi reponas *Optat ephippia bos*, novisti reliqua. De *Ludovico* Decimo quarto Galliarum Rege incomparabili, sic res est, ut dicis. Vergebat in profundam ac caecam noctem literarum splendor omnis, nisi ille fataliter obtigisset artibus, stator ac vindex scientiarum unicus. Quo facto feliciter, si quis alius, id est consecutus, ut, cum praeter hoc complura gesserit immortalitate dignissima, immortalitatem, quam demeruit ac fovendo suam fecit, rebus praeclare abs se gestis polliceri jure optimo possit. Sed ista non sunt hujus loci. *Gudium* rediisse ad Belgas Amstelodamo ad me scribitur. *Gronovius* in Livio ac Plauto recensendis occupatur. *Schefferus*, qui Ubsaliae literas humaniores profitetur, Mauricii & Arriani *Tactica* haecenus inedita, tum commentarios de Italica secta Pythagoreae Philosophiae suos praelo subjecit. *Vossius* totus ex Philologo Philosophus est factus: *Golium* aut otuari aut nihil agere existimo. *Freinshemius* e vivis jam pridem excessit. Tu vale, Medoni suavissime, & ut ego quoque valeam, me ama. Holmiae Suecor. CXCICLXIII. a. d. XXI. Novembr.

EPISTOLA DLXXVIII.

BERNARDUS MEDONIUS

Nic. Heinsio.

Holmiam.

A Mabiles & mellitas esse meas epistolas perperam in tuis ad me nuper exaratis pronuntiasti, vir amantissime; & nisi me a te medullitus amari perspectissimum haberem mille nominibus, facile eo adducerer, ut crederem, sub isto tuo melle latere amarulentos aculeos. Ego merito quidem tuas non mellitas solum dixero, sed & ipsam *μελιχρὴν σμηνოდόχου χάριτα*: adeo enim erant elegantes, adeo venustae & suaves, ut omne meum mel prae illarum dulcedine plane ace scat: quamquam minus dulces propterea videbantur, quod Sororis spectatissimae funeris acerbitas huic melli fellis multum permiscuisset. Dii boni quam misera est rerum humanarum conditio! ut nulla unquam sit omnibus numeris absoluta voluptas; nullum gaudium quod non aliqua subito excipiat calamitas. Equidem in illam spem omnem tabellae contuleram, mihique istud gratiae ab ejus humanitate pollicebar; At proh dolor ejus occasu spes omnes meas sentio misere evanescere. Quid enim spei in te mihi reliquum esse potest? qui quaesito toties praetextu, causatus modo tuam modestiam, modo Pictorum raritatem hanc deluseris. Aliquot anni sunt, si bene numerem, Vir egregie, bene quos numeramus amantes, ex quo te precibus continuis frustra urgeo, meque hujus rei desiderio, sine ullo amicitiae nostrae respectu

Tom. V.

Pppp

finis

finis macerare, Et mirum in modum obdurefcis! Dirigere nunc si velis in fili-
cem, per me licet. Nec enim spem infinitam persequi vel illius est, quem
amor ingens urat, sed potius amentis, quem furor agat. ad alia igitur me re-
voco. Virgilii manu exarati varias lectiones accepisses a me jamdiu, nisi fae-
va quaedam & pertinax negotiorum pestis, quae in me sensum omnem huma-
nitatis quasi extinxerat, ab hac sparta invitum avocasset. ô quoties tunc Strep-
siadis mutuatus verba.

— — — — — ἰς ἰς!

ὦ Ζεῦ βασιλεῦ, τὸ χρῆμα τῶν νυκτῶν ἴσον

Ἀπέρατον; εἰδὲ πᾶσι ἡμέρα γενήσεται;

& rursus;

Ἀπόλοιτο δ᾽ ἢ τ᾽ ὧ πόλιν με πολλῶν ἔνεκα

Liceat namque mihi lites & fori rabiem bellum dicere, eo magis atrox & im-
mane, quod non manibus & lacertis, sed mala mente & malis artibus bellatur, a
quibus, verbo absit invidia, penitus immunis sum. Tuas in Virgilium observa-
tiones mira legendi teneor cupiditate; incredibile quippe est, quam eximius
mihi videris notarum artifex; dum illa solum in medium profers, quae sine
sensus iactura abesse non possunt. Apage libellarios istos, quos vocant Com-
mentatores, qui farragini tantum indulgent, qua enormiter tumeant, & quo-
rum gloria in eo tota poni videtur, ut non moveantur e loco absque machina.
Rerum indigestarum mole brachia fatigent illi; praestat ingenii succo, ut so-
les, nectaris instar lectorum animos perfundere. *Gudium* nostrum optatos Pa-
triae fines repetiisse laetor eo vehementius, quod in tam tenui valetudine ve-
rebar, ne quid apud exteros humanitus ei contingeret. taederet profecto me
multam iniisse cum illo amicitiam, qua frui diutius non liceret. Philologiam
cum Philosophia commutasse *Vossium* mirari satis non possum, cum hujusmodi
mutationes nunquam, aut raro fiant. Otiatur *Goliis* non sine magno litera-
riae Reipublicae detrimento, praecipue Lingarum Orientalium, quem illac
hac aetate unicum fidum habent interpretem. Quae de Petronio ad praestan-
tissimum virum *Capellanium* nostrum non semel scripsisti, ejus mihi beneficio
innotuere: adhuc tamen abs te ipso pervelim de re tota plurimis verbis certior
fieri. Emergisse integrum primum inaudivi, dehinc pro parte, denuo integrum
ab amico Romae degenti accepi. Quam ob rem si quid indubitatae fidei
ad te pervenerit, quamprimum quaeso fortunae istius fac me participem.
Quid agitur in Repub. Literarum, in qua primas tenes & ego miser exulo; si
per Aulicas occupationes liceat, aliquid imperti. A me vero rerum novarum
nihil est, quod expectes. Solitudo ante ostium. Uxor, quae te solito affectu
salvere jubet, sexta prole mascula jam jam aucta est. Vale, & me ama ut ego
te. Tolosae 16. Kalend. April. CIOIOCLXIV.

EPISTOLA DLXXIX.

NIC. HEINSIUS

*Bernardo. Medonio**Tolosam.*

V Ideo urgeri a te propositum de imagine mea vivis expressa coloribus, quam tui juris esse cupias, Medoni jucundissime. Indignaris etiam spes & postulata tua differri, aut, ut tu loqui amas, deludi tanto tempore, tibi-que ad easdem preces toties nequicquam recurrendum esse querebaris flagitator sic fatis fervidus. Rem, fateor, exigis nec factu arduam, nec repelli meritam: cum ipse molestias majores longe animo jam ceperis, tibi-que ultro adsper-feris nictum in spem gratiae. Equidem amo te & observo, mi Medoni, ut me ipsum haud magis aut impensius possim. Quod tunc demum falso a me jactari censeas atque arbitreris licet, cum mihi me dedisse liquido cognosces, quod a te frustra haecenus postulatur. Imaginem meam nec ostentare possum ipse, nec amicorum quisquam. Quod invidia omni repulsam, ni fallor, ab-unde exoneraret, si desideriis tuis aurem obstruxissem, nec precibus locum darem. Noli negatum putare, quod nondum impetratum est. Credebam rem esse nihili, quam poscebas. Vide sodes, ne tu me arrogantem aut super-bum reddas, neve ego plurimi apud me ipsum fiam, postquam iconem, hoc est umbram mei inanem, votis tam ardentibus scitaris. At ego stultus munifi- centiae meae nil addi opinabar posse, ex quo me totum dedicaram, ac devo- veram tibi. Nihil fatiare te poterit, si hoc non potest. *ἔκτυπον* tenere mei desideras, cum diu sit quod *ἀρχέτυπον* possideas in oculis tuis. Aliquid sal- tem mearum facultatum relinquo mihi par est: ne post asellum etiam diariis carendum sit amico tuo, neve prorsus sordere tibi incipiam, ubi me totum dispoliaris. Dum superest, quod auferre possis, optime, ut spero, mihi te- cum conveniet. I nunc stomachare, quod deluderis: dum mihi sit, quo hanc tuam iracundiam placem mitigemque, cum ex re erit. Sed ut missis nugarum ambagibus serio tecum agam, quod velle te reor, certo persua- sum habe, nemini copiam imaginis meae fore, nisi te votorum compote jam facto. Si post annum hunc volventem exactum mora diuturnior hîc locorum mihi erit trahenda, quod nolim, parebo obsequarque mandato tuo, uti ho- minem longe tui amantissimum decet, nec committam, ut de repulsa deque ingenio meo inexorabili quicquam conqueraris. Nunc tuis desideriis obtem- perari a me finge. Annus ad minimum abierit, priusquam tabula ad te perfe- ratur. Quid quod ne sic quidem graphice atque examussim ad vivum expri- mendam fore polliceri possum, cum pictores in Septentrione vix invenias, qui supra plebejam laudem extolli mereantur. In Maronis exemplaribus discu- tiendis desudari a te nolim, nisi vetusta admodum tibi se sistant, ne & operam tuam ludas, & mihi pro thesauro, carbonem offerantur. Ingens quippe copia

codicum Virgilianorum in priscis bibliothecis passim occurrit. nec pauci jam a me inspecti sunt: si continget aliquando ea terrarum perlustrare spatia, in quibus uber hujus messis proventus est, curis secundis lucubrationes nostras percensebo. Tanti nempe & a me fit, & ab omnibus faciendus est scriptor divinus, ut satis operae in illo exornando navari haud possit. Nunc abunde laudis consecutum rebor, si nonnihil a me addetur novarum observationum, post horum curas & diligentiam, qui ante me hanc susceperere provinciam. De *Gudio* quod nunciem nihil est in promptu nunc mihi, cum & ipse rerum suarum jamdudum ignarum esse me patiatur; nec quo fortunae ejus aut Musae sint loco per alios satis accurate sim factus certior. Lugduni Batavorum sedem ab illo esse fixam, ubi *Gronovio* assiduus adhaereat, & in *Phaedri* editione nova concinnanda occupetur, rumores spargunt. *Petronii* fragmentum tanto tempore desideratum prodiit tandem, si tamen *Petronii* foetus est. Vidi libellum, sed in transcurso tantum, & aliud agens. Eum amici *Ubsalienses* abstulere, dum in publicis negotiis occupabar totus, mox ad me reversurum polliciti. Cum fidem datam praestabunt, omnia majore cura pervolvam. Nihil illic, quod ad *Trimalcionis* coenam non spectet, quam operis *Petroniani* partem admodum exiguum fuisse sum certus. Hic terrarum litteras jacere ac negligi si dixerò, nil dixerò aut novi aut mirum quod videri tibi debeat. Prohibunt tamen ex *Ubsaliensi* Academia propediem studio *Johannis Schefferi* haecenus inedita *Mauricii* & *Arriani* *Tactica*, cum ejusdem commentario de *Italica Pythagoreorum Philosophia*, praeter haec *Martinus Brunnerus* *Moerin Atticistam* itidem luce haecenus fraudatum dabit, una cum *Attico* vocabulario *Thomae Magistri*, quod typis Romanis ac *Parisinis* saeculo proxime decurso est publicatum. Tu, qui in *Galliis*, hoc est in ipso *Parnasso*, aetatem agis, quin luculentiora hujus argumenti nunciare possis non est dubitandum. Hoc igitur age, &, si me solide demereri cupis, frequenter scribe. Uxori lectissimae liberisque plurimam salutem impertire meis verbis quaeso. Salveant & caeteri amici. Tu vale, mi *Medoni*. Exarabam *Holmiae Suec.* MDCLXIV. a. d. XXI. Junii Gregor.

EPISTOLA DLXXX.

N I C. H E I N S I U S.

*Bernardo. Medonio.**Tolosans.*

EA tuorum erga me meritorum est in me moles, is numerus, *Medoni* jucundissime, ut nusquam oculos in Museo meo convertam, quin aliquod luculentae benignitatis pignus confestim illic occurrat abs te homine officiosissimo, & ad me demerendum unice nato. Vel nuper in excutiendis *Virgilii* membranis, quos labores meae in spem gratiae exantlasti! quam devorasti molestiam? Quo magis partium mearum erat, debitam gratiarum actionem promag-

magno beneficio nequaquam distulisse: quod alterum nunc factum non sine praesentissimo rubore meo videmus. Sed post exortas nuper inter populares meos & gentem Britannicam contentiones maximas &, quantum apparet, in apertum bellum jam nunc erupturas, adeo illic ex mandato publico occupatus fui, dum cavetur, ne Sueci in partes adversarias pertrahantur, ut privata omnia coactus sim ponere; etsi nunquam deest hîc terrarum quod agam. Innatae igitur tibi comitatis est non succensere contententi reo, praesertim cum nil deliquerim, quod mea cum culpâ sit conjunctum. Claudianus meus editionis iteratae cum prodiisset nuper in publicum, inter exemplaria hujus voluminis complura ad amicos in Gallias missa unum tibi a me destinatum est; cujus curandi laborem ac molestiam *Emericus Bigotius* in se recepit vir, ut nosti, nostrum utriusque studiosissimus. Quamquam in isto foetu juvenili nil occurrat, quod eruditioni tuae prosit, aut oculos tam sagaces subire mereatur. Dandum nihilominus amicitiae nostrae sum ratus, ne quid quisquiliarum mearum te lateret, quem in oculis assiduum fero. In Marone quae observavi, jam ad finem perducta sunt propemodum, & praelo typographico tantum non parata: nisi quod eas cogitationes importune admodum abrupit Mars Britannicus. Unde & factum est, ne attentiori cura haecenus potuerim percensere, quae in hanc operam benigniter nimis a te collocata sunt. Quod unum possum inter has negotiorum constitutus angustias, curae mihi erit, ut hic annus, quem modo auspicati sumus, poematis meis rem litterariam donet: nisi pergit editionem libelli procrastinare typographus. *Tactica* Arriani & *Mauricii* haecenus inedita *Schefferus* noster nuper admodum in lucem emisit, post publico permissum de dogmate Pythagorico commentarium. Praeter hoc unum, quod nunciare rerum novarum possim nihil nunc occurrit, *Gudium* ad foederatos Belgas jamdudum rediisse audio, quod ex illo ipso cognovisse malletm. De Ovidianis membranis noli sollicitus esse, nisi pervetustae sint, & supra plebejos codices aliquid promittant, ut alias non semel monui. Vale, mi optime Medoni. Exarabantur Holmiae Suecorum Anno MDCLXV: Eidibus Februar.

EPISTOLA DLXXXI.

N I C. H E I N S I U S.

*Bernardo. Medonio.**Tolosam.*

PRO excerptis codicis Maronis diu est, quod gratias agebam, Medoni jucundissime, nec tamen eximiis tuis in me meritis ulla ex parte aequandas aut pares. Misi & per *Bigotium* Claudiani recens editi exemplar, quod jam ante annum ad te perferri debuit. Nunc novam poematum meorum editionem ab optimo *Capelano* accipies. Unde colligas rerum tuarum studium mihi, etsi inter molestissimas occupationes agitato, constanter inhaerere. Imaginem

P p p p 3

meam

toties tibi promissam deberi jam pridem & post longissimas procrastinationes praestandam esse tandem aliquando probe memini. Sed speravi ego jam ante biennium fore, ut liceret mihi aut pedem non rediturum hinc movere, aut saltem in patriam excurrere, ubi & majorem artificum esse, quam hîc terrarum, copiam minime puto ignoras, & occasionem magis oportunitatem ad te mittendi, si quid vellem. Sed avertit me ac avocavit penitus a proposita via bellum atrocissimum, quod nos cum Britannis denuo collisit. Unde factum est, ut non nisi praesentissimo cum rei publicae detrimento me hinc fuerim prorepturus, Suecis praesertim res novas molientibus, & in partes Britannicas utcumque propensis. Est autem mihi haec solitudo & aliis multis nominibus permolesta, & hoc inprimis nomine, quod desideriis tuis juxta ac fidei a me datae deesse tanto cogor tempore. Nam si affectum tibi devotum mora temporis refrixisse arbitraris immerentem neglecti officii insimulas. De rebus tuis nonnihil aveo doceri. Tu hîc mihi gratificare, quaeso, & amantem ama. Vale, suavissime Medoni. Holmiae Suecorum Anno *ciciciclxvi*, a. d. v. Nonas Septembres Gregorianas.

EPISTOLA DLXXXII.

BERNARDUS MEDONIUS

Nic. Heinsio.

Holmiam.

ETSI innumerae sunt causae, vir clarissime, quibus tam diuturnum meum silentium merito purgare possim, ex his tamen vel aliquam nolo hîc in medium afferre. Nam cum amor in me tuo plus semper confusus sim, quam aut ullis officiis, aut rationibus meis, malo culpae omnem veniam (si culpa est quae animi vitio caret) singulari benevolentiae tuae debere, quam ulli quantumvis legitimae aut idoneae excusationi. Facerem id equidem cum summo studio & arte, si crederem me minus a te amari quam in dies experior, sique ego te minus observarem, & te non medullitus diligerem. Causarer tum morbi pertinaciam tum lites multas, quibus ad hunc usque diem adeo fui obrutus, ut ab humanarum literarum non solum; sed etiam ab ipsius omnis humanitatis commercio atque amicorum consuetudine abstinere penitus me mihi necesse fuerit. Verum quî fieri potuisset, ut in ea corporis animique carnificina Musas voluptatum omnium artifices tractarem, Musas inquam nostras tam jucundas, tam teneras, tam amabiles. Non ego certe ille sum, mi Heinsi, in quo a natura sibi adeo invicem contrariae lites & literae conveniant. Unde fit ut continuis votis ac precibus caelos compellem & Numina, me a forensibus negotiis revocent, meque sinant ad otium literarium perfergere, cui me totum ab ineunte aetate reservasse temere, ut quidem experior nunc, auguratus eram antea. O fori Rabularum stirpem invisam, & fatis contraria nostris eorum facta moresque! quibus adhuc diu nimium infelix, a quibus vitae omnis honestas, gratiae, lepores venerisque aeternum exulant. Te vero mortalium felicissimum, qui,
cum

cum magno ingenio & doctrina polleas, etiam otio studioque abundes; summaque animi tranquillitate te cum Musis oblectare potes, ut lubet. Quod si ab earum latere aut consuetudine interdum divelleris, sine tamen dispendio fit aut voluptatis aut gloriae tuae: tunc namque (quando Reipublicae causa id accidit) tibi tuaeque tranquillitati aut Musis quidquid deest cum optimo damno & divite, ut ita dicam, jactura, cumulate compensatur. Ac proinde si saepe minus nomen Heinſianum nostri veteres authores in fronte praeferant, neque tuorum operum tam frequentia cudantur volumina, quam tu forſan & omnes literarum cultores velint, eſt proſecto crede mihi, quod te mirum quantum ſoletur, in Actis foederatorum Ordinum ac Regum ſaepe ſaepius referri, ac decoris titulis commendari. Magnum quidem eſt literarum decus, magna ornamenta, ſed nihil comparari poteſt cum illa gloria, quam pariunt curae, officia, vigiliaeque, quae pro ſalute Reipublicae inſumuntur. Quo nomine apud eos, qui nobis Deorum inſtar ſunt, jam adeo optime meritus es, ut earum amicitias tibi deviceris, quibus Musae ipſae noſtrae, quas Regias fingimus, ancillantur. Perge ergo, vir egregie, quo coepiſti pede, & iſdem veſtigiis inſiſte ad honorum gradus. Metire quidem ſplendida literarum ſpatia, verſus fundere Auguſtaea aetate dignos non ceſſa, optimorum Authorum lucubrationibus augere lucem tua claritate nominis, reconditae antiquitatis monimenta ſedulo eruere, inedita poſteritati transmittere, quae omnia admirabili ingenio & induſtria rara in dies praefas: verum contende magis ac magis totis nervis ac viribus Rempublicam tueri conſiliis, ope, & diligentia, populis pacem & felicitatem parere, partam augere, atque omnibus munire praefidiis. Solida iſthaec eſt gloria medius fidius, quae e ſalute civium ac familiarum emergit atque una viget. Relinque nobis quaefo cum blattis & tineis pugnare, & in caeno corruptorum codicum volutari, te certe majora expectant & Heinſiano nomine mage digna. Hiſtoria noſtrorum temporum jam jam geſtit referre tua in Rempublicam ſtudia, & Heinſiana laude fulgere. Huic te praebe materiam laudum uberem & immenſam. Huic inquam imaginem tuam inſere, quam miretur poſteritas egregia virtutis tuae nativa pulchritudine inſignem. quod poſtquam contigerit, ut quidem aequum eſt & praeclara tua facinora poſtulant, res erit certe mihi uſque adeo grata & jocunda, ut verba deſint ori, quibus voluptatem quantam inde percepturus ſim explicem. Nolim tamen propterea, quod te ſuis verborum coloribus deſcriptura ſit Hiſtoria, virtutis cuſtos, carere ea delineatione, quae Piſtorum arte fit, qua me beare toties a multis jam annis pollicitus es: volunt quippe oculi mei, dum te ſuo mens modo intuebitur, habere ſe coram, quo te ſuo etiam more intueantur. Sic ego multis imaginibus me mirum in modum oblectabo, mihiſque videbor integrum te quaſi pacto tenere, te amplecti, tecum eſſe, aut ſaltem minus a te abeſſe in tanto locorum intervallo, quo aegre ſejungimur. Caeterum aberiſne diutius a Patriae finibus, & te Amſtelodamum nunquam amplius repetet? Utinam eſſes in vicinia cariſſimum caput, ſpei forſan aliquid eluceret mihi te poſſe aliquando inviſere, & rerum mearum ſors, quae me cito forſan Lutetiam adducet,

cet, faceret ut tui ergo me Amstelodamum deferrem. Non enim aliter videre te unquam sperare licet, alioquin actum esset de uxore suavissima, quae sciens prudens nunquam pateretur (sic me plus oculis diligit) in exteras regiones progredi, sine summo vitae suae taedio. Vides, mi Heinsi, quam durum istiusmodi jugum est, etsi parit tantum voluptatis & solatii, eo mihi profecto durum, praecipue quod a nobis abes tu, qui si adesses coram, nihil esset amplius quod cuperem. Conabor tamen huic malo mederi utcunque potero jucundissima lectione novae editionis tuorum poematum & commentariorum in Claudianum, quae habeo jam jam prae manibus tuo beneficio & cura nobilissimi *Bigotii*, qui inde occasionem arripuit liberaliter plane testificandi mihi non vulgare suum in me studium. Sciebam illum virum esse magni nominis & eruditionis, ejusque famam omnium testimonio claram totum orbem peragrassse. & ego illum amabam & observabam plurimum, nullus tamen aditus ad ejus familiaritatem mihi hucusque patuerat. Optato igitur contigit me a tanto viro compellari, quem officiis bene multis provocare paraveram. Sed cum istud gratiae non meis, sed tuis meritis debere me ingenue fatear & agnoscam, recipere illam quaeso referendam, hoc pacto egregii viri humanitatem, quam in me edidit, demereri solum potis sum. Quare cum ad eum scribes, insinua rogo te totum me penitus in ejus animum, ut ad summam benevolentiam perveniat nostra necessitudo, illam certe omnibus modis & tueri & ornare non desinam, inque ejus commodis augendis, si facultas detur, nunquam mihi deerit constans voluntas. Quid rerum geratur in Republica literaria fac intelligam, nam illum latere nihil quidquam potest, ad quem omnes literarum Principatum deferunt, & e cujus existimatione eorum tota pendet fama ingenii & laborum gloria. Quid agant *Gronovius*, *Vossius*, *Goliuss*, *Gudius* & alii nostri Semones, summa teneor sciendi cupiditate. Equidem multum vereor, ne in vicinia positi milites nostri eorum laboribus officiant. Aeternum felix sit Regum omnium maximus *Ludovicus*, equidem vehementer optem, Hispanos, debellet, frangat, & conterat, nolim tamen id unquam fore cum aliquo vestrorum ordinum damno & Athenarum Batavarum dedecore, ex quibus in caeteras orbis partes tanta cum dignitate Musae nostrae dominantur. Stet hinc aeternum earum sedes unica & avertant numina tam grande nefas, ut ne belli terrores & Martis horrenda tormenta gratissimos tenerarum Virginum cantus & dulce melos miserabiliter praecludant. Sane tanti & tam ingentes bellorum apparatus interdum curas & cogitationes meas aegre admodum exercent, neque possum non timere Musis nostris, incertus, quorsum haec evadant. Plura non habeo, quibus te diutius alloquar, solum unum restat te etiam atque etiam enixe rogitum, me continuo ames, qui te solide & efficitim amo. Salutem tibi plurimam impertit mea uxor, & *Janus Dominicus* meae deliciae, qui te prope diem propriis verbis ac stylo provocabit, ut se diligas. quatuordecim annos natus Graecis literis satis jam est instructus, a quibus incepit; nunc Latinis sedulo operam dat, seque brevi ad iter Hollandicum, ut a vestris Professoribus & linguis Orientalibus & variis scientiis, quae hinc apud nos perbelle frigent, cumu-

cumulate exornetur, comparabit. Vale, vir amantissime, & hanc valetudinem, quae mea mihi carior est, omnibus modis serva incolumem. De rebus tuis quamprimum certiore me fac, & amplissimo viro D. *Arnoldo Pomponio* Regis Christianissimi legato eximio, Clariss. *Arnoldii Andilii* summe amici mei filio, lectissimis verbis tuis meo nomine salutem jubeo dicas, & *Baricio* ejus Eleemosinario, viro merito nasci Apostolorum temporibus, qui sic illorum virtutes & praeclara facta emuletur in omnibus ac graphice exprimat. Iterum vale, meum decus, mea vita, meum mel: inornatae & impolitae scriptioni ignosce. Tolosa Holmiam Nonis Junii Anni Dom. *MDCLXVII*. Haec dum obfigno, ecce intervenit, & manum cohibet *Jacobus Maranus* antecessor hujus Acad. illustris, *Guilielmi* quondam illius viri adeo eximii nepos, qui cum propria maxime & derivata in se gloria fulgeat, ac proinde non possit non valde observare sui simillimos, vult peramanter te salutatum suo nomine & rogatum ut se in eorum album referas, qui tui nominis studiosissimi sunt. Hunc complectere, quaeso, quem in oculis fero.

EPISTOLA DLXXXIII.

BERNARDUS MEDONIUS

Nic. Heinso.

Amstelodamum.

Imagine, quae veri oris tui speciem mihi referret, carere diutius post tot tantasque meas praeces & dilationes tuas, vir Clarissime, plane non possum non fateri me aegre molesteque diu admodum tulisse. Ultro etiam est quod fatear, sic sum candidus & liberalis, hujus acerba expectatione saepius eo adductum fuisse, ut crederem, de tam eximio illo tuo affectu, non sine summo meo dedecore multum te remisisse. Non enim arbitrabar, quod in hoc desideriis meis non satisfaceres, ullum tibi esse locum excusationis; & dum haec mecum tacitus perpendo, parum abest, vir amantissime, quin inplacabili ira animus meus alioquin placidissimus penitus totus exardeat. Et hercle quinque aut sex annorum taedio victus, ac sic sui merito impotens, exarsisset, nisi me singulare ac summum studium, quo te nemo sic diligit, ad mentis tranquillitatem revocasset. Minime certe necessitudini nostrae conveniebant a tua modestia quaesitae illae rationes, quibus me rogantem repelleres. Una tantum potuit esse alicujus ponderis, quae pictorum raritate nitebatur. Et jam facile crediderim difficillimum esse, sub tam aspero caelo, sub quo tunc versabaris, inveniri pictores hujusmodi, qui vultus hominum vivis ac nativis coloribus expriment, propterea quod illa arte, quae sola absentium amicorum & amantium curas solari potest, praestare omnibus nobis solis datum est, qui amicitiiis, amoribus, & officiis caeteras omnes nationes antecellimus. Haec ipsa profecto causa unica fuit, resque per se patet, hujus procrastinationis: quando gratiae tantum indulgere mihi, ex quo molle solum repetiisti, nec amantius nec diligentius potuisti. O me igitur mortalium felicissimum, & plane votorum om-

Tom. V.

Qqq

nium

nium compotem! qui charissimum eximii amoris pignus, nunc tandem manibus tractem, nunc exosculer. Et ô egregiam artem! cujus beneficio imposte-
 rum licebit, te non solum animo altius, sed etiam oculis vel absentem con-
 templari. Nunc quoque ergo dabitur voluptates jucunditatesque vitae omnes
 meae, quae in uno te sitae sunt, taedio pulsas reducere. Nasonem vero Te pi-
 ctorum omnium excellentissimum ac facile principem est etiam quod laudibus
 ad caelos eveham; qui tanta industria effeceris, ut in tua elegantissima tabella
 totus vivat ac spiret Heinsius meus, sicque ego & felicius vivam & liberius
 spirem imposte-
 rum. Utrumque enim adimunt magna desideria. Sed quam
 timeo, ne illa postquam paulo remissius mecum egerit, novus ardor incendat
 animum, qui in hunc veteres curas ingerat, nihilque illum explere possit,
 quam te ipsum videre; dulces tuos in amplexus ruere, deque ore tuo pen-
 dere denique. tunc certe advolabo ad te, & omnes obices, quos res dome-
 stica & uxor haecenus molita est, soivam. Quod sane crediderim aliquando
 eventurum, si me solum audiam. Talis nunc tenet, quam ex fama nominis
 tui concepit merito, cupiditas clarissimum virum *Julianum Hericurtium*, quo-
 cum mihi summa necessitudo inita est, ex quo Regis negotia hîc procu-
 rat, is ultro fidem dedit, viae comitem fore cum me ad te conferam, post-
 quam Regio munere functus erit: Hunc mirum est, quam tibi devicerint blan-
 dulae Musae tuae, vir Clarissime, quas nunquam finit abire e suis manibus; sic-
 que ardet de te bene mereri omni officiorum genere, inque tuam benevolen-
 tiam sese insinuare, ut facile ei author fuerim, in tam magno desiderio, tuam
 gratiam ambiret suis epistolis. vir hercle dignus est tuo studio & obliervantia,
 qui antiqua nobilitate stirpis, magno ingenio, summa & varia eruditione, &
 quod praecipuum est apud te, eximia virtute, ac morum suavitate pollet.
 Sponsor tibi sum & nunc maxime idoneus, neminem esse illo in demerendis
 amicis magis idoneum. Si quis ergo locus est reliquus in albo amicorum tuo-
 rum, hunc sinas occupet *Hericurtius* meus, tenebit certe illum non sine dig-
 nitate & gloria: quod si per te liceat & hoc beneficio illum beaveris, res erit
 mihi tam grata quam quae gratissima. Prudentium interea ex recensione tua
 quamprimum expecto. authorem hunc valde olim amavi, nunc magis amabo,
 quum illustrationibus tuis ornatus prodierit. Hunc statim Virgilius sequatur,
 postquam e Typographorum manibus excefferit. Hanc spartam ornare nun-
 quam desinas velim, vir Clarissime, qui veteres authores solus edere potes lu-
 culentissime. Hoc age atque his insiste vestigiis ad aeternitatem, meque tuis
 muneribus cumulatum decorare. Scripta omnia *Gronovii* magna cum volup-
 tate lego. Est enim vir tum acerrimi judicii: tum summae eruditionis & styli
 perquam elegantis. Verum tarde adeo deferuntur ad nos, quae in Batavia veltra
 cuduntur, ut intolerabile sit, tantam voluptatem retardari. Praestantissimum
Golium ad plures abiisse perae-
 gre fero & feram diu. ex tanti viri jactura innu-
 meras habet doloris causas literaria Respublica. Illustrissimi *Graevii* Hesio-
 dum jam nunc ad me deferendum curavit *Menagius* noster, de quo eximio mu-
 nere per epistolas gratias nunc quoque magnas agerem, nisi ab hoc officio,

plu-

plurimis negotiis, quae non licet in aliud deferre tempus, penitus sic distraherer, ut uno verbo hîc illum tantum vacet salutare. Homerum cum Scholiaste ab ipso adornatum videre gestio. *Janus Dominicus Medonius* deliciae meae, finas quaeso te suis verbis compellet. Hunc amo egregie ea condicione, ut te aeque amet ac me, sicque instituo, ut tantum tolat ac veneretur, quos virtus ac gloria commendat. Seque ad hujusmodi exemplaria ignosce effingat. Clarissimus vir *Ranchinus*, qui jam jam huc advenit, cum ad obsignandam hanc epistolam me comparo, verbis officiosissimis tibi plurimam salutem impertit. Emoriar, nisi illum medullitus diligas, si innumeras maximi ejus ingenii atque animi dotes aeque nosceres ac ejus humanitatem liberalitatemque, quam olim expertus est Ovidius noster. adhuc paucis te volo, ut te moneam nempe, si iterum in Sueciam tibi adornandum est iter, mecum statuas ac circumspicias diligenter, cujusnam fidei committendae erunt nostrae epistolae. Vale, meum decus & pessimae scriptioni ignosce, quam non vacat expolire. Salutem plurimam tibi dicit uxor mea. Tolosae Eidibus Aprilis Anni MDCLXVIII.

EPISTOLA DLXXXIV.

JOANNES BAPTISTA LANTINUS

Nic. Heinſio.

Lutetiam.

M*Enetrerii*, popularis mei, librum ad te pervenisse jampridem intellexeram. Mex iis litteris, quas ad me superiore anno dedisti, tum etiam ex Claudiano tuo elegantissimo, quo quidquid id erat munusculi, longe impari compensatione remuneratum voluisti. Pro quo cum agere tibi gratias & deberem & vellem maximas, quo minus id facerem deterritus fui variis curis ac negotiis, quae ab amicis nostris, qui sunt Lutetiae, scire potuisti, ac eo praecipue, quod vererem, ne aberrarent meae litterae, si ad te scriberem, qui primo quoque tempore Suecia in patriam rediturus, atque hinc subito in Italiam profecturus dicereris. Verum postremis tuis litteris, quibus certior factus sum adventus in Galliam tui, commodior oblata mihi est ad te scribendi facultas. Imo & propemodum facta spes est videndi tui ac coram compellandi. Quamvis enim, qui te huc solum allicere posse videntur, Manuscripti Codices Ovidii, quibus usus est olum *Ἰνὸν ὁ μαναιῆς*, summa cura & studio perquisiti, diligentiam meam, & amicorum, quos nihil ejusmodi, siquid esset, latere posset, effugerint, audivi tamen servari in bibliotheca Monasterii Cisterciensis, quod abest ab hac urbe paucis miliaribus, codicem unum Ovidii, unum item Claudiani, eosque non malae notae. Quorum inspiciendorum, si tanti id ducis, tibi copia non deerit, nec ideo multum a via deflectendum erit, cum ea, quae Lutetia Lugdunum itur, per Burgundiam & commodior habeatur, nec unius diculae itinere longior, illud te rogo, si ad nos venturus es, cura ut id sciam prius. Interim sic habe, multum me tibi devinctum muneribus tuis (quamvis de carmine panegyrico quod ad me miseras, solum ex litteris tuis intellexerim,

Qqqq 2

quae

quae me non solum movent pretio & elegantia sua, sed praecipue quod sint animi erga me tui indicia & amicitiae nostrae pignora, quae mihi est eritque semper carissima. Plurimum te salvere jubet *Claudius Morizotus*. Quidam ex amicis rogavit me, ut a te sciscitarer, an vir praestantissimus Parens tuus promissas olim lucubrationes, quibus titulus *Dissertationes Platonicae*, & *Aristarchus de disciplinis veterum*, absolverit, spesque ulla sit eas editum iri.

EPISTOLA DLXXXV.

JOANNES BAPTISTA LANTINUS

Nic. Heinsio.

Leidam.

GAudeo te saluum & incolumem in patriam rediisse, quod intellexeram ex litteris *Puteani* nostri, antequam tuae ad me perferrentur. Quas ad *Marium* nostrum *Genevae* te dedisse scribis, vidisse non memini. Vidi solum excerptum ex quadam epistola tua ad *Puteanum*, quod ille misit ad me ante menses tres, ni fallor, in quo quaedam erant de *Leonardi Aretini* operibus, quaedam de libris, quos mihi emendos susceperas, de quibus gratias habeo tibi maximas. *Septalium* nondum ad me misit *Puteanus*, neque se accepisse scribit, qui fortasse nondum ad eum pervenerat, cum ad me ultimo scripsit, reliqui si aberraverint feram moderate, neque minus tibi eo nomine debebo. Tu velim si quid sumptus mea causa feceris, me moneas, ut tibi reddi curem. Viros doctos, qui tibi apud nos noti sunt, salvere jussi plurimum tuo nomine, excepto illustrissimo *Marnaeo*, quem nuper amisimus, incredibili omnium meoque praecipue dolore, eximiae comitatis, elegantiae, doctrinae, dignitatis & prudentiae juvenem, mihiq; amicissimum. Prosperet Deus tuum in *Sueciam* iter, faxitque ut apud *Heroiam* vestram abundes & gratia & otio, quo praeclaris illis laboribus tuis brevi manum ultimam imponas. Cum *Wttembogarzio* illo *Ultrajectensi*, quem *Lutetiae* novi, ut scis ante annos quinque, intermissum litterarum commercium renovare institui, quare mihi gratissimum erit, si quam illi scribo epistolam ad eum perferendam cures, *Langermannum* nostrum salvere jubeo plurimum. Tu Vale, & me amare perges tibi addictissimum. In *Rullano* fundo, XII. Kal. Nov. Anno Domini MDCLIII.

EPISTOLA DLXXXVI.

JOANNES BAPTISTA LANTINUS

Nic. Heinsio.

Holmiam.

Quae a me & Clarissimo viro *Jacobo Augusto Chavario* in *Prudentianis* *Condicibus* impensa est opera (etsi tenuis quiddam sit pro tam ingentibus, quas agis, gratiis) tibi gratum esse vehementer gaudeo. Cum enim amicitiam tuam maximi faciam, teque possim demereri mihi semper optatissimum fuit.

Am-

Amplissimo viro *Joanni Boherio & Chavano* nostro significavi, quantum eorum humanitati te debere profiteris. Hos vicissim tibi addictissimos esse nullus dubites. De *Evotio* quod monuisti, ita esse ut conjeceras, reperi, habet enim uterque Boherianus codex eo loco, quem indicasti, *Euvoti*, non *Eventi* quae vulgatorum est lectio. Hinc vereor, ne plura a nobis praetermissa sint. Quamvis enim diligentia non mediocri usi fuimus, moniti tamen a Doctissimo *Bigotio* nostro, celeritate opus esse, quod editio tua jam fere absoluta esset, festinantius fortasse hos libros evolvimus. Itaque haud abs re feceris, si ea loca notaveris, quae ad vetustos codices iterum expendi par est. Nisi forte id satis ex observationibus tuis intellecturi sumus, longioris enim esset operae librum denuo a capite ad calcem percurrere. Caeterum scias, si quid ad rem, horum Manuscriptorum illum, qui melioris notae, ex Bibliotheca Monasterii sancti Claudii in monte Jura, alterum ex Monasterio St Martini Augustodunensi ad D. *Boherium* pervenisse. Vale, vir praestantissime, remque litterariam augere, & me amare perge, tui studiosissimum. Dabam Divione Anno MDCLXVIII. a. d. XXI. Januarii.

EPISTOLA DLXXXVII.

PHILIBERTUS DE LA MARE
SENATOR DIVIONENSIS

Nic. Heinsio.

Florentiam.

Tertium ad te scribo, ex quo te Lugduno discessisse accepi, litterasque Romam & Venetias prout inter nos fuerat conventum, direxeram, quas periisse ex tuis ad *Latinum* nostrum intellexi, saltem ad te non pervenisse. Quod vero nostri memineris, gratias ago, Aretini epistola de militia penes me est ex MS. Cod. Bibliothecae Regiae descripta, sed *Gaddius*, qui se mihi illius operum, quae mihi desunt, copiam facturum promiserat, fidem saepius datam non liberat. Quamvis non semel a me interpellatus, & hoc miror, an hoc rusticationi, quam causaris, adscribere debeam, aut rusticitati adhuc apud me dubium est; mitto ad epistolae calcem Aretini operum indicem, quae penes illum latent, necdum in manus meas venerunt, ut ea mihi describi cures. si ad saniolem sententiam revocetur aliquando. Curabit *Franciscus Maillardus* Monachus Fulliensis, non tam consanguinitatis, quam amicitiae vinculo mihi conjunctus, ut praesto tibi sit pecunia huic usui necessaria, quod ut diligenter facias iterum te atque iterum rogo. *Langermanno* nostro ut ejusdem *Aretini* operum, quae MSS. extant sex in Vaticana, sex in aliis Romanis Bibliothecis, indicem velit ad me transmittere, quaeso, aurem velle; urget enim tabellarius, qui ad eum inpraesentiarum me vetat scribere: paravi non ignobilem antiquarum inscriptionum manum, illi exhibendam, cum hac ad suos remeans transiturus est, si modo fidem suam (quod voveo) exsolvat: Varias in Ovidium lectiones a *Francisco Jureto* annotatas curaturum in me recipio, ut ad te

brevi mittantur, quod frustra tunc fieret, donec paternos lares reviseris. Redibis, puto, in patriam antiquitatis nummariae spoliis onustus opimis; Italia enim, si quae est in orbe regio, hoc genere opum dives est imprimis, quod ad me attinet, conquisivi magno studio Liviae, Britannici, Plotinae, Marcianae, Matidiae, Helvii Pertinacis, Didii Juliani, Pescennii & Gordiani utriusque nummos, ex aere aut argento, incassum tamen, quamobrem si eorum aliquos modico pretio comparandi daretur occasio, sicut & Graecos nec non Arabicos, quos scio in Italiâ reperiri frequentius, secus ac in Gallia, rem utique feceris gratissimam, si comparaveris. Vale, & me, quod facis semper ama: Divione xvi. Kalend. Februar. cjdjocliii.

Catalogus operum *Leonardi Aretini* MSS. in Bibliotheca *Jacobi Gaddii*,
quae a me desiderantur.

Praefatio in Cornelium Nepotem & vitam Attici.

Pro honore Secretariorum contra Advocatos.

Tractatus de Sphaera.

Laudatio in funere Othonis.

Copia cujusdam disputationis ad Ugonem Medicum.

Epistola ad Thomam Campforem, de antiquitate Arimini.

Epistola ad Nicolaum Veronensem.

Epistola ad Nicolaum de moribus Germanorum.

Oratione in nome della signoria du Firenza all' ambasciatore del Re Alfonso.

Littera al Conte F. Sforza sopra la rihavuta di Verona.

Nouvella fatta per lopposita di quella di Tancredi del Boccacio.

EPISTOLA DLXXXVIII.

PHILIBERTUS DE LA MARE

Nic. Heinsio.

Leidam.

Salum te & incolumem redisse in patriam accepi & gaudeo, grave quippe mihi pridem fuit tam charum Musis caput tot tantisque profectionis Italicae laboribus & injuriis videre obnoxium; subsidet nunc angor ille, ex quo te Lugdunum Batavorum pervenisse audio. Sed quid & *Langermanno* nostro factum est, an rediit ille ad suos, aut adhuc versatur in Italia? hoc tanto magis scire desidero, quanto parata est a me nobilis epigrammatum antiquorum copia ad illum transmittenda. An vero ad te Lutetia Parisiorum missus fuerit meo nomine operum *Leonardi Bruni* Philosophi Aretini elenchus nuper a me vulgatus, non satis certo scio, ut ut sit, iterum ad te & ad *Langermannum* nostrum mitto, nec non varias lectiones, quas ex Codice *Francisci Jureti* V. Cl. qui servatur in bibliotheca *Joannis Boherii* Divionensis ad amussim descripsi. Vale, & me ut facis semper ama. Scribebam Divione xix. Kalend. Septembris cjdjocliii. Salutant te plurimum *Lantinus* & *Chevaneus* nostri. Iterum Vale.

EPI-

EPISTOLA DLXXXIX.

PHILIBERTUS DE LA MARE

Nic. Heinsio.

Holmiam.

Kalendis Januariis tuas accepi Holmiae scriptas mense Julio, quibus post biennii varios errores tandem ad te varias illas ex *Francisci Jureti* amatoriorum Ovidii Codice lectiones excerptas pervenisse significas, id bonum factum, vix enim putabam illas non periisse centies: miseram autem anno proxime elapso ad *Langermannum* nostrum inscriptiones veteres, quae penes me essent, nescio an eandem passus fuerint sortem, quamvis ex illius praecepto recta Hamburgum direxissem ad illius parentem: ut ut sit, non gravabor exscribere denuo, si perierint, licet non satis mihi certum sit, qua ratione ad illum transmitti debeant. Vulgavit nuper *Morisotus* noster epistolarum centuriam primam, cuditur altera, & mox subsequetur tertia, praeter ista nihil novi apud nos: Lutetiae vero pauca ad modum, nisi *Petri Gassendi* opera posthumatypis brevi subjicienda, reliqua vos docebit *Spanhemius* noster, qui in Bataviam proficiscitur. Caeterum unum te oro, ut (ni grave sit) epistolarum exemplar ad me transmittere digneris, quas *Dominicus Malinus* Patricius Venetus ad virum Maximum *Danielem* parentem tuum olim scripsit de rebus a *Condaeo* patre Venetiis gestis, rem feceris omni suaviorem, si modo illas sincere describi curaveris: Vale, & me tui studiosissimum amare perge, Divione Kalend. Martiis CIOIOCLVI. *Boberius*, *Lantinus*, & *Morisotus* salvere te jubent. Iterum Vale.

EPISTOLA DXC.

PHILIBERTUS DE LA MARE

Nic. Heinsio.

Amstelodamum.

Speraveram fore, ut si quando reverteretur in Galliam *Spanhemius* noster, stum ad nos aut aliquid litterarum a te referret, aut saltem de tua valetudine faceret certiores, sed quia spes illa decollavit, homine utriusque nostrum amantissimo in Batavia (ut opinor) lares ponente, nec aliunde quidpiam nobis a te fuerit allatum, ideo mearum esse partium duxi iterato ad te scribere, tum ut praevertendo meum in te studium testatum facerem, cum ut significarem incidisse nuper in manus meas Ovidii *Metamorphoseôn* Codicem typis quidem editum, sed ad cujus oram variantes e pluribus MSS. lectiones adnotaverat *Juretus* noster, quarum tibi copiam facere non dubitabo, ubi acceptas tibi fore accepero: rescribas ergo velim, certus, nullum a me officii genus praetermissum iri, quo me tuum tibi probare queam. Paratur Lutetiae utriusque *Scaligeri* operum editio, si quae sint apud vos hactenus inedita, curabo ne huic de-

defint, si transmiseris. Apud nos pauca typis sunt edita praeter *Morifoti* nostri epistolarum centuriam alteram, quibus addidit Illustrium doctrina viro-
rum, qui anno *ciciodcliii*. obierunt, elogia mihi inscripta. *Guyoniorum* fra-
trum apud nos in re litteraria principum poemata & epistolas, quae super-
sunt, edere cogito; & jam ferverent operae, nisi typographo deessent Grae-
ci characteres venustiores & nitidioris formae, qui a nobis diu (ut puto) non
desiderabuntur. Caeterum morbus ille, cum quo nimium quantum conflictatus
es magno rei litteraria damno, an tandem recessit? si ita fuerit & per va-
letudinem liceat, quod olim te rogavi, iterum te rogo, ut parentis bibliotheca
revolvendo *Domini Molini* epistolarum ad illum, quae de *Condae* patris
moribus, quandiu Venetiis egit, mentionem habent, copiam facias, quo fiet,
ut & fidem erga me tuam liberaris, & novo me beneficio obstringas. Vale,
& me quod facis ama. De *Langermanno* nostro nihil audio, an consarcinandis
post *Gruterum* veteribus epigrammatis vacat, an vero (quod magis recens nup-
tum decet) uxori & liberis. Commoda erit *Thuani* ad vos legatio transmit-
tendis utrimque epistolis, exempto jam rebus humanis *Puteano*, qui tam be-
nigne aderat utrique. Iterum Vale, salvebunt a te *Boherius*, *Lantinus*, & *Morifotus*.
Scribebam Divione Kalendas Januarias *ciciodclviii*.

EPISTOLA DXCI.

PHILIBERTUS DE LA MARE

Nic. Heinſio.

Amstelodamam.

QUAe a me postulasti Metamorphoseôn excerpta, nunc ad te mitto ad fi-
dem Juretiani Codicis descripta beneficio *Joannis Boherii* Divionensis,
qui te plurimum salutatur, nihil prorsus, quod sciam, Ovidianorum ope-
rum reperitur apud nos in membranis scriptum, nisi in Cisterciensi bibliotheca,
unde maxima quam fieri potuerit diligentia curabo, ut codex ad me trans-
mittatur, quo viso quamprimum faciam te certiores, ne, si quid in illo sit,
quo tibi prodesse queam, frustra operam meam desiderare videaris. Caeterum
angit me non parum languidus ille, fluctuansque & incertus valetudinis tuae
status, quam haud dubie firmabit nova anni tempestas, saltem ita voveo, ne res
litteraria, quae hoc anno tot sensit funera, hac tua invaletudine fatiscat. Quod
vero de *Salmasii* epistolis apud vos editis scribis, hoc vero me admonet, ut te
de parentis tui, viri omni laude dignissimi, vulgandis pariter epistolis interpel-
lem, si feceris, rem feceris & tibi honestam, & rei litterariae utilem. Accepi
nuper ex intima Graecia nonnullos Codices Graecos MSS. sed in quibus pauca
admodum deprehendi haecenus inedita, homines nempe vestrates, ut audio,
omnem illum tractum expilarunt, & Regiam vere gazam detulerunt in Bata-
viam, ego, quamvis serius, videbo quid in ea re possim, & si expeditio in
Graeciam succedat minus feliciter, certus sum in ultimam Syriam & Aegyp-
tum ope vicaria penetrare, &, quid ex remotissimis illis regionibus sperandum
sit,

sit, expediti. Vale, & me, quod facis, amare perge: Divione Kalendis Mart. CXCICLVII. De *Leonardo Aretino* altum nunc apud nos silentium, defunt enim mihi nonnulla illius opera, quae editionem morantur. Iterum Vale.

EPISTOLA DXCII.

PHILIBERTUS DE LA MARE

*Nic. Heinsio.**Amstelodamum.*

Ovidianus ille codex, de quo pridem ad te scripseram, tandem ad me Cistercio transmissus est, sed, ut dicam, spei, quam ex illius antiquitate concipiebam, minime respondit: in eo quippe poetarum omnium, etiam Christianorum aliquot, opera continentur vix ante cc annos, manu quidem eleganti, sed aut imperite, aut ex vitioso exemplari descripta; quod magis evincit subjectum Ovidianis operibus, ac sub ipsius Ovidii nomine poema de Lupo, quo nihil tristius, & magis inficetum legi potest: hunc itaque codicem ex *Lantini* nostri, & aliorum emunctae naris hominum, qui apud nos pauci non sunt, sententia missum feci, cum a vulgatis editionibus nihil differret, nisi quod naevis innumeris scateret hoc quidem est. Et quod haecenus de poetarum tui operibus praestare potui, quamvis pluteos omnes, forulosque diligenter excusserim; non cunctabor tamen, si quid deprehendere valeam, quod tuo proposito conducere existimem, tibi significare. Ne vero putes, si res minus prospere succedat, cessaturum ideo me ab instituto pridem inter nos epistolarum commercio, quo nihil mihi dulcius unquam possit contingere: nam ut aut Symmachus ad Theodorum, his maxime nutrimentis amicitiarum cultus adolescit. Caeterum de *Dominici Molini* ad virum maximum parentem tuum epistolis altum apud te silentium est, fac quaeso illis resciam, quid Venetiis a *Condaeo*, ejus, qui nunc in Belgio versatur, patre actum sit, nam hoc & ad rem publicam pertinet, & ad privatos hominis mores. Vale, & me, quod facis, ama. *Guyoniorum* opera prodibunt cum Jano. Iterum vale. Scribebam Divione Kalend. Novembris CXCICLVII.

EPISTOLA DXCIII.

PHILIBERTUS DE LA MARE

*Nic. Heinsio.**Amstelodamum.*

Pridem est cum ad te literas dedi nihil quidem continentes illas, quod te valde scire attinet, sed testes tamen illius, quam tibi debeo, semperque debebo gratiae pro tuis in me beneficiis: eae literae mihi non videntur ad te pervenisse, neque edita a nobis *Guyoniorum* opera, quae ideo mandaveram, ut Pa-

Tom. V.

Rrrr

rifiis

rifiis committerentur bibliothecae Thuanacae custodi, ut ille certius ad te transmitteret, quid de iis actum sit rescribas velim, nam hujus rei sollicitudo & cura tam me angit, quam huic officio, quaecumque illud est, deesse nolum. De tua Ovidii operum editione nihil audio quidquam, improspera forte tua valetudo moram illi injecit, vide tandem qua ratione fidem tuam exolves, hoc siquidem a te praestolatur respublica literarum. De *Molini* epistolis ad virum maximum Parentem tuum de *Condaeo* patre scriptis, quas pollicitus fueras, iterum aurem tibi vello, non una recurrit hyems, ex quo illas in magna hominum corona cum hinc esses, te ad me transmissurum palam promissisti, vides quot te promissorum reum perago, cura ut fidem utrimque liberes. Salutant te *Latinus* & *Morisotus*, hic dubia solido fere anno valetudine usus est, aegroto quam sano propior. Vale, & me tui studiosissimum ama. Scribebam Divione Kalendis Januariis MDCCCLIX.

EPISTOLA DXCIV.

PHILIBERTUS DE LA MARE.

*Nic. Heinio.**Hagam.*

POST biennale pene silentium tuas accepi tandem Hagae Comitibus scriptas xxx. Octobris, quibus & te valere, & ornandae rei literariae sedulo incumbere scribis; horum utrumque eo magis mihi acceptum fuit, quo te aut minus bene habere, aut nostri penitus iuisse oblitum ex tanti temporis silentio jure dubitaveram, sed quod jam dubio locus non sit, gaudeo summo opere, & quas possum gratias ago, quod in ea, quam paras, Natonis operum editione nostri meminisse dignatus fueris. *Huberti Langueti* V. Cl. nostratis vitam proximis diebus ad umbilicum perduxit brevi forte edendam; is autem fuit, qui in *Guiljelmi* Principis Araugonensis fortissimi illius libertatis vestrae assertoris comitatu, Antverpiae, dum ea urbe foederati Belgii ordines potirentur, obiit Anno MDCCCLXXXI, rerum maxima cum prudentiae, doctrinae, & integritatis laude gestarum & scriptarum gloria plenius: id vero te scire velim, ut si quid apud vos reperiri posset, quod ornandae huic spartae conveniret, illius copiam a te impetrare possem, quod minus gravate obituro te pro singulari tua humanitate confido. De *Molini* epistola iterum atque iterum aurem tibi vello, donec fidem tuam exolveris, eris semper in meo aere. Vale; salutant te plurimum *Latinus*, *Chiffletus*, & *Morisotus*, hic improspera prorsus aliquot mensibus valetudine utitur, adeo ut jam studia literarum parum curare videatur. Iterum vale. Divione Kalendis Decembris MDCCCLX.

EPISTOLA DXCV.

PHILIBERTUS DE LA MARE

*Nic. Heinsio.**Hagam.*

AN delatam tibi Legationem Suecicam gratulaturus essem, multum anceps dubiusque fui; nam quamvis nova te, & amplissima quidem dignitate auctum cernerem, cum subit animum tristissima peregrinationis illius recordatio, quae te avulsum a nobis solido triennio retinebit in extremis pene orbis terrarum partibus, non possum quin summo dolore afficiar, languente sine dubio per hoc tempus instituto pridem inter nos literarum commercio, nec tamen propterea credas velim, etiamsi hoc contingeret, quod augurari nollem, de meo in te studio quidquam remissum iri, sed eum semper, eumque erga te futurum me, qui haecenus. Quod tibi Caesaris apud vos Orator de Brunoniano in Ibin Ovidianam commentario retulit, citra veritatem retulit, nam etsi diligenter inquisierim, nemini tamen hominum nostratum, qui literas colunt, librum hunc vidisse contigit, sed lapsum memoria *Friquetum*, pace tanti viri dixerim, arbitrarer, & librum hunc *Antonio Brunoni* Hispaniarum Regis apud vos, dum vixit, Oratori perperam tribuisse, qui *Dionysium Salvagnium Boessium*, Regiarum in Delphinatu rationum jam Principem, authorem habet, nam editionis illius tempus, locusque iis belle conveniunt, quae a *Friquet* te accepisse scribis, an recte conjecerim ipse videris, ecce *Salvagnii* librum ad te mitto, tuum deinceps futurum. De *Dominici Molini* epistola, nisi grave sit, haec habet, peregrinatum quippe in Italia fuisse annis MDCXXII, & MDCXXIII. *Condaeum* hujus parentem, qui quasi postliminii jure nuper nobis restitutus est. Scripserat pridem *Spanhemius* noster, Electori Palatino haberi prae caeteris *Lucanum* in deliciis, quod vero illius rogatu poetam hunc in integrum restituere cogites, summo opere gaudeo, bonum factum, Christianis principibus, post partam orbi Christiano terra marique pacem, non intermissa tamen rei publicae cura, ad litterarum studia serio se convertentibus, quam ubique id factum vellem! Sed ad *Lucanum* tuum redeo, cujus MS. Codicem Longobardicis literis exaratum utendum mihi dedit *Boherius* noster, ad calcem lib. IX. ita legi,

PAULUS CONSTANTINOPOLITANUS EMENDAVI MANU MEA SOLUS.

M. ANNAEI LUCANI LIBER VIII EXPLICIT.

LEGENTI VITA, ET PRAEFECTURA;

SCRIPTORI VITA, ET FORTUNA,

Ad calcem autem libri X, qui ultimus est, haec leguntur literis aliquot nimia vetustate exes, sed quae eundem sensum prae se ferunt,

Rrrr 2

PAU.

PAULUS CONSTANTINOPOLITANUS EMENDAVI MANU MEA SOLUS.

M. ANNAEI LUCANI EXPLICIT LIBER X.

L . . . TI VITA, FECTURA;

SCRIPTORI ET FORTUNA.

Scribebam Divione inter saevissimos podagrae cruciatus xvi. Kalend. Februar.
CICIDCLXI.

EPISTOLA DXCVI.

PHILIBERTUS DE LA MARE.

*Nic. Heinsio.**Holmiam.*

QUAS ad me dedisti litteras mense Septembri proxime elapso Holmiae scriptas, illae & te salvum appulisse in Sueciam, nec tamen oblitum nostri significarunt, quod quam volupe mihi fuerit, satis dicere non possum, praesagiebam enim cum *Capellano* nostro, te gravissima legatione fungentem, vix nostri, tanto praesertim locorum intermedio, recordaturum, sed tui erga me studii egregium sane extare voluisti monimentum, cum Nasonis operum partem mihi inscripsisti, quamobrem gratias ago quam maximas, certus neminem esse magis erga te fidei & observantiae plenum. Sed quia jam de Nafone mentio, haec habe, nullum me unquam apud nos vidisse operum illius Codicem MS. praeterquam Cistercii, ubi pleraque illius opera leguntur post ducentos annos descripta, & extare inter ea, quod te olim monui, poema de *Lupo* Nasoni adscriptum, opus sane inficetum, & quo nihil tristius mihi unquam visum est; an illud tibi conveniat, tu videris. Valent *Boherius* & *Lantinus*, hic aetate & literarum studio florens, ille imminuta podagricis doloribus valetudine jam gravis, uterque te plurimum salvere jubet. Sed infauftum hunc autumnum experti sumus, *Morisoto* nostro tibi, nobisque erepto, quem praeter pangendi faeliciter carminis copiam, abstrusioris antiquitatis scientia insignite ornabat. Curabo ne uberes illi, quos paraverat in *Ovidii* fastos, commentarii nobis pereant, si modo fidem ii liberent, penes quos illi sunt. De *Lucano*, cujus editio paratur auspiciis Electoris Palatini a *Spanhemio* nostro, ubi ex itinere Italico reversus fuerit, dixi alias, contulique ad *Boherianum* MS. quae tu conferenda curaveras, statimque ad te transmissi. Vale, & me tui studiosissimum ama. Divione xv. Dec. CICIDCLXI.

EPISTOLA DXCVII.

PHILIBERTUS DE LA MARE.

*Nic. Heinsio.**Holmiam.*

Auret a nobis *Gudius* tuus meusque, & nihil ad te literarum ferret, hoc vero quo Oceano elterem? Certe quod institutum pridem inter nos epistola-

larum commercium ab anno & ultra jacuerit, nihil tamen est, quod inde putes quidquam de meo in te studio detractum fuisse hactenus, nec deinceps fore. Sed quae te, praeter rem publicam, quam curas, studia tenent, iterumne Ovidius curis auctus secundis paratur ad praelum? Quod ad me attinet, totus sum in scribenda *Salmasii* vita. Ferio te, nec enim me latent eae, quas cum Parente tuo viro maximo exercuit, controversiae; extremis illas (ut ajunt) labiis attingam, delibabo tantum ea, quae ad rem meam facient, nec enim mihi vacat ire per omnes simultatum ambages, quas cum viris doctis, & amicis etiam, quod jure illi objecisti, gessit: hoc unum mihi consilium stat, literarum historiam in *Salmasii* vita scribere, in qua suus cuique honos pro merito habebitur. Si quae sint penes te, quae ad eam rem faciant, eaque mecum communicaveris, rem feceris & te dignam, & mihi gratissimam. Vale & me, quod facis, amare perge, Scribebam Divione Kalendas Julii CIOIOCLXIII.

EX VITA SALMASII

Dum haec Leydae aguntur, Divione parum sollicitus agebat, quem exitum res ista foret habitura, nisi, quod eo deductam esse doleret, ut aut vincere, aut vinci prorsus necesse esset! sed & commissum se cum Danicle Heinsio, viro supra titulos omnes & elogia, molestissime tulit, quem & loco illo, & successione, quam non obscure ambiebat, dignissimum judicabat, ut nec digniorem alium esse profiteretur, qui Scalligero succederet, addebatque tunc ad Grotium rescribens, quod si conventui illi Academicum interfuisset, quo negotium tractatum est, & dicendae sententiae jus habuisset, suus Heinsio ad victoriam calculus non defuisset.

EPISTOLA DXCVIII.

NIC. HEINSIUS

Philiberto. de la Mare.

Divionem.

ANnus jam est, quantum datur meminisse, & quod temporis effluxit, eximie & Amplissime vir, quando missis aliquot Claudiani mei a bibliopola Lutetiam exemplaribus, unum ex his ut seponeretur, ac ad te iret meo nomine, virum clarissimum ac perquam officiosum *Emericum Bigotium* verbis enixis rogavi. Nec dubito illum precibus meis dedisse, qua est comitate; quamquam nuntios haud ullos de hoc negotio ab illo pro expectatione mea confecto accepi postmodo. Nunc & novam Poëmatum accipies editionem, quam provinciam optimus *Capellanus* suscepit. Non merebantur profecto aut hic, aut ille liber, tam cultas manus subire, & metuo jampridem, ne haec putida tibi videatur ac ridicula rerum frivolarum ostentatio. Malo tamen ego nimius officii, quam parvus videri, praesertim apud te, qui meae in spem gratiae nihil laboris aut molestiarum hactenus graveris. Nos hîc in pistrino publicarum occupationum non sine taedio quotidiano exercemur. Quo ma-

Rrrr 3,

jo.

jorem praesentio remque veniam scripta haec nostra qualiacumque, spero, apud te merebuntur, quae tempore ab hisce studiis maxime alieno foras prorumpunt, bibliopolae potius sic flagitantis, quam mea culpa, qui tempestatem magis oportunam Musis praestolari maluissem, si quis meae sententiae fuisset locus. Viros eximios *Boherium* ac *Latinum*, si supersunt etiamnum ac aura vitali vescuntur, salvere plurimum jubeo, teque ut mihi favere pergas, anxie rogo. Vale, vir Clarissime, & rem feliciter age. Holmiae Suecorum ad iv. Nonas Decemb. Gregorianas c1010CLXVI.

EPISTOLA DXCIX.

PHILIBERTUS DE LA MARE

Nic. Heinsio.

Holmiam.

ET tua, & Claudiani poemata denuo excusa transmisit ad me nuper *Bigotius* tuus meusque, serius quidem quam ille voluerit, & ego vellem, sed ut est sedulus ac diligens rerum fidei suae ab amicis creditarum administer, maluit ea tardius ad me, quam foliis aliquot manca & mutila transmitti, utrumque igitur accepi ab eo numeris omnibus absolutum, quamobrem ago tibi gratias, & ob muneris, quo me dignatus es, elegantiam, & quia per publica, quibus distineris, negotia, nihil tamen de tuo in me studio remisisse te video, quod in maxima felicitatis mea parte pono, certus esse neminem, qui tuo erga me animo sincera magis fide, cum se dederit occasio, respondeat. Sed quid agunt virorum optimi, iidem & doctissimi *Spanheimius*, *Gudius* & *Langermanus*? fatin salvi sunt? Valent *Boherius* & *Lantinus* tui, hic Lutetiae, quo non ita pridem profectus est, ille domi jam senio gravis & podagra. Vulgavi nuper aliud agendo de *Guillelmi Philandri* viri nostratis vita, moribus & scriptis epistolam ad *Franciscum* Cardinalem *Barberinum*, hujus exemplar curabit ad te *Bigotius* noster, leve quidem, sed certissimum mei erga te studii argumentum. Vale, & me, quod facis, amare perge. Scribebam Divione Kalendas Aprilis c1010CLXVII.

EPISTOLA DC.

PHILIBERTUS DE LA MARE

Nic. Heinsio.

Hagam.

Quod salvus ad tuos remeaveris laetor quammaxime, sic enim fiet, ut semota tantisper rei publicae cura, ad studia literarum redeas alacrior. In bibliotheca Boheriana exstant Prudentii Codd. duo MSS. & unus inter eos vetustatis maximae; recepit *Lantinus* se variantes ex utroque lectio-

lectiones excerpturum rebus prolatis, quod commode praestabit hac autumnalium rempestas, qua rus proficisci non avert, quod nostri facere solent. De Virgilio quod scribis mox a te edendo, rem facis & te, & tanto vate dignam, adscriptas appendicis Virgilianae margini variantes *Salmasii* manu lectiones ecce ad te mitto Lindenbruchianam editionem fecutus, his divini poetae effigiem ex veteri nummo argenteo, qui apud me servatur, delineatam adjunxi. De *Gudio* nostro audivisse quae scribis mirum quantum volupe mihi fuit, nihil quippe litterarum ab eo solido hoc quadriennio accepi, quamquam a nobis discedens primo quoque die se de *Phaedri*, quam moliebatur, editione renuntiaturum mihi fuisset pollicitus. Vale, & me, ut facis, amare perge. Scribebam Divione pridie Kalendas Augusti MDCLXXVII.

EPISTOLA DCI.

PHILIBERTUS DE LA MARE

Nic. Heinsio.

Hagani.

DE *Francisci Jureti* schedis non est cur labores amplius, si quid enim superesset illarum, hoc apud *Boberium*, tuum meumque sine dubio servaretur, illius ex semisse haeredem, sed vir bonus sedulo caverat, ne quid schedarum suarum ad posteros perveniret, ultimo enim, quo decubuit, morbo chartaceam suam omnem suppellectilem coram se comburi jussit, seu vitae, aut rerum taedio, seu quod illum ut alios quamplures, studiorum cepisset latietas: ex eo autem incendio vix subducta sunt sacrorum poetarum fragmenta ex variis Codd. MSS. ab eo descripta, quae ut publici juris faceret *Boberio* frustra non semel auctor fui, quod quidem minime praestitisse putem, quod aequae ferret *Jureti* mandato fratrem harum rerum imperitum nimium religiose fuisse obsecutum: narravit quippe mihi non semel *Jureti* schedis non modo constitisse chartaceam illam suppellectilem, sed etiam variis divini Herois *Scaligeri*, *Cassauboni*, *Pithoei* aliorumque hujus notae hominum epistolis & observationibus. De argenteo Virgilii nummo, cujus ad te nuper iconem transmisi, haec habes, is est crebra digitorum tractatione detritus, refertque quam proxime seu pondere, seu magnitudine argenteos Constantini M. nummos, caeterum tam caecae antiquitatis, ut antiquariorum nostrorum nulli visus sit ipso Constantini aevo, si non superior, saltem non inferior, unde factum est, ut unanimi consensu eum aut ipso Virgilii saeculo cūsum, aut circa Constantini M. tempora restitutum censuerim: habes meam & aliorum in re admodum obscura sententiam, quam viso nummo aut probasses confestim, aut rejecisses pro tua in hoc literaturae genere sagacitate, nisi nummum nemini haecenus, quod sciam, visum avatis curtorum manibus credere dubitasset. Sed quia de nummis sermo, *Spanhemii* de usu & utilitate nummorum dissertationem typis iterum subjici & quidem longe ampliorem ajunt, & quoniam de *Spanhemio* mentio est, quid

de Lucano, cujus editionem tanta magnificentia & cura Palatini VIII. Viri jussu & sumptibus adornare se scripserat, factum fuerit, scire velim, ni grave sit. Apologiam pro Parente tuo viro maximo scriptam Anno MDCXLIX. ut tuo beneficio legam; fac obsecro, frustra enim libelli hujus exemplar conquisivi. Jam ad te pervenisse arbitror descriptas ex MSS. Prudentii Codd. varias lectiones *Lantini* nostri cura, quamobrem de his dicere supersedeo. Vale, & me tui studiosissimum ama. Scribebam Campinii ad Tiliam rebus prolatis, Kalendis Novembris CIOIOCLXVII.

EPISTOLA DCII.

PHILIBERTUS DE LA MARE

Nic. Heinso.

Hagam.

JURETI schedas omnes ad unam Vulcano cessisse tam certum est, quam quod certissimum, adeo ut ex tota illius suppellectile libraria nihil reliquum sit praeter varias lectiones ab eo ad librorum aliquot suorum oram ex MSS. Codd. descriptas, & illa veterum poetarum Christianorum collectanea, de quibus ad te nuper, sed quae constituit tandem praelo subjicere *Boberius*, ubi primum licebit illi per podagram penu suum literarium revolvere, iis coronidis vice subjunget vetera quaedam epigrammata eodem *Jureto* collectore. Paulini poematis de vita B. Martini editio nulla unquam fuit praeter mendosissimam illam, quae in bibliotheca Patrum legitur, quam tamen mendosam habere satius est quam carere illa, quamobrem frustra *Bigotio* nostro aliisve amicorum rem eam commendaveris. Sed dum haec scribo, ecce adest mihi ex improvviso tuus meusque *Spanhemius* ab Electore Palatino ad Regem reipublicae causa missus, quanto perfusus sum gaudio narrare tibi promptum non est mihi, cum carissimum caput nec visum hactenus complecti datum est, verum dum loquor, elabatur, & Lutetiam Parisiorum fulminis instar properat, praecipitis ac festinati discessus taedium lenit tantisper brevis in aulam excursus spes, cum aderit non cunctabor argenteum Maronis nummum, ut de sincera illius integritate judicium fieret, quod ad te quamprimum rescribam. Apologiam pro viro maximo parente tuo adversus *Joannem Croyum* si ad *Bigotium* nostrum curaveris transmitti, rem feceris suavissimam, quam gratissima saltem memoris animi significatione prosequar. Vale, & me, quod facis, amare perge. Divione XIII. Kalendas Februarii CIOIOCLXVIII.

EPISTOLA DCIII.

PETRUS POSSINUS
E SOCIETATE JESU*Nic. Heinsio.**Holmiam.*

EX quo novas Athenas auspiciis Minervae melioris sub axe procul alio condere coepistis & frequentare, fas, opinor, est veteres Atticae cives, qui e tenebris subinde in famam emergunt, ad vos mittere, vobiscum jure suo atque optimo futuros. En hîc meus Theophylactus ex isto numero adspirare ad te gestit, vir clarissime, in magni beneficii parte numeraturus, si, te agente, admissionem apud Serenissimam Reginam nancisci possit, cujus audientia atque conspectus omnium hodie literarum, omnium ingeniorum commune votum est. Vir est, quantum judicare possum, stylo atque judicio limatus, sermonis elegantis supra captum senescentis Graeciae, & ejus, qua floruit, aetatis ante hos annos quinquaginta supra quingentos; aequalis videlicet temporum, uti & acmulus studiorum Annae nostrae. Vidisti ejus epistolas ab annis jam triginta *Meursii* opera editas apud vos, ex codice, ut apparet, valde mendoso; quae auctiores & emendatiores haut paulo e Bibliotheca Medicaea, non sine operae pretio possent edi; quemadmodum observare mihi non ita pridem contigit, per menses duos Florentiae moranti; & videlicet totos exigenti dies in Laurentiana illa Bibliotheca lustrandis describendisque operibus veterum. In his hoc opusculum ut cupide tollerem, effecit Christianissimi Regis Nostri gemina aetas, & caetera in plerisque conditio generis, felicitatis, spei, cum isto Constantino, quem celebrat Theophylactus: Amicorumque hortatus in id certatim incubuere, ut maturarem hoc ei, tamquam ejus Majestate non indignum, offerre munusculum. Qua fronte is acceperit dicerem, nisi verendum esset, ne tali commemoratione astutae jactantiae suspecta, commendationem benignitatis regiae in meriti proprii praejudicium trahere videri possem. Illud non tacebo: ita successisse Theophylacto meo consilium suum ad eundi affandique Regis Maximi, ut inde animus ei factus sit ad appetendum Illustrissimae Reginae colloquium; ejus inquam Reginae, quicum, desueta multis jam saeculis felicitate, miscere sermones possit sine interprete homo, licet Byzantinus & Atticista. In istam spem duo en ad te, Amicorum optime, Libelli hujus exempla destino: quae, ut spero, simul cum his literis accipies, alterum oblaturus, si tibi videbitur, Serenissimae Reginae. Nuper Romae familiarissime agens, cum nostro *Athanasio Kircher*o, audiebam ab eo, id quod fama publica egregie confirmat, vim inesse humanitatis Heroinae illi parem ingenio ipsius atque fortunae; adeoque non dubitare illam eo usque demittere Principale fastigium, ut literaria munuscula nostri similium non respuat. Igitur ipsi Comnenam meam mox exituram eo confidentius paro, quod fieri non potest, ut ei grata jucundaque non adveniat, cui tanta omnis ge-

Tom. V.

Ssss

neria

neris intercedit, cum ipsa similitudo. Expectandi tamen in hoc tui consilii otium offert lentitudo editionis, nescio quibus causis tamdiu haerentis. Anni jam plane evoluti sunt duo, ex quo interpretatio mea totius Alexiadis perfecta descriptaque in manus Curatoris Typographiae Regiae venit. Anno tamen hinc cessatum: ac mense demum Majo anni praeteriti excudi coepti sunt Regiis praelis Alexiados Annae Comnenae libri xv. Trium deinde mensium intermissio injecta. Resumptum dudum opus non cursu, aut saltem incessu, sed reptatione quadam prope jam ad umbilicum pervenisse dicitur. Habeo paratam, quam dabo mox postea, aliam Historiam perelegantem, nec umquam visam, Joannis Sinnami, inde inchoantis narrationem suam, ubi Anna desit. Vale, vir Clarissime, & fiduciam de te meam virtutis tui notitiae assigna, ideoque boni consule. Scribebam Tolosae x. Kalendas Jun. Anno CIOICLI.

E P I S T O L A DCIV.

P E T R U S P O S S I N U S

Nic. Heinsio.

Leidam.

Quam persuasum habuerim ante hos dies paucos, esse te ac porro futurum in Comitatu Serenissimae Reginae Suecorum, argumento erunt postremae ad te meae tum datae literae; quas spero vel te accepisse jam, vel cum his accepturum, adjuncto iis exemplo gemino Theophylacti mei, quem, quoniam nihil elegans & eruditum non continuo Heroinae istius vestrae oculis dignum est, sperare audebam oblatum per te iri Majestati ejus. Nunc a Parisiensibus amicis audio, remigrasse te in Patriam; ubi conveniri te a me nova causa subigit. Audivi nunc primum, quod si antea rescissem, non tandiu cessassem appellare te, audivi, inquam, habere te in tuis *καμηλοῖς* inter alia *παρεμπορεύματα* peregrinationis Italicae, manu exaratum codicem Historiae Joannis Sinnami. Est is homo, quicum (quod dici solet) salis modium comedi; cujus exemplar a tribus jam annis ad me missum ab Illustrissimo Franciae Cancellario Petro Seguerio contrivi legendo vertendoque. Denique interpretatio ejus libri mea jam coepit regiis Lutetiae praelis subjici. Percussit igitur merito me rei tam ad me pertinentis indicatio; veritusque sum, ne gessisse negligentius negotium publicum videri possem, si unius non optimi codicis auctoritate fultus editionem operis alioqui luce dignissimi praecipitarem, quae fieri forsitan emendatior meliorque haut paulo exempli alterius collatione posset, cujus usuram tam amica in manu positi diffidere mihi concedendam, tuae humanitatis injuria foret. Ea me causa impulit, ut raptim ad D. Cramosum Regiae Typographiae curatorem scriberem: inhiaberet tantisper cursum ruentis praeli, sustineretque usque ad responsum tuum. Hic jam potestatis tuae facio, vir Clarissime, quid huic fiduciae de te meae facias: Comprobarene illam & successu indulgendo affirmare velis: an contra, id agere, ut vanam eam fuisse-

im-

improbamque destitutio sperati exitus demonstret. Equidem dum ex meo animo tuum aestimo; dumque illa repeto memoria indicia indolis nobilis Geniique ad juvandas literas unice nati, quae usurpare coram oculis & experientia percipere praesenti licuit, dum tuae jucundissimae consuetudinis dulcedine fruerer, vix est, ut persuadere mihi queam aliud, quam omnino fore, ut facere liberaliter quam avare cessare potius, teque dignius habiturus sis: magisque nos velis praedicandi tui beneficii, quam repullae ac desiderii consolandi nostri causam habere. Vale. Scribebam Tolosae XVIII. Kalendas Quintiles Anno CIOICLI.

EPISTOLA DCV.

PETRUS POSSINUS

Nic. Heinsio.

Florentiam.

Quas ante hos tres menses ad te Lugdunum datas a me literas *Medonio* nostro commendaveram, an perlatae fuerint si dubitem, tam diligentis Amici fidei atque officio injuriam faciam. Cognoveris igitur ex iis, quam aegre mihi fuerit, quod cum non satis distinxissem in quadam epistola tibi scripta oblationem libri privatam a nuncupatione publica, visus sim polliceri aliquid, quod in mea potestate minime tum fuit. Ex eo tempore literas accepi ab *Isaaco Vossio* humanissimas, quibus certiolem me fecit, de incredibili Serenissimae Sueciae Reginae in me benignitate, qua Theophylactum meum per te ad ipsam missum & gratum habere dignata est, & id ipsum significari mihi voluit. Pervenerit, spero, dudum ad illam exemplar Annae, quod epistola privata ipsi offerre sum ausus, prout tibi me facturum ostenderam, certe ostendere volueram, illis literis, quas tu, jure fortasse tuo (non enim, ut dixi, ambiguitatem satis caveram) plus aliquid promississe credidisti. Qua in re ut prae fracte non negem, obrepisse mihi aliquid per ἀπρόσεξιν quandam, quod iis verbis cogitationem exposui meam, quae occasionem vobis dederint aliud quam vellem intelligendi; ita spero humanitatem tuam imprudentiae huic non inclementer occursuram. Tamen, ut e malis interdum bona existunt; lucro meo imputo, quod ex isto qualicumque incommodo non satis explicati dicti licuerit intelligere non aspernaturam serenissimam Regiam, si quis ei editus per me liber dedicatione publica inscribatur. Non negligam indicium, aut tanti decoris usurpatione omittenda committam, ut prodigus ingerentis se felicitatis contemptor audiam. Etsi enim meum est, qui nuncium remissi rebus humanis, nihil magnopere aut curare aut mirari periturum; tamen indolem & eruditionem aeternitate dignissimam Augustissimae Principis in censu rerum mortalium habere non debui: quin etiam ad ipsum officium coelestia spectantium pertinere arbitror tantae laudis exemplum splendidissimo in loco positum, ingeniosissimae, inquam, ejusdemque doctissimae Virginis, claritate summa regii generis, copiisque fortunatissimi regni cumulatam gloriam praeconio & gratula-

tulatione profequi. Et offert se commodum non indignus, ni fallor, liber, qui nomini tanto inscriptus prodeat. Memini me alias indicare tibi, venisse in manus meas Historiam Byzantinam Nicephori Caesaris Bryenii, opus rarum & praeclarum. quo tres *δυναστεῖαι* Byzantinorum Principum, videlicet Romani Diogenis, Michaëlis Ducae & Nicephori Botaniatae, accuratissime perscribuntur, & e superioribus Principatibus Basilii, Isaacii Comneni, Constantini Ducae, Eudociae ac filiorum ejus quaedam haut vulgo nota repetuntur. Eum ego librum a me descriptum emendatum, Latina interpretatione & Annotationibus ornatum paratus sum Typis Regiis edendum mittere, praefixa ad Serenissimam Sueciae Reginam epistola, qua meam erga tantam Principem observantiam venerationemque contester. Non tamen id facere prius ausim, quam a te aut *Vossio*, consciis sensuum ejus intimorum, didicerim Majestati ejus id gratum fore. Ac *Vossio* quidem ita pridem hac de re scripsi, ut si tabellarii non cessarunt, consentaneum sit meas jam ei redditas literas esse. Tuae tamen, si quid his rescribere tanti duxeris, & occurrere opinor ad tempus poterunt, antequam manum ultimam imposuero meis schedis, & mihi certe, ut tua omnia, longe gratissimae jucundissimaeque accident. Vale. Tolosae VI. Kalend. Mart. Anno CIOIOCLII.

EPISTOLA DCVI.

HENRICUS VALESIUS

Nic. Heinso.

Parisiis.

INDICAVIT hodie mihi vir Cl. *Langermannus* cupere te in Italiam tecum asportare libros *Joannis Tristani* de Nummis Imperatorum, promiseramque ei illos me ad te missurum. Sed prius id te monitum volui, libros illos meos non esse, sed *Tristani*, qui eos suis sumptibus edidit, & apud me aliquot exemplaria deposuit, cum rus proficisceretur. Itaque ego, cujus fidei commendata sunt, rationem ei reddere teneor, simulatque in urbem advenerit. Quod si mea essent exemplaria, libentissime ea tibi donarem. Sed neque mea sunt, ut jam dixi, nec tibi ipsi ea comparare vis, sed Bibliothecario ducis Florentiae. Proinde aequum est, ut si ea habere velit, pretio comparet. Sunt homines Itali plerumque ejusmodi, ut omnia gratis velint habere. Sed non is est *Tristanus*, qui sua libenter donet. faciam tamen quod volueris, quodque harum literarum bajulo mandaveris. Vale vir Clarissime 20. August. CIOIOCLI.

1 Haec, & tres sequentes schedulae, codicilli fuere *Heinso*, in urbe Lutetia versanti, missi.

EPISTOLA DCVII.

HENRICUS VALESIUS

*Nic. Heinsio.**Parisiis.*

NON licuit mihi ad *Gronovium* scribere, ob quaedam domestica negotia. Itaque te etiam atque etiam rogo, ut illi significes literis tuis gratissimos mihi fuisse ipsius libellos, primum notarum in Senecam, alterum deinde Observationum sacrarum. Quos integros legi & magnopere probavi. Eoque nomine magnas ei gratias ago, vellemque & Senecam Tragicum nobis quamprimum emendatum a se exhiberet. Librum Amicorum *Lucae Langermanno* remitto, in quo ego & frater meus nomen nostrum ascripsimus. te & illum crastina die salutare constitui. Proinde Amanuensi meo renuntiabis, utrum cras hora secunda & tertia post meridiem, tui copiam nobis facturum sis. Quod si erit incommodum, die Dominico mane te conveniemus. Vale, vir Clarissime & me ama. Parisiis Kalendis Septembris CIOICLI.

EPISTOLA DCVIII.

HENRICUS VALESIUS

*Nic. Heinsio.**Loidam.*

Optaveram te solus absque ullis arbitris convenire. Sed quoniam id nobis non licuit, agam tecum per literas, & intima mea tibi exponam. Ego te virum optimum, prudentissimum ac doctissimum semper judicavi. Et nunc etiam judico: tuamque notitiam magni facio, meque a te diligere maxime volo. Est interim, quod de te querar, qui cum Ser. Reginae nomine munus ad *Ferrarium* deferas, clam me id esse voluisti. Cum tamen id ipsum aliis in hac urbe declaraveris, a quibus id mihi renuntiatum est, & *Bidallius* noster rem ingenue mihi confessus fuerit. Quin etiam nuper cum te de ea re interrogassem, vel dissimulasti vel negasti. Quod certe minime factum oportuit. nihil enim amicos celare fas est. Aut si id licet, omnis amicitia e medio tollitur. ignosco tamen tibi, modo in posterum me ames. Libros, de quibus tibi dixi, si in Italia mihi emeris, rem mihi gratissimam facies. Pretium solvam *Bidallio* cum vectura. Opto, Clarissime Domine, tibi & *Langermanno* nostro prosperum peregrinationis cursum. Pridie Nonas Septembres CIOICLI.

EPISTOLA DCIX.

HENRICUS VALESIUS

*Nic. Heinsio.**Amstelodamum.*

DOleo, quod heri abfuerim, cum domum meam venisti, adeo ut tantum laboris frustra susceperis. Praemonendus a te fueram per famulum, ut te domi expectarem. Eram in aedibus *Fabri Cantarelli*, quo singulis Hebdomadis convenire solemus die Martis post meridiem. Magnaque eo die doctorum hominum turba illic adesse consuevit. Quod si vacuum tibi hodie tempus erit post meridiem, conveniam te domi. Mitto ad te Statium meum a *Nic. Fabro* collatum cum scriptis codicibus. Eo uteris, quamdiu voles. Vale, vir Clarissime. Septimo Idus Septembres CIOIOCLI.

EPISTOLA DCX.

HENRICUS VALESIUS

*Nic. Heinsio.**Romam.*

EGO de affectu tuo erga me, vir clarissime, nec dubitavi antea, nec unquam dubitabo. Te enim virum optimum & constantissimum esse certo scio, qui amicitias, quas semel iniveris, summa fide & constantia retinere soleas. Sed tamen magnopere gaudeo, quod affectum tuum etiam scriptis literis mihi approbare voluisti, ut hoc tanquam pignus haberem animi tui. Equidem in amicitia nolim molestos ac difficiles creditores imitari, qui debitorum fidem semper in dubium revocantes, vix ullis pignoribus & hypothecis contenti sunt. Verum nihilominus ut ingenue fatear, hoc amoris pignore magnopere delector. Hujusmodi enim literarum officiis ali quodammodo mihi & renovari amicitia videtur. Itaque si rem mihi gratam facere volueris, quam saepissime ad me scribes, modo id tibi per occupationes tuas liceat. Quod vero operam tuam mihi humanissime offers, libenter amplector, teque oro ut si quid in Bibliothecis aut apud amicos in Italia reperiens, quod ad Eusebii, aliorumque historiae ecclesiasticae scriptorum illustrationem conferre possit, mihi seponas. Scripsi de eadem re ad Em. Card. *Barberinum*, & ad viros D.D. *Holsenium* & *Allatum*, sed nihil adhuc ab illis exsculpere potui. Promiseras etiam mihi dum hîc ageres, inscriptionem quandam *Lucii Turcii Asterii*, quam te olim legisse dicebas in codice Florentino. Nihil mihi gratius facere potes. Quam si confestim eam ad me mittas. Nam in quodam libello meo, quem Serenissimae Suecorum Reginae offerre decreveram eam inscriptionem inferre constitui, imo, ut verum dicam, jam ex fide tua inserui. Quod spectat ad peregrinationem meam Suecicam, sic rem paucis accipe. *Bochartus* noster eo profectus est absque me. Scripsit quidem ad me, antequam proficiscere-

ceretur, sed tanta cum festinatione, ut appareret solum ipsum proficisci voluisse. Praeterea *Vossius* noster jam dudum nullas ad me literas dedit. Septem enim menses fluxerunt, ex quo literas ab eo accepi, cum tamen ter ego ei scripserim. Itaque ego cum mihi subiratum esse suspicor, idque quibusdam ejus amicis, qui me ejus nomine convenerunt, non dissimulavi. Denique *Bidallius*, cui literas *Bocharti* nostri legendas miseram, quibus mihi significabat se propediem profecturum esse, nullam mihi pecuniam obtulit. Quin etiam torquem aureum, quem ante septem menses mihi & Domino de *Brieux* Cadomenfi offerre jussus fuerat, nondum mihi detulit, cum tamen *Briosio* torquem suum jamdudum transmiserit, ut primum ex *Briosii* carminibus, deinde ex *Bidallii* ipsius confessione didici. Quae cum ita sint, egone in Sueciam proficisci potui, ita contemptus & ludihabitus. Scripsi tamen *Lagerio*, qui a secretis est Ser. Reginae, ut me apud eam excusaret, eique significaret, me nihilominus adhuc paratum esse in Sueciam proficisci, quotiescunque opportuna offeretur occasio. Haec te, carissime Heinse, inprimis scire volui. Vale, vir clarissime. *Langermannum* nostrum meo nomine plurimum saluta. Lutetiae Parisiorum, quarto Kalendas Junias MDCLII.

EPISTOLA DCXI.

HENRICUS VALESIUS

Nic. Heinse.

Romam.

MEmorem te atque fidei optimae virum esse etsi antea minime dubitabam, tamen plane perspexi ex literis tuis, vir clarissime: quod enim mihi anno superiore Lutetiae promiseras, id nunc tandem cumulate persolvis. Cumque ii, qui voluptatis & oblectamenti causa peregrinantur, amicorum fere oblivisci soleant, tu, qui studiorum causa Italiam perlustras, inter tot negotia, quibus districtus es, inscriptionis tamen illius mihi dudum abs te promissae meministi. Itaque singulares eo nomine tibi gratias ago. Expectabam enim inscriptionem illam in dies, quippe cui vacuam sedem reliqueram in ¹ libello meo de Critica, quem Ser. Reginae nuncupare statueram. Sed aliud mihi fortasse consilium capiendum erit. Omnis enim aditus in aulam illam mihi interclusus est calumniis quorundam malevolorum. Ac ni fallor iidem ipsi, qui *Vossium* nostrum exturbarunt, adversus me etiam conspiraverunt. *Vossium* quod mihi excusas laudo. id enim lex amicitiae postulat, ut de amicis nostris bene sentiamus, nec ob levis negligentiae culpam eis succenseamus. Ego certe non id illi vitio verto, quod literis meis non respondit, sed quod calumniatoribus meis fidem adhibuit, a quibus ipse postea est pessumdatus. Sed & nihilominus amo illum, & imposterum amabo. Pro certo enim habeo

¹ Hic nondum prodiit, sed nuper ex Gallia huc delatus, brevi spero, mea opera lucem videbit, licet supremam manum non imposuerit auctor.

beo illum non malevolentia erga me, sed errore ac fraude aliorum inductum id egisse. De *Holstenio* quod scribis noluisse illum respondere literis meis eo, quod ante aliquot annos literis ipsius respondere supersedissem, agnosco culpam meam.

Ἄλλε πάθαι ἃ ἔρεξε δίκη ἰδέα γένοιτο.

Quamquam factum meum excusare facile possem. Morbus enim amanuensis mei & civiles motus, ne ad illum scriberem, obstiterunt, neque vero aequalis in scribendo diligentia a caeco & a lynceo exigenda est. Iterum pauca de *Vossio* nostro, cujus causa magnopere doleo. Si quid certi de eo comperiisti, velim ad me scribas, & utrum speres eum in aulam rediturum esse. Quae enim hîc jactata sunt a *Bidalio*, *Fresnaeo*, *Salmasio*, fidem mihi omnino non faciunt, quippe cum illos & *Vossio* & nobis infensiores esse deprehenderim. *Fresnaeus* quidem nos brevi missionem a Regina accepturos esse mihi dixit. Sed & tu & *Langermannus* his opus non habetis. Quod scribis *Langermannum* nostrum de edenda Anthologia cogitare, laudo ejus consilium. Sunt quaedam apud me inedita ex Palatino codice descripta, in quibus nonnulla observavi, quae ipsum adjuvare poterunt. Frater meus te, & illum salutat. Vale, vir Clarissime. Lutetiae Parisiorum, tertio Kalend. Augustae CIOIOCLII.

EPISTOLA DCXII.

HENRICUS VALESIUS

Nic. Heinso.

Helmiam.

JAmdudum ad te nihil literarum dedi, vir Clarissime, quod te iter agere didiceram, nec quonam dirigendae essent literae nostrae exploratum habebam. Nunc vero salvum te & incolumem in patriam rediisse magnopere gaudeo, tibiue & Cl. V. parenti tuo ob id gratulor. De *Langermanno* nostro idem mihi persuadeo, eum felici cursu domum revertisse. Sed ô factum male, quod libri illi, quos ex Italia convehendos curaveras, in Anglicanorum praedonum manus inciderunt. Spero tamen te auctoritate Serenissimae Reginae non difficile eos recuperaturum. De *Vossio* nostro certiore me facias velim, utrum in Sueciam reversus sit. Ea res hîc a quibusdam in dubium revocatur. Pervulgatissimus in hac urbe rumor est, Aulam Suecicam viris doctis amplius non patere, sperni illic studia literarum, & nescio quos rythmos ac libros inficetissimos in pretio haberi. Idque culpa nebulonis cujusdam, qui Ser. Reginae animum a seriis studiis ad haec ludicra & inania traduxerit. Verum ego his rumoribus fidem adhibere non possum. Melius enim sentio de ingenio Ser. Reginae. De me si quid scire cupis, scias absolutam esse a nobis Eusebiana historiae versionem. Interpretatus sum etiam libros quatuor de vita Constantini, cum oratione ejusdem Imperatoris. Superest oratio tricennialis Eusebii. Scripti Codices Bibliothecae Regiae leve admodum mihi subsidium attulerunt. Audivi ex te, cum Lutetiae ageres, esse in Bibliotheca
V. Cl.

V. Cl. patris tui codicem Eusebii collatum cum optimo exemplari. Ejus specimen aliquod velim ad me mittas, si tibi otium erit, ut intelligam, sintne eae conjecturae duntaxat an variantes scripti Codicis lectiones. Orationem meam de obitu *Dionysii Petavii* utrum nactus sis nescio. Seposui tibi exemplar, quod missurus sum ad te, ubi primum mihi significaveris, qua via & per quos mittendum sit. Vale, vir Clarissime. Lutetiae Parisiorum x. Kalend. Septembres CIOIOCLIII.

EPISTOLA DCXIII.

HENRICUS VALESIUS

Nic. Heinsio.

Holmiam.

Jampridem ad te, vir Clarissime, scribere decreveram, ut ob felicem tuum in Sueciam adventum tibi gratularer. Sed quoniam ad *Vossium* nostrum literas jam dederam, prius ab eo responsum expectabam, ut de adventu tuo tuisque rebus certius cognoscerem. Nunc vero quando & *Vossius* Pythagoricum quoddam silentium indixisse sibi videtur, & ex tuis ad fratrem meum literis intellexi te epistolas nostras desiderare, scriptionis officium non amplius differendum putavi. Singulares igitur ago gratias, quod memoria nominis mei adeo penitus in animo tuo infideat, ut literis meis diutius carere non possis: teque vehementer oro, ut in hoc studio, & in hac erga me benevolentia semper perseveres. Cum antea tibi gratulari decrevissem, ob tuum in aulam Regiam adventum, nunc majoris gratulationis causam mihi esse oblatam magnopere gaudeo. Nam ex literis, quas ad Cl. V. *Capellanium*, scripsisti Serenissimae Reginae recentem erga te munificentiam cognovi. Qua quidem re non minus sum delectatus, quam si mihi ipsi idem honos contigisset. Ita enim res se habet, ut omnes sibi delatum putent, quod dignus accepit, quemadmodum alicubi scribit Symmachus: Contra vero quod indignis & improbis hominibus tribuitur, id sibi quisque bonus ereptum existimat, & injuriam sibi fieri censet. Et quoties quidem vir bonus praemio afficitur, eum, qui beneficium contulit, omnes praedicant. Quoties vero vir improbus honore ac beneficio afficitur, summum opprobrium ac dedecus in dantem redundare solet. Sic plane, ne exempla longius arcessam, Serenissimae Reginae hanc erga te munificentiam omnes hîc magnopere collaudant. In illum vero, quem nosti, plura non dicam, tu per te ipse facile cetera conjicies. *Vossio* nostro parem felicitatem opto, quamquam ei sum subiratus: Idque velim ei nunties. Qui cum ante tres menses literas a me acceperit, nihil tamen adhuc mihi rescripsit, idque tametsi ante biennium plures ad ipsum literas scripserim. Quodquidem qua de causa sic agat, & cur in tam diuturno silentio obstinatissime permaneat, equidem conjicere non possum. Nam quod ad me attinet, nec dicto nec facto ullo eum unquam laesi: sed singulari semper amore eum complexus sum, complectar-

Tom. V.

T t t t

que

que dum vivam. *Langermannum* nostrum velim salutes meo nomine, mihi que quid agat significes. Ego notas meas in Eusebium adorno, quae tibi absolutae fuerint, editionem meam inchoabo. Utrum in bibliotheca Ser. Reginae Codex Eusebii manuscriptus inveniatur certior abs te fieri velim, ut aliquot locorum collationes ad me mittantur: tuum erit pro tuo erga me & erga literas amore id inquirere. Vale, vir Clarissime. Lutetiae Parisiorum xvi. Kalendas Majas MDCLIV.

EPISTOLA DCXIV.

NIC. HEINSIUS

*Henrico Valesio.**Lutetiam.*

Luculentum benevolentiae erga me tuae testimonium atque argumentum est mehercules, postrema, quam mihi scripsisti, epistola, Clarissime & summe vir. Hunc ego affectum plane singularem eo pluris facio, quod bene de te mereri hactenus non sit datum: etsi occasionem defuisse mihi, non voluntatem rebus tuis bene consulendi haud ignoras ipse. *Vossius* officio se functum in danda ad tuas literas responsione non semel jam adfirmavit mihi. Epistolam illam, si ad te perlata non est, apud tabellarium Belgicum fore inveniendam arbitratur, Parisiis: quam eo jam ante tres menses miserit. Consilium Reginae nuperum de vita privata agenda praeterisse te non potuit. Expectamus suspensis animis hujus exitum tragoediae, quot rebus regis bene cupimus. Mensis forsan unius mora superest, ut Regno se subducatur Augusta, & Diadema successoris capiti imponat. Ex Italia redux sub primum nuper in hanc aulam adventum nihil habui prius, quam magni beneficii locomissionem a Regina flagitare, ita rebus familiae nostrae privatis & adfecta parentis valetudine exigentibus. Parum tamen aut nihil promovi hactenus, etsi iterarim identidem easdem preces. Nec liberalitate Regia & splendidissimis promissis a proposito me dimoveri passus sum. Negat tamen illa consensum pertinaciter votis fervidissimis: quin iussit, ut ad iter Spadanum me accingerem, comitatu suo interfuturus. Etsi manum clientium exiguam oppido ex plurimis selegerit, inservituram sibi in via. Iussus est & sequi *Vossius*. Sed is provinciam hanc deprecatur, quod veteres injurias necdum concoxerit. De me certi adfirmarim nihil. Debentur enim parenti hic meo aureorum millia duodecim circiter, suo partim, partim Rutgeriano nomine; id debitum si Regina expunxerit, ut expuncturam se semper est pollicita, atque etiamnum pollicetur, molestiam ineundi itineris nullis coloribus possum subterfugere: cum alia lege nusquam satisfaciendum ab illa fore Patri praevideam. Si destituerit promissa, libertas non destituet, quam ambabus ulnis amplectar. *Langermannus* hanc hyemem in Theocrito se occupavit; quem notis suis illustratum dabit aliquando in lucem. Notae quidem ipsae jam paratae sunt; sed quibus a majori limbo plurimum ornatus accedet. Eusebius tuus salivam eruditae omnibus

mo-

movet. Utinam opus eruditissimum mox videamus! Eusebiani codices manu exarati an in regia bibliotheca ulli servantur non dixerim. Alio enim translata est bibliotheca, nec a me visa, ex quo huc reversus sum. Viciniorē illam opinor esse vobis, quam sit mihi. Exemplar Eusebii inscriptum Florentiae servabatur, non valde antiquum tamen, cum aliis multis Graecis codicibus, apud Ducem *Salvium*. Hos ille omnes me intercedente Reginae donandos obtulit per epistolam. Respondit illa, sed an munus admiserit, haud scio. Non enim inter tantas occupationes, quibus nunc distinetur, consultum duco, curas ejus a rebus seriis ad hasce leviores avocare: praesertim cum post gravitatem sceptri relictam credi omnino velit fore, ut totam sese studiis sit dicatura. Theodoreti exemplar historiae ecclesiasticae antiquissimum in eadem *Salviani* bibliotheca extabat. Vale, vir summe, cum doctissimo fratre, & caeteris amicis. Dabam Upsaliae. Nonis Majis CIOIOCLIV.

Poëmatia mea ut tibi ac fratri tuo offerret meo nomine, virum illustrem *Jacobum Puteanum* rogaram. Munusculi hujus cum non memineris in tuis litteris, facile suspicor, necdum id vobis oblatum esse.

EPISTOLA DCXV.

HADRIANUS VALESIUS

Nic. Heinsio.

Holmiam.

A Mare te coepi, simul ac te Lutetiae Parisiorum vidi, vir Clarissime: sed nescio quo malo meo fato contigit, nullo ut munusculo, quod summo opere optabam, meam erga te benevolentiam testari possem. Quippe & in Italiam profectum esse, paullo antequam historia mea ederetur: & multo post editionem operis, cum jam omnia exemplaria, quae habebam, amicis dedissem, Lutetiam revertisti, ac mox, me insciente & emere parante quod darem, domum rediisti. Quod ideo dico, ut mihi pro tua humanitate ignoscas, aut saltem minus irascare, quod officio meo defuerim, tuo praesertim munere tuique versibus honoratus. Et antea quidem Elegiam tuam cum semel atque iterum legissem, sic judicabam, nihil ejus fieri posse perfectius, & te arte ingenioque ac sublimi spiritu valere, & inter Latinae nostrae aetatis Poëtas Principem locum tenere arbitrabar. Postquam vero tuas litteras vidi, (vidi autem plurimas, cum ad *Menagium* nostrum, tum ad *Maresium*, & ad *Puteanos* fratres scriptas) plane te non Poëtica modo, sed etiam prosa oratione praestare intellexi, & prima quaque occasione oblata, tibi scribere decrevi, ut scires Lutetiae virum esse, qui eloquentia tua maxime caperetur, & amicis tuis annumerari flagrantissime cuperet. Haec cogitanti lecta est epistola tua ad viros Clarissimos *Puteanos* fratres, de Serenissima *Christina* Suecorum Regina. ex qua cognovi te Holmiae nunc esse, & tantae Heroinae studia dotesque eximias fui admiratus. ô fortunatam Sueciam, cui tam clarum sidus illuxit! ô

Tttt 2.

feli-

felices litteratos, quos alloquio suo dignatur, quos partim honorariis, partim donis amplissimis locupletat. Huic *Menagius* noster, cum circa idem tempus *Balzacii* opera Latina nuncuparet, rogassetque, ut ipsius epistolam recognoscerem, rogavi invicem, ut meam ad te una epistolam mitteret, quod ultro se facturum promisit. Sed ut ad Serenissimam Reginam revertam, nummum ejus aureum *Claudius Sarravius*, Senatorum Parisiensium clarissimus atque doctissimus, mihi ostendit, ex altera parte Sole, ex altera Minerva signatum, & ut in eum distichon aliquod facerem, hortatus est. feci, non ut debui ac volui, sed ut potui, quorum versuum partem *Isaaco Vossio*, V. Cl. misi, partem tibi mitto.

*Adspirat studiis jam non Tritonia, Pallas
Christina, & pacem bellaque Virgo gerit:
Quis dubitet binos Solem quondam aethere visos?
En habet & Solem terra Sueca juum.
Splendore aequiparat Solem, virtute Minervam
Christina, & binos induit una deos.*

Quos versiculos, qualescumque sunt, (sunt autem multum infra materiae majestatem) si doctissimae Reginae legeris, plane mihi gratissimum fecerim, idque te plurimum rogo. Deinceps, si voles, erunt inter nos epistolarum librorumque commercia, quanta inter te & *Menagium* esse consueverunt. Historiam Francicam usque ad Pipini Principatum deduco, & jam septem libros composui a morte Chlotharii senioris. Tu quid pares, quidve agat Ovidius tuus, rescribere ne graveris. vale, vir Clarissime, & eruditissime. *Henricus Valefius*, frater meus, te salutat. Iterum Vale, & pro tuo me habe. Lutetiae Parisiorum anno Dom. MDCL. Kalendis Martii.

EPISTOLA DCXVI.

NICOLAUS HEINSIUS

*Hadriano Valefio.**Lutetiam:*

Affectum erga me. singularem, quem eleganti non ita nuper epistola testatus es, Valefi politissime, mirum quanta animi voluptate perceperim. Vidi enim praeter expectationem ultro id oblatum, quod tacito jam pridem desiderio ambiendum mihi proposueram, cum nequaquam ignoraram, quid eruditioni tuae, quid caeteris virtutibus deberetur. Sed quemadmodum laetitiae omni ex parte sinceræ fructus est rarissimus, ita invito me ac nolente accidit, ut epistola illa tua menses fere tres continuos in via haeserit, antequam in manus mihi traderetur. Eram autem in eo totus, ut in Sueciam reverterem. Nunc defunctus itineris longinqui molestiis compellandum te duxi, gratiasque quas possem maximas agendas pro incredibili illa benignitate, qua hominem nullis meritis commendandum amplecteris. Accedit munusculum, quo mo-
ram

ram scriptionis compensem, Claudianus meus: quem ut indulgenter habeas per comitatis tuae genium te obtestor, nam & me absente in lucem prorupit, ut operis typographicis adesse non potuerim, quarum supinitatem ac oscitantiam multis in locis jam animadverti ipse, & in aliis peccatum saepe nullus dubito, quae in typographos derivare frustra studeam, festinationi meae ac inscitiae imputanda. Censura tua nihil gratius offerri mihi possit, non enim ex illorum numero sum, qui humanos lapsus a se alienos arbitrantur. Fac igitur quod amicum decet, & erranti viam monstra. Secundis curis emendabitur, quicquid hac prima deliquerim. Epigramma tuum venustissimum Reginae ostendi, quod illa meritis laudibus prosecuta est, prolixius etiam, ut existimo, laudatura, nisi tuo encomio praeventa esset. Habeo in scriniis carmen luculentum hexametrum virtutibus maximae Principis decantandis destinatum, ex occasione solennis festi, quod imminet. Si lucem viderit, ad te ut perveniat curabitur. Mihi quidem nihil fixum haecenus. Adeo viribus meis id argumentum majus apparet. Historiae tuae Francicae totum alterum quod sperare nos jubes id vero longe gratissimum. De commercio etiam litterario imposterum inter nos frequentius exercendo amplector conditionem & lubens accipio. Nihil quippe mihi jucundius, quam subinde doceri, quid in urbe vestra viri docti moliantur: qua felicitate raro nunc fruor. Nam *Menagius* noster, tam parvus tamque lentus est in exarandis epistolis, ut diligens sibi admodum videatur, si binis ternisve meis semel respondeat. Non enim a me impetrare possum, quin amicissimum hominem justa hîc querela tangam. Quapropter si quid imposterum ad me voles, per Tabellarium Batavum Leidam perferri cura, parenti curae erit, ut ad me postea perveniat. Nisi viam nosti, qua ad Legatum Regis in hac aula vestri illustrissimum mittantur. Juvenalem publico jampridem promissum utinam aliquando absolvas! utinam Harpocracionem frater? cujus auctoris geminum exemplar manu exaratum in Bremensi bibliotheca non ita nuper observavi. qui quidem libri cum Reginae a republica donati sint, Harpocracionem inter illos etiam adfuturum nullus dubito. Possedi jam olim editionem Aldinam ejusdem auctoris manu *Sylburgii* passim emendatam, nactus etiam nuperrime exemplar sum, quod infinitis locis *Scaliger* correxit. Sed de his alias. Amicis omnibus si me de meliori commendaris nota, multum tibi debucero. Fratri praesertim tuo testaris velim, inter eruditionis suae plurimos admiratores non postremo me loco esse. Vale, jucundissime Valesi, & nimium dilatae responsioni, qua comitate es, cave succenseas, quod iterum supplex te rogo, diligentiores me experieris imposterum. Holmiae c1710CL. Eidib. Septemb. Gregor.

EPISTOLA DCXVII.

HADRIANUS VALESIUS

*Nic. Heinſio.**Holmiam.*

INtra paucos dies duo a te uno munera accepi, doctissime Heinſi, Claudianum tuum primum, deinde Poëmatium ad Serenissimam Suecorum Reginam. Ac de Claudiano quidem ut dicam quod sentio, editionem tuam ut ordine temporum postremam omnium, sic utilitate facile primam habendam duco, ac saepe miratus sum, tot te manuscriptos Codices, tot situ victa volumina conferre ac tam diligenter versare, variasque lectiones tanta cum cura notare potuisse. Tuæ ego eruditionis plenas notas cum avide perlegerem, incidi in quemdam Poëtam veterem nondum editum, qui de gestis Berengarii Italiae Regis scripsit, atque ut sum Historiae avidus, nostrae praesertim, gavisus sum magnopere, hunc te auctorem reperisse. Qui si tuus ac penes te est manuscriptus rogo, ut eum quamprimum edendum cures, aut mihi tuo nomine publicandum mittas. Prorsus rem studiosis omnibus, non mihi tantum, gratissimam feceris. Ex tuis in Claudianum notis intelligitur, quantum in Poëtarum omnium sis lectione versatus, multo tamen magis ex carmine tuo ad *Christinam* Reginarum maximam, quod (nescio quam ob causam) Poëmatium, quam Poëma appellare maluisti. Est enim grande ac sonorum, & tanta heroide dignum omnino, ita ut omnes omnibus Poëtis veneres surripuisse, ac in eo opere collocasse videaris. Itaque non censorem me tuum, sed approbatorem ac praeconem puta, ac persuasissimum habe, tot & tantis muneribus me semper tibi obstrictum fore, nec habere nunc, quo liberalitati tuae respondeam, homo in scribendo edendoque piger & lentus. Frater meus pro Poëmate tuo grates tibi quam maximas agit, & salvere te plurimum jubet, atque ut amicis tuis annumeretur rogat, quod & ambire me ac vehementer cupere profiteor, paratus invicem facere, quidquid volueris. Vale, vir Clarissime atque doctissime, Lutetiae Parisiorum Anno *MDCCCLII*. Idibus Martiis.

EPISTOLA DCXVIII.

HADRIANUS VALESIUS

*Nic. Heinſio.**Romam.*

JAM semel atque iterum ad te scripsi, vir Clarissime, nec quidquam a te litterarum accepi. Ex quo prope compertum habeo, neutram tibi epistolam redditam esse. Alioquin (qua es humanitate) rescripsisses. Itaque silentio isto tuo, aut potius infelicitate mea nihilo infractor, tertio stilum sumsi, si quid a te epistolarum possem elicere. An sit mihi gratior ulla, quamque
ma-

magis nostra copiam contingere dextra? aut quantum mea interest scire, quas vento accesseris oras, quas urbes peragraveris; quas Bibliothecas circumiveris, quid Codicum MSS. excusseris, legeris, exscripseris; ubi nunc verferis, quae loca sis petiturus. Pro certo & persuaso habeas velim, nihil mihi harum rerum notitia accidere posse jucundius. Apud nos frigent literae, & bello civili media hyeme flagramus. Multi eminentis dignitatis viri Lutetia Parisiorum emigrant. Cardinalis *Mazarinus* in Galliam redire dicitur armatus, quem dux Aurelianensis arcere transitu cogitat. Haec quorsum evasura sunt ipsi viderint. Sed & ex Suecia nuper allatus est subito nuntius horribilis, Reginam sceptrum suum Principi Carolo, aut alii nescio cui, tradere velle, cessionemque Regni Ordinibus gratam & ratam fuisse. idque & *Vossii* nostri epistolae probare videbantur. Quod si verum est, magnum Musae praesidium amittunt. Interea magnam studiosi omnes jacturam fecimus morte *Jacobi Sirmundi*, magnam morte *Petri Puteani* Viri Clarissimi, & *Dionysius Petavius* hemicrania sic laborat, ut credatur non diu esse victurus. In utriusque obitum orationem composuit frater meus, quam tibi mittet. Has ego scribere coeperam, cum me febris invasit, & per duos fere menses vacare studiis vetuit. Postquam convalui, epistolam, mense Decembri inchoatam, mense demum Martio absolvi. Qua mora factum est, ne Elegiam meam de morte *P. Puteani* possem tibi mittere. *Menagius* noster opera sua Graeca, Latina & Francica edit. Tu vero, mi Heinssi, fac Antenoreae urbis, fac Bibliothecae memineris, & praesertim Poëtae illius, qui de vita Berengarii Regis scripsit. Immo vero fac memineris mei; gratius mihi facere nihil potes. Hoc omnibus urbibus, hoc Bibliothecis, hoc Codicibus, Archetypis universis, divitiis etiam quibuscumque facile antepo- nam. Vale, vir Clarissime. *Henricus Valesius*, frater meus, te salutat, Eusebiumque auspiciis Cleri Gallicani convertit. Ego Francicae me reddidi Historiae. Data Lutetiae Parisiorum Anno MDCLXII. III. Idus Martias.

EPISTOLA DCXIX.

HADRIANUS VALESIUS

*Nic. Heinssio.**Romam.*

U Sque adeone infaustae & adversis Musis scriptae superiores meae litterae fuerunt, ut te aliquo maerore affecerint? ô tabulae marito Veneris dandae, & omnibus Ovidii execrationibus dignae! Equidem, mi Heinssi, duarum priorum epistolarum ad te mearum mentionem feceram, non ut silentium reprehenderem tuum, aut onerarem pudorem; sed ut scires saepius te admonitum esse promissi, nec (quemadmodum accidere consuevit) in tam longo & laborioso itinere, inter tot & tantas occupationes, rem mihi optatissimam, studiosis etiam historiae non inutilem futuram, ex animo tuo effluere sineres.

Ita-

Itaque ego officio meo deesse non debui, aut in scribendo laceffendoque piger esse, ut quod petebam impetrarem, tu tantulam litterarum mearum jacturam moleste ferre non debuisti, nec excusationes quaerere, cum culpa vacares. Te quidem, qua es comitate, qua fide, promissi memorem fuisse, nec monitore opus habuisse docet tua ad *Joannem Rhodium* (quisquis ille est) epistola Patavium missa, & quod ille de vita Berengarii tibi rescripsit. Tuam vero in primis diligentiam laudo & osculor, qui totum opus ex ipso autographo describi malis, multo, si ita fiat, emendatius futurum ac majoris auctoritatis: & a te veniam peto impudentiae, cui tantopere molestus esse sustineo. Tuum erit invicem te ulcisci, & aliquod mihi onus imponeri. Intelliges nihil me tua causa facere recusaturum. Interea valde laetor te Ovidio & Claudiano, clarissimo Poëtarum pari, manus admove. Ex alterius editione apparet; quam diligenter alterum sis emendaturus, & quanto correctiorem melioremque facturum. Vale, vir Clarissime, & brevitatem epistolae infelicitati temporum imputa, non negligentiae. Inter Regias copias pro Cardinale *Mazarino* pugnantes, & Regiae stirpis Principum exercitus adjutore Lothariensium duce, eum oppugnantes constituti sumus. *Henricus Valesius*, frater meus, *Rolandus Maresius*, vir Cl. salvere te jubent. Data Lutetiae Parisiorum Nonis Junii. CIOICLII.

EPISTOLA DCXX.

HADRIANUS VALESIUS

Nic. Heinsio.

Holmiam.

Accepi tandem, vir Clarissime, Panegyricum de laudibus Berengarii Caesaris, quod carmen pridem a te missum, ut ex aliquot litteris tuis ante cognoveram x. Kalend. Februariis Anno CIOICLIV. per Cl. *Puteanum* demum ad me pervenit. Carmen illud, simul atque mihi redditum est avide perlegi relegique, ut sum historiae, praesertim enim nostrarum avidissimus, animadvertique compositum esse a Poëta aequali aetatis Berengarii senioris, Patavino aut Veronensi, qui proinde ante Annos DCCL. floruerit, ac cui fidem haberi in multis oporteat. Etsi enim Poëtae, praesertim laudes viri Principis canenti, nequaquam credendum esse videatur, tamen mihi persuadere non possum, adeo eum Panegyristam impudentem ac sine fronte fuisse, ut in relatione rerum gestarum Berengarii pro veris falsa ingereret, vanitatis statim ac mendacii ab omnibus popularibus suis convincendus. Quin aliqua de industria praetermiserit, aut in gratiam Principis sui paullo aliter quam gesta sint, interdum retulerit, negare non audeo; praesertim in quibus ab omnibus auctoribus dissentit. Comparationes saepe ex Virgilio & Statio aliisque magni nominis Poëtis excerptas, operi suo inseruit, ut tum omnia jejunis scriptoribus & paupertatis suae sibi consciis licebant. Existimabant, credo, plagiarii isti opera sua vete-

veterum autorum monumentis superfutura, tumque pro suis habitum iri, quae ab eis acceperant. Carmen est si non elegantia, certe vetustate venerandum, & dignum quod edatur atque ab historiae studiosis evolvatur. Quo nomine maximas tibi gratias ago, qui promissi tui memor mihi apographon illud miseris, quod an transcribi tantummodo ac tibi remitti, an a me servari edique velis, ut rescribas oro. Nam in litteris, quae ad me Anno MDCCL. prid. Kalend. Jul. Lugduno Batavorum dedisti, professus es hoc te mihi poëma, si tamen tanti duxisses, edendum commissurum. Si cum notis a me permissu tuo vulgabitur, non sine nominis beneficiique tui grata mentione vulgabitur. Invicem opera mea utere, ut libet. Paene enim irascor nonnunquam, quod me tibi satis amicum esse non putes, aut saltem non putare videaris, qui nihil imponas oneris, nihil imperes. Scire pervelim, quid rerum Holmiae agat Ovidius tuus, quem quidem a te editum minusculis litteris, & iterum multo auctiorem pleniorumque brevi edendum esse audio. Id certe Cl. *Capellanus* nobis apud *Menagium* nostrum nuper referebat. Utinam eximius Poëta, per te nitore suo restitutus, doctis a te notis illustratus in lucem exeat, & in manus nostras diu expectatus veniat! Cl. *Menagius* undiquaque colligit, quae in maximam Reginarum laudes a nostris congestae sunt patrio Latinoque sermone. Hoc sibi onus a Rege ipso delegari, librum typis ac sumptibus Regiis vulgari curabit per amicos, quos, ut scio, multos & magnos habet. Cl. *Puteanus* fratris sui opera aliquot edidit, & reliqua editurum se profitetur. *H. Valesius*, frater meus, Eusebii historiam Ecclesiasticam jam transtulit notaeque nunc meditatur & properat. De me ne taceam, Historiae Francicae usque ad Pipinum Regem extremam manum impono. *Maresium* nostrum nuper amissimus, annos natus circiter LX. Dicebatur, cum insomnia aliisque incommodis laboraret, pulverem veneficum bibisse inscientibus suis, qui ex stibio confectus apud nos impune grassatur: dum medici inter se contendunt, & alii pro remedio stibium, vulgo antimonium dictum; alii pro veneno habent. commercium epistolarum inter nos te peregrinante intermissum, longo intervallo repetere cupio, nisi tibi molestum est. Vale, vir Clarissime, & me tuo illo munere, ac multo magis tuis virtutibus, tua doctrina ac humanitate singulari devinctum puta. *Vossium* ac *Langermannum* illustres viros, si tamen Holmiae sunt, meo nomine saluta. frater meus ad te una mecum epistolam mittit. Data Lutetiae Paris. Anno ^PX CXCIV. iv. Kalend. Februar. Exemplar panegyrici istius, quod misisti, a quo scriptum, & cujus manu emendatum fuerit, nosse aveo. Iterum Vale.

*Hadriano. Valesio.**Lugetiam.*

V Elleji Paterculi, castigationibus nonnullis a me non ita nuper illustrati, exemplar ad te perferri haud sum passus, Valesi clarissime, quod non nisi subitaneam operam perfunctoriamque huic scriptori navaverim, multis jam aliud annis agens, & nullo Bibliothecae meae adminiculo, quam in Suecia reliqueram, instructus, ac magis obsecutus auctoritati viri in amplissima dignitate constituti, qui editionis novae flagrabat desideriis. Ex illo manum secundam libello admovi, & multa addidi, multa in melius mutavi, prioribus conjecturis damnatis, ut spes sit digniorem fore, qui conspectum tuum subeat, si aliquando curis repetitis limatior est proditurus in lucem. Quod si, quae tu ad illum jam olim observasti, communicare mecum haudquaquam gravaberis, quicquid horum est, meis accessurum lucubrationibus aut iis inferendum fore, non est quod a te dubitetur. Virgilianum locum Aeneidos sexto, de spectata Aeneae pietate castigavi, ut circumfertur in editione mea, fide optimorum vetustissimorumque codicum secutus: Quo & Nasonem in Fastis allusisse per est verisimile hisce versibus,

*Hinc satus Aeneas, pietas spectata per ignes,
Sacra, patremque humeris altera sacra, tulit.*

Fratris tui, viri summi, adnotata in Harpocratonem jam, credo, describenda curavit *Elzevirius*, in quo procrastinationis non est culpa. Sed cunctatur nescio quare bibliopola, qui ipsum Harpocratonem suscepit edendum, aeri alieno, ut ferunt, aliquantum obnoxius. *Langermannum* nostrum jam diu adhortatus essem, etsi aeger ac invalidus, de danda nobis opera, ut *Lindenbrogiana* in *Ammianum* notae describerentur, nisi *Cl. Graevius* ejus negotii curam omnem in se recepisset, quem, quia cunctari video, ipse partibus quoque meis functus sum. Respondet autem amicus noster hoc jam a se agi, ut *Lindenbrochiana* describantur, nec dubito. Ceterum arbitrio tuo relinquo, numquid *Ammiano* addendas censeas, quas *Mariangelus Accursius*, ac post *Janus Gruterus*, & *Marcus Suerius Boxhornius* in hunc scriptorem dedere notas. Non quod tanti sint, quae cum doctissimis fratris tui ac tuis lucubrationibus una legantur, sed quod is sit seculi nostri Genius, ut scriptores antiquos cum omnium commentariis editos gestiat videre, praesertim cum omnes istae animadversiones paucis pagellis comprehendi possint. Agebat olim mecum in Italiam profecturo Frater tuus de Vaticano *Ammiani* Codice, cujus excerpta nescio an post sit consecutus. Id certe exoptandum duco; erat enim is codex, etiam forte jam adhibitus, notae vetustissimae. Vale, virorum praestantissime, & affectum, quem mihi tot jam annis illibatum conservasti, diurnare in posterum sine. xii. April. cicioclxvvi.

EPISTOLA DCXXII.

SAMUELUS BOCHARTUS

*Nic. Heinsio.**Lutetiam.*

Geminas, quas ad me scripsisti, ex quo venisti in Gallias, vir doctissime, & mihi multis nominibus charissime, vide quibus commiseris. Egc enim sancte testor, me ante hanc diem nihil quicquam a te accepisse praeter illas, quas procuravit *Menagius* noster non ita pridem scriptas, sed in Belgio, & nisi fallor Leidae, quibus respondi illa ipsa die, qua acceperam: quam misere timeo ne inscriptio causa sit, cur tuas literas resignent homines curiosuli. Neque enim Pastoris titulus literis praefigi solet, multo minus pastoris ecclesiae reformatae, quem titulum nobis invident adversarii. Itaque si posthac scripseris, solum inscribe nomen meum, & locum si vis in quo habito, quamvis nulli civium ignotum. Et ut spero literae tuae melius in posterum curabuntur. Sane a Dno *Viquefortio* didiceram te venisse Lutetiam, & in Italiam iturum propediem, jamque esse in procinctu. Itaque quod unum licebat per angustias temporis illum rogavi nudius tertius, ut te meis verbis salutaret. Nunc tibi faustum iter omnibus votis exopto, atque adeo tam breve ut in Suecia possim tui conspectu frui. Quo deo dante proficisci sum plane certus Mense Martio proximo, ut Reginam illam incomparabilem, de qua non sine stupore cogito, propius intueri liceat. Quod pridem habeo in votis, neque tamen licebit ante illud tempus exequi, quia vel si jam discederem, me in ipso itinere hyems interciperet. De his plura scripturus *Vossio* nostro jam desino, teque cum literarii orbis phoenice, id est amplissimo parente tuo, iterum atque iterum saluto. Raptim Cadomi Pridie Nonas Septembr. Anno *MDCLII*.

EPISTOLA DCXXIII.

SAMUELUS BOCHARTUS

*Nic. Heinsio.**Lutetiam.*

Angebar animo, antequam scirem an meas recepisses, vir idem doctissime atque humanissime, veritus, ne me crederes hominum inficetissimum, qui a te toties provocatus non respondissem. Itaque me bearunt postremae tuae, quibus ex hoc metu me commodum liberaisti, atque alia significasti, quae me scire non parum intererat. In his te priores literas Rothomagensi hospiti tuo commisisse ad sororium meum *Langlaeum* deferendas, ad quem scripsi jam modo, ut ab illo docear, quid de iis factum sit, & de Gronoviano libello his adjecto. Posteriores, quas *Bidalio* tradidisti, necdum accepi. Italiam repetenti in Reginae gratiam serio gratulor, atque assiduis precibus orabo, ut hoc iter sit prosperrimum, profectionem diutius si differs, timeo ne hyeme

appetente iter per Alpes sit molestum, nec maritimum tutum satis. Et quo discedes maturius, eo promptior erit reditus, quod unice exopto, ne in Suecia te desiderem. Quo cur ante Martium non proficiscar, causas habui fonticas, quas significavi *Vossio* nostro, adeoque ipsi Reginae Serenissimae. Literas praeterita hebdomade scriptas accepit haud dubie *Bidalus*, & curabit ut solet. Quamvis id futurum sit intempestivum, tamen libenter resciverim, quibus me rationibus ad hoc iter ante hyemem suscipiendum sollicitabas, si rescribere non sit grave. Miror te adhuc dubitare an carmen tuum acceperim, cum quid de illo sentiam *Vossio* nostro significaverim non semel; nempe post Musas natas ne a patre quidem tuo, poetarum hujus saeculi facile principe, quicquam elegantius fuisse scriptum. Te Virgilium, Statium & Claudianum ita aemulari, ut hunc videaris penitus imbibisse. Nempe tam grandis poetarum Majestas animo tuo inhaeserat altius, quia in illam recens scripseras. Quod opus donec videro, impatientia torquebor, cum quia auctores unice amo, tum quia id habeo persuasissimum, nihil posse ab illo proficisci quod non sit sane valde accuratum. De lectione Runae Suecicae, quam a *Blondello* habui, impegi in ipso limine. Quia *Runae* vox quid significet ignoro juxta cum ignarissimis. Ignotus etiam est auctor, qui non praestabit, satis scio, quicquid promittit. Tu mihi in utroque, si placet, facem praeferes. Aveo etiam id scire, quam historiae partem attingat Sallustianum illud fragmentum a Cl. *Vossio* repertum, quod ut publici juris quamprimum fiat rei literariae multum interest. Haec dum scribo mihi commodum afferuntur literae illae tuae, quas *Bidalio* commiseras, quibus in Sueciam iturientem iis verbis accendis, ut mei non sim compos amplius. Atque id mihi sit gravissimum, quod illas eo tempore non acceperim, quo tu scripsisti; quia tunc fortasse potuisset mutari sententia. At in quo statu res sunt, non est locus poenitentiae, quia ut ipse agnoscis, jam itineri tempus non est relictum. In hac mora id me solatur, quod si jam discessissem, in Suecia te non vidissem. At vere discessurus te ex Italia reducem fortasse habebo viae comitem. Quod mihi bonum si contingeret, illud in magna parte felicitatis ponerem. Iterum in hoc itinere omnia fausta tibi precor. Vale. Data Cadomi XII. Kalend. Octobr. Anno Ch. MDCLII.

EPISTOLA DCXXIV.

NICOLAUS HEINSIUS

*Samueli Bocharto.**Holmiam.*

Quandoquidem nunquam satisfacio mihi in te aestimando; vir summe: debebam, fateor, venerationem, qua virtutes tuas complector, constantissimam frequentius per literas testari. Nec tamen sine magna veniae impetrandae spe a me peccari confido. Nam & benignitatem morum tuorum eximiam multis argumentis habeo perspectam, & cum rarissimos ex Suecia

cia nuncios accipiam haftenus, rariores autem expectem impofterum, quod compellare amicos non refponfores permoleftum fit, rerum tuarum vivo ignariffimus. Hibernandum tibi fore in Septentrione unus non ita nuper *Voffius* me docuit. De rebus meis utinam certi viciffim aliquid affirmare poffim! Cum nihil eorum hinc intermiferim curare, quibus regium favorem fperaram confequi; deque bibliothecis venalibus aliisque rebus quicquid fuccurrebat abunde perfcripferim, adeo tamen nihil refponfi fero, ut parum abfit, quin operam meam fordere Dominae agnofcam. Menfes jam totos feptem meo aere meisque expenfis hinc vivo, regis fubfidiis deftitutus. Pollicetur quidem *Holmius* fore reftituenda omnia, fed cum de reditu in Sueciam meo fatis fit incertum negotium, facultates meas, quas peregrinationibus affiduis fatis fuperque attrivi, ut profligare pergam, nequaquam videtur confultum. Cum igitur fupplex orarim Dominam, ut ad paternos lares liceret mihi reverti, ita conclamata Parentis optimi poftulante valetudine, atque illam pro fingulari fua clementia precibus meis annuiffe intelligam; cum fororis meae marito jam egi, ut de pecunia, quanta quidem videretur neceffaria, partim ad iter conficiendum, partim ad aes alienum, quod his in oris contraxiffem, expungendum, mihi profpiceret. Haec ubi in promptu erit, viae me committam. Germaniam haftenus mihi non vifam perluftrare decrevi, ut ultimis fignificaffe me literis recordor. Beneficium interim a te promitto mihi fingulare. Nimirum ne graveris indicare, literasne illas, quibus Suecia interdendum fore mihi minatur Protomedicus, nifi cum adverfario *Alaflore* in gratium rediero, Regina iubente exararit. Si adfirmaris ejus mandato fcriptas, rebus meis tempeftive confulendum erit. Non opinor tamen, cum longe ab his diverfa fperare femper juffus fim, ne veriffimile fiat, promifforum dememiniffe incomparabilem Reginam. Quicquid fit, ad omnes Protomedicorum minas occallui. Non enim tam indulgenter mecum egit haftenus fortuna, ut chariorem illam exiftimatione mea debeam habere. Pertinax mihi olim cum ambitione lucta fuit, de qua poftquam triumphare coepi, animos indomitos gero, & nihil in rerum natura magnopere aestimantes praeter unicam virtutem. Hunc nodum Gordium, quo arctiffime Augusta me conftriktum tenet, nulla faevientis fortunae injuria, nullae Protomedicorum artes diffolvant. Aeterno cultu regias virtutes profequar, & tum quidem maxime, cum inter fuos me numerare non dignabitur. Hoc unum eft, quod polliceri de me poffum. *Alaflorem* tum amare & laudare incipiam, cum coepero virtutem odiffe. Aeftimet & adoret beluinos mores in Cyclope fuo Protomedicus: non invideo illi hoc gaudium; dum mihi diffentiendi libertatem non eripiat. Inter has turbas diebus proxime elapfis optatiffimus de parentis valetudine in melius paulatim eunte nuncius me plurimum oblektavit. Etfi enim ea eft aetate, ad quem perveniunt pauci, me tamen abfente terris illum fubduci nolim. Literas tuas fi *Georgio Furftenheuffer* Regio Noribergae confiliario exhiberi cures, dubitare noli, quin ad me fint perferendae. Vale, virorum Maxime, & amicis communibus me commenda, Clariffimo imprimis *Naudaeo*: compellatus ille jampridem a me effet; fed

respondendi necessitatem nolui imponere viro optimo. Panico enim quodam terrore consternatos omnium apud vos animos esse video. adeo misere metuunt ne Alastoras infensos experiantur, & fortunas suas in discrimen vocent, si meam consuetudinem admittant. Mirer certe, si Protomedicus ausit ad meas respondere, nisi impetrata ab *Alastore* venia. Vale iterum. Florentiae Anno MDCLII. XXI. Dec. Vix fieri possit, ut ante Martium mensem Italia excedam.

EPISTOLA DCXXV.

NICOLAUS HEINSIUS

Samueli Bochartio.

Holmiam.

CUM diebus proxime elapsis sermonem minime Laconicum de rerum mearum statu tecum instituerim, easque literas Hamburgum mittendas curarim ad *Michaelem Finchlernm* negotiatorem illa in urbe satis notum, ac *Johannem Holam*, nostri amicum, (ut ad te perlatas non esse nefas sit suspicari) quod iis nunc addam nihil fere habeo in promptu. Velim tamen ex te intelligat Domina, ad plures nuper abiisse Romae *Franciscum Angelonum* Canonicum. Collegerat is antiquitates ac res naturales plurimas majori cura ac sedulitate quam peritia; ut e scriptis *Tristani* vestratis apparet, quicum simultates hic noster exercebat. Omnia ea nunc prostant venalia, sed quibus Princeps *Ludoviscus* dicitur inhiare. Discessus ex Italia meus magis quantum video magisque protrahitur: quod me nolente fit ac invito. Cum enim alia non desint, quae me domum trahant, ut proxime significavi, tum valetudo inprimis mea, quae nutat jam multo tempore. Ex quo enim Alpes anno praeterito procellis atrocissimis ac nymbis hibernis me objecerunt, tentor exerceor febriacula assiduus, levi quidem illa, sed quae tamen augeatur potius quam decrescat. Vitae longioris ut sum minime cupidus, sic fatali necessitate opprimi hic terrarum tamen nolim. Ad Illustrissimum Cancellarium hic scripsi, ut vides, quod toto, quo Bataviam deserui tempore, non est factum, & fieri citius debuisse agnosco. Optime enim de me meritis est vir ille incomparabilis. Epistolam, quaeso illi in manus trade, ut si quid fortassis velit reponere, id quammittendum sit via doceatur. Sin minus, per amicos tandem, ut tuto curetur, operam da. Protomedicum regium quod spectat, doleo simultates mihi cum illo intercedere. Amavi hominem semper, quod me ab illo vicissim amari crederem. Decipi tamen me & tota errare via intellexi postea invitus. Intermittas necessitudines quominus redintegrem, per me non stabit. Cultum tamen si deberi sibi a me arbitratur majorem illò, quam praestiti haecenus, opinionis suae multum fallitur. Nihil enim aut minus in amicis aestimo aut magis in adversariis contemno, quam secundam fortunam. Literas tuas qua via ad me curares jam non semel monui. Si minus ea videtur tuta, *Vossio* committam. Vale, Clarissime & optime virorum, meque omni cultu ac veneratione tuum non averfare. Florentiae Anno MDCLVIII. prid. Kalend. Januar.

EPI-

EPISTOLA DCXXVI.

NICOLAUS HEINSIUS

*Petro Bourdelotio.**Holmiam.*

Hesterno die oblata mihi fuit tua epistola, vir Amplissime, qua edoctus sum, tres mearum tantum ad te pervenisse, ex quo Lutetia digressus fui, cum septem & plures, si recorder, scripserim. Tuas vero, quarum meministi, nullas vidi. Ad *Bidalium* fuisse missas suspicor: cujus pleraeque in via perierunt; idque Lugdunensis cujusdam negotiatoris, quem amicum sibi credebat, cuique rerum mearum curam commiserat, accidisse perfidia fateatur ipse. Commendatitias omnes recte curavi: praeter illas, quas *Alexandro Marfo* Medico inscripseras. Abest enim is ut plurimum ab hac urbe. A Praefide *Liargio* responsum Taurino, nisi fallor, ad te dedi. Cardinalis *Barberinus* cur nihil reponat, causam ignoro, sed suspicari licet ex rumusculis aulicorum. Imaginem vivis coloribus expressam Dominae summopere is desiderat: qua de re cum scripserim in Sueciam non semel, nihil tamen responsi fero, solemni admodum infelicitate mea. Honorifice profecto & incredibili benignitate me excepit, credo ut monumentum aliquod extaret affectus luculenti, quo *Urbanus Octavus* parentem meum semper prosecutus est. Nam ad prandium familiariter invitavit, & post ambulationem pomeridianam per suburbana urbis rudera, domum ipse me deduxit, frustra deprecantem. Silentium tuum tam pertinax mirabar valde, ne quid dissimulem, donec ex Batavia infausta omnia nunciata sunt, ex amico videlicet inimicum te mihi factum, recitari palam in Salmasianis aedibus tuas literas, quibus quam bene mihi velles, abunde appareret. Auget suspicionem tua epistola, qua auctor mihi es, ut adversarium atrocissimum placare studeam: idque fieri posse omnium commodissime, si laudare illum incipiam in meis literis. Ad quae omnia, quantum fieri poterit, accuratissime respondebo; ea tamen lege, ut libertati ignoscas, si quae dolor iustissimus verba inimitiora expresserit. Oportet igitur, mi Bourdeloti, ut aut simultatum nostrarum prorsus sis ignarus, si hoc non fateris, in studia partis adversae sis pronissimus, qui exigas, ut cum hoste capitali, qualem recte se vocat, redeam in gratiam. Egone laudem hominem impurum, qui annis totis viginti paternae & meae existimationi (quam vita chariorem habemus) scelerate est insidiatus? qui omnem movit hactenus lapidem, & adhuc movet, ad evertendas fortunas nostras? Quo autem laudem nomine? An ob cruditionem, qui in scriptis passim suis bestiam & asinum parentem meum vocavit? An ob candorem? atqui pice nigriorem ipsi ejus amici fatentur. An ob benignitatem morum? At nihil illo magis est maledicum ac malignum ut testantur scripta. An ob devotum nobis animum, qui parvo antequam ex Batavia discederem tempore, praelegi jusserit mihi litteras suas, quibus me & parentem, nebulones; ac impostores appellabat? An ob ingenium? qui sive vorfa
sive

sive prosa scribat oratione, adeo scaber est & impolitus, ut risum emunctae naris hominibus maximum jure exprimat, & sine fastidio legi non possit. Quo igitur nomine laudatum illum velis, primo sim docendus. At magni facit illum Domina. expertus scio, mi Bourdeloti, vel te non adfirmante. Magni etiam fecit parentem meum & Avunculum *Gustavus Magnus*. Nec si ille nunc nobis est felicior, ideo etiam melior sit dicendus. Hae rerum aulicarum sunt vicissitudines. Posteritatis erit judicium, utrum illius scripta de *Christina Augusta* melius, an mei genitoris de *Gustavo Magno* sint merita. Quāquam quid compono utriusque scripta, cum ille, ne verbo quidem unico cultum hactenus publice sit testatus, quem optimae Principi debebat. Hoc ubi fecerit, tum videbimus, quam felices ejus conatus sint, qui alienis laboribus tanto cum supercilio audet oblatrare. Sed fingamus viri disertissimi dignos cedro Panegyricos *Christinae Augustae* inscriptos extare luculentos, & omnibus teri manibus, & legi cum applausu, quam parenti meo obtigisse felicitatem livor ipse inficiari non potest, quas, quaeso, legationes obivit, quam Reginae operam probavit unquam in republica administranda. Huc si recurrendum sit, praesto erit *Rutgersius* noster, qui annos duodecim continuos in praecipui momenti rebus fidem atque integritatem Regi Maximo exhibuit, donec mors intempesta obsequiis illum subduxit. Haec ad os isti rabulae obstruendum sufficere debebant, nisi pudoris esset decocti. At in Sueciam non licebit reverti, & semper male mecum agetur, nisi amicum illum experiar. Non irrepsi clandestinis artibus in aulam, ut tu videris existimare, mi Bourdeloti. Nunquam ea via fortunas tentavi. Vocatus veni in Sueciam: nec poenitet. Sum enim eam in clementissima Principe expertus benignitatem, cujus etiamnum vel sola memoria pudorem meum onerare possit. Rogatus ut operam illi meam & obsequia devoverem, detrectavi: non quod habitum mihi honorem nequaquam intelligerem, sed quod agnoscerem humeros isti oneri vix pares, cum tenax libertatis, & vitae rusticae, quam aulicae, naturae quodam occulto instinctu magis aptus, multa in me ipse requirerem, quae ad favorem tantae principis mihi conciliandum essent necessaria. Nec dedignata est id ipsum a parente meo post contendere Regina incomparabilis humanissimis literis, quibus, ut par erat, manum dedit senex noster; transtuli igitur fortunas in Sueciam, sed ita ut dignitates aut honores multos nec ambiverim, nec consecutus sim. Stipendium ullum multo minus. Quid ergo nocere mihi possit adversarius non video. At melioris fortunae spem intervertet. Ego vero nihil speravi unquam in aula praeter unum beneficium, id quia non obtinui, conjecturam non vanam inde feci, quid caeteris fortunis esset futurum. Ab insultibus adversarii tutum me fore semper est pollicita Domina, cum suspicaretur, de fortunis in Sueciam transferendis ea de causa me tergiversari. Ea promissa si destituent, feram, ut potero. Non enim adeo est miserum, ac tu putas, in solo paterno vivere. Ab aliis, qui immensas in aula corraferunt opes, animum tam abjectum & servilem expectare possis, a me non potes. Omitte igitur augurari mihi Vossianum fa-

tum:

um: qui poenas meritas dedisse se fatetur, quod in aulam protraxerit hostem infidum. Tu cave, ne & tanti tibi constet ejus amicitia, quanti huic quem dixi *Vossio*, quanti *Grotio*, *Heraldo*, atque aliis plurimis, optime de illo meritis constitit. Sed simultatum oblivisci pulchrum est. Ostende mihi cum quoquam adversariorum (quos habet innumeros) in gratiam rediisse Cyclopem istum: ego ostendam foedus concordiae cum parente meo ab illo initum & subscriptum, intercedentibus Academiae Lugduno Batavae curatoribus, perfide fuisse violatum. Quod addis coli a me amicitiam non posse cum amicis, quos habeo in aula, nisi illum placaro, ne illud quidem me movet. Esse enim tam delicatum illum, ut hoc vix ferat: unde colligo, cur tu tanto tempore tacueris. Sed ad rem, colui amicitiam in Gallicum *Sarravio*, cum *Puteanis* fratribus, cum *Menagio*, cum aliis ejus amicis: quod illi licere sibi existimarunt. Si amici, quos in Suecia communes habemus, partium studio se teneri arbitrantur; sint in partibus per me licet. Ego tam serviles amicitias non magnifacio. Nemini invito meae literae molestae erunt. Si alios non habuero amicos, quam ejus hostes: jam ab amicis abunde mihi erit prospectum, quos per universum terrarum orbem infinitos, ut jam dixi, habeo. Si Sueci amici deerunt, non desunt in patria, in Italia, in Gallia, & quidem plures, quam quibuscum possum literarium exercere commercium. Patiar igitur perire potius fortunas illas, de quibus nunquam bene speravi, quam existimationem meam vel in levissimum vocari discrimen. Si per illum non licebit mihi Dominam laudare publice, at tacita veneratione virtutes ejus prosequi licebit. Ad Annales interim Bataviae scribendos potero calamum convertere. Et pius est patriae facta referre labor. Mones illic terrarum me vivere, ubi morum civitas maxime est in usu. fateor. Sed & illic vivo terrarum, ubi simultates exercentur perpetuae. Vixisti tu quoque in his oris; & tamen aulam Condaeam deseruisti ob offensas leves. Nec tamen eo sum ingenio, qui immortales inimicitias amplectar: hanc adversario scabiem relinquo. Ne te quidem judicem detrecto. Sed obsequium praestare illi detrecto, qui contumeliis & injuriis modum non ponit. Proferantur offensae causae in publicum, tu id ipsum ab amico tuo exige; tum facile apparebit, utrius causa sit melior. Ait *Miltono* multa a me subministrata. Quod mendacium, ut caetera, quae jactat, est scelestissimum. Caput & fortunas devoveo, si hoc probare possit calumniator. Deus mihi testis erit, me nescivisse *Miltonum* esse in rerum natura, antequam ejus Apologia venalis mihi fuit exhibita ab *Elezviriiis*. Pari impudentia ausus est duos tresve libros famosos, ut vocat ipse, patri meo publice adscribere: quos pater non magis, quam tu, scripserat. Sed de his ejus calumniis & imposturis melius publice agetur. Expecto tantum, ut vel verbo me tangat unico, in illa, quam *Miltono*, parat, responsione. Tum provolabunt statim in publicum poemata, in quibus ad satietatem defricabitur. Ipsi ostendam, quam ignarus rerum ejus fuerit *Miltonus*; & quam nihil dixerit eorum, quae reipublicae literariae intererat, non ignorari. nec parvo constabit illi mentiendi libido. Si in partibus erit Domina, ut tu minaris, &

fractus mihi illabetur orbis, impavidum ferient in ruinae: in omnem fortunam me paravi. Quanquam non est ejus illa indolis, ut pietati nesciat ignoscere, aut non intelligat, quo parentibus illatae injuriae animo sint ferendae. Tibi vero, mi Bourdeloti, auctor sum ut a componendis, quod frustra tentabis, hisce simultatibus animum convertas ad obtinendum a Domina beneficium de meo in patriam reditu. Id enim jam ab illa bis rogavi. Partem Ovidii quod ais Dominae exhibitam: ego totum missum credidi. Elegiam quoque ad vos perlatam laetor. Salveat *Wullenius*. Vale CIOGLII.

EPISTOLA DCXXVII

P E T R U S S E G U I N U S

Nic. Heinso.

Hagam.

SUavissima, qua me dignatus es epistola, existimationi, quam apud omnes consecutus es, apprimè respondet. Tanta enim urbanitate referta est, tanto lepore conscripta, ut genium illum tuum totum amabilem, & nulli secundum prae se ferat. At vero quanti faciam benevolentiam illam, qua me prosequeris, vix possum eloqui. hoc solo me infelicem ducō, quod jam a te nimium distitus qui mihi videbar, majori itinerum intervallo propediem sejunctus ero. In tēpē veniebam hac aestate proxima, cum praedia Abbatiæ meae in Hannonia invisere cogitarem, Hagam usque proficiscendi, & tua dulcissima consuetudine fruendi diuturnius, quam mihi contigerat anno praeterito. Sed legatio, quam adornas Sueciam versus, quo publica negotia & mandata Procerum tuorum te vocant, me in desperationem cogit, nisi antequam ad illud iter te accingas, altera mihi a te contingat epistola. Interim ut jussis tuis obtemperem, mittam Lucubratiunculam ad quasdam familias *Ful. Urfini*, quam scripsi *Francisco Gottifredo*, Antiquitatis Romanae genio, & quam typis mandare impulit me nimia amicorum indulgentia. Tu plurimum me devincies, si priusquam in lucem omnino prodeat, mihi velis indicare quid probes, quid emendes in hoc opusculo, quod in Musei nostri latebris absconditum remanebit, donec, quid super eo sentias, resciverim. Et typum gemmae, quam vulgo Corniolam vocant, Ovidii vultum referentis, hic inclusum accipies, ut postulasti: faxit Deus ut tibi gratum adveniat: dubito paululum de antiquitate prototypi, sed nullum aliud potui Parisiis reperire, neque in gemmis neque in nummis. Quantum ad tuam nummorum congeriem, copiosior & pretiosior est, quam ut citius emptorem nancisci queat. Sed si pro tua erga me humanitate, unius aut alterius nummi permutatio non te gravet, cum praesertim familiis Romanis addictus sim, memini me vidisse apud te nummum argenteum M. Antonii cum capite ipsius in antica, atque inscriptione P. Ventidii in averfa. Hanc familiam Ventidiam, quae inter meas non reperitur, libenter compararem, vel pretio, vel permutatione alterius nummi, qui tibi arrideret, si per te mihi innotescat. Non hīc ago de altero Antonio aureo,

reo, cum averſa figura trôphæo inſidenti, & inſcriptione familiae Muſſidiaee vel alterius; non de aureo familiae Aquiliae cum Triquetra Siciliae: neque etiam de aureo Julio per Trajanum reſtituto, quos poſſides: ne nimium audere & tibi & mihi videar, quamvis illos aut illis ſimiles, larga compenſatione redimêrem. Quicquid ſtatueris ratum erit & gratum mihi, dummodo me tui obſervantiſſimum exiſtumes, & tui ſtudioſiſſimum ſemper futurum eſſe conſidas. Dabam Lutetiae Pariſ. Idib. Mart. CIOIOCLXI.

EPISTOLA DCXXVIII.

NICOLAUS HEINSIUS

Petro Seguino.

Lutetiam.

SEmeſtris ſpatii tempus jam propemodum effluxit, quod Orator Regis Chriſtianiſſimi, *Jacobus Auguſtus Thuanus*, magno patri cognominis & par filius, tuas mihi literas Idibus Martiis exaratas tradidit, una cum diſſertatione te digna ſuper Pompeji nummis antiquis. Quam ego non multa tantum cum aviditate, ut tua omnia ſoleo, ſed admirabundus quoque legi ac relegi, iterata identidem cum animi contentione. Sed quod in provinciu tuam ſtarem, convaleſcis jam ac mari creditis ſarcinis, biduoque proximo poſt exacto, Suecico itineri committerer, non potui debita gratiarum actione apud te deſungi. Rejeci igitur ſcriptionis officium in opportuniora tempora, quod itinere conſecto tui compellendi ex hiſce regionibus non deſore opinabar. Sed adventum in Sueciam meum excepere praeter ſpem occupationes & moleſtae ſatis & denſae, quae me exercuerunt haecenus, ut nec amicis ſalutandis, nec privatarum rerum aut familiarium curae locus ſuperfuerit. Quod ut ingenuè & ſine fūco teſtor, ita rubore tacito perfundi me ſentio, cum intermiſſi officii culpam vix excuſabilem mecum perpendo. De libello tuo quaeris quid ſentiam? Ego vero cum omnia id genus ſcripta, quae antiquitati Romanae illuſtrandae dantur, plurimi faciam, praeter ceteris tamen te inter pauciſſimos repono, qui in intimos eruditae vetuſtatis fontes ac reſſus caecos perſpicacis mentis acumine penetraris. Quo magis vellem, ut *Triſtano* e vivis ſublato, ſucceſſus tuos acriter urgeres ipſe, & quae hîc illic obſervavi aliis ignota quam plurima in publicum proferres, communi commodò inſervitura. Nuper admodum dum aurea Ducis Arſchotani perlūſtro numiſmata à *Johanne Hemelario*, ut ſcis, juris publici facta, moratus eſt oculos meos nummus iſte Veſpaſiani, qui pagina duodecima ſecundus occurrit, clypeum votivum exhibens columnae adfixum, inter duos ſurculos, addito ſuper columnam vaſe quodam: quem nummum & ego poſſideo argenteum, & a *Jacobo Byaeo*, *Aenea Vivo* & aliis jam editum animadverto.

Quid

r Intelligit Epistolam ad *Franc. Gottifredum*, editam primo Anno 1660. poſtea inter alias diſſertationes, quibus ſelecta numiſmata illuſtravit vir Ampliſſimus & Doctiſſimus.

Quid tamen is sibi velit, nemo, quod sciam, haecenus percepit. *Hemellarius* certe pag. 36. & *Albertus Rubenius*, qui ultimam *Byaei* numismatam editionem notis eruditis illustravit pag. 45. de columna & clypeo votivo conveniunt, quibus & ego adfentior. Sed quod duos istos furculos lauri ramos esse contendunt, id ego aliter se habere arbitror. Nec vasculum illud urnam esse, quod *Pierio Valeriano* in Hieroglyphicis, & *Hemellario* videbatur, nec notam monetariam, quod censet *Rubenius*, ut credam patior mihi persuaderi. Si intendas aciem, nullos illic ramos exhiberi, sed furculos seu frutices, & quidem terrae inhaerentes, facile appareat. Certe diversos plane, atque alia omnino facie ramos laureos in Augusti numo expressos animadvertas pag. 2. apud eundem *Hemellarium*, ubi tamen clypeus quoque votivus occurrit. Inducor igitur, ut existimem furculos balsami in hoc Divi Vespasiani numo exhiberi, & vas columnae superpositum alabastrum esse, seu vasculum unguentarium balsamo Servando destinatum. Auctorem conjecturae meae praecipuum habeo C. Plinium, qui libro Naturalis Historiae xi i. cap. 25. non tantum nos docet uni proprium Judaeae balsamum fuisse, verum etiam hanc arbusculam ab Imperatoribus Vespasianis in triumphum ductam, & tributum pendisse una cum gente sua post Judaeam devictam, unde luculenti reditus Populo Romano provenerint. Sed quod ibidem folium proximum rutae illi dat, in eo quidem cum Dioscoride aliisque vetustioribus sentit; sed cum paullo ante professus sit, longe aliam illi naturam esse, quam Romani exterique prodiderint, amplector lectionem, quam scripti codices plerique prae se ferunt, *folium proximum tuberi*. Est autem *Tuber* Mali species, de quo Plinius alibi. Quid? quod paullo ante, ubi *arbusculam* vocat, optima membranae *arbutum* agnoscunt. Pro eo tamen etsi prae fracte digladiari nolum, qui balsami fruticem numquam viderim, ita de alabaistro rem sic se habere, ut dixi, prorsus censeo. Inspice Plinianum locum, & sententiae tuae certiore me fac, ni molestum est. Pro imagine Nasoniana, quam gemma antiqua refert, plurimum me debere tibi profiteor. Nec tamen ausus sum eam juris publici facere, quod multum discrepet ab ea, quam ex veteri numo indubitatae fidei expressum Nasonis mei editioni praefigendam curavi. Huc accedit, quod adulteratam esse gemmam & ipse suspicor, & ego quoque subvereor; cum in numis quoque adulterinis nasutus admodum Ovidius exprimitur, quasi inde Nasonis cognomen sit mutuatus, quod homines insciti credidere. Numos veteres majori ex parte domi reliqui discedens, quod augurer meam a patria hanc absentiam non nisi annuam fore. Ad meos cum recurram de iis permutandis agemus. Vale, vir eximie & ornamento patriae tuae progate, tuasque de re numaria lucubrationes, si me audis, publico quamprimum indulge. Dabam Holmiae Suecorum a. d. viii. Octobris: MDCLXI.

EPISTOLA DCXXIX.

PETRUS SEGUINUS

*Nic. Heinsio.**Holmiam.*

GRatissimae mihi advenerunt, per amicissimum & doctissimum nostrum *Bigotium*, literae tuae datae *Holmiae Suecorum*, a. d. viii. Octobr. anni praeteriti: eisque respondiſſem diligentius, nisi me triū fere mensium adversa valetudo distinuiſſet. Sed quae interim non obſtitit, quo minus maximo perfusus ſim gaudio, videns te etſi politicis Reipublicae tuae negotiis additum, non tamen averſum ab antiquitatis Romanae arcanis; quibus ſi aliquam operam dare tibi per ſerias occupationes liceret, quam magna lux iis accederet, nemo eſt qui non ſentiat. Et certe magno cum plaſu exceptus eſt a noſtris antiquariis, illustratus a te Divi Veſpaſiani numus: praefertim dum vas illud columnae impoſitum, balfamo ſervando, quod nemo ante te, deſtinatum, tam luculenter obſervaviſti. Pro urna quidem accipi non debere tecum ſentio, multo minus pro nota monetaria, ut opinabantur viri docti, quos reſcens. Sed quam appoſite ad hitoriſcam veritatem, quod addis de triumpho Veſpaſiani, & de tributo balfami a Judaeis pendi Romanis ſolito? in tuam igitur ſententiam abeo, & omnino tecum de alabaſtro ſeu vaſculo unguentario concludo. Stabo etiam a partibus tuae modeltiae, & uſque dum viderim tecum fruticem balfami, *Laurum*, quam ſuper ejus annotatione meruiſti, a tuo numo non ſubmovebo: praefertim cum apud *Plinium*, quem ut tibi morem gererem perlegi, & apud alios auctores, balfami arbuſculam, viti ſimilem repererim. At lignum vitis obliquum eſt, & minus rectum, quam videntur iſti ſurculi tui numiſmatiſ. Non diſpliceat tibi, quaefo, vir Ornatiffime, amica & *Gallica* libertas ſententiae meae quam poſtulaviſti. Qualiſcumque enim illa ſit, tuo permittitur arbitrio; cui ſi quidquam, vellem detrachere hoc ſolum, quod opuſculum meum de *Pompejanis* numis, immerita laude cumulas. Caeterum quoniam te ejuſmodi lucubrationum, quae vetera monumenta ſpectant, ſtudioſiſſimum praefas, te monitum velim, apud nos *Juvenem* Medicum *Carolū Patinum*, *Guidonis* filium, perdoctum ſane, magna ſuper hoc argumento meditari, quippe qui *F. Urſinum*, non ſolum novis praelis ac recognitionibus adgreditur, verum etiam trecentis fere nummis adaugere, quorum typum in noſtris ſtudiolis *Parienſibus* accepit, & qui *Romae* non reperiabantur, tunc cum praefatus antiquitatis Romanae genius, ſuas familias ex *Archetypis*, praefertim *Farnesianis*, exaravit. In hoc tamen cum *Patino* non convenirem, quod ſuas lucubrationes, non ut *Gorlaeus*, ſeparatim ſit editurus, ſed *Urſinianis*, quas intactas pro tanti viri reverentia voluiſſem, ſit inſerturus: quamvis adhibita quorundam aſteriſcorum & characterum diverſitate, quibus quid *Urſini*, quid *Patini*, innotescat. Idem publici juris facturus eſt, ſeriem aereorum numorum ſecundae ſeu mediocriſ magnitudinis, quibus *Illu-*

striffimi Comit^{is} *Briennaei* gazophylacium prae caeteris abundat. Nec deesset adhuc aliquis, qui pro sua in rem antiquariam propensione, lubens operam suam locaret, in seligendis & elucidandis aliquot ex tot tantisque cimi-
liis & numismatis, quae ex universis orbis partibus, Parisios comportantur. Sed deest nobis lepos ille, & eloquentiae decor, quo tua dicta scriptaque exornas. hoc uno solo tibi non inferiores, quod urbanitati & benevolentiae tuae, vices aeternas ex animo rependemus. Vale, vir Ornatissime, ac te patriae & amicis tuis, citius incolumem praestet Deus Opt. Max. Dabam Lutetiae Parisiorum vi. Kalend. Martii Anno cicioclxii.

EPISTOLA DCXXX.

NICOLAUS HEINSIUS

Petro Seguino.

Lutetiam.

NON displicuisse tibi aut improbata esse, quae ad illustrationem numi veteris in medium contulit epistola Octobri mense exarata, equidem pergratum est. Pro certo igitur habeamus vas illud in numismate signatum de alabaastro unguentario esse capiendum, Balsami custode, quo Judaea, vestigalis Populo Romano facta post divi Vespasiani triumphum, denotetur. De fruticibus illic additis an balsami sint arbusculae, si rem non satis exploratam contendis esse, mecum profecto sentis. Quamquam quod Balsami fruticem viti similem volunt Plinius alique ex Graecis scriptoribus ac Latinis, nescio an satis validum sit argumentum, quo prorsus vincatur, lignum Balsami obliquum ac incurvum esse, contra quam in numo Vespasiani exhibetur. Nam quod ignorarunt veteres, cum nostra aetate sit compertum, Judaeam ac Aegyptum Balsami minime feraces esse, sed odoratum hunc fruticem in Arabia Felice gigni, atque inde ad terrarum tractus jam nominatos transferri, ubi in hortis Principum virorum delicatis multo excolitur studio, fieri potest, truncum fruticis, qui natura sinuosus sit ac obliquus, cultu assiduo & diuturno adhibito emendari. In icone certe balsami, quam *Prosper Albinus*, testis oculatus, publico dedit, truncum gibbosum quidem ac obtortum, ceterum ramusculos rectos & proceros est agnoscere. Quid? quod credibile est triumphi sui pompae eas selegisse balsamos Vespasianum, quas prae ceteris terfa ac castigata formae elegantia multusque cultus commendaret, cum non tam raribus, quam oculis spectantium hujusmodi fercula ad triumphi ornatum & splendorem referenda, inservirent. Sed frutex in numo Divi Vespasiani spectandus densiore folio est, quam is, quem *Prosper Albinus* exhibuit. Itaque certi nil affirmo, dum alia in promptu, quae rei veritatem liquidius nobis proponunt. De altero numismate familiariter, ut soles, cum *Bigotio* nostro agebam nuper, ejus iconem Ascanii vultu insignitam esse contendens, non quod id pro re indubitata venditarem, sed ut vos ad veriora indaganda accenderem atque exhortarer. *Guidonem Patinum* magni apud vos nominis medicum, hominem
cum

cum eruditum, tum candidum imprimis & mero leporis nectare delibutum, probe notum habeo, qui ante annos hosce quatuordecim & plures apud vos commorantem me non uno beneficio est prosecutus. Quo magis gaudeo, filium illi obtigisse ad praeclara quaevis magnis passibus contendentem. Auctuarium certe, quò familias *Ursini* Romanas illustrare coepit, plurimum antiquariae rei utilitatis ac emolumenti feret. Meos quidem numos si haberem in promptu, conatus ejus & studia nonnihil fovere possem. Excusationem tamen serinia, & si quid illic reperero, quod antiquitati illustrandae faciat, atque huic argumento conducatur, libens depromam. Observavi olim *Ursinum* detritis ac evanescentibus prae vetustate numorum hinc illic notis haud raro deceptum ea supposuisse eotypis, conjecturae falsum, quae in ipsis numismatibus aliter sese habeant. Auguror fore, ut accuratissimus *Patinus* errores istos corrigat ac tollat. Nec opinor secuturum nimiam, ac paene putidam *Gorlaei* sedulitatem, qui omnes notae monetariae differentias aere exprimendas curavit, easque, ceu diversos numos ostentat. Ex fastis Goltzianis depromi complura possunt, nescio tamen an pro genuinis omnino habenda; qua in re *Gorlaeus* quoque non semel peccasse visus est. Juvare hoc institutum opera sua posset *Ezechiel Spanhemius*, Sere- nissimo Electori Palatino a consiliis, hac potissimum de causa missus ab hero in Italiam, ut nummariam Principum virorum suppellectilem cum cura perlustraret, atque inde enotet ac describat, quidquid ab aliis hactenus observatum non fuisse deprehendet. Is significabat nuper per literas, ex solis Mediceis numis mille & quingentos sibi animadversos, qui *Oeconem* aliosque antiquarios fugissent. Redemi ante decennium Romae a librario quodam quatuor volumina manu *Hannibalis Cari* exarata, in quibus vir elegantissimus rem numariam magno conatu illustrabat. Primum volumen circa familias illustres Urbis occupatur, secundum numos Augustorum, Augustarum tertius excutiebat. Quartum in Graecis illustrandis erat totum. Ea mihi naufragio perierunt, scripta anno seculi superioris sexagesimo quarto aut quinto. In plerisque, quae ad familias veteres pertinebant, *Ursiniani* congrua observationibus annotabat, ut alterum alterius serinia sublegisse sit verosimile, aut, quod magis crediderim, ex *Delphini Gentilis* seriniis utrumque profecisse. Nam *Hannibalis Cari* doctrina in hoc studiorum genere mihi plane ignota est, ut *Ursinus* inspectus ejus schedis minime habuerit opus, quae tamen annis ad minimum duodenis ante publicatum hujus opus erant congestae. Illustrissimum comitem *Briennium* literarum cognitione solida egregie instructum esse ex rumore & fama jam constat mihi. Dignae profecto cogitationes istae, quas narras, sunt hoc heroe, qui thesauros antiquorum numismatum luculentos, quos possidet, publici juris atque usus factururus sit. Spero laudabile hoc ejus exemplum alios mox proceres secuturos esse; quod toto jam seculo minimum ornatus atque incrementi huic studio accesserit, cum nec hominis nisi in re lauta constituti sit hanc suppellectilem coacervare, & si qui Magnates eam possidebant, hi Euclionum instar, quidquid collegerant, reconderent, oculisque alienis prorsus subduce-

rent;

rent, non sine praesentissimo rei literariae detrimento. Sunt enim longe plurima etiamnum in historicis Graecis ac Romanis obscura, quae sola numismatum ope nisi illustrentur, posteros latebunt. Gratulor igitur vobis heroem *Briennium*, gratulor *Briennio Patinum*, cujus diligentia fiet, ut rarissimi numi non modo in lucem omniumque conspectum proferantur, sed accurate etiam expressi prodeant, quod praecipue desiderandum est. Sunt enim, qui huiusmodi divitias tam negligenter prodant, ut latuisse eas omnino praestiterit. *Angelorum* orthographiam in inscriptionibus numerorum exhibendis vix curasse indignor. Nam cum aliunde emendate scribendi rationem vix certioribus argumentis sit colligere, quam ex hisce argumentis, quae aut numquam aut raro admodum fallunt, opera anxie danda est, ne quid praeter rem in iis divulgandis admittatur. Sed video verbosius haec me persecutum esse, quam par erat. Praesertim apud virum, quem horum studiorum nil fugit aut fallit. Vale. Exarabam Holmiae Suecorum Anno MDCLXII. a. d. x. April. Gregor.

E P I S T O L A DCXXXI.

C L A U D I U S J O L Y

CANONICUS ECCLESIAE PARISIENSIS

*Nic. Heinſio.**Holmiam.*

A Ccepi nuper tuum Claudianum, vir eruditissime, ab *Emerico Bigotio*, amico nostro, ad me missum, cujus gratias tibi amplissimas ago ut debeo, quandoquidem hunc ex dono tuo ad me perventurum jampridem *Elzevirius* monuerat. Nimirum ea fuit erga me tua gratitudo ac benevolentia, ut exiguum beneficium magno munere compensares. Quod enim *Antonii Oisellii*, avi mei, nec non mei ipsius immerentis mentionem ibi fieri video, non parum decoris mihi contigisse arbitror: si quidem tot inter Literatos a laudato viro nominatum esse, aliquid est non vulgare, quod quilibet famae cupidus non oscitanter ambiat. Ego vero quemadmodum stolidus ac delirus merito videar, si nominis amplioris appetens fuerim; ita si *Antonium Oisellium* inter viros doctrina praestantes collocarim, nihil agam quod non actum sit a pluribus viris doctissimis; inter quos *Jac. Aug. Thuanus*, *Oisellium* in literis cum *Pithoeis* fratribus *Jac. Hollerio* & *Cl. Puteano*, *Puteanorum* nostrorum patre, qui in Bibliotheca Regia non ita pridem claruerunt, primas apud nos suo tempore tulisse lib. v. de vita sua testatus est. Nec certe ignotum fuit *Oisellii* nomen magno *Danieli Heinſio*, patri tuo, qui, cum anno 1646. Lugdunum Batavorum adiissem cum serenissima *Anna Borbonia* Longavillani Ducis uxore, mihi de *Oisellii* singulari eruditione honorifice loquutus est, meque propter ejus memoriam perhumane atque amanter excepit. Et quidem bonis avibus accidit, ut testimonium illud Patris, tui quasi futurae alicujus inter nos amicitiae praenuncium, Codices avi mei sequerentur tuisque studiis inservirent. Ex quatuor, quos *Elzevirio*

com-

commiseram, jam duo incolumes redierunt, Claudiani scilicet ac Lucani. Hinc magnopere cupiam, ut quod in Claudiano perfecisti, id ipsum in Luciano propediem peragas. Quod si quid etiam Ovidio nostros codices Metamorphoseon, qui adhuc penes te sunt, profuturos speras, nescium te nolim, alterum fuisse ejusdem *Oiseli*, alterum Ecclesiae nostrae Parisiensis. Vale, doctissime Heinsi, ac de bonis literis perge bene mereri, paternique nominis gloriam tua semper adaugere. Lutetiae Parisiorum Pridie Nonas Septembr. Anno MDCLXV.

EPISTOLA DCXXXII.

NICOLAUS HEINSIUS

Claudio Joly.

Canonico Ecclesiae Pariensis.

Lutetiam.

Singularis illa & exporrecta comitas tua, quam abunde mihi approbaras, supeditatis tam liberaliter Nasonis, Lucani, ac Claudiani membranis vetustis, denuo se nuper exseruit, vir Clarissime, quando partes meas occupasti, actis per literas gratiis pro Claudiano nostro ad te perlato, quas ego tibi debebam, & quidem ingentes, hoc est magno beneficio pares. Claudiani exemplar profuit in multis, ut videre potuisti: vix enim est, ut ejus scriptoris codices oppido vetusti in priscis bibliothecis occurrant, mihi certe in tanta copia praeter unicum exemplar Vaticanum, nullum hactenus offertur, quod membranas illas tuas vetustate post se relinquat. Profuit & Lucani codex, etsi necdum pervolvi: cum & spes sit facta aliorum complurium, quos eadem opera excutiendos mihi proposueram, tum quod hi ipsi codices parum bonae promittant frugis, ejus nimirum notae ac aetatis, cujus infiniti propemodum hinc illic in manus meas recorder incidisse. Utinam vetustiores aliquando ex pluteis Gallicanis abs te eruantur! saltem qui Lucani tui senium adaequent, hoc est ante annos sexcentos exarati, quales perpaucos mihi perlustrare contigit. Tui interim illi ad te revertentur occasione prima. Hactenus enim id fieri vix potuit, quod & pestilentia anno proxime elapso per Bataviam nostram grassata, & nunc bellum Anglicanum illi limiti incumbens, quidquid maritimi commercii erat inter Succos & populares meos, interverterit. *Antonii Oizelii* avi tui merita in rem literariam praeclara minime me latent, quibus praedicandis locum opportuniorem confido dari posse, quam est datus. Festinabam enim in iis, quae ad Claudianum sum praefatus. Sed & nomen tam illustre commendationis meae haudquaquam indigere opinabar, quod lectori literarum non prorsus ignaro satis superque cognitum est ac perspectum. Vale, vir Clarissime, & mihi bene velle, ut coepisti, perge. Exarabam Holmiae XXI. Octobr. MDCLXV.

*Nic. Heinso.**Holmiam.*

ECce iterum me beas, eruditissime Heinſi, poſt donata Claudiani Poëmata, recentioribus tuae Muſae deliciis, quas mihi tradidit doctiſſimus amicus noſter *Emericus Bigotius*. Atque utinam huiusce muneris tantas tibi gratias referre quirem, quantas tot lepores, tot elegantiae, tot amoenitates repoſcunt ac promerentur. Par pari aliquatenus referrem. Nunc vero me debitorem ac ſolvendi inidoneum eſſe oportet. Quidquid ſit, quam maximas poſſum tibi gratias ex corde gratiſſimo ac beneficiorum tuorum nunquam immemori perſolvo. Et quoniam me tot doctorem amicorum choro, quos non tantum domi, ſed etiam in exteris gentibus numeras, adſcriptum eſſe voluiſti; cuius quidem rei non minus gloriſ, quam gaudeo: ita me ſemper ad omnia tibi paratiſſimum credas velim. Perge, doctiſſime Domine, bonas literas quotidie exornare, ac nomen Heinſianum illis excolendis natum ad maiora ſemper provehere. Vale & me ama. Lutetiae Pariſiorum x. Mart. Anno cicioclxvii.

E P I S T O L A DCXXXIV.

P E T R U S P E T I T U S

*Nic. Heinſo.**Holmiam.*

NON arbitror me habere habiturumve unquam quidquam ἀντάξιον, quod tibi rependam, Heinſi, pro illo munere eximio, quo me nuper donaviſti, niſi ſi grati animi affectum pro effectu accipis. Enimvero magnam mihi eo facto voluptatem inieciſti; non ſolum, quia tam boni libri me poſſeſſorem eſſe factum gaudeo, ſed etiam quia tali munere, quod mea officia, literasque praevertit, videre mihi ultro amicitiae tuae fores aperire, certe occaſionem das eas pulſandi, uti nunc facio hacce epiſtola; tum non ſurdas fore eas prope modum pollicere, ſpemque admiſſionis facis. Quod ſi aſſequar, nihil mihi jucundius poſſit contingere. Ea eſt enim eruditio tua & in literis juvandis induſtria, ea probitas & candor, ut omnes vel abs te remotiſſimos ad tuam amicitiam quaerendam accendere poſſit. Sane tua fama, ut quam latiſſime quoquo verſum ſeſe diffundit, univerſamque Europam amplectitur, jam pridem me tibi ex admiratore Amicum, ex aeſtimatore Laudatorem fecerat. Ac multi in hac urbe teſtari poſſunt, quantopere tibi faveam, quam pronis auribus tuas laudes excipiam, quam ipſe in eas, ubi occaſio datur, cupide erumpam. Quem affectum mihi non parum auxerunt amici tui, vel potius noſtri, viri clariſſimi *Jo. Capellanus*, *Aegidius Menagius*, *Emericus Bigotius*, *Vidus Patinus*.

tinus, Jacobus Mentelius, dum mecum epistolas, quas ipsis de re literaria scrip-
sisses, communicarent: quibus epistolis nihil tersius aut elegantius esse po-
test. Sed quod magis miremur, illa tam polita & omni leporum genere ad-
blandiens oratio tibi, ut iidem affirmant, fuit illaborata. Ex quo intelligi
possit, quanta sit in te vis ingenii & eruditionis, quam incredibilis usus om-
nium optimarum disciplinarum. Neque certe, quin ita res se habeat, dubi-
tare possumus, postquam tot egregia ingenii tui monumenta videmus e Mu-
seo tuo prodire. Vel illa, quam sulcepisti, provincia Poëtarum omnium Lati-
norum scripta recognoscendi, quem non & rerum difficultatibus, & laboris
magnitudine terreret? Tu tamen eam sic administras, ut eodem spiritu, quo
illi Auctores scripserunt, videaris ad eos restituendos atque illustrandos ac-
cessisse. Istud vero jam mirum videri non debet, te de poëtarum scriptis tam
adamumum iudicium facere, in illa antiquitate tam cernere acutum, quam
Aquila cernit, aut serpens Epidaurius, qui ipse egregius sis poëta, & mirus
carminum artifex. Quod cum ex aliis Poëmatis tuis, tum ex divino illo sca-
zonte, quem in Claudiani tui frontispicio posuisti, plane perspectum habemus.
Sed haec & alia ingenii tui decora, non est comprehendere epistolae angu-
stis, nec nunc sane scribimus ut te laudemus, in os videlicet, sed ut tibi
gratias agamus. Porro nec tua virtus, mea aut cuiusquam praedicatione e-
get, utpote quae tot claris operibus ipsa ultro in omnium oculos incurrat.
Non potui tamen tam bella occasione oblata mihi temperare, quin haec pau-
cula tot aliis ornamentis tuis attingerem. Quae mihi solius veritatis vi ex-
pressa velim tibi persuadeas. Caeterum officii mei esse duxi libelli cuiusdam a
me nuper editi, de Extensione animae & rerum incorporearum natura, (ita
enim inscribere placuit) exemplar ad te mittere: quod fortassis ad te jam per-
venit. Eo libello excutimus opinionem quandam D. *Chambrei*, clarissimi viri,
quae animae humanae, Angelisque ipsis dimensiones, partes, figuram, mo-
tum localem, tametsi (ut fatetur) incorporeis tribuit, quod Systematis ani-
mae, (ita enim loquitur) fundamentum posuit. Id munusculum, qualecum-
que est, certe obsequii atque observantiae in te meae pignus aequi bonique
consulas, etiam atque etiam rogo. Ex Museo nostro Lutetiae Parisiorum
Kalendis Decembribus anni a Christo nato CIOICLXV.

EPISTOLA DCXXXV.

NICOLAUS HEINSIUS

*Petro Petito.**Lutetiam.*

DIU est, quod te ex fama & scriptis habeo perspectum, vir Celeberrime.
Favere etiam ingenio tuo coepi non ita nuper, ex quo operum tuorum
nonnihil, munus a temet ipso profectum, pervenire ad me voluit, quo fertur
rerum mearum studio, noster *Bigotius*. Hanc tam obviae tamque exporrectae
frontis nisi in te exoscularer comitatem, ne agrestis, atque inurbanæ mentis

Yyy 2

cen-

censuram apud me ipsum incurrerem, unice metuendum profecto videbatur. Ausus igitur sum ex frivolis meis, quod hostimenti locum obtineret, nescio quid vicissim per eundem *Bigotium* tibi offerre, acturus & gratias uti oportebat, pro non una felicitis curae lucubratione, atque excusaturus confidentiam meam & temeritatem, qui primos studiorum conatus exhibere tibi viro per omnem literaturam laudato sustinerem; nisi quod in ea nunc incidimus, quotquot in republica versamur, tempora aut veniam promereamur quodammodo apud non severos officiorum exactores, si privata non satis sedulo curemus. Excusavit tamen jam apud te, puto, Claudianus ipse scriptor politissimus, quamquam de observatis in illum meis jejunis ut plane juvenilibus deprecari commissa debebam. Jamque in eo eram, ut alterum munusculum, Poëmatia, inquam, mea publici juris propediem de novo facienda tibi destinarem; idque eo magis, quod cum voluptate summa & admiratione jam perlegissem ex his nonnulla, quae tu ipse ligato sermone & Musico egregie es commentatus. Sed dum ob absentiam meam lentius procedit opera bibliopolae in hac tela detexenda, supervenerunt interea temporis literae tuae, disertae illae atque elegantes, plurimamque cum comitatis, tum amoris in me tui testificationem prae se ferentes, ad quas rescribi sine procrastinatione ulla, fateor, par fuit, nisi morae culpa penes librarium cunctatorem potius, quam me, stetisset, qui, quem toto anno parturiit libellum, nunc vix tandem enixus est, ut audio, iussus a me ejus tibi copiam in primis Gallicanis amicis facere. Nec dubito mandatis hinc obsequentem illum ac morigerum fore. Te obtestor interim tuaeque humanitatis genium, ne quid rigide nimis ac censorium in morem cum libello hoc agas, quando per me absentem & alibi occupatum naevis omnibus caveri non satis potuit, quos ne aequo plures & graviores ostendat libellus subvereor. Eruditionem enim aut ingenii laudem haudquaquam capto, omnis gloriae securus, & abunde felix, si te tuique similes experior amicos. Ita fit, ut quotiescunque in externos terrarum tractus per epistolas adundi mihi sunt homines disciplinis liberalibus instructi, quorum plurimos habeo mei studiosos, extemporali quadam scriptionis impolitae libertate apud illos utor, unde ipsi intelligant, multum praesidii ac fiduciae in illorum benevolentia me collocasse, apud quos licere mihi negligenti & incomto esse habeam persuasum ut omnino credam. Spectari quippe in officiis frequentiam & assiduitatem malo, quam ornatum, qui officiarum suspensionem raro a se amolitur. Libellum tuum de extensione Animae, cujus jam ad me missi in tuis mentionem facis, impatienter exspecto. Haecenus illum certe nec accepi, nec qua via, aut per quos ad me sit perventurus scio. Vale, vir ornatissime, & me, ut coepisti, in tuis habe. Holmiae Suecorum a. d. xvi. Kalend. April. cıııııııııı. Has jam scripseram, cum a *Bigotio* perferuntur ad me literae, quibus ille subindicat tuum de Extensione animae commentarium sua opera ad me mittendum fore.

EPISTOLA DCXXXVI.

PETRUS PETITUS

*Nic. Heinso.**Vianam.*

TU quidem, vir praestantissime, morem antiquum obtines, ut novis subinde industriae tuae monumentis rem litterariam juves; quod sane tot emendatissimae bonorum Auctorum editiones tua opera perfectae, quique nuper prodiit Virgilius tuus, testantur: mihi vero, qui pridem in albo tuorum amicorum esse gloriator, cum semper infixae haeserit memoria tui, tamen ea tempora inciderunt, quae inceptum inter nos literarum commercium interrupperunt: non eas causas intelligo, quas *Capellanus* noster olim se habere putavit non scribendi ad te ut comperi, praeterita bella; non sum adeo cautus; sed luctum domesticum & negotia studiis inimicissima, morte fratris mihi percari. Qui casus me ex otio literario, quod semper amavi, & cui unice natus sum, in summam miseriam conjecit. Nam quod nunquam in vita expertus fueram, lites habere coactus sum, & ejusmodi lites, quae nondum post tantum temporis intervallum extingui potuerunt. A quibus tamen me tandem expedivi, sed qua conditione negotiatores in tempestate, rerum mearum parte abjecta. Nunc cum respirare licet, nihil magis officii mei esse ducō, quam ad te scribere. Cujus officii cum occasionem expectarem, vir clarissimus, & mihi amicissimus *Emericus Bigotius* peropportunitatem & gratissimam obtulit. Is enim cum in urbem venisset, me, ut sit, de studiis meis percontatus, quid agerem, & num quid haberem quod in lucem dari posset: respondi multa me habere, & in his animadversa olim a me in varios auctores, unde *Miscellanearum Observationum* volumen conflare possit: si sint librarii, qui editionem suscipiant. Nunc *Lutetiae* paucos admodum esse, qui bonis literis servire velint; omnes ad plebejas scriptiones patria moneta percussas intentos esse: unde scilicet promptius lucrum ad se rediturum sperent. Tum ille, ut est summa humanitate praeditus, prolixè mihi operam suam pollicitus est apud vos *columina* & *Principes* literarum: spemque dedit fore, ut vestra commendatione aliquis mihi ad *typos Batavicos* aditus pateat. Cupide arripui hanc occasionem ad te scribendi, vir praestantissime, vehementerque te oro, ut me in hac re juvare velis. Selegi ex meis adversariis quae visa sunt magis publici saporis. In his disponendis, poliendis, & transcribendis sum totus. Cum perfecero, quod spero prope diem fore, ad vos, si hoc impetravero, missurus. Deus te, vir optime, diu literis conservet. Bene vale. Ex *Musaeo Lutetiae Parisiorum* 29. Septembris anni a Christo *MDCLXXIX*.

E P I S T O L A DCXXXVII.

P E T R U S P E T I T U S

*Nic. Heinsio.**Vianam.*

Multiplici me literae tuae voluptate affecerunt, Heinsi literatorum decus: primum quidem quod ex iis intelligo librum meum Observationum ad te saluum pervenisse, quod metuebam ne secus accidisset, cum nihil de eo tamdiu audirem. Deinde quod significas bibliopolam non mutasse propositum de ea commentatione typis suis ornanda. Sed omnium maxima haec lætitia est, cum polliceris fore tibi curae eam editionem, quo haud scio an majus officium mihi abs te hoc tempore praestari possit; qui tam procul ab operis absuim typographicis, ut me metus jam non mediocris incessat, ne multa irrepant in hunc librum menda. Quibus & ipse occasionem dederim tot lituris, quibus passim paginas non paucas impeditas reliqui describendi taedio. Dum eodem tempore aliae me avocant curae incoeptae lucubrationis de Sibylla, quam per clarissimi *Bigotii* absentiam desperans de editione mearum Observationum confeci. Utinam vacasset tibi, aut libuisset pervolvere atque excutere istas Observationes, & in iis criticam tuam exercere, antequam praelo darentur. Sed hoc non ausus sum petere a te, quod mihi ipsi improbum videretur. Non mediocri & voluptati est, quod nomen meum video in ea parte epistolae celeberrimi viri *Joannis Georgii Graevii*, quam mihi excerpisti, &, quae est humanitas ejus, huic quoque nonnulli esse curae res meas: hincque & ambiendae ejus amicitiae occasionem mihi praebitam video, immo vero aditum patefactum ad eam: certe fores pulsabo, vel ut gratias agam. Quod autem novae Ovidii editionis ac curarum in eum secundarum spem facis, Maronianarum insuper lectionum commentarios promittis, non mihi tantum, sed universae reipub. Literariae de his bonis gratulor. Neque enim dubito, quin multa in eum Poëtarum latinorum Principem animadverteris, quae aliorum diligentiam fugerunt. Quamobrem Deum precor, ut valetudinem tuam magis ac magis confirmet, ut quam diutissime egregiis lucubrationibus tuis de literis bene mereri possis. De Manuscriptis Nasonis antiquioribus quod narras, nihil equidem magis cupiam, quam votis tuis non in hoc tantum, sed in omnibus, quod potero satisfacere: nec dubitare debes de hoc affectu meo: sed & amicos me sagaciores & ad bibliothecarum angulos scrutandos; promptiores ad eandem operam invitabo. Interea, vir praestantissime, velim me in eorum numero esse credas, qui te maxime amant & colunt, quod equidem facere, ex quo te cognovi, nunquam destiti, per illud etiam tempus, quo nullas a me literas accipiebas. Testes tibi hujus esse possunt viri clarissimi & magni amici mei *Menagius* & *Bigotius*; & tum *Capellanus* posset, si viveret, apud quem frequens mihi de te sermo erat. Cum mecum, quas illi scribebas, litteras communicaret, ut ejus judicii, quo dictionem tuam mirifice probabat atque etiam ad-
mira-

mirabatur, socium haberet. In quo & omni ingenii tui praedicatione illi profecto non concedebam. Vale, vir inclyte, & me pridem tuum amare perge. Kalend. Mart. CIOIOCLXXXI.

EPISTOLA DCXXXVIII.

MONSIEUR

a Viane.

JE suis en peine de savoir ce qu'est devenue une lettre, que vous m'avez fait la grace de m'écrire, si il y avoit dedans quelque occasion de vous rendre service. Je vous supplie de me la faire savoir. C'est, Monsieur, pour vous dire la peine on j'en suis, que je vous écris ces lignes, & pour vous faire mes remerciemens de vostre Virgile, qui me paroist infiniment plus beau, depuis qu'il a passé par vos mains. Je vous cite, mon cher Monsieur, en toutes rencontres pour celui des gens des lettres de nostre siecle, qui a le plus de merite, & le moins de douceur dans la vie. Faut il qu'apres un aussi malheureux proces, que celui que l'on vous a fait, vostre santé se trouve encore affectée? il n'y a point d'exemple pareil a celui de vostre vie dans le livre de Pierius Valerianus de literatorum infelicitate. Je vous plains plus que personne, car j'entre dans vos intrêts, & dans tout ce que vous touche, & outre la profession que j'ay fait, il y a long tems d'amitié pour vous, une affaire aussi injuste, que l'on m'y fait icy, & qui m'a fait perdre deux ou trois ans d'étude, & de temps, m'attendrit encore d'avantage sur la persecution que l'on vous a faite. Il n'y a que dans les lettres, que l'on puisse trouver de la consolation des injustices, que les hommes nous font, & il n'y a personne que s'en doive mieux servir que vous. Ne songes vous point a changer un air si contraire de toutes facons? mais je ne songe pas, que vous avez maintenant Monsieur van Beuningen, & que vous devez trouver tout dans son amitié. vous avez eu autrefois quelque esperance de MSS. Grecs en Moscovie, qu'est ce quelle est devenue? n'avez vous point aussi de relation du voyage de cet officier Hollandois, qui a passé de Moscovie a la Chine? n'avez vous point decouvert quelque partie de ce grand contrait, qui est entre la Moscovie & la Chine, & fait une partie asses considerable de nostre Globe terrestre, que nous ne connoissons point. Il est asses impossible, qu'il ne vous soit tombé entre les mains quelque piece de cette nature: pour moy qui suis désormais hors d'age de voyager, & de faire des decouvertes, je n'ay point de plus grand plaisir, que de prendre ce que les autres font pour de semblables desseins, & je vous enverrois bientôt une suite de ce recueil des voyages, dont je crois vous avoir déjà envoyé quatre parties, qui seront suivies d'une cinquieme, a laquelle l'on travaille. Nous sommes maintenant peu eloignes l'un de l'autre. L'on m'a dit que vous estes a Viane; en deux ou trois jours de temps nous pouvons avoir des nouvelles, l'un de l'autre. Soyes bien persuadé, que vous n'avez point d'ame plus fidel, & plus dévouée, que je vous le suis, & que le seray toute ma vie. Paris. 16. Juin. CIOIOCLXXXIX.

Vostre treshumble & tres obeissant serviteur

THEVENOT.

EPI.

EPISTOLA DCXXXIX.

NICOLAUS HEINSIUS

*Melchizedeco Thevenoto.**Lutetiam.*

NON erat sane, cur pro tenui ac perpusillo munusculo grates ageres tam profusum in modum, cum longe majori, ut potes meminisse, munificentia jam olim essem abs te provocatus: nisi quod singularem plane eximiamque comitatem illam, quam tot argumentis ante toties mihi approbaras, numeris omnibus sibi parem ac constantem etiam hîc exhibendam duxisti nobis. Causa mittendi ad te libelli in praecipuis fuit; uti ex hoc qualicumque pignoris gustu cognosceres, & privatim constare mihi rationem pristinae tuae benevolentiae, & publice Gallicani nominis observantiam. Gentem enim universam in tanto Rege, quasi delectis ad id viarum compendiis, sum veneratus. Quod institutum etsi praemature fortassis aggressus possum videri, consultius quippe, quorundam ex sententia, fecissem cautiusque si sopiendis odiis, adhuc recentibus, quae gentem utramque nuper acerrime collidebant, diuturnius spatium fuisset indultum; urgenti tamen atque alia flagitanti omnia valetudini morem quodammodo gerendum esse sum arbitratus, quae decursis proxime annis graviter quidem, sed gravius multo adfecta sub ipsam libelli editionem, mortalitatis aequae ac animi haudquaquam ingrati Regi, pulcherrime de me merito, praestandi identidem admonebat perquam instanter, nec sine quodam convicio, qui tanto tempore partibus hîc meis deessem. Hinc metus injectus, ne satis vitae restaret, ad publicandas una cum ipso Maronis contextu animadversiones nostras. Accessit & hoc excusatione dignum, quodque pretium libelli apud nonnullos extenuavit, in formam tam exilem collectus poëtarum Princeps. Id autem quemadmodum me nolente factum est a typographo, ita tu, pro cetera tua aequitate facile agnoscis inveteratum bibliopolarum nostratum morbum, qui compendio lucri ut plurimum studentes litterarum dignitatem negligentius curent. Quamquam si quid hîc culpa mea foret admissum, non citra spem veniae videri poteram peccasse apud candidos rerum aestimatores, quibus in comperto sit, non fuisse ab antiquis improbatum artificem, qui Iliadem Homeri universam, nucis includendam putamine, circumscripsisset, nec enormem corporis mensuram sua semper venustas comitatur aut elegantia. Quod reliquum est, amicis fore curae confido, si promissis sunt staturi, ne post me luci subtrahantur lucubrationes Maroni a me jam olim dedicatae, quando valetudo, id ut ipse praestem, sperandum vix relinquit. Est enim eo jampridem loco, etsi aestivis hisce mensibus solito benignius mitiusque mecum agit, ut nihil confirmati aut solidi, nisi deus, quod ajunt, adsit a machina, polliceatur in posterum: cum vires aut prodituro in publicum, aut rem privatam, bellis proximis haud modice attritam, curaturo nusquam respondeant. Articularis morbus & calculus mala sunt jam antiqua,

qua, quibus alia, praesertim post Ruthenicum iter, accesserunt nihilo leviora, atque horum id in minimis habendum, quod omni ferme jam pedum usu vivam privatus. Adde saevientis injuriae non unos insultus, qua veteres, qua novos. Obvenisse nimirum in rebus humanis haud pauca mihi adversa, sollerter & amice abs te est observatum: obvenerunt enim, & quidem multo plura his, quorum fama ad aures tuas pervenisse potuit. Nec postremam horum sibi vindicant partem aliae ex aliis peringratae lites, quae toto me vicennio modis indignissimis exercitum habuerunt, ut hisce incommodis angoribusque totum aetatis florem misere collabi atque interverti senserim. Quippe lite vix prima defunctus, iudicesque adeo iniquos eram expertus, ut causa reipublicae absentem damnarent, frustra, ut domum liceret reverti, flagitantem, aut si id non daretur, ut parumper sustinerent ac proferrent litem, (ea enim rerum in foro documenta post a praesente sunt exhibita, quibus inspectis iudex cogeretur fateri, longe aliam se sententiam fuisse laturum, si tempestivius aliquanto horum sibi facta foret copia) vix, inquam defunctus diuturnis hisce molestiis, ecce, denuo compellor in eandem arenam descendere, & cum proximae adfinitatis necessariis ob hereditatem, quam involarant, paternam digladiari, & his quidem in foro tam potentibus, ut iudicum pars magna essent ipsi, ac tantum non inter illos regnarent. Cui contentioni, etsi feliciorum sortitae eventum, nullus equidem adfulsisset finis, nisi domum re- versus munere ac honore publico memet abdicassem, uti rem privatam commodius curarem: praesertim quod dudum animadvertissem, infensos oblique foederatis Belgis Procerum Suecana in aula animos nihil jam fidum spirare, & si bella nobis aliunde intentarentur, (ut omne, quod rebus secundis floret, invidiae semper est expositum) illos, sacrosanctae pactorum omnium religionis oblitos, in partibus haudquaquam postremos fore; id quod eventus rerum non multo post abunde comprobavit. Jam curis exsolutus omnibus, tranquillitatis portum videbar tenere, jam biennem animo peregrinationem volutabam, ut valetudini ex adflatu coeli mitioris fomenta quaesiturus, ita exploraturus una, si quos aeri meo in exteris haud leviter habebam obnoxios, ingentibus horum promissis oneratus haecenus, hoc e nexu daretur tandem aliquando expedire. Nec deerant peregre viri Principes, qui uti ad se quoque molirer gressum, invitarent. Sed consilii huius ratio prorsus omnis mire conturbata est subsecuto confestim bello longe funestissimo. Locum igitur solitarium circumspexi, in quo mihi uni meisque Musis viverem, translata eo bibliotheca, quam pro facultatibus meis copiosam atque amplam plus satis instruxi, flagitatoque a Proceribus nostris missionis libello: cujus loco, post repetita frequenter haec postulata, longamque procrastinationem, perlatum huc ex aula nostra ad me diploma est, quo quicquid egi tot annis pro re communi approbatur, ac exquisitis iisque longe supra meritum meum laudibus extollitur. Ceterum missioni, quam unam flagitaram, ceterorum securus, quod conscientia propensae in rem publicam voluntatis integritatisque me involverem, neque subscribunt illic patres, & sese, si velim, paratos profitentur, curis ac

honoribus me rursus admoveere. Hunc post vitae tenorem aliis videbor fortassis parum felix: ego vero inter apprimè fortunatos asumi me numerare, qui tot objectus negotiis tamque lubricis atque in praecipiti collocatis, fortunae, utcumque semper avercae, ne tantillum quidem reliquerim, quo me aut neglecti in publicis officii, aut, quod multo gravius, doli insimularet mali. Nam paria hisce judicia, scripto non uno consignata, & ab aulae Succanae Procèribus ultro sum consecutus inde discedens, & ante ab his ipsis, qui illo terrarum in tractu late regnarunt. Vides, humanissime Thevenote, quo me libido quaedam & intemperies tecum confabulandi provexerit: jam enim epistolae modum longe excessi. Sed majora nusquam occurrebant, quae nuntiarem. De codicibus vero Graecis, quos Nicon Patriarcha Moscuæ complures, & hos quidem partem potissimam e monte Atho conquississe dictus est, cum illic regionum versarer, cognosse ex illo nil prorsus est datum. Ne quidem de Tartariae oris adhuc incognitis. Nam is, qui ex amicis meis ad Seras Orator a Principe destinabatur, alia post dignitate est cumulatus, & Rutheni ipsi adeo supine ac inscite observant & committunt chartae, quicquid peregre contemplandum occurrit, ut sine taedio ac multa indignatione narrantes vix audias aut legas. Ceterum litteras tuas measque complures in via periisse non est quod miremur, cum & itinera frequenti militum latrocinio fuerint infecta, neque locum certum, ubi aut ruri aut in urbe viveres, satis cognitum haberem, & ipse sedem elegissem ab omni tabellariorum accessu remotum. Illustrissimo Duci *Montozerio*, cum feret opportunitas, obsequia mea sistantur velim. Vale, virorum optime, & mihi velle, sic ut facis, in posterum perge. Vianae ad Leccam *MDCLXXIX. a. d. XIX. Sextil.*

EPISTOLA DCXL.

NICOLAUS HEINSIUS

*Petro Danieli Huethio.**Dutetiam.*

DEmonstrationem tuam Evangelicam, qua ab annis jam multis opus nullum aut eruditione consummatius, aut utilius Christianae Ecclesiae reor in lucem prodiisse, haud ita nuper ad me perlatam, jamque incredibili quadam cum voluptate ex parte majore perlectam, quibus exornem verbis, aut qua praestantiam libri exaequem oratione, fateor me non videre. De pretio tamen haud sane exiguo, quod is liber apud me invenit, fidem utcumque fecerit, quod etsi totum jam fere biennium aeger, sed a binis potissimum mensibus, prostratae & a lecto me non divelli permittentis valetudinis, oculos tamen a lectione commentarii tam exquisiti, tamque hoc seculo, quo contentus rerum divinarum plurimorum animos oppressit, & quotidie gliscit, cum maxime salutaris, vix removi; medicis quamquam & invitis, & omnium studiorum intentione mihi interdicentibus. Atque utinam vires, quas confirmari jamjam sentio, tam validas experirer, ut pleniore velo in commendationem

nem hujus scripti liceret excurrere: quamquam dubitari non potest, quin omnes Christiani, & sana sentientes, idem studeant. Ego vero, quem egestatis suae pudere merito decet, quid repono his tantis thesauris? Vellejū nūper, nunc Virgilium a me recognitos, quantilla munuscula? Virgilius certe, cum Rhotomagum pridem itinere maritimo perlatus esse dicatur, promitto mihi ab officiis *Emerici Bigotii* V. Cl. ut & tu & eximius Episcopus Cadomensis, alique ex praestantibus doctrina viris apud vos, unusquisque sibi destinatum ejus Poëtae exemplar jam sint consecuti. Vale. Vianae xii. Maji cidioclxix.

EPISTOLA DCXLI.

P E T R. D A N I E L H U E T I U S

*Nic. Heinsio.**Vianam.*

Q UOD de Evangelica mea Demonstratione scribis ad me, dignum est elegantia tua & comitate, quam ex libris tuis probe mihi jamdudum perspectam nunc ipse experior. Iis enim verborum blanditiis & ornamentis opus nostrum commendas, ut nisi me nimis amem, non merito quidem ulli meo, sed eximiae tuae urbanitati totum hoc referre debeam. Nempe ita comparatum est, ut quo quis est laudibus cumulatio, idem in iis tribuendis profusior esse soleat. Optimo quidem consilio operis hujus lucubrationem a me esse susceptam, neque negare velim, neque possim. Apparet enim propositum id fuisse mihi, certa in animo Serenissimi Delphini fidei Christianae fundamenta jacere, unaque grassantem passim hac aetate impietatem retundere. Cui argumento parem ingenii vim, parem eruditionem haudquaquam attulisse me agnosco. Quod si laboris hujus fructus extabit nihilominus aliquis, divinae hoc erit benignitatis munus, quae pia consilia optatis successibus prosequi solet. Interim te aliquantum temporis in scriptiois nostrae lectione sine fastidio & molestia collocasse valde laetor: novi enim subtilitatem judicii tui, ingenii acumen, candorem animi; quae talia sunt, ut si res bonas, sic tanquam optimas, laudare te sinant, at res malas, sic tanquam bonas, probare non patiantur. Quamobrem cum opus arbitrio tuo bonum lucubrassē me sine arrogantia existimare posse videar, id profecto magnopere gaudeo: tu enim unus omnium es, a quo probari faciendum esse plurimi existimaverim, a quo diligi magnae semper felicitatis loco duxerim. Dicam enim sine ulla assentatione, jampridem ex scriptioibus tuis, quas in priscos auctores edidisti, & ex elegantissimis Poëmatiis tuis, aureo Augusti saeculo dignis, praeclaram animi tui indolem, amabili quadam ingenuitate conjunctam, ita me perspexisse, ut adamaverim; ita adamasse, ut redamari contra a te valde optaverim, ad idque occasionem mihi & viam dari cupiverim. Quam quoniam liberalitate tua, donisque aperuisti, ineundam illico censui, nec committendum ut quod omni ope, omnibusque votis quaerere constitueram, oblatum id repudiarem. Peto itaque abs te, eximie vir, ut me ames in posterum, ita si me hoc idem

Z z z z 2

in

in te facere intellexeris. Quod quamvis sentio me facturum cum multis, neque paucos in te amando rivales habiturum, tamen appetam hujus rei principatum. Valde me angit adversa tua valetudo. Deus te nobis servet, cujus in salute politiorum literarum salus vertitur. Virgilium tuum accepi ab *Emerico Bigotio*: accepit a me Condomensis Episcopus. Gratias agimus uterque. Nihil cultius, nihil emendatius. Notas tamen tuas desideramus: quibus quamdiu carebit Virgilius, maximo decore & ornamento carebit. Vale XIV. Kal. Septembr. MDCLXXIX. Lutetia Paris.

EPISTOLA DCXLII.

NICOLAUS HEINSIUS

Petro Danieli Huetio.

Lutetiam.

PLenus quamquam adhuc admiratione doctrinae tuae, vir illustris, quam anno praeterito plenis oculis hauriendam mihi dabant Demonstrationes tuae Evangelicae, quod ego opus meo jure divinum appellare posse videor, distuli tamen scriptionem multo tempore, literis tuis humanissimis utcumque provocatus, quod sperarem fore, ut pervenirent ad me nonnulla ex his libris, quorum a te desiderari usum *Graevius* noster mihi significarat. Verum fortuna partim votis meis gratificata non indulsit, ut horum quicquam indagarim haecenus, praeter *Johannis Meursii* de Gloria libellum, quem ab optimo *Bigotio* accipies. Seposui & notas in Curopalatam Meursianas, & *Jonae Arngrimi* Islandicam historiam, sed ultimae editionis Batavicae, bis in pluteis meis exstantem: nisi quod tu fortassis mavis Hamburgensem, quam designaras, etsi minus hac nostra locupletem. De reliquis etiam mihi curae erit, ubi in auctionibus venales occurrant, quando nobis in librariorum pergulis nihil superest praesidii. Pro versibus tuis longe elegantissimis quod reponam nihil habeo, praeter nudam gratiarum actionem, eamque tuis in me meritis longe inferiorem. Audio & duplex epigramma ad te perferendum curare, quod publica auctoritate tumulo viri maximi nuper inscriptum est. Eram & vitam & res ab eodem gestas, breviter oratione prosa complexus, itidem sepulchro inscribendam. Sed cum nonnihil eam immutatam esse audiam, ab illis, qui rebantur supra caput vulgi nonnulla ibi esse a me prolata, & antiquitati magis, quam nostro saeculo convenire, quo usus Romani sermonis quodammodo obsolevit, pro meis venditare non ausim, quae alieni ingenii adminiculo sese tuentur. Nam Epigrammata non alio fine mittuntur, nisi ut arbitreris ipse, quid intersit inter obryzam tuam & meam scoriam. *Elzevirius* cum flagitatam a me saepenumero editionem Nasonis secundam nunc adornet, quod primae editionis exemplaria variis descripta formis sint jampridem distracta, desideris ejus refragari non possum. Vale, vir Illustris, Vianae ad Leccam XIII. Septemb. MDCLXXX.

EPISTOLA DCLXIII.

PETR. DANIEL HUETIUS

*Nic. Heinsio.**Vianam.*

EGO tamen postremis tuis diligentius respondere cogitabam, vir eximie. Verum cum exeunte autumno Lutetiae redditae mihi fuissent, paucis post diebus in morbum incidi, ex quo nondum plane recreatus, reficiendi mei, otiique persequendi causa huc concessi. Quorum alterum, valetudinis nempe, viriumque restitutionem, aëris hujus salubritate obtinui; alterum nondum nactus sum, ea est crebritas negotiorum, ea adventorum & interpellatorum molestia. Tecum autem per literas colloqui, nonnisi animo sereno & vacuo volebam. *Meursii* libellum De Gloria nondum accepi. Cum enim anno praeterito Lutetia scripsisset ad me *Bigotius*, se jamjam abiturum reliquisset eum amico cuidam suo, a quo reciperem statim atque in urbem rediissem; nihil hujus factum est. Spero tamen futurum id propediem. *Arngrimi Jonae* Crymogaeam bis omnino editam typis fuisse credidi, idque Hamburgi; in Batavia vero tantum specimen Islandicum. Hujus & Crymogaeae Hamburgi postremo editae exemplaria penes me habeo. Nihil est itaque quod de iis mihi comparandis vel mittendis amplius labores pro singulari illa tua liberalitate, quam satis laudare vix possum; gratias referre debitas ne vix quidem. Versiculos nostros tibi placere ex *Graevio* jam intellexeram. Ac tibi quidem, qui inter aetatis hujus Poëtas Principatum tenes, probari, summa votorum iis esse debet, qui ad Poëticam lauream aspirant; mihi, qui ne nomen quidem Poëtae affectavi unquam, supra vota est. Fruar itaque judicio illo tuo, mittamque ad te post paulo Lyricum carmen, quod a Musis meis jam per diuturnam desuetudinem elinguis loci hujus amoenitas expressit. Hoc te mihi alloquendum proposui, ut vulgo cognitum sit, quanti te faciam. De tuis Epigrammatis, *Ruteri* tumulo adscribendis, quae ad calcem literarum tuarum adjunxeras, quid dicam aliud, quam & ejus virtute ac meritis, in quem scripta sunt, & ejus praestanti ingenio & elegantia qui scripsit, esse dignissima. De nova Ovidii editione quam moliris, tibi gratulor. Primam quidem, tuasque adeo subjectas ei Notas, evolvi olim accurate: quod cum facerem, alium plane Ovidium, quae emendationum seges est, mihi legere videbar. Sic enim habeto, quaecunque a te profecta reperire potui, fuisse a me avide arrepta, & non magna solum mea voluptate, sed utilitate quoque perlecta; velut *Claudianum* tuum, quam lucubrationum tuarum postremam pervolutavi. Quem si per te revixisse dixerō, vere utique dixerō. Quoniam autem plurimis locis emendatum esse a te Pervigilium Veneris observavi, maximopere abs te contendo, ut ad vetustos tuos codices exactum & emaculatum suavissimum hoc Poëmatium mecum communices. Hoc mihi gratius facere nihil potes. Quod si nitori suo restitutum publici aliquando juris per te fiat, plurimum tibi Musas

Zzzz 3

ele-

elegantiores devinxis. Vale, literarum decus, meque ama. Ex Monasterio Alnetano, in agro Cadomensi viii. Kalend. Septemb. ciciocclxxxi.

EPISTOLA DCXLIV.

NICOLAUS HEINSIUS

*Christinae Augustae.**Holmiam.*

Mirum, Domina, quanta nuper animorum consternatione adversa valetudo tua hîc excepta sit, quantum metus atrocissimi omnibus incusserit. Ego autem quanquam meae erga te pietatis ostentator videri nolim, illorum tamen numero subduci me non patior, qui in partem curae maximae venerunt, quique votis continuis Deum immortalem pro salute tua fatigarunt. Spero commendatam illi fore in posterum tam sacri capitis salutem, quam sua potiore boni omnes merito habent. Parisiis scribunt opuscula *Balzacii* Latina nuper prodiisse, quae Majestati tuae inscripta sint. Dedicationis auctor *Aegidius Menagius* elegantis vir ingenii. Exemplar hujus libri jam in Sueciam missum est tibi offerendum. ita *Puteani* fratres nunciant. Sed metuo ne tardius ad vos perferatur, quam velit *Balzacius*. Operam igitur dabo, ut alia via aliud exemplar mittatur. *Vossium* hîc expectamus. Is ubi venerit de meo in Sueciam reditu sedulus cogitabo. *Salmasius* in Zelandiam profectus, ut amicis valediceret, in morbum illic incidit, ut audio. De libris nonnullis manuscriptis, qui ex Anglia allati sint, spes mihi ante dies paucos facta, qua de re certiora proxime. Nunc enim pluribus sacras occupationes tuas, Domina, interpellare mihi religio est. Deus te conservet, & tecum bonos omnes, qui sine te salvi esse non possunt. Lugduni Batav. cicioccl. Majo.

EPISTOLA DCXLV.

NICOLAUS HEINSIUS

*Christinae Augustae.**Holmiam.*

Quanquam videri jure confidens possum ac temerarius, qui sacras occupationes tuas ausim interpellare, Domina: meritorum tamen erga me tuorum rationem id requirere existimo, ut de meo in has oras adventu deque constanti obsequio per me tibi constet. Adeo quidem ut, cum non solubili immortalium beneficiorum nexu tibi obligatus sim, firmiter tamen tenaciusque vinculum virtutes tuas arbitrer, quas ut coram observare nuper divina tua indulgentia licuit, ita nunc absens non minus colo & admiror. Neque expectandum, Princeps sacratissima, ut tuus esse desinam, quamdiu meus ero; & quamdiu virtutis amor in hoc pectore flagrabit. Unum ad summam felicitatem deest, ut quem tuum esse voluisti, tanquam tuo uti incipias. Mandatis tuis aliquando bea, quem beneficiis fatis superque demeruisti. Hoc si
fece-

feceris, votorum summam consecutus videbor. Ego interim iis excipien-
dis me accingo, ne imparatum deprehendant aut aliud agentem. Ovidio
summam manum ut imponerem iussisti: & imposuisssem jampridem, nisi spem
dedisses fore, ut opera mea in majoris momenti negotio uteretur. Quantum
tamen per angustiam temporis licuit, ipsum Ovidii contextum editioni para-
vi: neque quicquam in me morae erit, quominus Elzevirianis typis brevi pro-
cudatur. Qua in re confido gratificaturos mihi typographos. Quanquam, si
mei arbitrii res esset, una prodire observationes in auctorem illum meas mal-
lem. Ex Italia litterae diebus proximis ad me perlatae, quibus scribant *Ota-
vium Ferrarium*, elegantis ingenii virum, litteras humaniores in Lyceo Pata-
vino profitentem, cujus eruditus de re vestiaria veterum libellus extet, Pane-
gyricum tibi inscripsisse, ac edi Venetiis curasse. Ejus exemplar si missum ad
te non esset, ut occasione prima mitteretur amicum rogavi. *Licetus* suum de
Lucernis veterum commentarium mox proditurum affirmat, quem alter ille
de Gemmis annularibus, Augusto nomini tuo devotus, sit excepturus. *Athanasii
Kircheri* Obeliscus Romae jam prodiit. Mitto hinc versus aliquot non quidem
optimos, tersos tamen atque elegantes, qui in manus meas nuper venerunt.
Deus clementissimus, Domina, te sospitem nobis praestet, qui pro salute tam
sacri capitis apud illum assidui intercedimus. Lugduni Batavorum CIOCLII. V.
Kalend. April.

EPISTOLA DCXLVI.

NICOLAUS HEINSIUS

Christinae Augustae.

Helmiam.

MEmini, cum nuper ad te scriberem, Domina, mentionem factam Panc-
gyricae orationis, quam vir eximius *Ottavius Ferrarius*, Patavinus huma-
norum litterarum professor, tibi inscripsisset, ac typis procudi curasset. Ejus
nunc exemplar cum per tabellarios ex Italia nactus sim, id mittendum tibi e-
xistimavi; si alia forsan via in manus tuas necdum pervenisset. Visa enim
mihi illa oratio multum eruditae antiquitatis prae se ferre, nec indignam ar-
gumento praestantissimo facundiam. Sive quod is obsequii erga te mei ge-
nius sit, ut nihil libentius legam quam laudes tuas, sive quod auctoris in rem
litterariam merita, nec exigua quae mihi cum illo haecenus intercedit necessi-
tudo, suffragium istud non invito extorquent, sive etiam quod scripti il-
lius nitor atque elegantia intercedunt, ne aliter arbitrari possim. Quic-
quid sit, officii mei existimavi eo eniti atque sedulo in id incumbere, ne
conspectu tuo Panegyricus hic fraudetur. Ex cujus lectione hoc certe e-
molumenti capies, ut ignorare in posterum nequeas, quo te cultu pro-
sequatur Italia, ingeniorum faecundissima illa mater, postquam quicquid re-
liquarum per Europam gentium virtutis tuae commendatio jam fatigavit.
Ego

Ego vero, Domina, quemadmodum saeculo huic invidendam istam felicitatem gratulor, quod natalium ac factorum praecipue tuorum fama in omnem posteritatem nobilitabitur, cum immortale sidus scientiis in tenebras jam nunc ac profundam noctem vergentibus affulseris, ita eidem quoque saeculo nostro istam pietatem atque istam mentem non possum non gratulari, quod praestantium tot ingeniorum assiduo certamine & victura commendatione virtutes tuae posteris innotescant. Deus ille regnorum tutor ac custos, qui te nobis dedit, faxit, ut tuis laudibus longum intersis, ac longum fruarere. Leidae cicicicli. viii. Maji. stilo novo.

EPISTOLA DCXLVII.

NICOLAUS HEINSIUS

Christinae Augustae.

Holmiam.

F*ortunius Licetus*, vir celeberrimus, Domina, qui anno superiori pollicitus erat, simul ac de Lucernis, quem praelo tum commiserat, in lucem prodiiisset commentarius, inscripturum se tibi, dedicaturumque de gemmis annularibus volumen mox edendum: is nunc, quod lentum nimis istud cum typographis negotium fore praevideat, e re sua, ut obstrictam fidem liberet, esse arbitratur, si illud ipsum de Lucernis opus tuo patrocinio committat. Alterum nihilominus de gemmis annularibus tuam quoque tutelam imploraturum est. Dedicationem ad me misit, quae *Vossiana* tibi manu exhibebitur. Prodiit intra mensem, alterumque opus. Ne trahatur igitur typographus, dum responsum e Suecia expectatur, ausus sum illi spem facere, tibi istud ejus propositum minime ingratum fore: idque eo magis, quod super altero libro tibi destinato sententiam tuam notam haberem. Si quid interim in dedicatione ipsa vel additum vel sublatum voles, tuum est imperare, Domina: cujus ad nutum lucubrationes ille suas dirigere posthac decrevit. *Ferrarium* benignitate ista vere regia, cum orationem suam panegyricam tam indulgenter a te habitam intelligat, aeterno quasi nexu in perpetuum tibi devinxisti. Mihi curae erit ut destinatum munus brevi consequatur. Ventus mihi pergit adversari in Gallias transfretaturo: haec morae causa est. Spero tamen brevi votis meis responsum. Pluribus in occupationes tuas gravissimas non pecco. Deus te conservet diuturnam nobis, Domina. Haec publica bonorum omnium vota sunt. Lugduni Batavorum cicicicli. 24. Julii.

EPISTOLA DCXLVIII.

NICOLAUS HEINSIUS

*Christinae Augustae.**Melmsiam.*

AUdeo sacrae dextrae offerre, Domina, quam a doctissimo *Gronovio* accepi modo epistolam tibi inscriptam. Aulum ille *Gellium* emendatum a se & recensitum luci nuper dedit. Cujus exemplar exhiberi tibi postulat, quod obsequii sui partes arbitretur, ne ignorare te patiatur, quid in rei litterariae emolumentum, cui lucubrationes suas uni consecravit, moliatur. Libellus ipse commoda occasione ut ad te perveniat, mox non negligam. Caeterum cum curae tibi esse teque velle intelligam, ut iter *Italicum* a me promoveatur, moram omnem procul habebo, meque quanta fieri poterit festinatione viae accingam. Expectanda tantum sunt, ut jussisti, certiora mandata. Bibliothecam *Cardinalis* neutiquam venalem fore quanquam plerique arbitrantur, invigilabo tamen illi negotio, operamque dabo, ne quis hoc a me agi intelligat. Habet enim in aula etiamnum *Gallica* amicos potentissimos, quique omnem moturi lapidem videntur, quo res ejus lapsae in integrum restituantur. Sic praesagiunt certe futurum quotquot inter nos in negotiis publicis aliquid se videre existimant, sic prudentiores *Galli*. Nec dubium est, quin primi isti in gente fervida publicorum odiorum impetus, mora temporis leniri possint, atque ita paulatim exspirent: praesertim si viderint fugam ejus internis seditionibus ac discordiis non mederi. Rem itaque de bibliotheca ejus occultam habebo; idemque *Bidalium* facturum confido. Sed nec ista cogitatione ab proposito in *Italiam* itinere avelli me patiar, aut avocari, si dubiam rem in tempus protrahendam cognovere. *Claudium Sarravium* *Parisiis* diem suum obiisse rumor hîc est: nullas enim ad me ex urbe illa tabellarii proximi tulerunt. Habebat ille manu exaratos codices nonnullos, paucos quidem illos, sed exquisitos; habebat editos rarissimos, *Hispanicos* praesertim ac *Italicos*, quos magno studio collegerat. Iis augeri bibliothecam tuam non inopportune posse existimo. De *Ovidio* malint *Elzevirii* dilatam editionem. Munus *Octavio Ferrario* destinatum pro *Panegyrica Oratione*, illi in manus tradam: gratiasque jam nunc, quantas possum, ejus nomine ago. Deum toto animo veneror, ut te diuturnam conservet nobis, ô, qua sol habitabiles illustrat oras, *Maxima Principum*: nihil enim majus optari paucis potest. *Octobris 16. August. ciciocli.*

EPISTOLA DCXLIX.

NICOLAUS HEINSIUS

*Christinae Augustinae.**Holmiam.*

CUM intellexissem, Domina, Gaulminianos quidem codices & MSSos jam in Sueciam & ad te perlatos, indicem tamen libris non fuisse additum, rem me facturum minime tibi ingrata arbitratum sum, si catalogum a *Gaulmino* ipso niterer impetrare, ex quo demum cognosci a te posset, cujus argumenti essent ea volumina. Tantoque magis sedulum me hac in re praestiti, quod norim praeter virum illum amplissimum vix alium esse, cujus opera index tam accurate confectus tibi possit exhiberi, cum & maximam literarum Orientalium cognitionem adeptus sit *Gaulminus*, & libros ex his plerosque, qua est curiositate, perlegerit. Catalogum, quem hic vides, a *Resandro* describendum curavi, *Gaulmini* manu descriptum alia & tutiori via missurus, ut si alterum perierit, alterum saltem exemplar ad te perferatur. Una cum Vossianis proxime accepi literis mandata tua in chartam coniecta, quibus certe, Domina, plurimum me beasti. Mentem quidem praefens de his omnibus, quae fieri ac procurari a me velles, abunde aperueras, sed diffusus ego memoriae meae, quam non valde interdum tenebam exerior, malui, fateor, tibi quam mihi credere. Chartas enim illas quoties attrecto & inspicio, toties Augustae audire imperantis vocem mihi videor. Vale; Lutetiae 9. Septemb. MDCCCLII.

EPISTOLA DCL.

NICOLAUS HEINSIUS

*Christinae Augustae.**Holmiam.*

CUM unicum omnium ingeniorum certamen sit, ut tibi innotescant, tibi probentur, Domina, *Godellus Grassensis Episcopus*, celeberrimi inter Gallos nominis scriptor, virtutum tuarum admirator summus, has ad te ut curarem rogavit; Opera etiam sua per *Bidalium* mox oblaturus. Misit etiam *Cramoisyus* Typographus hodierno die versionem Gallicam libri primi commentariorum Caesaris a Ludovico XIV. Rege Christianissimo lucubratam, quam eidem *Bidalio* curandum commisit. cras Italico itineri me sum commissurus. Discedet biduo post legatus ad Rempb. Venetam Gallicus, quem Lugduni opperiar, ut per Allobrogum fines, latrociniis valde infestos, in Italiam salvus evadam. Vale Parisiis; xx. Septemb. MDCCCLII.

EPISTOLA DCLI.

NICOLAUS HEINSIUS

*Christinae Augustae.**Holmiam.*

OPinor testatum me fecisse tibi jam olim, Domina, quo virtutes tuas cultu, quaque veneratione politissimus prosequeretur *Capellanus*, quanquam quis est ex praestantioribus nostrorum ingeniis adeo oblitus fui, ut ignoret aut dissimulet, quid meritis tuis debeatur? Delati tibi imperii solennia anno proxime elapso celebranda sibi hoc epigrammate proposuit, quod oculis tuis haftenus fraudatum, hîc mitto. Auctor enim cum sibi tantum, qua est modestia, id scripsisset, interque schedas suas neglectum postea seposuisset, aegre a se impetrari primo passus est, id ut mecum communicaretur, & quia tenebris subductum non meo tantum, sed caeterorum quoque, quotquot aliquem Poësis gustum hîc habent, suffragio te ac *Capellano* dignissimum visum est, injurium me mihi fore credidi, nisi ejus tibi copiam facerem. Additum & aliud epigramma ejusdem jam olim scriptum in Marchionis *Montoserii* uxorem, illo tempore virginem adhuc, commendatissimam ab ingenii praestantia toto orbe faeminam. Argumentum dedit flos ab amante *Montoserio* illi missus, quem coronam imperialem vulgo hîc vocant. Venerabatur ea tunc Divum Gustavum Magnum; genitorem illum tuum, miraue animi propensione continuas ejus victorias prosequeretur. unde creditum ejus illam amore correptam. Huc alludit epigramma. Sed cum notissima ista tibi sint, perperam hîc a me repetuntur. Plura non dissimilis argumenti aliorum epigrammata ad eandem *Montoseriam* scripta describi jam curavi per amicum: operamque dabo, ut ad te mittantur. Vale, certissimum generis humani praesidium, & laudibus tuis tandem assuesce.

EPISTOLA DCLII.

NICOLAUS HEINSIUS

*Christinae Augustae.**Holmiam.*

FRetus auspiciis tuis, Domina, ac firmo Fortunae regiae praesidio munitus, incommoda molestiasque itineris Italici, quae frequentes nec parvae in via sese obtulerunt, hiberna tempestate hasce terras solito maturius invadente, salvus evasi tandem. Postquam Lugdunensem in Galliis pervagatus essem provinciam irritò conatu, nihilque veterum in oris illis librorum e latebris bibliothecarum posset erui, Taurinum me converti. Copia mihi in illa civitate facta est perlustrandae Ducalis bibliothecae, in qua codices notae optimae Graecos, satis multos & quidem haftenus ineditos, exstare deprehendi. Vastum etiam *Pyrrhi Ligorii*, summi antiquarii, opus viginti septem voluminibus comprehensum

inspexi, aegerrimeque, ne quid dissimulem, tuli tantum haecenus thesaurum publico invideri. Haec tamen omnia quasi in transcurso & festinantibus oculis usurpavi, quod periculum in mora esset, ne hiberni caeli injuriis aliud agendo rursus me exponerem. Vocavit me ad colloquium suum mater Ducis, de adventu in urbem illam meo nescio a quo monita, multisque verbis cultum vere eximium testata est, quem immortalibus meritis tuis dicasset. Ex illa urbe Mediolanum me contuli, ubi paucis etiamnum diebus moram sum tracturus, cum spes sit facta codicum aliquot manu exaratorum venalium, & ab urbe absint, penes quos negotii hujus arbitrium est. Interim Ambrosianam bibliothecam quotidianus frequento, codicum ex catalogo praestantiorum nomina excerpo, ineditorum maxime. Ceterum cum intelligam literas meas nec improbari, nec ingratas, quae divina tua est benignitas, tibi esse, quamquam frequentes & impolitas, domina, curae mihi erit posthac, ne felicitatem istam meam videar neglexisse. Vale. Mediolani. 13. Novemb. 1610. CCL.

EPISTOLA DCLIII.

NICOLAUS HEINSIUS

Christinae Augustae.

Rolmiam.

Venetias adveni tandem, Domina, post peragratam Italiae partem non exiguam, relicta Mediolano, ex qua urbe nuper scribebam, jamque torquem aureum *Octavio Ferrario*, a te destinatum conficiendum curavi. Erit is post dies paucos paratus. Nihil prius mihi tum futurum, quam ut Pata-vium me conferam, ac eximiae liberalitatis tuae virum praestantissimum reddam compotem. Librariorum interim in hac urbe pluteos omnes excutio, si quid forte scriptorum codicum hinc inde conquiri possit: nec de successu desperandum. *Lucam Langermannum* commodissimis moribus atque eruditione non vulgari ornatum juvenem, quod in consortium peregrinationis hujus ad-scivi, non displicuisse tibi consilium meum vehementer laetor, diligentiamque ejus expectationi desideriisque in omnibus responsuram confido. Certe quocultu, quaque erga te pietate haecenus fuerit, luculenta pridem oratione panegyrica nec ineleganti testatum publice fecit, quam edendam in Germania curavit, nec applausus doctorum hominum conatum illum destituit, nescio vero an in manus tuas perlata sit haecenus. Relictus a me est Mediolani, quod spes in illa urbe non vana adfulgeret de scriptis codicibus aliquot auctione publica vendendis, cum mihi interim huc excurrendum esset, ne cunctatione mea munus tuum, Domina, diutius *Ferrario* invideretur. Theocritum in Ambrosiana cum manu exaratis libris coepit committere, multaue egregia auctori suavissimo restituit, quorum specimen proxime tibi sistam. De Altempfiana bibliotheca opportune *Vossius* me monuit, deque emenda curae mihi erit, ubi Romam venero. Catalogum ejus jam cum multis aliis Mediolani nactus eram. Venit nuperrime in manus meas carmen hoc cum epistola Ferrariana, quod

con-

conspectu tuo non existimavi fraudandum. Vale, unicum generis humani praesidium. Venetiis 9. Decemb. MDCLII.

EPISTOLA DCLIV.

NICOLAUS HEINSIUS

*Christinae Augustae.**Holmiam.*

Adventus in hanc urbem meus, argumentum scriptionis nuperae fuit, Augusta, nunc de adeundo in diem crastinum Patavio me cogitare nuntio. Citius enim torquem aureum obtinere non potui, sine quo *Ferrarius* mihi compellendus vix videbatur. Eadem opera urbis illius bibliothecas praestantiores inspiciam, nihilque non agam, ut quicquid veterum librorum venale illuc prosteret in monasteriis, aut apud privatos lateat, tui juris fiat. In mandatis etiam aut *Ferrario*, aut alteri amico dabo, ut me absente rem istam pro viribus promoveant: cum decreverim Florentiam mox contendere. Lugduno antequam moverem pedem, in Italiam abiturus, libros aliquot recens illic editos comparavi, Bidalioque mittendos curavi: quos inter & Alberti Magni scripta omnia fuisse memini opus viginti & unius voluminum. Non quod illorum quicquam tuo gustui arrisurum existimarem, sed quod Regiae Bibliothecae splendor videretur exquirere hoc auctuarium. Obiit in Batavis *Johannes Forestus*, amplissimus Senator, qui supplementum Virgilianum Augusto tuo nomini inscribendum voverat. Magnum ante mortem solatium tulit vir optimus, quod conatus suos non improbari tibi intellexerit. *Liceti* liber nondum prostat. Video potissimam scriptorum codicum partem magna externorum industria Italiae jam praereptam. Editorum copia necdum deest, ut de augenda bibliotheca tua haud parvo librorum numero, spes esset certa, si ejus indicem in promptu haberem, sine quo nihil temere tentandum existimo. Vale. Venetiis 16. Decemb. MDCLII.

EPISTOLA DCLV.

NICOLAUS HEINSIUS

*Christinae Augustae.**Holmiam.*

Virtutes tuae, Augusta, cum tantae sint, ut eruditorum omnium & praestantium virorum obsequia atque cultum perennem abunde conciliare tibi possint, quo arctius tamen tenaciusque devinctos habeas cultores tuos, regiae insuper liberalitatis benigno nexu constringendos putes. Nec satis tibi visum neglectas jamdudum sub Arctoo coelo scientias instaurare, praemiisque sopitas excitare luculentis per regni tui limites; sed reliquam quoque, quaqua patet, Europam immensi hujus & inusitati erga literas amoris tui testem esse voluisti. Quem heroicum conatum is mehercule excepit successus, ea gloria,

Aaaa 3

ut.

ut quicquid in terrarum orbe non est prorsus barbarum, te tanquam numen unicum bonis artibus tutelare propitiumque imploret ac veneretur, tuque mundi universi imperium (mundus enim dici non potest, quem scientiae destituunt) jure optimo vindicare tibi possis. Reginae certe ubivis gentium, quam Christinae Augustae nomine non minus jam nota sis. Torquem aureum, quem *Otávio Ferrario* offerri jufferas, oblatum a me nuntio, cujus rei testes viri illius politissimi literas hîc habes. Munus tam splendidum, quo donatus est, non tam illi, quam tibi gratulor, Augusta, cum nec indigno cesserit, nec ingrato, quod re ipsa aliquando te experturam confido. De me autem, ut hoc addam, honor ille viro mei amantissimo a te habitus, quem proinde meum reor, multum alacritatis mihi addit ac stimuli, reliquis mandatis tuis pari cum fide atque diligentia ad felicem exitum promovendis. Vale; Patavii xxi. Decemb. CIOICLI.

EPISTOLA DCLVI.

NICOLAUS HEINSIUS

Christinae Augustae.

Holmiam.

O*ctavio Ferrario* torquem aureum tuo nomine oblatum a me proxime nuntiavi, Domina. Gratum fuisse munus pretiumque, quod debebat, invenisse apud disertissimum panegyristen luculenta ejus, quam exhibitam jam confido; testabitur epistola. Omnium literatorum oculos in te convertit torquatus noster: munus enim ipsum collo appensum circumferre nonnumquam solet pro nitore gentis. Metus itaque est, ne regiam liberalitatem admirari hîc incipiant etiam illi, qui ceteras virtutes tuas aestimare non possunt, scriptisque tantum non trivialibus & quotidianis promiscue tuum patrocinium imploretur. Quanquam curae mihi erit praecipue, ut delectus ingeniorum habeatur, utque paucis imitari liceat *Ferrarium*, vulgusque a sacris tuis profanum longe arceatur. Patavio redux omnem eo diligentiam converti, ut ad antiquarii *Ruzini* nobilis Veneti suppellectilem perlustrandam admitterer. Sed *Ruzino* ipsi praeturam *Tarvisinam* hoc anno demandatam a Patribus intellexi, qui foris proinde degat. Per civitatem tamen *Tarvisinam* cum sit facturus iter *Gustavus Adamus Bannerius*, gentis Suecicae magnum decus atque incrementum, pollicitus mihi est, se omnes eo conatus directurum, ut exhiberi mihi *Ruzinus*, quanquam absens, a domesticis ac familiaribus suis, numismata antiqua ac statuas omnes curet. Quod si fit, an & quo pretio venales haberi possint, ut intelligas, Augusta, curabo. Sin nihil ea de re sperandum, vasa colligam proximisque Florentiam diebus sum discessurus. *Paulus Capatorta* Senator, dum viveret, in hac republ. amplissimus, magnum hujus notae thesaurum possidebat, quem morte *Bellono* cognato legavit, numismata ipsa cum statuis Patavii servantur. Vidit ea ac magnopere commendat *Ferrarius*, tribusque aureorum millibus aestimari adfirmat. Ne a me etiam videri possint, *Belloni* facit

est absentia, qui Romam profectus est, propter lites, quas super agro nescio quo cum Duce Mutinensi exercet. Senator alter, cui *Viario* nomen, magnam etiam in hac urbe numismatum copiam collegit, quam velit vendere, si emptorem inveniat. Vidi illa olim, ac rursus videre conabor. Argentea erant potiori ex parte, si recte memini. Graecos etiam manuscriptos possidet, sed paucos numero, quosque a reliqua bibliotheca, quae ex libris juridicis potissimum constare dicitur, avelli se passurum neget. Sed quod praecipue cura tua dignum duco, exhibitus a me olim tibi, Domina, numismatum Boncompagnianorum Catalogus, quae per totam Italiam celeberrima, nunc viliori longe quam antehac pretio haberi posse eques *Puteanus* arbitratur. Factus enim eorum possessor ex Abbate Archiepiscopus Bononiensis, ut vivere multo splendidius nunc cogitur, quam ante, totus etiam est in exstruendo palatio novo, ac proinde parata opus habet pecunia. Octo aut novem scutorum millibus haberi posse, quae millibus viginti aestimantur, spes est. De pretio diligenter omnia inquiram, teque rei totius certiore faciam. Romae ut diu haeream, consultum non puto: praesertim cum vix ullus ad Vaticanam peregrinis aditus nunc detur. Numismatum etiam quidquid illic comparari potest Principis Hetruriae Leopoldi nomine *Carolus Datus* conquirat. Statuae denique, in primis Graecae, meliori longe pretio & Venetiis & in aliis Italiae civitatibus, quam in urbe, haberi possunt. Vale. Venetiis x. Jun. MDCLII.

EPISTOLA DCLVII.

NICOLAUS HEINSIUS.

Christinae Augustae.

Holmiam.

Scribendi partes, Domina, ab aliquo jam tempore intermisi, quod in via sfuerim assiduus. Relictis Venetiis, ex qua urbe scripsi proxime, Bononiam, Bononia Florentiam contendi. Utrique civitati dies a me non nisi pauci sunt dati. Inde Romam profectus, quod post continuos imbres, coeli tandem clementioris aura ad iter hoc invitare me videretur. De felici in Urbem adventu nunc te certiore facio. Hoc epistolae hujus argumentum erit. Neminem praestantiorum hinc virorum cum hactenus convenerim, praeter *Puteanum* & *Holstenium*, ut qui non nisi triduum hinc ago, si de illis omnibus, quae scire aves, accurate nunc non possim scribere, facile ignosces mihi, ut opinor. Proxime ad scribendi officium revertar. Ostendit nobis Cl. *Holstenius* immensam copiam auctorum veterum, quos partim e tenebris primus eruit, manu sua descriptos, partim ex Membranis antiquis in integrum restituit & infinitis locis correxit. In lucem ne proferre possit horum quicquam, subsidia deesse sibi causatur. Adeo Graecae literae nunc hinc negliguntur & jacent. Conabor ab illo impetrare Catalogum scriptorum omnium, quae luci parata habet,

impe-

impetratum ad te mittam. Deus te conservet nobis diuturnam, Domina.
Romae IX. Februar. CIOIOCLII.

EPISTOLA DCLVIII.

NICOLAUS HEINSIUS

*Christinae Augustae.**Holmiam.*

DIvinam benignitatis tuae erga res meas constantiam veneror profecto & admiror, ut qui maxime, Augusta. Unice in votis mihi semper fuit, ut commendarer tibi. Nunc non hoc tantum me consecutum video, verum ut viris principibus commender tuo beneficio tuaque auctoritate. Quas ad Legatum Gallicum per me curatas voluisti literas, recte curatae sunt. De statuis adfirmat mihi serio se egisse cum Pontifice maximo, cum ultima illi vice ante menses tres adesset, spemque esse non vanam desiderii illum tuis subscripturum. Verum statuae ipsae, quod ille nesciebat, jam Liburnum missae sunt, qua in re non inutilem tibi operam *Holstenius* navavit. Quantum ad alterum illud negotium, quod videris velle, ut aditus mihi liberior ad bibliothecas Romanas detur, cum Cardinali *Caponio* se acturum promisit, qui Vaticanam curam habet. Mihi interim ejus usus conceditur, sed ea lege, ne quid praeter Poëtas evolvam. Hispanicus in hac aula legatus nullus est. Legati munia interim obit, dum adsit alius, Cardinalis *Trivultius*. Illi tuas si offerrem, rem fortassis non gratam tibi viderer facere. Possint illae aut Proregi Neapolitano aut Mediolanensi Gubernatori exhiberi cum mea inscriptione, quam ut adderem voluisti. Videbo quid e re tua sit. *Boncompagni* numismata necdum vidi: nec satis constat an videri possint, cum ea Bononiam secum brevi ablaturus dicatur, cujus urbis Archiepiscopus nuper factus est. *Franciscus Gotesfredus*, sua se exhibiturum nobis post dies paucos promisit. Immenso illa pretio aestimare fertur, ut inter nos vix opiner conventurum. Haftenus in celebrandis Bacchanalibus adeo toti fuere Romani, ut serii nihil cum iis agi potuerit. Mox alia supervenerunt solemnia, creatis ab Innocentio x. decem Cardinalibus, quos inter & Coadjutor Parisiensis. In laudes tuas quae meditatus est *Nicolaus Crafusus*, Venetae reipublicae consultor, nondum ad manus meas pervenerunt, perventura tamen brevi confido. De suis etiam versibus Hetruscis spem mihi fecit *Carolus Datus*. Inveni hîc Patrem *Antonium Macedonem* Jesuitam Lusitanum, qui magnam virtutum tuarum venerationem utique prae se fert. Pollicitus est curaturum, ut aditus mihi detur ad Altempsianam, Farnesianam ac Sfortianam bibliothecas, quae post Vaticanam omnium in hac urbe celeberrimae. Nam suae ipsius usum liberaliter mihi obtulit doctissimus princeps *Franciscus Barberinus*. Ego Ovidio manum rursus admoveere coepi, idque eo magis, quod auctoris illius editionem, quam recensui, typographi Amstelodamenses in minori forma, quantum video, adornare jam coeperint. Propter absentiam meam ne inendae plures quam velim, irrepanet metuo. Dubiumque

am

jam mihi est, an tui sub nominis auspiciis libellus debeat prodire, quem secundis curis politiolem majoribusque typis mox edendum fore confido. *Vincentius Noghera* salutari a me non potuit, quod in carcere detineatur. An *Vossianae* ad illum literae perlatae sint, ne hoc quidem scio. Quidam mox dimittendum fore adfirmant, negant alii. *Holstenius* Perusiam, iubente Pontifice, profectus est praeter expectationem meam: mox tamen reversurus dicitur. Haec causa est, cur promissus index librorum, qui penes illum sunt, edendorum ad te non veniat. Imaginem tuam, Domina, plurimi hinc a me exigunt, sed frustra. Dux *Braccianus* inter cultores tuos praecipuus eam exprimi curavit in auro, & ad te mittendam destinat. Exhiberi illam curavit mihi hodie, sententiamque meam voluit scire. Ut verum fatear, non visa est mihi optime te referre. Cras ipsum Ducem conveniam. Retulit eques *Puteanus*, magnos in hac urbe artifices esse, qui eam libenter in auro ac aere expressuri sint. Huic instituto si faves, necesse erit ut mittatur huc imago aliqua exacte ad vivum expressa. Vivam interim imaginem tui, hoc est heroicas illas & nunquam satis praedicandas virtutes, omnes hinc circumferunt ac adorant. Vale Romae Februar. cicioclii.

EPISTOLA DCLIX.

NICOLAUS HEINSIUS

Christinae Augustae.

Holmiam.

Mensis, nisi fallor, quintus jam agitur, quod relictis Galliis in Italiam jussu tuo me contuli, Augusta. Ab eo autem tempore nihil mihi prius fuit, nihil majori curae, quam ut successum itineris hujus ex epistolis meis intelligeres. Quas tamen omnes, fateor, exaravi magis, ne obsequio meo deessem, quam quod spes esset ad te perventuras, cum edoctus non essem, qua via & per quem tuto curari possent; donec *Vossiana* tandem epistola percepi *Norimbergam* ad *Georgium Furstenhausium* mittendas, cujus operam imposterum implorabo. Meas in via plerasque periisse ut credam, facit tum silentium illorum, quas ad scribendum provocare solebam, tum quod ex rarioribus illorum literis satis agnoscam, illas non minus quam meas epistolas intercipi. Mihi interim quid futurum sit, avide exspecto. Nam mandata tua nisi intra mensem aut sex hebdomadas adsint, serum fore praevideo, ut in *Siciliam* excurram, quod velle tamen te ex *Vossianis*, quas dixi, literis subodoratus sum. Aestivi enim calores jam nunc grassari his in oris incipiunt, moxque itinerum usum viatoribus omnem intercipient. Ego *Holmiam* *Vossiumque* jam a tribus quatuorve mensibus urgere non destiti, ut sententiae ac voluntatis tuae copiam mihi facere ne graventur, & confido responsum illorum tempestive adfuturum. Doleo per valetudinem vix satis firmam non posse desideriiis me tuis sic invigilare, ut velim ipse. Vaticanam adeo frequenter: sed cum intra Poëtarum veterum angustias studia nostra a Cardinali *Capponio*,

Tom. V.

Bbb b

qui

qui curam bibliothecae habet, sint circumscripta, Ovidio manum denuo ad-movere coepi, ut proxime a me significatum memini: idque eo magis, quod in auctore illo edendo nunc occupentur *Elzevirii*. *Langermannus* in Theocrito pergit non inutili opera: mox aliis Poëtis restituendis parem diligentiam adhibiturus. Sfortianam vidi proximis diebus, quae expectationi meae nequaquam respondit. Scripta majori ex parte Theologica sunt, quae in ea con-servantur. Ad Altempsianam & Farnesianam mox ut admittar, nihil non agam; nec tamen satis scio, an id impetraturus sim. *Vincentium Nogheram* in carcere detineri proxime monui: sine ejus opera in Altempfiano negotio nihil agi po-est; cum aliis in hac urbe viris literatis minime fidam: qui videntur indig-nari in ultimum septemtrionem haec eruditionis instrumenta ablegari, ut illo-rum verbis utar. *Boncompagnii* numismata necdum vidi. Ad ea perlustranda ut admitterer, petii ab iis, qui multum apud eum possunt: nihil tamen effeci haecenus. Nec urgere fervidius ausim, ne suspicetur eo nomine me huc ve-nisse. Scrutari interim coepi ea, quae *Franciscus Gottefredus*, nobilis Romanus possidet, egregia sane & quantivis pretii. Imperatorum veterum plurima illic vidi cum Graecis inscriptionibus, quae maximi hic sunt. Nec scio an alius ejus notae tam multa in hac urbe possideat. Idem de numismatis magnae molis (*Medaglioni* ab Italis vocantur) dictum esto. Vincit tamen aureis argen-teisque nummis longe *Boncompagnius*, ut ferunt, & praecipue gemmis anti-quis, quas pulcherrimas graphiceque admodum sculptas ingenti numero colle-git. Sua quanti *Gottefredus* aestimet non scio, cum omnia necdum perlustra-rim, quod occupatior sit. In familiari tamen colloquio professus est novem ad minimum scutorum millibus ea sibi constitisse, quo pretio Boncom-pagniana haberi posse confido. Accuratius inquiram in hanc rem. Rariora sua typis destinavit *Gottefredus*, & jam in aes incidi ea curavit, exemplum *Angeloni*, alterius antiquarii Romani, secutus, qui sua annis proximis in lucem dedit. Reversus est tandem *Perusia Holstenius*, sed decumbentem offendi ex adversa valetudine, quae causa est, cur indicem auctorum veterum, quos par-tim ineditos, partim ex antiquis codicibus a se restitutos magna copia possi-det, necdum mecum communicarit. Interpretes Platonis multos in promptu habet, quos tuis expensis publico donari velit, quantum colligo, cum & ty-pographi Italici sumptus graventur, & ex proceribus Romanis nullus sit, qui eo curas dignetur convertere. De Platonica etiam Philosophia commentarios paraturum se adfirmat, tibi, ut reor, inscribendos. Statuas antiquas meo nomine hic emptas, ut ad te mitterentur, a Pontifice impetravit, cum lega-tus Gallicus rem differret, cujus res in hac aula sic satis sunt turbatae. Sta-tuas ipsas jam Liburnum appulisse opinor. Inscriptiones aliquot antiquas prae-stantioris notae velim conquirere, quod sperem tibi eas nequaquam ingratas fore. Qua in re operam suam verbis luculentis idem mihi *Holstenius* est pol-licitus. Ante dies quatuordecim Dux *Braccianus*, summus virtutum tuarum cultor, Augusta, imaginem tuam auro coloribus vivis artificiose inustam ad me misit, quam tibi jam redditam auguror. Ipse manu sua hanc imaginem

cla-

elaboravit, quod nesciebam primo. Miraberis summam viri Principis dexteritatem, idque eo magis, quod nullus hîc sit, qui eo modo hoc possit. Magna me certe comitate excepit, quod tuum esse intelligeret. Ante menses duas elegiam tibi a me inscriptam misi; mittam aliud exemplar, si illud in via periiit, quamquam felicitatis magnae reor, si fortuna tam malis versibus fraudatam te voluit. Vale: Romae Martio ciccicclii.

E P I S T O L A DCLX.

N I C O L A U S H E I N S I U S

*Christinae Augustae.**Holmiam.*

MISI non ita nuper specimen, Augusta, seu indiculi partem earum antiquitatum, quas *Franciscus Gottefredus* possidet. Caeterum cum opportune a me sit monitus laboris fore nimii, omnes in indicem nummi si congregarentur, praestantiores tantum notandos curabit. Debebat index jam totus mihi esse exhibitus, sed nescio quam ob causam more Italico cunctatur. Hodie Bononiam ad Archiepiscopatum suum abiit *Boncompagnius*, supellectilemque antiquariam secum avexit, quam exhibere mihi debebat omnino ante abitum, cum & id assiduis petiissem precibus, & se facturum promississet ipse. Licet conjecturam facere non vanam, malle illum Bononiae negotium hoc agi, quam Romae, ne Papa forte venditionem intervertat. Aere certe alieno oppressus est *Boncompagnius*, ex quibus angustiis miserum in modum se velit expedire. Petit pro numismatis ac gemmis scutatorum mille Duodecim, octo aut novem millibus venditurum spes est. Adfirmavit mihi quidam ex amicis, ejus pondus aureorum & argenteorum numismatum fere millia aequare quatuor. In aereis numismatis superare *Boncompagnium* creditur *Gottefredus*, nisi quod Pescennium nullum habeat, quem alter possidere sexies dicitur. Expectabo mandata tua aut Bononiae aut Venetiis, Augusta; Ex hac enim urbe ut calores aestivi me mox abigant futurum video. *Muscambronius* mox capite plectendus: ita futurum ut restituatur libertati *Noghera*. Non discedam certe, nisi ejus opera tentavero, quid de Altempfiana sit sperandum. Ovidium meum, qui in Batavia nunc editur, nomine tuo illustrare ausus sum. Titulis nullum in dedicatione locum dedi, quod solum nomen tuum instar omnium sit titulorum, nihilque minus in te veneremur, cum omnia veneremur maxime, quam regalis fastigii splendorem. Vale. Romae ciccicclii.

EPISTOLA DCLXI.

NICOLAUS HEINSIUS

*Christinae Augustae.**Holmiam.*

Boncompagnium Bononiam profectum, non ostensis, quod facturum tamen se promiserat, numismatis, nunciavi proxime, Augusta. Nolle illum suspicor agi in hac urbe de illo negotio, ne Pontificem offendat. Supellectilem, quam possidet antiquariam, omnem Duodecim scutorum millibus aestimat. Sex millibus tuos nummos *Gottofredus*, a quo reliquam catalogi partem necdum obtinere potui. Quanquam uterque remissurus sit nonnihil de illo pretio, tamen in aequiora omnia ire *Boncompagnium* videtur. Nam & Gemmas praestantissimas easque plurimas habet, plurimos etiam nummos aureos argenteosque, qui paucissimi sunt apud *Gottofredum*, nec valde rari, cum ille omnem eo diligentiam videatur contulisse, ut in aereis excelleret: sententiam tuam non ignorare magni beneficii loco ducam, Domina. *Vincentius Noghera* necdum sui juris est, brevi tamen fururus. Sic & auguratur ipse, cum capite sit plexus *Muscambronius* tandem. De Altempfiana bibliotheca bene sperare iubet. Nam & Ducem literarum imperitissimum esse adfirmat, nec de ea vendenda abhorrere. Id tantum dubitare licet, passurusne sit manu exaratos codices ab editis separari. Nos hoc intelligemus proxime. Unicum *Nogheram* adhibendum in consilii hujus partem existimavi, ne turbetur negotium ab hominibus malignis, quales hinc sunt multi, si promanet in vulgus. *Holstenius* cum adversa valetudine post iter Perusinum pergit conflictari, devotissimum se tibi profitetur, quam in statuis ex hac urbe auferendis apud Pontificem navavit tibi operam, eandem pollicetur in reliquis illi exportandis, quae apud *Vitellescum* etiamnum haerent. Deus te conservet.

EPISTOLA DCLXII.

NICOLAUS HEINSIUS

*Christinae Augustae.**Holmiam.*

Nunquam magis miratus fui, Domina, quam cum Alexiadem Annae Comnenae, quam tibi inscribendam putaram, Galliarum Cancellario dedicatam vidi. Veniam ut id liceret sibi ab patre generali sui ordinis non potuisse impetrare *Possinum* opinor. Epistolae ejus, quam tum ad me dabat, apographum misisse me tibi laetor, ex qua sententiam ejus abunde potuisti colligere. Idem nunc denuo facio, ut si quid denuo praeter opinionem meam accidat, ego facti omnem invidiam a me amoliri possim. *Liceti* de Lucernis Antiquis commentarius ad finem perductus, cui nihil praeter dedicationem restat. Negotium

gotium ei exhibet Pater inquisitor. Quod genus hominum inter omnes Monachos maxime imperitum. Ego nihil non ago, ut impune illi liceat proposito insistere. *Ferrarii* de re vestiaria commentarius Patavii prelo commissus est, ut ex *Rhodio* intelligo. Indicem *Gottofredianorum* nummorum necdum obtinui, quem proxime mittam. Quo illos ipse, quo suos *Boncompagnius* pretio aestiment, jam ante significavi. Adui nudius tertius multo tempore Cardinali *Barberino*. Est sane Princeps inter paucos eruditus, &, quod praecipuum duco, Augusti tui nominis venerator maximus, Augusta. Imaginem tuam vivis expressam coloribus a me postulavit, quam illum sperare jussi, si per te liceat. Vale.

E P I S T O L A DCLXIII.

N I C O L A U S H E I N S I U S

*Christinae Augustae.**Holmiam.*

NON sine maximo rubore te convenio, Domina, qui videam de catalogo *Gottofredianorum* numismatum conficiendo negotium tamdiu praeter expectationem meam trahi. Parum tamen restat operae, ut vix dubitem, quin vice proxima parata sint futura omnia. Ita certe spem facit *Gottofredus* ipse. *Fortunii Liceti* de *Lucernis* antiquis volumen jam prodiiisset, nisi per inquisitores staret. Negant illi jus fasve esse, ut Catholicas Principi non Catholico lucubrationes inscribat. Confugit hac in re ad me *Licetus*, cujus epistolam proxime tibi misi. Sed cum ego consultius arbitrarer, alteri negotium permittere, id ut in se reciperet *Cassianum Puteum* rogavi, virum sane & officiosum imprimis, & Augusti nominis tui studiosum. Is quidem omnem eo jam convertet curam, nec scio tamen quo res sit evasura, quod proxime non dissimulabo.

E P I S T O L A DCLXIV.

N I C O L A U S H E I N S I U S

*Christinae Augustae.**Holmiam.*

Mitto tandem, Domina, Catalogum *Gottofredianum*, qui venisse jam pridem ad te debuerat, si mei juris res fuisset. Lentum se gessit in indice conficiendo *Gottofredus* admodum, dum occupationes domesticas causatur. Quo pretio nummos velit venditos, jam ante scripsi. Scripsi & jam discessisse ex hac urbe *Boncompagnium* non ostensis, quod promiserat tamen se facturum, numismatis, Bononiam, ubi nunc degit: si jusseris, ut eo nomine me conferam, nihil cunctabor. Cum enim videbam de Neapolitano itinere cogitationes foveri a me

non posse, quod nullas ex Suecia literas accipiam, atque interim calores activi premant, proximis diebus Florentiam me sum recepturus: unde Bononiam non difficilis est excursus. Exigebat jam pridem dubia valetudo & vires attritae, ut coelo Romano me subducerem, sed spes de Altempfiana bibliotheca officii me admonuit tibi devoti, Domina, meique ipsius negligentem reddidit, quae magis magisque frustratur. Pergit enim detineri in custodia Vincentius Noghera, nec alium hîc novi, cui tuto hac in re possim fidere. Romae Jun. cicioclii.

EPISTOLA DCLXV.

M O N S I E U R

à Viane.

JAY receu plusieurs de vos lettres, les quelz m'ont fait apprendre les soirs & l'application que vous avez à mon service. Je suis obligé de vous en remercier. & je ne manqueray pas aux occasions, dans lesquels je vous pouray faire ressentir les effets de ma reconnaissance. ils seront tels, que vous n'aurez jamais sujet de regretter vos peines & noiez. les bienfaits & recompenses seront dignes de moy & de ma gratitude. Mande moy les Catalogues des livres, que vous avez achetés. & de ceus que vous avez fait copier, & le contes de l'argent, que vous avez dépencé, & pour vostre persone & pour vostre achat, le vous ferai tout payer, & mande moy ausy combien vous avez besoin, afin que je envoie les changes pour vostre voyage. Je ne vous puy rien dire, si non que la remette en vostre discretion sans facon, faut il que vous sachiez, que je veux que vous ne quittiez pas l'Italie sans avoir visité la Sicile. Pour vostre demeure en tout & par tout faite la ausi longue & ausi courte, comme vous jugerez, quil soit besoin pour mon service. Vous me rendrez un tres grand office, si vous poves me faire tenir correspondenee avec le cavalier del Pozzo, & quelques autres gens de merite. Je seray ravie de cultiver leur amitie, si ils m'en donneront quelque petite marque. Ayez ausi soin de remarquer ceus, qui travaillent ou en vers, ou en prose pour mon honneur, afin che je soy punctuellement en averti, afin de les pouvoir regaler: vous savez que je suis curieuse. ayez soin de contenter ma curiosite en matiere des medailles. Continues de m'envoier le catalogue, de ce qu'est beau & curieux, mais ne vous enbarques point en aucun achat, pour veu que je soy instruite, de ce quist rare. Je disposerai bien du reste. Je renouvellerai, avant que de finir, encore une fois la protestation, que je vous ay fait de la commencement de ma lettre, vous assurant, que auray le soin de recompense dignement vos peines, que vous n'obligerez jamais une ingrate. je suis. De Stockholme le 1. May. cicioclii.

CHRISTINE.

I Vide tomio III. Sylloges hujus, Epist. ccxlii. & seq. ad Gronovium datas ab Heinsio.

EPISTOLA DCLXVI.

NICOLAUS HEINSIUS

*Christinae Augustae.**Holmiam.*

MISI proxime Gothofredianum Catalogum, Augusta, quem recte curatum confido. Sex Scutorum millibus nummos ab illo aestimari jam pridem significavi. Videtur ille cogitare de editione praestantiorum, quae possidet, numismatum, jamque aeri tabulas majori ex parte incisas intelligo: quas commentariis sit illustraturus. Quod monendum duxi, quod dubitem, an ratum id sis habitura. *Fortunii Liceti* negotium de dedicando tibi Lucernarum veterum opere postquam ventilatum esset in sancto officio (sic inquisitionis conventus vocatur) prolata tandem lex fuit, qua Pontificiis omnibus interdicitur, ne scripta committant patrocinio Principum, diversam ab Ecclesia Romana in religionis causa sententiam amplectentium. Cum nihil hinc expectandum videret eques *Puteanus*, ad Cardinalem *Chisium*, qui nuncium egit Monasterii non ita nuper, hominem satis literatum, comemque, ac sibi maxime familiarem confugit. Qui cum sperare primo illum optime juberet, communicato mox cum Papa consilio, responsum tulit severum. Nolle nimirum se, ut remissiori indulgentia in antiquas leges peccaretur. Quid consilii sit capturus *Licetus* non scio. Credo & hanc esse causam, cur nummos suos Bononiam averit *Boncompagnius*. Salutabam proximis diebus Ducem *Braccianum*: qui redditas sibi literas a te Domina, multum exultabat, quibus testabaris gratos fuisse tibi versus, quos honori tuo scripsisset. Ego brevi Florentiam cogito. Jun. MDCLII.

EPISTOLA DCLXVII.

NICOLAUS HEINSIUS

*Christinae Augustae.**Holmiam.*

Catalogum Gothofredianum redditum jam pridem tibi, Domina, confido. Operam certe dedi, ut tuto tibi redderetur. Moram in hac urbe diuturniorem traxi, quod spes esset de *Noghera* in integrum restituendo, nec ego de Altempfiana Bibliotheca negotium cum altero communicare sustinerem, ne palam fieret, ac turbarentur hoc pacto desideria tua. At vendenda Bibliotheca non abhorre ducem satis constat, dubium tamen est, an copiam facturum sit scriptorum tibi codicum, servatis sibi editis. Ad ipsam bibliothecam, quam semel tantum in transcurso vidi, aditum mihi omni studio paravi: sed frustra. Cum *Liceto* quam indigne actum sit jam nunciavi. Mitto apographum ejus epistolae. Florentia proxime scribam. Romae Jun. MDCLII.

EPI-

EPISTOLA DCLXVIII.

NICOLAUS HEINSIUS

*Christinae Augustae.**Holmiam.*

MEliori auspicio Florentiam proficisci Roma non poteram, quam diebus proximis profectus sum, Domina. Quo advenienti tuae occurrerunt literae Kalendis Majis Julianis exaratae, quas ego regiae benignitatis, toties expertae, toties a me laudatae pignus certissimum debita animi veneratione exosculatus sum. Dolui haecenus, fateor gravissime, nequaquam rebus meis optime prospectum esse, non alio nomine, quam quod occasionem tam opportunam perire mihi viderem ac interverti commodis tuis atque desideriis promovendis. Tu vero, Augusta, ne ab innata tibi & caelesti illa clementia degeneres, grato animo, obsequia mea devotamque rebus tuis sedulitatem prosequi te testaris, cum mihi potius jactura temporis anxie deprecanda sit, qui nonum mensem inter Italos jam ago sine ullo tuo emolumento. Adco quidem, ut a justissima indignatione tua metuendum mihi fuerit, nisi tu, Principum clementissima, luculentam praestandi obsequii voluntatem, qua certe assidua tantum non flagro, nihil minus aestimares praestito obsequio. Fortunae meae tenuitatem atque inopiam animo aequissimo tuli semper: nunc molestiam exhibere coepit, postquam per illam mihi non licet grato esse, tuaeque expectationi respondere. Nam quod regiae munificentiae faventem aulam sperare me jubes, Domina, tibi potius, quam promissis tuis manum dabo. Alii, & melius de te meriti & ad rem faciendam attentiores, quam sim ego, liberalitatem tuam experiantur licet, ego tenacius vinculum non agnosco, quo tibi devinciar, quam incomparabiles virtutes illas, quas orbis universus nunc observat ac praedicat. In iis admirandis quamdiu totus ero, satis superque intelligam, quam pretium nullum sit ponendum meis, quae commendas, obsequiis, ea enim gratis omnes exigenti tibi tanquam tributum debemus; Augusta, quotquot amorem virtutis pulcherrimae non habemus procul. Primae igitur felicitatis duco, quod ea tempestate natus sim, qua te rebus humanis Deus Opt. Max. indulset: secundae, quod innotui tibi: tertiis votis si quis locus est, non displicuisse me tibi, si quid mei ad posteros perveniet, posterum nolum ignorent. In eo omnis summa ambitionis meae vertitur; hos intra terminos vota constrinxi. De Altempfiana bibliotheca jam ante scripsi non semel. Consultius mihi visum expectare, dum *Noghera* sui juris fiat, privato carceri mancipatus haecenus; quam temeraria festinatione turbare negotium, praesertim cum in mora nihil sit periculi. Si jubes tamen ut rem urgeam, aut ad equitem *Puteanum* confugiam, aut alium quemvis, quem rerum tuarum maxime studiosum e Romanis judicaro. Codices manu exaratos emi paucos haecenus, quos Mediolani nactus sum, Venetiis haerent, quod mari illos non sim ausus committere, ne in Anglos piratas inci-

inciderent. Plurimum in eadem urbe spes est facta; e Monasteriis & privatis bibliothecis corradi nonnulla posse, si pecunia in promptu esset. De integris bibliothecis emendis non cogitabo te inconsulta. Codices Graecos describendos curavi nullos, quod indicem illorum, quos possides ineditos, impetrare hactenus non possim. Metus autem est, ne operam perdam, quamdiu ignoro, quid hujus notae extet jam apud te. Quantum pecuniae *Bidalius* mihi curarit annumerari jam olim *Holmio* significavi; significavi denuo nuper. Nam quas ipse feci expensas in via, quo jure eas possim rationibus tuis adscribere non video, Augusta, quod factae sint illis eae nummis, quos tuae liberalitati acceptos retuli, cum e Suecia discederem. Quicquid hinc terrarum ab eruditis viris tuae laudi dabitur, sive prosa oratione, sive carmine, id ut ad te mox veniat, curae mihi erit. Cujus notae ad gustum tuum factura omnia polliceri non auesim. Cavebo tamen ne Anagrammaticis atque ejusmodi nugis aliis laudes tuae inquinentur.

*Gratulor huic terrae, quod abest regionibus illis,
Quae tantum genuere nefas*

Litteras accepi a *Zacharia Grimano* nobili Veneto, quem in Suecia vidisti, earum apographum hinc mitto. Miror tamdiu deliberari super negotio tam parvi momenti. Principem Heturiae *Leopoldum* nudius tertius salutabam, qui totus oratione diffusa in tuas laudes ferebatur; Mediceam bibliothecam patere mihi se curaturum promisit. Versus *Heinsianos* meliores describi curat, ut ad te veniant. Iter ad te parat *Cecconius*, is inter alia munuscula virorum Principum, *Pescennium* (quem unum inter *Gottfrediana* numismata desiderari norum) ad te feret aeneum, ut audio, a *Marchione Nicolino*. Vale, decus immortale rerum. *Gottfredus* nummorum Catalogum magno Duci misit, unde licet colligas de vendendis iis agitare illum consilia. 13. Julii CIOIOCLII.

EPISTOLA DCLXIX.

NICOLAUS HEINSIUS

*Christinae Augustae.**Holmiam.*

Epistolam, quam ad me exarare Kalendis Majis manu Augusta non es gravatus, quoties inspicio, inspicio autem frequentissime, toties aurei illius saeculi, Domina, imaginem intueri mihi videor, quo ruri versabantur, atque homines agrestes ultro compellabant Dii immortales. Unum mirari subit (audebo enim ea uti libertate, quam non invita admisisti hactenus, ut sensum animi & cogitationes secure expromam) unum, inquam, mirari subit, cur lingua Gallorum aulica apud hominem rusticum volueris uti, cum Latina optime posses. Sed agnosco voti mei immodestiam, & desideriiis frenum impono. Nulla enim unquam lingua loqueris, quin loquaris tua. Mihi potius causa debet esse justissima, cur egestatis meae me pudeat, qui unius intra linguae angustias con-

Tom. V.

Ccccc

clu-

cludor. Rationes expensarum quod a me exigis, gaudeo. Misi eas jam olim ad *Holmum*, & nuper misi denuo. Menses totos decem & octo jam ex Suecia absum. Parisiis scutatos ducentos Gallicos *Bidalius* tuo nomine annumeravit. Mediolani scutatos circiter septuaginta septem, centum & quinquaginta Venetiis, Florentiae centum quadraginta quatuor, Romae ducentos & quadraginta accepi, & hos quidem monetae Italicae, quae Gallica paulo pluris fit, ut ex literis, quas vocant cambii, apparebit. Agnoscis ipsa, ut opinor, quam in libris emendis magnas impensas facere non potuerim, nisi omni victu me ipsum fraudatum vellem. Mille scutatorum Gallicorum summam nondum aequat haec pecunia: cui addendi sunt scutati sexcenti, quibus emptus torquis aureus, *Ferrario* oblatus. Expensarum rationem nisi accurate reddidero, tum me indignationis tuae fulmine percellas licet. Interim a criminationibus hominum malevolorum favor tuus tutum me praestet. Hesterno die Bibliothecam Ducis *Salviati* perspexi. Codices manu exaratos centum circiter & triginta seposui. Plures esse credideram. Graeci omnes sunt, si Virgilium unum excipias literis Longobardicis scriptum, indicem confeci magna festinatione, cum horae vix unius spatium daretur ad pervolvendos libros. Quare petii, ut alium accuratorem fieri curarent, ac simul de pretio monerent, quod fieri haecenus non potuit, cum raro Dux ipse haereat in villa. Proxime intellecturam te omnia confido. Sunt hic codices apud Marchionem *Riccardum* etiam nonnulli, qui legatus est Romae Magni Ducis, atque apud *Carolus Stozzam*, qui fortasse venales sint. Excerptum ex catalogo Mediceae bibliothecae misi nuper. Familiae nostrae res & valetudo patris quo loco essent etiam significavi. Spero igitur me impetraturum, quod votis ardentissimis petii, ut in patriam reverti mihi liceret. Id certe faciendum, nisi privari illum vivum & videntem stipendio suo velim, ejusque, quas administravit, provincias aliis demandari. Quod aliorum opem, qui juvare illum poterant, non sum expertus, Domina, hoc fortunae crimen est. Ego si partibus meis desum, in naturam fuero injustus. Scio rem mihi esse cum Principe, apud quam, cum virtutum omnium exemplar sit praestantissimum, primae semper partes pietatis sunt: *Dauni miserere senectae*. A *Langermanno* praestari posse, quicquid hic agendum habes, jam ante monui. Habes hic epigramma *Hetruscum Hieronymi Gratiani*, qui Ducis Mutinensis Secretarius est, ut in aula vocant, cum responsione *Marchionis Capponiae*. Ausus sum & meas nugas addere, quas jussus in natalem Magni *Hetruriae* Principis scripsi. In negotio Veneto, de quo ante mensem scripsi, quid fieri velis utinam scirem! Senatum si compellari volueris tuo nomine, ut ad *Sti Marci* Bibliothecam aditus mihi detur, partibus non deero. Florentiae Jul. CXCICLII.

EPISTOLA DCLXX.

NICOLAUS HEINSIUS

*Christinae Augustae.**Holmiam.*

Quamquam divinae providentiae auspiciis & virtutis tuae merito, Augusta, eo fastigii sis evecta, ut privatum nihil ad te pertinere videatur, dissimulare tamen nunc non possum, qui miris modis me premit ac affligit, de conclamata Patris valetudine nuncium. Quod si vivis subducatur senex, Augustae tuae familiae dum vixit devotissimus, & vix aliud expectare jubent tum aetas gravissima, ad quam pervenit, tum morbus ipse periculi plenus, rerum status exacturus omnino est, ut in patriam excurram; ne exiguum illud, quod ex pertinaci fortunae adversae naufragio, & assiduis domesticae jacturae procellis enatavit, mea mihi socordia perire atque interverti sinam. Cui petitioni, ut mihi videtur, nequaquam iniquae, haud obniscram te confido. Praesertim cum provincia, quam mihi demandare es dignata, de codicibus MSS. colligendis describendisque per has regiones aetatem meam abunde occupare possit. Privatis fortunis ubi prospexero, reliquam tuis commodis vitam consecrare non gravabor. Puer adhuc parens meus bonis avitis omnibus tyrannide Hispanica exutus est. Mox Flandria relicta in Bataviam concessit, studiis literarum operam navavit, quarum amore adeo correptus est, ut neglecta rei faciendae cura, patrimonio suo tantum arbitraretur accedere, quantum bonae mentis in palaestra profecisset, atque omnes in eruditione divitias existimaret esse sitas. Nec parum in pulcherrimo proposito confirmavit illum applausus ingens, qui conatus ejus laudatissimos excepit. Uxori postea ducendae cum animum applicuisset, non tam sua interesse, ut opulentae, quam ut bono loco natae, & honestis ortae parentibus jungeretur. Tenui igitur dote, ut in numerosa prole fieri solet, contentus, affinitate virorum praestantium multorum, praecipue *Johannis Rutgersii*, unice exultabat. Devoverat illa tempestate obsequium suum *Gustavo* magno *Rutgersius*, cujus nomine varias per Germaniam legationes obibat, non sine magno rei familiaris damno conjunctas, cum & sumptus non exigui passim faciendi essent, & intercepta ab Austriacis Praga, sarcinas omnes, & bibliothecam, in variis Germaniae locis magna cura magnoque sumptu conquistam, illic perdidisset. Bonis demum suis majori ex parte absumptis, dotem matris meae omnem mutuam petit a Patre, & pro ea, quae inter illos erat, necessitudine atque amicitia, facile aufert. Hac quoque consumpta, dum totus est in expectatione praemii, quod Rex benignissimus pro navata annis duodecim continuis opera sperare jussarat, morbo lento correptus ad plures abit *Rutgersius* in ipso aetatis flore, cum annum trigesimum septimum vix attigisset, relicta haerede matre mea. Eam enim in Rege clementissimo fiduciam habebat collocatam, eam in praestitis a se obsequiis, ut ex stipendio, saltem quod debebatur, mox adfuturum non

dubitaret, quando regiae liberalitatis fructus mors intempestiva invideret. Adit haereditatem mater mea, aes alienum, quod *Rutgersius* hîc inde conflarat, expungit, legata praestat fide integra legatariis, atque hoc quoque pacto rem familiarem non parum terit. Bello mox Polonico *Gustavus* magnus avocatur, atque inde Germanico, ipse demum tollitur e vivis. Qui casus quibus angustiiis familiam nostram objecerit, non narrabo, Augusta, ne in majus omnia exaggerare videar, aut clementiae tuae gravis sim. Hoc tantum dicam, post mortem *Gustavi* magni anxiam matri aetatem, qua Regi supervixit, inter gemitus, lamenta, lacrymas, quas videre mihi adhuc videor, exactam: quod actum de fortunis suis probe intelligeret; quando & illa nobis perit. Annis post duodeviginti totis, quas literas Parens ad procures regni scripserit, quam in omnes formas se frustra verterit, ut votis potiretur, quid attinet narrare? Fractam spem tu tandem crexisti, Domina, tua incomparabili clementia factum est, ut conclamata fere ac depositi negotii causam ausus sit denuo suscipere meus Genitor. Nec nobis abfuit praeter fortunam nostram, quo minus voto potiremur. Bis in Sueciam me proficisci passus est, cum ipse senio confectus ope mea maxime indulgeret, bis re infecta vidit redeuntem. Fraudato igitur omni spe, & pertaeso vitae suae & vicino morti ipsi, & tibi intercepta est oportuna occasio benignitatem tuam ostentandi. De *Rutgersianis* meritis nihil addam, cum mora temporis longa illorum quoque memoria apud vos perire potuerit, nisi superesset cum paucis, qui hominem noverunt, regni tui Cancellarius. Parentis supersunt scripta, & supererunt post illum, ut auguror, quibus cultum erga regiam familiam suam abunde testatus est. Illa olim qui evolvet, & simul inter caeteras maximas virtutes tuas eximium illum amorem literarum venerabitur, quem venerabuntur olim omnes, quamdiu ullus eruditioni honos constabit, facile intelliget, non tuam fortunae nostrae defuisse clementiam, Domina, sed clementiae tuae defuisse fortunam nostram. Gallis Italisque atque adeo Europae toti notissimus est ille panegyricus *Gustavo* Magno scriptus. illi utinam aliquid sui ingenii opponerent, qui palam gloriantur se senis apud te nostri existimationem obscurasse, atque adeo sibi deberi volunt, ne plenum ille fructum clementiae tuae tulerit. Si recusabunt soluta oratione certare, jube *Scazonti*, qui praefationis loco est praefixus panegyrico, totidem versus ex suis opponant. Tunc agnosces, quo vales ingenii acumine, quid inter illos intersit, qui contemnunt & qui contemnuntur. Sed tam felix nunquam erit meus genitor, ut hoc triumpho fruatur. Vincant igitur illi fortuna, dum nos obsequiis & cultu vincamus. Agnosco impetu scriptionis nimio ac libertate ulterius me proVectum, quam par erat. Quod tamen alio nomine a me factum non est, quam ut agnoscas, Domina, rerum mearum statum flagitare meam in Batavia praesentiam, si e vivis, quod abominor, tollatur pater, tua tamen sine venia nihil acturus. *Langermannus* interim, si quid ibi agendum est curare poterit, dum ego absum. De *Altempfiana* Bibliotheca haeret negotium, quia necdum carcerem evasit, quod sciam, *Noghera*, si per illum rem promoveri postulas, pare-

parebo. Interim Ducem *Salviatum*, qui instructissimam Graecis codicibus in hac urbe bibliothecam habet, tentari per amicum curavi, an ad vendendam eam impelli possit. Nec videtur detrectare venditionem, sed magno, ut opinor, aestimabit. Numerus & index librorum, ut exhibeatur mihi rogavi, cujus spes est facta. Mox de pretio diligentius omnia percunctabor, & ad te perscribam. Libri illic multi sunt inediti, quos inter & Proclus in Rempublicam Platonis, qui mutilus vulgo extat. Rem, quantum possum, occultam habeo. Metus enim est ne magnus Dux, si resciscit, aut frater ejus Princeps *Leopoldus*, (est enim literarum amantissimus) sibi eos emat, aut certe aegre auferri patiatur. Curam Bibliothecae habet homo quidam indoctus, cui praemium hoc nomine promisi, si rem ad optatum perducatur exitum. Habes hinc indicem praestantiorum codicum, qui in Medicea extant. Seliges inde, Domina, quos potissimum descriptos cupis. Habes hinc etiam *Caroli Dati* epigramma Hetruscum in nuperum casum tuum, quod non sine magno applausu hinc est lectum. Misi proxime aliud carmen ejusdem argumenti, scriptum a Monacha nobili loco nata. Velit illa poësin suam unice exercere in aliqua materia, quam ad gustum tuum facturam potissimum crediderit. Imaginem tuam habet & colit instar numinis. Si casum tuum accurate scivissem (quem nullus ad me perscripsit haecenus e Suecia) plurimi versus ad te mitti hujus notae poterant. Cum operam meam unice probare tibi ardeam, Domina, audebo a te exigere, ut sit, qui saltem moneat, quos fasciculos acceperis. Florentiae August. GIDIOCLII.

EPISTOLA DCLXXI.

NICOLAUS HEINSIUS

*Christinae Augustae.**Holmiam.*

Multo hinc Catalogum manuscriptorum bibliothecae Ducis *Salvati*, quem geminis meis ultimis missurum me promisi: factus est a professore quodam literarum Graecarum; non accurate admodum. Codices ego plures numerare visus sum, quorum nomina in libellos pugillares retulit. Nihil ex iis me desideraturum adfirmat ille, qui eos mihi exhibuit. Voluit a me scire Dux *Salviatus*, an tuo nomine eos flagitarem, nec ausus sum negare. Responderi itaque mihi curavit, se minoris illos non vendituram, si vendendi essent, quam quatuor scutatorum Florentinorum millibus: tibi autem se donaturum esse, si velles. De quatuor scutatorum millibus me scripturum tibi sum pollicitus, de oblato munere scripturum negavi. Quod dubitem an ex animo offerat libros Dux. Cum enim Itali satis sint ad rem attenti, nec valde liberales, metuo, ne aut spe majoris praemii eos sit donaturus; aut donandos eos obtulerit, ne quid demeres de quatuor scutatorum millibus, quod est profecto immensum pretium: cum codices multi sint mutili. Ego sententiam tuam avide, Augusta, expectabo. Reditum in patriam ut permitteres mihi non semel jam.

rogavi, quem valetudo parentis mala requirit. Ea etsi meliori nunc sit loco, tamen est nequaquam bono. Ultimum & atrocissimum fortunae crimen erit, si stationem, quam his in oris mihi credidisti, cogar deserere. Deus te sospitet, Augusta. Florent. xxiv. August. cıııııclıı.

EPISTOLA DCLXXII.

NICOLAUS HEINSIUS

*Christinae Augustae.**Holmiam.*

Pompejus Colonna Princeps Gallicanus, Augusta, summi ingenii vir atque literaturae minime vulgaris, dum magnum forte Hetruriae Ducem salutarem, ac sermo de te esset institutus, virtutum tuarum veneratione adeo se correptum ostendit, ut de Suecia adeunda cogitaret serio. Cultum interim suum hisce, quas vides, literis testatum tibi voluit. Poësi vernacula cum polleat plurimum, versus ab eo additos Epistolae vix dubito. Adfirmavit certe laudes tuas musis suis esse jam non intactas. De Familia *Columna*, quae agmen ducit inter Romanas, & dubiam *Ursinae* facit palmam, ut verba faciam, non est opus: Habes enim eam, Domina, ut opinor, abunde notam. Ingenium viri ex epistola existimabis. Hispanos experitur valde infensos, quorum opera bonis, quae in regno Neapolitano possidebat plurima, majori ex parte privatus, carceri etiam diuturno vix elapsus, nunc jubetur exulare. Si quod parabis responsum, id ut ad me veniat, etiam atque etiam supplico. Habes & hîc a *Carolo Dato*, Epigramma Hetruscum. Est autem ille, quod & alia monui occasione, magni inter Florentinos Poëtas nominis: laudes tuas singulari parat poemate. Florentiae x. Septemb. cıııııclıı.

EPISTOLA DCLXXIII.

NICOLAUS HEINSIUS

*Christinae Augustae.**Holmiam.*

Clementissima domina. Transiit hac non ita nuper, & in Germaniam contendit *Gustavus Adolfus* Dux Megalopolitanus, excitati vividique ingenii Princeps, quique magnam de se expectationem apud Italos reliquit. Poësi vernacula cum magnopere delectetur, auribus tuis dedit hoc Epigramma, quod a familiarium ejus nonnemine sum consecutus. Post iter hoc Italicum de Suecia adeunda videtur cogitare, teque salutanda, cum commune sit hac tempestate asylum peregrinantium, ut, qui aulam tuam non viderit, nihil in rerum natura se vidisse arbitretur. Serenissimus Hetruriae Princeps *Leopoldus*, cum ex me intellexisset esse tibi in deliciis Poësin Italicam, convertit omnem eo curam, ut quicquid eximium inter schedas suas lateret, quod lucem necdum vidisset, a praecipuis Italiae ingeniis conscriptum,

tum, colligeretur, tibi offerendum. Tomi erunt duo, ut opinor, & fortasse plures. Praefiguntur operi varia carmina laudi tuae consecrata, ad quam provinciam invitavit Poëtas Italos clarissimos idem Princeps: memini ea de re jam ante me non nihil scripsisse. Principis Gallicani literas misi proxime, Augusta. Versus nonnullos addidisse illum epistolae existimabam, sed non addidit: servat enim illos, ut ipse mihi iudicavit postea, eidem, de quo verba modo faciebam, operi. Paucos igitur aut nullos versus sum missurus posterum. Florentiae Septemb cıııııclıı.

EPISTOLA DCLXXIV.

NICOLAUS HEINSIUS

*Christinae Augustae.**Helmiam.*

Domina. Cum omne literarum argumentum, omnem scriptionis materiam dēxhauserim jam pridem, parce sobrieque cogor indulgentia tua frui, quae tanta est, ut absenti quoque mihi aditum ad te non intercludat, meumque quamvis remoti colloquium non aversetur. De Bibliotheca Altempfiana omnia esse incerta jam non semel indicavi, quia pergit detineri in carcere *Vincentius Noghera*. Codices Graeci cum passim lateant non paucis hīc terrarum in monasteriis, nec magni fiant a possidentibus, spes erat, augeri iis Bibliothecam tuam posse, si instrumenta fuissent in promptu, quibus emerentur. Cum igitur intercipi mihi viderem omnem opportunitatem tibi gratificandi, ausus sum a te contendere, ut gratia hujus peregrinationis mihi fieret, quod & florem aetatis nihil agendo perire mihi animadverterem, & patrem senio confectum meo auxilio fraudarem: neque tu precibus meis defuisti, Augusta, sed quantum ex aliis intelligo, ut liceret mihi ad meos reverti clementer annuisti. Ad viam igitur necessaria ubi in promptu erunt, nihil cunctabor. Ajunt Politicorum filii, nervum esse martis pecuniam. At ego qui politicus non sum, Palladis quoque nervum esse ac Musarum didici hoc itinere. Dum enim rebus meis non optime consulitur, & tibi fructus periit peregrinationis meae, & mihi voluptas, quam ego percipio plenissimam, cum tuae utilitatis me totum impendo. Libros tibi destinatos sub initium mensis februarii fore paratos polliceri pergit Hetruriae Princeps *Leopoldus*. Interea spero in promptu fore instrumenta, quibus hinc me possim proripere. Florentiae cıııııclıı. Octob.

EPISTOLA DCLXXV.

NICOLAUS HEINSIUS

*Christinae Augustinae.**Holmiam.*

Peregrinationis hujus quod gratiam mihi feceris, Augusta, consenserisque, ut pedem hinc referre mihi ad meos liceret, gaudeo: id enim ex *Holmianis* literis proxime intellexi: nam mandatis tuis, quorum ille meminit, haecenus fraudatus sum, nec scio cujus culpa id eveniat, quod sane permolesto fero, ut & literarum tuarum jacturam, cum nullas acceperim, praeter unicas Kalendis Majis exaratas. Si quid alia occasione insidietur mihi fortuna, minus indigner, hinc sine venia peccare mihi videtur, qui favoris tui fructum pretiosissimum mihi intercipiat. Caeterum cum ad iter auspicandum omnia necdum parata sint, nec de viatico mihi sit perspectum, non possum iter sic festinare, ut vellem. Parentis quoque valetudo loco jam paulo meliori est, cum & febris & Diarrhea, quibus acriter primo tentabatur, intermiserint, hinc minus est periculi in mora. Huc accedit, quod Princeps Hetruriae *Leopoldus* spem faciat fore, ut intra spatii trimestris terminos duo volumina absolvantur carminum Hetruscorum, quae tibi donum destinavit. Mea autem opera ad te mit- ti, & me latore uti idem Princeps vellet. Neque ego dissentio, praesertim cum hortator fuerim & ἐργολάτης hujus instituti, ne inanis ex his oris rever- tar, &, nisi hoc procedat, inutile omnino iter hoc me & infructuosum tibi fuerit. Accedent versus multi, a praecipuis Italiae ingeniis in honorem tuum conscripti, longe pulcherrimi, quorum quosdam jam videre mihi contigit. Iter per Germaniam optime facturum videor, cum in Galliis necdum res pacatae sint. Velim autem, si per te mihi liceat, Bibliothecas aliquot praestantes perlustrare in transcurso, ut Augustanam, Bavaricam, Noricam, Helve- ticam non unam, cum illac iter sit faciendum. De Viennensi mira nar- rant, qui viderunt autem paucissimi. Sed fortassis nimis a via deflexero, si illuc excurram, quod tuum est arbitrari, Augusta; te enim invita aut in- consulta nihil sum acturus. De *Langermanno* quid fieri velis, quia haecenus ignoro, mecum ut hinc discedat, non possum illi non suadere, praesertim cum ipse quoque gestiat se tibi sistere. Manethonis & Maximi Poëtarum A- potelesmata descripsit in Medicea. In Vaticana Anthologiam Graecorum Epigrammatum Palatinam, quam luci dare velit, cum alii, qui id opus jam a triginta annis promiserunt, cunctentur, ac rem publicam literariam fraudent utilissimo labore. Florent. Novemb. cıııııııııı.

EPISTOLA DCLXXVI.

NICOLAUS HEINSIUS

*Christinae Augustae.**Holmiam.*

SI recte curatae sunt, quas ex hac urbe ad te dedi, Domina, indicem Mediceae & Salviatae Bibliothecae jam accepisti. Principis quoque Gallicani epistolam. Salviatae Bibliothecae index non multa cura factus est. Vidi enim illic omisso codices aliquot, quos ego in libellos pugillares retuleram; cujus notae Eusebii & Theodoreti Historia Ecclesiastica. Sed mihi curae erit, ne quid numero codicum decedat. Si per occupationes publicas licuisset tibi de rebus meis cogitare, dubium non est, quin ingenti codicum MSSorum accessione Bibliotheca esset ditata. Iter Italicum cum pararem, spes erat facta, nihil eorum, quae forent necessaria, mihi defuturum. Sed falsum me expectationis immane quantum fuisse, simul ac Lutetiam adveni, licuit ex *Bidalio* intelligere. Rationes acceptae ab illo pecuniae mox ad *Holmium* misi: multisque argumentis ostendi, nisi alio modo rebus meis prospiceretur, nihil utilitatis aut emolumenti hoc ex itinere sperandum tibi fore. Quod vel ultro tamen, me tacente, poterat apparere. Mediolanum adveniens incidi in Bibliothecam venalem, libris Graecis Latinisque MSS. egregie instructam, ea quoque de re nuntios continuo ad te dedi, sed frustra; donec illa tandem distracta est. Inhibui venditionem quantum potui. Summae felicitatis fuit, quod eam tibi non addixeram, etsi spes esset quadringentis aut quingentis aureis haberi totam potuisse, pretio certe vilissimo: fidem enim in ea comparanda si obstrinxissem, quod tamen ut facerem tua commoda videbantur requirere, jam de exstimatione mea apud Italos esset actum, ut qui venditoribus non possem satisfacere. Romae ultro compellatus nonnunquam fui de emendis libris MSS. Sed odiosos & molestos venditores spe vana, irritisque promissis semper distuli ac lactavi, quod a te nuncios adfore optatos considerem. Nunc quia vota ista lenta sunt, desino in hanc mercem inquirere, etsi non nesciam apud privatos latere quaedam, quae fortassis haberi aequo pretio possint, ut & in aliis *Hetruriae* urbibus. Nolim enim Italis ludibrium debere, quorum nullus est, qui ignoret, quo nomine huc missus sim. Esse autem omnes Suecico nomini faventes Romae sum expertus. Expertus est & credit *Alexander Cecconius*, non sine fortunae discrimine, quod nisi is eo advenisset, non tulisset repulsam *Licetus* in dedicatione tibi destinata. Graecum amanuensem, ut in medicea Bibliotheca codices ineditos describat, nullum hîc inveni, qui Roma aut aliunde arcessendus esset. Nam *Langermanno* tantum oneris imponere, quem frustra tibi commendavi saepe, non audeo, quamdiu se tuis accensere nullo jure potest. Unum illi deest ad meliorem fortunam, quod aut tibi est ignotus, domina, aut quod est amicus mihi. Ego certe ejus operam posse tibi variis in rebus utilissimam esse, & semper credidi, & etiamnum credo. Vivimus hîc in

Tom. V.

D d d d d

diver-

diversorio publico inter assiduos Bacchantium strepitus, ut nec valetudini consulere nec studiis possimus: Romae privatae aedes incolebamur minoribus expensis, victumque nobis ipsis curabamus parari quotidie, qualis valetudini non optima conducere videbatur. Id nobis nunc non licet, cum parata deesset pecunia. Vides igitur ipsa, mea non fieri culpa, ne expectationi tuae in omnibus respondeam. Jubes quidem, pro incomparabili clementia tua, ut te moneam, quas expensas de meo fecerim! Sed cum ita sim dimissus a te, ut nihil certi aut viatici aut stipendii promiseris in hoc itinere, quid possum exigere non video: a *Bidalio* quantum pecuniae esset petendum, ne hoc quidem ullus tuo nomine me monuit. Omnia igitur illi credere sum coactus, utinam sine meo damno! Speravi indicandum fore nomen mercatoris alicujus Itali aut Germani, a quo pecuniam possem exigere, si in libros MSS. inciderem hic illic venales. Nam e Suecia responsum expectare, quam sit lentum negotium agnoscis ipsa. De integris bibliothecis emendis ut cogitem te inconsulta non est periculum, Domina. Tibi ut serviam, fortunas in patria meas negligere non recusem. Tibi autem nec servire, & deesse mihi apud meos, eam ego duplicem jacturam puto. Eo, quem dixi, loco cum res meae totis decem & novem mensibus, quibus e Suecia jam absum, fuerint, calumniae tamen quidvis in aula tua contra me licere invitus intelligo, ubi minime omnium id decebat. Nam si meae innocentiae ratio habenda non fuit, tuae certe auctoritati, Domina, hoc debebatur, ne peregre a te missus & tuo nomine absens atque inauditus proscinderer. Sed hoc *ὡς ἐν παροίᾳ*. *Equiti Puteano* auctor fui ut suis te compellaret literis, sed excusavit se, qua est modestia, chiragram caussatus, qua fieret, ut in exarandis epistolis amanuensis opera uti cogeretur. Florent. Februar. MDCLXXIII.

EPISTOLA DCLXXVII.

NICOLAUS HEINSIUS

*Christinae Augustae.**Holmias.*

Clementissima Domina. Memini cum Romae essem, nunciatum a me, *Fortunio Liceto* Pontificis Romani mandato interdictum, ne libros suos, quos de Gemmis veterum annularibus parabat & Lucernis, tibi inscriberet. Nunc invenisse viam videtur, qua nec Papam offendat, & tibi nihilominus cultum probet ac observantiam. Effecit igitur, ut utriusque voluminis exemplaria, quae ex Italia sunt mittenda in Transalpinas regiones, tuo nomini consecrentur, quae inter Italos sint vendenda, nomen nullius praeferant. Hacc ille ad me: inquiram tamen diligentius, deque tota veritate ut constet, liquido operam dabo. Libri ipsi jam ad te missi sunt Hamburgensi via, qui cum diu fortassis haesuri sint in via, dedicationes, quas dixi, ad te mittendas existimavi. Addidi & specimen libelli Philosophici, quem Comes *Julius Clemens Scottus*, domo Placentinus, tibi dedicavit. Exemplaria jam ante tres menses in Sue-

Sueciam missa oportet, quorum curandorum provinciam susceperat *Lagerius*. Sed cum in Galliam profectus sit, ac rumor ferat, ab epistolis illum tibi amplius non esse, visus est vereri *Scotus*, ne exemplaribus tibi destinatis sit fraudatus. Jesuita fuit olim, nunc Jesuitis est infestissimus, quod libellus ipse prodit passim. Sunt & alia, in quibus a Jesuitis videtur deflectere. Hanc an laturus sit impune libertatem, brevi sciemus. Vale. Venetiis vii. Mart. CIOCLIII.

EPISTOLA DCLXXVIII.

NICOLAUS HEINSIUS

*Christinae Augustae.**Holmiam.*

Scripsi Taurinum, ut jussisti, Domina. In ipsis literis si quid mutatum velis aut additum, ne graveris indicare, supplex te obtestor. Vix credas quanto gaudio me perfusum sentiam, ex quo negotium paternum curae tibi esse compertum coepi habere. Per proximum tabellarium faxo munificentiam tuam senex noster intelligat; quando effecisti, ut aetatem reliquam animo tranquillo ac securo possit exigere sublatis molestiis, quae annos plurimos curas ejus exercuerunt ac occuparunt. De Bremensi Canonatu etsi nihil ausus eram sperare; ultro tamen oblatum beneficium lubens amplector. Curas vicissim meas alacrius impofterum, quam ante, ad te demerendum convertam. Nec luculenta mihi haecenus voluntas defuit. Fidem certe meam tibi devotam ac porro devovendam nulla in re claudicare passus sum: qua laude tuorum nemini me arbitror concessisse. Si mandatis tuis non is semper successus per me obtigit, quem expectabas: tota ea Fortuna est injuria. Publicis, quibus apud Batavos est functus, muneribus se abdicare per senectutem cum cogatur meus parens, suas in iis administrandis partes mihi demandare decreverat, domumque me identidem literis fervidissimis revocavit. Nunc ut in alium ea conferri curet, si videbitur, significabo. Fortunas meas commendare tibi non pergam, cum incomparabili tua fiat clementia, ut sint commendatissimae. Vale, Augusta.

EPISTOLA DCLXXIX.

NICOLAUS HEINSIUS

*Christinae Augustae.**Holmiam.*

DE re, quam indicabam nuper, rursus te compello, Domina: cum ultro me adhortata sis, ne ei promovendae deessem. Tabellarius, qui ex Germania penultimus huc advenit, literas a *Langermanni* patre attulit Stadae exaratas, quibus is testetur ex *Konings-Marckio* intellectum sibi, praeter agros *Bisdalio* nuper addictos, ex iis, qui in Bremensi tractu & Pomerania *Salvii* vi-

duae publica auctoritate sint subducti, superesse adhuc terrarum abunde, quo rationes Rutgerianae expungi possint. Absunt ab hac urbe illi, quorum opera certiora doceri non foret arduum, quare supplex oraculum tuum consulo, cum nullum regni tui angulum te latere certus sim: & obnixè peto, ut parentis tandem mei habeatur ratio, si supersint ex Salvianis bonis agri, ut superesse *Konings-Marckius* adfirmabat, quae aliquot aureorum millia aequarent. Maximum in mora periculum est, ne & alii me praevertant, & dum ultro citroque super isto negotio mittuntur literae, expiret interim tempus illud, quod exiguum capeffendis regni habenis tibi reliquum est. In commemoratione facinoris, quod meditaris, Augusta, pulcherrimi de privata vita amplectenda, & vellem & debebam occupare ingenium meum, sed adeo dejectum mihi esse animum experior, ut erigi non possit, aut officii meminisse, nisi rebus familiae nostrae turbatis melius consulatur. Ducis Sabaudiae mater, dono ad te mittit *Pyrrhi Ligorii* opera, munus certe eximium. Reliquos etiam, quos possidet codices manu exaratos, se missuram pollicetur, si hoc munus non ingratum tibi fuisse intelligat. Qua de re pluribus coram, cum ad conspectum tuum licebit admitti. Vale, Augusta, & fortunas nostras commendatas habe.

EPISTOLA DCLXXX.

NICOLAUS HEINSIUS.

*Christinae Augustae.**Holmiam.*

Quantum in votis tuis praesidii sit apud deum immortalem iis, quibus faves, Domina, quemadmodum non raro alii, ita & ego nuper abunde expertus sum. Cum enim pessima anni tempestate a te discessissem, atque iter mihi faustum precari nequaquam gravata esses, evenit praeter spem, ne aut viae difficilis per se ac molestae difficultates, aut hiberni coeli injurias, quibuscum conflictandum videbatur, senserim. Ita nullis in via objectis impedimentis salvus ad meos perveni. Quo quidem nomine erat cur devinctissimum me tibi profiterer, nisi ultimum hoc beneficium infinitis aliis erga me meritis praevenisses. Nimirum hoc divinae tuae benignitati familiare propriumque, Domina, ut quos vel sola conspectus tui indulgentia mancipare poteras, tanquam admirandae illae virtutes parum vinculi essent, liberalitate devincire malis. Novi ac perspectum habeo laudibus tuis apud te locum vix relinqui, earumque commendationem uni tibi gravem atque invisam accidere, impetrare tamen a me vix possum, ut duram atque iniquam silentii legem hinc mihi patiar imponi. Nam apud alios te praedicare cum serum ac superfluum videatur, quae omnium in ore sis, una tu restabas, ad quam eundem mihi foret, Augusta; quod & iniqua tui aestimatrix es, & quam de te confessionem hostibus tuis expressisti, tibi extorqueri non patiaris. Quid quod conferendo-

rum.

rum in clientes tuos beneficiorum assidua cogitatio ita sensus tibi occupavit, ut meminisse te illorum, quae jam collata sunt, non sinat. Refricanda igitur memoria hîc tibi erat tuorum erga me meritorum, si animum non ingratum ostentare vellem. Sed ne otiosus essem, denegavi mihi met ipsi maximam voluptatem, quam ex rei jucundissimae recordatione percepturus eram; majoremque obsequii rationem, quam officii hîc habendam duxi: quanquam eo angustiarum ac necessitatis a te redactus sim; Domina, ut nihil reliqui mihi videam praeter verba, quibus gratum me profitear: nam & fortunae meae tenuitate, & tuorum beneficiorum mole ac magnitudine fit, ut re ipsa gratum me aliquando fore parum absit quin desperem. Incumbam tamen in eam curam quantum in me, nec ullam elabi mihi occasionem patiar commodis tuis studendi, ut nihil sit praeter unicam hanc spem, quod moram in his oris diuturniorem mihi possit objicere, ubi videro nihil offerri, quo tibi consulam, statim ad vos reditum maturabo, nec eripi diutius mihi patiar conspectus tui felicitatem, qui jam nunc solitudinem hanc impatientius fero: si quid enim meae erga te pietati credi posset, multum accessisse profiterer, postquam a te absum, ut seri plerumque bona nostra aestimamus. Codicum Gottorphianorum ac Bremensium manu scriptorum Catalogum exhibitum tibi jam confido, quos Bibliothecae tuae ornamento non parvo fore existimo. Nummos veteres non uno loco venales proflare in his oris intelligo. De Bruxellensibus tamen melius, quam de reliquis sentio. Excurram igitur intra dies quatuordecim in Brabantiam, ut videam an famae respondeant. Amstelodami etiam ex Viquefortianis argentei Graeci numero satis magno prostant; aureos jam distractos puto. De iis certiora proxime judicabo. *Balzacii* Latina poëmata necdum prodierunt: in has certe oras nondum perlata sunt. De caeteris tuus, ô Regina, quid optes explorare labor, mihi obsequii gloriam relictam nostri, quam probatam tibi vehementer atque unice velim. Denique si nihil ad summam felicitatem deesse mihi vis, perpetuam mihi fac incomparabilem illam clementiam, qua me foves haëtenus. Non quod eam promerear, sed ne & judicii tui te poenitere videatur, & conspectum lucis hujus invisum mihi reddas. Lugduni Batavorum. CIOIOCLIII.

E P I S T O L A DCLXXXI.

N I C O L A U S H E I N S I U S.

*Christinae Augustae.**Holmiam.*

Oblatas manibus tuis confido, Domina, quas de Fortunii *Liceti* novo opere tibi inscribendo nuper exararam literas. Nunc Parisiis ad me feruntur, quae moneant Balsacianorum poëmatum exemplar jam pridem ad me missum, quod Majestati tuae cupiat redditum edititionis auctor *Menagius*. Id cum haëtenus non compareat, aliud interim ex librariorum officinis depromptum

D d d d d 3

mitto.

mitto. Discedenti enim ex regno tuo iusseras, ut quanta possem festinatione horum poematum novam editionem, si prodiisset, cum ad meos venissem, ad te curarem. Exemplar tibi ab editore destinatum mecum feram, si tempestive mihi reddetur, quod futurum confido. De nummis Brabantinis responsum tandem accepi, potissimam eorum partem jam divenditam. Superesse mille etiamnum argenteos ex numero trium millium. Eos quingentis scutatis emi posse, aut minoris etiam, quod pretium nimium mihi visum, praesertim cum facilis sit conjectura rariores ex iis jam distractos esse. Hagae alii venales prostant, de quibus coram acturus sum. *Viquefortii* aureos *Thulerius* legatus Gallicus, rei nummariae studiosissimus, ut suspicatus eram, redemit. Superfunt Graeci argentei, quorum indicem mecum feram, ut cum tuis committantur, ac tanto melius mihi constet, quid desideres horum. De Claudiano meo lentum omnino negotium est. Occupantur a mensibus jam tribus *Elzevirii* in libellis nescio quibus res Gallicas spectantibus luci committendis, unde multum lucri sibi pollicentur. Feriatur interim Claudianus me invito, cui manum brevi se denuo admoturos ferunt, quam id vere nescio. De caeteris, Domina, ex successu, quem praestare ubique non possum, metiaris nolim, quicquid demum a me obsequiorum proficisci potuit, dum in patria dego, sed potius, quae incomparabilis tua est benignitas, ex affectu studioque commodis tuis invigilandi. Ego quidem id agam, ut intra dies paucos itineri me accingam. Faxit Deus Opt. Maximus, ut conspectum tuum mihi indulgeat, quo beneficio nullum majus optare possum. Lugduni Batavorum CIOICLIII.

EPISTOLA DCLXXXII.

NICOLAUS HEINSIUS

Christinae Augustae.

Holmiam.

Invito si quid unquam a me factum est, Domina, id profecto jam nunc fit, quando verba mihi facienda sunt & pro me ipso, & apud te, cujus ego sacratissimas aures suis onerare laudibus semper malui, quam ingrata mihi quoque ipsi de miseriis meis querela obtundere. Tempus etiam inopportunum & maxime alienum accipio, laeto quippe isthoc instantis anni auspicio inter publicos acclamantium applausus audiri me praestabat, quam privato dolori incumbere. Sed cum huc angustiarum nolentem redegerit dura necessitatis lex, ut odiosus nunc esse cogar tibi, quos ego scopulos anxie haecenus vitaram, venerabundus primum ac supplex te convenio, antequam latius se diffundat oratio, ut benigne & attente legas, quicquid hoc est chartae. Mihi vicissim curae fore promitto, ne abutar singulari indulgentia, utque verbis,

Hunc esse puto illum libellum supplicem, quem se parasse scribit *Gronovio* Epist. cclxix. prius Natalitii Festi Anno 1653. tom. i. i. i. Sylloges pag. 529.

his, quantum potero, paucissimis, quae dicenda habeo, complectar: tum simul cavebo diligenter, ne quid taedii & molestiarum ab hujus argumenti compellationibus impofterum tibi per me suboriat. Annus quartus jam exactus est, quintus agitur, Augusta, ex quo relictis paternis laribus in has oras deveni, erectus atque excitatus incredibili cupiditate propius te venerandi, in cuius meritissima commendatione omnem miratrix Fama facundiam jampridem exhaustisset. Accedebant huc tuorum non unae literae, quibus persuadebar nec te invita iter hoc me suscepturum, & spem adfulgere certam, ut, quicquid familia nostra detrimenti cepisset olim, dum domus regiae & regni Suecici commodis studeret impensius, quam a privatis exterisque fieri oportebat, id omne tuo beneficio resarciretur. Hanc alte impressam meis sensibus de te expectationem non confirmavit tantum primus statim congressus, sed longe superavit quoque ac me antevertit. Nam & parcam nimis ac prope malignam fuisse famam in te praedicanda deprehendi, & tu verbis amplissimis testata es, gratum atque acceptum tibi esse adventum in terras tuas meum. Promisisti praeterea causae nostrae aequitatem diutius negligendam non fore. Ego vero mente attonita constanter defixus in pulcherrima virtutum omnium imagine, fide te & pietate summa ex illo prosecutus sum, nec utilitati atque emolumentis tuis invigilare, quantum in me, destiti, etiam cum rei familiaris damno non exiguo. Quid, quod quotidiano ad te accessu, quo me pro incomparabili tua benignitate tum dignabaris, adeo religiose ac moderate usus sum, ut, insuper habita fortunae meae tenuitate, nihil petierim unquam aut flagitarim, quod mihi meisve in lucrum vel tenuissimum cederet? cum scirem tamen & probe exploratum haberem, rem mihi esse cum Principe, una omnium, quotquot ab orbe condito vixissent, longe indulgentissima munificentissimaque, & quae vel nunquam, vel rarissime quicquam negasset votis suorum utcumque immodestis. Hanc animi nec avari nec ambiciosi in me laudem nusquam interpellari aut transversam agi passus sum, Augusta, aut ab aulicis illecebris, aut adversae fortis ab impulsu. Ipsum illud negotium, in quo incolumitas & salus nostrae familiae vertebatur, atque etiamnum vertitur, nunquam apud te promovere, nunquam ejus verbo vel unico meminisse conatus sum, nisi a te ipsa ultro provocatus ac praeventus. Ad Italicam profectionem promptum sponte & paratum me obtuli, cum tu eam imperare mihi jure optimo posses, nec velles tamen: quae divinae auctoritatis tuae in omnibus moderatio est ac temperantia. Ad Italicam, inquam, profectionem sponte me obtuli promptum, dilatis Rutgersianis rationibus, quae a Parente mihi meo non precibus tantum flagrantissimis, sed cum suspiriis saepe ac lacrymis commendatae erant, neglecta etiam valetudine, qua tum utebar adeo non firma, ut de prospero eventu itineris & meo ad te reditu ipsi quoque medici desperarent. Delatus in Italiam, multa diligentia multoque studio in ea inquisivi omnia, quae grata fore & voluptatis tibi allatura nonnil confidebam; deque iis per literas non intermissas te certiores feci. Exilis tamen & minor, quam vellem, fructus ex itinere hoc, fateor, ad te redun-

dundavit, Domina: quod gravissimis istis occupationibus, quibus semper distineri soles, an invidorum malevolentiae & obrectationi acceptum referri par sit, non est hujus loci indagare. Rebus certe tuis prodesse luculentius hac protectione potuissem, si absenti ea, quam in procinctu sperare jussus eram, habita fuisset ratio. In Siciliam quoque, ut mandaras, decreveram excurrere: etsi ora illa a piratis Turcis sub id tempus infestaretur maxime, & quodammodo inaccessa per continuas barbarorum populationes facta tum esset: sed turbarent hoc consilium de conclamata Parentis valetudine supervenientes nuncii, quibus fiebat, ut pedem cogerer referre, praesertim cum omnem interceptam mihi facultatem viderem ulterius progrediendi. Nam de viatico rebusque ad iter tam operosum necessariis negotium tibi curae esse malueram a te discedens, Augusta, quam mihi, ne & munificentiae tuae, quae neminem frustrata esset unquam, diffusus, & majus mihi ipsi pretium viderer posuisse, quam a te poneretur. Quamquam pro usitata & recepta nunc in aulis consuetudine, non tam postulasse ante viam ipsam id jure poteram, quam debebam. His officiis, quorum me poenitebit nunquam, cum satisfieri tibi abunde posset, aliam praeterea excogitavi & ingressus sum viam, qua te mihi conciliarem. Poësin quod amari & acceptam tibi esse non nescirem prae reliquis scientiis, quas omnes tamen acceptas habes unice, illuc curas quoque ac cogitationes converti. Non erubescam equidem fateri, Domina, inconsultos prorsus ac temerarii exempli istos ausus fuisse: nam quis ad nominis tui gloriam latius extendendam conferre quicquam possit? Innata tamen tibi facilitate fit, ne longe quaerenda sit illis veniae atque impunitatis spes, qui ex nimia veneratione imprudenter apud te peccant. Quapropter si in hac palaestra meritis tuis immortalibus non respondi, si oleum perdidisse, si lusisse operam videor, cum maximis ingeniis communem, mihi fuisse irritum conatum erit solatio. Tu certe cum amari a tuis non aegre ipsa aut indigne feras, jaectare mihi liceat, illorum neminem extitisse hactenus, qui observantiam erga te suam pluribus argumentis publico testatam reliquerit, quam a me factum est. Scio procul esse a meis versibus omnem elegantiam, quae ad laudes tuas requiratur commemorandas, agnoscent tamen & fatebuntur, quotquot ad lusus istos ingenui lectores accedent, nec poësis omnino imperiti aut rudes, densa in iis apparere passim cultus prodigi vestigia, ex intimis animi admirabundi penetralibus deprompta, quae fucum prae se non ferant, nec possint fallere. Atque utinam tam proclive, tam pronum fuisset mihi, te dignos versus praestare, quam rebus familiae nostrae afflictis mederi atque opem ferre tibi in promptu est, Augusta, non utendum superflua hac excusatione mehercules nunc apud te foret! si nihil in rem tuam egi unquam, at votis saltem, quod unum potui, & propensissima tui demerendi voluntate mihi me non defuisse nullus illorum ambiget, quibus perspectus sum. Apud familiares juxta & ignotos te unam semper in ore habui, te assidua oratione praedicavi; & quidem tanto studio, ut aliis omnibus virtutum tuarum ignaris nimius hinc viderer, mihi uni satisfacerem nunquam. Testem hujus rei appello Italiam universam, testem Galliam,

testem nostram Bataviam: caeteras denique regiones, quasunque perlustravi, ex quo inter tuos numeratus sum. Non is quidem rerum mihi usus est, Augusta, & morum aulicorum, ut nihil commississe me existimem, quo offenderim, aut quod factum nollem: sed imprudentiae ut insimulari jure forsân in multis possum, ita malignitatis convincar a nemine. Plus dicam, sed dicam confidenter. Ne cogitationes quidem meae erga te deliquerunt unquam. Quae nunc in medium a me proferuntur, non quo me ipsum laudem, (id enim apud te minime omnium fieri oportere non nescio) sed quod jucunda mihi sit innocentiae meae atque illibatae mentis hac in parte recordatio. Haec cum ita se habeant, ac mihi ratio officiorum probe constet, suspensis, sat scio, sensibus jam dudum expectas, quorsum circuitiones istae verborum & ambages evadant. Paucis me expediam. Ad ardentissimas praeter solitum preces devolvor supplex, Domina. Ad preces, inquam, ardentissimas, quibus primum nunc extremumque a me compellaris, ut mihi per te liceat post diuturnas aulici naufragii jactationes, in tranquilliorum portum confugere apud meos, ubi in remoto a turbis angulo, intermissis praepostero consilio tot jam per annos studiis, quod reliquum est aetatis postliminio impendam. Invitus ad hanc spem amplectendam erigor, quam nolenti tamen praescribit & extorquet iniquae fortis pertinacia. Quis enim tam est ferreus, qui lubens a te discesserit, Augusta? Ego vero non adesse tantum tibi in praecipua felicitatis parte duxerim, & vitam omnem tuae clientelae dedicare: sed ne detrectem quidem aut recusem obversos nobis antipodas adire mandatis tuis instructus, & extra solis limites proferre pedem: si unum egestatis atque esuritio- nis metum averruncare detur & a curis meis excludere. Facultates suas Divi Genitoris tui commodis profuderunt Avunculus & Parens meus. Ego meas, quae aliunde mihi obvenerunt non copiosae, cum assiduis plurium annorum per Europam discursionibus, tum ultima hac ad Italos profectio- ne, non trivi solum, sed ad nihilum jam fere decoctas rede- gi. Peregrinationes istas non alio spectare expertus sum, quam ut magis indies magisque & ab eruditione & ab omni profectu, & a bona mente, & a rebus secundis quoque ac prosperis peregrinum me reddant atque alienum. Florem aetatis nihil agendo labi ac perire sentio. Nec tibi prosum, nec mihi. Justissimo praeterea rubore me quotidie perfundit inscitiae meae conscientia. Libros toto decennio vix inspexi. Abrupi cum amicis absentibus omne commercium. De Musis, quarum immenso olim amore capiebar, cogitanti nausea ac fastidium subre- pit, quod utiles nequaquam eas aut idoneas vitae sustentandae magistras esse serus agnoscam. Fracta est atque expugnata fortis adversae constanti malignitate patientia, & inviso calamitatis domesticae contemplatu. Nec tamen ita de- jectus est aut sui oblitus animus, ut quicquid apud te fortuna nostra peccavit, id corrigi atque emendari diffidam posse. Vel in patria vel alibi terrarum, si publicas aut fori aut curiae occupationes vitae privatae, quam fovi haecenus, anteponam. Sed de his viderit Fortuna. Rutgerfianum vero negotium, quo potissimum est referenda hujus epistolae supplicatio, ut tandem aliquando curae

Tom. V.

E e e e

tibi

tibi esse finas, vehementer opto, Augusta. Post tredecim annorum operam fidelissime *Gustavo Magno* navatam, post labores toto illo tempore non interruptis molestiis exantlatos, post obitas per Germaniam ac Belgium tot & tantas legationes, certa cum valetudinis ac facultatum conjunctas jactura, hunc vigiliarum fructum tulit unicum *Rutgersius*, ut aere alieno oppressus, suo fraudatus, e vivis excefferit. Haereditatem turbatissimam adire compulsus est meus parens, & aes ab illo conflatum rescindere cum rei familiaris clade praesentissima & pernicie, ut a publica, quam creditores minabantur, contumelia atque ignominia cadaver vindicaret, & terrae crederet sepeliendum. Proferre exempla possem plurima aliorum, si id nunc ageretur, quorum minora longe in domum regiam extant officia; qui & brevi tamen omnes tempore lautissimis a te ac Genitore tuo remunerationibus locupletati sint. Ad tam invidiosas preces non adspirat haec epistola. Nudam stipendii *Rutgersiani* &, si annuis, paterni quoque persolvendi causam ago: idque nec immodeste nec audacter. Reliquis illorum temporum ministris quod concessum est, nobis solis ne nega. Laudem a domo nostra illam, a te vero invidiam, insignem averte, Domina, ut cum damno nostro tibi tuisque studuisse posthac jure gloriemur. Si non alio nomine, saltem ne odisse nos videaris, aut omnino aspernata esse, quando benevolentiam tuam his officiis non est datum promereri. Si iniqua postulantur, repulsam compendiosam magni beneficii loco ducam. Aequiori illam certe animo sum laturus, quam trahendas rursus inter spem metumque novas alterius quinquennii procrastinationes. Sin aquas preces nostras esse judicabis, ut judicaturam auguror, fac quod te decet, haecenus Augusta, & fortunam tuam: quam ne cum mea experiri pergam mihi infensam, quod in te est, quamprimum quaeso procura. Causae hujus arbitros regni tui senatores non refugio. Quanquam quid ad illud tribunal provoco, te viva & superstite, quae mitissimum una tutissimumque supplicibus confugium es atque asylum? Aut quid aliunde sperem praesidii, si Salus ipsa mihi & Clementia non patrocinator: si medicinam huic morbo tu gravaris adferre, cujus opem nemo frustra imploravit: qua fiducia dies excubabo totos contemptus & prostratus ante atria senatus tui, quorum aures ad quotidianas supplicantum preces jam dudum occalluerunt? Posses te juvare nos, Reginam potentissimam florentissimamque in re non ardua quis ambigat? Reliquum est, ut velis. Si evolvere aut videre saltem tibi contigisset Parentis mei Poëma, si Orationes, Augusta, si scripta reliqua, quae omnia Divi Genitoris tui praeconiis sunt referatissima (nam per senectutem illi non licuit in te celebranda occupari) flecteris profecto & manum dares tam profuso ejus erga tuos adfectui. Homines novos & qui nec in regni tui emolumentum, nec in tuas privatim laudes quicquam contulerunt aut meditati sunt, cum & possent, ut qui acerrima scribendi laborarent prurigine, & deberent quoque infinitis a te beneficiis provocati, quam liberaliter, quam indulgenter habuisti? Illis felicitatem suam non invidéo, praesertim mortuis, dum & nos aliquo apud te loco sumus: nec, quam animo erga illos benefico gratis fuisti, tam a nobis averso praeter ordinem appareas.

pareas. Annum vel biennium obsequium nihil illis agentibus fuerit lucrosissimum: nobis quadraginta annorum servitus continua dum ne sit fraudi. Si fordemus tibi, si viles sumus, tui ipsius memento, Domina, ac rationem habe. Fidem libera, quam nobis obstrinxisti. Iteratorum verbis solennibus toties promissorum sanctitatem & religionem reverere, conspirare persuasum habere cum votis nostris, & commendare tibi causam hanc illius manes, cui vitam debes, intercedere pro nobis apud te *Gustavum Magnum*, qui si morti immaturae parvo etiamnum tempore subductus esset, non istis flagitationibus nunc convenirere. Fac ex sordidissimo hoc mendicitatis & querelarum luto emergat atque erigatur ingenium meum, & ad laetum optatumque laudis tuae argumentum denuo se tandem convertat. Si virtutes tuae, Domina, pro stimulo jucundissimo mihi fuerunt olim, si iis adflatae sunt unquam & incaluerunt Musae meae, si pietatem istam non es aspernata, similem me mei praesta, & receptam apud omnes de incomparabili benignitate tua opinionem hoc beneficio confice ac sancit. Da ut tuis debeatur auspiciis, si quid posthoc moliar non contemnendum. Sin exorari te non pateris, & re infecta mihi redeundum est ad meos, pergam tamen in laudabili ac pulcherrimo cultus erga te mei proposito. Nec indecorum putabo, familiam nostram obsequiis suis funditus everfam esse, & constantissimae fidei cum Saguntinis poenas dedisse. Denique quicquid in tuam commendationem commentatus sum ante aut porro post repulsam commentabor, id Musarum valvis affigam pro Tropaeo dedicandum aeternitati de adversa fortuna. Cum illa expostulationem liberrimam apud te instituendam nunc duxi, Principum Clementissima, ut tua, si fieri posset, opera atroces ejus injurias a meo capite amolirer. Illi irascor, illi gravissime, fateor, succenseo, non quod me persequatur aut premat, sed quod apud te hoc ausit indignor, quae tutelare mihi numen es, & ad cujus aram securum me speravi fore ab ejus protervia. Si quid acrius, si quid animosius in illam a me dictum est, quam dici debuit, condonetur is lapsus homini nec abjectae indolis, nec ad stipem petendam nato. Tyro sum, Augusta, in mendicorum castris, & parum adhuc in tam ignavis armis exercitatus, quapropter veniam des aequum est, si partes meas egi perperam in hac tragoedia, si scientiam apud te professus sum, in qua nihil intelligebam. Fortunatiorem ubi feceris, saevi, quantum voles, si quid peccaro. Nunc hoc unum sortis adversae beneficium est, ne indigniora metuum, quam fero. Quare aut eo curas auxiliares converte, ut sim felix, si luctuosas hujus notae preces averaris, aut integram relinque misero dolendi libertatem. Haecenus modestiae meae imputare possum, quod nihil profeci. Ut voti enim compos fierem, spes non defuit, si importunus esse voluissim. Nunc periculum faciendum est, an omnem mihi petenti aditum obstruxeris ad liberalitatem illam, quam ultro obviam non semel ante expertus sum. Plurimum timoris mihi ac desperationis cum incutiat cursus anteaetae vitae nequaquam prosper, plus tamen fiducia accedit a caelesti tua bonitate. Ut laetiores ergo atque amaeniores (nam potes) strenas expectes impostum, anni imminentis exordio tam au-

spicato, mihi praestes supplico, quam a me tibi voventur. Upsaliae Decemb.
CICIDCLIII.

EPISTOLA DCLXXXII.

NICOLAUS HEINSIUS

*Christinae Augustae.**Holmiam.*

ETSI tuis omnibus ac imprimis mihi, molesta, ut debet profecto, accidit atque acerba privatae haec jacturae contemplatio, quam consternatis altis sensibus impressit de deferenda regni florentissimi statione captum nuper, Augusta, a te consilium: impetravi tamen a diuturno stupore, quo oppressus & afflictus haesit huc usque animus, ut proposito huic tuo non accederem solum ac manum darem, quod fieri a nolentibus plerumque consuevit & invitis, qui potissimam in obsequio laudem collocarunt, sed laudator quoque gratularer memorabili instituto atque applauderem. Diffiteri haud ausim expugnatam aegre doloris concepti pertinaciam: at vero sedatior nonnihil emergo nunc paulatim, recolligoque me ex profunda curarum nocte, tuaeque acquiesco sententiae, & ad approbationem propriae calamitatis impellor. Habeo enim compertum, Augusta, eam esse tibi indolem, id inconcussi animi robur, ut non possis esse injuria aut in te aut in tuos. Scio inconsiderate nihil, nihil praeter ordinem fieri a te solere. Quare iis disceptandum relinquam, quibus es ignota, an recte feceris, quae regno vitam privatam anteponas; dum rationes mecum dubius subduco, & in causas inquirō anxius, quae ad facinoris admirandi atque inauditi spem fiduciamque capiendam praecipuae te erexerint & instigarint. Non deflectam e via, nec virtutum tuarum commendationi indulgebo, ne, dum liberius expatiatur in tam vasto campo ac se diffundit oratio, mearum ipse virium infirmitatem parum perspexisse atque exploratam habere videar, & tuis auribus haud recte consulatur, cum intelligam, ac probe jam dudum edoctus sim, non esse verba apud te de te facienda, nisi sobrie & paucis: cujus inter praecipuas est laudes, laudes suas fastidire, & antevertere factis immortalibus. Commune, Augusta, maximis temporum ingeniis argumentum es, in quo certatim memorando se exerceant, & facundiam jam pridem experiantur. Quapropter summae temeritatis sit & imprudentiae, ad illos denuo impingi a me scopulos, quos ne illi quidem satis feliciter praeternavigarunt, qui praeternavigarunt felicissime. Quid? quod ea, quae plurima praeclare atque egregie haecenus gessisti, Regibus aliquando posteris pro exemplo quod imitentur futura, recentis facti admirando splendore omnia obscurantur: Quod quia pro merito suo & dignitate praedicari nequit & extolli, non inconsulte fecero, si laudum tuarum partem hanc unicam proponam mihi delibandam, atque istos inter limites coerceam ingenium. Non est cujusvis, mihi crede, te capere, te aestimare, Augusta. Infinitis praeconiis cum memorata publice sis in tanto laudantium numero, plures fortunam

tunam tuam, quam te suspexerunt, & *Reginam* commendarunt multi, *Christinam* pauci. Insigne naturae beneficium videbatur, quod late imperares, quod *Gustavo Magno* prognata esses, & erat mehercules insigne naturae beneficium. Majus tamen illud tuum, Domina, quae regno & parente tantis dignam te praestitisti. Invidendae felicitatis credebatur, quod assiduo rerum successu floreres; quod bella cum potentissimis hostibus & gessisses prospere & composuisses: nos etiam prudentiae tuae id fuisse non ignoramus. Nunc detractis naturae ac fortunae ornamentis, illecebris amotis, tuis in posterum bonis, tuo cultu venies spectanda. Non enim commendari in te poterunt, quae spernis ipsa & contemnis. Ipsum illud, quod moliris, factum novum atque insolens, nec ulli saeculorum memoriae testatum, latere te nequaquam finet. Sedem ut occupes & figas in remoto a turbis angulo, ut inaccessible insulam invadas, secessum tamen illum, illas latebras orbis universus rimabitur. Si confluxerunt olim gentes undiquaque, ut, Divo Genitore tuo etiamnum superstite, victorem septentrionis vultum, ut tot ornatum laureis, tot triumphis perfunctum caput contemplarentur, quid non facturos censes, ut *Gustavi Magni* spectent filiam, ut animam pulcherrimam intueantur, quae triumphare noluit, cum posset, & tamen toties triumphavit. Non sum adeo rudis, adeo ignarus tui, domina, ut vestigia tua tibi commendem, & inculcem, quibus porro insistas. Haud potes tui esse dissimilis, postquam tam inusitati facti capax fuisti. Nihil tibi reliquum est in rerum natura aestimandum praeter unam fortunam, cum Fortunam, quae summum regnantibus bonum est, a te excludas atque averseris. Fortunae enim beneficio sola virtus non tangitur, sola non indiget. Itaque non tibi magis cum virtute male posthac convenire, quam ipsi secum virtuti potest. An voluptati ut indulgeas est expectandum, quae voluptatem ducis non regnare? Cum taedas tuas, cum nuptias tot Reges Principesque frustra sperarint, an castitati constantissimae timebimus? Ab ipsis teneris, quam parca somni, quam minime appetens fueris, quam epulis non sis delectata, quam procul habueris supervacua oblectamenta, & feriantes ingenii lusus familiares tui norunt: nunc tanto minus hisce capieris illecebris, quanto magis iudicium aetate est confirmatum. An otiosam fore te suspicabimur, quae ne tum quidem fuisti, cum regnares, & cum tuto posses. Scis enim oculi non posse regni vitia, solere dissimulari & silentii religione tacita involvi, quod multum reverentiae regali dignitati debeatur. Nunc rigidissima via res tuas censere omnes audebunt, postquam privasti te praerogativa omni veniae atque impunitatis. Accedet aemulatio & occultus livor illorum, qui splendorem existimationis tuae ferre non possunt. Quicquid temporis a curis publicis subduci potuit, eruditis a te lucubrationibus dedicatum scimus, partem diei praecipuam saepe, noctes etiam nonnunquam totas sic periisse tibi in confesso est apud omnes, qui te norunt &c.

EPISTOLA DCLXXXIII.

NOS Christina, Dei gratia Suecorum, Gothorum, Wandalorumque Regina, Magna Princeps Finlandiae, dux Esthoniae, Careliae, Bremae, Verdae, Stetini, Pomeraniae, Cassubiae, & Wandaliae, Princeps Rugiae, nec non Domina Ingriae & Wismariae praesentibus constare volumus, quod cum ministro nostro, Regiique conclavis ab epistolis Latinis Secretario, *Nicolao Heinsio*, pro praestito tam apud nos, quam in exteris aliquot annorum servitio, pensionis loco, constituerimus, atque assignaverimus quinquies mille ducentos & viginti septem imperiales, quorum solutionem ob alias nunc faciendas impensas, in commodius tempus prorogare atque differre complacuit. Quo autem datae ejusdem fidei interea is certior foret, hanc ad securationem nostram illi communicare volumus, qua praefatam summam 5227. imperialium primo quoque tempore ei rite persolutum iri promittimus & asseveramus. In quorum fidem majorem praesentes manu nostra subscriptas sigillo nostro Regio firmari jussimus. Dabantur Upsaliae de 22. Februarii Anno MDIOCLIV.

CHRISTINA.

Vide Epist. cclxx. ad Gronovium tom. III. Sylloges hujus pag. 330.

EPISTOLA DCLXXXIV.

NICOLAUS HEINSIUS

*Christinae Augustae.**Holmiam.*

AGnosco & amplector ultimum beneficium tuum, Domina, de datis ad Cameram Rationum commendatitiis: quanquam successus rei defuit. accepi enim tandem post longissimam moram a *Canterstenio* literas. Sed negarunt illi, quibus inscriptae erant literae, vacare sibi tempus ad excutiendas rationes nostras, quod multis longe majoris momenti negotiis nunc premanetur. Reliquum igitur erat, ut mandatis paternis manum darem, & re infecta ad meos referrem pedem: nisi auctores mihi essent ex proceribus nonnulli rerum mearum studiosi, ut oportuniora tempora mox adfutura expectarem. Mihi vero quanquam molestum est aliunde sperare beneficia, qui tibi soli me measque fortunas debere maluissem: post lustrum tamen totius jacturam, facile persuaderi patiar, ut parvum etiamnum tempus concedam promovendo huic negotio: etsi ipsa ejus memoria quodammodo mihi sit invisae post tot repulsas. Sed adversis paulatim obduratus animus, & a longo usu irriti laboris fiduciam sumit & pertinaciam. Principis Hetruriae *Leopoldi* epistolam mihi inscriptam optem videre; si sine incommodo tuo fieri potest; Metus enim est, ne, dilata responsione, Principem mei amantem offendam: quem demereri omnibus officiis studeo.

EPI-

EPISTOLA DCLXXXV.

NICOLAUS HEINSIUS

Christinae Augustae.

Perire beneficia identidem dilata, cum praestari cito possint, non deesse scio ex antiquis sapientiae praeceptoribus, Augusta, qui confidenter adfirmant. Iis etsi temere nihil hîc crediderim, opinor tamen benefactis a cunctatione & mora pretii haud multum accedere. Promptitudinem atque alacritatem animi, quam in demerendis clientibus summam tibi esse vulgo praedicant, quamque non paucis ego argumentis olim expertus sum, nunc remissiorem nonnihil solito & in causa paterna haerentem, rursus imploro. Pudet quidem ad easdem frustra preces recurrendum esse: justissimusque metus suboritur, ne extorxisse beneficium nolenti videar, quod benignitati tuae gratuito acceptum a nobis referri praestaret: non desunt tamen rationes, quibus fiat, ut urgendum omni conatu promovendumque ducam negotium, de quo tam saepenumero apud te egi. Beneficio, cujus spem certam nuper fecisti, etsi per se magno, non tam moveor aut tangor, quam quod honorificum imprimis mihi fore censeam, si aliquo apud te loco esse, nec prorsus negligi me appareat, & deprehendatur pristinum erga res meas studium in te non omnino refrixisse. *Canterstenius* in parandis literis, quas parare jam pridem jussus est, mensem totum cunctatur: & porro, quantum apparet, cunctabitur, nisi tua apud illum pro me intercedat auctoritas, quod si fiat, auguror fore, ut mox suprema negotio toti manus imponatur. Vale, Domina, & si preces meae nihil apud te possunt, aequitatem causae tamdiu protractae clementer intuere.

EPISTOLA DCLXXXVI.

NICOLAUS HEINSIUS

Christinae Augustae.

Allatae nudius tertius ex Germania literae narrarunt nobis, Hamburgo Amstelodamum te discessisse, Augusta. Qui nuncius majorine voluptate an maestitia me perfuderit vix est ut prodam. Laetor enim & gaudeo vehementer, tanti tibi visam Bataviam nostram, quam inspectam in transcurso hac peregrinatione cupias. Sed & doleo vehementer hîc me relictum & exclusum pleno gaudio: levibus enim officiis locus aliquis fuisset, & curiosis oculis tuis poteram gratificatus esse, non ignarus aut inexpertus illarum civitatum, quas in illo tractu perlustrandas tibi proponeres. Sed hoc fatum jampridem meum est, ut te demereri non detur, nisi sola voluntate. Erit nunc me felicior *Vossius*, & officia ista praeoccupabit. Parentis mei hae partes fuissent. Sed is senio &

mor-

morbis diuturnis oppressus jam nec tuus est nec suus. De rerum mearum statu paucis agam, quo nihil potest esse miserius. Quid enim magis acerbum obtingat homini ingenuo & tuae clientelae addicto, quam mendicum agere tot jam annos, & quidem illic terrarum, ubi tu regnare noluiſti, Domina? Domi honesto loco natus inter propinquorum civiumque meorum complexus fortunis non contemnendis frui poteram, foris mendicum agere malui, ut tuus essem. Mensis agitur jam septimus, quo *Joannus Holmius* tuo nomine mihi tradidit diploma, quo partim pro expensis, quas in Italico nuper itinere fecissem, partim pro praestitis aliquot per annos obsequiis, quina aureorum seu thalerorum Germanicorum milia jubebas mihi dari. Pecuniam post menses duos paratam fore idem *Holmius* tunc promittebat. Nunc negat de pecunia ista mihi persolvenda quicquam in mandatis a te sibi datum: auctorque mihi fuit, ut argumenti hujus literas ad te ipsam darem. Audeo igitur ad easdem preces iterum confugere, quas toties sine successu apud te profudi: Non quod effecturas illas multum existimem, etsi invidiosae non sunt, sed ne mihi desim. Post fortunas enim turbatissimas, post attritas ac dissipatas facultates, facilis verborum est jactura. Peto igitur, Augusta, supplicoque submissus, ut si de tota pecuniae summa, quam Diploma tuum largitur, nihil videtur sperandum, ea saltem pars ne detrahatur, quam ex meis facultatibus profudi in Italia, eamque ut mihi reddat, *Holmio* quamprimum injungas. Habet is quidem nomenclatorem a te sibi datum illorum omnium, quibus satisfaciendum sit ex terrarum tuarum proventu: sed ex illo numero exclusus sum, in quem tamen & Cytharoedos & alios minimi pretii homunciones admissos intelligo. In ipsos Cytharoedos dicam nihil aspere: scio enim illos oblectandis animis & fallendo tempori non parum conferre: sed aeternitatis instrumenta non sunt. Cum celebritate nominis tui misere agatur, Augusta, si ab iis sit augenda, qui nec in alios victurum nomen conferre possunt, nec in se ipsos. Hos tamen successores nacti sunt eruditi in aula tua, hos liberalitas & munificentia tua nunc fovet, nobis plorare jussis. Sed pristinum literarum & ingeniorum cultum rursus instaurandum mox fore in tuo comitatu auguror. Liberior haec fortasse quam par erat. Sed hoc desperationis ingenium est, ut nihil metuat. Novi praeterea Philosophiae semper male convenisse cum assentatione. Mitto hinc versus meos jam ante tibi visos, sed auctiores nunc nonnihil. In quibus si minus videor probare consilium tuum de privata vita, cogites velim, quanti mihi constet. Vale, Augusta, & fidem, quam illibatam tibi inter paucissimos olim praestiti, nunc quoque devotam tibi crede. *Holmiae*
CICIDCLIV.

1 Vide Epist. cclxxvi. Tom. III. Sylloges pag. 329. ad *Gronovium*.

EPISTOLA DCLXXXVII.

NICOLAUS HEINSIUS

*Christinae Augustae.**Romam.*

NUNCius diebus proxime elapsis longe nobis optatissimus advenit, Augusta, qui alienissima anni tempestate, & minime omnium oportuna per Alpinas nives feliciter te luctatam asseverabat. Nimirum frueris nunc desiderato illo toties splendoris antiqui conspectu, & majestatis Romanae necdum oblitteratam magnitudinem ex operosa ruinarum congerie metiris atque admiraris. Faxit Deus Opt. Max. parem itineris successum experiare ad Belgas aliquando nostros reditura. Annus jam est, si recte memini, cum literas ex Suecia ad te dedi doloris ac querelarum nonnihil prae se ferentes, quod non eam a te rerum mearum rationem habitam agnoscerem, quam habendam a te fore identidem jusseras ut sperarem. Erat autem eo liberior epistola, quod tibi soli scriptam manus alienas haud subituram arbitrator. Invitus tamen intellexi postea curiosis multorum oculis in aula tua objectam fuisse: credo ab iis, qui cum male mihi vellent, tua excussum videre benevolentia optabant. Ad meos ante tres menses cum ex Suecia rediissem, libros domi nonnullos offendi, quos mihi seposuisse *Silvercronius* dicebatur, quod in bibliotheca tua essent superflui. Inde solutionis factum est initium. Spem quidem fecerat non una epistola idem *Silvercronius* fore, ut quicquid mihi tecum restaret ratiuncularum, ante tuam ad Italos profectionem expungeretur. Caeterum is, quantum video, suam fidem est frustratus. Quapropter post iteratas toties preces supplex te denuo obtestor, Domina, ne, qua polles apud *Silvercronium* auctoritate, trahi ac differri negotium istud diutius patiare. Totos enim menses quinos mihi lucta pertinax est cum morbo molestissimo, cujus eventus cum futurus anceps videatur, facultatibus meis consultum omnino cupiam. Quamquam enim pulchrum ac gloriosum mihi duco, nullo cum emolumento, multa cum rerum mearum jactura tibi studuisse, nolim nihilominus, Augusta, heredes mei ut aliquando conquerantur, tuis me auspiciis decoxisse. Vale, & si aeternitatem nominis tui, rem profecto pulcherrimam, ut debes, amas, noli eos averfari aut insuper habere, qui istam in te gloriam magno cum labore sunt conati derivare. CIOICLV.

EPISTOLA DCLXXXVIII.

NICOLAUS HEINSIUS

*Christinae Augustae.**Hamburgum.*

INcredibili mehercules laetitia perfusus sum, Domina, perlatis ad me nuper admodum a *Langermanno* nunciis, qui non indicarent solummodo, Hamburgum ex Italia te advenisse, verum etiam post temporum ac locorum interval- la necdum te mei oblitam esse testarentur. Circumstabat quippe ac premebat me conscientia jejunorum tenuiumque officiorum, quae tibi haecenus praestit- tissem, nec sinebat me assurgere ad fiduciam aut spem tantae felicitatis. Nunc vero, quando pro caetera tua incomparabili benignitate fit, ut hominem nul- lis meritis tibi conciliatum, augusto tuo patrocinio fovere pergas, audeo qua- lemcumque operam tibi offerre, obtestarique genium divinae tuae clementiae, ne graveris voluntatem illam, quam luculentam sane ac promptissimam rebus tuis promovendis pridem consecravi, tentare tandem aliquando atque experiri, meque mandatis tuis, quibus nihil optabilius perferri ad me possit, beare. Plu- ribus infirmas obsequii vires apud te non ostentabo, ne inane per se officium multo vanae jactationis ornatu extenuetur. Flagrantissimum hoc desiderium bene de te merendi coram tibi testaturus eram, si res id meae ferrent, ferent tamen ut auguror aliquando, si autumnus hujus quod reliquum est apud Ham- burgenses exegeris. Vale, Augusta, meque omni cultu ac observantia tibi mancipatum crede. CIOIOCLXI.

EPISTOLA DCLXXXIX.

NICOLAUS HEINSIUS

Christinae Augustae.

Nihil solidae voluptatis esse in humanis rebus, Domina, nunquam magis sum expertus, quam nuper admodum, cum in via praeter expectationem mihi occurrebas. Quamvis enim laetius haud quicquam optatiusque conspectu tuo offerri mihi poterat, fortunae tamen meae te discedente graviter succen- sebam, fateor, quae felicitatem tantam, tam fluxam, tamque non diuturnam, mihi praestaret. Alieno certe jure, ac herilibus mandatis, quae alio me avoca- bant, nisi obnoxius atque astrictus fuisset, dubium non est, quin te comitatu- rus fuerim, non Helmaestadium solummodo aut Elsingburgum, quo vo- lebam usque, sed ad antipodas quoque hominum extremos, si postulares aut patereris. Augebat praeterea atque accumulabat macrorem meum, quod be- nignissime me exceptum viderem, eamque experirer in te comitatem, quae mentes etiam ferreas mollire posset & frangere, nedum me, quem vel minima bene-

beneficia traherent facillime, ac expugnarent. Ab illo tempore cum nulla cura cogitationes meas aequae exerceat, quam studium desideriumque bene de te merendi, in eo tamen contemplatu, quo animum identidem occupare ac demulcere soleo, vix mihi ipsi ulla ex parte satisfaciam, nisi mandata tua spem fiduciamque plenior mihi addant fore, ut hunc votorum scopum aliquando contingam, teque insigni aliquo argumento de observantia mea certiore, quam feci hactenus, faciam. *Meibomium*, uti jusseras, per literas tentavi de cura bibliothecae tuae suscipienda, quid rescripturus sit, avide expecto, nec responsum ejus ignorari te patiar. Caeterum, Princeps Augusta, cum *Silvercronius* jam tuis verbis saepenumero mihi significaverit, te pro caetera clementia tua, tibi ipsi ultro memoriam identidem refricare earum ratiuncularum, quae subducendae etiamnum restent super expensis, quas in itinere Italico atque alibi feceram tuae clientelae ante septennium & quod excurrit in nexus, nihilque magis in votis tibi esse, quam ut hoc nomine quamprimum, mihi satisfaceret: audeo te nunc obsecrare, Domina, ut aut in Oesalia Alandiave insulis, aut alibi per ditiones tuas tantum agrorum assignare mihi jubeas, quantum summae debiti respondeat, idque ad certum solummodo tempus, dum nexus iste parata pecunia commodius expediri possit. Hoc enim & facili negotio fieri a te posse, si velis, persuadent mihi homines rerum tuarum haud ignari, idque ego si impetravero beneficium, quod aliorum precibus frequenter indulsisti, mancipatum tibi hunc hominem perpetuo fore dubitare noli. Rempublicam quod spectat, Suecos tuos cum Moschis in gratiam rediisse, pacisque conditionibus utrimque jam subscriptum esse, nuncio. Ovidius meus, si necdum ad te perlatus est, mox *Langermanni* opera perferetur. Vale. Holmiae Suecorum CIOIOCLXI. 2. d. XVI. Junii.

EPISTOLA DCXC.

NICOLAUS HEINSIUS

Christinae Augustae.

O Bsequii mei rationem sic satis tardo pede processisse invitatus agnosco, dum indicem operum paternorum, cujus copiam tibi fieri volebas, ab *Isaaco Vossio* nunc absente, aut alibi occupato nequicquam multo tempore expecto. Operum jam publice prostantium Catalogum vix tandem hinc mitto, ineditorum mittam propediem, simulatque & illum fuero nactus, quem sperari quamprimum jussit *Vossius*. Negavit ille mihi verbis seriis sese ullas a Majestate vestra super ea re litteras accepisse, officio neutiquam defuturus si accepisset. Mitto & indicem, Domina, scriptorum a Jansenistis nuper publici juris factorum, quibus alia complura, quantum audio, propediem accedent. Debebam mehercules operosa nunc uti oratione, ac gratiis agendis multum insudare, sic a Majestate tua nuper Hamburgi exceptus, ut comius benignius-

F ffff 2

que

que haudquaquam possem. Sed nec verba mihi sunt prompta, quae beneficentiae tantae satis respondeant, & tu demereri tuos mavis, quam ob merita laudari. Caeterum res meas, quas discedens Majestati vestrae commendavi, rursus nunc, si fas est, commendo. Iis, Domina, si quocunque modo prospexeris, & me immane quantum beabis, & simul efficies, ut os obstruatur illis, qui amorem literarum in te refrixisse vulgo jactitant. Viam facile invenero, quae illae sine incommodo tuo promoveantur, dum ipsam te ita cupere manifestum ac compertum sit mihi.

EPISTOLA DCXCI.

NICOLAUS HEINSIUS

Christinae Augustae.

Quaquam mandati tui sat memor, Princeps Augusta, rarius tamen ad te scribo, quod adventum in hanc civitatem meum aestivae feriae mox excipere, per quas fit, ut procerum magna parte negotiis privatis intentae, aut rus identidem excurrente, res aulicae vel jaceant omnino ac proferantur sub hoc tempus, vel lentius assueto procedant, unde ego potissimum epistolis meis argumentum fore promendum speraveram. Mearum ad Nasonem observationum primitias Augusto nomini tuo necdum ausus sum dedicare, quod rudes plane & impolitae sint, ac curam majorem a secunda manu unice requirant. Harum tamen qualiumcunque exemplar ut ad te perferret, quod sic velle te cognovissem, *Langermannum* nuper rogavi. Qua in re illum meis precibus gratificaturum confido, simulatque codicem tibi destinatum ex Batavia nostra a typographo acceperit. Caeterum Claudianum typis majoribus cum nunc adornent *Elzevirii*, in eo sum, ut quae ad ingeniosissimum poetam tuis auspiciis olim annotarem, recenseam, atque auctiora proferam in lucem, mox aliis quoque primi ordinis poetis, si otium concedetur, manum admoturus. *Tanaquillum Fabrum* Salmuriensem, virum eleganter sane eruditum, e vivis excessisse nuper admodum *Gronovius* ad me perscribit. Idem Stephanum Byzantium Holstenianis commentariis illustratum ad se perferri vehementer exoptat, ut doctissimus atque utilissimus labor tuo beneficio publici juris fiat. A *Meibomio* quod miror, nihil etiamnum responsi accepi, quare fit, ut suspicer literas ad illum meas parum diligenter curatas esse. Deus Opt. Max. Domina, te diutissime, ac in te rem litterariam, incolumes velit. Vale. Dabam. Holmiae Suecorum Anno MDCLXI. a. d. x. Augusti.

EPISTOLA DCXCII.

NICOLAUS HEINSIUS

Christinae Alexandrae.

SI toties te venerentur ac conveniant meae litterae, Domina, quoties desiderium flagrantissimum ad officia scriptionis me compellit, nullus omnino ad vos ex hac civitate contendet tabellarius, qui epistolas a me tibi non ferat. At vero cum neque dignitatis tuae sit ad otiosas plebejorum hominum allocutiones respondere, neque frontis meae, ut alibi occupatam frequenter interpellem, sufflamino, quantum, possum hanc tui compellendi immoderatam cupidinem, meque intra tacitae observantiae ac religionis mutae limites quodammodo coërceo. Huc accedit, quod de negotiis publicis nihil fere nunc occurrit nuntiandum, cum ad pacis concordiaeque scopum dirigantur unice Senatus Regii consilia, postquam armorum taedia fatigatis diutino bello mentibus obrepserunt. Attritum videlicet exhaustumque aerarium nobis haec fecit otia, quorum ne nullus ad me fructus redundare videatur, scriptores antiquos evolvo nonnunquam & familiares mihi reddo: in quibus sese nuper admodum mihi offerebant L. Appulei Metamorphoses, scriptum mehercules & ingeniosum comprimis, & multam cum urbanitatem, tum eruditionem prae se ferens. Indignatus igitur pulcherrimum opus infinitis propemodum naevis adhuc conspurcari, loca depravata non pauca inter legendum castigare sum conatus, nec sine successu, ut mihi videbar. Nam quod scriptorem hunc vulgo inter semi-barbaros ac minime Latinos reponunt, in eo quam sint injurii, facile pervicerim, si membranas hujus operis vetustas ac fidas aliunde detur indagare. Ex iis enim, nisi spes me fallit, liquido appareat, alieno illum ore, non suo, ut plurimum balbutire ac incondite longui. Nam ut omne, quod in illo peccarunt interpolatores, solius ingenii ope ac fiducia possit corrigi, frustra speretur. Est autem hic ipse Apulejus curae tam operosae in captanda verborum proprietate, inque vocibus ex ultima antiquitate depromendis, ut nimiae potius eruditionis studio, quam inscitia sermonis Latini peccare possit videri. De membranarum melioris notae si spes ab amicis Gallis, Italisque fiet, manum medicam scriptori pessime affecto sum admoturus. Atque haec de L. Apulejo. Caeterum, Domina, rogatus est nuper a me *Silvercronius*, ut imaginem tuam mihi abs te impetraret, quam *Johannes Holmius* jam olim ultro non semel me sperare jussisset, idque tuo nomine, cum ne ambire quidem eam sustinebam. Recta ad te ivisse poteram, qua nihil indulgentius esse aut exorabilius jampridem habeo compertum; nisi quod infirmitatis propriae mihi conscius, preces meas adeo inefficaces esse noveram, ac voti consequendi rudes, ut cum repulsa haud raro conflictentur, tunc quoque cum iniquum nihil aut invidiosum postulare se opinantur. Vale, Princeps Augusta, meque clientium tuorum numero accensere perge. Holmiae Suecorum Anno MDCLXI. a. d. 1. Novemb.

EPISTOLA DCXCIII.

NICOLAUS HEINSIUS

Christinae Alexandrae.

FAcis profecto, Domina, pro caetera Augustae indolis tuae magnanimitate, quae pietatem longe flagrantissimam, qua te semper prosecutus sum, obliterari aut senescere haudquaquam finis in tuis cogitationibus. Id cum abunde coram sub aetatem proximam testata es, quando me in ipso itinere tibi fortuito occurrentem, plurimis benignitatis tuae argumentis cumulatam dimisisti, tum nuper denuo per litteras interpretes luculenter significasti, facta praeter haec spe, futurum, ut quod debere te mihi nummorum voluisti ipsa; mox persolveretur. Potes quippe meminisse, chirographum ultro ad me iussu tuo perlatum esse, nihil minus flagitantem, funesto illo & luctuoso clientibus tuis tempore, quo regno te abdicabas, cum in solo maerore curas omnes defixissem, ac tota sese sollicitudo mea hinc unice occuparet, caeterorum negligens, & privati emolumenti prorsus secura. Hunc ego nuncium, clementiae tuae testem luculentum, ante paucos dies mihi redditum, quanquam diffiteri non possum, acceptum omnino atque jucundum mihi fuisse, sic tamen de me sentias & statuas rogo, ut persuadeas tibi, nihil in rerum natura esse, quod vel tantilla voluptate me possit perfundere, si cum tuis commodis non sit conjunctum. Horum potissimam rationem cum habuerim semper, omnique ea lucro ac privatae utilitati praetulerim, nunc quoque in eodem proposito persistendum mihi duco, nec unquam tam dissimilis evadam mei, ut impudenter atque odiose flagitando tibi extorqueam, meaeque importunitati acceptum referre enitar, quod indulgentiae tuae jam debere incepti. Nullam igitur procrastinationem aut nimiam aut longam a me censi existima, quam rebus tuis conduxisse intellexero. Illud unicum enixe a te peto, Domina, quando ad exemplum solis siderumque ac aetheris tui, divinae liberalitatis & munificentiae radiis atque inexhausto illo imbre clientes tuos promiscue, ingratos etiam ac indignos, irrigasti & fovisti, mei postremo loco meminisse ne fastidias aut graveris. Sacratissima interim imagino tua, quod munus destinasse te mihi testaris, non potest non plurimae voluptati esse, cum in illa impofterum te absentem sim veneraturus, quam rerum mearum columen ac tutelare numen observavi suspexique hactenus. In Virgilium commentaria immensae molis complura circumferuntur, nec ullus ex antiquitate omni scriptor ingenia nostrorum temporum tam multa occupavit aut exercuit. Poëmata ejus tamen qui ad pristinum nitorem revocare tentavit haud fuit, praeter unum *Pierium Valerianum*. Is ante annos hosce cxxx. collatis hanc in rem vetustis exemplaribus sat multis, Maronem castigare aggressus est, nec tamen eo cum successu, ut non plurimum alienae curae reliquerit. Ex Mediceo codice omnium, quotquot ullibi exstare opinor, vetustissimo, jam observavi multa, unde spes sub-

orta

orta est, ex aliis hinc inde exemplaribus plura animadverti posse. in Vaticana bibliotheca perquam multos Virgilii codices recorder me vidisse. Sed quatuor praecipuae vetustatis, literis Romanis, quas Capitales vulgus appellat, exaratos, quos operae pretium foret accurate evolvi. Vellem profecto res meas id ferre, nam & alienis oculis hinc minimum fido, & mihi, cum Romae essem, alibi occupato iis uti non vacavit. Sed & Apulejus est dignissimus, quem castigatiorem publice legamus: cum vix scriptor alius plus leporis atque urbanitatis cum tanta eruditione conjungat. Duos ejus codices in Medicea bibliotheca exstare memini, quorum ope editionem suam potissimum concinnavit *Elmenhorstius*, caeteris omnibus meliorem, nec tamen optimam, cum parum diligenter membranis illis sit usus. Veterimum exemplar in Vaticana servari *Jacobi Sirmondi* viri doctissimi ad Sidonium Apollinarem notae me docuerunt, ex quo plurimis locis hic ipse Apulejus corrigi atque emendatior prodire possit. Sed de hisce quisquiliis audebo te fortassis interpellare, Domina, cum urbi aeternae redderis. Comes *Nicolaus Brahe* qualem se praestiterit in legatione Anglica latere te non potest, quam nihil horum solet praeterire. Tanta nobilitatis tamque splendorum natalium viro tantum sordis adhaerere mirantur atque indignantur omnes. Hinc procures Sueci expensarum rationes ab illo sese exacturos esse minantur, cum persuasum habeant vix quartam annueratae pecuniae partem ab illo erogatam esse: hinc Magnae Britanniae Rex satisfieri sibi postulat ob navem classis suae praetoriam minus reverenter habitam, sed intercedent, ut opinor, pro illo Patruus & Socer, hominemque minime malum ex hisce angustiis expedire conabuntur. Versus, quos natiuitati Delphini Gallici nuper dederam, a *Langermanno* tibi exhibitos esse, a quo id officii postularam, auguror. Deum Opt. Max. toto animo veneror, ut te, Princeps Augusta, diutissime incolumem conservet. Holmiae Suecorum Anno MDCLXII. XIV. Januarii.

EPISTOLA DCXCIV.

NICOLAUS HEINSIUS

Christinae Alexandrae.

Quod ex publicis rumoribus percepi nuper admodum, Domina, nutare tibi valetudinem, id animum moerentem graviter sane mihi affecit. Auguror tamen medicorum cura timori huic nostro jam consultum esse, teque integris, & instauratis viribus non frui solide tantummodo, sed saeculo fruituram toto. imposterum. Negotia publica quod spectat, jacent illa hinc terrarum interrupta jampridem per diuturnam procerum absentiam, qui post res prolatas ut denuo conveniant, vix ante Martias Kalendas opinor fore, quamquam in diem proximi mensis decimum convocatus jam sit senatus. Legatio Britannica Comiti *Nicolao Brahe* parum prospere, si quid video, successit.

Sub

Sub primum quippe ejus in insulam appulsum, collisi inter sese Regum potentissimorum Oratores,

Et socer atque gener, ferro concurrere jussi,

Orbem terrarum universum haecenus attentum tenuere, quanquam videri possunt haec ejus culpa non contigisse. Utinam longe plura non essent ab adversariis, quos in procerum Suecorum numero non paucos nunc habet, majori in illum jure congesta, qui criminantur legationis amplissimae splendorem omnem intempestivis sordibus unice ab illo conspurcatum. Nummos, quos sustinendae pro publica dignitate huic provinciae ex regio aëratio acceperit, in privatam utilitatem conversos, Euclionem Plautinum pro Oratore Regio Britannis ostentatum, haec ab illo jam fieri ea aetate, quae prodige rem administrare soleat: quid futurum, si senescat? Comitatem praeterea ac tesserae hospitalis religionem procul habitas: ex aula discessisse, etiam iis insalutatis, in quorum aede benigniter fuerit receptus, & ad quos deverterit. Regem ipsum in navem, qua ille sit advectus, bis terve excipi & admitti gestientem, valetudinis adversae excusatione, longe admodum quaesita, rejectum ac repulsum. Denique confecta legatione ad suos jam redeuntem, temerario prorsus consilio, classis regiae navem praetoriam irreverenter & contemptim praevectum esse. Ne *Tottii* quidem exemplo aut aemulatione ad saniora potuisse impelli, qui sub idem tempus impositam sibi publicam personam plurima cum laude sustinuerit in aula Gallica, egregieque ac splendide ornarit. Interesse regis ac regni, ut expensarum rationes ab illo flagitentur. Nullo enim jure attriti bellis continuis aëarii spoliū ferri, tanquam praemium rei perperam gestae, ab eo, qui publicae rei nihil indulserit, privatae omnia. Haec passim & ubique clam palamque invito mihi ac nolenti audienda sunt. Nec minus fremere Britanni. Rex ipse contumeliosius se habitum quiritari, ac velle, ut illata sibi ignominia per Suecos expiatur. Quid decreturi sint in hanc rem proceres vestri, ubi convenerint, intelligemus, nisi quod recepta jam nunc apud plerosque invaluit opinio, operam ab iis dandam fore, ut placatos quampridem Britannos experiantur. Horum nil abs te ignorari certus sum, Domina, sed quaerendum scriptionis argumentum fuit, cum impetrare a me haud possem, ut officium protraheretur. Juvenis infelicissimi multum profecto me miseret, nisi quod patrum socerumque pro illo interposituros esse auctoritatem, quia plurimum possunt, non dubito, atque ita fore, ut omni periculo subducatur. Sacratissimam imaginem tuam, quam sperare nuper jussus sum, impatienter expecto. Vale, Princeps Augusta. Holmiae Suecorum Anno *MDCLXII*. a. d. *xxviii*. Januar. Juliani.

EPISTOLA DCXCV.

NICOLAUS HEINSIUS

*Christinae Alexandrae.**Holmiam.*

Delicias & lepores aulae Sueciae incomparabiles *Ebbam Sparre*, quam benevolentia tua singulari non immerentem fovisti, morbus diuturnus vivis subduxit nudius quintus, Domina. Et ne quid indigni spectaculi non secum traheret tam funestus dies, certissimam fundi Livonici calamitatem Oratores a Russia quatuor advexit, uberrimo barbariae comitatu stipatos. Splendida (fatendum enim) magnificaque praeter solitum pompa pervehebantur civitatem advenientes. Crederes spolia Suecico nomini detracta ab illis ostentari. Magnus regni Cancellarius totos tres menses ab urbe jam abest, nec exploratum sat habetur, quando rure huc sit rediturus: cessantibus interim ac feriari iussis negotiis magnam partem publicis. Vossianus, ut ad privata descendam, de septuaginta interpretibus, deque mundi aetate commentarius jam ad te perlatus est, nisi fallor augurii, Domina. Ex quo sub aestatem praeteriti anni fortuna congressus tui mihi obtigit, non defuerunt illi admonitiones meae tuis conceptae verbis, tuam prae se ferentes auctoritatem, quibus hortabar, ut in eo studiorum campo sese exerceret, quem feliciter sibi jampridem aperuisset, Graecaeque ac Romanae antiquitati illustrandis incumberet, unde plus laudis gloriaeque, invidiae minus esset expectandum. Catullum, Martialem, Ptolemaeum, quos dudum promississet, aliosque scriptores aut haecenus in publico non visos, aut editos mendose, luci committeret; a spinis vepribusque Theologicis manum contineret. Hanc tuam esse sententiam, hanc caeterorum omnium, qui aestimationi ejus bene cuperent, & rei literariae impense faverent. Sed nihil apud contumacem promovi: credo, quod judicio meo diffusus, hoc ipsum ex te, Domina, maluerit audire. Et sane tanti erat, hunc fabrum tractasse non fabrilia, ut argumentum tibi daret tam elegantis tamque ingeniosae epistolae, ex qua quae ad rem unice facerent, nonnulla ad me perscripsit *Silvercronius*. Virgilio manum jam admoveere coepi, usus, inter alios codices minime contemnendos, exemplari Mediceo, quo vetustius sinceriusque nulum in bibliothecis Europaeis exstare opinor. Sed necessarium omnino est, ut aliae etiam membranae divini poetae a me consulantur, si famam hisce conatibus faventem experiri cupio. Lutetiae Parisiorum novam editionem familiarum *Fulvii Ursini* Romanarum parari audio, cui trecenta & plura numismata sunt accessura de novo, quae doctissimum *Ursinum* fugerant. Multum contulit huic operi ornando *Petrus Seguinus*, vir horum studiorum atque adeo antiquariae & gnarus imprimis & amans plurimum, redemptis in hos usus a *Francisco Gottofredo* equite Romano nummis compluribus, qui in *Ursiniana* editione desiderabantur. Quod monendum duxi, ne *Gottfredus* id genus thesauros suos, quos luculentos possidet, pro non libatis integrisque tibi divendat. Latent alicubi

Tom. V.

G g g g

in

in scriniis meis indiculi illorum numismatum, quae rarioris notae apud illum servabantur, cum ante novennium tuis auspiciis Romam me contulissem. *Gronovius* in supputanda vetere pecunia tantum non assiduus est, ac spem facit mox fore, ut suos de Sestertiis commentarios longe auctiores publico tradat. Non minorem vir ille egregius voluptatem capit, dum vectigales sibi facit censibusque suis adscribit immensos Romani imperii atque opulentiae Graeciae redditus, & usui publico dinumeratos munifice impertit, quam in opibus suis recondendis capiebat olim Plautinus Euclio. A plebe tamen impetrari non potest, ut divitem esse aut opibus affluentem *Gronovium* credant, sed tanquam constitutum in re tenui & angustiae familiari objectum, alienis thesauris sese oblectantem sine cavillo non ferunt. Ego autem, Domina, cum tantas facultates in nuda eruditione collatas esse agnoscam, non possum non gaudere in sinu, & parentibus bene precari, per quos cautum ac prospectum est, ne vitam agerem litterarum prorsus expertem, atque inter luculentas divitias egerem, Tantali exemplo. Quam tamen Philosophiam apud debitores meos prudenter dissimulo: apud te profiteri paulo confidentius eam audeo; sed hac lege ac conditione, ut ne quid damnosam mihi esse patiaris. Vale, Princeps Augusta. Holmiae Suecorum MDCLXXII. a. d. XXI. Martii.

EPISTOLA DCXCVI.

NICOLAUS HEINSIUS

Christinae Alexandrae.

Romam.

INcredibili mehercules voluptate me perfudit nuncius, Domina, in hanc civitatem diebus proximis perlatus de tuo in Italiam reditu. Quem optatissimum itineris ex voto a te confecti successum non possum non plurimum mihi gratulari, cum inde ad studia quoque mea incrementi atque ornatus nonnihil redundaturum esse confidam. Meministi quippe injecta forte, cum coram proxime te venerabar, mentione, ut sit, editionis Virgilianae, quam a me adornari tum significabam, nec improbasse te istum propositum; promississe insuper, quicquid veterum membranarum possideres Maroniana scripta completentium, ejus copiam mihi a te faciendam esse, ubi primum in aeternam urbem rediisses: qua pollicitatione nil acceptius mihi jucundiusque potuit obtinere. Nam quamquam codices Maronis complures, & in iis duos tresve satis vetustos evolvi, supersunt tamen loca non pauca, quae negotium mihi facessunt, & e quibus expediri me posse vix spes est, nisi & plura & meliora exemplaria consulenda dentur, quorum ope praesidioque fretus quicquid residuum est mendorum penitus eradam. Obstringo religiose ac sancte fidem, quicquid suppeditaris, ad te confestim rediturum esse, nec quicquam inde a me flagitari, praeter solos in tempus brevissimum usus. Poenitet profecto, Domina, ut quod maxime, non perscrutatum me fuisse principis poetae Vaticana exemplaria, tria praesertim ejus bibliothecae caeteris vetustiora, quae lit-

litteris Romanis uncialibus, quas vulgo capitales vocamus, illic exarata observavi, plurimamque aetatem prae se ferentia, quorum duo in ipsius Pontificiae Bibliothecae scriniis asservantur, integrum alterum, alterum Bucolica solummodo & Georgica, si satis memini, complexum: tertium ex Palatinatu inter spolia complura librariae suppellectilis advecta. Accuratam certe Maronis editionem vel solis ex hisce exemplaribus concinnari posse vix est dubium, sed multa sedulitate atque animi contentione opus est, ut non discrepantia vocum solummodo, sed litterarum quoque omnis accurate annotetur. Nullibi utilius operam collocasse poteram, cum Romae ante decennium morabar, sed alia, & quidem minoris momenti, ab hac cura tunc me avocabant ac distrahebant. ipsam editionem vere proximo confectam fore auguror. Miraberis, Domina, in scriptore omnium manibus trito totque commentariis illustrato, tam multa etiamnum superesse castiganda. Sed interpretes in id incubuisse potius videntur, ut mentem Maronis indagarent, quam ut ipsa ejus verba nobis exhiberent, & suo ore loquentem, non alieno, nobis sisterent. Rempubicam quod spectat, est ea loco satis tranquillo. *Robertum Douglassium* nuper amissimus, virum sane cordatum, & rei militaris in paucis peritum. Ablegabuntur hinc brevi Viennam Austriorum *Palbitskius*, in Galliam *Levenschildius*, *Martini Augustini* filius, in Daniam *Gustavus Liliakronius*, in Poloniam atque Lusitaniam fratrum par *Tongeliorum*, atque hi omnes Residentium titulo aucti, *Canuto Kurckio* legatione apud Dominos meos functuro. Cum pompa funebris exequiis *Laurentii Kagge* destinata nuper in publicum esset processura, contentiones exortae sunt inter duas foeminas Principes, alteram duci *Adolpho*, alteram Cancellario nuptam, cum utraque proximum a Regina locum sibi deberi asseverarent: Regina tamen litem hanc judicavit secundum Cancellarii uxorem, altera multum indignante atque exequiis sese subducente. Cum toto jam novennio *Silvercronius* profiteatur in mandatis a te sibi datum esse, ut veteris debiti rationes nobiscum subducat, ipsumque debitum expungat, nec quicquam tamen hujus rei apud illum promoveatur, opinor ac persuasum habeo, nisi tu dissentis, Domina, longe consultius rebus meis fore, ut cura negotii hujus *Severino Baatio* demandetur. Nescio an plus praesidii in illo mihi futurum sit, sed certus sum hominem, qui tardior difficiliorque ad demerendos amicos sit, hoc *Silvercronio* alium me nusquam inventurum esse. Viri ingenium longo usu abunde exploratum habeo. Opibus, quas luculentas possidet, sic utitur, ut pauperrimum credas. Cumque omni propemodum earum usu sibi interdicat, in novas facultates tamen conquirendas tantum non assiduas curas occupat & cogitationes. Habet praeterea, si quid illi credimus, quod sibi sororibusque suis apud te consulat, quibus desideriis nisi satisfactum sit, de nobis cogitaturum non est quod sperem. Nunc etiam ut fidem suam quodammodo erigat, atque instauret, quam ob irrita toties promissa jacere apud nos atque amissam penitus esse non nescit, ex lapacidinis nescio quibus Oleandicis prae se fert, id pecuniae nullo negotio confici posse, quod expungendo debito sit satis, atque ea se in re jam totum esse; sed ludit ille & jocatur in re seria,

Ggggg 2

dum

dum nos post longam solvendi nexus expectationem ad metalla condemnet. Olim cum me sex septemve vicariatus Bremensibus donasses, ultro is idem negotium omne in se recipiebat de diplomatibus donationis quamprimum obtinendis: credidi homini pro simplicitate mea, & qui Ubsalia Holmiam te secutus esse poteram ad conficiendum negotium, nostro illi fortunas meas permisi. At ille eisdem Vicariatus non tantum ab *Appelmanno* auferri passus est, cujus amicitiam sibi utiliore fore praevidebat, sed ita se proripuit tunc ex hisce oris, ne monito quidem me, negotium id praeter spem meam cessisse, aut ulla reddita ratione, per quam compulsus esset, causam confidenter susceptam turpiter deferere: nuper etiam, cum significassem me donatum esse imagine tua, quam *Langermanno* tradi eapropter jussisses, quod is ipse *Langermannus* Viennam Austriorum inopina profectione discessisset sub ipsum fere donationis tempus, subvereri me, ne imagine optatissima fraudarer, respondet illi per literas sic, ut plane securum esse me juberet: cogitare enim se jam nunc recta ad te Hamburgum, meamque rem illic unicae sibi curae fore, de debito etiam expungendo multa magnifica pollicitus. Reversus jampridem Hamburgo litteras quidem ad me dedit, sed plane jejunas, & in quibus de debito solvendo sic loquatur, ut frigidius nunquam antehac, de imagine tua ne loquatur quidem, tanquam satis sit promississe. Plura ejus argumenti poteram subtexere, quae non permittunt, ut quicquam mihi promittam magni ab homine, qui in rebus tantillis apud te, Principem longe indulgentissimam, toties me sic frustratur, meamque opinionem cum sententia Vossiana prorsus conspirare in hac re video.

Nullas habet spes Troja, si tales habet.

Quapropter supplex te rogo, Domina, ut negotium istud seriis verbis illi, quem dixi, *Severino Baatio* digneris commendare. Quod si feceris, sum certus, non defore inter procures hujusce regni, & quidem praecipuae auctoritatis viros, qui illum ad solutionem praestandam porro sunt hortaturi, atque impulsuri. Mitto eam in rem exemplar chirographi tui, unde de summa ipsa pecuniae, quam sperare jussisti, constare tibi possit. Rem non prorsus iniquam si a te impetravero, efficies, ut & unicam rerum mearum patronam agnitus, & coram etiam fortasse gratias sim acturus pro accepto beneficio. Audeo rem paulo fervidius urgere, quod maximo meo malo expertus sum, aetatem illic terrarum a me agi, ubi rationes antiquae facile obsolescant, ac nullo loco habeantur. Amitam regis, Dominam Marchionem Badensem supremum obiisse diem, nudius tertius intelleximus. Vale, Princeps Augusta, & fac quaeso, ne scriptionis argumentum longe ingratisimum, toties jam repetitum, imposterum mihi denuo sit repetendum. Holmiae. Maj. c1010CLXII.

EPISTOLA DCXCVII.

NICOLAUS HEINSIUS

*Christinae Alexandrae.**Romam.*

IN tabellariorum fide ac diligentia si quod praesidium fuit, Domina, una cum meis literis dedicationem Principis poetarum accepisse jampridem debuisti. Auguror etiam preces meas a te, quanquam curis longe gravioribus immane quantum distracta, non omnino rejectas esse, de impetrando ad breve tempus usu membranarum Maronis veterum, quae in bibliotheca tua instructissima nec contemnendas possides, quasque pro caetera benignitate sperare me ultro, si meministi, jubebas, cum proxime in via tibi occurrebam. Non debebam, fateor, hisce quisquiliis ac nugis occupationes tuas sacras interpellare, sed cum ex comitatu tuo familiaribusque aulicis neminem cognorim, qui haec studia aut promoveat aut intelligat, recta ad te ipsam irrumpo, Domina, confidenter sane, sed tamen fretus incomparabili indulgentia illa, qua conatus literarios omnes jam olim fovere ac complecti non gravabar. De Republica, quod nuntiare possim, aut quod tua scire intersit, nil nunc quidem in promptu. *Gustavum Adolphum Sckytte*, *Benedicti* ex fratre nepotem, & *Gustavum Draecke*, tuae ante ante annos hosce septem aulae, si quid recordor, adscriptum potes novisse. Hi collecta famulorum & clientium manu, ac instructa clam navi piratica, Hollandicam onerariam in mari Balthico armati inermem invaserunt atque expilarunt, nautis ad unum omnibus trucidatis, immanem in modum, ne quis atroci facto superesset nuncius: re tamen propalata *Sckytius* in vincula conjectus est, cum quinque aliis comitatus sui praedonibus. *Draeckius* reliquique latrocinii hujus consortes an evaserint haud scio, nondum sane protracti sunt e latibulis. Captorum capiti misere metuo. Vale, Domina, meque, ut haecenus, tuis accensere, si mereor, perge. Holmiae Suecorum CIOIOCLXII. XXIX. Novemb. Gregor.

EPISTOLA DCXCVIII.

NICOLAUS HEINSIUS

*Christinae Alexandrae.**Romam.*

LUculenti mehercules maximique beneficii apud me loco est, Domina, quod bibliothecae meae tam benigniter prospectum voluisti. Ea enim jam nunc in tuto collocata, caeteris sarcinis, quod longe sint expeditiores, facili negotio, cum usus postulabit, ipse consulam. In eventu litis minimum periculi est, te praesertim mihi tam propitia ac favente: ut securus & mente inconcussa excepturus sum, quicquid illic fortuna de me decernet. Novam quippe peregrinationem animo jampridem volvo: cum e re mea nequaquam sit, ut

Ggggg 3

hic

hîc terrarum consenescam, ubi nihil est, quod ad litterarum studia percolenda excitare me possit. Hoc quippe oneris fortuna, utcumque blandiens, si mihi imponet, pessime equidem de rebus meis merebitur. Quapropter, Domina, cum de sede mutanda aut hoc aut proximo anno consilium mihi jam quodammodo sit fixum ac ratum, unum id ceteris beneficiis adjiciatur a te velim, ut quartam quintamve partem illius summae, quam ultro debere mihi voluisti, quotannis per aerario tuo praefectos persolvi cures, donec omne debitum, quod quina scutatorum vix excedit millia, sit persolutum. id enim sine ullo rerum tuarum detrimento aut incommodo posse fieri plane confido. *Silvercronius* certe pergit asseverare, non defuturum sese solutionis partibus, ubi eas sibi a te demandari intelliget. Praeter Virgilianos codices jam ante a me inspectos, bis octoni nunc inter manus mihi sunt ab amicis, hinc inde ex Belgio Galliaque, ac Germania ad me missi. Sed vix duo tresve in tanto numero, quos vetustas commendet. Nam quamquam animadverto recentis notae exemplaria nonnunquam satis castigata atque ex antiquissimis esse descripta, ea res tamen & anceps est plerumque, & rarius contingit. Quapropter tuos codices avebam perlustrare, Domina, quos nec paucos numero, & veteres ac praestantes admodum in scriniis bibliothecae tuae asservari minime ignoro. Interim typographos impellam, ac hortabor, ut manum operi inchoato admoveere pergant. Plura enim subsidia si nunc mihi expectanda non sunt, curis secundis poterit suppleri, quod prioribus est defuturum. Vale, Princeps Augusta, & mihi, quod facis, porro patrocinare. Holmiae Suecorum CIOIOCLXIII, x. Maji. Gregor.

EPISTOLA DCXCIX.

NICOLAUS HEINSIUS

Christinae Alexandrae.

Romam.

PERvenisse noster Virgilius ad te, Domina, una cum iteratae editionis Claudiano jampridem debebat, si istas cogitationes avocamenta curae gravioris ac publicae rei minus frequenter interpellarent, per quae non licet mihi esse meo & hujus studii, quo, si essem meus, caperer maxime ac delectarer. Perferetur tamen utrimque ad te volumen sub aestatem proximam, ut confido; quod iis operae typographicae manum admoveere coeperint jampridem. Addam & his munusculis poemata fortassis mea a bibliopolis saepe flagitata, ac curis prioribus longe castigatius auctiusque mox in publicum proditura: in quibus Augustum tuum nomen paginam mihi faciet utramque: cum in te observanda aegre mihi ipsi soleam satisfacere. De transferendo hinc lare sub mensem Majum quod postremis meis consilium agitabam, persisto etiamnum in hoc ipso proposito & sic quidem, ut promissos libellos coram a me exhiberi posse ac offerri sperarem confideremque, si rebus meis ac mandatae solutioni prospexisset in tantum *Silvercronius*, quantum ab auctoritate tua, qua

id

id iussisse dicebaris, videbatur esse expectandum. Sed cum in eo negotio parum aut nihil a me promoveatur, facile intelligo, mihi rem esse cum hominibus illiteratis, quique ignorent, fomenta illa ornandis ac promovendis bonis artibus a te olim in medium collata, non minori ornamento gloriaeque tibi fuisse, quam triumphos omnes, quos & frequentes & luculentos ex hoste potentissimo egisti, dum regnabas, Domina. Horum, inquam, hominum recordiae refertur acceptum, quod cum nemo prorsus hac tempestate inter viros faeminasque tui ordinis ac loci Principes existat, qui solida literarum cognitione tecum ulla ex parte possit contendere, inveniantur tamen, qui eximio earundem literarum amore (quam virtutem tibi propriam ac peculiarem diu fuisse scimus, nec aemulorum studiis obnoxiam) te non aequare solummodo gestiant, sed etiam post se relinquere, quantum in ipsis est, enitantur. Ita fiet tandem, nisi avertat Deus, ut famae tantis impensis acquisitae splendor in te obscuretur ac deficiat paulatim, utque exemplum rei longe pulcherrimae acceptura sis ab aliis impofterum, quod prima omnium aliis ipsa maximo cum saeculi gratulantis applausu dedisti. Regis Galliarum Christianissimi certe inuitata nuper benignitas ac munificentia enituit, qua me aliosque, quibus nihil debebat, est complexus. In bonam igitur partem interpreteris rogo, Princeps Augusta, quod liberior paullo exposulavi cum iis, qui sic res tuas agunt, ut nihil agant minus. Nam ipsam te quod spectat, abunde exploratum habeo, tam alte bonis artibus pectus tibi esse excultum, ut iis non possis non patrocinari ac favere, etiamsi nolis. Publicam eruditionis promovendae causam ago, non privatam. In meam enim commendationem quicquid proferri posset, jam postremis meis sum praefatus, quando te obsecravi quidem, ut utilitati meae consultum ires, sed sic tamen, ne vel minimum ea cum incommodo tuo conjungeretur. Habeo videlicet persuasum, ut credam, perituum mihi esse omnino tuum beneficium, si invitae extorqueatur. Vale, Princeps Augusta, & mihi, ut haecenus, favere perge. Holmiae Suecorum MDCLXIII. a. d. v. Decembr. Gregor.

EPISTOLA DCC.

NICOLAUS HEINSIUS

Christinae Alexandrae.

Romam.

Prodierunt nuper denuo in lucem, quae ad Claudianum annotabam olim, sed multa ea nunc auctiora. Prodibunt & propediem Poëmata mea, magno nunc post editionem primam incremento ornata. Horum voluminum cum alterum Augusto tuo Nomini sit dedicatum, in altero paginam utramque facias, & hoc & illud in manus tuas perferri quamprimum velim: Quod pars mihi magna sit voluptatis observantiam meam cultumque constantem a te perspicere. Sed cum rumor jampridem apud nos spargat, de deferenda Roma te cogitare, quid potissimum itineris hisce libellis sit insistendum, ut conspectu tuo

tuo fruantur, & votorum compotes fiant equidem ignoro. Rumor certe si constare sibi pergit, Domina, quod unice cupio, spes haud deest, mox fore, ut libelli coram a me tuis oculis exhibeantur. Sed metuo vehementer, ut felicitate tanta me cumulatam videam, utque fruar hoc immortalis gaudio: adeo in magnis rebus famae non tuto creditur. Mittentur igitur Romam libelli, nisi alio mittendos praescribis. Quanquam nec res tua omnino videtur ferre, ut aut patriae te sistas, aut proprius certe, quam nunc fit, admoveas, ac viciniorem te reddas. Causas operosius subtexerem, ni haberem persuasum, plane jam nunc esse te perdoctam ab *Appelmanno* ac caeteris tuorum de iis, quae nuper admodum hîc sunt gesta. Fateor, Princeps Augusta, proximis comitiis ordines regni desideriis tuis per omnia haudquaquam gratificatos esse, sed duriora his videri possent expectanda, si abesse pergis, & dubito jampridem an virtutes tuas Roma satis capiat. Sed tu, quod tibi factum opus sit, omnium optime videbis. Rerum novarum quod nunciare possim, nihil nunc occurrit, nisi puerum diebus proximis principi Palatino *Adolpho Johanni* esse prognatum. Vale, Domina, & si quid mihi concedis, omitte mirari beatæ fumum & opes strepitumque Romae. Holmiae Suecorum CIOIOCLXIV. a. d. x. Septemb. Virgilio manum extremam jam imposuisssem, nisi quod ab amicis vetustorum nonnihil exemplarium de novo jussus sum sperare. Hiberna tamen tempestate telam omnem detexi posse confido.

EPISTOLA DCCI.

NICOLAUS HEINSIUS

Christinae Alexandrae.

Romam.

Utare jampridem rumore, nec sat constare sibi cum videam, qui de Roma deferenda deque repetendo paterno lare te cogitare sedulam feriamque, nuncios per hunc septentrionem spargebat, non ita nuper, in mandatis *Langermanno* proxime dedi, per *Texeram* ut tentaret diligenter, si quid opportunitatis praesto esset, qua Claudianus meus itinere terrestri in aeternam urbem ad te perferri tuto posset, & celeriter. Hominem mei peramantem huic tantillo officio nequaquam esse defuturum augurari equidem licet. Opinor quippe compertum abunde tibi, Princeps Augusta, ex iis litteris, quas septembri mense exarabam, Claudianum publico rursus a me commissum esse, forma ut majore, sic typis non minus nitidis atque elegantibus, quam ante annos complures in lucem prodibat, uti etiamnum potes meminisse. Commendant praeter haec editionem novam annotata mea partem alteram nunc auctiora: de poematis meis lentum omnino frigidumque est negotium, ut lucem ea haudquaquam visura esse appareat ante proximam aestatem. Ego interim missionem hujus muneris, quo nunc fungor, urgere ac flagitare non desino apud illos, quibus sacramentum dixi; cum otio & Musis tandem aliquando rediturus in gratiam, si licebit. Ne desiderii tamen hujus haecenus, siam com-

pos,

pos, impetremque id quod peto, in caussa sunt potissimum difficilia haec tempora, & bellum quod foederatorum Belgarum publicae rei a Britannis denuo ut atrox, sic insigniter injurium atque iniquum intentatur, magno conatu. Confido nihilominus ante Kalendas Apriles pedem hinc terrarum a me moveri posse. Quod si fit, bibliothecam meam tuorum nonnemini sum concrediturus, ne aut privatis praeda obtingat, aut aliis periculis exponatur, quibus eam eventus litis privatae, ni sit prosper ac secundus, objecerit haud difficulter. Hoc emigrationis consilium ut foveam constanter magna me perpellit a bonis artibus per hosce terrarum tractus solitudo, magna frivolarum occupationum moles, quae ab omni Musarum contubernio me excludit. Obdurassem tamen adversus haec incommoda animum illustribus exemplis, si praesentiae tuae bono, Domina, frui obtigisset. Nunc aulam in aula, regiam in regia nequicquam quaero ac circumspicio, pristinae felicitatis nimio plus memor. Quod reliquum est, deum Optimum Maximum ex intimo cordis penetrali veneror, ut & annum hunc instantem, & saeculi praesentis quod restat, inoffenso penitus pede & successu per omnia fortunato decurras, quod si fit, Augusta Princeps, mecum quoque optime arbitrabor agi, quicumque tandem casus res meas & fortunas est mansurus. Vale, Holmiae Suecorum CIOICLXIV. a. d. xxxi. Decembr. Gregor.

EPISTOLA DCCII.

NICOLAUS HEINSIUS

Christinae Alexandrae.

Romam.

INfrequentius jampridem rariusque, fateor, quam pietatis in te meae ratio postulabat, Majestatem tuam per litteras sum veneratus, quod itineri Suecico te accingi, alios ex aliis nuncios toto jam biennio tantum non continuos asseverare intelligebam. Quae tamen expectatio immane quantum nos haecenus frustratur ac ludit. Veniebat quidem nuper admodum in hanc urbem ex numero familiarium tuorum *Adamius*, qui id ipsum sperare nos juberet. Sed cum in eo is sit, ut tibi tuaeque familiae libertatem solidam paciscatur divini cultus, idque secundum ritus Romanos, rem non tantum plurima conjunctam cum difficultate, sed conclamata propemodum, ab illo urgeri, minimum abest, quin certo persuadear ut credam. Non quod procures Sueci cultu omni divino, qualem toto jam decennio profiteris, prorsus interdictum tibi cupiant, posse enim eas ceremonias, tui unius usus, clam abs te admitti, dum sacrificulus huic rei constituendus nec gente sit Italus, & veste saeculari, quam vocant, induatur, quoties prodibit in publicum. Sed quod cum Latina natione curiaque Romana rem sibi esse nequaquam volunt, cum id nomen, ut qui maxime aversentur, ac invisum habeant; Italosque non alia de causa in comitatu tuo futuros opinentur, quam ut arcana regni hujus explorent, plebemque ad res novas moliendas cohortentur. Unde & fit, ut censeant rem serio abs te non

Tom. V.

H h h h

agi,

agi, quae per hominem Italum, & quidem curiae Romanae non unas ob causas mancipatum, negotii quicquid hujus est expediri volueris. Sed & qui rebus tuis optimum in modum hinc terrarum student, arbitrantur tua non parum interesse, ut benevolentiam civium tuorum quam arctissime tibi concilies, si inter illos aetatem sis actura, cui rei moram haud dubiam certissimamque obicem fore Italos, familiaribus tuis adfiscendos. Ego autem, Domina, cui consiliorum tuorum compertum est prorsus nihil, sed qui observantia tamen integerima sanctissimaque quicquid ad utilitatem tuam commodumque potest referri, foveo, in rem tuam nonnihil hinc posse exoptem ardentem, idque eo magis, quod te praesentem in hoc septentrione tuo venerari praecipuis jam pridem habeo in votis. Facit profecto in tua desideria tuumque in propositum *Adamius*, quicquid ab homine fido industrioque sedulitatis accuratae expectari potuit. Sed an indolem hujus aulae habeat plane perspectam, dubitari merito fas est, praesertim cum de promissis ac verbis officiosis nonnullorum magnatum optime mihi visus sit sentire, quos in comperto est longe diversa sentire ab iis, quae apud illum prae se ferunt. Gentem Italicam multis beneficiis mihi esse cognitam, maximique, ut par est, a me fieri, haud te latet, Princeps Augusta: ut quae nunc a me proferuntur ab omni simultate odioque aliena sint habenda. Plura hujus argumenti subtexerem, ni metus iustissimus suboriretur, ne videri arguique possem negotiis haud meis me praeter ordinem immiscuisse. Ad meas igitur res ut aliquando deveniam, annus cum dimidio nunc agitur, quod discessum ex hoc terrarum tractu prece continua a Foederatorum Belgarum patribus efflagito. Taedet quippe sedem tanto jam tempore a me figi illic gentium, quas inter & populares meos simultates bello Danico exortae crudescunt magis ac magis de die in diem, cum alia omnia ante hoc quadriennium huc adventans de sopiendis controversiis mihi promississem: hinc operam meam rei publicae inutilem atque infructuosam esse facile intelligas. Agitantur quidem apud nos jamdudum consilia de revocando postliminio, atque instauranda utrimque veteri illa animorum concordia, eamque in rem orator extra ordinem a foederatis Belgis nuper huc missus est. Sed metuo ne studia gentis hujus Britannicas partes tam tenaciter jam sint amplexa; ut nostris foederibus vix reliquus sit locus, nisi Deus adsit e machina, & consilia haec a Gallis ocius turbentur. Urgenti mihi constanter discessum a patriae patribus est responsum, rebus id suis nequaquam expedire, praesertim ingruente a Britannis bello atrocissimo. Quod si jurgium omne inter Suecos & nostros ante Kalendas Januarias proximas non amovetur, hyemem hanc in septentrione hoc supremam mihi fore sum certus. Fortassis & ante tempestatem hibernam vasa a me colligentur. Bibliotheca in patriam tuto transferri haudquaquam potest, cum alias ob causas, tum quod a piratis maria assidue infestantur. Lubeca igitur erit proxima, praesertim si *Texera* curam eam haud gravabitur, quam *Silvercromio* ante hoc biennium demandaras. Eiusdem *Texerae* opera exemplar Claudiani mei in Augusta manus jam pridem pervenisse confido. Est enim per nescio quos id missum ab illo Romam, cum *Appelmannus* ad te con-

ten-

tendens equis citatis id onus a se esset amolitus. Si aberravit in via liber, aliud exemplar, Domina, tuis usibus, a me parabitur, una cum poematum libello, qui maxima jam ex parte typis est descriptus. Quod reliquum est, Deum Opt. Maximum totis animi sensibus veneror, ut te diu superstitem & incolumem velit. Holmiae Suecorum cicicclxv. a. d. xxv. August. Gregor.

EPISTOLA DCCIII.

NICOLAUS HEINSIUS

Christinae Alexandrae.

Hamburgum.

Longe jucundissimus profecto gratissimusque mihi accidit de adventu in Germaniam tuo nuntius; atque totum me perfudit voluptate, ut majori non possit. Nec defuissem haecenus debitae apud te gratulationi, nisi rumor constantissimus asseverasset mox fore, ut post datos quieti corporis apud Hamburgenses dies admodum paucos, recta confestim ad septentrionem hunc tuum viam molireris. Qua spe atque expectatione etsi necdum plane dejectus, vix tempero tamen mihi ab officio salutationis, ut si quid in rem Augustam te absente conferri ab hoc homine, sive id sit hic terrarum, sive alibi, potest, certassis, mandati tui majestatem ab alio nemine religiosius atque sanctius observandam atque custodiendam fore. Propensissimum hoc & minime fucatum pietatis in te meae studium simulationi locum haudquaquam relinquit, unde fit interdum, ut apertius liberiusque, quam fortasse par sit, remota omni circuituum ambage, me diffundam, Domina, ac consilia non consultus audacter depromam, dum verba apud te facio. Tale quid non ita nuper obveniebat, dum de deferenda Roma sententiam meam haud tego: cui libertati atque confidentiae ut pro cetera ingenti tui bonitate ne quid succenseas, per augustum Regiae clementiae Genium, tot argumentis perspectum mihi toties ac cognitum, te veneror atque obtestor. Claudianum meum, annus jam atque alter aguntur, cum ad te misi. Nunc quod mittatur munusculi nil est in promptu, praeter poemata mea recens juris publici facta. Quae tamen a me ipso accipies, si propediem huc es ventura; sin Hamburgi substitutione per autumnum, *Langermannus* curabit, ut eorum tibi fiat copia. Inter praesentissimas spississimasque publicae rei turbas versanti neque id opus exasciari satis potuit, nec de aliis cogitare datur lucubrationibus, quae caeteroquin lucem apud me praestolabantur jam pridem. Vale, Domina, & me benevolentiae Regalis aura dignari ac fovere in posterum perge. Holmiae Suecorum cicicclxvi. pridie Kalend. Sextil. Gregor.

EPISTOLA DCCIV.

NICOLAUS HEINSIUS

Christinae Alexandrae.

Augustum Majestatis tuae genium incredibili quadam perfusum comitate et si jam ante propitium saepe numero expertus, equidem nuper admodum sum vehementer admiratus. Non enim contenta facundum in modum laudibus efferre quotidiana illa officia, quae *D. Isbrandius* in *D. Adamium* aetate proxime decursa conferebat, me quoque gloriae hujus in partem vocare voluisti. Modica ille, tenuia ego cum revera praestiterimus, praestitissimus haud dubie majora uterque, si illic terrarum aetas ageretur a nobis, ubi gratia & auctoritate plus polleremus. Conflictati quippe cum temporum difficillimorum angustiis, aliisque incommodis compluribus objecti, nil in medium valimus conferre, praeter umbram exilem summae illius observantiae, quam majestati vestrae, ceu tributum debemus, quotquot aeternitati virtutis atque gloriae per posteros iturae rite diximus sacramentum. Haudquaquam minora, quam ego, in rem majestatis tuae vult *D. Isbrandius*, & potest majora, a cujus singulari ac eximio candore nil non polliceri & sperare mihi posse videor. Nec tamen exploratum satis habeo, quidnam & a quo oblatum sit, quod oblique designas, Domina. Id tamen scio studium nostrum, quod tibi consecravimus, nullis mensurae angustiis, nullo termino includi aut circumscribi. Si explicatius paullo mecum agere non eris dedignata, quod velim, quicquid occultendae rei concreditur mihi, & summa silentii religione involvam, uti par est, ne admoto quidem in consortium *D. Isbrandio*, aliis multo minus, & pari fortassis obsequii ac industriae fide indagare potero, quod rebus tuis sit conducturum. Discessum propediem cum ad suos meditetur is ipse *D. Isbrandius*, etsi susceptae legationis irritus, hoc uno tamen me felicius habendus, quod Majestatem vestram in via ante exitum anni hujus venerabitur, quo votis omnibus jampridem adspirat. Me quod attinet, quando pro summa benignitate tua clientis antiqui res ad te spectare, Domina, arbitraris, quanto tempore hinc terrarum porro sim substitutus haud scio. re tamen publica juxta ac privata parum procedentibus ex sententia nostra, vix futurum est, ut illic consenescam, ubi otium literarium ac animi tranquillitatem, tanto opere Philosophicis praeceptis convenientem nequicquam spero. Holmiae Suecorum Anno MDCLXVI. a. d. Octob. Gregor. IX.

EPISTOLA DCCV.

NICOLAUS HEINSIUS

Christinae Alexandrae.

Merita jampridem gratiarum actione defungi apud Majestatem tuam equidem debebam, pro nupero ejus ingenti beneficio, cum prospici ac subveniri rebus meis opportune admodum pro insigni tua clementia volueris. Nec defuissem partibus hîc meis, nisi intervenisset contumacem in modum valetudo adversa, meque a proposito haecenus avocasset. Dum inter hasce jactor angustias, libenter intellexi factam mihi vix tandem copiam atque facultatem, quam frustra saepenumero flagitaram Patriae adeundae, a foederati Belgii proceribus. In eo igitur nunc sum, ut viae quamprimum me permittam veneraturus, ut auguror, Majestatem vestram propediem coram atque hoc etiam nomine, quantum in me erit, festinaturus. Cum haec tanta felicitas longe pluris a me fiat, quam natalis soli conspectus. Quod reliquum est, Deum Opt. Max. toto animo veneror, ut Majestati vestrae & hunc & proxime subsequuturos complures annos fluere felicissime sinat. Holmiae Suecorum MDCLXVII. a. d. VIII. Januar. Gregor.

EPISTOLA DCCVI.

NICOLAUS HEINSIUS

*Christinae Alexandrae.**Romae.*

EX quo in hanc aulam sum regressus, anno proxime decurso, nihil prius habui aut antiquius, quam res meas promovere illius commendationis beneficio, quam pro singulari clementia ad praefectum redditibus tuis administrandis mihi perferendam concredebas, cum Hamburgi in transcurso Majestatem vestram venerabar praesens. Sed effici aut nihil omnino, aut certe perparum haecenus potuit hoc in negotio. Nunc vero cum compertum habeam, non sine successu in eo occupari *D. Gustavum Kurck*, Regni Suecici Senatorem, ut illos, Domina, qui in aere sunt tuo, debitores, ad expediendum hoc ex nexu nomen tuum invitet aut constringat, atque hasce potissimum ob causas, ditionis tuae tractum omnem circumeat mira sedulitate & industria, nec vim pecuniae contemnendam hinc inde jam coegisse dicatur, prece supplici Majestatem tuam enixissime convenio, atque obsecro, det in mandatis jam nominato *D. Gustavo Kurck* ut illo ex aere quamprimum satisfieri mihi curet. Id enim si abs te impetraro, pariturum mandato regio Illustrem virum confidamus est necesse. Nam & frater ejus *D. Canutus* rebus meis favet impense, & Rex Rutgeriani debiti solutionem jam nunc suis injunxit, quo mihi ani-

H h h h 3

mus.

mus addatur ad causae suae jus omne apud Moschos, ad quos a Foederati Belgii Patribus ablegor, pro virili tuendum. Habes exemplum, Domina, longe nobilissimum, quod aemuleris ac sequaris, habes occasionem, qua me demeraris totum, penitus tibi addicas, praesentissimam, & qua irritum in modum elapsa nullam in posterum aequae opportunam detur nobis sperare. Poteram commendatitias ad institutum hoc ornandum facili negotio abs Rege nunc obtinuisse, quiscum preces hae nostrae tuae Majestati sisterentur. Sed ipsam temet plus velle rebus meis promovendis collatum, quam aliunde possit sperari, sum mehercules certissimus. Commendatus per te, Domina, tuae aequitatis tuaeque clementiae, in quibus patrocinii spes tota (utinam non vana!) nobis est sita, rem ex voto confectam mox habebo, cui unicum a mora & procrastinatione periculum incumbit. Collectam quippe ex debitis, quae jam designavi, pecuniam majori ex parte aliis jam cessisse audio. Quibus cum egregie beneficam tete praestes, permitte, quaeso, ut & ego ausim benignitatis tantae genium utcumque mihi propitium augurari, quem pro ingenii mei mediocritate & captu, ceu numen praesentissimum adoravi, atque adorabo semper. Stephanum Byzantium *Holstenii*, ni conditionem aspernaris, Princeps Augusta, *Elzévirius* typis suis, cum per te licebit, juris publici faciendum offert, ac spondet. Ego quod in me est, secunda quaevis Augusto capiti precatus, faciam supplicationis finem, hoc in omne, Sere- nissima ac potentissima Princeps. Holmiae Suecorum iv. Kalendas Sextilis CIOIOCLXIX.

EPISTOLA DCCVII.

NICOLAUS HEINSIUS

Christinae Alexandrae.

Roman.

INvitus fateor, ut qui maxime, sed sic tamen dura atque imperiosa necessi-
tatis adductus lege, quae plerumque transversos nos abripit, utcumque vi
tota refragantes, Majestatem nunc tuam tertium repetitis precibus humilli-
mum prostratus in modum convenio. Vota, ut auguror, melioribus suscep-
turus tandem auspiciis, quam adhuc a me factum est. Summa igitur in hoc
supplicationis consistit, ne quid gravius ducas, aut a curis tuis omnino alie-
num, Princeps Augusta, Domino *Gustavo Kurkio*, in mandatis quamprimum
dare, ut quae toties sperare sum jussus, persolvantur aliquando, post irritos &
supervacuos tot annorum decursus. Ita nimirum fiet, ne dejectus animo om-
ni ac fractus ad bonarum artium cultum propagandum accedam, cui ego inno-
centissimo studiorum generi aetatis prostrema ac vitae hujusce, quod mihi
pauillum reliquum est, dedicandum destinasse, atque hinc per valetudinem
publicis occupationibus minus munusque respondentem, quodammodo impelli
non semel jam ante sum professus. Quod si non dedignaris tecum reputare,
Domina, quantum intercapedinis decurrat jam ab illo tempore, quo regnum
flore-

florentissimum abdicasti, plus aequo non esse festinatam spem nostram praecipitemque, tute omnium optime ultro agnosces, nisi si aequitatem tuam parum habeo perspectam. Ad haec si vacabit tibi meminisse, quoties & quam sollemnibus verborum modo arctissimo, promissi tui sacrosancti religio me tibi teneat jamdudum adstrictum, hinc quoque plurimum fiducia rebus meis debere suboriri non difficulter intelliges. Cum Reges prae ceteris mortalium hanc a Deo optimo maximo laudem mutuuntur quodammodo, propriumque sibi vindicent; ac coelo quam proxime jungantur ea potissimum gloria, ut nihil omnino polliceantur, quod praestari solitum atque exhiberi, oraculi in vicem, non oporteat. Atque ego sic existimo, actum omnino ac conclamatum de divino cultu in terris fore, si quam in deo indulgentiam desideremus, contumaciusque abnuentem votis nostris, praesertim haud improbis aut invidiosis, experiamur. Non pauca mehercules in causam meam conferri huc possent, ac deberent quoque; ac primo quidem, quanto ego pietatis ardore instinctus utilitatem tuam semper meis posthabuerim commodis: quam profusus, Princeps maxima, fuerim in laudibus tuis decantandis, sic ut tuorum nemo haud umquam magis: ut florem aetatis ferme omnem, certe praecipuam, tuis devotam imperiis mihimet ipsi meisque in Patria stabiliendis fortunis interceperim atque iverim ereptum, dum tibi uni me totum trado: quam parum praemiorum abs te tulerim, quam parce flagitarim. Haec inquam, atque hisce haud dissimilia plura tibi me conciliasse quam proxime, ac res meas e tuo nexu jamdudum expeditivisse poterant, si quid vel minimae mihi facundiae foret in promptu. Sed quidquid fuit, in occultos gemitus, timidumque penetrare pectoris carpentes morsu atrocissimo & lacerantes, est conversum, quos utinam caperet, atque ob oculos poneret haec charta! Videres profecto tui monumenta, Princeps Augusta, sed in quibus temet ipsam non agnosceres: illam, inquam Christinam, patrocinio Musarum praesentissimo atque incomparabili adeo olim in universa rerum natura conspectam, adeo eminentem. Fac igitur rem Majestate tua longe omnium dignissimam. Sin minus, liceat mihi saltem intercedere apud te, pro dignitate urbis illius, in qua nemo pedem fixit haecenus, quin ex literarum amante, fieret earumdem multo amantissimus; ut quidquid tuus ille genius, tam benignus olim, tam exporrectus, mihi non adjudicabit, id urbis aeternae genio me debere integrum relinquatur. Holmiae Suecorum III. Maji. MDCLXXI.

EPISTOLA DCCVIII.

NICOLAUS HEINSIUS

*Christinae Alexandrae.**Romam.*

Fluctuassem me animo immane quantum aliquamdiu fateor, silentione pergerem involvere spes infelicissimas, an tuam ego Majestatem denuo interpellandam mihi proponerem, ante nostram ex Suecana aula emigrationem, toties

ties re eadem sine successu tentata: cujus tam insignitae factorum injuria, tantique infortunii necesse mihi est ac erit nimium meminisse, dum inter mortales numerabor. Nam sive nil omnino precum istarum, quas chartae consignatas ter quaterve, ex Ruthenis redux, iteraram, in Augustas devenisset manus, par eventus nunc quoque rebus meis videbatur metuendus, sive usas obsequente fortuna, atque in optatum portum Sacratissimi, quo destinabantur, conspectus perlatus constaret, quo tandem ego fretus praesidio, qua munitus fiducia pollicerer mihi aut praesagirem meliora, post repulsam tam evidentem? Revocabat tamen ab hac me cogitatione identidem, ac nubem inauspicatam huic animo detergebat jucunda oppido temporis antea acti memoria, quo supplicationibus nostris ac votis aura longe mitior benigniorque aspirabat in Lare Augusto, ubi perspicui atque explorari contigisset in paucis, si gloriari apud te licet, Domina, exporrectam illam mirificum in modum obviamque Majestatis tuae indulgentiam, pari cum aequitate conjunctam, ac splendidissimo sui fulgore omnium animos perstringentem jamdudum: atque propter quam longissime habendas esse causas, per quas fieret, ut perpetuo occludendum precibus submissis Regiae bonitatis penetrabile sacrosanctum fore nequicquam ominarer. Neque enim eo impudentiae importunitatisve me prolapsus credas umquam, ut quicquid superesset debiti, id ego omne, nullo temporis intercedente spatio, confestim esse expungendum contenderem odiose flagitareque: sed vero integrum a me Majestati vestrae relictum omnino, ut ne quid ex isto aere plus minusve annumeraretur annum mihi, quam commodis tuis expedire censes atque arbitrareris ipsa: nec subverendum mehercules, ut meo me indicio proderem ac manifestarem, aut rei successum inter illos ambitiosius jactarem, voto jam potitus, si qui fortassis superessent reliqui ex creditoribus temporum meorum antiquioribus. Atque idcirco sum ausus, Domina, negotium hoc integrare denuo, compellatione nec immodesta, nec improbis votis adhibitis, sed totum me clementissimo Majestatis Vestrae arbitrio permittens: nilque differendum hujusce rei mea supinitate opinatus, quod valetudo senectam maturet mihi ante diem, ac tantum non praecipitaret accelerato decursu. Habeo autem persuasissimum, Augusta, ut credam meae non magis utilitati id dari, quam tuis laudibus, si enitar non abire ex hac vita, nisi subductis tecum rationibus jam ante: unde fiat, ut invidiae minimum mea ex morte ad te sit redundaturum, dum nec inimici exprobrant ac laetantur, tanto tempore ad aures surdas cantillatum nostris Musis, nec amici ingemiscunt, ac complorant. Obtulit mihi, dum in aula versabar Suecica, operam comiter suam non semel *Gustavus Kurckius*, asseveravitque inveniri abs sese viam posse gratificandi mihi haudquaquam difficilem, si jussisses. Sine mandato enim tuo confieri nil posse. Testati sunt & alii ex Procerum numero se causae meae favere, &, si vellem, non defuturam mihi Regis intercessionem. Malebam autem maloque per *Kurckium* rem omnem confici, quam per alios quoscunque. Quid enim? an prostrernar supplex ad pedes illorum, illos in optima causa pretio immani nundinabor ac conciliabo mihi, quos in comitatu tuo habes, Augusta, aut
in

in clientela, ut gratiosos apud te, ita bonarum artium expertes? a quibus proinde sperare non possum, ut patrocinentur mihi, nisi ad hoc ipsum redimantur. Sim enim rerum omnium imperitus ipse, si ab litterarum rudibus viris gratuitae quid benignitatis expectem. Apud alios Reges, artium bonarum cognitione minus instructos, obdurarem adversus hanc injuriam animum, si cum iis mihi res esset: apud te, Principem longe litteratissimam, Domina, litterarum amantibus praesidium ab illiteratis petendum, id vero conjunctum sit, non dicam cum meo, sed cum extremo ipsarum pudore, ultimaque cum contumelia: quibus hoc praerogativae antiquitus debetur, ut ab omni dedecorum emptione pretiosa praestentur immunes. Nec video qua fronte gratiam sim captaturus hominum novorum, ut mihi veteri clienti apud te adsint: cui uni omnia mea me debere nec nolim ego, & sit acquitati consentaneum. Si exhortationibus pro me agendum foret aut exemplorum auctoritate, offerebat sese Rex Christianissimus, nec deerant Principes alii, qui quamquam aetate nostra litterarum studia leviter delibarent ipsi, in iis tamen provchendis atque ornandis nulli parcent impensae. Nec parum est, quod illis privatim a me debeatur. Quibus ut tu prima praeivisti ad hanc tantam gloriam, nominisque comparandam immortalitatem, sic unice cavendum tibi intelligis, ne tuismet te exemplis superasse hi gloriari aliquando possint, aut amore artium bonarum post se reliquisse, quam eruditionis intellectu ac Musarum cognitione haudquaquam assequantur. Quod si talem te praestiteris mihi, quales tui ordinis, Augusta, non unos experior, quorum laudibus tamen commodisque nihil studii aut publice aut privatim a me haecenus est datum, benignissime me haberi opinabor ac indulgentissime ab illa, quam ego cultu plus quam humano unam prae caeteris semper sum veneratus, ac veneraturus in posterum. Vale, Princeps Augusta. Hagae Comitum Anno MDCLXXII. Kalendas Aprilis Gregor.

EPISTOLA DCCIX.

NICOLAUS HEINSIUS

Christinae Alexandrae.

Romam.

CUM e propinquis meis *Conradus Ruyschius*, praestanti apud Batavos loco oriundus, excitatus studio peregrinationis Romam contenderet, ratus sum non esse negligendam mihi tam opportunam occasionem, qua Majestatem vestram liceret pro mea pietate humillimum in modum venerari. Invitabat me praeterea ad hoc officium novus imminentis anni decursus, quem propediem sumus auspicaturi; utinam omni ex parte Majestati vestrae tam salutarem ac fortunatum, quam votis meis praesumitur ac spondetur. Neque enim coërcet me tenuitas mea, utcunque constitutum inter minimos cultores tantae Principis, quo minus pro salute atque incolumitate Sacratissimi capitis Deum Opt. Max. frequentissimus ausim convenire. Cu-

Tom. V.

Iiiii

jus

ius religionis nexu ut teneri me plurimis de causis perpulchre intelligo, mancipatus obstrictusque jam olim Regiae benignitati praecipuum in modum, ita beneficii accepti perparcus sum ostentator, quod nec rebus adsequi, nec aequare verbis integrum sit mihi. Ita fit, Princeps Augusta, ut cum conferre nil omnino possim ad haec sacra pro rei dignitate, solo litem silentio, & honore sancto tuae Majestatis defixus obstupescam. Evidentius argumentum vix est, ut a me proferri queat, unde fiat manifestum, esse me & fore semper submissae mentis devotione omni mancipio devinctum. Hagae Comitum MDCLXXIV. XII. Decemb.

EPISTOLA DCCX.

NICOLAUS HEINSIUS

*Christinae Alexandrae.**Romam.*

Princeps Maxima. Res meas saepe numero Majestati tuae commendavi. Absens, temporumque horum statum vere calamitosum, ac duram necessitatis legem, quae me circumstaret, per litteras sum testatus: Eram nunc & in eo, ut memet ipse conferrem Romam, promoturum rem eandem coram Majestate tua pro virili, ne quid intentatum viderer reliquisse. Sed habita valetudinis per maximas itineris longinqui & hiberni difficultates dejectae ratione, judicarunt Medici, vix fore, ut vivus eluctarer. Misi igitur sororis meae filium hac de causa, ut is operam hinc mihi praestaret vicariam ac succenturiaretur. Quem si Majestas Vestra supplicem non rejecerit, omne votorum punctum videbor tulisse. Hagae Comitum MDCLXXV. XXVIII. Novemb.

EPISTOLA DCCXI.

NICOLAUS HEINSIUS

*Christinae Alexandrae.**Romam.*

Dolina. Cum anni decurrentis exitum propediem finis consecuturi, pietatis meae ratio videbatur flagitare quodammodo, ne imminentis anni auspicia Majestati tuae adfulgerent sine meis appreciationibus. Quapropter Deum Opt. Max. toto animi ardore supplex veneror, ut votis publicis clementer subscribat, teque incolumem ac valentem diutissime conservet nobis, rebusque prosperis ac laetis omni ex parte cumulatam abunde ut velit. Nulla annorum lege divinum numen circumscribimus, nullo aetatis termino metimur aut includimus vota nostra. Tantum ut pro meritis virtutibusque extendat annos Majestati tuae annumeretque, Deo supplicamus. Ad enim si obtinetur, quin immortalem terram sit possessura nulli du-

dubitamus. Vale, Princeps maxima, & tuorum ista pietate frui aeternum. Hagae ciōiōclxxv. 18. Decemb.

EPISTOLA DCCXII.

NICOLAUS HEINSIUS

*Christinae Alexandrae.**Romam.*

Significavit mihi sororis meae filius, quem in urbem non ita nuper miseram, clementer omnino benigniterque, sic ut magis haud potuerit, sese a Majestate vestra fuisse exceptum. Quae quam grato animo a me agnoscantur, re ipsa, si detur opportunitas, quam verbis, testari aliquando malim. Nihil certe majori voluptate me perfuderit, quam si obsequia mea humillimamque observantiam Majestati vestrae hinc terrarum, ubi nunc sedem fixi, detur approbare. Caeterum quod idem sororis meae filius testatum mihi faciat, siue maligna curiositate quorundam, siue fortuna conatibus suis meisque obnitente, ne illas quidem litteras, quibus ego anni ineuntis auspiciis pro mea pietate vestrae Majestati fortunatum proxime apprecabar, inviolatas ac illaesas permanuisse, priusquam traderentur, facile agnovi, rebus adversis me solennem in modum constanter premi. Quapropter justum est, relicta urbe, quanta poterit fieri acceleratione, ad nos referre pedem. Quod ut cum bona Majestatis vestrae venia ab illo fore perficiendum spero, ita testor, nihil apud me esse aut prius aut antiquius illo cultu, quem Majestati vestrae semel dedicavi. Hagae ciōiōcxxvi. xix. Februar.

EPISTOLA DCCXIII.

NICOLAUS HEINSIUS

*Christinae Alexandrae.**Romam.*

JAM pridem ex urbe ad nos reversus sororis meae filius *Robertus Goesius* verbis amplissimis apud meos suosque omnes praedicavit, quam comiter quamque benignum in modum a Majestate vestra non semel exceptus esset: quo honore nihil majus equidem ambitiosiusque sperari potuit a nobis. Illud unum me invito nuntiabat, litteras meas, quibus pro caetera pietate exortum novi anni auspiciis Majestati tuae eram apprecatus, jamjam regiis manibus ex mandato meo offerendas, aulicorum nonnemi sic exigenti se exhibuisse, quo faciliorem accessum impetraret. ab illo autem litteras easdem non sine obtestatione sua ac indignatione resignatas ac perlectas fuisse, dum titulos fronti litterarum non rite adscriptos causatur, quasi Majestas tua tot tantisque animi dotibus conspecta non extulisset sese supra universum laudis ac titulorum nomen. Sed neque ex illo ullis sese artibus ad regium conspectum potuisse admitti, nisi religiose pollicitus, de resignatis litteris mentionem sese

nullam facturum apud Majestatem vestram: quod unum potuerit, de re tota se apud aulicorum complures esse conquestum. Ipsam vero epistolam secum ad me retulit, narrationis suae testem. Ita annus atque alter effluxerunt, dum tacitus mecum exoptulo identidem de hac fortunae inter alias iniquitate. Quapropter imperato mihi post id silentio obdurarem nunc quoque adversus haec tam improspera animum, nisi superveniens nuper admodum, idque praeter spem omnem, Majestatis vestrae epistola, latum mihi aperiret campum rescribendi, simulque agendi causam meam coram judice omnium moderatissima, de cujus aequitate plurimum mihi promitto, quamquam falsae narrationis malis artibus aures ejus tentatas intelligo perquam invitus. Nec vero defuissem tanto tempore rescribendi partibus, nisi Hagam Comitum missa Majestatis tuae epistola, cum alibi locorum essem quaerendus, neglecta aliquamdiu ac dilata illic temere jacuisset. Accessit altera dilatae scriptionis causa valetudo, quae extremum vitae meae curriculum in ipsam metam offendentem continuo impulsu adfligit gravissimum in modum. Sed ad rem ipsam deveniatur praestat. Hunc igitur, qui confidenter fatis in aulam Majestatis tuae nuper obrepfit, nunquam ego pro legitimo filio agnovi: nec poteram sane, nisi oblitus mei matrem quoque ejus, omnium quotquot sol vidit unquam, facinarum propudiosissimam, pro uxore agnoscerem. In eo quoque fecit haud levem mihi injuriam, cum gratia mea ac adfectu fraudatum se fingit, quod ejurato religionis, cui innutritus erat, sacramento ad Romana castra transierit: cum sancte tester, nihil omnino ejus rei vel per dubios rumores mihi compertum fuisse, nisi jam perlata hujus negotii nuntia Majestatis tuae epistola. Quin aestate proxima quicquid alimenti a me debebatur, jam Lutetia digressus accepit. Quare, qui Majestati vestrae non erubuit tam impudenter hinc dare verba, quam in reliquis non sit credendum, quae haud dubie non pauca praeter hoc comminiscitur, facile, ut opinor, apparet. Sed de matre non nihil praemittendum est, priusquam ad hunc bonum virum deveniamus. Dam-natus sum fateor, ut eam ducerem uxorem. Sed absens damnatus, & quidem propter rempublicam absens, cum frustra saepenumero petiissem, ut domum reverti mihi liceret, ad causam meam agendam, quando parum proficiebant tot testes mea ex parte prolati, qui adversariam meam uno omnes ore impudicitiae convincebant. Haec prima judicis iniquitas fuit. Deinde quod omnis matrimonii imaginarii histrionia in vici Hagiensis curia a pagano Magistratu peracta est, procuratore adversariae meae partes sustinente, inaudito apud nos facinore, cum in ecclesia id fieri debuisset. In cujus acta cum referendum curassem, me invito cum maxime ac nolente hos ludos dari, Theologi Hagani, ut prudentes viros decebat, judici ad ecclesiam maritales caeremonias remittenti negaverunt, se sine consensu meo quicquam fore facturos, cum auctoritate juris divini prohiberi se asseverarent. Requirit enim mutuum in matrimoniis assensum, tam divinis quam humanis legibus. Jam a civili aut saeculari Magistratu matrimoniale sacramentum administrari, quam a caeremoniis Romanis aversum sit, una omnium optime intel-
ligit

ligit Majestas vestra. Certe facti sine exemplo violenti novitas omnium apud nos indignationem concitavit, cujus & ipsum judicem pudere coepit, ex quo prolatae sunt a me epistolae complures, quas interceperam, per hanc Venerem exaratae ad Adonidem e suis nonneminem, adeo obscenae ac spurcae, ut justissimum lupanari cuivis ruborem incutiant. Adeo enim moris antiqui non fuit immemor haec Penelope, post pertractum in partes suas judicem, ac hominem plurimis flagitiis homicidiisque coopertum, qui alias inter caedes Baronem Gallum adolescentulum adhuc & fere puerum obtruncavit Hagae Comitum, in domum suam finumque abdiderit: ac tandem in Sueciam e Batavia nostra abduxerit. Gallum is se gente falso ferebat, ac *Johannem de la Bafide* vocitari, cum patriam haberet Dantiscum, ac nomen illi est *Cbristiano Bertsmanno*. Hunc maritum esse suum prae se tulit toto itinere, Patrem quoque suum hunc appellavit noster. Convenientissimum nempe maternae pudicitiae fuit, ut filio pater inter latrones esset quaerendus & qui, ne matris libidini obstaret, in aliud se noctu conclave dormitum recepit, relictis in uno eodemque cubiculo duobus amantibus. De his aliisque, cum per indubitata rerum testimonia judici constitit, de dissolvendo matrimonio operam suam mihi obtulerunt, sed quod urgerem ego sententiam, omnem tanquam inique latam, esse abrogandam, id sine certissima sua ignominia fieri haud posse contendentes, rem hactenus tenuere suspensam. Nunc de filio. Hic cum materni dedecoris jam a teneris domesticus fuisset spectator, ad ejus ingenitum sese prorsus ex illo accommodavit. Liceat mihi apud Majestatem tuam dissimulare, quae illi adhuc incomperta sunt: & quae mihi tantum maeroris attulerunt, ut ab omni mortalium consortio maluerim subduci, meque in hunc angulum humanis congressibus ferme inaccessum recipere, quam tot ac tanta, tam indigna nostro nomine de illo alia ex aliis, quae narrabantur, audire. Evenit ergo ante hoc biennium, quod eventurum diu praevidimus, ut dum nocturnis grassationibus ex solito indulget, obvium hominem inermem armatus ipse obtruncavit. Adeo curae illi fuit numeris omnibus se dignum praestare latrone illo, quem parentem in itinere Suecico adsciverat. Habebat tum duos comites, fateor. Sed qui atrocis facti invidiam omnem edito in vulgum libello prolatisque testibus a se amoliuntur, atque in illum unum convertunt, etiam ex ipsius liquida confessione. Profugus itaque ac proscriptus desperatoque in patria reditu, cum in aula Gallicana fortunae suae praesidium nonnihil apud illustrissimum *Colbertum* aliosque, qui hominem, qualis esset, intelligebant, nequicquam quaesivisset, id reliquum rebus suis unum habuit, ut Majestatis tuae benevolentiam captaret. Caeterum latrocinii hujus, ob quod praecipue mihi privatim invisus est, & merito, adeo poenitentia non ducitur, ut post perpetratum id facinus mihi per litteras parricidium interminari sit ausus, nisi matrem suam nutriam ac sustentem, quod judex, quem in caeteris iniquissimum sum expertus, mihi non est ausus oneris imponere. Quid quod ultimis adhuc litteris in urbe exaratis pari confidentia minatur, nisi subministrentur sibi a me porro ad victum necessaria, se curaturum, ne quod aeris mei apud

Majestatem tuam restat, unquam persolvatur. Si per latrocinia & vitam in caeteris tam nefariam, ad veram rerum divinarum cognitionem pervenitur, caecutire me non poenitet. Caeterum, cum fiscus, qui illum proscripsit, manum non ita nuper injecerit alimentis, quae cum in usum a me praestari solebant, publicae auctoritati quæ me exhibere possim inobsequentem, quae est aequitas Majestatis vestrae, satis reor apparere. Habes causas, Domina, nisi mihi blandior, sufficientes, cur pro filio legitimo hunc mali corvi, quod ajunt; malum ovum non agnoscam, habet enim, quod non matri tantum suae, sed sibimet quoque ipsi se debere hîc intelligat. Vidisti pro me stantes Ecclesiae Belgicae, vidisti stantes Romanae, cum jure universo gentium ac publici moris, leges. Si culpae nihil admisisset, quæ ad aram Regiae Clementiae confugit? Ego autem in caeteris, quae salva existimatione mea confieri poterunt, semper ostendam, nihil esse in universa rerum natura magis devotum, addictumque tibi, & de quo statuere certiore in modum pro arbitrio possis, quam, Princeps Augusta, de Majestati tuae omni nexu mancipato. Vianae Decemb. MDCLXXIX.



NICOLAUS HEINSIUS

J. Fr. Gronovio.

Hagae.

Has epistolas paucas, inter abjectas schedas nuper repertas, hic subicere placuit: eas lector ad suum locum referre poterit. Haec inferenda est tom. III, pag. 50. post Epist. XLV.

Heros clarissime. Ut videas quam curae mihi sint res tuae, *Schragius* hodie mihi adfuit, qui cum de fasciculo Norimbergensi mentionem fecisset, miratus sum nondum tibi redditum esse. Statim itaque D. *Tatium* accessi, is ad *Elzevirios* me ablegavit, quibus tradidisse se affirmabas. Custodem Bibliopolii eo ipso momento conveni. Is respondit, *Bonaventuram* hodie mane Hagam profectum esse, nec dubitare, quin una secum ad vos transtulisset. Nunc itaque moneo, apud ipsos inquiras, tarditatem enim eorum in ejusmodi rebus curandis probe nosti. De nobili Gallo iterum ne obliviscaris rogo, Nam brevi proficiscetur. De loco Ovidiano judicium tuum expecto. Alter, isti quem adjunxeram, satis firmus est, nihilque in eo mutandum; quod ante, commentatorum ineptiis deceptus, fuspicatus eram. Nunc, cum locum ipsum accuratius perlego, praecipitantiam meam accusare cogor, qui loco ne quidem inspecto, aliorum somniis fidem adhibui. In Persiano loco adhuc perfevero; cui & haec adjungo. Sat. 6. statim ab initio,

*Mox juvenes agitare jocos, & pollice honesto
Egregios luisse senes — — —*

MSSus optimae notae habet,

Egregius luisse senex.

Paulo post,

*Curvus ob id minui senio, aut caenare sine uncto,
Et signum in vapida naso tetigisse lagena*

MSSus hunc interfert versum;

*Caenare sine uncto
Doctus, & ad calicem vigilanti stertere naso,
Et signum &c.*

quem versum alibi me legisse memini, ut fortassis ex commentariis in textum translatus sit. Plura non possum; nugari enim debemus. *Boxhornius* vehementer aegrotat, laborat eo morbo, quem nos vocamus, *Rootjonck*. De *Fabricio*, quae *Pilius* attulit, gratissima fuerunt. Leidae CIOICXXXVIII. 18. Maji.

EPI-

NICOLAUS HEINSIUS

J. Fr. Gronovio.

Hagam.

Inferenda p. 64. post Ep. LIX.

SCripseram hodie luculentas ad te; sed quae *Andreae* nostri securitas est, snautam jam profectum frustra quaesivit. Interea *Casauboni* Epistolae comparent. Quare illis alteras has addo, sed breviores eas seraque scriptas vespera. Pro epistolis *Casauboni* quantum tibi debeam, quot sunt quotque fuere mortaliū venustissime, dici non potest. Et quia dici non potest, praestat facere, quam nihil dicere. Gratum interim me futurum spondeo. Fasciculum hunc quamprimum fieri poterit ad D. de *Thienhoven* curabis, meque commendabis. Formulas non addo, ne te hominem fori consultum docere videar. Epistolas *Casauboni* primo impetu devorabo; hodie mihi vix videre licuit, ea fuit parentis mei curiositas, de humanitate domini *Riveti* quidvis sibi pollicetur, & fortasse nimis magna. Sed hoc inter nos. Interim immortales ago tibi gratias, qui in tantum me beasti, acturus plures, ubi reapse id licuerit. Verbis enim meis nolo quicquam tribuas. Domino de *Thienhoven* an grata fuerit opera mea fac sciam. Doleo certe hunc tam exiguum fasciculum tam magno a nobis emptum pretio. D. *Merano* hunc Catalogum Leidenfis Bibliothecae trades, & me. Haec scribebam multa vespera, praeclare satis ab amicis exceptus. Vale Raptissime. CIOIOCCXXVI. XVII. Oct.

NICOLAUS HEINSIUS

J. Fr. Gronovio.

Inferenda post Epist. LXIII. pag. 70.

Heros amicissime. Haecenus impatienter tuas expecto, frustra tamen. Parce quaeso odiosus esse, nisi enecare mortalem hunc tibi visum. Nunc cum aliud ad manus non esset, orationem hanc manibus *Petri Cunaei*, hominis, dum vixit, tui amantissimi consecratam, mittimus. *Fabricius* noster gemitus suos adjunxit, ut vides. Herois nostri, scis quem putem, Lacrymae ex secunda nunc prodire editione. Primam si habes, inter thesauros tuos reponatur. Eam enim pro genuina amicus noster agnoscit. *Caeli induperator* & *Jupiter Infernalis* a theologorum supercilio miserrime vapularunt. Ita ut quicquid hoc esset nugarum, totum delere fuerit coactus, nisi primum inter Crocodili Lacrymas, quas *Voetius*, nisi fallor, nuper edidit, locum vindicare sibi maluisset. Veniet post annos fortassis centum Antiquarius aliquis, qui Epigramma hoc Ennio vel Andronico vindicabit. Et profecto audiui magno cum applausu a *Delmanhorstio* fuisse id approbatum. Malim tacere potuisset, he-

heros disertus. Sed ne ego quoque illo carere morbo me confiteor. De reliquis iudicium tuum exspecto. *Fabricii* nostri divina Poëmatia jam, scio, accepisti; hoc demum est non nugari, tam Latina, tam polita omnia. Gratulor mihi immortalitatem, quam contraxi indubitata amici nostri praeconio. Posteritatis tamen me miseret, cui tam festive imposuit. Nunc restat, ut & mea in lucem proferantur, si bona fide cum illis actum non nolim. Et tamen fieri hoc posset, quoniam sic placet amicis meis. Illis quicquid erit nugarum exponam. *Cabeliavius* ante diem aut alterum scripsit mihi *Barthium* jampridem obisse. *Stratenus* noster in Zelandia nunc est. Vale, Heros maxime, & brevi tuas videamus aut te. Leidae $\text{CICICCCXXXVIII. XXIX.}$ Decemb. Parens meus enixe rogat literas has per ancillam vestram cures ad Thalassiararcham perferendas.

N I C O L A U S H E I N S I U S

J. Fr. Gronovio.

Hagae.

vid. Epist. LXVII. cui videtur respondere.

PRO divino munere tuo, quid reponam nunc tibi, aut quas acturus sim gratias, ita me venustas tua & venus ament, totus nescio. Patere itaque religionem vel tacita incomparabiles virtutes tuas adorare. Hoc affirmare possum a diebus jam tribus nullum inspexisse me librum, ita veneres tuae me ceperunt. Laudare amicos scis quam non possim. Neque certe istas minutias inexhausta illa tua rerum atque literarum admittat cognitio. Si quid foetui tuo nonnulli detraxerint, invidiae totum hoc debebis, cui exponendus fuit is, quem tu tot beatum dotibus prodire voluisti. Ad singulas, vel minimas observationes tuas haereo, & inde mihi disco, quum nihil adhuc sciam. Paenegyricum tibi nunc si pararem, possem scio, ita totus undiquaquam numine tuo ac genio afflatus sum. Sed o frater, frater, quid ego nunc te laudem? satis certo scio: nunquam ita magnifice quicquam dicam, id virtus quin superet tua. Itaque hanc rem me habere praeter alios praecipuam arbitror, fratrem homini nemini esse primarum artium magis Principem. Emendationes in Ovidium omnes divinae sunt. Ut nunc demum videam, multa praetermisisse me fide optima, quae observari maxime merebantur. Plures vellem addidisses. Nonnullae sunt, in quibus uterque concurrimus, earum unam pulcherrimam, & in qua vel inprimis mihi placerem, si pateris, tibi invideo. Epist. xv. 113. *Postquam se dolor invenit.* Dii boni, quid venustius? Hauseram eam ex duobus chartaceis, tuo & Scriveriano, totumque illi caput promiseram. Primo versu tamen omiseram, forte quod tanti non esset, legendum *lingua palato*, quomodo meliores Codd. sane *τὸ verba* Glossam sapit. Deinde recte ob-

Tom. V.

K k k k k

ser-

servas ruptis comis esse legendum. Id verbi restituimus etiam nos epistolae Ariadnes.

*Protinus adductis sonuerunt pectora palmis;
Utque erat e somno turbida, rupta coma est.*

Sic enim Bersmanni ora, quod ille non intellexit. *Scragii* excerpta expecto, inde conferam me ad emendationem Epistolarum, & libellum inde conficiam, censurae tuae offerendum. In iis potius, quam in Planude vellem festinaret. Gratias ipsi ages pro isto labore, & me vicissim totum illi devovebis. *Boxhornius* ne exemplaria nostra videat, quod serio mones, frustra fuisti. Quis enim latere illum potuit, quod non ignorabat *Comelinus*, is illi hoc suggessit. Itaque cum amicus noster composito, ut fit, vultu consulisset me de meo exemplari, eidem respondi unum idemque cum suo esse. ibi ille me accusare, nostramque testari amicitiam, qui in rebus tam parvi immo nullius momenti, tam splendide ipsi mentitus essem: tonuisse sub terra putes. Parens meus, qui Hagam profectus hodie est, coram haud dubie aget gratias. *Fabricium* cum vobis in Hollandica fuisse aula jam praesenseram, tam splendide in me stomachatus est. Profecto nollem verba mea apud amicissimum caput tam male esses interpretatus. Κορνήλιος ille, quisquis est, innocentissimum pecus, dignus est, qui Priapo imoletur. Falleris tu, si cornutum tantum esse putas, etiam auritus est. Et hoc vos non nescitis. Videor enim videre mihi, quam misere hominem excipiat, totum ostrea esse dicas. Sed quid hoc vult sibi, quod νεγεσφόρος illos vestrates toties oggeratis nobis. Solis putatis esse delicias illas vobis? etiam hic dii sunt. Puellas sane Leidenses habuere quod opponerent. Rogate quaeso hominem, ipse non negabit. Cogitaveram ad vos, sed impediit hoc repentina Nobilissimi juvenis *Henrici Ploosi* mors, quem in Galliis occubuisse haud dubie intellexeris. Ea male nunc me habet. Utinam vos ipsi parentaretis, saltem non recusabit hoc *Fabricius*, nec dubita quin patri hoc gratissimum futurum sit. Interim facite vos videam. Etiam hic ostrea, etiam Rhenanum est. vale. Januar. CIOIOQXXXIX.

N I C O L A U S H E I N S I U S

N. N.

Hagam.

Credo esse scriptam ad Isaac. Vossium, sed non erat adscriptum nomen.

Clarissime atque Amicissime vir. Insignis injuria, qua ab *Elzeviriis* adfectum me indignor, ut ad te confugiam, nunc facit. Poëmatum meorum edi-

editionem *Johannes* affinis tuus in se receperat, antequam anno proxime elapso pedem e patria moverem. Manum etiam operi admovit postea, & supremam quin imposeret, parum abfuit. Miratus interim ego editionis moram, quae tot jam traheretur mensibus, intelligo, monitum typographum eo in libello nonnulla occurrere, quae *Salmasium* tangant, detrectare susceptam provinciam. Qui certe nuncius, ne quid diffimulem, bilem acerrime mihi movit. Quot & quanta beneficia Parenti meo debeant *Elzevirii*, tu omnium nosti optime: quorum tamen memoriae, quae constantius inhaere illis debuerat, adeo ratio nulla habita est, ut reveriti non sint, famosos *Salmasii* libellos, quibus existimationi ejusdem mei Parentis, *Goesii*que nostri ac meae palam insultaret homo scelestus, procudere. Nec semel iterumque hoc tantum, sed frequentissime. cumque injuriam hanc non diffimularem, id responsi tulimus, typographos se ac lucri studiosos esse, literarum etiam imperitos, rationem proinde ab ipsis non exigendam eorum, quae in lucem proferrent. Si quid contra *Salmasium* moliremur, edituros etiam id se libentissime. Nunc quam ingenuos se in negotio meo profiteantur videamus. Characterem in poematis meis hominis maledici dedi, quem *Alastorem* appello. *Salmasii* nomen nusquam expressi, & ut expressissem maxime, mirum id videri nemini deberet, qui perspectas habeat, quas cum illo exercemus, simultates. Non multis antequam e patria discederem diebus (ne veteres injurias nunc tangam) epistolam suam praelegi mihi jussit, in qua non modo uxoris suae existimationem a me proscissam in aula Suecica impudentissimo mendacio adfirmare audet, sed nebulonem etiam ac impostorem me vocat, multisque me ac patrem conviciis excipit, magnum denique malum nobis solens minetur. An ad haec tacerem ego! Quid quaeso aliud id fuisset, quam conviciis illis subscribere, & mendacium ejus approbare? Primo itaque adfirmavi illi, qui jussas mihi literas impurissimi Sycophantae exhibuit, nullam in accusatione ista meam culpam esse. Promisi etiam & curavi minas istas me praeventurum. Quid? quod assiduus postea amicorum admonitionibus ex Suecia certior sum factus, dira illum multa non moliri tantummodo in me, sed parata jam habere. Poteram itaque apud bonos omnes videri existimationis meae, quae tot telis impeteretur, prodigus, si insultus hominis stolidissime ferocis non conarer amoliri: praesertim cum vindictae materia & occasio nequaquam mihi desit. Sciant itaque & intelligant *Elzevirii* ex te rogo, quam bene voluerim ac consuluerim illis hactenus, tam male me consulturum impofterum, si cunctatione ista sua ab adversario me praeveniri patiantur. Adeo non desunt illis inimici, ut facili negotio inventurus sim, quem contra eos fovere possim. *Goesio* interim nostro in mandatis dedi, ut alium typographum poematis meis edendis quaereret, si *Elzevirios* ad aequiora non posset pertrahere. Spero precibus illum meis accessurum. Mihi enim certum est ac penitus fixum vita prius privari, quam existimatione. Adversarius vero, quod fortunis in Suecia meis magnum minari malum pergit, perridiculum se praebet. Cum enim praesens in aula illa omnem lapidem tam apud Reginam, quam apud alios moverit, ut male mihi

esset, omnesque eo cogitationes tum converterit irriti successu; quam ab absente nihil mihi nunc sit metuendum, facile intelligis. Fingamus tamen a stultissimis minis illis periculum esse, existimationem fortunae praetulisse tanto longe pulchrius arbitrabor, quam fortunas existimationi. Vertat denique se in omnes formas, nunquam effecerit, ne ego freneticum ejus sinciput helleboro non detergeam. Vale; vir Clarissime, & festinationi ignosce. Romae

Anno ^PX xv. Martii. CIOIOCLII.



I N D E X I.

EORUM QUI EPISTOLAS SCRIPSERUNT.

Litterae a. b. c. d. e. Tomos designant.

A.

A Bengochea, *Dominic*, Lipsio. b. 114
 Aersenius, *Francisc.*, Lipsio. 560
 Allarius, *Leo*, Nic. Heinsio. e. 436
 Alnpeckius, *Joh.*, Lipsio. b. 69
 Andreas, Episcopus Wratislaviensis, Lipsio. 623
 Anslaer, *Guil.*, Nic. Blancardo. b. 642
 Anonymi, Corn. Walthero & Gregor. Cassandro b. 236
 ——— Isac. Casaubono. b. 446
 ——— N. N. b. 481
 Arcerius, *Johan.*, Lipsio. 449
 Argensola, *Lupert. Leonard*, Lipsio. b. 112
 Arnoldus, *Christoph.*, Nic. Heinsio. e. 342
 Aurelius Lessigniensis, *Julianus*, Hadriano Mario b. 231

B.

B Angius, *Thom.*, Dan. Heinsio. b. 458
 Barclajus, *Guilel.*, Lipsio. b. 25
 Baronius, *Caesar.*, Lipsio. b. 58
 ——— *Joan.*, Moreto. b. 185
 Bartholinus, *Thom.*, Nic. Heinsio. b. 815
 Baudius, *Domin.*, Lipsio. b. 254
 Beffa Nigrinus, *Anton.*, Lipsio. b. 71
 Bellarminus, *Robert.*, Lipsio. b. 57
 Bencius, *Francisc.*, Lipsio. b. 6
 Berchemius, *Hieron.*, Lipsio. 626
 Berckelius, *Abrah.*, Nic. Blancardo. b. 651
 Bertius, *Petrus*, Lipsio. 578
 Bosius, *Jo. And.*, Nic. Heinsio. e. 209
 Bibrant, *Abrah.*, Lipsio. b. 144
 Bircovius, *Fabianus*, Lipsio. b. 15
 Blancardus, *Nic.*, Abr. Berckelio. b. 653
 ——— Davidi Giffeno. b. 663
 ——— J. F. Gronovio. b. 631
 ——— Isaac. Grutero. b. 639
 ——— Jongstallo b. 649
 ——— Jac. Lydio b. 644
 ——— Th. Munckero b. 656
 ——— Salmasio. b. 621
 Blotius, *Hugo*, Lipsio. 423
 Bochartus, *Samuel.*, N. Heinsio. e. 707
 Bollandus, *Joan.*, Nic. Heinsio. b. 777, 784
 Boetzelarius Baro, *Gedeon*, Lipsio. 604

Boisotus, *Joh.*, Lipsio. 659
 Bonciarius, *M. Anton.*, Lipsio. 654
 ——— Velfero. b. 186
 Bongarsius, *Jacob*, Lipsio. 50
 Boretius Chanlieu, *Jacob*, Jos. Scaligero. b. 368
 Bosius, *Simeon*, Jos. Scaligero. b. 308
 Boschius, *Joh.*, Nic. Heinsio. b. 828
 Brantius, *Johannes*, Lipsio. 94
 Brederodius, *Pet.*, Lipsio. 587
 Brunonius vel Bruningius, *Christ.*, Lipsio. b. 4
 ——— Rosweido. b. 187
 Buclandus, *Rodul.*, Lipsio. b. 184
 Burchius, *Lambertus*, Lipsio. 494
 Buillaldus, *Ism.*, Nic. Heinsio. e. 586
 Busbequius, *Augerius*, Lipsio. 213
 Buxtorfius, *Joh.*, Jos. Scaligero. b. 362
 ——— Dan. Heinsio. b. 416
 Buyckius, *Nic.*, Lipsio. 612
 Buytewechius, *Gerard.*, Lipsio. 681
 Bynaes, *Anton.*, Nic. Heinsio. b. 825

C.

C Alvinus, *Joh.*, Phil. Melanchthoni b. 229
 Camerarius, *Joach.*, Lipsio. 2
 ——— *Ludovicus*, Dan. Heinsio. b. 460
 Campius, *Jacob.*, Lipsio. 554
 Canterus, *Theod.*, Lipsio. 590
 Carondeletus, *Jacob.*, Lipsio. 467
 Carrion, *Ludov.*, Plantino, *Christophoro*, 9
 Carpozovius, *Fred. Bened.*, Nic. Heinsio. e. 273
 Casaubonus, *Isaac.*, Lipsio. 365
 Casalius, *Joh.*, Lipsio. 126, 450
 Chifletius, *Joan.*, Lipsio. 726
 Chioccus, *Andr.*, Lipsio. b. 122
 Christina Augusta, Regina Sueciae, *Nic. Heinsio.*, e. 750
 Christianus, *2. Sept. Flor.*, Jano Doufæ b. 322
 Christmannus, *Jacob*, Jos. Scaligero. b. 318
 Chytraeus, *Nathan*, Lipsio. 490
 Claverius, *Stephan*, Jos. Scaligero. b. 346
 Clusius, *Carolus*, Lipsio. 311
 Coccius, *Joh.*, Nic. Heinsio. b. 809
 Cobelius, *Philippus*, Anonymo. b. 224
 Colinus, *Joan.*, Nic. Heinsio. b. 805
 Colvius, *Andr.*, Dan. Heinsio. b. 461

K k k k k 3.

Col.

Colvius, Cl. Salmasio. b. 617
 Correa, *Emman*, Lipsio. b. 62
 Columbus, *Joh.*, Nic. Heinsio. e. 163
 Covarruvias Leiva, *Anton*, Jano Doufæ. 91
 ——— Lipsio 92
 Covarruvias, *Anton*, Lipsio. 444
 Crato a Crastheim, *Joh.*, Lipsio. 235
 Cripius secundus, *Gulielm.*, Lipsio. 750
 Cueillyacus, *Jacob*, Lipsio. 755
 Cuyckius, *Henr.*, Lipsio 589
 Cuperus, *Gisb.*, Nic. Heinsio. b. 665
 Cyrillus Lucaris, Lipsio. b. 67

D.

DAmman a Bisterveld, *Hadrian*, Lipsio. 453
 Daumius, *Christ.*, Nic. Heinsio. e. 210
 Dausquejus, *Claud*, Lipsio. b. 148
 Deckerius, *Johan.*, Lipsio. b. 168
 Delly, *Janus*, Nic. Heinsio. b. 799
 Delrius, *Martin. Anton.*, Lipsio. 501
 Diemenus, *Gaspar*, Lipsio. b. 181
 Dieft, *Henricus*, Dan. Heinsio. b. 459
 La Doderie, Lipsio. b. 142
 Donellus, *Hugo*, Lipsio. 304
 Donius, *Joh. Bapt.*, Dan. Heinsio. b. 470
 Douza, *Janus*, Lipsio. 219
 ——— *Janus fil.*, Lipsio. 226
 ——— *Francisc.*, Lipsio. 233
 Dresserus, *Matth.*, Lipsio. 304
 Ducaeus, *Fronto*, Lipsio. 645
 Dudithius, *Andr.* Lipsio. 215
 Dumay, *Paullus*, Jos. Scaligero. b. 367

E.

Ellingerus, *Andreas*, Lipsio. 4
 Elmenhorstius, *Everh.*, Jos. Scaligero. b. 355
 Ernestus, Elector Colonienfis, Lipsio. 671
 Erpenius, *Joh.*, Nic. Blancardo. b. 625
 Esychius, *Joan.*, Lipsio. 711

F.

Faber, *Huppertus*, Lipsio. 656
 Fabricius, *Vinc.*, Nic. Heinsio. c. 787
 Fabrottus, *Car. An.*, Nic. Heinsio. e. 582
 Falconerius, *Ostlav.*, Nic. Heinsio. e. 473
 Falconius Auratus, *Simon*, Jos. Scaligero. b. 312
 Falkenburgius, *Gerard*, Lipsio. 6
 Ferrerius, *Hieron.*, Lipsio. b. 64
 Fienus, *Thom.*, Lipsio. b. 79
 Franckenberg, *Reinold*, Dan. Heinsio. b. 469
 Freherus, *Marq.*, Lipsio. 417
 Frencelius de Fridenthal, *Salomon*, Lipsio. 732
 Frischlinus, *Nicod.*, Lipsio. 303

G.

Gentilis, *Scipio*, Lipsio. b. 30
 Gerdes, *Joach.*, Dan. Heinsio. b. 461
 Gesnerus, *Conrad.*, Georg. Caslandro. b. 256
 Gevartius, *Casp.*, Nic. Heinsio. b. 762
 Gifanius, *Hubert*, Lipsio. 339
 ——— Joseph. Scaligero. b. 309
 Giffenius, *David*, Nic. Blancardo. b. 658
 Gillius, *Petrus*, ad amicum, b. 232
 Gillot, *Jac.*, Jos. Scaligero. b. 369
 Gifelinus, *Victor*, Lipsio. 153
 Goldastus, *Melch.*, Lipsio. 153
 Gothofredus, *Dionys*, Lipsio. 387
 Graevius, *J. G.*, Nic. Heinsio. d. 1
 Groenewegius, *Mihael*, Lipsio. b. 179
 Gronovius, *Jacob.*, Nic. Heinsio. c. 551
 Gronovius, *J. F.*, Cl. Salmasio, b. 522. & seq.
 ——— Nic. Blancardo. b. 625
 ——— Nic. Heinsio. c. 1. & seq.
 ——— Jan. Bodechero Banningio. c. 8.
 ——— Th. Reinesio. e. 207
 Gronovius, *Laur. Theod.*, Nic. Heinsio. c. 547
 Grosnotius Lissaeus, *Hieron.*, Lipsio. 348
 Grotius, *Hugo*, Gev. Elmenhorstio. b. 440
 ——— Casp. Gevartio. b. 443
 ——— Danieli Heinsio. b. 383
 ——— Joh. Hemelario. b. 443
 ——— Lipsio. 342. b. 63
 ——— Jano Rutgerfio. b. 380
 ——— And. Schotto. b. 441
 Gruterus, *Janus*, Lipsio. 267
 ——— Casp. Barthio. b. 377
 ——— Joh. Meurfio. b. 379
 Guastavinus, *Julius*, Lipsio. 759
 Guilielmus, *Janus*, Lipsio. 177
 Gutenstein, *Leonard*, Jos. Scaligero. b. 345

H.

Hanniel, *Ignat.*, Jos. Scaligero. b. 371
 Hansenius, *Joh. Bapt.*, Lipsio. b. 75
 Harge, *Splensirus ab*, Hadr. Mario. b. 222
 Hartius, *Otho*, Lipsio. 167
 Heinsius, *Daniel*, Elmenhorstio. b. 445
 ——— N. N. b. 45. 471
 ——— Polyandro, *Johanni*, b. 454
 ——— Scoto cuidam. b. 454
 Heinsius, *Nicolaus*, Arnoldo, *Christiano*, e. 343
 ——— Bocharto, *Samueli*, e. 708
 ——— Boschio, *Johanni*, b. 829
 ——— Bourdelotio, *Petro*, e. 711

Hein-

Henſius, Nic., Bynaeg, Antonio, b. 826
 ——— Carpio, Fred. Bened., e. 275
 ——— Christinae, Reginae Suae, e. 734
 ——— Coccio, Johanni, b. 810
 ——— Colino, Johanni, b. 806
 ——— Columbo, Johanni, e. 164
 ——— Cupero, Gisherto, b. 666
 ——— Daumio, Christiano, e. 212
 ——— Fabricio, Vincentio, c. 788
 ——— Falconerio, Octavio, c. 474
 ——— Falconerio, Paulo, e. 577
 ——— Gevartio, Caspari, b. 763
 ——— Graevio, Joan. Georg., d. 28
 ——— Gronovio, Jacobo, c. 552
 ——— Gronovio, Johan. Frid., c. 24. e. 807
 ——— Gronovio, Laur. Theod., c. 548
 ——— Huetio, Petr. Dan., e. 740
 ——— Joly, Claudio, e. 721
 ——— Mare, Philiberto de la, e. 685
 ——— Maresio, Rolando, e. 605
 ——— Medonio, Bernard., e. 618
 ——— Meibomio, Marco, b. 821
 ——— Munckero, Philipp., e. 422
 ——— Munckero, Thomae, e. 348
 ——— Papenbrochio, Danieli, b. 787
 ——— Perizonio, Jacobo, d. 736
 ——— Petito, Petro, e. 723
 ——— Phorbaeo, Joanni, b. 829
 ——— Reinesio, Thomae, e. 187
 ——— Rhodio, Johann., e. 466
 ——— Rondiniio, Natali, e. 467
 ——— Rottendorffio, Bern., e. 166
 ——— Rubenio, Alberti, b. 755
 ——— Scheffero, Johanni, e. 2
 ——— Schelio, Radb. Herm., b. 739
 ——— Seguino, Petro, e. 715
 ——— Sligtenhorſtio, Arnol., c. 755
 ——— Spanhemio, Ezechieli, c. 808
 ——— Tennulio, Samueli, b. 805
 ——— Thevenoto, Melchized., e. 720
 ——— Valesio, Hadriano, e. 700
 ——— Valesio, Henrico, e. 698
 ——— Vlitio, Jano, c. 755
 ——— Vorſtio, Adolfo, b. 793
 ——— Voſſio, Isaaco, c. 558. e. 810
 ——— Wallio, Hadriano, c. 856
 ——— Wallio, Jacobo, b. 784
 ab Helbach, Freder. Lipsio. 661
 Hemelarius, Joh., Lipsio. 563

Henninius, Henr. Christ., Nic. Blancardo. b. 663
 Henschenius, Godefr., Nic. Heinsio. b. 773
 Heraldus, Desiderius, Nic. Heinsio. c. 585.
 Hildesheim, Franc., Lipsio 438
 Hoefchelius, David, Jos. Scaligero. b. 353
 Hogerſius, Theoph., Nic. Heinsio. b. 823
 Hojus, Andr., Lipsio. 662
 Holſtenius, Lucas, Nic. Heinsio. e. 429
 Hopperus, Joach., Corn. Walterio, & G. Caffando. b. 238
 ——— Ant. Schoonhovio. b. 239
 ——— Joh. Birchmanno. b. 240
 ——— N. N. Cognato. b. 240
 Huetius, Petr. Dan., Nic. Heinsio. e. 733
 I.
 Joly, Claud., Nic. Heinsio. e. 720
 Jungermannus, Gothof. Salmaſio, b. 483
 Junius, Francisc., Lipsio. 407
 K.
 Lockius, Matthaeus, Lipsio. 389
 Knobelftorf, Eustath., Georg. Caffandro. b. 300
 L.
 Labbaeus, Phil., Jos. Scaligero. b. 350
 Lampſonius, Dominic, Lipsio. 431
 Lantinus, Joh. Baptiſt., Nic. Heinsio. e. 615
 Lernutius, Janus, Lipsio. 16
 Lindenbrugius, Frid., Lipsio. 741
 ——— Jos. Scaligero. b. 346
 Lingelsheimius, Georg. Mich., Jos. Scaligero. b. 359
 Lipsius Aldrobando, Cynthio, Cardinali. b. 81
 ——— Ameyde, Arnold. ab, b. 120
 ——— Arsenio, Cornelio, 457
 ——— Francisco, 561
 ——— Ayalae, Philip., b. 35
 ——— Barbiano, Veftrio, b. 176
 ——— Barclajo, Guell., b. 27
 ——— Baudio, Dominico, 255
 ——— Bencio, Francisco, 66, 82
 ——— Berchemio, Hieron., 626
 ——— Bernartio, Johanni, 702
 ——— Bertio, Petro, 280
 ——— Blyenburgio, Hadriano. 454
 ——— Bongarſio, Jacobo, 50
 ——— Brederodio, Petr., 587
 ——— Bredio, Henr., 589
 ——— Breugelio, Guilel., 718

Lipsius Brantio, *Joanni*. 645
 ——— Brouwero, *Christoph.*, 586
 ——— Burchio, *Lamberto*, 494
 ——— ——— *Joanni*, 500
 ——— Busio, *Paulo*, 124
 ——— Buytewechio, *Gerardo*, 680
 ——— Cantero *Theodoro*, 593
 ——— Carondoletto, *Jacob.*, 470
 ——— Casaubono, *Isaacus*, 368
 ——— Caselio, *Johanni.*, 125
 ——— Clusio Carolo. 317.
 ——— Colvio, *Petro*, 212
 ——— Coornhertio, *Theodoro*, 180
 ——— Covarruviae, *Antonio*, 91
 ——— Cratoni a Crasheim. 235
 ——— Crojo, *Carolo*, Duci Arschotano.
 b. 106
 ——— Cujacio, *Jacobo*, 213
 ——— Curatoribus Academiae Batavae
 555, 557
 ——— Danaeo, *Lamberto*, 87
 ——— Daffonvillaeo, *Guilelm.*, b. 3
 ——— Belrio, *Martino Antonio*, 504
 ——— Douzae, *Jano*, 217
 ——— Dudithio, *Andr.*, 214
 ——— Duickio, *Francis*, 562
 ——— Egmondo, *Petro*, 52
 ——— EgmondoNieuwenburgio, 253
 ——— Elmenhorstio, *Everh.*, b. 121
 ——— Everhardi, *Emberto*, 613
 ——— Fardin, *Petro du*, b. 31
 ——— Florentio, *Nicolao*, 154
 ——— Grosstio Leflaeo, *Hieron.*, 346
 ——— Hansenio, *Joh. Bapt.*, b. 74
 ——— Hario, *Florent.*, b. 172
 ——— Heremitae, *Dan.*, b. 121
 ——— Ingelio, *Regnero*, 632
 ——— Gifanio, *Huberto*, 340
 ——— Gisellino, *Victori*, 150
 ——— Grutero, *Jano*, 277
 ——— Guilielmio, *Jano*, 177
 ——— Guastavinio, *Julio*, 760
 ——— Harlaeo, *Christophoro*, 710
 ——— Hartio, *Othoni*, 166
 ——— Hauteno, *Johanni*, 82, 87
 ——— Hayo, *Joh.*, 751
 ——— Hemelario, *Joanni*, 565
 ——— Hojo, *Andreae*, 665
 ——— Humaeorolio, *Nic. Librae*, 585
 ——— Lampfonio, *Dominico*, 128

Lipsius Leeuwio, *Theodoro*, 27
 ——— Lernutio, *Jano*, 8, 27
 ——— Lindenbrugio, *Frideric*, 742
 ——— Livinejo, *Johanni*, 641
 ——— Lydio, *Martino*, 48, 49
 ——— Manareo, *Olivario*, b. 160
 ——— Marchantio, *Jacobo*, 757
 ——— Marescotto, *Agésilao*, 729
 ——— Marnixio Aldegondio. 155
 ——— Melisso, *Paullo*, 331
 ——— Metello, *Joanni Matalio*, 58
 ——— Mercuriali, *Hieron.*, 261
 ——— Micaultio, *Nic.*, b. 41
 ——— Modio, *Francisc.*, 108
 ——— Monavio, *Jacob.*, 425
 ——— Morello, *Federico*, 420
 ——— Moreto, *Balthas*, 737
 ——— ——— *Michaeli*, 749
 ——— Moro, *Flaminio*, 678
 ——— Nansio, *Francisco*, 673
 ——— Orano, *Joanni*, 570
 ——— ——— *Petro* 73
 ——— Ordinibus Brabantiae. b. 47
 ——— Ortelio, *Abrahamo*, 157
 ——— Oudarto, *Nicol.*, 281
 ——— Pantino, *Petro*, 446
 ——— Plantino, *Christophoro*, 258
 ——— Pollioni, *Hermann*, 115
 ——— ——— *Everardo*, 115
 ——— Prunio, *Cornelio*, 149
 ——— Puteano, *Erycio*, b. 84
 ——— Raphelengio, *Francisco*, 186
 ——— ——— *Francisco Fil.*, 200
 ——— ——— *Justo*, 211
 ——— Ratloni, *Alexandro*, 127
 ——— Richardoto, *Joani*, 730
 ——— Romano, *Adrian.*, 669
 ——— Roberti, *Romalco*, 736
 ——— Rubenio, *Phil.*, b. 103
 ——— Sacco, *Joh. Bapt.*, b. 11
 ——— a Sancto victore. 719
 ——— Sandelino, *Ger.*, 744
 ——— Sargelfio, *J.*, 659
 ——— Schondoncho, *Aegidio*, b. 44
 ——— Schoppio, *Gasp.*, b. 52
 ——— Schotto, *Andreae*, 55, 104
 ——— Scribanio, *Carolo*, b. 166.
 ——— Serario, *Nicolao*, 608
 ——— Solrano Comiti, *Philippo*, 761
 ——— Sweertio, *Francisco*, 674

Lipfius Tholotio, *Adamo*, 600

————— *Torrentio, Laevino*, 474

————— *Varicio, Jacobo*, 713

————— *Velfero, Marco*, 714

————— *Viviano, Joani*, 457

————— *Villerio, Francisc.*, b. 170

————— *Viringo, Joan.*, b. 165

————— *Uweno, Henrico*, 674

————— *Wiltio, Henrico*, 122

————— *Wingio, Anton*, b. 17

————— *Wouwero, Joh.*, b. 45

————— *Yvarae Stephano*, 723

————— *Xandrino, Clementi*, b. 175

Livinejus, *Johan.*, Lipsio. 632

Lydius, *Joh.*, Paulo Merulae. b. 376

M.

M Accius Durantianus, *Sebast.*, Lipsio. b. 159

Manutius, *Paul.*, Joanni Cratoni b. 383

Marchantius, *Jacob.*, Lipsio. 755

Mare, *Philibertus de la*, Nic. Heinsio. e. 677

Mafius, *Andr.*, Georg. Cassandro. b. 184

Medonius, *Bern.*, Nic. Heinsio. e. 607

Meibomius, *Marc.*, Nic. Heinsio. b. 817

Meliffus, *Paullus*, Lipsio. 329

Mendozius, *Nunus*, Lipsio. b. 177

Mercerus, *Jossias*, Lipsio. 307

Mercurialis, *Hieron.*, Lipsio. 261

Metellus, *Jo. Matalius*, Lipsio. 60

————— *Georg. Cassandro*. b. 288

Meuschius, *Theobaldus*, Jos. Scaligero. b. 357

Meurier, vel Maulpergher, *Philibert*, Lipsio. b. 82

Meurfus, *Johannes*, Lipsio. b. 35

Modius, *Frane*, Lipsio. 106

Molineus, *Joh.*, Georg. Cassandro. b. 245

————— *Petrus*, Jos. Scaligero. b. 343

Monavius, *Jacob.*, Lipsio. 424

Montanus, *Arias*, Lipsio. 666

Montius, *Hieron.*, Hadr. Mario. b. 216

Morellus, *Frid.*, Lipsio. 419

————— *Frid.*, Jos. Scaligero. b. 315

Moretus, *Balth.*, Lipsio. 738. b. 167

Morus, *Flaminius*, Lipsio. 676

Munckerus Philipp. Nic. Heinsio. e. 423

Munckerus, *Thom.*, Nic. Blancardo, b. 657

————— *Nic. Heinsio*. e. 348

Murellius, *Joh.*, Georg. Cassandro. b. 302

N.

N Ansius, *Franciscus*, Lipsio. 671

Nassavius comes, *Wilh. Ludov.*, Lipsio. 450

Tom. V.

Nicolaus Nicolai Hadriano Mario. b. 205

O.

O Ranus, *Petrus*, Lipsio. 575

Oricellarius, *Bernardus*, Cataneo Diacetio, *Roberto*, b. 197

————— *Acciaiole, Roberto*, b. 200

Ortelius, *Abrah.*, Lipsio. 162

Oudartus, *Nicol.*, Lipsio. 278

Oultremannus, *Henr.*, Lipsio. 693

P.

P Alaeotus, *Gabriel*, Lipsio. 736

Pallandus, *Petrus*, Lipsio. 451

Pantinus, *Petr.*, Lipsio. 443

Papenbrochius, *Dan.*, Nic. Heinsio. b. 785

Patinus, *Guido*, Nic. Heinsio. e. 578

Paullus V Papa Lipsio. b. 175

Peckius, *Petrus*, Lipsio. b. 91

Perizonius, *Jacob.*, Nic. Heinsio. d. 714

Petitus, *Petr.*, Nic. Heinsio. e. 722

Phorbaeus, *Joh.*, Nic. Heinsio. b. 830

Pezelius, *Christoph.*, Lipsio. 305

Pflug, *Julius*, Mentero. b. 202

Pichena, *Curtius*, Lipsio. b. 138

Pierffenaeus, *Jiermeias*, Lipsio. b. 129

Pigafetta, *Philip.*, Lipsio. b. 60

Pighius, *Steph.*, Lipsio. 1

Pipinus, *Joh.*, Mizialdo, *Joh.*, b. 235

Pistorius, *Joh.*, Franc. Raphelengio. b. 342

Plantinus, *Christoph.*, Lipsio. 260

Pollio, *Ever.*, Lipsio. 120

Possevinus, *Anton*, Lipsio. b. 45

Possinus, *Petr.*, Nic. Heinsio. e. 689

Posthius, *Joan.*, Lipsio. 105

Puteanus, *Erycius*, Lipsio. b. 81

Q.

Q uevedo, *Francisc.*, Lipsio. b. 162

R.

R Aderus, *Matthaeus*, Lipsio. b. 33

Raphelengius. *Francisc.*, Lipsio. 184

————— *Francisc. fil.*, Lipsio. 200

————— *Justus*, Lipsio. 211

Reineccius, *Reinerus*, Lipsio. 266

Reinesius, *Thom.*, Nic. Heinsio. e. 190

Rescius, *Stanisla.*, Lipsio. 651

Reusnerus, *Nicol.*, Lipsio. 422

Rhediger, a Strifa, *Nicol.*, Lipsio. b. 37

Rhodium, *Joan.*, Nic. Heinsio. e. 442

Rigaltius, *Nic.*, Lipsio. 674

Richardotus, *Joan.*, Lipsio. 729

Rimainus, *Joan.*, Lipsio. 619

L1111

1111

Rittershausen, *Henricus*, Lipsio. 764
 ———— *Jos. Scaligero*. b. 325
 ———— *Caspi Barthio*. b. 377
 Romanus, *Adrianus*, Lipsio. 671
 Rondininius, *Natalis*, Nic. Heinio. e. 468
 Rosweidus, *Heribert*, Lipsio. b. 140
 Rottendorffius, *Bern.*, Nic. Heinio. e. 263
 Rubenius, *Alb.*, Nic. Heinio. b. 749
 Rubenius, *Phil.*, Lipsio. b. 105
 Rulaeus, *Ewald.*, Nic. Heinio. b. 815
 Saccus, *Joh. Bapt.*, Lipsio. b. 8
 Salinerius, *Julius*, Lipsio. b. 126
 Sandelin, *Gerard.*, Lipsio. 743
 Saravia, *Adrian.*, Lipsio. 363
 Sarmiento de Mendoza, *Emman.*, Lipsio. b. 57
 Sarrauius, *Claud.*, Nic. Heinio. e. 583
 Saxo, *Joh.*, Corn. Gualtero. b. 242
 Scaliger, *Joseph.*, Lipsio. 237
 Scheidlefus, *Robert.*, Lipsio. b. 172
 Schefferus, *Joh.*, Nic. Heinio. e. 1
 Schelius, *Rad. Her.*, N. Heinio. b. 736
 Schondonchus, *Aegid.*, Lipsio. b. 41
 Schoockius, *Martin.*, Heinio, *Dan.*, b. 463
 Schoppius, *Caspar.*, Lipsio. 648
 Schottus, *Andr.*, Lipsio. 96
 ———— *P. Schverio*. b. 378
 Scrivefius, *Petr.*, Lipsio. b. 127
 Seguinus, *Petr.*, N. Heinio. e. 714
 Segaeus, *Thom.*, Lipsio. 751
 Seldenus, *Joh.*, Cl. Salmasio. b. 619
 Septalius, *Ehd.*, Lipsio. b. 68
 Serarius, *Nic.*, Lipsio. 665
 Sfortia, *Franc.*, Cardinalis, Lipsio. b. 39
 Sirmondus, *Jacob.*, Lipsio. 632
 Slichtenhoffius, *Arnoldus*, Nic. Heinio. c. 774
 Sommalus, *Henr.*, Lipsio. b. 182
 Spanhemius, *Ezech.*, Nic. Heinio. c. 807
 Spannochiu, *Angel.*, Lipsio. 724
 Stanihurstius, *Richard.*, Lipsio. 600
 Steenberg, *Joh. Bapt. van*, Nic. Heinio. b. 773
 Stuckius, *Joh.*, Lipsio. 492
 Sylburgius, *Phil.*, Lipsio. 345
 ———— *Jos. Scaligero*. b. 316
 Sweetius, *Franc.*, Lipsio. 618

Taffis, *Anton. de*, Joanni Metello, b. 294
 Taubmannus, *Frider.*, Lipsio. b. 73

Taubmannus, *Jos. Scaligero*. b. 338
 Tennulius, *Sam.*, Nic. Heinio. b. 790
 Thevenot, *Melchised.*, Nic. Heinio. e. 727
 Thuanus, *Jac. Ang.*, Lipsio. 404
 Titius, *Robert.*, N. Heinio. b. 374
 Toelemanus, *Simon.*, Lipsio. 602
 Torrentius, *Daedalus*, Lipsio. 475
 Tregianus, *Francisc.*, Lipsio. b. 133

Valerius, *Cornel.*, Joach. Hoppero. b. 255
 Valefius, *Henric.*, Nic. Heinio. e. 692

——— *Hadr.*, Nic. Heinio. e. 699
 Varic, *Jacob. a*, Lipsio. 712
 a Sancto Victore, *Franc.*, Lipsio. 723
 Villerius, *Dionys.*, Lipsio. b. 77
 ———— *Franc.*, Lipsio. b. 170

Vivianus, *Joh.*, Lipsio. 455
 Vitius, *Jan.*, Dan. Heinio. b. 481
 ———— *Nic. Heinio*. c. 693

Voetius, *Gisb.*, Dan. Heinio. b. 468
 Vorspallius, *Petrus*, Lipsio. 641
 Vorstius, *Adolf.*, Nic. Heinio. b. 789

Vossius, *J. Gerard.*, Jac. Wittio. b. 612
 ———— *Isaac.*, Nic. Heinio. e. 556
 ———— *Gerard.*, Nic. Heinio. e. 692

Vriendtius, *Maxim.*, Lipsio. b. 96
 Vulcanius, *Bonav.*, Lipsio. 556
 Uwenus, *Henr.*, Lipsio. 673

Wallius, *Jacob.*, Nic. Heinio. b. 778
 ———— *Hadrianus*, Nic. Heinio. c.

855
 Wacherus a Wackenfels, *Joh. Math.*, Lipsio.
 594

Wevelinchoyus, *Joh.*, Cl. Salmasio. b. 623
 Walthesius, *Cornel.*, Friderico-Electori Colo-
 niensi. b. 293

Wilach, *Peregrinus*, Georg. Cassandro. b. 295
 Withakerus, *Guilel.*, Lipsio. 252
 Wittendellus, *Petrus*, Lipsio. 624

Ximemus, *Petrus*, Georg. Cassandro. b. 257
 ———— *Corn.*, Walthero. b. 281

Zerotmus Baro, *Carolus*, Lipsio. 336
 Zoppius, *Melch.*, Lipsio. 668

Zuichemius, *Viglius*, Joach. Hoppero. b.
 254

INDEX II. VIRORUM CLARORUM ET ILLUSTRIORUM.

- A** Bengochea, *Dominicus*, b. 113, 113 b. 80
 Acidalius, *Valens*, 430, 436, 437, 438.
 Acropolis Marchio. d. 270
 Aemilius, *Anson*, c. 266
 ——— *Georgius*, b. 25, b. 111
 Aersenius, *Franciscus*, 169, b. 471
 Aicardus, *Paulus*, b. 66
 Alanus Cardinalis. b. 133
 Albinus, *Prosper* e. 718
 Aldobrandinus, *Petrus*, b. 54
 Aldegondius Marnixius, *Philippus*, 155, & seq.
 272, 692
 Aldrovandus. 670
 Alenfonius Dux. 15
 Alers. 70
 Alibaster, *Guillelmus*, 232
 Allatius, *Leo*, c. 82, 96, 163, 168, 173, 176,
 197, 231, 237, 566, 820, 813, 826, d. 83, e.
 118, 435, 529, 530, 531, 539, 541
 Allinga d. 257
 Almondus. 151
 Alfarius, *Vincentius*, c. 777
 Altingius, *Henricus*, b. 524
 ——— *Jacobus*, d. 612
 Alvares, *Gabriel*, b. 113
 Amaseus, *Pompilius*, 317
 Amerbachius 116, 123
 Amerongiae Dominus. d. 129
 Amerongius 383
 Ancanterus. 341
 Anchemant, Dominus a-Marca, *Reinerius*,
 22
 Andlo, *Petrus*, d. 257
 Andre. b. 728
 Angelocrator, *Daniel*, b. 156
 Angelonus, *Franciscus*, c. 461, 710, 720
 Angelus, Clericus ad D. Laurentii. c. 163
 Anhaltinus Princeps, *Christianus*, 441
 Anschema. b. 37
 Antonius, *Nicol*, e. 510
 Antonius, Rex Portugalliae. 56
 Aprosius Ventimiglia, vel Intimelius, *Joh. Ange-*
licus, &c. 164, 165, 167, 173, 174, 175, 181,
 184, 190, 192, 194, 201, 219
 Apollonius. b. 632
 Appellmannus. e. 788
 Appelbomius. c. 515, 516, 639
 Arcerius. e. 325
 Argensola, *Lupercus Leonardus*, b. 122, 115
 Argenterius. e. 461
 Archontorus, *Petrus*, c. 265
 Armagniacus Cardinalis. b. 235
 Arminius, *Jacobus*, b. 380, 428
 Arnoldus, *Christophorus*, c. 275, 414, 416, e.
 254, 336, 336
 Arnulphus Aurelianensis. e. 265
 Assendelfius, *Guillelmus*, 47, b. 179
 Affonvillanus 469, 489
 Athenius. *Guillelmus*, 265
 Auborius. e. 601
 Aubrius, *Johannes*, 427
 Audejantius, *Hubertus*, b. 81
 Augurellus. 143
 Augustinus, *Antonius*, 102
 Auratus, *Johannes*, b. 60, 378
 Aurelius, *Julianus*, b. 231
 ——— *Suavius*. b. 220
 Axelius. e. 136
 Axenius. d. 448
 Ayala, *Balthasar*, b. 35
 Ayisma, *Poppo*, b. 439
 d' Azevedo, *Diegius*, 134
 Azzolinus Cardinalis. e. 511
 B.
B Ackerus. c. 258
 Backhusius 111, 112
 Baersdorfius. c. 207
 Bagnanius, *Bartholomaeus*, c. 554
 Baiffius. c. 127
 Balasdiatus, *Stephanus*, 622
 Balduinus, *Franciscus*, 112, 114. b. 226, 241,
 255, 263
 Balusius. e. 318, 320, 323, 326
 Balzacius. c. 296, 266, 302, 331. e. 580,
 734
 Bangius, *Thomas*, c. 456
 Bannerius, *Gustavus Adolfus*, e. 742
 Barciajus, *dux navalis Anglorum*, e. 95
 ——— *Guillelmus*, 233, 625. b. 25
 Lllll 2

- Barberinus, *Franciscus*, Cardinalis. c. 96, 176, 294, 295, 312, 394, 816, 820. c. 473, 475, 711, 749
 Barelayus, *Joannes*, b. 25
 Barisonius. c. 443, 444
 Barlaeus, *Caspar*, c. 168, 568, 570, 574, 705, 715. d. 460
 ——— *Lambertus*, 6. c. 352
 Barlouw, *Thomas*, c. 819
 Burenus, *Caesar*, 606, 738, 739, c. 50, 76, 134
 Barrovius. d. 177
 Bartaffius, *Guil. Sallustius*, c. 359
 Barthius, *Caspar*, b. 756, 763, 764, c. 148, 200, 236, 241, 256, 258, 266, 312, 320, 385, 415, 451, 514, 602, 727, 731, 735, 756, 763, 764, d. 17, 19, 23, 25, 26, 33. e. 328
 Bartholinus, *Caspar*, b. 341. c. 167, 183. d. 459, 482
 Barthyan, *Ungarus*. 316
 Barvicius, *Johannes*, 431, 432, 595
 Bastingius. 198, 682, 686
 Batzonius, *Goswinus*, 542
 Baudius, *Dominic.*, 89, 405, 541. b. 181, 380, 381, 389, 395, 399, 400, 406, 407, 408, 412, 414, 415, 416, 418, 420, 422, 423, 428. c. 221. d. 74
 Becharius, *Augustinus*, c. 1618
 Beek a Leopoldad., *Hieronymus*, 423
 Beckius, *Pictor*. c. 601, 631, 639, 643
 Becillus, *Caesar*, e. 439
 Becmannus, *Joh. Christoph.*, d. 482. c. 241
 Beffa Nigrinus, *Antonius*, b. 72
 Behotius, *Adrianus*, c. 163
 Beisius. 207
 Belivraeus. 373
 Bellarminus. 79, 98, 537
 Bellifortius dux. c. 95
 Bellonius. 316
 Bellonus. e. 742
 Bencius, *Franciscus*, 57, 58, 66, 100, 101, 533, 650, 680
 Benedicti Werteloo, *Georg.*, 408
 Berchemius, *Hieronym.*, 105, 107, 289, 626
 Berckelius, *Abrah.*, c. 539. d. 387, 390. e. 153, 154, 156, 158, 223, 358, 463, 476, 496, 584, 585, 752
 Berettus, *Murius*, e. 143, 368, 369
 Berlicomius, *Andreas*, c. 582
 Bernardus, *Eduard.*, d. 177
 Bernartius. 169, 283, 287, 290, 541, 644. c. 142
 Berneccerus, *Matthias*, b. 554. c. 53, 92
 Berlaeus. b. 32
 Berfmannus, *Gorg.*, c. 371
 Bertius, *Petrus*, 86, 198, 435, 578, 600, 682, 686, 687, 693, 695, 696, 763. b. not. 402, 446
 Berzewitzii fratres. 554
 Betzius. b. 214
 Beverlandus, *Adrian.*, d. 597, 598, 623, 626
 Bevilaqua, *Cardinals*. b. 187
 Beuningius, *Conradus*, c. 380, 384, 639, 643, 646, 659, 666, 687. d. 23, 258. e. 153
 Beyma. 685
 Beza, *Theodor.*, 90. b. 213, 241, 257, 292, 263, b. 398, 479
 Bibranus, *Abrah.*, 277, 379. b. 190, 350
 Budellius, *Bibliopola*. c. 511
 Biefius. 1
 Bigotius, *Emeritus*, b. 725. c. 413, 454, 819, 820, 835, 887. d. 34, 39, 44, 48, 57, 58. e. 19, 49, 55, 66, 105, 125, 184, 274, 276, 327, 672
 Billainius. d. 574
 Billejus. 547, 548
 Bulli, *de*, e. 601
 Billius, *Jacobus*, 649
 Binetus. c. 87
 Bifius, *Herman.*, 339
 Bisterfeldius. c. 273, 276
 Bizarus, *Petrus*, 258
 Blankardus, *Keverardus*, 45
 ——— *Nicol.*, c. 209
 Blauwius. c. 647
 Blondellus, *David.*, c. 263, 295, 570, 575, 602, 605, 643
 Blonquius. b. 417, 421, 422, 425, 430
 Blotius, *Hugo*, 423
 du Bloy's. 23
 Blumius. 831, 833
 Bleyenburgius. c. 207, 209, 887. d. 182, 190, 195
 Bocalinus, *Traja*, e. 64
 Bochartius, *Samuel*, c. 214, 222, 266, 282, 302, 313, 572, 581, 602, 615, 637. & seq. 646, 651, 658, 662, 664, 666, 669, 814. d. 54
 Bodecherus. 753. c. 42, 43, 49, 71, 796
 Bodenius, *Matth.*, 642
 Bodinus, *Joh.*, 30. b. 369
 Bodius, *Gisbert.*, c. 444

- Boëcalinus, *Trajan.*, c. 64
 Boeclerus, *Joh. Henr.*, c. 228, 242, 245, 248, 254, 269, 286, 359, 390. d. 15, 91, 139, 147, 583
 Boessius Salvagnius, *Dionysius*, c. 201, 475, 476. e. 683
 Boherius, *Joh.*, c. 835. d. 66. e. 678, 680, 684
 Boineburgius. c. 847, 849, 850, 851. d. 138, 139, 154, 160
 Boissardus, *Janus Jacob.*, 324, 649
 Boissizius. b. 351
 Boissotus, *Joh.*, 196. b. 32
 Bojus, *Cornelius*, c. 76, 78, 198, 207, 208, 210, 226, 700, 705, 719, 746, 791, 806, 856, 875
 Bollandus, *Johan.*, b. 781. e. 266, 267
 Bollius. 34, 90, 613
 Bonamicus, *Lazarus*, b. 203
 Bonciarius, *M. Anton.*, 81, 82, 654. b. 125
 Boncompagnius, *Cardinalis*, c. 581. e. 744, 747, 748
 Bongarsius, *Jacobus*, 213. b. 359, 361, 496
 Bontius. b. 428
 Boonen, *Ingelbertus*, 483
 Bort, *Cornelius*, b. 431
 Borbonius *Cardinalis*. 63
 Borchius b. 672, 682, 684, 715. d. 260, 667, 669
 Borckius, *Adrianus*, b. 318
 Borelius, *Johan.*, b. 415, 416
 Borellus. c. 825
 Borghefius, *Joach.*, c. 225
 Bornius, *Henricus*, c. 458, 465, 471, 737, 746, 748, 750, 752, 754, 759, 770, 771, 868, 889
 Borremansius, *Ant.*, e. 286
 Borromaeus, *Cardinalis*. 486. b. 88
 Boschius, *Joh.*, e. 161
 Bosius, *Jo. And.*, c. 854. d. 31, 69, 76, 270, 274, 275, 311. e. 65, 85, 116, 117, 128, 245, 248, 251, 565, 566, 567
 Boswellus. b. 589. c. 49
 Botzelarius, *Gideon*, 156, 605
 Bourdelotus, *Petrus*, *Medicus Christinae*. c. 313, 317, 320, 630, 634, 630, 638, 659, 651, 659, 664, 666, 668, 673, 677. e. 636, 710, 711
 Boxhornius, *Henricus*, 588
 ——— *M. Suerius*, b. 535, 549, 567, 571, 575, 583, 584, 586. c. 48, 49, 83, 89, 106, 113, 114, 126, 142, 173, 186, 189, 206, 209, 222, 259, 303, 329, 379, 493, 568, 572, 677, 589, 594, 752, 795. d. 386
 Braccianus dux. e. 746, 751
 Brachius, *Petrus*, 645
 Brahe, *Tycho*, b. 339
 ——— *Nicolaus*, e. 783
 ——— *Barthol.*, 441
 ——— *Laurentius*, 188
 Branden, *Nicol. vanden*, 660. b. 32
 Bras, *Marchio de*, c. 364, 365
 Brederodius. 317, 337, 366, 387, 578, 581, 588
 Bredius, *Henricus*, 191, 227, 590
 Breugelius. 169, 174, 260, 281
 ——— *Filius*. 665
 Briennius *Comés*. c. 474. e. 720
 Briofius, *Jacob. Mos*, e. 695
 Briffonius, *Barnab.*, 55, 179, 460, 581
 Brobergius. e. 145
 Brouchtonus. b. 491, 494, 514
 Brouckhusius, *Janus*, d. 503, 504, 557, 613, 616
 Brucaeus, *Henricus*, 126, 267, 268
 Brummerus, *Andreas*, c. 514. d. 71, 73, 80. e. 57, 112, 129, 377
 Brullarus *Praefes*. b. 28
 Brunnerus, *Martinus*, c. 535, 538, 689, 691. d. 71. e. 57, 107, 131, 177, 668. e. 501, 517
 Bruno, *Henr.*, e. 600, 696, 701, 703, 705, 710, 718, 719, 734, 763, 766, 767, 875
 Brunus, *Johannes*, d. 381, 385
 ——— *Antonius*, e. 683
 Brunonius, sive Bruningius, *Christian*, b. 6, 187
 Brustonus, *Matthaeus*, c. 882
 Brutus, *Michael*, 109, 342
 Buchananus, *Georg.*, b. 451
 Buchnerus, *Augustus*, c. 493. d. 9. e. 132, 290, 313
 Bucretius. 436
 Buillaldus, *Ismael*, c. 161, 174, 220, 266, 286, 359, 393, 422, 445, 566, 568, 718. d. 251
 Bullionius. d. 120
 Burchius *Praefes*. 470
 Burgundus, *Nicol.*, b. 443. c. 137
 Burgus, *Franciscus*, 678
 ——— *Petr. Baptif.*, c. 215. e. 436
 Burmannus, *Francisc.*, d. 311, 312, 313, 330, 627
 Busaeus, *Johan.*, 72
 Busbequius, *Augerius*, 1, 26, 179, 460

- Bofchius, *Gabrius*, b. 10
 Bufius, *Paulus*, 12, 13, 46, 84, 124, 217, 221, 223, 277, 344, 363
 Butewechius, *Ger.*, b. 178
 Buxtorfius, *Joh.*, 456. c. 164. e. 627
 Buyckius, *Nic.*, 613
 Buzelinus. 539
 Bye. b. 427
 Bynaes, *Anton.*, d. 395
 C.
 Abeljavius. c. 46
 Cajetanus, *Daniel*, e. 193
 Calixtus, *Georg.*, e. 278
 Calvisius, *Sethus*, b. 469
 Camerarius, *Joach.*, 108. b. 73
 ——— *Joach. fl.*, 765
 Camers, *Joh.*, b. 641
 Cammius. 272
 Campanius. c. 576
 Campanus, b. 288
 ——— *Joan. Anton.*, e. 156
 Campius, *Jacob*, Decanus Bonnenfis. 112, 114, 457
 Cangius, *Car. du Frene*, d. 567. e. 325
 Canisius. e. 539
 Cannobius, *Alexander*, b. 126
 Cant, *Florentius*, d. 169
 Canterus, *Guilelm.*, 5, 6
 ——— *Theodorus*, 191
 Canteri. 579, 581
 Canterorum Familia. 591
 Cantocharus. c. 816
 Capellanus, *Joh.*, c. 495, 500, 523, 525, 535, 806, 814, 815, 835, 875. d. 239, 240, 241, 328, 331. e. 118, 189, 192, 719
 Capoferreus, *Guilelmus*, c. 402, 403. d. 23, 44
 Capacius, *Jul. Caesar*, c. 204, 206
 Capatorta, *Paullus*, e. 742
 Caponius Cardinalis. e. 744
 Capponius. c. 825. e. 754
 Caranta a Miranda, *Batthol.*, 134
 Carcarius. d. 305
 Cardanus, *Hieron.*, b. 375. c. 866
 Cardonus, *Daniel*, b. 787
 Carolus, *Philippus*, d. 11
 Carondoletus. 131, 144, 467
 Carpenterius. c. 717
 Carpzovius, *Frid. Bened.*, d. 400, 401
 Carrion, *Ludovicus*, d. 13, 14, 49, 56, 95, 96, 108, 109, 110, 111, 113, 114, 152, 154, 179, 212, 238, 242, 486, 526, 537. c. 147
 Carterius. e. 660, 661
 Cartefius, *Renatus*, b. 465, 467, 468
 Carus, *Hannibal*, e. 719
 Casalius. e. 204
 Casanova. e. 612, 615, 622
 Casaubonus, *Isaacus*, 257, 384, 407, 546, 553, 581, 640, 641, 697. b. 28, 77. 144, 173, 354, 361, 369, 429, 438, 446, 521. c. 97. e. 208.
 Casaubonus, *Jacobus*, c. 579
 Casaubonus, *Mericus*, c. 82, 197, 436. d. 21, 54, 78, 91
 Caselius, *Johannes*, 125, 268. d. 59
 Cassander, *Georgius*, 137. b. 240. & seq. 281, 283, 293
 Cassandus, *vel Chassannus*, e. 651, 653, 654, 656, 660
 Cassius, *Christianus*, d. 55, 56
 Castalio, *Joseph.*, b. 49
 Castanaeus. 3. 4. b. 309
 Castellanus-Episcopus Matisconensis. b. 235
 Castellio. b. 423
 Catzius, *Jacobus*, b. 455. c. 741, 744, 746, 761
 Cavalcantes, *Andreas*, 9. c. 671, 825
 Cavallerius. e. 193
 Caucius. 142
 Cauchii. 79
 Cauchius, *Joh.*, b. 255. d. 49
 Cecconius, *Alexander*, e. 753, 761
 Cellarius, *Christophor.*, e. 182
 Cellensis, *Petrus*, e. 140
 Celsius, *Magnus*, e. 145, 177
 Chambrejus. e. 723
 Champagnius Baro. 34
 Chapuzellus. c. 453
 Chasseus. 686
 Chavanius, *Jacob. Aug.*, e. 676
 Checus, *Johannes*, e. 45
 Chevenhyllerus. b. 55
 Chifletius. b. 749, 761. e. 100
 ——— *Claudius*, 719
 ——— *Junior.* c. 823, 829
 Chifletiorum Gens. 726
 Chimentellius, *Valerius*, c. 193, 321, 825, 826, 833. d. 53, 66. e. 67, 218
 Chioccus, *Andreas*, b. 122
 Chisius, *Fabius*, Cardinalis e. 493, 731
 Cholinus. 340

Da3

- Danaeus, *Lambertus*, 31, 45, 55, 88.
 Daniel, *Petrus*, 405, 406
 Dathénus, *Petrus*, 34
 Datus, *Carolus*, b. 671, 689, 693. c. 193, 294, 573, 574, 576, 806, 816, 820, 826, 827. d. 409. e. 577, 578, 753, 757, 758
 Daumius, *Christianus*, c. 416. d. 38, 39, 42, 44, 47. e. 269
 Dausquejus, *Claudius*, 104. d. 43
 Deckerius, *Johannes*, 550, 700. b. 169
 Deechbroot, *Laurentius*, b. 42
 Delmanhorstius, *Henricus*, b. 406, 437
 Denaifius, *Petrus*, b. 359
 Delrius, *Joannes*, 513
 ——— *Martinus Antonius*, 74, 105, 223, 247, 251, 380, 405, 555, 682, 700
 Diacetius, *Franciscus*, *Cataneus*. b. 200
 Dialogista. c. 101, 103, 106
 Diemerbroeckius, *Isbrandus*, d. 306, 308
 Dies, *Eduardus*, 218
 Dieft, *Henricus a*, c. 292, 358
 Diffenbachius Baro. 472
 Dnius. c. 460, 461
 Dodoneus, *Rembertus*, 236
 ——— *Remberti fil.*, 315
 Doletus, *Stephanus*, b. 215
 Domannus, *Joh.*, 162, 231, 429, 436, 459, 496, 532, 537, 538, 543, 702
 Donellus, *Hugo*, 31, 45, 57, 88, 119, 124, 218, 271, 278, 317, 338, 347, 365
 Domus, *Joh. Baptista*, c. 163, 167, 172, 173, 174, 175, 177, 182, 187, 190, 193, 258, 567, 573, 574, 579. e. 583, 587
 Dorpius. 686
 Douza, *Janus*, b. 9, 14, 16, 41, 46, 59, 151, 153, 178, 217, 256, 258, 270, 329, 453, 468, b. 340, 388, 392
 Douzae filii. 24
 Douza, *Janus filius*, 24, 224, 698. b. 15
 ——— *Georgius*, 25, 227, 329, 700. b. 71
 ——— *Franciscus*. 590. b. 28
 ——— *Stephanus*. b. 379
 ——— *Theodoricus*. 224
 Drakius, *Franciscus*, 39, 671, 748
 Dresselerus. 260
 Dresserus, *Matthaeus* 64
 Droward, *Ambrosius*, b. 351
 Drusius, *Johan.*, b. 163
 Dubois, *Engelbertus*, b. 13
 Ducacus, *Fronto*, c. 335
 Duchet, *Bartholemaeus*, 564
 Dudithius, *Andreas*, 158, 215, 235, 312, 424, 732 b. 38
 Dullardus. 526
 Durerus. c. 643
 Duretus. b. 60
 Durrius, *Joh. Cunr.*, e. 301
 Dyckius, *Andreas*, 104
 ——— *Grapharius*. 644
 Dyckveldius, *Wede*. d. 10, 54, 58, 75, 76, 79
 E.
 Earlius. e. 766
 Echtius, *Johannes*, b. 256, 266, 271, 274, 279, 290
 Eglisheimius. b. 451
 Egmondus, *Petrus*, 69, 151, 179, 213, 214, 442
 Elichmannus, *Johannes*, b. 598. c. 84. e. 449
 Ellebodius, *Nicasus*, 312
 Ellingerus, *Andreas*, 2, 4, 5, 105
 Elmenhorstius, *Ever.*, e. 780
 Elzevirii, *Ludovici*, negligentia. e. 248
 Elzeviriorum avaritia. c. 70, 82. d. 90. e. 811
 Embertus, *Everardus*, 583, 613
 Emius, *Cornelius vander*, 225
 Emmeneffius, *Jacobus*, d. 566, 567, 573
 l' Empereur, *Constantinus*, b. 620, 661. e. 97
 Engelbertus. b. 787
 Epigrammatarius Gandensis. 27
 Erasmus, *Desiderius*, 137, 575. e. 270
 Erasmi Epigramma. 143
 Erdodius, *Thomas*, 621
 Eremita, *Daniel*, b. 122
 Ernestus, *Coloniensis Elector*. 576
 Erpenius. *Johannes*, b. 621. e. 231, 233, 589
 Erythaeus, five Rossus. e. 193, 574
 Essenius, *Andr.*, d. 493
 Essexius d. 705
 Esychius, *Joh.*, 272, 305, 711
 Everhardi, *Cornelius*, c. 95
 Everardi, *Nicolaus*, b. 208
 Eyckius, *Jacobus*, b. 765
 Eyndius. 581
 F.
 Faber, *Hubertus*, 642, 657
 ——— *Nicolaus*, 103, 406, 445, 646, 650
 ——— *Petrus*, 179, 212, 213, 475, 574, 598, 627, 664, 665
 Fa-

- Faber, *Tanaquillus*, b. 739, 740, 741, c. 414, 418, 420, 422, 457, 462, 465, 467, 468, 474, 770, 810, 814, 834, 847, 858, 859, 861, 864. d. 63, 73, 91, 139. e. 294, 509, 663, 780
 Fabricius, *Henricus*, b. 462
 ——— *Ludovicus*, c. 444, 808, 813, 826. d. 146, 245
 ——— *Vincentius*, b. 527, 536, 544, 574, 575, 584, 588. c. 22, 24, 30, 43, 44, 52, 59, 66, 70, 75, 81, 95, 112, 118, 121, 147, 176, 179, 180, 249, 346, 379, 408, 458, 728. d. 54
 Fabrottus, *Car. Annibal.*, c. 162, 178, 183, 279
 Facius, *Bartholomaeus*, b. 631
 Fagelius, *Casp.*, d. 456, 458, 688
 Fagelii fratres. d. 261
 Falckenburg. c. 819
 Falconerius, *Octavius*, b. 671. c. 492, 537, 545, 821, 826, 834, 841, 851, 852. d. 141. e. 121, 577
 ——— *Paulus*. d. 61
 la Farina, *Martinus*, e. 526
 Farnesius, *Henricus*, b. 89
 Faucerius. 309
 Fauchetus, *Claudius*, 418
 Favoritus, *Augustinus*, c. 826. e. 500
 Fayus, *Antonius*, 418
 Febonius, *Mutius*, e. 433
 Feithius, *Everardus*, e. 249
 Fererius. 527
 Fermatus. e. 614, 626, 627, 649, 651
 Ferrarius, *Bernardinus*, e. 464, 577
 Ferrarius, *Octavius*, b. 603, 605, 709, c. 113, 114, 121, 127, 129, 164, 167, 173, 194, 258, 263, 277, 288, 599, 601, 607, 615, 681, 806, 816, 825. d. 270, 330. e. 542, 735, 742
 Ferronius, *Franciscus*, e. 539
 Fienus, *Thomas*, b. 81
 Figrelus, *Edmondus*, alias *Gripenhelmus*. b. 794. c. 464, 471, 475, 515. d. 75, 79
 Figneroa, *Gursias*, 552. 667
 Findekelder, *Ch. Daniel*, c. 800, 802, 803
 Fisherus. c. 743
 Flaccus Illyricus. b. 237. e. 253, 255
 Flaminius, *M. Anton.*, d. 319
 Flerontinus, *Franciscus*, 487, 524, 510, 552
 Florens, *Q. Septimius Christianus*, 230, 231, 372, 419, 647, 664. b. 315, 323
 Florentius, *Nicolaus*, 129
 Forestus, *Johannes*, c. 599, 606, 620. e. 741
 Tom. P.
 Forgatzius, *Michael*, 610
 ——— *Emericus*, 621
 ——— *Simon*, 622
 Fornelius, *Laurentius*, c. 58, 59, 164, 177
 ——— *Jonas*, e. 58, 177
 Fornerius, *Guilielmus*, 179
 Forstnerus. c. 219
 Fortis, *Jodocus*, b. 99
 Fracastorius, *Hieronymus*, b. 711
 Frambrottus. e. 458, 459
 Franckensteinus. e. 326
 Francius, *Petrus*, c. 514. d. 158, 248, 483, 484, 701. d. 158, 248
 Frederus, *Nathanael*, d. 104
 Freherus, *Marquardus*, 64, 331, 715
 Freimonius Vicecancellarius. 327, 735
 Freinshemius, *Johannes*, b. 607. c. 53, 101, 125, 228, 243, 245, 248, 269, 274, 276, 283, 284, 286, 608, 620, 816. d. 23, 67. e. 665
 Frencelius de Fridenthal, *Salomon*, 732
 Fresnius. c. 644, 646, 651, 673
 Friquetus, *Johannes*, c. 831. d. 53, 54. e. 683
 Frischlinus, *Nicodemus*, 303
 Frisius. e. 90
 ——— *Henricus*, e. 299
 ——— *Nicolaus*, b. 610
 Fruterius, *Lucas*, 7, 14
 Fuchsius, *Leonardus*, 760
 Fuggerus. b. 80
 ——— *Joannes Jacobus*, b. 222
 Furstenbergii. e. 268
 Furstenbergius, *Ferdinandus*, b. 783. c. 378, 476, 500, 820, 844, 859, 860, 877, 888. d. 68. e. 134, 269, 478
 Furstenbergius Doctor. b. 267, 290
 G.
 GAbianus, *Paullus*, e. 192
 Gaddius, *Jacobus*, c. 174, 175, 182, 187, 194, 566, 825. d. 431
 Gail, *Andreas*, b. 241
 Gaille. b. 42
 Galeus, *Thomas*, e. 321
 Galilaeus Galilaei. c. 96
 Galius. c. 673, 746
 Gallus, *Carolus*, 189, 223
 Gardie, *Magnus Gabriel de la*, c. 248
 Gardinerius, *Stephanus*, b. 285
 Gassendus, *Petrus*, b. 631
 Gatakerus. d. 7
 aGauda, *Johannes*, b. 189
 M m m m m
 Gars

- Gaudentius, *Paganinus*, c. 96, 163, 167, 172, 173, 180, 187, 217, 581, 875
 Gaulminus. c. 170, 283, 604, 628, 708. e. 738
 Geierus. d. 679
 Genebrardus. b. 363
 Gentilis, *Scipio*, 581, 764. b. 332
 Gentius. c. 383
 Georgius, *Franciscus*, b. 10
 Geregius Medicus. 136
 Gernandus, *Johannes*, b. 391, 396, 496
 Gerstorffius, *Joachimus*, b. 462
 Gesnerus, *Conradus*, 760
 Gevartius, *Caspar*, b. 539, 761. c. 30, 37, 135, 137, 138, 139, 140, 243, 263, 264, 267, 369, 381, 388, 415, 853. d. 32, 35, 46, 481. e. 92, 93
 Gifanius, *Obertus*, 6. 45, 49, 212, 317, 764. b. 231
 Gifanii filius. c. 820, 824
 Gillius, *Petrus*, 60. b. 233
 Gioli. b. 43
 Gipfon. b. 658
 Giraldus, *Joan. Baptista*, b. 106
 Giselinus, *Victor*, 8, 9, 12. 13, 14, 26, 150, 627. d. 49. e. 268
 Glandorpius, *Johannes*, 266
 Glareanus, *Henricus*, 10
 Gloriosus, *Camillus*, c. 566
 Godellus, *Episcopus Grassensis*. e. 708
 Goes, *Damianus*, b. 222
 Goesius, *Wilhelmus*, c. 218, 306. e. 297, 303
 Goesii. c. 887
 Goethals, *Franciscus*, b. 247, 252
 Goldastus, *Melchior*, 433. b. 166, 359. c. 169, 585
 Golius, *Jacobus*, 363. b. 455, 792, 793. c. 409, 449, 465. e. 601, 604, 651, 654, 665, 666
 ——— *Petrus*, 563
 ——— *Theodorus*, 563
 Gottsfredus, *Franciscus*, c. 820, 823. e. 714, 744, 746, 785
 Goltzius, *Hubertus*, 135, 649. b. 182
 Gomarus, *Franciscus*, b. 380, 467, 478. e. 85
 Gonaea, *Maria*, 736. c. 106, 113
 Gospaeanus. b. 28
 Gothofredus, *Dionysius*, 276, 366, 418, 579, 581, 585
 ——— *Jacobus*, b. 692. c. 100, 303, 812
 Grabius, *Josephus*, 306
 Gradarius, *Annibal*, e. 464
 Gradus, *Stephanus*, b. 703. c. 826. d. 460, 603
 Graevius, *Johannes Georgius*, b. 638, 739, 741, 762. c. 365, 366, 368, 370, 371, 373, 377, 404, 418, 465, 498, 676, 847, 849, 887. e. 111, 115. d. 5. e. 15, 18, 27, 28, 29, 40, 49, 51, 57, 59, 60, 70, 76, 78, 86, 91, 140, 144, 146, 153, 157, 161, 168, 174, 178, 206, 207, 208, 258, 259, 489, 490
 Grantvellijs, *Legatus Caesaris*. b. 224
 Granvellanus *Cardinalis*. b. 241
 Grafwinkelijs, *Theodorus*, b. 526, 527, 567, 569. c. 31, 33, 42, 55, 209, 268, 271, 274, 285, 606, 607, 621, 703, 859
 Gratianus, *Hieronym.*, c. 825. e. 754
 Gravius. 578
 ——— *Theologus*, 287, 626
 ——— *Henricus*, b. 50
 Grenirius. c. 613
 Grentesmenilius *Palmerius*. V. *Palmerius*
 Gretzerus. b. 74
 Greve. e. 325
 Griatius. 442
 Grieffenfeldius, d. 416
 Griepenhelmus, Vid. *Figrelus*
 Grimanus, *Zacharias*, e. 755
 Grinradius, *Otho*, 317, 332
 Groesbeek. 564
 Gronovius, *Joh. Fridericus*, b. 791. c. 572, 593, 671, 702, 704, 719, 728, 729, 738, 787, 788, 806, 816, 818, 821, 887. d. 10, 15, 38, 46, 52, 86, e. 68, 83, 137, 218, 551, 647
 ——— *Jacobus*, b. 696. c. 487, 491. d. 41, 107, 220, 223, 239, 240, 243, 373, 384, 464, 472. e. 121, 150, 155, 157, 220, 223, 315, 327
 ——— *Theod. Laurentius*, b. 656
 Gros-laesus *Lessaeus*, *Hieronym.*, 307, 330, 346
 Grossus, *Januarius*, c. 566
 Grotius, *Cornelius*, 342, 682. b. 589
 ——— *Janus*, 151, 222, 343. b. 63
 ——— *Hugo*, b. 461, 523, 526. c. 33, 41, 86, 166, 793, 812, 813. d. 82, 128, 387. e. 449
 ——— *Guilielmus*, c. 33, 41, 45, 221
 ——— *Petrus*, c. 207, 210, 383, 709, 746, 748, 810, 817, 824, 831, 836, 836, 887. d. 82, 446, 447, 453, 456, 457, 459, 465, 468, 470. e. 123, 127
 Gruterus, *Janus*, 163, 228, 267, 269, 271, 273, 274, 342, 541, 679, 585. b. 49, 167, 377, 435, 540, 641. c. 2, 295, 493, 617. d. 55
 Gruterus, *Isaacus*, c. 887. e. 131
 Grynaeus. 306

- Gryphus, *Bartholomaeus*, 31, 33, 126
 Gryphius, *Johannes*, b. 376
 Gualdus, *Franciscus*, c. 820
 Guarinus, *Baptista*, b. 159
 Guastavinius, *Julius*, 760
 Gudius, *Marquardus*, c. 398, 445, 474, 484, 496, 503, 509, 514, 519, 770, 809, 820, 835, 838, 843, 848, 867, 887. d. 33, 43, 46, 48, 59, 61, 68, 73, 77, 316, 406, 526, 534, 562, 585. c. 7, 18, 52, 200, 218, 225, 509, 478, 553, 650
 Guerrerius, *Franciscus*, 100
 Guichius Comes. d. 53, 56, 117
 Gujetus. c. 353, 361
 Guilielmus, *Jannus*, 13, 49, 151, 152, 178, 212, 628
 Guilielmi, *Joannes*, 691
 Guilandinus, *Melchior*, 250
 Guilleterus. d. 596
 Gujonii. c. 681
 Guldinus, *Paullus*, b. 464
 Gutestein, *Leonhardus a*, b. 50
 H.
HAer, *Paullus ter*, c. 258, 287
 Florentius vander, b. 173
 Hagius, *Cornelius*, c. 100
 Hagmejerus, *Joachinus*, b. 570. c. 67, 70, 76, 81, 788
 Halen, *Hermannus van*, b. 728
 Hallerus. 340, 342
 Hamelmannus, *Hermannus*, 436
 Hanffenius, *Jos. Baptista*, 611. b. 75. d. 390
 Hardy. c. 512
 Harduinus. b. 90
 Harenius. c. 135, 136
 Harlaeus, *Christophorus*, 256
 Hartgerus, *Hanotus*, 60
 Hartius, *Otho*, 166, 173, 282, 288, 291, 292, 293, 295, 681, 693
 Hauchinus. 282
 Hautenus, *Janus*, 16, 41, 42, 83, 219, 220, 221, 224, 286, 362, 582, 682, 685, 698, 696
 Hayus, *Johannes*, 751
 Heidanus, *Abrahamus*, c. 219, 272, 276, 759. d. 416, 564. c. 282
 Heilersichius. b. 566. c. 57, 65, 207, 209, 269, 270
 Heilius, *Wolfgangus*, 5
 Heinsius, *Daniel*, b. 334, 337, 338, 636, 446, 777, 780. c. 20, 40, 83, 86, 91, 92, 758, 759, 761, c. 637, 638, 755, 756, 767, 768, 769, 770
 Heinsius, *Nicolaus*, b. 470, 481, 536, 544, 545. d. 24, 38, 60, 61, 63, 65, 83, 84, 85, 87, 726. c. 267
 Heinzelius. 492
 Hekelius. c. 333
 Helbach, *Wendelinus ab*, 662
 Helmannus. b. 277
 Helmichius. 194
 Hemelarius, *Johannes*, 563. b. 43, 443. c. 137. c. 715, 716
 Henrici IV. *Conversio*. 62, 63
 Henschenius, *Gothofredus*, 67, 85, 786, 787, 789
 Heraldus, *Desiderius*, b. 357. c. 176, 178, 183, 184, 223, 245. d. 32
 Herbinus. c. 124
 Heribertus. c. 457
 Hericurtius, *Julianus*, c. 674
 Hespelius, *Guilielmus*, 188, 190, 191, 193, 693
 Hesselius, *Johannes*, b. 252, 261
 Hesychii editio. c. 115, 346
 Hevelius. c. 85, 92, 93, 94, 99, 602
 Heurnius. 117, 189, 191, 196, 625
 Heussenius, *Hugo Franciscus*, d. 137
 Heuterus, *Pontus*, 740
 Higuera. 444
 Hildensemius. 330
 Hilleprandus, *Johannes*, 738
 Hillus, *Guilielmi*, c. 321
 Hofferus, *Rochus*, c. 775, 776
 Hoffmannus, *Caspar*, c. 219
 Hoffmannus c. 182
 Hogelandus, *Theobaldus*, 315, 326
 Hogerius, *Theophilus*, b. 667, 682. c. 467, 471. d. 41, 50, 67, 119, 261, 410, 412
 Hohenlous Comes. 45
 Hojus, *Andreas*, 662. b. 148
 Holmannus, *Johannes*, 55, 89, 90
 Holmius. c. 299, 418, 638, 661, 674. c. 779, 781
 Holstenius, *Lucas*, b. 785, c. 82, 96, 163, 168, 174, 175, 176, 177, 179, 180, 181, 184, 186, 195, 207, 264, 269, 274, 283, 288, 289, 299, 350, 405, 412, 451, 454, 466, 566, 568, 572, 474, 577, 620, 639, 655, 718, 816, 817, 820, 823. d. 126. c. 479, 480, 487, 533, 696, 743, 746
 Hondemannus, *Conradus*, c. 206
 Honertius, *Rochus*, 578
 M m m m m 2
 Hes

- Honertius Senator. c. 28, 44
 Hoornschuckius. e. 235
 Hopperus, *Joach.*, b. 253
 Hopperus. b. 285
 Hornejus. d. 59
 Hornius, *Georg.*, c. 206, 512. d. 86, 91
 Horstius. b. 273, 278
 Hortensius. c. 84
 Hofchius, *Sidronius*, b. 779, 783. c. 734
 Hospitalius, *Mich.*, b. 60
 Hostus, *Matthaeus*, c. 122, 125, 209
 Hotomannus, *Antonius*, b. 370
 ——— *Franciscus*, 116, 123
 ——— *filius*, 309, 362
 Hovius. 147. b. 142
 Huberus, *Ulricus*, 46
 Huetius, *Daniel*, c. 835. d. 41, 44, 75, 90, 604
 e. 112, 322, 490
 Hugenus, *Christianus*, c. 447, 861, 868, 870,
 878. d. 181. e. 602, 603
 ——— *Constantinus*, c. 869, 878, 879
 ——— *Ludovicus*, c. 865, 868, 869
 Hugo, *Hermannus*, e. 56
 Hulfemannus. c. 416
 Hulfius, *Antonius*, c. 479, 762, 865. d. 400
 Hulfius. c. 45
 Hungerus. 340, 342
 Hunnaeus, *Augustus*, b. 247, 249
 Huylenbroeckius. b. 773, 774, 775
 I.
 Iacobeus. d. 482
 Jamotius, *Fridericus*, 663, 664, 666. b. 43
 Jannigius. c. 207, 209
 Janninius. b. 403, 419, 420, 423, 425
 Jardinius. c. 82, 697, 708, 717
 Idiaquez, *Joannes*, 667
 Jeremias Constantinopolitanus. d. 69
 Illyricus, *vide*, Flaccus.
 Imperatus, *Ferrantes*, e. 134
 Ingolius, *Franciscus*, e. 438
 Intimelius, *vid.*, Aprosius.
 Johannaeus, *Michael.*, b. 458
 Jonas, *Ingramus*, c. 771
 Jonsonius Bibliopola. d. 15
 Jordanus Calaber de Natura equorum. e. 436
 Joffentius, *Joannes*, b. 322
 Isbrandus. c. 526, 806, 884
 Isembardus. 62, 64
 Isendornius. b. 628
 Istanfus. b. 39
 Jungermannus, *Gothofredus*, b. 383, 390
 Junius, *Balduinus*, 290
 ——— *Franciscus*, 193, 223, 274, 581, 585. b.
 49, 475, 483, 586, 685, 618
 ——— *Franciscus fil.*, c. 82, 286, 769. d. 223, 226,
 306, 308, 311, 324, 510, 516. e. 397, 515
 ——— *Franciscus*, c. 238, 240, 241, 245, 246
 ——— *Hadrianus*, Rector Gymnasii, Amste-
 lodamensis. c. 492
 ——— Rector Gymnasii Leidenfis 86
 ——— *Patritius*, b. 593, 594, 597. c. 73, 80,
 81, 82, 168, 643, 748, 819
 ——— contubernalis Graevii. c. 479, 483, 490
 Juretus. e. 328, 335
 Justellus, *Christophorus*, c. 87, 220, 628, 795.
 d. 617
 Juyius. 574
 K.
 K Eckius, *Joannes Christianus*, c. 269, 605,
 618
 Kellerus. d. 79
 Kernerus. c. 45
 Kinschotius, *Caspar*, c. 173, 176, 179, 180, 185,
 207, 209, 210, 214, 230, 244, 697, 699, 701, 703,
 705, 707, 709, 719, 726, 728, 855, 858, 869, 870,
 883, 890
 Kinschotius Senator. d. 268
 Kircherus, *Athanasius*, Obit. 669. c. 176, 828.
 e. 466, 467, 664
 ——— *Conradus*, b. 357
 Kirchmannus, *Joannes*, b. 374, 375
 Klock, *Mattheus*, 342
 Knotteri. b. 622
 Konigius. e. 91, 219
 Krachtius, *Gerardus*, 64
 Kuchlinus, Rector Gymnasii Trajectini ad Me-
 sam. c. 157
 Kuchlinus, *Joannes*, 191, 198, 584
 Kurckius, *Gustavus*, e. 550
 Kurtz a Sentfittenau, sive Curtius, *Jacobus*,
 Vicicancellarius. 320, 326
 L.
 L Abbeus, *Philippus*, e. 225, 229
 Laetius, *Joannes*, b. 352, 620. c. 111, 219
 Lagius, *Matthaeus*, c. 415. d. 25, 26, 33
 Lage sive, Lagenus. c. 658, 663, 671, 673
 Lagerloff, *Petrus*, e. 171
 La Matta. b. 53
 Lambecius, *Petrus*, c. 173, 184, 194, 196,
 207, 286, 478, 568, 572. d. 41. e. 432
 Lam-

- Lambinus, *Dionysius*, 338. b. 60, 307
 Lamertius. d. 40
 Lampsonius, *Dominicus*, 128, 190, 223, 228,
 318, 319, 468, 480, 485. b. 261, 162, 265
 Lampugnani, *Pompejus*, 245, 250, 276, 447.
 b. 14, 84
 Lanchornius, *Daniel*, d. 269
 Landmannus, d. 256, 313
 Langermannus, *Laurentius*, b. 607. c. 144
 Langermannus, *Lucas*, b. 610, c. 236, 258, 279,
 280, 283, 286, 290, 304, 314, 327, 331, 333,
 334, 341, 356, 384, 423, 475, 476, 488, 541, 625,
 626, 627, 808, 809, 827. e. 7, 203, 217, 221, 460,
 740, 746, 760, 761
 Langevoith, *Georgius*, e. 234
 Langius, *Carolus*, 148. b. 306
 ——— *Josephus*, b. 34
 Langius. c. 871. e. 460
 Langlaeus, c. 282
 Languetus, *Hubertus*, d. 580. e. 682
 Lannius, *Jacobus*, c. 115, 118
 Lantinius, *Joh. Bapt.*, c. 835, 840, 684
 Lantius, *Ludovicus*, 728
 Latinus Latinus. 75, 76
 Lavaterus. 91
 Lavinius, *Wenceslaus*, 330
 Launoy, *Rolandus*, 131, 144
 Launois. 95
 Launois. e. 601
 Laurentius, *Bartholomaeus*, b. 113
 Laurinus, *Marcus*, 315
 Lectius. 374
 Leemputius, *Adamus*, 123, 193, 319, 574,
 578, 605. b. 5
 Leersius. e. 143
 Leffinus. c. 825
 Leibnitius. 596
 Leiencronius, *Johannes*, c. 483, 496
 Leoninus, *Elbertus*, 468
 ——— *Quirinus*, 341
 Lernutius, *Janus*, 13, 16, 21, 151, 152,
 627
 Leffius, *Leonardus*, 577. b. 779
 Levineius, *Livinus*, 111, 128, 478
 Levita, *Elias*, b. 363
 Leuwius, *Franciscus*, b. 559
 ——— *Theodorus*, 28, 235
 Leunclavius. 429
 Lewius vel Levius. c. 39, 41
 Licheus Marchio. c. 554, 555
 Licetus, *Fortunius*, c. 96, 191, 777, 622. e. 449,
 451, 748, 749, 762
 Leckerkius. 20
 Liesfeldius. 173
 Ligorius, *Pyrrhus*, c. 258, 577, 615, 633. e.
 204, 405, 133, 280, 739, 764
 Ligorida, *Paisius*, d. 25, 85, 89
 Limogius. c. 446
 Lindanus. b. 273, 278
 Linde, *Laurentius*, e. 101
 Linden, *Johannes Antonides vander*, c. 505. e.
 461
 Lindenbrogius. 695, 735. c. 73, 102, 163, 164,
 506, 582, 791
 Lingelsheimus, *Georg. Michael*, 276. b. 359,
 490, 496
 Lippius, *Laurentius*, b. 326
 Lipsius, *Justus*, b. 360, 405. c. 717, 864. d. 11,
 498. e. 605, 606, 607
 Lipsius, *Martinus*, 96
 Lisetus. b. 302
 Livineus, *Johannes*, c. 291, 293. e. 266
 Liung, *Petrus Ericus*, e. 117
 Loccenius, *Johannes*, c. 228, 242, 247, 248.
 e. 657
 Loenius. b. 628. e. 356
 Loo, *Petrus*, b. 295
 Loredanus. c. 167, 190, 192, 198. e. 154, 156,
 200, 202, 287, 288, 289, 825
 Lotichius, *Petrus*, d. 41, 140, 149, 154
 Lucas. 190, 191
 Ludolfus, *Jobus*, e. 274, 277
 Lundius. c. 584
 Luydius. b. 496
 Luxemburgius dux. d. 120
 Luzzagi, *Alexander*, 754
 Lycopolita, *Alexander*, c. 84
 Lydius, *Johannes*, e. 270
 ——— *Martinus*, 481, 490, 494. b. 476
 M.
 Macarius, *Joannes*, b. 50
 Macedo, *Antonius*, c. 744
 Maccius, *Sebastianus*, b. 158, 186
 Magliabeekius, *Antonius*, b. 693. c. 555, 825.
 d. 91, 317
 Madrucius Cardinalis. b. 51
 Maestertius. c. 389, 667
 Maestro, *Ferdinandus del*, e. 671, 825
 Maetellanus Cancellarius Scotiae. c. 453
 Mm m m m 3 Mæ-

- Maevius. c. 267
 Magallottus, *Laurentius*, c. 825, 853. d. 61, 84.
 c. 157, 322, 525
 Mager. c. 540
 Magius, *Hieronymus*, 314
 Magnanus, *Emmanuel*, e. 623
 Mahomet ben Isaac. c. 554, 557
 Majus, *Thomas*, e. 752, 757
 Malineus, *Carolus*, Senator Antverpiensis. c.
 162
 Mallardus. b. 302
 Mallincrotius. c. 216, 218, 225, 244, 292, 294,
 870. d. 14, 20, 24, e. 24
 Malvasia. c. 677
 Manardus, *Oliverius*, c. 489
 Manilia. d. 62, 63
 Manlius, *Christoforus*, c. 59
 Manmakerus, *Hadrianus*, b. 347, 425. c. 165.
 d. 263
 Mantellus Medicus. c. 223
 Manutius, *Paullus*, b. 116, 323
 Maranus, *Jacobus*, e. 673
 Marca, *Petrus de*, e. 324, 330
 Marchantius, *Franciscus*, 170, 545, 758, 759.
 b. 90
 Marcilius, *Theodorus*, 179, 212, 377. b. 27
 Mare, *Philibertus de la*, c. 835, 840. e. 677,
 591
 Marefchaldus. b. 353
 Marefius, *Rolandus*, c. 282, 331, 705
 — *Samuel*, b. 461. c. 430. d. 174, 257
 Mariana, *Johannes*, 99
 Marianus, *Andreas*, e. 542
 Mariottus. c. 578
 Maripetrus, *Fredericus*, c. 192, 194
 Marneus. e. 670
 Marnius, *Claudius*, b. 521.
 Marshamus. d. 177
 Marfollerius. e. 270
 Martellus, *Petrus Antonius*, c. 753
 Marucellus. c. 825
 Mafius, *Andreas*, 279, 283. b. 280
 Massonius, *Papirius*, 579
 Matalius, *Johannes Metellus*, 58, 603. b. 268,
 269, 270, 271, 279
 Mathisius. c. 494
 Mauritius, *Ericus*, b. 145, 154
 Mauffacus, *Philippus*, c. 96
 Mazarinus. c. 595, 615, 633, 634
 Mediceus Princeps, *Cosinus*, d. 51, 63
 Mediceus Princeps, *Leopoldus*, c. 825. e. 759, 760
 Medonius, *Bernardus*, c. 449. e. 659, 645
 Meer, *vander*, d. 463, 464
 Megalopolitanus dux, *Gustavus Adolfus*, e. 758
 Meibomius, *Marcus*, c. 328, 455, 600, 650, 654.
 660. d. 72, 73, 77, 88, 270, 301, 535, 616, 618, e.
 108, 133, 135, 139, 141, 466, 467, 533, 779
 Melchior, *Georgius*, d. 100
 Meliffus, *Paullus*, 227, 230, 275, 317, 425.
 429. 592, 628
 Mellaesus. 126, 191, 450
 Mellinus vel Millinus, *Benedictus*, c. 823. e.
 516, 530, 532, 538, 540. d. 83
 Memmius. 55, 179. c. 249, 563. d. 611
 Menabenius, *Apollonius*, 315
 Menagius, *Aegidius*, c. 164, 178, 239, 265, 279,
 283, 446, 563, 596, 626. d. 48 e. 84, , 276, 280,
 601, 700, 701, 705, 734, 765
 Menardus. e. 479
 — *Claudius*, c. 90, 160, 700
 — *Joannes*, c. 90
 Mendosa, *Nunnez*, b. 62
 Menetrerius. e. 675
 Meninius, *Jodocus*, 188, 166, 681, 686, 693
 Mentelius. b. 796. c. 285. c. 74
 Mercator, *Gerardus*, b. 284
 Mercerus, *Jofias*, 179, 227, 359, 407. b. 28,
 344
 Mercerus. e. 316
 Mercurialis, *Hieronymus*, 86, 579, 624, 625. b
 123, 139
 Mermannus. b. 79
 Mersennus. c. 700
 Merula, *Paullus*, 191, 192, 194, 258, 274, 695.
 b. 375, 401. c. 258
 Messenius. c. 289
 Metkerekius, *Adolf*, 16, 17, 90, 153 460
 Meurfius, *Johannes*, b. 394, 428, 792. d. 38.
 e. 291
 Meyerus, *Leo*, b. 129
 Meysterus, *Joachimus*, 306
 Mezlerus, *Michael*, c. 251
 Michaeli, *Johannes*, 322, 323, 642, 656
 Michaelius, *Petrus*, c. 289
 Micaultius, *Nicolaus*, 658, 659. b. 11, 48
 Milander, *Johannes*, b. 407
 Mileterius, c. 572
 Milettus, *Vitus*, 595, 623
 Miltonus. c. 259, 270, 276, 286, 307, 595, 596,
 600, 603, 618, 621, 643, 662, 669, 742. e. 713
 Mi-

- Minos, *Claudius*, e. 227
 Minutius de Minutiis. 132, 146
 Miraeus, *Johannes*, 551
 Mirandula, *Picus*, d. 452
 Modius, *Franciscus*, 10, 106, 110, 314, 340, 341, 581, 663, 664, 665. c. 147, 488. d. 77
 Moerentorius, *Johannes*, 167, 180
 Moleschotius. d. 447
 Moliner, *Claudius du*, e. 324
 Molineus, *Johannes*, b. 246
 Molinus, *Dominicus*, e. 679, 681, 682
 Mollerus. 90
 Mollius. c. 719. d. 23
 Mombricitus, *Boninus*, 593
 Monachius, le Moyne, *Stephanus*, d. 174, 429, 438, 439, 570, 589. c. 165, 236, 239
 Monavius, *Jacobus*, 159, 163, 164, 266, 320, 424, 585, 594. b. 38
 Monelia, *Paullus*, 263, 759. b. 75
 Monelius. e. 539
 Monmorantius. b. 32
 Monmorius, *Petrus*, c. 806. e. 592, 593
 Monmuthius Dux. d. 567
 Monschalius, Archiepiscopus Tolosae. c. 619
 Montanus, sive Montagne, *Michael*, 33, 628, 644, 735, 851
 Montanus, *Arias*, 443, 445. b. 117
 Montacutius, *Richardus*, b. 351
 Montius, *Hieronymus*, b. 217
 Montozerius Dux. c. 165, 178, 274, 279, 626, 835, 875. d. 45, 47, 48, 51
 Moraeus, *Paullus*, b. 27
 Morantius, *Thomas*, 381, 421
 Moreelfius, *Henricus*, d. 42, 44, 46
 Morellus, *Fridericus*, 379, 646. b. 848, 502
 Moretus, *Balthasar*, b. 763. c. 137
 ——— *Johannes*, 126, 671
 Moreti Filius. 535
 Morhofius, *Daniel*, d. 55, 56. e. 129
 Morillonius. b. 288
 Morisottus. e. 679
 Morlanus, *Bartholemaeus*, b. 113
 Moronus, *Carolus*, c. 175, 476, 820. e. 478, 479, 498, 500
 ——— *Josephus*, e. 439
 Morfius, *Joachimus*, c. 24
 Morritus, *Johannes*, b. 620
 Morus, *Alexander*, b. 748, c. 200, 295, 303, 305, 307, 311, 313, 323, 364, 365, 369, 380, 386, 388, 643, 647, 649, 651, 658, 662, 665, 748. c. 48
 Morus, *Flaminius*, 668, 670, 676
 Moschus, *Franciscus*, 665, 666
 Mothe Vajerius. e. 601
 Moucheron. c. 286
 Mulenius, *Johannes*, b. 458
 Mulingius, *Johannes Adolfus*, e. 234
 Mullerus. c. 65
 Munckerus, *Thomas*, b. 38. d. 380, 387, 398. e. 159, 160, 252, 329, 428
 Munnosius, *Hieronymus*, b. 116
 Murdisonius. b. 393
 Muretus. 56, 69, 654. b. 116, 124, 453
 Muscambronius. e. 747, 748
 Mutius Berettus Placentinus. e. 368, 369
 Mylius Praeses. 29
 Mylius, *Abrahamus*, 753
 Mylius, *Arnoldus*, 61, 138, 142, 190, 322, 603
 Mylius, *Cornelius*, b. 387, 393, 401, 408, 429, 436

N.

- N Ani. c. 164
 Nanfius, *Franciscus*, 16, 188, 189, 190, 191, 664, 741
 Nardinius. c. 820, 829. e. 498, 504, 508, 516
 Nardius. c. 188
 Naudeus, *Gabriel*, c. 96, 161, 164, 171, 279, 321, 640, 643, 644, 646, 648, 651, 680. e. 579
 Nedercaffelius, *Joannes*, Episcopus. d. 137, 138
 Neostadius. 28. b. 388, 391, 392, 395
 Neuhufius. e. 265
 Nicephorus Melissenus. 570
 Nicius, *Janus*, 96
 Nicolaorum gens. b. 217
 Nicollinus Marchio. 825
 Niegefferius. b. 20
 Nieveltius Advocatus. 49
 Nigrivola. 1.
 Nigronius Lucanus. 667
 Nilandius. c. 225, 228
 Noghera, *Vicensius*, c. 560, 627, 629, 636, 656. e. 745, 746, 748, 750, 756, 759
 Nonius Ludovicus. c. 137
 Noodtius, *Gerardus*, d. 649
 Noomfius, *Guilielmus*, c. 558
 North, *Johannes*, e. 321
 Noritzius. 45

O.

OBrechtus, *Utricus*, d. 147, 325. e. 313, 316

Occo, *Adolfus*, 753. c. 818

Ochinus, *Bernardinus*, b. 230

Oddus, *Gisbertus*, b. 54

Odeschalcius Papa. d. 459

Ogerius. b. 43

Oiselius, *Antonius*, e. 720, 721

Olearius. c. 586

Olivarius, *Seraphinus*, 81

Omalius. 137

Ommerius. c. 759, 775, 776, 887

Oppemius. 549

Oranus. 131, 140, 342, 691, 671

——— *Petrus*, 139, 143, 147

Oricellarii. b. 199

Orionis Etymologicum. c. 506, 526

Ortelius, *Abrahamus*, 424, 429

Ottingerus. b. 211

Otto. b. 277

Dudartus, *Nic.*, 173, 175, 260, 292, 515, 519, 703

Dultremannus, *Henricis*, 694

P.

PAchicellus. c. 853

Paicecus. 667

Paciottus, *Felix*, b. 159

Pallavicinus. c. 823

Palmerius Grentesmenilius. e. 524, 529, 810, 815. d. 49. e. 106, 513

Palmerius, *Jacobus*, 48, 451

Palmirenus, *Laurentus*, b. 116

Paludanus, *Eernardus*, 190, 223

Pamelius. 10, 663

Pantiaticus, *Laurentius*, b. 671. c. 843. d. 452, 453, 460, 462. e. 542, 517, 578

Pantinus, *Petrus*, 94, 96, 77, 97, 103, 442, 527, 726. b. 13, 42

Papius, *Andreas*, 95

Pareus, *Daniel*, b. 522

——— *Philippus*, b. 628. c. 186, 202, 493

Parrhasius, *Janus*, c. 180, 561

Paschalius. d. 8

Passeratus, *Janus*, 10, 179. e. 660

Pastorius. c. 800, 805. d. 320

Patinus, *Carolus*, c. 827, 830, 842, 843, 860. d. 482. e. 717

——— *Guido*, c. 279. d. 139

Paulinus, *Bernardinus*, b. 48, 53

Pavo. 267

Pauwius. 202. b. 455

Pearsonius. d. 54, 95

Peckius, *Petrus*, 691

Peifferus. 64

Peiraredius. b. 473. e. 51, 52, 66, 160, 161, 166, 167, 170, 370. e. 603

Peirescius. e. 343

Pelargus. e. 237

Pelissonius. d. 129. e. 661

Pembrockius comes. 66

Pendafius. 679

Peregrinus, *Camillus*, c. 566, 623. e. 430, 542

Peres, *Marcus*, b. 279

Perecius, *Ludovicus*, 666

Perizonius, *Anton.*, d. 441

Perizonius, *Jacobus*, b. 679, 682, 696, 697, 719, 723, 725, d. 304, 436, 503, 504, 557, 570, 571, 617, 624, 645, 651, 629, 720, 721, 729, 747, 753, 754, 766, 819, 825, 826, 827. e. 327, 329, 330

Perrottus. c. 572

Perfius. b. 87

Petavius, *Alexander*, c. 159, 160, 161, 165, 166, 167, 168, 563, 700

——— *Dionysius*, b. 469, 589. c. 815, 828, 874. e. 334, 703

Petitus Architectus. e. 593

Petitius, *Thomas*, 457, 458, 466, 467

Petitus, *Petrus*, b. 711. c. 867

——— *Samuel*, c. 46, 69

Petrejus. c. 743, 795

Petruccius. c. 816, 817, 825

Pezelius, *Christophorus*, 305

Pezzenius. b. 54

Pflug., *Julius*, b. 240, 266

Philippius. c. 767

Philomathus. e. 265

Phorbaeus. d. 597, 608. e. 402

Phynanus, *Franciscus*, 482

Picardus. b. 302

Picartus, *Mich.*, d. 2. 3

Pierius Valerianus, *Johannes*, b. 793. e. 272

Pigafetta, *Philip.*, b. 84, 62, 74. c. 20

Pighius, *Albertus*, b. 230

Pighius, *Stephanus*, b. 288. d. 756

Pignorius, *Laurentius*, c. 200

Pilius. c. 36, 38, 41, 46, 56, 75, 205, 206, 209

Pincaeus, *Renold.*, 420. b. 315

Pincier, *Ludovicus*, c. 274

Pindemontis Marchio. d. 715

Pine-

- Pinedo, *Johannes*, 553
 Pinedo, *Thomas*, d. 78
 Pinellus, *Joh Baptista*, c. 6
 Pinellus, *Ant. Vincentius*, 250, 261, 321, 322, b. 68. c. 199
 Pifo, *Guilielmus*, c. 362, 887
 Pistorius, *Johannes*, b. 343
 Pithoeus, *Franciscus*, b. 28, 60. c. 792
 ——— *Petrus*, 10, 11, 174, 406, 646, 648
 Planta, *Franciscus*, c. 76, 196, 207, 208, 214, 226, 479, 692, 704, 719, 806, 865
 Plantinus, *Christophorus*, 5, 107, 124, 128, 130, 177, 666
 Plempius, *Johannes*, c. 137, 574
 Plettenbergius, *Theod. Christianus*, d. 154
 Plofius. c. 791
 Politianus. 638. b. 76. c. 258
 Pollinus, *Alexander*, c. 820, 828. d. 412. e. 554
 Pollio, *Everardus*, 115, 272, b. 5
 Polus Cardinalis, 139
 ——— *Laurentius*, b. 87
 Polyander, *Johannes*, 373
 Pomponius, *Arnoldus*, c. 884. d. 118
 ——— *Dandillus*, c. 526
 Pona. e. 455, 461
 Pontacus, *Arnoldus*, 248
 Pontanus, *Johannes*, b. 34
 ——— *Jovianus*, b. 200. d. 233
 ——— *Isaacus*, b. 523
 Portaeus. 421
 Portum, *Jacobus ad*, b. 362
 Possevinus, *Antonius*, 676
 Possinus, *Petrus*, b. 769. c. 96, 192, 194, 280, 823, 834. e. 498, 748
 Posthius, *Johannes*, 107, 108, 274, 422
 Praetorius, *Johannes*, b. 335
 Priamus, *Janus*, b. 56
 Priceus, *Johannes*, c. 654, 662, 669, 816. e. 239, 290
 Prochnicius. b. 178, 178
 Pruchnisky, *Andreas*, 610
 Prunius. 145, 157, 318, 489
 Puffendorffius. d. 608, 322. c. 290
 Pulmannus. 10. c. 141
 Puteanus, *Pozzo*, sive *a Puteo*, *Cassianus*, c. 176, 195, 217, 258, 272, 284, 288, 291, 296, 298, 305, 306, 369, 378, 575, 582. c. 133, 507
 ——— *Tom. V.*
 Puteanus, *Carolus Antonius*, c. 820, 824
 Puteanus, *Christophorus*, c. 792. e. 204
 ——— *Claudius*, 193, 653. c. 282, 559
 ——— *Jacobus*, c. 299. e. 591
 ——— *Petrus*, e. 619, 705
 ——— *Erycius*, b. 11, 12, 15, 68. c. 135, 137, 165
 Puteani fratres. c. 84, 162, 167, 170, 178, 183, 194, 280, 700. e. 433
 Putschius, *Helias*, c. 277
 Q.
 Quernu, *Andreas a*, e. 601
 Quevedo, *Franciscus*, 552. b. 163
 Quinctius, *Fridericus*, b. 10, 85
 Quirinius Licentiatus. 341
 R.
 Rævardus. 212
 Rainerius. e. 257, 295
 Ramirezius. 552
 Ramus, *Petrus*, 368. b. 60
 Ranchinus. e. 675, 647, 648, 653
 Rantzovius. 143, 229, 270, 271, b. 73
 Raphelengius, *Christophorus*, 71, 209, 324
 ——— *Christophorus filius*, 711, 496
 ——— *Franciscus*, 648. b. 326
 ——— *Justus*, b. 48
 Rappoltus. d. 431, 435, 482. e. 278
 Rasarius, *Joh. Baptista*, b. 116
 Ratallerus. 39, 41, 107. b. 215
 Ratlo, *Alexander*, 127
 Ravenspergerus. b. 440
 Ravesteinus, *Jodocus*, Tiletanus. b. 247, 249, 261
 Ravius, *Christianus*, c. 242, 590, 741. c. 145
 Redi, *Franciscus*, c. 825. e. 67, 123
 Reinefius, *Thomas*, c. 128, 131, 200, 256, 258, 267, 290, 291, 295, 310, 312, 315, 317, 602, 806, 834. d. 18, 31, 53, 148, 148, 158, 755. e. 313, 226, 273
 Reinhartus, *Samuel*, 441
 Reinftius. c. 164, 166, 170
 Rellacus. e. 620
 Renaldinus, *Carolus*, e. 603
 Renerius. e. 581
 Rensius. b. 216, 219
 Resander. c. 267, 280, 590, 618, 624, 626
 Rescius, *Stanislaus*, 76, 78, 82, 651. b. 76
 Reva, *Petrus de*, 621
 Revelascus, *Caspar*, 483
 Nnnnn Rhe-

- Rhedigerus, *Nicolaus*, 435, 436, 594
 ——— *Thomas*, 6. b. 38
 Rhedius. d. 618
 Rhenanus, *Beatus*, 10
 Rhetius, *Cornelius*, b. 239
 Rhodius, *Johannes*, c. 96, 164, 165, 167, 173.
 191, 194, 219, 258, 278, 399, 506. b. 606.
 c. 497, 704.
 Rhodomannus. 438
 Richardotus. 22, 167, 281, 292, 489, 516, 571,
 b. 33
 ——— *Junior*. 176
 ——— *Franciscus*, b. 289
 ——— *Petrus*, b. 78
 Richardus Marchio. c. 754
 Richardus, *Johannes*, c. 270.
 Richerius, *Edmondus*, 329
 Richius, *Daniel*, b. 71
 Richter. c. 100, 707
 Riccobonus, *Antonius*, 250
 Rigaltius, *Nicolaus*, 259, 280, 418, 602.
 Rimerius, *Vincentius*, c. 193
 Riquartus. c. 82
 Rittershusius, *Cunradus*, b. 49, 167, 372. d.
 10. e. 125
 Rittershusii pater. b. 332
 Riverius Medicus. c. 317
 Rivetus, *Andr.*, b. 565. c. 220, 698, 700,
 701, 735
 Rivinus, *Andreas*, c. 256, 258, 613. c. 226,
 227, 219, 224
 Rivius, 302
 Robortellus. b. 116
 Rodolphus. 109
 ——— *Cantor Caesaris*. b. 209
 Rogers, *Joachimus*, b. 64
 Rogiers. 142
 Roillardus. b. 173
 Romanus, *Adrianus*, 194, 321, 536, 607, 669,
 682
 Romerus. c. 574
 Rondeletus. 153
 Rondininius, *Natalis*, c. 378, 820, 859. c. 511
 Ronfardus. b. 315
 Rosenbach, *Philippus Wolfius*, 457
 Rosenhan. e. 265, 267
 Rossen, *Valerianus Sigismundus*, c. 725
 Rosweidus, *Heribertus*, 664, 665
 Rotallerus, vid. *Ratallerus*,
 Rotarius. 458
 Rottendorffius, *Bernard*, c. 216, 218, 221, 225,
 237, 244, 256, 265, 268, 290, 304, 310, 387, 389,
 490, 499, 500, d. 15
 Rubenius, *Albertus*, b. 769. c. 137, 140, 243,
 245, 258, 270, 274, 275, 282, 344, 369, 371,
 372, 376, 684, 863. d. 5, 20, 22, 26, 28, 29, 45,
 46. e. 96, 716
 ——— *Philippus*, 176, 631. b. 16, 25, 53, 56,
 88, 162, 176, 749, 780, 770, 771
 Ruccellajus. b. 199. c. 825
 Rudbeckius. c. 72, 75, 76, 83, 98
 Rudingerus, *Esromus*, 3
 Rufus, *Christophorus*, b. 314
 Rulæus, *Ewaldus*, b. 733. d. 243
 Ruifius. 442
 Ruifchius, *Conradus*, e. 571, 572, 573, 574
 Rumpsius, *Constantius*, b. 698, 701, 559, 569.
 d. 277. e. 155, 156. e. 180, 183, 185
 de Rupe. 420
 Rupertus. e. 95
 Rufius, *Albertus*, c. 512
 Ruspigliofus. e. 521, 528, 530
 Rufius. c. 207. 210, 496, 750, 752, 754, 759,
 762
 Rutgersius, *Janus*, b. 715. c. 87, 93, 795, 815. d.
 21, 712, 755, 767, 769, 770
 Ruverius, *Franciscus Maria*, b. 591
 Ruyterus Thalassiarcha. d. 196, 276. e. 99, 316,
 317, 733
 Ruzinus. e. 742
 Ryckius, *Theodorus*, b. 669. d. 107, 276, 277,
 315, 322, 323, 336, 338, 528. e. 133, 223,
 541
 Ryfwyckius, *Rennerius*, 168, 170
 S.
 Sacchettus, *Julius*, c. 473, 475
 Saccus, *Joh. Baptista*, b. 68, 85, 89
 Sadeel, *Antonius*, 372
 Sadlerus, *Joannes*, 135
 Sadoletus, *Jacobus*, b. 230
 Sagittarius, *Caspar*, d. 140
 Sala, *Jos. Ant. Gonfales de*, c. 271
 Salanus, *Petrus*, c. 17
 Salmasius, *Claudius*, b. 465, 466, 467, 468,
 478, 482, 704, 789, 794. c. 85, 124, 125, 160,
 176, 178, 183, 203, 204, 209, 213, 218, 219,
 223, 239, 244, 245, 247, 252, 258, 259, 267,
 270, 274, 283, 284, 286, 288, 291, 295, 297,
 299, 307, 313, 323, 329, 494, 427, 592, 606,
 621, 634, 661, 666, 697, 698, 704, 710, 721,
 741,

- 741, 812, 840, 874. d. 253, 239, 757. e. 438,
 441. 442, 685, 599, 600, 582, 585, 586, 709,
 711
 Salmafii uxor. c. 598, 608
 Salvagnius v. Boeffius.
 Salviatus Dux. e. 695, 754, 757. 761
 Samarthanus, *Scaevola*, 218
 Samblancatus. c. 615, 627, 628
 Sambucus, *Johannes*, 1, 319. b. 284
 Sanctamantius. c. 632
 Sanctius, *Franciscus*, 667. b. 59, 115. c.
 498
 Sandelinus. 204, 205, 688, 690, 697, 698
 Sangeorgius. b. 106
 Sangius. 607, 609
 Santandreas, *Johannes*, 647
 Santinius. e. 566, 567
 Sarravia, *Adrianus*, 45, 364, 610
 Sarravius, *Claudius*, c. 158, 159, 160, 161, 166,
 168, 183, 207, 250, 259, 263, 264, 266, 286,
 575, 614, 617, 698, 700, 737, 792, 792, 795.
 d. 10. e. 639, 581, 700, 737
 Sassenus, *Andreas*, 287, 293
 Saubertus. c. 30
 Savillus. 407. b. 354
 Saxonius, *Johannes*, b. 242
 Scala, *Bartholomaeus*, d. 482
 Scaliger, *Josephus*, 19, 49, 55, 56, 61, 75, 87,
 109, 121, 160, 179, 190, 191, 192, 194, 195,
 196, 198, 212, 204, 208, 213, 229, 255, 257,
 324, 329, 331, 372, 405, 406, 411, 418, 465,
 539, 546, 598, 625, 626, 647, 650, 671, 680,
 682, 686, 690, 691, 693, 694, 997, 698, 699,
 700, 701, 717, 741, 744, 745. b. 36, 60, 125,
 307, 322, 323. 418, 427, 469, 471, 506, 709.
 c. 34, 73, 124, 221, 223, 258, 620, 815, d. 49,
 50, 87, e. 155, 425
 Scaliger, *Julius Caesar*, 26, 359, 646, 650.
 b. 60
 ——— *Sylvius*, 359
 Scepperus, *Isaacus*, c. 834
 Schazzius. c. 503. d. 58, 59, 64, 391, 292, 448.
 e. 654
 Schefferus, *Johannes*, b. 668, 701. c. 242, 258,
 327, 415, 497, 502, 506, 514, 528, 573, 539,
 541, 689, 770, 823, 828, 829, 832, 832. d. 38,
 39, 44, 47, 48, 50, 60, 67, 75, 77, 324, 325,
 330, 407, 601. e. 270, 227, 163, 164, 176,
 177
 Schegkiius. 342
 Schelius, *Radb. Hermannus*, b. 612, 715. c. 211,
 212, 216, 228, 229, 234, 243, 249, 263, 281,
 284, 347, 382, 391, 480, 612, 860. d. 22, 35, 36,
 37, 38, 39, 40, 41, 47, 50
 Schertlingius. c. 787, 789, 790, 792
 Schetlingius. 732
 Schmilinus. 735
 Schilterus, *Johannes*, d. 484, 485
 Schioppius, *Caspar*, 764, 765, 766. b. 104, 105,
 412, 418. b. 49, 327, 331, 335, 338, 361, 362.
 c. 96, 165, 217, 219, 573, 574, 710, 817, e.
 413
 Schnabelius. d. 615, 642
 Schobingerus, *Tobias*, c. 175, 200
 Schonerus, *Lazarus*, b. 120
 Schoockius, *Martinus*, b. 487, 580. c. 99,
 112, 463, 503. d. 69
 Schoonhovius, *Johannes*, 671. b. 238
 Schotanus, *Christianus*, c. 412
 Schotenus. e. 603
 Schottus, *Andreas*, 93, 157, 158, 159, 442,
 446, 537, 715. b. 33, 118, 354. c. 109, 221, 223,
 294
 Schottus Senator. c. 28
 Schragius, *Joh. Adamus*, b. 607. c. 52, 68,
 101
 Schrevelius. c. 874
 Schultingius, *Johannes*, b. 638. d. 46, 48, 50
 Schubartus. e. 313
 Schuurmanna, *Anna Maria*, c. 601. d. 88
 Scondoncus. 663
 Scotus, *Jul. Clemens*, e. 762
 Scribanus, *Carolus*, 245, 249, 251, 384, 553,
 628, 700
 Sriverius, *Petrus*, b. 406, 414, 438, 453, 536,
 538, 543, 549, 567, 571, 790, 791. c. 35, 209,
 582, 586, 587, 591
 Sefeldius, *Georgius*, c. 770
 Segethus, *Thomas*, 751
 Seguerius. 381. c. 192
 ——— *Hieronymus*, 421
 Seguinus, *Petrus*, c. 834. d. 87. e. 785
 Seienus. d. 565
 Seldenus, *Johannes*, c. 70, 73, 80, 81, 543,
 742, 744
 Semperius, *Andreas*, b. 116
 Sengeberus. c. 95, 162, 700, 701, 703
 Sentlebius, c. 218, 220, 227
 Septalius, *Ludovicus*, b. 12, 69, 84. 89
 Serarius, *Nicolaus*, 250, 606, 670. b. 363
 Nnnnn 2 Ser-

- Serlius. 157
 Servinus Advocatus Regius. b. 344
 Servius, *Petrus*, c. 175, 176, 193, 269, 574
 Severolus Abbas. b. 671
 Sexagius. 155
 Seystius, *Nicolaus*, 388, 436
 Sfondratus. c. 564. e. 445, 544
 Sfortia Cardinalis. 104
 Sidnejus, *Philippus*, 218, 277, 311
 Sienauwskii, *Procopius*, 610
 Signejus, *Jobus*, 622
 ——— *Nicolaus*, 622
 Sigonius, *Carolus*, b. 116. e. 125
 Silerius. 373
 Slingelandius. c. 383, 395, 395, 887
 Slingelandius, *Franciscus*, c. 137
 Silva, *Johannes*, 93
 Silvercroonius, *Joh. Philippus*, 117
 Simo Simonides. b. 71. d. 410
 Simon, *Theodorus*, b. 371
 Simon. e. 329
 Sincliticus, *Alexander*, e. 454
 Sirletus. 58
 Sirmondus, *Jacobus*, c. 287, 572, 596, 827.
 c. 219, 224, 703
 Sixius, *Johannes*, c. 496, 617, 767
 Sixtinus. b. 525. c. 238, 240, 258, 267. 295,
 577
 Sixtinus, *Suffridus*, c. 28, 40
 Skenaeus. 453
 Slupetius. 582
 Slufius, *Franc.*, d. 83, 87. e. 118, 530, 531
 Smetius, *Henricus*, 274, 315, 412
 ——— *Johannes*, five Smithus. b. 524, 526,
 527. c. 191, 201, 269, 271, 575. d. 12
 Smith, *Thomas*, d. 270
 Solicovius, *Demetrius*, b. 65
 Sommalius, *Henricus*, b. 182
 Sopingius, *Godofredus*, e. 115
 Sorbierius. e. 601
 Spagnetus. c. 452
 Spangenbergius, *Cyriacus*, 662. c. 545. e. 544,
 546, 554, 575
 Spanochius. 679
 Spanhemius, *Ezechiel*, c. 474, 860. e. 478,
 486, 490, 495, 719
 ——— *Fridericus*, b. 457. c. 132, 213, 215,
 217, 220, 581, 841. d. 465, 465, 469. d. 61, 74,
 77, 81, 94, 538, 603, 667. e. 214, 289, 295, 397,
 392, 391, 557, 683, 644, 687, 688
 Spehnerus. d. 151
 Spencerus. d. 270
 Spiegelius, *H. L.*, 633
 Spinosa, *Benedictus*, d. 475
 Spiringius. 184
 ——— e. 267, 639, 643
 Sponius, *Carolus*, d. 554, 579. e. 331
 Stanlejus, *Thomas*, 512
 Stapletonius. 302, 488, 608, 609. b. 48
 Stanihurstius, *Richardus*, 93, 602
 Starrenberg, *Richardus Baro a*, 320
 Statilius, *Marinus*, d. 229. d. 1. e. 296, 530
 Statius, *Achilles*, d. 468, 396
 Steenbergius, *Joh. Baptista*, b. 774, c. 887. d.
 74, 77, 454, 458
 Stenemola, *Rumoldus*, b. 239
 Stephanus. c. 593, 864
 Stephanus, *Henricus*, 25, 101, 110, 179, 438,
 473, 609, 638, 640, 641, 676, 708, 734, 737. b.
 326, 515. c. 864
 Stewartus, *Petrus*, 340
 Stewechius. 591
 Stolzenbergius Baro de Kalenberg, *Paulus*,
 d. 66
 Stopius, *Nicolaus*, 628
 Strada, *Famianus*, c. 172. e. 580
 Strangius. e. 142
 Stratenus. c. 3, 76
 Stratius, *Johannes*, b. 231
 Strauchius. d. 209, 210
 Strevelshoek. c. 393
 Strochelius. d. 225
 Strotius, *Carolus*, b. 527
 Strozza, *Carolus*, e. 754
 Strozus, *Ludovicus*, c. 825
 Stryckius. d. 456, 460, 462, 468
 Stuckius, *Johannes*, 91, 546
 Sturlesonius. c. 124
 Sturmius. 339
 Suberinus, *Johannes*, 455
 Succa, *Laevinus*, 59, 62
 Suerius, *Philippus*, 589
 Suffridus, *Petrus*, 58, 61, 66
 Surita, *Hieronymus*, e. 553
 Surlus. 593. b. 148
 Susius, *Daniel*, 536
 ——— *Jacobus*, 232, 247, 306, 536
 Sylburgius, *Fridericus*, 270, 735
 Sylvius Aeneas. e. 314
 ——— del Boc. d. 151

- Sylvius, *Lambertus*, d. 201.
 Sypesteinius. d. 588
 Syrenius, *Julius*, d. 469
 Swartius, *Eustathius*, b. 515. c. 71, 73, 186, 169
 Swartzmajerus. 735
 T.
 TAbassius, *Jo. Anton*, e. 433
 Tarquetus. 261
 Taurellus, *Jacobus*, b. 289
 Tegnagelius, *Georgius*, b. 143
 Tellitzonus, *Franciscus*, b. 135
 Templius. 185
 Templius. d. 705
 Tennulius, *Samuel*, c. 413, 422, 448. d. 782, e. 153, 223, 543
 Terharius, *Paullus*, c. 479
 Terrentius. b. 372, 375
 Tertius, *Laurentius*, 754
 Thevenotius, *Melchizedecus*, c. 535, 537, 546, 551, 552, 853. d. 77, 81, 87, 249
 Thienius. d. 86
 Thomas Montalbanensis. e. 614
 Thomassinus. c. 192
 Thomafius. c. 224, 347
 Thomson, *Georgius*, 618
 ——— *Richardus*, 232. b. 344, 351. c. 2
 Thorius, *Raphael*, b. 438
 Thourinius, *Georgius*, 131, 144, 146, 147
 Thriverius, *Hieremias*, 739
 Thuanus, *Jac. Augustus*, 229, 379, 553, 561, 562, 651, 672. b. 27, 48, 438. c. 369, 385, 771, 817, 820, e. 595, 591, 603; e. 715
 Thulerius. c. 766
 Thyfius, *Antonius*, c. 345, 423, 512, 765, 746, 758, 796
 ——— *Jacobus*, 423
 Thyfiorum familia. 423
 Tiarda, *Eitzon*, b. 398
 Tilius. b. 237
 Tinnius. 673
 Tintius Abbas. c. 622
 Titius. c. 75
 ——— *Robertus*, 75, 186, 250, 716. b. 87
 Tollemannus Pomeranus. 61, 604
 Tollius. c. 221
 ——— *Cornelius*, b. 629. c. 254, 255, 263, 266, 292, 600, 620. d. 34, 96
 ——— *Jacobus*, c. 266, 492, 542, 690. d. 34, 36, 37, 39, 42, 162, 169, 172, 484, 485, 494, 570. e. 53
 Tolotius, *Adamus*, 582
 Tomafinus, *Philippus*, c. 369, 385, 771, 817, 820. d. 8. e. 452, 454, 464, 588
 Tonares, *Simon*, 667
 Toricellus, *Euangelista*, c. 193. e. 597
 Torrentius, *Laevinus*, 10, 96, 128, 129, 130, 159, 179, 260, 279, 282, 468, 580, 572, 591
 Tottius. c. 799. e. 784
 Tregianus, *Franciscus*, 294
 Trellschius. d. 738
 Tremolius Dux. c. 671
 Triglandius. d. 798
 Trifanus Sanctamantius. b. 761
 Trifanus. c. 139, 818. e. 692
 Trompius. e. 95
 Trotius, *Camillus*, b. 10
 Trutius, *Antonius*; Lyranus. 58, 193, 942
 Tryft, *Antonius*, Episcopus Gandensis. b. 631
 Tuldenus. c. 137
 Tulpus. c. 700
 Tuningius. 191, 231. b. 325, 324, 395, 415, 417, 427
 Turnebus, *Adrianus*, b. 60. d. 10, 12
 ——— *Stephanus*, b. 27
 Turnerus. 340
 Turrianus, *Raimundus*, b. 53
 Tutinus, *Camillus*, c. 566. e. 430
 Twifdenus. c. 687
 V.
 Valentia, *Petrus*, 667
 Valerianus, *Pierius*, e. 782
 Valckenarius. d. 61, 200, 201, 250, 255, 351, 405
 Valerius. c. 137
 ——— *Flaminius*, b. 126
 ——— *Cardinalis*. b. 124
 ——— *Hadrianus*, c. 259, 266. e. 57, 701
 ——— *Henricus*, c. 277, 282, 563, 602, 607, 615, 626, 649. d. 81, 431, 433, 435, 617. e. 97, e. 101, 321, 238, 502, 695, 701
 Valle, *Horatius de*, b. 49
 Vallengis, five de Vallibus, *Hieronymus*, e. 249, 250
 Valtrinus. 101, 104
 Vandeville, *Petrus*, 183. b. 123, 259, 262, 274, 275
 Nnnnn 3
 Var-

- Varchi, *Benedictus*, b. 315
 Varicius. 713, 747
 Vaferus, *Caspar*, 492
 Vaslovius, *Johannes*, b. 778
 Vasques, *Michael*, 552
 Vatierus. c. 649, 654
 Vavaffor, *Franciscus*, b. 800. d. 90, 652
 Veen, *Simon van*, 686
 Vegetii de Mulomedina MSS. c. 449, 450
 Velasquius. b. 87, 105
 Velastegius. 723
 Velferus. 164, 753, 648, 354, 355. c. 322, 329, 344, 345
 Velfius. b. 237
 Velthufius, *Lambertus*, d. 206, 207, 208, 209, 212, 213, 215, 215, 257, 657
 Venius, *Cornelius*, 124, 131
 ——— *Otho*, 124, 131, 626, 618. b. 94, 414
 ——— *Petrus*, b. 87. 686, 687
 Vergerius, *Paullus*, b. 631
 Verjus. c. 852
 Vernuleus. c. 137
 Vellingius. c. 167, 173, 177, 222, 229
 ——— *Joh. Mauricius*, c. 237
 Vezzanus. c. 193
 Viarius. e. 743
 Vicecomes, *Joannes Maria*, c. 564
 Vicomercatus. b. 61
 Victorius, *Petrus*, Petri Pronepos. c. 96
 Vieta, *Elias*, c. 431, 449
 Vigius, *Carolus*, 718
 Viglius Suichemius. b. 255
 Villerius. 468
 ——— *Dionysius*, 41. b. 76
 ——— *Franciscus*, b. 170, 181
 Vincentius, *Petrus*, c. 744
 ——— *Philippus*, c. 159, 279
 Vintimilia. 288
 Virdungus, *Michael*, b. 333. c. 30, 32
 Vivianus. 157, 455, 526
 ——— *Carolus*, c. 126, 388
 Vizzanius, *Aeneas*, 670. b. 123
 Vlitius, *Janus*, b. 709. c. 57, 142, 174, 181, 182, 185, 181, 188, 200, 267, 268, 462, 478, 492, 524, 526, 593, 601, 855, 864, 878, 881. d. 43. c. 154, 92, 93
 Voetius, *Gisbertus*, b. 465, 566. e. 290
 ——— *Johannes*, d. 462, 463. 465, 640
 Voittius. 274
 Vondelius, *Justus*, b. 791
 Voogdius. 221
 Vorspulus, *Petrus*, 641
 Vorstius. b. 590
 Vorstius, *Adolfus*, 76, 183, 503, 505
 ——— *Conradus*, b. 435, 446
 ——— *Johannes*, d. 109, 132, 140, 147, 149, 160. e. 146
 Vossius, *Gerardus Johannes*, b. 440. c. 693
 ——— *Gerardus*, c. 42. d. 83, 94
 ——— *Dionysius*, c. 95
 ——— *Johannes*, b. 623
 ——— *Isaacus*, b. 686, 744, 746, 789. c. 40. 97, 142, 166, 170, 198, 206, 207, 208, 210, 214, 220, 221, 228, 241, 244, 248, 250, 256, 266, 289, 291, 292, 295, 297, 298, 300, 301, 302, 307, 311, 324, 329, 338, 339, 354, 365, 367, 392, 399, 401, 463, 466, 474, 461, 503, 504, 506, 509, 524, 681, 682, 730, 767, 770, 859, 870. d. 32, 35, 46, 102, 103, 178, 247, 258, 282, 322, 325, 528, 574, 575, 611. e. 13, 25, 56, 29, 153, 461. 289, 599, 666. b. 30, 634, 697, 698
 ——— *Franciscus*, b. 546
 Vredius, *Olivarius*, b. 648
 Urbanus VIII. e. 711
 Ufferius, *Jacobus*, e. 198
 Ursinus, *Fulvius*, 70, 75, 76, 592, 637. b. 39, 49. c. 777
 Ursinus Virginius. b. 79
 Vuila, *Christianus de*, b. 123
 Utenhovus, *Carolus*, 60, 61, 62, 64, 603
 Uytenbogardus. e. 676
 Vulcanius, *Bonaventura*, 188, 329, 362, 447, 672, 693, 697, 741, 743. b. 254, 326, 343, 353, 395. c. 223
 Vulcanius, *Petrus*, b. 254
 W.
 Wacherus Wachenfels, *Joh. Matth.*, 427, 430, 438, 439, 624. b. 48
 Wagenfeelius. d. 339. e. 274, 342
 Walaeus. c. 82, 217. e. 448
 Waldeckius Comes. d. 322
 Wallius, *Jacobus*, b. 785. c. 857, 859. d. 31
 Walle, *Hadrianus vander*, c. 105, 207, 696, 697, 704, 706, 718, 718, 728, 730, 806. d. 43. e. 270
 Wal-

Walravius. 29
 Wamefius. b. 91
 Warnerus, *Laevinus*, b. 657
 Wafferbachius, *Ernestus Casimirus*, 436
 Waffellus, *Ludovicus*, b. 774
 Wechius. 274
 Weedius. Vid. Dyckveldius.
 Wehers, *Johan. Adam.*, e. 182
 Weems a Voerda. b. 92
 Weitzius, *Johannes*, b. 511. e. 219
 Werckhovius. 579, 58
 Werdenburgius, *Cornelius*, 423
 Wesembecius, *Matth.*, 274, 435. b. 290
 Wevelinchovius. c. 749
 Weymannus. c. 837, 858
 Wezius, b. 286, 287
 Wicelius. 58, 137. b. 263, 271
 Wicquefortius, *Joachimus*, c. 559, 560, 564,
 587, 624, 693
 Wilag, *Peregrinus*, b. 295
 Wilthemius. 678. b. 786
 Wiltius, *Henricus*, 69, 70, 118, 120, 122, 202,
 272. b. 5
 Wincelius. vid. Wicelius
 Wingius, *Philippus*, 533. b. 7
 Wingius, *Hieronymus*, b. 7
 Winterfonius. d. 69
 Wintwodus. b. 435
 Witt, *Johannes de*, d. 115, 116. 124, 217
 Withakerus. 253, 608
 Witte, *Nicolaus*, b. 794
 Witrendellus, *Petrus*, 261, 262

Wittenius. c. 777
 Witze, consul Amstelodamensis. c. 887. d. 38
 Wolfius, *Hieronymus*, b. 462
 Wolowiczius. 717
 Wolzogius. d. 178
 Wouwerius, *Joannes*, Antverpiensis. b. 179,
 189
 Wouwerius, *Joannes*, Hamburgensis. b. 28,
 121, 345, 348, 356, 446, 556. c. 37, 506.
 d. 9
 Wouwius Eques. c. 588
 Wullenius. c. 257, 274, 607, 610, 613, 630,
 631, 677, 682
 Wurtzius. b. 740

X.
 X Andrinus, *Johannes Clemens*, b. 174
 X Ximenius, *Petrus*, 60, 61, 62, 129. & seq.
 130. b. 253, 257. & seq.

Y.
 Y Varra, *Stephanus*, 723, 725

Z.
 Z Anden, *Nicolaus vander*, 468
 Zerotinus Baro. 330, 338
 Zeubelius. b. 253
 Zeveldius. c. 587
 Zinzerlingus. c. 248, 364
 Zoefius, *Thomas*, 12, 125, 217, 233, 342,
 670
 Zuylichemius. c. 699, 701, 769, 184, 185,
 e. 49
 Zylius, *Otho*, b. 783

F I N I S.

I N.

I N D E X I I I . R E R U M E T V E R B O R U M .

A:

- A** & Ω. a. 609
 Ab pro *Post.* d. 802
 Abdias de vitis Apostolorum. e. 247
 Abducere a studiis. d. 349
 Academia in aula Suecica erecta. c. 658
 — Bredana. c. 709
 — Harderovicena. c. 186. 188
 — Leidensis Batava, a. 188, 194, 198,
 203, 612, 682, 685, 687. c. 217, 530, 757, 769
 — Lovaniensis. b. 408, 409. a. 487,
 488, 612
 Academiæ in Hispania status. a. 553
 Academici Otiosi Neapoli. c. 566
 de Academiis Catholicis edictum Batavorum.
 a. 39, 46, 64, 613, 683
 Accentus in particulis. a. 331
 Achates Tiberianus. b. 770
 Achilles, *Achillus*, & *Achilleus*, d. 121. 124. 126
 — Tatiæ auctior vulgato. b. 489
 Acre telum. d. 96
 Actor teli. d. 58
 Acuta crux. a. 634
 Ad stellas facere. e. 388
 Addere gradum. c. 501
 Addicere. d. 643
 Adfligere pro infligere. d. 707
 Adjectiva in *idus*. c. 272
 Adolfus Joannes, frater Caroli Gustavi. c. 803
 Adfentiendi formula. d. 2
 Adscisci in Coloniam. c. 486
 Adstrictus. d. 232
 Advocatio. e. 349
 Advocatoris munus apud Venetos. c. 288
 Aeger, cum Genitivo. d. 352
 Aegyptius Deus. b. 718
 Aegyptiorum Lingua vetus. b. 478
 Aeliani opus ineditum. e. 17
 Aemulari pro imitari. d. 173
 Aeneae errores. d. 802, 803
 Aequicus, ab *Aequis*, c. 107
 Aequus, pro Aequali. d. 132
 Aera militaria. a. 612
 Aere & libra. b. 547
 Ardenburgi Obsidio. d. 121, 122
 Aether, ultima brevi. c. 884
 Actis, e. 201, 202
 Age porro. d. 198
 Agnomina. d. 767, 678
 Agrippina, Germani uxor. d. 130, 135
 — Neronis mater. d. 130
 Alastor. c. 663, 669, 870
 Albategnius. b. 335
 Albertus Austriacus Cardinalis. a. 103
 — ejus nuptiae cum Isabella. a. 548
 Album amicorum. b. 644
 Aleppo. b. 234
 Alexander Lycopolita. b. 733
 Alexandrinum Museum. b. 78
 Alexias, Annae Comnenae. c. 175. 179, 182,
 185, 192. & seq. 291, 575, 741
 Algere. e. 219
 Algeriana expeditio, b. 107
 Aliquis & Alius confusa. d. 788
 Altaria & arae. b. 714. & seq.
 Altor & auctor. d. 289
 Amberlandia. b. 244
 Ambianum oppressa. a. 174
 Ambō pro ambos. d. 121, 124
 Ambrones. b. 243
 Ambrosiana Bibliotheca, b. 15, 85. c. 165, 199,
 564, 571, 578
 Amersfortii obsidio. d. 115
 Amisfa. c. 53
 Amphitheatrum honoris Bonarscii. a. 384, 386,
 553. b. 173, 360
 Amphitheatrum Burdegalense. b. 186
 Amphitheatra reliqua. b. 147
 Anabaptistae. b. 295. & seq.
 Anacreon auctior vulgato. c. 411
 Ancyranum Marmor. a. 313
 Anfridus Episcopus Ultrajectinus. b. 141
 Angli. a. 139. c. 639
 Anglicanae puellae historia rara. b. 136
 Anglorum imperium in Belgas. a. 278
 — inhumanitas in externos. b. 594
 — luxus. a. 38
 Anglicum bellum. c. 746
 Annus Judaicus. b. 365
 Ante diem. b. 561. & seq.

An

- Anthologia MSS. b. 490
 Antichristus. c. 705
 Antiptosis. c. 212
 Antiquarius an fuerit Lipsius. a. 164
 Antoninus Liberalis Munkeri. b. 655
 Antonius Mufa. b. 724
 Antonius Rex Portugalliae. a. 259, 747
 Antverpiae datum templum Catholicis. a. 30
 Antverpiensium Jesuitarum MSS. b. 773
 Antverpiensium convivium. b. 42
 Apellas Judaeus. b. 465
 Apicii Codex MS. c. 566
 Apologia pro Erasmo. c. 870, 871
 Apollo atrox. b. 140
 Apostolis donum linguarum datum. b. 463
 Appiani Alex. Anecdota. d. 69
 Apronia Gens. e. 193
 Apuleji codices & editiones. a. 362
 ————— editio Elmenhorstii. e. 783
 Aquae Grani. a. 187. c. 136
 Aquilae Romanae quales. b. 151
 Arabes Medici. a. 440
 Arabicae voces literis Hebraicis. b. 318
 Arabici Characteres. b. 353
 Aradius Rufinus. b. 728, 732, 787, 788
 Arausionensis Wilhelmi I. caedes. a. 186,
 244
 Arbutum & Arbutum. e. 120
 Arctica, pro, Arctoa. c. 477
 Aretias insula. e. 353
 Argypa. c. 489
 Aries Heilbronensis. b. 192
 Aristotelis Paraphraeses. b. 401
 ————— Politica. d. 2
 Arminii & Gomari colloquium. b. 416
 Arnobii editio. c. 239
 Arolii Comitatus evasio e carcere. a. 751
 Arquites. e. 769
 Arrianus. e. 60
 Arriani Dissertationes sunt Epicteti. a. 127
 Arschotani Ducis uxor Hagae mortua. a.
 329
 Artorius Medicus. b. 705
 Arundeliana Bibliotheca. c. 62
 Arufianus Messus. c. 184, 569, 579
 sub Ascia dedicare. a. 61
 Asconius Pedianus. a. 61
 Asia minor. b. 232
 Asini in tutela Vestae. d. 256
 Architrenius. e. 226
 Tom. V.
- Affyriorum & Babyloniorum Chronologia. b. 168
 Afterii & Affyrii. b. 728, 730, 787, 788. e.
 193. & seq.
 At pro ad. d. 237
 Atellana. d. 136
 Atheismus in aula Christinae. c. 338
 Athenaeus Casauboni. a. 374
 Atlantis Blauviani descriptiones sunt Jac. Tol-
 lii. d. 34
 Atrox, pro animoso. d. 130
 Attalus d. 773, 775
 Attica dicta *negra*. d. 254
 Avaritia bibliopolarum. b. 630. c. 27, 70, 161,
 169, 260, 268, 525, 533
 Auctor libelli de somniis c. 9, 13
 Auctor & altor. d. 289
 Audere d. 772
 Audiens dicto alicui, non alicujus. c. 151. &
 seqq.
 Augustinus de civitate Dei MSS. Scriverianus.
 b. 617
 Augere pro generare. d. 294
 Avitus Sirmondi. e. 223, 226
 Aulicorum animus erga studia. a. 470
 de Aurelio Victore iudicium. a. 28
 Austriacorum potentiam vaticinatus Lipsius. a. 60
 Austriacae familiae imagines Pragâ translatae in
 Sueciam. c. 602
 Axenus. c. 402
 Azymus in S. Coena. b. 459
 B.
B & v. commutatae. e. 366
 Babaecali. c. 518
 Babyloniorum & Affyriorum Chronologia. b.
 168
 Bacchanalia. c. 704
 Bacchus latuit apud Thetis. e. 199
 Balsamum. e. 716. & seq.
 Barbarossa Mytilenus. b. 212
 Bardevicum. b. 244
 Barlaamius de primatu Papae. b. 494, 496
 Baronii Monarchia Siciliae. b. 174, 185
 Barthii Cludianus. c. 731
 Basilea. a. 117
 Batavi Poetae. c. 112, 114, 199
 Batavorum edictum de Academiis Catholicis.
 a. 39, 46, 56, 613, 683
 ————— foedus cum Elizabetha. a. 259
 ————— libertas in scribendo. b. 338
 ————— Mores. a. 200
 O o o o o Ba-

- Batavorum navigatio in septentrionem. a. 209.
 b. 109
 _____ in orbem novum. a. 684.
 _____ de pace cum Anglis & Hispanis
 tractatio. a. 299
 _____ res militares laudatae. b. 106
 _____ Status miser. a. 39, 46
 _____ Victoria ad Caput bonae spei. a.
 301
 Batavis jusjurandum injunctum. a. 150
 _____ Rusticitas exprobat a Heinio. c. 726,
 728
 Batta. e. 374
 Bavarica aula. b. 79
 Baubari. e. 409
 Belgium a Gallis occupatum. d. 113. & seqq.
 Bellaciorum familia. c. 767
 Bellum Anglicum. c. 746
 _____ Bremense. c. 333
 _____ civile in Gallia. c. 284
 _____ inter Genevenses & Sabaudum. a.
 492
 _____ Maurorum. b. 177
 Bentivolius. a. 621, 628
 Berengarii vita carmine scripta. e. 704
 de Bernartii Statio iudicium. a. 708
 Biblia Islandica. c. 770
 Bibliorum Belgicorum errata. c. 759
 Bibliopolarum avaritia. b. 630. c. 27, 70, 161,
 169, 260, 268, 525, 533
 Bibliotheca Ambrosiana. b. 15, 85. e. 165,
 199, 564, 571, 571
 _____ Altempfiana. c. 627, 616
 _____ Arundeliana. b. 81
 _____ Bongarsiana. c. 200, 506, 812, 815,
 818
 _____ Bremensis. c. 585
 _____ Cantabrigiensis. b. 351
 _____ Christinae Reginae Bruxellam de-
 vecta. c. 679
 _____ Colonienfis. d. 15
 _____ Corvini. c. 886
 _____ Erphurtenfis. d. 19, 26, 33
 _____ Goldasti. c. 569
 _____ Holfatiae Ducis. c. 506, 582, 585
 _____ Luneburgensis Ducis. c. 587
 _____ Mazzriniana. c. 597
 _____ Memmiana, quam emere voluit
 Christina. c. 161, 257, 259, 600
 _____ Meursensis cujusdam. d. 13
 Bibliotheca Oxoniensis. b. 351
 _____ Petaviana empta a Christina. a. 162,
 168, 259, 267, 591, 604
 Bibliotheca Tholosani Archiepiscopi. c. 620
 _____ Sangallensis. c. 200
 _____ Urbineusis. c. 396, 566
 _____ Vossiana cessit Christinae. c. 221,
 223, 675
 _____ Wouwerii. c. 506
 Bibliothecae Anglicae. c. 81
 _____ Florentinae. c. 96, 163, 171, 565
 _____ Francofurtensis & vicinarum ur-
 bium. d. 142
 _____ Italicae. c. 163
 _____ Neapolitanae. c. 180, 181, 566
 _____ Parisienses. c. 563
 _____ Romanae. c. 289, 561
 _____ Venetae. c. 190, 575
 Bibliothecarii rudes. c. 575
 Bielke, Steno, c. 805
 Bigas statuere. a. 458
 Biria. b. 243
 Bivilles. e. 369
 Blanckardi plagium. b. 649
 Blitho Sulpicius. a. 342
 Bodecheri MS. cesserunt Heinio. c. 71
 Boecleri Terentius. c. 359
 Boëtia in Thracia. d. 730
 Bohemiae Principis Philippi facinus. c. 703
 Bona opera. b. 252
 Bongarsiana bibliotheca. c. 200, 812, 815, 818
 Bonna capta. a. 34
 Bononiae laus. a. 677, 724
 _____ status. c. 571
 Boyus, satyris profcissus. c. 729
 Brabantiae ordines. a. 644, 645
 Brain le Chateau capta ab Hispania. a. 572
 Bredanae Academiae initia. c. 709
 Bremenfe bellum. c. 333
 Brementia MSS. donata Reginae. c. 244
 Brevis & longa vocalis coalescentes. b. 212
 Bucca, Bucca, quot sunt hîc? ludus. c. 375
 Buchingami ducis statuac. c. 588
 Burdegalenfe Amphitheatrum. b. 190
 Burchii, Lamberti vander, Historia Sabaudiae.
 c. 499
 C.
 CAdalifac. b. 733
 Cadere, de fragore & tonitru. c. 82
 Caduceatores. b. 643

- de Caesare, *Julio*, iudicium. b. 201
 Calicis usus in Eucharistia. b. 294
 ——— permissus Cliviensibus. b. 291
 Camerarii, *Joachimi*, epistolae ineditae. b. 460
 Campani. d. 136
 Canis, pro catena ferrea. d. 101
 Cannea sagitta. b. 153
 Canonicis Ultrajectinis interdicta administra-
 tio reipublicae. a. 496
 Cantabrigiensis Bibliotheca. b. 351
 Cantus Germanorum & Gallorum. c. 152
 ——— euntium in praelia. d. 164
 Capite tecto an aperto cibum ceperint Romani.
 a. 495
 Capitonis Fonteji nummus. a. 447
 Capfarius. d. 194, 197
 Carmen & crimen confusa. d. 4
 Carondeletorum familia. a. 467
 Carolus Magnus de imaginibus. b. 256
 ——— V. a. 725
 Caroli I. Angliae Regis caedes. c. 211
 ——— II. Inauguratio. c. 767
 Carolus Gustavus Sueciae Rex. c. 803
 Carpere oscula. d. 303
 Cartesiana Philosophia. b. 463
 Caryophyllatae. c. 649
 Casauboni Adversaria. a. 385
 ——— Athenaeus. a. 375
 ——— Persius. a. 381
 ——— Polybius. a. 375, 385, 386
 ——— de Satyrica Poësi a. 385
 Castus, de Sacerdote. b. 669
 Castigo. c. 2
 Cateja. b. 155, 157
 Catholici impetrant templum Antverpiae. a.
 30
 Catomis objurgare. d. 477, 478, 480
 Cathedrae. b. 645
 Catholica religio. a. 711
 Catholicon. c. 538
 Catulus, catena ferrea. d. 101
 Celsi Rhetorica. c. 623, 632
 Cenotaphia Pisana. b. 134
 Centonarius. e. 376
 Cestrosphendona. c. 1
 Cestus. b. 2
 Chemici libri. c. 585
 Chemiae studium. a. 146, 143
 Chirothecae. b. 709
 Chilodovaeus idem qui Ludovicus. a. 240
 Christina, *Augusta, & Alexandra*, b. 763, 765,
 769, 789, 793. c. 114, 216, 227, 233, 240,
 241, 246, 350, 338, 352, 455, 474, 506,
 510, 527, 616, 626, 629, 633, 637, 658,
 678, 679, 681. & seqq. 757, 759. e. 695,
 699, 700, 709, 712, 772, 773, 774
 Christinae humanitas in N. Heinsium. c. 770
 Chronica Idaci, Georgii Episcopi, Marcellini &
 Prosperi. b. 347, 349
 ——— Judaica. b. 366
 Chronologia Assyriorum & Babyloniorum. b. 168
 Chronologica. b. 373
 Chrysostomus de Circo. a. 648
 Chrytraei, *Nath.*, porismata in Ciceronis Epi-
 stolas ad Atticum. a. 491
 Ciceronianus Erasmi. b. 202
 Ciceronis consolatio supposititia. a. 238
 Ciconia, Iannae genus. c. 5
 Cinnami Historia. c. 620
 Citharoedus Italus. c. 657
 Civitas pro gente, republ. d. 673
 Clamor regii sanguinis Al. Mori. c. 646, 746
 Claudianus Barthii. c. 731
 ——— Chymicus. e. 436
 Clerici, *Joh.*, turpis error. c. 706
 Clientes, Clientae. c. 216, 218
 Clusius, *Carolus*, Leidam invitatus. a. 314
 ——— non benigne ibi habitus. a. 326
 Coctus pro maturo. d. 462
 Codini codex plenior edito. b. 568
 Coemptionales senes. c.
 Coena sine Azymo. b. 458
 Cognatio. d. 768, 774
 Cognomina. d. 759, 760, 763, 764
 Colere arva, an recte dicatur. d. 227
 Collegium Leidae conditum. a. 188, 194, 198
 ——— Lovanii Jesuitis condidit Torre-
 tius. c. 487
 Colloquium Possiacum. b. 259
 Colonia. b. 243
 ——— Equestris. a. 458, 587
 ——— Patricia. a. 458, 586
 ——— ad Spream. b. 244
 ——— Trevirorum. a. 586
 Colorati. a. 235
 Columellae codex MSS. c. 162
 Comes Mursensis. a. 269
 Comitis Egmondarum filius. a. 744
 Comestabuli Gubernator Mediolani. b. 8.16
 Committere sacra, ludos, iudicia. c. 392
 O o o o o 2 Com

- Communicatio & confirmatio in Eucharistia. b. 250
 Communio sub una specie. b. 251
 Concilium Tridentinum. b. 369
 Concionatorum licentia. c. 704
 Condaeus Princeps. c. 284
 CONOB. & TROBS. in nummis. c. 372
 Consolatio Ciceronis falsa. a. 238
 Conspiratio in Jacobum, Angliae R. a. 295, 302
 ——— in Magistratus Leidenses. a. 45, 364
 Constrati currus. e. 114
 Contentus cum Genitiv. d. 96
 Contingere, pro illinere. b. 525
 Conventus doctorum Romae. b. 216
 ——— Lunaeburgensis. a. 269
 Convivium deorum in Suecia. c. 664
 Convivia Antverpensiū. b. 42
 ——— Hamburgensiū. c. 798
 Coquere, pro torrere. d. 463
 Cora, pro cura in MSS. d. 149
 Corytus. e. 101
 Cornua pro genis. e. 370, 374
 Corona capi. a. 464
 Coronatio Imperatoris. a. 2
 Corripere, pro accusare, deferre. d. 143, 155, 162
 Corruptor. d. 151, 721
 Cortracensis clades. c. 360
 Corvini Bibliotheca. c. 880
 Corvus oracula dabat. b. 730
 Cosmae Indopleustae Typographia. c. 652
 Craffae paludes. d. 285
 Cossus Consul. b. 382
 Credere diligentiae, bonitati. c. 246, 250
 Covini. d. 435, 441. e. 114
 Creta. d. 707
 Crinen & carmen confusa. d. 4
 Critica studia. a. 113. c. 3, 16, 34
 Critici. a. 199
 ——— Londinenses Sacri. c. 406, 407
 Crotalia. d. 470
 Crusii & Frischlini rixae Grammaticales. a. 303
 Crux Christi, & Salmasii sententia. c. 721
 Crucis forma. a. 649
 ——— Supplicii modus. a. 661
 ——— Signum. a. 643
 de Cruce Scriptores. a. 445
 Cumulare in gregem. d. 253
 Cura pro regimine. d. 368, 769. e. 780
 ——— pro amore. d. 149
 Curatores Academiae Batavae. c. 757
 Currus strati & constrati. e. 114
 Curtii aetas. b. 626
 de Curtio iudicium. a. 626
 Cybele. d. 792
 Cycladum mel. c. 507
 Cygnus. c. 108
 Cymbalistria. d. 412
 D.
 DAmasceni, *Joh.*, homiliae. d. 444
 Dani legatione a Batavis invitantur. a. 681, 713
 ——— Iniquiores Batavis. a. 170
 Daniae Rex. a. 299
 Damas & Dama. e. 376
 Dasypus. e. 351
 Daventriae pestilentia. c. 351
 Daventriensis Gymnasii status. b. 628
 Daventrienses studiosi ludos scenicos agentes. c. 292
 Davidis de Pomis Lexicon. b. 363, 366
 Davidica Medicina. b. 45
 Dedicare sub ascia. a. 611
 Dedicaciones ad captanda munera. c. 511
 ——— Germanorum. a. 270
 Deducere. b. 704
 Defendere aliquid alicui. d. 301
 Defixio magica. b. 705
 Degenerare. d. 774
 ——— cum quarto casu. d. 299
 Deliberare, pro delibrare. a. 53
 Deliniri, pro incantari. d. 705
 ——— pro illecebris capi. d. 745
 Delrio in Thuanum scripsit. a. 551
 ——— periculosa ejus navigatio. a. 543
 Demetrianæ. a. 618
 Demetrius Phalerius & Phalereus. e. 89
 Demissis labris. e. 412
 Dena nox, pro decima. b. 211
 Depensare. d. 783
 Depilare. e. 375
 Dequeri. c. 392
 Διαβολαι. a. 638
 Dialectici Graeci. b. 202
 Dicaearchus de Graecia. b. 310
 Dicta, pro facetiis. e. 29
 Dictata Lipsii in Anglia vulgata. a. 193
 Dictator Romanus. b. 383

Didymus de Plantis ineditus. c. 162
 Differre & disjicere per valles. e. 167
 Dimittere militare verbum. d. 726
 Diphthongus in voce Graeca brevis. c. 530
 Disinctus, pro legibus soluto. d. 344
 Disciplina Ecclesiastica. a. 82
 Discrimen sapientis & plebis. a. 705
 Disjicere per valles. e. 167
 Distendere. b. 212
 Distinctiones novi testamenti. b. 459
 Ditmarus Reineccii. a. 266
 Diu, ultima communis. b. 212
 Diva Hallensis, & Sichemensis &. b. 142, 177,
 182, 184, 359, 361
 Dividi, obscaeno sensu. e. 375
 Divitas, pro divinitas. a. 609
 Divona & Doveo. b. 190
 Docti viri an in Germania. a. 267
 Doctores Leidæ creandi modus. a. 188
 Doesburgi ad Isalam obsidio. d. 115, 116
 Domesticus Jupiter. b. 666
 Domifeda. d. 605
 Domus luxuriae. d. 364, 366. e. 23
 — pro proximis, familia. d. 808
 Dordracena Synodus. b. 452
 Donare aliquem alicui. e. 420, 421
 Dore. d. 638
 Dorelai caedes. c. 213, 215
 Doristadium. b. 244
 Draco Satanas dictus. a. 246
 Duaci pestilentia. a. 20
 Dux de imperatore Romano. d. 738
 Duisburgi descriptio. d. 17
 Duo, pro duos. c. 888. d. 121, 124
 E.
E & I. confusae. e. 89
 — pro I. in nummis. e. 196
 Ebo numen Neapolitanorum. b. 708
 Ebusus. d. 461, 462
 Ecclesiae corruptus status. b. 447
 Ecclesiastica disciplina. a. 82
 Edictum Ordinum Batavorum de Academiis
 Catholicis. a. 39, 46, 64, 613, 683
 Editiones cum notis variorum. b. 633. c. 243
 Effigies, pro umbra. b. 669
 Effluere active. e. 406
 Ego vero, pro immo. e. 382
 Elatus metaphorice. d. 372, 374
 Elector Palatinus vinum donat Nic. Heinio
 & Isaaco Vossio. c. 809

Electoris Palatini & Lotharinguae Ducis con-
 troversia. c. 836. & seq.
 Elephas. a. 60
 Elizabetha Angliae Regina. a. 751
 — foedus facit cum Batavis. a. 259
 Ellipsis verbi contrarium significantis. d. 704
 de Eloquentiae ruina. e. 605. & seqq.
 Elzeviriorum sordes. b. 630
 Emanare active. e. 406
 Emancare. c. 189
 Emereri, pro mereri. d. 408
 Empedocles. b. 735
 Empedoclea Sphaera. b. 315
 Enitescere. d. 794
 Eo & & confusa. d. 372
 Epici Poetis sententiae datae a monachis. c. 293
 Epictetus auctor dissertationum sub Arriani no-
 mine. a. 127
 — ejus Enchiridion. b. 362, 472
 Epigrammata in Papam. c. 708
 Ἐπισύνιον, supercilium. d. 359
 Epistola Lipsii de pace & induciis. a. 207, 692
 Epistolae amicorum an publicandae. b. 76
 — Wouwerii contra Elmenhorstium. c. 60
 Epona. d. 255, 256
 Equestris Colonia. a. 458
 — fortuna. a. 222
 Erasmi Ciceronianus. b. 202
 — effigies Roterodami statuta. a. 185
 — Juvenilia. b. 376
 pro Erasmo Apologia. c. 870, 871
 Erigere toros. d. 427, 433
 Erinnae carmen. a. 232
 Ernestus Austriacus. a. 470, 713
 Erphordia. d. 17
 Erphordiensis bibliotheca MSS. d. 17, 26
 Error. d. 745
 Est, omissum saepe. d. 771, 772
 Et & eo confusa. d. 372
 — pro etiam. d. 372
 Etesiae. d. 709
 Ethices studia. b. 3
 Etymologiae studia. c. 771
 Exterior comes. b. 719, 723, 724
 Euangelium Matthaei. b. 643
 Eucharistia. b. 250
 Eucherii Glossarium. e. 557
 Eugraphius Terentii Scholiastes. b. 348
 Eugubinae tabulae. b. 289
 Eumenes. d. 773, 775

Eusebius Scaligeri. c. 620
 ——— Codex MSS. Chronici. a. 243
 Euthalius de vita Pauli. e. 234
 Exemplum, pro fabula. d. 585
 ——— pro supplicio. e. 41
 Exigere. d. 433
 ——— alicui poenas, pro persolvere. d. 722
 Expeditio Algerina. b. 107
 Expergere. d. 316
 Expectare & spectare. b. 529
 Expugnare, pro expellere. d. 569
 Exsilium leniter ferendum. b. 442
 Exta secta. d. 297
 Εφαπτε. b. 710

F.

F & P. permutatae. d. 334
 F. Fabarii pro incantatoribus. e. 369
 Facies loci, sinus &c. d. 351
 Facere Poëta dicitur, qui alios facientes inducit. e. 394
 ——— culinare verbum. e. 396, 420
 ——— pro dicere. e. 420
 Factiones in Ttansisalania. c. 335, 337
 Fallax Aequor, fallaces epulae. d. 295
 Farnesianus Thesaurus. e. 826
 Farnesii Ducis Parmensis mors. a. 285
 Fata obstant. d. 373
 Fax Historica Lipsii. a. 148
 Fenestras in nova domo amici donant Lipsio. a. 488
 Ferrario, *Octavio*, torquis cum nummo a Christina data. c. 601, 617, 623
 Fessus senio, de re inanimata. d. 103
 Festina & fortuna confusa. d. 351
 Fictus, pro fixus. c. 39
 Ficus condiendi ratio. d. 462
 Figere. b. 553
 ——— rostro. e. 83
 Fila puellae praeeparabant. d. 541
 Filia pro alumna. d. 148
 Fingere, pro affingere. d. 210
 Flaminius an Flamininus. a. 460
 Flammaris. c. 7
 Flegyas. e. 369
 Florentinae bibliothecae. c. 565
 Flores ferendi modus. a. 325
 Foenus & Usura. b. 576
 Fontanus comes. a. 730
 Fortuna & festina confusa. d. 352
 ——— equestris an sequestris. a. 229

Franciae status. a. 62
 Francofurti non grati peregrini. a. 316
 Frigus & gelu extraordinarum. c. 703
 Frischlini & Crufii controversiae Grammaticales. a. 303
 Frisii nundinationis munerum rei. b. 727
 Frugia, pro Phrygia dea. b. 714
 Frugifer sol. b. 713
 Fucus & Succus. c. 225
 Fulgentii codex MSS. c. 696
 Fumus, pro caligine. d. 425
 ——— pro vaporibus. d. 425
 Funus, pro pompa funebri. d. 536, 539
 Furca, unde vorck. a. 163
 Furca traducti nocentes. d. 101

G.

Gabalus, unde Galg. a. 163
 Gaesum. a. 155
 Gale, *Joh. van*, vincit Anglos navali praelio. c. 314
 Galeae cum cristis. a. 152
 Gallia & Lutetia. c. 792
 Galliae Regis munificentia in eruditos. c. 523, 806
 Gallorum cantus. a. 152
 ——— Poëmata colligere & edere voluit Lernutius. a. 8
 Gallinaceum lac. e. 376
 Gallus Gallinaceus Penthiacus. e. 381
 Gaufridus vel Gaufredus de vino Salvo Anglus. e. 243
 Garizim & Hebal. a. 285, 287
 Gassion. c. 698
 Gastrum. e. 354
 Gelrica Historia Slichtenhorstii. c. 776
 Genesius Scriptor Byzantinus, e. 346
 Genitiva nomina. d. 806
 Genitivus de motu ad locum. e. 400
 Genevenses inter & Sabaudum bellum vc. 492
 Gennadius, T, recensitor Martialis. b. 523
 Gens pro familia. d. 808
 Genus pro liberis. d. 303, 304
 ——— pro fabularum genere. e. 29
 ——— pro genere humano. d. 585
 Georgii Episcopi Chronologia. b. 347, 349
 Germania placebat Lipsio. a. 669
 Germani canunt facta illustria. a. 152
 ——— Dedicaciones scribere solent. a. 270
 ——— Negligunt humanitatis studia. a. 126
 Giza opposita Saxosis. d. 282

Glig-

Gliscit regnare. d. 103
 Gloria de gl' incogniti. c. 190
 Glossae in MSS. c. 73
 ——— Isidori. c. 558
 Glossarium Eucherii. c. 557
 ——— Macri. c. 55, 78
 ——— Jo. Monachi. b. 347
 ——— H. Stephani. a. 587
 Glycae annales. a. 444
 Goldasti Bibliotheca. c. 568
 Gomari & Arminii colloquium. b. 417
 Graecae Linguae studium. b. 329
 Graecis de studiis iudicium Lipsii. a. 376
 Grammaticales lites inter Crusium & Frischli-
 num. a. 303
 Granatensi de bello Poëma. c. 642
 Gratio adscriptum halieuticon. c. 695
 Grati, pro Graji in MSS. d. 254
 Gravia capta. a. 38
 Gravis, pro incommodo, oneroso. d. 289
 ——— pro aegro. d. 349, 355
 Grotii carcer & exsilium. b. 441. & seq.
 ——— liber de veritate Religionis. b. 441
 Gujeti Terentius. c. 359
 Guilielmus I. Arausionensis. a. 30, 214
 ——— II. c. 248, 704, 724, 731
 ——— III. in Academia Leidenfi operam
 dat studiis. c. 769
 ——— a Transisalanis creatur praefectus. c.
 758
 Gymnasium Daventriense. b. 628
 ——— Mediolanense. b. 85
 H.
HAbere, pro regere. d. 553
 ——— & obire confusa. d. 221
 Hackii avaritia & sordes. d. 533
 Haereses de sectis Philosophorum. d. 234, 236
 Halieutica adscripta Gratio. c. 695
 ——— Spuria. a. 442
 Hallensis diva. b. 142, 177, 182, 184, 359, 361
 Hamavchae matronae in lapidibus. a. 451, 457
 Hambeck. a. 452
 Hamburgensium convivia. c. 798
 Harderovicena Academia. c. 286, 288
 Harpocrates. d. 495
 Harpocratiani. b. 711, 712, 714
 Harpocratonis editio. b. 651. & seq. e. 701
 Harpyiae. e. 350, 352, 533
 Hartii, *Othonis*, filius. a. 577

Hebal & Garizim. b. 285, 287
 Heidelbergae, Myrtilatum, & unde dicta. a.
 274, 330
 Heilbronnensis aries. b. 192
 Dan. Heinsii & Salmasii inimicitiae. b. 472,
 479. c. 85
 ——— infirmitas memoriae. c. 758, 759
 ——— mors. c. 335, 340
 Heliodorus auctior vulgato. b. 487
 Hellenistica lingua. b. 464, 473, 478
 Henrici III. Regis Galliarum caedes. a. 412
 Henricus Julius Brunsvicensis. a. 733, 735
 Heronis Strategica. a. 94
 Hiantia lumina. d. 155
 Hieremia Patriarcha. c. 399
 Hierosolymitanum templum. b. 640. e. 169
 Hilaria. b. 718
 Hirundines. e. 93
 Hispanicae Academiae. a. 553
 Hispaniae status, in literis, re militari &c. b.
 113, 114. c. 553
 Hispanorum inertia. a. 448
 Historiae Augustae a Sylburgio editae. a. 344,
 349
 ——— MSS. in bibliothecis. c. 639, 641,
 644, 648
 Historicum studium. a. 4
 Hoc, pro huc. d. 92
 Hojum capta. a. 573, 576, 687
 Hollandorum studia literarum lapsa. c. 211,
 216, 246
 Holmiae incendium. c. 650
 Holsatiae Ducis bibliotheca. c. 508, 582, 583
 Homerus deus. b. 668
 Homeri laus. a. 672, 675
 ——— Scholiastes Vossianus. c. 421, 424
 Honorus. d. 479
 Hoogstratia occupata a. 295
 Hortator in puppi. e. 54
 Hosta, pro honesta in MSS. d. 163
 Huetii demonstratio Euangelica. e. 730
 Hugenii habuere codices Lipsianos. c. 372, 375,
 377
 Hugnotae. b. 264
 Hulsta obsessa & capta. c. 698, 699
 in Hungaria gesta. a. 621. b. 39
 Hyacinthus. c. 131
 Hyele dictae Velia. c. 491
 Hysopus. c. 721

I.

- Iacobus I. a. 302, 751. b. 44, 110
 Jactare. d. 264
 Jacturae. b. 609
 Iare pro hiare in MSS. d. 155
 Icaria. b. 731
 Idaci Chronicon. b. 357, 348
 in *Idus* nomina adjectiva. c. 272
 Jesuitae. a. 147, 245, 250. b. 774, 779. c. 170
 ——— mittunt adoloscetes in Angliam. b. 43
 ——— e Gallia ejecti. a. 652
 ——— vexant Lovanienses. a. 488
 Jesuitarum odium in Scaligerum. a. 700
 ——— Antverpiensium MSS. b. 773
 Jesuitis collegium Lovanii condidit Torrentius.
 a. 487
 Ignorantia cujusdam Anonymi. a. 269
 Illetum, pro illicetum. c. 139, 142
 Illudere. d. 77
 Imagines an Romani sub regibus habuerint. a. 53
 ——— Austriacae familiae Pragâ transla-
 tae in Sueciam. c. 612
 ——— Mortuorum in pompa funebri. d.
 221, 222
 Imaginum cultus. b. 253
 Imaginis jus. d. 636, 641, 642
 Imitatio veterum scriptorum. b. 200
 Immaturus, Sc. imperio. d. 368
 Immittere habenas. d. 344
 Immunes veterani. d. 381
 Immunis mali. d. 388
 Immunitas ab excubiis in Academia Batavia. a.
 681
 Impalationis supplicium. a. 484
 Impatiens irae. c. 112, 114
 Impellere. d. 372
 Impraesentiarum. c. 53
 Imus olympus. d. 522
 Inachus. d. 42
 Incedere summoto. b. 607
 Incendium Holmiae. c. 650
 Incentor. c. 466
 Incitatus, pro vehementi. d. 365
 Index in Ovidium. c. 101
 India major & minor. b. 680
 Infantes abluti & fasciis involuti. b. 727
 Inferre salutem. c. 469
 Infertores. c. 405
 Infligere securim. d. 707
 Influere active. c. 406
 Infulae. d. 175
 Ingenia Paedagogica. b. 451
 Inhibere remos. b. 557
 Inimicitiae inter D. Heinsium & Salmasium.
 b. 472, 479. c. 81
 ——— inter Salmasium & Isaac. Vossium.
 c. 637. & seq. 653
 Inscriptio Graeca. b. 363
 Inscriptiones veteres. c. 258, 294. d. 97. d. 203,
 204, 206, 565, 566
 ——— missae Reinesio. c. 291
 ——— Smetii crematae in ejus aedibus. b. 49
 Insidere arena. d. 559
 Institutio mala istius temporis. a. 719
 Intranscripti. a. 458
 Invidere. d. 211, 214, 217
 Invitare somnos. d. 424
 Ire, pro mori. c. 380
 Is in accusativo plurali pro *es*. d. 59
 Isabellae Austriacae & Alberti nuptiae. a. 548
 ——— superstitio. a. 296
 Islandica biblia. c. 770
 Italia effoeta. a. 107
 Italicae Bibliothecae. c. 163
 Italica peregrinatio. c. 717
 Jubarum stemma. b. 145
 Jubere cum quarto casu. c. 406
 Judaei invenerunt machinas. b. 156
 ——— Poloni. b. 70
 Judaeorum annus. b. 365
 ——— Chronica. b. 366
 ——— & Lacedemoniorum cognatio. a. 611
 Judicare verbum medicum. b. 686
 Judicium, pro facultate judicandi an Latine di-
 catur. c. 267, 262
 Judicium de Aurelio victore. a. 28
 ——— de Caesare, Curtio, Livio, Sallustio
 & Tacito. b. 201, 202
 ——— de Kinschotii Poëmatibus. c. 885
 ——— de Machiavello. b. 4
 ——— de Ovidio. c. 714
 ——— de Statio Bernartii. a. 708
 Julia lex. d. 426
 ——— Julia templa, rostra. c. 365
 Junii, *Fran.*, Manilius. a. 411
 Julii Africani *xiol.* a. 93
 Juncus, pro proximo. d. 571
 Juno hospita. a. 459
 Jupiter Domesticus. b. 666
 ——— Syrius. a. 459

Jus magistratum in Sacra. b. 435
 Juvenalem promisit Hadr. Valesius. 701
 Juvenes. d. 800

K.

K Agge, *Laurentius*, c. 809
 Kalendarium ante Ovidii Fastos. c. 714
 Kalendaria Musulmannorum, Persarum & Syro-
 rum Christianorum. e. 589
 Késér Julii Africani. a. 93
 Kinschotii, *Casp.*, poemata. c. 885
 Kinschotius a Gallis Quinxiotius dictus. c. 809

L.

L & R. confusae. c. 132
 Labris demissis. e. 412
 Lac Gallinaceum. e. 376
 Lacedaemoniorum & Judaeorum cognatio. a.
 611
 Lacerari corpore. d. 478
 Lactari amore. d. 250
 Laetus. d. 745
 — de arboribus. d. 641
 Laminae in Magicis. b. 705
 Lampsonii filius. a. 577
 Lances. e. 402
 Laneus, pro invalido. d. 327
 Lapis mirandae naturae & rarus. b. 235
 Lassus de rebus inanimatis. d. 105
 Late tenere. b. 708
 Laticlavia tunica, d. 642
 Latini civitate donati. c. 265
 Leidae Academia. vid. Academia.
 — collegium institutum. a. 188, 194, 198,
 203
 — conspiratio in Magistratus. a. 45, 364
 — pestilentia. b. 455
 Legatio Batavorum in Daniam. c. 681, 688,
 713, 744, 745
 — in Scotiam. a. 681
 Legatorum mos in visitando. c. 831
 Lentus. d. 745
 Leo in spectaculis exhibitus. c. 248
 Leodium & Leodicum. 239, 574, 577. c. 136.
 c. 136
 Leodienes quales. c. 520
 — tumultuantes ob religionem. b. 275
 Lepores. e. 93
 Lernutius Gallorum poemata colligere & edere
 voluit. a. 23
 Lethra. b. 243
 Letous, pro Latous c. 477

Tom. V.

Lex Julia. d. 426
 — Mallia. b. 695
 — xii. Tabularum. a. 336
 Lexicon Davidis de Pomis. b. 363, 366
 Liberalitas Regis Gallorum in eruditos. c. 523,
 806
 Libelli famosi in Gallos. c. 291
 — in Lipsium. a. 247, 248, 255, 257
 Libertas Belgarum in scribendo. b. 338
 Librare corpus in alis. d. 732
 Libri Christinae dati Heinio & Vossio. c. 681.
 & seq.
 — Chymici. c. 585
 — Sibyllini. a. 246
 Libra & aere minus. b. 547
 Ligorii, *Pyrrhi*, opus Antiquitatum. c. 679
 Lima, pro rasorio vel pectine. c. 132
 Lineae vestes. a. 561
 Lingua Hellenistica. b. 464, 473, 478
 Linguae Latinae pronuntiatio. a. 330
 — Graecae studium. b. 329
 — vernaculae studium. c. 760, 761
 Linguarum donum Apostolis datum. b. 463
 Liqueor. d. 233
 Literae editae sub nomine Lipsii. a. 55
 Livii editiones. c. 156, 168
 de Livio judicium. b. 201
 Locare. c. 52
 Lorica. b. 157
 Lorus, pro lorum. 395, 396
 Lotharingii Ducis & Electoris Palatini contro-
 versiae. c. 836. & seqq.
 Lotus & totus confusa. d. 424
 Lovanii descriptio & laus. a. 435. c. 135
 — status, & lapsa studia. a. 168, 283, 288
 Lovaniensis ager vexatus a rebellibus. a. 298
 — Academia. a. 487, 488, 612. b.
 408, 409
 Lovaniensium de Academia Batava censura. a.
 612
 Lubrica & ludicra confusa. d. 329
 Lucani editiones. c. 811
 — laus. b. 437
 — Codices MS. c. 808, 809, 811, 816, 822
 Lucius personatus auctor. c. 702
 Ludi scenici a studiosis Daventriensibus acti.
 681. c. 292
 Ludovicus & Chlodovaeus idem. a. 240.
 Lumina premere dicitur Leo. d. 359
 Luneburgensis Ducis bibliotheca. c. 587

P p p p p

Lunç

- Luneburgensis conventus. a. 269
 Lupara concremata Lutetiae. b. 798
 Lusitani Lipsio faventes. b. 3
 Lutetia. c. 792
 Luxuriae domus. d. 364, 366. e. 23
 Lydius, *Joh.*, de Fastis Romanis voluit scribere.
 c. 176, 177
 M.
Macedo, secunda syllaba longa. c. 489
 Maceria. b. 156
 Machiavellus. a. 4
 Machinae antiquae reliquae. b. 9, 10
 ———— inventae a Judaeis. b. 156
 Macri Glossarium. c. 558
 Magica defixio, & lamina & rhombus. b. 705
 706
 Magistratum jus in sacra. b. 435
 Magnes. c. 39
 Malela, *Johannes*, e. 244
 Mala multa dicere. e. 198
 Male commissa gratia. d. 422
 Μαλέα, & ὑπὲρ Μαλέας, c. 55
 Mallia lex. b. 695
 Mancipii jus. b. 549
 Manethon MS. & a Vossio descriptus. c. 303,
 652
 Mangana. b. 156
 Manicare. a. 609
 Manilius Junii. a. 411
 ———— MS. Sufii. b. 306
 ———— Scaligeri. a. 242
 Manipuli pro centuriis. c. 14
 Manibus elatis milites ducibus promittebunt o-
 peram. d. 439, 440
 Maniciolum. c. 370
 Manubiae. d. 776, 782, 783, 784, 787
 Manuscripti codices Jesuitarum Antverpien-
 sium. b. 773
 ———— Virgilii. c. 746
 ———— Lucani. c. 808, 809, 811, 815, 822
 ———— Martialis. c. 563, 565
 Manuscriptorum notae. a. 7
 Maria virgo. b. 184
 Marcellini Chronicon. b. 349
 Martialis Raderi. b. 32
 ———— Schrevelii. d. 31
 ———— recensitus a Gennadio. b. 523
 ———— Codices MSS. c. 563, 565
 Massa, pro Chao. d. 457
 Massiliae descriptio. b. 197
 Matres, pro nutricibus. d. 148
 Matthias Austriacus. b. 362
 Maturum onus. e. 12
 Maturus & immaturus, imperio scilicet. d. 368
 Mauricius, secunda syllaba brevi. c. 363
 Mauritius Nassovius. a. 169, 206, 681, 688,
 744, 745
 Maurorum bellum. b. 177
 Maximilianus Imperator. b. 304
 Mazarini Bibliotheca. c. 597
 Medicea Familia. c. 532
 Medici veteres & Arabes. a. 440
 Medicina Davidica. b. 45
 Mediolanensis Bibliotheca & Gymnasium. b. 85
 Mel Cycladum. c. 507
 Meleager Epigrammatum scriptor. b. 535
 Meles fluvius. b. 671
 Memmia Bibliotheca. c. 161, 757, 259, 600
 Meracus. b. 541
 Mercerus, *Josias*, probat Lipsii abitum ex Ba-
 tavia. a. 310
 Mercurius Dux. b. 344
 Messala Corvinus. d. 805, 809, 812
 Messalinus. d. 801, 803, 804, 806
 Metaphysica invexit noxias quaestiones. b. 448
 Metelli. d. 813
 Methodus studendi & exerpendi. a. 689
 ———— studendi Politico viro. b. 3
 Meursii postuma. c. 475, 537, 770. d. 75, 79
 Mica. d. 692
 Militaris res ad veterum imitationem instituta.
 a. 744, 745
 ———— rei Belgarum laudator. b. 106
 Milites elatis Manibus ducibus obsequium pro-
 mittebant. d. 439, 440
 Minervae vota a sperantibus magnam fortunam.
 d. 198
 Minus libra & aere. b. 547
 Minutius Felix. b. 445
 Miracula. b. 182
 ———— divae Sichemenfis. b. 187
 Mittere, pro emittere. d. 333
 Mobilis & nobilis confusa. d. 432, 434
 Moderatus Nypsus, *Junius*, c. 568
 Modii Epistolica & notae in Silium. a. 107
 Moeris Atticista. c. 691
 Mollia rura, glebosa & terrena. d. 282
 Molorchus. e. 114
 Monachi Johannis Glossarium. b. 347
 Monasteriensis Obsidio. b. 737

Monasteriensis pax. c. 727
 Monitus deorum, d. 445
 ——— praesignificationes. d. 241
 Montes Hannoniae obsessi. a. 1
 Monumenta Paderbornensia. b. 673
 Morbosus, pro pathico. c. 375
 Moreti Codices MS. c. 588
 Mori Clamor regii sanguinis. c. 648, 746
 Moschopulus. c. 690, 691. e. 209
 Μυσία ἀφ' ἑστίας. b. 729
 Mulcere vulnera. 641
 Mulierofus. e. 371
 Multa mala dicere. d. 198
 Munckeri Antoninus Liberalis. b. 655
 Munera, pro oneribus. d. 408
 Munus, pro feris in spectaculo exhibitis. b. 113
 Mures salaces, unde pro pueris delicatis. c. 372, 374
 Mureti Seneca. b. 124
 Museum Alexandrinum. b. 78
 Mutare habenas. d. 344
 N.
 Nævuli dicti insulae. a. 673
 Navarrae rex. a. 360
 Naufragare. e. 413
 Navigatio Batavorum in novum orbem. a. 689
 ——— in Septentrionem. a. 208
 Navis obscaeno sensu. e. 375
 Neapolitanae bibliothecae. c. 180, 181, 566
 Neapolitanus tumultus. c. 187
 Necessitas peccandi. a. 182
 Nehalennia dea. b. 653. c. 259
 Nemesiani de aucupio MSS. Codex. c. 706
 Νεοχώροι. b. 648
 Neomagum. d. 115, 116, 117, 120, 121
 Nervia. d. 725
 Nexi & mancipii jus. b. 549
 Niger tamquam corvus. e. 420
 Nigra nomina in Epistolis Lipsii, id est non Catholicorum. a. 538
 Nilus de primatu Papae. a. 694. b. 494, 496
 Nobilis & mobilis confusa. d. 432, 434
 Nomen agelli, pro ipso agro. d. 331
 ——— nudum. d. 387
 Nomen est Dasio. c. 488
 ——— pro solo nomine. d. 539. & seqq.
 Nomina propria. d. 755, 756, 759, 760, 763
 ——— & honores basibus statuarum inscripti. d. 768
 Noribergensis pestilentia. b. 522

Notae manuscriptorum. a. 7
 ——— Senecae & Tyronis. b. 128, 343
 Novatores. c. 702
 Nudum nomen. d. 387
 Numerus septenarius pro multiplici. b. 153
 Nubes pro volatu. d. 450
 Nummi fictitii. c. 570
 ——— & pecunia suilla antiqua. c. 744
 ——— Veteres consulis Meursensis. d. 12
 Nummus Capitonis Fonteji. a. 447
 ——— Vespasiani. e. 716, 717
 Nypsius, Jun. Moderatus, c. 568
 Nysaei campi. d. 282

O.

O pro au, ut copo, caupo &c. c. 411
 Obire & habere confusa. d. 221
 Obnoxius & tener. d. 607
 Obstant Fata. d. 373
 Obtinere praesidio loca. d. 380
 Occultare se itineribus. d. 212
 S. Odiliae vita. e. 66
 Oldenburgum. b. 243
 Olympus imus. d. 522
 Omnia esse alicui. b. 711
 Omnis Herois. c. 247
 ——— & communis confusa. d. 163
 Onus maturum. e. 12
 Opera bona. b. 252
 Opinio pro fama. c. 185
 Oppianus Rittershusii. a. 765. b. 325
 Opus pistorium. e. 396
 Ora frenis continere. d. 42
 Orac. b. 521
 Ordo, pro senatu. d. 383
 Oracula Sibyllina. a. 479
 Oratio Lipsii de duplici concordia. a. 433
 Oricellariorum familia. b. 199
 Ostenda obfessa. b. 107
 Otiosi Academici Neapolitani. c. 566
 Otium & otuari, pro rusticari. d. 349
 Ovidii index. c. 201
 ——— de eo iudicium. c. 714
 ——— editio Heinfiana. d. 30
 ——— nummus. e. 716
 Oxoniensis bibliotheca. b. 351
 ὄζον. a. 635

P.

Pacare montes. c. 118
 Pacifici. d. 770
 Pacti conventi. b. 609

Ppppp 3

Pppp

- Paedagogica ingenia. b. 451
 Παιδαγωγὸς Stratonis. c. 400
 Pangere, idem quod figere. d. 236
 Panis Εἰς τὸν θ. b. 618
 Panne, Petri, supplicium. a. 42
 Pannoniae res. a. 62, 65
 Papa femina. c. 578
 Papistae an possint esse membra Academiae. a. 682
 Paraphrasis Aristotelis. b. 402
 Paratus. d. 231
 Parviflorum laus. c. 87, 88, 90
 Parisinae Bibliothecae. c. 563
 Parmensis Ducis mors. a. 285
 Parra. e. 373
 Parricidae regis Galliae. a. 406
 in Parvo. pro in parva re. d. 372
 Pascha, quo Christus cruci adfixus est. b. 469
 Pasquillus. b. 223
 Patricia colonia. a. 258, 586
 Patricii. a. 389
 Paullinus de vita Martini. e. 339
 Pax cum Britannis & Hispanis. a. 299
 — an induciae praestent Belgis. a. 207, 692, 719, 720, 761
 — Monasteriensis. c. 722
 Pecunia suilla. c. 744
 Pedestres copiae. c. 152, 154
 Pedibus assentiri. d. 2
 Pellacia. d. 332
 Pellibus texta scuta. b. 151
 Penaces. b. 731, 733. c. 475. e. 192
 Pendere in alis. d. 303
 Penthiacus Gallus Gallinaceus. c. 381
 Peragi. c. 542
 Peregrinatio Italica. c. 717
 Pergula. d. 42. 243
 Permittere, pro remittere. b. 612
 Perpenſe audire. d. 579
 Persicae & Belgicae linguae affinitas. a. 185
 Persarum continentia. d. 121
 ————— Kalendaria. e. 589
 Persius Casauboni. a. 381
 Pestilentia Daventriae. c. 351
 ————— Duaci. a. 20
 ————— Leidensis. c. 530
 ————— Noribergae. b. 522
 Petaviana bibliotheca. c. 259, 207, 591, 604
 Petri Apostoli supplicium, a. 661
 Petronii fragmentum. c. 497, 504, 508, 537, 805, 823, 865. d. 91
 Πεζεταγοί. b. 636
 Phaedri editio. d. 15
 ————— Schefferi. d. 39, 44
 Phaemon. c. 740
 Phaenomena. c. 50, 51, 52
 Phalerius & Phalereus Demetrius. e. 89
 Philippi Bohemiae Principis facinus. c. 709
 Philippus. d. 795
 Philosophia Cartesiana. b. 469
 ————— Rami. a. 368
 Phineae aves, Harpyiae. e. 350
 Photius a. Schotto editus. a. 715
 Pictura. d. 437
 Pigri somni. d. 427
 Pilum. a. 639
 Pisana cenotaphia. b. 139
 ————— Marmora. a. 264, 265
 Pisander Larandensis. b. 702, 703
 Pistorium opus. c. 396
 Pitulus. e. 53
 Pituita. d. 344
 Plagium Blanckardi. b. 649
 Plangi pro plangere. c. 172
 Plebeji & sapientis discrimen. a. 705
 Plurimus cum genitivo. d. 541
 Pietas. d. 771
 Plus decem millia. d. 781
 Poëta de bello Granatenſi. c. 642
 ————— quidam parum Latinus. c. 122
 Poëtae Batavi. c. 112, 114, 199
 Poëtas Gallos colligere voluit Lernutius. a. 23
 Ποιεῖν, pro coquere. e. 396, 420
 Politices studium. b. 3
 Pollionum familia. a. 115
 Poloni Judaei. b. 20
 Polybius Casauboni. a. 375, 383, 385
 Polybii libri novem integri. d. 69
 Polycrates Graecus scriptor. c. 399. & seq.
 Ponere, pro in foenere poenere. d. 461
 Porrigo quid proprie sit. d. 295
 Possiacum colloquium. b. 259
 Ποσειδών, de mari. e. 402
 Praelium in Anglia navale, per van Gale. c. 313
 ————— ad Iverium. a. 309
 Praenomina. d. 756, 558. & seq. 769
 Praesagium mortis. b. 333
 Praesens, pro efficaci. d. 582
 Praxis judiciaria. a. 120

Preces sanctorum pro nobis. b. 252
 Premit lumina Leo. d. 359
 Pressus pro humili. d. 372, 374
 Princeps an tardus esse debeat. a. 725
 Prior & propior confusa. d. 741
 Procancellarius Poloniae. c. 664
 Procopii editio. b. 354, 355
 Prodigia in coelo visa. a. 613
 Proferre in theatrum. e. 89
 Professus, pro manifesto. d. 284, 286
αεγασγίδρα. b. 709
 Pronuntiatio Linguae Latinae. a. 330
 Propior & prior confusa. d. 741
 Prosperi Chronicon. b. 349
 Prospicere ex edito in humilem locum. e. 82
 Prudentii editio. a. 640
 ——— laus c. 889

Psalterium ex versione Saxonica. a. 222
 Ptolemaeus collatus cum MSS. c. 639
 Publica pro vectigalibus agris. d. 403, 408
 Pulla vestis. a. 235
 Puncta Hebraica. b. 363, 365
 in Puppi stabat hortator. e. 54
 Putare, pro judicare. e. 33

Q.

QUA, pro quousque. e. 388
 Quam, an conjungat similes casus. a. 308
 Quantum milvi volant. e. 385, 395
 Quasi, pro fere. d. 786
 Querelae de studiis lapsis. b. 430
 Quidam, de ignoto. d. 778, 779
 Quinctiliani editio. c. 498, 410

R.

R & L. confusae. c. 132
 Rabirius. d. 739
 Raderi Martialis. b. 33
 Rami Philosophia. a. 368
 Rapere fugam. e. 170
 Rarus. d. 233
 Rascupolis. d. 821
 Rectores civitatum in Belgio. a. 712
 Reges consilia popularia abhorreere debent. a. 171
 Regis Galliae liberalitas in eruditos. c. 523, 806
 Regulus aviculus. b. 313
 Reineccii Ditmarus. a. 266
 Reinesio missae inscriptiones. c. 291
 Remi. d. 33
 Repraesentare consilium. b. 627
 Responfare in deteriorem patrem. d. 287

Rex Navarrae. a. 360
 ——— Sacrorum. a. 246
 ——— Suecorum. a. 626
 Rhombus. b. 707
 Rhutaria. b. 155
 Richardotus in iudicium tractus. a. 298
 Ripa. b. 245
 Rittershusii Oppianus. a. 765. b. 325
 Rodere de muribus. e. 386
 Romae conventus doctorum. b. 719
 Romanae bibliothecae. c. 284, 561
 Rosenberg Baro. c. 273, 276, 278
 Roskilda. b. 243
 Ruere pro tonare. e. 12
 Runa. e. 708
 Rumpere cursus. e. 169
 Rus verum. d. 689
 Rusticitas Batavis exprobrata a Nic. Heinio.
 c. 726, 728
 Rutae in folium conjicere. e. 231
 Rutgerfianum debitum. e. 698, 757, 767
 S.

S pro X. d. 233
 S. initio vocum, scara pro escara, Spania pro
 Hispania &c. 417

Sabaudi & Genevensium bellum. a. 492
 Sabbatum *δουπερώου*. b. 357, 358
 Sabinae tristes. d. 236
 Sabini epistolae. b. 686
 Sacerdotia ampla. a. 53
 Sacerrimi viri. c. 107
 Sacoma. a. 338
 Sacrorum rex. a. 248
 Sagittaria ars. b. 157
 Sallustianum fragmentum. c. 620. e. 708
 Salzburgi MS. quae sunt. c. 316
 Salamis vera. b. 555
 de Sallustio iudicium. b. 201
 Salviati Dux donat MS. libros Christinae. c.
 312
 Salmasius alastor. c. 663, 663
 Salmasii familia. c. 641
 ——— furtum. c. 656
 ——— inscientia Linguae Graecae. c. 617
 ——— laus. b. 361
 ——— liber de annis Climactericis. b. 620
 ——— de foenore trapezitio. b. 617
 ——— de caede Regis Angliae. b. 741
 ——— & Heinsii inimicitiae. b. 472, 479.
 c. 81

Ppppp 2

Sal-

- Salmafii & Isaaci Voffii inimicitiae. c. 637. & seq. 653
 ——— vocatio Leidam. b. 624
 Saluber media brevi. b. 204
 Salubritas post pestilentiam. c. 530
 Sambuca. a. 239
 Sanctorum preces pro nobis. b. 252
 Sangallensis Bibliotheca. e. 200
 Sanguen. b. 718
 Sardanapalus. a. 285
 Satanas, draco. a. 246
 Satira. b. 551. d. 423, 424, 426, 428, 430, 432, 437
 Satira Menippea. a. 59
 Saturnalia in Boyum & Plantam. c. 729
 Satyrica Poësis per Casaubonum. a. 385
 Scabri dentes. d. 24
 Scaligeri Eusebius. c. 620
 ——— familia. a. 250
 ——— Manilius. a. 242
 ——— Postuma. b. 430
 ——— Notae in Caesarem. c. 288
 ——— Vocatio Leidam. a. 191. b. 322
 Scaligerorum insignia inserta Domui Saxonicae. b. 342
 in Scaligerum odia Jesuitarum. a. 700
 Scaligeriana. d. 49
 Schenckii castellum expugnatum. d. 115, 116
 Scholiastes Homeri Voffianus. b. 421, 424
 ——— quo usus Victorius. d. 59
 ——— Simmiae. c. 656
 Schotti notae in Senecae controversiis. a. 97, 99, 102
 ——— Photius. a. 715
 Schutter, a Schytis dictus. b. 157
 Sciscere, pro pronuntiare sententiam. e. 102
 Sciuri. e. 93
 Scolopax. e. 350, 352
 Scripta supposititia. b. 121
 Scriverii filii. c. 809
 Scuta pellibus texta. b. 151
 Securus cum genitivo. d. 745
 ——— pro tuto. d. 746
 Sedere. d. 703
 Sedes piorum & impiorum. d. 226
 Sedetum & Sudetum. a. 239
 Seliquastra. b. 645
 Σενέκας. d. 409
 Seneca Mureti. b. 124
 Senecae controversiae. Schotti. a. 97, 99, 102
 Senecae & Tyronis notae. b. 128, 343
 Sensus pro animo. e. 33
 Septenarius numerus pro multiplici. b. 153
 Sequestris aut equestris fortuna. a. 229
 Sequi, pro obsequi. d. 125
 Servitus, ultima brevi. c. 752, 756
 Sexti Empyrici scripta. b. 121
 Sfortia, *Ludovicus*, a. 724
 Siberia. d. 88
 Sibyllina oracula. b. 479. c. 246
 Sica Tragica. b. 42
 Sichemensis Diva. vid. Diva.
 ——— tumultus. a. 172
 Siciliae Monarchia Baronii. a. 738. b. 174, 185
 Sidonii. d. 329
 Sigillum Hollandiae surreptum. a. 746
 ——— muliebre. a. 462
 Sigismundi Poloni nuptiae cum Austriaca. a. 428
 Silesiae status. a. 599
 Simmiae Scholiastes. c. 656
 Sincfala. b. 245
 Sifenna. e. 120
 Σηλοπίζαν. a. 485
 Slesvicum. b. 243
 Sligtenhorstii Historia Gelrica. c. 776
 Smetianus Thesaurus. a. 315
 Smetii inscriptiones crematae. b. 49
 Socrates fuit calvus. e. 291
 Socratius fons. d. 349
 Solvere massam. d. 457
 Sophistica. b. 447
 Sortiri. d. 217
 Sosпита Juno. a. 459
 Spadani fontes duo. a. 142
 Spanhemii, *Ez.*, panegyris ad Christinam. c. 807
 Species, pro dignitate. d. 182
 Speciosus. d. 773
 Spectare & exspectare. b. 529
 Spectrum post Salmafii mortem. c. 326, 329
 Spes de liberis. d. 245
 Sphaera Empedoclea. c. 315
 Sponfae e sinu matrum raptae. d. 227
 Stagiare. b. 552
 Statius Poëta quis fuerit. c. 17
 ——— Surculus dictus. c. 17
 Statii codices. c. 142, 167, 168
 Statuae Ducis Buckinghami. c. 588
 Stephanus de Urbibus MSS. c. 639
 H Stephani Glossarium. a. 583
 Sterilis domus. d. 227

- Stoici. a. 703, 715
 Stola. d. 731
 Stomachus & Stomachari. d. 136
 Stratonis *παιδεία*. c. 412
 Strati currus & constrati. e. 114
 Strictus, pro avaro. d. 232, 236
 Striculus, pusio. d. 239
 Struthiocameli. c. 507
 Studia Graeca. a. 376
 — Historiae. b. 4
 — Linguae Vernaculae. c. 760, 761
 — literarum in Hollandia lapsa. c. 211, 216, 246
 — Politices. c. 3
 Styli praecepta. b. 453
 Subsidere cum quarto casu. d. 289
 Succedere cum quarto casu. d. 288
 Succinum. c. 93
 Succentor. c. 461, 466
 Succus & fucus. c. 225
 Sudare cum quarto casu. d. 187
 Sudor sanguineus in Christo. b. 659
 Suecorum Rex. a. 626
 Sulpitius Blitho. a. 342
 Summoto incedere. b. 607
 Suppedaneum in Cruce. b. 647
 Surculus dictus Statius. c. 17
 Suffi Codex MS. Manilii. b. 306
 Sylburgii Historiae Augustae scriptores. a. 344, 345
 Symmachi codex. c. 158
 Syrius Jupiter. a. 459
 T.
TAcitus quot libros scripserit. a. 295
 Taciti codex Bambergensis. a. 107
 de Tacito iudicia. a. 294
 Talenti modus. a. 544
 Talmud. b. 367
 Taurica urbs in Media. a. 233
 Telum metaphorice. d. 96
 Tempus, pro rebus eo tempore actis. d. 557
 Tempore, tempori. d. 227
 Templum Hierosolymitanum. e. 169. b. 640
 Tendere fila, pro torquere. d. 326
 Tener & obnoxius idem notat. d. 607
 Tenere late. b. 708
 Tenedos. e. 419
 Teneri pueri. d. 549
 Tensa. a. 635
 Terentius Boecleri & Gujeti. c. 359
 Terrena, campestris plana, opposita montanis; saxosis. d. 282
 Testa ex rubente terra. d. 251
 Testamenti novi distinctiones. b. 459
 Thamisis una nocte ter aestuavit. c. 767
 Themista. b. 308
 Themistocles. d. 821
 Theocritus cum MS. collatus. c. 594
 Theodulfus. e. 219, 222, 224, 226, 240, 245
 Theologi. b. 618, 746. c. 764
 Theophanus. a. 444
 Thesaurum, neutro genere. e. 231
 Thraces, pro bestiariis. c. 373
 Thuanus a Delrio petitus. a. 551
 Thuani Historia. a. 379, 404
 Tituli in pectoribus damnatorum. d. 103
 Toga Romana. b. 582, 621
τοιοῦτον. b. 312
 Tolli rebus laetis. d. 359
 Tolosani Archiepiscopi bibliotheca. c. 620
 Tormentis excussae faces. &c. d. 163, 164
 Torquis a Christina donata Ferrario. c. 601, 617
 Torta, pro tormenta in MSS. d. 163
 Torus & vir permutata. d. 299
 Tragoedorum vestis. b. 709
 Trahere dicuntur vota & preces aliquem. d. 448
 Transilvania in factiones divis. c. 315, 317
 Transire, pro transiri. d. 353
 Trevirorum colonia. a. 586
 Tribunal Academiae Batavae. a. 198
 Tridentinum consilium. b. 257, 369
 Trifax telum. b. 155
 Trifolium. e. 362
 Tristis, pro severo. d. 737, 235, 236, 238, 244
 TROBS in nummis. c. 372
 Troglodites avicula. b. 313
 Trompii Victoria. c. 60
 Truncus de vimine, &c. plantis. c. 92
 Trux pro, torvo. d. 739
 Tumultus Neapolitanus. c. 187
 — Sicheimensis. a. 172
 Tunica laticlavata. d. 642
 Turbare. c. 426
 — Saturam. b. 551
 Turbo. c. 1
 Turcae in Hungaria. a. 323. b. 39
 Tutus locus. d. 749
 Tyrannis avicula. b. 313

V.

V & B. permutatae. e. 1661
 Vadari. d. 170
 Vaenire cum dativo. e. 34
 Vallum b. 156
 — pili. d. 290, 292
 Vectis Insula. b. 696
 Vegetius MS. b. 7
 Velamenta. d. 175
 Velia dicta Hycle. c. 491
 Venerarius. c. 406
 Venetiarum Urbs c. 189
 Venetae bibliothecae. c. 190, 575, 577
 Venetorum Advocator. c. 288
 Verberare catomis. d. 478, 479, 481
 Verdugii Victoria. a. 571
 Vergiliae. d. 195
 Vernaculi. d. 335
 Vernaculae linguae studium. c. 760, 761
 Vernile. d. 334
 Vero, pro etiam. e. 405
 Versio Lxx. interpretum. a. 239
 Versus, in meridiem &c. e. 419
 Vertere, pro versare. d. 149
 Verum rus. d. 689
 Veruti. a. 239
 Vesta. a. 27. d. 155
 Vestae asini in tutela. d. 256
 Vestis linea. a. 561
 — pulla. a. 253
 — Tragoedorum. b. 709
 Vestium cura. d. 540
 Viatores cantabant. e. 381
 Vicarii Ultrajectini. d. 137
 Victoria Batavorum ad caput Bonae spei. a. 301
 Vicinales. d. 707
 Villomarus. b. 339
 Vineae. b. 154
 Vinum ab Electore Palatino datum Heinsio &
 Vossio. c. 809
 Vir & torus confusa. d. 299
 Virgilii codices MS. c. 476
 Viridia & viridaria. e. 31, 82, 88

Vis pro potentia. d. 163
 Visio Rustico oblata. b. 300
 Vitiligantes. d. 317
 Vitis aurea in ten plo Hierosolymitoro. b. 640
 Vleisch unde dicta. b. 155
 Ulixes, Ulixus & Ulixus. d. 121, 124, 126
 Umbilicus. b. 152
 Ultrajecti status & res A. 1672. d. 113. & seq.
 168, 177, 182, 186, 203. & seq. 213, 216,
 228, 235, 255. & seqq.
 Vocare, in vaticiniis. b. 711
 Vocalis brevis & longa in unum contracta. b. 212
 Volcanalia. c. 701
 Volvere bellum. d. 162
 Voluntas hominis. a. 181, 182
 Volusianus Messus. c. 181
 Vorck a furca. a. 163
 Vorstii, Cunradi, vocatio Leidam. b. 435
 Vossii, Joh. Ger., mors. c. 580
 Vossiana Bibliotheca data Christinae. c. 221,
 222. e. 675
 Vota, de liberis. d. 245
 Urbes ad mare Balthicum quae perierunt. b. 243
 Urbinensis Bibliotheca. c. 396, 566
 Usura. b. 282, 546, 576
 Vulgus, de canibus. d. 289
 Vulpeculae. c. 93
 Uxor an ducenda. a. 29, 30

W.

W Alachria Zelandiae insula. b. 647
 Weisbergus captus. b. 242
 Wineta. b. 142
 Wisboia. b. 242
 Wouwerii Bibliotheca. c. 506
 — Epistolae contra Elmenhorstium. c. 68
 Wrangelius. d. 805

Z.

Z Elandi collegium instituere volunt. a. 200
 — offerunt praefecturam Arausionensi.
 c. 647
 Zulichemiana Bibliotheca Epistolas Lipsii & a-
 liorum servabat. d. 21
 Zutphanin capta. a. 142. d. 116

F I N I S.

I N-

I N D E X I V.

AUCTORUM ILLUSTRATORUM ET EMENDATORUM.

A.

- A** Eschylī fragmentum. b. 491
 Afranius. d. 706
 Albinovanus. b. 676
 Alcīnus. b. 407
 Aldhelmus de virginitate. b. 596
 Ammianus Marcellinus. d. 383, 807. e. 196, 706
 Anacreon. c. 409
 Antoninus Liberalis. e. 355
 Apicius. c. 379, 380, 383
 Appianus. 637, 640
 Apulejus. 363, 673. b. 51, 156, 528, 529, 531, 565. c. 461. d. 214, 215, 220, 225, 250, 253, 329, 635. e. b. 381, 406, 411
 Aristophanes. d. 359
 Aristoteles de Animalibus. c. 351
 Arnobius. b. 140, 163, 529, 712, 714. d. 155, 240, 329, 331, 334, 337. e. 410
 Arrianus. b. 635, 638
 Auctor belli Alexandrini. d. 788
 — belli Africani. c. 379
 — de Phoenice. c. 507, 514
 — Dialogi de Claris oratoribus. d. 226, 804
 — de somniis & prodigiis. c. 8, 31
 Avienus. c. 273, 276. d. 46
 Augustinus. b. 500. d. 555
 Ausonius. b. 571. c. 37, 38, 39, 197, 541, 542, 554. d. 638, 689, 768

B.

B Arlaamus. b. 459

C.

- C** Aesar, *Julius*, c. 6
 Calpurnius. b. 528. c. 735
 Capella, *Marcellianus*, c. 460. d. 428, 434, 436, 437. e. 378
 Capitolinus. d. 234, 235
 Cato. d. 317. c. 33
 — *Valerius*, b. 565
 Catullus. 311. d. 143, 210, 246, 327, 527, 531, 533, 535, 585, 587, 641, 645, 676, 677, 681, 682, 683. c. 33, 212, 213, 375
 Celsus. 440. e. 380

Tom. V.

Censorinus. b. 373

- Cicero. 105, 459, 631. b. 307, 309, 310, 311, 602. d. 92, 158, 170, 182, 211, 212, 214, 221, 230, 233, 234, 236, 266, 292, 331, 340, 343, 349, 353, 360, 374, 378, 488, 559, 578, 579, 586, 672, 702, 703, 704, 707, 716, 733, 738, 745, 759, 762, 764, 768, 772, 776, 777, 778, 784, 786, 787, 800. e. 82, 88, 212, 225, 241, 250, 271, 375, 379, 380, 385, 394, 426
 Claudianus. b. 750, 751, 754, 756, 760, 766, 767, 768. c. 7, 66, 177, 140, 148, 162, 210, 211, 212, 214, 218, 223, 226, 229, 231, 235, 464, 466, 472, 473, 477, 734, 735. d. 182, 244, 250, 344, 349, 427, 446, 727, 746. e. 367, 352, 375
 Columella. d. 295, 462. e. 381
 Corippus. d. 440
 Curtius. b. 626, 629, 630, 680, c. 212. d. 362, 572
 Cyprianus. 526

D.

- D** Ictys Cretensis. e. 316
 Diodorus Siculus. c. 55
 Dion Cassius. 635, 636. d. 788
 Dionysius Halicarnassensis. d. 786, 787
 Donatus. c. 10

E.

- E** Nrius. d. 539
 Epictetus. b. 463
 Epigramma vetus. c. 801, 803. e. 406
 Eratosthenes. c. 415, 416
 Eumenius. b. 600
 Eutlathius. d. 499
 Eutecnus Sophista. c. 661

F.

- F** Estus. c. 451. d. 807. e. 397
 Flaccus, *Valerius*, b. 577, 578, 748. c. 149, 411, 413, 414, 417, 419. d. 33, 96, 98, 149, 164, 335, 336, 337, 346, 350, 358, 353, 355, 359, 367, 370, 371, 374, 375, 376, 425, 438, 442, 443, 444, 445, 446, 447, 448, 449, 450, 455, 457, 459, 460, 522, 541, 543, 544, 557, 758, 759, 761. e. 54, 101, 160, 166, 167, 168, 169

Qqqqq

169, 170, 171, 172, 173, 174, 175, 185, 186,
187, 202, 203, 205, 216

Florus. b. 560. 522, 636, 651, 655. d. 284, 286,
287, 288, 289, 299, 374, 388, 441, 451,
509, 522, 525, 530, 540, 542, 545, 546,
547, 548, 549, 550, 551, 553, 554, 557,
558, 559, 560, 562, 564, 565, 566, 567,
568, 569, 570, 573, 575, 578, 606, 653,
656, 657, 658, 659, 660, 661, 663, 664,
665, 707, 714, 771, 773, 776, 791 802

Frontinus. b. 690. d. 580, 786, 788, 809

Fulgentius. d. 719. e. 394, 411, 418, 419

G.

Galenus, *Johannes*, b. 313

Gellius, *Aulus*, b. 306. d. 768, 776. e.
410, 417

Germanicus. c. 548

Glossaria. b. 354. e. 120, 371

Gratius. c. 720, 740. d. 282, 284, 285, 286,
268, 288, 289, 292, 293, 295

Guntherus. c. 4

H.

Harpocraton. b. 520, 522, 626, 651, 655

Herodianus. 638

Herodotus. b. 690. d. 512

Hesiodus. d. 24, 221. e. 402.

Hesychius. 637. b. 560

Hesychius Milefius. b. 680

Hieronymus. c. 51. d. 805

Homerus. d. 359, 429

Horatius. b. 554, 557, 560, 561, 568, 570,
573, 575. d. 288, 289, 318, 360, 368, 369,
403, 422, 424, 446, 429, 432, 439, 722,
331, 755. e. 12, 13, 23, 35, 82, 373, 375,
385, 413

Hyginus. d. 716, 788. e. 253, 353, 361, 363,
371, 392, 393, 394, 395, 403, 406, 409,
413, 414, 415, 416, 418, 419

I.

Inscriptiones. 312, 451, 456, 612. b. 145,
314, 514, 666, 667, 672, 729, 732. c.
294, 296. d. 412, 807

Johannes Euangelista. 660

Josephus. e. 85

Isidorus. b. 503

Isidori Glossae. c. 132. e. 364, 366, 367, 368,
369, 395, 396, 397, 466, 419

Isocrates. b. 576

Julianus. b. 717

Justinus. d. 284, 295, 331, 368, 369, 638,

678, 679, 689, 692, 702, 706, 709, 733
768, 701

Juvenalis. b. 543. d. 143, 151, 155, 184, 188,
193, 194, 197, 217, 295, 542, 544, 545,
721, 723, 725, 803

L.

Lactantius. d. 535, 536, 537, 661, 690, 691,
692, 704, 706, 707, 730. e. 400, 261

Lampridius. d. 334

Livius. 389, 459. b. 536, 545, 606, 608, 721. c.
106, 107, 112, 113, 143, 249, 251, 263, 281.
d. 2, 96, 374, 495, 540, 560, 573, 705, 738,
769, 770, 771, 772, 773, 774, 776, 777, 778,
779, 780, 781, 786, 789, 802, 803

Logarice vetus. c. 407

Longus. d. 23

Lucanus. b. 164, 716. c. 210, 212, 458, 459, 462,
465, 477, 522, 812, 815. d. 101, 244, 332, 376,
380, 430, 435, 439, 440, 445, 643, 710, 778. e.
114, 196, 173

Lucianus. b. 709

Lucilius. d. 101, 244, 428, 432

Lucretius. b. 526, 428. c. 861. d. 322, 460, 408

M.

Machabeorum auctor. 616

Macer. e. 417

Macrobius. b. 702, 732. d. 705. e. 82, 88, 394,
411

Mamertinus. 638

Manilius. b. 378, 601. c. 68. d. 338, 365, 628, 685

Martialis. b. 127, 383, 523. c. 6, 7, 473, 479, 482,
487, 696, 697. d. 101, 103, 327, 419, 424,
426, 427, 428, 452, 641, 676, 682, 683, 684,
689, 690, 691, 692, 693, 694, 713, 808. c. 34,
82, 114, 167, 365, 366, 406, 534

Mela. b. 696. d. 350, 351, 435, 513, 741

Meleager. c. 5

Minutius Felix. d. 259, 262, 264. e. 406

N.

Nemesianus. b. 690, 698. d. 285. e. 351

Nepos, *Cornelius*, c. 151, 153. d. 728, 749,
764. e. 5, 9, 10, 11

Nonius Marcellus. e. 120, 413

Nummi veteres. 317. 649. e. 714, 715, 716

O.

Oribasius. d. 282

Ovidius. b. 525, 528, 540, 542, 545, 546,
547, 612, 670, 677, 678, 699, 700, 704, 705,
720, 723, 743, 745, 756, 757, 758, 759, 760,
761, 771, 797, 798, 799. c. 20, 17, 25, 42,
68,

- 68, 84, 92, 101, 108, 112, 115, 116, 117, 120, 128, 129, 130, 131, 137, 148, 152, 153, 162, 171, 181, 258, 261, 270, 271, 272, 273, 278, 291, 292, 293, 304, 305, 308, 309, 311, 313, 314, 317, 318, 320, 321, 323, 335, 337, 343, 351, 353, 367, 368, 370, 371, 373, 376, 377, 379, 380, 381, 382, 384, 387, 388, 389, 390, 393, 394, 395, 399, 401, 402, 413, 416, 423, 447, 460, 464, 467, 468, 472, 787, 489, 490, 507, 508, 528, 714, 715, 716, 720, 731, 773, 779, 780, 785, 863. d. 42, 58, 59, 60, 67, 83, 148, 151, 155, 173, 214, 233, 234, 236, 250, 253, 286, 297, 303, 349, 352, 355, 365, 368, 370, 371, 372, 387, 388, 389, 390, 408, 411, 415, 421, 424, 429, 432, 444, 448, 450, 427, 463, 492, 498, 517, 522, 536, 539, 541, 552, 559, 571, 577, 599, 632, 633, 634, 642, 710, 714, 716, 717, 718, 731, 732, 738, 745, 774, 793, 794, 796, 797, 804, 806. e. 8, 12, 15, 22, 26, 29, 30, 32, 33, 34, 35, 82, 83, 101, 114, 119, 121, 167, 169, 172, 173, 174, 199, 211, 212, 213, 262, 344, 350, 374, 376, 377, 380, 381, 386, 388, 393, 400, 706
- P.**
Pacatus. b. 728, 729. e. 28
Palladius. e. 414
Pandectae. b. 646. c. 76, 77
Paterculus, *Vellejus*, b. 724, 726, 728, 730. d. 253, 306, 367, 368, 370, 373, 374, 376, 377, 378, 380, 381, 382, 383, 388, 389, 403, 404, 408, 409, 411, 412, 414, 415, 420, 421, 422, 423, 429, 430, 433, 435, 479, 481, 484, 485, 519, 582, 637, 582, 637, 643, 737, 738, 739, 767, 770, 773, 775, 776, 777, 778, 780, 781, 783, 784, 785, 786, 789, 791, 793, 794, 794, 795, 797, 799, 818. e. 408, 419
Paulinus. d. 25, 253
Pediasimus Scholiaſtes. c. 661
Perſius. c. 51, 52. d. 298, 432, 434, 795
Petronius. 751. b. 368, 692, 694, 695, 701, 703, 707, 710, 712. c. 497, 504, 505, 520, 511, 518. d. 217, 220, 236, 237, 238, 240, 242, 245, 246, 250, 251, 253, 254, 292, 293, 295, 316, 317, 341, 342, 344, 345, 346, 347, 348, 350, 352, 405, 411, 412, 425, 427, 428, 434, 436, 437, 469, 479, 481, 482, 484, 485, 542, 725, 745, 746, 749. e. 67, 69, 70, 86, 102, 190, 201, 231, 236, 349, 350, 351, 354, 360, 361, 362, 372, 373, 374, 375, 376, 377, 378, 379, 380, 381, 382, 383, 384, 385, 386, 387, 388, 389, 395, 396, 397, 398, 399, 400, 401, 405, 406, 408, 409, 411, 412, 413, 414, 417, 420, 421, 497, 499
Phaedrus. c. 467, 469, 472, 473, 482, 491. d. 42, 44, 132, 194, 195, 198, 284, 303, 362, 363, 364, 365, 422, 429, 481, 584, 585, 426, 430, 704, 738, 789, 818. e. 8, 10, 11, 12, 13, 15, 17, 19, 20, 21, 22, 23, 25, 26, 28, 29, 30, 31, 33, 34, 40, 42, 43, 82, 83, 87, 88, 90, 102, 104, 106, 402
Pindarus. d. 225
Plato. b. 664
Plautus. 369, 370, 668. c. 494. d. 101, 211, 212, 213, 685, 705, 745, 786
Plinius. 440, 464. b. 77. c. 13, 47, 127, 131, 132, 371. d. 232, 236, 282, 327, 374, 437, 410, 783, 808, 811. e. 351, 380, 716
Plinius Junior. c. 538. d. 221, 230, 231, 235, 237, 238, 240, 335, 327, 375, 393. c. 31, 32, 227
Plutarchus. d. 595, 769, 788
Pollux. b. 484. & ſeq. 709
Polyaenus. d. 24
Polybius. 239, 636. d. 770, 787
Porphyrus in Homerum. c. 407
Priapeia. c. 42, 422. d. 2, 217, 394
Procles. d. 596
Procopius. 443
Propertius. b. 682, 683, 684, 685, 687, 692. c. 396. d. 155, 195, 202, 210, 213, 214, 217, 218, 220, 221, 222, 224, 225, 226, 229, 230, 232, 233, 234, 235, 244, 250, 295, 296, 297, 299, 300, 301, 302, 303, 306, 325, 326, 327, 334, 346, 376, 378, 428, 430, 433, 437, 441, 442, 527, 532, 533, 534, 637, 641, 648, 677, 774, 791
Prudentius. b. 785. d. 55, 236, 451, 457. e. 211
- Q.**
Quintilianus. d. 578, 715. d. 349, 373, 461. e. 48
- R.**
Rutilius. d. 318, 382, 383, 432
- S.**
Sabinus. d. 708, 711
Salluſtius. b. 558. d. 2, 352, 359, 368. e. 118, 379, 383, 385, 419
Scholiaſtes Germanici. b. 36
Seneca Rhetor. b. 616. d. 186, c. 69. d. 425
- Qqqqq 2

- Seneca Philosophus. 235, 484, 634. b. 557, 588, 590, 603, 614. c. 32, 195, 221. d. 282, 374, 540, 587, 607, 684, 739, 788, 797. e. 27, 30, 82, 88, 375, 412.
- Seneca Tragicus. b. 382, 383, 430. c. 182, 197, 239, 240, 290, 294, 421, 422, 477, 843. d. 183, 187, 253, 461, 462, 592, 722, 771. e. 166, 350, 403, 821.
- Severus de Aetna. c. 74.
- Silius Italicus. b. 667, 669. c. 149, 488, 494, 496, 497, 508, 515. d. 77, 250, 362, 435, 461, 541, 703, 704, 807. e. 8, 13, 101, 121.
- Solinus. d. 809.
- Spartianus. e. 396.
- Statius. 420, 707. b. 28, 29, 531, 533, 534, 537, 545, 546, 565, 583, 691, 745, 746, 747, 772. c. 1, 4, 7, 9, 14, 17, 84, 223, 481, 486, 491, 514, 522. d. 58, 101, 103, 229, 336, 417, 424, 425, 428. d. 33, 448, 450, 451, 462, 539, 546, 541, 544. e. 45, 114, 532, 533, 534, 535.
- Stephanus de urbibus. b. 604, 693.
- Strabo. d. 553.
- Suetonius. b. 693, 695, 721, 722. c. 62. d. 136, 138, 140, 194, 197, 121, 243, 253, 254, 255, 256, 282, 388, 403, 486, 607, 723, 756, 759, 772, 776, 780, 786, 806, 808. e. 208, 209.
- Sulpicia. e. 393, 394.
- Symmachus. d. 253, 349, 359, 365, 403.
- Syrus, *Publius*, b. 365.
- T.
- T**Acitus. 75, 229, 311, 348. & seq. 586, 727, 728, 750. b. 59, 139, 573, 743. c. 53, 114, 365. d. 59, 130, 132, 135, 138, 162, 163, 164, 170, 173, 174, 175, 187, 232, 235, 318, 320, 368, 422, 424, 427, 433, 486, 492, 494, 495, 496, 497, 498. 505, 512, 515, 516, 517, 539, 540, 670, 671, 673, 706, 738, 739, 760, 783, 788, 794, 801, 802, 805, 808. e. 5.
- Terentius. d. 198, 704, 749, 781. e. 30, 33, 382, 412.
- Tertullianus. 246. b. 529. d. 325, 326, 327, 331, 333, 337. e. 399.
- Testamentum N. b. 357, 459, 604.
- Themistius. b. 635.
- Theocritus. d. 359.
- Theophrastus. d. 707. e. 15.
- Tibullus. 157. d. 349, 539, 799. e. 178, 179.
- V.
- V**alerius Maximus. 398. c. 366. d. 762, 763, 774, 777, 778, 784, 786, 788, 793, 795, 815, 816, 777, 818, 819.
- Varro. b. 549. c. 3. d. 121, 282, 290, 291, 292, 762, 763, 775.
- Vegetius. 338.
- Victor, *Aurelius*, 458. e. 6.
- Virgilius. b. 560, 694, 716. c. 222, 490, 498, 500, 695, 861. 863, 873, 874, 876. d. 2, 121, 122, 140, 148, 149, 155, 157, 162, 175, 211, 214, 234, 235, 238, 242, 243, 244, 245, 246, 250, 252, 253, 289, 234, 302, 316, 327, 346, 349, 365, 380, 417, 428, 452, 457, 550, 559, 582, 641, 705. 755, 799, 800, 803. e. 33, 82, 201, 222, 140, 166, 167, 178, 212, 351, 369, 385, 388, 394, 396, 399, 706.
- Vitruvius. 88.
- Ulpianus. b. 367.

ERRATA In Tom. V.

Pag. 4. lin. 6. parietis *leg.* parietes
 5. l. 34. Simonis *leg.* Cimonis
 15. l. 30. gens *leg.* genus
 21. l. 25. Fab. III. *leg.* Lib. III. Fab. 13.
 22. l. 12. XII. cap. v. *leg.* XLVII. cap. 10.
 l. 13. putant *leg.* putans
 28. l. 12. auctorem *leg.* auctoris
 48. l. 32. ostentor *leg.* exosculor
 56. l. 4. licet *leg.* liceat
 100. l. 25. sunt *leg.* sint
 101. l. 25. auctoritate solo *leg.* auctoritati soleo
 102. l. 29. sine avena, sine *leg.* sine avena, sine
 110. l. 19. accessione *leg.* accessiones
 126. l. 6. precantur *leg.* precamur
 138. l. 40. literas *leg.* literis
 142. l. 33. proferendi *leg.* proferendo
 166. l. 13. ubi *leg.* tibi
 168. l. 30. suo *leg.* super
 176. l. 28. magnisque *leg.* magnusque
 189. l. 16. literaturae *leg.* literatura
 193. l. 5. de *leg.* te
 198. l. 37. fatio *leg.* fatis
 200. l. 10. solerat *leg.* soleat
 207. l. 19. Daventriam *leg.* Lipsiam
 209. l. 12. conexerat *leg.* correxerat
 l. 16. movet *leg.* movit
 220. l. 4. Sirmondum observationes *leg.* Sirmondum:
 observationes meas ut
 223. l. 17. Theodulfo *leg.* Theodulfum
 226. l. 30. sibi *leg.* tibi
 234. l. 5. MDCLXXV. *leg.* MDLXXV.
 240. l. 21. Fabricius *leg.* Fabricii
 l. 21. corrupta *leg.* corrupti
 258. l. 22. describendum *leg.* describendus
 258. l. 13. codicis *leg.* codices
 l. 33. Teutonicus *leg.* Teutonici
 279. l. 34. juxta meam *leg.* tantam
 222. l. 10. antea *leg.* aurea
 286. l. 15. Borremanni *leg.* Borremansii
 292. l. 15. defunctum *leg.* defunctus
 229. l. 23. edendarum *leg.* edendorum
 302. l. 19. auferre *leg.* offerre
 344. l. 30. meis *leg.* meos
 345. l. penult. attinet *leg.* attinent
 351. l. 35. ac *leg.* ad
 363. l. 29. bibliothecam *leg.* bibliotheca
 385. l. 18. CIOIOCLXXVII. *leg.* CIOIOCLXXVII.
 316. l. 22. sine *leg.* fine
 425. l. 17. Trajecti *leg.* Traiectini
 436. l. 16. videatur *leg.* videantur
 437. l. 3. sustineat *leg.* sustineant
 442. l. 2. faceris *leg.* faceres
 468. l. 22. Domesticequae *leg.* domesticaeque
 471. l. 11. quem *leg.* quae
 472. l. 14. praestantiae *leg.* praestantium
 474. l. 12. ingenio *leg.* ingenuo

Pag. 475. l. 5. bene te *leg.* bene de te
 479. l. 12. lucrum. *leg.* luctum
 482. l. 22. Favorinus *leg.* Favoritus
 493. l. 1. Flavium *leg.* Fabrum
 l. 36. esse *leg.* esset
 501. l. 27. prae *leg.* pro
 503. l. 10. duxit *leg.* duxi
 537. l. ult. nobis *leg.* vobis
 519. l. 20. Kalendas *leg.* Kalendis
 524. l. 26. quae *leg.* quas
 532. l. 39. adnotaram *leg.* adnotarat
 533. l. 6. facultus *leg.* facultas
 540. l. 2. paucos *leg.* paucos dies
 562. l. ult. testabar *leg.* testabatur
 563. l. 31. Stantinius *leg.* Santinius
 564. l. 34. nimis *leg.* minus
 572. l. 13. successu *leg.* secessu
 579. l. 19. feris *leg.* feriis
 593. l. 14. ptoficantur *leg.* profitentur
 606. l. 21. insurgeret *leg.* insurgere
 618. l. 31. orbatum, me ferre. Sane *leg.* orbatum me:
 Ferre fane
 627. l. 6. quaestu *leg.* questu
 628. l. 5. principue *leg.* praecipue
 636. l. 33. augustae *leg.* angustae
 646. l. 6. ingeniosissimas *leg.* ingeniosissimus
 661. l. 2. meae *leg.* mea
 663. l. 31. gessit *leg.* gestit
 675. l. 5. solat *leg.* colat
 l. 37. quae *leg.* qua
 681. l. 18. scateret hoc &c. *leg.* scateret. Et hoc qui-
 dem est, quod hactenus.
 l. 24. aut *leg.* ait
 687. l. 24. aequae *leg.* aegre
 700. l. 13. solem *leg.* soles
 l. 18. fecerim *leg.* feceris
 704. l. 10. imponeri *leg.* imponere
 706. l. 17. fide *leg.* fidem
 713. l. 11. Gallicum *leg.* Gallia cum
 715. l. ult. vivo *leg.* vico
 717. l. 9. on *leg.* ou
 737. l. 25. cognovere *leg.* cognovero
 752. l. 22. aulam *leg.* auram
 757. l. 30. retulit *leg.* retuli
 759. l. 6. judicavit *leg.* indicavit
 l. 30. utilitatis *leg.* utilitati
 765. l. 24. indicabo *leg.* judicabo
 768. l. 4. absenti *leg.* absentis
 776. l. 7. Joannus *leg.* Joannes
 777. l. 15. arbitror *leg.* arbitrabar
 780. l. 25. annotarem *leg.* annotaram
 786. l. 28. istum *leg.* istud
 795. l. 25. ingenti *leg.* ingenii
 806. l. 34. patria *leg.* patriam
 808. l. 4. facere *leg.* tacere

NUMERUS PLAGULARUM.

Tom. 1. continet.	97 Plagulas
2.	106
3.	109
4.	104
5.	108
Praefatio generalis.	3
2. Figurae dimidii folii faciunt.	4
Una parva.	1

faciunt 532 Plagulas

Plagulae singulae ad chalchos septem efficient summam	23 : 5 $\frac{1}{2}$
pro quibus jam solverunt tribus vicibus subscribentes	18 : -

5 : 5 $\frac{1}{2}$

Primae vero magnitudinis codices efficiunt summam	34 : 18 $\frac{1}{4}$
pro quibus solutum est tribus vicibus	27 : -

7 : 18 $\frac{1}{4}$

